


Iroaquerari Itioncacaantaqueca Aapani Irioshi:

Tsavetacoquerica Amajirote Jesoquirishito



New Testament in Caquinte (PE:cot:Caquinte)

Iroaquerari Itioncacaantaqueca Aapani Irioshi: Tsavetacoquerica Amajirote
Jesoquirishito

New Testament in Caquinte (PE:cot:Caquinte)

copyright © 2008 Wycliffe Bible Translators, Inc.

Language: Caquinte

Translation by: Wycliffe Bible Translators, Inc.

Caquinte[cot], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Caquinte

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-22

PDF generated using Haiola and XeLaTeX on 4 Mar 2019 from source files dated 14 Nov 2018

83ba253d-55c7-5686-b0d2-bfc8d1efc0d5

Contents

MATEO	1
MARICOSHI	73
IROCASHI	117
JOANCA	195
YANTAJIGUICA	243
IROMAQUITICA	302
1 CORINTOQUITICA	335
2 CORINTOQUITICA	365
GARASHIAQUITICA	384
EPESOQUITICA	395
PIRIPOQUITICA	406
COROSAQUITICA	414
1 Ts.	421
2 Ts.	427
1 TIMOTEO	431
2 TIMOTEO	439
TITO	445
PIREMONI	449
EVEREOJIA	451
SANTIAGO	475
1 PEERERO	483
2 PEERERO	492
1 JOANCA	497
2 JOANCA	504
3 JOANCA	506
JORASHI	508
Yonig.	511

QUENQUETSATSARENTSI OGANEJENCATATSICA ITIONCAQUECA MATEO

Antsatantaquemparoca

Ocatia iroguenti antsatantaquemparoca itioncaqueca Mateo itioncacotaquerigueti Jesoquirishito. Mateo iriguenti jorio guintenitanquitsica quepatsiqui icantajitica Garirea. Iriguenti itigarancane Jesoshi. Mateo ipajita aisa Irevi. Tequeratagueti incajemeriji Jesoshi iroguijatanaqueri, iriguenti amanaguequerica igonorogia imentaquit-sitepae cameetsaniji incapiocaqueneri majirontatsica Iromaquitica omperajiacarica joriojia. Irirajia tsatatsica iquenquejajiaque itioncaquero Mateo ocatia tsavetacoquerica Jesoquirishito ichoocatigueti quepatsiqui iguintenijiacagueti ichoviquijiani Ishiraeri. Tecatsi tsamajaterone ajagantsini itioncaqueroqueti, cotanquitsi chooca quenquejanquitsica arica itioncaquero ajagantsiniqui 70. (Oratica ajagantsi ivoaquegueti Jesoshi iro icantajitica ajagantsini 1.)

Mateo yonigaantaqueri Jesoshi iriotaque majirontatsica. Itioncaciaqueneri irapijoriojiateni intsajiaqueniji iriraquea Jesoshi irio itigarancaqueca Aapani Irioshi, irira icantajitica Meshiashi, iriotaque itsavetacotsitacaca tsavetantajiatsica coramani itioncaqueroqueti paperiqui icantajitica *Iroquetinica Itioncacaantaqueca Aapani Irioshi (el Antiguo Testamento)*. Oraquea ocanqueca otsapaqui 1.1 onetsanataquero icanquerica Aapani Irioshi irira Taavini aisa Averaameni choviquijianaquerica Jesoshi (Jen. 15.18; 2 Sam. 7.8-16). Mateo yonigaacajiri aisa Jesoshi irio tsatacaantantatsica.

Chooca 5 itsatacaacajica Mateo itsavetacotaquerigueti Jesoshi: (1) imajirontagueti Aapani Irioshi (capitotoqui 5-7); (2) icamantajiaquerica Jesoshi itigarancanejia taa opajita intsavetantajiaque intigarancajiaquerigueti (cap. 10); (3) iquejetacaacaca Jesoshi itsatacanquegueti (cap. 13); (4) itsavetacotaquero quero incojiaquempani quemisantajiaquerica Jesoshi (cap. 18); (5) itsavetacotaquero quero oncoguetanaquempani onteroncanajempagueti quepatsi aisa quero ococani oparianacagueti imajirontacagueti Aapani Irioshi (cap. 13-25).

Choviquijianaquerica Jesoquirishito

(Irc. 3.23-38)

¹ Imaicaquea nontioncacoguequeroqueate ipajiguetaqueti paesatinipaequitica choviquijianaquerica Jesoquirishito, ichoviquini Taavini aisa ichoviquini Averaameni.

² Iriraquea Averaameni irijanincari Ishaaco.

Irira Ishaaconi irijanincari Jacovo.

Irira Jacovoni irijanincari Joraa aisa iriguentijeguijiate.

³ Irira Joraani yoacaaquero Tamare, irijanintacari Parese aisa Tsara.

Irira Pareseni irijanincari Eserome.

Irira Eseromeni irijanincari Arame.

⁴ Irira Arameni irijanincari Aminaravo.

Irira Aminaravoni irijanincari Naasone.

Irira Naasoneni irijanincari Saramoni.

⁵ Irira Saramonini irijanincari Voose. Oratica iriniro opajita Iraava.

Irira Vooseni irijanincari Overi. Oratica iriniro opajita Iroti.

Irira Overini irijanincari Isai.

⁶ Irira Isaini irijanincari majirontatsica Taavi.

Irira majirontatsica Taavini irijanincari Saromoni. Oratica iriniro Saromonini iroguenti imanquigavetanica Oriashi.

⁷ Irira Saromonini irijanincari Irovoame.

Irira Irovoameni irijanincari Aviashi.

Irira Aviashini irijanincari Asa.

⁸ Irira Asani irijanincari Josapate.

Irira Josapateni irijanincari Jorame.

Irira Jorameni ichoviquivaetanaqueri Oshiashi.*

⁹ Irira Oshiashini irijanincari Jotame.

Irira Jotameni irijanincari Acashi.

Irira Acashini irijanincari Esequia.

¹⁰ Irira Esequiani irijanincari Manaseshi.

Irira Manaseshini irijanincari Amoni.

Irira Amonini irijanincari Joshiashi.

¹¹ Irira Joshiashini ichoviquivaetanaqueri Jeconiashi[†] aisa iriguentijeguijiate coramaniu icoraquecoraqueitashiquerigueti coaretajia Vavironiaquitica yashinta-jiacarigueti maasano ishiraerijia yaajitanaqueri Vavironiaqui oshequi.[‡]

¹² Iroompa iriraquea Jeconiashini irijanincari Saratieri.

Irira Saratierini ichoviquivaetanaqueri Sorovaveri.[§]

¹³ Irira Sorovaverini irijanincari Aviote.

Irira Avioteni irijanincari Eriaquime.

Irira Eriaquimeni irijanincari Asoro.

¹⁴ Irira Asoroni irijanincari Saroco.

Irira Saroconi irijanincari Aquimo.

Irira Aquimoni irijanincari Eriote.

¹⁵ Irira Erioteni irijanincari Eriasare.

Irira Eriasareni irijanincari Matani.

Irira Matanini irijanincari Jacovo.

¹⁶ Irira Jacovoni irijanincari Jose manquigataroca Maria. Iroatimpa iroguenti iriniro

Jesoshi icantajiqueca aisa Quirishito.*

¹⁷ Maasano tioncacojianquitsica ipajiguetaqueti ocaniqui icaravaeque 14 ipariapanajanta ichooaquegueti Averaameni yarejevaecaroquea ichooaquegueti Taavini. Ariquea iquempejiaca aisa icarajiaque 14 maasano tioncacojianquitsica ipajiguetaqueti ipariapanajantaroquea ichooaquegueti Taavini icaravaeque yaajitanaquerigueti Vavironiaqui. Iroompaquea ari iquempejiaca aisa icarajiaque 14 maasano tioncacojianquitsica ipajiguetaqueti ipariapanajantaroquea yaajitanaquerigueti Vavironiaqui icaravaeque ichooaquegueti Quirishito.

Ivoaquegueti Jesoquirishito

(Irc. 2.1-7)

¹⁸ Imaicaquea nontsavetacotantaqueriqueate Jesoquirishito queroca ocotacani iroaqueragueti ivoaquegueti. Coramaniquea ochooacque manquigarentsi pajitatsica Maria. Iriguentiquea cashiacaro shirampari pajitatsica Jose. Iroompaquea tequeratatirajatari quisho irogueroji ichooatashica irijanite, iriguentiquea choocatacaqueri Ishire Aapani Irioshi. ¹⁹ Iriraquea Jose inintaveca irovashiantajerome, iriguentiquea comajamajatanquitsica, cotanquitsiquea ipintsatacaroquea jero teeca irinintantempaji inquenquetsatacoqueroquea iroguipashiventajaquero, manaqueate iquenquejavetanacaquea irovashiantashitajemparo intati, aatoqueate icanti taa opajita irovashiantantanajemparoca. ²⁰ Cotanquitsiquea irooquea iquenquejavetanacaquea imaica, yonigaapojacariquea irashivantite Amajirote iguimaanequi, icanqueri: “Jose, ichoviquitanaqueca

* 1:8 Irira joriojia incanquegueti “iririni” iragavejaque incantacoqueri ivaesatinite. Acaniqui Mateo tee intsavetacoteriji maasano ivaesatinite Jesoshi, mana itioncacogarantaqueri. Pamenero 2 Coronica 21.4–26.23 itsavetacojitaquerigueti irijanite Jorameni pajitatsica Ocoshiashi (22.1), irijanite Ocoshiashi pajitatsica Joashi (22.11; 24.1), irijanite Joashi pajitatsica Amashiashi (24.27). Irira Amashiashini iriotaque iriri Oshiashi (26.1). † 1:11 Ichoviquivaetanaqueri Jeconiashi. Pamenero 2 Coronica 36.1–9 itioncacojitaquerigueti irijanijiate Joshiashi. Irira Joshiashi irijanincari Joacashi aisa Eriaquime. Iriatica Eriaquime ipajijitajiri Joashime. Irira Joashime irijanincari Joaquinini icantajitica aisa Jeconiashi. ‡ 1:11 Yaajitanaqueri Vavironiaqui oshequi, cotanquitsiquea aparopae choocaguetajatsi. § 1:12 Irira Saratierini irijanincari Peraiaishi iriri Sorovaveri (pamenero 1 Coronica 3.17–19). * 1:16 Quirishito. Iguenquetsatsarequi guiriegogia incanquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajatsica coramanitica intigarancaque Aapani Irioshi impeaquempaniji Imajirojiate maasano.

Taavini, aato pitsaroacagaro pimanquigatempo Maria. Aritarite iriraquea irijanite choocatanquitsica intsompogui iriguentiquea choocatacaqueriquea Ishire Aapani Irioshi, irootaquequeate ichoocantacaca. ²¹ Oncoajicatapojaquegueti irivoaquegueti pimpajitsitempari Jesoshi,† irioriji iriotaquequea meshiajiaquerineca igonorojia aatonijite icatsimatimentiritsiquea Aapani Irioshi icovaeguishecagueti.”

²² Ariquea oquejetaca imaica cameetsanijite onetsanamajaquempanijite icanqueca Amajirote paesatoniqui icantashirentaquerigueti tsavetantatsicani, icanque:

²³ “Ora majinaro ontsaraqitashitanaquempa, ariquee inchoocataquequea irijanite. Iriatimpa impajijiteri Emanoere” (ocanquequea: “Iconoajiacaji Aapani Irioshi”).

²⁴ Iroompaquea ipityaquirejanaji Jose iquemisanqueriqueate irashivantite Amajirote, iroompa ariquee yoanaque yaaquitiroquea Maria itsipatanacaro itsovironaquitequi.

²⁵ Cotanquitsiquea teequea quisho irogueroji arejevaetaca ivoaquegueti irijanite opariacaca. Ariquee ipajiqueri Jesoshi.

2

Savicaventajiguirica impoquirojite

¹ Oraquea ivoaquegueti Jesoshi Verenequi Joreaque chooca imajirojiate Joreajiaquitica pajitatsica Erorishi. Iroompaquea icoraquecoraqueitaquequea Jerosarequi shiramparipae icantajitica maagopae savicaventajiguirica impoquirojite intsatantajiaquem-paca taaca opajitapae. Iriatimpajia iquenaquenaipojaque isotoguigueti catsirincaiteri. Oraquea yarejerejeipojacagueti ² icoacojiapojiriquea choocajiatatsica ocantiqui icanqueri:

—¿Querocaquea ichoocaqueni oraniqui imajirote joriojia voanquitsica? Namenajiaqueriqueate irimpoquirote isotoashitapojacaquea ontaniqui isotoguigueti catsirincaiteri notsatantajiacaca voaque, nocoraquecoraqueitantajiacaca nogueroventajiaquempariquea noshineventajiaquitempariqueate.

³ Iroompaqueate iquemavaquegueti majirontatsica Erorishi, ariquee ishoshoguitevaetanacaquea, ariquate iquempejianaca maasanojia choocajiatatsica Jerosarequi. ⁴ Incajaranquiguitetanaquegueti, iriatimpa icajemacaantajiaqueriquea maasano saserorotejia anaantajanquitsica aisa tsatacaajiguirica joriojia itioncacotanaquea Moishishini coramani, icoacojiaqueriquea queroca oraniqui irivoaque Quirishitotanquitsica.* ⁵ Iriatimpajia icanquequea:

—Iroguenti irivoaque ontaniqui Verenequi Joreaque, ariquee icanque tsavetantatsica itioncacotaquerogueti coramani icanquerica Aapani Irioshi, icanque:

⁶ ‘Aviatimpa Verene† choocatatsica iguepatsitequi Joraani, aatoquea anajaigumpi otsipapae guinteninintsi iguintenijagueti oshequi Joreaqitica, irisotoampojempitarite majirontanquitsineca peanquitsineca Imajirote maasanojia ishiraerijia nashintajiacaca.’

⁷ Ariquate Erorishi santicoji yoaquero icajemacaantsitari maagopae, teequeate quericaca incamanque. Yarejerejeipojacagueti icoacojiaqueriquea icantajiaqueri:

—¿Querocaquea savincaguiteri pamentantajiacari isotoampojacaca impoquiro?

⁸ Iroompaquea iquemavaquegueti icamantaquerigueti itigarancajiaqueriquea Verenequi icantajiaqueri:

† 1:21 Jesoshi. Iroguenti iguenquetsatsare guiriego (Jesus), ari oquenapojaque iguenquetsatsarequi evereo, icanquequea Yeshua, ocanque: “Yamitacotantaque Yave”, “Yaantavaji Yave”, aisa “Imeshiantaque Yave”. * 2:4 Quirishitotanquitsica. Iguenquetsatsarequi guiriegojia icanquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempaniji Imajirojiate maasano. † 2:6 Iguenquetsatacaquero guinteninintsi Verene quejetaca iroguenti caquinte.

—Iintsijate poajianaque pamenamajaguequiterijate, iroompa pamenajiaquerigueti pincoraquetajeja pincamantajiapojajenaja cameetsanijite noanaquenijite naatimpa noguerovenquitempariqueate noshinevenquitempari.

⁹ Irooquee iquemajiaquerigueti yoayoaitanaquequea Verenequi. Iriraquea impoquiroyamenajiaqueca iroaqueragueti ontaniqui iguinteniqui ijivaqueriquea iroompaquea iquishojencatapojuquea otampaticataquegueti tsovironaqui ichoocatacotantacaca Jesoshi. ¹⁰ Oraquea yamenajajirigueti impoquiroya, ariquea icohicoitanaca ishinejianaca icanca. ¹¹ Iroompaquea yarejerejeipojocarogueti tsovironaqui iquijaquijaitanaquequea intsompogui inejajiapojiriquea Jesoshi, otsipatacari Maria, iriniro. Igueroventajiapojacariquea ishineventajiapojacari. Iroompaquea itanarejacoguetapojiro yamajiaquerica yojocajiaqueneri ooro, casancavaneri, aisa otsipa casancari icantajitica mira. ¹² Iroompaquea imaajiaquegueti icamantajiqueri iguimaanequi aatonijite yoayoaitanajitsiquea Erorishiqui, irootaquequea iquenapitsatantajanajarica otsipaqui quenavoquirontsi, yoayoaitanaji iguinteniqui.

Jose ishiacaanacari Jesoshi ontaniqui Ejepitoqui

¹³ Iroompaquea yoayoaitanajigueti iriatimpajia, iriraquea irashivantite Amajirote yonigaapojacari Jose iguimaanequi, icantiriquea:

—Iintsija imaica pincatianaqueja paanaqueriquea chaajaniquitirajaca aisa iriniro poanaqueshiatsi pishianaqueshiatsi ontaniqui osamani Ejepitoniqui. Pinchoocateja ontaniqui aapojajempaguetiquea noncantantajempica pincoraquetantajempaca, irame-nacaantaguequeritari majirontatsica Erorishi irimetojacaanqueriniji.

¹⁴ Ariqueate icatiapanajanta, yaanaqueriquea chaajaniquitirajaca aisa iriniro, yoanincanaquequea pitsecariqui yoayoaitanaque Ejepitoqui. ¹⁵ Ichoocaguitiniquea ontaniqui aapojaguetiquea imetojanajigueti Erorishi. Ariquea iquempejiaca imaica cameetsanijite onetsanamajaquempanijite icanqueca Aapani Irioshi coramaniqui itioncacaquerica tsavetantatsica icanque: “Ichoocavetaca Irijani Ejepitoqui, nocajemajiri.”[‡]

Erorishi imetojacaantajiaqueriquea chaajaniquirijia

¹⁶ Iroompaquea iriraquea Erorishi yamenaquegueti teequea incoraquejiaje maagopae icatsimatsitanacaquea, ariquea itigarancajiaqueri coaretajia irimetojajiaqueriquea maasano chaajaniquirijia guinteninjianquitsica Verenequi irioca aisa guinteninjianquitsica irooshiguetanquitsica, interoncajiaqueriquea maasano iriaqueraca voaguetanquitsica irarejevaequempariquea incaravaequeriquea ajagantsitacojiananquitsica mavite. Iroguentiquea ipampiatsitaqueri icantajiaqueca maagopae ivoantacaca. ¹⁷ Ariquea iquempejiaca imaica inetsanajitaquero itioncacotanaqueca coramani tsavetantatsica Jeremiashini, icanque:

¹⁸ “Iquemajiquero ontaniqui Iramaqui
ocajemavaequequea, ocantacoguitani iraaguitani,
iroguenti ochoviquijiani Iraquereni, iracoguitiriniquea irijanijiate.
Tee oninteji iroguishinejajitajero,
teetari inchoocajiajeji irijanijiate.”

¹⁹ Ocoramanitapojaquegueti imetojanajigueti Erorishi, iriraquea irashivantite Amajirote yonigaapojajari Jose iguimaanequi ontaniqui Ejepitoqui, ²⁰ icanti: “Iintsijate imaica pincatianaje paanaquerija chaajaniquitirajaca aisa iriniro, poanajequea ontaniqui Ishiraeriqui, metojanajitari nintajavetanquitsica irimetojajiaquerimequea.”

²¹ Ariquea icatianaja, yaanajiri chaajaniquitirajaca aisa iriniro, yoanaji Ishiraeriqui. ²² Cotanquitsiquea iquemacoqueriquea Arequerao irijanite Erorishini ipejaaquea majirontatsica Joreaqi iquempetajari iririni, ariqueate icotanaca itsaronaquequea teequea irininteji iroanajequea ontaniqui. Iroompaquea icamantajitiri iguimaanequi aatoniji yoanaji ontaniqui, irootaquequea yoantanajaca Garireaqi.

²³ Yarejetapojajaroquea ontaniqui ichoocatantapojajaro guinteninintsi icantajitica Nasare. Ariquea iquejetaquerogueti imaica onetsanatanaca icantaguetaqueca tsavetantajatsica, icanquequea: “Incantajiteri Nasarequitica.”

[‡] 2:15 Icantsitacaroquea Aapani Irioshi coramaniqui tequeratagueti aguempaji, cotanquitsiquea icanquero quejeta avisanaque. Os. 11.1.

3

Joanca Viñacajatantatsica itsavetantavaequequea oquitamampororoitapojaquegueti
(Mr. 1.1-8; Irc. 3.1-9, 15-17; Jn. 1.19-28)

¹ Aapojacagueti savincaguiteri yoanaquequea Joanca Viñacajatantatsica itsavetan-tavaequequea ontaniqui oquitamampororoitapojaquegueti Joreaqui, ² icanque: “Pin-cantashitatijaianaquempaja povashiantajianaquerojate pipeacaaguishetaca, irooshipo-jitarite aapojaquempaquea irimajirontaquempa acaniqui Inquitequitica.”

³ Iiraquea Joanca iriotaque itsavetacotaqueca tsavetantatsica Isaiashini coramani, icanquequea:

“Inquenquetsataquequea oquitamampororoitapojigueti iririjencani, incanquequea:

‘Pinetsanatahijiavaquempari Amajirote inquenantapojempaca,

pintanarejagueteneri iguenaovoquiropae ontampaticapoquitantanaquempaca.’ ”[☆]

⁴ Iroguenti iquitsaataca Joanca quitsaarentsi ipeacaajitacaca imae cameyo, aisa ichompimashitacotacariquea imeshinatsa. Iriguentiquea ishecataca quejevetarica shapiipiikuti aisa earotoja. ⁵ Iroompaquea yoayoaitashitanaqueri icaramirincavae-tanaquequea caquinteja guinteninitantaroca Jerosarequi, iriguentijiaca itsipajia Jore-aquitica, iriguentijiaca aisa irooshitacojiacaroca ojaaquiniqui pajitatsica Jororane. ⁶ Irooqueate iquemajiapojaquerigueti, ariqueate icohicoitanaca itsaveacojianaquero-quea maasanopae igovaeguisherejia, ariquea iviñacajajiaqueriquea Joanca Jororanequi.

⁷ Ariquea icoraquejiavetaca oshequini pariseojia, aisa saroseojia iviñacajatantaque-gueti. Cotanquitsiquea yamenajiavaquerigueti, icantajiavaqueri: “¡Quejejiaguempiquea irijanijiate sanatari! ¿Taate cantajiaquempi picoraquecoraqueitancacaca ocaniqui noviñacajajiaquempiquea aatonijite icatsimajiguimpiquea Aapani Irioshi oncoraman-itapojajegueti incatsimatimentajiaquerigueti maasano igovaeguisherejia? ⁸ Iintsijate pinquempetajemparo inchato oitsoquitananquitsica cameetsa, pinetsanamajajianaque-mpaja iramenajiaquempinijite maasano arimajaca picantashitatijaianaja povashianta-jianajiro pantaguishejiavetacaca. ⁹ Aatoja picantajigui: ‘Aatoqueate icatsimajigana Aapani Irioshi, naroguentitari ichoviquijiani Averaameni.’ Pamenajigueroja oratica mapiporoqui. Irininquegueti Aapani Irioshi iragavejaquequeate impeacaajajemparo-quea ichoviquivaejianaqueca Averaameni. ¹⁰ Jac, yaajitiro poshontyo, itsitijitanaquero inchaquijitaquero ovari maasano inchato teeca oncameetsateji oitsoqui, ariquea intajai-quero paamariqui.

¹¹ “Naatimpa iroguenti nantaque noviñacajatantajiaquempiro oja iramenan-tajiquemparoca arimajaca picantashitatijaianaca povashiantajianajiroquea pipeacaaguishetacaca, cotanquitsiquea incoraquepoje impoitapojenaneca caaviji yanaaquenaquea yagavejamajati. Ooshiatsi, aatotarite noquempejitaritsiquea iriatimpa nompeaquempame amiquerineca aitaniquerineca igaviguitire. Iriatimpa inquempetacaantaquemparo iroviñacajatantajiaquempiri Ishire Aapani Irioshi aisa paamari.* ¹² Incoraquepojaquegueti iroashiguetajempariquea queri tsaromentamajacarica. Inquempetanaquemparoquea aguerogueti oitsoqui,

asagorejitemparo, ampishoncavaqueroquea oncoraquejencaquegueti chovigajenca, aanaqueroquea osagoma, oveguiseanaquempa oitsoqui. Aguijaavaqueroquea shimatoqui anquempoguijitemparoquea. Oraquea osagoma antaitemparoquea. Ariquea inquempetaquempaquea Amajirote incapiocajiapojaqueriquea tsaromentamajacarica intsipatsipaitanajempari jenoqui ichoocatigueti Aapani Irioshi. Iiraquea teeca intsaromentajiguempariji intigarancaqueriquea camorecariqui teeca ontsivacavaete, incoquempaniquea irantsipevaejiaquempaquea.”

[☆] 3:3 Is. 40.3. * 3:11 Paamari oquenquetsatacotaquero mavitepae. (1) Pamenero otsapa 12 acaniqui ocantacoqueroqueti camorecari intaantajitaquempaca caarica netsanatiro ininqueca Aapani Irioshi. (2) Pamenero aisa Ya. 2.3 ocantacoqueroqueti icoraquepojaquegueti Ishire yamenajiquero quejevetaca paamari. (3) Pamenero aisa 1 Co. 3.13 ocantacoqueroqueti iramenantajitaquemparogueti yantaguetaqueca maasano caquinte.

Iviñacajiqueri Jesoshi
(Mr. 1.9-11; Irc. 3.21-22)

¹³ Iroompaquea iquenapojaque Jesoshi Garireaqui yoanaque Jororanequi ichooaquegueti Joanca cameetsaniji iriviñacajatavaqueri. ¹⁴ Cotanquitsiquea teequea irinintavetempaji Joanca iriviñacajateri, icantavaqueri:

—Cameetsa aviguenti viñacajapojenane naatimpa. ¿Arimajampa picoraquetashiquena naatimpa noviñacajatempi?

¹⁵ Icanque Jesoshi:

—Aritaunqueate onquejetaquempaja imaica cameetsanijite anetsanajiaqueronijite maasano ininqueca Aapani Irioshi.

Ariquea icanquequea Joanca:

—lintsijate.

¹⁶ Ariquea iviñacajataqueri. Iroompaquea yarejepojatigaro Jesoshi otsapijaqui, ariqueate ocotanaca otanarejanacaqueate inquite, yameniriqueate yampiguiricashipojacariquea Ishire Aapani Irioshi iquejetapojacariquea emoreni. Yagatapojaque.

¹⁷ Iroompaquea iquenquetsajenajitanaque jenoqui inquitequi, icanque:

—Iricatica irio Irijani nopintsamajatacaca, noshineventamajatacari.

4

Inintavecaquea ampatsini irantacaaquerime Jesoshi teeca irininteji Aapani Irioshi
(Mr. 1.12-13; Irc. 4.1-13)

¹ Iroompa iriraquea Ishire Aapani Irioshi yaanaqueriquea Jesoshi osamani oquitamampororoitapojaquegueti cameetsanijite iramenamajaquerinijite imajirote ampatsini arica iragavejaque irantacaaqueri teeca irininteji Aapani Irioshi. ² Ariquea ichooaque oraniqui 40 savincaguiteri, teequea irishecatempaji. Arimpa itaseamajatanaque.

³ Ariquea iquempejipojacari irira nintatsica incovaeguishetacaante, icantiriquea:

—lintsija arimajaguete aviguentica Irijanite Irioshi iintsijate pincanteroja ocativa mapi ompeanaquempata pan pishecataquempaca.

⁴ Cotanquitsiquea Jesoshi icantiriquea:

—Choocatarite otioncacocaguete ocanque: ‘Teequea aparo ontampishitacaanteji ishca caquinte, jero aisa maasano icanqueca Aapani Irioshi.’

⁵ Iroompaquea ariquea yaanaqueriquea Jerosarequi, oratica guinteninintsi yashincaca Aapani Irioshi, icatiacaapojacariqueate teemporoqui* itsarorentantajitarica Aapani Irioshi ochoviinatapojacaguete ocaravaequequea jenoqui ocanca, icanqueriquea:

⁶ —lintsija arimajaguete aviguentica Irijanite Irioshi, iintsijate pisapocanaquejate isaviji, ocanquetari itioncacojiqueroguete ocanque:

‘Intigarancajiaquempiri Irioshi irashivantijitete, quisho iroaroaitanaquempi.’

‘Irajiricanaquempiquea irantsomajanaquempi aatonijite pitsitincapojaro mapi.’

⁷ Icantsitanaca Jesoshi icanqueriquea:

—Cotanquitsiquea choocatarite itioncacojiqueroguete aisa ocanquequea: ‘Aatoquea pamenantaritsi Majirontamajatatsica Pirioshite.’

⁸ Iroompaquea yaanaqueriquea otsempiqui jmm agasataanquitsica yonigaaguetaqueri maasanopae quepatsi yashincaca majirontaguetsica aisa maasanopae yashintajiacaca. ⁹ Icanqueriquea:

—Ariguetija pogueroventuena pintsarovenquena, nojocaguetaquempiroquea maasanopae pamenaguetaqueca imaica.

¹⁰ Icantsitanajaquea Jesoshi aisa icanqueri:

—Pijatequetiroshine, Satanashi, choocatarite otioncacaguete ocanquequea: ‘Pintsarorentaquemparija Majirontamajatatsica Pirioshite, aparoqueate iriguenti pimajirontamajaquempa.’

* 4:5 teemporo. Oratica teemporo iroguenti inirojegui tsovironaqui choocatatsica Jerosarequi. Iriro jorioja iroguenti itaantapinitantarica viratsipae intsarorentantajiaquemparica Aapani Irioshi. Pamenero ovaantorite otsapaqui Mt. 21.23.

¹¹ Ariquea yoanaji imajirote ampatsini. Irioquea coraquecoraqueitajatsi irashivanti-jitete Aapani Irioshi yamitacojiapojajiri.

Iparianacaro Jesoshi itsavetantavaetaque Garireaquei
(Mr. 1.14-15; Irc. 4.14-15)

¹² Iroompaquea iriraquea Jesoshi iquemacoquerigueti Joanca isantanatacojitaqueri, yoanajiquea Garireaquei. ¹³ Cotanquitsiquea teequea inchoocatantajemparoji Nasare, iroguentiquea yoantanaja Caperenao iriguintenitapojajemparo. Oraquea Caperenao iroguenti ochooqueue otsapijaqui iniromotijaqui. Iroatimpa iroguenti ochooqueue iguintenijiacagueti ichoviquijianaqueca Savoroone aisa Nepetari. ¹⁴ Ariquea iquejetaca imaica cameetsanijite irinetsanajiqueroniijite itioncacotanaqueca tsavetantatsica Isaiashini coramani, icanque:

¹⁵ “Oraquea iguepatsite Savoroone aisa iguepatsite Nepetari, choocatanquitsica intatiqueroqui Jororane, iquenaquenaitantajiacarorquea yoayoaitantapinicarogueti inirojani quantijani: Garirea inchoocatantajiacaca oshequini teeca irijorijoigueji.

¹⁶ Irirajia pitsecacojiavetanquitsica inejajiaquero tsirencari tsirencavaetanquitsica; irirajia guinteninijianquitsica otsimancacojiavetarigueti metojagantsi otsirencaguitetacojiaqueri tsirencari.”

¹⁷ Ariquea iparianacaro Jesoshi itsavetantavaetaque, icanque:
—Pincantashitatijaijanajempaja povashiantajianajerojate pipeacaaguishetacaca, iroo-shipojitarite apojaquempaquea irimajirontaquempa acaniqui Inquitequitica.

Jesoshi icajemajiaqueri 4 tarajajiatsica impeacaajiaquempari itsatacaanejia
(Mr. 1.16-20; Irc. 5.1-11)

¹⁸ Iroompaquea yoanaquequea Jesoshi oraniqui ishitaravijatanacaro otaravijaqui iniromotija Garirea. Inejajiapojiriquea Shimo (icantajitica aisa Peerero) itsipatacari iriguentijeguite pajitatsica Antirishi, tarajajiaquequea, irootaquequeate isavicaventa-jiguiquea iriatimpajia. Ariquea icantiri:

¹⁹ —Jame poguijaguijaitanaquenajate, imaicaquea irioquea pimpitsocashijianaque-mpa caquinteja, nagavejacaajiaquempiquea pinquejetacaajiajempari shima panquitacojiguirigueti.

²⁰ Iroompaquea iriatimpajia yojocapanajantiroquea imantsatsitepae yoguijaguijaitanaqueri.

²¹ Yoayoavetanaca tiijacoñaji ontaniqui irioquea yamenapojiquea Santiago† aisa iriguentijeguite pajitatsica Joanca savisaviitaque quenajarontsiqui inetsanajiaquero-queate imantsatsitepae. Itsipatsipaicari iriri pajitatsica Severo. Iroompaquea iriraquea Jesoshi icanqueriquea Santiago aisa Joanca:

—Jame poguijaguijaitanaquenaja.

²² Taampina yojocajianaqueroquea quenajarontsi aisa iriri, yoguijaguijaitanaque-riquea Jesoshi.

Jesoshi itsatacajiaqueri quea icaramirincavaequequea caquinteja
(Irc. 6.17-19)

²³ Iroompaquea yoanaquequea Jesoshi itsitacaguetejanaquero Garirea itsatacaan-tavaetanaque shinagogapaequi icapiocantajiacaca joriojia, itsavetantaquero Quenquet-satsarentsi Oganejencatatsica icantajiaqueri quero icotani imajirontaguete Aapani Irioshi. Aisa yogueshiguequeriqueate oshequini joquijiguetanquitsica aaguequeriguete cantashitaijencaguetanquitsica ashinoncajagantsipae, aisa catsijianquitsica, jac peamajianajaqueate. ²⁴ Iroompaquea irirajia guinteninijianquitsica osamanipaequitica Shiriaqui iquemacojianaqueriiguete yogueshitantaguetanaque jero yamajiaipojaquener-iquea maasano ashinoncajijanquitsica. Iriatimpajia iroguenti icantashitatieguecaquea

† 4:21 Santiago. Iguenquetsatsarequi guiriego ipajita Iakobos. Iconoagarantaca quimajareri yoguipitsocaqueroqueti ivajiro ipajitaqueri Santiago, itsipa ipajitaqueri Jacobo. Mavite oponeca iguenquetsatsarequi evereo, ipajitaqueri Yaakob.

icanca iconoaca yatsipevaetani oshequi. Itsipa iroguenti imetojapinitaquito icantapinitaquito tinquininini, itsipapae teeca ironquempaji, cotanquitsiquea iriatimpa yogueshiguetajiriquea maasanopae. Aisa yoguisotoacoventajajiri ishaquiajiacarigueti ampatsinipae. ²⁵ Iroompaquea yoguijaguijaitanaqueriquea icaramirincavaequequea caquinteja quenaquenaitapojanquitsica Garireaqui, Tecaporishiqui, Jerosarequi, Jore-aqui irooca aisa quenaquenaitapojanquitsica intatiquero Jororane, icaramirincajiaque.

5

Itsavetantaquequea Jesoshi niganquitantanaqui

¹ Iroompaquea yamenajiaquerigueti Jesoshi maasano capiocaventajiacarica icaramirincavaequequea oraniqui, itoncoanaque isavicaquequea niganquitantanaqui, ariquea iquempejijapojacari itsatacaaneja iquemisantajiaqueriquea. ² Ariquea itsatacajaia-queri icantajiaqueri:

*Queri shinetavajatsineca**(Irc. 6.20-23)*

- ³ “Caavijiquea irishinevaequempa maasano tsatanquitsica ishirequi tee iragavejama-jatempaji,
iriguentitari intsipajiaquempa Inquitequitica imajirontagueti.
⁴ Caavijiquea irishinevaequempa maasano shimampojancajianquitsica,
iroguishinejajiaqueriquea Aapani Irioshi.
⁵ Caavijiquea irishinevaequempa maasano teeca iraventacojiguempaji,
irojocajitaqueneritari maasano quepatsi.
⁶ Caavijiquea irishinevaequempa maasano nintamajajiatsica incomajamajajiaquempa
inquejetemparigueti taseatsica aisa miretatsica,
iragavejacajiaqueritari irinetsanajiguero ininqueca quejetaca inquemempagueti.
⁷ Caavijiquea irishinevaequempa maasano pintsatacotantajiatsica,
impintsatacojitaquemparitari.
⁸ Caavijiquea irishinevaequempa maasano comajashirentajiatsica,
iriojiatari amenerineca Aapani Irioshi.
⁹ Caavijiquea irishinevaequempa maasano gameetsantajiajerineca igonorolja,
incantacojiqueritari: ‘Iriojia irijanijiate Aapani Irioshi.’
¹⁰ Caavijiquea irishinevaequempa maasano irantsipetacaajiquemparigueti incatsimati-
mentajiaquerigueti incomajamajaquempagueti,
iriguentitari intsipajiaquempa Inquitequitica imajirontagueti.
¹¹ “Caavijiquea pishinevaejiaquempa pamenajiaquegueti incantaguishejiaquempi,
incatsimacatsimajiaquempigueti, aisa intosojeventajiaquempigueti iramenajiaquem-
pigueti pitsaromentajiaquenaquea naatimpa. ¹² Pamenajiaquegueti inquejejaquem-
pigueti imaica pishinevaetanaquempaja, pitsajiaque incavintsajamajataquempiquea Aa-
pani Irioshi oncoramanitapojajegueti ontaniqui inquitequi. Ariqueate iquempejitaqueri
tsavetantajiatsica choocajiaatsica coramanipaequitica yatsipetacaajiacari catsimajiaque-
rica.

*Tsaroventajiatsica iquempejiacaro incachoane**(Mr. 9.50; Irc. 14.34-35)*

¹³ “Aviatimpajia conoajigarica quepatsiquitica piquempejiacaro incachoane. Cotan-
quitsiquea ariguetaija omasancategueta, ¿querocampate incojitajeroni incachoanetanta-
jitajemparo? Aatoquea inintajitajiro, manaquea impishoncajiqueroquea intati, iragati-
gatijitaquero intati.* ¹⁴ Aisa aviatimpajia quempejiaquempi tsivotacojiguirica maasano
caquinteja. Pamenajiguirotarite oratica tsovironaquipae impeacajaitemparogueta ot-
sempiqui incapiocajiterogueta oshequiavaetanaque oncanquempa, ¿arimpate aatoquea

* 5:13 Ari aquejejiaca aatimpajia tsaroventajigarica Aapani Irioshi, anconoaquemparigueta antaguetiroca cov-
aeguisherentsi antsatacaajiaqueriquea aatosaconaniji icovaeguishesjiga. Cotanquitsiquea arigueta avashiantanajero
atsaroventariogueta ¿querocampate ancojiaquempani antsatacaajiajerigueta? Manaquea anquejetanaquemparo inca-
choane omasancategueta, aatoquea inintajitajiro.

yamenajitirotsi? Iramenajiqueroquea, onconijavaeque. ¹⁵ Ariquea iquejetaca aisa tsi-vorentsi itsivojitirigueta teetarite ariquea iroguivotacojiteriji chomoqui, iroguenti yogu-isavicacojitiri jenoquijaniqui cameetsanijite intsivotanaquenerinijite maasano choocajianquitsica tsovironaqui. ¹⁶ Ariqueate pinquempejiaquempa aviatimpajia pincomajamajiaquempaja pimpeacaajiaquemparo cameetsaguetatsica cameetsanijite iramenajiaquempigueta maasano, ariquea irishineventamajianaquemparinijite Piri choocatatsica inquitequi.

Jesoshi icanque onetsanamajaquempa itioncacaanqueca coramani Aapani Irioshi

¹⁷ “Aato pijijiguitsi iroguenti nocoraquetashitaque novashiantacaajempiro piquemisantirogueta itioncacotanaqueca Moishishini irooca aisa itioncacotanaqueca tsavetantajiatsica coramani, teetarite irooquea noncoraquetashiteji, iroguentiquea nocoraquetashitaque onetsanamajaquempianiji maasanopae icantajiaqueca. ¹⁸ Arimajaca noncamantaquempi: aatotaqueti opeitsita inquite aisa quepatsi, aatoquea opegatsi apaitsoquijaniqui Itioncacaantaqueca Aapani Irioshi, onetsanamajatanauempaquea maasanopae icanqueca. ¹⁹ Quericaca teeca irinetsanamajateroji maasanopae icanqueca Aapani Irioshi, aisa intsatacaajiaqueriquea itsipapae inquejejianauempaja iriatimpajia, oncoramanitapojajegueta irisavijisavijitapojajequa inquitequi imajirontacagueta Aapani Irioshi, itsipajia iranaantapojequa. Cotanquitsiquea iriraquea netsanamajaqueroneca, aisa intsatacaajiaqueriquea itsipapae inquempejianauempaja iriatimpa irinetsanamajajianaqueroquea, caaviji iranaavaepojaje ontaniqui inquitequi. ²⁰ Nocantantajiaquempica imaica aatogueta picomajamajajiga, aatogueta panaacojiguiiri tsatacaantajiguiroca itioncacotanaqueca Moishishini aisa pariseojia, icomajamampeajiacagueta, aatotarite pagavejitsi pinquijanaque imajirontagueta Inquitequitica.

Jesoshi itsatacaantaqueroquea aatonijite icatsimatantajititsi

(Irc. 12.57-59)

²¹ “Pitsajiaqueroquea icantajitiri pivaesatinite: ‘Aatoja pimetojanti, maasano metojantajianquitsineca irantsipetacamentajiquempari yantaqueca.’ ²² Cotanquitsiquea naatimpa noncantajiaquempi quericaca catsimataquerineca igonoro inquejetacajitaquempariquea iriatimpa oncoramanitapojajegueta irantsipetacamentajiquempari yantaqueca. Aisa quericaca cantiquerineca igonoro: ‘Aviatimpa tee pintsatimateji’, irajitanaqueriquea majirontatsicaqui incatsimajitaqueriquea. Cotanquitsiquea iriraquea cantiquerineca itsipa: ‘¡Aviguenti covaeguisher!’ shoshoh itsigatsi camorecariqui.

²³ “Irootaquequea nocantantajiaquempica poapoaitanaquagueta teemproqui it-sarorentantajitarica Aapani Irioshi paanaquagueta pivira pijitorejacaantaquenerigueta aretarequi, ariquea taampinagueta pinquenquejapojaqueroqueta pincanque: ‘Choocitari icatsimatimenquenaca nogonoro’, aatotajate pijitorejacaantiritsijate. ²⁴ Manaquea pojoquijipanjanteritaja oneguitapojacagueta aretare, poapanajantetaja pogameetsatapanajanteritaquea pigonoro. Iroompa ariquea poashitanajeriqueate pivira pijitorejacaantaqueneriquea Aapani Irioshi.

²⁵ “Incatsimaquempigueta pigonoro irinintavequempagueta iranaquempiquea jivatatsicaqui irisantanatacotacaanquempi, pinquenquetsatacaanajerija quenavouquirontsiqui pogameetsatanajeri taampina aatonijite yaguimpi. Arigueta iranaquempi jivatatsicaqui joesequi iriotaque cajemaquerineca coareta, iriraquea coareta manaquea irapanajantempiquea irisantanatacotsitempi. ²⁶ Arimajaquea aatogueta povegaramajatajiri catsimataquempica maasanopae paacotaquerica, aatoquea yoguipaquijajimpitsi santanatacoquempica.

Jesoshi itsatacaantaqueroquea aatonijite yoashijitirotsi manquigarentsi

²⁷ “Aviatimpajia pitsajiaquerotarite icantajitaquero paesatoniqui: ‘Aatoja poashitirotsi manquigarentsi.’ ²⁸ Cotanquitsiquea naatimpa noncantajiaquempi quericaca nevequemparoneca manquigarentsi, quejacaquea yoashitaquero, iquenquejaquerotarite yamenaqueroqueta. ²⁹ Nonquejetacajiaquempiroquea imaica: arigueta oncovaeguisheritacaaquempi poquijamajaca pinquitsorejaquempaja pimishoncaquero. Cameetsavaequeate pimishoncaqueroqueta covaeguisheritacaaquempica

pinetsanatimentanajempanijite. Aatoguettarite pipishonquiro jatanatsitarite oncovaeguishedacaajempi, iroompa pimetojanajegueti impishoncajitaquempiqueate camorecariqui. ³⁰ Aisa iroogueti covaeguishedacaquempine pacomajaca ariqueate pincarataquero pimpishonquitsitemparo. Cameetsavaequequeate pimpishoncaquerogueti covaeguishedacaquempica pinetsanatimentanajempanijite. Aatoguettarite pipishonquiro jatanatsitarite oncovaeguishedacaajempi, iroompa pimetojanajegueti impishoncajitaquempiqueate camorecariqui.

Icanque Jesoshi aatoja quericaca ovashiantirotsi imanquigare
(Mt. 19.9; Mr. 10.11-12; Irc. 16.18)

³¹ “Aisa icantajitironi paesatoniqui: ‘Quericaca nintanquitsineca irovashiantanajero imanquigare, irojocaqueneroja paperi oncanque: “Imaica novashiantajiro nonmanquigavetacaca.”’ ³² Cotanquitsiquea naatimpa noncantajiaquempi quericaca ovashiantaqueroneca imanquigare apaniro oaquerica, arigueti omanquigatajempagueti itsipa jac icovaeguishedacaacaro, omanquigatajatarite itsipa teeca irio omanquigaremajaca. Ariquea iquejetaca quericaca manquigataquemparoneca yovashiantajitica jac icovaeguishedaca.

Jesoshi icanque: Aato picantashita

³³ “Aisa pitsajiaquerotarite icantajitaqueri paesatoniqui: ‘Aatoja pitsojega. Aato picantashita intati: “Incatsimatimentenarota Aapani Irioshi aatogueti nonetsanatiro nocanqueca.”’ Arigueti pincantero, pinetsanamajateroja maasano picanqueca.’ ³⁴ Cotanquitsiquea naatimpa noncantajiaquempi aatoja pitsojeimatatsi aatonijite oavetanaque pinintajiguetsi pincantajigue: ‘Incatsimatimentenarota Aapani Irioshi aatogueti nonetsanatiro nocanqueca.’ Aisa aatoja piquenquetsatacojiguirotsija inquite, aato picantajiguetsi: ‘Nontsojeaquempagueti ompeguempata inquite’, iroguentitarite imajirontamento isavicantacaca Aapani Irioshi. ³⁵ Ari oquejetaca quepatsi, aatoja piquenquetsatacojiguirotsi, aato picantajiguetsi: ‘Nontsojeaquempagueti ompeguempata quepatsi’, iroguentitari ivanqueguititacaca. Aisa aatoja piquenquetsatacojiguirotsija Jerosare, aato picantajiguetsi: ‘Nontsojeaquempagueti ompeguempata Jerosare’, iriguentitari ashincaro Majirontamajatatsica. ³⁶ Aisa aatoja picantajigui: ‘Nontsojeaquempagueti nonquitamaromaetanajeta’, teetarite pagavejajigueji aviatimpajia pinquitamaromaejigueroji irooca pinquisaamaetacaajero apamaerotica pima. ³⁷ Aatoja piquejetacaajigarotsi, manaquea pincantajigue: ‘Jeeje’, irooca manaquea pincantajigue: ‘Tee’. Oraquea iroguentica pinquenquetsatacojiaque quejeguetaacaroca imaica cameetsanijite inquemisantajiaquempinijite itsipapae, manaquea oquenantapojacari ampatsini icantajitica covaeguisheru.

Jesoshi icanque aatoja pipigatari catsimataquempineca
(Irc. 6.29-30)

³⁸ “Aviatimpajia pitsajiaquerotarite icantajitiro paesatoniqui: ‘Quericaca tyaquisaatantantquitsineca ariqueate inquejetacaajitaquempariquea iriatimpa intyaquisajaitaqueru. Aisa quericaca jararejitsiquerineca iraji, ariqueate inquejetacaajitaquempariquea iriatimpa irijararejitajiqueriquea iraji.’ ³⁹ Cotanquitsiquea naatimpa noncantajiaquempi aatoja pipigajigaritsija catsimataquempineca. Quericaca capojaquempineca pivoroqui pimpitsocanaquempaja inquejetacaquemparo otsipavoroqui. ⁴⁰ Choocagueti nintanquitsineca iraanquempi jivatatsicaqui iraitsiquempironiji piitsaare intsompoguitica, pishinetsitempariqueate aisa piitsaare jenoquitanquitsica. ⁴¹ Choocagueti aanaquempineca iromperaquempiguetsi incanquempi: ‘Pinquijanaquenarolja ontaniqui’, poavaetanaquequea panaavaetanaquequea icanquempica poavaequiteneriquea osamani. ⁴² Quericaguetsi amanaquempineca taaca opajita, pojocaqueneriquea. Aisa quericaca cantaquempica: ‘Pojoquenaja ocatica, noguipiajatempiroitari coajica’, aato pipitsocapitsatari.

Ampintsataquemparija catsimatacajica
(Irc. 6.27-28, 32-36)

⁴³ “Piquemajiaquero icantajiqueca: ‘Pimpintsataquemparija pigonoro pincavintsajaquerijate, pisemaquempari catsimataquempica.’ ⁴⁴ Cotanquitsiquea naatimpa noncantajiaquempi pimpintsataquemparija catsimajiaquempica.† Aisa pamanacoventajiaquerija maasano atsipetacaajiaquempica. ⁴⁵ Pinquejejaquempaquea imaica pinquempetimentajiaquempariniji Piri choocatatsica inquitequi. Quempeca iriatimpa ivoreguirigueti catsirincaiteri cameetsanijite irivoreacojiaquerinijite maasano caquintejiatsica, irioca cameetsajiatsica aisa teeca incameetsajigueji. Ariqueate oquejetaca incani iroatimpa itejiniri maasano, comajamajajiatsica aisa covaeguishejiatsica. ⁴⁶ Noncantajiaquempi aparogueti iriatimpa pincavintsajajiaque cavintsajimpica, ¿arimpate irishineventsiquempiro Aapani Irioshi? Ariquea iquempejiga imaica amatavijantajiaatsica capiocapinijiguinirica majirontatsica imentaquipae. ⁴⁷ Ari oquejetaca aparogueti iriatimpa pinquenquetsatacaajiavaque pigonorojia, ¿arimpate panajiaqueri itsipapae? Ariquea iquempejiga imaica irirajia teeca intsaromentajiguempariji Aapani Irioshi. ⁴⁸ Pincomajamajianaquempaja pinquempejianaquemparija Piri choocatatsica inquitequi icomajamajatacagueti.

6

Jesoshi itsatacaantaque queroca incojiqueroni incavintsajantajitegueti

¹ “Aatotarite mana picavintsajantantajigui iramenajiaquempiniji caquinteja. Pinquempejiaquempagueti imaica aatotarite ishineventajiguimpitsi Piri choocatatsica inquitequi. ² Pimpintsatacojiaquemparigueti teeca irashintempaji pojocajiaquenerigueti icoguitejacojiacaca, aatoja picamantiritsija pigonorojia aatonijite piquejigaritsi tsaromentamampeajiatsica intati. Iriatimpajia iroguenti isemetacaantajiaque shinaogopaequi acapiocantapinicaca irooca aisa oraniqui quenavoquirontsipaequi cameetsanijite irishineventajiaquemparinijite igonorojia, cotanquitsiquea imaica noncantajiaquempi aatotarite ishineventajigaritsi Aapani Irioshi quempejiguiroca imaica, iriguenti shineventajiacari igonorojia amenajiaquerica. ³ Pojocajiaquenerigueti quericaca coguitejacojianquitsica aatotarite quericaca picamantitsi. ⁴ Santicoguitenija pojocaqueneri. Iroompaquea iramenajiaquempigueti Aapani Irioshi picavintsajamajatantaque, irioquea shineventajiaquempineca, ariquea pamenacojiaquempaja oncoramanitapojajegueti ontaniqui inquitequi.

Jesoshi itsatacaantaquero quero incojitaquerini iramanajiterigueti Aapani Irioshi

(Irc. 11.2-4)

⁵ “Pamanajiaquerigueti Aapani Irioshi aatoja piquempejigari tsaromentamampejiantquitsica intati yamanamampejiacari. Iriatimpajia iroguentiquea inintavintsajiaque incatintijiaque shinagogopaequi irooca aisa oquenavoquiguedagueti yamanamampejiacari cameetsanijite iramenajiaquerinijite igonorojia. Irirajia quejejianquitsica imaica aatotarite ishineventaritsi Aapani Irioshi. Aparoquea shineventajiaquemparine amenajiaquerica. ⁶ Cotanquitsiquea pamanerigueti Aapani Irioshi poanaqueja pinquijanaquequea pitsovironaquitequi pashitacotanaquempa aparo, ariquea pamanaqueriqueate. Iriatimpa yamenaquempiquea aparo pichoocaque pamanaquerigueti, inquemaquempiquea irishineventaquempi, ari incavintsajaquempi.

⁷ “Pamanerigueti Aapani Irioshi, aatoja pamanavijitiri intati vero vero vero, aatonijite piquejigaritsi teeca intsajigueriji Aapani Irioshi. Ijiqueji inquemisantavaqueri arigueti incantacoguitepani vero vero vero. ⁸ Aatojate piquempejigaritsi iriatimpajia, itsatsitacarotari Aapani Irioshi maasano picoguitejacocaca tequeratatirajagueti pamaneriji. ⁹ Pamanajiguerigueti mana pinquempejiaquempaja imaica, pincantajiaque: ‘Aapani choocatatsica inquitequi, noninque intsaromentamajiaquempiquea maasano caquinte.

¹⁰ Caacateja pimajirontamajapojaquempa.

† 5:44 Iconoagarantaca itioncajitajirogueti oca guiriegotsaqui yogavijitaquero capichaji, ocanti acaniqui: “Irirajia cantavetaquempica: ‘¡Shoo poanaque camorecariqui!’ manaquea pinquenquetsatacaqueriquea cameetsa, pincanqueri: ‘Noninque pinchoocajiaque cameetsa.’ Pincavintsajaqueri semajiaquempica.”

Noninquequea irinetsanamajajiqueroja ocaniqui quepatsiqui maasanopae pininqueca aviatimpa,

onquejetantaquempaca inetsanamajajiquerogueti ontaniqui inquitequi.

¹¹ Pojocaquenaja imaica noshecatapinijiaquempaca.

¹² Pimpeacotsitajenaroja nogovaeguisherere, quejetaca naatimpajia nopeacotsijajari antaguetaroca teeca oncameetsateji.

¹³ Aato pishinejiganarotsi oncoraquetashijiaquena aatoca notampishitashiti nocoguishetatsi.

Manaquea noninque pintampishitacaamajajiaquenaja aatonijite yagavejajana ampatsini incovaeguishedacajaena.*

¹⁴ “Ariguetei pimpeacotsijajempari yantaqueca caquinte, ariquea inquempetaquempaquea Piri choocatatsica inquitequi impeacotsitajemproquea maasanopae pantaguishevetacaca aviatimpajia. ¹⁵ Cotanquitsiquea aatogueti pipeacotsijigaritsi yantaguishejiaqueca caquinte, aatotarite ipeacotsijajimpirotsi Piri pantaguishejiaqueca aviatimpajia.

Jesoshi itsatacaanque quero incojitaquempa irisanticotaquiterogueti isheca

¹⁶ “Ariguetejate pisanticotaquitero pisheca cameetsanijite pisavicavenquerinijite Aapani Irioshi, aatoja pishimampojanmampeajiaja intati, aatonijite piquempejigariquea tsaromentamampeacarica. Iriatimpajia iroguenti ishimampojanmampeajiaja intati iramenajiquerinijite isanticoquitiro isheca. Cotanquitsiquea irirajia quempejianquitsica imaica aatotarite ishineventaritsi Aapani Irioshi, aparoquea shineventajiaquemparine amenajiaquerica. ¹⁷ Cotanquitsiquea aviatimpajia pisanticotaquiterogueti pisheca cameetsanijite pamaneri Aapani Irioshi, pinquishijiaquempaquea, aisa pinquivavorojiaquempaja, ¹⁸ aatonijite itsajiguimpitsi pigonorojia pisanticotaquitiro pisheca. Irioquea amenajiaquempine Piri teeca iramenajiteriji. Iriatimpa yamenajiaquempi pichoocati guetei apaniro, ariquea irishineventajiaquempiquea iroguishinejajiaquempi ariquea pamenacojiaquempa oncoramanitapojajeguetei ontaniqui inquitequi.

Irishineventamajajiquemparoja maasanopae inintaguetica Aapani Irioshi
(Irc. 12.33-34)

¹⁹ “Aatojate iroguenti pishineventajiatatsi pashintajiaquempa ocaniqui quepatsiqui, onconoagaranquempaqueate irishecaguetaquempari shecaguetaroca, otsipapae oyoguetanaque ompomatsatanaquempa, otsipapae inquijaguetanaque aitsitantatsica iraitsiguetaquempiro. ²⁰ Iroguenti pishineventamajajiaquempaja maasanopae inintaguetica Aapani Irioshi cameetsanijite incavintsajamajajiaquempinijite iroguishinejajiaquempiniji oncoramanitapojajeguetei ontaniqui inquitequi. Ontaniquiquea ontaniqui aato ichoocati shecaguetaroca pashintaguetaca, aatoquea oyogueti, aato yaitisijitajimpro. ²¹ Aritarite taaca opajita pishineventamajataca manaquea pisavicaventaguitironi piquenquejaguitironi.

Iquempetacaacaro tsivorentsi
(Irc. 11.34-36)

²² “Poquija oquempevecaro otsivore pitsino. Ariguetei oncameetsate poquija, pamenamajate, onquempetaquempari otsivoguitemajatiguetei. ²³ Aatogueti ocameetsate poquija, aato pamenantamajataro, onquempetaquempari pipitsecacotiguetei maasanotsino. Ari oquempetaca, ariguetei ompitsecanaque tsivoshirentaquempimeca, pimpitsecacomajatatiguenimaja.†

* 6:13 Iconoagarantaca itioncajitauroguetei oca guiriegotsaqoy yogavijitaquero capichaji, ocanti acaniqui: “Aviguentitari majirontamajatsica, aviguenti ashintaro tampishirentsi aisa oganejencarentsi. Pincoguitempaniquea pinquejetaquempa. Ari oncoquempani.” † 6:23 Ariguetei anintamajataque anetsanatero inintaguetica Aapani Irioshi, anquempetaquempari cameetsatanquitsica iroquija amenamajataqueterari ocanqueca Iguenquetsatsare Aapani Irioshi, anquemaquero. Aatogueti anintamajati anetsanatiro inintaguetica Aapani Irioshi, manaquea anquempetaquempari teeca oncameetsateji iroquija, amenavequemparogueti ocanqueca Iguenquetsatsare Aapani Irioshi, aato aquemirotsi.

*Nintanquitsineca irjaarantavaequempa
(Irc. 16.13)*

²⁴ “Tee inchoocateji agavejanquitsineca irantavaetaqueneri mavite ashintaquemparica. Manaquea irisemaneguintaquempari aparo, iriraquea itsipa impintsataquempari, irooca inquemisantamajataqueri aparo, itsipaquea intsojencaneguintaqueri. Aato pagaveji pantaqueneri Aapani Irioshi inintaguetica, irooguete pisavicaventaque pajaarantavaequempa quejetaca irooquea ashintaquempi ajaararonsi.

*Aapani Irioshi yojocapinijiguiniri irijanijiate maasanopae icoguitejacojiacaca
(Irc. 12.22-31)*

²⁵ “Imaicaquea noncanquempi: aatoja pishoshoventajigaro pisheca irooca pimira-
jiaquempaca choocatacaajempineca, aisa aatoja pishoshoventajigaroquea pinquitsaa-
jiaquempaca. Oraquea pishire anijacajaiguimpica ¿teempa anagueroji pisheca? Aisa
pitsino ¿teempa anagueroji quitsaarentsipae? ²⁶ Pamenajiguiriquea araguetatsica,
teequea irivintyacavetempaji, aisa teequea onchoocavetempajiquea incapiocantaque-
mparoca isheca iroarositapinijigue irapinijiaquequea irishecaciaquempaca, cotanquit-
siquea Piri inquitequitica yojocapinijiaqueneriquea ishecaciaacaca. Aviatimpajia ¿teempa
panaamajajigueriji iriatimpajia? ²⁷ Ariguete pishoshoguiteventavequempari pigat-
santsare ¿arimpa pagavejaque pincatsantsatanaje niganqui meetero?‡

²⁸ “Iroosacanica ¿queroca oocani pishoshoguiteventajiacaroquea pinquit-
saajiaquempaca? Pamenajiguirotarite ocatica ovempenaquipae inchiqiuojiquea
otsoroashiguecaquea iroatimpa, teequea oncatsiquejivetempaji aantaquemparomeca
oitsaare, aisa teequea onquiricajivetempaji, ²⁹ ariquiteate ocameetsamajavioti
anaavaequequea oanca ocameetsavaeque, anaaguequeroquea quitsaarentsi cameet-
samorenaguetatsica coramanitica iquitsaajiacaca majirontatsica Saromonini caavijica
anaaque ocameetsamorenajataquequea. ³⁰ Quempeca ocatica ovempenaquipae
oporencanaque poren icameetsatacaaguetaqueroquea Aapani Irioshi, cotanquitsiquea
osaitequera taampina oshimpeguiricanaque shimpeguiririri, irajaiqueroquea
intajaiquero. ¡Aviatimpajiaquea caaviji irojocajiaquempiquea pinquitsaajiaquempaca,
caavijitari panajaiqueroquea ovempenaquipae! Cotanquitsiquea aviatimpajia
teequea paventamajatempajiji, manaquea pishoshoventajiacaca taaca opajitapae.
³¹ Noncantantajiaquempica aatoja pishoshoguiteventajigarotsija pincantajiaque:
‘¿Querocashiatsi noshecataquempaca? ¿Taate nomirajeca? ¿Querocaquea
naajeroquea nonquitsaatajempaca?’ ³² Iriguentiquea quempejiguiroquea imaica
irirajia teeca intsaromentajiguempajiji, ishoshomentajiacaroquea taaca opajitapae,
irootaquequeate isavicaventajiaquequea iriatimpajia. Cotanquitsiquea aviatimpajia
aatojate piquejiguirotsija imaica, choocatarite Piri inquitequitica. Iriatimpa
itsataque maasanopae picoguitejacojiacaca. ³³ Aviatimpajiampani pinintamajajigue
pimajirontamajatanajuempajiji Aapani Irioshi pishineventajiaquempajiji
pisavicaventajiaquerojate maasanopae inintaguequeca iriatimpa, ariquitea iriatimpa
irojocajiaquempiquea maasanopae picoguitejacojiacaca. ³⁴ Aatojate pishoshoventaji-
garotsijate pincantajiaque: ‘¿Querocate noncotaquempani osaitequera?’ Oocaniquea
savincaguiteriqui chooca taaca opajita manapitsajiaquempineca pinquenquejacoqueca.
Osavincaguiterivetanajempagueti otsipapae choocatatsineca pinquenquejacojiacaca.

7

*Aatoja piquenquejacoguishetsitiritsi peacaajigaroca covaequisherentsi
(Irc. 6.37-38, 41-42)*

‡ 6:27 Oguipitsocaqueroguete tioncanquitsica guiriegoqui, agavejaque aisa oncanque: “Ariguete pishoshoguiteven-
tavequempari oshequianajeme pisavincaguiteritepae ¿arimpa pagavejaque poshequiaquero capichaji?”

¹ “Pamenitaquerigueti yantaguishetaqueca itsipa aato piquenquejitsi: ‘Teequea incameetsateji, icovaeguishedaca’, aatonijite iquejetacaajitimpi aviatimpa. ² Irooriji que-rocaca pinquenquejacotsiterica itsipa, ariquea inquempetacaajitaquempi aviatimpajia. Querocagueti pincotsiterini itsipa ariquea inquejetacaajitaquempi aviatimpajia.

³ “¿Querocaquea picocani pamenantacarica itijaarojaniqui pigonoro cotanquitsi tee pinquenquejacoteroji inchapoa poquijaqui pashi aviatimpa? ⁴ ¿Arimpate pagavejaquempma pincanqueri pigonoro: ‘Iintsija nonquitsoajempio pitijaaro’, choocatirajagueti inchapoa poquijaqui pashi aviatimpa? ⁵ Cameetsatamampeatsica, iroquetitarite pijivatavaque pinquitsoavajerota inchapoa jocaquempica aviatimpa, ariquea pamenamajatanaje pinquitsoimentajenerinijite tijaataquerica pigonoro.*

⁶ “Aatoja pojoquiniri shiishi querocaca yashincaca Aapani Irioshi. Oquempetaca aisa aatoja pipishonquiniri chanchopae piveererate vegaramajatanquitsica. Pinquem-petaquempagueti mana iragatigatiivaquero, ariquea impitsocashiitsitempi aviatimpa inteshireteshirejaquempi.†

Quero incojitaquerini iramanajiterigueti Aapani Irioshi

(Irc. 11.9-13; 6.31)

⁷ “Pamanajigueri Aapani Irioshi taaca opajita picoguitejacojiacaca, ariquea iriatimpa irojocajiaquempiro. Pamenagueteroja taaca opajita, ari pamenapojero. Aisa pintin-quiapojeroguetei sotomorontsi, ari irashirejacojiquempi. ⁸ Aritarite iriraquea amanantatsica irojocajiqueneri. Iriraquea amenaguetatsica iramenapoje. Aisa iriraquea tin-quiuiroca sotomorontsi irashirejacojiqueri.

⁹ “¿Arimpate pinquempejiaquempa aviatimpajia iramanempiguetei pirijanite pan arimpate paitsitenempari mapi pojoquitenempari? ¹⁰ Irioguetei iramanempi shima, ¿arimpate paitsitenempari pojoquitenempari camaarini? ¹¹ Avirovetaca covaeguishejiatsica pitsajiaque pojocajiguiniri pirijanijiate taaca opajitapae cameetsaripae, iriompate Piri choocatatsica inquitequi caaviji irojocajiaquempiquea cameetsaguetatsica pamana-jiaqueriguetei.

¹² “Taaca opajitapae pantajigue pincavintsajajigueri itsipajia, pinquejetacaguemparo pininqueguetei incavintsajaquempi aviatimpa. Irootarite ocanque itioncacotanaqueca Moishishini aisa itsipajia tsavetantajiguiroca icanquerica Aapani Irioshi.

Sotomorontsi chaamorojaniquitica

(Irc. 13.24)

¹³ “Pinquijantajianaquemparoja sotomorontsi chaamorojaniquitica. Choocatarite otsipa sotomorontsi iniromorojeguini ocanca aisa quenavoquirontsi iniropoquivaetaque ocanca oavoquivaetanquitsica isaviqui camorecariqui. Iroguentiquea iquijaquijai-tantacaca icaramirincavaeque caquinteja. ¹⁴ Cotanquitsiquea oraquea sotomorontsi chaamorojaniquitica aisa quenavoquirontsi orijanipoquijianiquitica mana oquenavoqui-tanaca anijagantsiqui. Teemajaca incaramirincateji nejaqueroneca.

Jesoshi itsavetacojiaqueri caquinte iquejetacaacanari inchato sovenatatsica

(Irc. 6.43-44)

¹⁵ “Inchiquiojitaja yamatavijajiguimpitsi tsavetacotamampeajiacarica Aapani Irioshi, inquitsaatsijiavequempari imae oveja, cotanquitsiquea intsompogui iriguentijia lobo‡

* 7:5 itijaarojaniqui pigonoro. Oquejetacaro ariguetei pininque pincanqueri pigonoro irovashiantajero covaeguishedacarentsipae yantagueteica, aviquetita vivaquerone povashiantajero pantaguishedacarentsipae aviatimpa. ¿Querocaquea picocani pamenantacarica ipeacaaguishedacarentsipae pigonoro cotanquitsi teequea pameneroji pashi aviatimpa caaviji pogaaca? † 7:6 Itsatacaqueriguetei iquejetacaacaro, quejetaca incanteri: Aatoja piquenquetsatimoguitirini Iguenquetsatsare Aapani Irioshi manintiroca aatonijite icatsimajiguimpi. Piveererate. Chooca quantijaqui quejevetarica chopiro. Onquijaqueriguetei capichaji impanequi, aseraqueri, ari intiritapiniquero cameetsaniji oncarenitanaque. Oncoramanitapojaguetei ompeanaquempa icantajitica peerera (icanquero quimajareri perla), quitasaancorerecavaeque, impeacaquemparo nenquetsiqui. Ovegaravaetaca. ‡ 7:15 lobo iriguenti tomirishiquitica catsimari quejevetarica iririjegui shiishi.

catsimari. ¹⁶ Aviatimpajia pamenamajajivaquero yantajiaqueca pintsatantajivaquemparica quero icocani iriatimpa. ¿Arimpate iraatantajitemparo ovaitsoqui samerento? Aato yaantajitaro. ¿Arimpate iraatantajitemparo igo[§] poronqueto? Aatoquea. ¹⁷ Ariqueate oquejetaca, maasanopae inchato cameetsaguetatsica oncameetsasovenatanaque. Oraquea inchato teeca oncameetsateji, irootaque ochoocatantaca osovena teeca oncameetsateji. ¹⁸ Oraqueate inchato cameetsatatsica aato agaveji ochoocatantaro osovena teeca oncameetsateji. Aisa oratica inchato teeca oncameetsateji, aatoquea agaveji ochoocatantaro osovena cameetsatatsica. ¹⁹ Maasanopae panquirentsi teeca oncameetsateji osovenapae inchaquitsitemparoquea iraanquero intaitemparoquea. ²⁰ Ariquea iquempejiaca caquinteji, pamenitsijiaqueri yantajiaqueca pintsatantajivaquemparica.

Aatotarite yooyoititsi maasano ichoocatigueti Aapani Irioshi

(Irc. 13.25-27)

²¹ “Aatotarite maasano iquijaquijaiti imajirontagueti Inquitequitica cantajiaquenanea: ‘Nomajirote, Nomajirote.’ Iriguentiquea quijaquijaitananquitsine irirajia maasano netsanamajajiaquero inintaguetic Aapani choocatatsica inquitequi. ²² Oraqueate apojempagueti oratica savincaguiteri, incaramirincavaetanaquequea cantajivetaquenanea: ‘Nomajirote, Nomajirote, notsavetantajiaquempi, aisa naven-tashijiacari pivajiro noguisotoaguetajiniri ishaquiajivecaca ampatsini, aisa nonigaantajiaqueroquea oacaantantatsica intati nocantajiaque aviguenti agavejacaquena.’ ²³ Cotanquitsiquea naatimpa noncantajiaqueri: ‘Teequeate nontsajiguempiji, poapoaitanaquequea osamani maasano aviatimpajia antajiguiroca covaeguisherentsi.’

Jesoshi itsavetacojiaqueri caquinte iquempetacaajiacari peacagaroca tsovironaqui

(Irc. 6.47-49)

²⁴ “Imaicaquea noncantajiaquempi quericagueti quemisantaquenanea netsanamajataqueronca nocanqueca ari inquempetaquempari quenquejamajatatsica vinchajiroca itsovironaquite shiratantapiqui. ²⁵ Iroompaquea otejavetanaca incani amaravetanaca ojaquiniqui, ochovigaguitevaetanaquequea jeoc jeoc jeoc, cotanquitsiquea teequea agavejeroji osoveanaqueroji, oquishomajataquetari shiratantapi ochoocatantacaca. ²⁶ Iriraquea quemavetavaquenanea cotanquitsiquea teequea irinetsanateroji nocanqueca, manaquea iquempetacari teeca inquenquejamajateji peacaavetacaroca itsovironaquite impanequiqui. ²⁷ Iroompaquea otejavetanaca incani, amaranaque ojaquiniqui, ochovigaguitevaetanaquequea jeoc jeoc jeoc, ariqueate ocotanaca osoveanacaquea itsovironaquite, ocantavaeti soven.”

²⁸ Iroompaquea iteroncanajirogueti Jesoshi itsavetantaquerogueti, yamenamenaitanaquequea intati maasano quemisantajiaquerica, ²⁹ yamenajiaqueritari itsatacajiaquerigueti choocaquea iragavejane, teequea inquempejiguempariji tsatacaantajiguiroca itioncacotanaqueca Moishishini.

8

Jesoshi yovejairi avejancari

(Mr. 1.40-45; Irc. 5.12-16)

¹ Iroompaquea yoguirincanaja Jesoshi otapiqui, ariquea isaquiritsaeventajianacari icaramirincavaeque caquinteji. ² Icoraquepojaquequea aparo avejancari iguerovempojacari icanqueri:

—Nomajirote, arigueti pininque, pagavejaque piveajena.

³ Iriraquea Jesoshi icantajempequitana ipamitsitari, icanqueri:

—Jeeje, noninque. ¡Pimpeanajempaja!

Iroompaqueate icanquitiguiri jac ipeanaja yavejancavejancaacagueti. ⁴ Iroompaquea icanjavajiri Jesoshi:

§ 7:16 igo (higo). Iroguenti osovena inchato icanantajitica iguera (higuera).

—Aatojate picamantitsija. Iriguenti poimotanaque saserorote ponigaapojemparija, paanajenerija viratsipae pinetsanaqueroja icanqueca Moishishini cameetsanijite iramenamajaquempinijite, ariquea incanquempi peanajimpi intsjaiquempinijite maasano peamajatanajimpi.

Jesoshi yogueshitajiri yashincaca imajirote coaretajia

(Irc. 7.1-10)

⁵ Iroompaquea yoanaque Jesoshi Caperenaoui. Ariquea yarejetapojacaroquea yameniriquea icoraquepojaque aparo Iromaquitica. Iriatimpa iriguenti imajironcaca 100 igoaretajiate. Iroompaquea icampoji:

⁶ —Nomajirote, inorijaguitani nashincaca notsovironaquitequi, teetari ironquempaji, yatsipevaetaca.

⁷ Icanqueri Jesoshi:

—Iroosacanea noanaque nogueshitajateri.

⁸ Icanquequea imajirote coaretajia:

—Nomajirote, aatotarite piquijitsitanarotsi notsovironaquite, notsaquetarite panaamajataquenaquea. Pincantajaniquiqueja impeapanajantempauea nashincaca.

⁹ Quejetaca naatimpa ichoocaveca tigarancanaca, ariqueate ichoocaque nashi nogoaretajiate notigarancajiguica. Noncanterigueti: ‘Pijate’, ari iroanaque. Itsipaquea noncanterigueti: ‘Caacate’, incoraquetaque. Aisa ichoocaque nashincaca taaca opaji nomperacarica iquemisanquenaquea.

¹⁰ Irooqueuea iquemavaquerigueti Jesoshi icanqueca yamenanaque intati, icantajiguiro oguijaguijaguerica:

—Arimaja noncanquempi, teequea namenimaguetaji aparo acaniqui Ishiraeriqui inquejetempariji irica itsamajatigueti nagavejamajati, iquemisantamajataque.

¹¹ Noncanquempiquea irimajirontaquempagueti Inquitequitica, ariquea incoraquecoraqueipoje caquinteja irisaquiritsaevaepojaque inquenaquenaipoje jmm osamanipaequitica isotoguigueti catsirincateri, itsipajia inquenajiaipoje iquijigueti catsirincateri, intsipajiaipojempariquea Averaameni, Ishaaconi aisa Jacovoni irishecaciaquempauea. ¹² Cotanquitsiquea irirajia joriojia inintajiavecaca Aapani Irioshi iroaroaitanaqueme aatotarite yoajiguiquea, manaquea intigarancajiqueriquea osamani ocanquegueti manquimanquimanqui. Ontaniquiquea ontaniqui incoquempajia iriraaguitempani irantsicayajijianaquempa.

¹³ Iroompaquea ipitsocashitanacari imajirote coaretajia icanqueri:

—Poanajeja, pitsaquetarite nagavejamajati nogueshitajeri pashincaca, imaica impeanajempa.

Irooqueuea icanquitigui Jesoshi jac peanaja.

Jesoshi yogueshitajiro orijanintaroca imanquigare Peerero

(Mr. 1.29-31; Irc. 4.38-39)

¹⁴ Iroompaquea yoanaque Jesoshi itsovironaquitequi Peerero, yamenapojiroquea ivaguirote Peerero, ashinoncajaca onorijaca ocatsirincavaeque. ¹⁵ Yaavacopojaquero ariqueate ocotanaca opeanaja ogatsirincare, ariquea ocatianaja ojocacojajiniri irishecaciaquempa.

Jesoshi yogueshiguetajiri ashinoncajajatsica

(Mr. 1.32-34; Irc. 4.40-41)

¹⁶ Iroompaquea opitsecanaquegueti yamajiaipojiniri Jesoshi icarajiaetaque ishaquiajiacaca ampatsini. Irooqueuea icantaquitigui Jesoshi ariquea icohicoitanaca ampatsinipae yovashiantajanajiri ishaquiajiavecaca. Aisa yogueshiguetajiri maasano ashinoncajaguetanquitsica. ¹⁷ Ari icanque paesatoniqui tsavetantatsica Isaiashini itsavetacotantaquerigueti icanque:

“Yaitanacajiro agavejavetacajica,
aisa yogueshiguetajaji ojoquijijiacagueti.”

Nintajatsica irogujaguijaitanaqueri Jesoshi

(Irc. 9.57-62)

¹⁸ Iroompaquea yameniriquea Jesoshi icaramirincavaeque capiocaventajiapojacarica, icantajiguiri itsatacaanejia:

—Jaame amontemonteitanauempaja intatiqueroqui.

¹⁹ Ariquea icoraquepoji tsatacaantiroca itioncacotanauqueca Moishishini, icanqueri Jesoshi:

—Tsatacaantantatsica, noninque noncoguitempani noguijaguitempini querocagueti poanaque.

²⁰ Icanque Jesoshi:

—Irraquea zorro* chooca imoro iquijantacaca. Ariquea iquempejiaca tsimeripae chooca imencoshi, cotanquitsiquea iriraquea Irijanite Caquinte† teequeate onchoocateji itsovironaquite irimaantaquempaca.

²¹ Iroompaquea icanque aparo itsatacaane:

—Nomajirote, nonintaveca noguijaguitempini, cotanquitsiquea iroquetita nonquitanajeritaja aapani.

²² Icanque Jesoshi:

—Poguijatanauenaja. Pishineteri metojari ashincarica inquitatajaterita metojari.

Jesoshi ipejairoquea choviga aisa imagojatacajairo iniromotija

(Mr. 4.35-41; Irc. 8.22-25)

²³ Ariqueate itetanajaroquea Jesoshi quenajarontsi itsipatsipaitanacari itsatacaanejia. ²⁴ Incajaranquiguitetanaquegueti ochovigaguitetapojiquea inirojencatapojaque choviga jeoc jeoc jeoc, otamacojatanaque iniromotija oshaguishaguivaetanaqueroquea quenajarontsi. Irraquea Jesoshi yojocanacani tin. ²⁵ Itsaroajianaque itsatacaanejia itinajitsitari icanqueri:

—¡Nomajirote, paavaquenashiatsi ojocajatempanishiatsi!

²⁶ Iriatimpa icanajiguiri:

—¿Quero ocotacani pitsaroantajanacaca? ¡Tequerata pintsamajajiguenaji nagavejamajati!

Icatiitsitanaca iquenquetsatacaitaro choviga icanquero:

—Pimpejaencatanajempaja.

Icantsitaro aisa iniromotija:

—Pinchopecajatanajempaja.

Ari ocotanaja osanticojencatanaji choviga, ari oquempetanaja iniromotija ochopecajatanaja.

²⁷ Iriatimpajia yamenamenaitanaque intati icanajianaque:

—¿Taashia ipaji irica? Jerompate oquemisantamajataqueriquea choviga aisa iniro-motija.

Jesoshi yoguisotoacoventajijiri ishaquijavetacaca ampatsinipae

(Mr. 5.1-20; Irc. 8.26-39)

²⁸ Oraquea yarejetapojacagueti Jesoshi intatiqueroqui, iguepatsitequi Gararaquitica‡ icoraquejiapoji mavite caquinte ishaquijaiacaca ampatsini. Iriatimpajia iroguenti iquenaquenaipoji imperitamoroqui yojoquijitantapinijitarica metojatsica. Icatsimamajajiaque itsaroacaamajitacari, caarica ipampoquivoquitantajitaro quenavoquirontsi oatsica ichoocajiaquegueti. ²⁹ Iroompaquea icajemitsijianaca icanajiguiri:

—Jesoshi Irijanite Irioshi, ¿queroquea pincojiguenani? ¿Iroocajate picoraquetashitaque pantsipetacaajiaquena imaica tequeratanicate arejetempaji nantsipetantajiaquempaca?

³⁰ Ariqueate ichoocajiaque oraniqui oshequi chancho,§ ishecajiaca, icarajiavaequequea icanca. ³¹ Irirajia ampatsini shaquijaiacarica icanajiaqueri Jesoshi:

* 8:20 Ichocati zorro tomirishiqui, iquejevecari shiishi. Iriguenti shecatarica chaapa, quepigari, maasano. † 8:20 Icanquegueti Jesoshi Irijanite Caquinte mana icanacotaca iriatimpa, mana oquejetaca icanacoqueri itsipa. Iriotaque Quirishito Meshiantatsica quenapojanquitsica jenoqui inquitequi, icaquintetapojajuetari ivoapojaque. ‡ 8:28 iguepatsitequi Gararaquitica. Chooça otsipa paperi otioncacotacagueti acaniqui Jerejesaquitica (gergesenos), otsipa paperi ocanti Jersaquitica (gerasenos). § 8:30 Irira chancho iriguenti viratsi quejevetarica santaviri.

—Poguisotoajiaquenagueti, iintsija noashijianaquerita irinta chanchojia, noshaquiajiapojemparita.

³² Icanque Jesoshi:

—Intsiquetirote poapoaitanaque.

Icampanajanta isotosotoitapanajanti yovashiantajianaqueri ishaquiajiaveca, irioquea yoashijiavetanaca chanco. Iroompa ishaquiajiavetapojacari ariqueate icohicoitanaca ishiajianaca ojeguironcapojacagueti itanquiretanquireitanaque yojocajajiapojaca, icampoajaca teron maasanojia.

³³ Ariqueate yamenajiaquerigueti quempoguijajiguirica itsaroajianaque, ishiaitianaca yoayoaitanaque iguinentijiacagueti icamantajiapojiri igonorojia yojocajajiagueti chanco. Aisa itsavetantajipojaqueriquea queroquea icohicoitanacani ishaquiajiavetapojacariagueti ampatsinipae. ³⁴ Iquemitsitaquea iriatimpajia yoayoaitanaquequea ontaniqui ichoocaquegueti Jesoshi, icantajajiri iroanaje irovashiantsitana-
jeri iguepatsite.

9

Jesoshi yogatijirigueti teeca ironquempaji

(Mr. 2.1-12; Irc. 5.17-26)

¹ Iroompaquea itetanajaquea Jesoshi quenajarontsi qui imontejacotanaja yoanaji igu-
intenicagueti. ² Ariquea icoraquejiapojiquea itsipapae caquinteja yamacojiapojacari
teeca ironquempaji, yaajianaqueneriquea Jesoshi irogueshitajeri. Iriraquea Jesoshi it-
sajiaqueri yaventajiapojacari irogueshitajeriniji, icantantacarica teeca ironquempaji:

—Irijani, pishinevaetempaja. Jac shetacotajimpi maasanopae pipeacaaguishevecaca.

³ Ariquea ichoocajiaque oraniqui tsatacaantajiguiroca itioncacotanaqueca
Moishishini. Iquemajiaquerigueti canqueca imaica, iquenquejajianaque
intati: “Manatari iquejemanatanacari Aapani Irioshi.” ⁴ Cotanquitsiquea Jesoshi
itsajiaqueriquea iquenquejajiaqueca icantsijigari:

—¿Queroquea picopicoitanacani piquenquejajianaquequea teeca oncameetsateji?

⁵ ¿Querocampate caavijica anaaque mananquitsica? ¿Iroocaja nocantaquerigueti: ‘Jac
shetacotajimpi maasanopae picovaeguishevetacaca, aatoquea iquenquejacaajimpro
Aapani Irioshi’, iroocaja noncanqueri: ‘Pincatianaje panijitanaje?’ ⁶ Imaicaquea na-
menacaajiaquempiroquea yagavejaque ocianiqui quepatsiqui irira Irijanite Caquinte
irishetacoitajeri ipeacaaguishevecaca caquinte.

Iroompaquea ipitsocashitanacari teeca ironquempaji canqueri:

—Pincatianaje, paanajero pinorijancaca, poanaje pitsovironaquitequi.

⁷ Ariqueate icotanaja icatiapanajanta yoanajiquea itsovironaquitequi. ⁸ Oraquea ya-
menajiaquerigueti maasano omporoguijajianquitsica itsaroajianaque, ariquea ishin-
eventajianacari Aapani Irioshi, yamenajiaquetari mana yagavejacaajiaqueri caquintepae
irongaantajiaquero oacaantantatsica intati.

Jesoshi canqueri Mateo iroguijatanaquerija

(Mr. 2.13-17; Irc. 5.27-32)

⁹ Iroompaquea yoanaque Jesoshi icantanaca oraniqui yamenapojiri aparó capiocap-
initinirica majirontatsica imentaquipae. Ipajita Mateo. Iriatimpa iroguenti isavicaque
ontaniqui ipashicatsarajitirogueti yoguijajiaqueri avisavisaitatsica ivegaratacaajia-
queri imentaquitsite maasano aajiananquitsica irajaararopae irooca taaca opajitapae.
Iroompaquea iriraquea Jesoshi icampoajiri:

—Jameja, poguijatanaquena.

Iriatimpa icatiapanajanta yoanaque yoguijatanaqueri.

¹⁰ Ariquea Jesoshi yoanaque itsovironaquitequi ishecajiaca itsipatsipaitanacari it-
satacaaneja, jerijia itsipajia capiocapinijiguirica majirontatsica imentaquipae, jeri
aisa itsipajia covaeguishejiatsica. ¹¹ Iriraquea pariseojia yamenajiaquerigueti Jesoshi
itsipatsipaitacariagueti ishecajiagueti, canqueriquea itsatacaaneja:

—¿Quero icocani irira tsatacaajiguimpica ishecatacojiacari capiocapinijiguirica ma-
jirontatsica imentaquipae, jeri aisa itsipapae covaeguishejiatsica?

¹² Oraquea iquemavaquegueti Jesoshi icantajiguiri:

—Irraquea teeca irashinoncajempaji teetarite incoguitejacotempariji aavintantat-sica. Iriguenti coguitejacojigari ashinoncajajatsica. ¹³ Poapoitanaaje pinquen-quejajiaqueroja pintsajiaqueronijite icanqueca Aapani Irioshi icanquegueti: ‘Caav-iji anaaque nonintamajaque pimpintsatacotantajiguempaja, anaqueroquea pijitore-jajiguenarigueti viratsipae pintaashiquenarigueti.’ Teetarite irioquea noncoraque-tashiteji teeca incovaeguishejiguempaji noncajemajiaqueri, iriguenti nocoraquetashiji-que covaeguishejiatsica noncajemajiaqueriquea cameetsanijite incantashitatijaiana-jempanijite irovashiantanajeronijite ipeacaaguishevecaca.

Icoacojitaqueriquea Jesoshi irisanticotantajitemparoca isheca

(Mr. 2.18-22; Irc. 5.33-39)

¹⁴ Iroompaquea icoraquecoraqueipojaque itsatacaanejia Joanca Viñacajatantatsica icantajipojaqueri Jesoshi:

—¿Quero ocoani naatimpajia aisa pariseojia nosanticotapinijiguiquea teequea noshe-cajiguempaji, cotanquitsiquea iriraquea pitsatacaanejia teetarite ariquea inquemp-ejiguempaji imaica?

¹⁵ Iroompaquea iquejetacaaca Jesoshi icanque:

—Pinquenquejeroja inchoocategueti iriaqueraca manquigatanquitsineca incajema-jiaqueriquea itsipavijijiaca irishecatacaajiaquempari, ¿arimpate aatompate isheca-jiga? Irishecashecaitanacuempaquea, itsipatsipaitacaritarite cajemajiaquerica shine-jiaquea. Cotanquitsiquea oraquate aapojempagueti incatsimatantajitaquempar-ica irajaitanaqueriquea osamani, ariquea iroguenti irisanticotantajitemparoca isheca, irishimampojanacocojianaquempari.

¹⁶ “Aatoquea ocameetsati oncotatemparogueti quitsaarentsiqui iroquetishitequit-ica incotantajivetaquempari iroaqueramorenatica quitsaarentsi. Irajaquitsijivetem-paroquea ariqueate oncotanaquempani ontsiñotsiñomorenatanaquequea arimpaquea omperejanaqueroquea. ¹⁷ Aisa ari onquempetaquemparoquea iroguijaatantajitaque-mparogueti vinoja* iroaquerajatica oncachotapoje iroguijaatantajivetaquemparogueti imeshinanaquiqui iriquetinica oroameshinatananquitsica. Oncachojamajavetanaque-mpagueti oshimoajavetanaquempa, ariquea oncotanaquempa aravoavetaquitempa imeshina, intyaquisanaque oshacojaatanaquempaquea vinoja, aisa impomatsataquem-paquea imeshina imperejanaque. Jero caaviji ocameetsavaeque impijaatantajitaquem-paroquea iriaquerameshinari cameetsanijite aatonijite opomatsajata vinoja, aisa aatoni-jite ipomatsatatsi imeshina.”†

Jesoshi ivochatajiro irorijanite Jairo

(Mr. 5.21-43; Irc. 8.40-56)

¹⁸ Choocatiraja quenquetsatanatsitiraja Jesoshi, icoraquepojaque aparo jivatatsica, iguerovempojacari icanqueri:

—Iroaquerasano metojananquitsi norijanite. Jaame pimpamitaquitenaro ontancore-janajenijite.

¹⁹ Iroompaquea icatiapanajanta Jesoshi yoguijatanaqueri itsovironaquitequi itsipatsi-paitanacari itsatacaanejia.

²⁰ Ariquea ochoocaque aisa oraniqui manquigarentsi ashinoncaavaetanquitsica os-osoajavaetini coramani, ariquea ocaratacovaetanaqueni 12 ajagantsiteni. Iroat-impa ojocavaetapoja quempeji coraquetashipojiri itaqui qui ochagatsaequitsitavaqueri ocaramagotapojaquegueti irogataamagoro. ²¹ Oquenquejitsitanacaquea incajaranqui ocanque: “Iroguenti nonchagatsivetaquempari irogataamagoro nompeanajempaquea.”

²² Iroompaquea ipitsocanaca Jesoshi yameniroquea icanquero:

* 9:17 Ocachotanaquegueti ovaja opeanacaquea vinoja. † 9:17 Itsatacaantica Jesoshi iroguenti quejetacaroca quitsaarentsi iroaqueraro, oquejetacaró aisa vinoja iroaquerajatica. Aato agaveji otsipataro itsatacaantica pariseojia aisa tsatacaantajigueroica itioncacotanaqueca Moishishini.

—Orijani, pishinevaetempaja. Irooriji pavenquenatarite naatimpa, irootari piveantanajaca.

Icanquitiguiro jac peamajatanaja.

²³ Iroompaa yarejetapojaca Jesoshi iquijapoji itsovironaquitequi jivatatsica, yamenajipojiri covijiatsica covijiaque. Irirajia iraacojiaqueroca metojatsica irajiacaca icajemajiaque. Icantajiaipojaqueri:

²⁴ —Pijajivajeta. Teetarite ometojeji, mana omaaque intati.

Ariqueate icojianaca ishirontimentajianacari. ²⁵ Irooqueea yoguisotojiaiquerigueti iquijitsitanaca intsompogui yaavacopojiaqueeroquea. Ariqueate ocotanaca otancorejanaja ocatianaja. ²⁶ Iroompaaquea ari maasano choocajatsica oraniqui osamanipaequitica iquemacojiaqueri itancorejajiroquea irorijanite jivatatsica.

Jesoshi yamenacajairi mavite shamponcajavetanquitsica

²⁷ Iroompaaquea yoanajigueti Jesoshi yoguijaguijaitanajiri mavite shamponcajari icajemacovaetavaqueri icanqueri:

—¡Ichoviquini Taavini, † pimpintsatacogajoitenashiatsi!

²⁸ Ariqueate yarejetapojaca Jesoshi tsovironaqui iquijitsitanaca intsompogui. Irirajia shamponcajari guijaguijaitanaquerica iquempejiquempejiipojiri. Icantavaqueri Jesoshi:

—¿Pitsaquenampa nagavejaque nantero oca?

Icantajianaque:

—Jeeje, Nomajirote, pagavejaque.

²⁹ Ariquea ipamitsitari iroquijiaqui icantajiguiri:

—Pitsaquenataritari nagavejaque, ari nonetsanatanacuempiro.

³⁰ Ariqueate icojianaja yamenajianaji. Iroompaaquea Jesoshi icantimentajivajiri icantiriquea:

—Shoshoh inchiqiojitajate pitsavetampojirotsija.

³¹ Cotanquitsiquea yoayoaitanajigueti jatanatsi itsavetantaguetanaqueriquea que-rocagueti ontaniqui.

Icanquerigueti Jesoshi iquenquetsatanaji macanari

³² Incajaranquiguitetanaquitiguiquea icoraquecoraqueipojaque itsipapae yamajiaipojaqueriquea macanari ishaquiacaca ampatsini. ³³ Irooqueea yoguisotoaquerigueti Jesoshi ampatsini, ariqueate icotanaja iquenquetsatanaji macanari. Yamenamenaaitanaquequea intati maasano icantajianaque:

—Teetarite irinejajigueteroji quejeguetacaroca ocatica ocaniqui Ishiraeriqui.

³⁴ Cotanquitsiquea irirajia pariseojia icantajiaque:

—Iriguentiquea agavejacaqueriquea imajirote ampatsinijia yagavejantacaca yoguisotoajiaqueri ampatsinipae shaquiajavecarica caquinte.

Jesoshi ipintsatacojiacari maasanojia

³⁵ Iroompaaquea yoanaque Jesoshi yoantanacaroquea oraniqui itsitacaguetanaqueeroquea ocapiocaguetagueti tsovironaquipae. Itsatacaantaguetanaquequea shinagogapaequi icapiocantapinitacaca joriojia itsavetantaquero Quenquetsatsarentsi Oganejencatatsica icantajiaqueri quero icotani imajirontagueti Aapani Irioshi. Aisa yogueshijajiri maasano ashinoncajajatsica. ³⁶ Oraqueea yamenajiaquerigueti maasano caquinteja ipintsatacojianacari oshequi, yamenajiaqueriquea yatsipevaejiaca taaca opajitapae, ishimampojanajiacaca, mana iquempejiacari oveja teeca inchoocateji quempoguijirica.

³⁷ Iroompaaquea icantajiguiri itsatacaaneja:

—Arimajaquea chooca icaramirincavaeque nintajianquitsica irimeshiajiaqueriquea, cotanquitsiquea teemajaca iroshequiamajateji tsatacaajiaquerineca cameetsanijite irimeshiimentajiquerinijite. Iroguenti iquempejiacaroquea osampatigueti tirigoitsoqui iniroteji teemajaca iroshequiamajateji aviguitaqueroneca. ³⁸ Irootaquequeate imaica noncantantajiaquempica pamanajiaquerija Aapani Irioshi pincantajiaqueri intigarancajiaqueri tsatacaajiaquerineca.

† 9:27 Ichoviquini Taavini, irootaque icantajitiri Meshiantanquitsineca coraquetanquitsineca.

10

Jesoshi yaajiaqueriquea 12 impeacaajiaquempaca itigarancanejia

(Mr. 3.13-19; Irc. 6.12-16)

¹ Iroompaquea icajemajiaqueriquea Jesoshi itsatacaanejia carajianquitsica 12, yagavejacaajiaqueriquea ironigaitsijiaquempariquea ishaquiajiacaca ampatsinipae, aisa irogueshijiaqueriquea aajiaquerica cantashitatiaguetaquitsica ashinoncajagantsipae aisa joquijirentsipae. ² Iriatimpajia carajianquitsica 12 ipeacajaiacari itigarancanejia. Iroguenti ipajijiga:

Shimo (icantajitica aisa Peerero) aisa Antirishi (iriguentijeguite Peerero);

Santiago* irijanite Severeo, aisa Joanca iriguentijeguite Santiago;

³ Jeripe aisa Varitorome;

Tomashi aisa Mateo (capiocapinitinirica majirontatsica imentaquipae);

Santiago† (irijanite Arejeo) aisa Tareo;‡

⁴ Shimo (icantajitica “Serote”)§ aisa Jorashi Ishicariote, acaanquerineca Jesoshi.

Jesoshi itigarancajiaqueri 12 itsatacaane iroaroaitanaque intsavetantajianaque

(Mr. 6.7-13; Irc. 9.1-6)

⁵ Ariquea itigarancajiaqueri Jesoshi irirajia carajianquitsica 12, itsatacajaiavaqueri icanque: “Aatoja poapoaitashijiguiiri teeca irijorijoigueji pintsatacaajiaqueri. Irirajia Samariaquitica aatoja piquijajiguitsi ontaniqui iguintenijiaqueti.

⁶ Iriguenti poimojianaque maasano ishiraerijia, iroguentiquea iquempejiacari oveja peajianquitsica. ⁷ Imaica poajianaqueja pintsavetantimojianaquerija pincantajiaquerija: ‘Irooshipojaque aapojaquempaquea irimajirontaquempa acaniqui Inquitequitica.’

⁸ Pogueshiguetaquerija avejancaguetsatsica iriguentijiac aisa itsipapae ashinoncajajatsica. Pintancorejaguetajerija metojaguetaquitsica, aisa poguisotojajiaenerija ishaquiajiacaca ampatsinipae, cotanquitsiquea aatoja pivegaratacaajigaritsija, quejecaquea naatimpa teequea novegaratacajaguempiji nagavejacaajiaquempigueti. ⁹ Aatoja paajiguitsija pimentaquitsite; ¹⁰ aatoja paajiguiquea pitsaratote, iroguenti paajianaque apamorenaro piitsaare piquitsaatacaca, aisa pigaviguitire picavijiacaca; aatoja paajiguitsi pigotiro; icantajitiroitari cameetsavaeque irojocajiqueneriquea catsiquetsatsica irishecaquempaca.

¹¹ “Querocagueti oraniqui parejerejeipojaquempagueti pincoaguetaipojaqueri cavintsajantatsica aavaquempineca cameetsa, irioquea pimaimojiaque irosati arejetapojajempagueti poantajianajempaca. ¹² Poajianaquegueti itsovironaquitequi pinquijajiapojegueti pincantajiaqueriquea: ‘Noninque incavintsajajiaquempiquea Aapani Irioshi.’

¹³ Irishineventajiaquempigueti, irioquea shineventajiaquemparine Aapani Irioshi incavintsajajiaqueriquea. Oraquea aatogueti ishineventajiguimpitsi, aatoquea ishineventajigaritsi Aapani Irioshi aato icavintsajajiguiiri, aparoquea incavintsajajiaquempiquea aviatimpajia. ¹⁴ Oraqueate querocagueti poapoaitanaqueni oraniqui, aatogueti ishineventajiaavajimpi, poapoaitanajeja, cotanquitsiquea iroquetitaja pantecamajatanaque-roja quepatsivane pagatiquitsitapojaquerigueti iroonijite iramenantajiaquempaca manaquea yantaque teeca oncameetsateji. ¹⁵ Arimajaquea oncoramanitapojajegueti arejetapojajempagueti incatsimatantaquemparica Aapani Irioshi, caaviji incatsimamajajiaqueriquea irirajia teeca irishineventajiaavajempiji, anaamajataqueroquea incatsimamajajiaquerigueti guintenijiavetanquitsica coramaniquitica Soromaqui aisa Gomoraqui.*

* 10:2 Irira Santiago ipajita aisa Jacovo. † 10:3 Santiago. Chooca mavite Santiago, pajitatsica Jacovo. ‡ 10:3 Tareo. Irioca icantajitica aisa Jorashi irijanite Santiago. Pamenero Irc. 6.16 aisa Ya. 1.13. § 10:4 Serote oncanque “nintamajatatsica”. Irooquea icantajitiri irirajia joriojia nintamajatanquitsica iroguisotoajigueri Iromaquitica omperaperaacarica onchoocatahitajempanijite iguepatsite ishiraerijia. Acaniqui Mateo icantiri “kananitas”, irooquea oponeaca iguenquetsatsarequi arameo, oncanque “nintamajatatsica”, tee oncanteji iponeaca Canaanequi. Irocashi (6.15) icantiri iguenquetsatsarequi guiriego “zelotes”, irootaquequea ationcantacaroca “Serote”. * 10:15 Soroma aisa Gomora. Pamenero Jen. 18.20-21; 19.23-29.

Irantsipetacajaitaquempari itsatacaanejia Jesoshi
(Mr. 13.9-13; Irc. 21.12-19)

¹⁶ “Imaicaquea nontigarancjiaquempiquea, onquejevetaquempa intigarancjiterigueti ovejapae inconoitempari lobopae† catsimari. Iroguenti pinquempejiaquempari casantonqueni itsatigueti, cotanquitsiquea aatoja paashitantajatsi, aisa aatoja pipigatsatantajatsija, iroguenti pinquempejiaquemparija emoreni. ¹⁷ Pagamajajiaquemparija caquintejia; irajaianaquempi icapiocajiacagueti jivajatsica incatsimatacaantajiaquempiquea, impasatacaantajiaquempi agompiaquitempi shinagogapaequi icapiocantapiniijiacaca pignonorjia. ¹⁸ Aatoquea aparo ocaticea. Irajaianaquempiquea aisa iramajirorequi, jeri aisa majirontajatsicaqui, incatsimatacaantajiaquempiquea irooriji poguijatacotaquena naatimpa. Ariquea pintsavetantimojianaqueriquea iriatimpajia, iriguentijia aisa maasano teeca irijorijoigueti, pintsavetacojiaquenaja naatimpa. ¹⁹ Oraquea irajaianaquempigueti majirontajatsicaqui aatoja pishoshoguitetatsi, aatoja piquenquejajigui: ‘¿Querocaca noncanqueni?’ Inquenquejacaajiaquempiroitari Aapani Irioshi cameetsanijite pintsajiaquenijite querocaca pincanque. ²⁰ Aatoquea inchiquiojitaja piquenquetsajigui aviatimpajia, irioquea quenquejacaajiaquempironeca Ishire Aapani Irioshi choocashirentajiaquempica.

²¹ “Inconoagaranquempa quea iracaantajiaqueri iriguentijeguijiate irashimajaca igonoromajaca irimetojacaantajiaqueri, itsipaquea iracaantajiaqueriquea irijanijiate. Ariqueate inquejejaquempa quea itsipa iracaantajiaqueri iriri irimetojacaantajiaqueriquea. ²² Maasanopae irisemaneguintimentajiaquempiroquea novajiro pitsaromentajiaquenuagueti, cotanquitsiquea quericaca atsipetacovaetanquitsineca aatogueti yovashiantirotsi itsarovenquenagueta arejevaequempa irimetojanaje, irioquea iriguenti irajitanaje inquitequi. ²³ Querocagueta irantsipetacajiaquempigueta oshequi, poapoitanaquequea pishiashiaitanaquequea. Arimajaca noncantajiaquempi tequeratagueta pintsitacaguetejajigueroji maasanopae iguintenipaequi ishiraerijia pintsavetantimojianaqueri, incoraquetajate Irijanite Caquinte.

²⁴ “Iraquea itsatacajaitica teetarite iranagueriji tsatacaguirica. Ariquea iquejetaca yashintajitaca teetarite iranagueriji ashincarica. ²⁵ Aisa iriraquea itsatacajaitica ariquea inquejetaquemparija tsatacaguirica. Ariquea iquempetaca yashintajitaca, ariquea inquempetaquemparija ashincarica. Quempeca naatimpa Pimajirote ariqueate icantajiquenaquea Veerevevo,‡ ogashia aviatimpajia caaviji irogaajitaquempi.

Apatiromajaca intsaroacaamajajitaquempari Aapani Irioshi
(Irc. 12.2-7)

²⁶ “Irootaquequea noncantantajiaquempica aatoja pitsaroacaajigaritsi caquinte, irooriji maasanopae isenacajivetacaca imaica oncoramanitapojajegueta intsajitaqueroquea. Ariquea oquejetaca maasanopae itsitijiguetacaca imaica, oncoramanitapojajegueta ironigaantajitaqueroquea. ²⁷ Taaca opajitapae nocanquempica pitsecariqui, pintsavetanteroquea savincaguiteriqui. Taaca opajita nocantajiaquempica inchiquioji piguempitaqui, iririjencaniquea pintsavetantero sotsiqui omencotapojacagueta pitsovironaquitequi ovancaitoqui. ²⁸ Aatoja pitsaroacaajigaritsi nintajanquitsineca irimetojajiaquempiquea. Iriatimpajia irimetojajiaquempigueta, iroguentiquea metojanquitsine pitsino, cotanquitsiquea aatotarite yagavejajiguirotsi irimetojajiaqueroquea pishire. Iriguentiquea pintsaroacaamajajitaquempajia Aapani Irioshi, apatirotarite icocani iriatimpa yagavejiquea incanque querica metojanquitsineca, iroompaquea iragavejaque intigarancqueroquea ishira camorecariqui. ²⁹ ¿Arimpate teequea pamenajigueriji tsimeripae ari ivegarataca mavite tsimeri apamentaquitiro imentaqui? Cotanquitsiquea aatoquea yomposa aparo quepatsiqui aatogueta irio nintatsine Piri. ³⁰ Quejetacaquea pimaejia, ariqueate itsatiroquea apamaeropae. ³¹ Irootaquequea noncantantajiaquempica aatoja pitsaroajiguetsijate, caavijitarite panajiaqueriquea tsimeripae.

† 10:16 Irira lobo iriguenti tomirishiquitica catsimari quejevecarica iririjegui shiishi. ‡ 10:25 Veerevevo. Iroguenti otsipa ivajiro Satanashi, imajirote ampatsinijia. Pamenero Mt. 12.24.

Teeca impashiventacajaiguempariji Jesoquirishito
(Irc. 12.8-9)

³² “Querica cantamajaqueroneca itsaromentamajataquena incamantajiaquerigueti caquinteja, ariqueate nonquejetaquempaqua naatimpa oncoramanitapojajegueti, noncanque: ‘Naroguenti ashincari’, inquemavaquenaquea Aapani choocatatsica inquitequi. ³³ Cotanquitsiquea quericaca cantaquerineca caquinte: ‘Teetarite nontsaromentempariji Jesoshi’, ariqueate nonquejetaquempaqua naatimpa oncoramanitapojajegueti, noncanquequea: ‘Teequea naroguenti ashintemparine’, inquemavaquenaquea Aapani choocatatsica inquitequi.

Teequea irooquee incoraquetashiteji Jesoshi incantajiaqueri maasanojia inquemavacaajiaquempa

(Irc. 12.51-53; 14.26-27)

³⁴ “Aato pijijiguitsi irooquee nocoraquetashique noncantajiaqueri maasano quepat-siquitica inquemavacaajiaquempa iraavacaajiaquempa. Teetarite irooquee nocoraquetashiteji, iroguentiquea nocoraquetashique ompampiatantanaquemparoquea intsinampirejavacaajianaquempa, incatsimajitanaqueriquea tsaromentaquenanea. ³⁵ Iriraquea irijanite incatsimatanaqueriquea iriri. Oratica orijanite oncatsimatanaqueroquea iniro. Aisa oratica imanquigatacaca irijanite oncatsimatanaqueroquea ovaguirote. ³⁶ Ariqueate onquejetanaquempaqua, inchoocajiaque quemisantajiaquenanea incatsimajiaqueriquea ijijiguica.

³⁷ “Aatotarite nompeguiritsi notsatacaane quericaca caavijica ipintsamajatari iriri, iriniro, aatomajaca naatimpa ipintsamajatana. Aisa aatotarite nopeguiritsi notsatacaane quericaca caavijica ipintsamajatariquea irijanite, iririjanite, aatomajaca naatimpa ipintsamajatana. ³⁸ Ariquea nonquejetaquempa aisa aatotarite nopeguiritsi notsatacaane quericaca teeca irininteji iraanontanaquempa ivoatsite irompajacotantajitaquemparica irantsipeventavaetena iroguijatacotantanaquenaca. ³⁹ Querica teeca irininteji irantsipeventenaji irooca irimetojavenquena, manaquea impeaquempa; cotanquitsiquea iriraquea teeca irinintimateji irantaguetaquequea taaca opajita inintaguequea iriatimpa iroguenti irininque irantsipevenquena irooca irimetojavenquena, irooquee iriguenti incoguitempani inchoocaguiteni.

Querica incavintsajaqueca Aapani Irioshi oncoramanitapojajegueti
(Mr. 9.41)

⁴⁰ “Taacagueti aajiavaquempineca shineventajiavaquempineca naroguenti ishinevenca, ariquea iquejetaca quericaca shineventaquenanea naatimpa, iriguenti ishinevenca aisa tigarancaquenaca. ⁴¹ Querica aavaquerineca tsavetacotirica Aapani Irioshi inquemisantaquerigueti yamenaquegueti iriguenti tigarancaqueriquea Aapani Irioshi, iriatimpa irishineventaquempariquea incavintsajaqueriquea inquempetacaaquempari icavintsajaquerigueti irira tsavetacotaquerica. Ariquea inquempetacaaquempari quericaca aavaquerineca comajamajatatsica iramenaquerigueti icomajamajatacaca, irishineventamajaquempariquea Aapani Irioshi incavintsajaqueriquea inquempetacaaquempariquea icavintsajaquerigueti comajamajatatsica. ⁴² Ariquea iquejetaca quericaca cavintsajaquerineca chaajaniquiri teeca iranaantavaeteji iramenaquerigueti yoguijatacotanaquena, iroguentigueti irojocavetaquenempari catsincajari irimiraqueca, arimaja aato opeapitsatari iramenacotajempaca.”

11

Joanca itigarancajiaqueriquea itsatacaanepae incoacojiaquiteri Jesoshi
(Irc. 7.18-35)

¹ Iroompaquea iteroncaquerogueti Jesoshi itsatacajiaquerigueti itsatacaanejia carajianquitsica 12, yoanaque osamanipaequi ocapiocaguetaqueti tsovironaquipae it-savetantavaeque, itsatacaantavaetaque. ² Iriraquea Joanca choocatiraja isantanatacojitaqueri. Iroompaquea icamantajitaquerigueti itsavetantavaetaque Quirishito, aisa yogueshiguetaqueri icaramirincavaetaque ashinoncajijanquitsica, itigarancajiaqueriquea Joanca mavite itsatacaanejia incoacojiaquiteriquea. ³ Icantajiapojiri:

—¿Aviguentica noguijajavecaca? ¿Irooca noncantacoguitempani noguijajaguiteterini itsipa incoraquetaque?

⁴ Iiraquea Jesoshi icantajiguiri:

—Imaicaquea poapoaitanaje pincamantajiajojajerija Joanca maasanopae pamenaguequitica aisa piquemajiaquitica. ⁵ Iiraquea shamponcajajavetatsica yamenamenaitanaji. Iiraquea teeca iranijijavetempaji yanijijianaji. Ariquea iquejejiaca avejancariipae ipejalianaja. Iiraquea teeca inquemajavetempaji iquemajianaji. Aisa iriraquea metojaguetatsica itancorejajianaji. Iiraquea coguitejacojianquitsica* imaica itsavetantimojiqueriquea itsatacajaiqueri Quenquetsatsarentsi Oganejencatatsica. ⁶ Caavijiquea irishinevaequempa quericaca incantacoguitempani intsariventamajataquena, quericaca caarica ovashiantajana.

⁷ Ariquea yoayoaitanajigueti itigarancajiaqueca Joanca iquenquetsavaetanaquequea Jesoshi iquenquetsatacoqueri Joanca, icantajiguiri maasano: “¿Taacaquea poapoaitashitaquiti ontaniqui oquitamampororoitapojaquegueti? ¿Arimpate irooquea poapoaitashitaquiti pamenajiaquitiro savorovana ojeonquiogueti choviga, ariquea oaquiti oaquiti?† ⁸ ¿Ariquea taaquea poashijiaquiti? ¿Iriocaja poashijiaquiti pamenajiaquitiri caquinte quitaataroca shipetamorenaro quitaarentsi? Pitsajiaquequea maasano quitaataroca shipetamorenaro quitaarentsi manaquea isavisaviiti itsovironaquitequi majirontatsica. ⁹ Iroosacánica ¿taaqueuea poapoaitashitaquiti? ¿Iriocaja poapoaitashitaquiti pamenajiaquitiri tsavetantaquerica Aapani Irioshi? Jeejeguitatsi, iriotaque, cotanquitsiquea iriatimpa caaviji yanaaguequeri itsipajia tsavetantajatsica. ¹⁰ Iriotaque itioncacojiqueca coramani iquenquetsatacaquerigueti Aapani Irioshi Irijanite, icanqueri:

‘Ari nontigarancaqueri iriquetica oanankuitsineca, intsavetacotempi.

Irio camantajiaquerineca igonorojia queroca pinquenanaqueni irinetsanatahitantajiaavaquempica.’✠

¹¹ Arimajaca noncantajiaquempica: maasanopae caquinteja teetarite inchoocatimateji aparato anaquerineca Joanca Viñacajatantatsica, cotanquitsiquea maasano majirontajiacarica Inquitequitica, irirajia teeca iranaajencavaevetempaji, caavijiquea icavintsajamajajiaqueri, oquejevetaca yanaajiaqueri Joanca.

¹² “Coramaniquea iroaqueragueti iparianacarogueti Joanca Viñacajatantatsica itsavetantavaequerogueti arejevaecaroquea imaica, iriraquea catsimatantajatsica icatsimatimentajiaqueriquea maasano tsavetacoguirica Inquitequitica quero icotani imajirontaguete, teetarite irinintajigueti inquemisantajiteriji aatonijite quericaca peguiritsi Aapani Irioshi Imajirote. ¹³ Maasano tsavetantajatsica itsavetacojiaqueri Aapani Irioshi coramani arejevaecaroquea ichoocaquegueti Joanca Viñacajatantatsica. Ariquea iquempetaca Moishishini iriatimpa itioncacotaqueri. ¹⁴ Iiraquea Joanca iriotaquequea tsavetantatsica Iriashini piquemacojiaqueca incoraquetaque. Ariguete pinintajiaque pinquemisantajiavaquero nocanquempica, pinquemajiavaqueroquea. ¹⁵ Choocaguete piguempita pinquemantavaquempaca, pinquemeja.

¹⁶ “¿Quero icojigani caquinteja choocajianquitsica imaica? ¿Taa ipaji iquempejiaca? Iriguenti iquempejiaca chaajaniquitirajaca irisavisaviitaquegueti tsovijaguiteteriqui irantanavijitempagueti, iroompa ari incatsimatavacaajianaquempa incanquequea:

¹⁷ ‘Nocovitimojiavequempiquea
teequea pintsamarojigueti.

Ariquea namashaitimojiavetaquempi amashairentsi yamashajitica ishimampojancajitaqueti

teequea pirajaiguempaji.’

¹⁸ Ariquate piquempejiaca aviatimpajia. Icoraquevetaca Joanca teequea irishecatempaji ishecapanitaca igonorojia, aisa teequea irimirimatemparaji cachojaro, manaquea picantacojiaqueriquea: ‘Ishaquiacari ampatsini.’ ¹⁹ Ariquea imaica icoraquevetaca irira

* 11:5 Icanqueguete coguitejacojianquitsica iquejetacaacari aisa irirajia tsajianquitsica teequea iragavejeji inchiqiojita irimeshiguempaji. Pamenero Mt. 5.3. † 11:7 Icanqueguete savorovana iquejetacaacari aisa caquinte teeca intampishitashigueteroji maasano amataagantsi, aca icanti aca icanti. ✠ 11:10 Mara. 3.1.

Irijanite Caquinte, ishecataca iriatimpa, imiraca, ariqueate picantajiaque: 'Iriguenti shecajanti, iriguenti shinquitatsica, aisa iriguenti itsipavijijiapojaca covaequishejiatsica aisa capiocapiniijiguinirica majirontatsica imentaquipae.' Cotanquitsi onconijavaetanaque itsatica tsamajatatsica amenajiaqueroguetei quero ocoani yantaguetaqueca."

Jesoshi icantomajiaqueriquea guintenijiatsica Corashiniqui, Vetsairaquei aisa Caperenaوقي
(Irc. 10.13-15)

²⁰ Iroompaquea Jesoshi icantomajitsijigari ipeacaimojiaveca oshequini oacaantantatsica intati, yamenajiaqueritarite teequea incantashitatijaiguempaji intsarorentajiguempariji Aapani Irioshi, icanqueriquea: ²¹ "¡Imaicashiatsi pantsipevaetemanishiatsi aviatimpajia guintenijiatsica Corashiniqui! ¡Imaicashiatsi pantsipevaetemanishiatsi aviatimpajia guintenijiatsica Vetsairaquei! Pamenajiavecaroquea nonigaimojiavequempica oacaantantatsica intati, cotanquitsiquea teequea pinintajigueji pincantashitajiaianajempa povashiantajianajeroji picovaeguishejiacaguetei. Iriaquea guintenijavetatsica coramani Tiroqui aisa Shironequi iriome amenajiguerome, incantashitajiaianaquempamequea inquitaaajiaquemparome jiriquiquijiporoqui, aisa irigachoncaguinajiaquemparomequea cachopoquiri ironigaantaquempañijite ishimampoñancajiaica yamenajiaque icovaeguishejiaca, incantashitajiaianajempamequea. ²² Cotanquitsiquea noncanquempiquea aviatimpajia arejetapojajempaguetei incatsimatantajiaquemparica Aapani Irioshi maasano teeca intsarorentajiguempariji, caaviji irogaamajiaquempi anaamajaqueroquea incatsimajiaqueriguetei Tirojiaquitica aisa Shironejiaquitica. ²³ Aviatimpajia guintenijiatsica Caperenaوقي paventacojiaca. ¿Pamenajiaica ariji poapoaitanaque jenoqui inquitequi? ¡Aatotarite! Manaquea poapoivaetanaque isaviji Areshiqui.‡ Arimequeate impeacaajiaquemparome oacaantantatsica intati coramani ontaniqui Soromaniqui onquempetaquemparomequea nopeacaimojiaquempica aviatimpajia imaica, aatomequeate iteroncajiguirimequeate maasano, choocatatsimequea iguinteni iriguintenijitemparomequea imaica. ²⁴ Irootaquequea noncantantajiaquempica oncoramanitapojajeguetei aapojajempaguetei incatsimatantajiaquemparica Aapani Irioshi maasano teeca intsarorentajiguempariji, caaviji incatsimamajiaquempiquea aviatimpajia, anaavaequeroquea incatsimajiaqueriguetei Soromajiaquitica."

Jesoshi icanque irimagorejacaajiaqueri aventajiaquemparineca
(Irc. 10.21-22)

²⁵ Iroompaquea icanque Jesoshi: "Aapani Majirontamajatatsica, aviguenti majirontacojiacarica maasano inquitequitica aisa quepatsiquitica. Noshinevenquempiquea noncanca, pitsititapitsajiaqueritari tsajiatatsica teequea ponigaajigueriji querocaca picotani aviatimpa. Iriguentiquea ponigaajiaque teeca intsajigueji. ²⁶ Oquempetantacaca imaica, irootari pininque aviatimpa."

²⁷ Iroompaquea icantajiguiri maasano: "Yojocaguetaquenaroquea Aapani maasanopae, aisa yagavejacaamajaquena maasanopae. Teequea quericaca tsamajatatsineca querocaca icotani Irijanite Aapani Irioshi, apatiroti tsatanquitsi Aapani. Aisa teequea quericaca tsamajatatsineca querocaca icotani Aapani, apatiroti tsatanquitsi Irijanite aisa irirajia inintacajiaiqueca Irijanite intsatacaajiaqueri.

²⁸ "Caacate naatimpaqui maasano aviatimpajia magoshirentajiatatsica atsipejianquitatsica cameetsañijite nomagorejacaajiaquempinijite. ²⁹ Pinatavaquero novoatsite, pintatavaquero nontsatacaquempica, naroguentitari atsipetacotatsica teetarite naventacotimatempaji. Ariquea pamenapojero pimagorejashirentajiaque. ³⁰ Teequea omanempaji novoatsite nojocaquempica, pijoncavaetaque nonatacaquempica."

12

Itsatacaanejia Jesoshi yaajiaqueroquea tirigoitsoqui savincaguiteriqui imagorejantajitaca
(Mr. 2.23-28; Irc. 6.1-5)

‡ 11:23 Oraquea Areshi iroguenti ichoocajiaqueguetei metojatsica.

¹ Ariquea arejetapojacagueteri savincagueteri imagorejantajitaca* yoanaquequea Jesoshi icantanaca tirigomashiqui, itsipatsipaitanacari itsatacaanejia. Iriatimpajia itaseajianaque ishireguipanajanti tirigoitsoqui ishecajiacaroquea. ² Ariquea yamenajiaquerigueteri pariseojia icantsijigariquea Jesoshi:

—¡Pamenajiguerija! Yaajianaquequea pitsatacaanejia tirigoitsoqui imaica savincagueteri imagorejantajitaca, icantimentantajitirotarite irantantajitemparo.

Cotanquitsiquea iriatimpa icanqueriquea:

³ —¿Arimpate teequea pampatsajavantacojigueroji aviatimpajia itioncacojitaquerigueteri Taavini coramani ocanquegueteri itaseanaque iriatimpa aisa itsipajianacaca, teequeate onchoocatimajaniquiteji taampaquea irishecajiaquempaca?

⁴ Iquijitsitanacaquea itsovironaquitequi Aapani Irioshi† ishecatsitaroquea pan icantimentantajitica irishecajitemparogueteri, manaquea yojoquijitaquero oraniqui shitaponcarontsiqui cameetsanijite iramenaqueronijite Aapani Irioshi. Iriguenti shecataroquea saserorotejia, irioqueate cantanquitsica Aapani Irioshi. Cotanquitsiquea iriraquea Taavini ishecatacaroquea, aisa yojocajiaqueneriquea itsipatsipaitacaca.

⁵ ¿Arimpate teequeate pampatsajavanteroji aisa itioncacojanaquea Moishishini ocanquegueteri iriraquea saserorotejia antajiguinirica teemproqui itsaromentantajitarica Aapani Irioshi yantantajigaroquea savincagueteri imagorejantajitaca, cotanquitsiquea teequea irooquea impeacajaiguempaji covaequisherentsi? ⁶ Imaicaquea noncamantajiaquempiquea chooca acaniqui caavijica anaaqueroquea teemproqui itsaromentantajitarica Aapani Irioshi. ⁷ Aviatimpajia teetarite pinquemajiguerojiquea itioncacojitaquerogueteri cantatsica: ‘Caaviji anaaque nonintaquequea pimpintsatacotantajiaquempa, anaaqueroquea pijitorejajiaquenarigueteri viratsipae pintajiaquenenarigueteri.’ Pinquemajivaqueroomegueteri ocatita, aatomequea pijijiguime ipeacaaguishejiaquero covaequisherentsi. ⁸ Iriraquea Irijanite Caquinte iriguentiquea cantatsica queroca icantimentantajitica irantantajitemparogueteri savincagueteriqui imagorejantajitaca, aisa querocaquea teeca incantimentantajiteroji.

Jesoshi yogueshitajiri chompevacovetatsica

(Mr. 3.1-6; Irc. 6.6-11)

⁹ Incajaraquivaetanaquegueteri yoanaque Jesoshi shinagogaqui icapiocantapinijiacaca joriojia iquijanaquequea intsompoguiqui. ¹⁰ Ariquea ichooaque oraniqui aparo chompevacovetatsica. Irirajia catsimajiaquerica Jesoshi yamenajiaquequea querocaca incanque cameetsanijite intsaveacojiaquerinijite incatsimatacaantajiaqueteri, icoacotanajiacarica icanqueriquea:

—¿Cameetsavaequempa irogueshitantajitaquempariquea caquinte savincagueteri imagorejantajitaca?

¹¹ Icanqueriquea:

—Choocagueteri ashintanquitsica irovejate arigueteri intanquirejantanaquemparo aparo omoroqui savincagueteri imagorejantajitaca, ¿arimpate aato yoashitiri irajaateri?

¹² Iriompaqueate caquinte caaviji ipintsatacojitarite, caavijitarite yanaaqueteri oveja. Irootaquequea imaica cameetsavaequempariquea incavintsajantantajiquemparoja savincagueteri imagorejantajitaca.

¹³ Jero ipitsocashitanacariquea chompevacovetatsica icanqueri:

—Pincantavacotempaja.

Iroompate icantavacovetanaquitiga ariquea icotanaja iraco jac peamajatanaja quememajatanaja otsipapaco. ¹⁴ Ariquea yamenajivaquerigueteri pariseojia yogueshitajirigueteri, isotosotoitapanajanti ariquea isariimanatanacari Jesoshi irimetojacaantajiaqueriquea.

Isaiashini itsavetantaqueriquea Jesoshi coramani

* 12:1 imagorejantajitaca. Irirajia joriojia imagorejantaro savincagueteri saavaro. † 12:4 Ocanquegueteri itsovironaquite Aapani Irioshi iriguenti ocanacotaque quitsaarentsivanco itsaromentantajitarica iriatimpa. Icantajitiro Taverenacoro. Coajica irijanite Taavini ipeacaacaro mapipanco icantajitica teemproqui intsaromentantaquemparica. Ipajiqueroquea iroatimpa aisa itsovironaquite Aapani Irioshi.

¹⁵ Irooqueea itsatavaquegueti Jesoshi isariimanajianacari irimetojacaantajiaqueri, yoanaquequea, ariquea yoguijaguijaitanaqueri icaramirincavaeque caquinteja. Iri-atimpa yogueshiguetajiri maasano ashinoncajajatsica, ¹⁶ cotanquitsiquea icantimentajiaqueriquea aatonijite itsavetacojiguiritsi. ¹⁷ Oraqueea iquejetacaguetei imaica onetsanatacaquea icanqueca Isaiashini coramani itioncacoqueroguetei icanqueca Aapani Irioshi, icanque:

¹⁸ “Jeeri irira notigaranquica nonintacaaqueca.

Nopintsamacari, aisa noshinevencari.

Nontigaranquimoqueriquea Noshire inchoocashirentapojeri.

Iriatimpa incamantajiaqueriquea maasano caquinteguetsica querocaca cameetsari-pae, aisa querocaca teeca oncameetsateji.

¹⁹ Aatotarite icatsimatanti, aisa aatotarite itampishijencatanti, aato iquemajitiri quenavoquirontsipaequi.

²⁰ Aato ijararejiro ovi chacopi otaporejavetanacaguetei,

aato itsivaquiros ota tsivorentsi chaavogajaniquitantsica, ‡

arejevaetemporoqueea irinetsanamajatantanaquemparooca maasano, irooqueea anaan-tananquitsine tampaticatanquitsica.

²¹ Iriotaque iroguijajivaqueca caquinteguetsica, iraventajiaquemparo ivajiro.”

Icantashijitacariguetei Jesoshi iriguenti shaquiacari ampatsini

(Mr. 3.20-27; Irc. 11.14-23)

²² Iroompaqueea yaajitanaqueneriquea Jesoshi aparo caquinte ishaquiacaca ampatsini, ishamponcajataque aisa imacanataque, teequee inquenquetsateji. Iriatimpa ariquea yamenacajairi, aisa inijacajairi macanari. ²³ Yamenamenaitanaquequeea intati maasano, icantajigui: “Iriocajate Ichoviquini Taavini.”

²⁴ Irooqueea iquemajiaqueriguetei pariseojia icantajiaqueca, iriatimpajia icanquequeea: “Iriguentisa shaquiacari Veeresevo[§] imajirote ampatsinijia. Iriotaquequeea agavejacaquerica yoguisotoantaguetacananica ishaquijiacaca ampatsinipae.”

²⁵ Cotanquitsiquea itsatavaqueroqueea Jesoshi iquenquejajiaqueca, icanqueriquea: “Inchoocateguetei caquinte incapiocajiaqueriquea igonorojia impeaquempaquea imajirote, iroompaqueea ariguetei impariajanacuemparo incatsimatavacaajiaquempa, ariquea intsinampirejavacaajianaquempaquea irishiapitsajianaqueri imajirote, aparo inchoocataje, aato ichoocataji quericampa iromperatajempaca. Ariquea iquempejiaca tsipatsipaitacarica ijijiguica, ariguetei incatsimatavacaajiaquempaquea, ariquea incohincoitanacuempa intsinampirejavacaajianaquempaquea, aatotarite iconoavacajajaa. ²⁶ Ariquea iquejetaca Satanashi, ¿arimpate intigarancajempajia iriatimpa iroguisotoacuempa? Inquempetaquempaguetei imaica irisatica guisotoajatsine, ¿arimpate iragavejaque incoguitempajia impeaquempaquea imajirote maasano ampatsinijia? ²⁷ Aviatimpajia iroguenti picantajiaquena: ‘Iriguentisa shaquiacari Veeresevo’, nagavejantacarica noguisotoantsijijarica ishaquijiajaveca ampatsinipae. Iriomeguetei agavejacaquename Veeresevo, ¿ariquea quericampate agavejacaajiaqueriquea pigonorojia yoguisotoantsijijarica ishaquijiajaveca ampatsini? Irootaquequeea itsatantajitacaroca manatarite picomica aviatimpajia. ²⁸ Cotanquitsiquea iriguenti agavejacaquenaqueate Ishire Aapani Irioshi noguisotoantsijijarica ishaquijiajaveca ampatsinipae, irooqueea pintsatantajivaquempajia jac imajirontapojaca Irioshimajaca acaniqui aviatimpajiaqui.

²⁹ “Imaica noninque noncoacojiguempajia: ¿Queroqueea incojitaquerini incatsimajitaqueriguetei caavijica itampishiti iraitsijiguetaqueriquea aatoguetei iroquetita iroishojitaqueri? Oraqueate iroquetiguetei iroishotsijitaquempariguetei, ariquea iroguenti iraitsijiqueriquea.

‡ 12:20 Icanqueguetei ovi chacopi aisa ota tsivorentsi iriguenti iquejetacaaca caarica tampishitatsi, caarica agavejatsi irompetanaquempa, mana incavintsajiaqueriquea. § 12:24 Veeresevo. Iguenquetsatsarequi guiriego icanqueri Beezeboul aisa Beelzeboul. Icanqueri quimajareri Beelzebú. Iriotaque pajitatsica aisa Satanashi.

³⁰ “Irraquea teeca irishineventavaquenaji, manaquea icatsimataquena; aisa iriraquea teeca intsipatenaji nocapiocantaquegueti, iroguenti yoguivorocantaque. ³¹ Ariquea noncantajiguempi imaica, taaca impeacaajiaquempaca caquinte covaeguisherentsi irooca incantaguishevaeque taaca opajitapae, iriraquea Aapani Irioshi iragavejaquequea irishetacotajeri aatoquea iquenquejacaajiri, cotanquitsiquea iriraquea cantaguissheta-coquerineca Ishire Aapani Irioshi aatoquea ishetacojitiritsi. ³² Ariquea oquempeca quericaca cantaguissheta-coquerineca Irijanite Caquinte iragavejaquequea Aapani Irioshi irishetacotajeri, cotanquitsiquea iriraquea cantaguissheta-coquerineca Ishire Aapani Irioshi, irioquea iriguenti aatoquea ishetacojitiri, aato imaica ocaniqui quepatsiqui aisa aatoquea oncoramanitapojajegueti.

Quero incojiquerini caquinte iramenantajiquemparicate arimajaca iriguenti comajamajatatsica

(Irc. 6.43-45)

³³ “Pamenaquerogueti inchato cameetsatsica, pintsaque cameetsataquequea osovenapae. Aisa pamenaquerogueti inchato teeca oncameetsateji, pintsaque tee oncameetsateji osovena. Iroguentitarite itsatantajitaroca inchato, yamenajitiro osovenena.* ³⁴ Quejiaquempiquea irijanijiate sanatari, ¿queroquea pincojiaquempani pincantajigueronijite cameetsaripae?, aviguentijitarite covaeguishejiatsica. Maasanotari iquenquejacogiguetica irootaquequea iquenquetsatacogiguetica. ³⁵ Ariquea iqempetaca caquinte comajamajatatsica iroguenti iquenquetsatacoguetaque cameetsaripae, irootari iquenquejacoguetaque. Irraquea teeca incomajamajatempaji iroguenti iquenquetsaguishetaque taaca opajitapae, irootarite iquenquejacoguetaque iriatimpa. ³⁶ Noncantajiaquempiquea, oraquea aapojajempagueti incatsimatantajiaquemparica covaeguishejiatsica, inquenquejacaajitaqueri maasanopae iquenquetsaguishediaquea intati. ³⁷ Aritarite cameetsarica picantaguetica, irishinevenquempiquea. Cotanquitsiquea teegueti oncameetsateji picantaguetica, incantajiaquempi: ‘Imaica pantsipeventaquemparo.’ ”

Irraquea covaeguishejiatsica icantajivecariquea Jesoshi iramenacaajiaquerime oacaantantatsica intati

(Mr. 8.12; Irc. 11.29-32)

³⁸ Ariquea icoraquetashijiapojaqueri Jesoshi pariseojia aisa tsatacaantajiguiroca itioncacotanaqueca Moishishini, icanqueriquea:

—Tsatacaantantatsica, nonintajiaque ponigaajiguenaro oacaantantatsica intati.

³⁹ Icanqueriquea Jesoshi:

—Aviatimpajia otiavaejiaquempiquea covaeguisherentsi, teequea quisho poajigueriji Irioshimajaca, pinintantajiavetacaca nonigaajiaquemprome oacaantantatsica intati, cotanquitsiquea aatoquea nonigaajiguiimpirotsi. Iroguentiquea nonigaajiaquempi otsipa, onquempetaquemparoquea iquejetacaajitacarigueti tsavetantatsicani Jonashini coramani. ⁴⁰ Piquemacojiaqueriquea Jonashini iniaquerigueti quejevatarica iririjegui quiterinqueni ariquea icaratacovaetanaquequea 3 savincaguiteri ontaniqui imotijaqui. Ariquea inquejetaquempaquea oncoramanitapojajegueti irira Irijanite Caquinte incaratacovaetanaque 3 savincaguiteri intsompogui quepatsiqui.

⁴¹ Oncoramanitapojajegueti aapojajempagueti incatsimatantajiaquemparica Aapani Irioshi maasano teeca intsariventajiguempariji, iriraquea Ninivejiaquitica incatintiitsitanaquempaquea intsavetacotsijiaquempiroquea pantaguishejiaqueca. Maasanotari Ninivejiaquitica iquemisantajiaqueriquea Jonashini itsavetantimojiaquerigueti, ishimampojancajianaca yamenajiacagueti ipeacaaguishejiacagueti covaeguisherentsi, ariquea icantashitatijaianaca. Cotanquitsiquea imaica icoraquevetapojaca caavijica anaavaequerica Jonashini, teequea pinquemisantajiaquaqueriji. ⁴² Ariqueate onquejetaquempaquea aisa oncoramanitapojajegueti oraquea imajirojiate Savajiaquitica oncatiitsitanaquempaquea ontsavetacotsijiaquempiro pantaguishequeca

* 12:33 Ari iquejetaca caquinte: iroguenti yamenantajitari ipeacaaguetaacaca, ari intsajitaqueri arisa icoca. Irraquea teeca incameetsateji iroguenti ipeacajaiaca covaeguisherentsi. Irraquea cameetsari oavaetanaque iroguenti ipeacaaguetaacaca cameetsaripae.

aviatimpajia choocajianquitsica imaica. Coramanitari ocoraquetashivaequeri Saromonini oquemisanqueriquea itsatacaquerogueti, oquenaetaipojaque jmm osamani oquemacoquerigueti itsamajati. Cotanquitsiquea imaica icoraquevetapojaca caavijica anaavaequerica Saromonini, teequea pinquemisantajiavaqueriji.

Ampatsini icoraquitashitajiri aisa ishaquiavetacaca
(Irc. 11.24-26)

⁴³ “Oraquea irovashiantanajerigueti ampatsini iriraquea ishaquiavetacaca, iroanaque ontaniqui oquitamampororoitapojigueti irinintavequempa irimagorejavaequeme. Cotanquitsiquea iroompa iramenavetapojaquemparo querocampa inchoocateni oraniqui. ⁴⁴ Inquenquejitsitanaquemparoquea incanque: ‘Noantanajemparota notsovironaquite nosotoantavetanacaca.’ Ari incoraquevetajempa iramenapojajeri ishaquiavetacaca quempeca tsovironaqui ipishijitirogueti inetsanajitirogueti, cajaraguetejisano oncanquempa tecatsi choocatanteparone. ⁴⁵ Ariquea iroanaque iraaquiteri itsipajia 7 ampatsini caavijica igajaiaca. Iroompaquea irishaquiapijapojempari irira ishaquiavetacaca iroaqueragueti, ariquee iriatimpa ari incotanajempa arimpa irogaamajatanajempa. Ari onquejetimojiaquempariquee covaeguishejiatsica choocajianquitsica imaica.”

Iriiro Jesoshi aisa iriguentijeguijiate
(Mr. 3.31-35; Irc. 8.19-21)

⁴⁶ Choocatiraja iquenquetsatacaajiaquerigueti Jesoshi omporoguijajianquitsica, oco-
raquepoji iriniro aisa iriguentijeguijiate icatintiitapojaca sotsiqui, inintajiavetaca in-
quenquetsatacaajiaquerime. ⁴⁷ Iroompaquea icamantajiqueriquea Jesoshi icantajitiri:
—Coraquetaque piniro aisa piguentijeguijiate, ichoocapoji sotsiqui, inintajiaque in-
quenquetsatacaajiaquempi.

⁴⁸ Cotanquitsiquea iriatimpa icanqueri camanquerica:
—¿Taa opaji iinani? ¿Taa ipaji iguentijeguijia?

⁴⁹ Iroompaquea ipitsocashijianacari itsatacaanejia, ijicojiaqueriquea icanque:
—Jeeri iricajia nopeajiaquea iinani aisa iguentijeguijiate. ⁵⁰ Querica netsanama-
jatiroca inintaguetica Aapani choocatatsica inquitequi, iriotaque nopejiaque iguenti-
jeguijiate, tsiojipae, iinanipae.

13

Jesoshi iquejetacaacari pishoncaguitiroca oitsoqui
(Mr. 4.1-9; Irc. 8.4-8)

¹ Iroompaquea oraticaquea savincaguiteri isotoanaji Jesoshi tsovironaquiqui, yoanaque otsapijiqui iniromotija, isavicapoji. ² Yomporoguijaventajiapojacariquee icaramirincavaetanaque caquinteja, ariquee itetanajaquea quenajarontsiqui isavicaque. Maasano omporoguijajianquitsica isavisaviiiquequea ocaratsapijiqui. ³ Iroompaquea itsatacaajiaqueri iquempetacaaguetacaroquea taaca opajitapae, icanqueriquea: “Yoanaque aparo caquinte impishoncaguitero oitsoqui. ⁴ Ipishoncavoncaquitanaqueroquea tacororo tacororo, itsitacaguetanaquero. Oconoagarancaqueate asacaraaguetanaca quenavoquirontsiqui, iroompaquea isavisaviitashipojiroquea tsimeripae ishecapijapojacaro. ⁵ Otsipa oconoagaranca asacaraanaca mapiporoquiqui, taampina otsoroavetanaca, teemajaca onchoocamajatenica quepatsi. ⁶ Iroompaquea icatsirincaguitevetanaca catsirincaiteri, itsianaqueroquea oshimpeguiricanaque ometojanaque, teetarite oamajateji ovarishitsa isaviqui, ojocaavaquerotarite mapi. ⁷ Oconoacaquea otsipapae asacaraanaca ochooacaguegueti ovarishitsa samerento. Iroompaquea otsoroitsivetanaca, arimpaquea otsoroitsitanacaquea samerento iroatimpa otsincoanaqueroquea ometojanaquero. ⁸ Otsipa oconoacaquea asacaraaguetanaca ocameetsaguitetaquegueti quepatsiqui, otsoroanaquequea otagananaanaca ochoocatanaque opitsaraquiacotanacaqueate oitsoqui, oconoacaquea ochooacaque 100, otsipa 60, otsipa ochooacaque 30. ⁹ Choocaguete piguempita pinquemantavaquempaca, pinquemeja.”

Jesoshi itsatacajiaiqueriquea quero ocoani iquempetacaantaguecaroca
(Mr. 4.10-12; Irc. 8.9-10)

¹⁰ Iroompaquea iquempejiquempejiipojacari itsatacaanejia icantiriquea: “¿Queroquea ocoani pitsatacajiaiquerigueti caquinteja piquejetacaacanari intati?”

¹¹ Iriatimpa icanqueriquea: “Imaica ininque Inquitequitica pintsajiaqueroquea aviatimpajia queroquea icotani imajirontaguete iriatimpa, cotanquitsiquea iriatimpajiaquea aatoquea itsajiguirotsi. Teetarite intsajiteroji paesatoniqui, aviguentiquea tsajiaquerone imaica. ¹² Quericaca choocatanquitsica itsataqueca, inquitomoguenquejaneta-caamajaqueri, oavaetanaque intsamajatanaque. Cotanquitsiquea quericaca teeca onchoocateji itsataqueca, capichaguenquejanejaniquitanquitsica choocavecarica irapitsatsijiqueri.* ¹³ Irootaquequea noquejetantajiacarica imaica notsatacajiaiqueriguete iriatimpajia manaquea noquejetacaacaroquea maasanopae. Iriatimpajiaquea yamenamenavetanacatari, cotanquitsiquea tee irinejeji; iquemajiavetacaquea, cotanquitsiquea tee inquemajiavaqueroji, tee intsajiavaqueroji. ¹⁴ Iquejejiacaguete imaica, onetsanatanacaquea icantaqueca Isaiashini coramani, icanque: ‘Pinquemajiavequempaquea, cotanquitsiquea aato piquemajiaavajirotsi. Pamenajiavequempaquea, cotanquitsiquea aato pitsatimajiaavajirotsi.

¹⁵ Iquishoshirentanaquetarite iricajia.

Oraquea iguempita tee inquemamajatantajemparo, aisa imatsivocajataque, aatonijite inejantajiajarotsi iroquiija, aatoniji iquemantajiajarotsi iguempita, aatoniji itsajigui ishirequi aatoniji ipitsocashijigana nogueshishirentantajiajemparica.’

¹⁶ “Cotanquitsiquea aviatimpajia caaviji icavintsajamajiaquempi Aapani Irioshi pamentajiacaroca maasanopae pamenajiaqueca imaica, aisa piquemajiaquena notsatacajiaquempica. ¹⁷ Arimajaca noncantajiaquempica, ichoocajiavetaca oshequini tsavetantajiaatsica aisa comajamajianquitsica inintajiavetaca iramenajiaqueroquea pamenajiaqueca aviatimpajia imaica, cotanquitsiquea teequea iramenajigueroji. Aisa inintajiavetaca inquemajiaqueroquea piquemajiaqueca aviatimpajia, cotanquitsiquea teequea inquemajigueroji.

Jesoshi itsatacajiaqueri itsatacaanejia taaca opajita iquejetacaaca incajaranqui
(Mr. 4.13-20; Irc. 8.11-15)

¹⁸ “Imaica iintsija pinquemisantajiavaquenaja noncamantaquempiguete taaca opajita noquempetacaaca incajaranqui. ¹⁹ Oraquea oitsoqui asacaraaguitananquitsica quenavoquirontsiqui iriguenti noquejetacaajiaquea caquinte quemisantajiavetacaroca Iguenquetsatsare Aapani Irioshi itsavetacojitiroguete, cotanquitsi tee intsajiavaqueroji. Itsatacajiaivecariquea queroquea incojiaquempani impejiaiqueriguete Aapani Irioshi Imajirote, cotanquitsiquea iroompaqueate icoraquetashiqueriquea ampatsini ipeacotacaacariquea maasanopae. ²⁰ Oraquea asacaraaguiguetananquitsica mapiporoquiqui iriguenti ogomarojiaquequea quemisantajiavetavacaroca Iguenquetsatsare Aapani Irioshi ishineventajiavetavacaroquea, ²¹ cotanquitsiquea teemajaca inquemisantamajateroji, jero ipeacotantajianajaroca taampina. Iroompaquea ororaquetashiqueriquea atsipetagantsi, irooca icatsimatimentajiaqueriquea Iguenquetsatsare Aapani Irioshi, ariqueate icohicoitanaca yovashiantajianajiroquea, iquejejianaja iroaqueraguete tequerataguete intsariventimatempariji. ²² Oraquea asacaraaguiguetananquitsica samerentoqui iriguenti noquempetacaajiaquea quemajiavetacaroca Iguenquetsatsare Aapani Irioshi iquemajiavetavacaroqueate, cotanquitsiquea iroompa irooqueate aisa iquenquejiaavajiroquea maasanopae choocaguetsatsica quepatsiquitica. Ariquea iriatimpajiaquea teequea inquenquejiajajeroji Iguenquetsatsare Aapani Irioshi, iroguentiquea iquenquejiaanaji incarajiavequeroquea yashintaguecaca. Querocampate incojiaquempani intsariventamajiaquempariguete. ²³ Cotanquitsiquea oraquea

* 13:12 Quericaca nintanquitsineca inquemqueroquea Iguenquetsatsare Aapani Irioshi, arimpaquea intsamajatanaquero. Cotanquitsiquea iriraquea teeca irininteji inquemisanteroji, inquemavetaquempaguete capichaji, manaquea omanapitsatanaquempani, aatoquea itsatimatirotsi.

asacaraaguigueta nanquitsica ocameetsaguiteta quegueti quepatsi iriguenti ogomarojia-
aque quemisantajia vaquero ca Iguenquetsatsare Aapani Irioshi, ari quea itsaromentama-
jatariquea iriatimpa. Ari quea ichoocajia que cameetsa, iquempejiacar quea oitsoqui
choocatananquitsica oitsoqui 100, itsipa iquempejiacar quea oitsoqui choocatananquit-
sica 60, itsipa iquempejiacar quea choocatananquitsica 30.”

Jesoshi iquempetacaacar o tojari conoacaroca tirigoitsoqui

²⁴ Ari quea iquejetacaajiacanari Jesoshi otsipa, icanqueri: “Imaica iroo quea nonquem-
petacaaquemparo quero icotani imajirontaguete Inquitequitica. Yoana que caquinte ip-
ishoncavoncaquitanaquero quea tirigo cameetsaitsoqui iniganquitejirequi. ²⁵ Iroompa
imaajianajiguete maasano, yananincaquitiquea itsipa catsimataquerica ipishoncavon-
caquitapanajantiro tojari quempevetaroca tirigo itsitacavaetanaquero quea oraniqui.
²⁶ Iroompa quea otsoroavetanaca tirigo, arimpaqueate otsoroitsitanaca tojari iroatimpa
omoncarajanacar quea. Ora quea ochoocatanaqueguete oitsoqui tirigo, yamenajiquero-
quea manasacanica oconoacar quea tojari. ²⁷ Irirajia amijiguirica yamenitsijigaro-
quea icoraquejiapoja que icantajiapojiri ashintaroca: ‘Nomajirote, arimpate namena-
jia que iroguenti pipishoncavoncaquitiquea tirigomajaca. ¿Imaica quea queroca quea
oquenapojini tojari?’ ²⁸ Icantiriquea iriatimpa: ‘Ooshiatsi, iriocajate quempequero-
quea catsimataquenaca.’ Icantajiana que amijiguirica: ‘¿Ari pinique noanoaitana que
nontsopajajiajatero?’ ²⁹ Icanque quea iriatimpa: ‘Aatota, pitsipatacaantajigarotsishiatsi
tirigomajaca. ³⁰ Ari quea ococaniquea osampatanaqueguete, ari quea nontigaranquitsi-
jiguempariquea aviguijiaqueroneca ari quea intsoajitsitemparoquea tojari iroishovati-
vaequero quea intaitsijiguemparoquea. Iroompa iroo quea irajia que quea tirigomajaca
intariajiaquero quea tsovironaquiqui itariantajitaroca tirigoitsoqui.’ ”

Jesoshi iquempetacaacar quea oitsoqui moshitaasa

(Mr. 4.30-32; Irc. 13.18-19)

³¹ Iroompa quea iquejetacaajiacanari otsipa, icanque: “Imaica nontsavetacotaquero-
quea quero quea icotani imajirontaguete Inquitequitica, ari quea nonquempetacaaque-
mpiro oitsoqui moshitaasa ivintyacajitiroguete iniganquitejirequi. ³² Iroatimpa caav-
iji ana que ochaamirijaquijaniquiva que, cotanquitsiquea ontsoroanaqueguete iniro-
jempetanaque quea anaaguequero quea otsipapae panquirentsipae chaamirijaquitsica
oitsoqui. Ontsegotsegoatanaquempa quea onquempetanajemparoquea inchato, in-
choocatantajianaquemparoquea tsimeripae.”

Jesoshi iquempetacaacar quea anempoacaguiroca pan

(Irc. 13.20-21)

³³ Iroompa quea iquejetacaajiacanari otsipa, icanque quea: “Imaica quea nontsave-
tacetanaquero quea quero quea icoqueroni Inquitequitica imajirontaguete, ari queate
nonquempetacaaquemparo anempoacaguiroca pan. Pamenirotarite manquigar-
entsi ompeacaguemparoguete pan, aaque quea apamontiinaro tirigovane, ari quea on-
conoanquempar o anempoacaguiroca, ari quea oncotanaquempa anempoacaanaquero
maasanose.”

Quero quea ococani iquempetacaantaguecaroca Jesoshi

(Mr. 4.33-34)

³⁴ Ari quea iquejejaqueri Jesoshi imaica maasano itsatacaajiaquerica caquinteja,
mana iquempetacaajiacanari. Teetarite intsatacaajigueriji intati, taaca opajitapae inin-
queca intsatacaajiaqueriquea, iroguenti iquejetacaagueta caroquea. ³⁵ Ora quea iquem-
petaquero guete imaica iroguenti ontsanatanaca itioncacotanaqueca tsavetantatsicani
coramani, icanque quea:

“Nonquenquetsatacaajiaqueriguete, iroguenti nonquejetacaagueta quemparoquea taaca
opajita.

Nontsavetantaguequero taaca opajita iroquetinica itsitijiguevecaca paesatoniqui iroa-
queraguete quea ipeacajicaroguete quepatsi arejevaetapojaro quea imaica.”

*Jesoshi icamanqueriquea itsatacaanejia taaca opajita itsavetacotaqueca iquenquetsatacota-
quero guete tojari conoacaroca tirigo*

³⁶ Ariquea iquenquetsatacaajiavajiri Jesoshi capiocaventajiacarica, yoanaji tsvironaquiqui iquijapojaque. Iriraquea itsatacaanejia iquempejiquempejiipojiri icanqueriquea:

—Nonintajiaque poguisotoguenaroja incajaranquitica piquempetacaajiacanarogueti tojari conoacaroca tirigo.

³⁷ Icanque Jesoshi:

—Iriraquea pishoncavoncaquitaqueroca tirigo cameetsaitsoquiri iriguenti Irijanite Caquinte. ³⁸ Oraquea niganquiteji, iroguenti maasanopae quepatsi iguintenitantajiacaca caquinteguetananquitsica. Oraquea cameetsaitsoquitatsica, iroguenti quejecari caquinteja peajiaquerica Aapani Irioshi Imajirote. Oraquea tojari, iroguenti quejecari caquinteja irashijia ampatsini. ³⁹ Iriraquea catsimatantatsica pishoncavoncaquiteroca tojari, iriguenti imajirote ampatsinijia. Oraquea nocanquegueti irajiaquerogueti tirigoitsoqui, iroguenti notsavetacotantaque onteroncanajempagueti quepatsi. Irirajia aajiaqueroneca iriguentijia irashivantijitete Aapani Irioshi. ⁴⁰ Imaicaquea pamenajiaquerogueti itsopajajiaquerogueti tojari itajiaquerogueti, ariquea onquempetaquempa oncoramanitapojajegueti onteroncanaquempagueti quepatsi. ⁴¹ Iriraquea Irijanite Caquinte intigarancajiaqueri irashivantijitete, incapiocajiaqueriquea covaeguisheta-caajiacarica itsipajia, irirajia aisa maasano peacaaguishejiacaroca covaeguisherentsi, aatoniji iconoajiajari majirontajiacarica, ⁴² impishoncajiaqueriquea camorecariqui. Oraniquiquea oraniqui incoquempaniquea iriraaguitempani irantsicayajijiaquempa. ⁴³ Ariquea irirajia comajamajatanquitsica iroaroaitanaque ichoocatigueti Aapani Irioshi imajirontagueti, inquempejianaquempariquea catsirincaiteri itsirencashimpoquirereregueti. Choocagueti piguempita pinquemantavaquempaca, pinquemeja.

Jesoshi iquempetacaacaro itsitijitirigueti ooro

⁴⁴ “Imaica nontsavetanqueroquea queroquea icotani imajirontagueti Inquitequitica, ariquate nonquempetacaquempariquea ooro itsitijitirigueti iquitajitirigueti quepatsiqui. Ariquea yamenapojiaquerigueti itsipa caquinte, iquitatsitanajiaquea. Ishinevaetanaca yojocantaguetaqueeroquea maasanopae yashintaguecaca yaancaroquea imentaquipae. Iroompaquea yoanaque ivegarataqueroquea quepatsi ichoocatantacaca ooro.

Jesoshi iquempetacaacaro peerera vegaramajatatsica

⁴⁵ “Oraquea imajirontagueti Inquitequitica iroguenti oquempetacari jocantaguetiroca taaca opajita. Iriatimpa yoanaque yamenaguetaquequea peerera† vegaramajatatsica. ⁴⁶ Ariquate yamenapojiaqueroquea apaitsoquitiro caavijica anaaguequeroquea oquitasaancorerencavaeque, ovegaramajavaeca oshequi. Yojocantaguetaqueeroquea maasanopae yashintaguecaca yaantaguecaroquea imentaquipae ivegaratantaguetacaroca oratica peerera.

Jesoshi iquempetacaacaroquea iniromantsa

⁴⁷ “Imaicaquea nontsavetacotantaqueroquea queroquea icotani imajirontagueti Inquitequitica, iroguenti nonquempetacaquemparoquea yanquitacotantajitarigueti shimaguetatsica iniromotijaqui, inoshicotaqueriquea icantashitatiaguecaquea oshequini. ⁴⁸ Itseraiquitatigaroquea yaitsitajaroquea yaajitanaqueroquea imparaguequi. Ariquea isavisaviitanaque ashincaroa imantsatsite icoguiaguetaqueriquea cameetsaguetatsica itejiaqueriquea cantiripaequi. Iriraquea teeca incameetsateji manaquea ipishoncaguetavaqueri. ⁴⁹ Ariquea onquempetanaquempaquea oncoramanitapojajegueti onteroncaguetanaquempagueti quepatsi, incoraquecoraqueipoje irashivantijitete Aapani Irioshi incapiocajiaqueriquea comajamajajanquitsica iroashijiaquempariquea maasano covaeguishejiatsica, ⁵⁰ impishoncajiaqueriquea camorecariqui. Ontaniquiquea ontaniqui incoquempaniquea iriraaguitempani irantsicayajijiaquempa.”

⁵¹ Icanque Jesoshi:

† 13:45 peerera. Chooqa quantijaqui quejevatarica chopiro. Onquijaquerigueti capichaji impanequi, aseraqueri, ari intiritapiniquero cameetsaniji oncarenitanaque. Oncoramanitapojajegueti ompeanaquempa icantajitica peerera (icanquero quimajareri perla), quitasaancorerencavaeque, impeacaquemparo nenquetsiqui. Ovegaravaetaca.

—¿Ari piquemajiaquero maasano nocantajiaquempica?

Iriatimpajia icanqueriquea:

—Jeeje, Nomajirote.

⁵² Icantiriquea:

—Maasano tsatacaantajiguiroca itioncacotanaqueca Moishishini itsatacaamajajita-queriguetai queroquea icotani imajirontaguetai Inquitequitica, inquempajiaquempariquea ashintaroca tsovironaqui icapiocantaguetaqueroqueti yashintaguetacaca. Iragevajaque iraguetaquero cameetsaguetatsica choocatatsica intsompogui, iroquetinica-pae aisa iroaqueraguetatsica.‡

Itsatacaantavetacaguetai Jesoshi Nasarequi

(Mr. 6.1-6; Irc. 4.16-30)

⁵³ Ariquea iteroncanaqueroqueti Jesoshi iquempetacaaguetaacarogueti, yoanajiquea.

⁵⁴ Yarejetapojacaguetai iguinteniqui itsatacaantapojaji ontaniqui shinagogaqui icapio-cantapinijiacaca Joriojia. Yamenamenaitanaquequea intati maasano quemisantajia-querica, icantajiaque:

—¿Queroquea oquenapojini maasanopae ocativa itsatica iricativa? ¿Taaquea agavejacaqueri yagavejantacaca yonigaantaguequeroquea oacaantantatsica intati?

⁵⁵ ¿Teecajate irioquea irijanite caripintero[§] choocatatsica aguinteniaggiuetai? Oraquea iriniro iroguenti Maria. Iriraquea iriguentijeguijate iriguenti Santiago, Jose, Shimo aisa Jorashi. ⁵⁶ Ariquea oquempejiaca itsijoitepae iroatimpajia iroguenti oguinteni-jiaca ocaniqui. ¿Queroquea oquenapojini itsatica aisa iragavejane?

⁵⁷ Ariquea teequea irinintajigueji inquemisantajigueriji, iroguenti icatsimajiaqueri, cotanquitsiquea Jesoshi icanqueriquea:

—Iriraquea tsavetantiroca icanquerica Aapani Irioshi ishineventajitavajari que-rocaguetai yoanaqueni osamani, cotanquitsiquea ichoocavecaguetai iguinteniqui aisa itsovironaquitequi, teequea irishineventajitempariji, teequea inquemisantajigueriji.

⁵⁸ Ariquea teemajaca ironigaantaguetajeroji oraniqui oacaantantatsica intati, tee-tarite inquemisantajigueriji, manaquea iquenquejajiaque: “Caaricaja.”

14

Erorishi iquenquejajiro imetojacaanqueriguetai Joanca Viñacajatantatsica

(Mr. 6.14-29; Irc. 9.7-9)

¹ Iroompaquea iriraquea Erorishi* imajirojiate Garireaquitica iquemacoqueriquea Jesoshi. ² Ariquea icantajiaqueri amijiguirica:

—Iriguentiquea Joancani Viñacajatantatsica nometojacaantaqueca. Tancorejanajishi-atsi, jero iquejetamopajaroca imaica yagavejamajatantacaca yonigaantaguequeroquea oacaantantatsica intati.

³ Oraquea chapinqui iriraquea Erorishi yaacaantaqueri Joanca yoishotacaanqueriquea cavorejatsariqui, isantanatacotacaantaqueri, irooriji yamenaquequea icantomajimen-tavecari Eroriashi yaapitsaqueriguetai iriguentijeguite pajitatsica Jeripe. ⁴ Iriraquea Joanca icanqueriquea Erorishi: “Teetarite oncameetsateji paapitsaqueriguetai iman-quistigare piguentijeguite.”

⁵ Irootaquequea inintantavetacaca Erorishi irimetojacaantaquerimequea, cotanquitsiquea itsaroacaajiacariquea maasano choocajanquitsica oraniqui, yamenajiaqueriquea iriguenti tsavetantatsica. ⁶ Iroompaquea apojacaguetai isavincaguiterte Erorishi icajemajiaqueriquea itsipavijijiacaca irishecatimojiaquempariquea. Ariqueate ishecashe-caica, oquijitsipojacaquea orijanite Eroriashi otsamaropojaquequea opitsopitsovae-tanacaquea ocanca. Ishineventsitanacaro Erorishi, ⁷ icanqueroquea:

‡ 13:52 Iroquetinica-pae ocatacoquero itioncacotanaqueca Moishishini aisa itsipajia tsavetantaquero-ca icanquerica Aapani Irioshi coramani. Iroaqueraguetatsica ocatacoquero imaicativa itsavetanqueca Jesoshi. § 13:55 Iriraquea caripintero iriguenti tsamajaguetairoca inchacota, ipeacaantaguecaro shitaponcarontsipae, taaca opajita. * 14:1 Iriratica Erorishi irio icantajitica Erorishi Antipashi. Iririni aisa ipajita Erorishi, irio majirontanquitsica ivoaqueguetai Jesoshi (pamenero Irc. 1.5; Mt. 2.1-19).

—Imaica noncanquempi arimajaca nojocaquempiroquea taaca opajita pamanaque-naca, aatotarite namatavijimpitsi. Incatsimatimentenarota Aapani Irioshi aatogueti nonetsanatiro nocanqueca.

⁸ Otsatacaitsitaroqueea iniro, ariquea ocampoajiri Erorishi:

—Pojocacotsitenaro acaniqui iguito Joanca Viñacajatantatsica shimencoqui.

⁹ Ariquea icotanaca iriatimpa ishimampojanacanaca, cotanquitsiquea iroorijite icanqueroquee, aisa iquemajiaqueriquea maasano icajemajiaqueca, irootarite icantantacaca: —Iroosacanicate intsiquetirote.

¹⁰ Itigarankuitsitariquea coareta ichoocaquegueti Joanca isantanatacotacagueti irijitorejauiteri iraacotanaqueneroqueea iguito. ¹¹ Ariquea yaacotanaqueneroqueeate yojocacopojaquenero, irooqueate jocacotavaqueneroqueea iniro. ¹² Iroompaqueea iquemacojiaqueriquea itsatacaanejia Joanca, icoraquetashijajiri yaajianajiro itsino iquitajiajiro. Ariqueate yoayoaitanaji icamantajiaquitiri Jesoshi.

Ishecatacaajiacari Jesoshi 5,000 shirampari

(Mr. 6.30-44; Irc. 9.10-17; Jn. 6.1-14)

¹³ Iroompaqueea iriraqueea Jesoshi iquemacoquerigueti Joanca imetojacaantajiquerigueti, yoanaque osamani teegueti inchoocateji caquinte, iriguenti itsipatsipaitanaca itsatacaanejia, iquenajatantajanacaroea quenajarontsi. Cotanquitsiquea iquemacojiaqueriquea choocajiatsica oraniqui guinteninintsipaequi, yoguijaguijaitanaqueriquea yanijiniijiitanaque. ¹⁴ Iroompaqueea yarejerejeipojaca yoncotsinampijaatacojiapojaca. Irooquea iterejavetanaca Jesoshi yamenajiapojiriquea icaramirincavaequee caquinteja, ipintsatacojianacari maasano. Yogueshiguetajiri maasano ashinoncajajianquitsica. ¹⁵ Imaicaqueea ijaguitevaetanaji catsirincaiteri, iriraqueea itsatacaanejia icantajiguiri:

—Jac ijaguitevaetanaji catsirincaiteri. Ocaniquiquea ocaniqui teequee quericaca choocatatsineca, iroosacanic pintigarancajiajerija maasano irirajia iroaroaitanajetaja ontaniqui guinteninintsipaequi cameetsanjite irivegarajiaquenijite isheca irishecajiaquempaca.

¹⁶ Cotanquitsiquea Jesoshi icantajiguiri:

—¿Taaqueea opaji iroashitantemparoca? Pojocajigueneri aviatimpajia irishecajiaquempaca.

¹⁷ Iriatimpajia icantajiguiri:

—Teequeea anejeri taampate nojocajiaquenerica. Ariguenti ocarataque 5 pan, iriraqueea shima mavipaquite icarataque.

¹⁸ Icanque Jesoshi:

—Iintsijate pojocajiguenarotate.

¹⁹ Ariquea icanqueriquea maasano irisavisaviitaquequeea cataromashiqui. Iriatimpajia isavisaviitaquequeea, ariquea yaaqueroqueea Jesoshi maasano 5 pan aisa mavipaquite shima, ipaguitetanaquero inquite yamanaqueriquea Aapani Irioshi, icantaqueri: “Arioteesaa.”

Ariquea icotarejaqueroqueea pan, yojocajiaqueneriquea itsatacaanejia, iriatimpajia yojocajiaqueneriquea maasano. Ariquea iquempetacaacari shima iriatimpa.

²⁰ Ariquea ishecajiaca maasano, iquemajianaca. Iroompa iriraqueea itsatacaanejia icapiocajiajiro choocatajatsica, itejiajiro cantiriqui tseraiquipae, ocaratacovaetaji 12.

²¹ Maasano shecajianquitsica icaramirincavaeque arica 5,000. Cotanquitsiquea iriguenti itsajitaquequeea shiramparijia quenquevarijia, teetarite intsajiteroji manquigarentsijia aisa chaajaniquirijia.

Yanijijatanaquero Jesoshi ojenoquiijaare iniromotija

(Mr. 6.45-52; Jn. 6.16-21)

²² Iroompaqueea icantajiguiri Jesoshi itsatacaanejia:

—Pintepinteitanajempajate quenajarontsi qui pijivajivaitanajete pimontejacojiana-jempaquea intatiqueroqui. Naatimpa aatotaqueea nocoraquetsitaja, nonquenquetsatacaajavajerita irirajia iroaroaitanajeguete.

²³ Iroompaquea yoayoaitanajigueti maasano, iriatimpa itoncoanaque otsempiqui iramaneri Iriri, apatiroquea yoanaquequea. Ariquea opitsecanaquegueti apaniro ichooaque. ²⁴ Iriraquea itsatacaanejia javaetanajiquea niganquijaqui ontaniqui. Oraquea iniromotija otamacojatanaquequeate oshequi, oshaguishaguivaetanaqueroqueate quenajarontsi joac joac, ochovigajencapojiqueate choviga jeoc jeoc, oguipigui-
ipiacojiaqueriqueate. ²⁵ Ariquea irooshipojajigueti osavincaguitetanaje, icoraquepojaji Jesoshi, yanijijatapojiro jenoquija iniromotija. ²⁶ Iriraquea itsatacaanejia yamenitsijigariquea yanijijatapojiro jenoquija itsaroajianaque, icajemajianaquequea:

—¡Jeerishiatsi sashinti!

²⁷ Icantsitanaca Jesoshi:

—Pintampishishirentajianaque. Naroguenti, aatoquea pitsaroajiguitsi.

²⁸ Icantiriquea Peerero:

—Nomajirote, aviguentica, pincajemenashiatsi nagaticajatashitanajempita ojenoquijaarequi.

²⁹ Icantiriquea Jesoshi:

—Caacatequetirote.

Yanijirejanaque Peerero yagaticajatsivetanacaroquea iroanaqueme ichooaquegueti Jesoshi. ³⁰ Cotanquitsiquea yamenavaqueroquea ochovigajencapojiquea itsaroitsitanaca, ariqueate icotanaca itsitijaatanaque, icajemitsitanaca:

—¡Nomajirote, paavajenashiatsi!

³¹ Itaampinatsitanacaquea icantajempequitanaca Jesoshi, yaitsitavajariquea iracoqui, icanqueriquea:

—¡Teemajaca pintsateji arimajaca nagavejavaeti! ¿Querocaquea ocoani pitsaroanacaca?

³² Irooquea itehiteitanajatiga quenajarontsi qui jac opeanaja choviga. ³³ Maasano choocajianquitsica quenajarontsi qui igueroventajianacari Jesoshi, icanqueriquea:

—Arimajaca aviguenti Irijanite Aapani Irioshi.

Jesoshi yogueshiguetajiriquea ashinoncajajianquitsica Jenesarequitica

(Mr. 6.53-56)

³⁴ Imontejacojianajaquea yarejejiapojajaro Jenesarequi. ³⁵ Irirajia choocajiatsica oraniqui yamenajivaquerigueti iriguenti Jesoshi, ishiashiaitanacaquea icamantajiava-
caanaca itsitacaguitejajianaqueroquea iguintenijigueti. Yaajianaqueneri maasano ashinoncajajianquitsica irogueshiguetajeri. ³⁶ Iroompaquea iriatimpajia icantapojiri:

—Intsishiatsi, Nomajirote, noninque inchagatsijivetavaquempiro oshipaquijaniqui piitsaare.

Maasanopaetari chagatsijiaquerica ipeaguetanaja.

15

Jesoshi itsatacajiaqueriquea itsatacaanejia taaca opajitapae covaeguishedantatsica

(Mr. 7.1-23)

¹ Iroompaquea icoraquecoraqueipoji pariseojia aisa tsatacantajiguiroca itioncaco-
tanaqueca Moishishini, iquenaquenaipoji Jerosarequi, icantajiguiri:

² —¿Querocaquea icohicoitacani pitsatacaanejia teeca irinetsanantajiguemparoji
maasanopae icantajianaqueca avaesatiniteni? Mana ishecajiacaquea intati teequea
inquivacomajatempaji.

³ Iriraquea Jesoshi icanqueriquea:

—¿Querocaquea picojiacani aviatimpajia teeca irooquea pinetsanantajiguempaji ican-
queca Aapani Irioshi, iroguenti pinintajiaque pinetsanajiaquequea icantajianaqueca
pivaesatiniteni? ⁴ Icantavetacaquea Aapani Irioshi: ‘Pinquemisantamajajiaquerijate piri
aisa piniro, aatoquea pipigatsajigaritsija.’ Icanque aisa: ‘Iriraquea tsavejencatirica iriri
irooca iriniro irimetojitajitempari.’ ⁵ Cotanquitsiquea aviatimpajia manaquea pican-
tashitatijaiacaroquea. Pinquenquejete imaica, choocajia irijanintajiatatsica coguiteja-
cojianquitsica icantajiavecariquea irijanite incavintsajajiaquerime irojocajiaquenerime

icoguitejacojiacaca, cotanquitsiquea aviatimpajia manaquea picantajiaquequea cameet-savaeque incanqueriquea: 'Aatoquea nagaveji nojocajiguimpirotsi pamanajiaquenaca, irooriji maasanopae nashintaguecaca nashintacaajari Aapani Irioshi',⁶ ariquea aatoquea yojoquiniri. Oraquea piquempejiacagueti imaica iroguentiquea povashiantajianaquero icanqueca Aapani Irioshi, irooquee poguijaguijaitanaque icantajianaqueca pivaesatiniteni.⁷ ¡Cameetsatamampeajiatsica! Itampaticamajataqueroquea tsavetantatsica Isaiashini itioncacojianaquempigueti coramani icanque:

⁸ 'Iricatica caquinteja ishinetserventamampeaquea,
cotanquitsiquea manaquea ichoocashirentavaetaque osamani.

⁹ Itsariventamampeajiavetaqueaquea,
cotanquitsiquea itsatacantajiguica iroguenti icantajiguica caquinteja irinetsana-
jiqueca.'

¹⁰ Iroompaquea icajemajiaqueriquea maasano, icapioajiaqueriquea, icantajiguri:

—Pinquemisantamajiaavaquenaja, pintsajiavaquero noncamanquempica.¹¹ Oraquea quijanquitsica ivagantequi caquinte teequea irooquee covaeguisheshirenterineca. Oraquea sotoanquitsineca ivagantequi, irootaquequea covaeguisheterineca.

¹² Ariquea iquempejiquempejiitapojiriquea itsatacaaneja, incanqueriquea:

—¿Pamenajiavaquerimpa pariseojia itijerequivorojianaca iquemajiaquempigueti picanquerigueti imaica?

¹³ Icanque Jesoshi:

—Maasanopae panquirentsi teeca irioquee vintyaquerone Aapani Irioshi inquitequitica intsojajiqueroquea oncoramanitapojajegueti.¹⁴ Imaica ariquea iquejejiaca irirajia pariseojia, iquempejiacari shamponcajatatsica irancatsavacojiaquerigueti irapishamponcajariteni. Oraquea inquempetaquempagueti imaica mavite shamponcajari irancatsatavacaajiaquempagueti iroaroaitegueti, mavitequea intanquiretanquireitanaque oogarajacagueti.

¹⁵ Icantsitanaca Peerero:

—Intsijate poguisotoguenaroja pitsavetacotaqueca incajaranqui.

¹⁶ Icanque Jesoshi:

—¡Arisacanca piquempejiacaquea aviatimpajia tequerata pinquemajiguenaji!

¹⁷ ¿Arimpate teequea pinquemajiguenaji nocantajiaquempica? Nocanque maasanopae ishecajiguetaacaca manaquea oanaque itsicotoqui, ariquea irishitacojitajero.¹⁸ Cotanquitsiquea maasanopae iquenquetsaguishejitaqueca oquenantapojacaro shirentsi, irootaquetari iquenquejaguishejitica. Irootaquequea covaeguishetantantquitsica.¹⁹ Ariquea oquenapoji ishirequi taaca opajitapae covaeguisherentsipae, iquenquejaguishejiaquero taaca opajitapae coguisherentsipae, imetojantajigui, yoashijiguiro manquigarentsi manquigajiatsica aisa tequeratatirajaca irimanquigajitemparoji, yaitsitantajigui, itsojeventantajiga, iquenquetsatacoguishetantajigui.²⁰ Maasanopae ocativa ipeacaaguishejiguetaacaca irooquee iroguenti ocovaeguishetanti, cotanquitsiquea pishecajiaquempagueti aatogueti piquivacoveta teequea oncovaeguishetanteji.

Aventanajari Jesoshi manquigarentsi ichoviquijianaqueca Canaanequitica

(Mr. 7.24-30)

²¹ Iroompaquea yoanaque Jesoshi irooshitacoquero Tiro aisa Shirone.²² Ariquea ocoraquepoji quea aparó manquigarentsi ichoviquijianaqueca choocajiavetatsica Canaanequi, ocanquequea:

—¡Nomajirote, Ichoviquitanaqueca Taavini, pincavintsajenashiatsi! Chooca norijanite ishaquiacaca ampatsini atsipevaecaquea oshequi.

²³ Cotanquitsiquea iriraquea Jesoshi teequea incanteji, manaquea isanticotanaque. Ariquea iquempejiquempejiipojiri itsatacaaneja, icantajiaqueri:

—Intsijate pinquemisanteroja cameetsanijite oanajenijite, manaqueate oguijagui-
jaipojacaji ocajemavaepoji.

²⁴ Icanque Jesoshi:

—Iroguenti itigaranquimentaquenaquea Aapani Irioshi noncoraquetashijiaqueri ishiraerijia, noncavintsajajiaqueri quejejiacarica oveja peajianquitsica.

²⁵ Cotanquitsiquea iroatimpa arimpaquea oquempejitapojari ogueroventanacari, ocanque:

—¡Nomajirote, iintsishiatsi pincavintsajacotenashiatsi!

²⁶ Cotanquitsiquea Jesoshi icanqueroquea:

—Teequea oncameetsateji aapitsateri chaajaniquirijia isheca, ojoquitenempari ishishitepae.*

²⁷ Iroatimpa ocanque:

—Arimajaca, Nomajirote, cotanquitsiquea shiishi iramenacojiaquerigueti irishecapiquempagueta virajiacarica irogujivaqueroquea isaviji shitaponcarontsiqui irishecatsopequiguetaquemparoquea otsopequi ontanquirejaguetaquetaqueta.

²⁸ Icantsitaroquea Jesoshi:

—Iroosacanica, manquigarentsi, pitsamajataque nagavejaque nogueshitajero porijanite, imaica nonetsanataquempiro pamanaqueenaca.

Iroompa icanquitiguiro opeapanajanta.

Jesoshi yogueshiguetajiri oshequini ashinoncajajiatsica

²⁹ Iroompaquea yoanaji Jesoshi icantanacaquea otaravijatapojacagueta iniromotija Garirea. Coajicaquea itoncoanaque niganquitananaqui ariquea isavicaque oraniqui.

³⁰ Ariquea yoayoaitashitanaqueri icaramirincavaetanaque caquinteja yaajianaqueneriquea teeca iranijimajateji, shamponcajaripae, macanaripae, teeca ironcavacotempaji, aisa oshequini ashinoncajajiatsica ocantashititajencaguecaquea ashinoncajarantsi. Yojoquijijiapojiniri iguitiqui Jesoshi. Iriatimpa yogueshiguetajaviriquea maasano.

³¹ Iriaquea capiocajanquitsica yamenamenaitanaquequea intati, yamenajiaquetarite iquenquetsajianajiquea macanaripae teeca inquenquetsajavetempaji, yoncavacojianajaquea teeca ironcavacovetempaji, yanijimajatanajiquea teeca iranijimajavetempaji, aisa yamenajianaji shamponcajavetanquitsica. Ariqueate icohicoitanaca ishineventamajatanacari Aapani Irioshi cavintsajajiaquerica ishiraerijia.

Jesoshi yoshequiavaequeroquea pan, ishecatacaajiacari 4,000 shirampari (Mr. 8.1-10)

³² Iroompaquea icajemajiaqueriquea Jesoshi itsatacaaneja icantajiguiri:

—Nopintsatacojianacariquea irirajia, namenajiaqueriquea isavicaventajiaquenaquea ocaniqui 3 savincaguiteri, niganquiquea iteroncacojianacaquea ishecacia. Imaicaquea imaica teequea onchoocateji taaquea irishecaciaquempaca. Teetarite noninteji nontigarancajiaqueriquea iroaroaitanaje itsovironaquitequi itaseajiaquetari, aajiavaqueritsi itase quenavoquirontsiqui.

³³ Iroompaquea icantajiguiri itsatacaaneja:

—¡Ooo icaramirincavaequaquea! ¿Querocampate naajiaqueroni pan nojocajiaquenerica irishecaciaquempaca maasano inquemantajianaquempacate? Ocaniquiquea teequea quericaca guintenitantarone.

³⁴ Icanqueri Jesoshi:

—¿Querocaquea ocarashequiaqueni pan choocatanquitsica?

Icantajiguiri:

—Ocarati 7. Chooca aisa ishantyoriqui shima tee iroshequiamajateji.

³⁵ Ariquea Jesoshi icantajiaqueriquea maasanoja irisavisaviitaquequea quepatsiqui.

³⁶ Yajiricajiaquero pan caratanquitsica 7 aisa shima, yamanaqueriquea Aapani Irioshi, icantaqueri: “Ariotelesaa.” Ariquea icotarejaqueroquea pan aisa shima yojocajiaqueneri itsatacaaneja, irioqueate jocajiaqueneriquea maasano. ³⁷ Ishecaciaquea maasano, iquemajianaca. Oraquea choocatapojajatsica iteguetajiroquea itsatacaaneja cantiriqui,

* 15:26 Aapani Irioshi itigaranquimentaqueri Jesoshi incoraqueashijiaqueri ishiraerijia. Iriquetimegueti incavintsajajiaqueme teeca irijorijoigueji, onquempevetaquempame yaapitsajitirigueta isheca chaajaniquirijia irojoquitenemparigueta shiishipae.

ocaratacovaetaji 7. ³⁸ Maasanojia shecajianquitsica icaramirincavaeque 4,000. Iriguentitarite itsajique shiramparijia, teequea intsajiteroji manquigarentsijia aisa chaajaniquirijia. ³⁹ Iroompaquea Jesoshi itigarancajajiri iroaroaitanajeta. Iriatimpa itetanaja quenajarontsiqui, itsipatsipaitanajari itsatacaanejia yoajianaquequea irooshitacoquero Magarara.†

16

Iriraquea pariseojia aisa saroseojia icantajivecari Jesoshi ironigaajiaquerime oacaantantatsica intati

(Mr. 8.11-13; Irc. 12.54-56)

¹ Ariquea icoraquecoraqueitashipojiriquea Jesoshi pariseojia aisa saroseojia iramenantajiguempari, icantantajiapojacarica ironigaajiaqueri oacaantantatsica intati onquenantapojemparoja ontaniqui jenoqui inquitequi. ² Cotanquitsiquea iriatimpa icanqueriquea:

—Aviatimpajia pamenajiguirogueti ocamachoncaguitetigueti itsaparoncaguitetigueti catsirincateri manaqueate picantajigui: ‘Osaitequeraquea oncameetsaguitetamanaquequea, camachoncaguitevaequetarite.’ ³ Oraquea arigueti oncamachoncaguitetamanaquequea picantajigui: ‘Imaicaquea aatotarite ocameetsaguiteti, mampiroguitevaeaquequea, aisa seevaequetarite.’ Pitsajiavetacararo arigueti oncameetsaguitetaque aricampate aatocaja ocameetsaguiteti, cotanquitsiquea teequea pintsajigueji queroquea ocotacani oquempetantacaca imaica pinejajiavetacarogueti taaca opajitapae oacaantantatsica intati teeca iramenajiteji coramani. ⁴ Aviatimpajia otiavaetaquempiquea covaequisherentsi, pinintantajiacaca namenacajaiaquempiro oacaantantatsica intati, cotanquitsiquea aatoquea namenacajaiquimpirotsi. Iroguentiquea namenacajaiquempipi otsipa onquempetaquemparoquea iquejetacaajitacarigueti Jonashi coramani.✠

Ariquea itsinampirejajianajiri, yoanaji.

Jesoshi itsavetacotsitaqueri itsatacaantaqueca pariseojia iquempetacaacaro anempoacaguiroca pan

(Mr. 8.14-21)

⁵ Iroompaquea yoayoaitanaquequea itsatacaanejia Jesoshi imontemonteitanajaquea intatiqueroqui, ipeacojianajaroquea pan irajaianaqueme irishecajiaquempameca.

⁶ Iroompaquea iriraquea Jesoshi icanqueriquea:

—Aviatimpajia, inchiqiojitaja pishecatacojigarotsi anempoacaguiroca pan irashijia pariseojia aisa saroseojia.

⁷ Irooquea iquemajiavaquegueti iquenquetsatavacaajianaca, icanquequea:

—Manatarite yamenajiacajiquea teetarite amejia pan, jero icantantajiacaca imaica.

⁸ Iriraquea Jesoshi yamenajiavaquerigueti iquenquetsatavacaajianaca, icantsitariquea:

—¡Teemajaca pintsamajajigueji arimaja nagavejamajati! ¿Queroquea oocani piquenquetsatacotantajiacaroca pan, picanquequea manatarite namenaquempi teequea pameji pan? ⁹ ¿Arimpate tequerata pintsajigueji? ¿Arimpate teequea pinquenquejajigueroji pan ocaravecaquea 5, nocotarejaguequero noshecatacaajiacari 5,000 shiramparijia? Ariquea picapiocajajiro choocatapojajatsica oshequiacovaetaji cantiripaequi. ¿Arimpate pipeacojianajaroquea? ¹⁰ Aisa ¿arimpate teequea pinquenquejajigueroji ocaravecaquea pan 7, nocotarejaguequeroquea noshecatacaajiacari 4,000 shiramparijia? Ariquea picapiocajajiroquea choocatapojajatsica oshequiacovaetaji cantiripaequi. ¿Arimpate pipeacojianajaro? ¹¹ Oraquea nocantajiaquempigueti: ‘Inchiqiojitaja pishecatacojigarotsija anempoacaguiroca pan irashijia pariseojia aisa saroseojia’, ¿queroquea oocani teeca pintsajiavaqueroji teequea irooquea noncantacoteji pan?

† 15:39 Oratica guinteninintsi Magarara (Magdala) opajita aisa Magarani (Magadán). ✠ 16:4 Mt. 12.39-40.

¹² Ariquea itsajiaque itsatacaanejia teequa irooquea incantacoteji anempoacaguiroca pan, iroguentiquea iquempetacaacaro itsatacaantajiguica pariseojia aisa saroseojia aatonijite iquemisantajiguiritsi itsatacaantajiguueti.

Peerero icanque Jesoshi iriguenti Quirishitotatsica
(Mr. 8.27-30; Irc. 9.18-21)

¹³ Iroompaquea yoanaquequea Jesoshi icantanacaroquea oraniqui irooshitacarogueti guinteninintsi pajitatsica Sesarea Piripo. Ariquea icanqueriquea itsatacaanejia:

—¿Queroquea icanqueni caquinteja? ¿Taa ipaji iricatica Irijanite Caquinte?

¹⁴ Iriatimpajia icantajiguiri:

—Iconoagarantajiacica icantacojiaquempi: ‘Iriguenti Joancani Viñacajatantatsica.’ It-sipa cantajiananquitsica: ‘Iriguenti Iriashini.’ Itsipaquea cantajiananquitsica: ‘Iriguenti Jeremiashini, teegueti irio, iriguenticaja itsipa tsavetantatsicani paesatinica, itancorejanajishiatsi.’

¹⁵ Ariquea icantajiguiri:

—Aviatimpajia, ¿quero picantajiguini? ¿Taa nonaque naatimpa?

¹⁶ Icantsitanaca Shimo Peerero:

—Aviguenti Quirishitotatsica, * Irijanite Aapani Irioshi anijatsica.

¹⁷ Icanqueriquea Jesoshi:

—Pishinetaca, Shimo, irijanite Jonashi, teetarite irioquea caquinteja tsatacaajiguempirone ocatica picantaquenaca imaica. Iriguenti tsatacaaquempiro Aapani inquitequitica, icavintsajaquempari. ¹⁸ Ariquea noncanquempi naatimpa: aviguenti Peerero, Mapi,† ariquea ocatica shiratantapiqui novinchajacotantemparo notsovironaquite cantacotaquerica maasano quemisantajiaquenanea. Aatoquea agavejajiguiri osotomoro Areshi ichoocaquegueti metojatsica.‡ ¹⁹ Onquempevetaquempaquea nojocaquempi yavi iyavirejantajitaroca sotorontsi inquijantajitempaca imajirontagueti Inquitequitica; taaca opajita picantimentaquerica choocatanquitsica acaniqui quepatsiqui, inquejetaquempa Aapani inquitequitica incantimentantaqueroquea; aisa taaca opajita pishineteneri choocatanquitsica acaniqui quepatsiqui, inquejetaquempa Aapani inquitequitica irishineteneri.

²⁰ Ariquea Jesoshi icantajiaqueriquea itsatacaanejia aatonijite itsavetantajiguiritsi incanquequea iriguenti Quirishito.

Jesoshi icamantsicaró irimetojaque
(Mr. 8.31-9.1; Irc. 9.22-27)

²¹ Iroompaquea Jesoshi iparianacaroquea itsatacajiaqueriquea itsatacaanejia iroanaque Jerosarequi irantsipetacajiaaquempariquea jivajiatsica, irirajia saserorotejia anaantajianquitsica, irirajia aisa tsatacaantajiguiroca itioncacotanaqueca Moishishini, iroompaquea ari irimetojajiqueri, cotanquitsiquea aapojajempagueti 3 savincaguiteri impochatanaje. ²² Iriiraquea Peerero itsipatanacari tiijacoñaji icantomajitavetari, icantiriquea:

—¡Aato, Nomajirote! ¡Aatotari avishimatimpi!

²³ Cotanquitsiquea ipitsocanaca Jesoshi icantsitari Peerero:

* 16:16 Quirishitotatsica. Iguenquetsatsarequi guiriegojia icanquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Iriira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempaniji Imajirojiate maasano. † 16:18 Peerero ocanque “mapi”. Jesoshi ipajitajiri “Peerero” iroorijsi itsatsitacari oncoramanitapojagueti iroanajegueti Jesoshi jenoqui inquitequi, intampishishirentanaque Peerero, aisa intampishitacajiaqueri itsipajia. Quericaca cantamajatanquitsineca: “Iriira Jesoshi irio Quirishito, Irijanite Aapani Irioshi”, intsipatacaantajiguempari maasano itsipajia tsaróventajigarica. ‡ 16:18 Oraquea Areshi iroguenti ichoocajiaquegueti metojatsica. Icanquegueti Aatoquea agavejajiguiri osotomoro Areshi, ocanque “Aatoquea agavejajiguiri metojagantsi”, ipochatanajitari Quirishito, ariquea inquejejaquempa aisa maasano aventajiaquemparica.

—¡Poanaqueshinete, Satanashi! Piticaavetaquena, teetarite irooquee pinquenque-jamajate inintaguetica Aapani Irioshi, iroguenti piquenquejaguetaquequea iquenque-jaguetica caquinteja.

²⁴ Ariquea Jesoshi icanqueriquea itsatacaaneja:

—Quericaca nintanquitsineca iroguijatacoquena irovashiantanaqueroja inintashiguetacaca iriatimpa, irinatashitapiniquempa inchapoa irompajacotantajiquemparica, mananiji iroguijatacoquena. ²⁵ Quericaca teeca irininteji irantsipeventena irooca irimetojavenquena, manaquea impeaquempa; cotanquitsiquea iriraquea atsipevenquenanece irooca irimetojavenquena, incoquempaniquea inchoocaguiteni. ²⁶ Ariguete inchoocavetaquempa agavejanquitsineca irashinquemparo maasanopae quepatsipaequitica, cotanquitsiquea oncoramanitapojajeguete irimetojaqueguete ariguete impeaquempa camorecariqui, ¿arimpate agavejaque irajaararo aavajeri? Aatoquea agavejitsi. Irashintaguevequemparoqueate maasanopae, cotanquitsiquea aatotarite yagaveji irivegaraventavaquempa aatonijite yoguitsi camorecariqui. ²⁷ Oraquea incoraquetajateguete Irijanite Caquinte iroganejencapojajempa, iroguentiquea iroganejencare Iri. Oraquea incoraquetajateguete intsipatsipaiquempariquea irashivantijitete, iroguishinejajipojajeri maasano netsanajiguiroca inintaguetica, irioquea teeca inquemisantajigueri manaquea incatsimatimentajipojajeri irantsipetacaajiaquempari. ²⁸ Noncanquempija arimajaguitatsi iconoagarantaca catintiitimojiaquenaca imaica, aato imetoji tequerataguete irameneri irira Irijanite Caquinte irimajirontapojajempaguete.

17

Jesoshi icantashitatiimojiacariquea itsatacaanepae
(Mr. 9.2-13; Irc. 9.28-36)

¹ Iroompaquea anaavaetanacaguetiquea 6 savincaguiteri iriraquea Jesoshi yoanaque-quea ontaniqui otsempiqui yagatsonquivaetanaquequea osamani. Iriguentiquea itsipatsipaitanaca Peerero, Santiago aisa iriguentijeguete Santiago pajitatsica Joanca. Tee inchoocateji itsipajia. ² Iroompaquea taampina iriatimpajia yamenitsijigari Jesoshi ican-tashitatiimojianacariquea. Ariquea icotanaca itsirencashimpoquirerejanaquequea ivoroqui quempetanacaquea itsirencashimpoquirerejiguete catsirincaiteri, aisa iitsaarequi oquitamaromajatanaquequea ocanca. ³ Yamenitsijigariquea Moishishini aisa Iriashini iquenquetsatacaajiaqueri Jesoshi. ⁴ Iriira Peerero icanqueriquea Jesoshi:

—Nomajirote, cameetsavaeque achoocajiaque ocaniqui. Pininqueguete nompeacaguempaja 3 catisetarentsi, aparato pashinquempa aviatimpa, aparato irashinquempa Moishishi, otsipaquea irashintaquempa Iriashi.

⁵ Quenquetsavetanatsi omanacojiapojajiri mararo quitamaromajatanquitsica, ariquea iquenquetsajencajitanaque omararosecanqueguete icanque:

—Iricatica irio Irijani, nopintsatacaca, noshineventamajatacari. Pinquemisantamajajiguerija.

⁶ Iquemitsijigariquea ariquate icohicoitanaca itsarotsaroitanaque ipatapataitanaca.

⁷ Cotanquitsiquea Jesoshi iquempejiquempejiipojiri ichagajiaqueriquea icanque:

—Pincatintiijianaje, aatoquea pitsaroajigui.

⁸ Yamenitsijavetanaja aisa teequea anejeriji incatintiitaje, aparatoquea icatiaja Jesoshi.

⁹ Ariquea icoraquecoraqueitaji yoguirincajiaja, iriraquea Jesoshi icanqueriquea:

—Aatotaja quericaca picamantitsi oratica pamenajiaqueca imaica. Intancorejanajeguete Irijanite Caquinte irimetojavetaquempaguete, ariquea pintsavetacotsijiguemparoquea.

¹⁰ Iriiraquea itsatacaaneja icoacotaqueri, icantajigui:

—¿Quero ocotacani icantantacaca tsatacaantajiguiroca itioncacotanaqueca Moishishini icantajiaqueguete iriquetitaquea coraquetajatsine Iriashini?

¹¹ Icanqueri Jesoshi:

—Arimaja iriquetitaquea coraquetajatsine Iriashini, irinetsanaguequeroquea maasano. ¹² Imaica noncantajiaquempiquea jac icoraquequiti Iriashini, cotanquitsiquea

teequea intsajiteriji, manaqueate yantaguishejitaqueri maasano inintajitaqueca. Ariquea inquempetacaajitaquempariquea Irijanite Caquinte irantsipetacajaiquempari.

¹³ Ariquea itsajipojaque itsatacaanejia iriosacanica itsavetacotaque Joanca Viñacajantatsica.

Jesoshi yogueshitajiri chaajaniquitirajaca, yoguisotoajiniri ampatsini

(Mr. 9.14-29; Irc. 9.37-43)

¹⁴ Iroompaquea yarejerejeipojacaquea ichoocajiaquegueti caquinteja icapiocajiacaguete. Icoraquetashipojiri Jesoshi aparo shirampari, iguerovempojacari icanqueriquea:

¹⁵ —Nomajirote, pimpintsatacotenarishiatsi nirijanite imetojapinitaquito icantapinitaquito tinquininini, yatsipevaetaca. Itsiatsiavaetanacaqueate paamariqui, aisa iticajaticajavaetaca ojaaquiniqui. ¹⁶ Namajiavetacanariquea pitsatacaanejia irogueshitajerimequea, cotanquitsiquea teequeate iragavejajigueriji.

¹⁷ Icanque Jesoshi:

—¡Arisa picomirincajiga teequea paventemparoji iragavejane Aapani Irioshi, iroguentiquea picovaeguishejiga! ¿Querocaquea oncarashequiavaeteni nosavicaventajiaquempi? ¿Queroca oncarashequiavaeteni nantsipetacojiaquempi? Iroosacanica iintsijate pamajiaquerijate ocaniqui.

¹⁸ Iroompaquea icantomajitari Jesoshi ampatsini, ariquea icotanaca isotoapanajanti, ari ipeanaja chaajaniquiri ishaquiavecaca.

¹⁹ Coajica iriraquea itsatacaanejia icoraquetashijipojiriquea Jesoshi apaniro, icanqueriquea:

—¿Queroquea ocoani naatimpajia teeca nagavejajigueji noguisotoitajigueriji?

²⁰ Icanque Jesoshi:

—Iroorijite tee paventajiguemparoji nagavejane. Arimaja noncanquempi, ariguetei pavenquitiguemparo capichaji, ariquea pagavejajiaqueroquea pincantajiaquero oratica otsempi: ‘Pogaanaquempajate poanaquequea osamani’, ogaanaquempaquea. Aatotarite taaca opaji manapitsajiguimpitsi arimajacaguetei paventamajatanaquemparogueti nagavejane. ²¹ Cotanquitsiquea ampatsinipae quejearica irintatica, aato isotogui aatogueti pamanamajitari Aapani Irioshi, aisa aatogueti pisanticotiro pisheca.

Jesoshi icamantsitajariquea irimetojaque

(Mr. 9.30-32; Irc. 9.43-45)

²² Iroompaquea Jesoshi itsipatsipaitanacari itsatacaanejia yooyoaitanaquequea oraniqui Garireaqui, itsatacajiaqueriquea icanque:

—Irraquea Irijanite Caquinte iracaantajiqueru irajiaqueri caquinteja. ²³ Ariquea irimetojiaqueri, cotanquitsiquea aapojajempaguetei 3 savincagueti irovochantajitajeri.

Ariquea iquemajiaqueriguetei ishimampancajianaca oshequi.

Imentaquipae ashiquea teemporo itsaromentajitarica Aapani Irioshi

²⁴ Ariquea yarejerejeipojacaguetei Jesoshi aisa itsatacaanejia Caperenaoqui, icoraquejiapojaquequea capioquirica imentaquipae ashiquea teemporo, icoacojiapojaqueri Peerero, icanqueriquea:

—Irraquea tsatacaajiguimpica ¿teempa irivegaratapiniteri capioquirica imentaquipae ashiquea teemporo?

²⁵ Icanque Peerero:

—Jeejeguitatsi ivegaratapinitiri.

Iquijavetanaquitiga intsompogui tsovironaqui qui ichoocaqueguetei Jesoshi, irique-tiquea quenquetsatacaavaqueri, icanqueriquea:

—Shimo, ¿queroquea piquenquejaque aviatimpa? Irraquea majirontajiatatsica choocajiatatsica acaniqui quepatsiqui ¿queri irivegaratacaaquempaca imentaquitsite? ¿Irioca irijanijiate, irioca itsipajia?

²⁶ Icanque Peerero:

—Iriguentiquea irivegaratacajiaaquempaca itsipajia.

Icanque Jesoshi:

—Iroosacánica teesacánica irioqueate irivegaratacaajiguempaji irijanijiate.

²⁷ Cotanquitsiquea aatimpajia aatonijite icatsimatashitaji, poanaque iniromotijaqui pojocatsajataquiteja, iroompaquea iriraquea iriquetica paaque pintisavancaqueritaquea paitsitavaqueriquea imentaqui cavorejatatsica choocatanquitsica ivagantequi, pamajiaqueneriquea capioquirica imentaquipae ashiquea teemporo, pojocajia-pojaqueneri. Irarejequemparo ivegaratacaquenaca naatimpa aisa aviatimpa avegaratimentajiaquempaniji.

18

Quericaca anaantamajatanquitsineca

(Mr. 9.33-37; Irc. 9.46-48)

¹ Iroompaquea iquempejiquempejiipojiri itsatacaanejia Jesoshi icantajiaqueriquea:

—¿Quericaca anaantamajatanquitsineca irimajirontaquempagueti Inquitequitica?

² Iriatimpa icajemitsitaquea aparo chaajaniquiri yogatiitsitariquea niganquiqui ichoocajiaquegueti, ³ icantajiaqueriquea:

—Arimajaca noncantajiaquempica: aatoguete picantashitatijajaa pishirequi pinquempejiajempariquea chaajaniquirijia, aatotarite pagavejitsi pinquijanaque imajirontaguete Inquitequitica. ⁴ Taacaguete quempetajemparineca iricatica chaajaniquiri teeca inquenquejeroji iranaimanatantaque, irioquea iriguenti caaviji iranaaque irimajirontaquempagueti Inquitequitica. ⁵ Aisa quericaca shineventavaquemparine chaajaniquiri quempecarica iricatica iroorijite nonintacaantaquero naatimpa, quempecaqueate naroguentica ishineventavaca.

Caaviji incatsimamajajiqueriquea covaeguishetacaantanquitsineca

(Mr. 9.42-48; Irc. 17.1-2)

⁶ “Taacaguete covaeguishetacaquemparineca aparo chaajaniquiri quejejiacarica iricajia tsarovaenanequea, incatsimamajajitaqueriquea oshequi. Iroquetitamequea intsatotocojiquenerime itsanoqui iniroshimentapiri itononcantajitaca ariquea irajaitanaquerimequea impishoncajajiquerime osaanajavaetaqueguete inirojani quantijani. ⁷ ¡Imaicashiatsi irantsipevaejiguempanishiatsi maasano choocajiatatsica acaniqui quepat-siqui, inchoocajiaquetarite nintajianquitsineca incovaeguishetacaantajiaquempaquea! Ariquea onquejetanaquempaquea imaica, cotanquitsiquea caavijiquea irantsipemajajiaquempaquea quempejiaqueroneca imaica, incatsimamajajiqueriquea.

⁸ “Nonquejetacaajiaquempiroquea imaica: ariguete oncovaeguishetacaquempi paco irooca piguiti, ariquea pinarataqueroquea pimpishonquitemparo. Cameetsavae-quequeate pimpishoncaquerogueti covaeguishetacaquempica pinetsanatimentana-jempanijite. Aatoguetitarite pipishonquiro jatanatsitarite oncovaeguishetacaajempi, iroompa pimetojanajegueti impishoncajitaquempiqueate camorecariqui aatoca otsivaquitsi. ⁹ Aisa irooguete covaeguishetacaquempine poquija pinquitsorejaaquempa pimpishoncaquero. Cameetsavaequequeate pimpishoncaquerogueti covaeguishetacaquempica pinetsanatimentanajempanijite. Aatoguetitarite pipishonquiro jatanatsitarite oncovaeguishetacaajempi, iroompa pimetojanajegueti impishoncajitaquempiqueate camorecariqui aatoca otsivaquitsi.

Oveja peavetanquitsica

(Irc. 15.3-7)

¹⁰ “Aatoja pitsojenquiritsija irirajia chaajaniquiri, choocajitarite irashivantijitete Aapani Irioshi quempoguijajiaquerica. Iriatimpajia icocaniquea ichoocajiaque ontaniqui quempeji Aapani Irioshi choocatatsica jenoqui inquitequi. ¹¹ Irootaquequea icoraque-tantacaca Irijanite Caquinte, irajiajateri peajavetanquitsica.

¹² “¿Queroquea piquenquejajiaque aviatimpajia? Inchoocategueti aparo caquinte iriviraquempaquea 100 irovejijate iroompaquea impeaquempaquea aparo, ¿arimpate aatompate yojocajianajiri maasano irovejate iroanaquequea iramenaguetajateri peanquitsica? ¹³ Ariquea irajeriguete caaviji irishinevenquempariquea, anaavaequeroquea

ishineventajiacarigueti maasano 99 teeca impeavetempaji. ¹⁴ Ariquea iquempetacaquea Piri inquitequitica, teetarite irininteji impeaquempaquee aparo quejejiacarica irirajia chaajaniquiri.

Querocagua ancojiaquempani avetsinantajajerigueti apitsaroveritarijieneni
(Irc. 17.3)

¹⁵ “Querocagueti incoquempini papitsaroveritariite poanaquequea pinquenquet-satacaopojeri apaniroja, pincamanqueriquea querocagueti icoquempini. Iriatimpa inquemaquempigueti jac pivetsinantajiri. ¹⁶ Oraquea aatogueti iquemimpitsi, pintsipatanacuempariquea aparo arica mavite papitsaroveritariite cameetsanijite inquemajiaquempinijite iriatimpa, aisa intsajiaquenijite arimajaca pininquequea pivetsinantajeri. ¹⁷ Cotanquitsiquea aatogueti iquemimpitsi, poanaquequea icapiocajiacagueti tsaroveritajatsica pincamantajigueriquea, incantomajajiaqueriquea. Aatogueti iquemiritsi iriatimpajia, manaquea pinquempetacajiaquempani teeca intsaroveritampariji Aapani Irioshi irioca capioquinirica majirontatsica imentaquipae.

¹⁸ “Arimaja noncantajiaquempi: taaca opajita picantimentaquerica choocatanquitsica acaniqui quepatsiqui, inquejetaquempa Aapani inquitequitica incantimentantaqueroquea; aisa taaca opajita pishineteneri choocatanquitsica acaniqui quepatsiqui, inquejetaquempa Aapani inquitequitica irishineteneri.

¹⁹ “Noncantajiaquempi aisa: arigueti pincarate mavite acaniqui quepatsiqui, arigueti onquempetavacuempa pinquenquejaqueca, iroompa pincoacotaqueri Aapani inquitequitica, ari irimataquempiro. ²⁰ Querocagueti incapiocaventajiaquenagueti, mavitegueti inchoocajavetaquempa irooca mavitepae, ariquiteate nonchoocatimojiaqueriquea naatimpa.”

Iramajirore majirontatsica teeca impintsatacotantempaji

²¹ Iroompaquea iquempejipojari Peerero, icanqueri:

—Nomajirote, ¿querocaquea oncarashequigueni nompeacotajemparo querocagueti incoquenani napitsaroveritariite? ¿Ari oncaravaete 7?

²² Icanqueriquea Jesoshi:

—Aatoqueate ocaratapojitsi 7, manaquea oncaravaetequea 70 x 7 pimpeacotajemparo.*

²³ “Imaicaquea noninque nontsatacaajiaquempiro quero icotani imajirontagueti Inquitequitica, manaquea nonquempetacaaquempani majirontatsica cajemacaantajiaquerineca itigarancajiguica caarica jocavetajanari, incantajiaqueri irivegarajajeru. ²⁴ Irooquea iparianacaroquea icajemacaantajiaqueri, yamajitaqueneri aparo jocajenerinemeca oshequini imentaquitsite caravaetatsica 10,000 tarentopae.†

²⁵ Cotanquitsiquea iriatimpa teequea inchoocateji taampaquea irivegaratantajemparica, irootaquetari icantacaantantacarica majirontatsica irojocantajiaqueri intsipatacaantsitempariquea imanquigare aisa irijanijiate, maasanopae yashintaguecaca, iraatajajemparoquea imentaquipae cameetsanijite irivegaratimentajerinijite. ²⁶ Cotanquitsiquea iriatimpa igueroventsitanacari, icanqueriquea: ‘Pimpintsatacogajoitenashiatsi, poguijacoquempatajate oncoramanitapojajeguete novegaratajempiroquea maasano imentaqui nojocajempimeca.’

²⁷ Iriiraquea majirontatsica ipintsatacotanacariquea icanqueriquea: ‘Iroosacanic ariataquequea ococa, aatoquea pivegaratajanatsi.’ Yoguijacoquempatajari. ²⁸ Cotanquitsiquea yoanajiguete itonquivojajariquea igonoro aacovecarica, icaravetaca 100 tenario‡ irojocajenerimeca. Yaitsitanacariquea icatiquitsitari itsanoqui, icanqueriquea: ‘¡Pivegaratenashinete paacovequenaca!’ ²⁹ Iriatimpa igueroventsivetanacari icanqueri: ‘Pimpintsatacogajoitenashiatsi, oncoramanitapojajeguete novegaratajempitarite.’

³⁰ Cotanquitsiquea iriatimpa teequea impintsatacotempariji, manaquea

* 18:22 Icanquegueti Jesoshi oncaravaetequea 70 x 7 ocanque aato ocaratapojitsi, ancoguitempani ampeacotajemparoja intati querocagueti incovetacajini itsipapae. † 18:24 Iriiraquea icantajitica tarento, irioquea apamontiinaro imentaquipae cavorejatatsica tenatatsica 91 quiro. Iramiteriguete itsipa irajagantsitacovaetanaque irivegarataqueri aparo tarento. ‡ 18:28 Iriiraquea tenario irio imentaquitsite Iromaquitica. Iramiteriguete itsipa apajencaro savincaguiteri irivegarataqueri aparo tenario.

yaacaanqueriquea isantanatacotacaantsitari inchoocaguiteni arejevaetapojempa irivegaratajeri yaacovecarica. ³¹ Ariquea yamenajiaqueriquea igonorojia, ishimampojancajianaca yoayoaitanaque icamantajiaquitiri majirontatsica. ³² Iquemitsitaquea icajemacaantsitari aacovecarica icanqueriquea: 'Isaashimpi. Naatimpa manaquea nopeacotajimpro maasanopae pojocaquenameca, irooriji picantanaquea: Pimpintsatocogajoitenashiatsi. ³³ Arimequeate pinquempetacaaquemparimequea aacovequempica aviatimpa, pimpintsatocojiaquemparimequeate iriatimpa, pinquempetaquename naatimpa nopintsatocotimpigueti.' ³⁴ Icatsimatsitanacaquea icantacaantaqueri irantsipetacajiaquempari arejevaepojajempa irovegaratajeriquea maasanopae yaacovecarica."

³⁵ Iteroncanaquerogueti Jesoshi itsavetanquerogueti icanque:

—Ariqueate inquejetacaajiaquempiquea Aapani inquitequitica aatogueti pipintsatocojigariquea pigonorojia pimpeacomajaquemparogueti querocagueti icojiaquempi.

19

Icanque Jesoshi aatoja quericaca ovashiantirotsi imanquigare

(Mr. 10.1-12; Irc. 16.18)

¹ Iroompaquea iteroncanajirogueti Jesoshi itsavetantaquerogueti, iso-toantanacaro Garirea, yoanaquequea Joreaqui intatiqueroqui Jororanequi. ² Yoguijaguijaitanaqueriquea oshequini caquinteja. Ontaniquiquea yogueshitajiriquea maasano ashinoncajiaatsica.

³ Ariquea iconoagarantajiacaca pariseojia choocajiaatsica oraniqui icoraquecoraqueipojiquea icoacojiapojiri iramenajiaqueri querocaca incanqueni iriatimpa, icantajiajojiaqueri:

—¿Cameetsavaequempa irovashiantajero shirampari imanquigare onchoocaquegueti taaca opajita teeca irinintamajateroji?

⁴ Iriatimpa icanqueriquea:

—¿Arimpate teequea pampatsajavanteroji itioncacojirogueti paesatoniqui ocanque iroaqueragueti ipeacaacarigueti Aapani Irioshi caquinte ipeacaititariquea shirampari aisa manquigarentsi? ⁵ Iroompaquea icanquequea: 'Irootaquequea imaica shirampari intsinampirejanaqueriqueate iriri aisa iriniro, quisho iroamajataquero imanquigare, apatsinoroquea incantanajempa. Ariquea iroaqueragueti tequeratagueti irimanquigatempajeri, mavite icarajiavetaca, ariquea imanquigacarogueti ariqueate icojianaca tee irimavitetajempaji, quempetanajaqueate apatsinoronica icantaja.' ⁶ Irootaquequea noncantantajiaquempi iriraquea shirampari manquigataquemparoneca manquigarentsi aatoquea yovashiantiroquea, teetarite irimavitetajeri, quempeca apatirotiquea icantaja, yamenaqueriquea Aapani Irioshi imanquigacarogueti teetarite oncameetsateji irovashiantaqueroquea, incoquempanija irimanquigamajataquemparoquea.

⁷ Iriatimpajia icantajiaqueri:

—Iroosacanica, ¿queroquea ococaniqueate icanquegueti Moishishini arigueti irovashiantanajero shirampari imanquigare, irojoquitenemparojate paperi otioncacagueti yovashianquero,* ariquea intigaranquitsitemparo oanaje?

⁸ Icanque Jesoshi:

—Iriraquea Moishishini manatarite yamenajiaquempiquea piquishoshirentanaque jero iquejetacaantajiaquempirocaquea imaica itioncaciaquempiroquea. Cotanquitsiquea iroaqueragueti ipeacaacarigueti Aapani Irioshi caquinte, teequea inquempeteroji imaica. ⁹ Noncanquempiquea naatimpa, aparogueti oaquempi pimanquigare aatoquea povashiantirotsijate. Povashiantanaquerogueti iroompaquea pimanquigatajempagueti otsipa manquigarentsi, manaquea picovaeguisheca.

¹⁰ Iriraquea itsatacaaneja icanqueriquea:

* 19:7 Oratica paperi icanquero quimajareri certificado de divorcio (irooca aisa carta de divorcio). Iroguenti paperi itioncaciaquerogueti quejearoca: "Imaicaquea novashiantajiro nomanquigavetacaca, aato nomanquigatajaro." (Pamenero Os. 2.2 aisa Ireo. 24.1-4.)

—Iroosacánica omanavaetacaquea oshequi amanquigatemparogueti manquigarentsi. Aatosacánica amanquigatarotsi.

¹¹ Iriraquea Jesoshi icanqueriquea:

—Teetarite iragavejajigueji maasanója inquemisanteroji nocantajiaquempica, imaicaquea iriguentiquea quemisantajiaqueroneca yagavejacaajiaqueca Aapani Irioshi.

¹² Choocajatarite iconoagarantajiaca teequea iragavejajigueji irijanintajiguempaji, ari icoca ivoaquegueti. Aisa chooca itsipa iroguenti ipeacaajicari eonoco[†] aatoniji irijaninta. Aisa choocaquea itsipapae iroguenti itampishitashijiaqueroquea ipeaca majinari cameetsanijite irisavicaventamajajiaqueronijite irashipae Majirontamajatatsica Inquitequitica. Quericaa agavejanquitsineca intsamajaqueroquea nocantajiaquempica imaica iintsijate intsaterojate.

Jesoshi yamanacoventajiaqueriquea chaajaniquirijia

(Mr. 10.13-16; Irc. 18.15-17)

¹³ Iroompaquea icoraquecoraqueitaquequea itsipapae yamajiapojiniriquea Jesoshi chaajaniquiripae impamijiavaqueriniji iramanacoventajiaqueriquea. Iriraquea itsatacaaneja yamenajiavaquerigueti yamajiapojirigueti icantomajavaqueriquea.

¹⁴ Icantsitariquea Jesoshi:

—Ariotaquetsija incoraquetetate chaajaniquirijia naatimpaqui, aatoquea pojocaavaca, ishineventajiacaritarite Inquitequitica irimajirontacotaquempari quenquejajatsica quempecarica iriatimpaja.[‡]

¹⁵ Iroompaquea ipamijiaqueriquea yamanacoventajiaqueri. Ariquea iriatimpa yoanaque.

Ajaarantavaetatsica

(Mr. 10.17-31; Irc. 18.18-30)

¹⁶ Oraquea yoanaquegueti Jesoshi icoraquetashipojiriquea aparó caquinte, icantapoaqueri:

—Tsatacaantantatsica [cameetsari], ¿queroquea noncoquempani cameetsanijite noncoguitempaninijite nonchoocaguiteni? ¿Taa opajita cameetsatanquitsineca nonpeacaguempaca?

¹⁷ Icanqueri Jesoshi:

—¿Queroquea ocoani picantantaquenaca ‘cameetsari’? Aparotari ichoocati cameetsatatsica. Cotanquitsiquea pininqueguetiquea poanaque ichoocatigueti Aapani Irioshi pincoguitempaniniji pinchoocaguiteni, pinetsanamajateroja maasanopae itioncacotanaqueca Moishishini coramanitica.

¹⁸ Icanque iriatimpa:

—¿Querocate?

Icanque Jesoshi:

—Irootaquequea cantanquitsica: ‘Aatoja pimetojanti, aatoja poashitiro manquigar-entsi, aatoja paitsitanti, aatoja pitsojeventantatsi. ¹⁹ Pinquenquejacameetsatacoquerija piri aisa piniro, aisa pimpintsataquemparija pigonoro pinquejetacaajempa pipintsatagueti aviatimpa.’

²⁰ Icantsitari iriatimpa:

—Arimajaca noquempetacaquea imaica nonetsanamajaqueroquea maasano. ¿Imaicaquea choocampate otsipa nonetsanateca?

²¹ Icanqueriquea Jesoshi:

—Pininquegueti pinetsanamajaqueroquea inintaguetica Aapani Irioshi, poanaquequea pojocantaguetanaquero pashintaguetaca paantaquemparoquea imentaquipae pojocajiaqueneri coguitejacojianquitsica, pinquejetaquerogueti onchoocataje oganejencaro shinetacajaempineca ontaniqui inquitequi. Ariquea pincoraquetajeja poguijatanaquena.

[†] 19:12 Eonoco irio isoitsorejitajiqueca iguemaquui. [‡] 19:14 Irirajia chaajaniquitantsica tee iraventacojiguempaji, mana ishineventajiajojacari Jesoshi, iquemisantajiaqueri. Ari anquempejiaquempaquea aatimpa.

²² Iquemitsitaquea icanquerica ishimampoancavaetanaca, ariqueate yoanaji, iriguentitari ajaarantavaetatsica.

²³ Iroompaquea ipitsocashitariquea Jesoshi itsatacaanejia icanqueriquea:

—Iroomajaca noncantajiaquempica, omanapitsamajataquempari ajaarantavaetatsica inquijanaque imajirontaguetei Inquitequitica. ²⁴ Noncantsijiajempí aisa. ¿Arimpate iragavejaque cameyo inquijanaquequea itepoquiqui quisaatonquiri irisotoanaqueriquea antaqueronta? Aatotarite yagavejitsi. Iriompaqueate ajaarantavaetatsica caaviji anaquero omanapitsataquempari inquijanaque imajirontaguetei Aapani Irioshi.

²⁵ Iquemitsijigari itsatacaanejia arimpaqueate yamenamenaitanaque intati, icantajigui:

—Iroosacánica, ¿quericampate agavejanquitsineca iraavajempa?

²⁶ Yamenajianaqueriquea Jesoshi, icanqueriquea:

—Iriraquea caquinte teequea iragavejeroji, cotanquitsiquea Aapani Irioshi yagavejaquero maasanopae.

²⁷ Icantsitanaca Peerero:

—Nomajirote, naatimpajia novashiantajianaqueroquea maasanopae nashintavecaca, noguijaguijaitanaquempi. Imaicaquea ¿taaca irojocajiaquenaca Aapani Irioshi?

²⁸ Icantajiguii Jesoshi:

—Iroomajaca noncantajiaquempica, oraquea iriaqueratacaajitajerogueti maasanopae, irira Irijanite Caquinte irisavicapojero imajirontamento oganencatatsica irimajirontamajapojempa. Aviatimpajia guijaguijaitanaquenaca imaica pintsipajianaquenaquea pisavisaviiqueeroquea majirontamentontsipaequi oncarataque 12. Iroompaquea pincantajiaque querocaca incojitaquerini ichoviquijianaqueca irijanijiate Ishiraeri, icarajiaque iriatimpajia aisa 12.

²⁹ Aisa iriraquea maasano ovashiantajianaqueroquea itsovironaquitepae, irioca iriguentijeguitepae, itsijoitepae, iriniro, iriri, irijanijiate, irooca iniganquitejire, iroguijaguijaitanaquenaniji, irojocajiqueneriquea otsipa caavijica anaqueroneca yashintavecaca oshequijamajatanaquequea; taaca opajita yovashiantanaqueca apatiroca irojocajitajeneriquea otsipapae 100. Aisa incoguitempaniquea inchoocaguiteni.

³⁰ Icaramirincavaequequea yamenajivetacaca imaica yanaantavaeque, cotanquitsiquea oncoramanitapojajeguetei aatoquea yanaantajitsi. Aisa icaramirincavaeque teeca iranaanteji imaica, oncoramanitapojajeguetei iranaantavaetanaque.

20

Jesoshi iquempetacaacari ashintatsica iniganquitejire

¹ “Imaica nontsavetacotaqueroquea quero icotani Inquitequitica imajirontaguetei, iroguenti nonquempetacaaquemparo ashintatsica iniganquitejire. Iriatimpa iroguenti yoguiniquea pitsecatirajaguetei iraaquiteriquea shiacojiatsica irishiacojiaqueneri irovaitsoquimashite. ² Ariquea yamenajiapojiriquea icantajiguii: ‘Poapoitanaquequea pishiacojiaquitenarocate ovaitsoqui, iroompaquea inquijanajeguetei catsirincaiteri novegarajiaquempiquea aparo tenario.’ Iriatimpajia icanquequea cameetsavaequequea. Jero itigarancajiaqueriquea iroaraitanaque irovaitsoquimashitequi. ³ Iroompa ijenoquiv-aepojiguetei catsirincaiteri icoraquetajiquea yojocantajigueteiroguetei taaca opajitapae irajaatequea itsipajia shiacotanquitsineca. Yamenajiapojiri itsipajia, savisaviitaquequea intati, teequea irantajigueji. ⁴ Icantajiguii: ‘Poapoitanaquequea aviatimpajia aisa, pishiacojiaquiteja noniganquitejirequi, novegarajiaquempiquea cameetsa.’ Ariquea yoayoitanaquequea. ⁵ Iroompaquea itampaticatanaqueguetei catsirincaiteri yoitsitanajaquea aisa iramenaguetaquitequeate itsipajia shiacotanquitsineca. Ariquea iquempetacaajaroquea ijaguitetanajiguetei, yaitajata itsipajia. ⁶ Iroompaquea irooshipojiguetei inquijanaje catsirincaiteri, yoitsitanajaquea aisa yamenajiapojiriquea itsipajia, teequea irantajigueji, icantajiguii: ‘¿Queroquea ococani pisavisaviitashicaquea intati, teequea pantajigueji?’ ⁷ Icantajiguii: ‘Tee inchoocatenica shiacotacaajiguenaneca.’ Iriatimpaquea icantajiguii: ‘Iroosacánica poapoitanaquequea aviatimpajia pishiacojiaquequea noniganquitejirequi.’”

⁸ “Iroompaquea itsaparoncaguitetanaquegueti icanqueriquea shiacotacaajiaquerica: ‘Imaica pincajemajiguerija shiacojianquitsica pivegarajiaqueriquea pintsitacajiaqueri, pimpariajanaquempari impoipoitanquitsica parejetacaapanajantempari iriquetica coraquecoraqueitanquitsica.’ ⁹ Iroompaquea icoraquecoraqueipoji coraquejianquitsica irooshipojigueti inquijanaje catsirincaiteri. Iquejetavacaajiaca maasano ivegarajiaquerigueti, yojocajiaqueneri aparo tenario. ¹⁰ Iroompaquea icoraquecoraqueipojiquea iriquetica shiacomajatanquitsica, iriatimpajia yamenajiguiriquea ijiqueji iranaacaajiaqueriji irivegaramajajiaqueri. Cotanquitsiquea manaquea iquejetacaajiacari ivegarajiaquerigueti, yojocajiaqueneri aparo tenario. ¹¹ Irooquee yamenajiaquerigueti teequea iranaacaajigueriji irivegaramajajigueriji, ariqueate icohicoitanaca icantimanajianaqueri ashincaroa iniganquitejire. ¹² Icantajiguiri: ‘Irirajia impoipoitanquitsica capichajaniquiquea ishiacotaque, cotanquitsiquea pivegarajiaqueri quempeca pivegarajiaquenagueti naatimpajia atsipejianquitsica noshiacoguitini catsirincaiteriqui narejevaeca imaica.’ ¹³ Cotanquitsiquea irira ashincaroa icanqueri aparo shiacotanquitsica: ‘Nogonoro, teequea namatavijempiji. ¿Arimpate teequea pincanteji cameetsavaeque incajaranqui nocanquempigueti novegarataquempi aparo tenario? ¹⁴ Poanajequea paanajeri yojocaquempica. Naroguentiquea cantaquerica irivegarajiaqueriquea impoipoivetanquitsica ishiacoquegueti iquempetacaajiaquempiriquea aviatimpa ivegarajitaquempigueti. ¹⁵ Naroguentitari ashincari nomentaquitsite. ¿Arimpa aato nagaveji nojoquiniritsi quericaca noninquca? ¿Aricaja picatsimatacotsitaquenaro pamenaquegueti iriguenti nocavintsajaque itsipa?’

¹⁶ “Irootaquetarite noncantantajiaquempica imaica choocajia iramenajivequempaca imaica yanaavaequequea, cotanquitsiquea oncoramanitapojajegueti aatoquea yanaantajajitsi. Iriraquea teeca iranaantajigueji imaica, irioquea anaamajatantanquitsineca oncoramanitapojajegueti.”

Jesoshi icamantajajiri aisa irimetojaque

(Mr. 10.32-34; Irc. 18.31-34)

¹⁷ Iroompaquea yoanaquequea Jesoshi Jerosarequi itoncotoncoitanaque, icajemitsitari iriatimpaqui itsatacaanejia carajianquitsica 12, icantajiguiri:

¹⁸ —Imaicaquea atoncotoncoitanaque oahoaitanaque Jerosarequi. Ontaniquiquea ontaniqui arejerejeipojaquempagueti manaquea iracaantajiaqueri irira Irijanite Caquinte, irajaitanaqueri ichoocajiaquegueti saserorotejia anaantajianquitsica aisa tsatacaantajiguiroca itioncacotanaqueca Moishishini. Iriatimpajia incanquequea: ‘Intsishiatsi irimetojajiterini.’ ¹⁹ Ariquee irajaitanaqueriquea ichoocajiguigueti teeca irijorijoigueji cameetsanijite irantanaguishevaequerinijite, aisa impasapasajiaqueri agompiaquitempari, ariquea irompajacojiaqueri coroshiqui, cotanquitsiquea aapojajempagueti 3 savincaguiteri impochatanaje.

Onintavecaca iriniro Santiago aisa Joanca

(Mr. 10.35-45)

²⁰ Iroompaquea ocoraquepojiquea imanquigare Severo otsipatsipaitapojacari irijanijiate, oguerovempojacariqueea Jesoshi oncamanqueriniji oninquca. ²¹ Icanqueroquea: —¿Taa opaji pininque?

Iroatimpa ocanque:

—Aapojajempagueti pimpeaquempagueti Imajirojiate maasano, noninque poguisavisaviitaquenari irirajia irijani irisenampijajiaquempi, aparo savicanquitsinequea pitincamijempequiqui, iriraquea itsipa irisavicaque pishinampijempequiqui.*

²² Cotanquitsiquea Jesoshi icanque:

—Teequea pintsajigueroji ocatoca pinintavecaca. ¿Arimpate pagavejajiaquequea aviatimpajia pimiraquero nomiraqueca naatimpa?†

* 20:21 Irira savicatsica itincamijempequiqui majirontatsica yanaajiaqueri itsipajia, iquejemajirovecari majirontatsica, aisa iquejetaca savicatsica ishinampijempequiqui, quejemajirovecari. † 20:22 Ocatocaquea icanqueca Jesoshi manaquea iquejetacaacararantsipequempagueti, oquejetaca incanquegueti: “¿Arimpate pagavejajiaquequea aviatimpajia pantsipevaequempaquea pinquempajiaquea naatimpa nantsipevaetaquempagueti?”

Iriatimpajia icantajiguiri:

—Jeejeguitatsi nagavejaquempa.

²³ Icantajiguiri Jesoshi:

—Pitampaticamajataquero pimiraqueroquea nomiraquempaca naatimpa,[‡] cotanquitsiquea teequea naatimpa cantanquitsineca quericaca senampijaquenanece savicanquitsineca notincamijempequiqui aisa noshinampijempequiqui. Iriguentiquea cantanquitsi Aapani Irioshi paesatoniqui iroaqueragueti.

²⁴ Ariquea iquemajiavaquegueti itsipajia 10 itsatacaanejia itijerequijianaqueri Santiago aisa Joanca. ²⁵ Cotanquitsiquea Jesoshi icajemajiaqueriquea icanqueriquea:

—Pitsajiguiritarite iriraquea ipejaiaqueca imajirojiate teeca irijorijoigueji manaquea yatsanavaecari igonorojia, ariquea iquempejiaca iramajiroreja yomperaperaicari irashijia. ²⁶ Cotanquitsiquea aviatimpajia aatoquea piquejejiga. Ariguenti quericaca nintanquitsine iranaantimojiaquempi, impeitsitempaja amijiaquempineca. ²⁷ Quericaca nintanquitsine irijivatante, impeitsitempaja iromperare maasano. ²⁸ Quempeca Irijanite Caquinte teequea irooquea incoraquetashiteji iramijitavaqueri, iroguenti icoraquetashitaque incavintsajantapoje, aisa irimetojaventsitempariquea maasanojia, onquejevequempaqueea irivegaraventajajeneri irisotoimentajianajeniji santanatacojiavetanquitsica.

Jesoshi ipityaquirejajiriquea mavite shamponcajari

(Mr. 10.46-52; Irc. 18.35-43)

²⁹ Ariquea Jesoshi itsipatanacariquea itsatacaanejia iquenaquenaipoji Jericoqui iroaroaitanaque Jerosarequi, itirorencaventajianacari caquinteja. ³⁰ Ariquea oraniqui isavicajiaquequea mavite shamponcajari ocaravoquitapojigueti quenavoquirontsi. Irooquea iquemacojiavaquerigueti Jesoshi coraquetapoji icajemitsijianaquea icanqueri:

—¡Nomajirote, Ichoviquitanaqueca Taavini, pimpintsatacotenashiatsi!

³¹ Irira choocajianquitsica icantomajajiaqueriquea icantsijiavetari irisanticotanaque-nijite, cotanquitsiquea iriatimpajia arimpate icajemamajatsijianaca:

—¡Nomajirote, Ichoviquitanaqueca Taavini, pimpintsatacotenashiatsi!

³² Icatiapojaquea Jesoshi icajemajiaqueri icanqueri:

—¿Taaquea pinintajiaque?

³³ Iriatimpajia icantajiguiri:

—Nomajirote, nonintajiaque nompityaquirejajianaje.

³⁴ Ipintsatacojianacariquea Jesoshi ipamijiaqueriquea iroquiiaqui. Ariquea icojianaja inejajianaji, yoguijaguijaitanaqueri.

21

Yarejetapojacaroquea Jesoshi Jerosarequi

(Mr. 11.1-11; Irc. 19.28-40; Jn. 12.12-19)

¹ Iroompaquea irooshipojigueti irarejerejeipojemparo Jerosare, yarejerejeipojaroquea Vetepaje Orivotsempiqui. Iroompaquea iriraquea Jesoshi itigarancajiaqueriquea mavite itsatacaane icantajaivaqueriquea:

² —Poanaquequea ontaniqui quempeji guinteninintsiqui, pamenajiapojeroquea oraniqui aparo aashino shiticacoca itsipatacaantajicaro irijanigantirenajaniqui. Pishiticarejacojiaqueri pamajiaquenari. ³ Choocaguete cantaquempineca, aviatimpajia pincantajigue: ‘Iriguenti coacotacari Amajirote, taampinatari iroguipiajajempiri.’

⁴ Ariquea oquejetantacaca imaica onetsanatanaquempaniji icanqueca tsavetantatsica coramani itioncacaajiqueriguete, icanque:

⁵ “Pincantajiguerija guintenijiatsica Shionequi:*

‘Pamenajigueja, coraquetapoji Pimajirote aviatimpagai, iriatimpa iriguenti caavijica imativicamajataca, manaquea iquenantapojacari aashino,

[‡] 20:23 Iquempetacaacaro Jesoshi, quejetacaquea incanquegueti: “Pitampaticamajataquero pantsipevaequem-paquea pinquempejiaquenaquea naatimpa nantsipevaetaquempaguetei.” * 21:5 Shione iriguenti Jerosare.

irijanigantirenajaniqui aashino, irijanite quijaviriniquitatsica ajaararonsi.’ ”

⁶ Iroompaquea yoayoaitanaquequea itsatacaanejia inetsanatsitaroqueea icanquerica Jesoshi. ⁷ Yaajianaqueroqueea aashino aisa irijanigantirenajaniqui, ipashicamititsajiqueneri iitsaarepaequi, isaviquitsitanacariqueea Jesoshi. ⁸ Yoayoaitanaquequea icaramir-incavaetanaque caquinteja, iconoagarantajiaca imaroncaashijiavaqueri iitsaare quenavoquirontsiqui, itsipapaequea aavashijiavanquitsica ovashi imaroncaavoquitashijiavaqueriquea Jesoshi.† ⁹ Iriraquea iriquetica oahoaitananquitsica aisa irirajia guijagui-jaitaquerica icajemajianaque, icanque:

—¡Caaviji yoganejencamajataca irira Ichoviquitanaqueca majirontatsica Taavini!

—¡Intsishiatsi irishineventajiquempari iriratica coraquetapojatsica itigarancaqueca Majirontamajatsica!

—¡Caaviji yoganejencamajataca Aapani Irioshi choocatatsica jenoqui!

¹⁰ Ariqueea iquijanaquegueti Jerosarequi, ishiamirincajiapojaca choocajianquitsica. Iconoagarantajiaca icoacojiapojiri itsipajiacaca icanqueriquea:

—¿Taa ipajita iricatica?

¹¹ Iriatimpajia icanquequea:

—Iriguenti Jesoshi tsavetantatsica quenapojatsica Nasarequi Garireaquei.

Jesoshi yoguivorocajiaqueri jocantantajiacaroca teemporo

(Mr. 11.15-19; Irc. 19.45-48; Jn. 2.13-22)

¹² Ariqueea Jesoshi iquijanaque oniganquirequi oticaacoroqui teemporo itsaroven-tantajitarica Aapani Irioshi yamenajiapojiri jocantantaguetirica viratsipae aisa veg-aratantajiguirica. Yoguivorocajiaqueriquea maasanajia, aisa yapitaquiaguequero-queea ishitaponcaropae yojoquijitantacarica imentaquitsite guipiantajiguirica imen-taquipae.‡ Iquejetsiguetaoqueea aisa isavisaviitantacaca jocantajiguirica emorenipae.

¹³ Icantajiguiri:

—¿Arimpate tee ontionquempaji: ‘Oratica notsovironaquite incantacojitero iroguenti ashi incoraquequantapinijitempaca iramanajiaquenani?’?⚡ Cotanquitsiquea aviatimpajia manaqueea pipeacajaiacaro imoro itsititantaca aitsitantajiatatsica.⚡

¹⁴ Iroompaquea ocaniqui oniganquirequi oticaacoroqui teemporo icoraquetashiji-apojiri shamponcajarijia aisa teeca iranijimajateji. Iriatimpa ipityaquirejagueta-jiri teeca iramenajiavetempaji, aisa yanijitacaamajatajiri teeca iranijimajiavetem-paji. ¹⁵ Iriraquea saseroroteja anaantajianquitsica aisa tsatacaantajiguiroca itionca-cotanaqueca Moishishini icatsimamajianaque yamenajiavaquerigueti yonigaantague-queeroqueea ocaantantatsica intati, aisa iquemajiaquerigueti chaajaniquiripae icajemit-sijianaca oniganquirequi teemporo, icantajiaque:

—¡Caaviji yoganejencamajataca irira Ichoviquitanaqueca majirontatsica Taavini!

¹⁶ Ariqueea iriatimpajia icantajiguiri:

—¿Arimpate teequeea pinquemajigueriji irirajia chaajaniquiripae icajemajiaquegueti? Iriraquea Jesoshi icantajiguiri:

—Jeejeguitatsi, noquemaque, cotanquitsiquea ¿arimpate teequeea pampatsajavanta-cojigueroji ocanquegueti: ‘Pinintacaajiaqueri chaajaniquiripae aisa igantagatirajaca yatsoti intsaroventajiaquempi’?§

¹⁷ Ariqueea yojocajianajiri isotosotoitanajiro Jerosare, yoayoaitanaque Vetaniaqui, ariqueea imaapojaji oraniqui.

† 21:8 Imaroncaashijiavaquerigueti iitsaare quenavoquirontsiqui aisa imaroncaavoquitashijiavaquerigueti ovashi, manaqueea iquejetacaavacari majirontatsica ishineventajigarigueti. ‡ 21:12 guipiantajiguirica imentaquipae. Incoraquequegueti jorioja quenajiaapojatsica otsipapaequi guinteninintsipaequi iramajiaquegueti cantashitatiague-tanquitsica imentaquipae, irojocajiaapojaqueneri guipiantajirica imentaquipae irojocajiajeneriniji itsipapae cameet-saniji irojocagarantajiajeneriniji Aapani Irioshi teemporoqui, irioca irivegarajiaque viratsi irojocajiaquenerica. ⚡ 21:13 Is. 56.7. ⚡ 21:13 Jer. 7.11. § 21:16 Irootaquequea itioncaneni Taavini yamashaiventaquerigueti Aapani Irioshi. Sar. 8.2.

Jesoshi icanqueroquea iguera aatonijite ochoocatimatajitsi osovena
(Mr. 11.12-14, 20-26)

¹⁸ Iroompaquea osavincaguitetamanaquegueti icoraquecoraqueitaji Jerosarequi. Iri-
raquea Jesoshi ariquea itaseapoji. ¹⁹ Ariquea yamenacovetapojacaro iguera ocaravo-
quitapojigueti quenavoquirontsi, ariquea yoapanajanti iramenamajapananteroquea
choocaca osovena, cotanquitsiquea yarejevipojacaroquea quempeji tee onchoocateji,
irogquentini ovana. Icantsitaroquea:

—Imaicaquea imaica aatotarite ochoocatimataji pisovena.

Ariquea ocotanaca osampirocanaquequea ometojanaque. ²⁰ Irooquea yamenajia-
vaquerogueti itsatacaaneja yamenamenaitanaquequea intati, icanqueriquea:

—¿Queroquea ococani picanquitiguiro ometojanaque?

²¹ Iriraquea Jesoshi icanqueriquea:

—Iroomajaca noncanquempica, arigueti paventamajataquemparigueti Aapani Irioshi
pintsamajajiaquegueti arimajaca yagavejamajati, aatogueti pinquenquejimatirotsijate:
‘Aatoca yagaveji Aapani Irioshi’, ariquea pagavejajiaquequea pinquempejiaquea
naatimpa nosampirocaquerogueti iguera. Cotanquitsiquea teequea aparoquea ocativa.
Aisa pagavejajiaque pincantajiguero ocativa otsempi: ‘Poanaquetsija pojocajatemala
inirojaniqui quantijani’, oapanajantequea ojocajapojempa. ²² Maasano taaca opajita
pamanajiaquerica Aapani Irioshi, arigueti paventamajajiaquempari, onetsanaquem-
paquea.

Icoacojitaqueriquea Jesoshi taaquea tigarancaqueri
(Mr. 11.27-33; Irc. 20.1-8)

²³ Iroompaquea yarejetapojaca Jesoshi teemporoqui iquijapojaque oniganquirequi
oticaacoroqui itsatacaantapojaque. Incajaranquiguitetanaquegueti icoraquecoraque-
itashipojaqueriquea saseroroteja anaantajianquitsica aisa jivajiguirica jorioja, ican-
queriquea:

—¿Taaquea cantaquempi piquempetancaroca imaica poguivorocantajiacarica jocan-
tantajatsica? ¿Taampate tigarancaquempiquea?

²⁴ Iriraquea Jesoshi icanqueri:

—Intsija naatimpa noncoacotempi. Poguisotoaquenarogueti, ariquea
nonquempetsitempa naatimpa noncamanquempiquea queri tigarancaquenaca.

²⁵ Iviñacajatantigueti Joancani, ¿queroquea oquenapojini? ¿Irooca oquenantapojaca
inquite? ¿Irioca oquenantapojaca caquinteja?

Irooquea iquemajiaquerigueti iquenquetsatavacaajianaca icantajigui:

—¿Querocate ancoterini? Ancantsivetemparigueti oquenantapojaca inquite, iri-
atimpa incantanaque: ‘Iroosacanica ¿queroquea ococani teeca pinquemisantanta-
jiguempariji?’ ²⁶ Cotanquitsiquea ariguetiija ancantsivetempari oquenantapojaca
caquinteja, atsaroacaajiacariquea caquinteja, maasanopaetari icanque irira Joancani

iriguenti tsavetantatsica itigarancaqueca Aapani Irioshi.

²⁷ Jero icantantajiacarica:

—Teetari nontsajiguenica.

Ariquea iriatimpa icanqueriquea:

—Iroosacanica, ariquea nonquejetaquempaquea naatimpa, aatoquea
nocamantimpitsi quericaca tigarancaquenaca naatimpa.

Jesoshi iquejetacaacari mavite irijanite caquinte

²⁸ Iroompaquea Jesoshi icanqueriquea:

—¿Queroquea pincanqueni pinquenquejerogueti noncantajiaquem-pica imaica?
Ichoocati caquinte choocatatsica mavite irijanite. Iroompaquea icanqueri

parianquitsica: ‘Irijani, poanaque pishiacoquiteta ovaitsouquimashiqui.’ ²⁹ Iriatimpa
icanque: ‘Aatoquea noguitsi’, cotanquitsiquea iroompaquea iquenquejanaquero
yoanaque ishiacoquiti. ³⁰ Iroompaquea yoashitanaqueri itsipa irijanite, ariquea
iquejetacaacari iriatimpa, itigarancavetacari irishiacote. Iriatimpa manaquea
icantaveca: ‘Intsija nonquejetaquempa’, cotanquitsiquea teequea irogejeji.

³¹ Imaicaquea pincantajiguena, ¿querica quemisantavaquerica iriri?

Iriatimpajia icanquequea:
—Iriguenti parianquitsica.

Ariquea Jesoshi icanantajigui:

—Iroomajaca noncanquempica, iriraquea capiocajiguinirica majirontatsica imentaquitsite aisa manquigarentsijia cantatsatantaguetatsica yanaajiaquempiquea iquemisantajiaque, iriquetiquea quijaquijaitananquitsine imajirontagueti Aapani Irioshi. ³² Pinquenquejeja, icoraquetashijivequempiquea Joancani Viñacajatantatsica itsatacaajivetaquempiquea queroquea pincojiaquempani pincomajamajiaquempagueti, cotanquitsiquea aviatimpajia teequea pinquemisantajigueriji. Iriraquea capiocapinijiguinirica majirontatsica imentaquipae, iriguentiquea quemisantajiaquerica. Ariquea oquejetaca cantatsatantaguetatsica. Aviatimpajia pamenajavecariquea cotanquitsiquea teequea pinintajigueji pincantashitatijaianaquempa povashiantajianaquero pigovaeguishere pinquemisantajianaqueri.

Jesoshi iquempetacaajiacariquea quempoguijvetaroca ovaitsoquimashi
(Mr. 12.1-12; Irc. 20.9-19)

³³ “Iintsija pinquemisantajiavaqueroja nonquejetacaajiaquemparogueti otsipa. Ichoocataque aparo caquinte yashinca iguepatsite. Ariquea imiataqueroquea ovaitsoqui itantotacotaqueroquea. Aisa ipeacaashicaroquea yagaticantajitaroca ovaitsoqui osotoajatantanaquempaca ovaja, aisa ipeacaacaroquea irisavicantaquempaca jenoqui amenaqueroneca cameetsanijite iramenamajaqueronijite aatonijite yaajitirotsi. Iroompaquea icajemajiaqueri itsipapae irishiacojiaqueneriquea. Oraquea onchoocatanaquegueti irojocagarantajiaqueneriquea iriatimpa. Iroompaquea yoavaetanaquequea jmm osamani. ³⁴ Ocoramanivaetapojiquea aapojajagueti osampatantanaquempaca ovaitsoqui itigarancajiavecari irashijia iramanajajaterime irojocagarantajiajenerime. ³⁵ Cotanquitsiquea iriraquea shiacojiaquero manaquea icatsimajiaqueri aparo itavatavaavaequeri, iriraquea itsipa imetojajiaqueri. Iriraquea itsipatapojatsica manaquea itsinatsinavaequeri mapiqui. ³⁶ Iroompaquea iriraquea ashincaro ovaitsoquimashi itigarancajiavecari itsipajia irashijia, yanaajiaqueriquea iriquetica itigarancajiavecaca. Cotanquitsiquea iriraquea shiacojiatsica ariquea iquempetacaajiacariquea iriatimpajia.

³⁷ “Iroompaquea icanquequea: ‘Iriocajate nontigarancaquequea nirijanite, irioca intsaroacaajiaquempa.’ Ariquea itigarancajititari. ³⁸ Cotanquitsiquea iriatimpajia yamenajiaqueneriquea icoraquetapojaquegueti, iquenquetsatavacaajianaca icanque: ‘Jeeri irintatica ashinquemparoneca maasanopae irimetojanajegueti iriri. Jaamequetiroshiatsi ametojajiaqueri cameetsanijite aatimpajia ashintamajatajemparonijite.’ ³⁹ Iroompaquea yarejevipojaca yaitsijianacari yaajianaqueri acaqueroaca otantotacotacagueti ovaitsoquimashi, imetojitsitari.

⁴⁰ “Oraquea incoraqueatagueti ashintamajataroca ovaitsoquimashi, ¿querocaca incojiapojaquerini irirajia shiacojiatsica?”

⁴¹ Iriatimpajia icanqueriquea:

—Irimetojajiaqueri interoncajiaqueri maasanojia, aatotarite ipintsatacojigaritsi. Iroompaquea incajemajiaquequea itsipajia quempoguijajenerineca iniganquitejire. Ariquea onchoocatanajegueti ovaitsoqui iriatimpajia irojocagarantajiajeneri.

⁴² Icanqueriquea Jesoshi:

—¿Arimpate teequea pampatsajavantacojigueroji Itioncacaantaqueca Aapani Irioshi coramani? Ariquea ocanque:

‘Oraquea ogota mapi teeca irishineventajiavetempaji peacaajiacaroca mapipanco, opeanacaquea anaantamajatanquitsica quishotacaqueroaca.

Iriraquea Aapani Irioshi ipeacajaaroquea.

Amenajiaqueroquea aatimpajia oganejencani.’

⁴³ Irootaquequea nocantantajiaquempica aatotari piconoajiajari Aapani Irioshi imajirontagueti, itsipapae caquinte incajemajiaje quemisantamajajiaquenerineca, iriatimpajia iriguentiquea peajiaquenerica Imajirojiate. ⁴⁴ Quericaaca ompoquemparoneca ocatice

mapi incampojemparo jarare jarare, cotanquitsiquea quericaca ontsinacaqueca ompit-sarepitsarejatanaqueri.*

⁴⁵ Irooqueea iquemajiaquaquerigueti saserrotejia anaantajianquitsica aisa pariseojia iquejetacaajiacanarica Jesoshi, itsajiaquequea iriguenti itsavetacojiaqueca. ⁴⁶ Ariqueea icatsimajianaque inintajiaveca iracaantajiaqueri, cotanquitsiquea itsaroacaajiacari igonorojia. Iriatimpajia yamenajiaquaqueriquea Jesoshi iriguenti tsavetantatsica.

22

Jesoshi iquempetacaacaro ishineventajitaroqueti imanquigajitaqueti (Irc. 14.15-24)

¹ Iroompaqueea Jesoshi iquempetacaacaroqueea imajirontagueti Aapani Irioshi, icanque:

² “Imaicaqueea imaica nontsatacaajiaquempiro quero icotani Inquitequitica imajirontagueti. Iroguenti iquempetacariqueea majirontatsica itiacantaquequea taaca opajitapae isheca icajemitsijigari igonorojia irishecatatacaajiaquempari irishineventajiaquempariqueea irijanite irimanquigaquempagueti. ³ Iroompaqueea itigarancajiaqueriquea irashijia incantajiaquiteri coraquecoraqueitanquitsineca, cotanquitsiquea iriatimpajia teequea irinintajigueji incoraquecoraqueite. ⁴ Ariqueea itigarancajiaquea itsipapae icantajiaquaqueriquea: ‘Imaica pincantajiaquaqueri: “Icajemajiaquempi inetsanamajiaqueroqueea taaca opajitapae shecatsipae.” Nojitorejacaantajiaqueriquea nogaapironcaarinitepae aisa irijanigantirenajaniquipae quejimajatanquitsica, imaica netsanagueca maasanopae. Pincamanteri incoraquecoraqueique taampina irishecatatacaajiaquiten.’

⁵ Cotanquitsiquea irirajia icajemaveca teequea inquemisantajiaquaqueriji, manaqueea yoayoaitanaque querocagueti. Aparo oananquitsi iniganquitejirequi, itsipa oananquitsica irojocantagueteroqueea irajaararo. ⁶ Iroompaqueea itsipapae yaajiaquaqueri itigarancajiaquea majirontatsica itavatavaavaetavaqueri imetajiaquaqueri. ⁷ Ariqueea icatsimamajianaque majirontatsica itigarancajiaquea igoaretajiate irimetojajiaquiteri metojantajatsica, intaitemparo itsovironaquitepae. ⁸ Iroompaqueea icanqueriquea irashijia: ‘Jac netsanavetacaqueea maasanopae cameetsanijite irimanquigaquempanijite irijani, cotanquitsiquea iriatimpajia nocajemajiavetacaca teequea incameetsajigueji, manaqueea iquemavetaca, imaicaqueea aatoqueea icoraquetitsi. ⁹ Imaicaqueea manaqueea poajianaque quenavoquirontsipaequi pincajemajiaquiteriquea maasano quericaca pintonquivotonquivoiquempaca.’ ¹⁰ Ariqueea yoayoaitanaquequeea icapioacajiaqueriquea cameetsajianquitsica aisa teeca incameetsajigueji. Iriatimpajia icoraquecoraqueipojiquea iquijaquijaitapojaque yomporoguijavaetapojacaro itsovironaquite. ¹¹ Ariqueea iquijitapojacaqueea majirontatsica iramenajiaquiteriquea icajemajiaqueca. Ipitsoquitsivetanaca yamenitsitari aparato teeca inquitsaatemparoji quitsaarentsi quempetaroca iquitsaajiacaca igonorojia yojocajiquenerica cameetsanijite intsipatsipaiquemparinijite iriaqueraca manquigatanquitsineca. ¹² Icanqueriquea: ‘Notsipavijitaca, ¿queroqueea picocani piquijapoji intati teequea pinquitsaatemparoji quitsaarentsi quempetaroca iquitsaajiacaca pigonorojia?’ Cotanquitsiquea iriatimpa imativicanaquequeea. ¹³ Iroompaqueea ipitsocashijigari irashijia icanqueriquea: ‘Poishojigueri iguitiqui aisa iracoqui, paajianaqueriquea pimpishoncajiaquiteri sotsiqui opitsecaquegueti pintsipatsipaitacaantatquitempari iraaajianquitsica atsicayajijianquitsica.’

¹⁴ “Icaramirincavaequequeea icajemajiveca, cotanquitsiquea irirajia icoguiaqueetaqueca teequea iroshequiamajateji.”

Icoacojiqueri Jesoshi cameetsavaequempa irojocajiqueneri Sesa imentaquipae (Mr. 12.13-17; Irc. 20.20-26)

* 21:44 Oraqueea mapi irioqueea quejecaro Jesoshi. Oraqueea otsinacaqueca opitsarepitsarejatanaqueca iriojia quempecaro caarica shineventavacari Jesoshi. Ari inquempetacaajitaquempari incatsimamajajitaqueri.

¹⁵ Iroompaquea iriraquea pariseojia yoayoaitanaji iquemavacaajiaca incoraquetashiji-aqueriquea Jesoshi incomitacaajiaquempari cameetsanijite onchoocaquenijite incanqueca ompampiatantapojempaca incatsimatacaantajiaqueri. ¹⁶ Iroompaquea iriatimpajia itigarancagarantajiaque itsatacaane aisa shinevencarica Erorishi* iroaroaitanaquequea incoacojiaquiteri. Iroompaquea yarejerejeipojaca icanqueriquea:

—Tsatacaantantsica, notsajiaquequea aviatimpa teequea pamatavijanteji. Oraquea pitsatacaantigueti tampatica poaquero picamanqueriquea maasanopae queroquea incoajiaquempani irinetsanajigueroniji inintaguetica Aapani Irioshi. Tee inchoocateji quericaca pagamajaquempari, aisa teequea pintsaroacaguempariji caquinte, irioca anaantavetanquitsica, irioca teeca iranaanteji. ¹⁷ Pitsatirotarite icanqueca majirontatsica Sesa icanquegueti maasanojia jorio irojocagarantapinijiaqueneri imentaquipae. Imaicaquea ¿queroca pincanteni? ¿Cameetsampa nojocajiaqueneri, arica tee oncameetsateji?

¹⁸ Cotanquitsiquea Jesoshi itsatavaqueroquea manasacanaica iquenquejaguishejiaque intati, irootari icantantacarica:

—Cameetsatamampeajiatsica, ¿queroquea ocotacani pincomitacaaquename?

¹⁹ Iintsijate pamaquenarija apamentaqui imentaqui icanqueca Sesa ajocapinitenerica, nameneritate.

Iriatimpajia yojoquitajianariquea tenariomentaqui,† ²⁰ icantsitariquea:

—¿Taa ipajita iricatica ivaantorijiquea? ¿Taaquea ashintaro ivajiro tioncanquitsica?

²¹ Icanqueri:

—Iriguenti majirontatsica Sesa.

Icantsitariquea:

—Iroosacanaica, pojocajiajenerijate Sesa yashincaca iriatimpa pinetsanati-menqueroniji icanqueca, aisa pinquejetacaajiaquempariquea Aapani Irioshi pinetsanamajajiaqueroja maasanopae icantaguequeca.

²² Iquemajivaqueroqueti icantajiaquerica, ariquea icohicoitanaca yamenamenaitanaque intati, ariquea yoayoaitanaji.

Icoacojitaqueriquea Jesoshi quero oncoquempa intancoretancoreitanajeguetei oncoramani-tapojajeguetei

(Mr. 12.18-27; Irc. 20.27-40)

²³ Iroompaquea incajaranquiguitetanaqueguetei irioqueate oahoaitanajatsi saroseojia iramenajiaquiteriquea Jesoshi. Iriatimpajia iriguentiquea cantajianquitsica aatoquea itancoretancoreitajitsi metojatsica. Icantajipojajeguetei:

²⁴ —Tsatacaantantsica, iriraquea Moishishini itioncanaque coramaniqui paperiqui icanque inchoocaqueguetei caquinte teeca irijanintempaji, aapojempaguetei irimetojanajeguetei irojocapanajantero imanquigare, choocagueteiquea iriguentijeguetei irioquea manquigatajemparone irijanintacajaemparoquea quejetaja irioca irijanintajari metojanquitsica. ²⁵ Coramaniquea ichoocataquequea aparo nogonoro irijanintacaquea 7. Iriraquea parianquitsica imanquigavetacaroquea manquigarentsi, cofanquitsiquea niganquiquea imetojaque teequea irijanintacaguemparoji. Iroompaquea irioquea manquigavetajaro itsipa oguijatirica. ²⁶ Ariquea iquejetajaquea iriatimpa imetojanaji, teequea irijanintacaguemparoji. Ariquea iquejetacaquea itsipa niganquitanquitsica, arimpate iteroncanacaquea maasano imanquigajavetacarogueti, teequea irijanintacajaguemparoji. ²⁷ Ariquea ometojitsitanaca iroatimpa. ²⁸ Imaica, iintsija pincantajiguenaja, oraquea oncoramanitapojajeguetei intancoretancoreitanajeguetei maasano metojajavetanquitsica, ¿quericaca manquigamajatajemparoneca? Maasanotari imanquigajavecaroquea.

²⁹ Icanqueriquea Jesoshi:

* 22:16 Irira pariseojia irio jorioja, teetari irinintajigueti irimajirontaquempari Sesa, iriguentitari Iromaquitica. Ari iquejetaca Erorishi, teequea irio jorio. Cotanquitsiquea iriraquea Iromaquitica iquijagueteanaque iguinteniqui jorioja yomperaperavaejacari. Irioquea cantanquitsi irimajirontaquempa Erorishi joriojaqui, iriotarite inquemisantamajataque Sesa. Icanquequea Sesa maasanojia jorioja irojocagarantapinijiaqueneri imentaquipae. Tee iroshequiama-jateji jorioja shineventacarica Erorishi. † 22:19 Iriraquea tenario irio imentaquitsite Iromaquitica. Iramiteriguetei itsipa apajencaro savincagueteri irivegarataqueri aparo tenario.

—Aviatimpajia manaquea picomijiaca, teetarite pintsajigueroji queroca ocanqueni Itioncacaantaqueca Aapani Irioshi coramani, aisa teequea pintsajigueroji yagavejica iriatimpa. ³⁰ Oncoramanitapojajegueti intancoretancoreitanajegueti maasano metojajavetanquitsica, aatoquea quericaca manquigatajatsineca, aisa manquigarentsi aatarite yojocantajitajirotsi irimanquigajitajemparo, manatarite inquempejianajempariquea irashivantijitete Aapani Irioshi choocajatsica inquitequi. ³¹ Imaicaquea aviatimpajia manaquea picanque aatosa itancoretancoreititsi metojaguevetatsica. ¿Arimpate teequea pampatsajavantacojigueroji icantsitaquempica Aapani Irioshi paesatoniqui, icanquegueti: ³² ‘Naroguenti Irioshimajate Averaame, Ishaaco aisa Jacovo’? Teequea irio Irioshite metojatsica, iriguentiquea Irioshite anijatsica.

³³ Irooquee iquemajiaquerigueti maasano itsatacaajiaquerigueti imaica, mana ya-menamenaitanaque intati.

Queroca caavijica anaaque irinetsanamajajiqueca

(Mr. 12.28-34; Irc. 10.25-28)

³⁴ Iroompaquea iriraquea pariseojia iquemacojiaquerigueti Jesoshi imajeretacaajiaquerigueti saroseojia, yoayoaitashitanaqueriquea iriatimpajia aisa. ³⁵ Aparo pariseo tsamajavetaroca itioncacotanaqueca Moishishini, icoacopojiri iramenantaquempariniji, icanqueriquea:

³⁶ —Tsatacaantantsica, oraticapae icantacaanqueca Aapani Irioshi irinetsanajite ¿querocate anaantamajatatsica?

³⁷ Iriraquea Jesoshi icanque:

—‘Pimpintsamajataquemparija Majirontamajatatsica Pirioshite, pampaniromajatanaqueri, pimpintsashirentamajaquempari, pimpintsaguenquejanemajatanaquempari.’ ³⁸ Caavijiquea anaaque ocameetsamajataque irinetsanamajajiqueroquea ocatica, anaaguequero maasanopae icantacaantaqueca Aapani Irioshi irinetsanajique. ³⁹ Oraquea mavitetapojatsica oquejevecaro, ocanque: ‘Pimpintsataquemparija pigonoro pinquejetacaajempa pipintsatagueti aviatimpa.’ ⁴⁰ Ocaticaquea mavite icantacaantacajica anetsanajigue irootaquetari oquenantapojaca maasano otsipapae itioncacoguetaqueca Moishishini aisa itsipajia tsavetantajiaqueroca icanquerica Aapani Irioshi.‡

¿Taaquea choviquitanaqueri Quirishitotatsica?

(Mr. 12.35-37; Irc. 20.41-44)

⁴¹ Choocatirajagueti pariseojia, iriraquea Jesoshi icanqueri:

⁴² —¿Queroquea pincanqueni aviatimpajia? ¿Quericaca choviquiquerica Quirishitotatsica?§

Iriatimpajia icanqueriquea:

—Iriguentiquea choviquiqueri Taavini.

⁴³ Iriraquea Jesoshi icanqueri:

—Iroosacanica, paesatoniqui iquenquejacaquerigueti Ishire Aapani Irioshi Taavini, ¿queroquea ocotacani iriraquea Taavini ipeantacarica Quirishitotatsica Imajirote? Icanquetari:

⁴⁴ ‘Iriraquea Majirontatsica Aapani Irioshi icanqueri Nomajirote:

Pisaviquetaja pisenampijaquenaja notincamijempequiqui

pintsipataquenaquea arejevaetanaquempa

nagavejajiaquerigueti maasano catsimajiaquempica, onquejevequemparo povanque-

gontatsitempari.’

⁴⁵ Iriraquea Taavini icanqueri: ‘Nomajirote’, ¿querocaca incoquempani inchoviquitana-

queri?

‡ 22:40 Ampintsamajatemparigueti Aapani Irioshi aisa ampintsatemparigueti agonorolja, anetsanajigueroquea otsipapae igantacaantane Aapani Irioshi, ovonchaquijacarotari. § 22:42 Quirishitotatsica. Iguenquetsatsarequi guiriegolja icanquegueti Christos (Quirishito) manaquea ocanque “Ishagujitaqueca” aisa “Icoguiaqueca”, irishagujitaqueritari orejiqui orivo irirajia icoguiajiaqueca impeaquempa imajirojiate irooca isaserrotejiate. Irira Quirishito iriotaquequea itsavetacotsitacaca tsavetantajatsica coramanitica intigarancaque Aapani Irioshi impeaquempiniji Imajirojiate maasano.

⁴⁶ Teequeate inchoocatimateji aparo agavejanquitsineca iroguisotoajivaqueneri, ariquea oparianaca teequea quericaca cocotajerineca, manaquea imajerejanaque.

23

Icanque Jesoshi aatoja yoguijatacojitajiri pariseojia aisa tsatacaantajiguiroca itioncacotanaqueca Moishishini

(Mr. 12.38-40; Irc. 11.37-54; 20.45-47)

¹ Iroompaquea Jesoshi iquenquetsatacaajiaqueriquea capiocajianquitsica aisa itsatacaanejia icanqueriquea: ² “Irraquea pariseojia aisa tsatacaantajiguiroca itioncacotanaqueca Moishishini, iriojiaquea oguisotojaiguiroca itioncacotanaqueca Moishishini. ³ Nocantantajiaquempica intsishiatsi pinquemisantamajajigueri pinetsanamajajigueroquea maasanopae itsatacaajiaquempica, cotanquitsiquea aatoja piquempejigaritsi iriatimpajia. Manaquea itsatacaantajiaquequea intati, cotanquitsiquea teequea irinetsanamajajigueroji. ⁴ Oquejetaca yoishotacojitinirigueti itsipajia inirochonquiina tenamajatatsica iquijachonquiinatacaajitaqueri, iriatimpa ejempaco, teequea irininteji inquije. ⁵ Maasano yantajiaqueca yantajiaqueroquea cameetsaniji iramenimentajiqueriniji. Ariquea yamatsaetacojiacaroquea onaqui ivancaqui yoguijaancaroca itioncacotanaqueca Moishishini, ipeacaitaroquea catsantsanaqui. Ariquea iquempejiaqueroquea aisa imaatacojiacaroquea inaraqui. Oraquea yamanajiaquerigueti Aapani Irioshi iroguenti iquitsaajiaca catsantsajepaquipae. ⁶ Oraquea icajemajitirigueti ishecajiacagueti iroguenti inintajiguiquea iroguisavisaviiqueriquea intsipatsipaitacaanquempariquea anaantajatsica, aisa yoayoaitapiniiguigueti tsovironaqui qui icapio cantapini jigaca inintajiaquequea iroguisavisaviitaqueri intsipatsipaitacaanquempariquea caavijica yanaajiaque. ⁷ Aisa yoayoaitanaquegueti oraniqui yojocantantajitirogueti taaca opajitapae inintajiaquequea inquenquetsatacaajitavaqueri incantavaqueri: ‘Tsatacaantantatsica.’

⁸ “Cotanquitsiquea aviatimpajia aatoquea pinintajiguetsi incantajiquempi: ‘Tsatacaantantatsica’, choocatarite aparoquea Tsatacaantantatsica tsatacaajiaquempica. Maasano aviatimpajia mana piquejetavacaajiaca, quejiaquempi iguentijeguijia. ⁹ Ocaniquiquea caniqui quepatsiqui aatoquea ichoocatimatitsi pijitashitempa: ‘Aapani’, choocatarite aparo Piri, ichoocati inquitequi. ¹⁰ Aisa aatoquea pinintimatitsi incantajiquempi: ‘Nomajironcaca’, choocatarite aparo Pimajirote, irira Quirishito. ¹¹ Irraquea nintanquitsineca iranaaque manaquea iramitacotanquequea. ¹² Aritarite irira quenquejacotajatsineca: ‘Nanaajiaqueri itsipajia’, manaquea iroguipashiventajaqueriquea Aapani Irioshi oncoramanitapojajeguete, iriraquea teeca iranaanteji iroguenti irishinevenquempariquea iranaacaavaequeri.

¹³ “¡Imacashiatsi pantsipevaetempanishiatsi aviatimpajia tsatacaantajiguiroca itioncacotanaqueca Moishishini, aisa aviatimpajia pariseojia, cameetsatamampeajiatsica! Quejevecaquea, pashiteroguete sotomorontsi inquijantajitaquempameca nintajianquitsica irimajironaquetempari Inquitequitica. Aviatimpajiaquea teequeate pinquijeji, manaquea piticaantavaque aatoniji iquijaquijaiti nintajivetanquitsica.*

¹⁴ ¡Imacashiatsi pantsipevaetempanishiatsi aviatimpajia tsatacaantajiguiroca itioncacotanaqueca Moishishini, aisa aviatimpajia pariseojia, cameetsatamampeajiatsica! Manatarite pamatavijajiaqueroquea metojacoguetatsica piteroncapitsajiaqueroquea ashincaca. Aisa pamanajiaqueriguete Aapani Irioshi picaratsantsatacaavaevetacaro iramenajitaquempiniji. Nocantantajiaquempica aviatimpajia caaviji panaamajajiaque incatsimamajajiaquempiquea oncoramanitapojajeguete.

¹⁵ “¡Imacashiatsi pantsipevaetempanishiatsi aviatimpajia tsatacaantajiguiroca itioncacotanaqueca Moishishini, aisa aviatimpajia pariseojia, cameetsatamampeajiatsica! Aviatimpajia pitsitacaguetejavaetanaqueroquea quepatsi aisa inirojani

* 23:13 Irirajia tsatacaantajiguiroca itioncacotanaqueca Moishishini iriovetaca tsatacaantamajatanterome Iguenquetsatsare Aapani Irioshi irimeshiantaquemparime igonorojia, cotanquitsiquea iriatimpajia tee irinintenica irinetsanatero, manaquea itsatacaamampeajiacaró intati.

quentijani pinquemisantacaajiaqueriniji aparo caquinte inquempejianaquempiquea aviatimpajia. Oraquea iquemisantajiaquempigueti caavijiquea iganacaqueate icovaeguishedanacaquea yanaajiaquempiquea aviatimpajia. Irootaquequea iroantajianaquempaca camorecariqui quejejiaquempi aviatimpajia.

¹⁶ “¡Imaicashiatsi pantsipevaetempanishiatsi aviatimpajia, pitsatacaantajavecaquea cotanquitsiquea teequea pintsatimajigueji! Mana piquejejiacari shamponcajari nigavetaquemparica itsipa queroquea inquenanaque. Iroguenti picantajiaquequea: “Taaca opaji ancantajiaque iroocajate anquenquetsatacojiaque teemporo ancanque: “Nontsojeaquempagueti ompeguempata teemporo”, iroompa aatogueti anetsanatiroquea acanqueca cameetsataquequea. Cotanquitsiquea iriogueti anquenquetsataco-taquequea ooro choocatatsica teemporoqui, ari anetsanamajaqueroja, aatoquea acan-tashitatiimatarotsi.’ ¹⁷ ¡Quishoguinari pinajiaque! Shamponcajataquempi pishirequi. ¿Querocampate anaatsica: iriocajate ooro choocatancaroca teemporo, iroocajate teem-poro yashintantavajarica Aapani Irioshi? Irooriji anaavaeque teemporo. ¹⁸ Ariquea picanquequea aisa: “Taaca opaji ancantajiaque iroocajate anquenquetsatacojiaquequea aretare itaantajitarica viratsipae yaajiguinirigueti Aapani Irioshi ancantajiaquegueti: “Nontsojeaquempagueti ompeguempata aretare”, iroompa aatogueti anetsanatiro acan-queca cameetsataquequea. Cotanquitsiquea iriogueti anquenquetsatacojiaque vi-ratsi ogataanquitsica aretarequi, ari anetsanamajaqueroja, aatoquea acantashitati-imatarotsi.’ ¹⁹ ¡Shamponcajari pinajiaque! ¿Querocampate anaatsica: iriocajate viratsi, iroocajate aretare yashintantavajarica Aapani Irioshi? Irooriji anaavaeque aretare. ²⁰ Iriraquea quenquetsatacotiroca aretare, teequea aparo inquenquetsatacoteroji iroat-impá, iquenquetsatacoqueriquea aisa viratsi ogataancaroca. ²¹ Ariquea iquejetacaquea iriraquea quenquetsatacotirocaquea teemporo, teequea aparo inquenquetsatacoteroji teemporo, iquenquetsatacotsitariquea iriatimpa aisa Aapani Irioshi choocatancaroca. ²² Aisa quericaca quenquetsatacotiroca inquite ichoocatigueti Aapani Irioshi irooquea iquenquetsatacotsitaqueri ishitaponcaroquea Aapani Irioshi Imajirojiate maasano, aisa iriguenti iquenquetsatacoquequea Aapani Irioshi savicantaroca.

²³ “¡Imaicashiatsi pantsipevaetempanishiatsi aviatimpajia tsatacaantajiguiroca ition-cacotanaqueca Moishishini, aisa aviatimpajia pariseojia, cameetsatamampeajiatsica! Pojocagarantapinijiguiniri Aapani Irioshi pashintaguecaca: pashintajigagueti 10 ovana-janiqui icantajitica menta, irooca oitsoquijaniqui anishi, irooca comino, pinetsanaque-roquea pojocapinijiguiniri aparo. Cameetsavetaca, cotanquitsiquea povashiantanajiro caavijica anaaquequea itsatacajaiaquempica tioncarentsiqui, jero inintamajataqueca: tampatica poaqueneri maasano caquinteguetsatsica, pimpintsatacotantempaja, aisa paventamajaguitemparini Aapani Irioshi. Cameetsavaeque pojocagarantajiaquener-iquea Aapani Irioshi pashincaca, cotanquitsiquea aatomesano pipeacojigarome otsipa-pae icantajiaquempica. ²⁴ Quempevaequempiquea shamponcajari tsatacaavetanacarica itsipa queroquea inquenacaanaquerime. Quempecaquea pitsicajatacovetacari tsiito-janiqui, iriraquea cameyo, pinijacoqueri.

²⁵ “¡Imaicashiatsi pantsipevaetempanishiatsi aviatimpajia tsatacaantajiguiroca ition-cacotanaqueca Moishishini, aisa aviatimpajia pariseojia, cameetsatamampeajiatsica! Piquejejiacari quiviroca otaqui chotarontsi irooca perato, cotanquitsiquea intsom-poguirequi jac cantaitevaequequea, oshatecaquempitari covaeguisherentsi, manaquea paitsitantaguetaque, mana picoaguetaquero pinintaguetica aviatimpa. ²⁶ ¡Aviatimpajia pariseojia quejequempiquea shamponcajari! Iroquetita pinquivaquero intsompoguire-qui chotarontsi irooca perato ariquea aato ocantaitetajitsi aisa otaquiqui.†

²⁷ “¡Imaicashiatsi pantsipevaetempanishiatsi aviatimpajia tsatacaantajiguiroca ition-cacotanaqueca Moishishini, aisa aviatimpajia pariseojia, cameetsatamampeajiatsica!

† 23:26 Iquejetacaacari intati Jesoshi itsatacaquerigueti pariseojia, quejetaca incanteri: “¡Aviatimpajia pariseo-jia teequea pintsatimajigueji! Iroquetita pinetsanamajigueroja pishirequi cameetsanijite iramenajiquempiniji netsanamajiaquempi.”

Manatarite piquempejiacarouquea yoguijaantajitarica metojatsica, manaquea ipantan-tajitacarou quitamarori cameetsanijite iramenajiqueroniijite ocameetsavaeque. Cotanquitsiquea intsompoguirequi chomisaaniquea iriguentiquea tseraiquicarouquea itonqui metojatsica icojotonquiptotanaquequea. ²⁸ Ariqueate piquempejiacaquea aviatimpajia iroguenti picameetsatamampeajiaca intati cameetsanijite iramenajiaquempinijite caquinteja, cotanquitsiquea intsompogui pishirejiaqui mana pishatecanajiro amatavijagantsi aisa covaeguisherentsi.

²⁹ “¡Imaicasiahiatsi pantsipevaetempanshiatsi aviatimpajia tsatacaantajiguiroca itioncacotanaqueca Moishishini aisa aviatimpajia pariseojia, cameetsatamampeajiatsica! Iroguentiquea pipeacaashijiacanariquea inquenquejacotantajitajemparica tsavetantajiatatsica metojajianquitsica coramanipaequitica, aisa pinetsanajiaqueneriquea yoguijaantajitarica comajamajajatsica metojajianquitsica cameetsanijite inquenquejacotitajerinijite. ³⁰ Ariquea picanquequea: ‘Arimequea nonchoocateme coramani ichoocatigueti choviquivaejianaquenaca aatomequea namijiguirime imetojajiaquerigueti tsavetantajiatatsica.’ ³¹ Oraqueate piquempejiaquerogueti imaica aviguenti quempetacaantanquitsi, picantajiaquetarite aviguentijia ichoviquivaejianaqueca metojajiaquerica, ari piquejejiacari. ³² ¡Iroosacanica pinteroncamajateroja ipariaguishecaca choviquivaejianaquem-pica!

³³ “¡Quempevaequempi camaarini! ¡Quejejiaquempiquea irijanijiate sanatari! ¿Quero pincojiaquempiani aatonijite pitsijaigatsi camorecariqui? ³⁴ Irootaquequea nontigaranquimotantajiaquempirica tsavetantajiguiroca icanquerica Aapani Irioshi, itsipajia caavijica itsajigui, itsipajia tsatacaantajiatatsica. Cotanquitsiquea ari pimetojagarantajigueri pompajacogarantajigueri, itsipapae pintavatavajigueri shinagogapaequi picapiocantapinijiacaca, pincatsimatashijianaquempari pimpatimajianaqueriquea iguintenipaequi. ³⁵ Pinintacaajiaqueri irimetojajiaque comajamajajatsica irootaquequea incatsimatimentantaquempiroca Aapani Irioshi quejetacaquea aviatimpajia quejetacaantajiaqueriquea imetojantajicarica tsariventamajajigarica Aapani Irioshi coramanitica, iriquetinicaquea ipariajitacaca comajatatsica Averini icaratacaajivaequeriquea Sacarianiqui irijanite Verequiashini. Iriraquea Sacariani manaquea imetojajitaqueriquea ontaniqui oniganquirequi oticaacoroqui teemporo ichoocavetacaguete acaqueroca aretare itaantajitarica viratsipae. ³⁶ Arimajacaquea noncantajiaquempica, imaicasiahiatsi incatsimatimentajiaquempironishiatsi Aapani Irioshi aviatimpajia choocajanquitsica imaica.

Jesoshi iracojiaqueriquea Jerosarequitica

(Irc. 13.34-35)

³⁷ “¡Jerosarequitica, Jerosarequitica, pimetojajiguiriquea tsavetantajiatatsica, aisa pitsinatsinavaetaqueriquea itigaranquimojivetaquempica Aapani Irioshi intsavetantimojiaquempiro Iguenquetsatsare! Pamenajiguiroquea chaapa osaavantajiguiqueti orijanijiate, nonintaguevetacaquea naatimpa nonquempetacaajiaquempimequea maasano aviatimpajia noncapiocajiaquempimequeate pintsariventajiaquena, cotanquitsiquea aviatimpajia teequea pinintajigueji. ³⁸ Imaicaquea imaica aatoquea ichoocatimojiajimpi Aapani Irioshi, aparoquea pinchoocajiaje. ³⁹ Nocantajiaquempiquea imaica aatoquea pamenajiajana arejevaetapojajempaqua aapojajempaguete pincantajianaque-taquea: ‘¡lintsishiatsi irishineventajiquempari iriratica coraquetapojatsica itigarancaqueca Majirontamajatatsica!’ ”

24

Jesoshi icanque irisovejaiquero teemporo

(Mr. 13.1-2; Irc. 21.5-6)

¹ Ariquea isotoanajiroguete Jesoshi oticaacoroqui teemporo iroavaetanaje, iquempejiquempejiipojiriquea itsatacaanejia yamenacaaguequeri teemporo aisa tsipaguetacaroa.

² Cotanquitsiquea iriraquea Jesoshi icantajigui:

—¿Arite pamenajiaquero maasanopae ocatica? Iroomajatari noncanquempica, aatoquea ochoocatajitsi aparo mapi ogataajatsineca, maasanopae irisoveacomajajitaquero.

Queroquea oncotanaquempani irooshipojegueti onteroncaguetanajempa quepatsi
(Mr. 13.3-23; Irc. 21.7-24)

³ Iroompaquea isavicaquegueti Jesoshi Orivotsempiqui, ariquea iquempejiquempeji-
ipojari itsatacaanejia, icantajiapojiri:

—Nonintajiaque pintsatacaguena quero oncarateni onetsanatantaquempaca inca-
jaranquitica picanquegueti irasacaraajitaquero. ¿Taa opaji nontsatantajiajavajemparoca
pincoraquetantapojajempaca aisa onteroncantaguetanaquempaca quepatsi?

⁴ Irieraquea Jesoshi icantajiguiri:

—Shoshoh yamatavijajitimpitsi. ⁵ Incoraquecoraqueitaquetari oshequini pinajaji-
aquenaneca cantajianquitsineca: ‘Naroguenti Quirishito’,* ariquea iramatavijajiaqueri
incaramirincatashivaetanaqueri. ⁶ Aisa pinquemacojiaqueriquea itsipajia irashimirin-
tavacaajianaquempa quempeji, aisa itsipajia otsipapaequi guinteninintsipaequi, cotan-
quitsiquea aviatimpajia aatoquea pitsaroajiguitsi. Aritarite onquempetanaquem-
paquea imaica, cotanquitsiquea aatotaquea arejetsitatsi onteroncantaguetanaquem-
paca quepatsi. ⁷ Irieraquea guintenijianquitsica otsipapaequi quepatsi iroaroaitashijiana-
queriquea osamanipaequitica, ariquea irashimirintavacaajiaquempa. Ariquea in-
quempejiaquempa majirontajatsica inchoocagarantajiaque intigarancajiaqueri igoare-
tajiante iroaroaitashijianaqueriquea itsipa majirontatsica irashimirintavacaajiaquempa.
Irantsipevaejitaquemparoquea tasetzijencapae, aisa omogucaguetanaquempaquea.
⁸ Onquempeguetanaquempagueti imaica mana oparianaca intati irantsipevaeantajia-
taquempaca.

⁹ “Ariquea irajaiquempejiaquea iranaquempi incatsimatacaantajiaquempejiaquea irime-
tojacaantajiaquempi. Maasanopae caquinteguetatsica irisemimentajiaquempiroquea
novajiro pitsarotentajiaquenagueti. ¹⁰ Inconoagarantajiaquempaquea tsarotentaji-
avequenanea irovashiantajianajero aato itsarotentajiajana, iroguenti iracaantajiana-
queriquea itsipavijivetacaca, irisemavacaajianaquempa. ¹¹ Irisotoguetanaquequea
amatavijantanquitsineca incantamampejiaquempaquea: ‘Notsavetantiro Iguenquet-
satsare Aapani Irioshi’, cotanquitsiquea iriatimpajia manaquea iramatavijajianaqueri
oshequini. ¹² Oncantatiaguishevaetanaquempaquea oratica covaequisherentsi, aato
ipintsatantamajatanaja oshequini caquinteja. ¹³ Cotanquitsiquea quericaca atsipeta-
covaetanquitsineca aatogueti yovashiantirotsi itsarovenquenagueti arejevaequempa
irimetotajane, irioquea iriguenti irajaitanaje inquitequi. ¹⁴ Intsitacaguitejavaetanaquero
quepatsi intsavetantajitanaqueroquea quero icotani Aapani Irioshi imajirontagueti.
Ariquea inquempejiaquempaquea imaica cameetsanijite inquemacojiaquero maasano
caquinteguetatsica, ariquea onteroncapojempa.

¹⁵ “Irieraquea tsavetantatsica Iranierini coramani itioncacotaqueriquea
covaeguisquetaqueronca teemporo oncoramanitapojajegueti. (Quericaca
apatsajavanqueroneca ocatica pinquenquejamajateroja pintsatimenqueroniji.) Imaica
aviatimpajia pamenajivaquerigueti inchoocatantapojajuemparogueti itemporote
Aapani Irioshi, ¹⁶ pincampojeja jaran maasano Joreajiaquitica pishiashiaitapanajantejate
otsempiguetagueti. ¹⁷ Quericaca choocatanquitsineca sotsiqui omencotapojacagueti
itsovironaquitequi ovancaitoqui, aatoquea yaguijitapanajanti iraguepanajantero
taaca opajitapae choocatanquitsica intsompogui. ¹⁸ Quericaca choocatanquitsineca
iniganquitejirequi, aatoquea yoapanajanti itsovironaquitequi irapanajantero otsipa
iitsaare. ¹⁹ ¡Ooshiatsi manquigarentsijia tsaraquijianquitsineca, aisa atsojianquitsineca,
caaviji antsipemajiaquempaquea! ²⁰ Aviatimpajia pamanacoventajiaquempaquea
aatonijite pishiamirincatantajigarotsi sharacaguiteri qui irooca aisa savincaguiteri qui
imagorejantajitaca. ²¹ Caavijitari irantsipevaejitaquempa anaavaequero maasanopae
yatsipejitacaca iroaqueragueti ipeacaaguecarogueti Aapani Irioshi quepatsi arejevaeca
imaica. Aisa aatoquea yamenimajitajirotsi oncoramanitapojajegueti. ²² Aatomegueti
icaratacaapojirome Amajirote oratica savincaguiteri ipae irantsipetantajiavetaquempaca

* 24:5 Quirishito ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraqueaque
impeaquempa imajirote ompejiaquemparineca.

interoncamajiaquempamequea caquinteja. Cotanquitsiquea ipintsatacotacari icoguiajiaqueca,[†] incaratacaantapojaquenemparica.

²³ “Quericaca cantajiaquempineca: ‘Jeeri iricatica Quirishitotatsica’, irooca incanquempi: ‘Ichoocaque ontaniqui’, aatoquea piquemisantajiguiritsija. ²⁴ Incoraquecoraqueitaquequea tsavetantamampejaigatsica amatavijantajianquitsineca incanquequea: ‘Naroguentiquea Quirishitotatsica.’ Itsipaquea cantajianquitsineca: ‘Naroguentiquea tsavetantiroca icanquenaca Aapani Irioshi.’ Aisa ironigaanqueroquea oacaantantatsica intati cameetsanijite iramatavijajianaquerinijite oshequini. Inquejetacaajitsivetempariquea icoguiajiaqueca Aapani Irioshi, cotanquitsiquea aatoquea yagavejiritsi. ²⁵ Jero, nocamantsivaequempiro maasano ocatica imaica tequerataguetei arejepojempa. ²⁶ Incanquempiguetei: ‘Jeeri irintatica oquitamampororoitapojiguetei’, aatoquea poapoaititsi pamenamenaiquiteri. Aisa incanquempiguetei: ‘Chooa oraniqui intsompoguiqui’, aatoquea piquemisantajiguiritsi. ²⁷ Onquempetaquempaquea pamenajiguiroguetei careti queroca ococani ocantiguetei timemec, teequea capichajaniqui ontimemequeji, maasanoquea ontimemecaguitevaequero. Ariquea inquempetapojajempa irira Irijanite Caquinte incoraquepojjaguetei, maasanojia iramenamajjivajeri. ²⁸ Quempecaquea metojatsica querocaguetei oraniqui yojoquijicaguetei yamenajiqueriquea sheetyaoni irarampejashijiapojeri.[‡]

Querocaca oncoguetanaquempiani incoraquetajateguetei Irijanite Caquinte
(Mr. 13.24-37; Irc. 17.26-30, 34-36; 21.25-33)

²⁹ “Irooquea oncaraguijanaqueguetei atsipevaerentsi impitsecajencatanaque catsirincaiteri, taai aato iquitasetaji. Iriraquea impoquiropae irasacaraaguetanaquempaquea. Irimogucanaquempaquea choocaguetanquitsica jenoqui inquitequi. ³⁰ Ariquea iramenajitavaquero ontaniqui inquitequi intsatantajitavaquemparoca irooshimajapoji incoraquepojaque irira Irijanite Caquinte. Ariquea irishimampojancajianaquempa maasano caquintegueteatsica quepatsipaequitica iriraajianaquempa. Ariquea iramenajivajeri Irijanite Caquinte incoraquetantapojajemparo mararo, iragavejavaetapojempa iranaajiaqueriquea maasano, iroganejencavaetapojempa. ³¹ Iroompaquea intivojiqueroquea tivorentsi intigarancajiaqueriquea irashivantijitete iroaroaitanaquequea intsitacaguitejajiaquitero maasanopae quepatsi incapiocajiaqueriquea icoguiajiaqueca Aapani Irioshi.

³² “Imaica pintsajivaqueroja nontsatacaajiaquempica, nonquempetacaaquempiroja iguera. Iroaquerasano etsocorevanatanaque pitsajiaquequea irooshipojaji ajagantsipojaje. ³³ Ariquea onquempetanaquempaquea oncoramanitapojajeguetei pamenaguetavajerogueti onquempetanajempaguetei maasanopae nontsatacajianaquempica imaica, irooquea pintsatantajivajempa irooshipojishiatsi incoraquepojjaje Irijanite Caquinte, quejetaca catiapojaca sotorontsiqui. ³⁴ Arimajaca noncantajiaquempica, maasanopae ocatica nocantajiaquempica imaica onetsanamajatanaquempaquea tequerataguetei interoncajiguempaji maasano choocajianquitsineca omparianaquempaguetei nontsavesantsitacaca imaica.[§] ³⁵ Oraquea inquite aisa quepatsi ompeaquempa, cotanquitsiquea oraquea nocantaguequeca aato opegatsi.

³⁶ “Teequea inchoocateji tsatatsineca querocaca savincaguiteri onetsanatantaquem-paca, tee intsajiteji quero incarateni catsirincaiteri. Irirajia ashivantijite inquitequitica tee intsajigueji, ariquea iquempetaca Irijanite Aapani Irioshi teequea intsateji. Aparoquea icocani Aapani Irioshi iriatimpa itsaqueroquea.

[†] 24:22 Irirajia icoguiajiaqueca iriojiatari aventaventajiaquemparineca. [‡] 24:28 Quejetaca yamenajiqueri sheetyaoni irarampejashijiapojeri metojatsica, ariquea onquempetaquempa incoraquepojjaguetei Quirishito, aato isenacapoja, maasanoquea iramenajivajeri. Pamenero aisa Irc. 17.37. [§] 24:34 Otioncaca acaniqui, iguenquetsatsarequi guiriegogia ocanque genea. Chooa mavitepae agavejaque oncantacotaque. Genea agavejaque oncantacoqueri (1) irioca maasano choocajianquitsica icantaquerogueti (esta generación la gente de este tiempo); (2) irioca oncantacoque maasano joriojia (esta raza); (3) irioca oncantacoque maasano choocajianquitsineca omparianaquempaguetei itsavetantsitacaca (esta generación, es decir, la generación que ve el comienzo de estas cosas).

³⁷ “Oraquea incoraquetajategueti Irijanite Caquinte onquempetajemparoquea ichoocavecagueti Noeni coramani.✠ ³⁸ Tequeratagueti onanquempaji anaantaguetaquemparoca maasanopae quepatsi, ishecajiaca caquinteja, imirajiaca, imanquigajiaca, yojocantajiaqueroquea irorijanijiate omanquigajiaquempaquea, arejevaeca savincaguiteri iquijaquijaitantacaca Noeni iguenajaroqui icantajitica aareca. ³⁹ Iroompaquea ocomitajajipojiri anancari ocataroajianaqueri. Ariquea onquempetaquempa oncoramanitapojajegueti incoraquetapojajegueti irira Irijanite Caquinte, manatarite incomirejajipojeri. ⁴⁰ Inchoocajiaque mavite caquinte iniganquitejirequi, aparo irajaitanaque, iriraquea itsipa irojocajitanaqueri. ⁴¹ Ariquea onquempetajiaquempaquea mavite manquigarentsi osavicajiaque ontoncaciaque, aparo irajaitanaquero, oraquea otsipa irojocajitanaquero.

⁴² “Irootaquequea noncantantajiaquempica pincoquempanija poguijajivajerija Pimajirote, teetarite pintsajigueti querocaca incoraquetantajempaca. ⁴³ Iintsijate pinquenquejajiguerojate, inchoocategueti itsipa ashintanquitsineca itsovironaquite intsatemegueti querocaca incoraquetantaquempaca aitsitantatsica, ¿arimpate iri-maaque? ¡Aatotarite imaguitsi! Manaquea intinajaventaguiteroni irajaararo aatonijite yaitsijitiritsi. ⁴⁴ Irootaquequea noncantantajiaquempica pincoquempanija pincomajamajajiaquempa poguijaguiteroni incoraquetajegueti irira Irijanite Caquinte, iroorijite incoraquetantajemparo pijijiaqueca aatoca incoraquetantaro.

Yashintajitaca cameetsari aisa teeca incameetsateji
(Irc. 12.41-48)

⁴⁵ “¿Querija quempequemparineca imaica yashintacaca irira tsatatsica quemisanta-majatirica ashincarica? Pameneja inchoocategueti ashincarica caquinte iroompaquea iroanaquegueti osamani, incantanaqueri aparo yashincaca: ‘Pinquempoguijajajeri maasano nashintajiacaca, pojocapinijiaquenerija ishecajia.’ ⁴⁶⁻⁴⁷ Oraquea incoraquepo-jajegueti iramenapojajerigueti inetsanamajatajiro icantanaquerica, arimpaquea irishin-eventamajatanauempariquea. Arimajaca noncanquempi, incampoajeri: ‘Imaica noninquequea pamenaguetaqueroquea maasanopae nashincaca.’ Ariquea iriatimpa irishinevaetanaquempaquea oshequi. ⁴⁸ Cotanquitsiquea iriogueti teeca inquemisanteji, aatoquea yoguijiritsi ashincarica manatarite incanque: ‘Aatotajate icoraquetsitaja’, ⁴⁹ ariquea imparianaquemparo incatsimajianaqueriquea quejejiacarica yashintajitacaca, inconoajiaquempariquea shinquitatsica manaquea irisavicaventaguiteroni irishecagui-tempani, aisa irishinquiguitempani. ⁵⁰ Cotanquitsiquea taampina incoraquetimopojajeri ashincarica incomirejapojempari, ⁵¹ incatsimamajapojajeri oshequi, intsipatacan-tajiaquempariquea quemisantamampeajatsica intati, ontaniquiquea iriraaguitempani irantsicayajijiaquempa.

25

Jesoshi iquempetacaacaro 10 manquigarentsijia iroaqueraca quenquevaroguetananquitsi

¹ “Imaica nonquejetacaquemparoquea quero oncoquempani irimajirontaquem-pagueti Inquitequitica aapojempagueti notsavetantsitacaca. Manaquea onquempeji-aquemparo 10 manquigarentsijia iroaqueraca quenquevaroguetananquitsi. Iroatimpajia amajiaque otsivorepae oahoaitanaque ontonquivotonquivoiquempari manquigatan-quitsineca. ² Ocarajiaque 5 teeca onquenquejamajajigueti, otsipa 5 quenquejamajajian-quitsica. ³ Iroatimpajia teeca onquenquejamajajigueti amajiaveca otsivorepae, cotan-quitsiquea teetarite aajianaqueji ashitite oganencajatantanaquemparica coajica in-teroncanaquempagueti. ⁴ Oraquea quenquejamajajianquitsica irogueti amajiaque itsi-pataco. ⁵ Iroompaquea oguijaveguitarini teetatarite incoraquetsitempaji manquigatan-quitsineca, ocantanaca pochoquini ojocajianacani tin. ⁶ Iroompaquea onianquite-vaetapojaquegueti oquemitsitariquea icajemajencajitaque: ‘¡Coraquetapojaque man-quigatanquitsineca, poapoaiteshiatsi pintonquivojajivaquempariquea!’ ⁷ Ariquea oco-jianaca ocatiajianaca maasano aitsijavetanaca otsivorepae. ⁸ Oraquea teeca onquenque-jitsitempariji ashiti ocantsivetroquea quenquejajianquitsica: ‘Pojocagajaitenashiatsi

✠ 24:37 Jen. 6.5-12; 7.6-24.

capichajaji pashitite irootapojishiatsi nontsivacacotenishiatsi.’⁹ Cotanquitsiquea iroatimpajia ocanqueroquea: ‘Aatoshinete nojoquimpitsi. Arigueti nojocajivequempigueti manaquea anteroncajatacotsijianaquempaja taampina maasano. Poapoitanaquequea pivegarajiapanajante pashi aviatimpa itsipajato.’¹⁰ Cotanquitsiquea irooquea oahoave-tanaca ovegarajiapanajante jac arejetapojaca manquigatanquitsineca. Oraquea quenquejamajianquitsica amajianquitsica ashitite oquijaquijaitanaque intsompoguiqui ot-sipatsipaitanacari irishineventajiaquemparigueti, ariquea ocotanaca yashimajitajiro ashitacoronsi.¹¹ Ariquea ocoraquecoraqueitsivepojaca otsipavecaca, ocanquequea: ‘¡Nomajirote, nomajirote, intsija pintanarejacotenashiatsi!’¹² Cotanquitsiquea iriatimpa icantajiguero: ‘Teetarite nontsamajajiguempiji cameetsanijite nontanarejacojiaque-mpinijite.’¹³ Irootaquequea imaica noncantantajiaquempica pincoquempaniquea pin-comajamajiaquempaja, teetarite pintsajigueji querocaca incoraquetantapojajempaca Irijanite Caquinte.

Jesoshi iquempetacaacari caquinte ashintajiacarica caraquisequitirica imentaqui
(Irc. 19.12-27)

¹⁴ “Imaica nonquempetacaaquemparoquea imajirontagueti Inquitequitica, man-
aquea nonquempetacaaquempari caquinte ashintajiacarica caraquisequitirica imen-
taqui. Irooshipoji iroanaquequea otsipaqi quepatsi icajemajiaqueri irashijia irojo-
cajianaqueneri imentaquipae iroganencajeri.¹⁵ Iriraquea aparo yojoquitanariquea
5 imontiina imentaqui.* Iriraquea itsipa yojocaqueneri mavimontiiinate. Iriraquea
mavitevaetapojatsica yojocaqueneri apamontiinaro. Itsaqueritari maasano yashinta-
jiacaca queri agavejamajatanquitsineca aisa teeca iragavejamajateji. Ariquea yoavae-
tanaque jmm osamani.¹⁶ Iriraquea yojocanaquenerica 5 imontiina yoganencajiriquea
itsipa 5 imontiina.¹⁷ Ariquea iquempetacari itsipa yojocanaquenerica mavimontiiinate,
yoganencajiri itsipa mavimontiiinate.¹⁸ Cotanquitsiquea iriraqueate yojocanaquenerica
apamontiinaro, manaquea yoanaque iquisocashitaqueri quepatsiqui yoguijaitari.

¹⁹ “Ocoramanivaetapojaji anaanaaguetanaca oshequini taai icoraquepojaji ashin-
tajiicarica icantajiapojiri: ‘Jameja amenajajeri imentaqui querocaca icaramonti-
inatanaqueni.’²⁰ Iriraquea yojocanaquenerica 5 imontiina yojoquitsitajanariquea,
itsipatacaantacari itsipa 5 imontiina imentaquipae yaancarica, icanqueriquea: ‘Noma-
jirote, ari pojocavetanaquena 5 imontiina, jeri iricatica itsipa 5 imontiina naantajarica
pimentaquitsite.’²¹ Iriraquea ashincarica icanqueri: ‘Cameetsavaeque, pinetsana-
majaqueroquea nocanquempica, piquemisantamajataquena. Pinetsanatavaquerotari
nocantavequempica capichajaniqui, imaicaquea aviguenti quempoguijenarone oavae-
tanaque. Pincoraquetequetiro ashinevaejiaquempa.’²² Iriraquea itsipa yojocanaque-
nerica mavimontiiinate yojoquitsitajanariquea, itsipatacaantacari itsipa mavimonti-
inate imentaquipae yaancarica, icanqueriquea: ‘Nomajirote, ari pojocavetanaquena
mavimontiiinate, jeri iricatica itsipa mavimontiiinate naantajarica pimentaquitsite.’
²³ Iriraquea ashincarica icanqueri: ‘Cameetsavaeque, pinetsanamajaqueroquea no-
canquempica, piquemisantamajataquena. Pinetsanatavaquerotari nocantavequempica
capichajaniqui, imaicaquea aviguenti quempoguijenarone oavaetanaque. Pincoraque-
tequetiro ashinevaejiaquempa.’

²⁴ “Iriraquea mavitevaepojatsica yojocanaquenerica apamontiinaro icanqueri ash-
incarica: ‘Nomajirote, namenimpiquea aviguenti teequea pimpintsatacotantempaji,
aisa aviguenti caavijica patsipetacaantavaetaca pishiacotacaantigueti paanquempaca
caraquisequi imentaqui. Aisa manaquea poganencaqueri imentaqui intati teequea
pishiacotimenteriji.²⁵ Irootaquequea notsaroacaanquempica noantanacaca noqui-
tatantacarica pimentaquitsitepae quepatsiqui. Imaica jeri iricatica pimentaquitsitepae.’
²⁶ Iriraquea ashincarica imentaquitsite icanqueri: ‘Teequea pincantempaji, aviguenti
peratatsica. Iroosacanica pitsaquena natsipetacaantavaetaca noshiacotacaantigueti
naanquempaca caraquisequi imentaqui, aisa manaquea noganencaqueri imentaqui

* 25:15 Apamontiinaro imentaquipae cavorejatatsica tenatatsica 91 quiro, icantajitiro coramani tarento (talento). Iramiterigueti itsipa irajagantsitacovaetanaque irivegarataqueri aparo tarento.

intati teequea noshiacotimenteriji. ²⁷ ¿Querocaquea ocotacani teequea pojoqueneriji nomentaquiijatsite quempoquijantaguetirica paantajemparimequeate itsipajia, iroompaquea nocoraquevetajaguetei imaica pojocavajenarimequea?’ ²⁸ Ipitsocashijigariquea choocajianquitsica oraniqui icanqueri: ‘Paapitsaterishiatsi iricatica apamontiinaro imentaqui nojocavecanarica pojocajigueneri oganencaquerica 5 imontiina. ²⁹ Caavijitari irojocamajajiqueneri quericaca ganencamajataquerica, cotanquitsiquea iriraquea teeca irashintamajatempaji, capichajitica yashintaveca iracaitsijitaquempariquea. ³⁰ Imaica iricatica nashincaca teeca inquemisantenaji paajianaqueriquea pimpishoncajianquiteri sotsiqui opitsecaqueguetei intsipatsipaitaquempariquea iraaajianquitsica atsicayajijianquitsica.’

Queroquea incojitaquerini caquinteja oncoramanitapojajeguetei impeaquempaguetei Jesoshi Imajirojiate maasanolja

³¹ “Oncoramanitapojajeguetei incoraquetajeguetei Irijanite Caquinte iroganejencavaetapojempa intsipatsipaitaquempari irashivantijitete Aapani Irioshi, irisavicapojero imajirontamento oganejencari irimajirontamajapojempa. ³² Intiorencaventajianaquempari maasano caquintequetatsica. Iriatimpa iromporoguijashiguetempari inquempetacaajiaquempari quempoguijirica oveja yomporoguijashiguetariguetei irovejate aisa igaaverate. ³³ Iromporoguijashitaquempari ovejajia itincamijempequiqui, aisa caaverajia iromporoguijashitaquempari ishinampijempequiqui. ³⁴ Iriraquea Majirontatsica incantajiaqueri choocajianquitsica itincamijempequiqui: ‘Caacate, aviatimpajia icavintsajamajiaqueca Aapani. Pashintajiaquemparoquea maasanopae ipeacaajiaquempica paesatoniqui iroaqueraguetei ipeacaacaroguetei quepatsi, aviatimpajia inintacaajiaquempiro incavintsajajiaquempiquea. ³⁵ Iroorijite natsipevaetacaroguetei notase aviatimpajia pojocajiaquenaquea noshecatacaca. Nomirevaetiguetei pojocajiaquenaquea nomiracaca. Noquenaguetanaqueguetei teequea pintsajiavetenaji, picajemajiaquenaquea pitsovironaquitequi nomaimojiaquempi. ³⁶ Teequea onchoocavetempaji nonquitsaaquempaca, aviatimpajia pojoquitanoquea noquitsaacaca. Nojoquijicaguetei aviatimpajia pipintsatacojiaquenaquea pamenajiaquitana. Aisa isantanatacojitanaguetei picoraquejijati.’ ³⁷ Iroompaquea iriraquea comajamajajianquitsica icanqueriquea: ‘Nomajirote, ¿querocate namenajiaquempini pitaseaqueni nojocajiaquempi pisheca? ¿Querocate namenajiaquempini pimirequeni nojocajiaquempi pimiracaca? ³⁸ ¿Querocate namenajiaquempini piquenaguetanaqueni nocajemajiaquempini pimaimojiaquena? ¿Querocate namenajiaquempini picajaratsinotiguetei nojocajiaquempi piquitsaacaca? ³⁹ ¿Querocate namenajiaquempini pojoquijicaguetei, aisa isantanatacojitaquempiqueti noanoaitaquiti namenajiatimp?’ ⁴⁰ Cotanquitsiquea icanquequea Majirontatsica: ‘Arimajaca noncanquempi, pipintsatacojiacariguetei aparo iricatica niguentijeguite† teeca iranaanteji, quempeca naroguentica pipintsatacotaca.’

⁴¹ “Aisa icanqueriquea yomporoguijajiaqueca ishinampijempequiqui: ‘Imaica aviatimpajia icatsimajiaqueca Aapani, poapoaitanaque ontaniqui camorecariqui aatoca otsivaquitsi ipeacaashijicarica Satanashi‡ aisa ashivantinirojite quemisantaquerica. ⁴² Natsipevaecaroguetei notase teequea pojocajiguenaji noshecajiaquempaca. Nomiretiguetei teequea pojocajiguenaji nomiraqueca. ⁴³ Noquenaguetanaqueguetei teequea pincajemajiguenaji pitsovironaquitequi nomaimojiguempiji. Teeguetei onchoocateji noitsaare teequea pojocajiguenaji nonquitsaaquempaca. Nojoquijicaguetei, aisa isantanatacojitanaguetei, teequea pimpintsatacojiguenaji pincoraquetashijiguenaji.’ ⁴⁴ Iriatimpajia incanqueriquea: ‘Nomajirote, ¿querocate namenajiaquempini pitaseaqueguetei, irooca pimirequeni, aisa piquenaguetanaqueguetei, irooca picajaratsinoqueguetei, irooca pojoquijicaguetei, aisa isantanatacojiquempiguetei, teequea nompintsatacojiguempiji?’

† 25:40 Icanqueguetei Jesoshi niguentijeguite iriguenti icantacoque tsarotentacarica Aapani Irioshi. ‡ 25:41 Iriraquea Satanashi iriotaquequea imajironcaca ampatsinijia, iriojiaquea irashivantinirojitetete.

⁴⁵ Iriatimpa incantajigueriquea: ‘Arimajaca noncantajiaquempi, teetari pimpintsatacojiguempariji iricaticajia teeca iranaanteji, quempeca naroguentica teeca pimpintsatacojiguempaji.’ ⁴⁶ Maasano irirajia iroaroaitanaquequea camorecariqui irantsipeventagui-temparoni igovaeguishere. Cotanquitsiquea iriraquea netsanajiguiroca inintica Aapani manaquea iroaroaitanaque inquitequi, incoguitempani iranijaguiteni.”

26

Iquemavacaimentajiacari Jesoshi iracaantajiaqueri

(Mr. 14.1-2; Irc. 22.1-2; Jn. 11.45-53)

¹ Iteroncaquerogueti Jesoshi itsatacajiaquerigueti itsatacaanejia, icanqueri:

² —Aviatimpajia pitsajiaque mavitetapojaque savincaguiteri aapojempaca Paashicoa.* Irooquee iracaantantajitaquemparica Irijanite Caquinte irompajacojiqueri.

³ Ariquee icapiocajiaica itsoviaguitertequi Caipashi maasano saserorotejia anaantajianquitsica, tsatacaantajiguiroca itioncacotanaqueca Moishishini aisa jivajiguirica joriojia. Iriraquea Caipashi iriguenti saserorote anaantamajatanquitsica. ⁴ Ariquee oraniqui iquemavacaajiaica iramatavijajiaqueriquea Jesoshi iracaantajiaqueri irimetojacaantajiaqueri. ⁵ Cotanquitsiquea icantajiaque:

—Oraquee anaantajempagueti Paashicoa ariquee aacaantajiaqueri. Imaicaquee imaica aatotaja aacaantajiguiritsi aatonijite icatsimatacojianaqueritsi maasano capiocaventajiacarica.

Ishaguitantajicari Jesoshi poncajajatsica

(Mr. 14.3-9; Jn. 12.1-8)

⁶ Iroompaquee yoanaque Jesoshi Vetaniaqui itsovironaquitequi Shimo icantajitica Avejancavetatsica. ⁷ Ichooaquegueti ontaniqui ocoraquetashipojiri manquigarentsi amacoqueri poncajajatsica vegaramajatatsica. Iroguenti yoguijaantajicaro chovintyoriqiu ipeacaajitaca mapi icantajitica aravasetero. Isavicaquegueti Jesoshi ishecajiaica, iroatimpa oquempejitapojacari oshaguitsitantapojacari ishinquireguishiqui. ⁸ Iriraquea itsatacaanejia irooquee yamenajiavaquerogueti ariquee icohicoitanaca icatsimajianaque, icantavacaajianaca:

—¿Querocaquea? Opomatsajatacashiat. ⁹ Arimesanoja irojocantajiquerome iraanatjiquemparo imentaqui incaraquisequivaeeque irojocajiquenerimequee coguitejacojianquitsica.

¹⁰ Cotanquitsiquea Jesoshi irooquee iquemajiavaquerigueti icantsitariquee:

—Ariotaqueshiat. ¹¹ ocoani pasereajiguirotsi. Cameetsavaeeque oshaguitanquenaro.

¹¹ Iriraquea coguitejacojianquitsica icancaniquea pintsipatsipaitajempari, cotanquitsiquea naatimpa aatotarite picocani pitsipatsipaitajanatsi. ¹² Oraquee oshaguitsinotsiquenagueti manquigarentsi, manaquea onetsanatsitacaro irojoquijijitajatenagueti nometojaquegueti. ¹³ Imaica noncamanquempiquea arimaja querocagueti intsavetantajiqueroni Quenquetsatsarentsi Oganejencatatsica maasanopae quepatsipaequi, ariquee intsavetantajiqueroquee ocatita manquigarentsi oshaguiquenagueti cameetsanijite inquenquejacotimentajitajeronijite iroatimpa.

Jorashi inique iracaanqueriquea Jesoshi

(Mr. 14.10-11; Irc. 22.3-6)

¹⁴ Iroompa iriraquea itsatacaane Jesoshi pajitatsica Jorashi Ishicariote yoanaque iramenajiaquiteri saserorotejia anaantajianquitsica. ¹⁵ Icantajiapojiri:

—¿Queroca incaravaequeni imentaqui povegarajiaquenaquea naacaantantajiaquempirica Jesoshi?

Iriatimpajia yojocajiaqueneriquea 30 peratamentaqui.† ¹⁶ Iroompaquee yoanajiquea ariquee ipariapojaro iquenquejanaquero querocaca incoquerini iracaanquerigueti.

* 26:2 Pamenero Glosario itsavetantajitirogueti Paashicoa. † 26:15 Iriraquea peratamentaqui ipeacaantajitari cavorejatatsica icantajitica perata (plata). Yanaaqueri itsipa imentaqui icantajitica tenario. Apamentaqui peratamentaqui icarataque 4 tenario. Iriraquea tenario irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

*Jesoshi ishecatacaqjianajari itsatacaanejia**(Mr. 14.12-25; Irc. 22.7-23; Jn. 13.21-30; 1 Co. 11.23-26)*

¹⁷ Iroompaquea aapojacagueteri savincaguiteri pariantajaroca savincaguiteripae ishecatacantajitaroca pan teeca onconoguemparoji anempoacaanaqueroneca, iriraquea itsatacaanejia icoraquetashijiapojiri Jesoshi icanqueri:

—¿Querocaquea pininqueni nonetsanajiaquempironi maasanopae cameetsanijite ashecaciaquempanijite coajica ashineventajiaquemparo Paashicoa?

¹⁸ Iriatimpa icanqueri:

—Pijateja, poapoitanaque shirampariquei Jerosarequi pincantajiapojerija: ‘Irraquea Tsatacaantantatsica icanque: Irootapoji arejetapojempa nocoraquetashitaqueca, irootaquequea nonintantacaca noshecatacaajiaquempariquea notsatacaanejia pitsovironaquitequi noshineventajiajemplo Paashicoa.’

¹⁹ Ariquea yoayoaitanaque itsatacaanejia itampaticamajajiaqueroquea icantajaivaquerica Jesoshi, inetsanajiaqueroquea maasanopae irishecaciaquempara irishineventajiaquemparoniji Paashicoa.

²⁰ Iroompaquea opitsecaguitetanajigueteri iriraquea Jesoshi itsipatsipaitanacari itsatacaanejia carajianquitsica 12, ipimerequijajiapojaca shitaponcarontsiqui. ²¹ Ariquea ishecaciaagueteri icanqueriquea Jesoshi:

—Imaica noncamantaquempi, iconoquempiquea aviatimpajia aparo aacaante-naneca.

²² Ariquea icohicoitanaca itsatacaanejia ishimampojancajianaca, yacayacaitanaque:

—Nomajirote, ¿naroguentimpa aacaanquempineca?

²³ Icanque Jesoshi:

—Iriguenti aacaanquenanea tsipavacoquenaca notsiantancarogueti pan shovaoqui.

²⁴ Aritarite ontampaticamajatanaque ocanqueca tioncanquitsica coramani itsavetacotsijicariqueti Irijanite Caquinte, cotanquitsiquea jirantsipevaetempanshiatsi irira aacaanquerineca! Aatomesano ivoguime iriatimpa.

²⁵ Icantsitanacaquea Jorashi aacaanquerineca:

—Tsatacaantantatsica, ¿naroguentimpa aacaanquempineca?

Icanqueri Jesoshi:

—Aviguentitari cantanquitsi.

²⁶ Iroompaquea ishecaciaagueteri, yaaqueroquea Jesoshi pan, yamanaqueriquea Aapani Irioshi, icantaqueri: “Arioteesaa.” Ariquea yojocajiaqueneriquea yojocajiaqueneri itsatacaanejia, icantiriquea:

—Paajiaqueja pishecaciaquemplo. Iroguenti notsino.

²⁷ Iroompa yaacoqueroquea chovintyoriquei,‡ yamanajiri aisa Aapani Irioshi, icantaqueri: “Arioteesaa.” Ariquea yojocajiaqueneriquea itsatacaanejia, icantiri:

—Jero pimirajiaquemploja, maasano. ²⁸ Iroguentiquea noriraja§ sotojaatananquitsineca nometojajentajiaquerigueteri caramirincavaetananquitsineca impeacotajemparonijite Aapani Irioshi igovaeguisherejia. Ocantacoqueroquea iroaqueraro paaquito.*

²⁹ Imaica noncanquempiquea, aatoquea nomirajaro vinoja arejevaetapojempa amiramiraitajemplo iroaquerajaro oncoramanitapojajegueteri impeaquempagueteri Aapani Imajirojiate maasano.

*Jesoshi icamanqueri Peerero iromanacoqueriquea**(Mr. 14.27-31; Irc. 22.31-34; Jn. 13.36-38)*

³⁰ Iroompaquea iteroncajianaqueroqueti yamashaiventajiaquerigueteri Aapani Irioshi, isotosotoitanaji yoayoaitanaque Orivotsempiqui. ³¹ Ariquea icanqueri Jesoshi:

‡ 26:27 Iroguenti yaacotaque vinoja. § 26:28 Icanquerogueti noriraja mana iquejetacaacaro intati, cameetsaniji amirapinijiaqueroqueti anquenquejapinijiaquero imetojajentajiacajigueteri. * 26:28 Oraquea paaquito iroguenti icantamajajitirica itsipa irinetsanamajajitenerica. Ocaticaquea iroaqueraro paaquito icantajiacajiquea Aapani Irioshi irishetacotajeri igovaeguishere maasano aventaventaquemparineca Meshiantatsica metojajentajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocagueteri Moishishini, otsipa icanquerica Taavini.

—Ocatica pitsecanquitsica maasano aviatimpajia pimpashiventacaajiaquenaquea pojocajapanajantena. Aritarite ocanque Itioncacaantaqueca Aapani Irioshi coramani, ocanque: ‘Aapojempagueti nometojaqueri quempoguijirica oveja. Iriiraquea ovejajia imporocajencatesano maasano.’[✠] ³² Cotanquitsiquea iroompaquea nontancorejanajegueti naroquetiquea jivatanaquempine noanaquequea Garireaquei.

³³ Icanquequea Peerero:

—Impashiventacaajiavetanaquempiquea maasanopae irojocajocaivetanaquempi, cotanquitsi naatimpa aatotarite nojoquimatimpitsi.

³⁴ Cotanquitsiquea Jesoshi icanqueri:

—Noncamanquempiquea, coajica tequerataguete irinijeji chaapa, pomanacoque-naquea 3.

³⁵ Icantsitanaca Peerero:

—Arigueteja intsipatacaantajitenajate irimetojajiquena irimetojajiquenaquea, cotanquitsiquea aatotarite nomanacotimpitsi.

Ariquea iquempejiaquero maasano itsatacaanejia icantajiaqueca.

Jesoshi yamanaqueriquea Aapani Irioshi Jetsemaniqui

(Mr. 14.32-42; Irc. 22.39-46)

³⁶ Iroompaquea yoayoaitanaquequea Jetsemaniqui. Irooquea yarejerejeipojacaguete iriraquea Jesoshi icanqueri itsatacaanejia:

—Pisavisaviitetaja ocaniqui, naatimpa noanaquetajate ontaniqui namanaquiterita Aapani.

³⁷ Iriguenti itsipatsipaitanaca Peerero aisa mavite irijanite Severo. Ariquea ishimampojancavaetanacaquea Jesoshi, yatsipeshirentavaeca. ³⁸ Icanqueriquea:

—Noshimampojancavaetatiganimaja irooshipojishiatsi ometojavaetenanishiatsi, picancanija ocaniqui pintinajaventajiaquea.

³⁹ Iriatimpa yoanaque tijacoñajisano ontaniqui igueroncasetapojaca yamananaqueriquea Iriri icanque:

—Aapani, nonintavecaquea paapitsatenarotate nantsipequempaca,[†] cotanquitsiquea teequea nonintena onetsanaquempa nonintica naatimpa, iroguentiquea pinintica aviatimpa.

⁴⁰ Ariquea yoanaji ichoocajiaqueguete itsatacaanejia, yamenajiapojiri yojocanacani tin. Icantapojiri Peerero:

—¿Arimpate teequea pagavejajigueji osamanicoñaji pintinajajigueji pintsipajiaque-name? ⁴¹ Pintinaje, aatoquea pimaajiguetsi. Pamanacoventajiaquempaja aatonijite covaequishetacaajianaquempitsi covaequisherentsi. Aviatimpajia pinintajiaveca pishirequi pinetsanamajiaquero inintaguetica Aapani Irioshi, cotanquitsiquea teetarite pintampishijigueji pitsinoqui.

⁴² Ariquea yoitsitanaja aisa yamanajiri Iriri, icanqueri: “Aapani, aatoguete agaveji opega aatoniji natsipetaro, iintsija onetsanaquempa pininqueca.”

⁴³ Ariquea icoraquevetapojaja aisa yamenajiapojiri yojocajianacani aisa tin, otiavaetanacaritari pochoquirentsi. ⁴⁴ Yojoquitsijianajariquea aisa, yoitsitanaja aisa yamanajiri Iriri, irootaque icanquitirica incajaranquitica. ⁴⁵ Iroompaquea iteroncanaquerogueti yamanaqueriguete, icoraquetapojaji ichoocajiaqueguete itsatacaanejia, icantajiapojajiri:

—Arisacanica picantacoguitani maaguitatsimpi magorejajianaquempi. Arejetapojaca iraacantantajitaquemparica Irijanite Caquinte irimetojajiaqueri covaequishejiatsica.

⁴⁶ Pincatintiitanaque, jamequetiro, jac coraquetapojishiatsi aacaanquenaneca.

Yaajitaqueriguete Jesoshi

(Mr. 14.43-50; Irc. 22.47-53; Jn. 18.2-11)

⁴⁷ Quenquetsatanatsitiraja Jesoshi, yarejetapojaca Jorashi, irioveca itsatacaane carajiavetanquitsica 12. Yamamirincatapojaqueri caquinteja itigarancajiaqueca saseroroteja anaantajanquitsica aisa jivajiguirica jorioja, yamashijiapojiri

[✠] 26:31 Sac. 13.7. [†] 26:39 Icanqueguete Jesoshi paapitsatenarotate nantsipequempaca iroguenti ishimampojancacomajatacaro incatarojitanaqueri igovaeguisher maasanojia caquinteguetaanquitsica quericaca aventajiaquemparineca. Pamenero 1 Pe. 2.24.

itsaampitsantsameniritepae aisa inchaquiji. ⁴⁸ Iriraquea Jorashi, aacaanquerineca Jesoshi, itsatacaitanacari iroaqueraguete, icanqueri:

—Quericaca nonintavorotapojaqueca, [‡] iriotaquequea pinintajiaqueca, paajianaqueriqueate.

⁴⁹ Iroompaquea yarejetapojatiga iquempejitapojacari Jesoshi, icanapojiri:

—Tsatacaantantatsica, arisa pichoocataji.

Ariquea inintavorotsitari.

⁵⁰ Icantsitariquea Jesoshi:

—Notsipavijitaca, iintsijate pinetsanaterote picoraquetashiqueca. [§]

Iroompaquea iriraquea tsipatsipaitanacarina Jorashi iquempejiquempejiipojiri Jesoshi, yaitsitapojacari yajiriqitsitari. ⁵¹ Cotanquitsiquea chooca aparo itsipatacaca Jesoshi yaitsitanacaroquea itsaampitsantsamenirite, itsopajitaro, iguempitarejitsitari yashintacaca saserote anaantamajatanquitsica.

⁵² Cotanquitsiquea Jesoshi icanqueriquea:

—Poguijaajerojate pitsaampitsantsamenirite. Quericaca avencaroca itsaampitsantsamenirite manaquea irimetojantsijitempariquea tsaampitsantsameniri.

⁵³ ¿Arimpate tee pintsateji naromeguete nintanquitsineme noncantanaquerime Aapani intigaranquimojiaquenarimequea irashivantijitete incaramirincavaeque incanquempa irompejianaquenamequeate? ⁵⁴ Cotanquitsiquea arimeguete nonquempetacaquemparomequea imaica, ¿querocaquea oncoquempani onetsanatan-tanaquempaca Itioncacaantaqueca Aapani Irioshi coramani otsavetacotsiquenaguete onquempetaquempa imaica?

⁵⁵ Iroompaquea Jesoshi ipitsocashijigari capiocajianquitsica, icanqueriquea:

—¿Arimpate naroguenti catsimari aapitsatantatsica pamashitantajiaquenaca tsaampitsantsameniripae aisa inchaquiji pamentajianaquenaniijite? Nocantacoguitanitari savincaguiteri qui notsipaguitimpini aviatimpajia ontaniqui oniganquirequi oticaacoroqui teemporo notsatacaantaguitini, teequea paajiguenaji. ⁵⁶ Cotanquitsiquea oquejetantanacaca imaica cameetsaniji onetsanamajatanaquempaniji itioncacojiaqueca tsavetantatsicani coramaniqui itsavetacotsijiaquenaguete.

Iroompaquea maasano itsatacaanejia, itsinampirejajianaqueri Jesoshi.

Yaajitanaqueriquea Jesoshi icapiocajiacaguete maasano imajirotepae joriojia

(Mr. 14.53-65; Irc. 22.54-55, 63-71; Jn. 18.12-14, 19-24)

⁵⁷ Irirajia aajiaquerica Jesoshi yaajianaqueriquea Caipashiniqui. Iriatimpa iriguenti saserote anaantamajatanquitsica. Ariquea ichoocajiaque oraniqui tsatacaantajiguiroca itioncacotanaqueca Moishishini aisa jivajiguirica joriojia, icapiocajia. ⁵⁸ Iriraquea Peerero yoguijatacovetanacari cotanquitsiquea impoivaetapojaque. Oraquea yarejetapojacaroguete pampatejijaniquiqui itsovironaquitequi saserote anaantamajatanquitsica, iquijapojaque otantoqui, yamenajiapojiri coaretajia quempoguijajiguiroca teemporo, savisaviitaque oraniqui. Ariquea isavicapoji iriatimpa iramenacotimentavaqueriniji Jesoshi querocaca incojitaquerini.

⁵⁹ Iriraquea saserrotejia anaantajianquitsica itsipajiacari maasano majirontajiatitsica icajemacaantajiaqueri itsipapae tsojeventajiaquemparineca Jesoshi cameetsanijite onchoocaquenijite ompampiatantapojempaca irimetojantajitaquemparica.

⁶⁰ Icoraquecoraqueivetapojaca yoshequiavetaca tsojeventajiaquemparineca, cotanquitsiquea irooquee icanque irooquee icanque, querocampate incojiaquerini, teenicate onchoocatenica. Iroompaquea icoraquecoraqueipoji mavite, ⁶¹ icanquequea:

—Naatimpajia noquemajiaqueri icanque: ‘Naatimpa nagavejaque nosoveaquero iteemporote Aapani Irioshi, ariquea nompeacaitajemparo, ontrespajajeguete savincaguiteri nontsitacantajemparo.’

⁶² Ariquea icatiitsitanaca saserote anaantamajatanquitsica, icanqueriquea Jesoshi:

[‡] 26:48 Quericaca nonintavorotapojaqueca. Yamejiaca joriojia coramani inintavorotavacaajiaavaca yamenavacaajiacaguete. [§] 26:50 Irooca ocanque guiriegoqui: Notsipavijitaca, ¿taaquea picoraquetashique?

—¿Aatempa paquiri? ¿Taaquea opajita ocatica icantacojiaquempica iricajia?

⁶³ Cotanquitsiquea Jesoshi teequea incanteji. Icantsitajari aisa:

—Aatotarite pamatagatsi, inquemavaquempitari Aapani Irioshi anijatsica. Iintsijate pincamantenajate arimajagueti aviguentica Quirishitotatsica, Irijanite Aapani Irioshi.

⁶⁴ Icantsitanacaqueate Jesoshi:

—Pitampaticataquero. Jero aisa noncamantajiaquempi: oncoramanitapojagueti pamenajiaqueriquea Irijanite Caquinte irisavicaque itincamijempequiqui* Agavejama-jatatsica. Aisa pamenajivajeri inquenapojaje mararoqui.

⁶⁵ Ariqueate icotanaca icatsimatanaque saserorote anaantamajatanquitsica, iperejit-sitanacaroquea iitsaare sarararara,† icanque:

—Iricatica manaquea iquejemanatanacariquea Aapani Irioshi. ¿Arimpate ancogu-imenquempari itsipapae cantacoquerineca? Jac piquemajiaquerishinete iquejem-anatanacarigueti Aapani Irioshi imaica. ⁶⁶ Iintsija ¿querocaca pincantajigueni aviatimpajia?

Iriatimpajia icanquequea:

—Iquempetacaantaca, irimetojetashinete.

⁶⁷ Iroompaquea iquishoquishoavaetaqueriquea ivoroqui, icapocapovaetaqueri, aisa yapatompatovaequeri, ⁶⁸ icantajiaqueriquea:

—¡Iintsijate, Quirishitotatsica, pintsatavaqueja taaquea capojaquempi!

Peerero yomanacoqueriquea Jesoshi

(Mr. 14.66-72; Irc. 22.55-62; Jn. 18.15-18, 25-27)

⁶⁹ Irieraquea Peerero choocaturaja ichooaque ontaniqui pampatejijaniquiqui. Iroompaquea ocoraquepojaque aparo yomperajitaca ocanque:

—Aviatimpa aisa itsipapinitimpi Jesoshi Garireaquitica.

⁷⁰ Yomanacotanacaquea, icanquero:

—Tee notsatsitavaquempiroji.

Iquemitsijigariquea maasano choocajianquitsica oraniqui. ⁷¹ Ariquea yogaitsivetanaja ontaniqui sotomorontsiqui amenitsitajariquea aisa otsipa manquigarentsi, ocantsijigariquea choocajianquitsica oraniqui:

—Iricatica irio itsipavijire Jesoshi Nasarequitica.

⁷² Yomanacotsitajaroquea, icanque:

—¡Teequea nontsateriji irintatica! Namataacagueti incatsimatimentenarotashia Aapani Irioshi.

⁷³ Incajanganquiguitetanajatigui iquempejiquempejiipojiri choocajianquitsica oraniqui, icantapojiaqueriquea Peerero:

—Arimajaca piquejerononcari noquemitajivaquempirojari piquenquetsaquegueti.

⁷⁴ Irieraquea Peerero icantsitanaja aisa:

—¡Nocanqueshinete tee nontsatimateriji! Namataacagueti incatsimatimentenarotashia Aapani Irioshi.

Icanquitigui, injanaquequea chaapa. ⁷⁵ Iquenquejitsitanacaroquea Peerero icanquerica Jesoshi incajanganquitica: “Tequeratagueti irinijeji chaapa, pomanacoquenaquea 3.” Icatiitsitapanajantaquea isotoapanajanti, iraitsitanacaquea ishimampojanacamajatanaca.

Yaajitanaqueriquea Jesoshi Piratoqui

(Mr. 15.1; Irc. 23.1-2; Jn. 18.28-32)

* 26:64 itincamijempequiqui. Yamejiaca coramani iriraquea majirontatsica incajemajiaqueri ishineventamajatacaca iroguisaviquitempari itincamijempequiqui, inquejemajironquempari iranaajiaqueri maasano itsipajia. † 26:65 Ari icojiaca jorijia, inquemaquerigueti itsipa inquejemanataquempirigueti Aapani Irioshi irooca incantaguishetaquerigueti, imperejitsitemparo iitsaare intsatantajitaquemparo icovaeguishemajatacaca. Otioncaca irira quejem-anatanacquemparineca Aapani Irioshi irioca cantaguishequerineca intsinaquitajitempari irimetojajiqueri.

¹ Iroompaquea osavincaguitetanajigueti maasano saserorotejia anaantajianquitsica aisa jivajiguirica joriojia iquemavacaajiaca querocaca incojiaquerini Jesoshi irimetojacaantajiaquerigueti. ² Iroompaquea yoishojianaqueri, yaajianaqueneriquea Pontsio Pirato yojocajiaipojaqueneri. Iriatimpa iriguenti itigarancane Sesa, quejemajirovetacarica.

Imetojaquegueti Jorashi

³ Ariquea iriraquea Jorashi, aacaanquerica Jesoshi, itsaquegueti arimajaca irimetojacaanqueri, ishimampoancaca iquenquejitsitanacaro: “Aatomesanoja naacaantirime”, yoanaquequea ichooajiaquegueti saserorotejia anaantajianquitsica aisa jivajiguirica joriojia, irojocajiajenerimequea iriratica 30 peratamentaqui, ⁴ icantajiavepojari:

—Nocovaeguishemajataca, naacaantaqueritari teeca incovaeguishetimatempaji, imaicanishiatsi irimetojajiterinishiatsi.

Cotanquitsiquea iriatimpajia icantajiavaqueri:

—Jmm. Avirosate quempetanquitsica.

⁵ Ipishoncamirijaquipanajantiri intati imentaquitsite oraniqui intsompoguiqui teemporoqui, isotoapanajanti. Yoanaque itsatotsita. ⁶ Iriraquea saserorotejia anaantajianquitsica icapiocamirijaquitajiri, icanquequea:

—Icantimentantajitiroitari anconoavoncaquitavajerigueti yamajiaqueca itsipapae yojocajitinerica Aapani Irioshi, iriotaquetari ivegaratsitantacarica irimetojaquenijite.

⁷ Iroompaquea iquemavacaajiaca irivegaratantajiajemparoquea quepatsi pajitatsica Iguepatsite Peacaaguetaroca Chomopae cameetsanijite onchoocaquenijite inquitatan-tajitapinitemparica quenaquenaitapojanquitsineca osamanipaequi. ⁸ Irootaquequea opariantanacaca oratica quepatsi opajitancaca Irajantsiguete arejevaecaquea imaica.

⁹ Oquejetacagueti imaica, onetsanamajatanaca icanqueca coramani tsavetantatsica Jeremiashini, icanque: “Iriraquea ishiraerijia iquemavacaajiaca irojocajiaqueneri aacaanquerineca 30 peratamentaqui, ariquea yaajiaqueri iriratica imentaquipae

¹⁰ ivegaratantajiacaroca quepatsi pajitatsica Iguepatsite Peacaaguetaroca Chomopae, irootaquetari icanquenaca Nomajirote.”

Pirato icoacoqueriquea Jesoshi

(Mr. 15.2-5; Irc. 23.3-5; Jn. 18.33-38)

¹¹ Iriraquea Jesoshi icatiimotapojacari quejemajirovetatsica, icoacotavaqueri:

—¿Arimajaca aviguenti Imajirote jorio?

Icanque Jesoshi:

—Tampatica poaquero.

¹² Oraquea itsojeventajiacarigueti saserorotejia anaantajianquitsica aisa jivajiguirica joriojia, teequea incanteji Jesoshi.

¹³ Icanqueriquea Pirato:

—¿Arimpate teequea pinquemavaqueroji icantacojiaquempica?

¹⁴ Cotanquitsiquea Jesoshi tee incantimateji, jero yamenantanacaca quejemajirovetatsica intati.

Icanque irimetojajiqueri Jesoshi

(Mr. 15.6-20; Irc. 23.13-25; Jn. 18.38-19.16)

¹⁵ Icantacoguitani aapojajagueti Paashicoa, iriraquea quejemajirovetatsica yogu-ipaquiujajiri aparo isantanatacotimentajiquerica ipeacaaguishetacaca, quericaca inintajiaqueca igonorojia iroguipaquiujaje. ¹⁶ Ariquea ichooaque oraniqui aparo santanatacotanquitsica pajitatsica Varavashi, itsitacaguetejacovaetanaca oraniqui iquemacojitiri. ¹⁷ Iroompaquea yamenajiaquerigueti Pirato yomporoguijaventavaetapojacari, icanqueriquea:

—¿Querica pinintajiaqueca noguipaquiujajempiri? ¿Irioca Varavashi, irioca Jesoshi icantajitica Quirishito?

¹⁸ Itsaquerotari iriatimpa iroguenti icatsimatacojiqueriquea yamenajiquerigueti iriguenti yomporoguijaventajica, irootaquequea yamantajiacarica iriatimpaqui.

¹⁹ Choocatiraja isaviquiquea Pirato ontaniqui icantomajantapiniquegueti, otigaranquitsitari imanquigare camanquiterineca:

—Aatoja querocaca picotirini iriratica teeca impeacaimatempaji. Natsipevaeca nogu-
imaacotacariguetti incajaranqui.

²⁰ Cotanquitsiquea iriraquea saserorotejia anaantajianquitsica aisa jivajiguirica jorio-
jia itsatacajiaqueriquea maasano, incanqueri:

—Irioquea poguipaquijaje Varavashi, iriraquea Jesoshi pimetojacaanteritsijate.

²¹ Icanquequea quejemajirovetatsica:

—¿Quericate pinintamajajiaqueca noguipaquijajeca? ¿Irioca Varavashi, irioca Ja-
soshi?

Icajemitsijianacaquea:

—¡Varavashi!

²² Icanqueriquea Pirato:

—Iroosanica, ¿querocampate noncoquerini iricatica Jesoshi icantajitica Quirishito?
Icajemitsijianacaquea aisa maasano:

—¡Pompajacoteri!

²³ Icanqueriquea Pirato:

—¿Taampate ipeacaaca?

Icajemamajajianaji:

—¡Pompajacoterishine!

²⁴ Iroompaquea yamenavaqueroguetti Pirato icantacoguitani icajemaguitini, quero-
campate incojiavajerini, ariquea icajemacaunque oja iquivavacotimojiacari maasano,
icanquequea:

—Irimetojajiqueriguetti imaica, teequea naatimpa quejetatsineca. Aviguentijia queje-
jianquitsi.

²⁵ Maasanopae icajemajianaquequea:

—Aritaque nonquejetempata, naatimpajia quejejianquitsineca aisa nirijanijiate,
naatimpajiaquea metojacaantajiaquerineca.

²⁶ Ariquea iquemajiaqueriguetti Pirato yoguipaquijajajiniri Varavashi. Ariquea ican-
tacaantsitariquea Jesoshi impasajitaqueri, irajaitanaqueri irompajacojiqueri.

²⁷ Iriraquea igoretajiate quejemajirovetatsica yaajianaqueri Jesoshi intsompoguiqui
imapipancotequi, icantajitiro “Peretorio”, ariquea icajemacaantajiaqueriquea maasano
irapicoaretajiate, yomporoguijaventajiacariquea. ²⁸ Iroompaquea isapoquitsijigari iit-
saare, iquitsaatantajiacari otsipa quitsaarentsi quityoncamorenari. ²⁹ Yaajiaquequea
tseitseiario, ipeacajaiacanari iramatsaero, yamatsaetsitari. Aisa yajiricacaajiaqueri sa-
voroquiji itincamijempequiqui,* iroompaquea igueroventajianacari ishishirontimen-
tajanacariquea, incanqueri:

—¡Iricashia Imajirote jorio!

³⁰ Iquishoquishoavaequeri, yaapitsatsijajari savoroquiji itavatavaatsitantari iguito-
qui. ³¹ Iroompaquea iteroncajajianaqueroguetti ishishirontimentavaecariguetti, is-
apocarejajiri quityoncamorenari, irooquea iquitsaatantajari iitsaare, yaajianaqueri
irompajacojiaqueri.

Yompajacojiaqueriguetti Jesoshi

(Mr. 15.21-32; Irc. 23.26-43; Jn. 19.17-27)

³² Oraquea yoayoitanaqueguetti irompajacojiaqueri, itonquivojajivacari aparo
Shirenequitica pajitatsica Shimo. Iriraquea coaretajia icantajivaqueri irinatashitana-
queriquea Jesoshi igoroshite. ³³ Ariquea yarejerejetacaquea Gorogotaniqui, (ocanque-
quea, “Ochoocatiguetti Shocoitontsi”). ³⁴ Yojocajavetacanari vinoja iconoajatantajicaro
ishincanajato, yatsirecavequitaro intati, teequea irimiremparaji. ³⁵ Iroompaquea
iteroncajiaqueroguettiquea yompajacojiaqueriguetti, iriraquea coaretajia ipegavijijia
intsajiaquenijite quericaca ashinquemparoneca iquitsaaguevecaca.† ³⁶ Ariquea isav-

* 27:29 Yajiricacaajiaqueriguetti savoroquiji itincamijempequiqui, manaquea iquejetacaavetari majirontatsica ya-
jiriquiroguetti imajirontamento. Icanquero quimajareri cetre. † 27:35 iquitsaaguevecaca. Irooca icantacotaque
isavoguinaro, igaviguitire, ichompimashite, aisa yogataacaca, ocarataque 4. Chooca aparopae paperi iguenquet-
satsarequi guiriegopae, yogavijiquero ocaniqui, ocanque: onetsanamentanaquempañiji icanqueca tsavetantatsica
icanqueguetti: Yaagarantajiaquero noitsaare, ipegavijijia intsjiaquenijite quericaca ashinquemparoneca (Sar.
22.18).

isaviique oraniqui yamenajiaqueriquea. ³⁷ Ojenoquipojaquegueti ishinquireguishipojacaguete ipatacajitaqueroquea ogota itioncajiquero ocanque: “Iriguenti Jesoshi, Imajirote jorio.”

³⁸ Aisa itsipatacaantajicariquea mavite aitsitantatsica yompajacojitaqueri, aparo yogatiacojiqueri itincamijempequiqui, iriraquea itsipa iroguenti yogatiacojiqueri ishinampijempequiqui. ³⁹ Iriraquea avisavisaitanquitsica oraniqui inijashinacari icantajianaque chaguito chaguito, ⁴⁰ icantajiaqueriquea:

—Arimpate picanque: ‘Nosoveaqueeroquea iteemporote Aapani Irioshi, ariquea nompeacaitajemparo, nontsitacajero 3 savincaguiteri.’ Imaicaquea iintsija pompetanaquempace. Arimajaguete aviguenti Irijanite Aapani Irioshi, pintsopajacotanajempaja paguijitapojaje.

⁴¹ Ariquea iquempejiaca saserorotejia anaantajianquitsica itsipatsipaicari tsatacaantajiguiroca itioncacotanaqueca Moishishini aisa jivajiguirica joriojia, ishiroshirontimentavaetacari icantavacaajiaca:

⁴² —Arimpate yompeguetacari itsipapae, cotanquitsi teequea iragavejempaji irompetacotanaquempace iriatimpa. Iriovetaca Amajirojiate ishiraerijia, iintsija intsopajacotanajempaja coroshiqui iraguijipojaje, antsatantaquemparica ariquea antsarotentajianaquempace. ⁴³ Yaventaguitarinitarite Aapani Irioshi, iintsijate irompetemparija imaica arimajaguete ipintsacari, icanquetarite: ‘Naroguenti Irijanite Aapani Irioshi.’

⁴⁴ Iquejequejeitanaca aisa itsipatacaantajicari yompajacojitaqueriguete, icantacantaguishevaetaqueri.

Imetojanaqueguete Jesoshi

(Mr. 15.33-41; Irc. 23.44-49; Jn. 19.28-30)

⁴⁵ Iroompaquea itampaticavepojaca catsirincaiteri, ocantanaque pitsec maasano quepatsi, arejetacovaeca ijaguitetanajiguete. ⁴⁶ Ariqueate icotanaca iririjencavatanaque Jesoshi, icanque: “Elí, Elí, ¿lama sabactani?” (Oncanquequea: “Aapani Irioshi, Aapani Irioshi, ¿queroquea oocani pojocantanaquenaca?”)‡

⁴⁷ Iconoajiaca choocajianquitsica oraniqui irooqueuea iquemajiavaqueriguete icantajianaque:

—Icajemaqueri tsavetantatsica Iriashini.

⁴⁸ Ishiitsitanaca aparo, yaanaquequea atsimijicajatiroca oja, iticajatsitaro vinoja cachonerontouijajaro, yoguitinajacotsivetanari savoroquijiqui irantsimijicajatavaquerome. ⁴⁹ Cotanquitsiquea itsipajia icanqueriquea:

—Iintsijate amenajiavaqueritaja incoraquetashipojeri Iriashini iroguisoancajeri.

⁵⁰ Ariquea icajemanaji aisa Jesoshi iririjencavatanaque, ariquea yoguipaquijapanajantiro ishire metoc.

⁵¹ Irooqueuea imetojanaquitigui, ariqueate ocotanaca operejanaque omorena ticaamorenatanquitsica teemporoqui jocagatsica aatonijite iquijajitirotsi intsompoguiremajacaqui. Opecotarejanaque tampaticaquea niganquisano ocantanaque sarararararara, oquenapojiquea jenoqui arejevaetacaquea isavi. Omoguequitanaquea quepatsi moguec moguec moguec, otsecaguetanaquequea mapitsentseina. ⁵² Ariquea ocoguetanacaquea omoroguetanaca iquitajigueteriguete metojaripae, itancoretancoreitanaque icaramirincavaeque igomajamajarejia Aapani Irioshi metojajivetanquitsica. ⁵³ Ariquea isotosotoitanajaro omoropae, iroompaquea ipochatanajiguete Jesoshi, yoayoaitanaque iriatimpajia Jerosarequi, oratica guinteninintsi yashincaca Aapani Irioshi, yamenajivajiri icaramirincavaeque choocajianquitsica oraniqui.

⁵⁴ Iriraquea imajirojiate coaretajia aisa itsipatsipaitashijiacaca yamenajivajiriguete Jesoshi, yamenajiavaqueriguete omoguecaguetanaqueguete, aisa otsipapae cantashitaguuetanquitsica, itsarotsaroitsitanacaquea, icantajiaque:

‡ 27:46 Elí. Iroguenti iguenquetsatsare evereo. Iquemaquero oquejevetacaro ivajiro Iriashi iguenquetsatsarequi, icanqueritari Elías. Icanqueguete ¿lama sabactani?, iroguenti iguenquetsatsare arameo.

—Arimajaca iriguenti Irijanite Aapani Irioshi.

⁵⁵ Ariquea ochoocajiaque oraniqui omporogujaca manquigarentsijia oguijaguijai-querica Jesoshi iquenapojigueti Garireauqui amitacojiaqueriniji. Iroatimpajia manaquea ochoocajiaque tijaicoñajisano ontaniqui amenamenaiqueri. ⁵⁶ Ariquea ochoocajiaque aisa oraniqui Maria Magararaqitica, oraquea otsipa Maria iriniro Santiago aisa Jose, oraquea aisa iriniro irijanijiate Severo.

Yojoquijitantajitari Jesoshi imperitamoroqui

(Mr. 15.42-47; Irc. 23.50-56; Jn. 19.38-42)

⁵⁷ Iroompaquea ijaguitemajatanajigueti, icoraquepoji aparo ajaarantatsica pajitatsica Jose quenampojaroca Arimatea. Ari iquejeca iriatimpa ipeanaca itsatacaane Jesoshi. ⁵⁸ Iriatimpa yoashitanaqueriquea Pirato, icanqueriquea ininque irajaitanajero itsino Jesoshi. Iriiraquea Pirato icantacaantsitari irojocajitajeneri. ⁵⁹ Ariquea yaanajiro Jose itsino Jesoshi, yampiguiricacotantanacari iniromorena shipetari teeca oncantaiteteji ipeacaajitaca irino. ⁶⁰ Iroompaquea yaanajiri yojoquijitajiri imperitamoroqui iroa-queramorotica iqueecacaanontacaca mapichonquiinaqui irojoquijitantajitajemparica iriatimpa irimetojaquegueti. Ariquea itigaritashitantacari inirotsentseina mapi, iticaacotantapanajantari, yoanaji. ⁶¹ Ariquea ochoocajiaque oraniqui Maria Magararaqitica aisa otsipa Maria osavisaviique oraniqui itampaticatacotaquegueti yojoquijitajirigueti.

Coaretajia quempoguijajivetacaroca yojoquijitantajivecarica Jesoshi

⁶² Iroompaquea osavincaguitetanaquegueti imagorejantajitaca, § iriraquea sasero-rotejia anaantajanquitsica aisa pariseojia yoayoaitanaquequea iramenajajateri Pirato.

⁶³ Icantajiapojiri:

—Nomajirote, noquenquejajajiroquea icanqueca irintatica amatavijantatsica anijatirajagueti, icanquequea: ‘Aapojajempagueti 3 savincaguiteri nompochatanajequea.’

⁶⁴ Irootaquequea noncantantaquemica, iintsija pintigaranquequea coaretajia inquem-poguijamajajiaqueri yojoquijitantajicarica avisanaquegueti 3 savincaguiteri, aatonijite icoraquetashijiguiritsi itsatacaanejia irajajateri, iroompa incantajigueteri maasano jac pochatanaji. Ariguetequea inquempejiaquemagueti imaica ocativa tsojetsi caaviji anaavaequero otsipa yamatavijantaquegueti.

⁶⁵ Iriiraquea Pirato icanqueri:

—Iroosacanica iintsijate, jeri irirajia coaretajia, poapoaitanaquequea pinquem-poguijamajajiaquerija aviatimpajia querocaca pincojiaqueroni yojoquijitantajicarica.

⁶⁶ Iriatimpajia yoayoaitanaque yojoquijitajitajigueteri Jesoshi, iseyotsitaro mapi yashatirijacotantajicarica, ariquea icantajiaqueri coaretajia inquem-poguijamajajiaqueri aatonijite quericaca coraquetashitimatiritsi.

28

Ipochatanajigueteri Jesoshi

(Mr. 16.1-8; Irc. 24.1-12; Jn. 20.1-10)

¹ Ariquea anaanacagueteri imagorejantajitaca, * osavincaguitetamanaji pariapojajaroca semana, oraquea Maria Magararaqitica aisa otsipa Maria oahoaitanaquequea amena-jajatero yojoquijitantajitacarica. ² Oraquea tequeratagueteri arejerejeitempaji, omoguec-anaquequea quepatsi moguec moguec moguec, icoraquepoji irashivantite Amajirote iquenapojiquea inquitequi. Itigaritapojiro mapi iticaacotantajivetacarica Jesoshi, isav-icapojiro. ³ Itsirencavaequequea icanca quempevaecaquea careti. Oratica iitsaare quitamaromajatatiguinimaja quempetacaqueate oquitamarotigueteri sharaca. ⁴ Irirajia coaretajia irooquea yamenajiaquerigueteri ariquea icohicoitanaca itsaroamajajianaque yompioncajianaca pion, pion, pion, itejatejaitanaquequea ijatacojiaquiti. ⁵ Iroompaquea arejerejeivetapojaca manquigarentsi, icantajigueteri irashivantite Aapani Irioshi:

§ 27:62 imagorejantajitaca. Irirajia joriojia imagorejantaro savincaguiteri saavaro. * 28:1 imagorejantajitaca. Irirajia joriojia imagorejantaro savincaguiteri saavaro, irootaque oteroncampaajia semana. Otsipa semana oparianaja tomincoqui.

—Aatotarite pitsaroajiguitsi. Notsaquequea iriguenti pamenaguetaje Jesoshi yompa-jacojivecaca. ⁶ Cotanquitsiquea teequa inchoocatajeji acaniqui, pochatanaji, aritarite icanque iriatimpa tequeratagueta irimetojeji. Intsijate caacatejate pameneroja yojo-quijijivecarigueta. ⁷ Pishintsijianajeja pincamantapojerija itsatacaanejia pincantajigue: ‘Jac pochatanajishiatsi. Imaica iroanaquequea Garireaquei, iriquetiquea oananquitsine. Pamenajapojeri ontaniqui.’ Irootaque nocamantaquempica.

⁸ Irooquea oquemajivaquerigueta otsaroajianaquequea, cotanquitsiquea oshine-jianaca aisa. Ocampanajantatigui tapoc oshintsijianaji oncamantapojaqueri itsatacaanejia. ⁹ Irooppaquea itonquivojajivacarero Jesoshi quenavoquirontsiqui icantajivaquero:

—¿Choocampi?

Oquempejiquempejiitanacari ajiricaguititsitari otsarovenanacari.

¹⁰ Icantajivaqueroquea Jesoshi:

—Aatoquea pitsaroguitsi. Poapoaitanaquequea pincamanqueri iguentijeguipae[†] iroaroaitanaque Garireaquei. Ontaniquiquea ari iramenajapojajena.

Itsavetantavecaca coaretajia

¹¹ Irooquea oahoaitanaquegueta manquigarentsijia, iconoagarantajia coaretajia quempoguijajivetarica Jesoshi manaquea yoayoaitanaquequea Jerosarequi, icamantajapojiri saserorotejia anaantajanquitsica maasanopae. ¹² Iriatimpajia icapiocajia itsipatsipaitacari jivajiguirica joriojia, iquemavacaajia, yojocajiaqueneri coaretajia caraquisequi imentaqui, ¹³ icantajivaquero:

—Aviatimpajia iroguenti pincanque: ‘Oraquea opitsecanaquegueta naatimpajia nomaajianaque, irooppaquea icoraquetashijiaqueri itsatacaanejia yaajapanajantiri.’

¹⁴ Arigueta inquemegueta quejemajirovetatsica noshinetacaajiaquempari aatonijite que-roca icotimajiguimpitsi.

¹⁵ Iriaquea coaretajia yaajianaqueriquea imentaqui, yoayoaitanaque inetsanajiaquero icanquerica. Ariquea iquemacojiaquero maasano joriojia itsavetantavecaca, otsitacaguitejacovaetanacari, ocantacoguitani arejevaetaca imaica.

Jesoshi icanqueri itsatacaanejia intsavetacojiaqueri

(Mr. 16.14-18; Irc. 24.36-49; Jn. 20.19-23)

¹⁶ Ariquea yoayoaitanaquequea Garireaquei itsatacaanejia carajianquitsica 11, yoayoaitanaque otsempiqui icanquerica Jesoshi. ¹⁷ Ariquea yamenajapojirigueta, itsaroven-tajianacari, cotanquitsiquea iconoagarantacaquea iquenquejashirentajianaque: “Iriocaja.”

¹⁸ Cotanquitsiquea Jesoshi iquempejiquempejiipojiri, icanqueriquea:

—Icanquenaquea Aapani Irioshi paesatoniqui: ‘Imaicaquea aviatimpa aviguenti agavejaguetaqueronca maasanopae inquitpaequitica aisa quepatsipaequitica.’

¹⁹ Irootaquequea imaica nocantantajiaquempica poapoaitanaque pintsavetantimojianaquerija maasano caquinteguetsica, pintsarovenacaajianaquemparijate cameetsanijite impejaianaquempanijite notsatacaanejia. Ariqueate piviñacajiaqueri ivajiroqui Aapani aisa Irijanite aisa Ishire. ²⁰ Pintsatacaajiaqueri inquemisantamajiaquero maasanopae nocanquempica irinetsanamajiaqueronijite. Noncoquempaniquea nontsipamajataquempi oavaetanaque savincaguiteriqui arejevaequemparoquea onteroncanajempagueta quepatsi.

[†] 28:10 Icanquegueta Jesoshi iguentijeguipae iriguenti icantacoque itsatacaanejia. Pamenero otsapa 7, jero aisa Mt. 12.48-50.

QUENQUETSATSARENTSI OGANEJENCATATSICA ITIONCAQUECA MARICOSHI

Antsatantaquemparoca

Ocatica iroguenti antsatantaquemparoca itioncaqueca Maricoshi itioncacotaque-rigueti Jesoquirishito. Maricoshi iriguenti jorio, irio ijitane Verenave (Cor. 4.10). Iriniro opajita Maria. Iconoagarantajiaca tsaromentajiacarica Jesoshi icapioapinijiaca otsovironaquequi (Ya. 12.12). Maricoshi aisa ipajita Joanca. Itsipajiacari Paavoro aisa Verenave iquenaguetanaquegueti quepatsipaequi (Ya. 12.25; 15.37-39). Iquenquejajitaque itioncaquero ocatica ichooaquegueti guinteninintsiqui pajitatsica Iroma. Maricoshi tee intsipatempariji Jesoshi. Iquenquejajitaque arica Shimo Peerero itigarancane Jesoshi itsatacaqueri yantaguetaqueca Jesoshi. Tee intsajiteroji ajagantsini itioncaquerogueti, cotanquitsi chooca quenquejanquitsica itioncaquero tequeratagueti intioncajeriteroji Mateo, Irocashi aisa Joanca, arica ajagantsini 57 irooca otsipa ajagantsini arejevaetacaro 63.

Maricoshi iroguenti itioncaque antsatantamajaquemparica irira Jesoshi iriguenti quejearica aajanirentsi amitacotantatsica yantaguetaquero inintaguetica Iriri tigarancakerica. Iriovetaca jorio cotanquitsi itioncaciaqueneri teeca irio jorioja intsantantajaquempara irira Jesoshi irio agavejamajatatsica yanaajiaqueri maasano agavejavetatsica, yantaguetaquetari oacaantantatsica intati, yoguisotoaguequeri ampatsinipae, aisa ipeacotsijajari caquinte igovaeguisherejia. Iparianacarogueti Maricoshi itioncacotaqueri Jesoshi iquenquevaritapojigueti Jesoshi, yoviñacajataquerigueti Joanca Viñacajatantatsica.

Joanca Viñacajatantatsica itsavetantavaequequea oquitamampororoitapojaquegueti (Mt. 3.1-12; Irc. 3.1-9, 15-17; Jn. 1.19-28)

¹ Jero oparianaca Quenquetsatsarentsi Oganejencamajatatsica tsavetacotaquerica Jesoquirishito Irijanite Aapani Irioshi.

² Iriaquea tsavetantatsica Isaiashini itioncacotaqueroquea paesatoniqui icanqueca Aapani Irioshi iquenquetsatacaquerigueti Irijanite, icanqueriquea:

“Ari nontigarancaqueri iriquetica oananquitsineca, intsavetacotempi.

Irio camantajiaquerineca igonorroja querocagueti pinquenanaqueni irinetsanatashitan-tajiavaquempara.”[☆]

³ “Inquenquetsataquequea oquitamampororoitapojaquegueti iririjencani, incanque-quea:

‘Pinetsanatashijiaquempari Amajirote inquenantapojempaca,

pintanarejagueteneri iguenaquoquiropae ontampaticapoquitantanaquempara.’”[☆]

⁴ Iroompaquea iriraquea Joanca Viñacajatantatsica yoanaquequea ontaniqui oquitamampororoitapojaquegueti iviñacajatantavaequequea, aisa itsavetantavaequequea icanque: “Pincantashitatijianajempa povashiantajianajero pipeacaaguishejiaveca, pivñacajajianaquempara aatonijite icatsimatimentajiguimproquea Aapani Irioshi maasanopae pigovaeguisherejia, manaqueate irishetajempiroquea.”

⁵ Icaramirincatashivaetanaqueriquea Joreajiaquitica aisa Jerosarejiaquitica. Irooquea iquemajiapojirigueti ariquea icohicoitanaca itsaveacojianaqueroquea maasanopae igovaeguisherejia, ariquea iviñacajajiaqueriquea Jororanequi.

⁶ Iroguenti iquitsaataca Joanca quitsaarentsi ipeacaajitacaca imae cameyo, aisa ichompimashitacocariquea imeshinatsa. Iriquentiquea ishecataca quejevetarica shapipiiquiti aisa earotoja.

⁷ Ariquea itsavetantajianaqueri icanqueriquea:

—Irooshipojiquea incoraquepojaque impoitapojenaneca. Iriatimpa caaviji yanaaque-naquea yagavejamajati. Aatotarite noquempetimataritsi iriatimpa nompeaquempame

[☆] 1:2 Mara. 3.1. [☆] 1:3 Is. 40.3.

amiquerineca nosavincanaqueme noishorejacoquerime igaviguitire, caavijitari yanaa-majaquena. ⁸ Naatimpa iroguenti nantaque noviñacajatantajiaquempiro oja, cotanquitsiquea iriatimpa inquempetacaantaquemparo iroviñacajatantajiaquempiri Ishire Aapani Irioshi.

Iviñacajajiqueriquea Jesoshi
(Mt. 3.13-17; Irc. 3.21-22)

⁹ Ariquea isotoantanacaroquea Jesoshi Nasare choocatatsica Garireaquei, icampo-jaca ichooaquegueti Joanca, ariquea iviñacajatavaqueri Jororanequi. ¹⁰ Ariquea yarejevetapojajaro Jesoshi otsapijapojacagueti, yameniroquea otanarejanacaquea inquite yampiguiricashipojacariquea Ishire Aapani Irioshi iquejetapojacari emoreni. ¹¹ Iroompaquea iquenquetsajencajitanaque jenoqui inquitequi, icanque:

—Aviguentiquea Irijani nopintsamajatacaca, noshineventamajataquempiquea aviatimpa.

Inintavecaquea ampatsini irantacaaquerime Jesoshi teeca irininteji Aapani Irioshi
(Mt. 4.1-11; Irc. 4.1-13)

¹² Iroompa iriraquea Ishire Aapani Irioshi yaanaqueriquea Jesoshi osamani oquitamampororoitapojaquegueti. ¹³ Ariquea ichooacquitiquea oraniqui 40 savincaguiteri iconoicari shecatantaguetatsica. Iriraquea Satanashi icoraquetashiqueriquea yasereseretaqueriquea yamenantavetacari inintavecaquea irantacaaquerime teeca irininteji Aapani Irioshi, cotanquitsiquea teetarite iragavejeriji. Iroompaquea irioquea coraquec-oraqueitashipojajiri irashivantijitete Aapani Irioshi yamijiapojajiri.

Itsavetantavaetaquequea Jesoshi Garireaquei
(Mt. 4.12-17; Irc. 4.14-15)

¹⁴ Ariquea isantanatacojitaquerigueti Joanca, yoanaque Jesoshi Garireaquei itsavetantavaetaqueroquea Quenquetsatsarentsi Oganejencamajatatsica tsatacaacajica quero icocani Aapani Irioshi imajirontagueti. ¹⁵ Icanque:

—Imaicaquea aapojaca irinetsanatantaquemparoca Aapani Irioshi icantaqueca coramani, irooshipoji irimajirontapojempa. Povashiantajianajeroja covaeguisherentsi pincantashitajianajempa, aisa pinquemisantajiguroja Quenquetsatsarentsi Oganejencamajatatsica.

Jesoshi icajemajiaqueri 4 tarajatapinijiatsica impeacaajiaquempari itsatacaanejia
(Mt. 4.18-22; Irc. 5.1-11)

¹⁶ Ariquea icantanacaquea Jesoshi oraniqui ishitaravijatanacaro otsapijaqui iniromotija Garirea jmm. Inejajiapojiriquea Shimo aisa iriguentijeguite pajitatsica Antirishi tarajajianatsiquea, irootaquequea isavicaventajiaquequea iriatimpajia. ¹⁷ Icantajiapojaquei Jesoshi:

—Jame poguijaguijaitanaquenajate, imaicaquea irioquea pimpitsocashijianaquempa caquinteja, nagavejacaajiaquempiquea pinquejetacaajiajempari shima panquitacojiguirigueti.

¹⁸ Ariquea iriatimpajia yojocapanajantiroquea imantsatsitepae yoguijaguijaitanaqueriquea.

¹⁹ Yoayoaivetanacaquea tijañoñaji ontaniqui irioqueate yamenapoji Santiago* aisa iriguentijeguite pajitatsica Joanca savisaviitaque quenajarontsiqui inetsanajiaqueroqueate imantsatsitepae. Itsipatsipaitacari iriri pajitatsica Severeo. ²⁰ Ariquea iriraquea Jesoshi icampojojiriquea Santiago aisa Joanca:

—Jaame poguijaguijaitanaquenaja.

Iriatimpajia yoguijaguijaitanaqueriquea Jesoshi, yojocanaqueriquea iriri quenajarontsiqui, itsipajajari amijiaquerica.

* 1:19 Santiago. Iguenquetsatsarequi guiriego ipajita Iakobos. Iconoagarantaca quimajareri yoguipitsocaqueroqueti ivajiro ipajitiri Santiago, itsipa ipajitiri Jacobo. Mavite oponeca iguenquetsatsarequi evereo, ipajitiri Yaakob.

*Caquinte ishaquiacaca ampatsini**(Irc. 4.31-37)*

²¹ Ariquea yoayoaitanaque Caperenaqui. Oraquea aapojacaguetei savincaguiteri imagorejantajitaca yoanaque Jesoshi shinagogaqui icapiocantajiacaca joriojia ipari-anacaroquea itsatacaantanaquequea. ²² Iquemajiavaquerigueteiquea maasanopae yamenamenaitanaquequea intati, yamenajiaqueritari itsatacaajiaqueriguetei choocaquea iragavejane, teequea inquempejiguempajiri tsatacaantajiguiroca itioncacotanaqueca Moishishini. ²³ Ariquea ichoocaque oraniqui ishinagogatequi aparo shirampari ishaquiacaca ampatsini, ariquea iriatimpa icajemaque icanque:

²⁴ —¡Ariotaqueshiatsi, Jesoshi Nasarequital! ¿Querocaquea pincojiaquenani? ¿Irooquea picoraquetashique pinteroncajiaquena? Notsaquempiquea aviguenti Iriomajaca irashi Irioshi.

²⁵ Icantanaquequea Jesoshi:

—¡Pisanticote! ¡Pisotoanajeri!

²⁶ Irooquea iquemaqueriguetei ampatsini ariquea icotanaqueri ishaquiacaca ican-tavaetanaquequea tinquinini, tinquinini tinquinini. Iroompaquea icajemapanajanti ampatsini ¡jeeee! isotoanajiri. ²⁷ Maasanojia yamenamenaitanaquequea intati icoacotavacaajianaca:

—¿Taashia opaji ocatita? Ocantashitaticatarite itsatacaantapojica, choocaquea iragavejane. Icantaqueriguetei ampatsinipae, ari iquemisantajiaqueri.

²⁸ Iroompaquea maasanojia guinteniguinteniiitanquitsica Garireaquei iquemacojiaqueri Jesoshi.

*Jesoshi yogueshitajiroquea ivaguirotemajaca Shimo Peerero**(Mt. 8.14-15; Irc. 4.38-39)*

²⁹ Ariquea isotosotoitanajiguetei shinagogaqui, yoanaque Jesoshi itsovironaquitequi Shimo aisa Antirishi, itsipatsipaitanacari Santiago aisa Joanca. ³⁰ Oraquea ivaguirotemajaca Shimo ocatsirincavaetaquequea ojoquijica intsompoguiqui. Irooqueate yarejetapojacaguetei Jesoshi icamantajitavaqueriquea. ³¹ Iriatimpa iquempejipojaro yacatsavacopojiroquea yogatiitaro. Ariquea ocopanajantaquea opeanaja taampina. Ariquea ojocacojiajiniriquea irishecajiaquempaca.

*Jesoshi yogueshiguetajiri icarajiavaeque joquijjianquitsica**(Mt. 8.16-17; Irc. 4.40-41)*

³² Ariquea itsoguenancanajiguetei catsirincaiteri yamajiapojiniriquea Jesoshi maasano joquijjianquitsica iriguentica aisa ishaquajiacaca ampatsini. ³³ Maasano guintenjianquitsica oraniqui icaramirincavaequequea sotomorontsiqui. ³⁴ Iriaquea Jesoshi yogueshiguetajiriquea cantashitajajencatashigucarica joquijirentsipae, aisa yoguisotojaijainiri ishaquajiacaca ampatsinipae. Iriaquea ampatsinijia itsajiavaqueriquea, jero Jesoshi icantantajiavacarica:

—Aatoja pitsavetacotantajipojanatsijate.

*Itsavetantavaetaquequea Jesoshi shinagogapaequi icapiocantajiacaca joriojia**(Irc. 4.42-44)*

³⁵ Osavincaguitetanajiguetei ogantagatiraja opitsepitseiti, icatianacaquea Jesoshi, yoanaque ontaniqui osamani, yamanaqueriqueate Iriri. ³⁶ Incajaranquitanaquitiguiquea yoanaque Shimo incoaguetajeriquea itsipatsipaitanacari itsipavijitaca. ³⁷ Ariquea yamenajiapojajiri icantajipojiri:

—Maasanojia icoaguetajimpi.

³⁸ Cotanquitsiquea iriatimpa icanqueriquea:

—Jaame ontaniqui irooshiguetajiguetei iguintenipaequi nontsatacajiaqueri, irootaquequea nocoraquetashique.

³⁹ Yoanaquequea Jesoshi itsitacanaqueroquea maasanopae Garireaquei itsavetantaguetaqueroquea shinagogapaequi icapiocantajiacaca joriojia, aisa yoguisotojaijainiri ishaquajiacaca ampatsinipae.

*Jesoshi yovejairi avejancari**(Mt. 8.1-4; Irc. 5.12-16)*

⁴⁰ Ariquea icoraquepojqiea aparo avejancari. Iguerovempojari icanqueriquea:
—Nomajirote, ariguete pininque, pagavejaque piveajena navejancavejancaacaguetei.

⁴¹ Ipintsatacotanacariquea Jesoshi, icantajempequitana ipamitsitari, icanqueri:
—Jeeje, noninque. ¡Pimpeanajempaja!

⁴² Irooqueate icanquitiguiri jac peanaja yavejancavejancaavecaguetei, caramajatanaji.

⁴³ Ariquea itigarancajiriquea Jesoshi, cotanquitsiquea icantavajiri:

⁴⁴ —Aatoja picamantitsi. Iriguentiquea poimotanaque saserote ponigaapojempariquea, paanajenerija viratsipae, pinetsanaqueroja icantaqueca Moishishini cameetsanjite iramenamajaquempinijite, ariquea incanquempi peanajimpi, intsajiaquempinijite maasano peamajatajimpi.

⁴⁵ Cotanquitsiquea iriatimpa yoanaquequea icamantajiaqueriquea maasano yogueshitajiriguetei Jesoshi. Irootari caarica yoantanta Jesoshi ontaniqui iguintenijiacaguetei caquinteja. Manaquea iquenaguetanaque osamanipaequi teeca iriguintenijiguempaji, cotanquitsiquea yoayoaitashivaetanaqueri osamanipaequitica iramenajiaqueri.

2

*Jesoshi yogatijiriguetei teeca ironquempaji**(Mt. 9.1-8; Irc. 5.17-26)*

¹ Iroompaquea ocaraguitejavaetanaqueguetei yoanajiquea Jesoshi Caperenaوقي. Maasanojia iquemacojiaqueriquea ariquea ichoocaque oraniqui tsovironaqui qui imaan-tapinitacaca. ² Irooquea iquemacojiaqueriguetei yoayoaitanaque yomporoguijaven-tanacariqueate oraniqui intsompoguiqui aisa sotsiqui. Querocampate incojiaque-mpani inqijiaquijaiqueguetei itsipapae, jocajajivaecaquea icaramirincavaequequea igonorroja. Iriatimpa itsavetantajiaqueneri Quenquetsatsarentsimajaca. ³ Ariquea icoraquecoraqueiquequea

⁴ shiramparijia yamacojiapojaqueri teeca ironquempaji.

⁴ Yarejejiavetapojaca iriguenti poncaquini icanca, querocampate incotacajaianaque-mparini inqijacaantajianaquemparicate intsompoguiqui ichoocaqueguetei Jesoshi. Yataitaitanaquequea jenoqui sotsiqui ocantamencotacaguetei, imorotsitaroqueea itam-paticatacotaqueguetei Jesoshi ivaritsantsajacojiaqueriquea. ⁵ Iriaquea Jesoshi yamenaji-avaqueriguetei yaventajiapojacari irogueshitajeriniji, icanqueriquea teeca ironquempaji:

—Irijani, jac shetacotajimpi maasano pipeacaaguishevecaca.

⁶ Ariquea ichoocajiaque oraniqui tsatacaantajiguiroca itioncacotanaqueca Moishishini. Iriatimpajia iquenquejajianaque intati: ⁷ “¿Querocaquea icocani icanqueguetei imaica? Manatari iquejemanatanacari Aapani Irioshi. ¿Arimbate choocampate itsipa agavejanquitsineca irishetsitantaqueroqueea covaeguisherentsi? Aparotarite agavejatsi Aapani Irioshi.”

⁸ Cotanquitsiquea Jesoshi itsajivaqueriquea iquenquejajiaqueca, icantsijigari:

—¿Querocaquea picojianacani piquenquejajianaquequea piquejejaqueroqueea imaica? ⁹ ¿Querocampate caavijica anaaque mananquitsica? ¿Iroocajate noncanta-queriguetei teeca ironquempaji: ‘Jac shetacotajimpi maasano pipeacaaguishevecaca’, iroocajate noncantaquitiguetei: ‘Pincatianaje, paanajeroqueea pinorijancaca, panijitanaje?’ ¹⁰ Imaica namenacaajiaquempiroqueea yagavejaque ocانiqui quepatsiqui irira Irijanite Caquinte* irishetacoitajeri ipeacaaguishevecaca caquinte.

Iroompaquea ipitsocashitanacari teeca ironquempaji icanqueri:

¹¹ —Iintsija noncanquempiquea pincatianaje, paanajero pinorijancaca, poanaje pitso-vironaquitequi.

¹² Ariqueate icotanaca icatiapanajanta, yaanajiroqueea inorijancaca isotoanaji yoanaji. Yamenajivajiriquea maasano, yamenamenaitanaquequea intati ishineventajiacariquea Aapani Irioshi, icantajigui:

* 2:10 Icanqueguetei Jesoshi Irijanite Caquinte mana icantacotaca iriatimpa, mana oquejetaca icantacoqueri itsipa. Iriotaque Quirishito Meshiantatsica quenapojatsica jenoqui inquitequi, icaquintetapojquetari ivoapojaque.

—Teequea namenimajigueroji onquempequemparoquea ocatica.

Jesoshi icanqueri Irevi iroguijatanaquerija
(Mt. 9.9-13; Irc. 5.27-32)

¹³ Ariquea yoanaji aisa Jesoshi otsapijapojagueti iniromotija. Irooquee yomporogujaventajianacariquea icaramirincavaetanaquequea caquinteja, itsatacaajiaqueriquea.

¹⁴ Iroompaquea yoanaji yamenapojiri irijanite Arejeo pajitatsica Irevi† savicaquequea ontaniqui ipashicatsarajitirogueti, yoguijajiavaqueri avisavisaitatsica ivegaratacaajiaqueri imentaquitsite maasanopae aajiananquitsica irajaararopae irooca taaca opajitapae, iriguentitarite capiocapinitinirica majirontatsica imentaquipae. Iroompaquea iriraquea Jesoshi icampojiri:

—Jameja, poguijatanaquena.

Iriatimpa icatiitsitapanajanta yoanaque yoguijatanaqueri.

¹⁵ Ariquea Jesoshi yoanaque itsovironaquequi ishecataqueate, itsipatsipaitacariquea itsatacaaneja, jerija itsipapae oshequini capiocapinijiguinirica majirontatsica imentaquipae, jeri aisa itsipapae covaeguishehetsica. Icaramirincavaequetari icanca oguijaguijaitanaquerica. ¹⁶ Iriraquea pariseojia aisa tsatacaantajiguiroca itioncacotanaqueca Moishishini yamenajiaquerigueti Jesoshi ishecajiacagueti itsipajiacari covaeguishejetsica aisa capiocapinijiguinirica majirontatsica imentaquipae, icanqueriquea itsatacaaneja:

—¿Quero icocani irira tsatacaajiguimpica ishecatacojiacari capiocapinijiguinirica majirontatsica imentaquipae, jeri aisa itsipapae covaeguishejetsica?

¹⁷ Oraquea iquemaquegueti Jesoshi icantajigui:

—Iriraquea teeca irashinoncajempaji teetarite incoguitejacotempariji aavintantatsica. Iriguenti coguitejacojigari ashinoncajajatsica. Ariqueate noquejetaca naatimpa teequea irioquea noncoraquetashiteji teeca incovaeguishejiguempaji noncajemajiaqueri, iriguenti nocoraquetashijiaque covaeguishejetsica.

Icoacojitaqueriquea Jesoshi irisanticotantajitemparoca isheca
(Mt. 9.14-17; Irc. 5.33-39)

¹⁸ Ariquea iriraquea itsatacaaneja Joanca aisa irashijia pariseojia yoguipaquijajiaqueroquea isheca teetaquea irishecatsitajempaquee. Iroompaquea iconoagarantaca yoayoaitanaque icantajapojiaqueri Jesoshi:

—Iriraquea itsatacaaneja Joanca aisa irashijia pariseojia yoguipaquijapinijiaqueroquea isheca, cotanquitsiquea pashijia pitsatacaguica teequea inquejiguempariji iriatimpajia. ¿Querocaquea icojiacani?

¹⁹ Iroompaquea iquejetacaanca Jesoshi icanque:

—Pinquenquejeroja inchoocategueti iriaqueraca manquigatanquitsineca incajemajiaqueriquea itsipavijijiaca irishecatacaajiaquempariquea, ¿arimpate aatompate ishecajatsi? Irishecajiaquempaquee, itsipatsipaitacaritarite cajemajiaquerica shinejiacaquee. ²⁰ Cotanquitsiquea oraquea aapojajempagueti incatsimatantajitaquemparica irajaitanaqueri osamani, ariquee iroguenti irisanticotantajitemparoca isheca, irishimampojanca-cojianaquempari.

²¹ “Aatoquea ocameetsati oncotatemparogueti quitsaarentsiqui iroquetishitequitica incotatantajivetaquemparo iroaqueramorenatica quitsaarentsi. Irajaquitsijivetemparoquea ariqueeate oncotanaquempanti ontsiñotsiñomorenatanaquequea arimpaquee omperejanaqueroquea. ²² Aisa ari onquempetaquemparoquea iroguijaatantajitaquemparogueti vinoja iroaquerajatica oncachotapoje iroguijaatantajivetaquemparogueti imeshinanaquiqui iriquetinica oroameshinatananquitsica. Oncachojamajavetanaquempagueti oshimoajavetanaquempa, ariquee oncotanaquempa aravoavetaquitempa

† 2:14 Iriratica Irevi ipajita aisa Mateo (pamenero Mt. 9.9; Irc. 5.27).

imeshina, intyaquisanaque oshacojaatanauempaquea vinoja, aisa impomatsataquem-paquea imeshina imperejanaque. Jero caaviji ocameetsavaeque impijaatantajitaquem-paroquee iriaquerameshinari cameetsanijite aatonijite opomatsajata vinoja, aisa aatonijite ipomatsatatsi imeshina.”‡

Itsatacaanejia Jesoshi ishireguipanajanti tirigoitsoqui savincaguiteriqui imagorejantajitaca
(Mt. 12.1-8; Irc. 6.1-5)

²³ Iroompaquea aapojajagueti savincaguiteri imagorejantajitaca yoanaque Jesoshi icantanaca tirigomashiqui itsipatsipaitanacari itsatacaanejia. Iriatimpajia ishireguipanajanti tirigoitsoqui. ²⁴ Icanqueriquea pariseojia:

—Pamenajiguerija. ¿Quero ocotacani yaajianaquequea tirigoitsoqui imaica savincaguiteri imagorejantajitaca? Icantimentantajitirotarite irantantajitemparo.

²⁵ Yacanaqueriquea:

—¿Arimpate teequea pampatsajavantacojigueroji aviatimpajia itioncacojitaqueriguetei Taavini coramani ocanqueguetei itaseanaque iriatimpa aisa itsipajianacaca, teequea onchoocatimajaniquetei taampaquea irishecaciaquempaca? ²⁶ Iquijitsitanaca itsovironaquitequi Aapani Irioshi[§] ichoocatiguetei saserorote anaantamajatanquitsica Aviatate ishecatacaroquee pan icantimentantajitica irishecajitemparoguetei, manaquee yojoquijitaquero oraniqui shitaponcarontsiqui cameetsanijite iramenaqueronijite Aapani Irioshi. Iriguentiquea shecaciaquemparoneca saserorotejia, iriotaquequee cantanquitsica Aapani Irioshi. Cotanquitsiquea iriraquee Taavini ishecatsitaroquee, aisa yojocaciaqueneriquea itsipatsipaitacaca.

²⁷ Aisa icanque Jesoshi:

—Oraquee savincaguiteri imagorejantajitaca manaquee ipeacamentajicanari caquinte, iriraquee caquinte teequea impeacamentajitenemparo iroatimpa. ²⁸ Iriraquee Irijanite Caquinte iriguentiquea cantanquitsica queroca icantimentantajitica irantantajitemparoguetei savincaguiteri imagorejantajitaca, aisa querocaquea teeca incantimentantajiteroji.

3

Jesoshi yogueshitajiri chompevacovetatsica
(Mt. 12.9-14; Irc. 6.6-11)

¹ Ariquee yoanaji aisa Jesoshi shinagogaqui icapiocantajiacaca joriojia, iquijapoji intsonpoguiqui. Ariquee ichoocaque oraniqui chompevacotanquitsica. ² Ariquee irirajia omporoguijajianquitsica yamenamajajiaqueriquea Jesoshi iramenajiaquequee arica irogueshitajeri savincaguiteriqui imagorejantajitaca cameetsanijite intsaveacotantajiaquerinijite incatsimatacaantajiaquerinijite. ³ Cotanquitsiquea Jesoshi yamenapojaqueriquea chompevacotanquitsica icanqueri:

—Iintsija pincatigreja iramenajiaquempinijite maasanopae.

⁴ Ariquee icanqueriquea maasanopae:

—Imaica iintsija pincantajiguenajate querocaquea icanque Moishishini coramaniqui. ¿Taaquee irantantajitemparoca savincaguiteriqui imagorejantajitaca? ¿Ariquee icanque impeacaantajitemparo cameetsa, irooca irantantajitemparo covaeguisherentsi? ¿Ariquee icanque aavajeri agonoro aatoniji imetoji, irooca icanque ametojaqueri?

Cotanquitsiquea iriatimpajia teequea querocaca incanteji, iquemisantajianaquequee maasanojia. ⁵ Iriraquee Jesoshi yamenamenaiqueriguetei maasano icatsimatsitanacaquea, aisa ishimampojancacojianacariquee, yamenajiaqueriguetei mana iquishoshirentanaquequee. Iroompaquea ipitsocashitariquee chompevacotanquitsica icanqueri:

‡ 2:22 Itsatacaantica Jesoshi iroguenti quejetacaroca quitsaarentsi iroaqueraro, oquejetacaroc aisa vinoja iroaque-rajatica. Aato agaveji otsipataro itsatacaantica pariseojia aisa tsatacaantajiguiroca itioncacojanaqueca Moishishini.

§ 2:26 Acaniqui ocanqueguetei itsovironaquite Aapani Irioshi iroguenti ocantacoque quitsaarentsivanco itsaroven-tantajitarica iriatimpa. Icantajitiro Taverenacoro. Coajica irijanite Taavini ipeacaacaroc mapipanco icantajitica teemporo intsarovenantajiaquemparica. Iroatimpa aisa icantajitiro itsovironaquite Aapani Irioshi.

—Pincantavacotempaja.

Irooquee icantavacovetanaquitiga ariquea ocotanaca iraco jac peamajatanaja.
⁶ Iroompaquee isotosotoitanaji pariseojia yoayoaitanaji iramenajiaquiteri shineventajigacarica Erorishi.* Irooquee yamenajiavaqueriguetei icapiocajiaa isariimanatanacari Jesoshi irimetojacaantajiaqueriquea.

Yomporoguijaventajiacariquea Jesoshi otsapijapojacaguetei iniromotija

⁷ Iriraquee Jesoshi yoanaque otsapijapojacaguetei iniromotijaqui itsipatsipaitanacari itsatacaanejia. Itiorencaventajianacari aisa icaramirincavaequequee Garireaquitica aisa Joreaquitica. ⁸ Iquemacojiaqueriquea yonigaantaguequeroqueate oacaantantatsica intati icoraquecoraqueiquequee iramenajiaquiteri, iquenaquenagarantajiapoji Jerosarequi aisa Iromeaqui. Itsipapae iquenajiapojiquea intatiqueroqui Jororanequi. Itsipapae quenaquenaitapojatsica Tiroqui aisa Shironequi. ⁹ Iriraquee Jesoshi irooquee yamenavaqueguetei yomporoguijaventajiapojacari icantajiaqueri itsatacaanejia irajaijateneriquea quenajarontsi iroajiaqueneriquea quempeji otsapijapojacaguetei intehinteitantajianaquempaca aatonijite itsinacajiguiritsi omporoguijaventajiacarica. ¹⁰ Yomporoguijaventajiapojacari icaramirincavaeque joquijjianquitsica itaviavacaa-jianacaquea icanca inintajiaque inquempejiquempejiinquempariquea impamijiapojaquerinijite, yamenajiaquequee yogueshiguetajiriquea icaramirincavaeque itsipapae. ¹¹ Iroompaquee irirajiaquee ampatsinipae yamenajiaqueriguetei Jesoshi yogueroventsi-tanacariquee icajemajianaque icanque:

—¡Aviatimpa aviguenti Irijanite Irioshi!

¹² Cotanquitsiquea Jesoshi icantimentajiaqueriquea aatonijite itsavetacojiguiritsi.

Jesoshi yaajiaqueriquea 12 impeacaajiaquempaca itigarancanejia

(Mt. 10.1-4; Irc. 6.12-16)

¹³ Iroompaquee Jesoshi yoanaquequee otsempiqui icajemajiaqueriquea inintacajiaqueca. Oraquee yoayoaitanaqueguetei iriatimpaqui ¹⁴ yaaquequee 12 intsipatsipaiquempaca, aisa intigarancajiaqueca intsavetantavaetaquequee irootaquequee ipajitantajiacarica itigarancanejia. ¹⁵ Ariquea yagavejacaajiaqueriquea iroguisotojaijeneri ishaquajiacaca ampatsinipae.

¹⁶ Maasanoquee yaajiaqueca manaquea ipajjiaca: Shimo (ipajitajica Peerero);

¹⁷ Santiago† irijanite Severo, aisa Joanca iriguentijeguite Santiago (ipajijajiri mavite Voaneregueshi, oncanquequee “quempejiaca careti”); ¹⁸ Antirishi, Jeripe, Varitorome, Mateo, Tomashi, Santiago‡ (irijanite Arejeo); Tareo,§ Shimo (icantajitica “Serote”),* aisa ¹⁹ Jorashi Ishicariote, aacaanquerineca Jesoshi.

Icantajiaqueriquea Jesoshi iriguenti shaquiacari ampatsini

(Mt. 12.22-32; Irc. 11.14-23; 12.10)

²⁰ Ariquea yoanajiguetei Jesoshi tsovironaqui, yomporoguijaventajianacari icaramirincavaequequee caquinteja, querocampate incojiaquempani irishecajiaque-mpa iriatimpa aisa itsatacaanejia. ²¹ Chooca cantajianquitsica: “Jac itsavigavaetanaque.” Iquemacojiaqueriguetei ijitanēja icoraquejiaquequee irajaijaterime.

²² Icoraquejiaquequee aisa tsatacaantajiguiroca itioncacotanaqueca Moishishini, iquenajiapojaque Jerosarequi iramenajiaqueriquea Jesoshi. Iriatimpajia icanquequee:

* 3:6 Iriira pariseojia irio joriojia, teetari irinintajigueti irimajironquempari Sesa, iriguentitari Iromaquitica. Ari iquejetaca Erorishi, teequee irio jorio. Cotanquitsiquea iriraquee Iromaquitica iquijaguetaanaque iguinteniqui joriojia yomperaperavaejiacari. Irirooquee cantanquitsi irimajironquempari Erorishi joriojiaqui, iriotarite inquemisantamajataque Sesa. Icanquequee Sesa maasanojia joriojia irojocagarantapinijiaqueneri imentaquipae. Tee iroshequiamajateji joriojia shinevencarica Erorishi. † 3:17 Iriira Santiago ipajita aisa Jacovo. ‡ 3:18 Santiago. Chooca mavite Santiago, pajitatsica Jacovo. § 3:18 Tareo. Irioca icantajitica aisa Jorashi irijanite Santiago. Pamenero Irc. 6.16 aisa Ya. 1.13. * 3:18 Serote ocanque “nintamajatatsica”. Irooquee icantajitiri irirajia joriojia nintamajatanquitsica iroguisotoajiguetei Iromaquitica ompaperaperaacarica onchoocatashitajempanijite iguepatsite ishiraerijia. Acaniqui Maricoshi icantiri “kananitas”, irooquee oponeaca iguenquetsatsarequi arameo, ocanque “nintamajatatsica”, tee oncanteji iponeaca Canaanequi. Irocashi (6.15) icantiri iguenquetsatsarequi guiriego “zelotes”, irootaquequee ationcantacaroca “Serote”.

“Iriguentisa shaquiacari Veeresevo[†] imajirote ampatsinijia. Iriotaquequea agavejacaquerica yoguisotoantaguetacanicarica ishaquijiacaca ampatsinipae.”

²³ Iriaquea Jesoshi icapiocajiaqueriquea maasano itsatacaajiaqueriquea iquejeta-caacanari, icanqueri: “¿Arimpate intigarancajempa Satanashi iriatimpa iroguisotoaquempaquea? ²⁴ Ariqueate inquempetaquempari inchoocateguete caquinte incapiocajiaqueriquea igonorroja impeaquempaquea imajirote. Iroompaquea irira igapio-cane impariajianaquemparoguete incatsimatavacaajianaquempa, aatoquea ichoocagantsijajitsi. ²⁵ Ariquea iquempejiaca tsipatsipaitacarica ijitanajia, iriatimpajia-guete apigarancashitavacaajianaajatsineca incatsimatavacaajiaquempa, ariquea incohincoitanaquempa intsinampirejavacaajianaquempa aatoquea iconoavacajiajatsi. ²⁶ Ariquea iquempetaca Satanashi iriatimpa. ¿Arimpaquea querocaquea incoquempani iriatimpaguete apigarancavacaajiajatsineca incatsimatavacaajiajempaguete igonorroja ampatsinipae? Interoncaciaqueriguete igonoro apatiroquea inchoocataje. ¿Ariquea quericampate iromperatajempaca? ²⁷ Inquempetempaquea inchoocateguete itsipa caquinte irininqueguete inquijashitanaqueriquea itsovironaquitequi catsimarimajaca iragarantsiqueriquea, iroquetitaqueate iroshotapojeri cameetsanijite iragarantsiquerinijite. Oraquea aatotaguete yoishotiritsi aatoquea yagavejitsi iragarantsiqueriquea. ²⁸ Nontsatacaamajaquempiroquea imaica taacaguete impeacaaguishejiaquempa caquinte covaequisherentsi irooca inquenquetsaguishevaeque taaca opajita, iriraquea Aapani Irioshi iragavejaquequea irishetacotajeri aatoquea iquenquejacaajiri. ²⁹ Cotanquitsiquea iriraquea cantaguishetacoquerineca Ishire Aapani Irioshi, aatoja ishetacojitiritsi, incoguitempani irantsipevenquemparo.”

³⁰ Icantantajiacarica imaica, yamenaquequea icantajiaqueri: “Iriguentiquea shaquiacari ampatsini.”

Iriniro Jesoshi aisa iriguentijeguitepae

(Mt. 12.46-50; Irc. 8.19-21)

³¹ Ariquea coraquetaque iriniro Jesoshi aisa iriguentijeguitepae, icatintiitapojaca sotsiqui, ariquea icajemacaantajiaqueriquea. ³² Iriaquea savisaviitanquitsica anquitsaecarica Jesoshi icanqueriquea:

—Coraquetaque piniro aisa piguentijeguitepae, ichoocapoji sotsiqui, inintajiaque iramenajiaquempi.

³³ Iriatimpa icanqueri:

—¿Querocate iinani, aisa quericate niguentijeguitepae?

³⁴ Ariquea yamenitajianacariquea maasanojia savisaviitanquitsica anquitsaecarica icanque:

—Jeeri irirajia nopeajiaqueca iinani aisa niguentijeguitepae. ³⁵ Querica netsanama-jatiroca inintaguetica Aapani Irioshi, iriotaque nopejiaque iguentijeguipeae, tsiojipae, iinanipae.

4

Jesoshi iquejetacaacari pishoncaguitiroca oitsoqui

(Mt. 13.1-9; Irc. 8.4-8)

¹ Ariquea Jesoshi yoanaji aisa otsapijapojacaguete iniromotijaqui itsatacaantavaetajiquea. Icapiocajiaipojaquea icaramirincavaeque caquinteja yomporoguijaventajiapojacariquea, itirorencajianacaquea icanca, itetantanacaroca Jesoshi quenajaronsi isavicaque. Maasanojia omporoguijajianquitsica ichoocajiaque otsapijapojacaguete. ² Ariquea itsatacaajiaqueri iquempetacaaguetaqueroquea taaca opajitapae, icanqueriquea: ³ “Intsijate piquemisantajiaquenaate. Yoanaque aparo caquinte impishoncaguitero oitsoqui. ⁴ Ipishoncavoncaquitanaqueroquea tacororo tacororo itsitacaguetanaquero. Oconoagarancaquea asacaraaguetaquero que navoquirontsiqui, iroompaquea isavisaviitashipojioquea tsimeripae

[†] 3:22 Veeresevo. Iguenquetsatsarequi guiriego icanqueri Beezeboul aisa Beelzeboul. Icanqueri quimajareri Beelzebú. Iriotaque pajitatsica aisa Satanashi.

ishecajiapojacaro. ⁵ Otsipa oconoagaranca asacaraanaca mapiporoquiqui, taampina otsoroitsivetanaca, teemajaca onchoocamajatenica quepatsi. ⁶ Iroompaquea icatsirincaguitevetanaca catsirincaiteri itsianaqueroquea oshimpeguiricanaquequea ometojanaque, teetarite oamajateji ovarishitsa isaviqui, ojocaavaquerotarite mapi. ⁷ Oconoacaquea otsipapae asacaraaguetanaca ochooacagueueti ovarishitsa samerento. Ariquea otsoroavetanaca ariqueate otsoroitsitanacaquea samerento iroatimpa otsincoanajiroquea ometojanaji, teequea onchoocateji oitsoqui. ⁸ Oconoacaquea otsipapae asacaraanaca ocameetsaguitetaquegueti quepatsi, otsoroanaquequea otagananaanaca ochoocatanaque opitsaraquiacotanacaqueate oitsoqui, oconoaca ochooacaque 30, otsipa 60, otsipa ochooacaquequea 100.”

⁹ Iroompaquea icanqueriquea: “Choocagueeti piguempita pinquemantavaquempaca, pinquemeja.”

Jesoshi itsatacajiaqueriquea quero ococani iquempetacaantaguecaroca

(Mt. 13.10-17; Irc. 8.9-10)

¹⁰ Ariquea yoayoaitanajiquea maasanopae, aparoquea icantaja Jesoshi itsipatsipaita-jariquea itsatacaaneja, aisa itsipa oguijaguijaiquerica. Iriatimpajia icanqueriquea:

—¿Taaquea opajita piquempetacaaguetacaca incajanganqui?

¹¹ Iriatimpa icanqueriquea:

—Aviguentijia tsajiaquerone imaica queroquea icotani Aapani Irioshi imajirontagueeti, teetari ironigaantajivetemparoji paesatoniqui. Iriiraquea itsipajia manaquea nonquejetacaaguetaquenempari maasanopae, ¹² cameetsanijite iramenamenavetanaquempaquea, cotanquitsiquea aato oconijatimotiri; Inquemaquemaivetanaquempaquea aisa, cotanquitsiquea aato itsajiavaquerotsi, aatoquea ipitsocashijigana noshetacotsitajerime igovaeguishere.✠

Jesoshi itsatacajiaqueri itsatacaaneja taaca opajita iquejetacaacaca incajanganqui

(Mt. 13.18-23; Irc. 8.11-15)

¹³ Icanqueriquea aisa:

—¿Teempate pinquemajiavaqueroquea ocatica noquejetacaacaca incajanganqui? Iroosacanica, ¿querocampate pincojiaquempani pinquemajiaquerogueti ogonoropae nonquejetacaaguetaquemparogueti? ¹⁴ Iriiraquea oanankuitsica impishoncaguite iriguenti quempecaroca tsavetantiroca Iguenquetsatsare Aapani Irioshi. ¹⁵ Iconoajia caquinteja iroguenti iquempejiacaroquea oitsoqui asacaraaguiguetananquitsica quenavoquirontsiqui. Iquemisantajiaqueroquea Iguenquetsatsare Aapani Irioshi, cotanquitsiquea icoraquetashiqueriquea Satanashi ipeacotacajaijaari maasanopae. ¹⁶ Iconoajia itsipa iroguenti iquempejiacaroquea oitsoqui asacaraaguetananquitsica mapiporoquiqui teemajaca onchoocamajateji ogamiguitere quepatsi. Iquemajiaqueroquea Iguenquetsatsare Aapani Irioshi ishineventamajjiavetavacaroquea. ¹⁷ Cotanquitsiquea teequea inquemisantamajateroji, mana iquejetacaró panquirentsi teeca onquijamajateji ovarishitsa, jero ipeacojianajaroquea taampina. Iroompaquea otiavaetanacari atsipetagantsi, irooca icatsimatimentajiqueriquea Iguenquetsatsare Aapani Irioshi ariquea icohicoitanaja yovashiantajianajiroquea itsaróventavecaca. ¹⁸ Itsipa iroguenti iquempejiacaroquea oitsoqui asacaraaguetananquitsica samerentoqui. Iquemisantajiavecaroquea Iguenquetsatsare Aapani Irioshi, ¹⁹ cotanquitsiquea irooqueate itsipatavajiroquea iquenquejajivajiroquea maasanopae choocaguetatsica quepatsipaequitica, aisa ishineventajiajavari imentaquitsite irooca aisa taaca opajitapae ajaararontsipae. Teequeate inquenquejajiajajeroji Iguenquetsatsare Aapani Irioshi, iroguentiquea inquenquejajiaquequea irajaarantajiaquempaquea. Querocampate incojiaquempani intsaróventamajjiaquemparigueti. ²⁰ Cotanquitsiquea chooca itsipa iconoagarantajia iroguenti iquempejiacaró asacaraaguetananquitsica ocamiguitetapojigueti quepatsi. Iquemisantajiavaqueroquea Iguenquetsatsare Aapani Irioshi, yaajiavaqueroquea, iroompaquea arimpaqueate iquemisantamajaguitironi.

✠ 4:12 Is. 6.9-10.

Iconoagarantajiaquea ichoocajiaque cameetsa iquempejiacaroquea tsoroananquitsica choocatananquitsica oitsoqui 30. Itsipa iquempejiacaroquea choocatananquitsica 60. Itsipa caavijica yanaaque ichoocamajajiaque cameetsa iquempejiacaroquea choocatananquitsica oitsoqui 100.

Iquempetacaacaroquea Jesoshi maasanopae senacacovetanquitsica
(Irc. 8.16-18)

²¹ Icanqueriquea aisa:

—Oraquea itsivojitirigueti tsivorentsi ¿arimpate isasaviacojitiriquea chomoqui? ¿Arimpate yoguisavicacojitiriquea osevatacagueti shitamencontsi imaantajitaca? Teequeate. Iroguentiquea yoguisavicacojitiriquea jenoquijaniqui cameetsanijite intsiv-otacojiaquerinijite maasanopae. ²² Ariquea oquempetaca taaca opajitapae senacague-tanquitsica imaica oncoramanitapojajegueti ironigaantajiqueroquea. Aisa taaca opajita-pae teeca intsajiteroji imaica oncoramanitapojajegueti intsajiqueroquea. ²³ Choocagueti piguempita pinguemantavaquempaca, pinguemeja.

²⁴ Icanqueriquea aisa:

—Pinquenquejamajajigueroja piquemajivaqueca. Querocagueti pincotsiterini it-sipa ariqueea inquejetacaajitaquempi aviatimpajia, ariqueea iranaacaavaequempiro. ²⁵ Quericaa tsatavaqueroneca icantajiquerica intsatacaajitaqueriquea otsipapae. Quer-icaca teeca irininteji intsatavaquero, iraapitsatsijitavaqueriquea itsavecaca.

Jesoshi iquempetacaacaro imajirontagueti Aapani Irioshi, iquejetacaacaro tirigoitsoqui

²⁶ Icanqueriquea aisa:

—Imaica nontsatacaamajataquempiroquea aisa queroquea icota imajirontagueti Aa-pani Irioshi, iroguenti oquejetacaroquea tirigoitsoqui. Yoanaquequea aparo caquinte ipishoncavoncaquitanaqueroquea tacorororo tacorororo itsitacaguetanaqueroquea. ²⁷ Oraquea iteroncanaqueroqueti yoanaji itsovironaquitequi, iroompaquea opitse-canaji imaanaji, osavincaguitetanajigueti ipityaquirejanaji. Ocaraguitejavaetanaque-gueti savincaguiteri otseequitanaquequea otsoroanaque, cotanquitsiquea iriatimpa tee-quea intsatavaqueroji querocaca ocotanacani otsoroanaquegueti. ²⁸ Inchiquiojiquea otsoroanaquequea quepatsiqui, ochoocatanaquequea oguiji, ariqueea agataganajanaca ochoocatanaque oitsoqui. ²⁹ Oraqueate osamparijencatanaquegueti yoanaquequea pis-honcavoncaquitanaqueroa ipesacoqueroquea yaanaquero sampamiriaquitananquit-sica.

Jesoshi iquempetacaacaro imajirontagueti Aapani Irioshi, iquejetacaacaroquea oitsoqui moshitaasa

(Mt. 13.31-32; Irc. 13.18-19)

³⁰ Icanqueriquea aisa:

—¿Imaicaquea taaca oquejetacaroquea imajirontagueti Aapani Irioshi? ¿Taaca non-quempetacaajemparo? ³¹ Ariqueea nonquempetacaajemparoquea oitsoqui moshitaasa. Oraquea oitsoqui moshitaasa caaviji anaaque chaamirijaquijaniquivaeequequea anaague-queeroquea otsipapae oitsoqui ivintyacajitica quepatsiqui. ³² Cotanquitsiquea ivintya-cajitirogueti otsoroanaque agajempejanaca ocanca anaaguequeeroquea otsipapae pan-quirentsipae chaamirijaquijaniquitatsica oitsoqui. Otsegotsegoatanaca oquempetana-jaroquea inchato, itsimampeantajajaro tsimeripae.

Jesoshi iquempetacaantaguecaro itsatacaanquegueti
(Mt. 13.34-35)

³³ Ariqueea iquejejaqueriquea imaica Jesoshi itsatacaajiaquerigueti Iguenquetsatsare Aapani Irioshi iquempetacaaguecaroqueuea taaca opajitapae, maasanopae yagavejaji-avaqueca. ³⁴ Teequea intsatacaajigueriji intati, taaca ininqueca intsatacaajiaqueri iquempetacaaguecaroqueuea. Cotanquitsiquea irioca choocatajatsi itsatacaanejia yoguiso-toamajataqueneri maasanopae.

Oquemisantamajataqueriquea Jesoshi choviga, aisa iniromotija
(Mt. 8.23-27; Irc. 8.22-25)

³⁵ Iroompaquea itsaparoncaguitetanajigueti icanqueriquea itsatacaanejia:

—lintsija jaame intatiqueroqui.

³⁶ Iquenquetsatacaajianajiriquea omporoguijajianquitsica, itaquiajatacojianajiri itsatacaanejia icocaniquea itetaca. Itsipajia oguijaguijaitacotanaquerica.

³⁷ Incajaranquiguitetanaquegueti ochovigaguitetapojaquequea choviga jeoc jeoc jeoc, ariquea ocotanaca ovorevoreanaca otserajatanaqueroquea oja quenajarontsiqui irooshivetapojaca ontamorencanaquempamequea. ³⁸ Iriraquea Jesoshi yojocanacaniquea tin ovataquipojacagueti itiinatacaroquea tiinarentsi. Itinaitariquea icanqueri:

—Tsatacaantantatsica, ¿arimpate teequea pintsateji irooshipojishiatsi ojocajajiguempanshiatsi?

³⁹ Icatiitsitanacaquea icanquero choviga:

—Pimpejaencatanajempaja.

Icantsitaroquea aisa iniromotija vorevoreanquitsica icanquero:

—Pinchopecajatanajempaja.

Ari ocotanaja opeanaja choviga, ari oquempetaca iniromotija ochopecajatanaja.

⁴⁰ Ariquea icanqueriquea itsatacaanejia:

—¿Quero ocotacani pitsaroantanacaca? ¿Arimpate tequeratampate pintsamajajigüena nagavejamajati?

⁴¹ Arimpaquea itsaroamajajianaquequea icantavacaajianaca:

—¿Taa ipaji iricatica? Jero oquemisantamajatanarica choviga aisa iniromotija.

5

Gararaquitica ishaquiacaca ampatsini

(Mt. 8.28-34; Irc. 8.26-39)

¹ Ariquea yarejerejeipojacaquea intatiqueroqui itsinampijaatacojiapojacaquea iguepatsitequi Gararaquitica.* ² Irooquea yanijirejavetanaca Jesoshi yameniri icoraquepoji aparo caquinte ishaquiacariquea ampatsini, iquenapojiroquea imperitamoroqui yojoquijitantapinijitarica metojatsica. ³ Ariqueate iguinteniguitaniquea oraniqui. Teequea quericaca agavejimatajerineca iroishoteri, teetari agavejeriji cavorejatsari.

⁴ Yoishotantajivecari cavorejatsariqui iguitiqui aisa iracoqui itsatitsativaetaqueroquea itsinatsinavaequeroquea pioquire, pioquire, pioquire, otsatitsatiavaetanacaquea cacaaporoquijaniqui. Teequeate quericaca agavejimaterineca. ⁵ Icocaniquea yanijivijiti savincaguiteriqui aisa pitsecariqui. Yoavaeguetanaquequea otsempipaequi aisa imperitamoroqui yojoquijitantapinijitarica metojatsica, icajemamajatatiguinimaja jeeee. Yaitsitaroquea mapi tsaampiri itotsitaquea quitente quitente quitente.

⁶ Irooqueate yamenacotsitavacarigueti Jesoshi ishiashitanacariquea quempeji iguerovempojacari. ⁷ Iririjencavaeque icanqueri:

—¿Querocaquea pincoquenani, Jesoshi Irijanite Irioshimajaca Anaantamajatatsica? lintsijate aatoja patsipetacaanatsijate. ¡Pimpintsatocogajaitenashiatsi!

⁸ Icantantacaroca ocativa irooriji icanqueri Jesoshi ampatsini:

—¡Pisotogue, ampatsini, povashianteriqueate iricatica!

⁹ Ariquea icanqueri Jesoshi:

—¿Querocaquea pipajitani?

Icanque iriatimpa:

—Nopajita Caramirincatatsica, nocaramirincavaequetari.

¹⁰ Yapijipijitaqueri icantiri:

—lintsija aatojate pitigarancajianatsijate osamani.

¹¹ Ariquea ichoocajiaque chancho† oraniqui otapiqui ishecajiaca, icaramirincavaeque icanca.

¹² Iquenquetsatsitanacaquea ampatsini icanqueri:

—lintsija ariguentiquea pintigarancajiaquenaquea noshaquiajiaquempariquea chanchojia.

* 5:1 Gararaquitica. Chooça otsipa paperi otioncacotacagueti acaniqui Jeraaquitica (gerasenos). † 5:11 Irira chancho iriguenti viratsi quejevetarica santaviri.

¹³ Iriraquea Jesoshi icanqueriquea:
—Intsiquetirote poapoaitanaque.

Yovashiampanajantiri ishaquiavecaca irioqueate yoashiyoashiivetanacari chanchojia. Irooqueea ishaquishaquiivetapojacari, ariquea icohicoitanaca isaquiritsaevaetanaque ojeguironcapojacaguete yanoyanoitanaca itanquiretanquireitanaque yojocajajipojaca, iteroncajiaca maasano. Maasanojia icarajiaque 2,000.

¹⁴ Irooqueea yamenajivaqueriguete quempoguijirica itsaroajianaque ishiashiaitanaca yoayoaitanaji icamantajipojiri ontaniqui iguintenijiacaguete itsitacaguetaipojioqueate, iquemacotantajiacarica choocajatsica acaniqui aisa choocajatsica quempejipaequi. Isotosoitanaque iramenajiaque taa opajita.

¹⁵ Yoayoaitanaquequea ichoocaqueguete Jesoshi, iroompaquea yarejerejeipojaca yamenajipojiriquea ishaquiavecaca ampatsini savicaji quitsaataja quenquejanaji quempejatanaja iroaqueraguete, ariquea icohicoitanaca itsaroajianaque.

¹⁶ Iriraquea amenajiaqueroca maasanopae icamantajivaqueriquea querocaca icoqueriniquea iroaqueraguete yoguisotojainiriguete shaquiavecarica caquinte, aisa querocaca icoquerini itigarancajiaqueriguete ishaquajavetacariguete chanchojia yojocajajiacaguete. ¹⁷ Iroompaqueate iquemajiaquitiguetea itsavetantajiaqueriguete, iriatimpajia yamanamanaiqueriquea Jesoshi iroanajeniji irovashiantsitanajeriniji iguepatsite.

¹⁸ Irooqueea itetanajaquea Jesoshi quenajarontsiqui iroanaje, iriraquea ishaquiavecaca ampatsini icanqueri ininque intsipatanaquempari. ¹⁹ Cotanquitsiquea Jesoshi tee irishineteriji, mana icanqueri intati:

—Poanaje pitsovironaquitequi, pigonoroqui, pincamantapojajerija pintsavetampoja-jeroqueea maasano queroqueea icoquempari Aapani Irioshi ipintsatacotajimpiguete.

²⁰ Iriatimpa yoanajiquea iparianacaro itsavetantaqueroqueea oraniqui guintenin-intsipaequi Tecaporishiqui, yoguisotojaiapojaqueneri ipintsatacotacariguete Jesoshi. Maasanoqueea mana yamenamenaitanaque intati.

Jesoshi ivochatajiro irorijanite Jairo
(Mt. 9.18-26; Irc. 8.40-56)

²¹ Ariquea imontejacotanaja Jesoshi intatiqueroqui yomporoguijaventapojacari icaramirincavaeque caquinteja, ariquea ichoocapoji oraniqui otsapijapojacaguete iniromotijaqui. ²² Iroompaquea icoraquepojaque shirampari pajitatsica Jairo. Iriatimpa iriguenti jivatanquitsica shinagogaqui icapocantajiacaca joriojia. Ariquea yamenapojiriguete Jesoshi igueroventapojacari, ²³ icampojiri:

—Irooshipoji ometoje norijanite. Jaameshiatsi pimpamitaquitenaroshiatsi ompeana-jempanijite onchoocatajeniji.

²⁴ Iriraquea Jesoshi yoanaque yoguijatanaqueriquea, ariquea yoguijaguijaitanaqueriquea icaramirincavaeque caquinteja itirorenciaventajanacariqueea oraniqui itsinacajianaqueri. ²⁵ Ariquea ochoocaque aisa oraniqui aparo manquigarentsi ashinoncaavaetanquitsica ososojavaetini coramani, ariquea ocaratacovaetanaqueni 12 ajagantsiteni.

²⁶ Atsipevaecaqueate yaavintanavecaroqueueate aavintantatsica teequeea ompeajempaji arimpaquee ogatsitanaca, niganquiquea oteroncamajatanacariqueea omentaquit-site, ejempacotia oanaca. ²⁷ Oquemacoqueriquea Jesoshi oanaquequeate ontaniqui ichoocaqueguete iriatimpa oconoajianacari, oquempejitanacariqueea ocoraquetashipojiri itaqui qui ochagatsaequitsitavaqueri ivanquemaero. ²⁸ Oquenquejitsitanacaqueea incajaranqui ocanque: “Iroguenti nonchagatsivetaquempari ivanquemaero nompeana-jempaquea.” ²⁹ Irooqueea ochagataquitiguiroqueea ariquea ocotanaja osanticojatapojaji ososoajare, oquematsinotavaca jac peamajatanaja. ³⁰ Iriraquea Jesoshi itsatavaqueroqueea ipeantajaro iragavejane ipitsocanacaqueea yamenamenaiqueri omporoguijaventajiacarica icanqueriquea:

—¿Taaqueea chagatsitaquenaro novanquemaero?

³¹ Icantajianaque itsatacaanejia:

—Pamenavecaqueate itsinacajianaquempi, pogaavacaquea picanque: ‘¿Taaquea chagatacoquena?’

³² Iriatimpa yamenamenaitanaque taaca chagatacoquerica. ³³ Iroatimpa otsaromajatanaquequea ompioncavaetanaca, otsatavajitari peamajataja. Ojocavaetapojaca iriatimpaqui ogueroventapojacari ocamanqueriquea maasanopae. ³⁴ Iriatimpa icanqueroquea:

—Orijani, irooriji pavenquenatarite naatimpa, irootari piveantanajaca. Imaicaquea poanaje, pishinevaetajempa aatotarite apijitajimpi aisa.

³⁵ Iroompaquea quenquetsatsitiraja Jesoshi icoraquecoraqueipoji itsipapae, iquenajipoji itsovironaquitequi jivatanquitsica shinagogaqui, icampoijiri:

—Jac metojaque porijanite, ariotapojaque pasereajiriti Tsatacaantantatsica.

³⁶ Cotanquitsiquea Jesoshi iquemaquerigueti,[‡] ipitsocashitari jivatanquitsica shinagogaqui icanqueri:

—Aato pitsaroguitsi. Mana paventanaquena naatimpa.

³⁷ Tee iroguishinejeri itsipajia iroguijaguijaitanaqueri, iriguentiquea itsipatsipaitanaca Peerero, Santiago[§] aisa iriguentijeguite Santiago pajitatsica Joanca. ³⁸ Oraquea yarejerejeitapojagueta itsovironaquitequi jivatanquitsica shinagogaqui yamenapojiri ampenejencavaejiaca iraajiaca cajemajiaque oraniqui. ³⁹ Iquijanaquequea intsompoguiqui icantajiapojiri:

—¿Taampa opajita piraantajiacaca picajemantacaca? Teetarite ometojenica, mana omaaque intati.

⁴⁰ Ariquea ichohicoitanaca ishirontimentajianacari. Ariquea yoguisotosotoitajiri maasano sotsiqui, iriguentiquea itsipataja jivatatsica aisa imanquigare, iriguentijia aisa itsatacaanepae itsipatsipaitacaca incajaranqui, iquijaguijaitanaquequea ojoquijicagueta irorijanite. ⁴¹ Yacatsavacoquero icanqueroquea:

—*Talitha, cumi* * —ocanquequea: “Chaajaniquitirajaca, noncanquempi, pincatianaje”.

⁴² Irooquea icantaquitigui ariquea ocotanaja otancorejanaji ocatianaja anijivijitaji. Iroatimpa arejetacaró 12 ajagantsite. Iriatimpajia yamenamenaitanaquequea intati.

⁴³ Cotanquitsiquea Jesoshi icantajiguiri aatoquea icamantitsi. Icantsitari aisa irojocajiaquenero oshecatajempata.

6

Itsatacaantavetacagueta Jesoshi Nasarequi (Mt. 13.53-58; Irc. 4.16-30)

¹ Ariquea yoanaji Jesoshi iguinteniqui, itsipatsipaitanajari itsatacaanejia.

² Aapojajagueta savincaguiteri imagorejantajitaca* yoanaque shinagogaqui icapiocantajiacaca iparianacaroquea itsatacaantanaque. Iriraquea quemajivaquerica yamenajianaquequea intati icantajianaque:

—¿Queroquea oquenapojini maasanopae ocativa iquejetantacaca iricativa? ¿Taa opajita ocativa itsatica ganejencaro yojocajiquenerica? ¿Quero ococani yagavejancaca yonigaantaguequeroquea oacaantantatsica intati? ³ ¿Teecajate irioquea iricativa caripintero,[†] irijanincaca Maria? Iriraquea iriguentijeguitepae iriguenti Santiago, Jose, Jorashi aisa Shimo. Ariquea oquempajia itsijoitepae iroatimpajia aisa oguintenijia acaniqui, amenamajajiguiroquea aatimpajia.

Ariquea teequea irinintajigui inquemisantajiaqueri, iroguenti icatsimajiaqueri.

⁴ Cotanquitsiquea Jesoshi icantajiaqueri:

—Iriraquea tsavetantiroca icanquerica Aapani Irioshi ishineventajitavajari que-rocagueta yoanaqueni osamani, cotanquitsiquea ichoocavecagueta iguinteniqui, teequea

[‡] 5:36 Chooca otsipapae paperi otioncacagueta: “Cotanquitsiquea Jesoshi teequea inquemisantajiajeri.” § 5:37

Santiago ipajita aisa Jacovo. * 5:41 Talitha, cumi. Icanqueroquea iguenquetsatsarequi arameojia, irootarite iguenquetsatsare Jesoshi ichoocatigueta quepatsiqui. * 6:2 imagorejantajitaca. Irira joriojia imagorejapinijiaque

saavaroqui. † 6:3 Iriraquea caripintero iriguenti tsamajaguetiroca inchacota, ipeacaantaguecaro shitaponcar-ontsipae, taaca opajitapae.

irishineventajitempariji, aisa teequea inquemisantajigueriji ijitanēja aisa guinteniniti-motacarica itsovironaquitequi.

⁵ Ariquea teemajaca ironigaantajeroji oacaantantatsica intati oraniqui iguintenive-tacagueti. Manaquea ipamijiaqueriquea aparopae ashinoncajajianquitsica, yogueshijia-jiri. ⁶ Ariquea yamenanaque intati, yamenaque teequea inquemisantajiajeriji, manaquea icantajiaque: “Caaricaja.”

Ariquee Jesoshi yoayoaguetaquequea irooshipojigueti oraniqui iguintenijiacagueti itsatacaantavaetaquequea.

Jesoshi itigarancjiaqueri 12 itsatacaane iroaroaitanaque intsavetantajianaque

(Mt. 10.1, 5-15; Irc. 9.1-6)

⁷ Ariquee icajemaqueriquea itsatacaane carajianquitsica 12, itigarancjiaqueriquea iroaroaitanaque intsipatavacanaquempa mavite mavite, yagavejacaajiaqueriquea iragavejajiaqueri ampatsinipae. ⁸ Icantajiaqueriquea: “Aato paimatitsi. Aatoja paajiguetsi pitsaratote, pisheca aisa pimentaquitsite. Iroguentiquea pigotiro. ⁹ Pincaviguitijianaquempaja, cotanquitsiquea aatoquea paajiguetsija mavite piitsaare, iroguentiqueate piquitsaajiacaca. ¹⁰ Querocagueti oraniqui poapoaitanaqueni incajemajiaquempiguetsi pimaanaque itsovironaquitequi, poapoaitanaquequea pincoquempaniquea pimaimojiaqueri arejevaetapojajempa savincaguiteri poapoaitantanajempaca. ¹¹ Oraquee querocaguetsi poapoaitanaqueni oraniqui aatoguetsiquea ishineventajiguimpitsi, taampina poapoaitanaque, cotanquitsiquea iroquetitaja pantecamajatanaquevoja quepatsivane pagatiquitsitapojiaqueriguetsi, ironijite iramenantajiaquempanijite iroguenti yantaguishejiaqueroquea covaeguisherentsi, teetarite irajaiavaquempiji irishineventajiaquempiji. [Arimajaquea oncoramanitapojajeguetsi arejetapojajempaguetsi incatsimatantaquemparica Aapani Irioshi, caaviji incatsimamajajiaqueriquea irirajia teeca irishineventajiajavempiji, anaamajataqueroquea incatsimamajajiaqueriguetsi guintenijiavetanquitsica coramaniquitica Soromaqui aisa Gomoraqui.]”

¹² Iriatimpaja yoayoaitanaquequea itsavetantajianaque, icantajiaqueri maasano irovashiantajianaqueroja maasanopae covaeguisherentsi ipeacaaguishevaetacaca incantashitatijiaanajempa. ¹³ Yoguisotoajiaqueriquea oshequi ampatsinipae, aisa ipantan-tajiacari orejiqui oshequi joquijiripae, ipeajianaja.

Erorishi iquenquejajiro imetojacaanqueriguetsi Joanca Viñacajatantatsica

(Mt. 14.1-12; Irc. 9.7-9)

¹⁴ Maasano iquemacojiaqueriquea Jesoshi, jero iquemacotantacarica majirontatsica Erorishi[‡] iriatimpa. Chooca cantajianquitsica: “Tancorejanajishiatsi Joancani Viñacajatantatsica, jero yagavejamajatantacaca yonigaantaguequeroquea oacaantantatsica intati.” ¹⁵ Itsipaquea cantanquitsica: “Iriguentiquea coramaniquitica tsavetantatsicani pajitatsica Iriashini.” Itsipapae cantanquitsica: “Iriguentiquea tsavetantatsica, queje-carica irirajia tsavetantajiatatsicani coramanipaequitica.”

¹⁶ Oraquee iquemajiaqueriguetsi Erorishi icantajiaqueguetsi imaica, icanque iriatimpa: —Iriguentiquea Joancani nojitorejacaanqueca, tancorejanajishiatsi.

¹⁷ Oraquee chapinqui iriraquee Erorishi yaacaantaqueri Joancani, yoishotacaan-queriquea cavorejatsariqui, isantanatacotacaanqueri, irooriji yamenaquequea icantomajimentavecari Eroriashi yaapitsaqueriguetsi iriguentijeguite pajitatsica Jeripe. ¹⁸ Iriraquee Joanca icanqueriquea Erorishi: “Tee ari incojitempaji paapitsaqueriguetsi imanquigare piguentijeguite.”

¹⁹ Oraquee Eroriashi ariquee ocatsimatanaqueriquea Joanca onintaveca irimetojaitsi-jiquemparimequea, cotanquitsiquea querocampate oncoquerini. ²⁰ Itsaroacaacaritarite Erorishi itsaquequea iriguentiquea cameetsari, iriguenti igomajamajare Aapani Irioshi,

[‡] 6:14 Iriratica Erorishi irio icantajitica Erorishi Antipashi. Iririni aisa ipajita Erorishi, irio majirontanquitsica ivoaqueguetsi Jesoshi (pamenero Irc. 1.5; Mt. 2.1-19).

jero yamenamajatantacarica aatonijite queroca icojitrini. Oraquea itsavetantavae-tigueti Joanca inintanirovecaro, cotanquitsiquea tee intsateji querocampate incoquem-pani. ²¹ Iroompaquea aapojatiga savincaguiteri ometojacaantantaquemparica. Iroguen-tiquea aapoja isavincaguiterte Erorishi. Iriatimpa itiacaaantaguetaquequea taaca opa-jitapae shecatsipae, ariquea icajemajiaqueriquea imajirojiate joriojia, aisa imajiroji-ate coaretajia, aisa anaantajiatsica guintenijiatsica oraniqui Garireaqui. ²² Ariquea ishecajiaca, oquijapojiquea orijanite Erorishi otsamaropoji opitsopitsovaetanacaque-ate. Irooquea yamenaqueroqueti Erorishi aisa maasanopae itsipatsipaitacaca ishecaji-acagueti, ishineventajiacariquea. Iroompaquea icanquero:

—Imaicaja pamanenajate taaca pininqueca, naatimpa nojoquitsitempiroquea.

²³ Icantsitajaro aisa:

—Imaica noncanquempi arimajaca nojocaquempiroquea taaca pamanaquenaca, aa-totarite namatavijimpitsi. Quempetaca pamanenagueti nojocagaranquempiro nash-intaguecaca, nontincavirejitempiroquea niganqui. Incatsimatimentenarota Aapani Irioshi aatogueti nonetsanatiro nocanqueca.

²⁴ Osotoapanajanti oanaquequea ocantapojaquero iniro:

—Iinani, ¿taaquea opaji namanaqueri?

Iroatimpa ocanqueroquea:

—Iroguentiquea pamanaqueri iguito Joanca Viñacajatantatsica.

²⁵ Iroatimpa oitsitanacaquea oquijitsitanaja ichoocaquegueti majirontatsica Erorishi, ocanqueriquea:

—Iroguenti noninque pojocacotsitenaro imaica iguito Joanca Viñacajatantatsica shi-mencoqui.

²⁶ Ariquea icotanaca iriatimpa ishimampojancanaca, cotanquitsiquea iroorijite ican-queroquea, aisa iquemajiaqueri maasanopae icajemajiaqueca, tee irinintenica incantero: “Aato.” ²⁷ Irootarite itigarancantsitancacarica coareta iroanaque ontaniqui isantanat-acojitaquerigueti Joanca iramacoqueroquea iguito. ²⁸ Yoanaquequea ijitorejiaquitiri santanaqui iroompaquea yamacoquenero yojocacopojaquenero, irooqueate oguipit-socacoqueneroquea iniro. ²⁹ Oraquea iquemacojiaquerigueti itsatacaanejia Joanca, icoraquetashijajiri yaajianajiro itsino iquitajajiro.

Ishecatacaajiacari Jesoshi 5,000 shirampari

(Mt. 14.13-21; Irc. 9.10-17; Jn. 6.1-14)

³⁰ Iroompaquea icoraquecoraqueitaji itigarancanejia Jesoshi itsipatsipaipojajari ica-mampojiri maasanopae yantaguetaquitica ontaniqui aisa maasanopae itsatacaantague-taquitica. ³¹ Cotanquitsiquea coraquecoraqueitanatsiquea icaramirincavaeque caquin-tejia, itsipapae yoayoaitanaji, teequeate iragavejajiguempaji Jesoshi irishecajiguempaji. Irootaquequea icantantacarica Jesoshi itigarancanejia:

—Jame ontaniqui osamani teeguete inchoocateji caquinte, pimagoremagoreipojaque-quea. Aviguentijia nontsipatsipaitanaquempacca, aatojate yoayoaititsija itsipapae.

³² Ariquea Jesoshi itsipatsipaitanacari itehiteitanacaquea quenajarontsiqui yoayoai-tanaquequea. ³³ Cotanquitsiquea irooquea yoayoavetanacaquea yamenajiaqueriquea itsipa caquintejia itsajiaqueri. Yoayoaitanaquequea iriatimpajia, aisa yanijijianaque iriquetica arejerejeitanquitsi. ³⁴ Iroompaquea itsinampijaatacojiapojaca. Irooquea yani-jirejavetanaca Jesoshi yamenajiaipojiriquea icaramirincajiaque caquintejia, ipintsataco-jianacariquea maasano, yamenajiaqueriquea aparo yapintajia yatsipevaejiaqueate quempejiaca oveja teeca inchoocateji quempoguijajiguerineca, ariquea iparianacar-quea itsatacaaguetapojiri. ³⁵ Imaicaquea ijaguitevaetanaji catsirincaiteri, iquempe-jiquempejiitanacariquea itsatacaanejia icanqueri:

—Jac jaguitevaetanaji catsirincaiteri. Ocaniquiquea ocaniqui teequea quericaca choocatatsineca, ³⁶ iroosacanica pintigarancajajeri maasano irirajia iroaroaitanaje-tajate ontaniqui guinteninintsipaequi irooshitacoguetanquitsica cameetsanijite irive-garajiaquenijite ishecajia irishecajiaquempanijite. Ocaniquiquea ocaniqui teetarite onchoocateji taaqueate irishecajiaquempacca.

³⁷ Cotanquitsiquea Jesoshi icanqueriquea:

—Pojocajigueneritsija aviatimpajia irishecajiaquempaca.

Iriatimpajia icanqueriquea:

—¿Arimpate pininque noanoaitanaque novegarajiaquiteneri irashijia maasano irishecajiaquempaca? Ovegaravaecatari 200 tenario.[§]

³⁸ Ariquea icanqueriquea Jesoshi:

—¿Quero ocarashequiaque pan pashijia? Iintsija poapoaitanaque pamenajiaquitero-jate querocaca ocarashequiavaeque.

Ariquea yoayoaitanaquequea yamenajiaquitiro, iroompaquea icoraquecoraqueitaji icantajiapojiri:

—Chooa 5, aisa shima mavipaquite.

³⁹ Icanqueriquea Jesoshi:

—Iintsija pincantajigueriquea maasano irisavisaviitaquequea janamaroncaroqui cataro, ariquea pomporoguijaguequeriquea.

⁴⁰ Iriatimpajia isavisaviiquequea iconoajia yomporoguijajia 100, itsipapae icarajiaque 50. ⁴¹ Iroompaquea iriraquea Jesoshi yajiricajiaquero pan caratanquitsica 5 aisa mavipaquite shima, ipaguitetanaqueroquea inquite yamanaqueriquea Aapani Irioshi, icantaqueri: “Arioteesaa.”

Ariquea icotarejaquero pan, yojocajiaqueneri itsatacaanejia, irioquea gaavaqueneri yojocajiaqueneri maasano. Ariquea iquempetacaacariquea shima iriatimpa.

⁴² Ariquea ishecajia maasano iquemajianaca. ⁴³ Iroompaquea iriraquea itsatacaanejia icapiocajajiro choocatajatsica pan aisa shima, itetajiro cantiriqui tseraiquipae ocaratacovaetaji 12. ⁴⁴ Icaramirincajiaque 5,000 shiramparjia quenquevarijia shecajianquitsica.

Yanijijatanaquero Jesoshi ojenoquiijaare iniromotijaqui

(Mt. 14.22-27; Jn. 6.16-21)

⁴⁵ Ariquea itigarancajiaqueriquea Jesoshi itsatacaanejia icantajianajiri intejianajempaquea quenajaronsiqui irijivajianaje irimontejacojianajempaquea intatiqueroqui Vetsairaqui. Icantanajiri capiocajianquitsica iroaroaitanaje.

⁴⁶ Ariquea yoayoaitanajiquea maasano, iriatimpa yoanaquequea otsempiqui iramaneri Iriri. ⁴⁷ Oraquea opitsecanajiguetei iriraquea itsatacaanejia niganquijatacovaetanajiquea. Ichooaque Jesoshi apaniro quepatsiqui. ⁴⁸ Iriatimpa yamenacotsijia-avacariquea ipanquenanjiaacaró ivetincajajiaquero imagojianaquequea, ochovigagui-tevaetanaquetari choviga jeoc jeoc, oguipiguiyacovaetanaqueriquea. Iroompaquea omancharejaguitetanajatiga savincaguiteri icoraquepoji yanijijatapojiro jenoquiija iniro-motijaqui iravisajianaquerime. ⁴⁹ Iriraquea itsatacaanejia yamenitsijiavacariquea yanijijatapojiro ojenoquiijaare, ijiqueriji sashinti, icajemajianaquequea. ⁵⁰ Maasanoquea yamenajiaqueri itsaroajianaque, cotanquitsiquea iriatimpa icanqueriquea:

—Pintampishishirentajianaque. Naroguenti, aatoquea pitsaroajiguitsi.

⁵¹ Ariquea itetanaja iconoapojajari, ariquea ocotanaja choviga jac santiconi. Iri-atimpajia yamenamenaitanaquequea intati. ⁵² Yamenajiavecaroqueate incajaranquiqui yoshequiaquerogueti pan, cotanquitsiquea teequea intsajigueji queroquea icocaniquea iriatimpa yagavejavaequeguetiquea maasanopae, manaquea iquishoshirentanaquequea.

Jesoshi yogueshiquetajiriquea ashinoncajajianquitsica Jenesarequitica

(Mt. 14.34-36)

⁵³ Iroompaquea imontejacojianajaquea intatiqueroqui yarejejiapojajaro Jenesarequi, yagatacojiapojaji. ⁵⁴ Yanijirejajianaquequea, maasanojia itsajiaquakeriquea iriguenti Jesoshi. ⁵⁵ Jero yoayoaitantajianacaca ishiashiaitanacaquea itsitacaguitejavae-tanaquero yaacojiaquitiri ashinoncajajianquitsica, yaajianaqueneriquea irogueshiguetajeri. ⁵⁶ Querocagueti oraniqui iquenaguetanaque Jesoshi guinteninintspaequi chaajaniquiguetanquitsica, iniroguetanquitsica, jero aisa iniganquitejirepaequi, yaacotsijitanacariquea ashinoncajaguetanquitsica yoguisavicajiqueri oraniqui quenavo-quirontsiqui. Icantajiaqueri:

§ 6:37 Iriraquea tenario irio imentaquitsite Iromaquitica. Iramiteriguetei itsipa apajencaro savincaguiteri irivegarataqueri aparo tenario. Iramiteriguetei 8 taai irivegarataqueri 200 tenario.

—Intsishiatsi, Nomajirote, noninque inchagatsijivetavaquempiro oshipaquijaniquiqui piitsaare.

Maasanopaetari chagatsijiaquerica ipeaguetanaja.

7

Jesoshi itsatacajiaaqueriquea itsatacaanejia taaca opajitapae coguishetantatsica
(Mt. 15.1-20)

¹ Iroompaquea icoraquecoraqueiquequea pariseojia aisa tsatacaantajiguiroca itioncacotanaqueca Moishishini, iquenaquenaipojiquea Jerosarequi, icapioaventajiapojacari Jesoshi. ² Yamenajiapojiriquea itsatacaanejia iconoagarantajiacaquea teequea irinetsanajigueroji yamejiacaca, mana ishecashecaica intati teequea inquivacomajajiguempaji, yamenajiavecaroquea ocoguishequeri yajiricajiaqueca. ³ (Irirajia pariseojia aisa maasanopae itsipajia joriojia yoguijatacojiaqueriquea choviquijianaquerica, aatogueti iquivacomajataquea aatojate ishecajiatsi. ⁴ Aisa yoayoaitigueti yojocantaguetirogueti taaca opajitapae ishecajiguetaacaca icoraquecoraqueitaji iquivaquivaipoja. Aatogueti iquivaquivaitatsi, aatoquea ishecashecaitatsi. Aisa taaca opajitapae yoguijatacojiaqueri choviquijianaquerica coramani, iquivajiguiroquea ichovintyoriquitepae, igatsantsanaquiritepae, cavorejanaquiripae, aisa inorijantacaca.) ⁵ Iroompaquea iriraquea pariseojia aisa tsatacaantajiguiroca itioncacotanaqueca Moishishini icanqueriquea Jesoshi:

—¿Querocaquea icojiacani pitsatacaanejia teequea iroguijatacojigueriji choviquijianacajica inquivacomajajiaquempa? Mana ishecatacojiacaroquea iraco ocoguishejiaquerigueti yajiricajiaqueca.

⁶ Iriatimpa icanqueriquea:

—Itampaticamajataqueroquea tsavetantatsica Isaiashini itioncacojianaquempigueti coramani aviatimpajia cameetsatamampeajiatsica, icanquequea:

‘Iricatica caquinteja ishinetsarentavequena,
cotanquitsiquea manaquea ichoocashirentavaetaque osamani.

⁷ Itsarovementamampejiaavetaquenaquea,
cotanquitsiquea itsatacaantajiguica iroguenti icantajiguica caquinteja irinetsanajiquea.’

⁸ Aviatimpajia pojocajianajiroquea icanqueca Aapani Irioshi, iroguentiquea quisho poamajajiaque itsatacaantajiguica choviquijianaquempica.

⁹ Icanqueriquea aisa:

—Caavijiquea piticaarejiaquero icanqueca Aapani Irioshi cameetsanijite poguijatacojiajeronijite pamejigaca aviatimpajia. ¹⁰ Pamenamajiavecaroquea icanqueca Moishishini: ‘Pinquemisantamajiaquerijate piri aisa piniro, aatoquea pipigatsajigaritsija.’ Icanque aisa: ‘Irraquea tsavejencatirica iriri irooca iriniro irimetojitsijitempari.’

¹¹ Cotanquitsiquea aviatimpajia manaquea picantashitatijiaqueroquea, picantapinijiaque cameetsavaeque shirampari incanqueri iriri irooca iriniro: ‘Aatoquea nagavejitsi nojocaquempi picoguitejacoqueca, irooriji maasanopae nojocaquempimeca iroguentiquea corova.’ (Oraquea corova ocanque: ‘Nojocashiquenemparica Aapani Irioshi’).

¹² Incanquerigueti iroguenti corova, aviatimpajia picanquequea aatoja yojoquiniritsija iriri irooca iriniro, aatoja icavintsajajigui. ¹³ Piquempejiaquerigueti imaica iroguentiquea povashiantajianaquero icanqueca Aapani Irioshi, irooquea poguijatacojianaque itsatacaantajiaqueca pivaesatiniteni. Cotanquitsiquea teetarite aparoquea onchoocateji ocatita, pantajiaquequea otsipapae quejecaroca.

¹⁴ Ariquea icajemajiaqueri aisa maasanopae, icapiocajiaqueriquea icanqueri:

—Pinquemisantamajiaavaquenaja maasano aviatimpajia, pintsajiaquero noncamanquempica. ¹⁵ Taaca opajitapae sotsiquitica quijanquitsineca ivagantequi caquinte aatoquea ocovaeguisheshirentiri. Oraquea sotoanquitsineca iriatimpaqui, irootaquequea covaeguisheterineca. ¹⁶ Choocagueti piguempita pinquemantavaquempaca, pinquemeja.

¹⁷ Ariquea yojocapanajantiri maasano iquijanaquequea tsovironaqui. Iriaquea itsatacaanejia icanqueriquea:

—¿Taaquea piquempetacaaca incajaranqui?

¹⁸ Iriatimpa icanqueriquea:

—¿Teetarite pinquemajiguenaji aviatimpajia aisa? ¿Arimpate teesacanica pinquemajiguenaji nocanquegueti taaca opajitapae sotsiquitica quijanquitsineca ivagantequi caquinte aatotarite ocovaeguishetiritsi? ¹⁹ Teetarite ariquea ogueji shecatsi shiretsiqui, manaquea otehoteitapojaca tsicotontsiqui mana irishitacojitajero.

Iroguentiquea icantajiaqueri imaica cameetsanijite intsajiaquenijite maasanopae ishecajiguetaacaca teetarite oncovaeguishetacaanteji. ²⁰ Icanqueriquea aisa:

—Oraquea sotoapojirica caquinte, irootaquequea covaeguishetaquerica. ²¹ Oraquea intsompoguiqui shiretsiqui ariquate oquenapoji taaca opajitapae covaeguisherentsipae: iquenquejaguishejigui, yoashijiguiro manquigarentsi tequeratatirajaca irimanquigajitemparo, yaitsitantajigui, imetojantajigui, yoashijiguiro manquigarentsijia imanquigajitacaca, ²² inintsigueteriquea yashintaguecaca itsipapae, isavicaventajiguiro covaeeguisherentsi, yamatavijantajigui, teequea irinejashitemparoji manquigarentsi, icatsimatimentiriquea igonoropae yamenaqueguetiquea caaviji yagavejavaequequea, iquenquetsaguishetantajigui, yaventacojiacaquea, teequea intsajigueji incomajamajajiguempaji. ²³ Maasanopae oatica ipeacaaguishejiguetaacaca manaquea oquenapojiquea shiretsiqui, irootaquequea covaeguishetantantquitsica.

Aventanjari Jesoshi manquigarentsi Shiropenishiaquitica
(Mt. 15.21-28)

²⁴ Ariquea yoanajiquea Jesoshi irooshitacoquero Tiro aisa Shirone ariquea iquijapoji tsovironaqui, teequea irinintavetempaji inquemacojiterime, cotanquitsiquea teequea iragavejeji iromanacotempaji. ²⁵ Ariquea ochoocaque aparo manquigarentsi choocatanquitsica orijanite tequeratatiraja onquenquevaroteji, ishaquiacaroquea ampatsini. Iroompaqueate oquemacoqueriguetei Jesoshi oanaquequea amenavaqueri. Ocoraquepojiquea ogueroventapojacari. ²⁶ Oraquea manquigarentsi iroguentiquea guiriego, ovoguiquea Shiropenishiaqui. Ocantapojiaqueri iroguisotoacoventajero orijanite ishaquiaca ampatsini. ²⁷ Cotanquitsiquea Jesoshi icanqueroquea:

—Iriquetitaquea shecamajatanquitsine chaajaniquipaetirajaca. Teequea oncameetateji aapitsateri chaajaniquirijia isheca, ojoquitenempari ishiishitepae.*

²⁸ Iroatimpa ocanqueriquea:

—Arimajaca, Nomajirote, cotanquitsiquea shiishi iramenajigueriguetei irishecajiguempaguetei chaajaniquiripae iroguijavaqueroquea isaviji shitaponcarontsiqui irishecatsopequiguetaquemparoquea otsopequi.

²⁹ Iriatimpa icanqueroquea:

—Pitampaticamajataqueroquea. Imaica iintsijate poanaje, jac sotoanajiquea ampatsini shaquiavecaroca porijanite.

³⁰ Oanajiquea, arejevempojaja otsovironaquitequi amenapojajiroquea orijanite norijaca omencorequi omaantacaca, teequea irishaquijajemparojiquea ampatsini, jac sotoanajiquea.

Jesoshi iquemacajairiquea teeca inquemavetempaji

³¹ Yoanajiquea Jesoshi isotoantanajaroquea ichooaqueguetei irooshitacoquero Tiro, icantanajaquea Shironequi aisa Tecaporishiqui, yarejevaetajaquea iniromotijajui Garirea. ³² Iroompaquea yaajianaqueneriquea shirampari carenisamaitori, aisa teeca inquenquetsamajavetempaji, icantajiaqueri impamijiaqueriquea.

* 7:27 Aapani Irioshi itigaranquimentaqueri Jesoshi incoraqueashijiaqueri ishiraerijia. Iriquetimeguetei incavintsa-jajiaque me teeca irijorijogueji, onquempevetaquempame yaapitsajitiriguetei isheca chaajaniquirijia irojoquitenempariguetei shiishipae.

³³ Iriaquea Jesoshi itsipatanacariquea tijai teegueti inchoocajigueji tirorencashiji-acarica, ariquea yoguijaachapaquitsitaro iguempitaqui, aisa ijavachapaquitsita ichagatsiqueri inenequi. ³⁴ Ariquea ipaguitetanaquero inquitequi yaajencataquiti icanqueri: “¡Efata!” (oncanquequea: “¡Pishepirejanajempa!”)

³⁵ Irooqueea icanquerigueti ariquea icotanaja ishepirejacotanaja, aisa itsirecarejanenetanaja iquenquetsamajatanaji. ³⁶ Iroompaqueea icantajiavecari Jesoshi maasano: “Aatoja picamantitsi.” Cotanquitsiquea arimpate itsavetantajianaqueroqueea. ³⁷ Yamenamenaitanaquequeea intati maasano icantajianaque: “Maasanoqueea yantaqueca cameetsavaeque, iquemacajaiaqueriquea teeca inquemavetempaji aisa inijacajairiquea macanavetatsica.”

8

Jesoshi yoshequiavaequeroqueea pan, ishecatacajiacari 4,000 shirampari
(Mt. 15.32-39)

¹ Iroompaqueea yomporoguijaventajiapojacariquea Jesoshi icaramirincavaeque caquinteja, icocaniquea isavicaventajiaqueri, niganquiquea iteroncacojianaca ishecacia, taampate irishecaciaquempaca. Ariquea icajemajiaqueriquea itsatacaaneja icanqueri:

² —Nopintsatacojianacariquea irirajia, namenaquequeate isavicaventajiaquenaqueea ocانىقى 3 savincaguiteri, niganquiquea iteroncacojianaca ishecacia. Imaicaqueea imaica teequeea onchoocateji taampaqueate irishecaciaquempaca. ³ Ariguetei nontigarancjia-avetajempari iroaroaitanaje itsovironaquitequi aajiavaquerinishiatsi itaseane quenavou-quirontsiqui, iconoagarantajiaquea iquenaquenaivaepoji jmm osamani.

⁴ Iroompaqueea icanqueriquea itsatacaaneja:

—Ocaniquiquea teequeea quericaca guintenitantemparone. ¿Ariquea querocampate iraajiqueroqueea ocانىقى pan irojocajiaquenerica irishecaciaquempaca maasano inquemantajianaquempacate?

⁵ Icanqueriquea iriatimpa:

—¿Querocaquea ocarashequiaqueni pan choocatanquitsica?

Icanqueriquea:

—Ocarati 7.

⁶ Iroompaqueea Jesoshi icantajiaqueri maasano irisavisaviitaquequeea quepatsiqui. Yajiricajiaquero pan caratanquitsica 7, icantacovenquero: “Arioteesa.” Ariquea icotarejaqueroqueea yojocajiaqueneri itsatacaaneja, irioqueate jocajiaqueneriquea maasano. ⁷ Ariquea chooca aisa mavipaqui janiquipaete shima. Iriaquea Jesoshi icantacovenqueri: “Arioteesa”, iroompaqueea icantajiaqueri itsatacaaneja irojocajiaqueneriquea maasano. ⁸ Ishecajiaquea maasanoja, iquemajianaca. Oraqueea choocatapojajatsica iteguetajiroqueea itsatacaaneja cantiriqui, ocaratacovaetaji 7. ⁹ Maasano shirampari-ja shecajianquitsica icaramirincavaeque 4,000. Iroompaqueea Jesoshi itigarancjiajiri iroaroaitanajeta. ¹⁰ Iriatimpa itetanajaro quenajarontsi, itsipatsipaitanajari itsatacaane-ja, yoajianaquequeea irooshitacoquero Tarimanota.*

Iriaquea pariseojia icantajiavecari Jesoshi ironigaajiaquerime oacaantantatsica intati
(Mt. 16.1-4; Irc. 12.54-56)

¹¹ Ariquea icoraquecoraqueitashipojiriquea pariseojia iramentajiguempari, ican- tantajiapojacarica ironigaajiaqueri oacaantantatsica intati onquenantapojemparoja on- tانىقى jenoqui inquitequi. ¹² Iriaquea Jesoshi yaajencataquitiquea icanque:

—¿Querocaquea icojiacani choocajatsica imaica inintantajiacaca ironigaajiaqueri oa- caantantatsica intati? Arimaja noncantajiaquempi aatotari nonigaajiguiniritsi.

¹³ Ariquea itsinampirejajianajiri, itetanajaroqueea quenajarontsiqui, imontemonteitanajaquea intatiqueroqui.

Jesoshi itsavetacotsitaqueri itsatacaantane pariseojia iquempetacaacaro anempoacaguiroca
pan
(Mt. 16.5-12)

* 8:10 Oraqueea Tarimanota irooshitacoquero Magarara.

¹⁴ Irirajia itsatacaanejia ipeacojianacaroquea pan irajaianaqueme irishecajianquem-pameca, aparoca ochoocaque quenajarontsiqui. ¹⁵ Iriraquea Jesoshi icanquequea:

—Aviatimpajia inchiquiojitaja pishecatacojigarotsi anempoacaguiroca pan irashijia pariseojia aisa Erorishi.

¹⁶ Irooquee iquemajiavaquerogueti iquenquetsatavacaajianaca, icanque:

—Manatarite yamenajiacajiquea teetarite amejji pan, jero icantantajiacaca imaica.

¹⁷ Iriraquea Jesoshi yamenajivaquerigueti iquenquetsatavacaajianaca, icantsitariquea:

—¿Querocaquea ocoani piquenquetsatocotantajiacaroca pan, picanquequea manatarite namenaquempi teequea pameji pan? ¿Arimpate tequerata pinquemajigueji? ¿Tequerata pintsajigueji? ¿Ari quishoshirentajiaquempi? ¹⁸ Ochoocavecaquea poquijajia, ¿teequea pamentajiguemparoji? Aisa piguempita, ochoocajivecaquea ¿teequea pinquemantajiguemparoji? ¿Teequea pinquenquejajiajeji? ¹⁹ Nocotarejaguequerogueti 5 pan, noshecatacaajiacari 5,000 shiramparijia, ariquea picapiocajiajiroquea choocatajatsica, ¿querocaquea ocarashequiavaetajini cantiripae pitseraiquijiajiro?

Iriatimpajia icanquequea:

—Ocaratacovaetaji 12.

²⁰ —Oquejetacaquea aisa ocaratacovecagueti pan 7, nocotarejaguequeneri 4,000 shirampari, iroompaquea pavijiguetajirogueti choocatajatsica, ¿querocaca ocarashequiavaetajini cantiripae pitseraiquijiajiro?

Icanqueriquea:

—Ocaratacotaji 7.

²¹ Ariquea Jesoshi icanqueriquea:

—¿Tequeratampate pinquemajigueji?

Jesoshi yamenacajairi shamponcajari Vetsairaqui

²² Ariquea yarejerejeitapojaca Vetsairaqui. Yamajitapojiniri shamponcajari, icantajitapojiri impamiteri. ²³ Iriraquea Jesoshi yacatsavacotapanajantiri shamponcajari itsipatanacari ocaraguepojigueti tsovironaquipae. Iquishoajatsitari iroquijaqui, imavitepacotashitanacari ipamitaqueri icanqueriquea:

—¿Ari pamenaji?

²⁴ Yamenaveca icanque:

—Namenaguevecari caquinteja, iquempejiavecaro inchato, cotanquitsi yanijinijitanaque.

²⁵ Iquejetsitajariquea aisa imavitepacotashitanajari ipamijaquitsitajari iroquijaqui, iroompa icampanajanta jac amenamajatanaji, peamajatanaja, conijamajatanaji maasanopae. ²⁶ Ariquea Jesoshi itigarancajiri itsovironaquitequi icantavaqueri:

—Aatoja poapanajantitsi guinteninintsiqui, picamantacotanatsi.

Peerero icanque Jesoshi iriguenti Quirishitotatsica

(Mt. 16.13-20; Irc. 9.18-21)

²⁷ Ariquea yoanaquequea Jesoshi guinteninintsipaequi irooshitacoguetaqueroca guinteninintsi pajitatsica Sesarea Piripo, itsipatsipaitanacari itsatacaanejia. Oraquea quenavoiroquirontsiqui icoacojiaqueri:

—¿Taa ipaji ijijiaquena caquinteja? ¿Quero icantajiguini?

²⁸ Iriatimpajia icanqueri:

—Iconoagarantajiacaca icantacojiaquempi: 'Iriguenti Joancani Viñacajatantatsica.' Itsipa cantajiananquitsica: 'Iriguenti Iriashini.' Itsipaquea cantajiananquitsica: 'Iriguenti itsipa tsavetantatsicani.'

²⁹ Ariquea icanqueriquea:

—Aviatimpajia, ¿quero picantajiguini? ¿Taa nonaque naatimpa?

Icantsitanaca Peerero:

—Aviguenti Quirishitotatsica.†

³⁰ Icanqueriquea:

—Aatojate picamantacotanatsi.

Jesoshi icamantsicaro irimetojaque

(Mt. 16.21-28; Irc. 9.22-27)

³¹ Ariquea Jesoshi iparianacaroquea itsatacajiaqueriquea itsatacaanejia irantsipevae-
quempaqueea irira Irijanite Caquinte. Irimanintajiaqueriquea jivajiatsica, saserorotejia
anaantajanquitsica aisa tsatacaantajiguiroca itioncacotanaqueca Moishishini. Ariquea
irimetojajiqueri, cotanquitsiquea aapojajempagueti 3 savincaguiteri impochatanaje.

³² Yoguiconejamajataqueneri. Irooquea iquemaquegueti Peerero itsipatanacari tijjai
icantomajitsivetari. ³³ Cotanquitsiquea Jesoshi ipitsocanaca yamenanaqueri itsata-
caanejia, ariqueea icantomajitsitari Peerero, icantsitari:

—¡Poanaqueshinete, Satanashi! Teetarite pinquenquejacomajateroji inintaguequeca
Aapani Irioshi, iroguentiquea piquenquejacoguequequea iquenquejaguetica caquinte.

³⁴ Ariquea icajemajajiri omporoguijajianquitsica oraniqui aisa itsatacaanejia ican-
queriquea:

—Quericaca nintanquitsineca iroguijatacoquena irovashiantanaqueroja
inintashiguevetacaca iriatimpa, irinatashitapiniquempa inchapoa irompajacotanta-
jiquemparica, mananiji iroguijatacoquena. ³⁵ Quericaca teeca irininteji irantsipeventena
irooca irimetojavenquena, manaquea impeaquempa; cotanquitsiquea iriraqueea
atsipevenquenanece aisa irantsipevenquemparogueti Quenquetsatsarentsi Ogane-
jencatatsica tsavetantaquenaca irooca irimetojavenquenaqueea, incoquempaniquea
inchoocaguiteni. ³⁶ Arigueti inchoocavetaquempa agavejanquitsineca irashinquemparo
maasanopae quepatsipaequitica, cotanquitsiquea oncoramanitapojajegueti
irimetojanajegueti arigueti impeaquempa camorecariqui, ¿arimpate agavejaque
irajaararo aavajeri? Aatoqueea agavejitsi. ³⁷ Irashintamajavequemparoquea
maasanopae, cotanquitsiquea aatoqueea yagavejitsi irivegaraventavaquempa aatonijite
yoguitsi camorecariqui. ³⁸ Quericaca pashiventacaaquenanece naatimpa aisa
nocantaguequeca inchoocatimojiaquerigueti caquintejea caarica quisho oamajatiri
Irioshimajaca, irirajia covaeguisherijia, ari inquejetaquempaqueea irira Irijanite
Caquinte impashiventacaapojajuempariquea iriatimpa oncoramanitapojajegueti
incoraquetajegueti. Iroganejencapojajempaqueea, inquempetapojajempari Iriri,
intspatsipaitapojajempari ashivantijite comajashirentanquitsica.

9

¹ Aisa icanqueriquea:

—Noncanquempija arimajaguitatsi iconoagarantaca catintiitimojiaquenaca imaica,
aato imetoji tequeratagueti iramene quero icotani Aapani Irioshi imajirontagueti,
ironigaimojiaqueriquea iragavejane.

Jesoshi icantashitatiimojiacariqueea itsatacaanepae

(Mt. 17.1-13; Irc. 9.28-36)

² Ariquea anaanajagueti 6 savincaguiteri iriraqueea Jesoshi yoanaque ontaniqui otsem-
piquei yagatsonquivaetanaquequeea osamani. Iriquentiquea itsipatsipaitanaca Peerero,
Santiago aisa Joanca. Tee inchoocateji itsipajia. Iroompaqueea taampina iriatimpajia
yamenitsijigariqueea Jesoshi icantashitatiimojianacariqueea. ³ Ariquea ocotanaca iitsaare
ocavorejatanaquequeea ocantashitatanaca tsiren oquitamaromajatanaquequeea ocanca
quempetacaqueate oquitamarotigueti sharaca, tequeea iramenimajiteroji quitsaarentsi
oguitamaroca yajacajitirogueti acaniqui quepatsiqui onquempetaquempari iroatimpa.

⁴ Yamenitsijigari Iriashini aisa Moishishini itsipatsipaitacari Jesoshi iquenquetsatava-
caajia. ⁵ Irira Peerero icanqueriquea Jesoshi:

† 8:29 Quirishitotatsica. Iguenquetsatsarequi guiriegojia icanquegueti Christos (Quirishito) manaquea ocanque
“Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa
imajirojiate irooca isaserorotejiate. Irira Quirishito iriotaquequeea itsavetacotsitacaca tsavetantajiatatsica coramanitica
intigarancaque Aapani Irioshi impeaquempaniji Imajirojiate maasano.

—Tsatacaantantsica, cameetsavaeque achoocajiaque ocaniqui. Intsishiatsi nompeacaguempaja 3 catisetarentsi, aparo pashinquempa aviatimpa, aparo irashinquempa Moishishi, otsipaquea irashinquempa Iriashi.

⁶ Teetarite intsateji querocaca incanquemeca, mana itsaroajianaquetari.

⁷ Iroompaquea omararotacojiapojajiri, ariquea iquenquetsajencajitanaque omararosecanquegueti icanque:

—Iricatica irio Irijani, nopintsamajatacaca. Pinquemisantamajajiguerija.

⁸ Ariquea yamenitsijiavetaja aisa cajaraguiteni, aparo icatiaja Jesoshi. ⁹ Ariquea icoraquecoraqueitaji yoguirincajiaja, iriraquea Jesoshi icanqueriquea:

—Aatotaja quericaca picamantitsi oratica pamenajiaqueca imaica. Intancorejana-jegueti Irijanite Caquinte irimetojavetaquempagueti, ariquea pintsavetacotsijiguem-paroquee.

¹⁰ Iriatimpaja teequea quericaca incamanteji, manaquea icantavacaajiaca:

—¿Oraquea icanquegueti: ‘intancorejanajegueti Irijanite Caquinte irimetojavetaque-mpagueti’, taaquea icantacotaque?

¹¹ Ariquea icoacotsijijaari Jesoshi:

—¿Quero ocotacani icantantacaca tsatacaantajiguiroca itioncacotanaqueca Moishishini icantajiaquegueti iriquetitaquea coraquetajatsine Iriashini?

¹² Iriatimpa icanquequea:

—Arimajaca ocanque Itioncacaantaqueca Aapani Irioshi iriquetitaquea coraquetajatsine Iriashini, irinetsanaguequeroquee maasano. Cotanquitsiquea oraquee itioncacojiquerigueti Irijanite Caquinte, ¿queroquee ococani ocanquegueti irantsipevaequem-paquea, aisa incatsimajiqueriquea? ¹³ Imaica noncamanquempi jac icoraquetaquiti Iriashini, cotanquitsiquea mana yantaguishejitaqueri maasano inintajitaqueca. Ariquea ocanque Itioncacaantaqueca Aapani Irioshi coramani itsavetsijitaroni.

Jesoshi yogueshitajiri chaajaniquitirajaca, yoguisotoajiniri ampatsini

(Mt. 17.14-21; Irc. 9.37-43)

¹⁴ Ariquea yarejerejeipojaja ichoocajiaquegueti itsipajia itsatacaanejia, yamena-jiapojajiri yomporoguijaventajari, aisa ichoocajiaque oraniqui tsatacaantajiguiroca itioncacotanaqueca Moishishini itsipatsipaicariquea iquenquetsatavacaajiaca, irooquee icanque irooquee icanque. ¹⁵ Yamenitsijiavajariquee icoraquepojaji Jesoshi ariquea icojianaca yamenamenaitanaquequea intati. Maasanojia itacorojaianaca iquenquetsatacaajiavajiri. ¹⁶ Iriatimpa icanqueriquea:

—¿Taaquea piquenquetsaventajiaqueca?

¹⁷ Iquenquetsatanaquequea aparo, icanqueri:

—Tsatacaantantsica, namavequempiri irijani ishaquiacaca ampatsini, imacanat-acaqueri. ¹⁸ Querocagueti ichoocaqueni yaacotapojaquerigueti ariquea ipijempeja-caacari ishimotyonajavaetanaque, yatsicayajitanaca, iroompaquea aratsiquijini. Nocantajiavecari pitsatacaanejia iroguisotojaiaquerime, cotanquitsiquea teequea iragaveja-jigueriji.

¹⁹ Icantanaquequea Jesoshi:

—¡Arisa picomirincajiga teequea paventemparoji iragavejane Aapani Irioshi! ¿Querocaquea oncarashequiavaeteni nosavicaventajiaquempi? ¿Queroca oncarashequiavaeteni nantsipetacojiaquempiquea? Iroosacanica iintsija pamajiaquenarijate ocaniqui.

²⁰ Yaajianaqueneriquea. Iriraquea ampatsini yamenavaquerigueti Jesoshi, ariquea icotanaca icantacaanaqueri tinquininini, ariquea itejanaquequea isavi quepatsiqui, itigaritigarivaetanaca tigaririri tigariri, ishimotyonajavaetanaque. ²¹ Iriraquea Jesoshi icanqueriquea iriri:

—¿Querocaquea ocaratanaqueni yajagantsitacotaca ishaquiacarigueti ampatsini?

Iriatimpa icanque:

—Jac yoshequiacovaetanaquequea, ishaquiitsitacaritarite coramani chaajaniquiti-rajagueti. ²² Oconoaca manaquea yomposacaacariquee paamaripoquiqui, oconoaca

yomposacaacari ojaaquiniqui irimetojaquerime. Imaicaquea arigueti pagavejaque aviatimpa, iintsija pimpintsatacojiguenashiatsi pamicacotenarishiatsi.

²³ Icanqueriquea Jesoshi:

—¿Queroquea ocoani picanquenaquea: ‘Arigueti pagavejaque’? Quericaca aventamajaquemparineca Aapani Irioshi iragavejaqueroquea maasano.

²⁴ Iririjencavaetanaque iriri chaajaniquiri, icanque:

—Naventavecariqueate. Pagavejacaguenaja naventamajataquemparinijite.

²⁵ Ariquea Jesoshi yamenajivaquerigueti ishiashiaitashipojacari icamirincavaeque caquinteja, icantomajitsitari ampatsini, icanqueri:

—Aviguenti cotacaacari, teeca inquemantempaji aisa teeca inquenquetsatantempaji. Imaicaquea noncanquempi pisotoanajerijate, povashiantanajerija iricatica, aatoquea picoraquetimatajitsi pishaquiajempari.

²⁶ Iriiraquea ampatsini ariquea icotanaca icajemanaquequea jeeee, icantacaanaqueri tinquininini, isotoapanajantiri yovashiantanajiri joquijitsantsataca quempeniquea ime-tojaque, iconoajiacaquea icantantajiacaca:

—Metojaque.

²⁷ Cotanquitsiquea Jesoshi yacatsavacoqueriquea yoguitinajaqueri, ariquea icotanaja icatianaja. ²⁸ Ariquea yoanaji Jesoshi tsovironaqui, itsipatsipaitanajari itsatacaaneja, iriguenti choocajajatsi, icoacotsijapojajari:

—¿Querote ocoani naatimpajia caarica nagavejantajigari noguisotoitajigueriji?

²⁹ Iriatimpa icanqueriquea:

—Iriiraquea ampatsini quempeparica imaica aatogueti iroquetitaquea pamanajiguir-itsi Aapani Irioshi aisa aatogueti pisanticotiro pisheca,* aatoquea pagavejimajiguitsi poguisotojiaqueri.

Jesoshi icamantsitajariquea irimetojaque

(Mt. 17.22-23; Irc. 9.43-45)

³⁰ Ariquea yoanaji Jesoshi icantanaca Garireaqui. Teequea irininteji iramenajitavaqueri, ³¹ ininquetarite intsatacaajiaqueriquea itsatacaaneja. Ariquea itsatacaajiaqueriquea, icanqueriquea:

—Iriiraquea Irijanite Caquinte iraacaantajiquer, irajaiavaqueri caquinteja, ariquea irimetojiaqueri, cotanquitsiquea aapojajempaguete 3 savincaguiteri intancorejanaje.

³² Iriatimpajia teequea intsajivaqueroji icanqueca, cotanquitsiquea omintsaroanaqueri incoacojiaquerime taa opaji icanque.

Quericaca anaamajatantanquitsineca

(Mt. 18.1-5; Irc. 9.46-48)

³³ Oraquea yarejerejeipojacaguete Caperenaqui yoayoaitanaquequea tsovironaqui, iroompaquea irira Jesoshi icanqueri itsatacaaneja:

—¿Taa opajita picantavaque picantavaque incajaranquítica quenavoquirontsiqui?

³⁴ Cotanquitsiquea iriatimpajia imativicajianaque, yamenajiaquequea iroguenti ican-tavaque icantavaque quericaca caavijica yanaantaque. ³⁵ Iriiraquea Jesoshi isavicanaque-quea, icajemajiaqueri itsatacaaneja carajianquitsica 12, icanqueriquea:

—Quericaguete nintanquitsineca iranaantaque aato yaventacotatsi, inchiqioji iri-atimpa iramijiaqueriquea maasano.

³⁶ Ariquea yaitsitaquea aparato chaajaniquitanquitsica yogatiimojiaqueriquea itsatacaaneja, ariquea yatsomaitsitari icanqueri:

³⁷ —Quericaca shineventavaquemparine chaajaniquiri quempeparica iricatica iroori-jite nonintacaantaquero naatimpa, quempecaqueate naroguentica ishineventavaca. Quericaca shineventavaquenane naatimpa, aatoquea aparato naatimpa ishineventavaca, irioquea aisa irishineventavaquempa tigarancaquenaca.

Quericaca teeca incatsimajaji iroguenti itsipatacaji

(Mt. 10.42; Irc. 9.49-50)

³⁸ Ariquea icanqueri Joanca:

* 9:29 Oconoaca paperi iroquetinica tee oncanteji ocaniqui: aisa aatoguete pisanticotiro pisheca.

—Tsatacaantantsica, chapiniqui namenajiaqueriquea aparo yoguisotoaqueriquea ampatsini, iroguentiquea yaventashicari pivajiro. Cotanquitsiquea naatimpajia nocantimentajiaqueriquea, namenajiaqueriqueate teetarite intsipatsipaitajinica.

³⁹ Icanquequea Jesoshi:

—Imaica aatotarite picantimentajiguiritsi. Quericagueti pamenajiaqueca avenquemparoneca novajiro ironigaantaqueroguetti oacaantantsica intati, iriatimpa aatoquea taampina itsipatavajirotsi incantimanatavajenaquea. ⁴⁰ Quericacatari teeca incatsimataji iroguenti itsipatacaji. ⁴¹ Quericaca cavintsajaquempine jocacotaquempine oja pimiraqueca iroorijite nonintacaantaquero naatimpa, inquenquejaqueguetti: ‘Irioriji irashi Quirishito’, arimaja aato opeapitsatari irinejacotajempa.

Caaviji incatsimatimentamajajiqueri covaeguishedacaantanquitsineca

(Mt. 18.6-9; Irc. 17.1-2)

⁴² “Taacaguetti covaeguishedacaquemparineca aparo chaajaniquiri quejejiacarica iricajia tsarovenatquenanece, incatsimatimentamajajitaqueriquea. Irootaquequea nontsatacaantajiaquempiroca aatonijite iquejejitiritsi imaica, iroquetitamequea intsatotacojiquenerime itsanoqui iniroshimentapiri itononcantajitaca, irajaitanaqueriquea impishoncajatsijitempariquea inirojaniqui quentijani. ⁴³ Nonquejetacaajiaquempiroquea imaica: ariguetti oncovaeguishedacaquempi paco, pincaratsitemparoquea. Cameetsavetaca pimpeaquempa tsatiavacori pichoocatiguetti acaniqui quepatsiqui, aatoniji mavitepacotirajampiguetti ipishoncajitimpi camorecariqui aatoca otsivaquitsi. ⁴⁴ Ontaniquiquea aato imetojitsi igueni aisa aato otsivaquitsi paamari. ⁴⁵ Aisa irooguetti covaeguishedacaquempine piguiti, pincaratsitemparoquea. Cameetsavetaca pimpeaquempa tsatiaguitiri pichoocatiguetti acaniqui quepatsiqui, aatoniji maviteguititirajampiguetti ipishoncajitimpi camorecariqui. ⁴⁶ Ontaniquiquea aato imetojitsi igueni aisa aato otsivaquitsi paamari. ⁴⁷ Aisa irooguetti covaeguishedacaquempine poquija, pintaguirorejaatsitempa. Cameetsavetacaquea apaoquivetaquempi pinquijapojajeguetti imajirontaguetti Aapani Irioshi, aatoniji mavioquivetimpiguetti impishoncajitaquempi camorecariqui. ⁴⁸ Ontaniquiquea aato imetojitsi igueni aisa aato otsivaquitsi paamari. ⁴⁹ Maasanojiaquea osocapojempari paamari, quejetaca icachoanejitiriguetti viratsi imetojaitiniriguetti Aapani Irioshi.† ⁵⁰ Oraquea incachoanepane cameetsavaeque, cotanquitsiquea ariguettija omasancateguetti, ¿querocampate incojitajeroni incachoanetantajitajemparo? Pinquejetemparoja incachoanepane cameetsatatsica, aisa pinconoavacaamajaquempaja.”

10

Icanque Jesoshi aatoja quericaca vashiantirotsi imanquigare

(Mt. 19.1-12; Irc. 16.18)

¹ Ariquea isotoanaque Jesoshi, yoanaquequea Joreaque aisa intatiqueroqui Jororane. Iroompaquea yarejetapojacaguetti yomporoguijajavempojacariquea aisa icaramirin-cavaeque caquinteja. Ariquea itsatacajiaqueri iquempetapiniquerogetti.

² Ariquea iconoagarantajiacaquea pariseojia icoraquecoraqueipojaque icoacojiapojaqueri iramenantajiaquempariniji, icantajiaipojaqueri:

—¿Arite icantimentantajitiro irovashianteroguetti shirampari imanquigare?

³ Iriatimpa icanqueriquea:

—¿Querocampate icanqueni Moishishini itioncacotanaqueroguetti?

⁴ Iriatimpajia icanquequea:

† 9:49 Chooa mavite ocantacoqueca ocativa. Maasano teeca intsarovenempari Aapani Irioshi iroanaque camorecariqui. Irioquea aisa ocantacoque tsarovenarica Quirishito irantsipevaetanaquempa acaniqui quepatsiqui impishoncamajatanajeroniji quempevaetantsi.

—Irraquea Moishishini ishinetsitari arigueti irovashiantanajero shirampari imanquigare, irojoqitenemparojate paperi otioncacagueti yovashianquero,* ariquea intiganquitsitemparo oanaje.

⁵ Icanque Jesoshi:

—Irraquea Moishishini manatarite yamenajiaquempiquea quishoshirentavaequempi, jero iquejetacaanquempiroca imaica itioncanquempiroca. ⁶ Cotanquitsiquea iroaqueragueti ipeacaaguecarigueticquea Aapani Irioshi maasanopae, ‘ipeacaacariquea shirampari aisa manquigarentsi.’[☆] ⁷ ‘Irootaquequea imaica shirampari intsinampirejanaqueriqueate iriri aisa iriniro, quisho iroamajataquero imanquigare, ⁸ apatsinoroquea incantanajempa. Ariquea iroaqueragueticquea tequeratagueti irimanquigatemparoji, mavite icarajiavetaca, ariquea imanquigacarogueti ariqueate icojianaca tee irimavitetajeji, quempetanajaqueate apatsinoronica icantaja.’[☆] ⁹ Jeroquea imaica oraquea itsipatacaantacaca Aapani Irioshi, aatojate itsiparejajiro caquinte.

¹⁰ Ariquea yoayoaitanaji tsovironaqui qui icoacomajajiaqueriquea itsatacaanejia.

¹¹ Iriatimpa icanqueriquea:

—Quericaca ovashianqueroneca imanquigare manquigatajemparoneca otsipa, manaquea icovaeguisheca yaimentacocarero iroquetica. ¹² Ariquea oquempetaca, irooguete manquigarentsi ovashiantanaquerineca manquigataroca manquigatajemparineca it-sipa, manaquea aimentacari.

Jesoshi yamanacoventajiaqueri chaajaniquirijia

(Mt. 19.13-15; Irc. 18.15-17)

¹³ Iroompaquea icoraquecoraqueitaquequea itsipapae yamajiapojiniriquea Jesoshi chaajaniquiripae impamijiavaqueriniji. Irraquea itsatacaanejia yamenajiavaqueriguete yamajiaqueneriguete, icantomajavaqueriquea.

¹⁴ Cotanquitsiquea yamenaqueguete Jesoshi, osemacaaquitari icanqueriquea:

—Ariotaquetsija incoraquetetate chaajaniquirijia naatimpai, aatoquea pojocaavaca, ishineventajiacaritarite Aapani inquitequitica irimajirontacotaquempari quenquejajiatsica quempeparica iriatimpajia.† ¹⁵ Iroomajaca noncantajiaquempica: quericaca nintanquitsineca impejaeri Aapani Irioshi Imajirote inquempetajempariquea chaajaniquitirajaca. Oraquea aatoguete iquempetaritsi, aatotarite iconoapojajari maasano peajiaquerica Imajirote.

¹⁶ Iroompaquea inajiaqueriquea chaajaniquiripae, ipamijiaqueri yamanacoventajiaqueri incavintsajamajiaquerinijite Aapani Irioshi.

Ajaarantavaetatsica

(Mt. 19.16-30; Irc. 18.18-30)

¹⁷ Oraquea yoanajiguete Jesoshi yameniri icoraquepoji irira caquinte ishiashitapojacariquea iguerovempojacari icanqueri:

—Tsatacaantantatsica cameetsari, ¿queroquea noncoquempani cameetsanijite noncoguitempaninijite nonchoocaguiteni?

¹⁸ Icanqueri Jesoshi:

—¿Queroquea ococani picantantaquenaca ‘cameetsari’? Teequea inchoocateji cameetsari, aparo icoca Aapani Irioshi. ¹⁹ Pitsaqueroquea maasanopae itioncaca-cotanaqueca Moishishini, ocanquequea: ‘Aatoja pimetojanti, aatoja poashitiro manquigarentsi, aatoja paitsitanti, aatoja pitsojeacotantimatatsi, aatoja pamatavijantitsi, pinquenquejacameetsatacoquerija piri aisa piniro.’

²⁰ Iriatimpa icanqueri:

* 10:4 Oratica paperi icanquero quimajareri certificado de divorcio (irooca aisa carta de divorcio). Iroguente paperi itioncagueroguete quejecaroca: “Imaicaquea novashiantajiro nomanquigavetacaca, aato nomanquigatajaro.” (Pamenero Os. 2.2 aisa Ireo. 24.1-4.) [☆] 10:6 Jen. 1.27. [☆] 10:8 Jen. 2.24. [†] 10:14 Iriajia chaajaniquitanquitsica tee iraventacogiuempaji, mana ishineventajiapojacari Jesoshi, iquemisantajiaqueri. Ari anquempejiaquempaquea aatimpa.

—Tsatacaantantsica, aritarite noquempetaca imaica, noparianacaroquea nonet-sanamajatanaquequea maasano nochaajaniquipojigueti narejevaecaro imaica.

²¹ Yamenitsitanacariquea Jesoshi ipintsatacotanacariquea icanqueri:

—Imaica apanivani poanaquequea pojocantaguetanaquequea maasanopae pash-intaguecaca, paantajiaquemparoquea imentaquipae pojocajiaqueneri coguitejacojian-quitsica, pinquejetaquerogueti onchoocataje oganejencaro shinetacajaempineca ontaniqui inquitequi. Ariquea pincoraquetajeja poguijatanaquena.

²² Iquemitsitaroqueuea icanquerica ariqueuea ocotanaca otsimeteitacaanaqueri, ariqueueate yoanaji, ishimampojancaetaanacaquea, iriguentitari ajaarantavaetatsica. ²³ Iriqueuea Jesoshi yamenajiaqueriquea maasanopae, ariqueuea icantajiguiiri itsatacaaneja:

—¡Omanapitsamajataquempariquea ajaarantavaetatsica inquijanaque imajirontagueti Aapani Irioshi!

²⁴ Irooquea iquemajiaquerogueti icanqueca, yamenamenaitanaquequea intati itsatacaaneja. Yapijitajiroquea Jesoshi icanque:

—Nirijanijiate, omanapitsamajataquempari inquijanaque imajirontagueti Aapani Irioshi iriqueuea aventaroca irajaararo. ²⁵ ¿Arimpate iragavejaquequea cameyo inquijanaquequea itepoquiqui quisatonquiri irisotoanaqueriquea antaqueronta? Aatoquea yagavejitsi. Iriompaquea ajaarantavaetatsica caaviji anaquero omanapitsataquempari inquijanaque imajirontagueti Aapani Irioshi.

²⁶ Iquemitsijigari itsatacaaneja arimpaqueate yamenamenaitanaque intati, icantava-caajiaca:

—Iroosacana, ¿quericampate agavejanquitsineca iraavajempa?

²⁷ Yamenajianaqueriquea Jesoshi icanqueriquea:

—Iriqueuea caquinte teequea iragavejeroji, iriguentiquea Aapani Irioshi agavejatsi, yagavejaquerotari maasanopae.

²⁸ Iroompaquea icantanaque Peerero:

—Nomajirote, naatimpajia novashiantajianaquequea maasanopae nashintaguecaca, noguijaguijaitanaquempi.

²⁹ Icanque Jesoshi:

—Iroomajaca noncantajiaquempica, quericaca vashiantajianaqueroneca itsoviron-aquite, irioca iriguentijeguitepae, itsijoitepae, iriniro, iriri, irijanijiate, irooca inigan-quitejire, cameetsanijite irisavicavenqueroquea notigaranquimenquerica intsavetan-timojianaqueriquea itsipapae intsatacaajiaqueriquea Quenquetsatsarentsi Oganejen-catatsica, ³⁰ irojocajitajeneriquea otsipa itsovironaquite ocانىqui quepatsiqui oshe-quiavaequequea aricaca oncaravaequequea 100, aisa inchoocajiaque itsipapae iriguen-tijeguitepae, itsijoitepae, iriniropae, irijanijiate, iniganquitejire. Cotanquitsiquea incatsimatimentajiqueri iramenajiquerigueti itsarovenquenaquea. Oncoramantapojajeguete incoguitepaniquea iranijaguiteni. ³¹ Icaramirincavaequequea yamenajive-tacaca imaica yanaantavaeque, cotanquitsiquea oncoramanitapojajeguete aatoquea yanaantajitsi. Aisa icaramirincavaeque teeca iranaanteji imaica, oncoramanitapojajeguete iranaantavaetanaque.

Jesoshi icamantajajiri aisa irimetojaque

(Mt. 20.17-19; Irc. 18.31-34)

³² Ariqueuea iriatimpajia ishivoquishivoquiiitanacaroquea quenavoquirontsi itonco-toncoitanaque iroaroaitanaquequea Jerosarequi. Iriquetitaquea oananquitsi Jesoshi, iriqueuea itsatacaaneja yoguijaguijaipojiri, yamenamenaitanaquequea intati. Itsipajia guijajianaquerica itsaroajianaquequea. Ariqueuea yapijitajiro Jesoshi itsipajiana-jari tijacoñaji itsatacaaneja carajianquitsica 12, ariqueuea iparianacaro icamanqueri querocaca incojiquerini ontaniqui Jerosarequi. ³³ Icanqueriquea: “Imaicaquea antoncotoncoitanaque oahoaitanaque Jerosarequi. Ontaniquiquea ontaniqui arejere-jeiquempaguete manaquea iracaantajiqueri irira Irijanite Caquinte, irajaitanaqueri ichoocajiaqueguete saserrotejia anaantajanquitsica aisa tsatacaantajiguiroca ition-cacotanaqueca Moishishini. Iriatimpajia incanquequea: ‘Intsishiatsi irimetojajiterini.’ Ariqueuea irajaitanaqueriquea ichoocajiaqueguete teeca irijorijoigueji irimeto-jacaanqueriquea. ³⁴ Iriatimpajia irantanaguishevaequeri, inquishoquishoavaequeri,

aisa impasapasaiqueri agompiaquitempari. Ariquea irimetojajiaqueri, cotanquitsiquea aapojajempagueti 3 savincaguiteri intancorejanaje.”

Inintajivecaca Santiago aisa Joanca

(Mt. 20.20-28)

³⁵ Ariquea iquempejiquempejiipojiriquea Santiago aisa Joanca, irijanijiate Severeo, icanqueriquea:

—Tsatacaantantsica, nonintajiaque pinetsanamajajiaqueroquea noncantajiaquem-pica imaica.

³⁶ Iriatimpa icanqueriquea:

—¿Taate opajita pinintajiaque nantempica?

³⁷ Icantajiaqueri:

—Aapojajempagueti pimpeaquempagueti Imajirojiate maasano, nonintajivecaquea poguisavisaviitaquena nosenampijajiaquempi, aparo savicanquitsineca pitincamijem-pequiqui, aparo pishinampijempequiqui.‡

³⁸ Cotanquitsiquea Jesoshi icanqueriquea:

—Teequea pintsajigueroji ocatica pinintavecaca. ¿Arimpate pagavejajiaquequea aviatimpajia pimire nomiraquempaca naatimpa? ¿Arimpate pagavejajiaque poviñacajata-caantantaquemparo noviñacajatacaantantaquempaca naatimpa?§

³⁹ Iriatimpajia icanqueriquea:

—Jeejeguitatsi nagavejaquempa.

Icanqueriquea Jesoshi:

—Pitampaticamajataquero pimiraqueroquea nomiraquempaca naatimpa, arimaja poviñacajatacaantantaquemparo noviñacajatacaantantaquempaca naatimpa.*

⁴⁰ Cotanquitsiquea teequea naatimpa cantatsineca quericaca senampijaquenanece savicanquitsineca notincamijempequiqui aisa noshinampijempequiqui. Iriguentiquea cantanquitsica Aapani Irioshi paesatoniqui iroaqueragueti.

⁴¹ Ariquea iquemajiavaquegueti itsipajia 10 itsatacaanejia itijerequijianaqueri Santi-ago aisa Joanca. ⁴² Cotanquitsiquea Jesoshi icajemajiaqueriquea icanqueriquea:

—Pitsajiguiritarite iriraquea ipejiaqueca imajirojiate teece irijorijoigueji man-aquea yatsanavaecari igonorojia, ariquea iquempejiaca iramajiroreja yomperaperacari irashijia. ⁴³ Cotanquitsiquea aviatimpajia aatoquea piquejijiga. Ariguenti quericaca nin-tanquitsineca iranaantimojiaquempi, impeitsitempaja amijiguempineca. ⁴⁴ Quericaca nintanquitsineca irijivatante, impeitsitempaja iromperare maasano. ⁴⁵ Quempecaquea Irijanite Caquinte teequea irooqueuea incoraquetashiteji iramijitavaqueri, iroguenti icora-quetashique incavintsajantapoje, aisa irimetojajentsitempariquea maasanojia, onque-jevequempaquee irivegaraventajiajeneri irisotoimentajianajeniji santanatacojiavetan-quitsica.

Jesoshi yamenacajari shamponcajari Varitimeo

(Mt. 20.29-34; Irc. 18.35-43)

⁴⁶ Iroompaquea yarejetapojacaroquea Jesoshi Jericoqui, itsipatsipaitapojacariquea itsatacaane. Oraquea yoanajigueticquea arimpaqueate yoshequiavaetanaquequea ogu-ijaguijaitanaquerica. Ariquea oraniqui ocaravoquitapojigueti quenavoquirontsi isav-icaque shamponcajari pajitatsica Varitimeo, iriguentiquea irijanite Timeo. Iriatim-paquea iroguenti isavicaventi yamanantagueti imentaquipae. ⁴⁷ Irooqueuea iquemacoquerigueti coraquetapojishiatsi Jesoshi Nasarequitica, icajemitsitanacaquea iririjen-catanaque, icanque:

—¡Jesoshii, Ichoviquitanaqueca Taavini, pimpintsatacotenashiatsi!

‡ 10:37 Iriava savicatsica itincamijempequiqui majirontatsica yanaajiaqueri itsipajia, iquejemajirovecari majirontat-sica, aisa iquejetaca savicatsica ishinampijempequiqui, iquejemajirovetajari. § 10:38 Ocaticaquea icanqueca Jesoshi manaquea iquejetacaacaro irantsipequempagueti, oquejetaca incanquegueti: “¿Arimpate pagavejajiaquequea aviatimpajia pantsipevaequempaquee pinquempejiaquenaquea naatimpa nantsipevaetaquempagueti?” * 10:39 Iquempetacaacaro Jesoshi, quejetacaquea incanquegueti: “Pitampaticamajataquero pantsipevaequempaquee pin-quempajiaquenaqueate naatimpa nantsipevaetaquempagueti.”

⁴⁸ Icantomajajiaqueriquea oshequini, icantsijiavetari irisanticotanaque, cotanquit-siquea iriatimpa arimpaqueate icajemamajatanaquequea:

—¡Ichoviquitanaqueca Taavini, pimpintsatacotenashiatsi!

⁴⁹ Icatiapojaquea Jesoshi icanque:

—lintsijate pincajemerijate.

Icajemitsitari shamponcajari icanqueriquea:

—lintsija, imaica pishinevaetanajempaja, pincatianaje, icajemaquempiqueate.

⁵⁰ Icatiitsitanaca ipishoncapanajantiroquea isavotacaca ishiashitanacariquea Jesoshi.

⁵¹ Icantavaqueri Jesoshi:

—¿Taa opaji pininque nantaquempiro?

Icanti shamponcajari:

—Tsatacaantantsica, noninque namenaje.

⁵² Icanqueriquea Jesoshi:

—lintsija poanaje, pitsaquetarite nagavejaque namenacaajempi, paventantaquenaca, irootaquequea pamenantanajaca.

Ariquea icotanaca amenaji, yoguijatanajiri quenavoquirontsiqui.

11

Yarejetapojacaroquea Jesoshi Jerosarequi
(Mt. 21.1-11; Irc. 19.28-40; Jn. 12.12-19)

¹ Iroompaquea irooshipojigueti irarejerejeipojemparo Jerosare, yarejerejeipojajaro-quea Vetepaje aisa Vetania Orivotsempiqui. Ariquea iriraquea Jesoshi itigarancajiaque-riquea mavite itsatacaane icantajivaqueriquea:

² —Poanaquequea ontaniqui quempeji guinteninintsiqui, ariquea pamenajapojeri aparo aashino irijanigantirenajaniqui shiticacotaca, tequeratatirajaquea irishiashiav-ijitacotantajitempariji. Pishiticarejacojianaqueri pamajiaquenarija. ³ Choocagueti cantajiaquempineca: ‘¿Querocampate pincojiaquerini?’ Aviatimpajia pincantajigueteri: ‘Iriguenti coacotacari Amajirote, taampinatari iroguipijaempiri.’

⁴ Ariquea yoayoaitanaquequea yamenajapojiariquea shiticacotaca tsovironaqui-quea sotomorontsiqui ocaravoquitapojigueti quenavoquirontsi, ariquea ishiticarejacojiaque-riquea. ⁵ Iriraquea choocajianquitsica oraniqui icanqueriquea:

—¿Querocaqueate pincojiguerini? ¿Taaquea pishiticarejacotancarica aashinogantire-najaniqui?

⁶ Icantanaqueriquea iriatimpajia icantajivaquerica Jesoshi, ariquea ishinejiaqueneri irajianaqueneri.

⁷ Ariquea yaajianaqueriquea yamajiaqueneriquea Jesoshi, ipashicamititsajiaqueneri iitsaarepaequi, iriatimpa isavicantanacari ishiacotantanacariquea. ⁸ Irirajia tiroren-caventajiacarica iconoagarantajiacaquea yovemaroncaashijivaqueri iitsaare quenavo-quirontsiqui, itsipapae aavashijivanquitsica ovashi ivemaroncaashijivaqueriquea.*

⁹ Irirajia iriquetica oahoaitananquitsica aisa irirajia guijaguijaitaquerica icajema-jianaque, icanque:

—¡Caaviji yoganejencamajataca!

—¡Intsishiatsi irishineventajiquempari iricatica coraquetapojatsica itigarancaqueca Majirontamajatsica!

¹⁰ —¡Ari incoquempani irishineventajiquempariquea iricatica peanquitsineca Ama-jirojiate inquempetajempariquea Taavini ipeavecagueteri coramani imajirojiate choviqui-jianacajica!

—¡Caaviji yoganejencamajataca Aapani Irioshi choocatatsica jenoqui!

¹¹ Ariquea yarejetacaroquea Jerosarequi, yoanaquequea teemporoqui itsariventanta-jitarica Aapani Irioshi, yamenaguepojiroqueate itsitacaguetaojiroquea. Iroompaquea

* 11:8 Yovemaroncaashijivaquerigueteri iitsaare quenavoquirontsiqui aisa ivemaroncaavoquitashijivaquerigueteri ovashi, manaquea iquejetacaavacari majirontatsica ishineventajigariqueti.

incajaranquiguitetanaquitigui isotoanaji yoanaji Vetaniaqui, itsipatsipaitanajari itsatacaanejia carajianquitsica 12, javaetanaji catsirincaiteri tsaparoncaguitetanaja.

Jesoshi icanqueroquea iguera aatotarite ochoocatajitsi osovena
(Mt. 21.18-19)

¹² Ariquea osavincaguitetanajigueti isotoanajirogueti Vetania, itaseapojiquea Jesoshi. ¹³ Yamenacotsitapojacaroqueate iguera choocatanquitsica ovana, irootaquequea yoantapanajantaca iramenamajapanajanteroquea choocaca osovena, cotanquitsiquea iquempejivetapojacaroquea quempeji teequea anejeroji, iroguentini ovana. Tequeratarite arejetempaji ochoocatantaca osovena. ¹⁴ Icantsitaroquee:

—Imaicaquea imaica aatoquea ishecatimajitarotsi pisoventa.
Iquemajiaqueriquea itsatacaanejia.

Jesoshi yoguivorocajiaqueri jocantantajiavecaroca teemporoqui
(Mt. 21.12-17; Irc. 19.45-48; Jn. 2.13-22)

¹⁵ Ariquea yarejerejeitaca Jerosarequi, iquijanaque Jesoshi oniganquirequi oticaacoroqui teemporo itsaromentantajitarica Aapani Irioshi, yamenajiapojiriquea jocantantaguetirica viratsipae intsompogui oniganquirequi aisa vegaratantajiguirica. Yoguivorocajipojaqueriquea maasanolja, aisa yapitaquiaguequeroquee ishitaponcaropae yojoquijitantarica imentaquitsite guipiantajiguirica imentaquipae.† Iquejetsigueta-
roquee aisa isavisaviitantacaca jocantajiguirica emorenipae. ¹⁶ Icantimentajiaqueriquea maasano aatotarite iquijacaantajanacaro oniganquirequi teemporo irajianaquero irajaaropae iravisacaantajianaquemparo antaqueronta. ¹⁷ Ariquea itsatacajiaqueriquea icanqueriquea:

—¿Arimpate tee ontionquempaji: ‘Oratica notsovironaquite incantacojitero iroguenti ashi incoraqueantapinijitempaca caquinteguetatsica iramanajiaquenani?’[☆] Cotanquitsiquea aviatimpajia manaquee pipecajaiacaro imoro itsititantaca aitsitantajiat-sica.[☆]

¹⁸ Iroompaquee iquemacojiaquerigueti saserorotejia anaantajanquitsica aisa tsatacaantajiguiroca itioncacotanaqueca Moishishini inintajiavecaquee irimetojajiaquerime, cotanquitsiquea querocampate incojiaquerini, itsaroacajiacariquea, yamenajiaqueri yomporoguijaventajiacari maasanopae yamenamenaitanaquequee intati ishineventajianacari itsatacaantavaequegueti.

¹⁹ Ariquea opitsecajencatanajigueti, yoanaji Jesoshi, isotoanaquero Jerosare.

Oshimpeguiricanaquequee iguera
(Mt. 21.20-22)

²⁰ Osavincaguitetanajigueti yoayoaitanaji, yamenacojianajiro iguera jac sampirocani metojamajataque maasano ovaritsa. ²¹ Iriaraquee Peerero iquenquejitanajaro chapinquitica, icanque:

—Tsatacaantantatsica, iintsija pameneroja intati ontatica iguera picantaqueroquee chapiniqui aatonijite ochoocatajitsi osovena, imaicaquee metojaque.

²² Icanque Jesoshi:

—Paventaventaitemparijate Aapani Irioshi. ²³ Iroomajaquea noncantajiaquempica, quericaca cantaqueroneca ocatica otsempi: ‘Poanaquetsija pojocajatemala inirojaniqui quantijani’, aatogueti iquenquejaveta: ‘Arica’, iroguenti iraventamajaquempiriquea Aapani Irioshi, ariquee oanaquequee ojocajapojempa. ²⁴ Jero imaica nocantantajiaquempica, taaca opajita pamanajajiaquerica Aapani Irioshi pamanajiaquerigueti, paventamajaquemparija pintsamajajiaqueja arimajaca irojocajiaquempí, ari oncotanaquempa.

† 11:15 guipiantajiguirica imentaquipae. Incoraquequegueti joriojia quenajiapojatsica otsipapae guinteninintsipaequi iramajiaquegueti cantashitatiaguetaquitsica imentaquipae, irojocajipojaqueneri guipiantajirica imentaquipae irojocajiajeneriniji itsipapae cameetsaniji irojocagarantajajeneriniji Aapani Irioshi teemporoqui, irioca irivegarajiaque viratsi irojocajiaquenerica. ☆ 11:17 Is. 56.7. ☆ 11:17 Jer. 7.11.

²⁵ Oraquea pamanajiguerigueti Aapani Irioshi, choocagueti picatsimajiaqueca, iroqueti-taquea pimpeacojajempari taaca opajita icatsimatacaaquempica cameetsanijite irishin-evenquempinijite Piri choocatatsica inquitequi irishetajempironijite pipeacaaguishejiacaca aviatimpajia. ²⁶ Cotanquitsiquea aatoguetija pipeacojajaritsi ipeacaajiaca catsimatacaaquempica, aatoquea ishetajirotsi Aapani Irioshi choocatatsica inquitequi pipeacaaguishejiacaca aviatimpajia.

Icoacojitaqueriquea Jesoshi taaquea tigarancaqueri
(Mt. 21.23-27; Irc. 20.1-8)

²⁷ Ariquea yarejerejitaipojajaro Jerosare, iriraquea Jesoshi iquijanaquequea intsompogui oniganquirequi teemporo yanijivijitaque. Incajaranquiguitetanaquegueti icoraquecoraqueitashipojaqueri saserorotejia anaantajianquitsica, itsipatsipaicariquea tsatacaantajigueroa itioncacotanaqueca Moishishini, icoraquejiaquequea aisa jivajiatsica.

²⁸ Icantajiaipojaqueri:

—¿Taaquea cantaquempi piquempetancaroca imaica poguivorocantajiacarica jocantantajiatatsica? ¿Taampate tigarancaquempiquea?

²⁹ Iriraquea Jesoshi icanqueri:

—Iintsija naatimpa noncoacotempi. Poguisotoaquenarogueti, ariquee nonquempetsitempa naatimpa noncamanquempiquea queri tigarancaquenaca. ³⁰ Iviñacajatantigueti Joancani, ¿queroquea oquenapojini? ¿Irooca oquenantapojaca inquite? ¿Irioca oquenantapojaca caquintejia? Iintsija pincamantena.

³¹ Irooquea iquemajiaquegueti iquenquetsatavacaajianaca icantajianaque:

—¿Querote ancoterini? Ancantsivetemparigueti oquenantapojaca inquite, iriatimpa incantanaque: ‘Iroosacanica ¿queroquea oocani teeca pinquemisantantajiguempariji?’

³² ¿Cotanquitsiquea ariguetajia ancantsivetempari oquenantapojaca caquintejia...?

Manatari itsaroacaajiacariquea omporoguijajianquitsica, maasanopaetari icanque irira Joancani iriguenti tsavetantatsica itigarancaqueca Aapani Irioshi. ³³ Jero icantantajiacarica Jesoshi:

—Teetari nontsajiguenica.

Ariquee Jesoshi icantajiaqueri:

—Iroosacanica, ariquee nonquejetaquempaquea naatimpa, aatoquea nocamantimpitsi quericaca tigarancaquenaca naatimpa.

12

Jesoshi iquempetacaajiacariquea quempoguijvetaroca ovaitsoquimashi
(Mt. 21.33-46; Irc. 20.9-19)

¹ Ariquee Jesoshi iquempetacaacotacanari icanqueriquea:

—Ichooacaque aparo caquinte yashincaquea iguepatsite. Iroompaquea imiamaroncaqueroquea ovaitsoqui, itantotocoqueroquea. Iqueecashiqueroquea yagaticantajitaroca ovaitsoqui osotoajatanaquempaca ovaja, ipeacaitsitaroquee irisavicantaquempaca jenoqui quempoguijaqueroneca cameetsanijite iramenamajaqueronijite aatonijite yaajiguetirotsi. Iroompaquea icajemajiaqueri itsipapae irishiacojiaqueneriquea. Oraquea onchoocatanaquegueti irojocagarantajiaqueneri iriatimpa. Ariquee yoavaetanaquequea jmm osamani. ² Ocoramanivaetaipojigueti aipojajagueta osamparipiotantanacaca ovaitsoqui itigarancavecari aparo yashincaca iramanajajateriquea irojocagarantajiajenerime iriatimpa. ³ Cotanquitsiquea iriraquea shiacojiaqueroca manaquea yaajiavaqueri itavatavaajiaqueri itigarancajajiri ejempaco. ⁴ Ariquee irira ashincarooca itigarancquitsitaja itsipa. Iriatimpa iroguenti iquirajashitequitacaajiavaqueri icantaguishejiavaqueri. ⁵ Itigarancavetaja itsipa, ariquee imetojajiavaqueri. Iroompaquea itigarancquitsivetaja itsipapae oshequini. Iconoagarantacaqueate itavatavaajiavaqueri, itsipapae imetojajiavaqueri.

⁶ “Iriguenti choocatajatsi irijanite ipintsamajatacaca. Ariquee itigarancquitsitari iriatimpa, icanque: ‘Iriocampa nirijanite, iriguentiquea irajaitavaque cameetsa, inquemisantajiavaqueri.’ ⁷ Cotanquitsiquea iriatimpajia irooquea yamenavaqueriguetai

icoraquepojigueti iquenquetsatavacaajianaca icanquequea: 'Jeeri irintatica ashinquem-paroneca maasanopae irimetojanajeguete iriri. Jamequetiroshiatsi ametojajiaqueri cameetsanijite aatimpajia ashintamajatajemparoneca.' ⁸ Iroompa yarejevopajaca yaa-jiaquaqueriquea imetojajiaqueri, ipishoncavaequitiri antaqueronta otantotacocaguete ovaitsouquimashi.

⁹ "¿Imaica querocaca incojiaquerini ashincaroa iguepatsite? Manaqueate iroashijiaquiteriquea irimetojajiaquiteri, itsipapaequeate incajemajiaje quempoguijitaerineca iniganquitejire.

¹⁰ "¿Arimpate teequea pampatsajavantacojigueroquea Itioncacaantaqueca Aapani Irioshi coramaniqui? Ariqueate ocanquequea imaica: 'Oraquea ogota mapi teeca irishineventajiavetempaji peacaajiacaroca mapipanco, opeanacaquea anaantamajatanquitsica quishotacaaqueroca.

¹¹ Iiraquea Aapani Irioshi ipeacajaaroquea. Amenajiaqueroquea aatimpajia oganejencani.' "

¹² Iriatimpajia inintajiaveca iraacaantajiaquerimequea, iquemajiaquaqueritari iriguenti iquejetacaajiacaa, cotanquitsiquea itsaroacaajiacariquea omporoguijajianquitsica, jero yoayoitantajianacaca.

Icoacojiqueri Jesoshi cameetsavaequempa irojocajiqueneri Sesa imentaquipae (Mt. 22.15-22; Irc. 20.20-26)

¹³ Iiraquea pariseojia itigarancagarantajiaquequea itsatacaane aisa shinevencarica Erorishi* iroaroaitanaque ichooaqueguete Jesoshi inomitacaajiaquempari cameetsanijite onchoocaquenijite incanqueca ompampiatantapojempaca incatsimatacaantajiaqueri. ¹⁴ Iriatimpajia yoayoaitanaquequea icantajiapojiri:

—Tsatacaantantatsica, notsajiaque aviatimpa teetarite pamataguempaji. Tee inchoocateji quericaca pagamajaquempaca, aisa teequea pintsaroacaguempajiji caquinte, irioca anaantavetanquitsica, irioca teeca iranaanteji. Pitsatacaantiguete tampatica poaquero picamanqueriguete queroquea incojiaquempani irinetsanajigueroniji inintaguetica Aapani Irioshi. Aviatimpa pitsatiroqueate incanqueca majirontatsica Sesa incanqueguete maasanojia joriojia irojocagarantapinijiaqueneri imentaquipae. Imaica ¿queroca pincanteni? ¿Cameetsampa nojocajiaqueneri, aricaca tee oncameetsateji?

¹⁵ ¿Ariquea nojocajiaqueneriquea, aricaca aato nojoquiniritsi?

Cotanquitsiquea Jesoshi itsatavaqueroquea teequea cameetsa incantajigueti, manaquea ishinetamampeajiacaqueate intati, irootari icantantacarica:

—¿Quero ocoani pinintantajiacaca pincomitacaajiaquenname? Iintsija pojocajiguenarijate apamentaqui tenario† nameneritate.

¹⁶ Iriatimpajia yojocajiaqueneriquea. Iroompaquea icanqueriquea:

—¿Taa ipajita iricatica ivaantorijiqueca? ¿Taaquea ashintaro ivajiro tioncanquitsica? Icanqueriquea:

—Iriguenti majirontatsica Sesa.

¹⁷ Icantsijigari Jesoshi:

—Iroosacana, pojocajiajenerijate Sesa yashincaca iriatimpa pinetsanati-menqueroniji incanqueca, aisa pinquejetacaajiaquempariquea Aapani Irioshi, pinetsanamajiaquaeroja maasanopae icantaguequeca.

Iquemajiaquaqueroguete icantajiaquerica, ariquea yamenamenaitanaque intati.

Icoacojitaqueriquea Jesoshi quero oncoquempa intancoretancoreitanajeguete oncoramanitapojajeguete

(Mt. 22.23-33; Irc. 20.27-40)

¹⁸ Iroompaquea irioquea oahoaitananquitsica saroseojia iramenajiaquiteriquea Jesoshi. Iriatimpajia iriguentiquea cantajiatatsica aatoquea itancoretancoreitanajitsi metojatsica. Icantajiapojiaqueri:

* 12:13 Pamenero Mr. 3.6 otioncacaguete isavi itsavetacojiqueriguete shinevencarica Erorishi. † 12:15 Iiraquea tenario irio imentaquitsite Iromaquitica. Iramiteriguete itsipa apajencaro savincaguiteri irivegarataqueri aparo tenario.

¹⁹ —Tsatacaantantsica, iriraquea Moishishini itioncanaque coramani paperiqui icanque inchooacagueueti caquinte teeca irijanintempaji, aapojempagueti irimetojanajegueti irojocapanjantero imanquigare, choocaguetequea iriguentijeguite irioquea manquigatajemparone irijanintacajaemparoquea quempetaja irioca irijanintajari meto-
janquitsica. ²⁰ Coramani ichooaque aparo nogonoro irijanintacaquea 7. Iriraquea parianquitsica imanquigavetacaroquea manquigarentsi, cotanquitsiquea niganquiquea imetojaque teequea irijanintacaguemparoji. ²¹ Iroompaquea irioquea manquigavetajaro itsipa oguijatirica. Ariquea iquempetaja iriatimpa, imetojanaji teequea irijanintacaguemparoji. Ariquea iquempetaja itsipa niganquitica. ²² Arimpaquea iteroncanaca maasano imanquigajiavecarogueti, teequea irijanintacajaiguemparoji. Ariquea ometojitsitanaja iroatimpa. ²³ Imaica, iintsija pincantenaja, oraquate oncoramanitapojajegueti intancoretancoretanajegueti maasano metojatsica, ¿quericaca manquigamatajemparoneca? Maasanotari imanquigajiavecaroquea.

²⁴ Icanqueri Jesoshi:

—Aviatimpajia manaquea picomijiaca, teetarite pintsajigueroji querocaca ocanqueni Itioncacaantaqueca Aapani Irioshi coramani, aisa teequea pintsajigueroji yagavejica iriatimpa. ²⁵ Oncoramanitapojajegueti intancoretancoretanajegueti maasanopae metojatsica, aatoquea quericaca manquigatajatsineca, aisa manquigarentsi aatoquea yojocantajitajirotsi irimanquigajitajemparoj, manatarite inquempejianajempariquea irashivantijitete Aapani Irioshi choocajatsica inquitequi. ²⁶ Imaica aviatimpajia iroguentequea picanque aatoquea itancoretancoretitsi metojaripae. ¿Arimpaté teequea pampatsajavantacojigueroji itioncacotanaqueca Moishishini coramani iquenquetsataquegueti Aapani Irioshi maequitsatsicaqui? Icanqueriquea: ‘Naroguenti Irioshimajate Averaame, Ishaaco aisa Jacovo.’ ²⁷ Teequea irio Irioshite metojatsica, iriguentiquea Irioshite anijatsica. Aviatimpajia iroguenti picomimajajiaca.

Queroca caavijica anaaque irinetsanamajajiqueca
(Mt. 22.34-40)

²⁸ Ariquea icoraquepojaque aparo tsatacaantiroca itioncacotanaqueca Moishishini, iquemapojaqueri iquenquetsatavacaajiaca. Yamenaquequea itampaticamajataqueroquea Jesoshi itsatacaquerigueti saroseojia, ariquea icanqueriquea iriatimpa:

—Oraticapae icantacaantica Aapani Irioshi irinetsanajite ¿querocate anaantamajatsica?

²⁹ Iriraquea Jesoshi icanqueriquea:

—Oraquea caavijica anaaque icantacaantica irinetsanajite iroguenti cantatsica: ‘Pinquemisantamajatenajate, ishiraerijia. Iriraquea Arioshite Majirontamajatsica, iriguenti apaniromajaca. ³⁰ Pimpintsamajataquemparija Majirontamajatsica Pirioshite, pampaniromajatanajemparija, pimpintsashirentamajaquempari, pimpintsaguenquejanemajatanajempari, pintampishiventamajaqueneri irooriji pipintsamajatacari.’[☆] ³¹ Oraquea mavitetapojatsica iroguentequea cantanquitsica: ‘Pimpintsataquemparija pigonoro pinquejetacaajempa pipintsatagueti aviatimpa.’[☆] Teetarite onchoocateji otsipa icantacaantaqueca anaaqueroca ocativa mavite.

³² Iriraquea tsatacaantiroca itioncacotanaqueca Moishishini icanque:

—Tsatacaantantsica, arimajaca pinetsanamajaqueroquea, iriraquea Irioshimajaca iriguentiquea aparomajaca, teequea inchoocateji itsipa. ³³ Ampintsamajaquempariquea ampanirontamajatanajempari iriatimpa, ampintsaguenquejanemajatanajempari, ampintsashirentamajatanajempari, antampishiventamajaqueneri. Aisa ampintsamajaquempari agonoro anquejetacaajempa apintsatagueti aatimpa. Irootaquequea inintamajataque Aapani Irioshi, anaaqueroquea antaajiguenerigueti viratsipae maasanomontiina irooca aisa ajocajiguenerigueti Aapani Irioshi taaca opajitapae.

³⁴ Iriraquea Jesoshi yamenaquerigueti iquenquejamajaquero itampaticamajataqueroquea yoaquero, icanque:

—Irooshipojishiatsi pimajirontamajaquempari Aapani Irioshi.

Ariquea icantajiaquiti mariric, ariquea oparianaca teequea quericaca coacotajerineca.

☆ 12:30 Ireo. 6.4-5. ☆ 12:31 Irev. 19.18.

¿Taaquea choviquitanaqueri Quirishitotsica?

(Mt. 22.41-46; Irc. 20.41-44)

³⁵ Oraquea itsatacaantanajigueti Jesoshi oniganquirequi teemporo icanque:

—Irraquea tsatacaantajiguiroca itioncacotanaqueca Moishishini icanquequea: ‘Irraquea Quirishitotsica[‡] iriguenti ichoviquini Taavini.’ ¿Querocaquea ocoani ican-tantajiacaroca? ³⁶ Coramanitari Ishire Aapani Irioshi iquenquejacaquerigueti Taavini icanque:

‘Irraquea Majirontatsica Aapani Irioshi icanqueriquea Nomajirote:

Pisaviquetaja pisenampijaquenaja notincamijempequiqui,

pintsipataquenaquea arejevaetanaquempa

nagavejajiaquerigueti maasano catsimajiaquempica, onquejevequemparo povanque-gontatsitempari.’

³⁷ Irraquea Taavini iriotaquequea cantaquerica: ‘Nomajirote’, ¿queroquea incoquem-pani inchoviquitanaqueri?

Icaramirincavaetanaquequea omporoguijaventacarica, iquemajiaquerigueti ishinejianaca.

Icanque Jesoshi aatojate yoguijaguijaitacotiritsijate tsatacaantajiguiroca itioncacotanaqueca Moishishini

(Mt. 23.1-36; Irc. 11.37-54; 20.45-47)

³⁸ Ariquea itsatacaantanajigueti Jesoshi icanque:

—Inchiquiojitaja poguijaguijaitacotiritsijate tsatacaantajiguiroca itioncacotanaqueca Moishishini. Iroguenti ishineventajiacca inquitsaajerontajiaquemparo ontiasearo cameetsanijite irisemeque. Aisa yoayoaitapinique ontaniqui yojocantajigueti rogueti taaca opajitapae ajaararontsipae inintajiaque inquenquetsatacaajitavaqueriquea.

³⁹ Icoquitani yoapinijiguigueti shinagogaqui icapiocantapinijiacaca, inintajiaquequea iroguisavicajitavaqueri intsipatsipaipojempariquea anaantajiatsica. Ariquea iquejejiacaquea aisa icapiocajiacagueti irishecajiaquempaquea, inintajiaque iroguisavicajitavaqueriquea intsipatacaantajiquempariquea anaantajiatsica. ⁴⁰ Aisa yamatavimatavivaetaqueroquea metojacoropae iteroncamajatsitaqueroquea ashintaguecaca. Aisa yamanamampeajiacariquea Aapani Irioshi teetaquea irisanticotsitempaji, isemejiaque intati. Iriatimpajia caaviji iranaajiaquequea incatsimamajajitaqueri oncoramanitapojajegueti.

Metojacoro ojocaqueneriquea Aapani Irioshi omentaquitsite

(Irc. 21.1-4)

⁴¹ Ariquea yoanaquequea Jesoshi isavicaque tampatica ochoocaquegueti itetantajitarica imentaquipae yojocajiquenerica Aapani Irioshi. Yamenajiaqueriquea maasano yojocajiaquegueti imentaquitsite. Iconoajiacca ashintajianquitsica yojocamajataquequea oshequini. ⁴² Iroompaquea ocoraquepojiquea aparato metojacoro, teequea ashintempaji, otepojiri iroatimpa mavimentaquitejaniqui omentaquitsite. ⁴³ Yamenaqueroquea Jesoshi icajemajiaqueriquea itsatacaanejia icanqueriquea:

—Arimajaca ocatica metojacoro teeca ashintempaji yamenaqueroquea Aapani Irioshi otetaquequea oshequini, anajiaqueriquea maasano. ⁴⁴ Iriatimpajia yaagarantavajiri imentaquitsite, yashintavaevetacatari, cotanquitsiquea iroatimpa teeca ashintamajavetempaji manaquea aacaajaniquicari maasano ashincaca ovegaratantajempameca osheca.

13

Jesoshi icanque irisovejaiquero teemporo

(Mt. 24.1-2; Irc. 21.5-6)

[‡] 12:35 Quirishitotsica. Iguenquetsatsarequi guiriegogia icanquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserrotejiate. Irira Quirishito iriotaquequea itsavetacotsitacaca tsavetantajiatsica coramanitica intigarancaque Aapani Irioshi impeaquempañiji Imajirojiate maasano.

¹ Ariquea isotoanajiroquea Jesoshi intsompogui oniganquirequi teemporo, icanque-
quea aparo itsatacaane:

—Tsatacaantantsica, pameneroja inirotsentseina mapipae ipeacaantajitaroca.
¡Cameetsavaequequea mapipancopae!

² Cotanquitsiquea iriraquea Jesoshi icanqueri:

—¿Arite pamenajiaquero maasanopae ocatica? Aatoquea ochoocatajitsi aparo mapi
ogataajatsineca, maasanopae irisoveacomajajitaquero.

Queroquea oncotanaquempani irooshipojegueti onteroncaguetanajempa quepatsi

(Mt. 24.3-28; Irc. 21.7-24; 17.22-24)

³ Ariquea yoayoaitanaquequea Orivotsempiqui otampaticatacoqueroquea teemporo-
qui, ariquea isavicaque Jesoshi oraniqui. Iroompaquea iriraquea Peerero, Santiago,
Joanca, Antirishi iquempejiquempejiipojacariquea, icantajiapojiri:

⁴ —Pincamantena, ¿querocate oncarateni irisovejaiqueroni? Irooshipojegueti onet-
sanatantaquempaca, ¿taa opaji nontsatantajiaquemparoca?

⁵ Iriraquea Jesoshi icanqueriquea: “Shoshoh yamatavijajitimpitsija.

⁶ Incoraquecoraqueitaquetari oshequini pinajajiaquenanea cantajianquitsineca:
‘Naroguenti’, ariquea iramatavijajiaqueri incaramirincatashivetaqueri.

⁷ Pinquemacojiavaquerigueti irashimirintavacaajianaquempaquea quempeji, aisa
otsipapaequi quepatsi, aatoquea pitsaroajiguetsi. Aritarite onquejetanaquempaquea
imaica, cotanquitsiquea aatotaja arejetsitatsi onteroncantanaquempaca
maasanopae quepatsi. ⁸ Iriraquea guintenijianquitsica otsipapaequi quepatsi

iroaroaitashijianaqueriquea osamanipaequitica, ariquea irashimirintavacaajiaquempa.
Ariquea inquempajiaquempaquea majirontajatsica inchoocagarantajiaque
intigarancajiaqueri igoaretajiate iroaroaitashijianaqueriquea itsipa majirontatsica
irashimirintavacaajiaquempa. Aisa omoguecaguetanaquempaquea. Irantsipevae-
jitaquemparoquea tatsesijencapae. Onquejeguetaquempagueta imaica mana
oparianaca intati irantsipevaetantajitaquempaca.

⁹ “Pagamajaguitempani. Irajaianaquempiquea icapiocajiacagueta jivajatsica incat-
simatacaantajiaquempiquea, impasatacaantajiaquempi agompiaquitempi shinagoga-
paequi icapiocantapiniyacaca pigonorroja. Aisa irajaianaquempiquea quejemajiroji-
avetatsicaqui, aisa majirontajatsicaqui. Ariquea aviatimpajia pintsavetantimojiana-
queri pintsavetacotantajiaquenaqueate naatimpa. ¹⁰ Iroquetitaquea intsavetacojiquero-
quea Quenquetsatsarentsimajaca Oganejencatatsica intsitacacovaetanaquempariquea
maasanopae caquinteguetatsica, ariquea onteroncapojajempa. ¹¹ Oraquea iracaan-
tajiquempigueta irajaianaquempigueta majirontajatsicaqui aatoquea pishoshoguiteta
aatoquea piquenquejajigui pincantajigue: ‘¿Querocaca noncanque nonpetanaquem-
pagueta coajica?’ Poapoaitanaquagueta iriatimpajiaqui aatoquea inchiqioji piquenquet-
satashijiaquempa aviatimpajia, iriguenti quenquejacaajiaquempironeca Ishire Aapani
Irioshi cameetsanijite pintsajiaquenijite querocaca pincanque.

¹² “Inconoagaranquempaquea iracaantajiaqueri iriguentijeguitepae irashimajaca
igonoromajaca irimetojacaantajiaqueri. Ariquea inquejejiaquempaquea irijanintajiat-
sica irimetojacaantajiaqueriquea irijanijiate. Itsipaquea incatsimajianaqueri iriri iriniro
irimetojacaantajiaqueri. ¹³ Maasanopae irisemaneguintimentajiaquempiroquea nova-
jiro pitsarotentajiaquenugueta, cotanquitsiquea quericaca atsipetacovaetanquitsineca
aatogueta yovashiantirotsi itsarovenquenagueta arejevaequempa irimetojanaje, irioquea
iriguenti irajaitanaje inquitequi.*

¹⁴ “Oraquea pamenajiaquerigueta iriraquea covaeguishetaqueroneca teemporo in-
catianquemparogueta ontaniqui icantimentajitirigueta incatigue (quericaca apatsa-
javanqueroneca ocatica pinquenquejamajateroja pintsatimenqueroniji), ariquea in-
choocaquegueta ontaniqui pintampinajapanajantejate maasanopae Joraquitica pishi-
ashiaitapanajantejate otsempitsempiacagueta. ¹⁵ Quericaca choocatanquitsineca sot-
siqui omencotapojacagueta itsovironaquitequi ovancaitoqui, aatoquea yaguijitapanan-
janti, aato iquiji iraguepanajantero taaca opajitapae choocatanquitsica intsompogui.

* 13:13 Mt. 10.21-22.

¹⁶ Querica choocatanquitsineca iniganquitejirequi, aatoquea ipiapanajanti iraapanajantero iitsaare. ¹⁷ ¡Ooshiatsi manquigarentsijia tsaraqijianquitsineca, aisa atsomijianquitsineca, caaviji antsipemajajiaquempaquea! ¹⁸ Aviatimpajia pamanacoventajiguempaja aatonijite otampaticatirotsi oncatsincaguitemajategueti. ¹⁹ Caavijitari irantsipejitaquempa anaavaequero maasanopae yatsipejiguetaacaca iroaqueragueta ipeacaacarogueta Aapani Irioshi quepatsi arejevaequemparoquea imaica. Aisa aatoquea yamenajitajirotsi oncoramanitapojajegueta. ²⁰ Aatomegueta icaratacaapojirome Amajirote oratica savincaguiterpae irantsipetantajivetaquempaca interoncamajajiaquempaquea caquinteja. Cotanquitsiquea ipintsatacotacari icoguiajiaquea,† icaratacaantapojacanarica.

²¹ “Querica cantajiaquempineca: ‘Jeeri iricatica Quirishitotatsica’, irooca incanquempi: ‘Ichooque ontaniqui’, aatoquea piquemisantajiguiritsija. ²² Incoraquecoraqueitaquequea tsavetantamampejaigatsica amatavijantajianquitsineca incanquequea: ‘Naroguentiquea Quirishitotatsica.’ Itsipaquea cantajianquitsineca: ‘Naroguentiquea tsavetantiroca icanquenaca Aapani Irioshi.’ Aisa ironigaanqueroquea oacaantantatsica intati cameetsanijite iramatavijianaquerinijite oshequini. Inquejetacaajitsivetempariquea icoguiajiaquea Aapani Irioshi, cotanquitsiquea aatoquea yagavejiritsi. ²³ Pagamajaventajiguempaja, nocamantsiquempiquea imaica maasano oatica tequeratagueta arejepojempa.

Querocaca oncoguetanaquempiani incoraquetajategueti Irijanite Caquinte
(Mt. 24.29-35, 42-44; Irc. 21.25-36)

²⁴ “Iroompaquea oncaraguijanaquegueta atsipevaerentsi impitsecajencatanaque catsirincaiteri, taai aato iquitasetaji. ²⁵ Iriroaquea impoquiropae irasacaraaguetaquempa. Irimoguecanaquempaquea choocaguetaquitsica jenoqui inquitequi. ²⁶ Iroompaquea iramenajitavaqueriquea Irijanite Caquinte incoraquetapojajegueta incoraquetantapojempa mararoqui, iragavejavaetapojempa iranaajiaqueriquea maasano, iroganejencavaetapojempa. ²⁷ Ariquea intigarancajiaqueriquea irashivantijitete iroaroaitanaquequea intsitacaguitejajiaquitero quepatsi aisa inquite, incapioajiaqueriquea icoguiajiaquea Aapani Irioshi.

²⁸ “Imaica pintsajivaqueroja nontsatacaajiaquempica, nonquempetacaquempiroja iguera. Iroaquerasano etsocorevanatanaque pitsajiaquequea irooshipojaji ajagantsipojaje. ²⁹ Ariquea onquempetajempaquea oncoramanitapojajegueta pamenajivajerogueta onquempetanajempagueta nontsatacajianaquempica imaica, irooquea pintsatantajivajempa irooshipojajishiatsi incoraquetajate Irijanite Caquinte, quejetaca catiapojaca sotorontsiqui. ³⁰ Arimajaca noncantajiaquempica, maasanopae oatica nocantajiaquempica imaica onetsanamajatanaquempaquea tequeratagueta interoncajiguempaji maasano choocajianquitsineca omparianaquempagueta nontsavetantsitacaca imaica.‡
³¹ Oraquea inquite aisa quepatsi ompeaquempa, cotanquitsiquea oraquea nocantaguequea aato opegatsi.

³² “Teequea inchoocateji tsatatsineca querocaca savincaguiteri ontsanatantaquempaca, tee aisa intsajiteji quero incarateni catsirincaiteri. Irirajia ashivantijite inquitequitica tee intsajigueji, ariquea iquempetaca Irijanite Aapani Irioshi teequea intsateji. Aparoquea icocani Aapani Irioshi iriatimpa itsaqueroquea. ³³ Pagamajavajemparija. Pincoguitempaniquea poguijajivajeri, aisa pamanaguiterini Aapani Irioshi, teetarite pintsajigueji querocaca aantapojempaca oratica savincaguiteri. ³⁴ Onquempetaquemparoquea iroguetu caquinte osamani, irojocajianajeri irashijia incantajianajeriquea maasanojia taaca opajita irisavicaventajajeneri. Incanteri yashincaca quempoguijiroca sotorontsiqui incantacoguitempani iramenaguiteni.

† 13:20 Irirajia icoguiajiaquea iriojitaritari aventantajiaquempineca. ‡ 13:30 Otioncacaca acaniqui, iguenquetsatsarequi guiriegogia ocanque genea. Chooca mavitepae agavejaque oncantacotaque. Genea agavejaque oncantacoqueri (1) irioca maasano choocajianquitsica icantaquerogueta (esta generación o la gente de este tiempo); (2) irioca oncantacoque maasano joriojia (esta raza); (3) irioca oncantacoque maasano choocajianquitsineca omparianaquempagueta itsavetantsitacaca (esta generación, es decir, la generación que ve el comienzo de estas cosas).

³⁵ Irootaquequea noncantantaquempica aviatimpajia, pincoquempaniquea poguijamajaguiteri, teetari pintsajigueji querocaca incorquetantajatempaca ashincaroa tsovironaqui. Aisa teequea pintsajigueji aricaca incorquetaje ompitsecajencaguitetanajeguete, irooca nianquite, irooca irinijanajeguete chaapa, irooca osavincaguitetanajeguete. ³⁶ Taampinaquea incomirejapojajempiquea, inchiqiojitaja yamenajapojajimpitsijate teequea poguijajigueriji. ³⁷ Oraquea nocantajiaquempica aviatimpajia, irooquea nocantajiaqueriquea aisa maasanojia: Pagamajajiaquempaja.”

14

Iquemavacaimentajiacari Jesoshi iracaantajiaqueri

(Mt. 26.1-5; Irc. 22.1-2; Jn. 11.45-57)

¹ Ariquea iriraquea saserrotejia anaantajanquitsica itsipajiacari tsatacaantajiguroca itioncacotanaqueca Moishishini yamenajavaqueroguete mavitetapoji savincaguiteri arejetantapojempaca Paashicoa,* aisa savincaguiteri pae ishecatantajitaroca pan teeca inconoantajitemparo anempoacaanaqueroneca, iquenquejajianaque queroquea incoquempani iracaantajiaquerinijite Jesoshi irimetojacaantajiaqueri, cotanquitsiquea teequea irininteji inquemacojitaqueri. ² Icanquequea:

—Oraquea anaanajempaguete Paashicoa, ariquee aacaantajiaqueri. Imaicaquea imaica aatotaja aacaantajiguiritsijate aatonijite icatsimatacojianaqueritsijate maasano om-poroguijaventajiacarica.

Ishaquitantajiacari Jesoshi casancajencajari

(Mt. 26.6-13; Jn. 12.1-8)

³ Ariquea yoanaque Jesoshi Vetaniaqui itsovironaquitequi Shimo icantajitica Avejancavetatsica. Isavisaviitaquequea ishecajiacaqueate, ariquee ocoraquepoji manquigar-entsi amacopojiri casancajencajari vegaramajatatsica, ipeacaantajitaroquee naarero, tee inconoajatantajitemparoji otsipaja. Iroguenti yoguijaantajicaro chovintyoriqui ipeacaajitaca mapi icantajitica aravasetero. Amapojaqueroguete iriatimpaqui otsanore-jacotsitaroquee oshaguitantsitariquea ishinquireguishiqui. ⁴ Iconoagarantajiacaquea savisaviitanquitsica oraniqui icatsimajianaquequea iquenquetsatavacaajianaca icanque-quea:

—¿Querocaquea? Opomatsajatacashiat si casancajencajari. ⁵ Ovegaravaecaqueate anaanaquero 300 tenario.† Arimesano irojocantajiquerome aanquemparome imentaqui irojocajitaquenerimequea coguitejacojianquitsica.

Ariquee icatsimajiaqueroquea. ⁶ Cotanquitsiquea Jesoshi irooquea iquemajiavaqueriguete icantsijigariquee:

—Iintsija ariotaquetsijate, aatoquea pasereaiguirotsi, cameetsavaequequea oshaguitanquenaro. ⁷ Iriraquea coguitejacojiatsica icoguitanitarite pintsipajajempariquee, pinintajiaqueguete pincavintsajajiaqueri pincavintsajajiaqueriqueate, cotanquitsiquea naatimpatarite aatoquea picoguitani pitsipajajanatsi. ⁸ Imaica iroatimpa onetsanaquero agavejaqueca, oshaguitsinotantaquenaro casancajencajari ashi irojoquijitajate-naguete nometojanaqueguete. ⁹ Imaica noncamanquempiquea arimaja querocaguete intsavetantajiqueroni Quenquetsatsarentsi Oganejencatatsica maasanopae quepatsi-paequi, ariquee intsavetantajiqueriquea ocatita manquigarentsi oshaguiquenaguete cameetsanijite inquenquejacotimentajitajeronijite iroatimpa.

Jorashi ininque iracaanqueriquea Jesoshi

(Mt. 26.14-16; Irc. 22.3-6)

¹⁰ Ariquea yoanaque Jorashi Ishicariote iramenajiaquiteriquea saserrotejia anaanta-jianquitsica incantajiaquiteri ininquequea iracaantaqueri Jesoshi. Irioveca itsatacaane carajianquitsica 12. ¹¹ Iriatimpajia ishinejianaquea icanqueriquea irojocajiaqueneri

* 14:1 Pamenero Glosario itsavetantajitiroguete Paashicoa. † 14:5 Iriraquea tenario irio imentaquitsite Iromaquitica. Iramiteriguete itsipa apajencaro savincaguiteri irivegarataqueri aparo tenario.

imentaquipae. Iriraqeua Jorashi yoanaji, iroompa ariqueea iquenquejanaquequea que-roca incoquerini iracaantaquerigueti.

Jesoshi ishecatacaajianajari itsatacaanejia

(Mt. 26.17-25; Irc. 22.7-18; Jn. 13.21-30)

¹² Ariqueea aapojaca savincaguiteri pariantajaroca savincaguiteri ipae ishecantantajitaroca pan teeca onconoguemparoji anempoacaqueroneca, irooquea aisa ijitorejantajitarica ovejajaniqui irishecajiaquempaca inquenquejacojiaqueroquea Paashicoa. Iri-raqeua itsatacaanejia Jesoshi icanqueriquea:

—¿Querocaquea pininqueni nonetsanajiaquempironi maasanopae cameetsanijite ashecajiaquempanijite coajica ashineventajiaquemparo Paashicoa?

¹³ Ariqueea iriatimpa itigarancajiaqueriquea mavite itsatacaane icantajiavaqueri:

—Poapoitanaquequea Jerosarequi, pintonquivojajiavaquempani shirampari iramacopojaqueroqueti ijatsite, irioquea poguijaguijaitanaque. ¹⁴ Querocaguete inqijanaqueni oraniqui ariqueea pinquijaquijaitanaquequea aviatimpajia, pincantajiapojeriquea ashincaroa itsovironaquite: ‘Iriraqeua Tsatacaantantatsica icanque: ¿Querocaqueate oraniqui noshecajiaquempani coajica nontsipatsipaiquempani notsatacaanejia nonquenquejacojiaqueroquea Paashicoa?’ ¹⁵ Iriatimpa intsipatsipaitanaquempiquea oshitamencotacaguete jenoqui, irijicojiaquempiroquea otantotacaguete caguetejeguinea, jac netsanaguecaquea maasanopae. Ariqueea oraniqui pinetsanamajajiaqueroquea maasanopae ashecajiaquempaniguete coajica.

¹⁶ Yoayoitanaquequea itsatacaanejia, yarejerejeica Jerosarequi, ariqueea yamenajiapojiroquea maasano quejemajataca icantajiavaquerica Jesoshi incajaranqui. Ariqueea inetsanajiaqueroquea maasanopae irishecajiaquempaca irishineventajiaquempanonijia Paashicoa.

¹⁷ Iroompaquea opitsecaguitetanaqueguete yoanaque Jesoshi Jerosarequi, itsipatsipaitanacariqueea itsatacaanejia carajianquitsica 12. ¹⁸ Ariqueea ipimerequijajiapojaca shitaponcarontsiqui ishecajiaca. Icanque Jesoshi:

—Imaica noncamanquempani, iconoaquempiquea aviatimpajia aparo aacaantenaneca, ishecaticomotaquena.

¹⁹ Ariqueea icohicoitanaca itsatacaanejia ishimampoanajianaca, yacayacaitanaque:

—¿Naroguenticampa aacaanquempineca?

²⁰ Iriraqeua Jesoshi icanqueriquea:

—Iriguenti aacaanquenaneca notsatacaane conoavetaquempani aviatimpajia 12, iriguentiquea tsipavacoquenaca notsiantancarogueti pan shovaoqui. ²¹ Aritarite ontampaticamajatanaque ocanqueca tioncanquitsica coramani itsavetacotsijicariqueti Irijanite Caquinte, cotanquitsiquea jirantsipevaetempanshiatsi irira aacaanquerineca! Aatomesano ivoguime iriatimpa.

Jesoshi icotarejaqueroquea pan yojocajiaqueneri itsatacaanejia

(Mt. 26.26-29; Irc. 22.14-20; 1 Co. 11.23-26)

²² Iroompaquea ishecajiacaguete, yaitsitaroquea Jesoshi pan, yamanaqueriquea Aapani Irioshi, icantacovenquero: “Arioteesaa.” Ariqueea icotarejaqueroquea yojocajiaqueneriquea itsatacaanejia icanqueriquea:

—Paajiavaqueja. Iroguenti notsino.

²³ Iroompaquea incajaranquiguitetanaqueguete yaacoquero chovintyoriqui,† yamanajiriquea aisa Aapani Irioshi, icantacovenquero: “Arioteesaa.” Ariqueea yojocajiaqueneriquea itsatacaanejia, imirajivaca maasano.

²⁴ Icanqueriquea:

† 14:23 Iroguenti yaacotaque vinoja.

—Iroguentiquea noriraja[§] sotojaatananquitsineca nometojaventajiaquerigueti caramirincavaetananquitsineca. Ocantacoqueroquea iroaqueraro paaquito.*²⁵ Imaica noncanquempiquea, aatoquea nomirajaro vinoja arejevaetapojempa nomirajemparo iroaquerajaro impeaquempagueti Aapani Irioshi Imajirojiate maasano.

Jesoshi icamanqueri Peerero iromanacoqueriquea

(Mt. 26.30-35; Irc. 22.31-34; Jn. 13.36-38)

²⁶ Iroompaquea iteroncajianaqueroqueti yamashaiventajiaquerigueti Aapani Irioshi, isotosotoitanaji yoayoaitanaque Orivotsempiqui.²⁷ Ariquea icanqueri Jesoshi:

—Ocatita pitsecanquitsica maasano aviatimpajia pimpashiventacaajiaquenaquea pojocajiapanajantena. Otioncacatari ocanque: ‘Aapojempagueti nometojaqueri quempoguijirica oveja. Irieraquea ovejajia imporocajencatesano maasano.’[☆]

²⁸ Cotanquitsiquea nontancorejanajegueti narouquetiquea jivatanaquempine noanaquequea Garireaquei.

²⁹ Icanquequea Peerero:

—Impashiventacaajivetanauempiquea maasanopae irojocajocavetanaquempi, cotanquitsiquea naatimpa aatotarite nojoquimatimpitsi.

³⁰ Cotanquitsiquea Jesoshi icanqueri:

—Noncamanquempiquea, coajica tequeratagueti omavitetempaji irinijeji chaapa, pomanacoquenaquea 3.

³¹ Cotanquitsiquea arimpaquea icantamajatanaque Peerero:

—Ariquetija intsipatacaantajitenajate irimetojajitena, irimetojajiquenaquea, cotanquitsiquea aatoquea nomanacotimpitsi.

Ariquee iquejejaquero maasano icantajiaqueca.

Jesoshi yamanaqueriquea Aapani Irioshi Jetsemaniqui

(Mt. 26.36-46; Irc. 22.39-46)

³² Ariquee yoayoaitanaquequea Jetsemaniqui. Irooquea yarejerejeipojacagueti iriraquea Jesoshi icanqueri itsatacaanejia:

—Pisavisaviitetaja ocaniqui, naatimpa namanaquiterija Aapani.

³³ Iriguenti itsipatsipaitanaca Peerero, Santiago, Joanca. Iriatimpa ishimampojancavaetanacaquea yatsipeshirentavaeca.³⁴ Incajanganquiguitetanaquegueti icanqueriquea:

—Noshimampojancavaetatiganimaja irooshipojishiatsi ometojavaetenanishiatsi, picancanija ocaniqui pintinajaventajiaquena.

³⁵ Iriatimpa yoanaque tijai ontaniqui itigueroasetanaca quepatsiqui, yamanaqueriquea Iriri ininquegueti impeaeneri maasanopae irantsipetaquempaca.³⁶ Oraquee yamanaquerigueti icanqueriquea:

—Aapani, pagavejaquequea maasanopae. Imaica nonintaveca paapitsatenarotate nantsipequempaca,[†] cotanquitsiquea teequea nonintenica onetsanaquempa nonintica naatimpa, iroguentiquea pinintica aviatimpa.

³⁷ Ariquee yoanaji incajanganquiqui ichoocajiaquegueti itsatacaanejia, yamenajiapojiri maajiaque. Icantapojiri Peerero:

—Shimo, ¿pojocanacaniquea tin? ¿Arimpate teequea pagavejajigueji osamanicoñaji pintinajajigueji? ³⁸ Pintinaje, aatoquea pimaajiguitsi. Pamanacoventajiguempaja aatonijite ocovaeguishetacajianaquempitsi covaeguisherentsi. Aviatimpajia pinintajia-avecaqueate pishirequi pinetsanamajajiaquero inintaguetica Aapani Irioshi, cotanquitsiquea teetarite pintampishijigueji pitsinoqui.

§ 14:24 Icanquerogueti noriraja mana iquejetacaacaro intati, cameetsaniji amirapinjiaquerogueti anquenquejap-inijiaquero imetojaventajiacajigueti. * 14:24 Oraquee paaquito iroguenti icantamajajitirica itsipa irinetsanamajajitenerica. Ocatitacaquea iroaqueraro paaquito icantajiacajiquea Aapani Irioshi irishetacotajeri igovaeguishere maasano aventantaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

☆ 14:27 Sac. 13.7. † 14:36 Icanquegueti Jesoshi paapitsatenarotate nantsipequempaca iroguenti ishimampojancacomajatacaro incatarojitanacuero igovaeguisherejia maasanojia caquinteguetaananquitsica quericaca aventajiaquemparineca. Pamenero 1 Pe. 2.24.

³⁹ Ariquea yoanaji aisa yamanajiri Iriri oquejetajaro icanquerica incajaraanquitica. ⁴⁰ Iroompaquea icoraquevetaja aisa yamenajiapojiri yojocajianacani tin aisa, otiavaetanacaritari pochoquirentsi. Ipashiventavaetanacaquea, cotanquitsiquea tee intsajigueji querocampate incantajiaquerini. ⁴¹ Yoanaji aisa, iroompaquea icoraquevetaja, ariquea icantajiapojajiri:

—Arisacanica picantacoguitani maaguitatsimpi magorejajianaquempi. Imaica ariotapoji, arejetapojaca iraacaantantajitaquemparica Irijanite Caquinte irimetojajiaqueri covaeguishejiatsica. ⁴² Pincatintiitanaque, jamequetiro, jac coraquetapojishiatsi aacaanquenaneqa.

Yaajitaqueriqueti Jesoshi

(Mt. 26.47-56; Irc. 22.47-53; Jn. 18.2-11)

⁴³ Quenquetsatanatsitiraja Jesoshi, icoraquetapoji Jorashi, irioveca itsatacaane iriojia-aveca carajavetanquitsica 12. Itsipatsipaitapojacari icaramirincavaequequea caquinte-
jia, yamashijiapojiri itsaampitsantsameniritepae aisa inchaquiji. Iriguentijia tigarancajiaqueri saserorotejia anaantajianquitsica aisa tsatacaantajiguiroca itioncacotanaqueca Moishishini aisa jivajiguirica joriojia. ⁴⁴ Iriraquea Jorashi, acaanquerineca Jesoshi, itsatacaaitsitanacari, icanqueriquea:

—Querica nonintavorotapojaqueca, † iriotaquequea pinintajiaqueca, paitajiguempari paajianaqueriqueate inchiqiojijata poguishiguiritsijate.

⁴⁵ Iroompaquea yarejetapojatiga iquempejitapojacari Jesoshi, icantapojiri:

—¡Tsatacaantantsica!

Ariquea inintavorotsitari.

⁴⁶ Ariquea iriatimpajia yaitsijiapojacari yajiricajiapojiri. ⁴⁷ Cotanquitsiquea chooca aparo itsipatacaca Jesoshi yaitsitanacaroquea itsaampitsantsamenirite, itsopajitaro, iguempitarejitsitari yashintacaca saserorote anaantamajatanquitsica. ⁴⁸ Iquenquetsatanaque Jesoshi icantajiguiri coraquetashijiaquerica:

—¿Arimpate naroguenti catsimari aapitsatantatsica pamashitantajiaquenaca pitsaampitsantsamenirite aisa inchaquiji pamentajianaquenanjite? ⁴⁹ Nocantacoguitani savincaguiteriqui notsipatsipaitaquempiquea aviatimpajia ontaniqui oniganquirequi teemporo notsatacaantavaeguitini, teequea ari paajiguenaji, cotanquitsiquea oquempetantanacaca imaica cameetsaniji onetsanamajatanaquempaniji itioncacojiaqueca tsavetantatsicani coramaniqui.

⁵⁰ Iroompaquea iporocajencajianaque maasano itsatacaanejia itsinampirejajianaqueri Jesoshi. ⁵¹ Cotanquitsiquea chooca itsipa tequeratatirajaca inquenquevarimajate yoguijvetanacari, manaquea isavotacaroquea aramaroncajaro. Yaajiavecari, ⁵² ipotequitsitanaca tancoren, ishiapanajanta cajaratsinoni.

Yaajitanaqueriquea Jesoshi icapiocajiacaguete imajirotepae joriojia

(Mt. 26.57-68; Irc. 22.54-55, 63-71; Jn. 18.12-14, 19-24)

⁵³ Ariquea yaajianaqueriquea Jesoshi ichoocaquegueti saserorote anaantamajatanquitsica. Ariquea icoraquecoraqueipoji yomporoguijajiapojaca saserorotejia anaantajianquitsica aisa tsatacaantajiguiroca itioncacotanaqueca Moishishini, irirajia aisa jivajiguirica joriojia. ⁵⁴ Iriraquea Peerero yoguijatacovetanacari cotanquitsiquea impoivaetapojaque. Oraquea yarejetapojacarugeti pampatejijaniquiqui itsovironaquitequi saserorote anaantamajatanquitsica, iquijapojaque otantoqui, yamenapojiri coaretajia itajiaque. Ariquea iconoajiapojacari isavicapoji itatapojaque.

⁵⁵ Iriraquea saserorotejia anaantajianquitsica itsipajiacari maasano majirontajiat-sica capiocajianquitsica icajemacaantajiaqueriquea itsipapae intojeventajiaquempari Jesoshi cameetsanjite onchoocaquenijite ompampiatantapojempaca irimetojantajitaquemparica, cotanquitsiquea tee onchoocateji. ⁵⁶ Itsojeventajiacariquea oshequini, irooquea icanque irooquea icanque, cotanquitsiquea querocampate incojiaquempani iriatimpajia teequea inquemavacaajiguempaji. ⁵⁷ Iconoagarantajiacari itsipapae icatintiitanaca itsojeventajiacari, icanqueriquea:

† 14:44 Querica nonintavorotapojaqueca. Yamejiaca joriojia coramani inintavorotavacaajiavacayamenavacaajiacaguete.

⁵⁸ —Naatimpajia noquemajiaqueriquea icanquegueti: ‘Nosoveguero ocativa teemporo ipeacaacaca caquinte, nompeacaajempa otsipa aatoca ipeacaaja caquinte, ontrespoja-jeguetei savincaguiteri nontsitacantajemparo.’

⁵⁹ Icantaveca imaica, cotanquitsiquea itsipapae cantashitatiavacaro. ⁶⁰ Ariquea icatiitsitanaca saserorote anaantamajatanquitsica icanqueriquea Jesoshi:

—¿Aatempa paquiri? ¿Taaquea opajita ocativa icantacojiaquempara iricajia?

⁶¹ Cotanquitsiquea Jesoshi teequea incanteji, teequea iranqueriji. Ariquea icoacotsitajari aisa, icanqueri:

—¿Arimajampa aviguentica Quirishitotatsica, Irijanite Itsaromentajitaca?

⁶² Icanquequea Jesoshi:

—Naroguentiguitatsi. Oncoramanitapojajeguetei pamenajiaqueriquea Irijanite Caquinte irisavicaque itincamijempequiqui[§] Agavejamajatatsica. Aisa pamenajivajeri inquenapojaje mararoqui.

⁶³ Ariquea icotanaca icatsimatanaque saserorote anaantamajatanquitsica iperejitsitaroquee iitsaare sarararara,* icanque:

—¿Arimpate ancoguimenquempara itsipapae cantacoquerineca? ⁶⁴ Jac piquemajiaquerishinete iquejemanatanacariqueti Aapani Irioshi imaica. Iintsija ¿querocaca pincantajigueni aviatimpajia?

Maasanoquea icanajigui iquempetacaanca irimetojajiqueri. ⁶⁵ Iconoajiaica iquishoquishoavaequeriquea. Iponaajiaqueriquea icapocapovaequeriquea, icanajivajeri:

—Iintsijate pintsatavaqueja taaquea capojaquempi.

Iriaquea coaretajia yapatompatoncavaequeri.

Peerero yomanacoqueriquea Jesoshi

(Mt. 26.69-75; Irc. 22.56-62; Jn. 18.15-18, 25-27)

⁶⁶ Iriaquea Peerero ichooaque oraniqui isavi pampatejijaniquiqui. Iroompaquea coraquepoji aparo iromperare saserorote anaantamajatanquitsica, ⁶⁷ amenapojiri Peerero itataque, amenamajatanacariqueriquea sorererere, ariquee ocanqueri:

—Aviatimpa aisa itsipapinitimpi Jesoshi Nasarequitica.

⁶⁸ Cotanquitsiquea yomanacotsitanacaquea, icanquero:

—Tee notsatsitavaquempiroji. Teequea nonquemeji querocaca picanqueni.

Isotoanaque iquijanajiro oaguitetanaqueguetei osotomorotapojacaguetei. Ariquee oraniqui icatiaca, iroompa inijanaque chaapa. ⁶⁹ Amenitsitajariquee aisa omperarentsi ocantajigui choocajianquitsica oraniqui, ocanque:

—Iricatica irio itsipavijire Jesoshi.

⁷⁰ Cotanquitsiquea yomanacotsitanaja Peerero.

Iroompaquea incajaranquiguitetanaquitigui icanajigui choocajianquitsica oraniqui:

—Arimajaca pitsipatari, aviguenti Garireaqueitica.

⁷¹ Iriaquea Peerero icantsitanaja aisa:

—¡Nocanqueshinete tee nontsatimateriji iricativa piquenquetsatacojiaqueca! Namataacaguetei incatsimatimentenaronishiatsi Aapani Irioshi.

⁷² Iroompaquea icanquitigui, inijanajiquea chaapa. Iquenquejitsitanacaroquee Peerero icanquerica Jesoshi incajaranquitica icanqueri: “Coajica tequerataguetei omavitetempaji irinijeji chaapa pomanacoquenaquea 3.” Ariquee icotanaca iraitsitanacaquea.

[§] 14:62 itincamijempequiqui. Yamejiaca coramani iriaquea majirontatsica incajemajiaqueri ishineventamajatacaca iroguisaviquitempara itincamijempequiqui, inquejemajirontavetaquempara iranaajiaqueri maasano itsipajia.

* 14:63 Ari icojiaica joriojia, inquemaqueriguetei itsipa inquejemanataquempariguetei Aapani Irioshi irooca incantaguishtaqueriguetei, imperejitsitemparo iitsaare intsatantajitaquemparo icovagueishemajataca. Otioncaca irira quejemanataquemparineca Aapani Irioshi irioca cantaguishequerineca intsinaquitajitempara irimetojajiqueri.

15

*Yaajitanaqueriquea Jesoshi Piratoqui**(Mt. 27.1-2, 11-14; Irc. 23.1-5; Jn. 18.28-38)*

¹ Osavincaguitetanajigueti icapiocajiaca saserorotejia anaantajianquitsica, aisa jivajiguirica joriojia, aisa tsatacaantajiguiroca itioncacotanaqueca Moishishini, aisa maasano imajirotepae joriojia. Iquemavacaajiaca querocaca incojiaquerini Jesoshi. Ariqueea yoishojianaqueri, yaajianaqueneriquea Pirato, yojocajiapojaqueneri.

² Iriatimpa icoacoqueriquea icanqueri:

—¿Arimajaca aviguenti Imajirote jorio?

Icanque Jesoshi:

—Tampatica poaquero.

³ Cotanquitsiquea iriraquea saserorotejia anaantajianquitsica arimpaquea itsojeventajianacari.

⁴ Iriraquea Pirato icantsitajari aisa icanqueri:

—¿Aatempa paquiri? Pinquemavaqueroja maasano icantacoguetaquempica.

⁵ Cotanquitsiquea Jesoshi teequea incantimateji, jero yamenantanacaca Pirato intati.

*Icanque irimetojajiqueri Jesoshi**(Mt. 27.15-31; Irc. 23.13-25; Jn. 18.38-19.16)*

⁶ Icantacoguitani aapojajagueti Paashicoa, iriraquea Pirato yametapinitaca yoguipaquijajiri aparo isantanatacotimentajiquerica ipeacaaguishetacaca, quericaca inintajiaqueca igonorojia iroguipaquijaje. ⁷ Ichooaque aparo shirampari ipajita Varavashi, iroguenti isantanatacotimentajiqueri imetojantaquegueti itsipatacaantajicari itsipapae itsipatashijiacaca imetojantajiaquegueti, iroguenti inintajiaveca iroguisotoajiajerime majirontatsica. ⁸ Icaramirincavaequequea oraniqui joriojia, ariqueea iconoagarantajiacaca yoayoaitanaque Piratoqui icantajiaapojaqueri irantajeneri yametapinicaca. ⁹ Iriatimpa icantavaqueri:

—¿Irioquea pinintajiaque noguipaquijajempiri Imajirote jorio?

¹⁰ Iriatimpa itsaque irirajia saserorotejia anaantajianquitsica manaquea icatsimatimentajiaqueriquea Jesoshi yamenajiaquegueti iriguenti yomporoguijaventajiacaca, irootaquequea yaantajitanacarica iriatimpaqui. ¹¹ Cotanquitsiquea iriraquea saserorotejia anaantajianquitsica itsatacajiaqueri omporoguijajianquitsica icantajiaqueri:

—Iintsija pincantejate: ‘Iriompaqueate poguipaquijaje Varavashi.’

¹² Iriraquea Pirato icanqueriquea:

—Arisacanica imaica ¿querocaca noncoquerini irica picanqueca Imajirote jorio?

¹³ Iriatimpajia icajemitsijianaca:

—¡Pompajacoteri!

¹⁴ Icanqueri Pirato:

—¿Taampate ipeacaaca?

Icajemamajajianaji:

—¡Pompajacoterishine!

¹⁵ Iriraquea Pirato inintaquequeate iroguishinejajiaqueriquea omporoguijajianquitsica, yoguipaquijajajiniri Varavashi. Ariqueea icantacaantsitariquea Jesoshi intavaajitaqueri, irajaitanaqueri irompajacojiqueri.

¹⁶ Iriraquea coaretajia yaajianaqueriquea intsompoguiqui pampatejijaniquiqui imapi-pancotequi Pirato, icantajitiro “Peretorio”, ariqueea icajemacaantajiaqueri maasano irapicoaretajiate. ¹⁷ Ariqueea iquitsaatantajiacari otsipa quitsaarentsi camachoncamorenari. Yaajiaque tseitseiario, ipeacaashijiacanari iramatsaero, yamatsaetsitari. ¹⁸ Ariqueea ishishirontimentavaecari icanqueriquea:

—¡Iricashia Imajirote jorio!

¹⁹ Itavatavaavaetaqueriquea iguitoqui savoroquijiqui, iquishoquishoavaequeri, igueroventajiacari iquempetacaajiacari ishineventajitarigueti majirontamajatatsica,

manaquea ishiroshirontimentavaecariquea intati. ²⁰ Iroompaquea iteroncajianaque-rogueti ishiroshirontimentavaecariqueti, isapocajiri camachoncamorenari, irooqueea iquitsaatantajari iitsaare, yaajianaqueri irompajacojiaqueri.

Yompajacojitaquerigueti Jesoshi

(Mt. 27.32-44; Irc. 23.26-44; Jn. 19.17-27)

²¹ Chooa aparo Shirenequitica ipajita Shimo, iriri Arijantero aisa Iropo. Yavisanaque iquenavaetapoji ontaniqui niganquitejipaequi. Icantajiavaqueri coaretajia irinatashitanaqueriquea Jesoshi igoroshite. ²² Ariqueea yaavaetanaqueriquea Jesoshi ontaniqui osamani opajitaquea Gorogota, (ocanquequea: “Ochoocatigueti Shocoitontsi”). ²³ Yojocajivecanariqueea vinoja iconoantajicaro mira, * cotanquitsiquea teequea irimiremparaji. ²⁴ Iriraqueea coaretajia yompajacojiaqueri. Ariqueea ipegavijijiaca intsajiaque-nijite quericaca ashinquemparoneca iquitsaaguevecaca.†

²⁵ Oraqueea yompajacojiaquerigueti iroaquerasano ijenoquivaepoji catsirincaiteri. ²⁶ Oraqueea itioncacojiquerogueti taate imetojimentajiqueri ocanque: “Iriguenti Imajirote jorio.” ²⁷ Itsipatacaantajicari mavite aitsitantatsica yompajacojitaqueriquea, aparo yogatiacojiqueri itincamijempequiqui, iriraqueea itsipa iroguenti yogatiacojiqueri ishinampijempequiqui. ²⁸ Oraqueea oquejetacagueti imaica iroguenti irinetsanajiquero-queea itioncacojiquerogueti coramaniqui ocanque: “Itsipatacaantajicari covaequishetatsica.”☆ ²⁹ Iriraqueea avisavisaitanquitsica oraniqui inijashinatacari icantajianaque chaguito chaguito, icanqueriquea:

—jArisacanica querocampate imaica! Arimpate picanque: ‘Nosoveaqueroqueea iteem-porote Aapani Irioshi, ariqueea nompeacaitajemparo, nontsitacajero 3 savincaguiteri.’ ³⁰ Iintsijate pompetanaquempajate imaica, pintso parejacotanajempajate coroshiqui paguijitapojaje.

³¹ Ariqueea iquempejiaca saserorotejia anaantajanquitsica itsipajiacari tsatacaanta-jiguiroca itioncacotanaqueca Moishishini ishiroshirontimentavaecari, iquenquetsatava-caajiaca icanqueriquea:

—Yamijiaqueri itsipapae yompetacoguetacari, cotanquitsi teequea iragavejempaji irompetacotanaquempa iriatimpa. ³² Iriovetaca Quirishitotanquitsica Amajirojiate ishi-raerijia, iintsija intsopajacotanajempaja coroshiqui iraguijipojaje, amenajiaquerinijite antsatimenqueriniji antsaroventimentajiaquempari.

Iquejetsijianaca itsipatacaantajicarica yompajacojitaquerigueti, icantacantaguishe-vaetaqueri.‡

Imetojanaquegueti Jesoshi

(Mt. 27.45-56; Irc. 23.44-49; Jn. 19.28-30)

³³ Iroompaquea itampaticavepojaca catsirincaiteri, ocantanaque pitsec maasano quepatsi, arejetacovaeca ijaguitetanajigueti. ³⁴ Ariqueea icotanaca iririjencavaetanaque Jesoshi icanque: “Eloi, Eloi, ¿lama sabactani?”§ (Ocanque: “Aapani Irioshi, Aapani Irioshi, ¿queroqueea ocoani pojocantanaquenaca?”)

³⁵ Iconoagarantajiacaqueea choocajianquitsica oraniqui irooqueea iquemajivaquegueti icantajianaque:

—Pinquemerija, icajemaqueri tsavetantatsica Iriashini.

³⁶ Ishiitsitanaca aparo, yaanaquequeea atsimijicajatiroca oja, iticajatsitaroqueea vinoja cachonerontoquijajaro, yogajenocacoqueneriquea savoroquijiqui irantsimijicajatacaaque-querime. Icanque:

—Iintsijate pamenerijate, amenajivaqueritaja incoraquetashipojeri Iriashini irogaguijitajeri.

* 15:23 Oraqueea mira iroguenti casancatatsica, inconoantajiquemparogueti oja irojocajiqueneri aatonijite ocatsitiri.

† 15:24 iquitsaaguevecaca. Irooca icantacotaque isavoguinaro, igaviguitire, ichompimashite, aisa yogataacaca, ocarataque 4. ☆ 15:28 Is. 53.12. ‡ 15:32 Pamenero aisa Irc. 23.39-43. Apara cantashitatiananquitsi coajica, yaventanacari Jesoshi inquenquejacotajeriniji irimajironquempagueti. § 15:34 Eloi, Eloi, ¿lama sabactani? oponeca iguenquetsatsarequi arameo. Mateo itioncaque Elí, Elí iguenquetsatsarequi evereo (Mt. 27.46).

³⁷ Iroompaquea icajemapanajanti Jesoshi iririjencavaetanaque, ariquea imetojanaque. ³⁸ Irooquee imetojanaquitigui, ariquea ocotanaca operejanaque omorena ticaamore-natanquitsica teemporoqui jocagatsica aatonijite iquijajitirotsi intsompoguiremaja-caqui. Opecotarejanaque tampaticaquee niganquisano ocantanaque sararararara, oquenapojiquea jenoqui arejevaetacaquee isavi. ³⁹ Iriraquee imajironcaca 100 igoare-tajiate Iromaquitica icatiaca oraniqui itampaticatacotaqueri Jesoshi. Oraquee ique-mavaqueriguete icajemanaquegueti, aisa yamenavaqueriguete quero icotanacani imeto-janaquegueti, icanque:

—Arimajaca iriguente Irijanite Aapani Irioshi.

⁴⁰ Aisa ariquea ochoocajiaque manquigarentsijia tiijacoñajisano ontaniqui, amena-jiaqueriquea Jesoshi. Oconocaroquee Maria Magararaquitica, Sarome, aisa Maria iriniro Jose aisa Santiago* guijapojirica. ⁴¹ Iroguentijiatari oguijajiaquerica yanijivae-tiguete Garireaquei, amitacojiaqueriquea. Aisa ariquea ochoocajiaque oraniqui otsipa-pae ocaramirincavaeque manquigarentsijia tsipatsipaitacarica iroaqueraguete icoraque-taqueguete Jesoshi Jerosarequi.

Yojoquijitantajitajari Jesoshi imperitamoroqui

(Mt. 27.57-61; Irc. 23.50-56; Jn. 19.38-42)

⁴² Ariquea ijaguitemajatanaji. Oratica savincaguiteri iroguente inetsanatantajiacaca joriojia maasanopae incoguitejacojiaquempaca osavincaguitetanaqueguete aapojajem-paca imagorejantajitaca. ⁴³ Iriraquee Jose Arimateaquitica, iriguente anaantatsica iguejemajirore joriojia, itsipajiacari imajirotepae icapiocapinijiacaguete. Yoguijaque-riquea Aapani Irioshi impeaquempaguete Imajirojiate maasanojia. Iriatimpa teequee intsarogueji, yoashitanaqueriquea Pirato icanqueriquea ininque irajaitanajero itsino Jesoshi. ⁴⁴ Cotanquitsiquea Pirato iquemaqueguete metojaque Jesoshi yamenanaque-quee intati. Icajemacaanqueriquea imajirote coaretajia icoacojiaqueriquea arimajaca metojaque. ⁴⁵ Iquemavaquerogueti icanquerica coareta, iriraquee Pirato ishinetsi-tacanari Jose iraanajero itsino. ⁴⁶ Irootarite yoantanacaca Jose ivegarataquitiquea iniromorena shipetari. Iroompa yoanaque itsopajacotajatiri, yampiguiricantajiacari, yaanajiriquea ontaniqui yojoquijitajitiri imperitamoroqui imorotashijitiriguete meto-jatsica. Itigaritashitantacari iniroshimentapiri mapi, iticaacotantacari. ⁴⁷ Oraquee Maria Magararaquitica aisa Maria iriniro Jose amenacojiaqueriquea yojoquijitajiriguete.

16

Ipochatanajiguete Jesoshi

(Mt. 28.1-10; Irc. 24.1-11; Jn. 20.1-10)

¹ Ariquea opitsecanajiguete savincaguiteriqui imagorejantajitaca,* oraquee Maria Magararaquitica otsipatanacaroquee Sarome aisa Maria iriniro Santiago oahoaitanaque ovegarajiaquitiquea poncajencajaripae, oahoaitanaqueniji oshaguitantajiaquitimpar-ime Jesoshi. ² Iroompa osavincaguitetamanaque pariapojajaroca semana,† iroa-queraguete isotoapojajiguete catsirincaiteri oahoaitanaquequee ontaniqui yojoquijita-jiriguete. ³ Oraquee oahoaitanaqueguete quenavoquirontsiqui ocanque:

—¿Taaquee tigaritajerone mapi iticaacotantajivecarica imperitamoroqui?

⁴ Inirojeguimajaca ocanca, cotanquitsiquea arejerejeivetapojaca amenajiapojiro oo jac yoguishirincajiqueroquee. ⁵ Oquijaquijaipoji intsompoguiqui imperitamoroqui, amenajiapojiriquea shirampari iriaqueraca quenquevaritananquitsica,‡ isavicaque ot-incamijempequiqui, quitamarovaeque iitsaare. Ariquea ocojianaca otsarotsaroitanaque. ⁶ Cotanquitsiquea iriatimpa icanqueroquee:

* 15:40 Santiago. Icantajitiri aisa Jacovo.

* 16:1 imagorejantajitaca. Irirajia joriojia imagorejantaro savincaguiteri saavaro. Opitsecapojajiguete oteroncapojaca imagorejantajitaca, irootaque oteroncampojaja semana, ariquea oparianaja otsipa. † 16:2 Iroguente opariantanaja semana savincaguiteri tominco. ‡ 16:5 shirampari iriaqueraca quenquevaritananquitsica. Iriotaque irashivantite Aapani Irioshi, amenajiaqueri quempevaeca caquinte.

—Aatoquea pitsaroajiguitsi. Imaica aviatimpajia picoajivecariquea Jesoshi Nasarequitica yompajacojivecaca, cotanquitsiquea imaica jac pochatanaji. Teequea inchoocatajeji ocaniqui. Iintsijate pamenerojate intati yojoquijijivecarigueti. ⁷ Imaica poapoaitanaquegueti pincamantajia pojerija Peerero aisa maasano itsatacaanejia pincanqueriquea: 'Iroanaquequea Jesoshi Garireaquei, iriquetiquea oananquitsine. Pamenajia pojajeri ontaniqui. Aritarite icantajianaquempi tequeratagueti irimetojeji.'

⁸ Osotosotoitapanajanti oshiashiaitanaca ompioncajianacaquea mana oajianaque intati. Teequea oncamantapojeji irooriji otsaroajianaque.

Jesoshi yonigaajarogueti Maria Magararaquitica

(Jn. 20.11-18)

⁹ Oraquea ipochatanajigueti Jesoshi iroaqueragueti osavincaguitetamanaji paripojajaroca semana, iroqueti yonigaaja Maria Magararaquitica yoguisotoacoventajiaqueca 7 ampatsini ishaquiavecarogueti. ¹⁰ Iroatimpa oanaque ocamantajia vetapojari maasano itsipavetacaca. Amenajia pojiri iracojiaqueri ishimampoancajianaca. ¹¹ Cotanquitsiquea iquemajia vetavacarogueti ocanquegueti anijanaji Jesoshi, amenajiri, teequea inquemisantajigueroji.

Jesoshi yonigaajari mavite itsatacaane

(Irc. 24.13-35)

¹² Iroompaquea Jesoshi irioquea yonigaaja mavite itsatacaane yoayoitanaquegueti ishivoquijia vetanacaro quenavoquirontsiqui niganquitejipaequi, cotanquitsiquea manaquea icantashitati mojiacari. ¹³ Iroompa iriatimpajia icantacantaitanaja Jerosarequi icamantajia vetapojajari itsipajia, cotanquitsiquea teequea inquemisantajigueroji iriatimpajia aisa.

Jesoshi icantajianajiri itigarancanejia intsavetacojianaqueriquea

(Mt. 28.16-20; Irc. 24.36-49; Jn. 20.19-23)

¹⁴ Iroompaquea ishecajiacagueti itsatacaanejia carajianquitsica 11, yonigaimojia jariquea Jesoshi. Ariquea icantomajia queri yamenaquegueti manaquea iquishoshirentavaetanaque, teetarite inquemisantajigueroji cantajia vecarica amenajia vecarica ipochatanajigueti.

¹⁵ Iroompaquea icanqueriquea:

—Poapoaitanaquequea pintsitacaguetejavaetanaqueroquea maasano quepatsi, pintsavetaneroquea Quenquetsatsarentsi Oganejencatatsica pintsavetantimojiaqueriquea maasano caquinteja. ¹⁶ Taacagueti quemisantajia vaqueroneca aisa iriviñacajatacaantajianaquempa irishetacojia queriquea iraatantajia vaquemparica aatoniji yogui camorecariqui, cotanquitsiquea quericaca aatoca iquemisantirotsi, manaquea incatsimatimentajia queri igovaeguisher. ¹⁷ Iriraquea aventaquenaneca manaquea iramenajia queri iroguisotoaguetaqueriquea ampatsinipae shaquiajiacarica caquinte, iraventashitaquemparigueti novajiro, aisa inquenquetsatantajia quemparoquea otsipapae quenquetsatsarentsipae teeca intsajia vetemparoji. ¹⁸ Irajiricajia vequempari camaarini, aisa arigueti irojocajivequempari quepigatatsica irimirajia vequemparoquea, aatoquea aanaqueri. Aisa impamijia queri joquijiguetsica, impeaguetanajempa quea.

Yatsomajanajagueti Jesoshi

(Irc. 24.50-53)

¹⁹ Iroompaquea iteroncanaquerogueti Amajirote Jesoshi iquenquetsatacaajiana-jirigueti itsatacaanejia, yatsomajanaja yoanaji jenoqui inquitequi isenampijapojarari Aapani Irioshi isavicapojaji itincamijempequiqui. ²⁰ Iriatimpajia yoayoitanaque intsavetantajianaque itsitacaguetejavaetanaquero guinteninintsipae. Iriraquea Amajirote yamijia queriquea yagavejacaajia queri yonigaantajia quero oacaantantatsica intati cameetsanjite intsajia quenijite iriratica itsavetantimojia queca teequea iramatavijajigueroji.

§ 16:19 Irira savicatsica itincamijempequiqui majirontatsica yanaajia queri itsipajia, iquemajirovecari majirontatsica.

QUENQUETSATSARENTSI OGANEJENCATATSICA ITIONCAQUECA IROCASHI

Antsatantaquemparoca

Ocativa iroguenti antsatantaquemparoca iroquetica itioncaqueca Irocashi itioncaco-
taquerigueti Jesoquirishito aisa itigarancanejia. Mavitetapojatsica itioncaqueca opajita
Yantajiguica Itigarancanejia Jesoshi. Irocashi iriguenti ogavintantatsica. Chooca quen-
quejajianquitsica tee irio jorio. Iriroquea Paavoro itsipatanacari iquenaguetanaquegueti
itsavetanquerogueti Iguenquetsatsare Aapani Irioshi guinteninintsipaequi (Ya. 16.10).
Ariquea inintajivetacagueti irimetojajiteri Paavoro, teequea irovashianteriji. Ipintsat-
acotanacariquea yamenaquerigueti itsaromentacari Jesoshi. Itsamajaqueroquea paperi
itioncantacaca cameetsa.

Tee intsajiteji quero ichoocaqueni itioncaquerogueti ocativa paperi. Chooca quen-
quejajianquitsica arica ichoocataque Iromaqui, irooca Cesareaqui, irooca Acayaqui.
Chooca quenquejanquitsica tequeratagueti intionqueroji Irocashi ocativa, iriqueti tion-
cacotaqueri Jesoshi Maricoshi, irooca ajagantsiniqui 60, irooca otsipaquei ajagantsini
arejevaetacaro 65. Irocashi tee intsipavetempariji Jesoshi, cotanquitsi itsaquero yan-
taguetaqueca Jesoshi, yapatsajavantaquerotari itioncaqueca itsipapae aisa icoacomaja-
jiaqueriquea oshequini amenaquerica Jesoshi intsamajatacotantaquemparica (1.1-4).

Itioncaquegueti Irocashi yonigaajiacaji quero icocani Jesoshi: iriovetaca Irioshima-
jaca, cotanquitsi iriotaque aisa caquinte. Irocashi itioncacojiaqueri choviquijianaquer-
ica Jesoshi irosati ichoocaquegueti Araini (3.23-38). Aisa itioncacojiaqueri ivoaquegueti
Joanca Viñacajatantatsica, aisa ivoaquegueti Jesoshi, aisa chaajaniquitirajagueti. Icant-
ajiacaji quero ancojiaquempani amanajiaquerigueti Aapani Irioshi (5.16; 6.12; 9.18; 11.5-
13; 18.1-8; 22.32; 23.40), itioncacojiaquero manquigarentsijia (quejecaroca iriniro Joanca
Viñacajatantatsica aisa iriniro Jesoshi: 2.36-38; 7.1-18, 37-38; 8.1-3; 10.38-42; 13.10-17;
15.8-10; 18.1-8; 21.1-4; 23.27-28), itioncacojiaqueri caquinteja teeca irishineventamaja-
jitempariji, quejejiaca chaajaniquirijia, coguitejacojianquitsica, aisa capiocapinitinirica
majirontatsica imentaquipae. Itsavetacotaqueri Jesoshi yantaguetaqueca, iparianac-
arogueti irosati iteroncapojirogueti. Itioncaciaqueneri jivatatsica pajitatsica Teopiro
aisa itsipajia teeca irijorijoigueti intsajiaqueneri iroomajaca ocativa quenquetsatsarentsi
iquemacojiaquerica Jesoshi (1.3-4). Irootaquequea itioncantajiacanarica cameetsaniji
intsajiaqueriniji Jesoshi iriguenti aajivajerineca maasano caquinteja aventajiaque-
mparinica, iriooca jorio, iriooca aisa teeca irijorijoigueti, aatoniji yatsipeventajigaro
igovaeguisherijia.

Irocashi itioncaqueneriqueate Teopiro

¹ Icarajiaquequea oshequi panquenapanquenaicaroca itioncacojiaquero maasano
aquemacojiaqueca acaniqui aguinteniguetaquagueti. ² Itioncaciaqueroquea itsatacaa-
jiaquenaca irirajia amenamajajiaquerooca maasano oparianacagueti arejevaetanac-
aro imaica, iriojiaquea tsavetantaqueroca. ³ Naatimpaquea napatsajavantaque-
roquea noteroncamajaqueroqueate maasanopae, aisa nocoacomajaguetaqueriquea
tsavetantaqueroca. Imaicaquea, Teopiro, namenaqueroquea cameetsataque non-
tioncaquempiquea nontsatacaamajaquempiroquea maasanopae, nonetsanamajaquero,
⁴ pintaquenerijite teetarite iramatavijajiguempiji tsatacaajiaquempiroca, iroomaja-
caquea.

Irashivantite Aapani Irioshi icamanqueriquea Sacaria inchoocataque irijanite

⁵ Coramani, imajirontagueti Erorishini Joreaquei, ichoocaquequea saserorote paji-
tatsica Sacaria. Ariquea yantavaetapiniquagueti teemporoqui* itsaromentantajitarica

* 1:5 teemporo. Oratica teemporo iroguenti inirojegui mapipanco choocatatsica Jerosarequi. Irira joriojia iroguenti
itaantapinitantarica viratsipae intsaromentantajitaquemparica Aapani Irioshi. Pamenero ovaantorite otsapaquei Mt.
21.23.

Aapani Irioshi, teetarite aparoquea irantavaetequeate Sacaria iriguentiquea itsipajiaca ichoviquijianaqueca itsipajiacaca Aviashini coramani. Choocaquea imanquigare opajitaquea Erisaveti.[†] Oquempetacariquea iroguentiquea ichoviquitanaqueca Aaroni.[‡]

⁶ Iriraqueate Aapani Irioshi yamenaqueriquea Sacaria aisa Erisaveti icomajamajajiaca, inetsanamajajiaquequea maasanopae icanquerica Amajirote itioncacojiqueroqueti coramani. Teetarite inchoocateji agavejanquitsineca incanque: “Tee irinetsanama-jateroji.”

⁷ Iriraquea Sacaria aisa imanquigare jac quenquevarimajajianaji, teequea inchoocatejiquea irijanite, teetarite irijanintimatempajiqueate Erisaveti.

⁸ Iroompaquea aapojajaqueate savincaguiteri yoayoaitantanacaca Sacaria aisa irirajia itsipajiacaca irantajigueneriquea teemporoqui itsaromentantajitarica Aapani Irioshi. ⁹ Igamejigaroquea isaserorotejiate jorio impegavijijiaquempa cameetsanijite intsajiaquenijite taaca opajitaquea irantajiaquequea aparopae irantajiaqueca. Iroompaquea yarejerejeipojacaquea teemporoqui icoguijiaquequeate, iroompaquea iriguentiquea otampaticatanaquequea Sacaria inquijaquenijite intsompogui intaaqueneriquea Aapani Irioshi casancavaneri. ¹⁰ Iroompaqueate aapojacaguetequea capichajaniquinivani intaaqueneriquea, iquijanaquequea intsompogui. Maasano omporoguijajianquitsica ichoocaquequea sotsiqui yamanajiaqueriqueate Aapani Irioshi. ¹¹ Icatiaqueate Sacaria intsompogui itaaguequeneriquea, yamenitsitariquea irashivantite Amajirote catiaqueate ocaratapojiguetequea aretare itaantajitaroca casancavaneri ocantanacaguete itincamijempequiqui. ¹² Yamenitsitariqueate ariquea icotanacani itsaroitsitanacaquea yamenanaquequeate intati. ¹³ Cotanquitsi icantiri ashivanti:

—Sacaria, aatoquea pitsaroguetsi, iquemaquempiqueate Aapani Irioshi pamanaqueriguete. Pimanquigare Erisaveti ovojaempiri pirijanite. Pimpajiteri Joanca. ¹⁴ Aviatimpaquea oshequi pishinevenquempari, aisa irishinejiaquempaquea oshequi caquinteja inquemacojiaqueriguete voaque. ¹⁵ Irishineventamajaquempariquea Amajirote. Aatoqueate imirimataroqueate vinoja aisa otsipapae cachojagueteatsica. Choocatirajaguete inchooacquea omotijaqui iriniro inchoocamajaqueriqueate Ishire Aapani Irioshi. ¹⁶ Iroompaquea intsaromentacaajiaquempariqueate igonorroja ichoviquijianaqueca Ishiraeri cameetsanijite intsaromentajiaquemparinijite Aapani Irioshi ashincarica. ¹⁷ Iriraquea pirijanite inquejetaquempariquea iriratica tsavetantatsica Iriashini, inchoocamajaqueriqueate Ishire Aapani Irioshi choocaquerica Iriashini paesatoniqui, iragavejacaqueriquea quejetacaquea yagavejacaqueriguete. Iriatimpa manaqueate irijivaqueriquea Amajirote intsatacaajiaqueriquea igonorroja irivetsinantajiavaquerita shiramparijia irijanijiate. Irirajiaquea teeca inquemisanteji intsatacaajiaqueriquea incomajamajajiaquempa cameetsanijite irinetsanatashitimentajiaquemparinijite Amajirote incoraquepojaqueguete.

¹⁸ Icantiri Sacaria:

—¿Queroquea noncoquempani nontsamajatantaquemparoca ocatica picanquenaca? Jac quenquevarimajatanajanatarite, aisa nomanquigare jac quenquevaromajatanaji.

¹⁹ Ariqueate icanqueriquea ashivanti:

—Naroguentiquea Gaviriero, catiimotarica Aapani Irioshi. Itigarancaquenaquea nonquenquetsatacaquempiniji noncamanquempi ocatica oguishinejantatsica. ²⁰ Cotanquitsiquea imaica teetarite pinquemisantavaquenaji, aatoqueate pagavejaja piquenquetsatajitsi arejevaetaquempa irivoajeguete pirijanite. Coajicaquea aapojacaguete onetsanatanacuempaca nocanquempica ariquea pinquenquetsatanaje.

²¹ Irirajia omporoguijajianquitsica sotsiqui yoguivaveguitarini teequea irisotojaeji Sacaria, iquenquejajiaquequea: “¿Quero ocotacani osamani ichoocatantacaca intsompogui teemporoqui?”

[†] 1:5 Erisaveti. Iguenquetsatsarequi guiriego Erisaveti opajita Elisabet. Yogui pitsocaqueroguete quimajareri iguenquetsatsarequi iriatimpa iconoagarantaca icanqueroquea Isabel (ancanque “Isavera”). Iconoacaquea itsipa yoguipitsocaquero icanqueroquea Elisabet. [‡] 1:5 Aaroni. Iriraquea Aaronini iriguentiquea saserorote paesatinica. Aisa maasano ichoviquijianaqueca iriguentijiaquea saseroroteja.

²² Iroompaquea isotoavetapojajaguete teequea iragavejajempa inquenquetsataje. Yamenajavaqueriguete itsajianaque chooca yamenaqueca intsompoguiqui teemporoqui. Iriatimpaquea teetarite inquenquetsatajequea, manaqueate ijicojicotapojiquea.

²³ Iroompaquea aapojajaguetequea savincaguiteri iteroncantanajaroca yantague-taqueneriguete Aapani Irioshi, yoanajiquea itsovironaquitequi. ²⁴ Ariquea oaque Erisaveti, imanquigare Sacaria, cotanquitsiquea ocancaniquea otsovironaquitequi 5 taai, teequeate onigaantajempa. ²⁵ Ocanquequea: “¡Caavijiqueate icavintsajamaquenaquea Nomajirote! Ipintsatacotaquenaqueate aatoniji yoguipashiventajana nogonoropae incantajaque: ‘Aricajate icatsimaqueroquea Aapani Irioshi jeroqueate teeca irijanintantempaji.’”

Irashivantite Aapani Irioshi icamanqueroquea Maria irooshipojiquea inchoocaque irijanite

²⁶ Iroompaquea aapojacaguete 6 otaate otsaraquitanaqueguete Erisaveti, iriraquea Aapani Irioshi ariquea itigaranquitsitariquea irashivantite pajitatsica Gaviriero iroanaque-quea Nasarequi Garireaqui. ²⁷ Aritaquequea ochoocatiquea oraniqui manquigarentsi pajitatsica Maria. Iroguenti majinaro iroaquera oquenquevarotanaque. Chooca cashiacaroca ipajitaquea Jose irooshivetapojaca irimanquigatemparoquea. Iriguen-tiquea ichoviquini Taavini imajirote joriojia coramaniqui. ²⁸ Iroompaquea iquijapoji ashivanti otsovironaquitequi, icantapojaqueeroquea:

—¡Pishinetempa, aviguenti ishineventamajatacaca Aapani Irioshi! Itsipataquempi Amajirote. Icaavintsajamajataquempi, anaaquero icavintsajajaqueerogueti otsipapae manquigarentsi.

²⁹ Oquemitsitariquea ariquea ocotanaca otsaroanaque oquenquejanaque: “¿Quero-caca icanque?” ³⁰ Icanqueroquea ashivanti:

—Maria, aatoquea pitsaroguiti, icavintsajamajataquempiquea Aapani Irioshi. ³¹ Imaicaquea irooshipojiquea inchoocapojempi pirijanite. Oncoajicaguitepoguetiquea irivoaqueguete pimpajitsitempariquea Jesoshi. ³² Caavijiquea iranaantaquequea iroganejencamajaquempaqueate iranaajaqueeriqueate maasano. Incantajiqueriqueate Irijanite Aapani Irioshi Anaantamajatsica. Iriraquea Amajirote Aapani Irioshi impeacaaquempari majirontatsica inquejetajempariquea Taavini choviquitaquerica. ³³ Impeaquempaquea Imajirojiate ichoviquijianaqueca Jacovoni, incoguitempaniquea irimajirontaquempa, aatoquea opejaa imajirontaguete.

³⁴ Cotanquitsiquea ocanqueri Maria ashivanti:

—¿Querocaquea oncotanaquempani picanquenaca? Tequeratatirajatarite quisho iroguenaji shirampari.

³⁵ Icanqueroquea ashivanti:

—Incoraqueaquequea Ishire Aapani Irioshi aviatimpaqui. Iriraqueate Irioshimajaca Anaantamajatsica iragavejacaquempitarite. Iriraquea pirijanite voanquitsineca aatotarite icovaeguishetimatatsi, incantajiqueriqueate Irijanite Irioshimajaca. ³⁶ Quejetacaquea pijitica Erisaveti jac quenquevarovaevetanajaquea, aisa icantajivetaroquea tee agavejempaji orijanintempaji, choocaquequea imaica irijanite, imaicaquea tsaraquitanaquequea icaratacotanaquequea yarejetapojacaroquea 6 otaate. ³⁷ Yagavejaquequeate Aapani Irioshi maasanopae, teequeate taaca opajitaquea manapit-satimatemparinca.

³⁸ Iroatimpaquea ocanquequea:

—Iintsija. Ariquea inquempetacaaquenaquea Aapani Irioshi maasanopae picantaque-naca. Naroguentiquea yashincaca.

Ariquea yoanaji ashivanti.

Maria oanaquequea onejaquitero Erisaveti

³⁹ Ariqueate onetsanatanacaquea Maria otaampinatanaque oanaquequea guintenin-intsiqui Joreaque otsempitsemapiapojacaguete. ⁴⁰ Arejetapojaca oquijapojiquea itsovironaquitequi Sacaria amenapojiroquea Erisaveti, oquenquetsatacaapojaqueo.

⁴¹ Oquemitsitaroqueate Erisaveti ocantapojaqueca Maria, ariquea icotanaca imoguecanaquequea irijanite omotijaqui, ichoocamajaqueroqueate Ishire Aapani Irioshi.

⁴² Oquenquetsatsitanacaquea ocarajencavaetanaquequea ocanque:

—Aviguentiquea icavintsajamajataque Aapani Irioshi. Maasano manquigarentsi icavintsajaqueroquea, cotanquitsiquea aviatimpa caavijiqueate anaaquero ipintsamajataquempi. Ariquea iquejetacaquea pirijanite voanquitsineca caavijiqueate icavintsajamajataqueri.

⁴³ ¡Ariotesaa, ocoraquetaquequea onejaquitana iriniro Nomajirote!

⁴⁴ Jeroquea noquemaquempiguete piquenquetsatapojaquegueti ariquea icotanacaquea nirijanite ishinevaetanacaquea imoguecanaque nomotijaqui.

⁴⁵ Icavintsajaquempiqueate Aapani Irioshi piquemisantavaqueritari, pitsaquequea irinetsanaqueroquea maasanopae itsatacaquempica.

⁴⁶ Ariquea ocanquequea Maria:

“Noquenquetsashirentanaquequea noshirequi nocanquequea: ‘Caaviji yoganejencamajata Nomajirote.’

⁴⁷ Noshinevaecaquea noshirequi, noshinevencariquea Aapani Irioshi meshijaanaca.

⁴⁸ Yamenaquenatari naroguentiquea yashincaca teetarite nashintempajiquea ipintsatacotantaquenaca.

Irosatiquea imaica maasano choocajianquitsineca ocaniqui quepatsiqui incantajiaquequea: ‘Caavijiquea icavintsajamajataquero Aapani Irioshi’,

⁴⁹ iroorijite iriraquea Agavejamajatatsica yantaquena oganejencaguetatsica. Saanca onaque ivajiro Iriomajatatsica.

⁵⁰ Icaniquea ipintsatacojiacaji maasano pincatsajiguirica.

Ariqueate iquejetacaajiacariquea avaesatiniteni, manaquea oavaetanaque.

⁵¹ Yonigaaqueroqueate yagavejica yantaguetaquequea ocaantantatsica intati. Yoguiworocajiaqueriquea aventacojiatsica.

⁵² Yoguisotoajiaqueriquea majirontajatsica.

Iriraqueate teeca irimajirontempaji yanaacaajivajiri.

⁵³ Iriraqueate taseajatsica yojocajiaqueneriquea cameetsaripae.

Iriraqueate ashintavaetatsica ejempacotia yoajiaqueriquea.

⁵⁴ Yamitacomajajiaqueriquea ishiraerijia, iriguentitarite irashimajaca.

Iquenquejajiaqueriquea icocaniquea ipintsatacomajajiacari.

⁵⁵ Icanqueritarite choviquijianacajica paesatoniqui:

‘Nococaniqueate nompintsatacoquempariquea Averaame aisa maasano inchoviquitanaqueca.’ ”

⁵⁶ Oraqueate Maria ochoocaquequea otsovironaquitequi Erisaveti aapojajaguete 3 taai, iroompaquea oanajiqueate ochoocatiguetei.

Ivoaqueguetei Joanca Viñacajatantatsica

⁵⁷ Ocoajicaguitetapojajiguetei arejetapojacaquea ovoantajemparica Erisaveti, ovoacotajiqueate iriguenti shirampari. ⁵⁸ Oshinevaetanacaqueate ocanca. Ariqueate iquemacajiaquerogueti maasano irooshiguetanquitsica aisa ojiguetica caaviji icavintsajamajaquero Aapani Irioshi, ishinejianacaquea maasano. ⁵⁹ Iroompaquea aapojajaguetei 8 savincaguiteri icoraquecoraqueitaquequea intotsaiquitacaantajiaquero ichonquimashi[§] chaajaniquitirajaca. Inintajivecaquea impajijiaquerimequea Sacaria iraacotsiquerime iriri. ⁶⁰ Cotanquitsiquea iriniro ocanquequea:

—Aato, ariguentiquea impajiquempa Joanca.

⁶¹ Iriatimpajia icantajianaquequea:

—¿Oo querocaquea ocoani? Tee inchoocatenicate pijiguetica pajitatsica Joanca.

⁶² Ariquea ijicojiaqueriquea Sacaria incanquequea ininqueca impajiquempa irijanite. ⁶³ Ariqueate iriatimpa ijicotsitaroquea inchapataquiqui intioncanquemparoqueate, yojocajiaqueneriquea intioncanquemparoquea, itionquitaquea: “Ipajita Joanca.” Mana yoayoaitanaquequea intati maasanojia. ⁶⁴ Iroompaqueate itionquitsitarogueti, ariquea icotanajaqueate iquenquetsatanajiquea, ishinevencariqueate Aapani Irioshi. ⁶⁵ Ariquea

[§] 1:59 Pamenero Glosario itsavetantajitiroguetei Totsaiquimashitagantsi, itotsaiquijiquero ichonquimashi.

iquemacojiaquerogueti maasano quempejitacoguecaroca yamenajianaquequeate intati. Ariquea iquejejianacaquea maasano choocajiatsica otsempipaequi Joreaniqui iquenquetsatacojiaqueroquea. ⁶⁶ Maasano quemacojiaquericaqueate iquenquejajianaquequea icantavacaajianacaquea: “¿Querocacaquea incotanaquempani irira chaajaniquiri oncoajicatapojajegueti?” Yamenajiaquetarite icavintsajamajataqueriquea Amajirote.

Sacaria ishineventamajatanacariquea Aapani Irioshi

⁶⁷ Iriroquea Sacaria iriri chaajaniquiri ichoocamajaqueriqueate Ishire Aapani Irioshi, iquenquejacaqueriquea icanquequea:

⁶⁸ “Caavijiquea yoganejencavaeca Amajirote Irioshimajaca ashintajiacajica aatimpajia ichoviquijianaqueca Ishiraeri.

Icoraquetashijiacajitari irajaiavajajiquea.

⁶⁹ Itigaranquimojiaquea Meshiantatsica agavejamajatatsica, irioquea ichoviquitanaqueca Taavini netsanapinitinirica ininqueca coramani.

⁷⁰ Irootaquequea icantsitacaca paesatoniqui iquenquejacaajiaquerigueti comajamajajiatatsica tsavetacojiaqueroquea icantaquerica.

⁷¹ Inchoocavetaquempaquea iroshequiavaetaquequea catsimajiacajica aisa semaneguintajiacajica, cotanquitsiquea irompejiacajiquea.

⁷² Iquenquejajiaqueritari maasano avaesatinite ipintsatacojiacariquea, iquenquejacoguitironi ivaquitote oganejencatatsica icantajiaquerica irinetsanajiaqueneri.

⁷³ Aapani Irioshi icantaqueriquea avaesatinite Averaameni coramaniqui icantamajaqueriquea

⁷⁴ irompejiacajiquea inchoocajiaquegueti catsimajiacajineca aatonijite atsaroimati antsaromentajiaquemparigueti anetsanajiaqueroniji inintacaajiacajica,

⁷⁵ ancomajamajajiaquempaquea, anetsanashirentimojiaquempari maasano savincaguiteriqui anijatirajajigueti.

⁷⁶ Aisa aviatimpa, irijani, incantacojiquempiquea: ‘Iriroquea tsavetacotantirica Aapani Irioshi Anaantamajatatsica’,

aviguentitarite jivaquerineca Amajirote, pincamantajiaqueriquea ishiraerijia irinetsanatsijiaquempaquea iroguijajiaqueri Amajirote incoraquepojaquegueti.

⁷⁷ Aisa pintatacaajiaqueriquea intsajianaquenijite queroquea incojiaquempani irimeshiantajitaquemparica

aatonijite iquenquejacaguiriquea Aapani Irioshi maasanopae igovaeguishere.

⁷⁸ Ipintsatacomajiacajitarite Aapani Irioshi intigancantaquemparica irira quenapojatsica inquitequi quempevetarica catsirincaiteri isotoguigueti,

⁷⁹ irisavincaguitetacojiaqueriquea pitsecacojianquitsica, irirajia guintenijanquitsica ot-simancacojiavetacarigueti metojagantsi.

Intsatacaajiacaji queroquea ancojiaquempani aatoniji ashoshoguiteta mana anchoocajiaque cameetsa.”

⁸⁰ Ariquea iquenquevaritanaquequea chaajaniquiri, itampishishirentanaquequea. Ariguenti ichoocaguitini osamani oquitamampororoipojigueti irosati yonigaampojaca ipariitanacaroquea itsatacaajiaqueri ishiraerijia.

2

Ivoaquegueti Jesoshi

(Mt. 1.18-25)

¹ Ariqueate chaajaniquitirajagueticquea Joanca icanquequea majirontatsica Sesa Aogoshito intioncacojiaquempaquea maasano caquinteja guinteninintsipaequi intsatantaquemparica quero icarataqueni maasano, ² teetarite intioncacotempanica coramaniqui. Iroaqueratarite intioncacotaquempaquea imaica ipeacagueti Shirenio quejemajirovetacarica Sesa irinetsanaguequeneriquea maasano ontaniqui Shiriaqui.

³ Iroompaquea yoayoaitanaquequea maasano querocagueti ichoocajiavetagueti choviquijianaquerica coramani, intioncacojiaquempaqueate.

⁴ Irireaquea Jose iquenapojaque Nasarequi Garireaquei, itoncotoncoguetanaque Joreaquei, yoanaquequea iguinteniqui Taavini, opajita Verene, iriotarite choviquitanaquerica coramani, irio ivaesatiniteni. ⁵ Yoanaque ontaniqui intioncacotempaniji, itsipatanacaroquea Maria icashiacaca irimanquigaquempaca, tsaraquitaquequeate. ⁶ Ariquea yarejevipojacaguete Verenequi aapojaquea ovoacotantajempaca Maria. ⁷ Ovoaqueriquea opariacaca. Ampiguiricacotantacariqueate paañoqui, ojoquijitantacariquea ishecatantaca viratsi, teetarite onchoocavetempaji querocampate irimaapojeni tsovironaqui qui imaantapinijitacaca.

Irashivantijitete Aapani Irioshi yonigaajipojacari quempoguijajiguirica ovejapae

⁸ Ontaniquiquea irooshiquegueti Verene ochoocaquegueti cataromashi ichoocajiquequea quempoguijajiguirica oveja itinajaventajiacariquea irovejajiate. ⁹ Ariqueate yamenitsitari catiaca irashivantite Amajirote. Itsirencacotantajipojacariquea iroganejencare Amajirote, itsaroamajajianaquequea. ¹⁰ Cotanquitsiquea icantajiguiri ashivanti: –Aato pitsaroajiguisi. Iroguentiquea nocoraquetantacaca noncamanquempiquea shinetacajiaquempineca pishinemajatantajianaquempaca aviatimpajia aisa maasano pigonorojia. ¹¹ Ontaniquiquea ontaniqui Verenequi ichoocavetaguete Taavini coramaniqui voaquequea Meshiajiaquempineca, iriotaque Quirishito* Amajirote. ¹² Imaicaquea poapoaitanaquegueti pamenajipojaqueriquea ampiguiricacotacaquea paañoqui yojoquijicaquea ishecatantaca viratsi. Irootaquequea pintsatantaquempaca teetarite namatavijajiguempiji.

¹³ Taampina iconijatsitapoja iriatimpaqui itsipapae inquitequitica catintijicaquea icarapiovaetaque. Ishineventajiacariquea Aapani Irioshi icantajigui:

¹⁴ “Ontaniquiqueate jenoqui incantajiqueriqueate: ‘Caavijiquea yoganejencamajata Aapani Irioshi.’

Acaniquiquea quepatsiqui inchoocajiaquequea cameetsa maasano incavintsajajiaquea Aapani Irioshi.”

¹⁵ Ariqueate yoayoaitanajiguete irashivantijitete Aapani Irioshi jenoqui inquitequi, iquenquetsatavacaajianacaquea iriatimpajia icantajigui:

–Jamequetishiatsi ohoaitanaque Verenequi amenajiaquiteriqueate itsatacajianacajica.

¹⁶ Yoayoaitanaquequea, itaampinatanaque yarejerejeipojaca yamenajipojiroquea Maria aisa Jose jeri aisa chaajaniquiri joquijitaca, yojoquijitantacaroquea ishecatantaca viratsipae. ¹⁷ Iroompaqueate yamenajipojiriguete itsavetantajipojaqueroquea maasanopae icamanquerica irashivantite Aapani Irioshi irashi chaajaniquitirajaca. ¹⁸ Maasano quemajiavaquerica itsavetantajiaqueroquete yamenajianaquequeate intati. ¹⁹ Oraquea Maria ococaniquea oquenquejaguitironiquea maasanopae, teetarite ompeacotemparoji. ²⁰ Ariquea yoayoaitanajiquea quempoguijajiguirica oveja, ishineventajianacariquea Aapani Irioshi, yamenajiaquequeate onetsanatanacaquea maasanopae icantajiaquerica irashivantijitete Aapani Irioshi.

Yaajitanaqueriquea Jesoshi teemporoqui

²¹ Ariqueate yarejetacotapojacarogueti savincaguiteri 8 itotsaiquijiqueriquea ichonquimashi irijanite Maria. Ipajijiqueriquea Jesoshi, aritarite canquero irashivantite Aapani Irioshi itsatacaquitiroguete tequerataguete inchoocatimateji.

²² Ariquea iriraquea Jose aisa Maria inetsanaqueroquea ocanqueca itioncacotanaqueca Moishishini,† jeroquea arejetapojaguete savincaguiteri incantantaji-

* 2:11 Quirishito. Iguenquetsatsarequi guiriegogia icanqueguete Christos (Quirishito) manaquea ocanque “Ishaguijitaqueca” aisa “Icoguaqueca”, irishaguijitaqueritari orejiqui orivo irirajia icoguijiaqueca impeaquempa imajirojiate irooca isaserrotejiate. Iriira Quirishito iriotaquequea itsavetacotsitacaca tsavetantajisica coramanitica intigarancaque Aapani Irioshi impeaquempaniji Imajirojiate maasano. † 2:22 Coramani Aapani Irioshi itioncacaqueriguete Moishishi (Irev. 12.2-8) icanti ovoacotajeguete manquigarentsi irijanite, oguijacotempa 40 savincaguiteri aato oita teemporoqui. Avisanaqueguete 40 savincaguiteri oanaque teemporoqui ojocapojaqueneri saserrote ovejajanique aisa emoreni (irioca jeento) intaashitaquenerica Aapani Irioshi. Aatoguete ichoocati ovejate cameetsataque ojocaque-neri mavite emoreni (irioca jeento).

aquemparica saserorote: “Cameetsatanajimpi imaica aatoniji picovaetajiro teempero itsaromentajitarica Aapani Irioshi”, yoanaquequea Jose aisa Maria Jerosarequi yaajianaqueriquea Jesoshi teemperoqui incanquequea: “Jeri irica irijani.”²³ Ariquea iquejetacaajiacaroquea imaica cameetsanijite irinetsanatimentajiaqueronijite Itioncacaantaqueca Amajirote coramanitica ocanquequea: “Maasano iriquetica pipariacaca pirijanincaca pojocajeneriquea Amajirote irashintajempariniji.”²⁴ Yooyoaitanaquequea yaajianaquequea viratsi yojocajiaqueneriquea saserorote intajiaqueneriquea Aapani Irioshi, irinetsanajiaqueroniji Itioncacaantaqueca Amajirote ocanquegueti irojocajiaqueneriquea “mavite jeento irioca mavite emoreni iriaqueraca quimoponatananquitsica.”

²⁵ Oraniquiquea Jerosarequi choocaquea aparo tsaromentamajatarica Aapani Irioshi, ipajitaquea Shimeone. Icomajamajatacaquea. Yoguijaguitiniqua coramaniqui incoraquequequea Meshiantanquitsineca shinetacaajiajemparineca ishimampojancajiacagueti maasano ishiraerijia. Iriguentiquea choocaqueri Ishire Aapani Irioshi.

²⁶ Iriotaquequea cantaquerica aatotagueti yameniri incoraquequegueti Meshiantanquitsineca intigarancaqueca Aapani Irioshi, aatotajate imetojita. ²⁷ Irira Ishire Aapani Irioshi itigaranquitariquea Shimeone iroanajequea teemperoqui, iquijapojajiquea otantotacagueti. Ariquea ichooaque icoraquejiaquegueti Jose aisa Maria yamajiaquerigueti Jesoshi irinetsanataqueronijite itioncacotanaqueca Moishishini coramanitica.

²⁸ Iriaquea Shimeone yamenavaquerigueti Jesoshi yaitsitariquea yatsomajitsitari ishin-eventanacariquea Aapani Irioshi icanqueriquea:

²⁹ “Imaicaquea, Nomajirote, jac netsanatapojaca picanquenaca coramanitica. Pininegueti nometojaque imaica naatimpa paajanire, cameetsavaeque.

³⁰ Imaicatari nonejaqueri noquiyaqui meshiantanquitsineca pitigarancaqueca,

³¹ pinetsanatimojiaquerica maasano caquinteguetanquitsica.

³² Intsirencoshirentajiaqueriquea teeca iriojia joriojia intsajiaquenijite queroquea incojiaquempani irimeshiantajitaquemparica.

Inquemacojiaquerigueti irishinevaejiaquempaqua, irishineventajitaquempariquea ishiraerijia pashintajaca.”

³³ Ariquea iquemavaquerigueti Jose aisa irinero Jesoshi iquenquetsatacoquerigueti yamenajianaquequeate intati. ³⁴ Iriaquea Shimeone yamanacoventajiaqueriqueate icanquequea incavintsajamajiaqueriquea Aapani Irioshi, ariquea icanqueroquea Maria irinero Jesoshi:

—Pamenequea quero incotanaquempani iricatica, irio iromposantajiaquempaca oshequini Ishiraeriqui, irio aisa incatiantajianajempaca itsipajia oshequini.[‡] Ironigaantaqueroquea inintaqueca Aapani Irioshi, cotanquitsiquea inchoocagarantajiaquequea oshequini manintaquerineca, ³⁵ onconijavaetantanaquempaca iquenquejajiaqueca. Maasanopaequea ocativa manaqueate oshimampojancacaaquempiquea aviatimpa, manaquea onquejevequemparo irisatajajitempigueti osotoatsantsamenivaeque.

³⁶ Ariquea ochoocaquequea oraniqui aparoquea manquigarentsi tsavetantiroca icanqueroa Aapani Irioshi opajitaquea Aana, iroguentiquea irorijanite Panoerini ichoviquitanaqueca Ashereni coramanitica. Iroatimpaquea oquenquevarovaetini coramani. Oraqueate iroaqueragueti oquenquevarotanaquegueti imanquigajivecaroquea, ariquea anaanajagueticquea 7 ajagantsini imetojaquequea manquigavecaroca. ³⁷ Imaicaquea ochoocatashitajaquea ocaravaetanaque 84 ajagantsini. Ocoguitaniqua ochoocapiniquequea teemperoqui. Osanticopiniqueroquea osheca teequea oshecatajempaji cameetsanijite osavicavenquerinijite Aapani Irioshi amanaqueriquea savincaguiteriqui aisa pitsecariqui.

³⁸ Irooqueate amenavaquerigueti Jesoshi yamajiaquerigueti ocoraquepojqieate ocanqueriquea Aapani Irioshi:

‡ 2:34 Icanquegueti irio iromposantajiaquempaca icantacotaqueri irirajia caarica quemisantirica Jesoshi impomat-sajiaquempaqua quejetaca iromposaquempa. Icanquegueti irio aisa incatiantajianajempaca icantacotaqueri irirajia quemisantaquerineca Jesoshi, irogueshishirentajigueri incatiashirentajianaje.

—¡Ariotesaa, cameetsavaeque!

Ariquea otsavetacotantaqueriquea ocantajiaqueriquea maasano oguijajiaquerica incoraqueque ompetajemparoneca Jerosare.

³⁹ Iroompaquea Jose aisa Maria iteroncajianaquerogueti inetsanajiaquerogueti maasanopae Itioncacaantaqueca Aapani Irioshi icampojaqueate Garireaque, yoayoaitanaquequea iguintenicagueti Nasarequi. ⁴⁰ Iriraquea Jesoshi arimpa ijatiriquea iquenquevaritanaque itampishitanaquequea, aisa itsamajati iquenquejamajatanaque. Caavijiquea icavintsajamajataqueri Aapani Irioshi.

Yoaquitigueti Jesoshi teemporoqui

⁴¹ Icantacoguitani iriri aisa iriniro aapojajagueti savincaguiteri Paashicoa yoayoaitapiniquequea Jerosarequi. ⁴² Iroompaquea yajagantsitacocagueti Jesoshi 12 irajagantsite, aapojajagueti aisa Paashicoa, ariquea itsipatanacari. ⁴³ Iroompaquea anaanajaguetiquea Paashicoa icantajianajagueti, iriraquea Jesoshi chaajaniquitirajagueti ichoocatajiquea oraniqui Jerosarequi. Cotanquitsiquea Jose aisa iriniro Jesoshi teequea intsajigueti, ⁴⁴ yamenajiaquequea ariji yoguijaguijaitanajiriquea igonorroja. Ariquea opitsecavetanajagueti yamenaguevetajari tee anejeriji, itsitacaguevecaroquea oraniqui icoacotsivetariquea ijiguetica aisa itsipatsipaicaca, ⁴⁵ teequea iramenajigueriji, tee anejeriji. Osavincaguitevetanacagueti yoayoaitajatiquea Jerosarequi iramenaguetapanajanteritaquea. ⁴⁶ Ocarataque 3 savincaguiteri yamenaguetajiri, ariquea yamenapojajiri quijaque otantotacagueti teemporo, savicaquequea iconoajiacariquea tsatacaantajiguiroca itioncacotanaqueca Moishishini coramanitica, iquemisantajiaqueriquea icoacotantavaqueroquea. ⁴⁷ Iriatimpajia icoacotsimajavetariquea manamajaguetanquitsica, cotanquitsiquea iriatimpa yoguisotoajiaqueneriquea. Maasano quemajiaquerica yamenamenaitanaquequea intati, yamenajiaqueriqueate caaviji itsamajati.

⁴⁸ Oraquea Maria aisa Jose yamenapojajirigueti yamenajianaquequea intati. Ariquea ocanceriquea iriniro:

—¿Taaquea, irijani, piquejetantajiaquenaca imaica? Namenaguevetajimpiqueate naatimpa aisa piri notsitacaguevecaroqueate, tee anejempiji, ocantavaetaquitanaquea tsarorec.

⁴⁹ Iriraquea Jesoshi icanqueroquea:

—¿Queroquea ocoani pitsitacavaetantavetanacaroca pamenajiaquenaquea? ¿Arim-pate tee pintsateji iroguentiquea nosavicaventamajaque inintaguetica Aapani?

⁵⁰ Cotanquitsiquea iriatimpajia teequea intsajigueti taacaquea icanqueca.

⁵¹ Ariqueate itsipatsipaitanajariquea Nasarequi. Iriatimpaquea icocaniquea iquemisantamajatiriquea iriri aisa iriniro. Iroatimpaquea ocoaniquea oquenquejacoqueroquea maasanopae icanqueca, teequea ompeacotemparoji. ⁵² Iriraquea Jesoshi arimpaquea iquenquevaritanaque, aisa arimpaquea itsamajatanaque. Iriraquea Aapani Irioshi ishinevencariquea, aisa caquinteja maasano ishineventajiacariquea.

3

Itsavetantanaquequea Joanca Viñacajatantsica oquitamampororoipojaquegueti (Mt. 3.1-12; Mr. 1.1-8; Jn. 1.19-28)

¹ Coramani imajirontaca Tiverio Sesa Iromaqui. Iroompa ovegaratacagueti 15 ajagantsini imajirontacagueti, choocaquea iramajirore pajitatsica Pontsio Pirato itigarancaqueca irinetsanajiaqueneriniji Joreaquitica. Iriraquea Erorishi* iriguentiquea netsanajiguirica Garireaquitica. Choocaquea iriguentijeguite pajitatsica Jeripe, iriatimpaquea iriguentiquea netsanajiguirica Itoreaquitica aisa Teraconitequitica. Iriraquea netsanatantsica ontaniqui Aviriniaqui ariguenti ipajica Irisaniashi. ² Aisa choocaquea mavite saserorote anaantamajatanquitsica. Aparoquea ipajitaquea Anashi, iriraquea itsipa ipajita Caipashi. Iriraquea Joanca, irijanite Sacaria, choocaquea ontaniqui,

* 3:1 Iriratica Erorishi irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

ichoocaquequea osamani oquitamampororoitapojigueti. Ariquea iquenquetsatacaqueri Aapani Irioshi. ³ Iquemaqueriguetei Joanca yoanaquequea icantanacaroquea Jororanequi, itsitacavaejianaqueriqueate choocajiatsica oraniqui, itsavetantavaetanaque-roqueate icantajiguiriquea: “Pincantashitajiaianajempa povashiantajianajero pipeacaaguishejiavecaca, piviñacajajianaquempaquea aatonijite icatsimatimentajiguimproquea Aapani Irioshi maasanopae pigovaeguisherejia, manaqueate irishetajempiroquea.”

⁴ Aritarite itionquicaroquea Isaiashini coramani icanquequea:
“Inquenquetsataquequea oquitamampororoitapojigueti iririjencani, incanquequea:
‘Pinetsanatahijiaquaempari Amajirote inquenantapojempaca,
pintanarejagueteneri iguenavoquiropae ontampaticapoquitantanaquempaca.

⁵ Querocaquea oquichovitoquiaguacagueti intijajiquero cameetsanijite ovepampajantanajempaca.

Oraquea otsempiguetatsica aisa otsonquiinapae irivepampajajiguequero.
Oraticaquea quenavoquirontsi ticopoquiguetanquitsica ontampaticavoquitanaque.
Irooqueate quenavoquirontsi quichovitoquiaguetaquitsica irivevajajiguetaquero-queate.

⁶ Ariquea iramenajiaque maasano caquinte quero icota Aapani Irioshi imeshiantigueti.’
”✠

⁷ Oraqueate yoayoaitanaqueguetei tirorerere caquintejia iriviñacajajigueriquea Joanca, iriatimpa icantajiaqueriquea: “¡Quejejiaguempiquea irijanijiate sanatari! Pitsanirovetacaquea. ¿Taate cantajiaquempi picoraquecoraqueitantacaca acaniqui noviñacajajiaquempiquea aatonijite icatsimajiguimpiquea Aapani Irioshi oncoramanitapojajegueti incatsimatimentajiaqueriguetei maasano igovaeguisherejia? ⁸ Iintsija pinetsanamajajianaquempaja iramenajiaquempinijite maasano arimajaca picantashitajiaianajempovashiantajianajero picovaeguishevetacaca, pintsaromentamajatanajemparija Aapani Irioshi. Imaica aatoja picantajigui: ‘Aatoqueate icatsimajigana Aapani Irioshi, naroguentitari ichoviquijiani Averaameni.’ Pamenajigueroja oratica mapiporoqui. Irininqueguetei Aapani Irioshi iragavejaquequeate impecaajiaquemparoquea ichoviquivaejianaqueca Averaameni. ⁹ Jac, yaajitiro poshontyo, itsitijitanaquero inchaquijitaquero ovari maasano inchoo teeca oncameetsateji oitsoqui, ariquea intajaiquero paamariqui.”

¹⁰ Iriatimpajia icantsijigariquea:

—¿Querocaquea noncojiaquempani?

¹¹ Icantiriquea Joanca:

—Choocagueti ashintanquitsica mavite iitsaare irojocagaranqueneriquea quericaca teeca inchoocatacoteji. Aisa quericaca choocatacotanquitsica isheca irojocaqueneriquea teeca inchoocatacoteji.

¹² Ariquea ichoocajiaquequea oraniqui capiocapinijiguinirica majirontatsica imentaquipae,† iroguentiquea icoraquetashijiaque iriatimpajia aisa incampojeriquea Joanca iriviñacajajiaqueri. Iquemajiaqueriguetei iquenquetsavaequeguetei Joanca icantsitanacaquea iriatimpajia:

—Tsatacaantantatsica, naatimpajia, ¿querocaquea noncojiaquempani?

¹³ Icantsijigariquea:

—Imaicaquea aviatimpajia aatoja poganaajiguiniriquea pigonorojia, iroguenti paajique intati icanqueca majirontatsica.

¹⁴ Ariquea icoacojiaqueriqueate coaretapae aisa icantsijigariquea:

—Naatimpajia, ¿querocaquea noncojiaquempani?

Icantajiguiriquea Joanca:

—Aviatimpajia aatoqueate paapitsajiguiritsi taaca opajitapae yashincaca itsipapae aisa aatoquea picantajigui: ‘Aatoguetei pojocanaro noninqueca noncatsimaquem-
piquea.’ Aatoja pamanantajigui imentaquipae itsipa, aatoja picantitsi: ‘Aatoguetei
pojocana nontsojevenquem-
piquea incatsimaquem-
piquea majirontatsica.’ Iriraquea

✠ 3:6 Is. 40.3-5. † 3:12 imentaqui. Coramani tee inchoocavetempaji quenapapana ipecaantajitaca paperipana, iroguenti choocatanquitsi imentaqui cavorejatatsica. Irootaque ivegaratantajitaca coramani.

imentaquitsite ivegaraquempica majirontatsica ariotapojaquequea, aatoquea pinintajiguitsi itsipapae.

¹⁵ Irirajaquea maasano capiocajianquitsica oraniqui ariquea icojianaca inintamajajianaquequea intsamajajiaqueri Joanca iriocajate Quirishitotatsica. ‡ ¹⁶ Cotanquitsiquea Joanca icantajiguiriquea maasano: “Naatimpa iroguenti nantaque noviñacajatantajiaquempiro oja iramenantajiquemparoca arimajaca picantashitajiaianaca povashiantajianajiroquea pipeacaaguishetacaca, cotanquitsiquea incoraquepoje impoitapojenaneca caaviji yanaaquenaquea yagavejamajati. Ooshiatsi, aatotarite noquempejitaritsiquea iriatimpa nompeaquempame amiquerineca noishorejacoquerimeca igaviguitire. Iriatimpa inquempetacaantaquemparo iroviñacajatantajiaquempiri Ishire Aapani Irioshi aisa paamari. § ¹⁷ Incoraquepojaquegueti iroashiguetajempariquea queri tsaroven tamajacarica. Inquempetanaquemparoquea aguerogueti oitsoqui, asagorejitemparo, ampishoncavaqueroquea oncoraquejencaquegueti chovigajenca, aanaqueroquea osagoma, onchoocatashitanaquempa oitsoqui. Aguijaavaqueroquea shimatoqui anquem poguijitemparoquea. Oraquea osagoma antaitemparoquea. Ariquea inquempetaquempaquea Amajirote incapiocajipojaqueriquea tsaroven tamajacarica intsipatsipaitana jempari jenoqui ichoocatigueti Aapani Irioshi. Iriraquea teeca intsaroven tajiguempariji intigarancaqueriquea camorecariqui teeca ontsivacavaete, incoquempaniquea irantsipevaejiaquempaquea.”

¹⁸ Ariquea iquejetacaquea imaica Joanca icamantajiaqueri maasano quero incoji aquempani, oshequi icamantaguetaqueri, itsavetacotimojiaqueri Quenquetsatsarentsi Oganejencatatsica.

¹⁹ Aisa icantomajaqueeriquea majirontatsica Erorishi, yamenaqueriquea yaapitsaqueeriqueate iriguentijeguite imanquigare pajitatsicaquea Eroriashi. Teetarite aparoquea onchoocateji ocatica. Icantimentagueeriquea aisa taaca opajitapae icovaeguisheguetacaca. ²⁰ Ariquea yogaavaetanaca Erorishi, yogavitaquero oca: isantanatacotsitariquea Joanca.

Iviñacajatacaantacaquea Jesoshi

(Mt. 3.13-17; Mr. 1.9-11)

²¹ Oraqueate tequerataguetiquea irisantanatacojiteriji Joanca, choocatirajaquea iviñacajatantaguitiniquea, ariquea iviñacajatacaantajiacaca oshequini caquinteja, ariquea iquejetacaquea aisa Jesoshi iviñacajatacaantacaquea iriatimpa. Ariquea iriraquea Jesoshi yamanaqueriquea Iriri. Iroompaquea yamanaquitiguiriquea otanarejanacaquea inquite ²² yamenajitavaqueriquea Ishire Aapani Irioshi iquempetapojacariquea emoreni yampiguiricashipojacariquea iriatimpaqui. Ariquea iquenquetsajencajitanaque jenoqui inquitequi, icanque:

—Aviguentiquea Irijani nopintsamajatacaca, noshineventamajataquempiquea aviatimpa.

Choviquijianaquerica Jesoshi

(Mt. 1.1-17)

‡ 3:15 Quirishitotatsica. Iguenquetsatsarequi guiriegojia icanquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajatsica coramanitica intigarancaque Aapani Irioshi impeaquempaniji Imajirojiate maasano. § 3:16 Paamari oquenquetsatacotaquero mavitepae. (1) Pamenero otsapa 17 acaniqui ocantacoquerogueti camorecari intaantajitaquempaca caarica netsanatiro ininquea Aapani Irioshi. (2) Pamenero aisa Ya. 2.3 ocantacoquerogueti icoraquepojaquegueti Ishire yamenajiquero quejevetaca paamari. (3) Pamenero aisa 1 Co. 3.13 ocantacoquerogueti iramenantajitaquemparogueti yantaguetaqueca maasano caquinte.

²³ Ariquea yajagantsitacotanaquequea Jesoshi 30 ajagantsini iparianacarogueta itsat-acaantaque. Ijijitaquejiquea iriojiquea irijanintamajatari Jose, cotanquitsiquea iriguentiquea choviquitanaqueri Eri.*

²⁴ Iriraqea Erini iriguenti irijanite Matate.

Irira Matateni iriguenti irijanite Irevi.

Irira Irevini iriguenti irijanite Merequi.

Irira Merequini iriguenti irijanite Jana.

Irira Janani iriguenti irijanite Jose.

²⁵ Irira Joseni iriguenti irijanite Matatiashi.

Irira Matatiashini iriguenti irijanite Amoshi.

Irira Amoshini iriguenti irijanite Naomo.

Irira Naomoni iriguenti irijanite Eseri.

Irira Eserini iriguenti irijanite Nagai.

²⁶ Irira Nagaini iriguenti irijanite Maati.

Irira Maatini iriguenti irijanite Matatiashi.

Irira Matatiashini iriguenti irijanite Semei.

Irira Semeini iriguenti irijanite Joseco.

Irira Joseconi iriguenti irijanite Jora.

²⁷ Irira Jorani iriguenti irijanite Joanani.

Irira Joananini iriguenti irijanite Iresa.

Irira Iresani iriguenti irijanite Sorovaveri.

Irira Sorovaverini iriguenti irijanite Saratieri.

Irira Saratierini iriguenti irijanite Neri.

²⁸ Irira Nerini iriguenti irijanite Merequi.

Irira Merequini iriguenti irijanite Ari.

Irira Arini iriguenti irijanite Cosame.

Irira Cosameni iriguenti irijanite Erimarami.

Irira Erimaramini iriguenti irijanite Eri.

²⁹ Irira Erini iriguenti irijanite Josoe.

Irira Josoeni iriguenti irijanite Eriesere.

Irira Eriesereni iriguenti irijanite Jorimo.

Irira Jorimoni iriguenti irijanite Matate.

³⁰ Irira Matateni iriguenti irijanite Irevi.

Irira Irevini iriguenti irijanite Shimeone.

Irira Shimeoneni iriguenti irijanite Joraa.

Irira Joraani iriguenti irijanite Joname.

Irira Jonameni iriguenti irijanite Eriaquime.

³¹ Irira Eriaquimeni iriguenti irijanite Merea.

Irira Mereani iriguenti irijanite Mena.

Irira Menani iriguenti irijanite Matata.

Irira Matatani iriguenti irijanite Natani.

³² Irira Natanini iriguenti irijanite Taavi.

Irira Taavini iriguenti irijanite Isai.

Irira Isaini iriguenti irijanite Overi.

Irira Overini iriguenti irijanite Voose.

Irira Vooseni iriguenti irijanite Saramoni.

Irira Saramonini iriguenti irijanite Naasone.

³³ Irira Naasoneni iriguenti irijanite Aminaravo.

* 3:23 Omanaca ocatuca oguipitsocaquerogueta. Oraquea iguenquetsatsarequi guiriegojia icanquegueti huios, chooca mavite aguenquetsatsarequi oguipitsocaquerogueta: oconoagarantaca ocanque "irijanite", oconoagarantaca aisa ocanque "ichoviquitanaqueca". Omanaca aisa otsipa: tee onconigamajateji queri ocantacotaqueca ichoviquitanaqueca Eri. Iriogueta Jose ocantacotaque guiriegotsaqui ocanquegueti huios...tou Eli, oguipitsocaquero "irijanite Eri". Cotanquitsiquea iriogueta ocantacotaque Jesoshi, oguipitsoqueroquea "ichoviquitanaqueca Eri". Mateo 1.16 ocanti iriri Jose ipajita Jacovo, irootaquequea namenantacaca acaniqui irio ocantacotaque Jesoshi ichoviquitanaqueca Eri. Chooa otsipa itioncaqueca jorio coramani ocanti iri Maria ipajita Eri. Irioca tioncacotanquitsica acaniqui, iriotari choviquitanaquerica Jesoshi.

Irira Aminaravoni iriguenti irijanite Arame.†

Irira Arameni iriguenti irijanite Eserome.

Irira Eseromeni iriguenti irijanite Parese.

Irira Pareseni iriguenti irijanite Joraa.

³⁴ Irira Joraani iriguenti irijanite Jacovo.

Irira Jacovoni iriguenti irijanite Ishaaco.

Irira Ishaaconi iriguenti irijanite Averaame.

Irira Averaameni iriguenti irijanite Tare.

Irira Tareni iriguenti irijanite Nacori.

³⁵ Irira Nacorini iriguenti irijanite Serogui.

Irira Seroguini iriguenti irijanite Iragao.

Irira Iragaoni iriguenti irijanite Peregui.

Irira Pereguiini iriguenti irijanite Evere.

Irira Evereni iriguenti irijanite Shera.‡

³⁶ Irira Sherani iriguenti irijanite Cainane.

Irira Cainaneni iriguenti irijanite Arepaquisare.

Irira Arepaquisareni iriguenti irijanite Sheme.

Irira Shemeni iriguenti irijanite Noe.

Irira Noeni iriguenti irijanite Irameco.

³⁷ Irira Irameconi iriguenti irijanite Matosare.

Irira Matosareni iriguenti irijanite Enoco.

Irira Enoconi iriguenti irijanite Jarete.

Irira Jareteni iriguenti irijanite Maarareere.

Irira Maarareereni iriguenti irijanite Cainane.

³⁸ Irira Cainaneni iriguenti irijanite Enoshi.

Irira Enoshini iriguenti irijanite Sete.

Irira Seteni iriguenti irijanite Arai.

Irira Araini iriguenti irijanite Aapani Irioshi.§

4

Inintavecaquea ampatsini irantacaaquerime Jesoshi teeca irininteji Aapani Irioshi

(Mt. 4.1-11; Mr. 1.12-13)

¹ Oraquea iroaqueragueti iviñacajatacaantacagueti Jesoshi Jororaneniqui ichoocama-japojaqueriqueate Ishire Aapani Irioshi, yaanaqueriquea ontaniqui oquitamamporo-roitapojaquegueti. ² Ariquea icoraquetashiqueriquea imajirote ampatsini yaseresereta-queriquea yamentavetacari inintavecaquea irantacaaquerime teeca irininteji Aapani Irioshi. Ariquea ichoocaque Jesoshi oraniqui oavaetanaquequea 40 savincaguiteri, teequea irishecatempaji. Ogatsimajatanaqueri itase. ³ Iroompaquea icantaqueriquea ampatsini:

—lintsija arimajagueti aviguentica Irijanite Irioshi iintsijate pincanteroja ocativa mapi ompeanaquempata pan pishecataquempaca.

⁴ Cotanquitsiquea Jesoshi icanqueriquea:

—Choocatarite otioncacocagueti ocanquequea: ‘Teequea aparo ontampishitacaanteji isheca caquinte, jero aisa maasano icanqueca Aapani Irioshi.’

⁵ Iroompaquea yaanaqueriquea jmm agasataanquitsica yonigaaguetaqueri maasanopae quepatsi yashincaca majirontaguetatsica aisa maasanopae yashintajiacaca.

⁶ Icanqueriquea:

—lintsija nompeacaitsitempiquea imajirojiate maasano, nojocaquempiquea maasano yashintajiacaca. Aritarite maasanopae ocativa pamenaguequeca iroguentitari nashi. Naatimpaquea nagavejaque nojocaqueneri quericaca nonintacaaqueca. ⁷ Arigueteja pigueroavenquena pintsarovenquena, pashintaguetaquemparoquea maasano.

† 3:33 Oconoagarantaca paperi ocanti ocantiqui: “Irira Aminaravoni iriguenti irijanite Arameni. Irira Araminini iriguenti irijanite Arini.” ‡ 3:35 Shera. Icantajitiri aisa “Sara” (Sala). § 3:38 Icanque Irira Araini iriguenti irijanite Aapani Irioshi, teenica inchoocatenica caquinte irijanintacarica Arai, mana ipeacaacariquea Aapani Irioshi.

⁸ Icantsitanajaquea Jesoshi aisa icanqueri:

—Choocatarite otioncacaguetei ocanquequea: ‘Pintsarovoltaquemparija Majirontamajatatsica Pirioshite, aparoqueate iriguenti pimajirontamajaquempa.’

⁹ Iroompaquea ariquea yaanaqueriquea Jerosarequi icatiacaapojacariqueate teemporoqui itsarovoltaajarica Aapani Irioshi ochoviinatapojacaguetei ocaravaequequea jenoqui ocanca, icanqueriquea:

—Iintsija arimajaguetei aviguentica Irijanite Irioshi, iintsijate pisapocanaque isaviji,
¹⁰ ocanquetarite itioncacojiquerogueti ocanque:

‘Intigarancajiaquempiriquea Irioshi irashivantijitete, quisho iroaroaitanaquempi.’

¹¹ ‘Irajiricanaquempiquea irantsomajanaquempi aatonijite pitsitincapojaro mapi.’

¹² Icantsitanacaquea Jesoshi icanqueriquea:

—Cotanquitsiquea choocatarite itioncacojiquerogueti aisa ocanquequea: ‘Aatoquea pamenantaritsi Majirontamajatatsica Pirioshite.’

¹³ Ariquea iriraquea imajirote ampatsini iteroncaquerogueti maasano yamenantave-tacariguetei, itsinampirejavetajatari.

Yoanajiquea Jesoshi Garireaquei itsatacaantaguetanaque

(Mt. 4.12-17; Mr. 1.14-15)

¹⁴ Iroompaquea yoanajiqueate Jesoshi Garireaquei. Ariquea ichoocamajaqueriquea Ishire Aapani Irioshi yagavejacaqueriquea, ariquea iquemacojiaqueriquea maasano choocajatsica oraniqui. ¹⁵ Itsatacaantaguetanaquequea shinagogapaequi* icapiocantapinijiacaca joriojia, ishineventajianacariquea maasano.

Itsatacaantavetacaguetei Jesoshi Nasarequi

(Mt. 13.53-58; Mr. 6.1-6)

¹⁶ Ariquea yoanaquequea Jesoshi Nasarequi iquenquevaritaqueguetei coramani. Iroompaquea aapojajaguetei savincaguiteri imagorejantajitaca yoanaquequea shina-gogaqui icapiocantapinijiacaca joriojia, iquijapojaquequea, ariqueate icotaniquea iri-atimpa yoampinicariqueate savincaguiteri imagorejantajitaca.† Ariquea icatiacaquea irampatsajavantaquero Iguenquetsatsare Aapani Irioshi. ¹⁷ Yojocajiqueneriquea paperi itioncanaqueca tsavetantatsica Isaiashini coramaniqui. Yaitsitaroquee iponarejitaro yapatsajavantaqueroquee yamenaguequeroquee otioncacaguetei ocanqueguetei:

¹⁸ “Ichoocaquenaqueate Ishire Amajirote, iroorijite inintacaquenaquea nontsavetantavaetanaqueneriqueate maasano cogu-itejacojianquitsica,

nontsatacaantaquemparica Quenquetsatsarentsi Oganejencatatsica.

Itigarancaquea nontsavetantavaejianaqueneriqueate maasano yaajivecaca nontsatacaantaquemparicaquea queroquee incojiaquempani cameetsanijite iroguipaqui jajerinijite.

Itigarancaquea nomenacajajajerinijite shamponcajaguetatsica, nompejiaquempariquea icatsimacatsimajitica.

¹⁹ Nontsatacaajiaqueriquea noncanquequea: ‘Imaicaquea aapojacaquea incavintsa-jamatantaquempica Aapani Irioshi.’ ”

²⁰ Iroompaquea iteroncanaquitiguiroquee yapatsajavantaquerogueti yampiguirica-jiroquee yojocajiniri jocaquenerica incajaranqui, isavicanaquequea. Maasanoquee choocajianquitsica shinogogaqui yamenamenaitanaqueriquea sorerere. ²¹ Ariquea iquenquetsatanaquequea icanquequea:

—Imaicaquea onetsanatimojiaquempi ocatita Tioncarentsi piquemajiaqueca.

* 4:15 Oratica icantajitica shinagoga iroguenti icapiocantajiacca joriojia yapatsajavantaquero Iguenquetsatsare Aapani Irioshi aisa yamanantapinicarica. Querocaguetei iguintenugetacaguetei joriojia incarajiaqueguetei 10 shirampari quenquevaritatsica iragavejaque impeacaquempari shinagoga. Incoguiitempariquea aparo jivaquerineca. † 4:16 imagorejantajitaca. Irira joriojia imagorejapinijiacque saavaroqui.

²² Maasanoquea iquenquetsatacotaqueriguetai Jesoshi, ishinevencariqueate, yamenajiaquequea intati, yamenajiaquequea cameetsavaequequea icantaguetaqueca, cotanquitsiquea icantavacaajianacaquea:

—Nojiquerisacanicario irijanite Jose.

²³ Icantajiguiriquea:

—Arimaja pincantajiaquea: ‘Aavintantatsica, paavintajempaquate avisati.’ Aisa pincantajiaquea: ‘Maasanopae noquemacojiaquero pantaguetaqueca Caperenaoniqui iintsijate pantagueteroquea aisa imaica acaniqui piguinteniqui.’

²⁴ Icantantanajaquea aisa icanquequea:

—Arimajaquea noncantamajajiaquempiquea iriraquea tsavetantiroca icanquerica Aapani Irioshi aatoquea ishineventajitari iguinteniqui. ²⁵ Piquemacojiaqueroqueate paesatoniqui choocatirajaguetai Iriashini teequeate ontejimatajeji incani anaavaetanacaquea 3 ajagantsini aisa 6 taai. Itaseajianaquequea maasano Ishiraeriqui. Ochoocavetacaquea oshequiavaeveca metojacoropae Ishiraeriqui, ²⁶ cotanquitsiquea itigarancaqueriguetai Aapani Irioshi Iriashini teetarite irooquea itigarancaqueneriji, ariguentiquea itigarancaqueri Sarepetaquei irooshitacoqueroquea Shirone, iroimotanaqueroquea otsipaquea metojacoro teeca iro igonoromajaca. ²⁷ Aisa coramani choocatirajaguetaiquea tsavetantatsica Eriseoni ichoocajiavecaquea yoshequiavaeveca avejancarijia Ishiraeriqui, cotanquitsiquea teequeate impeaguetempaji aparato, iriguentiquea pejaatsi aparato Shiriaquitica pajitatsica Naamanini.

²⁸ Irooqueate iquemaquemaitavaquitiguiquea capiocajianquitsica icatsimamajianaquequea maasano. ²⁹ Icatintijianacaquea yoguisotoitsitariquea yaajianaqueri tijacoñajiquea oraniqui ocaratapojiguetai ocapiocaguetai tsovironaquipae. Yaajivetanacariqueate ocogarajapocaguetai intanquirejitsitemparimequea, iroguentiquea ocapiocacaguetai itsovironaquitepae otsempiqui. ³⁰ Cotanquitsiquea iriatimpaquea iquenaguijianaqueriquea niganquiqui yomporoguijajiacaguetai, yoapanajanti.

Jesoshi yoguisotoajiri ampatsini

(Mr. 1.21-28)

³¹ Iroompaquea yoanajiquea Jesoshi Caperenaquero, iroguenti guinteninintsi choocatanquitsica Garireaquei. Arejetapojaguetaiquea savincagueteri imagorejantajitaca yoanaquequea shinagogaquero icapiocantapinijiacaca joriojia itsatacaantaquequea. ³² Iquemajiaqueroquetai itsatacaantaqueca mana yamenamenaitanaquequea intati, agavejavequetari icanqueca. ³³ Ariquea ichoocaque oraniqui shinagogaquero aparatoquea ishaquiacaca ampatsini, icajemavaequequeate iririjencani:

³⁴ —¡Ariotaqueshiatsi, Jesoshi Nasarequitica! ¿Queroquea pincojiaquenani naatimpajia? ¿Irooquea picoraquetashique pinteroncajiaquea? Notsatavaquempiquea aviguenti Iriomajaca irashi Irioshi.

³⁵ Icantanaquequea Jesoshi:

—¡Pisanticote! Pisotoanajeri.

Irooquea iquemaquitiguiriquea ampatsini ariquea icotanaca yoguitejanaqueri ishaquiacaca, iquenapanajantiquea isotoapanajanti yovashiantanajiriquea, teequea queroca incotajeri. ³⁶ Maasanojia mana yoayoaitanaque intati, iquenquetsatavacaajianaca:

—¿Quero cocani iquejequeroquetai? ¡Icantaquitigui iquemisanqueriquea ampatsinipae, isotoapanajanti! ¡Caavijitari imajirontamajaca! ¡Caavijiquea yagavejamajati!

³⁷ Iroompaquea maasanopae choocajiatatsica oraniqui iquemacojiaqueroqueate Jesoshi.

Jesoshi yogueshitajiroguetai ivaguirote Shimo

(Mt. 8.14-15; Mr. 1.29-31)

³⁸ Ariqueate isotoanajiqueate Jesoshi shinagogaquero icapiocajiacaguetai, yoanaquequea itsovironaquitequi Shimo. Oraqueate ivaguirote Shimo ashinoncajavaecaquea ocatsirincavaeque. Icamantajitavaqueriquea Jesoshi irogueshitajero. ³⁹ Yoanaquequea iroatimpaquero icanaanacaquea iquenquetsatacaqueroquea joquijirentsi yoguisotoajiroquea.

Iroatimpaquea ariquea ocotanaja osavogatanaji. Ariquea ocatianaja ojocacojiajiniri irishecaciaquempaca.

Jesoshi yogueshiguetajirigueti yoshequiavaequequea ashinoncajajatsica

(Mt. 8.16-17; Mr. 1.32-34)

⁴⁰ Oraquea itsaparoncaguitetanajigueti icoraquecoraqueitaquequea maasano ashinoncajacojiatsica ocantashitajencaguecaquea ashinoncajagantsipae, yaajianaqueneriquea Jesoshi irogueshiguetajeri. Ipamijiavaqueriquea, ipeague-tanajaquea maasano. ⁴¹ Iconoagarancaquea mana ishaquiajacari ampatsini. Yoguisotojajainirigueti yoguisotosotoitajiri icajemavaetanaquequea icanqueri:

—Aviguenti Irijanite Irioshi.

Cotanquitsiquea Jesoshi icantimentajiaqueriquea inquenquetsajiaje, irioriji itsajiaque iriguenti Quirishito Meshiantatsica.

Itsavetantaquequeate Jesoshi Joreaquei

(Mr. 1.35-39)

⁴² Osavincaguitetanajigueti yoanaquequea Jesoshi oraniqui teegueti inchoocateji caquinte, cotanquitsiquea icoajiaqueriquea caquinteja ariquea yarejetacovaejiacari ichoocaquegueti. Inintajiavetacaquea iraaiajaquerime aatonijite yoanaji.

⁴³ Cotanquitsiquea iriatimpa icantajiguiriquea:

—Noanaquetarite noncamantajiaqueriquea aisa choocajianquitsica otsipapaequi guinteninintsi, nontsavetantaquero Quenquetsatsarentsi Oganejencatatsica nontsat-ajajiaqueri quero icotani imajirontagueti Aapani Irioshi, irootaquequea itigarant-quinmenquenaquea Aapani.

⁴⁴ Iroompaquea yoanaquequea Joreaquei itsavetantanaqueroquea shinagogapaequi icapiocapinijagueti joriojia.

5

Yaajiaquequea icarapiovaetaquequea shima

(Mt. 4.18-22; Mr. 1.16-20)

¹ Ariqueate yoanaquequea Jesoshi otsapijaqui iniromotija pajitatsica Jenesare.* Itiorencaventajianacariquea caquinteja, itsinacajianaqueri Jesoshi. Inintajiaquequeate inquemisantajiaqueriquea itsavetantaqueroqueti Iguenquetsatsare Aapani Irioshi. ² Ariquea yameniroquea Jesoshi mavite quenajarontsi ogataaguetaca. Igataajiaqueroqueate ashincaroquea, yaguijijianaquequea yajacajiajiroqueate imantsatsite. ³ Iroompaquea itetanajaquea Jesoshi iguenajaroqui Shimo icanqueriquea iraimatanajerota niganquijacoñaji. Isavicaquequea itsatacaajiaqueriquea irirajia omporoguijajianquitsica otsapijaqui. ⁴ Ariquea iteroncanaqueroqueti iquenquetsataquegueti icanqueriquea Shimo:

—Jaameja ontaniqui osaanajataquegueti panquitacotantajiguempari shima pimantsatsite.

⁵ Icanquequea Shimo:

—Tsatacaantantatsica, nanquitacoveguitarini incajaranqui pitsecariqui nocantacoveguitaniqua aapojaja osavincaguitetanaji, teequeate naimajigueji. Cotanquitsiquea imaicaquea aviguenti cantanquitsi, intsishiatsi.

⁶ Irooquea yojocajiaqueroquea inoshicajatsijavetaroquea taaja itseraiquivaecaro-queate shimapae icanca, niganquiqueate otsatitsatiavetanaca imantsatsite. ⁷ Ariquea yacocovaeanaquequea vacoc vacoc icajemaguitetsijigariquea mavinaquitanquitsica quenajarontsi iramitacojiaquerinijite. Yoayoaitanaquequea yamitacojiaqueriquea yaajiaquequea itseraiquivaequeri mavinaquite quenajarontsiqui, tsitijaatacovaeca. ⁸ Iiraquea Shimo Peerero yamenaquerigueti caaviji yagavejamajati Jesoshi, igueroventsitariquea icanqueri:

—Nomajirote, cameetsa poanaje, aato pitsipatanatsi, naroguentiquea covaequishetatsica.

* 5:1 Jenesare opajita aisa Garirea.

⁹ Itsaroanaquequeate iriatimpa irisatijiaquea itsipatsipaicaca yamenajiaquequeate yaajiaquequea icarapiovaetaquequea shimapae. ¹⁰ Iriguentiquea itsipatsipaitacaquea irijanitepae Severeo ipajitaquea Santiago,[†] iriraquea itsipa ipajitaquea Joanca. Itsaroanaquequea iriatimpajia aisa, cotanquitsiquea Jesoshi icanqueriquea Shimo:

—Aatoquea pitsaroguitsi. Imaicaquea irioquea pimpitsocashijianaquempa caquinteja, pinquejetacaajajempari shima panquitacojiguirigueti.

¹¹ Iroompaquea itsinampijaatacojianaquea igataapanajantiro iguenajaropae, itarianapanajantiroquea maasanopae, yoayoaitanaji yoguijaguijaitanaqueriquea Jesoshi.

Jesoshi ipeajiriquea avejancari

(Mt. 8.1-4; Mr. 1.40-45)

¹² Ariquea ichoocaquegueti Jesoshi ocapiocacagueti tsovironaquipae, icoraquepojqiquea avejancari. Yamenapojaquerigueti Jesoshi iguerovempojacari yarejevaetaquita ivancaqui isavi, icanqueriquea:

—Nomajirote, arigueti pininque, pagavejaque piveajena navejancavejancaacagueti.

¹³ Iriraquea Jesoshi icantajempequitana ipamitsitari, icanqueri:

—Jeeje, noninque. ¡Pimpeanajempaja!

Irooqueate icanquitiguiri jac peanaja yavejancavejancaacagueti. ¹⁴ Ariquea icantavajiriquea Jesoshi:

—Aatoquea picamantitsi. Iriguentiquea poimotanaque saserrote ponigaapojempariquea, paanajenerija viratsipae, pinetsanaqueroja icantaqueca Moishishini cameetsanijite iramenamajaquempinijite, ariquea incanquempi peanajimpi, intsajiaquempinijite maasano peamajatajimpi.

¹⁵ Cotanquitsiquea arimpaqueate iquemacomajajianaqueriquea Jesoshi, itirorencashijianacariquea oshequini inquemisantajiaqueri intsavetantaquegueti, aisa impeaguetajeriquea irashinoncajanedia. ¹⁶ Cotanquitsiquea Jesoshi yoapiniti osamani teegueti inchoocatimateji caquinte iramananaqueriquea Iriri.

Jesoshi yogatijirigueti teeca ironquempaji

(Mt. 9.1-8; Mr. 2.1-12)

¹⁷ Iroompaquea itsatacaantaqueguetiquea Jesoshi, ariquea ichoocajiaquequea oraniqui isavisaviique pariseojia irisatijiaquea tsatacaantajiguiroca itioncacotanaqueca Moishishini quenajiapojatsicaquea Jerosarequi aisa guinteninintsipaequi Garireaquei aisa Joreaqui. Iriraquea Jesoshi yogueshijiaqueriquea ashinoncajajiatsica, iriguentiquea agavejacaqueriquea Aapani Irioshi. ¹⁸ Ariqueate icoraquecoraqueipoji itsipapae caquinte yamacojiapojaqueriquea teeca ironquempaji irajianaqueneriqueate intsompogui ichoocaquegueti Jesoshi. ¹⁹ Cotanquitsiquea querocampa inquenacaajiaqueri inqijacaantajianaquemparicate, omporoguijajicaquea tirorererere caquinteja. Yafaitaitanaquequea jenoqui sotsiqui ocantamencotacagueti itsopajaguequero ogotapae ivichajajiguequeca quepatsi, ishimatarejitaro, yoguisoroncacojiaqueriquea teeca ironquempaji itampaticatacotaquegueti ichoocataquegueti Jesoshi. ²⁰ Iriraquea Jesoshi itsajiavaqueri yaventajipojacari irogueshitajeriniji, icanqueriquea teeca ironquempaji:

—Shirampari, jac shetacotajimpi maasano pipeacaaguishevecaca.

²¹ Iriraquea tsatacaantajiguiroca itioncacotanaqueca Moishishini, irirajia pariseojia iquenquejajianaque intati: “¿Taate ipaji irira quejemanatacarica Aapani Irioshi? ¿Ooqueate choocampaca itsipa agavejanquitsineca irishetaqueroqueate covaeguisherentsi? Aparoqueate yagavejaque Aapani Irioshi.”

²² Cotanquitsiquea Jesoshi itsajiavaqueriquea iquenquejajiaqueca icantsijigariquea:

—¿Queroquea picopicoitanacani piquenquejajianaquequea piquejejaqueroquea imaica? ²³ ¿Querocampate caavijica anaaque mananquitsica? ¿Iroocajate noncantaquerigueti teeca ironquempaji: ‘Jac shetacotajimpi maasano

[†] 5:10 Santiago. Iguenquetsatsarequi guiriego ipajita Iakobos. Iconoagarantaca quimajareri yoguipitsocaquerogueti ivajiro ipajitiri Santiago, itsipa ipajitiri Jacobo. Mavite oponeaca iguenquetsatsarequi evereo, ipajitiri Yaakob.

pipeacaaguishevecaca', iroocajate noncantaquitigueri: 'Pincatianaje panijitanaje?'
²⁴ Imaicaquea namenacaajiaquemproquea yagavejaquequea acaniqui quepatsiqui irira
 Irijanite Caquinte[‡] irishetacoitajeri ipeacaaguishevecaca caquinte.

Irooquea icantanaquitigui ipitsocashitari teeca ironquempaji icanqueriquea:
 —lintsija noncanquempiquea pincatianaje, paanajero pinorijancaca, poanaje pitsovi-
 ronaquitequi.

²⁵ Irooquea icantaquitiguiriquea icampanajantaquea icatiapanajanta, yaanajiro-
 queate inorijancaca yoanaji itsovironaquitequi, ishineventamajatanacariquea Aapani
 Irioshi, icanquequea: "Ariotesaa, Aapani, poganejencamajata." Maasanojia yame-
 najiavajiriquea. ²⁶ Yamenamenaitanaquequeate intati ishineventamajajianacariquea
 Aapani Irioshi iriatimpajia aisa, itsaroamajijianaquequea icantajigui:

—Imaica oatica savincaguiteri amenantajiacaroca oganejencatatsica teeca iramena-
 jiteroji.

Ishecatataquea Jesoshi itsovironaquitequi Irevi

(Mt. 9.9-13; Mr. 2.13-17)

²⁷ Ariqueate isotoanajiquea Jesoshi icantanaja ontaniqui yamenapojaquequea aparo
 capiocapinitinirica majirontatsica imentaquipae. Ipajitaquea Irevi.[§] Isavicaque-
 quea ipashicatsarajitirogueti yoguijajivaqueri avisavisaitatsica ivegaratacaajivaque-
 riqueate imentaquitsite maasano aajiananquitsica irajaararopae aisa taaca opajitapae.
 Ariquea icanqueriquea:

—Jameja, poguijatanaquena.

²⁸ Ariquea yovashiantaguetanaqueroquea Irevi maasanopae, icatiitsitanaca, yogui-
 jatanaqueri.

²⁹ Iroompaquea itiacanquequeate Irevi taaca opajitapae, icajemaqueriqueate Jesoshi
 irishecaquempa itsovironaquitequi. Icajemacaantaguequeri itsipapae oshequini capio-
 capinijiguinirica majirontatsica imentaquipae, itsipapae caquinte, irishinevenquempari
 Jesoshi. Itsipatsipaicaca ishecajiaca. ³⁰ Cotanquitsiquea iriraquea pariseojia itsipatsi-
 paicari tsatacaantajiguiroca itioncacotanaqueca Moishishini, icantajiaqueri itsatacaane
 Jesoshi:

—¿Querocaquea picojiacaniquea pishecajiacaguete pitsipatsipaitantacarica capiocap-
 inijiguinirica majirontatsica imentaquipae aisa itsipajia covaeguishetatsica?

³¹ Icantanaquequea Jesoshi:

—Iriraquea teeca irashinoncajempaji teetarite incoguitejacotempariji aavintantat-
 sica. Iriguenti coguitejacojigari ashinoncajajiatsica. ³² Ariqueate noquejetacaquea
 naatimpa teequea irioquea noncoraquetashiteji teeca incovaeguishejiguempaji nonca-
 jemajiaqueri incantashitatijaijanajempaja, iriguenti nocoraquetashijiaque covaeguishe-
 jiatsica noncajemajiaqueriquea cameetsanijite incantashitatijaijanajempajite irovashi-
 antanajerijite ipeacaaguishevecaca.

Icoacojitaqueriquea Jesoshi irisanticotantajitemparoca isheca

(Mt. 9.14-17; Mr. 2.18-22)

³³ Iroompaquea icantajitaqueri Jesoshi:

—Iriraquea itsatacaanejia Joanca aisa irashijia pariseojia yoguipaquijapinijiaquero-
 quea isheca teetaquea irishecatsitajempauea cameetsanijite incantacoguitepaniquea
 iramanajiaqueriquea Aapani Irioshi. Cotanquitsiquea pashijia pitsatacaguica ¿quero-
 caquea icojiacani teequea inquejiguempariji iriatimpajia, manaqueate incantacogui-
 taniquea ishecaguitani, imiraguitani?

³⁴ Iroompaquea iquempetacaanca Jesoshi icanque:

[‡] 5:24 Icanquegueti Jesoshi Irijanite Caquinte mana icantacotaca iriatimpa, mana oquejetaca icantacoqueri itsipa.
 Iriotaque Quirishito Meshiantatsica quenapojatsica jenoqui inquitequi, icaquintetapojaqueitari ivoapojaque. [§] 5:27
 Iriratica Irevi ipajita aisa Mateo (pamenero Mt. 9.9; Mr. 2.14).

—Pinquenquejeja inchoocateguetiquea iriaqueraca manquigatanquitsineca incajemajiaqueriquea itsipavijijiaca irishecajiaquempa, ¿arimpaqueate aatompate ishecajiga? Irishecajiaquempa, itsipajiacaritarite cajemajiaquerica, shinejiacaquea.³⁵ Cotanquitsiquea oraqueate aapojempaguete incatsimatantajitaquemparica irajaitanaqueri osamani, ariquea iroguenti iroguipaquijantajiaquemparoca isheca, irishimampojancacojianaquempari.

³⁶ Ariqueate Jesoshi iquejetacaajiacanariquea aisa icanque:

—Aato agaveji atosashitaro iroaqueraro quitsaarentsi capichaji ampatacanquempari iroquetishitequinica quitsaarentsi. Anquejevetaquempaguete imaica antovetaquemparoguete iroaqueraro, ompomatsaquempa. Oratica aavetacaca capichaji ompatacamataquivetaquempa, aato ocameetsamajati, aatotari oquejetaro.

³⁷ Aisa aritarite onquejetaquempa iroguijaatantajitaquemparoguete vinoja iroaquerajatica oncachotapoje iroguijaatantajivetaquemparoguete imeshinanaquiqui iriquetinica. Oroameshinatanaquetari, oncachojamajavetanaquempaguete oshimoajavetanaquempa, ariquea oncotanaquempa aravoavetaquitempa imeshina, ariquea intyaquisanaque oshacojaatanaquempa vinoja, aisa impomatsaquempa imeshina.

³⁸ Jeroquea caavijiquea ocameetsataque: oraquea vinoja iroaquerajatica iroguentiquea iroguijaatantajiquempari iriaquerameshinari cameetsanijite aatonijite opomatsajata vinoja, aisa aatonijite ipomatsata imeshina.*

³⁹ Aisa quericacaquea miraroca vinoja iroquetijaca teequea irinintajeroji iroaquerajaca, manaqueate icanquequea: ‘Oraticaquea iroquetica iroquea cameetsajamajatanquitsica.’†

6

Ishiregujiaque tirigoitsoqui itsatacaane Jesoshi savincaguiteriqui imagorejantajitaca (Mt. 12.1-8; Mr. 2.23-28)

¹ Iroompaquea aapojajaguete savincaguiteri imagorejantajitaca yoanaquequea Jesoshi icantanaca tirigomashiqui, itsipatsipaitanacari itsatacaaneja. Irooquea icantajanacaguetiquea oraniqui ishireguipanajanti tirigoitsoqui isagorejajiaqueroquea ishecacajiaro. ² Iroompaqueate yamenajiaqueguete pariseojia icantsijigariquea:

—¿Quero ocotacani paajianaquequea tirigoitsoqui? Imaicatarite iroguentiquea savincaguiteri imagorejantajitaca icantimentantajitirotarite irantantajitemparo.

³ Icantanaquequea Jesoshi:

—¿Arimpate teequea pampatsajavantacotimajigueri aviatimpajia itioncacojitaqueriguete Taavini coramani ocanqueguete itaseanaque iriatimpa aisa itsipajianacaca, teequeate onchoocatimajaniquejeji taampaquea irishecajiaquempaca?

⁴ Iquijitsitanacaqueate itsovironaquitequi Aapani Irioshi* ishecatacaroquea pan icantimentantajitica irishecajitemparoguete, manaquea yojoquijitaquero oraniqui shitaponcarontsiqui cameetsanijite iramenaqueronijite Aapani Irioshi. Iriguentiquea shecataroquea saseroroteja, iriotaquequea cantaqueroqueate Aapani Irioshi. Cotanquitsiquea iriraquea Taavini ishecatacaroquea, aisa yojocajiaqueneriquea itsipatsipaitacaca.

⁵ Icanquequea aisa:

—Iriraquea Irijanite Caquinte iriguentiquea cantatsica queroca icantimentantajitica irantantajitemparoguete savincaguiteri imagorejantajitaca, aisa querocaquea teeca icantimentantajiteroji.

* 5:38 Itsatacaantica Jesoshi iroguenti quejetacaroca quitsaarentsi iroaqueraro, oquejetacaroc aisa vinoja iroaquerajatica. Aato agaveji otsipataro itsatacaantica pariseojia aisa tsatacaantajiguiroca itioncacojanaqueca Moishishini.

† 5:39 Ari iquejejiaca caquinteja, iconoagarantaca tee irininteji inquemisantajero iroaqueraca itsatacaantaqueca Jesoshi. * 6:4 Ocanqueguete itsovironaquite Aapani Irioshi iroguenti ocantacoque quitsaarentsivanco itsariventantajitarica iriatimpa. Icantajitiro Taverenacoro. Coajica irijanite Taavini ipeaacaroc mapipanco icantajitica teemporo intsariventantaquemparica. Ipajiqueroquea iroatimpa aisa itsovironaquite Aapani Irioshi.

Jesoshi yogueshitajiri chompevacovetatsica savincaguiteri imagorejantajitaca

(Mt. 12.9-14; Mr. 3.1-6)

⁶ Iroompaquea aapojajaqueate otsipaquea savincaguiteri imagorejantajitaca yoanaquequea Jesoshi shinagogaqui icapiofantajiacaca joriojia itsatacaantaquequea. Ariquea ichooaque oraniqui chompevacotantacaroca itincamijempequiqui, teequea iragavejempajiquea impacorejempaji. ⁷ Iriraquea tsatacaantajiguiroca itioncacotanaqueca Moishishini aisa pariseojia yamenamajataqueriqueate Jesoshi iramenajiaqueriquea arica impeajeriqueate savincaguiteri qui imagorejantajitaca intsavetantimenquerinijite incantajigue ipeacaaca teeca oncameetsateji ipeajiriquea chompevacori savincaguiteri qui imagorejantajitaca. ⁸ Cotanquitsiquea Jesoshi itsataquequea iquenquejajiaqueca. Icantsitariquea chompevacovetanquitsica:

—Iintsijate pincatigue iramenajiaquempinijite maasano.

Icatiitsitanacaquea. ⁹ Ariquea icantajiguiroca Jesoshi:

—Iintsija noncoacojiguempi. ¿Querocaquea icanque Moishishini coramani? ¿Taaca irantantajitempaca savincaguiteri qui imagorejantajitaca? ¿Ariquea icanque impeacaantajitemparo cameetsa, irooca irantantajitaquemparoquea covaeguisherentsi? ¿Ari icanque aavajeri agonoro aatoniji imetoji, irooca icanque ametojaqueri?

¹⁰ Ariqueate yamenaqueriquea maasano capioaventajiacarica icanqueriquea chompevacovetanquitsica:

—Pincantavacotempaja.

Irooquea icantavacovetanaquitiga ariquea icotanaja iraco jac peamajatanaja.

¹¹ Cotanquitsiquea iriatimpajia icatsimamajajianaquequea icanca, iquenquetsatava-caajianacaquea querocaca incojiaquerini Jesoshi.

Icoguijiaqueri Jesoshi 12 impeacaajiaquempaca itigarancane

(Mt. 10.1-4; Mr. 3.13-19)

¹² Otsipa savincaguiteri yoanaquequea Jesoshi otsempiqui iramaneriquea Aapani Irioshi. Yamanaqueriquea icantacoguitani osavincaguitetanaji.

¹³ Osavincaguitetanajigueti icajemajiaqueriquea itsatacaanejia iriatimpaqui. Ariquea icoraquejiaquegueti icoguique 12, ipeacaajiacari itigarancane. ¹⁴ Maasano yaajiaqueca ariqueate ipajijiaqueca: Shimo (ipajitajica Peerero), Antirishi (iriguentijeguite Shimo), Santiago, Joanca, Jeripe, Varitorome, ¹⁵ Mateo, Tomashi, Santiago (irijanite Arejeo), Shimo (icantajitica “Serote”),[†] ¹⁶ Jorashi (irijanite Santiago)[‡] aisa Jorashi Ishicariote (aacanquerineca Jesoshi oncoramanitanajeguete).

Itsatacaajiaqueriquea Jesoshi oshequi caquinte

(Mt. 4.23-25)

¹⁷ Ariquea yoguirincaquea Jesoshi itsipatsipaitajariquea itsatacaanejia isavisavi-ipojaji opiguetejagueti. Yomporoguijaventajianacariquea itsipapae itsatacaanejia yoshequiavaequequea aisa itsipapae quenaquenaitapojatsica osamani Jorequi aisa Jerosarequi aisa quenajiapojatsica otsapijaguetapojacaguetiquea Tiroqui aisa Shirone. Iroguentiquea icoraquetashijiaquequea inquemisantajiaqueriquea Jesoshi intsavetantaqueguete aisa cameetsaniji irogueshitimentajeriniji yojoquijigueteacagueti. ¹⁸ Iriraquea ishaquiaguetacaca ampatsinipae yoguisotoaguetajiniriquea. ¹⁹ Maasanopae inintajiaquequea inchagajiaqueriquea, yamenajiaqueriquea yagavejamajati, yogueshigueta-jiriqueate maasano.

Quericaca shinetavajatsineca aisa quericaca atsipetavajatsineca

(Mt. 5.1-12)

²⁰ Iroompaquea yamenajiguiriquea Jesoshi itsatacaane icantajiguiriquea:

[†] 6:15 Serote ocanque “nintamajatsica”. Irooquea icantajitiri irirajia joriojia nintamajatanquitsica iroguisotoajiguete Iromaquitica omperaperaacarica onchoocatashitajempanijite iguepatsite ishiraerijia. [‡] 6:16 Iriratica Jorashi (irijanite Santiago) ipajita aisa Tareo. Pamenero Mt. 10.3; Mr. 3.18. Iguenquetsatsarequi guiriego ocanque “irashi” Santiago irootaquequea iconoagarantantacaca caquinte yoguipitsocaquerogueti icantiri “iriguentijeguite” Santiago.

“Caavijiquea pishinevaejiaquempa aviatimpajia coguitejacojianquitsica,[§]
pimajirontajiacaritarite Aapani Irioshi.

²¹ Caavijiquea pishinevaejiaquempa aviatimpajia taseajianquitsica imaica,^{*}
pinquemajiaquempatari.

Caavijiquea pishinevaejiaquempa aviatimpajia iraaianquitsica imaica,
iroguishinejajiaquempitari Aapani Irioshi pishirontajiaquempaquee.

²² Caavijiquea pishinejanaquempaquee aviatimpajia irisemajitempigueti
iramenajiaquempigueti pitsaromentajiacari irira Irijanite Caquinte.
Aricaquee aatoquee inintajigui pinconoajiaquempari manaqueate incantaguishe-
janaquempi
aisa incantacojiaquempi: ‘Iriguenti covaeguishemajatanquitsica.’

²³ “Iiraquee choviquijianaquerica ariquea iquejejaqueriquea tsavetantajiguinirica
Aapani Irioshi coramanipaequitica icatsimajiaqueriquea. Ariquea aviatimpajia pa-
menajiaquegueti inquejejaquempigueti imaica pishinejanaquempaquee, pishinema-
jajianaquempa, pitsajiaquequee caaviji iroguishinejamajaquempiquea Aapani Irioshi
oncoramanitapojajegueti ontaniqui inquitequi, ipeacaajiaquempiprotari irojocajiaquem-
pica.

²⁴ ¡Cotanquitsiquea imaicashiatsi pantsipevaejiguempa aviatimpajia ajaarantajiaatsica![†]
Aatotarite querica guishinejajimpitsi oncoramanitapojajegueti, iroorijite pishinet-
sicaquee imaica, pishineventavecarioquee pashintagueca.

²⁵ ¡Imaicashiatsi pantsipevaejiguempa aviatimpajia quemajianquitsica imaica, pintasea-
jigue!

Imaica pijique: ‘Teetarite taaca noncoguitejacojiguempaji.’

Oncoramanitapojajegueti pinquenquejajavetanaquemparoquee pinintajianaque-
quee incavintsajajiaquempiqueate Aapani Irioshi, cotanquitsiquea aatoquee
ichoocatimati amijiajempineca.

¡Imaicashiatsi pantsipevaejiguempa aviatimpajia shirontajiaatsica imaica, pishineven-
caroqueate maasanopae quepatsipaequitica!

Oncoramanitapojajegueti pishimampoanajiaquempaquee pirajiaquempa.

²⁶ ¡Imaicashiatsi pantsipevaejiguempa aviatimpajia irishineventajiaquempigueti
maasano!

Ariqueate iquejejiacariquea paesatinijianacarica ishineventajiacari tsavetantajiat-
sica amataajiaatsica.

Ampintsajiaquempari catsimajiacajica

(Mt. 5.38-48; 7.12)

²⁷ “Imaicaquee aviatimpajia quemisantajiaquenaca noncantajiaquempiquea aisa.
Pimpintsajiaquempariquea catsimajiaquempica aisa pincavintsajajiaqueriquea
semaquempica. ²⁸ Irirajia cantavetaquempica: ‘¡Shoo poanaque camorecariqui!’,
manaquee pinquenquetsatacaqueriquea cameetsa, pincanqueri: ‘Noninque
pinchoocajiaque cameetsa.’ Pamanacoventajiaqueriquea quenquetsaguishetacov-
equempica. ²⁹ Inchoocaquegueti capojaquempineca pivoroqui pimpitsoquempaqueeate
acaquerocatica otsipavoro inquejetacaitemparoquea iroatimpa. Inchoocaquegueti
aapitsataquempironeca piitsaare, irinintsitaquempirogueti otsipa intompoguitica
piitsaare, pojoquitenempari. ³⁰ Inchoocaquegueti amanaquempironeca taaca
opajitapae, pojocaqueneriqueate. Inchoocaquegueti aapitsaquempironeca
pashincaca, aatoquee picantajiri: ‘Pojojajenaroja.’ ³¹ Pincavintsajajiguerija itsipajia,
pinquejetacaguempari pininquegueti incavintsajiaquempi aviatimpa.

§ 6:20 Icanquegueti coguitejacojianquitsica iquejetacaacari aisa irirajia tsatanquitsica ishiquei tee iragavejama-
jatempaji. Pamenero Mt. 5.3. * 6:21 Icanquegueti taseajianquitsica iquejetacaacari aisa nintamajianquit-
sica incomajamajiaquempa, iragavejacajiaqueritari irinetsanajiguero ininqueca quejetaca inquemajiaquempineca.
Pamenero Mt. 5.6. † 6:24 Icanquegueti ajaarantajiaatsica icantacotaqueriquea aisa irirajia quenquejajiaatsica:
“Teetarite noncoguitejacotempariji impintsatocotena Aapani Irioshi, caavijiquea naatimpa nagavejaque.”

³² “Managueti irioca pimpintsajiguempa pintsajiguimpica aviatimpajia, ¿arimpa irooquee irishinevenquempi Aapani Irioshi? Ariqueate icojiga aisa coguishejiatsica, itsajiguirotari impintsataquempari pintsatarica iriatimpa. ³³ Managueti irioca pincavintsajajigue cavintsajajiaquempica aviatimpajia, ¿arimpa irooquee irishinevenquempi Aapani Irioshi? Ariqueate icojiga aisa coguishejiatsica, itsajiguirotari incavintsajajiqueri cavintsajirica iriatimpa. ³⁴ Aisa ariguetei pojocaqueneri pigonoro yamanaquempica iramanaquempiguetei iroguipijaempica coajica, cameetsavaeque. Cotanquitsiquea managuetei irioca pojoquene quejetacaajajempineca ¿arimpa irooquee irishinevenquempi Aapani Irioshi? Ariqueate icojiga aisa coguishejiatsica, yojocajiguiniri igonoro cameetsaniji inquejetacaajempari iriatimpa. ³⁵ Cotanquitsiquea aviatimpajia noncantajiaquempiquea pimpintsajiaquempariquea catsimajiaquempica, pincavintsajantaquequea, aisa pojocaqueneriguetei cantaquempica iroguipiajempiro, aatoquea poguijacojajia inquejetacaajempi. Pinquejejaquempaguetei imaica, incavintsajamajianaquempiquea Aapani Irioshi Anaantamajatatsica aisa pinquejejaquempariquea iriatimpa, incavintsajajiaqueritari teeca inquenquejacojigueriji aisa covaeguishedatsica. ³⁶ Pimpintsatocotantajiguempaquee, pinquejejaquempariquea Piri Irioshimajaca ipintsatocotantamajataguetei.

Aatoja piquenquejacoguishetsitiritsi peacaajigaroca covaeguisherentsi
(Mt. 7.1-5)

³⁷ “Pamenitaqueriguetei yantaguishetaqueca itsipa aato piquenquejitsi: ‘Teequea incameetsateji, icovaeguishedata’, ariquee aato iquejetacaajitimpi aviatimpa. Aatoquea pinintitsi incatsimatimentera Aapani Irioshi covaeguishedanquitsica, ariquee aato iquejetacaajitimpi aviatimpa. Pimpeacotsitajempari itsipajia, ariquee inquejetacaajitaquempi aviatimpa. ³⁸ Pincavintsajantamajajigue, ariquee inquejetacaajitaquempiquea aviatimpa. Incavintsajamajajiquempiquea, onquejetaquempa incavintsajamajajiquempiguetei intseraiquimajataquempiro pishimatotequi irivinacamajatavaquero irantecacotavaquero irosati osocaguitanaquempa. Querica caavijica iranaaque incavintsajantamajataque, caavijiqueate incavintsajajiqueriquea iriatimpa, cotanquitsiquea iriraquea arica igoca incavintsajanquequea, ariqueate inquejetacaajitaquempari iriatimpa ariquee igotaquempa incavintsajajiqueriquea.”

³⁹ Ariqueate iquenquetsatanajiquea Jesoshi iquenquetsatacotaqueriquea tsatacantantsica, icanquequea: “¿Arimpaqueate iragavejaque shamponcajari iranaqueri itsipa shamponcajari ironigaantaque? ¿Aatompaaquea itanquiretanquireitanaque mavite ocogarajopocaguetei? ⁴⁰ Iriraquea itsatacaajitica, teequea iranagueriji tsatacaguirica, cotanquitsiquea ariguetei intsitacacaaguetaqueri intsatacaqueriguetei irooquee inquejetantanaquemparica iriatimpa.

⁴¹ “¿Querocaquea picocani pamentancarica itijaarajaniqui pigonoro cotanquitsi tee pinquenquejacoteroji inchapoa poquijaqui pashi aviatimpa? ⁴² Aatoguetei pameniro inchapoa poquijaqui pashi aviatimpa, ¿arimpate pagavejaquempa pincanqueri pigonoro: ‘Intsija, iguentijegui, nonquitsoajempiro pitijaaro’? Cameetsatamampeatsica, iroquetitarite pijivatavaque pinquitsoavajerota inchapoa poquijaqui pashi aviatimpa, ariquee pamenamajatanaje pinquitsoimentajenerinijite tijaataquerica pigonoro.‡

Jesoshi iquenquetsatacojiaqueriquea caquinte iquejetacaacari inchato sovenatatsica
(Mt. 7.17-20; 12.34-35)

⁴³ “Maasano inchatopae choocatatsica osovena ishecajitaca aatoquea agavejitsi onchoocaque osovena teeca irishecajitemparoji. Ari oquejetaca inchatopae choocatatsica osovena teeca irishecajitemparoji, aatoquea agavejitsi onchoocaque osovena ishecajigueta. ⁴⁴ Maasanopae inchato iroguenti itsatantajitaroca osovena. Iguerasovena

‡ 6:42 tijaataquerica pigonoro. Oquejetacaros ariguetei pinique pincanqueri pigonoro irovashiantajero covaeguisherentsipae yantaguetea, aviquetita jivaquerone povashiantajero pantaguisheguetica aviatimpa. ¿Querocaquea picocani pamentancarica ipeacaaguishedatataca pigonoro cotanquitsi teequea pameneroji pashi aviatimpa caaviji pogaa?

teequea onchoocatantemparoji samerento. Aisa ovaitsiqui teequea onchoocatantemparoji poronqueto. ⁴⁵ Ariquea iquempetaca caquinte comajamajatatsica iroguenti iquenquetsatacoguetaque cameetsaripae, irootari iquenquejacoguetaque. Iriraquea teeca incomajamajatemparoji iroguenti iquenquetsaguishetaque taaca opajitapae, irootarite iquenquejacoguetaque iriatimpa. Maasanopaetari iquenquejacojiguetica irootaquequea iquenquetsatacojiguetica.

Jesoshi itsavetacotaqueriquea caquinte iquejetacaajiacari peacagaroca tsovironaqui
(Mt. 7.24-27)

⁴⁶ “¿Querocaquea picojiacani picantajiaquenaqueate intati: ‘Nomajirote, Nomajirote’, cotanquitsiquea teetarite pinetsanajiavaqueroji nocantajiavequempica? ⁴⁷ Imaicaquea noncantajiaquempiquea queri iquejetaca iriraquea quericaca coraquetashiquenaca iquemisantaquenaquea ariquea inetsanamajaquero nocantaquerica. ⁴⁸ Manaqueate iquejetacariquea caquinte vinchajiroca itsovironaquite. Iqueequitaroquea yoavaequeroquea jmm isavi imontsitajacotantacaró shiratanapi. Ariquea ivinchajavaquero. Iroompaquea amaravepojacaquea oja anaacotanaqueroqueate itsovironaquite otampishijavaetanaquequea ocanca, cotanquitsiquea teequea agueroji, ocatiavaecaqueate isaviqui imontsitajacotantacarotari mapi oquishomajatantacaca. ⁴⁹ Iriraquea quemavetavacaroa nocanqueca cotanquitsiquea teequea irinetsanateroji manaqueate iquejetanacari itsipa ipeacaacaqueate itsovironaquite teequea iroguijaamajateroji isavi, querocampaquea onquishotanguempaca. Iroompaquea amaranaquegueti oja anaacotanaquero itsovironaquite, otampishijatanaque osoveanaquero, jac aapanajantiro, oteroncamajatanaquero oanaquero.”

7

Jesoshi yogueshitajiriquea yashincaca imajirojiate coaretajia
(Mt. 8.5-13)

¹ Iteroncanaqueroguetiquea Jesoshi itsatacaajiaquerigueti yoanajiquea Caperenaquui. ² Ariquea ichoocati oraniqui coareta Iromaquitica. Iriatimpa iriguentiquea imajironcaca 100 igoaretajiate. Yojoquijivaecaquea yashincaca caavijica ipintsamajatacaca, iroovepojaca irimetojeme. ³ Irootaquequea iquemacotantaquerigueti Jesoshi itigarancaqueriquea iramajiroreja joriojia incamanquiteri incoraquequeniji irogueshitajeri yashincaca. ⁴ Iroompaquea yoayoitanaquequea icantajiaipojaqueriquea Jesoshi:

—Nonintamajiaque poanaque pogueshitajateri yashincaca imajirojiate coaretajia, caavijitari icameetsati ashintantanquitsica. ⁵ Ipintsamajiacajitari aatimpajia joriojia, yantacaantaquenaro shinagoga nocapiocantapinijiacaca.

⁶ Ariquea yoanaquequea Jesoshi yoguijaguijaitanaqueriquea. Yaajivetanacaró quempeji tsovironaqui qui itonquivojajivacari itsipavijijiacaca imajirojiate coaretajia. Iriatimpa iroguentiquea itigarancajiaqueri intonquivojajivaquempari incantajivaqueri:

—Itigarancajiaquena notsipavijitaca canquempi: ‘Nomajirote, aatoquea patsipeventanaqueate pincoraquetashivaequena notsovironaquitequi. Aatotarite piquijitsitanarotsi notsovironaquite, notsaquetarite panaamajataquenaquea. ⁷ Irootaquequea nopashiventantacaca naatimpa inchiqioji noanaque nonquenquetsatacaajiaquitempi. Pincantajaniquiqueja impeapanajantempaquea nashincaca. ⁸ Quejetaca naatimpa ichoocaveca tigarancanaca, ariqueate ichoocaque nashi nogoaretajiate notigarancajiguica. Quericaca noninqueca nontigarancaqueca inquemisantaquenaquea iroanaque. Itsipaquea nocajemirigueti icoraquetaque. Aisa ichoocaque nashincaca taaca opaji nomperacarica iquemisanquenaquea.’

⁹ Irooquea iquemavaquerigueti Jesoshi canqueca yamenanaque intati. Ipitso-cashijianacariquea maasano oguijaguijaiquerica icantajiguiriquea:

—Noncanquempiquea, choocavetaca oshequini quemisantajiaquenaca acaniqui Ishiraeriqui, cotanquitsiquea teequea namenimaguetaji aparo inquejetempariji irica it-samajati gueti nagavejamajati.

¹⁰ Ariquea irirajia itigarancajiaqueca imajirojiate coaretajia icoraquecoraqueivetajiquea tsovironaqui qui yamenavepojajiriquea jac peamajatanaja yashincaca.

Jesoshi itancorejajineroquea irijanite metojacoro

¹¹ Iroompa yoanaque Jesoshi guinteninintsiqui icantajitica Naine, yoguijaguijaitanaqueriquea itsatacaanejia aisa oshequi caquinteja. ¹² Ariquea yaavetapojacaroquea quempeji osotomoro otantotacojiacaguetei tsovironaquipae, yamacojipojiri metojatsica inquitajajateri. Iriguentiquea irijanite metojacoro, aparoqueate icocaniquea iriatimpa irijanincaca. Icantaventajianaqueroquea tirorererere caquinte oguijaguijaitanaqueroa irijanincarica. ¹³ Ipintsatacotanacaroquea Amajirote yamenaqueroqueti iraaca, icanqueroquea:

—Aato piraga.

¹⁴ Yoashitanaqueroquea yamancarica ipamitsitaro. Ariquea icatintiitapojacaquea natacojiaquerica. Ariquea icanqueriquea Jesoshi metojanquitsica iriaqueraca quenquevaritananquitsi:

—Shirampari, noncanquempiquea pintinajanaje.

¹⁵ Ariquea isavicanaji metojavetanquitsica iquenquetsatanajiquea. Yojocajineroquea iriniro.

¹⁶ Yamenaqueguetiquea maasano yogueshitajiriguetei yoayoaitanaque intati, aisa ishineventajianacariquea Aapani Irioshi. Icantajiaquequea:

—Icoraquetimojiacaji tsavetantatsica anaamajatantatsica. Iquenquejacojiacajiquea Aapani Irioshi, icavintsajajiacaji aatimpajia yashincaca.

¹⁷ Iroompaquea maasanopae choocajiatatsica Joreaquei aisa irooshitacoguetanquitsica iquemacojiaqueriquea Jesoshi itancorejajiri metojavetanquitsica.

Joanca itigarancajiaqueriquea itsatacaane incoacojiaquiteri Jesoshi

(Mt. 11.2-19)

¹⁸ Ariquea irirajia itsatacaanejia Joanca icamantajiaqueriquea yantaguetaqueca Jesoshi. Ariquea icajemaqueriquea mavite, ¹⁹ itigarancaqueri incoacojiaquiteri Jesoshi: “¿Aviguentica noguijajaveca? ¿Irooca noncantacoguitempani noguijajiaquiterini itsipa incoraquetaque?”

²⁰ Ariqueate yoayoaitanaquequea yarejerejeipojaca ichoocaqueguetei Jesoshi icantajipojaqueriquea:

—Itigarancajiaquea Joanca Viñacajatantatsica noncoacojiaquempiquea: ‘¿Aviguentica noguijajaveca? ¿Irooca noncantacoguitempani noguijajiaquiterini itsipa incoraquetaque?’

²¹ Oraqueate yarejetapojacaguetei yamenacojiapojaqueriquea yogueshiguetejiri oshequini ashinoncajaguetatsica iconoagarantajiacaa aajiaqueri joquijirentsi anaaguetatsica. Irraquea ishaquiaguetacaca ampatsinipae yoguisotoaguetajiniriquea. Aisa yamenacaa-jajiri shamponcajivetatsica. ²² Ariquea icantajiguiriquea Jesoshi:

—Imaicaquea poapoaitanaje pincamantajiapojajeriya Joanca maasanopae pamenague-taqueca aisa piquemaguetaqueca. Irraquea shamponcajajivetatsica yamenamenaitanaji. Irraquea teeca iranijijavetempaji yanijijianaji. Ariquea iquejejiaca avejancari-pae ipejaianaja. Irraquea teeca inquemajavetempaji iquemajianaji. Aisa iriraquea metojaguetatsica itancorejajianaji. Irraquea coguitejacojianquitsica* imaica itsavetan-timojiqueriquea itsatacajaiqueri Quenquetsatsarentsi Oganejencatatsica. ²³ Caavijiquea irishinevaetaquempa quericaca incantacoguitempani intsariventamajataquea aatoca yovashiantajana.

²⁴ Ariquea yoayoaitanajiguetei itigarancajiaqueca Joanca iquenquetsavaetaquequea Jesoshi iquenquetsatacoqueri Joanca, icantajiguiri maasano: “¿Taacaquea poapoaitashitaquiti ontaniqui oquitamampororoitapojiguetei? ¿Arimpa irooquea poapoaitashitaquiti pamenajiaquitiro savorovana ojeonquiroguetei choviga, ariquea oaquiti oaquiti?† ²⁵ ¿Ariquea taaquea poashijiaquiti? ¿Iriocaja poashijiaquiti pamenajiaquiti caquinte quitsaatatsica shipetamorenaro quitsaarentsi?”

* 7:22 Icanqueguetei coguitejacojianquitsica iquejetacaacari aisa irirajia tsajianquitsica teequea iragavejeji inchiqiu-jita irimeshiguempaji. Pamenero Mt. 5.3. † 7:24 Icanqueguetei savorovana iquejetacaacari aisa caquinte teeca intampishitashigueteroji maasano amataagantsi, aca icanti aca icanti.

Pitsajiaquequea maasano quitsaatatsica shipetamorenaro quitsaarentsi manaquea isavisaviiti itsovironaquitequi majirontatsica, icantacoguitaniquea isavicaventiro taaca opajitapae ishinevencaca iriatimpajia. ²⁶ Iroosacánica ¿taaquee poashitaquitiquea? ¿Iriocaja poashijiaquiti pamenajiaquitiri tsavetantaquerica Aapani Irioshi? Jeejeguitatsi, iriotaque, cotanquitsiquea iriatimpa caaviji yanaaguequeri itsipajia tsavetantajatsica. ²⁷ Iriotaque itioncacojiqueca coramani iquenquetsatacaquerigueti Aapani Irioshi Irijanite, icanqueri:

‘Ari nontigarancaqueri iriquestica oananquitsineca intsavetacotempi.

Irio camantajiaquerineca igonorojia queroca pinquenanaqueni irinetsanatahitantajia-
avaquempica.’[☆]

²⁸ Imaica noncantajiaquempi: maasanopae caquinteja teetarite inchoocatimateji aparo anaaquerineca Joanca, cotanquitsiquea maasano majirontajiacarica Aapani Irioshi, irirajia teeca iranaajencavaevetempaji, caavijiquea icavintsajamajajiaqueri, oquejevetaca yanaajiaqueri Joanca.

²⁹ “Maasano caquinteja quemajiaquerica Joanca itsatacaantigueti icantajiaqueri iriviñacajajiaqueri, yamenajiaqueritarite icantamajati Aapani Irioshi icantaquegueti iriguentijia covaeguishejiatsica. Ariquea iquejejiacaquea irirajia capiocapinijiguinirica majirontatsica imentaquipae iviñacajatacaantajiacaquea iriatimpajia aisa. ³⁰ Irirampani pariseojia itsipatacariquea tsatacaantajigueroa itioncacotanaqueca Moishishini tee-
quea irishineteriji iriviñacajajigueri Joanca. Inintavetacaquea Aapani Irioshi incavintsajajiaqueri, cotanquitsi iriatimpajia teequea irinintajigueti inquemisantajiaqueri.

³¹ “¿Quero icojigani caquinteja choocajianquitsica imaica? ¿Taa ipaji iquempeji-
aca? ³² Iriguentiquea iquempejiaca chaajaniquitirajaca irisavisaviitaquegueti tsovia-
guiteri qui irantanavijitempagueti iroompa ari incatsimatavacaajianaquempa incantajia-
aquequea:

‘Nocovitimojiavequempiquea
teequea pintsamarojianaque.

Ariquea namashaitimojiavetaquempi amashairentsi yamashajitica ishimampojanca-
jitagueti

teequea pirajaguempaji.’

³³ Ariqueate piquempejiaca aviatimpajia. Icoraquevetaca Joanca Viñacajatantatsica teequea irishecatempaji ishecapinitaca igonorojia, aisa teequea irimirimateparoji cachojaro, manaquea picantacojiaqueriquea: ‘Ishaquiacari ampatsini.’ ³⁴ Ariquea imaica icoraquevetaca irira Irijanite Caquinte, ishecataca iriatimpa, imiraca, ariqueate picantajiaque: ‘Iriguenti shecajtanti, iriguenti shinquitatsica, aisa iriguenti itsipaviji-
jiapojaca covaeguishejiatsica aisa capiocapinijiguinirica majirontatsica imentaquipae.’

³⁵ Cotanquitsi onconijavaetanaque itsatica tsamajatatsica amenajiaquegueti quero oco-
cane yantaguetaqueca.”

Ishecatacaquea Jesoshi itsovironaquitequi pariseo pajitatsica Shimo

³⁶ Ichoocaque pariseo icajemaqueriquea Jesoshi irishecatacaquempari itsovirona-
quitequi. Ariquea yoanaquequea Jesoshi iquijapoji ipimerequijapojaca shitaponcar-
ontsiqui irishecaciaquempa. ³⁷ Ochoocaque manquigarentsi quempevaetatsica, ariquea
oguintenica quempeji. Ariquea oquemacoquerigueti Jesoshi yoanaque irishecatempa
itsovironaquitequi pariseo, oanaque aanaquequeate casancajencajari yoguijaantaji-
caro chovintyori qui ipeacaajitaca mapi icantajitica aravasetero. ³⁸ Iroompaquea
arejetapojaca ichoocaquegueti Jesoshi ocatiapojaca igontatapojacagueti, iraanaca
oparijaatanaquequea ojaquija oshaguitsitariquea iguitiqui. Ariquea osheguititanta-
jariquea omae, onintaguititanaqueriquea, aisa oshaguiguititantacari casancajencajari.

³⁹ Ariquea yamenaquerogueti pariseo cajemaquerica Jesoshi itsovironaquitequi iquen-
quejanaque: “Arimajagueti iriogueti tsavetantatsica intsatsitavaquempa taaqueate
pamipojiri, intsaque queroca ocoani, intsatavaquequea iroguenti quempevaetatsica.”

⁴⁰ Iroompaquea icantanaquequea Jesoshi icanqueri pariseo:

[☆] 7:27 Mara. 3.1.

—Shimo, chooca noncanquempica.

Icanqueriquea:

—Iintsijate, Tsatacaantantsica, pincantenaja.

⁴¹ Icanqueriquea Jesoshi:

—Chooa mavite shirampari, yaacoqueri imentaquitsite jocavaquenerica, icanqueriquea: ‘Oncoajicatapojajegueti poguipiajatenaja.’ Aparoquea yaacoqueri 500 tenario.[‡] Iriraqea itsipa ariguenti yaacoqueri 50. ⁴² Cotanquitsiquea iriatimpajia ocoajicavepojaja aavetapojaja iroguipiantajenemparimeca teequea inchoocatajeji imentaquitsitejia querocampaquea irajaiajeri irivegaratantajemparica. Ariquea ican-tajiriquea: ‘Ompeashitanajempaqueea intati.’ Imaicaqueea iintsija pincanquena ¿queri pintsamajaquemparineca?

⁴³ Icanqueriquea Shimo:

—Iriocajate ipeacomajacaca.

Icanqueriquea Jesoshi:

—Pitampaticamajataquero.

⁴⁴ Ariqueate ipitsocavetanaca yamenanaquero manquigarentsi, icanqueriquea Shimo:

—¿Ari pamenaquero ocatita manquigarentsi? Noquijavepojaca pitsovironaquitequi teetari pojocavaquena pijatsite najacaguititaquempame. Iroatimpa ajacaguititanquenaro ojaquija, osheguititantajanaroqueea omae. ⁴⁵ Aisa teequea pinintavorotenaji,[§] cotanquitsiquea iroatimpa onintaguitiquenaqueea incajaranqui arejevaeca imaica. ⁴⁶ Teetarite pimpantantenaraji orejiqui noguitoqui, cotanquitsiquea iroatimpaqueea oshaguiguititaquenaqueea casancajencajari. ⁴⁷ Irootaquequeea imaica noncanquempi ocovaeguishevecaroqueate taaca opajitapae, cotanquitsiquea imaica shetajaqueate maasanopae, irooriji opintsamajataquena. Cotanquitsiquea iriaraqea irishetsijitaqueca capichaji ipeacaaguishetacaca, capichajaniqui impintsatantavequempa.

⁴⁸ Iroompaqueea icantsitaroqueea manquigarentsi:

—Imaicaqueea shetanajaquea picovaeguishevetacaca.

⁴⁹ Ariquea irirajia icajemajiqueca itsipatsipaicaca ishecajiagueti icantavacaa-jianaquea:

—¿Taashia ipajita iricatica shetsitantaqueroca covaequisherentsi?

⁵⁰ Cotanquitsiquea Jesoshi icantsitaroqueea aisa:

—Imaicaqueea meshiajimpi irooriji pavempojana. Poanaje pishinevaequempa.

8

Manquigarentsijia amijiaquerica Jesoshi

¹ Iroompaqueea iquenaquenaguetanaquequeea Jesoshi guinteninintsipaequi ichooa-jiguigueti oshequini caquintejeja aisa guinteninintsipaequi teegueti iroshequiama-jateji, itsavetantaquero Quenquetsatsarentsi Oganejencatatsica icantajiaqueri quero icotani imajirontaguete Aapani Irioshi. Itsipatsipaitanacari itsatacaanejia carajianquitsica 12. ² Aisa oguijaguijaitanaqueriquea manquigarentsijia yoguisotoacoventajiajica ishaquiavavecaroqueti ampatsini, aisa yogueshijiajica ashinoncajiaivecaguete. Ariquea ochoocaque Maria icantajitica Magararaquitica yoguisotoacovenqueca ishaquiavetac-arogueti 7 ampatsini. ³ Otsipatsipaicaro Sosana aisa Joana, imanquigare Cosa iramajirore Erorishi. Oahoaitanaquequeea aisa otsipapae manquigarentsijia. Iroatimpajia amiqueriqueate Jesoshi ojocajiaqueneriquea omentaquitsite cameetsanijite irivegaratanta-quempaca taaca icoguитеjacocaca.

Jesoshi iquejetacaacari pishoncaguitiroca oitsoqui
(Mt. 13.1-9; Mr. 4.1-9)

‡ 7:41 Iriraqea tenario irio imentaquitsite Iromaquitica. Iramiteriguete itsipa apajencaro savincaguiteri irivegarataqueri aparo tenario. Ari iquejevecari itsipa imentaqui icantajitica iraquima, iriguenti imentaquitsite guiriegojia.

§ 7:45 teequea pinintavorotenaji. Yamejiaca joriojia coramani inintavorotavacaajiajavaca yamenavacaajiacaguete.

⁴ Ariqueate icoraquecoraqueitaque caquinteja icaramirincavaeque, iquenaque-naitapojaque guinteninintsipaequi yomporoguijaventajapojacari Jesoshi. Iroompaquea iriatimpa iquejetacaacanari, icantajiguiri: ⁵ “Yoanaque aparo caquinte impishonca-guitero oitsoqui. Ipishoncavoncaquitanaqueeroquea tacororo tacororo, itsitacague-tanaquero. Oconoagarancaqueate asacaraaguiguetanaca quenavoquirontsiqi, ariquea yagatigatiiquero, iroompaquea isavisaviitashipojiroquea tsimeripae ishecajiapojacaro. ⁶ Otsipa oconoagaranca asacaraanaca mapiporoquiqui, taampina otsoroavetanaca cotanquitsiquea oshimpeguiricanaque ometojanaji, pirijaguitevaetaquetarite quepatsi. ⁷ Oconoacaquea otsipapae asacaraanaca ochoocaquegueti ovarishitsa samerento. Otsoroavetanacaquea oquenanaquequea otsoroitsitanacaquea samerento iroatimpa otsincoanaqueroquea ometojanaji. ⁸ Otsipapae oconoacaquea asacaraanaca ocameetsagui-tequegueti quepatsi, otsoroanaquequea otaganaanaca ochoocatanaque opitsaraquia-cotanacaqueate oitsoqui, oconoacaquea ochoocaque 100.”

Irooqueuea iquejetaquerogueti Jesoshi imaica iquenquetsatanajiquea iririjenca icanque-queuea: “Chocagueti piguempita pinquemantavaquempaca, pinquemeja.”

Jesoshi itsatacajiaqueriquea quero ococani iquempetacaantaguecaroca
(Mt. 13.10-17; Mr. 4.10-12)

⁹ Iroompaquea icoacojiavaqueri itsatacaanejia taa opajita oquejetaca itsavetanqueca incajaranqui.

¹⁰ Iriatimpaquea icantajiguiri: “Imaicaquea ininque Aapani Irioshi pintsajiaquero aviatimpajia queroquea icotani imajirontaguete iriatimpa. Teetarite intsajiteroji pae-satoniqui, aviguentiquea tsajiaquerone imaica. Oraqueate notsatacajiaqueriguetei itsipapae manaquea noquejetacaacaroquea maasanopae, manaquea iramenamenavetanaquempaquea, cotanquitsiquea aato inejajiguitsi; inquemajivequempaqueate, cotanquitsiquea aato itsajiavaquerotsi.✠

Jesoshi itsatacajiaqueri itsatacaanejia taaca opajita iquejetacaaca incajaranqui
(Mt. 13.18-23; Mr. 4.13-20)

¹¹ “Imaicaquea nontsatacaajiaquempiquea taaca opajitapae noquejetacaaca. Oratica-queuea oitsoqui iroguentiquea noquejetacaacaro itsavetantajitiroguetei Iguenquetsat-sare Aapani Irioshi. ¹² Oraticaqueuea asacaraaguitananquitsica quenavoquirontsiqi iriguentiquea noquejetacaaca caquinte quemajavetavacaroca Iguenquetsatsare Aa-pani Irioshi, cotanquitsiquea iroompaquea icoraquetashiqueriquea ampatsini ipea-cotacaacari maasanopae aatonijite iquemisantajirotsi imeshajitiritsi. ¹³ Oraticaqueuea asacaraaguitananquitsica mapiporoquiqui iriguentiquea noquejetacaaca caquinte que-majavetavacaroca Iguenquetsatsare Aapani Irioshi ishineventajavetavacaroquea shine, cotanquitsiquea teequea intsamajateroji, tee inenquejamajateroji, mana iquejetac-aro panquirentsi teeca onquijamajateji ovaritsa. Iquemisantajavetaquita cotanquit-siquea ocoraquetashiqueriguetei atsipetagantsi ariquea icotanaca yovashiantanajiro-queuea itsarorentane. ¹⁴ Oraticaqueuea asacaraaguitananquitsica ochoocaqueguetei samer-ento, iriguentiquea quejecaroca caquinte quemajavetacaroca Iguenquetsatsare Aa-pani Irioshi. Cotanquitsiquea ariqueate iquenquejaviavetroqueate taaca opajitapae ishoshoventajijaaro, ishinevencariquea imentaquitsite aisa taaca inintajigui iriatimpa. Irooqueuea anaanaquero Quenquetsatsarentsi iquemavetacaca, iquejetacaroquea pan-quirentsi caarica oitsoquitatsi. ¹⁵ Cotanquitsiquea oraticaqueuea asacaraaguitananquitsica ocameetsaguitetaqueguetei quepatsi, iriguentiquea quejecaroca caquinte tampati-catiroca netsanamajatiroca cameetsaguetatsica. Iriatimpajia iquemisantamajatavaque-roquea Iguenquetsatsare Aapani Irioshi, ipampiamajaqueroquea, iroompaquea arim-paqueate ipampiatsimajatanacaroquea.

Iquejetacaacaroquea Jesoshi maasanopae senacacovetanquitsica
(Mr. 4.21-25)

✠ 8:10 Is. 6.9-10.

¹⁶ “Oraquea itsivojitirigueti tsivorentsi teequea ari iriguivotacojiteriji chomoqui. Aisa teetarite ariquea iroguisavicacojiteriji isaviquea omencoqui imaantajitaca. Iroguentiquea yoguisavicacojiteriquea jenoquijaniqui cameetsanijite intsivoguitetanaquenerinijite maasano quijaquijaitanquitsica oraniqui. ¹⁷ Ariquea oquejetacaquea taaca opajitapae senacaguetatsica imaica, oncoramanitapojajegueti ironigaantajiquero. Aisa taaca opajitapae teeca intsajiteroji imaica, oncoramanitapojajegueti intsajitaqueroqueate, aatotarite osenaquimatajatsiqueate. ¹⁸ Irootaquequea imaica pinquenquejamajateja quero pincoquempani pinquemisantamajatantaquempaca. Quericaca tsatavaqueroneca icantajiquerica intsatacaajitaqueriquea otsipapae. Quericaca teeca irininteji intsatavaquero, irapitsatsijitavaqueriquea ijivetaca itsaque.”

Iriniro Jesoshi aisa iriguentijeguitepae

(Mt. 12.46-50; Mr. 3.31-35)

¹⁹ Ariqueate ocoraqueaquequea iriniro Jesoshi aisa iriguentijeguitepae tsvironaquiqui ichoocaquegueti iriatimpa, cotanquitsiquea teequeate iragavejajigueji inquijaquijaiteji intsompogui, yojocajajiacatarite yoshequiavaequequea caquinte. ²⁰ Ariquea icamantajiqueriquea Jesoshi icantajitiri:

—Coraquetaque piniro aisa piguentijeguitepae. Chooca sotsiqui, inintajiaque iramenajiaquempi.

²¹ Cotanquitsiquea icanquequea:

—Maasano quemisantajivaqueroca Iguenquetsatsare Aapani Irioshi aisa netsanajivaqueroca, iriotaque nopejiaque iinanijia aisa iguentijeguijia.

Jesoshi ipejairoquea choviga aisa imagojatacajairo iniromotija

(Mt. 8.23-27; Mr. 4.35-41)

²² Iroompaquea yoanaquequea Jesoshi iniromotijaqui itetanacaroquea quenajarontsi itsipatsipaitanacariquea itsatacaane icanqueriquea:

—Jameja intatiqueroqui.

Ariqueate yooyoaitanaque. ²³ Iquenajatacojianaquegueti imaquequea Jesoshi quenajarontsiqui. Iroompaquea ochovigaguitevaepojiquea inirojencatapojaque choviga jeoc jeoc jeoc, ariqueate ocotanaca ovorevoreanaca otserajatanacaquea oja quenajarontsiqui iroovepojaca ontsitijaatanaqueme. ²⁴ Ishiashijianacariquea Jesoshi itinaitari icantsijigari:

—¡Tsatacaantantatsica! ¡Tsatacaantantatsica! ¡Ojocajajiguempani!

Itinajitsitanacaquea Jesoshi iquenquetsatacaquero choviga icanquero:

—Pimpejaencatanajempaja.

Icantsitaroquea aisa iniromotija vorevoreananquitsica icanqueroquea:

—Pinchopecajatanajempaja.

Ari ocotanaja osanticojencatanaji choviga, ari oquempetanaja iniromotija ochopecajatanaja. ²⁵ Iroompaquea icantsijigariquea itsatacaane:

—¿Quero ocotaca caarica pitsatantajigana nagavejamajati?

Cotanquitsiquea iriatimpajia itsaroamajajianaquequea yamenamenaitanaque intati icantavacaajianacaquea:

—¿Taashia ipaji irica? Icantaquitiguiro choviga aisa iniromotija oquemisanqueriquea.

Gararaquitica ishaquiacaca ampatsini

(Mt. 8.28-34; Mr. 5.1-20)

²⁶ Iroompaquea yarejerejeitapojacaro iguepatsitequi Gararaquitica* otampaticatacomajataquero quepatsi Garirea. ²⁷ Irooquea yaguijivetanacaquea Jesoshi yameniriquea icoraquepoji shirampari choocatatsica ocaniqui. Ishaquijiacariquea ampatsini, yajagantsitacovaetanaquequea teequea inquitsaatajempaji, aisa teequea inchoocateji tsvironaquiqui ariguentiquea ichoocati imperitamoroqui yojoquijitantapinijitarica metojaripae.

²⁸⁻²⁹ Querocaguetiquea savincaguiteri ishoncacoguitevaetanaqueri. Yaajitapinivecari yoishotantajivetacari cavorejatsariqui iracoqui aisa iguitiqui, yamenamajajivecari,

* 8:26 Gararaquitica. Chooca otsipa paperi otioncacotacaguetei ocaniqui Jersaquitica (gerasenos).

cotanquitsiquea teetarite iragavejajiteriji. Icaratsarejaguetaqueroquea ocanca, ishiashiatacaaguitarini ampatsini ontaniqui teeca inchoocateji caquinte. Ariquea yamenavaqueriguetei Jesoshi iguerotashitapojacari icajemanaquequea:

—¿Querocaquea pincoquenani, Jesoshi Irijanite Irioshimajaca Anaantamajatatsica? Iintsijate aatoqueate patsipetacaavaetana. ¡Pimpintsatacogajoitenashiatsi!

Icantantacaroca ocatica irooriji icanqueri Jesoshi ampatsini irisotoanaje irovashiantanajeri. ³⁰ Iroompaquea icanqueriquea Jesoshi:

—¿Querocaquea pipajitani?

Icanque iriatimpa:

—Nopajita Caramirincatatsica.

Icantantacarica: “Nopajita Caramirincatatsica”, irooriji yoshequiavaeque ampatsini shaquijaiacarica. ³¹ Iriatimpajia icantajiaqueriquea Jesoshi aatonijite itigarancajiguiritsi oogantavaetanquitsica jmm isaviji. ³² Cotanquitsiquea ontaniqui otapiqui choocaquea chanchof† icarapiovaeque, ishecajiaca. Iroompaquea irirajia ampatsini icantajianaqueriquea Jesoshi iroashijianaquerita chanchof inchoocajiaipojaqueriniji. Iriatimpaquea icantsijigariquea:

—Intsiquetirote poapoaitanaque.

³³ Icampanajanta isotosotoitapanajanti ampatsini yovashiantajianaqueri ishaquiavetacaca, irioquea yoashijiavetanaca chanchof. Iroompa ishaquijaiavetapojacari ariquea icohicoitanaca ishiajianaca ocogarajacaguetei itanquireajianaque vojocajajapojaca, icampojaca teron maasanojia.

³⁴ Irooquea yamenajiaqueriguetei quempoguijajiguirica chanchof itsaroajianaquequea ishiashiaitanaca yoayoaitanaque itsavetantajiaipojaqueroquea ontaniqui ichoocajiguiguetei itsitacavaepojiroquea, iquemacotantajiacarica choocajatsica acaniqui aisa choocajatsica quempejipaequi. ³⁵ Yoayoaitanaquequea iramenajiaquiteriquea. Ariquea yarejerejeipojacaro ichoocaqueguetei Jesoshi yamenajiaipojiriquea ishaquijaiavecaca ampatsinipae savicaji iquempejitacocari iquemisantajiri. Quitsaataja quenquejanaji. Itsarotsaroitanaquequea. ³⁶ Iriraquea amenajiaquerica yoguisotojainiriguetei itsatacaajiaqueri querocaca icoquerini yonigaitsijiacariguetei ishaquiavecariguetei. ³⁷ Ariquea maasano choocajatsica Gararaqui itsaroacaamajajianacari Jesoshi yamanamanaitantacarica irovashiantajianajeriniji. Ariquea itetanajaro quenajarontsi iquenajatacotanaji. ³⁸ Ariquea iriratica isotoanaqueca ampatsinipae icantavetacari ininque intsipataquempari, cotanquitsiquea Jesoshi itigarancaqueri, icanqueri:

³⁹ —Poanaje pitsovironaquitequi, pintsavetampoajeroquea maasano queroquea icoquempini Aapani Irioshi.

Iriatimpa yoanajiquea yoguisotojaiapojaqueneri maasano choocajatsica oraniqui ipintsatacotacariguetei Jesoshi.

Jesoshi ivochatajiro irorijanite Jairo

(Mt. 9.18-26; Mr. 5.21-43)

⁴⁰ Ocoajicatapojajiguetei icoraquetajiquea Jesoshi, yagatanaji intatiqueroqui. Maasanopae yaajiaqueri ishineventajiacarari, iroorijite icocani yoguijaguijaitavaqueri. ⁴¹ Iroompaquea icoraquepoji shirampari ipajitaquea Jairo. Iriatimpa iriguenti jivatanquitsica shinagogaqui icapiocantajiacaca joriojia. Ariquea yamenapojiriguetei Jesoshi itampinatashipojiriquea iguerovempojacari icanqueriquea iroanaquequea itsovironaquitequi. ⁴² Irooshipoji ometojaque irorijanite irapatiroritsite. Ocaratacotaque 12 ajagantsite.

Ariquea yoanaqueguetei Jesoshi yoguijaguijaitanaqueriquea icarajiavaeque caquintejia icantavaetanaque tirorererere oraniqui iroovepojaca irivinacajianaquerimequea. ⁴³ Ariquea ochoocaque aisa manquigarentsi ashinoncaavaetanquitsica ososojavaetini coramani, ariqueate ocaratacovaetanaqueni 12 ajagantsiteni. Yaavintanajivetacaroquea teequea inchoocatenica agavejanquitsineca iroveajero, niganquiquea oteroncamajatanakeri omentaquitsite, ejempacotia oanaca. ⁴⁴ Imaicaquea ocoraquetaque

† 8:32 Irira chanchof iriguenti viratsi quejvetarica santaviri.

oquenashipojaqueri Jesoshi itaquiqui ochagatsaequitsitavaqueri ocaramagotapojaquegueti irogataamagoro. Irooquee ochagatacotaquitiguiri jac osanticojatanaji ososoajare.

⁴⁵ Icantanaquequee Jesoshi:

—¿Taaquee chagatacoquena?

Icantajianaquequee maasano:

—Tee, jmm.

Cotanquitsiquea icantsitanacaquee Peerero aisa itsipatsipaitacaca icantajiguiri:

—Tsatacaantantsica, pamenavecaqueate itsinacajianaquempi itatsintatsiitanaquempi.

⁴⁶ Cotanquitsiquea Jesoshi arimpaqueate icantanaquequee:

—Choocaguitatsi chagatacoquenaca, notsatavaquetari ocantapanajantana shirec nagavejane osotoanaquegueti.

⁴⁷ Iroatimpa amenavaquerogueti tee agaveji omanacotempaji, ocoraquepojaquequee iriatimpaqui ompioncanacaqueate pion, pion, pion, oguerovempojacariquee. Maasano iquemajiaqueroquee ocamanquerigueti taaquee opaji ochagatimenqueri, aisa ocamanqueriquea ocanque:

—Iroompaqueate nochagatacoquempigueti jac osanticojatanaji noriraja.

⁴⁸ Iriatimpa icanqueroquee:

—Orijani, irooriji pavenquenatarite naatimpa, irootari piveantanajaca. Imaicaquee poanaje pishinevaequempa.

⁴⁹ Iroompaquee quenquetsatatsitiraja Jesoshi icoraquepoji itsipa, iquenapoji itsovironaquitequi Jairo, jivatanquitsica shinagogaqui, icanqueriquea:

—Jac metojaque porijanite, ariotapojaque pasereguiritsi Tsatacaantantsica.

⁵⁰ Cotanquitsiquea Jesoshi iquemaqueriquea, icanqueri Jairo:

—Aato pitsaroguitsi. Mana paventanaquena naatimpa, ariquee ompeanajempa.

⁵¹ Ariquee yarejetapojacagueti itsovironaquitequi icanque aatoquee iquijitsi itsipa, iriguenti itsipatsipaitanaca Peerero, Joanca, Santiago, iri joquijitanquitsica aisa iniro, iquijaquijaitanaquequee intsompogui.

⁵² Manaquee icatintijiacaca sotsiqui itsipajia iraacojiaqueroquee metojatsica cajemajiaque icanca, cotanquitsiquea Jesoshi icantajapanajantiriquea:

—Aato piraajiga, teetari ometojeji, manatarite omaaque intati.

⁵³ Cotanquitsiquea ishironmentajianacari, itsajiaquetari metojamajataque.

⁵⁴ Iriiraquee Jesoshi yaavacopojaquero, iririjencatanaque icanqueroquee:

—Chaajaniquitirajaca, pincatianaje.

⁵⁵ Ariquee opiapojaja oshire, ocatianaja. Iroompaquee icanque Jesoshi irojocajiaquenero oshecatajempata. ⁵⁶ Manaquee yamenamenaitanaque intati iri aisa iniro, cotanquitsiquea Jesoshi icantajiguiri aatoquee icamantitsi.

9

Jesoshi itigarancajiaqueri 12 itsatacaane iroaroaitanaque intsavetantajianaque (Mt. 10.5-15; Mr. 6.7-13)

¹ Ariquee icajemajiaqueriquea Jesoshi itsatacaane carajianquitsica 12, icapiocajiaqueriquea yagavejacaajiaqueri iroguisotoaguetaqueri maasano ampatsinipae aisa irogueshiguetajeri joquijiguetaatsica. ² Itigarancajiaqueriquea intsavetantimojianaqueri maasano intsatacaajianaqueri quero icocani imajirontaguetai Aapani Irioshi. Icantajiaqueriquea aisa irogueshiguetajeriquea joquijiguetaatsica.

³ Icantajiaqueriquea:

—Aatoquee paimatitsi. Aatoquee paguirotsi pigotiro, pitsarate, pisheca, aisa pimentaquitsite. Aatoquee paguirotsi mavite piitsaare, iroguentiquea oratica piquitsaacaca. ⁴ Querocaguetai oraniqui poapoaitanaqueni incajemavaquempiqueti pimaaque itsovironaquitequi, poapoaitanaquequee pimaaque. Picocaniquea pimaimotaqueriquea arejetapojajempa poapoaitantanajempaca. ⁵ Oraqueate aatoguetai quericaca

aavaquempineca, poapoaitanaquequea, cotanquitsiquea iroquetitaquea pantecamajanaqueroja quepatsivane pagatiquitsitapojaquerigueti, iroonijite iramenantajiaque-mpaca manaquea yantaque teeca oncameetsateji teetarite iraavaquempi irishineventajiaquempi.

⁶ Iroompaquea yoayoaitanaquequea itsitacavaetanaquero querocagueti oraniqui ichoocajiguigueti caquinteja, itsavetantimojianaqueriquea Quenquetsatsarentsi Oganejencatatsica. Aisa yogueshiguetanajiri joquijiguetsica.

Erorishi iquenquejajiro imetojacaanquerigueti Joanca Viñacajatantatsica
(Mt. 14.1-12; Mr. 6.14-29)

⁷ Ariquea iriraquea majirontatsica Erorishi* iquemacoquerogueti maasanopae yantaguetaqueca Jesoshi, yamenanaquequea intati querocampa incanque, choocatari cantajianquitsica: “Tancorejanajishia Joancani Viñacajatantatsica.” ⁸ Itsipaqueate cantajianquitsi: “Iriocajate coraquetajatsiquea tsavetantatsicani Iriashini coramaniticanani.”

⁹ Cotanquitsiquea icanquequea Erorishi:

—Irirampani Joancani nojitorejacaanqueriquea naatimpa. ¿Taampaqueate imaica irira noquemacoqueca icamantacojitrini?
Ariqueea inintaveca iramenaquerime.

Ishecatacaajiacari Jesoshi 5,000 shirampari
(Mt. 14.13-21; Mr. 6.30-44; Jn. 6.1-14)

¹⁰ Ocoajicatapojigueti icoraquecoraqueitaji itigarancaqueca Jesoshi icamantaguetapojiri maasanopae yantaguetaqueca. Iquemajiavaqueriquea Jesoshi, itsipatsipaitanacariqueea osamani irooshitigueti guinteninintsi icantajitica Vetsaira. ¹¹ Cotanquitsiquea ari quemacojiquerigueti yoayoaitanaque isaquiritsaevaetanaque caquinte yoguijaguijaiqueriquea. Iriraquea Jesoshi ishineventajiavacari itsavetantimojiaqueri icamantajiaqueri quero icocani imajirontaguete Aapani Irioshi, aisa yogueshiguetajiriquea ashinoncajajiatsica.

¹² Iroompaquea ijaguitevaetanajiguete catsirincaiteri iquempejiquempejitanacariqueea itsatacaane icantajiguiri:

—Poguiapaquijajajeri maasano irirajia iroaroaitanajeta ontaniqui guinteninintsipaequi irooshitacoguetanquitsica cameetsanijite irimagorejajiaquequea aisa irivegarajiaque isheca irishecajiaquempanijite. Ocaniquiquea ocaniqui tee anejeronica quero-campa irishecajiaquempaca.

¹³ Cotanquitsiquea Jesoshi icantajiguiri:

—Pojocajigueneri aviatimpajia irishecajiaquempaca.

Yacajianaque icantajiguiri:

—Tee anejeroji querocampa nojocajiaquenerica. Iroguentivani 5 pan, iriraquea shima mavipaquite icarati. ¿Querocaquea noncojiaquempa? ¿Ari nagavejajiaque noanoaitanaque novegarajiaquiteneriquea irashijia maasano irishecajiaquempaca?

¹⁴ Icantantajiacaca imaica yamenajiaquequea iriguentipioniquea tirorererere caquinteja, icarajiavaetaquequea aricaquea 5,000 shiramparija. Cotanquitsiquea Jesoshi icantajiguiri itsatacaaneja:

—Poguisavicajigueri, poashiguequempari arica incarajiaquequea 50 irisavisaviitaque-quea.

¹⁵ Ariqueea quempejiaqueriquea, yoguisavicaguequeri maasano. ¹⁶ Iroompaquea iriraquea Jesoshi yaitaroquea 5 pan aisa mavipaquite shima, yajiricaqueriquea, ipaguitetanaquero inquite yamanaqueriquea Aapani Irioshi, icantaqueri: “Arioteesaa.”

Iroompaquea icotarejaguequeroquea pan, yojocajiaqueneriquea itsatacaane, iriatimpajia yojocajiaqueneriquea maasano. ¹⁷ Ishecajiacaquea maasano, quemajianaca.

* 9:7 Iriratica Erorishi irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

Ariquea iriraquea itsatacaane yaaguetajiroquea choocatajatsica, itetajiroquea cantiriqui tseraiquipae ocaratacovaquequea 12.

Peerero icanque Jesoshi iriguenti Quirishitotatsica

(Mt. 16.13-16, 20; Mr. 8.27-30)

¹⁸ Querocagueteri savincaguiteri ichoocaque Jesoshi yamanaqueriquea Iriri, iriguentiquea itsipajiaca itsatacaanejia. Ariquea icoacojiaqueri icanque:

—¿Taa ipaji ijijiaquena caquinteja? ¿Quero ican tajiguini?

¹⁹ Iriatimpajia ican tajiguiriquea:

—Iconoagarantajiaca ican tajojaquempi: ‘Iriguenti Joancani Viñacajatantatsica.’ Itsipa cantajiananquitsi: ‘Iriguenti Iriashini.’ Itsipaquea cantajiananquitsi: ‘Iriguenti itsipa tsavetantatsicani paesatinica, tancorejanajishiatsi.’

²⁰ Ariquea ican tajiguiriquea:

—Aviatimpajia, ¿quero picantajiguini? ¿Taa nonaque naatimpa?

Icantsitanacaquea Peerero:

—Aviguenti Quirishitotatsica† itigarancaqueca Aapani Irioshi.

²¹ Icantajiguiriquea:

—Aatojate picamantitsi.

Jesoshi icamantsicaró irimetojaque

(Mt. 16.21-28; Mr. 8.31-9.1)

²² Icantanaquequea aisa:

—Iransipevaequempaquea irira Irijanite Caquinte. Irimanintajiaqueriquea jivajitsica, saseroroteja anaantajanquitsica aisa tsatacaantajiguiroca itioncacotanaqueca Moishishini. Ariquea irimetojajiqueriquea, cotanquitsiquea aapojajempagueteri 3 savincaguiteri impochatanaje.

²³ Ariquea ican tajiguiriquea maasano:

—Quericaca nintanquitsineca iroguijatacoquena irovashiantanaqueroja inintashiguetacaca iriatimpa, maasanopae osavincaguitetegueteri irinatashitapiniquempa inchapoa irompajacotantajiquemparica, mananiji iroguijatacoquena. ²⁴ Quericaca teeca irininteji irantsipeventena irooca irimetojavenquena, manaquea impeaquempa; cotanquitsiquea iriraquea atsipevenquenanece irooca irimetojavenquena, incoquempaniquea inchoocaguiteni. ²⁵ Arigueteri inchoocavetaquempa agavejanquitsineca irashinquemparo maasanopae quepatsipaequitica, cotanquitsiquea oncoramanitapojajegueteri irimetojanaquegueteri arigueteri impeaquempa camorecariqui, ¿arimpate agavejaque irajaararo aavajeri? Aatoquea agavejitsi. ²⁶ Quericaca pashiventacaquenanece naatimpa aisa nocantaguetica, ariquate inquejetaquempaquea irira Irijanite Caquinte impashiventacaapojaquempariquea iriatimpa oncoramanitapojajegueteri incoraquetajegueteri. Iroganejencapojajempaquea, inquempetapojajempari Iriri aisa irashivantijitete comajashirentanquitsica yoganejencajiacagueteri. ²⁷ Noncanquempija arimajaguitatsi iconoagarantaca catintiitimojiaquenaca imaica, aato imetoji tequeratagueteri iramene quero icotani Aapani Irioshi imajirontagueteri.

Jesoshi ican tashitatiimojiacariquea itsatacaanepae

(Mt. 17.1-8; Mr. 9.2-8)

²⁸ Iroompaquea anaavaetanajagueteri arica 8 savincaguiteri yoanaquequea otsempiqui iramanajeriquea Iriri, itsipatsipaitanacari Peerero, Joanca, Santiago. ²⁹ Ariquea yamanaquerigueteri Iriri taampinaquea ican tashitatanaca ivoroqui, ariquea ocotanaca iitsaare ocavorejatanaque ocantanaquequea tsiren oquitamaromajatanaque. ³⁰ Ariquea iconijajianaque mavite shirampari, itsipajiacariquea Jesoshi iquenquetsatavacaajiaca. Iriotaque Moishishini aisa Iriashini. ³¹ Icavorejamajatanaquequea ican tajanaquequea

† 9:20 Quirishitotatsica. Iguenquetsatsarequi guiriegojia icanquegueteri Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajatsica coramanitica intigarancaque Aapani Irioshi impeaquempañiji Imajirojiate maasano.

tsiren. Iroguentiquea iquenquetsatacojiaque irimetojaque Jesoshi Jerosarequi onet-sanatantaquempaca itioncacojiquerigueti. ³² Iriraquea Peerero aisa itsipatsipaitacaca manaquea ipochoquipochoiitanaque, cotanquitsiquea opeamajatanacagueti yamenitsijigariquea Jesoshi cavorejavaequequea cantavaeque tsiren itsipatsipaitacari Moishishini aisa Iriashini. ³³ Iroompaquea itsinampirejajitanajatiguii Jesoshi icantsitanacaquea Peerero:

—Tsatacaantantsica, cameetsavaeque achoocajiaque ocaniqui. Intsishiatsi nompeacaguempaja 3 catisetarentsi, aparo pashinquempa aviatimpa, aparo irashintaquempapa Moishishi, otsipaquea irashintaquempapa Iriashi.

Cotanquitsiquea irira Peerero tee intsatavajeroji icantavecaca. ³⁴ Quenquetsavetanatsi omanacojiapojajiri mararo, itsarotsarotanaque yamenaquequea omanacojianajiri. ³⁵ Ariquea iquenquetsajencajitanaque omararosecanquegueti icanquequea:

—Iricatica irio Irijani, nopintsamajatacaca. † Pinquemisantamajajiguerija.

³⁶ Ariquea opeanacagueti iquenquetsataquegueti yamenitsijivajetajari Jesoshi aparo icatiaja. Ariquea yoayoaitanajiquea imajerejiapoji teequea incamantapojajeji iroaque-ragueti yamenaveca.

Jesoshi yogueshitajiri chaajaniquitirajaca, yoguisotoajiniri ampatsini

(Mt. 17.14-21; Mr. 9.14-29)

³⁷ Osavincaguitetanajigueti icoraquetaji Jesoshi aisa itsatacaane iquenaquenaipojaji otsempiqui. Ariqueate yoayoaitanaquequea oshequini caquinte itonquivotonquivoitavajari. ³⁸ Ariquea iquenquetsatanaquequea aparo irijencavaetanaque icanca, icanqueriquea Jesoshi:

—Tsatacaantantsica, iintsija pamenerija nirijanite, apatiroti icancaquea iriatimpa.

³⁹ Ishaquiacaritari ampatsini icajemamajatacaqueri aisa icantacaaqueri tinquininini, ishimotyonaatanaquequea icanca. Icocaniquea yatsipetacaaguitarini, tee irinintenica iroguipaquiujajeri. ⁴⁰ Nocantajavecariquea pitsatacaane iroguisotojiaquerime, cotanquitsiquea teequea iragavejajigueriji.

⁴¹ Icantanaquequea Jesoshi:

—¡Arisa picomirincajiga teequea paventemparoji iragavejane Aapani Irioshi, ariguentiquea picovaeguishejiga! ¿Querocaquea oncarashequiavaeteni nosavicaventajiaquempipi? ¿Queroca oncarashequiavaeteni nantsipetacojiaquempipi?

Ipitsocashitanacari iriri icanqueriquea:

—Pamaquenarijate acaniqui pirijanite.

⁴² Cotanquitsiquea irooquea yaavetanacanarigueti, iriraquea ampatsini yoguitejanacari isavi quepatsiqui icantacaaqueri tinquininini. Cotanquitsiquea icantomajitsitari Jesoshi, yoguisotoitari, ariquea icotanaja chaajaniquiri jac peamajatanaja. Yojoquitajanariquea iriri.

⁴³ Maasanopae yoayoaitanaque intati, yamenaquequeate yagavejamajati Aapani Irioshi.

Jesoshi icamantsitajariquea irimetojaque

(Mt. 17.22-23; Mr. 9.30-32)

Icojiacaniquea quenquejajianatsitiraja iquenquejacojianaquerogueti ipeacaaguecaca Jesoshi, iquenquetsatanaquequea iriatimpa icantajiguii itsatacaane:

⁴⁴ —Imaicaquea pinquemisantamajatacaqueri noncanquempica. Iriraquea Irijanite Caquinte iracaantajiqueriquea iraajiavaqueri caquinteja.

⁴⁵ Cotanquitsiquea iriatimpajia teequea intsatavaquero taaca icantaqueca, omanapitsajiacariquea. Cotanquitsiquea omintsarotanaqueri incoacojiaquerime taa opaji icanque.

Quericaca anaamajatantanquitsineca

(Mt. 18.1-5; Mr. 9.33-37)

⁴⁶ Iroompaquea ipariajianacaro itsatacaane iquenquetsatavacaajiaca iquenquejacojiaca quericaca anaamajatantanquitsine, irooquea icanque, irooquea icanque.

† 9:35 nopintsamajatacaca. Chooca otsipapae paperi iroquetinica cantanquitsica ocaniqui “iriguenti nocoguaqueca.”

⁴⁷ Cotanquitsiquea Jesoshi itsaqueroquea maasanopae iquenquejajaqueca. Ariquea yaaquequea aparo chaajaniquiri isenampijacari. ⁴⁸ Icantajiguiriquea:

—Quericaca aavaquerine shineventavaquemparine chaajaniquiri quempecarica iricatica iroorijite nonintacaantaquero naatimpa, quempecaqueate naroguentica ishineventavaca. Quericaca shineventavaquenane naatimpa, irioquea aisa irishineventavaquempa tigarancaquenaca. Taacaguetei cavintsajantamajatantantantsine incavintsajamajatanaqueriquea teeca iranaanteji, irioquea iriguenti caaviji yanaantavaeque.

Quericaca teeca incatsimajiaji iroguenti itsipatacaji

(Mr. 9.38-40)

⁴⁹ Ariquea icanqueriquea Joanca:

—Tsatacaantantatsica, chapinqui namenajiaqueriquea aparo yoguisotoaqueriquea ampatsini, iroguentiquea yaventashicari pivajiro. Cotanquitsiquea naatimpajia nocantimentsitariquea, namenaque tee intsipatacaji.

⁵⁰ Icanquequea Jesoshi:

—Imaicaquea aatoquea picantimentiri, maasanotari teeca incatsimajiacaji iroguenti itsipatacaji.

Jesoshi icantomajiaqueri Santiago aisa Joanca

⁵¹ Irooshipojigueti iroantanajempaca Jesoshi jenoqui inquitequi itampishitashitanquero iroanaque Jerosarequi. ⁵² Itigarancajiaqueri iriquetita oananquitsineca incamantanquequea coraquetapoji Jesoshi. Iriatimpajia yoayoaitanaquequea irinetsanaguequeneri, iquijaquijaivetapojaca apatiroca guinteninintsi ichoocantantajiacaca Samariquitica. ⁵³ Cotanquitsiquea iriatimpajia yamenamenaiqueguetei ariguenti iroaroaitanaque Jerosarequi, teequea irinintajigueji irajiavaqueri. § ⁵⁴ Iriraquea itsatacaane pajitatsica Santiago aisa Joanca yamenaqueguetei teequea irajiavaqueriji, icantajiguiriquea Jesoshi:

—Nomajirote, ¿ari pininque noncantajiaque asacaraaquempa paamari jenoqui inquitequi ampevoquijajiaqueri onteroncamaquaeri?

⁵⁵ Iptsocashijigari Jesoshi icantomajiaqueri, [icanti:

—Tee pintsateji quero icocani Ishire ashintajiaquempica; ⁵⁶ teenicate iroonica incoraquequetantempa Irijanite Caquinte interoncaguefaqueri caquinte, iroguentiquea icoraquetantacaca irajiaavajeri.]*

Iroompaquea yoayoaitanaquequea otsipaqui guinteninintsi.

Nintajiatatsica iroquijagujaitanaqueri Jesoshi

(Mt. 8.19-22)

⁵⁷ Ariquea ishivoquishivoquiitanacaro quenavoquirontsi, icoraquepojaque shirampari icampojsiri Jesoshi:

—Nomajirote, noninque noncoguitempani noguijaguitempini querocaguetei poanaque.

⁵⁸ Icanquequea Jesoshi:

—Iriraquea zorro[†] chooca imoro iquijantacaca. Ariquea iquempejiaca tsimeripae chooca imencoshi, cotanquitsiquea iriraquea Irijanite Caquinte teequeate onchoocateji itsovironaquite irimaantaquempaca.

⁵⁹ Ariquea icanqueriquea itsipa:

—Jameja poguijaguitenani.

Cotanquitsiquea iriatimpa icanquequea:

—Nomajirote, iroquetita nonquitatanajeritaja aapani.

⁶⁰ Icanquequea Jesoshi:

§ 9:53 Irirajia Samariaquitica oshequi icatsimaneguintajiaqueri joriojia, teequea irinintsi inquenaquenaitsaqueri joriojia iguinteniqui iroaroaitanaqueguetei Jerosarequi intsarotentajiaquemparigueti Aapani Irioshi, irootaquequea teeca irinintantempaji iravaajeri Jesoshi. * 9:56 Oconoagarantaca paperi iroquetinica manaquea ocanti acaniqui: "Iptsocashijigari Jesoshi icantomajiaqueri." † 9:58 Ichocati zorro tomirishiqui, iquejevecari shiishi. Iroguenti shecatarica chaapa, quepigari, maasano.

—Irraquea metojashirentari irio quitatajerine metojari. Aviatimpa poanaque pintsavetantaqueroquea quero icotani imajirontagueti Aapani Irioshi.

⁶¹ Icantanaquequea itsipa:

—Nomajirote, iintsija naatimpa noguijaguitempini, cotanquitsiquea iroquetita pishinetena noapanajanteta notsovironaquitequi noncamantantaguetapanajanteta.

⁶² Cotanquitsiquea Jesoshi icanqueriquea:

—Quericaca parianaquemparoneca inquitencavatsatacaantempari igaapironcaarite quepatsiqui, arigueti iramenamenatanaque itaquitapojacagueti, aato otampaticati iquitenciaqueca. Ari iquejetaca quericaca parianaquemparoneca iroguijatacotena, arigueti iramenamenatajaterogueti iquejeveguitanigueti coramani, aatoquea yagaveji inetsanamajatiro inintacaavecarica Aapani Irioshi, teetarite irimajirontamajatemparinica.

10

Jesoshi itigarancajiaqueriquea 72 intsavetantanaque

¹ Coajicaquea iriraquea Amajirote icoguiaguetaqueri itsipapae itsatacaanejia carajianquitsica 72,* itigarancajiaqueriquea irijivajivaitanaqueri intsipatavacaanaque-mpa mavite mavite, intsitacaguitejavaetanaquero guinteninintsipae querocagueti iroanaqueni iriatimpa.

² Iroompaquea icantajiavaqueri: “Choocaquea oshequini coguitejajianquitsica irimeshijiaqueri, cotanquitsiquea teemajacaquea iroshequigueji tsatacaajiaquerineca cameetsanijite irimeshiimentajiquerinijite. Manatarite iquejejiacariquea osampatigueti tirigoitsoqui ocaraguitetacovaeque catejieguni teemajacaquea iroshequiama-jateji aviitaqueroneca. Irootaquequea imaica nocamantantajiaquempica pamanajia-queriquea Aapani Irioshi intigarancajiaque tsatacaajiaquerineca. ³ Poajianaquequea aviatimpajia. Iroguentiquea nontigarancajiaquempiquea inchoocajiaquegueti catsimatantajiatsica irantsipetacaavaequempiquea quempecaquea irioca notigarancaque-quea irijanigantirenajaniqui oveja iroanaquequeate yomporoguijagueti lobopae† she-catarica oveja. ⁴ Aatoquea paajiguiti pitsaratote, aisa pitetantarica pimentaquitsite, aisa aatoquea paajiguiti itsipapae pigaviguitire. Aatoquea pisavicaguetanaquequea quenavoquirontsiqui pinquenquetsatavacaajianaquempa pintsipatsipaiquempariquea quericaca pintonquivojajiapojaquempaca.

⁵ “Querocaguetiquea oraniqui incajemajiavaquempi pimaajianaque itsovironaquite-qui pinquijaquijaitanaquegueti intsompogui iroquetitaquea pincantajiaqueri: ‘Nonin-quequea incavintsajamajiaquempi Aapani Irioshi maasano choocajianquitsica pitso-vironaquitequi.’ ⁶ Irishinevaetanaquempagueti iriatimpa irininquegueti incavintsaja-majaqueriquea Aapani Irioshi, ariquea inquejetaquempaquea Aapani Irioshi incavintsajamajataqueriquea. Cotanquitsiquea aatogueti ininti, aatoquea icavintsajiritsi Aapani Irioshi, aviguentiquea incavintsajajiaque. ⁷ Irishineventajiavaquempigueti pincoquempanija pimaimojiaqueri aapojempagueti poapoaitantanajempaca, aatoquea pigajaiatsi. Pishecajiaquemparoquea taaca opajitapae irojocajiaquempica, aisa pimirajiaqueroquea imirajiacaca iriatimpajia. Icantajitiroquea cameetsavaeque irivegarajiaqueriquea catsi-quetatsica. Jeroquea cameetsavaeque irojocajiaquempiquea maasanopae picoguitejaco-jiacaca, poimojianaqueritarite pitsavetantimojiaqueritarite.

⁸ “Querocaguetiquea oraniqui poapoaitanaque, incajemajiavaquempigueti pishecajianaquempaquea pishecatavaquemparoquea taaca opaji yojocacojiaquempica.

⁹ Pogueshiguetajeriquea ashinoncaaguetatsica, aisa pincantajiaqueriquea maasano: ‘Iroshitapoji irimajirontaquempa Aapani Irioshi.’ ¹⁰ Cotanquitsiquea querocagueti poapoaitanaque aatogueti icajemimpi, pinquenaquenaitanaquequea quenavoquirontsiqui icanquegueti tirorererere caquinteja pincantajianaqueja:

¹¹ ‘Noshegontamajianaqueroquea quepatsivane nagatiquitsitapojaquempica iroonijite pintsajiaquenijite manaquea pipeacajaiaca covaequisherentsi teetarite pishineventajiavaquenaji. Cotanquitsiquea noninque pintsajiaque irooshipojaquequea irimajirontaquempaquea Aapani Irioshi.’ ¹² Pitsajigui coramaniqui icatsimajiaqueriquea

* 10:1 Oraquea itioncajijirogueti coramani oconoajiacca itioncajiquero 70, otsipapae otioncaca 72. † 10:3 Irira lobo iriguenti tomirishiquitica catsimari quejevecarica iririjegui shiishi.

Aapani Irioshi Soromaquitica yapevoquijajiaqueriquea iteroncajiaqueriquea. Imaica noncantajiaquempiquea aavaepojajempagueti incatsimatantajiaquemparica Aapani Irioshi maasano teeca intsaromentajiguempariji, caaviji irigaajiaqueri teeca irinintajigueji inquemisantajiaquempiji, anaamajataquero irantsipejiaquempaca Soromaquitica.

Jesoshi icantomajajiaqueriquea guintenijiatsica Corashiniqui, Vetsairaquí aisa Caperenaquí (Mt. 11.20-24)

¹³ “¡Imacashiatsi patsipevaetemanishiatsi aviatimpajia guintenijiatsica Corashiniqui! ¡Imacashiatsi patsipevaetemanishiatsi aviatimpajia guintenijiatsica Vetsairaquí! Pamenajavecaroquee nonigaimojiavequempica ocaantantatsica intati, cotanquitsiquea teequea pinintajigueji pincantashitatijaijanajempa povashiantajianajeroji picovaeguishejiacagueti. Iiraquea guintenijavetsica coramani Tiroqui aisa Shironequi iriome amenajiguerome, incantashitatijaijanaquempamequea inquitaaajiaquemparome jiriquiquijiporoqui, aisa irigachoncaguinajiaquempamequea cachopoquiri ironigaantaquempanijite ishimampojancajiaca yamenajiaque icovaeguishejiaca, incantashitatijaijanajempamequea. ¹⁴ Cotanquitsiquea aviatimpajia arejetapojajempagueti incatsimatantajiaquemparica Aapani Irioshi maasano teeca intsaromentajiguempariji, caaviji irogaamajajiaquempi anaamajaqueroquee incatsimajiaquerigueti Tiroquitica aisa Shironequitica. ¹⁵ Aviatimpajia guintenijiatsica Caperenaquí paventacojiaca. ¿Ari pijitaque poapoaitanaque jenoqui inquitequi? ¡Aatotarite! Manaquee poapoivaetanaque isaviji Areshiqui.‡

¹⁶ “Notsatacaanejia, quericaca quemisantamajatavaquempineca aviatimpa, naroguenti iquemisantamajatavaque. Quericaca manintaquempineca aviatimpa, naroguenti imanintaque. Quericaca manintaquenaneca naatimpa, iriguenti imanintaque tigarancaquenaca.”

Icoraquecoraqueitaji itigarancajiaqueca Jesoshi

¹⁷ Ocoajicaguitevaetanaquequee icoraquecoraqueitaji irirajia 72[§] itigarancajiaqueca, ishinejiapojajaquea icantajiguiri:

—Nomajirote, iquemisantajianaque ampatsinipae, noguisotoantajiacari pagavejica naventajiacarogueti pivajiro.

¹⁸ Icantajiguiri Jesoshi:

—Jeejeguitatsi arimajaca namenaqueriquea Satanashi yagavejajitaqueri yasacaraan-tanacaro inquite iquejetanacaro careti. ¹⁹ Naatimpa nagavejacaajiaquempi pagaticajiaqueriquea camaarini aisa oseroticon. Aisa pagavejajiaqueriquea ampatsini catsimatantanquitsica agavejvetanquitsica, aatoquee querocaca icojiguimpiniquea. ²⁰ Cotanquitsiquea noncantajiaquempi, aatoquee irooquee pishineventajiatatsi pamenajiaquegueti pagavejajiaqueriquea ampatsinipae. Iroguentiquea pishinejiaquempaquea pamenajiaque tioncacojiaquempiqueate jenoqui inquitequi.

Jesoshi ishinevencariquea Aapani Irioshi

(Mt. 11.25-27; 13.16-17)

²¹ Iroompaquee ariquea icotanaca Jesoshi ishinemajatanaca icanca, yoguishinejaqueriquea Ishire Aapani Irioshi, icanquequee: “Aapani Majirontamajatatsica, aviguenti majirontacojiacarica maasano inquitequitica aisa quepatsiquitica. Noshinevenquempiquea nocanca, pitsititapitsajiaqueritari tsajiatatsica teequea ponigaajigueriji querocaca picotani aviatimpa. Iriguentiquea ponigaajiaque teeca intsajigueji. Ari oquempetantacaca imaica, Aapani, irootari pininque aviatimpa.

²² “Yojocaguetaquenaroquee Aapani maasanopae, aisa yagavejacaamajaquena maasanopae. Teequea quericaca tsamajatatsineca querocaca icotani Irijanite Aapani Irioshi, apatiroti tsatanquitsi Aapani. Aisa teequea quericaca tsamajatatsineca querocaca icotani Aapani, apatiroti tsatanquitsi Irijanite aisa irirajia inintacajiaqueca Irijanite intsatacaajiaqueri.”

‡ 10:15 Oraquee Areshi iroguenti ichoocajiaquegueti metojatsica. § 10:17 Pamenero tioncanquitsica isavivanaqui otsapaqui 10.1.

²³ Irioquea ipitsocashitanaca itsatacaanejia icanqueri: “Icavintsajamajaji-aquempiquea Aapani Irioshi pamenantajiacaroca maasanopae pamenajiaqueca imaica. ²⁴ Nocantajiaquempi ichoocajiaveca oshequiniquea majirontajiatistica aisa tsavetantajiguiroca icanquerica Aapani Irioshi inintajiaveca iramenajiaquerome pamenajiaqueca aviatimpajia imaica, cotanquitsiquea teetarite iramenimajigueroji. Aisa inintajiaveca inquemajiaqueroquea piquemajiaqueca, cotanquitsiquea teequea inquemeroji.”

Samariaquitica cavintsajacotantatsica

(Mt. 22.34-40; Mr. 12.28-34)

²⁵ Iroompaquea icatiitsitanaca aparo tsatacaantiroca itioncacotanaqueca Moishishini, icoacoqueriquea Jesoshi inintavetaca iramenantempari. Ariquea icanqueri:

—Tsatacaantantatsica, ¿querocaquea noncoquempanti imaica iranijacaantajenacate Aapani Irioshi cameetsanijite nonchoocaguiteni?

²⁶ Icanqueriquea Jesoshi;

—¿Querocaquea ocanqueni itioncacotanaqueca Moishishini? Papatsajavantirogueti, ¿querocaquea ocanqueni?

²⁷ Icanquequea iriatimpa:

—Manatarite ocanque: ‘Pimpintsamajataquemparija Majirontamajatatsica Pirioshite, pampaniromajatanaqueri, pimpintsashirentamajaquempari, pintampishiventamajaqueneri irooriji pipintsamajatacari, pimpintsaguenquejanemajatanaquempari.’ Aisa ‘Pimpintsataquemparija pigonoro pinquejetacaajempa pipintsatagueti aviatimpa.’[☆]

²⁸ Icanqueriquea Jesoshi:

—Pitampaticamajataqueroquea. Pincoquempagueti pinetsanamajaqueroqueti ocanqueca, ariquee iranijacaajempi Aapani Irioshi pinchoocaguiteni.

²⁹ Cotanquitsiquea iriatimpa inintaque irompetanaquempa, icoacotsitariquea otsipa icanqueriquea:

—¿Querimpate nogonoro?

³⁰ Icantsitariquea Jesoshi:

—Aparo jorio yoavetanaqueca Jericoqui iquenavepojaca Jerosarequi. Cotanquitsiquea ariquee yarejevecaro niganquipoqui yaavaqueriqueate aitsitantajiatistica yaitsimajataqueriquea maasanopae aisa iquitsaacaca yoajiaqueriquea ejempaco, itavatavaaqueri semic semic semic, yamenajiguiquea ijiquejeji metojanaque yoguipaquijapanajantiri. ³¹ Iroompaquea yoanaquequea oraniqui aparo saserorote iquenapojiroquea iriatimpa aisa Jerosarequi, yamenavetanacari itomicapitsapanajantiri tiijacoñaji oraniqui, yoanajiquea. ³² Aisa icoraquepoji oraniqui aparo irevita amijiguirica saserorotejia, ariquee iquempetacaquea iriatimpa yamenavetanacari itomicapitsapanajantiri.

³³ Cotanquitsiquea icoraquepoji aparo Samariaquitica* yamenitsipojacariquee ipintsat-acotanacari. ³⁴ Ishiashitanacari yaanaquequea ashiti aisa vinoja yaavintasetsiqueriquea imaaguequeri. Iroompaquea igataitsitariquea iraashinotequi quijavecarica iriatimpa, itsipatanacari tsovironaqui qui imaantajitaca oahoaitatsica oraniqui. Iquempoguiaqueriquea yojocaguequeneri icoguitejacogueca. ³⁵ Iroompaquea osavincaguitetanaquagueti aisa, yaitsitanaca mavite tenario[†] yojocaqueneriquea ashincaro itsovironaquite icanqueriquea: ‘Jeri iricatica imentaqui novegaratanquempica pamenamajatajerija iricatica. Aatogueti yarejetaqueate imentaqui oncoajicatanajegueti novegaratapojajempi noncoraquetajegueti.’ Ariquee yoanajiquea Samariaqui. ³⁶ Imaicaquea imaica iintsija pincanquenaquea, ¿querica peamajaquerica igonoro yaajiaqueca aitsitantajiatistica?

³⁷ Icanque iriatimpa:

—Iriguenti iricatica pintsatacocarica.

Icanqueriquea Jesoshi:

—Iroosacánica imaica ariquee pinquempequempa aviatimpa.

[☆] 10:27 Ireo. 6.4-5; Irev. 19.18. * 10:33 Icatsimatavacaca joriojia aisa Samariaquitica iroorijite itsarovenajiacarigueti Aapani Irioshi irirajia Samariaquitica tee irogujamajateroji yamejigaca joriojia iriatimpa. † 10:35 Iriiraquea tenario irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

Yoanaquequea Jesoshi otsovironaquitequi Marita aisa Maria

³⁸ Arimpaquea yoavaetanaquequea Jesoshi, iroompaquea yarejevaeca ichoocajigu-gueti itsipapae. Ariquea ochoocatiquea oraniqui manquigarentsi opajitaquea Marita, ocajemaqueriquea otsovironaquitequi. ³⁹ Chooa oguetyote opajitaquea Maria. Iroat-impae osavicaventavaqueriquea Jesoshi oquemisantamajatavaqueri itsavetantaquegueti.

⁴⁰ Cotanquitsiquea oraquea Marita oshoshoguitevencaroquea antaguequeca. Iroompaquea oashitsitanacariquea Jesoshi ocanqueriquea:

—Nomajirote, pamenashicaroquea intati iguetyo teequea amitacotenaji, aparo nantaveguitaroni maasanopae, teequea querocaca pincanteroji. Iintsijate pincanteroja amitacotenata.

⁴¹ Icantsitaroquea Jesoshi:

—Marita, iroguentiquea piquenquejacogueque taaca opajitapae pishoshovencaroquea. ⁴² Cotanquitsiquea chooca aparo caavijica anaaquequea irinintamajajiteca. Irootaquequea ocoguiavaqueca imaica Maria. Aatoquea ichoocati quericaca jocaavaque-roneca.

11

Jesoshi itsatacajiaqueri itsatacaanejia quero incojiaquero iramanerigueti Aapani Irioshi (Mt. 6.9-15; 7.7-11)

¹ Ariquea otsipa savincaguiteri yoanaque Jesoshi iramaneriquea iriri. Iroompaquea iteroncanaquitiguiroquea, icantanaque aparo itsatacaane:

—Nomajirote, iintsija pintsatacaajiguenaja quero noncoqueroni namanerigueti Aapani Irioshi, pinquejetacaguemparoja itsatacaquerigueti Joanca itsatacaanejia.

² Icantajiguiri Jesoshi:

—Pamanajiaquerigueti Aapani Irioshi, jero pinquejetacaguemparoj:

‘Aapani choocatatsica inquitequi, noninque intsariventamajajiaquempiquea maasano caquinte. Caacateja pimajirontamajapojempa.

Noninquequea irinetsanamajajiqueroja ocaniqui quepatsiqui maasanopae pininqueca aviatimpa,

onquejetantaquempaca inetsanamajajiquerogueti ontaniqui inquitequi.

³ Pojocaquenaja imaica noshecatapinjiaquempaca.

⁴ Pimpeacotsitajenaroja nogovaeguishere, aritarite noquempetaca naatimpa nopeacotsitajari ipeacaavecaca atsipetacaavetaque-naca.

Aato pishinejiganarotsi oncoraquetashiquena aatoca notampishitashiti.

Manaquee noninque pintampishitacaamajajiaquenaja aatonijite yagavejajana ampatsini incovaeguishetacajaena.’

⁵ Iroompaquea icantajiguiri aisa:

—Pinquenquejeroja, arigueti poanincanaquegueti itsovironaquitequi pitsipavijitaca nianquiite pincajemacotapojakeri: ‘Anianishi, pojoquenashiatsi 3 pan,

⁶ iriaquerasanoquea arejetapojatsi nogonoro, teetari onchoocatenica nojocavaquener-ica.’ ⁷ Ariquea irancanaquequea iriatimpa ontaniqui intsompoguiqui incanquempiquea:

‘Jaashinete pasereganatsi, ashitacojianajanatarite, maajianajanaqueate maasano. Aatoquea nagaveji nojoquimpitsi.’ ⁸ Aatoquea yojocavetimpitsi, cotanquitsiquea pincantacoguitempangueti pamanaguiterini incatiitanaquempaquea irojocauitempi

maasanopae picoguitejacocaca. Cotanquitsiquea aatoquea iro jojoquimentimpi ipeaquempigueti itsipavijitacaca, iroguentiquea irojocauitempi picantacoguitani pamanaguiterini. ⁹ Irootaquetari noncantantajiaquempica: pamanaguiterini Aapani Irioshi taaca picoguitejacociacaca, ariquee iriatimpa irojocajiaquempiro. Pamenagueteroja taaca opajita, ari pamenapojero. Aisa pintinquiapojerogueti

sotomorontsi, ari irashirejacoquempi. ¹⁰ Aritarite iriraquea amanantatsica irojocajiqueneri. Iriraquea amenaguetatsica iramenapojero. Aisa iriraquea tinquiguiroca sotomorontsi irashirejacoquiqueri.

¹¹ “¿Arimpate piquempejiga aviatimpajia iramanempigueti pirijanite pan, pait-sitenempari mapi pojoquitenempari? ¿Arimpate iramanempigueti pirijanite shima, paitsitenempari camaarini pojoquitenempari? ¹² Iriogueta iramanaquempi iitsoqui, ¿paitsitenempari pojoquitenempari oseroticona? ¹³ Quempevecaquea aviatimpajia, picoguishejiavecaquea, cotanquitsi pojocajiguiniriquea pirijanijiate taaca opajitapae cameetsaguetatsica yamanajiaquempica, iriompate Aapani Irioshi choocatatsica in-quitequi caaviji intigaranquimojiaqueri Ishire inchoocajipojaqueri maasano amanaji-aquerineca.”

Icantajiqueriquea Jesoshi iriguenti shaquiacariquea ampatsini

(Mt. 12.22-32, 43-45; Mr. 3.20-30)

¹⁴ Iroompaquea Jesoshi yoguisotoaqueriquea ampatsini macanari, irooqueuea isotoana-jigueta ampatsini iquenquetsatanaji shirampari macanavetanquitsica. Yamenamenai-tanaquequea intati maasanojia. ¹⁵ Cotanquitsiquea iconoagaranca manaquea icanta-jianaque: “Iriguentiquea shaquiacari Veerevevo* imajirote ampatsinijia. Iriotaquequea agavejacaquerica yoguisotoantaguetacanicarica ishaquiajiacaca ampatsinipae.”

¹⁶ Ariquea iconoagarancaqueate itsipapae inintajiaque iramenanquempari icantanta-jiacarica: “Intsija pamenacaajiguenaroja otsipa ocaantantatsica intati onquenantapo-jaquemparo inquite.”

¹⁷ Cotanquitsiquea iriatimpa itsatavaquero iquenquejajiaqueca icantajiguiri: “Inchoocategueta caquinte incapiocajiaqueriquea igonorojia impeaquempaqueuea imajirote, iroompaquea arigueta imparijiaquemparo incatsimatavacaajianaquempa, ariquea intsinampirejavacaajianaquempa, aatotari itsipatavacaaja, aato imajirontajajari. Ariquea iquempejica tsipatsipaitarica ijijiguica, arigueta incatsimatavacaajianaquempaqueuea, ariquea incojianaquempaqueuea intsinampire-javacaajianaquempaqueuea, aatotarite iconoavacajajiaa. ¹⁸ Ariquea iquejetaca Satanashi iriatimpa, ¿arimpate queroquea incoquempani incatsimatavacaajempagueta igonorojia ampatsinijia? Aato iconoavacaaja, aato imajirontajitajari. Manaquea noncantajiaquempi imaica notsaque picantajiaque: ‘Iriguenti shaquiacari Veerevevo agavejacaquerica yoguisotoitantajijaarica ishaquiaguevecaca ampatsinipae.’

¹⁹ Iriomegueta agavejacaquename Veerevevo, ¿ariquea taaquea agavejacaajiaqueri oguijatacoquempica aviatimpa yoguisotoitantajijaarica ishaquiajiavetacaca ampatsinipae? Irootaquequea itsatantajitacaroca manatarite picomica aviatimpajia. ²⁰ Cotanquitsiquea iriguenti agavejacaquena Aapani Irioshi noguisotoitantajijaarica ampatsinipae, irooqueuea pintsatantajiaquempaca jac imajirontapojaca Irioshimajaca acaniqui aviatimpajiaqui.

²¹ “Irraquea ampatsini manaquea iquempecariquea caquinte tampishitatsica choocatatsica ishiquiripite, igotsirote, maasanopae iticaancaca, iquempoguija-majatsitaroqueuea itsovironaquite, aatoquea quericaca agavejerineca iraitsijiteri. ²² Cotanquitsiquea incoraqueetegueta itsipa caavijica yanaaqueri, irioqueuea iriguenti iragavejaque iraitsiqueri maasanopae yaventaguevecaca irashinquemparoqueuea maasanopae yashintaguevecaca, irojoquitenempariquea quericaca inintacaaqueca iriatimpa.

²³ “Irraquea teeca irishineventavaquenaji, manaquea icatsimaquena; aisa iriraqueuea teeca intsipatenaji nocapiocantaquegueta, iroguenti yoguivorocantaque.

Ampatsini incoraqueetashitajiri aisa ishaquiavetacaca

(Mt. 12.43-45)

²⁴ “Oraquea irovashiantanajerigueta ampatsini iriraqueuea ishaquiavetacaca, iroanaque ontaniqui oquitamampororoitapojigueta irinintavequempa irimagorejavaequeme. Cotanquitsiquea iroompa iramenavetapojaquemparo querocampa inchoocateni oraniqui. Inquenquejitsitanaquemparoqueuea incanque: ‘Noantanajemparota notsovironaquiteni nosotoantavetanacaca.’ ²⁵ Ari incoraquevetajempa iramenapojajeri

* 11:15 Veerevevo. Iguenquetsatsarequi guiriego icanqueri Beezeboul aisa Beelzeboul. Icanqueri quimajareri Beelzebú. Iriotaque pajitatsica aisa Satanashi.

ishaquiavetacaca quempeca tsovironaqui ipishijitirogueti inetsanajitirogueti, cajaraguitejisano oncanquempa. ²⁶ Ariquea iroanaque iraaquiteri itsipajia 7 ampatsini caavijica igajaiaca. Iroompaquea irishaquiapijajempari irira ishaquiavecaca iroaqueragueti, ariquee iriatimpa ari incotanajempa arimpa irogaamajatanajempa.”

Quericaquea caavijica icavintsajamajajique

²⁷ Iroompaquea choocaturajagueti iquenquetsavaetaque Jesoshi ocajemitsitanacaquea aparo manquigarentsi tsipajiacarica omporoguijajianquitsica, ocanque:

—|Cavintsajamajajiqueroquea piniro irijaninquempica atsomitimpica!

²⁸ Cotanquitsiquea iriatimpa icanquequea:

—Iriompaqueate icavintsajamajajique quemajivaqueroca Iguenquetsatsare Aapani Irioshi netsanamajajiaqueroca.

Iriaquea covaeguishejiatsica icantajavecariquea Jesoshi iramenacaajiaquerime oacaantantatsica intati

(Mt. 12.38-42; Mr. 8.12)

²⁹ Iroompaquea arimpaquea yomporoguijaventavaetapojacari Jesoshi, yanquitacojijapojiri icanca, iroompaquea itsatacaajiaqueriquea, icanque: “Aviatimpajia otiavaetaquempiquea covaeguisherentsi, pinintantajiacaca namenacaajiaquemprome oacaantantatsica intati, cotanquitsiquea aatoquea nonigaguimpirotsi. Iroguentiquea nonigaaajiaquempi otsipa onquempequemparoquea iquejejiquerigueti tsavetantatsica Jonashini coramani. ³⁰ Piquemacojiguiritarite Jonashini coramaniqui. Aapani Irioshi manatarite yamenacaajiaqueriquea Ninivequitica intsajiaquenijite arimajaca iriguenti tigarancaqueri. Ariquee inquempetaquempaquea irira Irijanite Caquinte, manaquea inquejetacaquempari Aapani Irioshi Jonashini cameetsanijite pintsajiaquenijite aviatimpajia iriotaque itigarancaque aisa.† ³¹ Oncoramaniguitevaepojajegueti aapojajempagueti incatsimatantajiaquemparica Aapani Irioshi maasano teeca intsaromentajiguempariji, oraqueate imajirojiate Savaquitica oncatiitsitanaquempaquea ontsavetacotsitaquempiro pantaguishequeca aviatimpajia choocajianquitsica imaica. Coramanitari ocoraquetashivaequeri Saromonini oquemisanqueriquea itsatacaquerogueti, oquenavaetapojiquea jmm osamani oquemacoquerigueti itsamajati. Cotanquitsiquea imaica icoraquevetapojaca caavijica anaavaequerica Saromonini, teequea pinquemisantajigueriji. ³² Ariquee inquempetajaquempa aisa Ninivequitica incatintiitsitanaquempaquea oncoramanitapojajegueti incatsimatantajiaquemparica Aapani Irioshi maasanojia teeca intsaromentajiguempari, intsavetacotantsitaquempiroquea pantaguishejiaqueca. Maasanotari Ninivequitica iquemisantajiaqueriquea Jonashini itsavetantimojiaquerigueti, ishimampojancajianaca yamenajiacagueti ipeacaaguishejiacagueti covaeeguisherentsi, ariquee icantashitatijaijanaca. Cotanquitsiquea imaica icoraquevetapojaca caavijica anaavaequerica Jonashini, teequea pinquemisantajigueriji.

Iquempetacaacaro tsivorentsi

(Mt. 5.15; 6.22-23)

³³ “Oraquea itsivojitirigueti tsivorentsi, teequea ariquee intsitijiteriji, aisa teequea irisasaviacojiteriji chomoqui, ariguenti yoguisavicacojitiri jenoquijaniqui, cameetsanijite intsivoguitetanaquenerinijite maasano quijajajaitanquitsica oraniqui.‡

³⁴ Poquija oquempevecaro otsivore pitsino. Arigueti oncameetsate poquija, pamenamajate, onquempetaquemparo otsivoguitemajatigueti. Aatogueti ocameetsati poquija, aato pamenantamajataro, onquempetaquemparo pipitsecacotigueti

† 11:30 Iriaquea Jonashini icaratacovaetaque 3 savincaguiteri imotijaqui quejevetarica iririjegui quiterinqueni niavetacarica. Imaica icanti Jesoshi inquempetaquempaquea iriatimpa irimetojaquegueti iroguiaajivetaquitempariquea omoroqui incaratacovaepojempa 3 savincaguiteri. ‡ 11:33 Ari iquejetacaquea Jesoshi, teequea intsititeroji maasano yantaguetaqueca aisa itsatacaantaqueca, oconijatimojiaqueriquea maasano coraquetashiquerica. Arimegueti irininqueme joriojia, iramenamajajiaquerome, intsaqueme inintaguetica Aapani Irioshi, aatome icantirime Jesoshi: “Intsija pamenacaajiguenaroja otsipa oacaantantatsica intati.”

maasanotsino. § ³⁵ Pamenamajateroja quero ocotaca piquenquejaguetaqueca. Inchiquiojitsi pijitirotsi cameetsa piquenquejavetacaca, pijitirotsi oquempetacaro tsivoguitetanquitsica, pamenitsivetemparoquea coajica manaquea ocanque pitsec. ³⁶ Arigueti ocameetsataque maasano piquenquejaqueca, onquempetaquemparogueti tsivoguitetanquitsica teeca ompitsequimateji, ari pamenamajataqueroquea maasano, onquempetimotaquempi itsivotacoquempigueti tsivorentsi, pintsatavaqueroquea inintacaaquempica Aapani Irioshi.”

Jesoshi icantomajajiaqueri pariseojia aisa irirajia tsatacaantajiguiroca itioncacotanaqueca Moishishini

(Mt. 23.1-36; Mr. 12.38-40; Irc. 20.45-47)

³⁷ Iroompaquea iteroncanaquitiguiroquea iquenquetsavaequegueti Jesoshi, icantanaque aparo pariseo icajemitsitanacariquea irishecatimoquempari. Iroompaquea yoanaque iquijanaque ipimerequijapojaca shitaponcarontsiqui irishecaciaquempa. ³⁸ Cotanquitsiquea yamenitsitanacaquea intati cajemaquerica yamenaqueriquea ishecatacaquea intati teequea inquivavacotempaji inquempējaquempariji iriatimpajia iquivavacomajataca irooshipojigueti irishecaciaquempa.* ³⁹ Cotanquitsiquea Amajirote icanqueriquea:

—Aviatimpajia pariseojia mana piquempējiacari quiviroca otaqui chotarontsi aisa perato, oraquea intsompoguiqui ooquea cantaitevaequequea. Ari piquejejiaca, mana pinetsanatomampeajiaca intati, cotanquitsi caaviji paitsitantagueti, otsitacashirentavaetaquempi pigovaeguisherere. ⁴⁰ ¡Teequea pinquenquejajigueji! ¿Arimpate teequea pintsajigueji iriraquea peacaacaroca itsino caquinte irioquea peacaacaroca ishire aisa? ⁴¹ Cotanquitsiquea pinetsanashirentajianaquempaja, pimpintsatacotantajiaquempaja, arigueti pinquempequero, saancavaequequea oncanquempa maasano.

⁴² “¡Imaicashiatsi pantsipevaetempanishiatsi aviatimpajia pariseojia! Taaca opajitapae pashincaca irooca ovanajaniqui menta, irooca quejevecaroca sanconca, irooca otsipapae taaca opajitapae pivintyacajiguica pitsipatacaantajigaroca pisheca pojocagarantaqueneriquea† Aapani Irioshi, cotanquitsiquea pipeacojiacaroquea icantajavequem-pica: tampatica poaqueneri maasano caquinteguetatsica aisa pimpintsamajiaquempariquea Aapani Irioshi. Cameetsavaeque pojocagarantajiaqueneriquea Aapani Irioshi pashincaca, cotanquitsiquea aatomesano pipeacojigarome ogonoropae icanqueca.

⁴³ “¡Imaicashiatsi pantsipevaetempanishiatsi aviatimpajia pariseojia! Picantacoguitaniquea poapoaitapiniquegueti tsovironaqui qui picapiocantapinijiacaca aviatimpajia pinintajiaque pisavisaviitaque pitsipatsipaitacari caavijica yanaajencavaeque. Aisa poapoaitigueti ontaniqui yojocantajigueti rogueti ajaararontsipae taaca opajitapae, pinintajiaque inquenquetsatacaajivaquempi.

⁴⁴ “¡Imaicashiatsi pantsipevaetempanishiatsi aviatimpajia cameetsatomampeajiatsica! Iroguenti piquempējiacaro yoguijaantajitarica metojatsica coramanitica iroompaquea mana omaperincanaja. Yoapinijiqueroquea yagatigativaequeroquea, iroorijite maperincanajatari teeca iramenantajitajemparoji.”‡

⁴⁵ Iroompaquea icantsitanaca aparo tsatacaantiroca itioncacotanaqueca Moishishini icanque:

—Tsatacaantantatsica, noquemajiavaquempi piquenquetsataquegueti imaica, pican-timanajianaquenaquea naatimpajia aisa.

§ 11:34 Arigueti anintamajataque anetsanatero inintaguetica Aapani Irioshi, anquempetaquempari cameetsatanquitsica iroquija, amenamajataquerotari ocanqueca Iguenquetsatsare Aapani Irioshi, anquemaquero. Aatogueti anintamajati anetsanatiro inintaguetica Aapani Irioshi, manaquea anquempetaquempari teeca oncameetsateji iroquija, amenavequemparogueti ocanqueca Iguenquetsatsare Aapani Irioshi, aato aquemirotsi. * 11:38 Iriraquea pariseojia manaquea yogavitashitajaro itioncacotaqueca Moishishini icantajiguiri igonorojia: “Aatogueti iroquetitaja piquivacomajata manaquea incatsimajiaquempi Aapani Irioshi.” † 11:42 pojocagarantaqueneri. Yojocaqueneri 1/10 (un décimo), ocanque onchoocaquegueti 10 irojocaqueneriquea aparo, onchoocaquegueti 100 irojocaqueneri 10. ‡ 11:44 Ariquea iquempejiaca iriatimpajia imaica, yamenajiaquerigueti irirajia tsipatsipaitacarica ijiqueji ari itampaticamajataquero itsaromentamajatacari Aapani Irioshi, cotanquitsiquea teequeate, teetarite intsajigueji manaqueate iquenquejaguishejaquequea taaca opajitapae covaequisherentsi.

⁴⁶ Cotanquitsiquea Jesoshi icanqueriquea:

—¡Imaicashtiatsi pantsipevaetempanishiatsi aviatimpajia aisa, tsatacaantajiguiroca itioncacotanaqueca Moishishini! Poguijatacaantamajatacariquea caquinteja manamajatanquitsica pitsatacajiaiqueriquea taaca opajitapae irinetsanamajataqueca irishin-eventaquemparinijite Aapani Irioshi, cotanquitsiquea aviatimpajia teequeate pinetsanatomajigueroji.

⁴⁷ “¡Imaicashtiatsi pantsipevaetempanishiatsi aviatimpajia! Iroguentiquea pipeacaashijiacanariquea inquenquejacotantajiquemparica tsavetantatsica metojajianquitsica coramanitica imetojajiaqueca choviquijianaquempica. Cotanquitsiquea manatarite pinetsanatomampeajiacariquea intati, teequea ariquea ontampaticateji pishineventamajatempariji. ⁴⁸ Oraquea pipeacajaiacanariguetei, ponigaantajiacaca mana pamenajiaquero cameetsavaeque imetojajiaqueriguetei. Iriatimpajia imetojajiaqueritarite coramaniqui, imaica aviatimpajia pipeacaashijiacanariquea inquenquejacotantajitajemparica cameetsanijite aatonijite omanatsi yoguijaajiqueriguetei.

⁴⁹ “Paesatoniqui itsatsitacaroquea Aapani Irioshi, irootaquequea icantantacaca: ‘Nontigarancavequenempariquea tsavetantiroca nocanqueca aisa itsipapae notigaran-caneja, cotanquitsiquea inconoagaranquempaquea irimetojaqueri, itsipapae irooca irantsipetacajiaquempariquea.’ ⁵⁰ Oncoramanivaetapojajeguetei incatsimajiaquem-piquea Aapani Irioshi aviatimpajia choocajianquitsica imaica, inquenquejacaajiaquem-piroquea imetojajiqueriguetei tsavetantatsica iroaqueraguetei ipeacajiacaroguetei quepatsi arejevaetajemparo imaica. ⁵¹ Iriaquea iriquetica imetojajique iriguenti Averi. Iri-
raquea impoimajatanquitsica iriguenti Sacariani[§] imetojajiqueriquea teemporoqui it-sarotentantajitarica Aapani Irioshi ichoocavecaquea araquerora aretarequi itaantajitar-ica viratsipae. Irootaquequea nocantantajiaquempica imaica arimajaca incatsimamaja-jiaquem-piquea aviatimpajia choocajianquitsica imaica inquenquejacaajiaquem-piroquea maasanō imetojajiguequeca, quejetacaquea aviguentijia metojajiaqueri.

⁵² “¡Imaicashtiatsi pantsipevaetempanishiatsi aviatimpajia tsatacaantajiguiroca ition-cacotanaqueca Moishishini! Piquejevecariquea aitsitantavetajaroca yavi iyavitantaji-taroca sotorontsi, teequea inquijeji iriatimpa, aisa teetari irishineteriji nintavetan-quitsica inquijaquijaitanaqueme. Pitsajiavecaroquea Iguenquetsatsare Aapani Irioshi, cotanquitsiquea teetarite pinintajigueji pintsamajiguero aviatimpajia, aisa piticaaco-jiaqueritari itsipapae nintajiavetanquitsica intsajigue.”

⁵³ Iroompaquea isotoanajiguetei icatsimamajajianaqueriquea pariseojia aisa tsatacaan-tajiguiroca itioncacotanaqueca Moishishini, ariquea icoacojiaqueriquea taaca opajita-pae ⁵⁴ iramenanquempaca querocaca incanque cameetsanijite intsojeventajiaquempar-inijite incatsimatacaantajiaquemparica.

12

Jesoshi icantajiaqueri itsatacaaneja aatoquea itsarotentamampeajigari intati

¹ Iroompaquea icaramirincavaetanaquequea jmm caquinteja icantajianaquequea tirorererere icanca itsinacajianaqueca. Iriaquea Jesoshi icantajiguiriquea itsatacaane-ja: “Inchiquiojitaja piquempejigaritsija pariseojia, manaquea icameetsatamampeaca intati, aisa itsarotentamampeajia. Iquempetacaro anempoacaanaquero ca pan ose, anempoanaquempa maasanose. Shooshoh paajencatsitiritsi. ² Maasanopae yomanajive-caca imaica yamatavijantiguetei oncoramanitapojajeguetei intsajitaqueroquea. Ariquea

§ 11:51 Iriratica Sacariani tee irio iriri Joana Viñacajantatsica. Iriroquea iriquetinica tsipatacarica Sorovaveri icanqueriguetei majirontatsica Vavironiaqui cameetsa iroajianaje Joreaquei impeacaajemparo teemporo Jerosarequi 538 ajagantsini tequerataguetei irivogueji Jesoshi. Pamenero 1 Coronica 24.20-22. Iguenquetsatsarequi evereo iroguenti paperi caratapojaquero ca Iroquetinica Itioncacaantaqueca Aapani Irioshi (el Antiguo Testamento).

oquejetaca maasanopae isenacajiguevetacaca imaica, oncoramanitapojajegueti ironi-gaantajiqueroquea. ³ Irootaquequea imaica nocantantajiaquempica, maasanopae picantaguetaqueca pitsecariqui pomanavecaca imaica, oncoramanitapojajegueti incantajiteroquea savincaguiteri, intsajianaqueroquea maasano. Aisa maasano pinchiquio-jijencavetaquempa iguempitaqui pigonoro intsompogui pitsovironaquitequi, oncoramanitapojajegueti intsavetantajitero sotsiqui omencotapojacagueti pitsovironaquitequi ovancaitoqui.

Apaniromajaca intsaroacaamajajitaquempari Aapani Irioshi
(Mt. 10.26-31)

⁴ “Imaicaquea nocantajiaquempiquea aviatimpajia notsipajiacaca, aatoquea pitsaroacaajigaritsi nintajianquitsica irimetojajiaquempi. Iriatimpajia arigueti irimetojajiaquempi iroguenti metojanquitsine pitsino, cotanquitsiquea aato yagavejirotsi irimetojajiaqueroquea pishire. ⁵ Cotanquitsiquea naatimpa nontsatacaajiaquempiquea querica pintsaroacaajiaquempaca: irioquea pintsaroacaamajaquempaquea Aapani Irioshi, aparo icanca iriatimpa yagavejamajaque incanquegueti quericaca metojanquitsineca ariquea iragavejaquequea intigarancaqueroquea ishire camorecariqui. Arimajaca irioquea pintsaroacaamajaquempa. ⁶ ¿Arimpaquea teequea pamenajiguiri tsimeripae ariguenti ivegaraca 5 tsimeri mavimentaquitequea imentaqui? Cotanquitsiquea Aapani Irioshi tee inchoocateji impeacotempaca. ⁷ Quempecaquea pimaejia, ariqueate itsaqueroquea apamaeropae. Irootaquequea nocantantajiaquempica aatoquea pitsaroajigui, caaviji panajiaqueroquea tsimeripae.

Teeca impashiventacajaguempariji Jesoquirishito
(Mt. 10.32-33; 10.19-20)

⁸ “Imaicaquea noncantajiaquempiquea: quericaca cantamajaqueroneca itsaromentamajataquena incamantajiaquerigueti caquinteja, ariqueate inquempetaquempa irira Irijanite Caquinte oncoramanitapojajegueti, incanquequea: ‘Naroguenti ashincari’, inquemajiaqueriquea maasano irashivantijitete Aapani Irioshi. ⁹ Cotanquitsiquea quericaca cantiquerineca caquinte: ‘Teetarite nontsaroventempariji Jesoshi’, ariqueate inquempetaquempaquea Irijanite Caquinte oncoramanitapojajegueti, incanquequea: ‘Teequea naroguenti ashintemparine’, inquemajiaquenaquea maasano irashivantijitete Aapani Irioshi. ¹⁰ Quericaca cantaguishevetaquemparineca irira Irijanite Caquinte iragavejaque Aapani Irioshi irishetacotajeriquea, cotanquitsiquea iriraquea cantaguissheta-coquerineca Ishire Aapani Irioshi, irioquea iriguenti aatoquea ishetacojitiritsi.

¹¹ “Oraqueate arigueti irajaitanaquempigueti shinagogaqui icapiocantapinijiacaca irooca ichoocatigueti jivatatsica joese irioca majirontajiatatsica, aatoquea pishoshoguiteta piquenquejajiguiroquea querocaca pincanqueca pinquenquetsatacoventaquempagueti. Aatoquea picanti: ‘¿Querocaca noncanqueni?’, ¹² aapojaquempatari inquenquejacaajiaquempi Ishire Aapani Irioshi cameetsanijite pintsajiaquequea querocaca pincanqueca.”

Teequea oncameetsateji irinintajiterogueti irajaarantajiquempa

¹³ Iroompaquea icantanaque aparo caquinte tsipatsipaitacarica omporoguijajianquitsica icanqueriquea Jesoshi:

—Tsatacaantantatsica, iintsija pincanteri iguentijegui irojocagarantaquenaroquea yojoquimojianajanaca aapanini imetojanajigueti. Imashitsatapitsataquenaroquea nash-intagarantaquemparome.

¹⁴ Cotanquitsiquea Jesoshi icanqueriquea:

—¿Narompate jivatatsica joese cameetsanijite nonquenquetsatacaaquempiri irojocagarantajempiro?

¹⁵ Ariquea icantajiguiri maasano:

—Shooshoh pinintajiguitsija pajaarantajiaquempaquea. Pajaarantajiaquempaquea, ¿arimpate irooquea anijacaajiaquempineca?

¹⁶ Ariquea iquempetacaanacariquea ajaarantavaetatsica, icanque: “Ichoocati caquinte ajaarantavaetatsica. Yashintamajataca iguepatsite ivintyacacaantaqueroquea tirigoitsoqui, iroompaquea ochoocataanaquequea ooquea jmmtacovaequequea teetarite oncapichaguiteteji. ¹⁷ Ocoramanivaetanaquequea anaavaequetanaqueroquea oratica icapiocantaroca querompaquea incapiocajeroni, icanque: ‘¿Querocaquea noncotajeroni? Anaanaaguetanaqueroquea nocapiocantaroca. Imaica ¿querocaca noncapiocajeroni?’

¹⁸ “Ariquea iquenquejanaqueroquea icanque: ‘Imaicaquea notsaquequea querocaca noncapiocajeroni. Nosoveacaanquerota nocapiocantavetaroca nantacaantaguetajequea otsipapae iniropaequea cameetsanijite arejetajempanijite maasanopae noncapiocantaguetajempanijite notirigoitsoquite aisa maasanopae najaararopae. ¹⁹ Iroompaquea noshinevaequempauea noncanque: Imaicaquea choocatacovaetanaquea oshequiavaeque, aatotaquea oteronquitajatsi oncaratacovaetanaquequea ajagantsini, aatotaquea taaca nocoguitejacotimataja. Imaicaquea imaica nomagorejaguiteniquea, noshecaguitempani, nomiraguiteniquea, noshinevaequitempani noncanquempa.’

²⁰ “Cotanquitsiquea Aapani Irioshi icanqueriquea: ‘Teequea pintsatimateji aviatimpa. Imaica pimetojaque ompitsecanaquegueti, povashiantaguetanaqueroquea maasanopae pashintaguecaca. ¿Taaca ashintajemparone?’ ²¹ Ariquea iquempeca imaica maasano iriratica nintatsica manaquea irajaarantavaequempa intati, cotanquitsiquea iriraquea Aapani Irioshi yamenaqueriquea quempecaquea teeca irashintempaji capichaji.”

Iquempoguijaqueri Aapani Irioshi irijanijiate
(Mt. 6.25-34)

²² Iroompaquea Jesoshi icantajigui itsatacaanejia: “Imaicaquea noncanquempi: aatoja pishoshoventajigaro pishecacia choocatacaajempineca, aisa aatoja pishoshoventajigaroquea pinquitsaajiaquempaca. ²³ Oraquea pishire anijacajaiguimpica yagavejaquequea Aapani Irioshi ichoocatacaaquemproquea, iroompaquea pisheca caaviji irojocajiaquempiquea. Ariquea oquempecaquea pinquitsaajiaquempaca, yagavejaquequea Aapani Irioshi ichoocatacaqueroquea pitsino, iroompaquea pinquitsaajiaquempaca caaviji irojocajiaquempiquea. ²⁴ Pamenajiguiriquea cogonti, teequea irivintyacavetempaji, aisa teequea onchoocavetempajiquea incapiocantemparoca isheca iroaroaitapinjigie iraapinjiaquequea irishecaciaquempaca, cotanquitsiquea Aapani Irioshi yojocapinjiaqueneriquea ishecaciaquea. ¡Aviatimpajia caaviji irojocajiaquempiquea pishecacia pishecaciaquempaca, caaviji panajiaqueriquea araguetatsica! ²⁵ Ariguete pishoshoguiteventavequemparo pigatsantsare ¿arimpa pagavejaque pincatsantsatanaje niganqui meetero?*

²⁶ Iroosacana teequea pagavejajigui teemajaca omanamajatempani, ¿queroquea ocoani pishoshoventantajiacaroca caavijica omanapitsajiaquempiquea? ²⁷ “Pamenajiguiroguetiquea ocatica ovempenaquipae inchiqiojiquea otsoroashiguetacaqueate iroatimpa, teequea oncatsiquejiavetempajiquea aantaquempromeca oitsaare, aisa teequea onquiricajiavetempaji, jac ocameetsamajaquequea anaavaequequea ocanca ocameetsavaeque, anaaguequeroquea quitsaarentsi cameetsamorenaguetatsica coramanitica iquitsaajiacaca majirontatsica Saromonini caavijica anaaque ocameetsamorenataquequea. ²⁸ Quempeca ocatica ovempenaquipae oporencanaque poren icameetsatacaguequeroquea Aapani Irioshi, cotanquitsiquea osaitequeraquea taampina oshimpeguiricanaque shimpeguiririri, irajiaqueroquea intajiaquero. ¡Aviatimpajiaquea caaviji irojocajiaquempiquea pinquitsaajiaquempaca, caavijitari panajiaque-roqueate ovempenaquipae! Cotanquitsiquea aviatimpajia teequea paventamajatempariji, manaquea pishoshoventajiacaca taaca opajitapae. ²⁹ Irootaquequea imaica nocantantajiaquempica: aatotaquea pishoshoventajigaroquea pishecaciaquempaca irooca pimirajiaquea. ³⁰ Iriguentequea quempejiguiroquea imaica irirajia teeca intsaroventajiguetempariji, ishoshoventajiacarocaca taaca opajitapae, irootaquequea isavicaventajiaquequea iriatimpajia. Cotanquitsiquea aviatimpajia aatojate piquejiguirotsija imaica,

* 12:25 Agavejaque aisa oncanque: “Ariguete pishoshoguiteventavequemparo oshequianajeme pisavincaguitertepae ¿arimpa pagavejaque poshequiaquero capichaji?”

choocatarite Piri inquitequitica. Iriatimpa itsaquequea maasanopae picoguitejacojiacaca. ³¹ Aviatimpajiampani pinintamajajigue pimajirontamajatanaquempari Aapani Irioshi, ariquea iriatimpa irojocajiaquempiquea maasanopae picoguitejacojiacaca.

Pashintamajatapojajempa inquitequitanquitsica

(Mt. 6.19-21)

³² “Aatotarite pitsaroajigui, novejajiate. Teequea pincaramirincajiavetempaji, cotanquitsiquea Piri choocatatsica jenoqui inintacaajiaquempi pimajirontajiapojempari aisa impeacaavajempi majirontajatsica imajirontagueti iriatimpa. ³³ Pojocantajiaqueroquea pashintaguecaca, paanquemparoquea imentaquipae, pojocajiaqueneriquea coguitejacojianquitsica. Pinquejetaquempagueti ariquea irojocajiaquempiquea Aapani Irioshi cameetsamajaguetaquitsica ontaniqui inquitequi, onquejevetaquempaquea pinterigueti imentaquipae tsaratoqui aatoca oshitequirejitsi, aatotari oteroncatsi irojocajiaquempica ontaniqui inquitequi, aatoquea ichoocati aitsitantatsica, aisa aato ichoocati shecaguetaroca quitsaarentsi. ³⁴ Aritarite taaca opajita pishineventamajataca manaquea pisavicaventaguitironi piquenquejaguitironi.

Agamajamajiaquemparija Amajirote

³⁵⁻³⁶ “Aviatimpajia pinquempejiaquemparija yashintajitaca yoguijaguijaitirigueti ashincarica yoguigueti irameneri manquigatanquitsineca. Inetsanatashijiavacariquea incorquetantajempaca, iquitsaajiaca, itsivojiaqueriquea tsivorentsi yoguijaguijaiqueriquea incajemapojaje intanarejacojiavaqueriquea taampina. ³⁷ Irishinejiaquempaquea irirajia yashintajitacaca tinajajianquitsica guijajivajirica ashincarica incoraquepojjagueti. Noncantamajaquempiquea inquitsaatashipojjajempariqueate iroguisavicajiapojaqueri shitaponcarontsiqui irojocajiapojaqueneriquea isheca. ³⁸ Incoraquevequempaquea nianquiitequi irooca osavincaguitetamanaquagueta cotanquitsiquea iramenajiapojajerigueta irashijia tinajajianatsi, irishinejiaquempaquea yashintajiacaca. ³⁹ Iintsija pinquenquejajiguerojate, inchoocategueta itsipa choocatanquitsineca itsovironaquite, intsatemegueta querocaca incoraquepantaquempaca aitsitantatsica, ¿arimpate ari irimaaque? ¡Aatoquea! Manaquea intinajavenqueroquea irajaararo aatonijite iquijashitsijitiri iraitsijitaqueriquea. ⁴⁰ Irootaquequea nocantantajiaquempica: pincoguitempanija pincomajamajiaquempaja poguijajivajeri irira Irijanite Caquinte incoraquepojjaje. Aatoguetaquea piquenquejamajajiguirotsi inchiquiojitaja icomirejajiapojajimpitsija.”

Yashintajitaca cameetsari aisa teeca incameetsateji

(Mt. 24.45-51)

⁴¹ Icantsitanaca Peerero:

—Nomajirote, piquejetacaacarogueta imaica ¿ari aparo pitsatacaajiaquena naatimpajia? ¿Arica maasano caquinteja pitsatacaajiaqueri?

⁴² Icanque Amajirote: “Imaicaquea iintsija pinquenquejajigueraquea yashintajicaca tsatatsica quemisantamajatirica ashincarica. Pameneja inchoocategueta ashincarica irashijia, iroompaquea iroanaquequea osamani, incanqueriquea aparo yashincaca irinetsanaguetajeneriquea maasanopae irashijia, incanani irojocajiaqueneriquea ishecacia. ⁴³ Irishinevaequempaquea yashincaca incoraquepojjagueta ashintarica arigueta iramenapojajeriquea inetsanamajaguetajiro icantanaquerica, arimpaquea irishineventamajatanaquempariquea. ⁴⁴ Arimajaquea incanqueri: ‘Imaica noninquequea pamenaguetaquenaro maasanopae nashincaca.’ ⁴⁵ Cotanquitsiquea aatogueta yoguijiri ashincarica manaquea incanque: ‘Aatota icoraquetsita’, ariquea imparianaquemparoquea incatsimajiaqueriquea irashijia shiramparijia irooca manquigarentsijia intavatavaaitaqueriquea. Manaquea irisavicaventaguitironi irishecaguitempani, irimiraguiteni, irishinquiguitempani. ⁴⁶ Cotanquitsiquea taampina incoraquepantaquempaje ashincarica savincaguitiriqui teeca intsateji, incomirejapojajempari incatsimacatsimavaequeriquea oshequi, intsipatsipaitacaanquempari maasanojia teeca inquemisantajigueraji.

⁴⁷ “Iiraquea yashintajitaca tsatatsica inintacaavecarica ashincarica, cotanquitsiquea teequea inquemisanteriji, aisa teeca irinetsanatempani incoraquepojjagueta, intavatavaavequeriquea oshequi. ⁴⁸ Cotanquitsiquea iriraquea yashintajitaca teeca intsateji

inintavecaca ashincarica, impeacaaguevequemparoquea teeca irininteji ashincarica, aatomajaca itavatavaajitiri, teetarite intsatenica. Quericacaquea itsatacaamajajiquea, inintajitiroquea inquempetaquempaqua iriatimpa inquempetacaamajaquemparoquea querocaguetei icojitaquerini itsatacajaiqueriguetei. Quericaca yojocamajajitica oshequi, inintajitiroquea irojocamajajitajeneriquea.

Teequea irooquee incoraquetashiteji Jesoshi incantajiaqueri maasanojia inquemavacaajiaquempa

(Mt. 10.34-36)

⁴⁹ “Naatimpa nocoraquetaquequea cameetsanijite nontsitacapojaqueroniji paamari acaniqui quepatsiqui.† Nonintamajaveca osamimincajencatsiquempame. ⁵⁰ Imaica nantsipevaequempaqua. ¡Noshimampojancaetaanaca nocanca, irooshipojitari aapojaquempa! ⁵¹ ¿Pijiqueji irooquee nocoraquetashique noncanqueriquea maasano quepatsiquitica inquemavacaajiaquempa iraavacaajiaquempaqua? Teetarite irooquee noncoraquetashiteji, iroguentiquea nocoraquetashique ompampiatantanaquemparoca intsinampirejavacaajianaquempa, incatsimajitanaqueriquea tsarovoltaquenanea. ⁵² Jeroquee imaica inchoocajiaque caquinteji tsovironaqui, incarajiaque apavacoro, cotanquitsi mavitetanquitsica incatsimajiaqueri itsipajia, ari intsinampirejavacaajianaquempa. ⁵³ Iiraquee shirampari incatsimaqueriquea irijanite, iriraquee irijanite incatsimaqueriquea iriri. Oraquee imanquigare oncatsimaqueroquee orijanite aisa ovataguero, oraquee orijanite oncatsimaqueroquee iniro, ariquee onquempetaquempaqua ovataguero iroatimpa oncatsimaqueroquee ovaguirote.”

Teequea intsajigueroji yonigaimojiavecarica Aapani Irioshi

(Mt. 16.1-4; Mr. 8.11-13)

⁵⁴ Iroompaaquea icantajiguiri maasano: “Oraqueate pamenajiguerogeti opoasecantiguetei mararo oraquee iquijiguetei catsirincaiteri picantajiaquequea: ‘Imaicashia ontejapojenishiatsi incani’, ariquee otejapojiqueate.‡ ⁵⁵ Aisa ochovigaguitetiguetei oquenajencatapojiguetei quirincaqui picantajiaque: ‘Imaicashia oncatsirincaguitetanaquenshia’, ariquee ocatsirincaguitetanaque.§ ⁵⁶ ¡Mana picameetsatamampeajica intati! Aviatimpajia pitsajiaveca pamenaguivevetarogueti arica ontejaque arica aato, irooca aisa pitsajiavecaroquee querocaca oncameetsaguitetantanaempaca, cotanquitsiquea ¿quero ococani teeca pintsatantajiguempaji quero ca ococani yonigaimojiavequempiroquea Aapani Irioshi maasanopae pamenajiaqueca imaica?

Pishinetacaajiajempaquea catsimajiaquempica

(Mt. 5.25-26)

⁵⁷ “¿Queroquee picojiacani aviatimpajia caarica pinintantajiga pintsajiguequea taaca opaji cameetsaguetanquitsica? ⁵⁸ Incatsimataquempiguetei pignonoro irinintavequempaguetei iraanaquempiquea jivatatsicaqui irisantanatacotacaanquempi, pinquenquetsatacaaguetanaquerija quenavoquirontsiqui pishinetacaajemparinijite aatoniji yaguimpitsi. Ontaniqui iraanaquempiguetei jivatatsicaqui iriotarite cajemaquerineca coareta. Iiraquee coareta manaquea irapanajantempiquea irisantanatacotsitempi. ⁵⁹ Noncanquempiquea, aatoguetei povegaramajatajiri catsimataquempica maasanopae paacotaquerica aatotarite yoguipaquiijimpitsi santanatacotaquempica.”

13

Icantajiaqueri Jesoshi aatoguetei icantashitatijaiga interoncajiaquempaqua

† 12:49 Icanqueguetei Jesoshi nontsitacapojaqueroniji paamari acaniqui quepatsiqui irooca iquejetacaaca incatsimatavacaquempaguetei caquinteji. Irirajia teeca intsarotentajiguempariji Aapani Irioshi incatsimajiaqueri tsarotentajiaquemparineca. Oncoramanitapojeguetei Aapani Irioshi incatsimatimentajiaqueri maasano teeca inquemisantariji. ‡ 12:54 Icantantaroca iroorijite ontaniqui iguinteniqui ishiraerijia ochooquetarite inirojani quentijani iquijiguetei catsirincaiteri, ontaniqui oquenantapojacaro mararo otejantapojacaca. § 12:55 Ontaniqui Ishiraeriqui oraquee choviga quenajencapojiroca oquirincaqueguetei catsirincajencavaeque irooriji oquitamamporoivaeque quirinca.

¹ Iroompaquea icoraquecoraqueipojiquea itsipapae icamantajiapojiriquea Jesoshi icantajiguiri:

—Irraquea Pirato imetojacaantajiaqueriquea Garireaquitica ontaniqui ijitorejajitiririgueti Aapani Irioshi viratsipae, ochovivincajatanaquequea iriraja oconoajatanacaroquea iriraja ivirapae ijitorejajiaqueca.

² Icantsijigariquea Jesoshi:

—¿Ari pijiqueji caaviji yogaamajajiaquea icovaeguishemajaca iriatimpajia Garireaquitica yanaajiaqueriquea igonorojia, jero iquempetacaajicariquea imaica? Teequea.

³ Naatimpa noncantajiaquempiquea aviatimpajia aisa: aatogueti pishimampojancaventajigaro pigovaeguishere aisa aatogueti picantashitatijajaa, manaquea pinteroncajiaquempa oncoramanitapojajeguete, pinquempejiaquempariquea iriatimpajia.

⁴ Iroompaquea aisa piquemacojiaqueriquea Jerosarequitica osoveimojiacari imapipancote inirochoviina coramani ontaniqui Shiroequi. Otsinacajiaqueriquea, imetojajiavaeque 18. ¿Ari pijiqueji caaviji yanaajiaque icoguishejiaca iriatimpajia yanaajiaqueriquea igonoropae choocajiatistica Jerosarequi? Teequeate.

⁵ Noncantajiaquempi aviatimpajia aisa: aatogueti picantashitatijajaa, pinteroncamaajaquempa quea pinquempejiaquempariquea iriatimpajia.

Jesoshi iquempetacaajiacariquea teeca irinetsanamajateroji icanqueca Aapani Irioshi

⁶ Iroompaquea iquempetacaajiacanariquea Jesoshi icanque: “Ichoocati aparo caquinte ivintyacaqueroquea aparo iguera iniganquitejirequi, ariquea yoapiniquequea iramenapiniquero choocatapojicaca osovena, cotanquitsiquea yoavetanacaquea teequea anejeroji.

⁷ Icantsitariquea shiacotiroca: ‘Iintsija pinquenquejeroja. Nocoraquetashitironiquea coramani, imaica ariquea omavitevaepoji ajagantsini tequerataqueate onchoocateji osovena. Pinchaquiteroshine, mana onchoocatashiguitempani intati.’

⁸ Cotanquitsiquea iriatimpa icanqueriquea: ‘Iintsija ariotaqueta. Imaicaquea imaica nonqueecavanetashitajeroquea noaviotacotajerota itigaqui viratsi. ⁹ Iroompaquea ajagantsitapojajeguete onchoocatajeguete osovena, cameetsavaeque; aatoguete ochoocatitsi, ariquea pinchaquitsitemparo quea.’ ”

Jesoshi yovejairoquea mititsajancatsica savincaguiteriqui imagorejantajitaca

¹⁰ Iroompaquea aapojacaguete savincaguiteri imagorejantajitaca itsatacaantavaetaquequea Jesoshi shinagogaqui icapiocantapiniyacaca jorioja. ¹¹ Ariquea ochoocaque oraniqui aparo manquigarentsi ocantacoguitani omititsajancaguitini, aapojaca 18 ajagantsini teequea ompejaempaji, iroorijite ishaquiacaroqueate ampatsini imititsajancacaaqueroquea, querocampate oncotajempani ontampaticatantanajempacate.

¹² Oraquea yamenaqueroguete Jesoshi icajemaqueroquea icanqueroquea:

—Manquigarentsi, imaicaquea jac peajimpiquea.

¹³ Ariquea ipamitsitavacaroquea, ariquea ocotanjaja otampaticatanaji oquenquetsatanaque oshinevencariquea Aapani Irioshi.

¹⁴ Cotanquitsiquea iriraquea jivatanquitsica shinagogaqui, yamenaqueriguete Jesoshi yoveantajaroquea savincaguiteriqui imagorejantajitaca, icatsimatsitanaca, icantajiguiri omporoguijajianquitsica:

—Ocaratiquea 6 savincaguiteri irantantajitempaca, irooqueate pincoraquetantapinijiaquempaca cameetsanijite irovejaiajempinijite. Aatoquea irooquea picoraquetantajiga savincaguiteri imagorejantajitaca.

¹⁵ Icantsitanacaquea Amajirote, icantiri:

—Cameetsatamampeajiatsica, piquempetaquea aviatimpajia, aapojajaguete savincaguiteri imagorejantajitaca pishiticarejacojiguiri pigaapironcaarite aisa paashinote, paa-jianaqueriquea pojocajiaqueneri oja, imirajiaquea. ¹⁶ Iroompaqueate ocatita manquigarentsi ichoviquitanaqueca Averaame yagavejaqueroquea Satanashi arejevaeca 18 ajagantsini, quejetacaquea yoishotacotaquero, ¿arimpate tee oncameetsateji iroishorejacotantajitemparo savincaguiteri imagorejantajitaca?

¹⁷ Iquejetacaacaroguete Jesoshi imaica, ipashiventajianaca maasano catsimajiavecarica. Cotanquitsiquea itsipajia caquinte ishinejianaca oshequi yamenajiaqueriguete Jesoshi ipeacaaguecaca ocaantantatsica intati.

Jesoshi iquempetacaacaroquea oitsoqui moshitaasa
(Mt. 13.31-34; Mr. 4.30-32)

¹⁸ Iroompaquea icanque Jesoshi: “¿Imaicaquea taaca opaji quempetaca imajirontagueti Aapani Irioshi? ¿Querocaca nonquempetacaaquemparoquea? ¹⁹ Iroguenti nonquempetacaaquemparoquea oitsoqui moshitaasa ivintyacajitirogueti niganquitejiqui, chaajaniqui onavetaca, cotanquitsiquea otsoroanaquequea agashimpojanacaquea otsegotsegoatanacaquea oquempetanajaroqueate inchato, ichoocatantajiacaroquea tsimeripae.”

Jesoshi iquempetacaacaroquea anempoacaguiroca pan
(Mt. 13.33)

²⁰ Iroompaquea icanque aisa: “¿Querocaca nonquempetacaaquemparoquea imajirontagueti Aapani Irioshi? ²¹ Ariquea nonquempetacaaquemparoquea anempoacaguiroca pan. Pamenirotarite manquigarentsi ompeacaguemparogueti pan, aaquequea apamontiinaro tirigovane, ariquea onconoanquemparoo anempoacaguiroca, ariquea oncotanaquempa anempoacaanaquero maasanose.”*

Sotomorontsi chaamorojaniquitatsica
(Mt. 7.13-14, 21-23)

²² Iroompaquea arimpaquea yoanaquequea Jesoshi Jerosarequi, iquenaetanaquequea ichoocajiguigueti caquinteja, itsatacaajianaqueriquea. ²³ Chooca aparo icoacotaqueriquea, icanqueri:

—Nomajirote, ¿teequea iroshequigueji meshiajianquitsineca?

Iroompaquea iquempetacaacaroquea Jesoshi querocaca ancojiaquempani oahoaitanatanauempaca ichoocatigueti Aapani Irioshi, icanajiaqueriquea:

²⁴ —Pimpanquenaguitemparoniquea pinquijaquijaitanauemparoniji sotomorontsi chaamorojaniquitatsica. Noncantamajaquempiquea inchoocajiaquequempaquea oshequini nintajiavetanquitsineca inquijaquijaitanauemparo, cotanquitsiquea aatoquea yagavejajiga iquijaquijaitiquea. ²⁵ Oncoramanitapojajegueti incatianaquequeate ashincaroa itsovironaquite irashiteroquea sotomorontsi. Aviatimpajia teeca pinquijaquijaiteji pincatintijiaque sotsiqui pintinquitavetemparoquea ashitacorontsi pincajemajiavetanaquempaquea: ‘Nomajirotee, pintanarejajoguenatsija.’ Cotanquitsiquea iriatimpa incantsijiguempi: ‘¿Querompate piquenajiapojini aviatimpajia? Teequea nontsajiguempiji.’

²⁶ Pincantsijiavetanaquempaquea: ‘Noconoajiguimpi ashecajiacagueti aisa amirajiacagueti, aisa aviatimpa pitsatacaantavaeque quenavoquirontsiqui noguinteniqui nocaramirincavaequegueti.’ ²⁷ Cotanquitsiquea iriatimpa arimpaquea incantajianaquempiquea: ‘Teequea nontsajiguempiji. Tee nontsateji quero piquenapojini. Poapoitanaquequea osamani maasano aviatimpajia antaguishejiguiroca covaeguisherentisi.’ ²⁸ Ariquea piraajianaquempaquea pantsicajiaqueroqueate paji pamenajiaquerigueti Averaameni, Ishaaconi, Jacovoni aisa itsipapae tsavetantajiaatsica iconoajiapojacariqueate Aapani Irioshi ontaniqui imajirontagueti, aviatimpajia manaquea impishoncajiaquempiquea osamani. ²⁹ Incoraquecoraquejiaque inquinaquenaivaepojaquequea jmm osamani oshequini otsipapaequi quepatsi irishinemajiaquempaquea inconoajiaquempariquea Aapani Irioshi irisavicajiaque irishecajiaquempa. Inquinaquenaivaepojaquequea isotoguigueti catsirincaiteri, itsipapae inquinaquenaivaepojaquequea iquijigueti catsirincaiteri, itsipapae quirinca, itsipapae inquinaquenaivaepojaquequea catonco. ³⁰ Irirajia teeca iranaantimajigueji imaica acaniqui quepatsiqui, inconoagaranquempaquea iranaampojaque. Irirajia anaantajanquitsica imaica inconoagaranquempaquea aatoquea yanaantimajiaji, maasanoquea iranaajiaqueriquea.

* 13:21 anempoacaanaquero maasanose. Ariquea iquejejiaca majirontajiacarica Aapani Irioshi, yoshequianaquequea querocagueti quepatsiqui.

Jesoshi iracojiaqueriquea Jerosarequitica
(Mt. 23.37-39)

³¹ Iroompaquea incajaranquiguitetanaquitigui icoraquecoraqueipojiquea pariseojia icantajiapojaqueri Jesoshi:

—Poanaqueshia otsipaqi quepatsi, ininquetari Erorishi† irimetojacaantempi.

³² Cotanquitsiquea iriatimpa icantajiguiri:

—Poapoaitanajiquea pincamantajiapojaquerija irinta amatavijantatsica, pincanqueri: ‘Iintsija pameneja, imaicaquea imaica choocatirajana nonigaaquempariquea ampatsini-pae aisa nogueshiguetajeri ashinoncajaguetatsica. Ariquea nonquempetaquempaquea osaitequera, aisa otsipa savincaguiteri, teetarite oshequiavaeteji savincaguiteri non-teroncaguetanajeroquea nocoraquetashitaqueca.’ ³³ Cotanquitsiquea imaica arimpaqueate antanatsinaqueate, nonquejetacaajemparoqueate aisa osaitequera, ontsipavepojaquempaquea osaitequera nonquejetacaitajemparoquea aisa. Irootari Jerosarequi imetojantajicari oshequi tsavetantajiaqueroca icanquerica Aapani Irioshi. ¿Arimpate irimetojavaete otsipaqi?

³⁴ “¡Jerosarequitica, Jerosarequitica, pimetojajiguiriquea tsavetantajiatatsica, aisa pitsinatsinavaetaqueriquea itigaranquimojiavequempica Aapani Irioshi intsavetantimoji-aquempiro Iguenquetsatsare! Pamenajiguiriquea chaapa osaavantajiguirigueti iri-janijiate, nonintaguevetacaquea naatimpa nonquempetacaajiaquempimequea maasano aviatimpajia noncapiocajiajempimequeate pintsaromentajiaquea, cotanquitsiquea aviatimpajia teequea pinintajigueji. ³⁵ Imaicaquea imaica aatoquea ichoocatimojiajimpia Aapani Irioshi, aparoquea pinchoocajiaje. Noncantajiaquempiquea imaica aatoquea pamenajiajana arejevaetapojajempaquea aapojajempaguete pincantajianaquetaquea: ‘¡Iintsishiatsi irishineventajiquempari iriratica coraquetapojatsica itigarancaqueca Majirontamajatsica!’ ”

14

Jesoshi ipeajiriquea eereheereatatsica

¹ Iroompaquea aapojacaguete savincaguiteri imagorejantajitaca yoanaquequea Jesoshi ishecatacaquea itsovironaquitequi pariseo anaantatsica. Itsipajia pariseojia yamenamajaqueriquea querocaca incoquempani. ² Ariquea ichoocaque oraniqui iriatimpaqui aparo eereheereatatsica. ³ Iroompaquea icantanaque Jesoshi icoacojiaqueriquea tsatacaantajiguirica itioncacotanaqueca Moishishini aisa pariseojia, icantajiguiri:

—¿Cameetsataque ampeantajempari joquijitatsica savincaguiteri qui imagorejantajitaca, arica teeca oncameetsateji?

⁴ Cotanquitsiquea iriatimpajia imajerejianaquequea. Iroompaquea Jesoshi yajiricapojaqueri eereheereatatsica yoveajiriquea, icanqueri iroanaje. ⁵ Iroompaquea icantsijigariquea aisa pariseojia:

—¿Arimpaquea aviatimpajia, intanquirejuguete omoroqui pirijanite irioca pigaapironcaarite savincaguiteri qui imagorejantajitaca, arimpa aato paajiajateri? ¿Arimpate ari poguijiaquequea anaanajempata imagorejantajitaca ari quea paajiajateriqueate?

⁶ Manaquea imajerejianaquequea, teequea intserarejimajigueji capichaji.

Iroguipashiventajiqueriquea aventacovaetatsica

⁷ Iroompaquea iriraquea Jesoshi yamenajiaqueriquea maasano icajemajiqueca irishecaciaquempa iroguenti inintamajiaquequea irisavisaviitapojaque quempeji irisenampijapojaquempari cajemajiaquerica, irishineventamajitaquempariniji iranaampojaqueniji. Ariquea itsatacajiaqueriquea icantajiguiri:

⁸ —Incajemaquempigueti iriaqueraca manquigatanquitsica pishecatimoquempariguete irishinevenquemparoguete imanquigatantacaca, aatoquea pisavicampojacaro irisavicantapojaquempaca anaantatsica. Aricaguete incoraquepojaque itsipapae anaaquempica, ⁹ iroompa iriraquea cajemajiaquempica incoraquepojaqueguete incanquempiquea: ‘Iintsija tiijaitatsija iricatica.’ Ariquea ovashiventajianaquempiquea,

† 13:31 Iriratica Erorishi irio icantajitica Erorishi Antipashi; pamenero tioncanquitsica isavivanaqui otsapauqui 3.1.

iroompa pintsenterejapanajante pisavicampojojemparoquea isavicantapinitaca teeca iranaanteji.¹⁰ Arigueti incajemaquempi, iroguentiquea pisavicampo-jempa itiinatapinitaguetei teeca iranaanteji, cameetsanijite inqijapojeguetei cajemaquempica iramenapojempiquea incantapojempinijite: 'Notsipavijitaca, caacateja acaniqui pisavicampojojemparoquea itiinatantajiaca anaantatsica.' Iroompaquea inquemajiaqueguetei tsipatsipaitaquempica shitaponcarontsiqui intsajianaquequea aviguenti ishineventamajataca cajemaquempica.¹¹ Irieraquea aventacotatsineca iroguipashiventajiqueriquea. Irieraquea teeca iraventacotempaji iranaacaajitaqueriquea.

¹² Ariquea iquenquetsataji Jesoshi, icanqueriquea cajemaquerica:

—Pintiacaanteguetei pisheca pincajemanteguetei aatoquea iriguentei pincajemapinique pitsipavijitaca, irioca piguentijeguijiate, irioca pijiguetea, irioca ajaarantatsica choocajianquitsica quempeji pitsovironaquitequi. Ariguetei pincajemajiaqueri iriatimpajia, inquejetacaajempi incajemajiajempiquea aviatimpa pishecatimotajatempariquea iriatimpa.¹³ Iriompate pincajemajiaque teeca irashintempaji, iriojiaca chompeguijiri, iriguentejiaca teeca iranijimajateji, iriguentejiaca aisa shamponcajari.¹⁴ Ariquea pishine-majatanaquempaquea oavaetanaque, aatotarite yagavejajiguetea inquejetacaajiajempiquea iriatimpajia, cotanquitsiquea oncoramanitapojajeguetei inquejetacaajiaquem-piquea Aapani Irioshi intancoretancoreitanajeguetei irirajia iramenajiaqueca quempeca teeca incovaeguishetimatempaji.

Jesoshi iquejetacaajari cajemantavetatsica irishecatacaajiaquemparime
(Mt. 22.1-10)

¹⁵ Chooca aparo savicanquitsica shitaponcarontsiqui irooquea iquemaqueriguetei Jesoshi icantaqueguetei icantsitanaca:

—Irishinevaetanaquempaquea irirajia shecajianquitsineca ontaniqui imajirontaguetei Aapani Irioshi.

¹⁶ Ariquea icantanaque Jesoshi, iquejetacaajiacanari, icanque:*

—Ichooqueue shirampari ininque incajemantaque, iroompaquea icamantacaantaji-queri maasano incajemaqueriquea irishecatimojiaquitempari incaramirincavaeque-quea jmm.¹⁷ Coajica itiacaquequeate taaca opajitapae isheca, iroompaquea oposa-tanaqueguetei itigaranquitsitariquea yashincaca irishiashiguequiteriquea incanqueri: 'Caacateshiatsi, netsanagueteaquea maasano.'¹⁸ Cotanquitsiquea maasanoquea ican-tacantaitanaque: 'Aato nagaveji noguitsi.' Aparo icanque: 'Iroaquerasano nareje-tapojaja novegaraquitiroquea quepatsi, noanaquequea namenajatero. Pincavintsaja-cotena, aato picantana.'¹⁹ Itsipaqueate cantananquitsi: 'Iroaquerasano narejetapojaja novegaraquitiriquea 10 caapironcaari, noanaquequea namenajateri nontsatimenqueniji arimajaca yagavejajiaque inquitencavatsataque. Pincavintsajacotena, aato picantana.'

²⁰ Irieraquea itsipa icanque: 'Iroaquerasantarite nomanquigacaro manquigarentsi, aato nagaveji noguitsi.'

²¹ "Ariquea icoraquetaji yashintajitaca icamantapojajiriquea ashincarica. Icatsimatsitanaca iriatimpa icanque: 'Iroosacanic poanaquequeate ontaniqui ocapiocaguecaguetei tsovironaqui, pintsitacavaetanaqueroquea maasanopae quenavoquirontsipaequi, pintsipatsipaiquempiquea teeca irashintajiguempa, iriguentejiaca chompeguijiri, iriguentejiaca teeca iranijimajateji, irioca aisa shamponcajari, incoraquecoraqueique irishecatacojiaquenaquea.'

²² "Osamaniguitevaepojiguetei icoraquetaji yashincaca icantapojiriquea: 'Jac naajiaquitiriquea, cotanquitsiquea tequerataquea intsitacajiguemparoji shitaponcarontsiqui.'²³ Icantanaque ashincarica: 'Iroosacanic pijateja poanaje irooquea pishivoquitantaguetanaquemparoquea quenavoquirontsipaequi tequerataca poantemparoji pamenantaguetapanajantemparija maasano choocajianquitsica

* 14:16 Jesoshi icamantacoqueri Aapani Irioshi iriquetimajaquea icavintsajamajaveca joriojia itigaranquimove-cariquea Irijanite, cotanquitsiquea teequea irishineventajiaquemparaji iriatimpajia, irioquea ipitsocashijianaca teeca irijorioteji, icavintsajamajatsitariquea.

oraniqui, pintsipatsipaitanaquemparija incantavaetanaquetaquea tirorerere notsovironaquitequi. ²⁴ Noncamanquempiquea, irirajia iriquestica nocajemacaantaguevetacaca aatoja ishecatimataro ocatita nonetsanavetacananarica.’ ”

Quericaca aatoca yatsipeventari Jesoshi aato ipequiritsi itsatacaane
(Mt. 10.37-38)

²⁵ Iroompaquea ishivoquitanacaroquea Jesoshi quenavoquirontsi itacororoaventajanacari caquinteja. Iroompaquea ipitsocashijianacariquea icantajigui: ²⁶ “Taacaguete nintanquitsineca impeamajataquempa notsatacaamajare, incantacoguitempaniquea impintsamajataquena anaimentanaqueroniji ipintsajigariguete irijanintajigarica, irooca imanquigare, irijanijiate, irorijanijiate, irioca iriguentijeguitepae, irooca itsijitepae. Ariquea onquempetaquempa aisa anaqueroniji ipintsataguete iriatimpa. Oraqueate aatoguete iquempetacagaro imaica, aatotarite yagavejitsi impeaquempaquea notsatacaane. ²⁷ Ariquea iquejetaquea aisa quericaca teeca irininteji irinatanontanaquempa ivoatsite irompajacotantajitaquemparica irantsipeventavaetena iroguijatacotantanaquenaca, aatoquea yagavejitsi impeamajataquempa notsatacaane.

²⁸ “Taacaguete nintanquitsineca impeacaquemparoquea mapipanco inirochoviina, iroquetitaquea inquenquejamajaquero quero incaraquisequitaqueni imentaquitsite intsitanquemparoniji. ²⁹ Oraquea aatoguete iroquetitaquea iquenquejirotsi managuete impeacaashiquemparoquea intati, niganquiquea interoncacopojempaquea, aato itsitaquirotsi, arica irishirontimentajiquempari iramenitsijiqueriguete manaquea capichajaniqui yogatiaguetaqueroquea. ³⁰ Incantajigue: ‘Iriatimpa ipeacaaguevecaroquea, teequea iragavejeroji interonqueroji.’

³¹ “Ariguete inchooacaque majirontatsica ashintanquitsica 10,000 coareta iroaroaitanaquequea irashimirintavaguempaquea itsipa majirontatsicaqui ashintanquitsica 20,000 igoaretate, ¿arimpate aatoquea iroquetitaquea iquenqueji arica iragavejajiaqueriquea, arica aatoca yagavejajitiri? Inquenquejanaquequea. ³² Ariquea iramenanaquiguete aatoquea yagavejiritsi, intigaranquitsitempariquea cantajajerineca, intonquivojajavaquempariquea caavijica yanaajiaqueri, iramenajiaqueriquea arica iragavejajiaqueri irivetsinantajavajeri. ³³ Arimpaqueate oquejetaquea imaica quericaguete teeca irininteji irovashiantaguetanaqueroquea maasanopae yashincaca, aatoquea ipeamajataquea notsatacaane.

Queroquea incojiqueroni incachoanepane incachoanetantajitajemparoquea
(Mt. 5.13; Mr. 9.50)

³⁴ “Oraquea incachoanepane cameetsavaeque, cotanquitsiquea arigueteja omasanateguete, ¿querocampate incojitajeroni incachoanetantajitajemparo? ³⁵ Teequea oncameetsateji onconoaquemparoguete quepatsi, aisa teequea oncameetsateji pinconoanquemparoguete camishitequi poaviotantaquemparoquea panquirentsi. Manaquea impishoncajitaqueroquea intati. Choocaguete piguempita pinquemantavaquempaca, pinquemeja.”

15

Oveja peavetanquitsica
(Mt. 18.12-14)

¹ Iroompaquea icoraquecoraquetashijiaqueriquea Jesoshi maasano capiocapinijiguiririca majirontatsica imentaquipae aisa itsipajia covaeguishejiatsica, iroguentiquea icoraquecoraquetashijiaque inquemisantajiaqueriquea. ² Iroompaquea yamenajiaqueriguete pariseojia aisa tsatacaantajiguiroca itioncacotanaqueca Moishishini, ariquea iquenquetsatocoguishejiaqueri Jesoshi, icantajigui:

—Iintsija pameneri. ¿Quericaquea icocani irintatica iconoconoipojacariquea covaequishejiatsica ishecatacojiapocari?

³ Iroompaquea icantanaque Jesoshi iquempetacaaca icanque: ⁴ “Pameneja aviatimpajia, pashinquempaguete 100 oveja paajianaqueriquea oraniqui cataromashiqui irishecaciaquempaquea, ariquea impeaquempaguete aparo, ¿arimpate aatoquea pitsinampirejajianaqueri igonorroja, poanaquequeate pamenaguetajateriquea, pincantacoguitempuni paantajatemparicajate? ⁵ Ariguete paajateriguete pantsomajanajeri paanajeri pishinevaetanajempaquea oshequi. ⁶ Iroompaquea parejetapojajempaguete pitsovironaquitequi pincajemajapojajeriquea pitsipavijijiaca irioca irooshitacoguetaquempica pincantajiaqueriquea: ‘Jaameja ashinejiaquempaquea, naajatiritarite novejate peavetanquitsica.’ ⁷ Imaicaquea noncantajiaquempi ariquea inquejetempaquea inchoocateguete aparo covaequishetanquitsica irovashianteroguete ipeacaaguishevecaca covaequisherentsi ariquea incantashitanajempaquea, irishineventamajajitanaquempariqueate oshequi ontaniqui jenoqui inquitequi, anaavaetanaqueroquea ishineventajiacariguete 99 comajamajianquitsica teeca incoguitejacojajempaji incantashitati-jaiquempaji.

Imentaqui peavetanquitsica

⁸ “Nonquempetacaajiaquempiro otsipa. Iroguentica ashinquempaquea aparo manquigarentsi 10 omentaquitsite* vegaravaetatsica, ariquea impeaquempaguete aparoshimentauki ¿arimpate aatompate otsivotiquea tsivorentsi ompishitacotsitajempariqueate oncoamajatajeriquea aajerinijite? ⁹ Ariguete aajeriguete, oncajemajiaqueroqueate ot-sipavijijiaca irosati irooshitacoguetanquitsica oncantajigueroquea: ‘Jaameja ashinejiguempa, naajiriqueate nomentaquitsite peavetanquitsica.’ ¹⁰ Imaicaquea noncantajiaquempiquea ariquea iquejejiacaquea irashivantijitete Aapani Irioshi ishinejiaca oshequi yamenajiguiguete icantashitatijaiaca aparo covaequishetatsica.”

Peavetanquitsica

¹¹ Iroompaquea icanquequea Jesoshi aisa: “Ichoocatiquea aparo shirampari, chooca irijanite mavite. ¹² Iroompaquea iriraquea ichoviqui icanqueriquea iriri: ‘Aapani, iintsijate pojoquenarotate imaica maasanopae nashinquempaca naatimpa oncoramanitapojajeguete pimetojanajeguete.’ Iriraquea iriri yojocajiaqueneriquea mavite maasanopae otampaticaguequerica.

¹³ “Iroompaquea oquempejipojajiguete savincaguiteri iriraquea ichoviqui yaaguetanaqueriquea maasanopae imentaquitsite, yoavaetanaquequea osamani ontaniqui ot-sipauki quepatsiqui, ariquea oraniqui ipeacaaguishetapojacaroquea taaca opajitapae, ipomatsaqueriquea imentaquitsite, iteroncamajaqueriquea oraniqui, cajaraguitenisano yoaqueri. ¹⁴ Ocoajicaguitevaetanaqueguete iteroncamajaqueriguete maasano imentaquitsite, oteronquitsitanacaquea isheca otsitacaguitejanacaroquea oraniqui, que-rocampaquea irajaeroquea irishecatajempaca, yatsipevaecaroshia itase. ¹⁵ Coajica yoanaquequea yamanapojiri guintenitaroca ocaniqui iramipojeriquea iraaquenijite imentaquitsite. Iriatimpa itigarancaqueriquea inquempoguijaqueneri ichanchotepae.† ¹⁶ Ariqueate itaseaguetaepoji icanca iroovetanacaquea irishecatanaquempamequea osagoma yojocajitinerica chancho inquemanaquempunijite teenica onchoocatimateji irojoquimajiteneriji irishecaquempaca.

¹⁷ “Iroompaquea iquenquejitsitanacaroquea icanque: ‘Iriraquea amiterica aapani ishecajiaca icanca, iquemajianaca teequea interoncamajajigueroji. Naatimpa acaniqui imaicashia aanaquena notase. ¹⁸ Iintsija noanajequeate aapaniqui noncampojajeriquea: Aapani, yamenaquenaquea Aapani Irioshi inquitequitica nopeacaaguishevaecaquea covaequisherentsi, aisa aviatimpa noguipashivenquempiquea, noteroncamajatanaque-riquea maasanopae pojocaguevequenaca, nopomatsaqueriquea. ¹⁹ Imaicaquea ooquea aatocaqueate picantajana irijani, manaqueate pinquempetacaajena amitimpica.’

* 15:8 omentaquitsite. Iriratica imentaqui ipajita dracma (ancanque aatimpa “iraquima”). Iramijiqueriguete itsipa apajencaro savincaguiteri irivegaraqueneri apashimentauki iraquima. Irira iraquima iriguente imentaquitsite guiriego. Iquejevecariquea itsipa imentaqui icantajitica tenario irashi Iromaquitica. † 15:15 Irira chancho iriguente viratsi quejevetarica santaviri.

²⁰ “Iroompaquea yoanajiquea yarejevaepoja itsovironaquitequi iriri. Irooqueate yamenacotsitavajirigueti icoraquepojajigueti ipintsatacotanacariquea oshequi, ishi-ashitanacariquea itonquivojavacari, yaavajiriquea yavitsanoitavajiri inintavorotavajiri.‡ ²¹ Iroompaquea icantanaquequea iriatimpa: ‘Aapanii, yamenaquenaqueate Aapani Irioshi inquitequitica nopeacaaguishevaecaqueate covaeguisherentsi, aisa aviatimpa noguipashivenquempiquea, noteroncamaajatanaqueriquea maasanopae pojocaguevequenaca, nopomatsaqueriquea. Imaicaquea ooqueate aatocaquea pican-tajana irijani.’ ²² Cotanquitsiquea iriri icantajiguiri irashijia: ‘Poapaitanaquequea paaquite quitsaarentsi caavijica anaaque ocameetsamajataquequea, pinquitsaajiaqueri, aisa pasatecaqueneri maachapaquirentsi ichapaquiqui, aisa pincaviguitijiaqueriquea. ²³ Paajiaquiteja caapironcaari irijanigantirenajaniqui quejitanquitsica, pijitorejitempariquea. ¡Jaame ashecajiaquempaquea ashinejiaquempaquea! ²⁴ Coraquetajitarite irijani, iroaquerasanoquea namenajiri arimegueti irimetojaquemegueti. Ipeamajavetacatarite, imaicaquea imaica amenajiajiriquea.’ Iroompaquea ishecajiaquea ishinemajiaquea.

²⁵ “Iriiraquea iriquetica ariguenti ichooaque niganquitejiqui. Iroompaquea icoraquevetapojaca iquemajiapojiri soncajiatsica yoshequiavaeque, aisa itsamarojiaque. ²⁶ Iroompaquea icajemaquequea aparo yashincaca icoacojiaqueriquea icanqueri: ‘¿Taaquea opaji oraniqui?’ ²⁷ Iriatimpa icanqueriquea: ‘Iroguenti icoraquetajiquea piguentijeguite. Imaicaquea ijitorejacaanqueriquea piri irijanigantirenajaniqui caapironcaari quejitanquitsica, cameetsatari yarejetaja.’

²⁸ “Ariquea icotanaca icatsimatanaquequea iriatimpa, teequea irininteji inquije tsovironaquiqui. Irooquea iquemacoquerigueti iriri, isotoanaquequea yoanaque in-quenquetsatacaqueriquea inquijapojenijite. ²⁹ Cotanquitsiquea iriatimpa ari ican-queriquea: ‘Pameneja, pitsataquequea aviatimpa naatimpa nocantacoguitaniqueate namiguitimpiniqua, teequeate nomperatimotempiji, teequea ari pojoquimatenaji aparo caavera irijanijaniqui noncajemajiaquerimequea notsipavijijiaca noshecatacaaji-aquempame noshinejiaquempame. ³⁰ Cotanquitsiquea imaicaquea icoraquetajigueti pirijanite teronquitanaquempirica pimentaquitsite ipomatsatacaantacaroquea man-quiarentsijia cantatsatantaguetatsica, paitsitanacaquea pijitorejacaantsitariquea iri-janigantirenajaniqui caapironcaari quejitanquitsica.’

³¹ “Icantsitanacariquea iriri: ‘Irijani, aviatimpa ariqueate pichooaque naatimpaqui. Maasanopae nashintaguecaca iroguenti pashi aviatimpa aisa. ³² Cotanquitsiquea imaica cameetsavaeque ashecajiaquempaquea ashinejiaquempaquea, coraquetajitarite piguentijeguite, iroaqueraqueate nojiqueji ariqueate metojuque, ipeamajavecaquea, imaicaquea imaica coraquetaji amenajiajiri.’ ”

16

Amatavijirica jivatatsica

¹ Iroompaquea Jesoshi icantajiguiri aisa itsatacaaneja: “Ichooaque aparo ajaaran-tatsica, chooca itigaranquica amenaguetinirica maasanopae yashintaguecaca. Iroom-paquea icamantajiaqueriquea ipomatsaguetaqueroqueate yashintaguecaca, opeague-taca. ² Iroompaquea icajemaqueriquea icanqueriquea: ‘¿Arimajaca pipomatsat-siguequenaro? Iintsijate pojoquenarojate pivaperipante pitoncacoguequerogueti maasanopae, namenerota queroquea picoqueroni, aatotarite pamitacotajanaqueate.’ ³ Ariquea iquenquejanaque itigaranquica: ‘¿Querocaquea noncoquempani imaica? Aatotarite namitacotajiriqueate, ¿quericaquea namitacogajoitajeca? Teetarite non-tampishiteji, ¿queroquea noncoquempani noshiacoquegueti? Nopashivencaquea na-manapiniquerigueti itsipapae irojocashitapiniquena intati.’ ⁴ Iroompaquea incajaran-quiniquea icanque: ‘Imaicaquea notsaquequea querocaca noncoquempani cameetsani-jite inchooquenijite aavajenaneca jocaquenanea nosheca coajica intigarancaque-nagueti jivatanaca.’ ⁵ Ariquea yoanaque icajemajiaqueriquea aacoquerica jivatir-

‡ 15:20 inintavorotavajiri. Yamejiaca joriojia coramani inintavorotavacaajivaca yamenavacaajiacagueti.

ica, aparopaetaquea icajemaque. Iriraquea iriquetica icajemaqueca icanqueriquea: ‘¿Querocaca icarashequiguini paacoqueri jivatanaca?’⁶ Yacanaqueriquea iriatimpa, icanque: ‘Iriguenti naa-coquequea ashiti icaratacovaegue 100 chomoqui.’ Iroompaquea icanqueriquea: ‘Jero ocatita pivaperipanate pitioncacotancarica coramanitica paacoquerigueti. Imaica iintsija caacatequetirote taampina pintioncajeroquea acaniqui pincantashitajjemparoquea ariguentiquea incarataje pojocaje 50.’⁷ Iroompaquea icajemitsitaquea itsipa iquempetaqueriquea iriatimpa icanqueriquea: ‘¿Querocaquea ocarashequiavaequeni paacoquerigueti jivatanaca?’ Iriatimpa icanque: ‘Iroguenti naa-coque tirigoitsoqui ocaratacovaegue 1,000 inirojeguiqui cantiriqui.’* Ariquea icanqueriquea: ‘Jero ocatita pivaperipanate pitioncacotancaroca coramanitica paacoquerigueti. Imaica iintsijate caacatejate pintioncajeroquea ocatita pincantashitajjemparoquea oncaratanajequa pojocajeca 800.’

⁸ “Iroompaquea iriraquea jivatirica itsaquegueti iquejetaquerogueti imaica, yamenanaquequeate intati, icanque: ‘Caaviji itsaveca iriraquea amatavijantanquitsica.’ Irirajia quepatsiquitica choocajianquitsica imaica itsamajavecaquea querocaca incojiaquerini igonorroja cameetsanijite iragavejacojiaqueronijite taaca inintajiaqueca, yanaajiaqueriquea tsirencacoshirentajianquitsica, teemajaca intsamajajigueroji.

⁹ Cotanquitsiquea imaica naatimpa noncantajiaquempi: inchoocajiaquegueti pashintaguecaca acaniqui ichoocajiguigueti covaeguishejiatsica pincavintsajajiaqueriquea coguitejacojianquitsica cameetsanijite inquempetacaajiaquempinijite, ariguentiquea pimetojajianaquegueti povashiantaguetanaqueroquea maasanopae pashijia irajaiavajempinijite iriatimpajia ontaniqui jenoqui tsovironaqui qui aatoca oteronquimataja.

¹⁰ Querocaca quempoguijamajaqueroneca irojocajitenerigueti capichaji, inquejetacaavajemparoquea aisa irojocajiquenerigueti oshequi, inquem-poguijamajatavaqueroquea irinetsanamajaquero inintacaajitaquerica. Iriraquea aatoca iquem-poguijamajatiro irojocajivequenemparigueti capichaji irooca iraitsigueta vaqueri capichaji, inquejetaquempauea aisa irinintajivetempagueti inquem-poguijaqueneri oshequi, aato iquem-poguijamajatirotsi irooca iraitsigueta vaqueri.

¹¹ Cotanquitsiquea aatogueti piquempoguijamajatirotsi ajaararonsi choocaguetatsica acaniqui quepatsiqui, ¿arimpa irojocajitaquempiroquea iroomajaca caavijica anaaquero?¹² Ariquea oquempetacaquea aatogueti piquempoguijamajatsitiri yashintaguetacaca itsipa, irooca paitsigueta vaqueri, ¿taashia jocajempirone pashinquempameca aviatimpa?

¹³ “Tee inchoocateji agavejanquitsineca irantavaetaqueneri mavite ashintaquemparica. Manaquea irisemaneguintaquempari aparo, iriraquea itsipa impintsataquempari, irooca inquemisantamajataqueri aparo, itsipaquea intsojencaneguintaqueri. Aato pagaveji pantaqueneri Aapani Irioshi inintaguetica, iroogueti pisavicaventaque pajaan-tavaequempa quejetaca irooquea ashintaquempi ajaararonsi.”

¹⁴ Iroompaquea irirajia pariseojia choocajianquitsica oraniqui irooquea iquemajia-querigueti Jesoshi, ariquate icohicoitanaca ishiroshirontimentavaecari, iriguentijiatari nintamajajiguirica imentaquipae.¹⁵ Icantsijigariquea Jesoshi: “Aviatimpajia aviguentijia peamampeajiatsica netsanamampeajiatsica irishineventajiaquempiniji caquinteja, cotanquitsiquea Aapani Irioshi yamenashirentajiaquempi. Iriatimpa teequea irishineventemparoji ishineventajiacaca caquinteja, manaquea yatsitsiimanatacaro.

Itioncacotanaqueca Moishishini aisa imajirontagueti Aapani Irioshi

¹⁶ “Ochoocaque ni coramaniqui itioncacotanaqueca Moishishini aisa tsavetantajiat-sica, arejevaetaquea ichoocaquegueti Joancani, ariquea imaica itsavetantajitanaque-roquea Quenquetsatsarentsi Oganejencatatsica quero icotani imajirontagueta Aapani Irioshi. Icaramirincavaequequea nintamajajianquitsica iroanaque ichoocaquegueti, ita-mpishiventamajaquero.¹⁷ Omanavaeca onteronquitsitempagueta quepatsi aisa inquite.

* 16:7 ocaratacovaegue 1,000 inirojeguiqui cantiriqui. Iguenquetsatsarequi guiriego icanque 100 korus, iroguenti ocarataque arica 35,000 ritoro.

Anaamajaquequea ompeguempagueti apaitsoqui itioncacotanaqueca Moishishini, maasanotari onetsanamajaquempauea.

Icanque Jesoshi aatoja quericaca ovashiantimatirotsi imanquigare
(Mt. 19.1-12; Mr. 10.1-12)

¹⁸ “Querica ovashianqueroneca imanquigare otsipaquea irimanquigatajempauea, manaquea icovaeguisheca. Ariquea iquempetaca manquigatavajemparoneca manquigarentsi yovashiantajitica, manaqueate icoguisheca.

Ajaarantatsica aisa Irasaro

¹⁹ “Ichooque aparo ajaarantatsica iquitsaamajataroquea quitsaarentsi aramampoaro ogameetsareni ocanca. Icantacoguitaniqua savincaguitariqui ishecamajectaquea taaca opajitapae, teequea taaca opaji incoguitejacotempaji. ²⁰ Ichooque aisa aparo teeca irashintempaji, ipajita Irasaro.† Iroguentini ishimoiriquire teetarite capichaji. Yamajiqueriquea yojoquijiqueri quepatsiqui sotomorontsiqui sotsiqui itsovironaquitequi ajaarantatsica. ²¹ Yatsipevaecaroquea itase, inintavecaquea irogujavaqueromequeate otsopequijaniqui ontanquirejaguetapaje shitaponcarontsiqui ishecatacaguete ajaarantatsica, irshecaquemparo. Icoraquecoraqueitashiqueri shiishi yaneronerovaequeriquea ishimoiriquitaquegueti.

²² “Iroompauea imetojanaue Irasaro, irirauea irashivantijitete Aapani Irioshi yaajianajiriquea ichoocaguegueti Averaameni. Ocoramanivaetapojajiguete imetojanajiquea ajaarantatsica, iquitajitajiriquea. ²³ Yatsipevaetaquea oshequi ontaniqui Areshiqui. Iroompauea yamenacotajiriquea Averaameni osamani itsipatajariquea Irasaro. ²⁴ Icajemacotsitariquea icanqueriquea: ‘Aapanii Averaameni, pimpintsatocogajitenashiatsi, pintigaranqueriquea Irasaro irorencachapaquitapanajantemparoquea ojaaquiniqui, incoraqueque intsincapojenauea nonenequi, natsipevaecaquea acaniqui paamariqui.’

²⁵ “Cotanquitsiquea Averaame icanqueriquea: ‘Irijani, pinquenejajeroja coramaniqui tequerataguete pimetoje, aviatimpa pishinevaeca oraniqui, teequea taaca opaji pincoguitejacotempaji. Irirauea Irasaro yatsipevaeca icanca. Imaicacaquea imaica irioqueate shinevaetajatsinequea ocaniqui, aviatimpauea pantsipeguitempaniquea. ²⁶ Aisa oquichatencanajavaequeate ontaniqui aviatimpaqui, taampaqueate agavejanquitsineca iroanauequeate oraniqui. Ariquea iquempejiga choocajanquitsica oraniqui aatoquea yagavejajiga incoraquequeate acaniqui, ¿querocaquea inquenaqueni?’

²⁷ “Yaquitsitanacaquea aisa ajaarantatsica icanqueriquea: ‘Iroosacana imaica noninque pintigarancaqueriquea Irasaro itsovironaquitequi aapani. ²⁸ Choocajiarite ontaniqui 5 iguentijeguija. Intsatacajaiapojaqueriquea aatonijite incoraquecoraqueitiquea iriatimpajia aisa acaniqui irantsipevaequempauea.’ ²⁹ Icanqueriquea Averaameni: ‘Choocatarite itioncacotanaueca Moishishini aisa tsavetantajatsica, irooquea irimpat-sajavantajiaque inquemisantajiaque.’ ³⁰ Yaquitsitanajaqueate iriatimpa icanqueriquea: ‘Aato, aapani Averaame, cotanquitsiquea ariguete iroque metojatsica intsatacaajiaqueri, ariquea incantashitatijaianaquempauea.’ ³¹ Cotanquitsiquea Averaameni icanque: ‘Aatoguete inintitsi irinetsanatashitemparo itioncacotanaueca Moishishini aisa tsavetantajatsica, ari inquemetacaavaquempari ariguete impochatimoteri metojatsica, aatarite iquemisantiri.’ ”

17

Caaviji incatsimamajajiqueriquea covaequishetacaantanquitsineca
(Mt. 18.6-7, 21-22; Mr. 9.42)

¹ Iroompauea icanquigui Jesoshi itsatacaanejia: “Oocaniquea onchoocaguiteni covaequishetacaajiaquemparineca caquinteja, cotanquitsiquea jimaicashiatsi

† 16:20 Irica Irasaro, tee irio ivochantajica Jesoshi, iriguenti itsipa coramanitica.

irantsipevaequempaquea quericaca covaeguishetacaaquemparineca itsipa, caaviji incatsimamajajiqueri! ² Quericaca covaeguishetacaaquemparineca aparo chaajaniquiri quejejiacarica iricajia, incatsimamajajiqueriquea oshequi. Iroquetitamequea intsatota-cojiqenerimequea itsanoqui shimentapiri itononcantajitaca iroompaquea irajaitanaqueriquea impishoncajajiqueri inirojani quentijaniqui. ³ Inchiquiojitajate aviatimpajia.

“Arigueti impeacaaguishetaquempa pignonoro taaca opajitapae, pincantomajajit-sitempari. Inquemisantaquempigueti irovashiantaquerogueti ipeacaaguishetacaca pimpeacotajemparoja maasanopae, aatoquea piquenquejacaajiritsi. ⁴ Irooca aparo savincaguiteri querocagueti incoquempini irampijipijivetaquempiquea oshequi ooqueate, ooqueate, ooqueate, cotanquitsiquea inquenquejanajerogueti incantajempigueti: ‘Ariquea nococani naatimpa, imaica aatoquea noquempetimatajirotsi aisa’, iroosacanica aviatimpa pimpeacotajemparoja maasanopae, aatoquea piquenquejacaajiritsi.”

Iraventamajajitemparigueti Aapani Irioshi iragavejajiquero maasanopae

⁵ Irirajia itigarancanejia icantajiguiri Amajirote:

—Notsajivecaquea yagavejamajati Aapani Irioshi cotanquitsiquea imaica nonintajiquea pitsatacaamajajiaquena naventamajatatantajianaquemparica.

⁶ Yacanaquequea iriatimpa icantajiguiri:

—Arigueti pavenquitiguemparo capichaji iragavejane Aapani Irioshi, ariquea pagavejajiaquequea pincantaquitigueroquea ocativa inchato: ‘lintsijate pintsojajanaquempaja, poanaquequea pincatijatapojaque inirojaniqui quentijani’, pagavejajiaqueroqueate oanaquequea.

Quero incoquempani yashintajitaca

⁷ “Pameneja aviatimpajia, inchoocategueti aparo pashincaca iriaquerasanoquea arejetapojajatsi ishiacoguitini piniganquitejirequi, irooca iquempoguijaquempiriquea pigaapironcaarite, ¿arimpate paavajeriquea pincantavajeri: ‘Caacatequetija, pisavicapojaje acaniqui pishecatapojajempaquea’? Aatoshinete. ⁸ Manaqueate pincantajavajeriquea: ‘Pintipojajenaja nosheca, pinetsanaquempaja pojocacotsitenaroquea, noshecatavaquempa, nomiravaque. Coajica nonteroncanaquerogueti, ariquea pishecatsitajempaquea aviatimpa, pimiravajequea.’ ⁹ Iroompaquea pinteroncanaajerogueti ¿arimpate pincanqueri: ‘¡Ooshia! Noshinevaecaquea namenaquempigueti pinetsanaqueroquea nocanquempica’? Aatotarite picantiritsi. ¹⁰ Aviatimpajia pinquempejiaquempaquea, pinetsanamajajiaquerogueti maasano icantajiaquempica Aapani Irioshi, manaquea pincantajiaque: ‘Naroguentijia yashintajitaca, teequea onchoocatimateji naventacojiaquempameca, manaquea nonetsanajiaquero intati inintacaajiaquenaca ashinquenaca.’ ”

Jesoshi ipeaguetajiriquea 10 avejancaripae

¹¹ Iroompaquea yoanaquequea Jesoshi Jerosarequi, yoantanacaroquea ocaraguetapojigueti Samaria aisa Garirea. ¹² Ariquea yarejetapojacaroquea ichoocajiguigueti itsipapae, itonquivojajivacari avejancaguetatsica icarataque 10, cotanquitsiquea teequeate inquempejiquempejiitempariji manaqueate ichoocajiaque tiijai. ¹³ Icajemajianaquequea:

—¡Jesoshii, Tsatacaantantatsica, pimpintsatacogajoitenashiatsi!

¹⁴ Iquemajiaquerigueticquea Jesoshi icantajiguiri:

—Poapoaitanaquequea ponigaajiguempariquea saserorotejia.

Yoayoaitanaquequea, ariquea tequeratatiraja incajaranquiguiteteji ariquea icohicoitanaca ipeaguetanajaquea. ¹⁵ Iroompaquea ichoocaque aparo yamenaquegueti ipeanajaqueate, icoraquetajiquea ishinevempojacariquea Aapani Irioshi inirojencaqueate icanca, icanque:

—Caaviji yagavejamajatiquea Aapani Irioshi.

¹⁶ Iguerovempojacariquea Jesoshi itaquivopojacaquea quepatsiqui yonigaantantacaca arimajaca ishineventamajatacari. Icanqueri:

—Arioteesaa —yamenajitarite yovejairi.

Iriatimpa iriguenti Samariaquitica. ¹⁷ Icanque Jesoshi:

—¿Arimpate teequea maasano impejaiguempaji carajianquitsica 10? Jeroquea aparo coraquetajatsi. ¿Quericampate itsipajia 9 imaica? ¹⁸ Iricaticaquea iricatica iriguenti teeca irioquea jorio coraquetajatsica ishineventavaetapojacari Aapani Irioshi. ¿Arimpate aparo ichoocaque iriatimpa?

¹⁹ Iroompaquea ipitsocashitanacariquea iriatimpa icanqueriquea:

—Pincatianaje poanaje. Pavempojana naatimpa, pitsaquetari nagavejaque nompejaempi, jeroqueate pipeantanajaca.

Jac imajirontaca Aapani Irioshi

(Mt. 24.23-28, 36-41)

²⁰ Iriraquea pariseojia icoacojiaqueriquea Jesoshi icantiriquea:

—¿Querocaqueate impariantanaquemparoca Aapani Irioshi incapiocantajajajica impeaquempaqueate Amajiromajate acaniqui quepatsiqui?

Icanque iriatimpa:

—Aatoquea quericaca amenimatiroca imaica, teetarite iramenajiteroji. ²¹ Aisa aatoquea quericaca agavejatsineca incanque: ‘Jeroquea ocatica’, irooca incanque: ‘Jero ontatica.’ Jac imajirontacatarite Aapani Irioshi imaica aviatimpajiaqui.

²² Ariquea icantiriquea itsatacaanejia:

—Aapojempauea pinintantajavetaquempaca pinejerome apajencaro savincaguiteri ironigaimojiaquempimeca Irijanite Caquinte, cotanquitsiquea aato pinejiro.

²³ Inchoocatanaquequea cantanquitsineca: ‘Jeri ocaniqui’, irooca incanque: ‘Jeri ontaniqui’, cotanquitsiquea aatoquea poapoaititsi. Incantajavetaquempiquea: ‘Jameshiatsi’, aatoquea poguijatiritsi. ²⁴ Pamenajiguiroquea careti querocaquea ococani otimemequigueti, teequea capichajaniqui ontimemecaguiteteji, maasanoquea otimemecaguitevaetanaqueroqueate. Ariquea inquempetaquempaquea Irijanite Caquinte incoraquetajeguete, maasanoquea iramenamenaitavajeriquea.

²⁵ Cotanquitsiquea iroquetitaquea irantsipevaequemparoquea taaca opajita, incatsimajitaqueriquea incantajiquequeate: ‘Teetarite irioquea agamajajavetacaca.’

²⁶ “Ariqueate incoraquetajeguete irira Irijanite Caquinte onquempetajemparoquea ichoocavetaniguete Noeni. ²⁷ Ariquea iriatimpajia manaquea ishecajiaca, imirajiacaca, imanquigajiacaca, aisa yojocantajiaqueroquea irorijanijiate imanquigajitacaroquea, teequea intsatimajigueji irooshipoji interoncajiaguempaquea. Ariquea niganqui aapojacaquea savincaguiteri iquijantanacaca Noeni intompoguiqui quenajarontsiqui, iroompaquea otejanaquequeate incani, amaranaquequea, anaacoguetanaqueriqueate maasanopae, iteroncajiaca yojocajajiacaca.

²⁸ “Ariquea oquejetaca aisa ichoocavetaniguete Iroteni. Ariquea iquempejiacaquea iriatimpajia ishecajiaca imirajiacaca, ivegarajiaquequea yojocantaguetaquequea, ivintyacajiaque, aisa ipeacaajiacaquea tsovironaquipae. ²⁹ Cotanquitsiquea aapojacaguetiquea savincaguiteri isotoantanacaroca Iroteni Soromaqui, yasacaraashiqueriquea Aapani Irioshi paamari oconoacaroquea asopiri oquenapojiquea jenoqui inquitequi, otsiajiaqueriquea maasano Soromaquitica, oteroncamaajiaqueriquea, teetarite inchoocatomajiaje aparo.

³⁰ “Ariqueate onquempetajempaquea ironigaantapojajempaguete Irijanite Caquinte.

³¹ Oratica savincaguiteri quericaca choocatanquitsineca sotsiqui omencotapojacaguete itsovironaquitequi ovancaitoqui, choocaguete yashintaguecaca intompogui, aatoquea yaguijitapanajanti iraguepanajantero. ³² Pinquenquejajajerojate imanquigare Iroteni aatonijite piquempejigarotsi iroatimpa. ³³ Quericaca teeca irininteji irantsipevenquenaquea irooca irimetojavenquenaquea, manaquea impeaquempa; cotanquitsiquea iriraquea atsipevenquenanea irooca irimetojavenquenaquea, irioquea iriguenti incoquempaniquea inchoocaguiteni.

³⁴ “Imaicaquea noncantajiaquempi: oraquea noncoraquepojjajeguete intsipatavacaaquempa mavite irinorijajiaquempa, aparo irajaitanaque, iriraquea itsipa irojocajitanaqueri. ³⁵ Ariquea onquempejiaquempaquea mavite manquigarentsi ontsipatavacaaquempa ontsinacaguijiaque, aparo irajaitanaque, oraquea otsipa irojocajitanaquero.

³⁶ Ariquea inquempējaquempa aisa mavite shirampari intsipatavacaaquempa niganquitejiqui, aparo irajaitanaque, iriraquea itsipa irojocajitanaqueri.”

³⁷ Iquemajavaquerigueti icanqueca icoacojiaqueri icantiriquea:

—Nomajirote, ¿querocaquea onchoocaqueni?

Icantiriquea iriatimpa:

—Querocagueti irojoquijiquempani metojatsica, aritaque oraniqui intirorencashiji-apojempari sheetyaoni.*

18

Metojacoro aisa joese

¹ Iriraquea Jesoshi ininque intsatacaajiaqueriquea iramanajiaqueri Aapani Irioshi incantacoguitempaniquea aato ipega. Iquejetacaajiacanariquea. ² Icanque: “Ichoocaque aparo jivatatsica joese teeca intsarocaguempariji Aapani Irioshi, aisa teeca impintsatocotempariji caquinte. ³ Ariquea ochoocaque aisa oraniqui aparo metojacoro. Iroatimpa ocantacoguitaniqua oashipiniqueri jivatatsica ocanqueriquea: ‘Pompeta-cotenashiatsi, chooca catsimatashitaquenaca.’ ⁴ Iroaqueraguete teetarite irinintavetem-paji inquemisantero, cotanquitsiquea coajica iquenquejapojiroquea icanque: ‘Teetarite nontsarocaaavetempariji Aapani Irioshi aisa teequea nonpintsatocotempariji caquinte, ⁵ cotanquitsiquea oocaniqueate ocoraquetashiquenaquea asereavaequena. Imaicaquea imaica nonquemisanqueroqueate nonpetanaquemparo aatonijite asereajanatsi, nocat-simatirotsi.’”

⁶ Iroompaquea icanque Amajirote: “Pinquemero icanqueca jivatatsica teeca incameetsateji. ⁷ Iriompaquea Aapani Irioshi caaviji irompejiaquempariquea icoguijia-queca amanajiguirica cantacoguitatsica. ¿Arimpate aatoquea yamitacoguiquiriquea? ¿Arimpate incantapiniqueri: ‘Aatota’? ⁸ Noncanquempiquea irompetsitempariquea taampina. Cotanquitsiquea oraquea incoraquepojajeguete irira Irijanite Caquinte, ¿ari iramenajiapojajeri acaniqui quepatsiqui tsaromentamajajigarica?”

Pariseo aisa capiocapinitinirica majirontatsica imentaquipae

⁹ Iroompaquea Jesoshi iquempetacaajiacariquea irirajia aventacotatsica amenajiave-tanquitsica yanaajiaqueri igonorolja itsaromentajiacariguete Aapani Irioshi, icanque: ¹⁰ “Mavite shirampari yoayoitanaquequea teemporoqui itsaromentantajitarica Aapani Irioshi iramanajiaqueriquea. Apara iriguente pariseo, iriraquea itsipa iriguente ca-piocupinitinirica majirontatsica imentaquipae. ¹¹ Iriraquea pariseo icatiapojacaque-ate yamanamampeacariquea Aapani Irioshi icanque: ‘Irioshimajaca, noshineventama-jataquempiquea oshequi, pagavejacaquenaqueate, teetarite nonquejetempariji itsi-papae, ipeacaaguishetacaqueate taaca opajitapae covaequisherentsi, iconoacaqueate yaitsitantagequequeate, itsipa icanatsatocotantaque manquigarentsiqui. Teequeate nonquempejiguempariji irintatica capiocupinitinirica majirontatsica imentaquipae. ¹² Nocantacoguitani aapojajaguete 3 savincaguiteri nosanticotaquiti teequea noshe-catempaji nonquenquejamajuempiniji. Aisa nojocagaranquempiquea taaca opajita-pae nashincaca iroaquerapaetica. Naaqueguete 10, nojocajempi aparo.’

¹³ “Cotanquitsiquea iriraquea capiocupinitinirica majirontatsica imentaquipae icati-apojaca oraniqui irooshipojiguete sotomorontsi. Ipashivenca, teequea iramenimateji jenoqui inquitequi, ariguentequea itinquitinquineguintanaca yonigaantantacaca ishi-mampojancavaeca, icanque: ‘¡Irioshimajaca, pimpintsatocotenashiatsi, naroguentiquea covaequisheretsica!’

¹⁴ “Imaicaquea noncamantajiaquempi iriraquea capiocupinitinirica majirontatsica imentaquipae irioquea iriguente ishinevenca Aapani Irioshi, ariquea yoanajiguete itso-vironaquitequi meshiacaquea. Cotanquitsiquea iriraquea pariseo teetari irisheteneriji,

* 17:37 Quejetaca yamenajiqueri sheetyaoni intirorencashijiapojempari metojatsica, ariquea onquempetaquempa incoraquepojajeguete Quirishito, aato isenacapoja, maasanoquea iramenajjavajeri. Pamenero Mt. 24.28.

maasanotari aventacotatsica iroguipashivenqueriqueate Aapani Irioshi oncoramanivae-tapojajeguete. Maasanoquea teeca iraventacotempaji caaviji iranaacaajeriqueate Aapani Irioshi oncoramanitapojajeguete.”

Jesoshi yamanacoventajiaqueriquea chaajaniquiripae

(Mt. 19.13-15; Mr. 10.13-16)

¹⁵ Iroompaquea icoraquecoraqueitaquequea itsipapae yamajiapojiniriquea Jesoshi chaajaniquiripae impamijiavaqueriniji. Iriraquea itsatacaanejia yamenajiavaqueriguete yamajiapojiriguete icantomajavaqueriquea.

¹⁶ Cotanquitsiquea Jesoshi icajemajiaqueri chaajaniquiripae, icanque:

—Ariotaquetsija incoraquetetate chaajaniquiripae naatimpaqui, aatoquea pojo-caavaca, ishineventajiacaritarite Aapani inquitequitica irimajirontacotaquempari quen-quejajatsica quempecarica iriatimpaja.* ¹⁷ Iroomajaca noncantajiaquempara: queri-caca nintanquitsineca impejaeri Aapani Irioshi Imajirote inquempetajempariquea chaajaniquitirajaca. Oraquea aatoguete iquempetaritsi, aatotarite iconoapojajari maasano peajiaquerica Imajirote.

Ajaarantavaetatsica

(Mt. 19.16-30; Mr. 10.17-31)

¹⁸ Iroompaquea icoraquepoji aparo majirontatsica icanqueriquea Jesoshi:

—Tsatacaantantatsica cameetsari, ¿queroquea noncoquempani cameetsanijite noncoguitempaninijite nonchoocaguiteni?

¹⁹ Icanqueri Jesoshi:

—¿Queroquea ococani picantantaquenaca ‘cameetsari’? Teequea inchoocateji cameetsari, aparo icoca Aapani Irioshi. ²⁰ Pitsaqueroqueate maasanopae itionca-cotanaqueca Moishishini, ocanque: ‘Aatoja poashitirotsi manquigarentsi, aatoja pime-tojantitsi, aatoja paitsitantitsi, aatoja pitsojeacotantimatatsi, pinquenquejacameetsata-cotaquerija piri aisa piniro.’

²¹ Iriatimpa icanqueri:

—Arimajaca noquempetacaquea imaica noparianacaro nonetsanamajatanaquero-quea maasano nochaajaniquipojiguete narejevaecaro imaica.

²² Iquemaqueguetiquea Jesoshi icanqueriquea:

—Imaica apanivani poanaquequea pojocantaguetanaqueroquea maasanopae pash-intaguecaca, paantaquemparoquea imentaquipae pojocajianaqueneri coguitejacojian-quitsica, pinquejetaqueroguete onchoocataje oganejencaro shinetacajaempineca on-taniqui inquitequi. Ariquea pincoraquetajeja poguijatanaquena.

²³ Cotanquitsiquea iquemitsitaquea icanquerica ariquea icotanaca ishimampan-cavaetanacaquea, iriguentitari ajaarantavaetatsica. ²⁴ Iriraquea Jesoshi yamenavaque-riguete ishimampancanacaguete icanque:

—¡Omanapitsamajataquempariquea ajaarantavaetatsica inquijanaque ima-jirontaguete Aapani Irioshi! ²⁵ ¿Arimpate iragavejaque cameyo inquijanaquequea itepoquiqui quisaatonquiri irisotoanaqueriquea antaqueronta? Aatotarite yagavejitsi. Iriompaquea ajaarantavaetatsica caaviji anaquero omanapitsataquempari inquijanaque imajirontaguete Aapani Irioshi.

²⁶ Ariquea irirajia quemajiaquerica icantajigui:

—Iroosacana, ¿quericampate agavejanquitsineca iraacotacaantavaquempa?

²⁷ Iriraquea Jesoshi icantiriquea:

—Oraquea teeca iragavejeji caquinte, iriraquea Aapani Irioshi yagavejaqueroquea.

²⁸ Iroompaquea icantanaque Peerero:

—Nomajirote, naatimpaja novashiantaguetanaqueroquea maasanopae nashintague-caca noguijaguijaitanaquempi.

²⁹ Icanque Jesoshi:

* 18:16 Irirajia chaajaniquitanquitsica tee iraventacojiguempaji, mana ishineventajiapojacari Jesoshi, iquemisanta-jiaqueri. Ari anquempejiaquempaquea aatimpa.

—Iroomajaca noncantajiaquempica, quericaca jocanaqueroneca itsovironaquite, irooca imanquigare, irioca iriguentijeguitepae, itsijoitepae, iriri, iriniro, irioca irijani-
jiate, irorijanijiate, cameetsanijite irimajirontamajaquempari Aapani Irioshi,³⁰ ariquea
irojocajiqueneriquea otsipapae acaniqui quepatsiqui, caaviji anaavaetanaquero yashin-
tavecaca, ariquea oncoramanitapojajeguete incoguitempaniquea iranijaguiteni.

Jesoshi icamantajajiri aisa irimetojaque

(Mt. 20.17-19; Mr. 10.32-34)

³¹ Iroompaquea icajemajiaqueriquea iriatimpaqui itsatacaanejia carajianquitsica
12, icantiriquea: “Imaicaquea oajianaque Jerosarequi, onetsanaguetanaquempaquea
maasanopae itioncacotaqueca tsavetantajiatsica coramaniqui itioncacojiaqueriguete Ir-
ijanite Caquinte. ³² Iraacaantajiqueri irajaitanaqueriquea ichoocajiaqueguete teeca ir-
ijorijoigueji, irantanaguishevaequeriquea, incantaguishejiaqueri, inquishoquishoavae-
queri. ³³ Iroompaquea impasapasajiaqueri agompiaquitempari ariquea irimetojajia-
queri, cotanquitsiquea aapojajempaguete 3 savincaguiteri intancorejanaje.”

³⁴ Cotanquitsiquea iriatimpajia teequea intsatimajigueji taaca opaji icantacotaque,
teetarite inquemajigueriji. Queroquea incojiaquempani intsatantajiaquempaca,
omanapitsajiacaritari.

Jesoshi yamenacajiri shamponcajatatsica choocatatsica Jericoqui

(Mt. 20.29-34; Mr. 10.46-52)

³⁵ Irooshipojaji irarejetajemparoquea Jesoshi Jericoqui, chooca shamponcajari isavi-
caque ocaravoquitaqueguete yamanantaguetaque imentaquipae.

³⁶ Iquemajivaqueriguete yavisavisaitanaqueguete oshequini caquinteja icoacotsi-
tariquea, icanque:

—¿Taaqueate opajita?

³⁷ Icamantsijitariquea icantajiqueri iriguenti coraquetapojatsi Jesoshi Nasarequitica.

³⁸ Icajemitsimajatanaca:

—¡Jesoshii, Ichoviquitanaqueca Taavini, pimpintsatacotenashiatsi!

³⁹ Irirajia jivajivaitapojirica Jesoshi icantavetariquea irisanticotanaquenijite, cotan-
quitsiquea iriatimpa arimpaqueate icajemitsimajatanaquea:

—¡Jesoshii, Ichoviquitanaqueca Taavini, pimpintsatacotenashiatsi!

⁴⁰ Iriraquea Jesoshi ariquea icatiapojaca icanque iramajiqueriquea. Iroompaquea
yamajiqueriquea quempeji, icanqueriquea:

⁴¹ —¿Taaquea pininque?

Icantanaquequea iriatimpa:

—Nomajirote, noninque namenanaaje.

⁴² Icanqueriquea Jesoshi:

—¡Intsija pamenanaajeja! Pitsaquequeate nagavejaque namenacaajempi, paventanta-
quenaca, irootaquequea pamenantanajaca.

⁴³ Irooqueate icantaquitiguiriri ariquea icotanaja yamenanaji, ariquea yoanajiquea
yoguijatanakeri, ishineventavaetanacariquea Aapani Irioshi oshequi, icanque:

—Caaviji yoganejencamajata Aapani Irioshi.

Ariquea iquempejianaca maasano amenamenaitavaquerica ishineventajianacariquea
Aapani Irioshi.

19

Jesoshi aisa Saqueo

¹ Iroompaquea yarejetapojaca Jesoshi Jericoqui icantanacaroquea ocapiocaguete tso-
vironaquipae. ² Ariquea ichoocataque oraniqui aparo ajaarantatsica ipajitaquea Saqueo.
Iriguenti jivajiguirica capiocapinijiguinirica majirontatsica imentaquipae. ³ Iriatimpa
iquemacoqueriguete Jesoshi ininquequea iramenaqueri, cotanquitsiquea querocam-
pate incoquempani iramenaqueriguete, yomporoguijaventavaetanacariqueate itsipapae
igonorojia yojocajiaqueriquea, iriguentitarite chaamorintejaniqui. ⁴ Ishiitsitanaquea

tijacoñaji oraniqui querocaguete iroanaquenuquea Jesoshi, yataitsitanacaquea inchatoqui cameetsanijite iramenavaquerinijite. ⁵ Iroompaquea yarejetapojacarogueti Jesoshi ichooaquegueti ipivancajanacaquea jenoqui, icanqueriquea:

—Saqueo, paguijitaipojequea. Aviguentiquea nomaimoque.

⁶ Isoaanquitsipojacaquea ishinetanaca itsipatanacariquea Jesoshi itsovironaquitequi.

⁷ Yamenajivaqueriguete maasano yoanaqueguete icantimanajianaqueriquea icantava-caajianacaquea:

—Querocaqueate icocani Jesoshi icantanacaquea irimaacotapojaqueeriquea itsovironaquitequi covaeguishedatsica.

⁸ Oraqueate ichooajiaqueguete itsovironaquitequi icatiitsitanacaquea Saqueo icanqueriquea Amajirote:

—Iintsija pamene, Nomajirote. Maasanopae nashintaguecaca naatimpa nojocagaran-tajiaqueneriquea teeca irashintajiguempaji, nojocavajeneriquea niganqui. Quericaa ivegaracaguete imentaqui namatavijaquerica itsipa, imaicaquea imaica nojocajeneriquea, cotanquitsiquea nanaacaantajempariquea nojocajajeneriquea. Ivegaracaguete aparo imentaqui namatavijaquerica, nojocajeneriquea oshequi 4. Ivegaracaguete 10, nojocajeneriquea 40.

⁹ Iiraquea Jesoshi icanqueriquea:

—Imaicaquea imeshiajitiriquea choocatantajigaroca ocانىqui tsovironaqui, irooriji iquempetanajari Averaameni choviquitanaquerica, ariquea iquempetajiriquea iriatimpa itsaroverantiguete Aapani Irioshi. ¹⁰ Irootaquequea icoraquetantacaca Irijanite Caquinte, iramenaguetajateri peajavetanquitsica irajajateri.

Jesoshi iquempetacaacari caquinte ashintajiacarica caraquisequitirica imentaqui (Mt. 25.14-30)

¹¹ Iiraquea omporoguijavencarica Jesoshi iquemisantajiaqueriquea iquenquetsatacaqueriguete Saqueo, itsajiaquetarite irooshipoji irarejepojaquempa Jerosarequi, iquenquejajiaquequea ijiqueji irooquea yoashitanaque impeaquempaquate imajirojiate, ijijiaqueji irooshipoji irimajirontapojempa Aapani Irioshi ocانىqui quepatsiqui. Cotanquitsiquea iriatimpa irooriji itsaque, ariquea iquejetacaaca, ¹² icanque: “Ichoocaque aparo anaantatsica, ariquea iroavaetanaquequea osamani ontانىqui otsipaqi quepatsiqui ichooatiguete majirontamajatatsica cameetsanijite impeacaavajemparinijite irimajirontacaavajempari, aapojajempaguete incoraquetaje ichooatiguete ari irimajirontapojempa. ¹³ Irootapojiguete iroanaque, icajemajiaqueriquea 10 iromperarepae yashintajiacaca, yojocajianaqueneriquea maasano apashimentaqui icantajitica mina,* icanajiaqueriquea: ‘Jeri iricatica imentaqui nojocajianaquempica poganencajerija, inchiqiojitarite pamenajiaquequea aviatimpajia querocaca pincojiaquerini paantajajempariquea itsipa, ariquea noncoraquepojjaguete namenajiapojajempiquea querocaca incarashequianaquenuquea paajiajeca.’ ¹⁴ Cotanquitsiquea iriraquea igonorolja teequeate irinintajigueriji, isemajiacari, itigarancajiaqueriquea itsipajia incamantajiaquiteri peacaajiaquemparineca majirontatsineca, incanqueriquea: ‘Teetarite nonintajigueti impeaquempaquate irira nomajirojiate.’

¹⁵ “Cotanquitsiquea arimpaquate ipeacaajicariquea majirontatsica, iroompaquea icoraquetaji ichooatiguete. Ariquea yarejetapojaja icajemajiapojajiri irashijia yojoquimojianaquenuca imentaquitsite iramenapojajeriquea querocaca icarashequianaquenuca yaajiaqueca itsipapae. ¹⁶ Ariquea icoraquepojjiquea aparo icanqueriquea: ‘Nomajirote, iriraquea pimentaquitsite pojocanaquenuca apamentaquitiro mina icaraveca, imaica naaji itsipapae, icaravaeque 10 naajica.’ ¹⁷ Icanqueriquea iriatimpa: ‘Cameetsavaequequea, nomperare, pinetsanaqueroquea ocatica capichaji nocantanaquempica. Imaicaquea nompeacaquempija imajirojiate choocajiatatsica 10 guintenintspaequi.’ ¹⁸ Ariquea icoraquepojjiquea itsipa icantapojajeri: ‘Nomajirote,

* 19:13 Apashimentaqui mina ivegaravaeque coramani. Iramijiqueriguete itsipa maasano savincaguiteri qui arejevaetemporoquea 3 taai, ariquea irivegaraqueneriquea apashimentaqui mina. Apashimentaqui mina iquejetacariquea 100 iraquima. Iramijiqueriguete itsipa apajencaro savincaguiteri, irivegaraqueneri apashimentaqui iraquima.

iriraquea pimentaquitsite pojocanaquenaca apamentaquitiro mina icaraveca, imaicaquea naaji itsipapae, icaravaeque 5 naajica.’¹⁹ Ariquea iquejetaqueriquea iriatimpa icanqueri: ‘Imaicaquea aviatimpa nompeacaaquempija imajirojiate choocajatsica 5 guinteninintsipaequi.’

²⁰ “Cotanquitsiquea itsipa icoraquevetapojaca icantapojaqueri: ‘Nomajirote, jeri iricatica pimentaquitsite. Nampiguiricacotsitajimpiriquea paañoqui noquempoguijajiri.²¹ Notsarocaaquempitarite namenimpiquea aviguenti catsimatantatsica, paashigüecariquea imentaquipae intati teequea taaca opajita panteji, aisa paitsitantagueque teeca pashinquempaji.’²² Icantanaquequea iriatimpa: ‘Aviroveca amitacovetanaca, cotanquitsi tee pincameetsateji. Inchiquiojiquea piquempetacaanca aviatimpa piquenquetsataquegueti imaica.’²³ Queroquea ocoani teequea paanaqueriquea nomentaquitsite pojocaquenerime vegaratantatsica iraatajemparinijite itsipapae, iroompaquea pojocavajenarimequeate nocoraquevetajaguetei imaica. Irooqueuea pamenanaguetei naroguenti catsimatantatsica, naashigüecariqueate imentaquipae intati teequea taaca opajita nanteji, aisa naitsitantagueque teeca nashintempaji.’²⁴ Iroompaquea icantajiguiri choocajianquitsica oraniqui: ‘Paapitsateriquetiro iricatica nomentaquitsite pojocajigueneriquea oganencajirica 10.’²⁵ Cotanquitsiquea iriatimpajia icantiriquea: ‘Nomajirote choocatarite irashi 10.’²⁶ Yacanaquequeate iriatimpa icanque: ‘Noncanquempiquea quericaca aamajatanquitsica, caaviji irojocamajajitaqueneri, cotanquitsiquea iriraquea teeca irashintempajiquea, capichajaniquiquea yashincaca iracaitsijiquempariqueate.’²⁷ Imaicaquea imaica irirajia catsimajiaquenaca teeca irinintajigüeji nompeaquempaquea imajirojiate, pamajiaqueriquea ocانىqui pimetojajiaqueri.’”

Yarejetapojacarouquea Jesoshi Jerosarequi

(Mt. 21.1-11; Mr. 11.1-11; Jn. 12.12-19)

²⁸ Coajica iteroncanaquerogueti Jesoshi iquenquetsavaetaquegueti iparianajaro iroanaquequea Jerosarequi, iriquetitaquea oananquitsi. Yagatsonquivaetanaji.²⁹ Iroompaquea irooshipojigueti irarejerejeitajempaquea Vetepajequi aisa Vetaniaqui irooshirooshitacotacarouquea Orivotsempi, itigarancaquequea mavite itsatacaane, icantajiaqueriquea:

³⁰ —Poanaquequea ontaniqui quempeji guinteninintsiqui, ariquee pamenajapojeri oraniqui aparo aashino irijanigantirenajaniqui ishiticacojiqueca, tequerataqueate irishi-ashiavijitacotantajitempariji. Pishiticarejacojiaqueri pamajiaquenari.³¹ Choocaguetei cantajiaquempineca: ‘¿Taaquea pishiticarejacotantacarica?’ aviatimpajia pincantajigüeri: ‘Iriguenti coacotacari Amajirote.’

³² Yoayoaitanaquequea ariquee yamenajapojiri shiticacoca.³³ Irooqueuea ishiticarejacojianaquerigueti icantajiguiriquea ashintajigarica:

—¿Taaquea pishiticarejacotantacarica aashinogantirenajaniqui?

³⁴ Iriatimpajia icantiriquea:

—Iriguenti nintaqueri Amajirote.

³⁵ Iroompaquea yaajianaqueriquea yamajiaqueneriquea Jesoshi. Isavomititsajiaqueriquea iitsaarepaequi cameetsanijite irisavicaquenijite. Ariquee yatsomajajiaqueriquea yoguisavicaajiaqueriquea.³⁶ Ariquee ishiacotanaca yoanaquequea. Irirajia omporoguijaventajavacarica imaroncaashijiaqueriquea iitsaarepaequi quenavoquirontsiqui ishivoquitantanacaca.³⁷ Oraquea irooshipojigueti oguirincaguetei Orivotsempiqui maasanopae quemisantajiaquerica isaquiriaventajianacariquee, ishinejianaca icanca, iririjencani yoanaquero ishineventajianacari Aapani Irioshi iroorijite iquenquejanaqueroquea yonigaantaguequeca Jesoshi oacaantantatsica intati.³⁸ Icantajigüi:

—¡Intsishiatsi irishineventajiquempari Amajirote coraquetapojatsica itigarancaqueca Majirontamajatsica!

—¡Oganejencaguitevaeca inquitequi! ¡Caaviji yoganejencamajataca Aapani Irioshi choocatatsica jenoqui!

³⁹ Iroompaquea iconoagarancaqueate pariseojia choocajianquitsica oraniqui icantiriquea Jesoshi:

—Tsatacaantantsica, pincantomajeritsijate gujatacojiaquempica.

⁴⁰ Cotanquitsiquea Jesoshi icantiriquea:

—Noncanquempiquea, arigueti irimajerejigue irirajia, irooqueate cajemajiananquitsineca mapi oshineventajianaquenaquea.

⁴¹ Iroompaquea yaapojaqueroqueti quempeji yamenacopojiroquea Jerosare, iracotsijigari choocatantajigaroca, ⁴² icanque: “¡Imaicaquea imaica choocatirajanaguete ocaniqui nonintaveca pintsajigueme quero pincojiaquempani aatonijite icatsimajiguimpitsi Aapani Irioshi! Cotanquitsiquea imaicatari omanapitsajiaquempi. ⁴³ Aapojajempaguete oncoramanitapojajeguete pantsipevaejiaquempaquea, inco-raquecoraqueitashijiaquempiquea catsimajiaquempineca iranquitacojiapojaquempi intantotacojiapojaquempi irashimirintsitempiquea. ⁴⁴ Irampeguitejajiaqueroqueate maasanopae mapi ipeacaantajicaroca piguintenitantajiacaca, irimetojajiaquempiquea. Ontariavaetanaquempaquea isavi, aatoquea ogataavitajatsi apapiro. Onquejetaquempaquea irooriji aavepojaca icoraquetantaquitacaca Aapani Irioshi incavintsajiaquitempiquea, cotanquitsiquea aviatimpajia teequea pintsajiavaqueroji.”

Jesoshi yoguivorocajiaqueri jocantantajivecaroca teemporoqui

(Mt. 21.12-17; Mr. 11.15-19; Jn. 2.13-22)

⁴⁵ Iroompaquea yoanaquequea Jesoshi teemporoqui itsaromentantajitarica Aapani Irioshi iquijavepojacaro oniganquirequi oticaacoroqui, yamenajiapojiri jocantantajiaquequea, yoguivorocajiapojiriquea, ⁴⁶ icantiriquea:

—¿Arimpate tee ontionquempaji: ‘Oratica notsovironaquite incantacojitero iroguenti ashi incoraquetantapinijitempaca iramanajiaquenani?’[☆] Cotanquitsiquea aviatimpajia manaquea pipeacajaiacaro imoro itsititantaca aitsitantajiaatsica.[☆]

⁴⁷ Ariquea icantacoguitani savincaguiteri qui itsatacaantaguitiniquea Jesoshi teemporoqui. Cotanquitsiquea irirajia saserorotejia anaantajianquitsica, irirajia tsatacaantajiguiroca itioncacotanaqueca Moishishini, aisa jivajiguirica caquinteja inintajiaveca irimetojacaanquerime. ⁴⁸ Cotanquitsiquea teequea iragavejajigueji querocampate incojiaquerini, maasanojia ishineventajiacariquea iquemisantajiavaqueri.

20

Icoacojitaqueriquea Jesoshi taate tigarancaqueri

(Mt. 21.23-27; Mr. 11.27-33)

¹ Ariqueate itsatacaantavaequequea Jesoshi oniganquirequi teemporo, itsavetacotaquero Quenquetsatsarentsi Oganejencatatsica. Iroompaquea icoraquecoraqueipojiquea saserorotejia anaantajianquitsica, itsipatsipaicariquea tsatacaantajiguiroca itioncacotanaqueca Moishishini, icoraquejiaquequea aisa jivajiatsica, ² icantajiaquaqueri:

—Iintsija pincamantenajate. ¿Taaqueate cantaquempi pinquejetacaaqueroquea imaica poguivorocajiaqueriquea jocantantajiguirica viratsipae? ¿Taaquea tigarancaquempi?

³ Iriraquea Jesoshi icantiriquea:

—Ochooacque noncoacojiaquempica naatimpa. Iintsija pincamantajiguenaja:

⁴ Iviñacajatantiguete Joancani, ¿queroquea oquenapojini? ¿Irooca oquenantapojaca inquite? ¿Irioca oquenantapojaca caquinteja?

⁵ Irooquea iquemajiavaqueguete iquenquetsatavacaajianaca icantajianaque: “¿Querote ancoterini? Ancantsivetempariguete oquenantapojaca inquite, iriatimpa incantanaque: ‘Iroosacanica ¿queroquea ococani teeca pinquemisantantajiguempariji?’

⁶ Arigueticaja ancantajiavequempariquea iriguente tigarancaqueri caquinteja, intsinatsinavaetacaji maasano omporoguijajianquitsica, maasanotari icantajiaque irira Joancani iriguente tsavetantatsica itigarancaqueca Aapani Irioshi.”

⁷ Jero icantantajiacaca:

—Jmm, taaca tigarancaqueri.

☆ 19:46 Is. 56.7. ☆ 19:46 Jer. 7.11.

⁸ Ariquea iriatimpa icantiriquea:
—Iroosacánica, ariqueate nonquejetaquempaquea naatimpa, aatoquea nocamantimpitsi quericaca tigarancaquenaca naatimpa.

Jesoshi iquempetacaajiacariquea quempoguijvetaroca ovaitsoquimashi
(Mt. 21.33-34; Mr. 12.1-11)

⁹ Ariqueate iparianacaroquea Jesoshi iquenquetsatacaajianaqueriquea maasano, cotanquitsiquea manaquea iquejetacaajiacanari, icantiriquea:

—Ichoocaque aparo caquinte imiashiaqueroquea ovaitsoqui itsitacancaroquea apamantanejiro iniganquitejire, iroguenti igomaroncaaque. Coajica icajemajiaqueriquea itsipapae irishiacojiaqueneriquea. Oraquea onchoocatanaquegueti, irojocagarantajiaqueneriquea iriatimpa. Iroompaquea yoavaetanaquequea osamani, ichoocaguitini ontaniqui. ¹⁰ Ocoramanivaetapojigueti aapojajagueti osamparipiotantanacaca ovaitsoqui, itigarancavecariquea aparo itigarancuica iramanajiajateriquea irojocagarantajiajenerime iriatimpa, cotanquitsiquea iriatimpajia itavatavaajiaqueriquea itigarancajajiri intati, teequea irojocajiajeneriji capichajaniqui. ¹¹ Iroompaquea iriraquea ashincaroquea itigarancajiquea itsipa yashincaca. Ariquea iquejejiavaqueriquea iriatimpa, itavatavaajiaqueriquea, icaveaqueri, itigarancajiri intati ejempaconi. ¹² Ariquea itigarancuistsitajiriquea aisa itsipa, cotanquitsiquea iquitenteatantavacariquea ipishoncaquitiri.

¹³ “Iroompaquea icantsitaquea ashincaroquea iguepatsite icanque: ‘¿Querocaquea noncojiaquerini imaica? Iintsija iriompate iriguenti nontigarancaquequea irijani nopintsamajatacaca, irioaqueate intsarocajiaquempaquea.’ ¹⁴ Cotanquitsiquea iriatimpajia irooquea yamenajiaquerigueti icoraquepojaquegueti iquenquetsatavacajianaca icantajianaquequea: ‘Jeeri irintatica ashinquemparoneca maasanopae irime-tojanajeguete iriri. Jamequetiroshiatsi ametojajiaqueriquea cameetsanijite aatimpajia ashintamajatajemparonijite.’ ¹⁵ Ariquea yaitsijianacari yaajianaqueri acaqueroca otantotacotacaguete ovaitsoquimashi, imetojitsitari.

“¿Imaicaquea querocaquea incojiaquerini ashincaroquea iguepatsite? ¹⁶ Manaqueate iroashijiaquiteriquea irimetojajiaquiteri, itsipapae incajemajiaquequea quempoguijajenerineca iniganquitejire.”

Iquemajiaqueriguete icanqueca icantsijigariquea:

—¡Oo, aatoquea!

¹⁷ Cotanquitsiquea Jesoshi yamenajiaqueriquea icanque:

—Iroosacánica, ¿taaquea ocantacoque Itioncacaantaqueca Aapani Irioshi ocanguetu ocatita?:

‘Oraquea ogota mapi teeca irishineventajiavetempaji peacaajiacaroca mapipanco, opeanacaquea anaantamajatanquitsica quishotacaaqueroca.’

¹⁸ Quericaca omposaquemparoneca ocatita mapi incampojemparo jarare jarare, cotanquitsiquea quericaca ontsinacaqueca ompitsarepitsarejatanaqueri.*

¹⁹ Ariquea irirajia saserrotejia anaantajianquitsica aisa tsatacaantajiguiroca itioncacotanaqueca Moishishini irooquea iquemajiaqueriguete icanqueguete Jesoshi icatsimatsijianacaquea, inintajiaveca irajianaquerime, iquemajiaqueriqueate iriguentejia iquejetacaajiacaquea, cotanquitsiquea itsarocajiacari omporoguijajianquitsica.

Icoacojiqueri Jesoshi cameetsavaequempa irojocajiqueneri Sesa imentaquipae
(Mt. 22.15-22; Mr. 12.13-17)

²⁰ Ariquea itigarancajiaqueriquea itsipapae iroaroaitanaque impeamampeajiaquempaquea arimajacaca inintamajiaque intsajiaquequea, incoacojiaqueriquea Jesoshi iramenajiaqueri querocaca incanque, iroompaquea incanqueroguete taaca opajita, irooquea iroguinajiaquempaquea irajianaqueneri iramajirore Sesa incatsimatantaqueriquea. ²¹ Irootaquequea icoacotantacarica icanqueri:

—Tsatacaantantatsica, notsajiaquempiquea aviatimpa teetarite pamataguempajiquea, pitsatacaantaqueguete teequea quericaca pagamajempaquea, teequea pincanteji:

* 20:18 Oraquea mapi irioquea quejecaro Jesoshi. Oraquea otsinacaqueca opitsarepitsarejatanaqueca iriojia quempecaro caarica shineventavacari Jesoshi. Ari inquempetacaajitaquempari incatsimamajajitaqueri.

‘Inchiquiojitaja iquemajiguiti itsipapae.’ Pitsatacaantigueti tampaticaquea poaquero picamanquerigueti queroquea incojiaquempani irinetsanajigueroniji inintaguetic Aapani Irioshi. ²² Pitsatiroqueate icanqueca majirontatsica Sesa icanquegueti maasanojia jorio irojocagarantapinijiaqueneri imentaquipae. Imaicaquea ¿quero ca pincanteni? ¿Cameetsampa nojocajiaqueneri, aricaca tee oncameetsateji?

²³ Cotanquitsiquea Jesoshi itsatavaqueroquea teequea cameetsa incantajigueti, manaquea ishinetamampeajiaqueate intati, irootari icantantajiacarica:

²⁴ —Iintsijate pamaquenarija apamentaqui tenario,[†] nameneritate. ¿Taa ipajita iricatica ivaantorijiqueca? ¿Taaquea ashintaro ivajiro tioncanquitsica?

Icantiriquea:

—Iriguenti majirontatsica Sesa.

²⁵ Iroompaquea icanque iriatimpa:

—Iroosacanic, pojocajiajenerijate Sesa yashincaca iriatimpa pinetsanati-menqueroniji icanqueca, aisa pinquejetacaajiaquempariquea Aapani Irioshi, pinetsanamajiaqueroja maasanopae icantaguequeca.

²⁶ Teequea iragavejajigueti incomitsatacaguempariji. Iocani iquemajiaquerigueti maasano tampatica inetsanaquero. Ariqueate yamenamenaitanaquequea intati coacociavecarica, yamenajiaqueriquea itsamajati, ariquea isanticosanticoitanaque.

Icoacojitaqueriquea Jesoshi quero oncoquempa intancoretancoretanajegueti oncoramanitapojajegueti

(Mt. 22.23-33; Mr. 12.18-27)

²⁷ Iroompaquea irioquea oahoaitananquitsica saroseojia iramenajiaquiteriquea Jesoshi. Iriatimpajia iriguentiquea cantajiatatsica aatoquea itancorejajianaji metojajiatatsica.

²⁸ Icantantajiapojacarica:

—Tsatacaantantatsica, iriraquea Moishishini itioncanaque coramani paperiqui icanque inchoocaquegueti caquinte teeca irijanintempaji, aapojempagueti irimetojanaquegueti irojocapanajantero imanquigare, choocagueti iriguentijeguite irioquea manquigatajemparone irijanintacajaemparoquea quejetaja irioca irijanintajari metojanquitsica. ²⁹ Coramani ichoocaque aparo nogonoro irijanintacaquea 7. Iriraquea parianquitsica imanquigavetacaroquea manquigarentsi, cotanquitsiquea niganquiquea imetojaque teequea irijanintacaguemparaji. ³⁰ Iroompaquea irioquea manquigavetajaro itsipa oguijatirica. Ariquea iquejetacaquea iriatimpa imetojanaji, teequea irijanintacaguemparaji. ³¹ Ariquea iquejetacaquea itsipa niganquitatsica, arimpate iteroncanacaquea maasano imanquigajavetacarogueti, teequea irijanintacajaiguemparaji. ³² Ariquea ometojitsitanaca iroatimpa. ³³ Imaica, iintsija pincantajiguenaja, oraquea oncoramanitapojajegueti intancoretancoretanajegueti maasano metojajavetanquitsica, ¿quericaca manquigamajatajemparoneca? Maasanotari imanquigajiavecariquea.

³⁴ Icanqueriquea Jesoshi:

—Imaicaquea imaica acaniqui imanquigajia shiramparija, ariquea oquempetaca manquigarentsi yojocantajitiro irimanquigajitemparo. ³⁵ Cotanquitsiquea irirajia ishetacojiqueca intancoretancoretanajegueti oncoramanitapojajegueti, iroaroaitanaquegueti ichoocatiguete Aapani Irioshi, aatoquea quericaca manquigatajatsineca, aisa manquigarentsi aatoquea yojocantajitajirotsi irimanquigajitajemparo. ³⁶ Aatotarite imetojimajajitsi, jac tancoretancoretanajitarite. Manaquea inquempajajempari irashivantijitete Aapani Irioshi, aisa inquempajajempari Aapani Irioshi teetarite iramenimateroji imetojane, jac ipeajiaqueri irijanijate. ³⁷ Quejetacaquea itioncanaqueca Moishishini coramani itioncacotaqueroquea iquenquetsataquegueti Aapani Irioshi maequitatsicaqui, icanque: ‘Naroguenti Irioshimajate Averaame, Ishaaco aisa Jacovo.’ Irootaquequea itsatantajitacariquea Moishishini itsaquequea intancoretancoretanajemetojajavetanquitsica. ³⁸ Teequea irio Irioshite metojatsica, iriguentiquea Irioshite

[†] 20:24 Iriraquea tenario irio imentaquitsite Iromaquitica. Iramiteriguete itsipa apajencaro savincaguiteri irivegarataqueri aparo tenario. Ari iquejevecari itsipa imentaqui icantajitica iraquima, iriguenti imentaquitsite guiriegojia.

anijatsica. Aviatimpajia pamenajivecari metojaque, cotanquitsiquea iriatimpa yame-naqueri maasano icocani yaniji.

³⁹ Iroompaquea iconoagarantajiacca tsatacaantajiguiroca itioncacotanaqueca Moishishini icanqueri:

—Tsatacaantantatsica, pitampaticamajataqueroquea.

⁴⁰ Ariquea icarajianajiquea maasanojia teequea incoacojiajeriji otsipapae, yamena-queriqueate teequea iragavejajigueriji.

¿Taaquea choviquitanaqueri Quirishitotatsica?

(Mt. 22.41-46; Mr. 12.35-37)

⁴¹ Iroompaquea icanque Jesoshi:

—¿Querocaquea ocoani icantantajitacaca: ‘Irraquea Quirishitotatsica[‡] iriguenti ichoviquini Taavini?’ ⁴² Iriotaquequea cantanquitsica Taavini iriatimpa coramani itioncaquerogueti paperiqui pajitatsica Saremo, icanque:

‘Irraquea Majirontatsica Aapani Irioshi icanqueri Nomajirote:

Pisaviquetaja pisenampijaquenaja notincamijempequiqui,

⁴³ pintsipataquenaquea arejevaetanaquempa

nagavejajiaquerigueti maasano catsimajiaquempica, onquejevequemparo povanque-gontatsitempari.’

⁴⁴ Irraquea Taavini iriotaquequea cantaqueerica: ‘Nomajirote’, ¿querocaca incoquem-pani inchoviquitanaqueri?

Icanque Jesoshi aatojate yoguijaguijaitacotiritsijate tsatacaantajiguiroca itioncacotanaqueca Moishishini

(Mt. 23.1-36; Mr. 12.38-40; Irc. 11.37-54)

⁴⁵ Maasano iquemisantajiaqueriquea Jesoshi icantajiaquerigueti itsatacaane, icanque:

⁴⁶ —Inchiquiojijata poguijaguijaitacotiritsijate tsatacaantajiguiroca itionca-cotanaqueca Moishishini. Iroguenti ishineventajiacca inquitsaajerontajiaquemparo ontiasearo cameetsanijite irisemeque. Aisa yoayoaitapinique ontaniqui yojocantajigueti rogueti taaca opajitapae ajaararontsipae inintajiaque inquenquetsata-caajitavaqueriquea. Icoquitani yoapinijiguigueti shinagogaqui icapiocantapinijiacca, inintajiaquequea iroguisavicajitavaqueri intsipatsipaipojempariquea anaantajiatatsica. Ariquea iquejejiacaquea aisa icapiocajiacagueti irishecajiaquempaquea, inintajiaque iroguisavicajitavaqueriquea intsipatacaantajiquempariquea anaantajiatatsica. ⁴⁷ Aisa yamatavimatavivaetaqueroquea metojacoropae iteroncamajatsitaqueroquea ashintaguecaca. Aisa yamanamampeajiacariquea Aapani Irioshi teetaquea irisanticotsitempaji, isemejiaque intati. Iriatimpajia caaviji iranaajiaque incatsimamajajitaqueri oncoramanitapojajegueti.

21

Metojacoro ojocaqueneriquea Aapani Irioshi omentaquitsite aacaajaniquicari

(Mr. 12.41-44)

¹ Ariqueate ichoocaque Jesoshi oraniqui teemproqui ochoocaquegueti itetantajitar-ica imentaquipae yojocajiquenerica Aapani Irioshi. Iriatimpa yamenajivaqueriquea ashintavaejiatatsica yojocajiaquequeate imentaquitsite. ² Iroompaquea yameniroquea aparo metojacoro, teetarite ashintempaji, otetsitariquea iroatimpa mavimentaquite-janiqui omentaquitsite. ³ Ariquea icanque:

—Arimajaca ocativa metojacoro teeca ashintempaji yamenaqueroquea Aapani Irioshi otepojiri oshequi, anaitajiaqueri maasano. ⁴ Iriatimpajia yaagarantavajiri imentaquit-site, yashintavaevetacatari, cotanquitsiquea iroatimpa teeca ashintamajavetempaji manaquea aacaajaniquicari maasano ashincaca ovegaratantajempameca osheca.

[‡] 20:41 Quirishitotatsica. Iguenquetsatsarequi guiriegogia icanquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserotejiate. Irira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempapaniji Imajirojiate maasano.

Jesoshi icanque irisovejaiquero teemporo

(Mt. 24.1-2; Mr. 13.1-2)

⁵ Iconoagarancaquea iquenquetsaventajiaqueroquea teemporo itsaromentantajitarica Aapani Irioshi, yamenajiaqueroquea cameetsavaequequea ocanca. Ipeacaantajitaro-quea mapi ogameetsareni. Aisa yojoquijitantajigüecaroquea otsipapae taaca opajitapae cameetsaguetatsica yojocajigüequenerica Aapani Irioshi. Iroompaquea icanque Jesoshi:

⁶—Ocatiquea pamenajianaqueca imaica, ariquea arejetapojajempagueti savincagüiteri aatoquea ochoocatajitsi aparo mapi ogataajatsineca, maasanopae irisoveacomajajitaquero.

Queroquea oncotanaquempani irooshipojegueti onteroncaguetanajempa quepatsi

(Mt. 24.3-28; Mr. 13.3-23)

⁷ Iroompaquea icanajiguiri:

—Tsatacaantantatsica, ¿querocate oncarateni irisovejaiqueroni? ¿Taa opaji nontsantantajiavaquemparoca?

⁸ Icanque Jesoshi: “Shoshoh yamatavijajitimpitsija. Incoraquecoraqueitanaquetari oshequini pinajiaquenaneca cantajianquitsineca: ‘Naroguenti.’ Itsipa incanque: ‘Irooshipoji aguempa.’ Cotanquitsiquea aviatimpajia aatoquea piquemisantajigüiritsijate.

⁹ Iroompaquea pinquemacojiaqueriquea itsipapae irashimirintavacaajiaquempa. Itsipapae iroguisotoitsijiguempari imajirojiate. Cotanquitsiquea aatoquea pitsaroajigüitsi. Ariqueate onquempeguetanaquempa quea imaica, cotanquitsiquea aatota aitsita onteroncaguetanajempaca quepatsi.”

¹⁰ Iroompaquea icantriquea aisa: “Irirajia guintenijianquitsica otsipapaequi quepatsi iroaroaitashijianaqueriquea choocajitsica osamanipaequitica, ariquea irashimirintavacaajiaquempa. Ariquea inquempejiaquempa quea majirontajatsica inchoocagarantajiaque intigarancajiaqueri igoaretajiate iroaroaitashijianaqueriquea itsipapae majirontatsica irashimirintavacaajiaquempa quea irimetojavacaajiaquempa.

¹¹ Omoguecaguetanaquempa quea oshequi ooshiatsi. Irantsipevaejitaquemparoquea tasetisjencapae. Osotoajencavaetanaquequea ashinoncajarentsi, oncantashitajajencavaetanaquempa quea oshequi querocagueti osotoajencaguetanaqueni. Iramenajitaquero caarica yamenajiti poneanquitsica inquitequi oncantashitajaguitetanaquempa oncanquempa, omintsaroajianaqueriquea.

¹² “Cotanquitsiquea aatotaquea oquejeta imaica, aviquetijiaca incatsimajiaque irantsipetacaavaejiaquempiquea. Iraajianaquempiquea shinagogapaequi icapio-cantapiniyacaca, incatsimatsijiguempi irisantanatacotacaantajiaquempiquea. Aisa iramenajiaquempigueti pitsaromentajiaquena irajianaquempiquea ichoocagueueti majirontajatsica aisa jivajatsica cameetsaniji incatsimatimentajiaquempiroquea.

¹³ Inquempejiaquempigueti imaica irajianaquempigueti querocagueti oraniqui, ariquea pintsavetacojianaquenaqueate naatimpa.

¹⁴ Cotanquitsiquea aatoquea piquenquejajigüiroquea pincantajigue: ‘¿Querocaca noncanqueca nompetanaquempagueti coajica irajianaquenaqueti incatsimajiaquenaqueti?’ ¹⁵ Naroguenti quenquejacaajiaquempironeca cameetsanijite pintsajiaqueniijite querocaca pincanqueca aatonijite yagavejitajigüimpirotsi, manaquea incatsimatashijiaquempiquea intati.

¹⁶ Cotanquitsiquea aviatimpajia pinconoagarantajiaquempa quea iracaantajiaquempi, inqujetsijianaquempiquea irijanintajigüimpica, piguentijegüijiate, pijigüetica aisa pitsipavijijiaca, pinconoagarantajiaquempa irimetojacaantajiaquempi.

¹⁷ Maasanopae irisemimentajiaquempiroquea novajiro pitsaromentajiaquenaqueti.

¹⁸ Arigueti irimetojaquempi, aatoquea opegatsi apamaero pimajeaniqui piguitoqui.*

¹⁹ Pantsipevaetaquempagueti maasanopae ocatice, aatoquea povashiantajigüirotsi pitsaromentajiaquenaqueti, pinquejetaqueroqueti imaica pincogüitempani panijagüiteni jenoqui inquitequi.

* 21:18 Icanque aatoquea opegatsi apamaero pimajeaniqui piguitoqui, iroorijite maasano tsaromentajigarica iroaroaitanaquequea ichoocagüeti Aapani Irioshi, incoquempani inchoocagüiteni. Itsaventanqueroqueti Paavoro icanque onchoocaque otsipa atsino cameetsamajatsineca aatoca oteroncatsi. Pamenero 1 Co. 15.53.

²⁰ “Iroompaquea pamenajiavaquerogeti Jerosare iranquijatacojiapojajemparoquea coaretajia, irooquea pintsatantajiavaquempa irooshipoji onteroncaguetanaquempa maasanopae tsovironaquipae, irisoveajiaqueroquea. ²¹ Irirajia choocajianquitsineca Joreaqi irishiashiaitanaquetaja otsempipaequi. Irirajia choocajianquitsineca Jerosarequi irishiashiaitapanajantetaja osamani. Ariquea inquempejiaquempa quea choocajianquitsineca niganquitejiqui inchiqiojitaja yoayoaitapanajantitsija Jerosarequi. ²² Inquejetaquempaja irooriji aapojaca incatsimatantajiaquemparica Aapani Irioshi, onetsanamajatanaquempa quea itioncacaunquea paesatoniqui. ²³ Ooshiatsi manquigarentsija tsaraqijianquitsineca, aisa atsomijianquitsineca caaviji antsipemajiaquempa quea, irantsipevaejiaquempatarite maasanojia choocajiatsica ocaniqui, incatsimamajajiqueriquea. ²⁴ Inconoagarantajiaquempa quea irimetojantajiquempari tsaampitsantsameni. Itsipapae iraashijitanaquempari quepatsipaequi osamaniguetsica. Iriatimpajia teeca irijorijoigueti quenaquenaitapojatsineca osamani iragavejantajiapojaque Jerosarequi irarejetacovaetapojemparo aapojempagueti incantantaquempaca Aapani Irioshi: ‘Imaicaquea ariotapojaque.’

Querocaca oncoguetanaquempanti incoraquetajategueti Irijanite Caquinte
(Mt. 24.29-35, 42-44; Mr. 13.24-37)

²⁵ “Ariqueate incantashitatijaianaquempa quea inquitepaequitica: irira catsirincaiteri, taai, impoquiropae. Iramenajitavaqueroquea teeca iramenajiteji coramani intsa-tantajitaquemparoca irooshipoji. Maasanopae choocajiatsica acaniqui quepatsiqui ariqueate incohincoitanaquempa quea intsaroamajajiana que inquemajiaquerogeti ampenejencavaetanaquempa quea inirojani quentijani, ontamacoseajavaetanaquempa quea ochonquiinaja sooooo tsacon tsacon. Irishoshoguitejianaquempa caquinteguetatsica incantajiana quea: ‘¡Imaicashiatsi querocampate oahoaitanaqueni!’ ²⁶ Caaviji intsaroamajajiana quea, ojatacotacaquiteri itsarore inquenquejacojianaquerogeti querocaca oncopojaquempani acaniqui quepatsiqui. Irimoguecana quea choocaguetanquitsica jenoqui inquitequi. ²⁷ Iroompaquea iramenajitavaqueroquea irira Irijanite Caquinte incoraquetapojajegueti inquenantapojajemparo mararo, iragavejavejapojempara iranaajiaqueroquea maasano, iroganejencavaetapojempara. ²⁸ Oraqueate pamenajavajerogeti onquempetapojajempagueti imaica, pishinejianaquempaja, irooshipojitarite irajavajempani Aapani Irioshi patsipevaecagueti.”

²⁹ Ariqueate iquempetacaacaroquea iguera, icanque: “Pamenajiguirogeti iguera irooca otsipapae inchato, ³⁰ ochoocatanajigueti ovana irooquea pitsatantajavajerogeti irooshipojajajagantsitapojaje. ³¹ Ariquea onquempetanaquempa quea oncoramanitapojajegueti pamenajavajerogeti onquempetanajempagueti notsatatacajianaquempica imaica, irooquea pintsatantajavajempara irooshipoji irimajirontaquempa Aapani Irioshi.

³² “Arimajaca noncantajiaquempica, maasanopae ocatica nocantajiaquempica imaica onetsanamajatanaquempa quea tequeratagueti interoncaguetempajia maasano choocajianquitsineca omparianaquempagueti notsavetantsitacaca imaica.† ³³ Oraquea inquite aisa quepatsi ompeaquempa, cotanquitsiquea oraquea nocantaguequeca aato opegatsi.

³⁴ “Aviatimpajia inchiqiojitaja pisavicaventirotsijate taaca opajitapae covaequisherentsipae, pishinquitatsija, pishoshoventajigarotsija taaca opajitapae. Pinquempejiaquempagueti imaica aatoquea pagavejajigueti pinquenquejajiaquerogeti irira Irijanite Caquinte incoraquetaje, iroompaquea manaquea incomirejajapojajempiquea. ³⁵ Manaquea onquempetaquempararo ivaracajitigueti, teequea intsatsitapojemparoji. Ariqueate onquempetaquempa quea oncoramanitapojajegueti incoraquetapojajegueti irira Irijanite Caquinte, aatoquea itsatsijiga choocajiatsica acaniqui quepatsiqui. ³⁶ Cotanquitsiquea aviatimpajia pincoquempanija poguivajajerija, aisa pincoquempanija pamanaguiterin

† 21:32 Otioncacaca acaniqui, iguenquetsatsarequi guiriegojia ocanque genea. Chooca mavitepae agavejaque oncantacotaque. Genea agavejaque oncantacoqueri (1) irioca maasano choocajianquitsica icantaquerogeti (esta generación o la gente de este tiempo); (2) irioca oncantacoque maasano joriojia (esta raza); (3) irioca oncantacoque maasano choocajianquitsineca omparianaquempagueti itsavetantsitacaca (esta generación, es decir, la generación que ve el comienzo de estas cosas).

Aapani Irioshi cameetsanijite pintampishitashiqueroniji maasanopae ocatica notsatacajaiaquempica imaica, aisa cameetsanijite pincatintiitimotaqueriniji Irijanite Caquinte incoraquetapojagueti.”

³⁷ Ariquea iquejetaqueroquea imaica icantacoguitani savincaguiteri qui itsatacaan-taguitini teemporoqui itsaromentantajitarica Aapani Irioshi. Oraquea pitsecariqui manaqueate yoapiniquequea otsempiqui ipajijitica Orivotsempi. ³⁸ Icantacoguitaniqua pitsecaguitetirajagueti icoraquecoraqueipojaque maasano teemporoqui inquemisantajaquerinijite intsavetantavaetaquegueti.

22

Iquemavacaimentajiacari Jesoshi iraacaantajiaqueri

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Irooshipoji arejetempa savincaguiteri icantajitica Paashicoa ishecatantajitaroca pan teeca onconoguemparoji anempoacaguiroca. ² Iriaquea saserrotejia anaantajianquitsica itsipajiacari tsatacaantajiguiroca itioncacotanaqueca Moishishini arimpaqueate iquenquejajianaque queroquea incoquempani iraacaanquerinijite Jesoshi irimetojacaantajiaquerinijite, cotanquitsiquea querocampaquea incojiaquerini, itsarocaaajiacariquea maasano omporoguijaventajiacarica.

³ Ariquea iriraquea Satanashi icoraquetashipojiri ishaquiapojacari Jorashi pajitatsica Ishicariote. Irioveca itsatacaane Jesoshi carajianquitsica 12. ⁴ Ariquea yoanaque inquenquetsatacaajigueri saserrotejia anaantajianquitsica aisa imajirojiate coaretajia quempoguijajiguiroca teemporo itsaromentantajitarica Aapani Irioshi. Ariquea itsipajiapojacari iquenquetsatavacaaca quero incoquempani Jorashi iraacaanquerinijite Jesoshi. ⁵ Iquemajivaquerigueti ishinejianaca, icanqueriquea irojocajiaqueneri imentaquipae. ⁶ Iriatimpa ishinevaetanaca, ariquea yamenaguetanaque aatogueti ichoocajigui omporoguijavencarica, ariquea iraacaantsitempari.

Jesoshi ishecatacaajianajari itsatacaanejia

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Iroompaquea aapojacaquea savincaguiteri ishecatantajitaroca pan teeca onconoguemparoji anempoacaanaqueroneca, aisa ijitorejantajitarica ovejajaniqui ishecajitacaca iquenquejacojiguirogueti Paashicoa. ⁸ Iriaquea Jesoshi itigarancaqueriquea Peerero aisa Joanca icantavaqueri:

—Poapoaitanaquequea pinetsanajivaqueroquea maasanopae cameetsanijite ashecaciaquempanijite coajica anquenquejacojiajerogueti Paashicoa.

⁹ Icantiriquea iriatimpajia:

—¿Quero nonetsanajiaqueroni?

¹⁰ Icanque Jesoshi:

—Poapoaitanaquequea Jerosarequi, ariquea parejejiapojempagueti pintonquivojawaquempari aparato shirampari iramacopojaqueroqueti ijatsite, irioquea poguijaguijaitanaque. Poapoaitanaque tsovironaqui qui querocagueti inquijapojeni.

¹¹ Pincantajiapojerija ashincaroca itsovironaquite: ‘Iriaquea Tsatacaantantatsica icanque: ¿Querocaca oraniqui noshecaciaquempani coajica nontsipatsipaiquempari notsatacaanejia nonquenquejacojiaqueroquea Paashicoa?’ ¹² Iriatimpa

intsipatsipaitanaquempiquea oshitamencoacagueti jenoqui, irijicoguequempiroquea otantotacagueti caguetejeguina, jac netsanaguecaquea maasanopae. Ariquea oraniqui pinetsanaguetaqueroquea maasanopae ashecaciaquempagueti coajica.

¹³ Iroompaquea yoayoaitanajiquea, ariquea yamenajiapojiroquea maasano quemajataca icantajivaquerica Jesoshi incajaranqui, ariquea oquejetaca. Ariquea oraniqui ipeacajaiacaro maasanopae irishecaciaquempacica irishineventajiaquemparoniji Paashicoa.

¹⁴ Ariquea opitsecaguitetanaquegueti icoraquepojaque Jesoshi itsipatsipaitanacariquea itigarancanejia, ipimerequijajiapojaca shitaponcarontsi qui irishecaciaquempa.

¹⁵ Iroompaquea icanque Jesoshi:

—Imaicaquea arejetapojaca ocatica Paashicoa nonintamajatantacaca nontsipat-sipaitaquempi noshecatacaajiaquempiquea ashineventajiaquemparo tequeratagueti arejetempaji nantsipevaetaquempagueti nometojaque. ¹⁶ Noncamantaquempitarite aatoquea noshecataantajarotsi, ariguenti noshecatajemparo onetsanamajatanaquem-pagueti ocatica maasanopae ocantacoqueca Paashicoa oncoramanitapojajegueti irima-jirontaquempagueti Aapani Irioshi.

¹⁷ Iroompaquea incajaranquiguitetanaquegueti yaacoquero chovintyoriqui, * yamana-queriquea Aapani Irioshi, icantaqueri: “Arioteesaa.” Ariquea yojocacojiaqueneriquea itigarancanejia icantiriquea:

—Paajiavaquero pimiramiraitavaquero. ¹⁸ Noncanquempitari aatoquea nomirajaro vinoja arejevaetapojempa nomirajemparo impeaquempagueti Aapani Irioshi Imajirojiate maasano.

¹⁹ Iroompaquea yaitsitaroquee pan, yamanajiri aisa Aapani Irioshi, icantaqueri: “Arioteesaa.” Ariquea icotarejitsitaroquee yojocajiaqueneri, icantiriquea:

—Iroguenti notsino metojaventajiaquempineca. Pinquempinijiaquempaquea imaica, pishecajiaquemparoja pinquenquejacojiaquenajate naatimpa.

²⁰ Iroompaquea ariquee iquejetacaacaroquee otsipatacoro vinoja iteroncajianaque-rogueti ishecajiacagueti, yaacotsitaroquee icantiriquea:

—Ocativa vinoja iroguenti noriraja[†] sotojaatashiquempineca. Ocantacoqueroquee iroaqueraro paaquito.[‡] ²¹ Iriraquee aacaanquenanea chooca imaica ocantiqui itsipava-coquenaquee shitaponcarontsiqui ashecataantajiacaca. ²² Irimetojaquetari irira Irijanite Caquinte, onetsanaquempaquea inintacaquerica Aapani, cotanquitsiquea jooshiatsi irantsipevaequempaquea irira aacaanquerineca!

²³ Icoacotavacaajianaca maasano:

—¿Quericaqueate aacaanquerineca?

Iquenquetsatacojiaquero querica anaantamajatanquitsica

²⁴ Iroompaquea iparipariitanacaroquee itsatacaanejia Jesoshi iquenquetsatavacaajia-caquee iquenquetsatacojianaquero arica chooca itsatacaane anaajiaquerica itsipajia.

²⁵ Cotanquitsiquea Jesoshi icantiriquea:

—Iriraquee imajirojiate caquinteguetatsica teeca intsaromentpariji Aapani Irioshi iroguentiquea yatsanatantajiacaca. Aisa iriraquee majirontajatsica manaquee inintajia-que incantajiqueriquea caaviji icavintsajanti. ²⁶ Cotanquitsiquea aviatimpajia aatoquee piquejiguirotsi imaica. Iriraquee anaantamajatsica inquejetanajemparija teeca iranaanteji. Ariquee inquejetaquempaquea majirontatsica, inquempetanajemparija amitantatsica. ²⁷ ¿Queri anaamajatsica? ¿Irioca savicatsica irishecatavaquempaquea intati shitaponcarontsiqui, irioca amitantatsica jocacotantiroca isheca? Iriotaque-quee savicatsica shitaponcarontsiqui. Cotanquitsiquea naatimpa imaica nocoraque-taque acaniqui noquempetapojariquee amitantatsica. ²⁸ Aviguentijia tsipajiaquenaca nantsipevaecagueti. ²⁹ Irootaquequee imaica nompeacaantajiaquempica majirontaji-atsica, ariquee iquejetanaquenaquee naatimpa Aapani ipeacaquenaquee imajiroji-ate maasanojia. ³⁰ Oncoramanitapojajegueti pintsipajiaquenaquee nomajirontagueti, pishecajiaquempa pimirajiaque noshitaponcaroqui, pisavisaviitantajiaquemparo isavi-cantaca majirontatsica cameetsanijite pincantajiaquerinijite queroquee incojitaquerini ishiraerijia ichoviquijianaqueca irijanijiate Jacovoni caravaetanquitsica 12.

Jesoshi icamanqueri Peerero iromanacoqueriquea

(Mt. 26.31-35; Mr. 14.27-31; Jn. 13.36-38)

³¹ Iroompaquea icanque Amajirote aisa:

* 22:17 Iroguenti yaacotaque vinoja. † 22:20 Icanquerogueti noriraja mana iquejetacaacaro intati, cameet-saniji amirapinijiaquerogueti anquenquejapinijiaquero imetojaventajiacajigueti. ‡ 22:20 Oraquee paaquito iroguenti icantamajajitirica itsipa irinetsanamajajitenerica. Ocaticaquee iroaqueraro paaquito icantajiacajiquea Aapani Irioshi irishetacotajeri igovaeguishere maasano aventaventaquemparineca Meshiantatsica metojaventajia-cajica. Ochoocaguetaquequee paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichooaquegueti Moishishini, otsipa icanquerica Taavini.

—Shimo, Shimo, irira Satanashi yamanaqueri Aapani irishinequeriniji inquem-petacaajiaquempiniji aviatimpajia yatecaojitirogueti tirigoitsoqui, iramenantajiaquem-piquea arimajacaca pitsariventamajataquena.³² Cotanquitsiquea naatimpa namana-covenquempiquea aviatimpa aatonijite pipeacomajatanajarotsi pitsarovenquenagueti. Ariquea pimpeacovequitenaquea, cotanquitsiquea pincoraquetashitajenagueti, non-inque pintampishitacaajiaqueriquea papitsariventarijiate.

³³ Icanque Shimo:

—Nomajirote, noanaquequea naatimpa quisho noacotantanaquempi, irisantanata-cojiuempigueti inquejetacaajitsitenaquea naatimpa, aatoquea notsinampirejimpitsi. Irooca irimetojajiquempiquea inquejetacajaiquenaquea naatimpa aisa.

³⁴ Icanqueriquea Jesoshi:

—Peerero, noncanquempiquea, coajica tequeratagueti irinijeji chaapa, pomanacoque-naquea 3.

Iroshipojaque irantsipevaequempaquee Jesoshi

³⁵ Ariquea icantiriquea Jesoshi itsatacaanejia:

—Oraqueate notigarancajiaquempigueti pitsavetantajiaquitigueti, nocantajiavaquem-piquea: ‘Aatoquea paajiguitsi pitsaratote, aisa pitetantarica pimentaquitsite, aisa aatoquea paajiguitsi itsipapae pigaviguitire.’ Piquejetacagueti, ¿choocampate picoguitejacoqueca?

Iriatimpajia icantiriquea:

—Tee onchoocateji.

³⁶ Ariquea icantiriquea:

—Cotanquitsiquea imaica choocagueti pitsaratote paanaqueroja, aisa pitetantarica pimentaquitsite. Aatogueti ochoocati pitsaampitsantsamenirite pojocantanaqueroja piitsaare jenoquitica paantanaquemparoja pitsaampitsantsamenirite.³⁷ Noncantajiaquempiquea irinetsanamajajiqueroquea ocanqueca Itioncacaantaqueca Aapani Irioshi cantacotsitaquenaca: ‘Intsipatacaantajiquempariquee covaeguishejigaroca covaeguisherentsi.’ Maasanopae itioncacotsijitaquena onetsanamajatanaquempaquee.

³⁸ Icantiriquea iriatimpajia:

—Jero, Nomajirote, mavite tsaampitsantsameniri.

Icanque iriatimpa:

—Ariotapojaque.

Jesoshi yamanaqueriquea Aapani Irioshi Jetsemaniqui

(Mt. 26.36-46; Mr. 14.32-42)

³⁹ Iroompaquee yoanajiquea Jesoshi Orivotsempiqui,[§] aritarite yoapinique oraniqui. Iiraquea itsatacaanejia yoguijaguijaitanaqueriquea.⁴⁰ Ariquea yarejerejeipojaca icantiriquea:

—Pamanacoventajiguempa aatonijite picovaeguishejigatsi.

⁴¹ Iroompaquee yoanaquequea tiijacoñajiquea ontaniqui yoguerotanaca yamananaqueriquea Iriri icanqueriquea:⁴² “Aapani, pininquegueti paapitsatenarotate nantsipequempaca,* cotanquitsiquea aatoquea iroguenti netsanatatsi nonintica naatimpa, iroguentiquea netsanatananquitsine pininqueca aviatimpa.”

⁴³ Iroompaquee icoraquetashiqueriquea irashivantite Aapani Irioshi, iquenapojaque inquitequi itampishitacaapojaqueri.⁴⁴ Yamenacotavacagueti yatsipemajatanaca, arimpaqueate yamanacoventanacaquee, imasavivaetanaque quempeni irajantsi, ochochorojanaque inirojapae isavi quepatsiqui.

§ 22:39 Irira Mateo icanque yoanaque Jetsemaniqui (pamenero Mt. 26.36). Iiraquea Joanca icanquero orivoshiqui (Jn. 18.1). Oratica orivoshi opajita Jetsemani, ochoocaque niganquitapi Orivotsempiqui. * 22:42 Icanquegueti Jesoshi paapitsatenarotate nantsipequempaca iroguenti ishimampojancacomajatacaro incatarojitanqueri igovaeguishehere maasanolja caquinteguettananquitsica quericaca aventajiaquemparineca. Pamenero 1 Pe. 2.24.

⁴⁵ Ariquea iteroncanajatiguiro yamanacovencagueti icatianajaqueate yoanaji itajencashijiapojiri itsatacaanejia, yamenajiapojiriquea maajiaque, omagotacaanaqueritari ishimampojanca. ⁴⁶ Icantiriquea:

—¿Taate pimaantajiacaca? Pintinajajianaque pamanacoventajiguempaquea aatonijite aapojimpitsi covaeguishetacaanaquempineca.

Yaajitaquerigueti Jesoshi

(Mt. 26.47-56; Mr. 14.43-50; Jn. 18.2-11)

⁴⁷ Iroompaquea quenquetsatatsitiraja Jesoshi icoraquecoraqueipojaque caquinteja isaquiriaventajiapojacari. Iriraquea itsatacaane pajitatsica Jorashi ijivatapojiri. Yojo-cavaetapojaca quempeji irinintavorotashipojempari[†] Jesoshi. ⁴⁸ Ariquea Jesoshi icantavaqueri:

—Jorashi, ¿irootaquempa picoraquetantacaca paacaanqueri Irijanite Caquinte, pinintavorotantamampeacarica?

⁴⁹ Irirajia itsatacaanejia yamenajiavaquerigueti maasanojia coraquetashijiaquerica icantiriquea:

—Nomajirote, ¿arite nompejianaquempiquea noncarajivaqueri?

⁵⁰ Aparo itsatacaane icaratavaqueri yashintacaca saserorote anaantamajatanquitsica, iguempitarejitsitari iguempita itincamijempequiquitica. ⁵¹ Cotanquitsiquea Jesoshi icanque:

—Ariotaquetsija icocani.

Ipamitsitajiriquea iguempitaqui, jac peamajatanaja. ⁵² Ariquea Jesoshi iquenquetsatacaajiaqueri saseroroteja anaantajanquitsica, imajirojiate igoaretatepae quempoguijajiguiroca teemporo, aisa jivajiatsica, maasanojia coraquetashijiaquerica aajiaquerineca, icantiriquea:

—¿Arimpate naroguenti catsimari aapitsatantatsica pamashitantajiaquenaca pitsaampitsantsamenirite aisa inchaquiji? ⁵³ Oraquea noconoajiguimpigueti nocantacoguitaniqua oraniqui teemporoqui teequea querocaquea pincotimajiguenaji, cotanquitsiquea imaica manatarite aapojaca pagavejantajiaquenaca, iroguentitari iragavejantantaquempaca imajirote pitsecacojiatsica,[‡] jero piquejetantajiacaroca imaica.

Peerero yomanacoqueriquea Jesoshi

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ariquea yajiricajiaqueri Jesoshi, yaanaqueriquea itsovironaquitequi saserorote anaantamajatanquitsica. Iriraquea Peerero yoguijatacovetanacari cotanquitsiquea impoivaetapojaque. ⁵⁵ Ariquea oraniqui itsitacajiaque paamari niganqui pampatejijaniquiqui itsovironaquitequi, savisaviitaque itajiaque yanquitacojiacaroquea. Iriraquea Peerero iconoajiapojacari isavicapoji.

⁵⁶ Iroompaquea amenaqueriquea aparato yashintajitaca itaquegueti, amenitsitanacariquea sorerere ocanque:

—Iricatica aisa itsipatacari Jesoshi.

⁵⁷ Cotanquitsiquea yomanacotsitanaca Peerero, icanque:

—Manquigarentsi, teenicate nontsateriji.

⁵⁸ Iroompaquea incajaranquiguitetanaquitigui itsipaquea amenaqueri icanqueri:

—Avirotari aisa itsatacaane Jesoshi.

Icantsitajaquea aisa Peerero:

—¡Teeshinete!

⁵⁹ Iroompaquea incajaranquiguitevaetanaquegueti arimpaquea icantanaque itsipa:

—Arimajaca itsipatacari, iriguentitarite Garireaquitica.

⁶⁰ Iriraquea Peerero icanque:

—Tee nontsatsitempiro picantacotaqueca.

Iroompaquea icantanaquitigui Peerero inijanaquequea chaapa. ⁶¹ Ipitsoquitsitanaca Amajirote yamenaquitiri Peerero, ariquee icotanaca iriatimpa iquenquejitanacaroquea

[†] 22:47 irinintavorotashipojempari. Yamejiaca joriojia coramani inintavorotavacaajivaca yamenavacaajiacagueti.

[‡] 22:53 Icanquegueti pitsecacojiatsica iriguenti iquejetacaaca coguishejiatsica. Iriraquea Satanashi iriotaquequea imajirojiate.

icantaquerica Jesoshi incajaranquitica icanqueriquea: “Coajica tequeratagueti irinijeji chaapa pomanacoquenaquea 3.”⁶² Icatiitsitapanajantaquea isotoapanajanti, iraitsitanacaquea ishimampojancajatanaca.

Ishiroshirontimentajitacari Jesoshi

(Mt. 26.67-68; Mr. 14.65)

⁶³ Iroompaquea maasano coaretajia quempoguijajiaquerica Jesoshi ishiroshirontimentavaecari, icapocapovaetaqueri, oshequi. ⁶⁴ Iponaajiaqueriquea icapoitari icantajavaqueri:

—Iintsijate pintsatavaqueja taaquea capojaquempi.

⁶⁵ Iquenquetsaguisheventajiaqueri.

Yaajitanaqueriquea Jesoshi icapiocajiacaguetei maasano imajirotepae joriojia

(Mt. 26.59-66; Mr. 14.55-64; Jn. 18.19-24)

⁶⁶ Iroompaquea osavincaguitetanaquegueti icapiocajia jivajiguirica joriojia, saserrotejia anaantajanquitsica aisa tsatacaantajiguiroca itioncacotanaqueca Moishishini, maasano. Iroompaquea icajemacaanqueriquea Jesoshi icoacojiaqueriquea.

⁶⁷ Icantiriquea:

—Iintsija pincamanquena, ¿arimajaca aviguentica Quirishitotatsica?§

Icantiriquea iriatimpa:

—Ariguetei noncantavequempi: ‘Jeejeguitatsi’, aatotarite piquemisantajanatsi.

⁶⁸ Ariquea noncoacojavetempiguetei, aatoquea picantajigui aviatimpajia.

⁶⁹ Cotanquitsiquea imaica iriraquea Irijanite Caquinte irisavicaquequea itincamijempequiqui* Aapani Irioshi Agavejamajatatsica, incoguitempani.

⁷⁰ Icantajiaqueriquea maasano:

—Arisacanica ¿aviguentimpa Irijanite Aapani Irioshi?

Icanque Jesoshi:

—Naroguitatsi, aviguenti cantaqueeroca.

⁷¹ Ariquea icantajianaque iriatimpajia:

—Iroosacanica, imaica ¿arimpate ancajemacaanque itsipapae incamancajiquea quero-caca icocani iricatica? Jac imaicaquea aquemajiaqueriqueate icantaqueguetei iriatimpa.†

23

Yaajitanaqueriquea Jesoshi Piratoqui

(Mt. 27.1-2, 11-14; Mr. 15.1-5; Jn. 18.28-38)

¹ Jero maasanojia icatintiijianaca yoayoaitanaque yaajianaqueriquea Jesoshi Piratoqui. ² Iroompaquea yarejerejeipojaca itsojeventajiapojacari, icanquequea:

—Iricaticaquea noquemaqueri icantacantavaequeri nogonorojia itsatacajiaique-
riquea incatsimajiaqueri majirontatsica, aisa icanquequea: ‘Aatoquea pojocagaranta-
jiguiniritsi majirontatsica Sesa pimentaquitsite.’ Aisa manaquea icanque: ‘Naroguen-
tiquea Quirishito Majirontatsica.’

³ Iriraquea Pirato icanqueriquea:

—¿Arimajaca aviguenti Imajirote jorio?

Icanquequea Jesoshi:

—Tampatica poaquero.

§ 22:67 Quirishitotatsica. Iguenquetsatsarequi guiriegojia icanqueguetei Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserrotejiate. Irira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempaniji Imajirojiate maasano. * 22:69 itincamijempequiqui. Yamejiaca coramani iriraquea majirontatsica incajemajiaqueri ishineventamajatacaca iroguisaviquitempari itincamijempequiqui, inquejemajirovequempari iranaajiaqueri maasano itsipajia. † 22:71 Iquemajiavaqueroquetei icanqueca Jesoshi iquenquejajianaquequea iroguenti iquejemanatanacari Aapani Irioshi. Iriraquea joriojia intsinaquitajitempariquea quericaca quejemaquemparineca Aapani Irioshi irimetojajiaqueri. Inquejetsijitempari aisa quericaca cantaguishequerineca.

⁴ Icantsitariquea Pirato maasano saserrotejia anaantajianquitsica aisa maasano caquinteja:

—Iricaticaquea naatimpa namenaqueriquea teequea taaca opaji impeacaimatempaji cameetsanijite incatsimatantajitaquemparica.

⁵ Cotanquitsiquea iriatimpajia arimpaquea itampishijianaquequea icantajiaque:

—Arimajaca icantacantajiaqueri maasano Joreaquitica itsatacajaianaqueriquea taaca opajitapae, icatsimatantajianacarica majirontajatsica. Ipariapanajantaroquea Garireaquui, imaica ariqueeate icoraquepojiquea acaniqui.

Yaajitanaqueriquea Jesoshi Erorishiqui

⁶ Iroompaquea iquemaquegueti Pirato icantsijigariquea:

—¿Irioca Garireaquitica?

⁷ Irooquea icanquitiguiri: “Jeejeguitatsi, iriotaquequea”, itigaranquitsitari Erorishiqui,* iriotaquetari netsanajiguirica Garireaquitica cotanquitsiquea ichoocapoji Jerosarequi imaica. ⁸ Iriraquea Erorishi yamenavaquerigueti Jesoshi ishinevaevetanaca icanca inintavecaquea iramenauerimequea coramani, iquemacotsicariquea iquenquetsatacojitaquerigueti, jero inintantacaca iramenauerimequea cameetsanijite iramenacaajiaquerinijite oacaantantatsica intati. ⁹ Icoacoguevecariquea oshequini, cotanquitsiquea Jesoshi teequea incanteji. ¹⁰ Ariquea ichoocajiaquequea saserorotejia anaantajianquitsica aisa tsatacaantajiguiroca itioncacotanaqueca Moishishini. Iriatimpajia arimpaqueate itampishijianaque itsojeventajianacariquea. ¹¹ Iriraquea Erorishi aisa igoretajiate ishiroshirontimentavaecari Jesoshi, iquejetacaamampeacari majirontatsica, iquitsaatantajiacariquea quitsaarentsi cameetsamorenamajatanquitsica quempetaroca iquitsaatata majirontatsica. Itigaranquitsitajari Piratoqui. ¹² Ariquea ivetsinantavacaajiacca Pirato itsipatajari Erorishi, coramani iroguentiquea icatsimatavacaajaveca.

Icanque irimetojajiqueri Jesoshi

(Mt. 27.15-26; Mr. 15.6-15; Jn. 18.39-19.16)

¹³ Iroompaquea iriraquea Pirato icapioacajiaqueri saserrotejia anaantajianquitsica, jivajiguirica joriojia, aisa maasano caquinteja.

¹⁴ Icantiriquea:

—Aviatimpajia pamajavetaquenari iricatica picantajiaqueca icantacantavaejianaqueri caquinteja icanqueriquea incatsimajianaqueriquea majirontatsica, cotanquitsiquea naatimpa imaica namenavecariquea teequea inquempeteroji picamantavetapojanaca, inchiqiuojiqueate piquemajiaqueri aviatimpajia icantaqueca nocoacovecarigueti incajaranqui. ¹⁵ Ariquea iquejetacaquea Erorishi iriatimpa yamenavecaquea teequea impeacaguempaji covaeguisherentsi, jero yoguipiantavajarica. Imaicaquea pamenaajiaquequea teequea taaca opajita impeacaguempaji cameetsanijite irimetojaquenijite. ¹⁶ Nantsipetacaavaquemparita ariqueea noguipaquijitajempariquea.

¹⁷ Icanqueriquea imaica irooriji icantacoguitani aapojempagueti Paashicoa iriraquea Pirato iroguipaquijajeri aparo isantanatacotimentajiqueca igovaeguisher.

¹⁸ Cotanquitsiquea iquemajiaquegueti icanqueca Pirato, maasanojia icajemajianaque icanquequea:

—¿Irimetojetashine! ¿Irioquea poguipaquijaje Varavashi!

¹⁹ Iriraquea Varavashi iroguentiquea isantanatacotimentajiqueriquea itsipatsipaitacariquea itsipapae guisotoantanquitsinemeca majirontanquitsica Jerosarequi, aisa imetojantaquequea.

²⁰ Iriraquea Pirato inintaveca iroguipaquijajerimequea Jesoshi, icantsijajariquea aisa.

²¹ Cotanquitsiquea iriatimpajia arimpaquea icajemajianaquequea:

—¿Pompajacoteri! ¿Pompajacoteri!

²² Icantsitajariquea aisa Pirato:

* 23:7 Iriratica Erorishi irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

—¿Taampate ipeacaaca? Nocoacotsivetariquea namenaqueroquea naatimpa teequea taaca opajita impeacaimatempaji cameetsanijite irimetojanquempaca. Nantsipeta-caavaquemparita ariquea noguipaquijitajempariquea.

²³ Cotanquitsiquea iriatimpajia arimpaquea itampishijianaquequea icajemajianaquequea:

—¡Pompajacoteri! ¡Pompajacoteri!

Caavijiquea icajemamajajianaquequea, ari yagavejantajianaque. ²⁴ Ariquea irira Pirato iquemisantajiaqueri. ²⁵ Ariquea yoguipaquijajiriquea iriraquea isantanatacojivecaca itsipajiacariguetei itsipapae guisoantantquitsinemeca majirontanquitsica aisa imetojanqueguetei, iriotaquetari inintajiaque iroguipaquijajitajeri. Irirampani Jesoshi, yojocajiaqueneriquea igoaretajiate irinetsanajiaqueronijite inintacaajiaquerica caquinteja.

Yompajacojiaqueriguetei Jesoshi

(Mt. 27.32-44; Mr. 15.21-32; Jn. 19.17-27)

²⁶ Ariquea yoayoaitanaquequea yaajianaqueriquea Jesoshi irompajacojiaqueri. Itonquivojajiacari Shirenequitica pajitatsica Shimo, iquenaetaepoji ontaniqui niganquitejipaequi. Iriatimpajia yaajivaqueriquea inatacaitsitariquea igoroshite Jesoshi, yoguijatacaqueriquea. ²⁷ Isaquiriaventajianacariquea oshequini caquinteja aisa manquigarentsijia ocaramirincavaeque ocanca, iraanajianacariquea oshimampojancaconventajianacari. ²⁸ Cotanquitsiquea Jesoshi yamenajiaqueroquea icanqueroquea:

—Manquigarentsijia Jerosarequitica, aatoquea piraacojianatsi naatimpa, piraacojiaquempa aviatimpajia, aisa piraacotsitempari pirijanijiate. ²⁹ Aapojajempaquea savincaquiteri incantantajitanaquempaca: ‘Iroguenti icavintsajamajataque Aapani Irioshi teeca onchoocatimajigueji irijanite, teetarite amenajigueriji irijanite, teequea antsomijigueriji.’ ³⁰ Iroompaquea maasano incantajianaqueroquea otsempipae: ‘¡Pintirejanaque pintsinacajiguenaja!’ Incantajianaqueroquea aisa aatsonquiripae: ‘Poaviotacojiguenajate, pomanacojiaquena.’ ³¹ Iquempetacarogueti oratica inchato janatirajaca, ¿quero incojitaquero oroavoaro?†

³² Aisa yaajitanaqueriquea mavite peacaaguishejianquitsica covaeguisherentsi irompajacojiaqueriquea, itsipatacaantajiacari Jesoshi. ³³ Iroompaquea yarejerejeipojacaroquea aatsonquiri icantajitica Shocoitontsi, ariquea oraniqui yompajacojiaqueriquea Jesoshi itsipatacaantajiacari irira peacaajianquitsica covaeguisherentsi, aparo yogatiacojiquequea itincamijempequiqui, iriraquea itsipa iroguenti yogatiacojiaqueriquea ishinampijempequiqui. ³⁴ Irooquea yompajacojitaqueriguetei Jesoshi ariqueate icotanaca yamanacoventajianaqueriquea ompajacojiaquerica, icanque:

—Aapani, pimpeacotsitajempari iquejejaquenaguetei imaica, teetarite intsajigueji.

Ariquea iriraquea coaretajia ipegavijjiaca intsajiaquenijite taaca aaqueroneca iquitsaaguevecaca‡ Jesoshi. ³⁵ Ariquea ichoocajiaque oraniqui oshequini caquinteja, yamenajiaqueriquea Jesoshi. Iriraquea jivajiatsica ishiroshirontimentavaecari, icanqueriquea:

—Yantashitacari yompetacoguetacari itsipajia, imaicaquea iriogueti Quirishitotatsica Icoquiaqueca Aapani Irioshi, iintsija irompetacotanaquempa.

³⁶ Ariquea iquempejiaca coaretajia ishiroshirontimentavaecari, iquempejiquempejitanacari yojocajiaqueneriquea vinoja cachonerontoquijajaro. ³⁷ Aisa icantiriquea:

—Aviguentica Imajirote jorio, iintsija pompetacotanaquempajate.

³⁸ Ojenuquipojaqueguetei ishinquireguishipojacaguetei ipatacajitaqueroquea ogota itioncantajicaro iguenquetsatsarepaequi guiriego, Iromaquitica, evereo, ocanque: “Iriguenti Imajirote jorio.”

† 23:31 Jesoshi iquejetacarero inchato janatirajaca. Teetarite impeacaimatempaji covaeguisherentsi, cotanquitsiquea yatsipetacaajitacari imetojajitaqueri. Irirajia ishiraerijia manintajiaquerica iriojietari quempecaroca oroavoaro inchato intajiaqueca, incatsimamajajitaqueriquea. ‡ 23:34 iquitsaaguevecaca. Irooca icantacotaque isavoguinaro, igaviguitire, ichompimashite, aisa yogataacaca, ocarataque 4.

³⁹ Iquenquetsatanaque aparo peacaanquitsica covaeguisherentsi itsipatacaantajicar-ica, icaveitariquea Jesoshi icanqueriquea:

—Irootarite aviguentica Quirishitotatsica iintsija pompetacotanaquempajate avi-atimpa, pinquejetacaitsitenaquea naatimpajia aisa.

⁴⁰ Cotanquitsiquea icantomajitari itsipa icanqueriquea:

—¿Arimpate teequea pintsaroacaguempariji Aapani Irioshi? ¡Pamenavecaqueate yompajacojiquempi itsipatacaantajiquempiri, pigaanacaquea piquejetanaca imaica!

⁴¹ Aatimpajia atsipejiacaquea apeacajaiaca covaeguisherentsi iquejetacaantantajitacajica imaica, cotanquitsiquea iriatimpa teequea taaca opajita impeacaguempaji, manaqueate yatsipetacajitacari intati.

⁴² Ariquea ipitsocashitariqueate Jesoshi icanqueriquea:

—Jesoshi, pinquenquejacotajenaja naatimpa pincoraquetajeguete pimajirontapojaquempaguetei.

⁴³ Icanqueriquea Jesoshi:

—Noncantamajataquempiquea ocativa savincaguiteri pintsipatapojaquenaquea paraisoqui. §

Imetojanaqueguetei Jesoshi

(Mt. 27.45-56; Mr. 15.33-41; Jn. 19.28-30)

⁴⁴ Oraqueate iquenquetsataqueguetiquea imaica jac tampaticapoji catsirincaiteri, opitsecanaquequeate maasanopae otsitacaguitejavaetanacaroquea oraniqui arejetacovaeca ijaguitetanajiguetei. ⁴⁵ Teequea irivoreitsitajempaji catsirincaiteri. Iroompaquea oraquea omorena ticaamorenatanquitsica teemporoqui jocagatsica aatonijite iquijajitiro intsompoguiremajacaqui, ariquea opecotarejanaque tampaticaquea niganquisano ocantanaque sarararararara. ⁴⁶ Iriraquea Jesoshi icajemapanaquantiquea inirojencamajaca canca, icanque:

—Aapanii, paavajeroja noshire.

Irooquea icanqueguetei imaica, ariquea imetojanaque.

⁴⁷ Iriraquea imajironcaca 100 igoaretajiate Iromaquitica yamenavaquerogueti maasanopae, ishineventavaetanacariquea Aapani Irioshi icanque:

—Arimajaca irica irio comajamajatatsica, teequea taaca opaji impeacaimatempaji.

⁴⁸ Maasanojia choocajianquitsica oraniqui yamenamenaitavaquerogueti maasanopae, yoayoaitanajiquea itinquitinquineguintajianacaquea tin tin tin, ishimampojancaevajianacatari. ⁴⁹ Cotanquitsiquea irirajia tsatirica Jesoshi aisa manquigarentsijia oguijaguijajiquerica iquenajipojiguetei Garireaquei icatintiijiaca tiijacoñajiquea oraniqui yamenamenaiqueriquea.

Yojoquijitantajitariquea Jesoshi imperitamoroqui

(Mt. 27.57-61; Mr. 15.42-47; Jn. 19.38-42)

⁵⁰ Ichooacque aparo shirampari pajitatsica Jose yamajironcaca joriojia, itsipajiacari imajirotepae icapiocapinijiacaguetei. Iriguenti pintsatantatsica comajamajatatsica.

⁵¹ Tee inquejetempariji itsipapae majirontajiatatsica cantanquitsica irimetoje Jesoshi. Iroguenti yoguijaqueriquea Aapani Irioshi impeaquempaquea irimajirontajiaquempaca maasanojia. Ariguentiquea iquenapoji guinteninintsiqui Arimatea choocatanquitsica Joreaquei. ⁵² Iriatimpa yoashitanaqueriquea Pirato, icanqueriquea ininque irajaitanajero itsino Jesoshi. ⁵³ Ariquea yoanaque itsopajarejacotajiriquea yampiguiricocantajariquea iniromorena shipetari. Ariquea yaanajiriquea yojoquijitantajari imperitamoroqui, iroaquerasanoquea iqueecajitaquero mapichonquiinaqui, tequeratatiraja irojoquijitantajitempariji metojatsica. ⁵⁴ Oraquea imetojantacaca Jesoshi iroguentiquea savincaguiteri inetsanatsitantaroca joriojia maasanopae tequerataguetei arejetempaji imagorejantajitaca, irooshipoji arejetapojemparo, iroorijite iquijanaji catsirincaiteri.*

§ 23:43 paraiso. Irimetojaqueguetei tsaroverarica Aapani Irioshi, ari iroanaque ontaniqui paraisoqui, ari inchooacque irosati aapojempaguetei savincaguiteri intancorejantanajempaca. Pamenero aisa 2 Co. 12.2-4; Yonig. 2.7; Irc. 16.22. * 23:54 Iriraquea joriojia yamenavajiriguetei iquijanajiguetei catsirincaiteri ipeavajiroquea aapojaca imagorejantajitaca. Ariquea iquejetacaacaro otsipapae savincaguiteri.

⁵⁵ Oraquea manquigarentsijia quenaquenaitapojatsica Garireaquei oguijaguijaiquerica Jesoshi icoraquequegueti, oahoaitanaquequea amenajiaquitiro yojoquijivecarigueti, amenamajajiaqueriquea querocaca icojitaquerini ipitsantsajajiquerigueti. ⁵⁶ Iroompaquea ocoraquecoraqueitajiquea tsovironaqui qui onetsanapojajiroquea poncajaguetatsica iroguentiquea ontiritsinotantaquemparica Jesoshi. Ariquea omagorejajiaque savincaguiteri qui imagorejantajitaca[†] onetsanajiaqueroquea icanqueca Moishishini itioncacotanaqueca.

24

Ipochatanajigueti Jesoshi

(Mt. 28.1-10; Mr. 16.1-8; Jn. 20.1-10)

¹ Iroompaquea iroaquerguetei osavincaguitetamanaque parianajaroca semana* oahoaitanaque manquigarentsijia ontaniqui yojoquijijitaqueriguetei Jesoshi aajianaquequea poncajatsica onetsanajiaqueca. ² Ariquea arejerejeivetapojaca amenajipojaque-roquea mapi ticaacotantajivecarica jac tigaritaca tanarejanaque. ³ Oquijaquijaivetanaca cajaraguiteni tee anejeriji impitsantsajajempaji Amajirote Jesoshi. ⁴ Oquenquejapoji, teequea ontsateji quero oocani. Iroompaquea amenitsitariquea mavite shirampari[†] cantacovaequequeate iitsaarequi tsirencavaetaquequea tsiren. ⁵ Ariqueate ocoho-coitanaca otsaroamajatanaquequea oguerotsitanaca arejevaequitaro ovancaqui quepat-siqui. Iriatimpajia icanqueroquea:

—¿Quero oocani pamentaguetajatarica anijatsica acaniqui yojoquijipinijitiriguetei metojaripae? ⁶ Teequea anejeriji acaniqui, pochatanaji. Iintsijate pinquenquejajajero-jate icantajiaquempiguetei ichoocavetacaguetei ontaniqui Garireaquei, icantacotacaquea icanque: ⁷ ‘Iriraquea Irijanite Caquinte iracaantajiqueriquea irajajiaqueriquea cov-aeguishejiatsica irompajacojiaqueri, iroompaquea aapojajempaguetei 3 savincaguiteri impochatanaje.’

⁸ Ariquea iroatimpajia oquenquejajianajiroquea icanqueca Jesoshi. ⁹ Coajica oco-raquecoraqueitaji tsovironaqui qui ocamantajiapojiri itigarancaneja carajajatsica 11, aisa itsipajia. ¹⁰ Oratica camantajiapojaquea itigarancaneja iroguentijia Maria Magararaquitica, Joana aisa Maria iriniro Santiago aisa otsipapae otsipatsipaitanacaca. ¹¹ Cotanquitsiquea iriatimpajia teequea inquemisantajiguroji. Yamenajiaquequea man-ajia oquenquetsatamampeajiacaquea intati. ¹² Cotanquitsiquea Peerero icatiitsitanaca ishiamajatanaca yojoquijijitaqueriguetei Jesoshi, yamenamorovepojacaro intsompogu-i qui cajaraguiteniqueate, iroguentiquea yamenaguepoji omagopae yampiguiricacotan-tajivecarica. Ariquea yoanaji tsovironaqui qui, yamenanaquequea intati.

Yoajianaque mavite itsatacaane Jesoshi Emaoshiqui

(Mr. 16.12-13)

¹³ Iroompaquea coajica incajaranquiguitetanaqueguetei yoajianaque mavite itsat-acaane Emaoshiqui. Inquenantapojaquemparoguetei Jerosare, arica ocarataque 11 quiromeetero. ¹⁴ Iroompaquea ari yoayoaitanaquequea quenavoquirontsiqui iquen-quetsatavacaajianaca iquenquetsatacojianaqueri Jesoshi querocaca icojiquerini imeto-jajiqueriguetei. ¹⁵ Irooquea iquenquetsajianaqueguetei, icoraquepojaque Jesoshi iriatimpa-itsipatsipaitanacari yoayoaitanaqueguetei. ¹⁶ Yamenajiavecariqueate, cotanquitsiquea querocaquea icohicoitaquerini Aapani Irioshi aatonijite itsajiguitsi iriguentica Jesoshi. ¹⁷ Ariquea icantiriquea Jesoshi:

—¿Taaqueate piquenquetsatacojianaque imaica?

Iriatimpajia icatintiitanaca ishimampoanajiacaquea.

¹⁸ Aparo ipajita Quereopashi, icanquequea:

[†] 23:56 imagorejantajitaca. Irira joriojia imagorejapinijiaque saavaroqui. * 24:1 Iroguenti opariantanaja semana savincaguiteri tominco. [†] 24:4 Ocanqueguetei mavite shirampari, iriotaquequea irashivantijitete Aapani Irioshi, amenajiaqueri quempetaca caquinte.

—¿Arimpate aparoquea picocani aviatimpa teequea pinquemacoteroji iquenquetsa-tacojiaqueca maasano ontaniqui Jerosarequi? ¿Querocaquea picocani aviatimpa aparo pichoocataji teequea pinquemacoteroji chapinquitica?

¹⁹ Iriatimpa icantsitariquea:

—¿Taaqueate opajita chapinquitica?

Icantiriquea:

—Orate imetojaquegueti Jesoshi Nasarequitica. Iriatimpa iriguentiquea tsavetan-tatsica agavejamajatatsica nigaantaguequeroca ocaantantatsica intati, aisa itsamajati icanca itsatacaantaquegueti. Iriraquea Aapani Irioshi ishineventamajatacari oshe-qui, ariquea iquempejiaca maasanojia caquinteja. ²⁰ Iroompaquea iriraquea sasero-rotejia anaantajanquitsica aisa amajirojiate yaajianaqueriquea yojocapojiniri incan-tacaantajiaqueriquea irimetojaque, ariquea yompajacotsitari. ²¹ Iroaqueragueti na-menajiavecaquea ari irioji ompejiacajineca aatimpajia ishiraerijia aatonijite yashin-tajiajitsi itsipapae cameetsanijite anchoocajiajenijite intati. Imaicaquea yanaacovae-tanaca 3 savincaguiteri imetojaque. ²²⁻²³ Cotanquitsiquea oconoagarantajia man-qui-garentsijia notsipatsipaitacaca oahoitanaque incajaranquini pitsecaguitetirajagueti amenajiajaterime yojoquijijivecarigueti, cotanquitsiquea teequea anejeriji. Iroom-paquea ocoraquecoraqueitaji omintsaroajiaquenaquea ocamantajiapojanagueti ame-najiaquerigueti irashivantijitete Aapani Irioshi icamanquerogueti jac pochatanaji. ²⁴ Iroompaquea iconoagarantajiaquea notsipajiacaca yoayoaitaquitiquea iriatimpajia yamenajiaquitiro, icantajiaque onetsanamajapojiroqueate teequea anejeriji Jesoshi.

²⁵ Iroompaquea icantiriquea Jesoshi:

—¡Tequeratamajaca pintsatimajigueji! Teetari paitsitavaquemparoji maasano icanta-jiaveca tsavetantajiguiroca icanquerica Aapani Irioshi coramanitica. ²⁶ ¿Arimpaquea teequea incanteji iroquetitaquea irantsipevaequempaquea Quirishitotatsica maasano ocatica, coajica intsajitaqueri iriguenti Oganejencamajatatsica ariquea impeama-jatanaquempaquea imajirote maasanojia?

²⁷ Iroompaquea iparianacaroquea itsatacaajiaqueriquea maasanopae Itioncacaan-taqueca Aapani Irioshi tsavetacotsitacarica iriatimpa, ipariapanajantaroquea ition-cacotanaquea Moishishini ariquea iquejeguetaquaeroquea aisa itioncacojianaqueca tsavetantajiatatsica iriatimpajia, yoguisotojiaqueneriquea.

²⁸ Iroompaquea yarejerejeipojacaro Emaoshiniqui, yamenajiguiriquea Jesoshi arim-paquea iroanaqueme, ²⁹ cotanquitsiquea yaajiajavajiri icantiriquea:

—Intsija aatoja poguitsi. Noninque pimaimojianaquenaja naatimpajia, irootapojji-tarite ompitsecanaje.

Ariquea iquijaquijaitanaque intsompoguiqui itsipatsipaitanacari.

³⁰ Ariquea isavisaviique shitaponcarontsiqui irishecajiaquempaquea. Iriatimpa yait-sitaroquea pan yamanaqueriquea Iriri ishinevencaroquea, ariquea icotarejaqueroquea yojocajiaqueneriquea. ³¹ Ariquea oquejevetaca iroaqueragueti ipityaquirejanaque, it-sajianajiriquea iriguenti Jesoshi, cotanquitsiquea iriatimpa jac ipejaencatapitsatanajari.

³² Icantavacaajianaquea:

—Arisacanica pinquenquejajero incajaranqui ontaniqui quenavoquirontsiqui iquen-quetsatacaavacajigueti yoguisotoacajirogueti Itioncacaantaqueca Aapani Irioshi quero-quea ocojianacajini ochagashirentajanacajiquea ashirejiaqui oshinetacaavaetanacaji.

³³ Iroompaquea icaticatiitsitanaca yoayoaitanaji icantacantaitanaja Jerosarequi. Ya-menajiapojajiri itigarancanejia Jesoshi carajianquitsica 11, omporoguijajiacca itsipatsi-paitacari itsipapae. ³⁴ Iriatimpajia icantavaqueri:

—Arimajaca pochatanaji Amajirote, yonigaavetajari Shimo.

³⁵ Ariquea icamantajiaqueriquea iriatimpajia aisa querocaquea icojiaquerini itsipat-sipaitanacariagueti quenavoquirontsiqui teequea intsajigueriji, iroompaquea yamenaji-ajirigueti tsovironaquiqui icotarejaqueroqueti pan, ariquea itsatantajiacarica iriguenti Jesoshi.

Jesoshi yonigaajajari itsatacaanejia
(Mt. 28.16-20; Mr. 16.14-18; Jn. 20.19-23)

³⁶ Choocatirajaquea quenquetsatavacaajianatsi, taampinaquea icatiimojiapojajari Jesoshi, icantajiapojajiri:

—Pishinejianajempa.

³⁷ Iriatimpajia itsaroajianaque oshequi itsaroacaajianacariquea yamenajiaqueriquea iriocaja sashinti.

³⁸ Cotanquitsiquea Jesoshi icantiriquea:

—¿Taaca pitsaroacaimentajiaquena? ¿Quero ocoani piquenquejiaqueca imaica?

³⁹ Iintsija pameneja intati nacoqui aisa noguitiqui yompajacojiquenaguete. Naroguentiquea. Pinchagajiguenaja pamenamajataquenaniijite. Iriiraquea sashinti teetarite onchoocateji itsino aisa itonqui, tee inquejetenaji naatimpa imaica pamenajiaquenaguete.

⁴⁰ Irooquea icantajiaqueriguete imaica yamenacaajiaqueriquea iracoqui aisa iguitiqui yompajacojitaqueriguete. ⁴¹ Cotanquitsiquea yamenajiaqueriquea tee iragavejajiajempaji inquenquejavajero, caavijitarite ishinemajianaca yamenamenaitanaquequea intati, icantantacarica Jesoshi:

—¿Chooa pisheca?

⁴² Ariquea yojoquitsitanariquea shima jocavoquiri. ⁴³ Yaitsitariquea ishecatacari, yamenacojiaqueriquea maasanopae.

⁴⁴ Ariquea icantiriquea:

—Imaicaquea imaica maasanopae pamenajiaqueca irootaquequea notsatacajiaquepica coramani choocatirajanaguete notsipatsipaitaquempiguete, nocanqueguete onetsanamajatanauempaquea maasanopae itioncacoquenaguete Moishishini aisa itioncacojianaquenaguete tsavetantajiatsica aisa paperiqui Saremó itioncacotanaquenaguete Taavini.

⁴⁵ Iroompaquea iriatimpa yagavejacaajiaqueriquea intsamajajianaqueronijite taaca opajitapae ocantacoqueca Itioncacaantaqueca Aapani Irioshi, icanqueriquea:

⁴⁶ —Ariquea oquejetaquea imaica itioncacojiqueroguete ocanque irantsipevaequempa Quirishitotsica irimetojaque, cotanquitsiquea aapojempaguete 3 savincaguiteri impochatanaje. ⁴⁷ Ariquea intigarancaqueri tsavetantajiatsica, intsvetantimojiaqueriquea maasano caquinteguetatsica incantajiaqueriquea irovashiantajianajero ipeacaaguishevecaca covaequisherentsi incantashitatijaianajempaquea cameetsanijite irishetacojiajerinijite Aapani Irioshi aatonijite icatsimatimentiritsi icovaequishejiacaguete. Ariquea omparianaquemparoquea Jerosarequi, onquejetaquempaquea imaica arejevaetanaquemparoquea onsitacaguitejavaequemparoja maasanopae quepatsi. ⁴⁸ Aviatimpajia pamenamajajiaqueroquea maasanopae, imaica aviatimpa tsavetantajiaqueroneca. ⁴⁹ Naatimpa nontigaranquimojiaquempiriquea icantsitacaca Aapani intigaranquimojiaquempi, cotanquitsiquea pinchoocajiguetaja acaniqui Jerosarequi aatota poapoaiti osamani. Poguijajiguetaja intigaranquimojiaquempiri Aapani agavejacaajiapojempineca poneanquitsineca jenoqui.

Yatsomajanajaguete Jesoshi

(Mr. 16.19-20)

⁵⁰ Iroompaquea Jesoshi itsipatsipaitanacari itsatacaanejia irooshipojiguete Vetani-aqui. Ariquea icantajempequitanaja iraco yamanacoventajianaqueriquea. ⁵¹ Irooquea iquejetanaqueroguete imaica yamanacoventajianaqueriguete yamenajiguiriquea yatsomajanaja yoanaque, yaajitanajiri jenoqui inquitequi. ⁵² Itsarotentajavajari, coajica yoayoaitanaji Jerosarequi ishinejianaca icanca. ⁵³ Icantacoguitani yoayoaitapinijigui teemporoqui ishineventajiacari Aapani Irioshi.

QUENQUETSATSARENTSI OGANEJENCATATSICA ITIONCAQUECA JOANCA

Antsatantaquemparoca

Ocatia iroguenti antsatantaquemparoca itioncaqueca Joanca irijanite Severeo itioncacaquerigueti Jesoquirishito. Joanca iriguenti jorio guintenitanquitsica quepatsiqui icantajitica Garirea. Iriguenti itigarancane Jesoshi. Itsipatacari iriguentijeguite icantajitica Santiago iriguentijia quitsatacotirica shima tequeratagueti incajemajigueri Jesoshi iroguijatanaqueri. Irocashi itsavetacotaqueri Joanca paperiqui icantajitica *Yantajiguica Itigarancanejia Jesoshi* (Ya. 3.1–4.22). Itsipatacari Jesoshi itsatacangueti, cotanquitsi itsavetantacagueti quejetacaquea irio tioncaquero itsipa. Pampatsajavantacotaquerigueti itsatacane Jesoshi ipintsamajatacaca, iriotaque Joanca irijanite Severeo, cotanquitsiquea tee incanteji “naroguenti”. Chooa itsipa Joanca irijanite Sacaria, iriotaquequea icantajitica Joanca Viñacajatantatsica.

Iquenquejajitaque itioncaquero ocatia paperi ichooaquegueti guinteninintsiqui icantajitica Epeso. Tecatsi tsamajaterone ajagantsini itioncaqueroqueti, cotanquitsi chooa quenquejanquitsica arica itioncaquero ajagantsiniqui 85 irooca otsipa ajagantsini arejevaetacaro 98. Irirajia Maricoshi, Irocashi aisa Mateo itioncaciaquero ivaperitepae tsavetacoquerica Jesoshi tequeratagueti intionqueroji Joanca ocatia. Itioncaquero 3 paperipae cacaajaniquitanquitsica tequeratagueti intionquero ocatia tsavetacoquerica Jesoquirishito. Oratica cacaajaniquitanquitsica opajijiga 1 *Joanca*, 2 *Joanca*, 3 *Joanca*. Impojtapojatsica itioncaquero aisa paperi icantajitica *Yonigaajiguetica Joanca*.

Itioncaquegueti Joanca jeroquea inintamajataque antsajiaque: iriraquea Jesoshi iriovetaca caquinte cotanquitsi iriguenti Irioshi. Joanca itsavetacoguetaquero yamejigaca joriojia, irootaque atsatanacaca itioncaqueneri teeca iriojia joriojia cameetsaniji intsatanajiaquempaca iriraquea Jesoquirishito irio Meshiashi itigarancaqueca Aapani Irioshi, iriotaque irijanite Aapani Irioshi (Jn. 20.31). Irootaquequea caarica ipariantaro intsavetacotaquero ivoantacaca Jesoshi, iroguenti iparianacaro icamantajiacaji iriguenti Jesoshi peacaacaroca maasano. Irio tsavetacomajaquero ca iquejetacaacagueti Jesoshi itsatacantaquegueti: Jesoshi iriguenti Irovejaniquite Aapani Irioshi (1.29, 36); Jesoshi iriguenti pan anijacaantantatsica (6.35, 47-51); iriguenti Tsirencari (1.4-12; 13.19; 8.12; 9.5); iriguenti cameetsari quempoguijamajiguirica oveja (10.11-15); iriguenti quejecaroca quenavoquironsi (14.6); iriguenti quejecaroca ovorentsamajaca ova (15.1-8). Irira Joanca irio tsavetacomajaquero oratica savincaguiteri iroshipojigueti irime-toje Jesoshi, itsavetacomajaquero yantaguetaqueca aisa itsatacantaqueca pitsecariqui oratica savincaguiteri (capitoropae 13–17) aisa coajica ipochatanajigueti (cap. 20–21).

Iparianacaroqueate Joanca itsavetanqueriqueate irira icantajitica Quenquetsatsarentsi

¹ Iroaqueragueti igantaga ichooataque Quenquetsatsarentsi.* Irira Quenquetsatsarentsi itsipatacariqueate Aapani Irioshi. Irira Quenquetsatsarentsi, iriotaque Irioshi. ² Irio itsipatacaca Aapani Irioshi iroaqueragueti. ³ Iriotaquequeate peacaaguetaacaro maasano choocaguetaatsica. Tee onchoocatashitempajiqueate teeca impeacaguemparo iriatimpa, aisa aatomegueti ichooatime iriatimpa aato ochoocaguetime. ⁴ Iriatimpa iriguentiqueate anijacaantantatsica, aisa iriratica anijacaantantatsica iriguentiquea tsirencacojiaquerica caquinteja.† ⁵ Iriraquea Tsirencari itsirencaque pitsecariqui, cotanquitsi pitsecari tee agavejavajeriji.

* 1:1 Irira icantajitica Quenquetsatsarentsi iriotaque Jesoquirishito. Pamenero otsapa 17, jero aisa 1 Jn. 1.1-3.

† 1:4 tsirencacojiaquerica caquinteja. Iroguentiqueate icoraquetashitaque mananjite intsatacaciaquerinijite teeca intsajavetempaji quempeaquea manaca itsirencacojiaqueriqueate pitsecacojianquitsica.

⁶ Ariqueate ichoocatini caquinte itigarancaqueca Aapani Irioshi, ipajita Joanca.
⁷ Iroguentiqueate icoraquetashitaque intsavetanqueriqueate irira Tsirencari, cameetsanijite iraventajivaquemparinijite maasano. ⁸ Iriraqueate Joanca teequeate irio Tsirencari, iroguenti icoraquetashitaque intsavetanqueri Tsirencari.
⁹ Icoraquetapojaquequea quepatsiqui irira Tsirencarimajaca tsirencacojiaquerica maasano caquinteja.

¹⁰ Ichocataque quepatsiqui, iriotaquequea peacaavetacaro quepatsi, cotanquitsiquea irirajia quepatsiquitica teequea intsajivajeriji. ¹¹ Icoraquetantavetacaroquea quepatsi yashincaca iriatimpa, cotanquitsi irirajia yashintajiacaca teequeate irishineventajivajempariji. ¹² Cotanquitsi maasano shineventajivacarica, aventacaroca ivajiro, irio icantacojiaqueca cameetsa impeaquempa irijanijiate Aapani Irioshi. ¹³ Oraqueate ipeacaajiacarigueti irijanijiate Aapani Irioshi teequea onquempetemparoji yoacaantigueti caquinte, aisa teequea onquempetemparoji inintigueti caquinte iroacaantaque, iriguentitari nintanquitsi Aapani Irioshi irijanintantaquemparica.

¹⁴ Iriraqueate icantajitica Quenquetsatsarentsi icaquintetapojaque iguintenitimojiapojacaji. Namenajiaqueriqueate yoganejencamajata, iriguentitarite Irijanite Aapani Irioshi apaniroquea icoca iriatimpa, caavijiquea icavintsajantavaetaque, aisa teequeate iramatavijanteji. ¹⁵ Iriraqueate Joanca itsavetacotaquerigueti iririjencani icanti: “Iriguentitarite irira noquenquetsatocotaqueca iroaqueragueti nocamantajiaquempiqueate nocanti: ‘Iriraqueate impoitapojenaneca yanaaquenaquea, iriquetitari choocatatsi.’ ”

¹⁶ Iriatimpaqueate caaviji icavintsajantamajati, icancani icavintsajapinijiacaji aatimpajia maasano. ¹⁷ Aritarite oraquea Cantacaantantsi, irio Moishishini yojocacaitaquene, yogaaqueneri itsipajia; orampani cavintsajantamajatagantsi aisa iroomajatacsica, iriguentiquea Jesoquirishito amaquero. ¹⁸ Tecatsi nejmaterine Aapani Irioshi, cotanquitsi irira Irijanite apatirotica itsipamajatacaca itsatacaajiacajiqueate quero icotani Irii.

Joanca Viñacajatantsica itsavetanqueriqueate Jesoshi

(Mt. 3.11-12; Mr. 1.7-8; Irc. 3.15-17)

¹⁹ Iriraqueate joriojia Jerosarequitica itigarancajiaqueriqueate saserrotejia jerijia aisa irevitapae incoacojiaqueri Joanca taaquea inaque.

²⁰ Ariqueate teequeate iromanacotempaji iriatimpa, tampatica yoaquero icanquerica, icamantamajajivaqueri icantajiguiri:

—Tee naroguenti Quirishito.‡

²¹ Ariqueate yapijitajiriquea aisa icantajiguiriquea:

—Iroosacanicate, ¿taampate aviguenti? ¿Aviguenticajate Iriashini?

Icantiri:

—Tee naro Iriashini.

—¿Aviguenti irira tsavetantatsica nagamajajivacaca?

—Tee.

²² Ariqueate yapijitsitajariquea aisa icantajiguiriquea:

—¿Taampate aviguenti? Iintsijate poguisotoguenaro noncamantantajiapojemparica tigarancaquenaca. ¿Querocagueti pincanqueni? Intsija pincamantacotempa.

²³ Ariqueate icantajiaqueriqueate Joanca:

—Naroguentiqueate quenquetsatsica oquitamampororoipojaquegueti niririjencani, nocantapinitaquequea: ‘Pintanarejagueteneri iguenavoquiro Amajirote ontampaticapoquitantanaquempaca’,§ irootaquetari itioncaqueca tsavetantatsica Isaiashini coramani.

²⁴ Iriraqueate coacojiaquerica Joanca iriguentiquea tigarancajiaqueri pariseojia.

²⁵ Ariqueate icantajiaquequea:

‡ 1:20 Quirishito ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraqueataque impeaquempa imajirote ompejiaquemparineca. § 1:23 Icanquegueti Pintanarejagueteneri iguenavoquiro Amajirote ontampaticapoquitantanaquempaca, ocantacotaque irinetsanajiguempa, incomajatashijivaquempariqueate Amajirote. Is. 40.3.

—Iroosacanicate teesacanicate aviguenti Quirishito, tee aviguenti Iriashi, aisa teequeate aviguenti tsavetantatsica coraquetanquitsineca. ¿Queroqueate ocotacani piviñacajatantacarica agonorojia?

²⁶ Icanti Joanca:

—Naatimpa noviñacajatantacaro oja, cotanquitsi chooqueate conoaquemfica teeca pintsajigueriji. ²⁷ Iriguentitarite imoitapojenaneca, cotanquitsi iriqueti choocatatsi. Caaviji yanaaquenaquea, aatotarite noquempejitaritsiquea iriatimpa nompeaquempame amiquerineca noishorejacoquerime igaviguitire.

²⁸ Irirajiaqueate coacojiaquerica ariquea yoashijianaqueriqueate Vetaniaqui, choocatatsica intatiquero Jororanequi, aritari iviñacajatantaque Joanca oraniqui.

Jesoshi iriguentiqueate Irovejaniquite Aapani Irioshi

²⁹ Ariqueate osavincaguitetanajigueti irira Joanca yamenavaqueriqueate Jesoshi icoraquepojaquegueti icanti: “Jeri irinta Irovejaniquite Aapani Irioshi shejiaquenerineca iguempevaere caquinteja. ³⁰ Iriotaquequeate notsavetantaqueca chapinqui, nocantiqueate: ‘Incoraquetaque shirampari imoitapojenaneca yanaaquenaquea, iriquetitari choocatatsi.’ ³¹ Naatimpaquea aisa teequea nontsavetempariji, cotanquitsi nocoraquetaque noviñacajatantaguetantacaro oja cameetsanijite intsajiaquerinijite maasano ishiraerijia.”

³² Ariqueate icanti aisa Joanca: “Namenavaqueri Ishire Aapani Irioshi iponeapojaca jenoqui inquitequi iquejetapojacari emoreni, yampiguiricashipojacariquea Jesoshi, ichoocapojiri. ³³ Iroaqueraguete tee nontsavetempariji, cotanquitsi iriraquea tigarancaquenaca noviñacajatantacaro oja icanquenaquea: ‘Quericaca pamenavaqueri irampiguiricashitapojempari Noshire inchoocapojeri, iriotaque viñacajatantacari Noshire.’ ³⁴ Namenamajatavaqueriqueate, irootaquequeate nocantantacaca iriguentiqueate Irijanite Aapani Irioshi.”

Iriquetica ipeajiaqueca Jesoshi itsatacaane

³⁵ Ariqueate osavincaguitetanajigueti iriraqueate Joanca ichoocataji oraniqui itsipajiacari mavite itsatacaane. ³⁶ Iroompaqueate yamenavaqueri Jesoshi yavisanaque, icanti: —Jeri irinta Irovejaniquite Aapani Irioshi.

³⁷ Iroompaqueate iquemajiavaquitiguiriqueate itsatacaane mavite ariqueate yoguijaguijaitanaqueri Jesoshi. ³⁸ Ipitsocanacaqueate Jesoshi yamenavaqueri yoguijaguijaipojaqueriqueate icantajiguiriquea:

—¿Taate pininque?

Iriatimpajia icantajiguiriquea:

—Tsatacaantantatsica, ¿quero pichoocaqueni?

³⁹ Icanti Jesoshi:

—Jameja pamenaquitero.

Ariqueate yoajianaque yamenaquero, ariqueate isaviquimotapanajantiri oratica savincaguiteri, iroorijite tsaparoncaguitetanaja catsirincaiteri. ⁴⁰ Apaniroqueate quemavaquerica Joanca oguijatanaquerica Jesoshi, iriguenti Antirishi iriguentijeguite Shimo Peerero. ⁴¹ Ariqueate iriatimpa iroqueti yoaquiti icoaguequitiri iriguentijeguite, inejapojaqueriqueate icampojeri:

—Nonejajiaqueri Meshiashi —ocantaque: “Quirishito.”*

⁴² Ariqueate itsipatanacari ichoocaquegueti Jesoshi. Iroompa yamenavaqueriguete icantiri:

—Aviguenti Shimo, irijanite Jonashi. Imaicaquea imaica pincantajempa Sepashi —ocanque: “Peerero”.†

* 1:41 Meshiashi oponeaca iguenquetsatsarequi evereo aisa arameo. Quirishito oponeaca iguenquetsatsarequi guiriego. Mavite ocanque “Ishaguijitaqueca” aisa “Icoguiaqueca”, irio yoguijajiaqueca ishiraerijia incoraqueataque impeaquempa imajirote ompejiaquemparineca. † 1:42 Sepashi aisa Peerero. Oraqueate ivajiro Peerero manaqueate ocantaque “mapi”. Iroguenti iguenquetsatsarequi guiriego. Iguenquetsatsarequi arameojia Sepashi ocantaque “mapi”.

⁴³ Osavincaguitetanajiguetiqueate iroanaje Jesoshi Garireaquei. Ariquea inejaqueri Jeripe icantiriquea:

—Poguijatanaquena.

⁴⁴ Irraqueate Jeripe ari iguintenita Vetsairaquei iguintenitaguete Antirishi aisa Peerero. ⁴⁵ Ariqueate irira Jeripe yoanaquequeate icoaguequitiri Natanaere, iroompaqueate inejapojatiguiiri icantiri:

—Nonejajiaqueriquea irira itioncacotanaqueca Moishishini coramani jerijia aisa itsipa tsavetantajiatsica. Iriguentiqueate Jesoshi Nasarequitica, irijanite Jose.

⁴⁶ Icantiriqueate Natanaere:

—¿Choocampaca cameetsatatsica poneanquitsica Nasarequi?

Icantiriqueate Jeripe:

—Caacatejate pamene.

⁴⁷ Irraquea Jesoshi iroompaquea inejavaquitatiguiiri icoraquepojaqueguete Natanaere iquenquetsatocotavaqueri icanti:

—Jeri ishiraerimajaca. Iriatimpa tee iramatavijanteji.

⁴⁸ Icantiri Natanaere:

—¿Queroquea picocani pitsatantavaquenaca?

Icantiriqueate Jesoshi:

—Nonejitsiquempiquea incajaranqui pitsimampeacaroguete iguera tequerataguete incajemempiji Jeripe.

⁴⁹ Ariqueate icantanaquequeate Natanaere:

—Tsatacaantantatsica, aviguentiqueate Irijanite Aapani Irioshi, aviguentiqueate Imajirote ishiraerijia.

⁵⁰ Icantiri Jesoshi:

—Piquemaquitatigana nocanquempiguete nonejaquempi pitsimampeacaroguete iguera ¿irootaquempa pitsatantapojacaroca picanquenaca imaica? Coajicaqueate pamenaguetavaqueroqueate otsipapae anaqueroneca oca.

⁵¹ Ariqueate icantiri aisa Jesoshi:

—Imaicaquea noncamantamajajiaquempi, coajicaqueate pamenajavaqueroquea inquite ontanarejanaquempaguete. Irraqueate irashivantijitete Aapani Irioshi iroaroaitanaque jenoqui, ariquea iraguijiguijitashitapojeri Irijanite Caquinte.‡

2

Iparianacaroguete imapocaquero Jesoshi yonigaanqueroquea yagavejica

¹ Aapojacaguete 3 savincaguiteri ishineventajiacaro imanquigacaguete shirampari Canaaqui Garireaquei. Ariqueate ochoocataquequea oraniqui iriniro Jesoshi.

² Icajemacaantajiqueriqueate Jesoshi jerijiaquea aisa itsatacaanejia. ³ Ariqueate oteroncanacaqueate vinoja. Oraqueate iriniro Jesoshi oashitanaqueriquea ocamantaqueri ocantiri:

—Teroncanaca vinoja.

⁴ Cotanquitsiqueate Jesoshi icantiro:

—¿Querocate ocotacani, manquigarentsi, picantantaquenaca naatimpa? Tequeratatarajanica aguempaji nonigaantaquempa.

⁵ Cotanquitsiqueate iroatimpa ocantajiguiriqueate quitajatantiroca vinoja:

—Pinetsanatavaqueroqueate taaca opaji incanquempica.

⁶ Ariqueate choacaqueate oraniqui 6 inirotsentseinapae chomo ipeacaantajitaroca mapi, iroguenti yamejiga iquivantapinijiacaca joriojia. Apaniropaqueate otserajaguetacar oja arica 50 ritoro, arica 70. ⁷ Ariqueate Jesoshi icantajiguiriqueate quitajatantiroca vinoja:

—Pishatecajaguetajero oja chomoqui.

Ariqueate ishatecajaguetajiro opancojaguetanajaroquea intati. ⁸ Ariqueate icantajiguiriqueate:

‡ 1:51 Icanqueguete Jesoshi Irijanite Caquinte mana icantacotaca iriatimpa, mana oquejetaca icantacoqueri itsipa. Iriotaque Quirishito Meshiantatsica quenapojanquitsica jenoqui inquitequi, icaquintetapojaguetari ivoapojaque.

—Imaicaquea imaica pinquitajate capichaaaji paacotanaqueneriquea vetsicacaanta-
queroca ashecajiacaguetei iramenanquemparoquea.

Ariquea yaacojianaqueneri. ⁹ Yamenantavacaroqueate oja peananquitsica vinoja,
teequeate intsateroji quero oponeacani. Iriguentijaquea tsajiaqueroqueate quitajatan-
tiroca, iriotari tserajajiaqueroca oja iroaqueraguetei. Iroompaqueate imiraquitigaro-
queate icajemaqueriqueate iriaqueraca manquigatananquitsica, ¹⁰ icantiri:

—Iroorijite amejigaro iroquetica ajivajiguiro cameetsajamajatanquitsica vinoja, coa-
jicaqueate iquemajianacaguetei irooqueate iquitajaitaque teesaconaca oncameetsajama-
jateji. ¿Queroqueate picotacani aviatimpa teequeate ari pinquejetero imaica? Manaquea
iroquetiquea pimirajica teesaconaca oncameetsajamajateji, irooquea pitsoteajica
cameetsajamajatanquitsica.

¹¹ Ocatita oacaantantatsica intati onigaantaqueroca iragavejane, iroguenti jivatan-
quitsica imapocaqueca Jesoshi, ipeacaacaroquea ontaniqui Canaaqui choocatatsica
Garireaquei, yonigaantantacaroca iroganejencare, ariqueate iquemisantajiaqueri itsata-
caanejia, yaventajianacari.

¹² Ariquea yoanajiquea Caperenaqui, itsipatanacaro iriniro, iriguentijeguitepae,
jerijia aisa itsatacaanejia. Ariqueate ichoocajiaque oraniqui aparopae savincaguiteri.

Jesoshi yoguisotojiaqueriquea jocantaguetirica viratsi teemproqui

(Mt. 21.12-13; Mr. 11.15-18; Irc. 19.45-46)

¹³ Ariqueate oquempejipojiguetei Paashicoa ishineventajiacaca joriojia, yoanaquequea
Jesoshi Jerosarequi. ¹⁴ Ariqueate yoavetanacaguetei teemproqui itsarotentajitar-
ica Aapani Irioshi iriguentiqueate inejapoji jocantaguetirica caapironcaari aisa oveja
jeriqueate aisa jocantaguetirica emoreni, ichoocajiaque oniganquirequi. Ariqueate
ichoocajiaquequea aisa oguipiantaguetirica imentaquipae. ¹⁵ Iriiraqueate Jesoshi
yaanaque peatsa, yampitaguiquero ishincantajiacariqueate maasano, yoguivorocajia-
queriqueate yoguisotojiaqueri itsipatacaantaguecariquea irovejatepae aisa igaapiron-
caarite. Ipishoncavoncaquitsiqueriqueate imentaquitsitepae oguipiantajiguirica imen-
taquipae, yapitaquiacoguequero ishitaponcaropae. ¹⁶ Ariqueate icantajiaqueriqueate
jocantajiguirica emoreni:

—Paajianajeri pemorenite ontaniqui sotsiqui. Ocaqueate itsovironaquite Aapani
aatoqueate piquejetacagaro yojocantantajigueteitiroguetei ajaararontsi.

¹⁷ Iriiraqueate itsatacaane ariqueate iquenquejajianaqueroqueate ocanqueca ition-
cacojiquerogueti ocanti: “Nontsaneamajaquemparoqueate pitsovironaquite inco-
vaeguishejitaquerogueti, osemacaamajatanaquena.” ¹⁸ Iriirajia joriojia icantsiji-
gariqueate:

—¿Taaquea cantaquempi piquejetancaroca imaica? Irioca cantaquempi Aapani
Irioshi iintsijate ponigaguenaroja oacaanaquenanea intati irooquea nontsatantajiaque-
mpaca iriguenti tigarancaquempi.

¹⁹ Icantiriqueate Jesoshi:

—Iintsija pisoveguero ocatita teempro, ariqueate aapojempaguetei 3 savincaguiteri
nontsitacajeroquea aisa.

²⁰ Icantajiguiriqueate joriojia:

—Jmm aricampa, oraquea ocatita teempro ariquea yatsipejiacarero yantajiguironi
46 ajagantsini. ¿Queroquea oncoquempani pintsitaquitsitantajemparoaca aviatimpa 3
savincaguiteri?

²¹ Cotanquitsiqueate oraquea icanqueguetei “teempro” mana icantacotaca iriatimpa
iquejetacaaca intati, iroguentiquea icantacotaque itsino. ²² Irootaquequeate irirajia
itsatacaanejia yamenajiaquerogueti coajica ipochatanajiguetei imetovetacaguetei iquen-
quejajianajiroqueate ocatita icanqueca iroaqueraguetei, ariqueate itsajiaque arimaja
ocantamajataque Itioncacaantaqueca Aapani Irioshi coramani aisa maasano icantajia-
querica Jesoshi.

Jesoshi itsajiguiri maasano

²³ Ariqueate aapojacaguetei Paashicoa choocatirajaqueate Jesoshi Jerosarequi,
ariqueate oraniqui yantaguetaquero cameetsaguetatsica oacaantantanaque

intati, yonigaajiaqueri yagavejica. Inejajiavaqueriquea irootaquequeate iquemisantantajanacarica oshequini, yaventajanacari.

²⁴ Cotanquitsiqueate Jesoshi itsatavaqueriquea tee arimaja inquemisantamajateriji maasano, itsajiguiritari maasano caquintejiatsica. ²⁵ Teequeate incogumentempaji incamantajitaqueri quero icojiacani, inchiqiojitsitari itsaque iriatimpa, itsamajatirotari maasano iquenquejajiaqueca caquinte.

3

Jesoshi aisa Nicoremo

¹ Chooaqueate pariseo icantajitica Nicoremo, iriguenti majirontatsica tsipajiacarica itsipajia imajirojiate joriojia. ² Iriatimpaqueate yoanincanaquequea tsiteniriqui irinejeri Jesoshi, ariquea icampojaqueri:

—Tsatacaantantatsica, notsajiaquempi piponeaca Aapaniqui Irioshiqui pintsatacaajiaquenaniijite, teenica inchoocateji agavejatsineca irantaque oacaantantatsica intati inquejetaquempiqueate aviatimpa aatogueti iriguenti tsipatari Aapani Irioshi.

³ Iriaqueate Jesoshi icantiri:

—Imaica noncamantamajataquempi, quericaca aatogueti ivojai aisa, aato yagaveji inejiro imajirontagueti Aapani Irioshi.

⁴ Icantiri Nicoremo:

—¿Querocampate incotanajempani quenquevari irivoantajempacate aisa? ¿Arimpate iragavejaque impianajero intsompogui omotijaqui irinero irivoantajempacate?

⁵ Icantiriqueate Jesoshi:

—Imaicaquea noncamantamajaquempiquea, irira caarica voantaro oja,* caarica aisa ivoashirentica Ishire Aapani Irioshi, aatoquea yagaveji iquiji imajirontagueti Aapani Irioshi. ⁶ Iriaquea ovoaqueca tsinotsi, tsinotsi inaque; iriraquea ivoaqueca Ishire Aapani Irioshi, shiretsi inaque. ⁷ Aatoquea poanaque intati nocamantaquempigueti: ‘Picogui-mentaca pivojajae.’ ⁸ Iriaquea choviga itampijataque querocagueti inintaque. Ariquea piquemavaqueri itampijatigueti ipojimajencatanaque, cotanquitsi teequea pintsateriji quero iquenajencatapoji aisa quero irojaencatanaqueni. Ariquea iquejetaca maasano ivoaqueca Ishire Aapani Irioshi.

⁹ Icantsitanajariqueate aisa Nicoremo:

—¿Queroquea ococani oca?

¹⁰ Icantsitanajariqueate aisa Jesoshi:

—Arivetacaquea aviguenti tsatacaajiguirica ishiraerijia ¿arimpate tee pintsateroji oca? ¹¹ Arimajaquea noncamantamajaquempi, manaquea nocamantajavetaquempiro notsajiguica naatimpajia jeroquea aisa nonejaguetica, cotanquitsiquea aviatimpajia teequea pinquemisantajivaqueroji notsatacaajivequempica. ¹² Imaica nocamantajavetaquempiqueate inejajigueticacanicu quepatsiqui, cotanquitsi teequeate pinquemisantajivaquenaji. ¿Arimpate pinquemisantajivaquena nonquenquetsatacaajivequempirogueti choocaguetsatsica inquitequi? ¹³ Teequea inchoocateji oanankuetsatsica jenoqui inquitequi, apaniro irira poneankuetsatsica inquitequi coraquetankuetsatsica isaviji. Irio nocantacotaque, Irijanite Caquinte.† ¹⁴ Coramani iriraqueate Moishishini yogatiacotaqueriqueate quejevetarica camaarini ontaniqui oquitamampororoipojaquegueti.‡ Ariqueate inquejetacaajitaqueri irira Irijanite Caquinte irogatiacojitaqueriquea coajica, ¹⁵ aatoniji ipejaiga maasano aventajiaquemparineca, incoguitempanti inchoocaguiteni.

* 3:5 Oraquea icantajitigueti acaniqui voantaroca oja, chooca iquejetacaajitacaca: (1) Chooa cantatsica iriguenti icantacojitaque viñacajatatsica yovashiantirogueti igovaeguishere. (2) Chooa cantatsica iroguenti icantacojitaque inianquiare chaajaniquiri. (3) Chooa cantatsica iriguenti icantacojitaque Ishire Aapani Irioshi, anejiqueritari Ishire Aapani Irioshi iquejetacaajitacari oja. Pamenero Jn. 7.38, 39; 4.14. † 3:13 Chooa otsipapae paperi ocanti: Irijanite Caquinte choocatatsica inquitequi. ‡ 3:14 Coramani ontaniqui oquitamampororoipojaquegueti yatsicajiaqueriqueate joriojiani oshequi camaarinipae. Ariqueate icanqueri Aapani Irioshi Moishishini: “Iintsija pinquejetacaguempica camaarini, pogatiacoteri inchapojaniquiqui iramenajiaqueriniji pigonorojia, aatoniji imetojajigui maasano amenajiaquerineca.” Ariqueate yaaque Moishishini voronquise, ipeacaacari camaarini, yogatiacoqueri, ipeantajanajaca oshequi igonorojia.

¹⁶ “Aapani Irioshi caaviji ipintsamajataru maasano caquintejiatsica, irootaque-quea ipantajiacarica Irijanite irapatiroritsite irimetojaventajiaqueri, aatonijite ipejajaa maasano aventajiaquemparineca, incoguitempaniqueate iranijajiaje. ¹⁷ Teenica irooquee intigaranquimenteru Irijanite acaniqui quepatsiqui incantacaantajiaqueriqueate caquintepae iroajianaque camorecariqui, iroguentiquea itigaranquimenteru irajajateri. ¹⁸ Quericaca aventaquemparineca aato icatsimatimentajitiri igovaeguishere, iriraqueate teeca iraventempariji irioquee icantacotsica Aapani incatsimatimentajiqueru igovaeguishere, teenica iraventemparoji ivajiro Irijanite Aapani Irioshi irapatiroritsite. ¹⁹ Jeroquee icantimentantajiacarica: icoraquevetaca Tsirencari quepatsiqui, cotanquitsiquea irirajia caquinteji iroguenti inintamajajianaque pitsecari, teequee irishineventajiaquempariji Tsirencari, covaeguishetacataru yantajiaqueca. ²⁰ Maasanotaru antaguishejiguiroca quempevaerentsi isemamajajiacaro tsirencari, teequee incoraquetashitero aatoniji inejitajitiri yantaguishejiaqueca. ²¹ Cotanquitsi iriraquee comajamajatanquitsica icoraquetashitaquero tsirencari, cameetsanijite irinejitsijiqueriqueate yantaqueca intsajitaquerinijite iriguenti agavejacaqueru Aapani Irioshi.”

Joanca Viñacajatantsica itsavetantajiriquea Jesoshi

²² Ariqueate yoanaque Jesoshi Joreaque itsipatsipaitanacariquee itsatacaanejia. Ariqueate ichoocajiaque oraniqui oshequi savincaguiteru iviñacajatantajiaquequea. ²³ Ariqueate iquejetaca irira Joanca iviñacajatantaquequea Enonequi quempeji Sarime, choocatarite oshequi oja oraniqui. Icoraquetashipinijiaqueriqueate oshequi caquinte iviñacajiaqueriquea. ²⁴ Tequeratirajataru irashitacojiteriji Joanca santanaqui. ²⁵ Ariqueate irira itsatacaanejia Joanca itsipajiacaru itsipa irapijorioteni iquenquetsatavacaaca iquenquetsatocotaquero ora taaca opajita caavijica osaancanti. ²⁶ Ariqueate yoashijianaqueriquea Joanca icantajiguiri:

—Tsatacaantantatsica, iriraqueate pitsipatacaca chapinqui ontaniqui intatiqueroqui Jororanequi pitsavetantaqueca imaica choocaquea iviñacajatantaque. Yoashijianaqueriquea maasano.

²⁷ Icantajiguiri queate Joanca:

—Teequeate inchoocatimateji agavejanquitsineca inchiqioji aatoguete yagavejacaguiri irira choocatanquitsica inquitequi. ²⁸ Aviguentiquea quemajiaquena nocamantaquempiguete teequeate naroguente Quirishito, iroguentiquea itigaranquimenteru Aapani Irioshi nojivataqueru. ²⁹ Pamenerija iriraqueate iriaqueraca manquigatanquitsica iriotaque ashintamajacaro imanquigare. Iriraquee itsipatacaca manaquea itsipatacari intati iquemisanqueriqueate iquenquetsaqueguete, ishinevencariquee intati. Ariquee noquejetaca naatimpa noshinevencariquee namenaqueriguete yoashijianaqueru. ³⁰ Imaica arimaja oncotanaquempa iriatimpa arimpaquee iranaantamajatanaque, naatimpa aatosaconaquea nanaantaji.

³¹ “Iriraqueate poneanquitsica jenoqui yanaamajataqueru maasano. Iriraqueate quepatsiquitica iquejejiacariqueate igonorjia, manaqueate iquenquetsatocotaquero inejaguetica quepatsiqui. Iriraqueate poneanquitsica inquitequi yanaamajataqueru maasano, ³² iroguenti itsavetantagueque inejaguetica, iquemaguetica, cotanquitsiquea tee inquemisantajitavaqueroji itsavetantaqueca. ³³ Cotanquitsiquea quericaca quemisantamajatavaqueroneca incanquequee arimajaquea icantamajataque Aapani Irioshi. ³⁴ Aritarite iriraquee itigarancaqueca Aapani Irioshi iquenquetsataque icanqueca Aapani Irioshi, teenica intsaneguempariji Aapani Irioshi Ishire. ³⁵ Aapani Irioshi ipintsamajatacari Irijanite, yojocaqueneriquea maasano choocaguetsica. ³⁶ Iriraquee aventacarica Irijanite Aapani Irioshi, yashintacaro anijagantsi coguitatsineca. Irirampani teeca irininteji inquemisanteru Irijanite Aapani Irioshi, aato yameniro anijagantsi, manaquea ocancani ochoocacheru igatsimare Aapani Irioshi.”

¹ Ariquea pariseojia iquemacojiaqueriqueate Jesoshi arimpa yoshequiaqueri itsatacaanejia, caavijiquea yanaantaque iviñacajatantaguetanaque, yanaanaqueriquea Joanca. ² Cotanquitsi teequea arimaja irio viñacajatantatsine Jesoshi, iriguentiquea viñacajatantantsiquea itsatacaanejia. ³ Ariqueate iriraquea Jesoshi iroompaquea iquemacoguetei iquenquetsatacojiqueru, isotoantanajaro Jorea, yoanajiquea Garireaquei.

⁴ Oraquea yoanajiguetei manaquea iquenanañi Samariaqui. ⁵ Oraniquiqueate Samariaqui yarejetapojacaro guinteninintsi icantajitica Shicare oquempejiquero quepatsi yashintavecaca Jacovoni coramani yojocanajinirica irijanite icantajitica Jose. ⁶ Ariqueate ochoocataque oraniqui oja iqueecacotinica Jacovoni. Imagotapojiqueate Jesoshi yanijitaqueguetei quenavoquirontsiqui, ariqueate isavicañi oraniqui. Tampaticapojaque catsirincaiteri. ⁷⁻⁸ Iriraqueate itsatacaanejia yoajianaquequeate ochoocatuetei tsovironaquipae irivegarajigue irishecajiaquempaca. Iriraqueate Jesoshi inejatiguero coraquepojaque manquigarentsi guintenitaroca oraniqui Samariaqui aajate oja, icantiroquea:

—Pojoquenajate nomire.

⁹ Ocantiriquea manquigarentsi Samariaquitica:

—Aviguentitari jorio, naatimpaquea naroguenti Samariaquitica. ¿Quero ocotacani pamanantaquenaca naatimpa oja pimire?

(Iriraqueate joriojia imanintajiguiritari Samariaquitica.) ¹⁰ Icantsitaroqueate Jesoshi:

—Pintaqueromeguetei irojocaquempica Aapani Irioshi, aisa pintaquerime amanauempiroca imire, pamañaqueime iriatimpa, irojocaquempime oja anijacaantantsica.

¹¹ Ocantiri manquigarentsi:

—Teenica onchoocateji paajatanquemparoca, aisa ocatica oja ochoocavaetaque jmm isaviji. ¿Querocaquea paaqueroni oja anijacaantantsica pojocaquenaca? ¹² ¿Arimpate panaaqueri avaesatinite Jacovoni queecacotanaqueroca ocatica oja? Iroguentitari imirapinitaca iriatimpa, jerijia irijanijate, jerijia aisa ivirapae.

¹³ Icantiroquea Jesoshi:

—Maasano miracaroca ocatica oja irimiretanajequeate aisa. ¹⁴ Cotanquitsiquea iriraquea miraqueroneca oja nojocaquenerica naatimpa aatoquea imiretaji. Ocaticaquea oja nojocaquenerica ompeañajempa motojaaro omotoajashirentanaque ishiquei, onchoocatacaqueri incoguitempaniniji iranijaguiteni.

¹⁵ Ocantiriquea manquigarentsi:

—Intsishia pojoquenaroja oratica oja nomirerota aatonijite nomiretaji, aatoniji nocoraquetaji acaniqui noncañapinitaje.

¹⁶ Ariqueate icantiroqueate Jesoshi:

—Iintsija pincañemaquiterija manquigatimpica, pincoraquetajequea aisa.

¹⁷ Ocantiriqueate:

—Teequeate inchoocateji manquigatanaca.

Icantsitajaroquea Jesoshi:

—Pitampaticataquero picanqueguetei tee inchoocateji manquigatimpica.

¹⁸ Ichoocavetaca manquigavetimpica oshequi, ivegaravetaca 5. Iriraqueate pitsipatañaja imaica, teequea irio pimanquigare. Picantamajataque.

¹⁹ Ocantsitariquea manquigarentsi:

—Nomajirote, nonejaquempi aviguenticañate tsavetantantsica. ²⁰ Irirajia novaesatinite manaquea itsariventapinijiacari Aapani Irioshi acaniqui otsempiqui. Aviatimpajia joriojia picantajaque iroguenti Jerosare antsariventantaquemparica.

²¹ Icantiroquea Jesoshi:

—Iintsijate, manquigarentsi, pinquemisantavaquenaja noncamantaquempiguetei. Aapojempa savincaguiteri aatoquea pitsariventajajari Aapani Irioshi acaniqui otsempiqui, aato aisa Jerosarequi. ²² Aviatimpajia Samariaquitica teequea pintsajigueteriji pitsariventavetacaca, manaquea pitsariventamampeñiacariquea intati. Naatimpajia joriojia notsajiguiri notsariventacaca, aritarite irira Meshiantantsica, jorio inaque.

²³ Cotanquitsiquea imaicaquea aapojaca savincaguiteri irira tsariventamajajiacarica Aapani Irioshi intsariventajiaquempariguetei onquenaetanaque intsompogui ishiquei, intsariventamajajiaquemparitari. Irootaquetari inique Aapani

inquejejaquempa imaica intsaroveñaquemparigueti. ²⁴ Iriraqueate Aapani Irioshi shiretsi inaque. Quericaquea tsaroveñarica intsaroveñaquempari ishiquei, aisa arimajaquea intsaroveñamajajaquempariquea.

²⁵ Ocantiriquea manquigarentsi:

—Notsaquequeate incoraqueque Meshiashi icantajitica Quirishito.* Oraquea incoraquegueti incamantamajajaquenaquea maasano.

²⁶ Ariquea icantiroquea Jesoshi:

—Iriguentitari quenquetsatacaaquempica imaica, naroguentitari.

²⁷ Ariqueate icoraquejiapojajiquea itsatacaaneja. Yamenajiapojiquerigueti iquenquetsatacaaqueroqueti manquigarentsi mana yamenajianaque intati, cotanquitsiquea tecatsi cantapojerine: “¿Taa opaji pinique?” Tecatsi cantatsine: “¿Quero ocotacani piquenquetsatacaantacaroca?”

²⁸ Iroompa iroatimpa ojoquijipanajantiroqueate intati icajantajitaroca oja, oanaquequeate ontaniqui oguinteniqui ocantajiapojiqueriqueate ogonorója:

²⁹ —Caacateshiatsi pamenajiaquiterija irinta caquinte, icanquenaqueate maasano nantaguishequea. ¿Taaca ipaji? ¿Irioca Quirishito?†

³⁰ Ariqueate yoayoaitanaque yoguijaguijaitanaqueroqueate yamenapojiri Jesoshi.

³¹ Irirajiaquea itsatacaaneja iroompaqueate yamenajivaqueroqueti oanaquegueti oncantajiaquiteri, icantajiguiriqueate Jesoshi:

—Tsatacaantantsica, pishecatempa.

³² Icantiqueate iriatimpa:

—Naatimpa choocitari nosheca teeca pintsajigueji aviatimpajia.

³³ Iriatimpajia icantavacaajianaquea:

—¿Choocampa amaquenerica isheca?

³⁴ Cotanquitsiquea Jesoshi icantajiguiriquea:

—Iroguenti nosheca nantaqueneriqueate ininqueca tigarancaquenaca, ariquea nonteroncaqueneri nonetsanamajaqueroquea maasano icanquenaca. ³⁵ Picantajiveca: ‘Cuatrotiraja taai osampatantanaquempaca oitsoqui iraviguijitaqueroqueate.’ Cotanquitsiqueate naatimpa noncantajiaquempiqueate iintsija pamene, pamenajigueroquea niganquitejirentsipae, jac sampatanaque oitsoqui, pajiniquea irajaitero. ³⁶ Iriraqueate aguiroca oitsoqui irivegarajiqueriquea irishinevaequempanijite tsaquiroca intsipaquempariquea aguiroca. Iriguentitari quejecaroca oitsoqui irirajia iquemisantacaajitaquea incoguitempaniniji inchoocaguiteni. ³⁷ Arimajaqueate icantamajajiqueroqueate: ‘Apaniroquea tsacaqueroquea, itsipaquea aajeroneca.’ ³⁸ Naatimpaqueate notigarancajiaquempi paajiaqueroqueate teeca aviro tsacajiguerone. Itsipaqueate tsacajiaqueroquea, imaicaquea aviguentiquea aajiaquero yatsipeventajiacaca.

³⁹ Ariquea oshequi Samariaquitica guintenitantaroca oratica guinteninintsi iquemisantajianaqueroquea Jesoshi iquemajivaqueroqueti manquigarentsi otsavetantaquerigueti, ocanti: “Icantaquena maasano nantaguetaquea.” ⁴⁰ Iroompa icoraquejiaquegueti Samariaquitica, inejajiapojiqueriquea icajemajiaqueri irimaimojiaqueri. Ariqueate yoanaque imaanaque mavite savincaguiteri. ⁴¹ Ariquea iquemisantajiaqueroquea ontaniqui itsipajia oshequi, iquemamajajiaqueroqueate iquenquetsaquegueti iriatimpa. ⁴² Ariqueate icantajiaqueroqueate manquigarentsi:

—Noquemisantajiaque pitsavetantaquerigueti aviatimpa, cotanquitsi imaica caaviji noquemisantamajajiaque, inchiquiojitari noquemajiaqueri naatimpajia, ariquea notsatanaque arimajasacanicate iriguenti meshiajiaqueroquea quepatsiquitica, iriguenti Quirishitotsica.

Jesoshi yogueshitajiri irijanite iramajirore majirontatsica

* 4:25 Meshiashi oponeaca iguenquetsatsarequi evereo aisa arameo. Quirishito oponeaca iguenquetsatsarequi guiriego. Mavite ocanque “Ishaguijitaquea” aisa “Icoguiaquea”, irio yoguijajivaquea ishiraerija incoraqueataquea impeaquempa imajirote ompejiaquemparineca. † 4:29 Pamenero tioncanquitsica isavivanaqui otsapaqui 4.25.

⁴³ Iroompa avisanaquitigui mavite savincaguiteri yogaanajaquea Jesoshi yoanaji Garireaquei. ⁴⁴ Icantaquetarite iriatimpa Jesoshi, iriraqueate tsavetantatsica tee irishin-eventajitempariji iguinteniqui. ⁴⁵ Iroompa yarejetapojatiga Garireaquei yaajiavaqueri cameetsa choocajatsica oraniqui, yoajiaquititarite iriatimpajia aisa Jerosarequi yogavisajiaquitirogueti Paashicoa, ariqueate yamenajiaqueri yantaguequeca oacaantantatsica intati.

⁴⁶ Ariqueate ipianajaquea Jesoshi Canaaruhi Garireaquei oraniqui ipeacaacarogueti oja vinoja. Choocaqueate iramajiore majirontatsica iguintenitacaqueate Caperenaoqui, yojoquijicaquea irijanite. ⁴⁷ Ariqueate iriatimpa iquemacotavaquerigueti Jesoshi arejetapojia Garireaquei iponeacaquea Joreaquei, yoanaquequea icantapojiaqueri iroanaqueniji itsovironaquitequi irogueshitajeneriquea irijanite, pajiniquea irimetoje. ⁴⁸ Iriraquea Jesoshi icantiri:

—Aviatimpajia aatoguetiqueate pamenajigana nantaguetaquerogueti oacaantantatsica intati, aatoquea pitsaromentajigana.

⁴⁹ Icantiri iramajiore majirontatsica:

—Nomajirote, caacateshiatsi pajini irimetoje irijani.

⁵⁰ Icantiriqueate Jesoshi:

—Pimpianajequea imaica, anijatsi pirijanite.

Iriatimpa iquemisanqueriqueate icanquerica, yoanaji. ⁵¹ Iroompaqueate yoanajigueti pajinigueti irarejetajempa itsovironaquitequi itonquivojajavacariquea amitacojiguirica icantajavajiriquea:

—Anijatsi pirijanite.

⁵² Icoacotavaqueri iriatimpa queroquea icarataqueni catsirincaiteri ipeantanajaca.

Icantajiguiriqueate:

—Chapinqui iroaqueragueti icononcanaja catsirincaiteri ari icotanaja isavogatanaji ipeanaja.

⁵³ Ariquea iquenquejanaquero aritarite iroaqueragueti icononcanaja catsirincaiteri icantaquegueti Jesoshi: “anijatsi pirijanite.” Irootaquequea iquemisantantanacarica itsatantacaca iriomajaca, ariquea iquejejiaca aisa maasano conoajiacarica.

⁵⁴ Ocaticaquea iroguenti mavitetapojatsica oacaantantatsica intati yonigaantaqueca Jesoshi iponeacagueti Joreaquei yoanajigueti Garireaquei.

5

Jesoshi yogueshitajiri caarica anijivetatsi

¹ Ariquea irirajiaqueate joriojia icapiocajiacaqueate irogavisajiajero otsipa savincaguiteri ishineventajiacaca, ariqueate yoanaque Jesoshi itoncoanaque Jerosarequi.

² Oraniquiqueate Jerosarequi oquempejiquegueti osotomoro icantajitica Isotomoro Oveja ariqueate ochoocataque osamponaja, icantajitiro evereotsaqui Veteshita. Chooca oraniqui icatisetajigueticata tsovironaqui ovegarataca 5. ³ Irootaquetari inorijantajiga oshequini caquinte joquijiguetanquitsica, shamponcajaripae, itsipajia teeca incatigueti, itsipajia magoviroshitsica. [Yoguijajiaqueroqueate omparencajatavajempata oja.

⁴ Icoraquepiniquetari irashivantite Aapani Irioshi iparencajatapojero, ariquea quericaca iriqueticata quijaatanquitsica iquenapanajanti ipeanaja.] ⁵ Choocaqueate apaniro oraniqui yojoquijitani iriquetinica, teequea impejaempaji yajagantsitacovaetanacaqueate aavaetanacaqueate 38 ajagantsi. ⁶ Iriraqueate Jesoshi inejapojiaqueriqueate norijaca, itsapojiaqueri yajagantsitacovaetanacaqueate coramani teequea impejaempa, icantantacarica:

—¿Pininque pimpeanajempa?

⁷ Yacanaqueri joquijitanquitsica:

—Nomajirote, teequea inchoocateji jocajatavaquenanea oparencajatagueti oja. Nopitsopitsovecaqueate naatimpa inchiqioji teequea nagavejempaji, manaqueate yanajaitanaquena.

⁸ Icantiriqueate Jesoshi:

—Iintsija pincatianaje pinatanajero pinorijantacaca, panijitanaje.

⁹ Iroompaquea icanquitiguiri ariquea ipeanaja, inatanajiro inorijantacaca, yanijitanaji. Cotanquitsiqueate iroguentiquea savincaguiteri imagorejantajitaca,

¹⁰ icantantajiacacaqueate imajirojiate joriojia:

—Imaicaqueate iroguenti savincaguiteri imagorejantajitaca, tee oncameetsateji pinatanajerogueti pinorijantacaca, icantimentantajitirotarite.

¹¹ Iriatimpa icantiriqueate:

—Irraquea ogueshitajanaca iriguenti cantaquena: ‘Pinatanajero pinorijantacaca, panijitanaje.’

¹² Ariqueate icantajiaqueriqueate:

—¿Queriquea cantaquempica: ‘Pinatanajero pinorijantacaca, panijitanaje?’

¹³ Cotanquitsiquea iriatimpa teequea intsateriji queri ogueshitajirica, icapioacajiacatari, iriraquea Jesoshi jac yoanaji. ¹⁴ Ariquea Jesoshi inejapojajiri teemproquii sarorentantajitarica Aapani Irioshi icantiri:

—Imaicaqueate peanajimpi, aatoquea papijitajiro aisa piquempevaetaja, aapoja-jimpitsi otsipa anaqueroca.

¹⁵ Iriatimpa yoanaquequeate icamantajiaqueriquea imajirojiate joriojia, icantajia-paqueriqueate:

—Iriguenti ogueshitajana Jesoshi.

¹⁶ Irootaquequea icatsimatantajiacarica joriojia Jesoshi, inintajiavecaqueate irimetojajiaquerime, yamenajiaqueritarite iroguenti yogueshitantajari savincaguiteri imagorejantajitaca. ¹⁷ Cotanquitsiqueate Jesoshi icantajiguiriquea:

—Ari icoca Aapani irosati yantaguitini, ari noquejetacari naatimpa aisa, irosati nantaguitini.

¹⁸ Irootaquequea arimpaquea icatsimamajatantajianacarica imajirojiate joriojia, inintamajianaque irimetojajiaqueri, teenica aparato irogueshitantantempari savincaguiteri imagorejantajitaca, manaqueate aisa iquejemanatanacari Aapani Irioshi icanquegueti iriguenti Iririmajaca.

Oraqueate yantaquetica Jesoshi teequea inchiquioji irantashitemparo iriatimpa

¹⁹ Ariqueate icantajiguiriqueate Jesoshi: “Imaicaquea noncamantamajiaquempiquea, iriraquea Irijanite Aapani Irioshi, oraqueate yantaqueca teequea inchiquioji irantashitemparo iriatimpa, iroguentiquea yantaque yamenacoquerica yantaquetica Iriri. Querocaca isavicaventica Iriri, irootaquequea isavicaventaque iriatimpa.

²⁰ Irraquea Iriri ipintsamajatacaritari Irijanite, yonigaaguetaqueneri maasano yantaquetica. Ariquea ironigaaqueneri otsipapae anaqueroneca pinejajiaqueca imaica, aviatimpajia pamenajianaquequea intati. ²¹ Aritarite quejetaca irira Aapani itancorejajiguiriqueate metojajiavetanquitsica, yanijacaajajiri, ariqueate iquejetaca Irijanite, iranijacaajeriquea quericaca ininqueca. ²² Aisa irira Aapani tee irionica cantatsine queri irogashinoncajajiqueca, iriguentiquea Irijanite icanque incantacoqueri. ²³ Ariquea iquejetaquero imaica cameetsaniji maasano irishineventamajajiaquempariniji Irijanite inquejetacaajiaquemparinijite ishineventajiacarigueti Iriri. Quericaca teeca irishineventajiguempariji Irijanite teequea irishineventajiguempariji Iriri tigarancaquerica.

²⁴ “Imaicaquea noncamantamajajiaquempiquea, maasano inquemaquerogueti nocanqueca aisa inquemisanquerigueti tigarancaquenaca incoguitempaniquea inchoocaguiteni, aatoquea icatsimatimentajitiri igovaeguisheru, manaquea yojocanajiro metojajantsi, yarejetapojaja anijagantsiqui. ²⁵ Aisaquea noncamantamajajiaquempiqueate, aapojempa savincaguiteri, jac aapojacatari imaica inquemantajiaquemparoca metojajantsica icanqueca Irijanite Aapani Irioshi, ariqueate maasano quemisantajiaquerica iranijajianaje. ²⁶ Irraqueate Aapani yanijashitacatari intati, iriotari anijacaantantatsica. Ariquea inintacaaqueri Irijanite iquejetancarica yanijashitaca iriatimpa, aisa iriguenti anijacaantantatsica. ²⁷ Aisa icanqueriqueate iriotaque cantacotaquerine caquinte quero incojitaquerini, iriguentitari Irijanite Caquinte. ²⁸ Aatoquea pamenajianaque intati, aapojempatarite savincaguiteri inquemantajiaquemparica maasano iquitajivetacaca,

²⁹ ariquea incampanajante irisotoajianaquea. Iriraquea comajamajianquitsica intancorejajianaqueate, iroajianaquequea jenoqui inquitequi, incoguitempani inchoocajiaje. Iriraquea teeca incomajamajajiguempaji intancorejajivetanajempaqueea manaqueate incatsimatimentajiqueriqueate igovaeguishere.

Tsavetacotantajiguirica Jesoshi

³⁰ “Teequeate nantashitempajiqueate inchiqiojitsita. Querocaca icanquenaca Aapani, irooqueate nocanque naatimpa, aisa notampaticamajataquero maasano nocanqueca, teenicate iroguenti noncoraquetashite nantaquero querocaca noninquenca naatimpa, iroguentiqueate nocoraquetashique nantaqueroquea maasano inintaguetica Aapani tigarancaquenaca. ³¹ Oraquea apanirome nontsavetanquempamequea naatimpa arimequea pincantajiaqueme: ‘Aatoquea noquemisantiri, irisati tsavetacotajatsi.’ ³² Cotanquitsiqueate choocaqueate itsipa tsavetantaquenaca. Naatimpa notsataque arimaja icantamajataque itsavetacotaquenagueti, teequea iramataguempaji. ³³ Pitigarancaquerigueti coacoquerineca Joanca, iriatimpa tampatica yoavaquero itsavetanquero iroomajatatsica. ³⁴ Cotanquitsi itsavetacojitaquenagueti, teequea iro noshineventavacaca oratica poneanquitsica caquintequi, manatari noquenquejacaquempitotari itsavetacotaquenagueti Joanca cameetsaniji pimeshijiaquempaniji. ³⁵ Iriraquea Joanca iquejevecari tsivorentsi morecanquitsica itsivotaquequeate. Aviatimpajia iro pinintajiaquequea pishineventapanajantaro itsivotacojiaquempiqueti. ³⁶ Cotanquitsiquea chooca tsavetantaquenaca anaaqueroa itsavetanquenagueti Joanca. Oraquea nantaguetaqueroqueti icanquenaca Aapani, caavijiquea anaantaque pintsatimentajiaqueronijite arimajaquea iriguenti tigarancaquena Aapani. ³⁷ Ariquea iquejetaca Aapani tigarancaquenaca itsavetantaquenaquea iriatimpa, cotanquitsiquea aviatimpajia teequea pinquemajigueroji icanqueca, aisa teequea pinejajigueroji quero icotani. ³⁸ Ariquea oquejetaca iguenquetsatsare teequea onchoocamajateji pishirequi, teetarite pinquemisantajiaqueroji itigarancaqueca. ³⁹ Aviatimpajia papatsajavantapinijiavecaroquea Itioncacaantaqueca Aapani Irioshi pijijiaqueroji irooqueate anijacajajempine pincoguitempaniniji panijaguiteni. Iroguentiquea tsavetantaquenaca naatimpa, ⁴⁰ cotanquitsiquea tee pinintajigueji pincoraquejigue naatimpaqui panijantajajempaca.

⁴¹ “Tee naashitemparoji irishineventajiaquena caquinte, ⁴² cotanquitsi notsajiaquempi aviatimpajia, tee pimpintsajiguempariji Aapani Irioshi. ⁴³ Naatimpa iriguenti tigarancavetaquena Aapani, aviatimpajia teequea paajiaquena. Cotanquitsiquea incoraquequegueti itsipa teeca intigarancajiteriji inchiqioqueti iriatimpa incoraque-tashiquempa, irioquea paajiaquene. ⁴⁴ Manatari piquenquejajiaque pishineventavacaajiaquempa intati, teequeate iroguenti pinquenquejajigue irishineventajiaquempi Irioshimajaca apatiroti icota. Piquejejiacagueti imaica ¿quero pincojiaquempani pinquemisantajigue? ⁴⁵ Aato piquenquejajigui pijijiaqueji noncamantaqueriquea Aapani teeguete pinquemisantajigueji. Choocaquea itsipa camanquerineca, iriguenti Moishishini paventamajajivetacaca. ⁴⁶ Oraqueate pinquemisantamajajiaquerime Moishishini, pinquemisantajiaquename naatimpa aisa, naroguentitari itioncacotaque. ⁴⁷ Teenica pinquemisantajigueroji itioncaveca, ¿arimpate pinquemisantajiaquero nocanquempica naatimpa?”

6

Ishecatacaajiacariguetei Jesoshi yoshequiamajataque caquinteji

(Mt. 14.13-21; Mr. 6.30-44; Irc. 9.10-17)

¹ Ariqueate Jesoshi imontejacojianaca intatiquero iniromotijaqui icantajitica Garirea, icantajitiro aisa Tiveriashi. ² Choocaqueate oshequini caquinte guijaguijaitapiniquerica, yamenajiaqueritarite yonigaantaguequeroqueti oacaantantatsica intati yogueshijiajiriguetei joquijiguetsatsica. ³ Iriraquea Jesoshi yoanaque otsempiqui itsipatsipaitanacari itsatacaanejia, isavicajiaipoji ontaniqui. ⁴ Irooshipojaque aantapojempaca savincaguiteri Paashicoa ishineventajigaca joriojia. ⁵ Ariqueate Jesoshi yamenajiaqueroqueti icoraquecoraqueipoji oshequini caquinte, icantiriquea Jeripe:

—¿Queroquea avegarajiaqueni pan ashecatacaajiaquemparica maasano iricajia?

⁶ Manaqueate icanquegueti Jesoshi imaica iramenaque queroqueate incante Jeripe, cotanquitsiqueate iriatimpa itsaquequea queroquea iraaquero. ⁷ Iriraqueate Jeripe icantiri:

—Jmm ariguete avegarajivetaquempaguete oshequi pan vegaratanquitsica 200 tenario, aato otsitacari irishecajiaquempa apaniropae capichaji.

⁸ Ariqueate icantanaquequeate itsipa itsatacaane Jesoshi icantajitica Antirishi, iriguentijeguite Shimo Peerero, icantiri:

⁹ —Jeri irica chaajaniquitirajaca yamaque ovegarataca 5 pan ipeacaantajitaca oitsoqui sevara, jeri aisa mavipaquite ishimate, cotanquitsi yoshequiamajatatiguinimaja caquinte, ¿arimpate intsitacajiaquempari?

¹⁰ Iriraquea Jesoshi icantiquea:

—lintsijate pincantajigueriqueate maasano irisavisaviitaque.

Oraniquiquea chooca oshequi cataroshi. Ariquea isavicajiaque maasano. Iriraqueate shiramparijia jmm icarajiavaetaque 5,000. ¹¹ Ariqueate Jesoshi yaaqueroquea pan yajiricaquero, yamanaqueriquea Aapani Irioshi, icantaqueri: “Arioteesaa.” Yojocajiaqueneriquea maasano savisaviitanquitsica. Ariqueate iquejetacaacari shima yojocajiaqueneri querocaca ininqueni. ¹² Iroompa iquemapojacaguete icantajiguiriquea Jesoshi itsatacaanejia:

—Paaguetajeroquea choocaguetajatsica aatoniji opomatsata capichaji.

¹³ Yaaguetajiroquea iteguetajiro cantiriqui. Ochoocavetacaquea 5 pan, jeroquea imaica iquemajianacarogueti maasano ochoocataji otseraiquitanajaroquea ocarataji 12 cantiri. ¹⁴ Ariqueate yamenajiaquerogueti maasano yonigaanquerogueti Jesoshi oacaantantatsica intati yoshequiaquerogueti pan icantajianaquequea:

—Arimajasacanica iriotaque tsavetantatsica aquemacoquea coramani incoraque-taque quepatsiqui.

¹⁵ Cotanquitsiqueate Jesoshi itsataque inintajiavetacaquea irajiaiaquerime impeacaa-jiaquemparime imajirote, itsinampirejajianajiri, apaniro yoanaji otsempiqui.

Yanijijatanaquerogueti Jesoshi jenoquija oja

(Mt. 14.22-27; Mr. 6.45-52)

¹⁶ Ariqueate pajiniguete ompitsecanaque irirajia itsatacaanejia Jesoshi yagategateitanajiqueate omotijaqui. ¹⁷ Itejiapojajaroquea quenajarontsi imontejacojianajaquea intatiquero iroaroaitanajequeate Caperenaoui. Pitsecanajiquea, iriraqueate Jesoshi tequerata incoraqueatajeji. ¹⁸ Ariqueate icampojuquea choviga jeoc jeoc jeoc jeoc itamacosejaatanaqueroquea. ¹⁹ Ariqueate yoacojianaque niganquija arica 5 irooca 6 quiromeetero, inejajivajiri Jesoshi icoraquepojajiquea yanijijatapojiroquea jenoquija oja, icantajiaquitiquea neguic, itsaroajianaquequea intati. ²⁰ Cotanquitsiqueate iriatimpa icantajiguiriquea:

—Naroguenti, aato pitsaroajigui.

²¹ Ariqueate iriatimpajia ishinejianaja intepojajempa, ariquea oquenapanajanti agapojaji otsapijaqui Caperenaoui.

Yamenaquetajiri Jesoshi

²² Ariquea osavincaguitetanajiguete maasanoquea capiocaventajiacarica Jesoshi chapiniqui iquenquejajianajiroquea yamenajivajiriguete itsatacaanejia yoanajiguete teequea intsipajianajempari iriatimpa. Aisa teequea onchoocateji otsipa quenajarontsi, apatirotitari choocatanquitsi itehiteitanajaca. ²³ Iroompa ocoraquepojaque otsipapae quenajarontsipae Tiveriashiquitica agaguetapojiqueate oquempejiqueguete ishecajiacarogueti pan, icantacoventaquerogueti Amajirote: “Arioteesaa.” ²⁴ Ariqueate yamenajiaqueguete iriatimpajia tee inchoocateji Jesoshi irisati itsatacaanejia, itehiteitanajia yoayoaitanajiquea Caperenaoui incoaguetajeri.

Jesoshi iriguenti isheca caquinte anijacaajiajerineca

²⁵ Ariqueate yarejerejeipojacaguete inejajiapojajiriquea Jesoshi icantajiapojiriquea:

—Tsatacaantantatsica, ¿quero icaratini parejetaca acaniqui?

²⁶ Cotanquitsiqueate Jesoshi icantiri:

—Imaicaquea noncamantamajajiaquempi teequeate iroguenti pincoimentajiguena pamenajiaquenagueti nonigaanquerogueti oacaantantatsica intati, iroguentiquea pincoimentajiaquena pishecajiacaro pan piquemajianaca. ²⁷ Aatoquea iroguenti pitampishiventamajajigui pisheca teroncanajatsineca, iroguentiquea pintampishiventamajajigue pisheca aatoca oteronca, oncoguitempani anijacajaempiquea. Irooqueea irojocajiaquempica Irijanite Caquinte, iriotarite ijicotaqueca Aapani Irioshi, quejetaca iseyotaqueri.

²⁸ Iriatimpajiaqueate icantajiguiriquea:

—¿Queroqueea noncojiaquempañi nontampishiventantajiaquemparo ca inintacajiaquenaca Aapani Irioshi?

²⁹ Icantajiguiriqueate Jesoshi:

—Jeroqueea inintacajiaquempica Aapani Irioshi pintampishiventamajajiguero: paventamajajiguempañi iriraquea itigarancaqueca, pinquemisantamajajianaqueri.

³⁰ Icantajiguiriqueate:

—¿Taa opajita ponigaajiaquenaca cameetsaniji namenajiaquerogueti nonquemisantajiaquempiniji? ¿Taa opaji pantaguetaque ponigaantaguetaque? ³¹ Coramani ichoocajia vetacagueti avaesatinite ontaniquiqueate oquitamampororoipojaquegueti ishecajiacaroqueea manaa. Oraqueea itioncacojiquerogueti ocanti: ‘Yojocajiaqueneriqueate pan poneanquitsica jenoqui inquitequi.’

³² Iriraquea Jesoshi icantajiguiriqueate:

—Imaicaquea noncamantamajajiaquempiquea, teequeate irio Moishishini jocajiaquempiroca pan poneanquitsica jenoqui inquitequi, iriguentiquea Aapani jocajiaquempiroca iroomajaca panmajaca poneanquitsica jenoqui inquitequi. ³³ Oraqueate pan yojocaquempica Aapani Irioshi, irooqueeate poneanquitsica jenoqui inquitequi anijacajiaquerica quepatsiquitica.

³⁴ Ariqueate icantajiaqueri:

—Nomajirote, pincoguitempaniquea pojocapinijiaquenaro oratica pan.

³⁵ Icantiri Jesoshi:

—Naroguentitari pan anijacaantantatsica. Irira coraquetashitaquenane ca aatoquea itaseimataji. Ariqueate inquejetaquempa aventaquenaneca, aatoquea imiretimataji. ³⁶ Cotanquitsi nocamantajiavetaquempitari pamenajiavequenaquea teequeate pintsajiguenaji, tee paventajiguenaji pinquemisantajiguenaji. ³⁷ Maasano yojocaquenaca Aapani, incoraquetashitaquena; irira coraquetashitaquenane ca aato noguipiavaqueri. ³⁸ Teenica iroguenti noncoraquetashite acaniqui quepatsiqui nantaque noninqueca naatimpa, mana noponeacagueti jenoqui inquitequi iroguentiquea nocoraquetashitaque nantaqueroqueea ininqueca tigarancaquenaca. ³⁹ Iroguenti ininque Aapani tigarancaquenaca aato noguipiguiri apaniro yojocaquenaca, manaquea novochantajiajeri intati aapojaquempagueti savincaguiteri vegaratapajaatsineca. ⁴⁰ Ininquetari Aapani tigarancaquenaca incoguitempaniquea inchoocaque maasano amenajiaquerineca Irijanite, aventajiaquemparineca. Ariqueea naatimpa novochantajiajeri aapojaquempagueti savincaguiteri vegaratapajaatsineca.

⁴¹ Ariqueea icantimanajianaqueri joriojia iquemajiaquerigueti icanquegueti: “Naroguentitari pan poneanquitsica jenoqui inquitequi.” ⁴² Icantajiguiriqueate:

—¿Teecajate irio Jesoshi irijanite Jose? Atsajiguiritari iriri aisa iriniro. ¿Quero cocani icantantacaca ‘Noponeaca jenoqui inquitequi’?

⁴³ Icantisijigariqueea Jesoshi:

—Aato picantimanatantajigui picantavacaajiacagueti. ⁴⁴ Aato icoraquetashitana caquinte aatogueti icajemashirentiri Aapani tigarancaquenaca. Ariqueea naatimpa novochantajeri savincaguiteriqui vegaratapajaatsineca. ⁴⁵ Ocanquetarite itioncaciaqueca tsavetantajiatatsica ocanti: ‘Aapani Irioshi intsatacaajiaqueriquea maasano caquinte.’ Maasanoqueea quemajiavaquerica Aapani, intsajiavaquerogueti icanqueca, incoraquetashiquena naatimpa. ⁴⁶ Tee noncanteji imaica chooca nejaquerica Aapani. Apaniro irira poneanquitsica Aapaniqui Irioshiqui, irio nejaquerica Aapani.

⁴⁷ Nocamantamajajiaquempiquea quericaca avempojenaneca incoguitempaniquea inchoocataje, aatoquea imetojaji. ⁴⁸ Naroguenti pan anijacaantantatsica. ⁴⁹ Coramani ichoocajivetacagueti pivaesatinite ontaniqui oquitamampororoipojigueti ishecajiavecaroqueate manaa, cotanquitsiquea imetojajijiquea intati. ⁵⁰ Cotanquitsiqueate ocatice pan noquenquetsatocotaqueca naatimpa ariguenti oquenapoji jenoqui inquitequi, cameetsanijite quericaca shecaquemparoneca aatoquea imetojajitsi. ⁵¹ Naroguenti pan anijatsica poneanquitsica jenoqui inquitequi. Quericaca shecaquemparoneca ocatice pan incoguitempani iranijanaque. Ocatice pan nojocaquenerica, iroguenti notsino nojocajiaquenerica maasano caquintejiatsica cameetsanijite incoguitempaninijite iranijaguiteni.

⁵² Ariqueate iquenquetsatavacaajianaquea joriojia, icantajiaque:

—¿Queroquea incoquempani iricatic a irojocajiacajirogueti itsino ashecajiaquemparoquea?

⁵³ Icantajiguiriqueate Jesoshi:

—Imaqueate noncamantamajajiaquempi aatoguete pishecatsitanaro notsino, aisa aatoguete pimiritajiganaro noriraja, aatoquea ochoocatimpi anijagantsi. ⁵⁴ Quericaquea shecaquemparoneca notsino aisa irimiraqueroguete noriraja onchoocapojeri anijagantsi coguitatsica, ariquea nontinaajeri naatimpa savincaguiteriqui vegaratapojaatsineca. ⁵⁵ Oraqueate notsino iroguentiquea iroomajaca ishecajitaca. Ariquea oquejetaca iroatimpa noriraja, iroguentiquea iroomajaca imirajitaca. ⁵⁶ Quericaca shecaquemparoneca notsino, aisa irimiraqueroguete noriraja incoguitempani inchoocaguitenani, naatimpaquea noncoguitempani nonchoocaguiterini. ⁵⁷ Itigarancaquenaquea Aapani anijatsica, ari nanijaque naatimpa irooriji yanijacaaquena Aapani. Ariquea inquejetaquempa quericaca shecaquenane ca naatimpa, nanijacajeri. ⁵⁸ Ocatice pan, iroguenti quenapojatsica jenoqui inquitequi. Teequea onquejetemparoji manaa ishecajiavecaca pivaesatinite imetojajianajiqueate. Quericaca shecaquemparoneca ocatice pan incoguitempaniqueate iranijaguiteni.

⁵⁹ Maasanoquea ocatice icanqueca Jesoshi manaquea itsatacajiaqueriquea shinaogoaqui icapiocontapinijiacaca joriojia ontaniqui Capereñaqui.

Quenquetsatsarentsi anijacaantantatsica

⁶⁰ Iroompaqueate iquemajivaqueroguete icanqueca Jesoshi imaica, ariquea iria oshequini oguijaguijaitanaquerica icantajianaque:

—Manavaeca ocatice icanqueca. ¿Taampa quemisantavaquerone?

⁶¹ Ariqueate iriraquea Jesoshi itsatashitavacaro icantavacaajianacaguete icanti-manataqueroguete icantavecarica, icantsiijaariquea:

—¿Ari ocatsimatacajiaianaquempi nocantajiaquempica? ⁶² Iroosacanica, ¿querocaca pincojiaquempa pamenajiaqueriguete Irijanite Caquinte iroanajeguete jenoqui inquitequi ichoocatiguete coramani? ⁶³ Oraquea shiretsi, iroguenti anijacaantanquitsica, teequea agavejeji atsino. Ariquea oquejetaca nocantajiaquempica imaica, oquejetacaro shiretsi, iroguenti anijacaantatsica. ⁶⁴ Cotanquitsiquea choocaquea piconoagarantajiacaa teequeate pinquemisantajiguenaji.

Iriraquea Jesoshi itsatsitacatari iroaqueraguete queri aato iquemisantajiguiri, aisa queri aacaanquerineca. ⁶⁵ Ariquea icantiri:

—Irootaquetari nocantantajiaquempica aato inchiquioji icoraquetashitana caquinte aatoguete yagavejacaguiri Aapani.

⁶⁶ Ariquea iconoagarantajianaquea oguijaguijivetanacarica Jesoshi yovashiantajianajiriquea teequea iroguijaguijaitajeri. ⁶⁷ Ariquea Jesoshi icoacojiaqueriquea itsatacaanejia vegarajianquitsica 12, icantajiguiriquea:

—¿Pinintajiaque poajianaje aviatimpajia aisa?

⁶⁸ Cotanquitsiquea irira Shimo Peerero icantiri:

—Nomajirote, ¿queriquea noashijianaqueca? Aviguentitari ashintaro quenquetsatsarentsi anijacaantantatsica noncoguitempaniniji nanijaguiteni. ⁶⁹ Naatimpajia noquemisantajiaquempiquea, aisa notsajiaque aviguentiquea Quirishitotatsica, * Irijanite Aapani Irioshi anijatsica.

⁷⁰ Icantajiguiriqueate Jesoshi:

—¿Teempa narotaque coguijiaquempica aviatimpajia carajianquitsica 12? Cotanquitsi chooca aparo piconoacaca, ampatsini inaque.

⁷¹ Oraquea icanquegueti Jesoshi imaica iriguenti icantacoque Jorashi, irijanite Shimo Ishicariote, iriguentitarite aacaanquerineca coajica. Iriouea itsatacaane inaveca, cotanquitsi coajica yaacaanqueri.

7

Iriguentijeguitepae Jesoshi teequea inquemisantajigueriji

¹ Ariqueate iriraquea Jesoshi tee irininteji iroanaque Joreaquei, itsaquetari inintajiaque joriojia irimetojajiaqueri. Mana ichoocataji Garireaquei itsatacaantaque oraniqui.

² Quempejitapojiaquetari ishineventajiacaca joriojia ipeacaantajigaroca tsovironaqui-janiquipae iquenquejajiro iquenaquenaitanajigueti ivaesatinite oquitamampororoipojaguegueti. ³ Iriraqueate iriguentijeguitepae Jesoshi icantajiguiri:

—Iintsijate poanaque Joreaquei pinquejetaquempaqueate imaica ponigaanqueroquea oacaantantatsica intati ariniji iramenajiaquempi pitsatacaanejia choocajianquitsica ontaniqui. ⁴ Icoquitantari quericaca nintanquitsica iramenajiaqueri, aato yomaniro yantaqueca. Imaicaquea aviatimpa, iroorijite pagavejaque ponigaanqueroqueate taaca opajitapae, iintsijate poanaque ponigaanquempa iramenajiaquempiniji maasano.

⁵ Ariqueate icojiacani iriguentijeguitepae aisa teequea intsamajajigueriji, irootaquequea icantantajiacarica imaica. ⁶ Cotanquitsiqueate Jesoshi icantajiguiriquea:

—Tequeratatirajatari aguempaji noantanaquempaca, cotanquitsiquea aviatimpajia cameetsaquea poajianaque querocagueti pinintajiaqueni. ⁷ Tee onchoocateji irisemaneguintimentajiguempica quepatsiquitica. Naatimpaquea irootari isemaneguintantajiaquenaca nocanquegueti yantaguetaqueca iroguenti covaequisherentsi.

⁸ Poajianaquequea aviatimpajia pintoncoajianaque incapiocaventajiaquempargueti ishineventajitaca. Naatimpaquea aatota nogui, tequeratanicate aguempaji noantanaquempaca.

⁹ Icantajiaquerigueti imaica, ari ichoocataji Garireaquei. ¹⁰ Cotanquitsiqueate ariqueate yoayoaitanaquegueti iriguentijeguitepae impoitanajiquea yoanaque iriatimpa. Teequea ari intsipatsipaitempariji igonorroja, teenicate irininteji irinejajiteri.

¹¹ Iriraqueate imajirojiate joriojia icoaqueri Jerosarequi, icantajiaqueri capiocajianquitsica:

—¿Quericampa?

¹² Iquenquetsatacojiaqueriquea intati, choocaquea cantavanquitsica: “Iriguentiquea cameetsatatsica.” Itsipaqueate icantavaque: “Teequea incameetsateji, mana yamatavijaqueri caquinte intati.” ¹³ Cotanquitsiquea inchiqioji iquenquetsatavacaajiacaquea teequea inconijajencateji, itsaroacaajiacaritarite joriojia majirontajiatatsica.

Icatsimatimentajiaqueri Jesoshi yogueshitantajarigueti joquijitatsica savincaguiteri imagorejantajitaca

¹⁴ Oraqueate oniganquipojaguegueti ishineventajiacaca ariqueate itoncoanaque Jesoshi, yoanaquequea teemproqui itsariventantajitarica Aapani Irioshi, itsatacaantaquequea oraniqui oniganquirequi. ¹⁵ Ariqueate yamenajiaquerigueti joriojia yamenajianaquequea intati icantantajianacaca:

—¿Queroquea icotacani itsatantacaroca taaca opajitapae? Teenicate intsatacaamajajiteriji.

* 6:69 Quirishitotatsica. Iguenquetsatsarequi guiriegojia icanquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijiaqueca impeaquempa imajirojiate irooca isaserrotejiate. Irira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempiniji Imajirojiate maasano.

¹⁶ Cotanquitsiquea Jesoshi icantajiguiriquea:

—Oraqueate notsatacaantaquea imaica teequeate inchiqiojitsiquea nontsatashitemparoji naatimpa. Iriguentitari tsatacaaquenaro tigarancaquenaca.

¹⁷ Quericacaquea nintanquitsineca irinetsanataqueroquea ininqueca Aapani Irioshi intsaquequea iriguenti tsatacaaquena, teequeate inchiqiojitsita naashitemparoji naatimpa. ¹⁸ Iriraqueate inchiqiojica aashitaroca intati iriatimpa manaquea ininquequea irishineventajitaquempari, cotanquitsiquea iriraquea nintanquitsica iriguentiqueate irishineventajitaquempa tigarancaquerica manaqueate itampaticataquero intati querocaca icanqueca, teequea iramataguempaji.

¹⁹ “Coramani Moishishini itioncaciaquempiro icanquerica Aapani Irioshi cameetsaniji pintsajiaquero, cotanquitsiqueate imaica aviatimpajia tee pinetsanajigueroji. ¿Quero ococani pinintantajiacaca pimetojajiaquenaquea?”

²⁰ Ariqueate iquenquetsajianaquequea maasano icantajiguiriquea:

—Ichoocaquempi ampatsini. ¿Quericate nintanquitsica irimetojaquempi?

²¹ Icantiri Jesoshi:

—Nonigaanqueroquea savincaguiteri qui imagorejantajitaca aparó teeca irinejajiteji, ariqueate ocaajianaquempi intati. ²² Iriraqueate Moishishini icanquequeate intotsaiquijiqueriquea ichonquimashi iriaqueraca voanquitsica aapojempagueti 8 savincaguiteri (cotanquitsiquea tee irio pariguemparone Moishishini, ogantagatari icotani pivaesatinijiate). Irootaquequea pitotantarica. Pitotsaiquitantajigui aisa savincaguiteri qui imagorejantajitaca. ²³ Imaica pitotsaiquitantajiguigueti savincaguiteri qui imagorejantajitaca cameetsanijite pinetsanajiaqueronijite icanqueca Moishishini, ¿queroquea ococa picatsimatimentantajiaquenaroca pamenajiaquenugueti nogueshimajatajirigueti joquijitanquitsica savincaguiteri qui imagorejantajitaca?

²⁴ Aatoqueate taampina picantsiija yantajitaquero teeca oncameetsateji. Iroquetiquea pinquenquejamajiaquequea iroguentica yantajitaque teeca oncameetsateji irooca cameetsari, iroompa tampatica pincanque.

Icamantacotacaguetei Jesoshi quero iponeacani

²⁵ Ariquea iconoagarantajiacaquea guintenijatsica Jerosarequi icantajianaquequea intati:

—¿Iriotaquempa inintajiqueca irimetojajiqueri? ²⁶ ¿Queroqueate ocotacani imaica teequeate incantajiteriji icapiocaventajicariguetei iquenquetsataqueguetei? Arica icantajianaque majirontajatsica iriotaque Quirishito.* ²⁷ Cotanquitsiquea atsajiaque queroquea iponeacani iricatica. Irirampani Quirishito incoraquetapojeguetei, aatoquea itsajitiri quero iponeacani.

²⁸ Iriraqueate Jesoshi choocatirajaquea itsatacaantaque teemporoqui oniganquirequi oticaacoró iririjencatanaquequea icanti:

—Pitsajiaquenaquea, aisa pitsajiaque quero noponeaca. Teequea noncoraque-tashitempaji inchiqioji, cotanquitsiquea iriomajacaquea irira tigarancaquenaca. Teequea pintsajigueriji aviatimpajia. ²⁹ Cotanquitsiquea naatimpa notsaqueriquea, aritarite noponeaca iriatimpagueti, aisa iriguentitarite tigarancaquena.

³⁰ Ariqueate inintajiavecaquea irajiaquerime, cotanquitsiquea tecatsi ajiriquerine, tequeratirajatarari aguempaji irantajitaquemparica. ³¹ Cotanquitsiquea iquemisanta-jianaqueriquea oshequini caquinte, icantantajianacaca:

—Incoraquequeguetei Quirishito ¿arimpa iranaaqueri iricatica ironigaanquero teeca irinejajiteji? Iriotaque Quirishito.

Icanqueguetei Jesoshi aatoquea inejajitajiri

³² Ariqueate irirajia pariseojia iquemajiaqueriguetei iquenquetsatacojiqueriguetei Jesoshi ishineventajicari, ariqueate itsipatsipaicariquea saserorotejia anaantajianquitsica itigarancajiaqueriqueate coaretapae quempoguijajiguiroca teemporo irajiaquiteriqueate. ³³ Cotanquitsiqueate Jesoshi icanti:

* 7:26 Quirishito ocanque “Ishaguijitaqueca” aisa “Icoguiaqueca”, irio yoguijajiaqueca ishiraerijia incoraqueaque impeaquempa imajirote ompejiaquemparineca.

—Capichajinivani nonconoajianajempi, ariquea noanaje ichoocatigueti tigarancaque-naca. ³⁴ Ariquea pincoaguevetajena, aatoqueate pinejajijaana, aatotarite pagavejajigui poajianaque aviatimpajia querocagueti noanajeni naatimpa.

³⁵ Ariqueate icojianaca joriojia iquenquetsatavacaajianacaqueate icanti:

—¿Querocaquea iroanaqueni aatoca anejantajajari? Aricaquea iroanaque inconoaji-
aquempariquea ontaniqui agonorolja varajajianquitsica conoajiacarica guiriegojia intsa-
tacaajiaqueriquea iriatimpajia aisa. ³⁶ ¿Taaqueate opajita icantacoqueca icantanta-
caca: ‘Ariqueate pincoaguevetajena aatoquea pinejajijaana, aatotarite pagavejajigui
poajianaque aviatimpajia querocagueti noanajeni naatimpa’?

Oja anijacaantantatsica

³⁷ Ariquea aapojaja savincaguiteri icaratantajianajaroa ishineventajiacaca. Ocatita savincaguiteri caaviji ishineventamajajigaro. Iriraqeua Jesoshi icatianacaquea iquen-
quetsatanaquequea iririjencaniquea icanti:

—Quericacaquea miretanquitsica incoraquetashiquenaja nojocaqueneri irimirapoje.

³⁸ Quericaca quemisantaquenanea, ocantaquequea Tioncarentsimajaca, omotojagui-
teni ishirequi oja anijacaantantatsica, onquempetanaquemparo iniroja oja.

³⁹ Oraquea icanquegueti Jesoshi imaica iriguentiquea iquenquetsatacotaque Ishire Aa-
pani Irioshi choocashirentajiaquerineca maasano tsaromentajiaquemparineca, tequer-
atatirajatari incoraqueateji Ishire Aapani Irioshi inchoocashirentantaquequeate, tequer-
atancate irogajenocashitanajemparo Jesoshi iroganejencare.

⁴⁰ Ariqueate iquemajivaquerigueti maasano iconoagarantajiacaqueate icantajiaque-
queate:

—Arimajasacancate iriguentiquea tsavetantatsica aguijajivaqueca.

⁴¹ Itsipapaequeate cantajianquitsica:

—Iriguentiqueate Quirishito.

Cotanquitsiquea itsipapae cantajianquitsicaquea:

—¿Arimpaquea imponeaquempa Quirishito Garireaquei? ⁴² ¿Teempa oncanteji Tion-
carentsimajaca: iriraquea Quirishito irio inchoviquitanaqueca Taavini, imponeaquempa
Verenequi, iguinenini Taavini?

⁴³ Irosatiquea tee inquemavacaimentempariji Jesoshi. ⁴⁴ Iconoagarantajiacaquea
inintajiavecaquea irajiaaquerime, cotanquitsiqueate tecatsi ajiriquerine. ⁴⁵ Ariqueate
irirajiaquea coaretapae oajiavetananquitsica irajiaaquiterimequea ipiapiaitashitajaquea
intati ichoocajiaquegueti pariseojia jerijia saserorotejia anaantajianquitsica. Iriatimpa-
jiaquea icantajivaqueriquea:

—¿Quero ococani caarica pamantari?

⁴⁶ Iriatimpajiaquea icantajiguiriquea:

—Iroorijite cameetsavaequetari iquenquetsataquegueti. Teequeate inchoocateji it-
sipa quempequemparineca iriatimpa.

⁴⁷ Iriraqeua pariseojia icantajiguiriquea:

—¿Aricaja yamatavijajiaquempiquea aviatimpajia aisa? ⁴⁸ Irira majirontajatsica
teequea inquemisantajigueriji. Ariquea noquejejiaca naatimpajia pariseojia. ⁴⁹ Irirajia
teeca intsajigueroji itioncanaquenica Moishishini iriguentiquea quemisantajiaquerica,
cotanquitsiqueate incatsimajiaqueri Aapani Irioshi.

⁵⁰ Ariqueate ichoocaque oraniqui Nicoremo oanincashitanaquerica Jesoshi chapinqui,
iriguentitari pariseo. Iquenquetsatanaquequea icanti:

⁵¹ —Icantimentantajitiroitari ancantsiquempagueti: ‘Chooca yantaguishequeca’,
aatogueti iroqueti aquemiri inquenquetsaquegueti cameetsaniji antsatimenqueroniji
taa opajita yantaque. Aritari ocanti ofioncacotacagueti.

⁵² Icantsiijaariquea iriatimpajia:

—¿Avirocajate aisa Garireaqueitica? Iintsijate pisavicaventamajatero Itioncacaan-
taqueca Aapani Irioshi, pamenaqueroquea tee oncanteji imponeaquempa tsavetantat-
sica Garireaquei.

Manquigarentsi teeca apaniro ogueriji manquigataroca

⁵³ Ariqueate yoayoaitanajiqueate itsovironaquitepaequi.

8

¹Cotanquitsiquea irira Jesoshi yoanaque Orivotsempiqui. ²Osavincaguitetamanaquegueti yoanajiquea teemoroqui itsaromentantajitarica Aapani Irioshi. Ariqueate icapioaventajianajari oshequi caquinte, ari isavicanaque itsatacajiaiqueriquea.

³Ariqueate irirajiaqueate tsatacaantajiguiroca itioncacotanaqueca Moishishini jerijia aisa pariseojia yamajiaqueroquea manquigarentsi yonigaacojicaroquea shirampari, yogatiajipojaqueneriqueate niganqui icapioacajiacaguete, ⁴icantajiguiriqueate Jesoshi:

—Tsatacaantantatsica, ocaqueate ocatica manquigarentsi choocavecaqueate manquigataroca cotanquitsiquea inejacojitapojiro itsipa shirampari. ⁵Oratari itioncanaqueca Moishishini ocantini maasano manquigarentsi quejedianquitsica imaica intsinatsinajiqueroquea irimetojajiquero. Imaicaquea imaica aviatimpa, ¿queroqueate pincanteni?

⁶Iriatimpajiaquea manaqueate icantajiaquequea imaica iramenajiaqueri querocaca incanteni iramenantajiaquempariniji incatsimatimentantajiaquemparica. Cotanquitsiquea Jesoshi imaroncanaca itioncantanacaroquea ichapaqui quepatsiqui. ⁷Jatanatsi icoacojianaqueriquea, ariquea icatianaca icantajiguiri:

—Quericacaquea teeca inquempvaetempaji iintsija iriquetiquea pariaquemparone intsinaquero.

⁸Ariqueate imaronquitanaja aisa itioncanaji quepatsiqui. ⁹Iroompaqueate iquemajiavaqueriguetei canqueriguetei, ariquea yoaguetanaji. Iriquetiquea oajianajatsi quenquevarimajatanquitsica. Apanirota oaguetanajatsi ari iteroncajianaja maasano. Apanivaniquea ichoocataji Jesoshi itsipatajaroquea manquigarentsi irisatiquea aisa capioaventajiacarica incajaranqui. ¹⁰Ariqueate icatiavetanaja Jesoshi, [yamenavetari cajaraguiteni, apaniroquea ocaticaca manquigarentsi,] icantiro:

—Manquigarentsi, ¿quero icantajianajani amajiavequempica? ¿Teequea inchoocateji catsimatimentempironeca pipeacaacaca?

¹¹Iroatimpa ocantiri:

—Tee, nomajirote. Tee inchoocateji.

Ariqueate icantiro:

—Ariquea nonquejetaquempa naatimpa, aatoqueate nocatsimatimentimpiro imaica. Imaicaquea poanaje, aatoquea piquempvaetaja aisa.

Jesoshi iriguentiquea Tsirencari tsirencacojiaquerica quepatsiquitica

¹²Ariqueate Jesoshi iquenquetsatanajiquea icantajiguiriquea:

—Naroguenti Tsirencari tsirencacojiaquerica quepatsiquitica. Quericacaqueate guijatacotaquenanea aatoquea ipitsecacotajitsi, naroguentitari tsirencacojiaquerine cameetsaniji incoguitempani inchoocataje.

¹³Irirajia pariseojia icantajiguiriquea:

—Avisati tsavetacotajatsi. Tee ontampaticateji pitsavetacotacaguetei.

¹⁴Cotanquitsiquea icantajiguiri Jesoshi:

—Naroguentiquea tsavetacovetajatsi, cotanquitsiquea arimajaquea nocanque, teequeate namataguempaji. Notsaquequea quero noponeaca aisa quero noanajeni, cotanquitsiqueate aviatimpajia teequeate pintsajigueji quero noponeaca, aisa quero noanajeni coajica. ¹⁵Aviatimpajia piquejejiacari caquinte cantacotashitantatsica intati, teequeate pintampaticamajateroji. Naatimpaquea teequea noncantashijiguempariji quericaca. ¹⁶Cotanquitsiquea noncantacotanqueguetei, tampatica noaquero, irooriji tee noncantacotanqueji naatimpa apaniro, nocarataque naatimpa jeri aisa Aapani tigarancquenaca. ¹⁷Oraticarite itioncantaqueca pamenavecaca ocantiqueate omoncarajavacaaquempaguetei canqueca mavite cantacotaqueroneca inejajiaquea, ari pintsaque tampatica yoaquero. ¹⁸Jero imaica, noquenquetsatacotaca naatimpa, ari iquejetaca Aapani tigarancquenaca iquenquetsatacotaquenaquea iriatimpa.

¹⁹Iriatimpajia icantajiguiriquea:

—¿Queroqueate ichoocataqueni piri imaica?

Icantajiguiriqueate Jesoshi:

—Teenicate pintsajiguenaji naatimpa, ari iquejetaca teequeate pintsajigueriji Aapani. Arimeguetei pintsajiaquenane naatimpa, pintsajiaquerimequea iriatimpa.

²⁰ Maasano icanquerica Jesoshi manaquea itsatacajiaaqueri teemporoqui, isav-icapoji ochoocaguegueti yoguijaantajitarica imentaquipae yojocajiguinirica Aapani Irioshi. Cotanquitsiquea teequeate inchoocateji aaquerineca iraanaqueri irimetojaji-queri, tequeratanica arejetempanica iraantajitaquemparica.

“Aato pagavejajigui poajianaque querocaguete noanajeni naatimpa”

²¹ Iroompa irira Jesoshi icantajajiriquea aisa:

—Naatimpaquea noanaje, ariquea pamenaguevetajena, cotanquitsiquea ogantagaquea onchoocaguiteni piguempaveare irosati pimetojacotaquero. Ontaniqui querocaguete noanajeni, aatoquea pagavejajigui poajianaque.

²² Irirajiaquea imajirojiate joriojia icantajianaquequea:

—¿Ari irimetojaquempa irisati, irootari icantantacaca aatoquea agavejajigui oajianaque querocaguete iroanaqueni?

²³ Cotanquitsiquea Jesoshi icantajiguiriquea:

—Aviatimpajia aviguentijiaquea isavijiquitica, naatimpaquea ariguenti noponeaca jenoqui inquitequi. Aviatimpajiaquea aritari piguintenimajajiga acaniqui quepatsiqui, naatimpaquea teequea noguintenimajajempajia acaniqui quepatsiqui. ²⁴ Irootaquequea nocantantajiaquempica pimetojajianaque tequerataguete oshetempajia piguempaveare. Aritarite aatoguete pitsamajatana narotaque, aisa aatoguete paventana, ogantagaquea onchoocaguiteni piguempaveare irosati pimetojacotaquero.

²⁵ Iriatimpajia icantajiguiriqueate:

—Jmm, ¿taampa avia?

Icantiri Jesoshi:

—Nocamantajavetaquempitari iroaqueraguete. ²⁶ Aisa chooca oshequini noncantajiaquempica, cotanquitsiquea manaquea noncanque icanquenaca tigarancaquenaca. Iriatimpaquea inetsanamajaqueroquea icanqueca, teequea iramataguempajia.

²⁷ Cotanquitsiquea iriatimpajia teequeate intsajigueriji iriguentiquea iquenquetsatacotanaque Iriri. ²⁸ Irootaquequea icantantacarica Jesoshi:

—Oraquea pogatiacojiaqueriguete irira Irijanite Caquinte, ari pintsaque narotaque. Aisa pintsaquiaquequea teequea nanteji inchiqioji. Iroguentiquea noncanque querocaca itsatacaquenaca Aapani. ²⁹ Icoquitantari itsipataquena tigarancaquenaca, teequea irojoquenaji apaniro, nocoguitanitarite nosavicavenqueroqueate ininqueca iriatimpa.

³⁰ Iquejequeroguete imaica iquenquetsataqueguete, iquemisantajianaqueriquea oshequini.

Irijanijate Aapani Irioshi aisa agavejajiaqueca quempevaerentsi

³¹ Ariqueate Jesoshi icantajiguiriquea irirajia joriojia quemisantajiaquerica:

—Aviatimpajiaquea pincoguitempaniguete pinquemisantajianaquena nocantajiaquempica imaica, pimpeamajajiaquempaquea notsatacaanejia. ³² Pinquejejaquempaguete imaica ariquea pintsamajajiaquero iroomajatatsica, irooqueate oguipaquijacojiajempineca manaquea pinchoocatashijajempa intati.

³³ Chooca quenquetsajianquitsica icantsiijaariquea:

—Naroguentijiatari ichoviquijianaqueca Averaameni. Teequea inchoocatimateji ashintajiganaca. ¿Queroquea ocotaca picantantacaca: ‘Pinchoocatashijajempaquea intati’?

³⁴ Icantajiguiriqueate Jesoshi:

—Noncamantamajajiguempajia, maasano quempevaejiatsica teequea inchoocatashijiguempajia intati, agavejajiaqueritari quempevaerentsi, quejetaca ashintacari omperaperaatacari. ³⁵ Pamenerijate aajanirentsi ivegarajitica teequeate inquejetempajia irijanite aajanitarica, teetari irio irijanite. Irinintaquaguete irojocaqueneri itsipa, irojocaqueneriqueate; cotanquitsiqueate irijanitemajaca aatoquea yojocantiri, incoguitempani inchoocaque. ³⁶ Iroguipaquijacaajajempiroguete Irijanite Aapani Irioshi agavejajiaquempiguete quempevaerentsi, arimajaquea pinchoocatashijajempa intati. ³⁷ Notsaquequeate aviguentijiavetaca ichoviquijianaqueca Averaameni, cotanquitsiquea tee pinintajigueti pinquemisantajigueroji nocamantajavetaquempica imaica, irootaquequea pinintantajiacaca pimetojajiguena. ³⁸ Naatimpaquea manaquea nocantajiaquempiquea nonejaqueca notsipatacariguete Aapani. Ariquea piquejejiaca aviatimpajia manaqueate pantajiaqueroquea querocaca icantajiaquempica piri.

³⁹ Iriatimpajiaquea icantajigui:

—Irio aapani Averaameni.*

Cotanquitsi Jesoshi icantiri:

—Iriomeguetiqueate choviquijianaquempime Averaameni pinquejejiaguempimequea iriatimpa. ⁴⁰ Cotanquitsiquea teequea pinquejejiguempariji imaica. Nocamantajavetaquempiqueate iroomajatatsica icanquenaca Aapani Irioshi, cotanquitsiquea aviatimpajia manaquea pinintajiaque pimetojajiaquena. Teequeate inquejeteroji Averaameni imaica. ⁴¹ Aviatimpajia mana pisavicaventajiaquero isavicaventica piri.

Iriatimpajia icantajiguiriquea:

—¿Arimpa itsipa irijanintajigana? Iriguentitari irijanintajigana Aapani Irioshi apatiroti.

⁴² Icantajigui Jesoshi:

—Iriguentimequea irijanintajiaquempime Aapani Irioshi pimpintsajiaquenamequea, aritarite noponeaca iriatimpaqui, teenica inchiqioji noncoraquetashitempajinaatimpa, iriguentiquea tigarancaquena. ⁴³ ¿Queroquea ocotacani teeca pintsatantajiaquemparo nocantajavequempica? Teequeate pinintajigueji pinquemisantajigueroji nocanqueca. ⁴⁴ Iriguentitari irijanintajiaquempi ampatsini, iriguentiquea ashintajiaquempi. Aviatimpajia iroguenti pinintajiaque pantajiaquequea inintaqueca iriatimpa. Iriatimpaquea iriguenti metojantatsica, irosati icocani coramani iroaqueraguete irosati imaica. Teequea incanteroji arimajatatsica, teequea irishineventemparoji. Itsojeacaguete, irootaque irashi, ari icocani iriatimpa, iriguenti tsojenti, iriguentiqueate oquenantapojaca tsojetsi. ⁴⁵ Naatimpaquea nocantamajataque iroomajatatsica, irootaquequea teeca pinquemisantantajiguenaji. ⁴⁶ ¿Arimpa chooca nantaqueca teeca oncameetsateji pincantacotsitantaquenaroca? Tee anejeroji. ¿Quero ocotacani imaica teeca pinquemisantantajiguenaji? Iroguentiquea nocanqueca arimajaca. ⁴⁷ Iriiraqueate yashintacaca Aapani Irioshi iquemisanqueroquea icanqueca. Cotanquitsi aviatimpajia teequea irio ashintajiguempine Aapani Irioshi, irootaque tee pinquemisantantajiguemparoji.

⁴⁸ Ariqueate icantsiijaariquea jorioja:

—Nocantamajataqueshine aviguenti Samariaquitica, aisa ichooaquempi ampatsini.

⁴⁹ Iriiraquea Jesoshi icantiriquea:

—Tee inchoocatimatenaji ampatsini. Naatimpaquea iroguentiquea noninque iramenantajiquemparica Aapani yoganejencavaetaca noquenquetsatacotancarica cameetsa, cotanquitsiquea aviatimpajia teequeate pinintajigueji pinquemisantajiguena, mana picantacantataquena intati. ⁵⁰ Naatimpaquea teequea inchiqioji noninteji inquemisantajitena intsaromentajitena, cotanquitsiquea choocaquea nintacaanqueroica intsaromentajiguena. Irio cantanquitsine quero incotanaquempani maasano teeca intsaromentajiguena. ⁵¹ Imaicaquea noncamantamajajiaquempiquea quericaca netsanataqueroneca nocantica aatoquea imetojimataji.

⁵² Icantajiguiriqueate jorioja:

—Notsamajajiaquero imaica arimaja ichooaquempi ampatsini. Metojajianajitari Averaameni jerijiaquea maasano tsavetantajiatatsica, cotanquitsi aviatimpa picanque: ‘Querica netsanataqueroneca nocantica aatoquea imetojimataji.’ ⁵³ ¿Arimpate panaaqueri Averaameni choviquijianacajica? Iriatimpa metojajitari, ariqueate iquejejianaja tsavetantajiatatsicani. ¿Taampa aviatimpa picantantacaca? ¿Taaquea pijiqueji?

⁵⁴ Icantajiguiriqueate Jesoshi:

—Inchiqiojime narosatime quenquetsatacotajatsine cantajatsineme: ‘Caaviji noganejencamajata’, narosatime nintajatsine intsaromentajitena, aatome ocameetsati. Cotanquitsiquea iriguentiquea nintanquitsi Aapani picantajaveca aviatimpajia iriguenti pitsaromentajiga. Irio shineventaquena. ⁵⁵ Cotanquitsiquea teequea pintsajigueriji. Naatimpa arimaja notsaqueri. Oramequea noncanquemeguete tee nontsateriji, manamequea nontsojeaquempame nonquempejiaquempimequeate aviatimpajia. Cotanquitsiquea naatimpa arimaja notsaqueri, aisa noquemisantiri

* 8:39 Icanqueguete aapani, icantacotaqueri ivaesatinite.

taaca icanquena. ⁵⁶ Coramani iriraquea Averaameni choviquijiaquempica ishinevaeca iquenquejaquegueti iramenaquero noncoraqueque, ariqueate yamenaquero ishinevaetanacaquea.

⁵⁷ Ariquea icantajiguiiri joriojia:

—Tequerata pajagantsitacoteji 50 ajagantsi, ¿pinejirimpa Averaameni?

⁵⁸ Icanqueri Jesoshi:

—Noncamantamajiaquempi, tequerataguete inchoocoteji Averaameni, choocana naatimpa.

⁵⁹ Ariqueate yaashijianaqueriquea mapi intsinacajiaquerime, cotanquitsiqueate Jesoshi ipeapitsajianajari, isotoantanajaro oticaacoro teemporo, yoanaji.

9

Jesoshi inejacajairiguete shamponcajari

¹ Ariqueate iquenanaqueguete oraniqui Jesoshi inejapojiriquea shirampari shamponcajari, yashitaque yoaquero iroaqueraguete ivoapoji tee irinejeji. ² Iriraquea itsatacaanjia icantajiguiiri:

—Tsatacaantantatsica, ¿quero ocotacani ivoaqueguete ishampontajatantacaca irica shirampari? Iriocaja quejejianquitsi iriri irooca iriniro iquempevaejiaca iquejetantanacaca irijanite, iriocaja quejetanquitsi iquempevaetaca irisati.

³ Icantajiguiriqueate Jesoshi:

—Teequea iroguentiquea quempetacaguemparine iguempevaere, aisa teequea iro quempetacaguemparine iguempevaejeji iriri irooca iriniro. Manaquea oquejetanacaca imaica iramenimentajiqueroneji iragavejane Aapani Irioshi. ⁴ Ogantagatirajaguete osavincaguitetiguete nantaguiteroni inintacaaquenaca tigarancaquenaca. Pajinitari ompitsecanaje, tecatsi agavejanquitsine irantavaetantajemparo. ⁵ Choocatirajanaguete acaniqui quepatsiqui, narotaque itsirencarite quepatsiquitica.

⁶ Ariquea icanquitiguii imaica, iquishoaque quepatsiqui, yaaque capichaji yamirocaquero, ariquea itirijatantacariquea shamponcajari, icantiri:

⁷ —Iintsija pija pinquivajatajatempa omotijaqui icantajitica Shiroe —oncanque ovajiro “Itigarancajitica”.

Iriatimpa yoanaque iquivajapojaca, ariquea icoraquevetajaguete jac nejanaji.

⁸ Irirajiaquea iconoajigaca iguintenijigaguete jerijia aisa amenajiguirica isaviquiguete yamanantapiniqueguete imentaquipae icantajianaquequea:

—¿Teempa irio irira savicapinitatsica amanantapinitatsica imentaquipae?

⁹ Iconoagarantajiaqueate icantajiaquequea:

—Jeejeguitatsi iriguenti.

Itsipaquea cantajiananquitsi:

—Tee, mana iquempevecari.

Iriatimpa icantanaque:

—Naroguenti.

¹⁰ Ariquea icantajiguiiri:

—¿Queroquea picotanajani pinejantanajaca?

¹¹ Iriatimpa icantajiguiiri:

—Iriraqueate icantajitica Jesoshi yamirocashitajana quepatsi, itirijatantajanaro, ariquea icanquena: ‘Pija pinquivajatajatempa omotijaqui Shiroe.’ Ariquea noanaque noquivajatajotiga nonejanaji.

¹² Iriatimpajia icantajiguiiri:

—¿Quericampa imaica?

Icantiquea iriatimpa:

—Jmm, tee nontsateji.

Irirajia pariseojia icoacojiaqueriguete shamponcavetatsica

¹³ Ariqueate yaajitanaqueri shamponcavetatsica ichoocajiaqueguete pariseojia.

¹⁴ Oraqueate yamirocashitaqueriguete Jesoshi quepatsi inejacajairiguete iroguentiquea savincaguiteri imagorejantajitaca. ¹⁵ Irootaquequea icoacotantajiacarica pariseojia quero icotajani inejantanajaca. Iriatimpaquea icantajiguiriquea:

—Itirijatantajanaro cajashepatsari, ariquea noquivajataja, ari nonejanaji imaica.

¹⁶ Ariquea iconoagarantajiaca pariseojia icantajiaquequea:

—Irraquea quejequeroca imaica teequea iriguenti tigarancerine Aapani Irioshi, yantantacarotari savincaguiteri imagorejantajitaca.

Cotanquitsiquea itsipaquea cantananquitsica:

—Iriomegueti quempevaetatsica, ¿arimpa iragavejaqueme ironigaanquero oacaajia-cajica intati quejecaroca ocatica?

Ariqueate tee inquemavacaajiajempaji. ¹⁷ Irootaquequeate icoacotantajianajarica aisa shamponcajavetatsica, icantajiguiriquea:

—¿Aviatimpa queroquea pincanteni? Aviroitari inejacajai.

Icanti:

—Iriguentiqueate tsavetantiroca icanquerica Aapani Irioshi.

¹⁸ Cotanquitsiquea irirajia joriojia teequea irinintajigueji incantajigueji inejacajairi shamponcajari icajemacaantantajiacarica iriri irosati iriniro icantajiguiriquea:

¹⁹ —¿Irio irica pirijanite picanqueca ivoaquegueti ishamponcajataque? ¿Queroquea icocani imaica inejantanajaca?

²⁰ Yacanaqueri iriatimpa:

—Notsaque iriotaque nirijanite, aritari icoca iroaqueraguete ivoaque ishamponcajataque. ²¹ Cotanquitsiquea teequea nontsateji quero icocani inejantanajaca imaica, aisa tee nontsateji queri nejacaajirica. Iintsijate pincoacoteri iriatimpa, quenquevaritari, inchiqiojitsitaquea incamantajiaquempi iriatimpa.

²² Iriatimpajia mana icantantajiacaca intati imaica itsaroacaajiacaritari imajirojiate joriojia, icantajiaquetarite querica cantanquitsine Jesoshi iriguenti Quirishito* incatsimatimentajiqueriquea aatoquea iquijaji shinagogaqui icapiocantapinijiacaca. ²³ Irootaquequea icantantacaca: “Iintsijate pincoacogigueri iriatimpa, quenquevaritari.”

²⁴ Ariquea irirajiaquea coacojiaquerica icajemajajiriqueate shamponcajavetatsica icantajiguiri:

—Iriguentiquea pincanque yoganejencamajata Aapani Irioshi. Irraqueate picanqueca incajaranqui notsajiaqueriquea iriguentiquea quempevaetatsica.

²⁵ Cotanquitsiquea iriatimpa icantajiguiriquea:

—Jmm, tee nontsateji iriocampa quempevaetatsica, iroguentiquea notsaque iroaque-raguete noshamponcajavetaca, imaicaquea nejanajana.

²⁶ Icantsijigariquea aisa:

—¿Queroquea icoquempini inejacaantajimpica?

²⁷ Icantsijigariquea iriatimpa:

—Nocamantamajajivetaquempiquea incajaranqui teequea pinquemajiguenaji. ¿Imaicaquea queroquea ococani pinintantajiacaca nampijitajero aisa noncamanta-jempiquea? ¿Ari pinintajiaque aviatimpajia aisa pimpejaiaquempa itsatacaaneja?

²⁸ Ariqueate icatsimatsajiaqueriqueate icantajiguiriquea:

—Aviatimpaquea aviguenti itsatacaane, naatimpajiaquea naroguentijiatarite ogui-jatacotajironica itsatacaantinica Moishishini. ²⁹ Notsajiaquetarite iriraqueate Aapani Irioshi iquenquetsatacaqueri Moishishini, cotanquitsiqueate iriraqueate irica piquen-quetsatacotaqueca imaica teequea nontsateriji queroca iponeacani.

³⁰ Ariqueate iriatimpa icantajiguiriquea:

—Arisacanicate. ¿Queroquea picojiacani aviatimpajia? Iriatimpaquea inejaca-janaquea, cotanquitsiquea teequea pintsajigueji quero iponeaca. ³¹ Atsaqueritari iriraquea Aapani Irioshi aato iquemiri quempevaetatsica iramaneriguete. Iriguentiquea inquemaque tsaromentamajacarica antiroca ininqueca iriatimpa. ³² Irosati coramani tecatsi quemacoterine itsipa caquinte inquejetero imaica iragavejaque irinejacaajeri voacotiroca ishamponcajare. ³³ Irica noquenquetsatacotaqueca imaica aatomeguete irio tigarancerime Aapani Irioshi aatome yagavejime inquejetacaquemparome imaica.

³⁴ Iriatimpajia icantajiguiriquea:

* 9:22 Quirishito ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraqueaque impeaquempa imajirote ompejiaquemparineca.

—¿Oo querocaquea pincantempani piji quejiquea pintsatacaajiguena naatimpajia?
Irosati piquejetaca aviatimpa piquempevaemajatanaca.
Ariquea icatsimamajajianaquequeate yoguisotoaqueri.

Iiraquea teeca intsateriji Aapani Irioshi quejevaeca shamponcajari

³⁵ Iiraqueate Jesoshi iquemacoquerigueti icatsimajitaqueri yoguisotoajitaqueri, yoanaque icoaguequeri. Ariqueate inejapojajiri icantiri:

—¿Ari piquemisantaqueri aviatimpa Irijanite Caquinte? ¿Paventashirentacari?

³⁶ Icantiri iriatimpa:

—Nomajirote, ¿quericaquea? Intsija pincamantena naventashirentantaquemparica.

³⁷ Icantiri Jesoshi:

—Pinejaqueritari, iriotaque quenquetsatacaaquempica imaica.

³⁸ Icantiri:

—Nomajirote, naventashirentaquempi.

Ariqueate itigueroashitanacari itsarovencari. ³⁹ Icantiri Jesoshi:

—Iroguenti nocoraquetashique acaniqui quepatsiqui cameetsaniji incantacoji-queriniji caquinteja quero icocani, cameetsanijite irinejajajeniji shamponcajavetatsica, irirampani nejajavetanquitsica irishamponcajatanaje.

⁴⁰ Ariqueate irirajia pariseojia choocajianquitsica oraniqui iquemajiaquerigueti ican-quegueti imaica iconoagarantajiacaquea icantajiaqueriquea:

—¿Arimpaquea naatimpajia noquejejiacari shamponcajari?

⁴¹ Icantajiguiriquea Jesoshi:

—Pinquejejiacquempimegueti shamponcajari, aatomequea ochoocatajime piguempevaereja, cotanquitsiqueate imaica picantajavetacatarite: ‘Nonejaque’, irootaque-quea ochoocatantajaca piguempevaereja.

10

Quempoguijamajaticica oveja

¹ “Imaica noncamantamajajiaquempiquea quericaca ataitashitanaquerineca on-taniqui itantacojiquerigueti oveja aatoguetei iquijantaro sotomorontsi iriguentiquea aitsitantatsica aisa aapitsatantatsica. ² Cotanquitsiquea iriraquea quijanquemparoneca sotomorontsi iriguentiquea quempoguijirica irovejate. ³ Iriguentiquea irashire-javaquene timashitiroca sotomorontsi. Iiraquea irovejajiate iquemajjavajiri iquenquet-satiguetei. Icajemajiaqueri irovejajiate apaniropae ivajiroqui, yaajianaqueri sotsiqui. ⁴ Iroomba iteroncaqueriguetei yoguisotosotoitaqueriguetei maasano, yoanaque ijivatana-queri. Iiraquea oveja yoguijaguijaitanaqueriqueate, itsajiguiritari iquenquetsatiguetei. ⁵ Cotanquitsiquea aatoquea yoguijajiguiri itsipa teeca intsajigueriji, manaquea irishi-ashitaitapitsatanaqueri intati, aatotari itsajiguiri inquenquetsavetaquempaguetei.”

⁶ Ari iquejetacajiacari Jesoshi imaica, cotanquitsiquea iriatimpajia tee intsajigueji taa opajita iquejetacaacaca. ⁷ Irootaque icantantacaca aisa Jesoshi:

“Imaica noncamantamajajiaquempi, naroguenti irashitacoro oveja. ⁸ Maasanoquea coraquejianquitsica tequerataguetei noncoraqueteji naatimpa iquejetacari aitsitantat-sica aisa aapitsatantatsica, cotanquitsi tee inquemisantajigueriji oveja. ⁹ Naroguenti ashitacorontsi. Querica quijantanaquenanea naatimpa inchoocapojaje cameetsa, inquijapojaque, irisotoanaque iramenapojero cataromashi. ¹⁰ Iiraqueate aitsitantatsica iroguentiquea icoraquetashitacore iraitsitante, irimetojante, impoguerejante, cotan-quitsiquea naatimpa iroguentiquea nocoraquetashique iranijajianajeniji, iranijamajata-tiguenimaja.

¹¹ “Naroguenti cameetsari quempoguijamajajiguirica oveja. Iiraquea cameet-sari quempoguijamajajiguirica oveja irimetojavejaqueriquea. ¹² Cotanquitsiqueate irira ivegarajitica intati inquemoguijantaquenemparica oveja, iramenavaqueriguetei lobo* incoraquequeguetei, manaquea irishianaque intati irovashiantanaqueriquea oveja,

* 10:12 Irira lobo iriguenti tomirishiquitica catsimari quejevecarica iririjegui shiishi.

teenica irio ashintemparine. Irira lobo iraashipojempari ovejapae, iroguivorocajen-caqueri. ¹³ Irooquee ishiantanacaca shirampari, manatari ivegarajitiri intati, teetari impintsatempariji oveja.

¹⁴ “Naroguenti cameetsari quempoguijamajjiguirica oveja. Notsamajjiguiriquea novejiate, ari iquejijigana iriatimpajia itsamajjigana, ¹⁵ quejecaquee itsamajatanagueta Aapani, ari noquejetaca naatimpa notsamajitiri. Ariquee aisa nometojaventajiaqueri novejatepae. ¹⁶ Chooqa itsipapae novejatepae teeca intsipajiguempariji choocajianquitsica acaniqui tantontsiqui. Namajiaqueriquea iriatimpajia aisa. Inquemisantajiaqueaquea nonquenquetsatacaquerigueta, apapioroquee incantana-jempa, aparo quempoguijaquerine.

¹⁷ “Jeroquee ipintsatanquenaca Aapani, inchiquiojitatari nojocanaquero nanijane, cameetsanijite naavajero nanijanaje. ¹⁸ Tecatsi aapitsatenarone, inchiquiojita naatimpa nojocanaquero. Nagavejaque nojocanaquero, nagavejaque naavajero. Irootaque inintacaquenaca Aapani nantero.”

¹⁹ Ariquee iquemajiaquerigueta joriojia icanquegueta imaica, ariquee icojianaca tee inquemavacaajianajempaji. ²⁰ Icantajianaquequee oshequini:

—¿Quero ocoani piquemisantantajiavacarica? Manatarite ichooaqueri ampatsini, aisa mana ishoncacotaca intati.

²¹ Cotanquitsiquea icantajianaquequee itsipa:

—Iriraquea ichooaqueca ampatsini aato yagaveji iquejetacagaro iquenquetsataquegueta imaica. ¿Arimpa iragavejaque ampatsini iramenacaajeri shamponcajari?

Imanintajiaquerigueta joriojia Jesoshi

²² Oraqueate ocatsincaguitepojajigueta iriraquee joriojia icapiocaventajiacaroquee ishineventajiacaca Jerosarequi iquenquejajajiro inetsanajajirogueta coramani ivaesatinite teempero itsaromentantajitarica Aapani Irioshi. ²³ Iriraquee Jesoshi yanijitaquequee oraniqui sotsiqui teemperoqui oveshintaacagueta iniropoapae ocajaratsencoataquegueta icantajitica Irashi Saromoni. ²⁴ Iriraquee joriojia icapiocaventajiapocariquee icantajiguiriquea:

—Noguijajavequempiquea coramani, tequerataquee pincamantajiguenaji. Aviguentimpate Quirishitotsica iintsijate pincamantamajajiguena imaica.

²⁵ Iriraquee Jesoshi icantajiguiriquea:

—Nomajiaavequempitari nocamantajiavetaquempiquea, teequee pinquemisantajiguenaji. Oraquee nantaguequeca ivajiroqui Aapani nintacaquenaroca, irooquee tsatacaaquempica quero nocotacani. ²⁶ Cotanquitsiquea aviatimpajia tee pinquemisantajiguenaji, teenicaquee avironica novejate. ²⁷ Irirajiaquee nashijia novejatepae iquemisantajiganaquee noquenquetsataquegueta, naatimpaquee notsajiguiri, iriatimpaquea yoguijaguijaitana. ²⁸ Nanijacaajiajeriquea mananiji incoguitempani inchoocajiaje, aato ipega camorecariqui. Aatoquee ichoocati aapitsaquerineca. ²⁹ Aapani jocaquenarica yanaajiaqueri maasano. Aatoquee ichoocati aapitsaquerineca. ³⁰ Naatimpaquee aisa Aapani apaniro nocanca.

³¹ Ariquee irirajia joriojia yaitsijianaja aisa mapi intsinacajiaquerime.

³² Cotanquitsiqueate Jesoshi icantajiguiriquea:

—Naatimpaquee yagavejacaquenaquee Aapani nonigaaguequempiroquee taaca opajitapae cameetsaguetsica. Imaica, ¿querocampate pintsinaquimentajiaquenaca?

³³ Icantajiguiriquea joriojia:

—Aato iroguenti notsinaquimentajiguimpi taaca opajita pantaguetaqueca cameetsaguetsica, iroguenti piquejemanatacari Aapani Irioshi. Aviguentitari caquinte, cotanquitsiquea pipinajashicari iriatimpa.

³⁴ Icantsiijaariquea Jesoshi:

—¿Teempa oncanteji Itioncacaantaquempica Aapani Irioshi: ‘Nocanque naatimpa, aviguentijia irioshijatsica?’ ³⁵ Itsajitrotari maasano Itioncacaantaqueca Aapani Irioshi aatoquee acanti tee iroomajaca, aisa iriguentiquea cantanquitsi Aapani irirajiaquee

itigarancajiaqueneca Iguenquetsatsare iriguenti irioshijiatsica. ³⁶ Iriguentitari nintacaaquena itigarancantaquenaca acaniqui quepatsiqui, ¿queroqueate ocoani picantantaquenaca ‘Pipinajashitacari Aapani Irioshi’, nocanquegueti: ‘Naroguenti Irijanite Aapani Irioshi?’ ³⁷ Aatomegueti nantrome yantaguetica Aapani, cameet-samequea aato piquemisantajigana. ³⁸ Cotanquitsiquea imaica nantaquerotarite. Aatogueti piquemisantajiavetana nocantajiaquempigueti imaica, pinquemisantajiguenaja pamenajiaquerogueti nantaguetiquerogueti cameetsaguetatsica pintsamajajiaqueni choocaquena Aapani, aisa noquejetaca naatimpa nochoocaqueri Aapani.

³⁹ Inintajiavetajaquea aisa iraaquerime irajaianaquerime irimetojacaantajiaquerime, cotanquitsiquea iriatimpa ariquea isotoapitsajianajiri.

⁴⁰ Ariqueate Jesoshi yoanajiqueate intatiqueroqui Jororanequi iviñacajatantaquegueti Joanca iroaqueragueti, ariquea ichoocapoji oraniqui. ⁴¹ Yoajianaquequea oshequini caquintepae iramenajiaqueri, icantajiguiquea:

—Iriraquea Joanca teequea ironigaantavetemparoji oacaantantatsica intati, cotanquitsiquea itsavetacotaquerigueti iricatica, arimaja maasano icanquea.

⁴² Ariquea itsaromentajianacariquea oraniqui oshequini.

11

Imetojaquegueti Irasaro

¹ Chooaquea joquijitanquitsica icantajitica Irasaro. Iguintenitaquea Vetaniaqui, ogu-intenitaguete Maria aisa oguetyote icantajitica Marita. ² Ocatica Maria, iroguentiquea shaguitantacarica Amajirote casancajari iguitiqui, ariqueate osheguititancari omae. Irira Irasaro joquijitanquitsica, iriguenti ojariri. ³ Ariquea iroatimpajia otigarancaqueri camantaquerineca Jesoshi incanquiteri:

—Nomajirote, joquijitaca pipintsamajatacaca.

⁴ Iriraquea Jesoshi iquemaquegueti icanti:

—Oraquea joquijirentsi aaquerica teequea iro oncoraquetantempa ometojaqueriniji, manaquea iramenimentajitaqueroniji caaviji yagavejamajati Aapani Irioshi, aisa intsajitaqueroniji caaviji yagavejamajati Irijanite Aapani Irioshi.

⁵ Iriraquea Jesoshi ipintsamajavetaro Marita aisa oguetyote jeri aisa Irasaro, ⁶ cotanquitsiqueate iquemacovetariguete yojoquijica teequea irogeje, manaqueate imaanaji mavite savincaguiteri ontaniqui choocaquegueti. ⁷ Iroompaquea icantajiguiiri itsatacaanejia:

—Jameja oajianaje Joreaquei.

⁸ Iriraquea itsatacaanejia icantajiguiriquea:

—Tsatacaantantatsica, iroaquerasampate inintajiavecaquea joriojia intsinacajiaquepime ontaniqui. ¿Arimpate poanajetampate aisa?

⁹ Icanque Jesoshi:

—Isotoguiguete catsirincaiteri ¿teempa oncarate 12 hora osavincaguitetanaque tequerataguete inquijaje? Quericaca anijitatsineca savincaguiteri aato itivata, inejantacaratari otsirencaguete quepatsiquitica. ¹⁰ Cotanquitsiqueate quericaca anijitatsineca pitsecariqui intivataquempaquea, teenicate onchoocateji tsirencaguitetacotaquenerineca.

¹¹ Irosati icanque:

—Iriraquea atsipavijitaca Irasaro maaquequea, cotanquitsiquea noanaque nontinajeriquea.

¹² Iriatimpajia icantajiguiriquea:

—Nomajirote, imaaquegueti iroveanajempaqueate.

¹³ Oraqueate icanqueguete Jesoshi: “Maaquequea”, iroguentiquea iquenquetsatacotaque imetojane, cotanquitsiquea iriatimpajia teequea inquemajigueriji, manaqueate ijijiaqueje arimaja imaaque. ¹⁴ Ariquea icamantamajajiaqueriquea Jesoshi, icantajiguiiri:

—Metojanaque Irasaro. ¹⁵ Cameetsa teequea nonchoocatsitimpaji naatimpa ontaniqui pintsaromentajiaquenaniite aviatimpajia pamenajiaqueroguete nantaquea. Cotanquitsiqueate imaica jameja oajianaque iriatimpajia.

¹⁶ Iquenquetsatanaquequeate Tomashi icantajitica Tsipari icantiriquea itsipapae itsatacaanejia Jesoshi:

—Iroosacanicate jamequetirote oajianaque aatimpajia aisa, anquempejanaquempari Jesoshi ametojajiaque.

Jesoshi iriguenti tancorejantatsica, iriguenti anijagantsi

¹⁷ Ariqueate yarejerejeipojacaguete iquemacopojaqueriqueate Jesoshi Irasaro icarat-acotanaque 4 savincaguiteri yoguijaantajitacarica omoroqui imperita. ¹⁸ Oraqueate Vetania oquempejiquero Jerosare, arica ocarataque 3 quiromeetero. ¹⁹ Ariqueate ichooaque oraniqui Vetaniaqui oshequi joriojia coraquejianquitsica iroguishinejajia-jeroquea Marita aisa Maria oshimampojanacocari ojariri. ²⁰ Oraqueate Marita oquemacotavaqueriguetei Jesoshi coraquetapojaque, oanaquequea ontonquivojavaquempariniji, oraquea Maria teequea ogueji iroatimpa, mana ochoocaque tsovironaqui. ²¹ Ariquea ocantavaqueriquea Marita Jesoshi:

—Nomajirote, arimeguetei pinchoocaqueme acaniqui aatomequea imetojime jai.

²² Cotanquitsiquea imaica notsaque taaca opaji pincanqueri Aapani Irioshi, inquemisan-tavaquempiquea.

²³ Icantiroquea Jesoshi:

—Impochatanaje pijariri.

²⁴ Ocantiri Marita:

—Jeejeguitatsi, notsaque impochatanajeguitatsi oncoramanitapojajeguetei impochajianajeguetei maasano metojajiavetatsica aapojaquempaguetei savincaguiteri vegaratapajaatsineca.

²⁵ Icantiro Jesoshi:

—Naroguentiquea tancorejantatsica, naroguentitari anijagantsi. Quericaca quemisantaquenanea irimetojavequempaguetei impochatanajequa. ²⁶ Maasano anijajatsica quemisantajiganaca, aato imetojamajatitsi. ¿Piquemisanquerompa ocatita?

²⁷ Ocantiri:

—Jeejeguitatsi, Nomajirote, noquemisanquempiqueate, notsaquetarite aviguentiquea Quirishito, Irijanite Aapani Irioshi, aviguentitarite icamantacojitica incoraqueataque acaniqui quepatsiqui.

Iraanacaguetei Jesoshi omorotacaguetei imperita yoguijaantajicarica Irasaro

²⁸ Ariquea ocanquitigui imaica Marita, opianaja ocajemapojiro Maria oguetyote, inchiquioji oquenquetsatacaaqueroquea ocantiro:

—Arejetapojaca Tsatacaantantatsica, icajemacaanquempi.

²⁹ Ariquea oquemavaqueroguetei ocatiapanajantaquea oanaque ichooaqueguetei. ³⁰ Tequeratatirajatarite irarejetempaji Jesoshi ochoocaguetei tsovironaquipae, manaqueate ichooapojaque ontaniqui iroaqueraguetei otonquivojavacariguetei Marita.

³¹ Irirajiaqueate joriojia tsipajiacaroca Maria tsovironaqui, oguishinejaquero, iroompaquea yamenavaqueroguetei ocatiapanajanta osotoanaque yoguijaguijaitanaqueroquea, ijiquequeate ari oanaque ichoocataqueguetei ojariri iraacopojajeri.

³² Ariquea arejetapojacaguetei Maria ichooaqueguetei Jesoshi, onejapojaqueriguetei otigueroashitapojacari iguitiqui, ocantiri:

—Nomajirote, arimequea pinchoocaqueme acaniqui aatomequea imetojime jai.

³³ Ariquea yamenavaqueroguetei Jesoshi iraanaca Maria jerijiaquea aisa joriojia tsipajiacaroca, ari quea iria ishimampojanacavaetanaquea. ³⁴ Ariquea icanti:

—¿Quero pojoquijiquerini?

Iriatimpajia icantajiguiriquea:

—Nomajirote, jameja pamenaquiteri.

³⁵ Iraaca Jesoshi. ³⁶ Icantajianaquequea joriojia:

—Pameneri, caaviji ipintsamajatari.

³⁷ Cotanquitsiqueate iconoagarantajianaquea mana icantajianaque intati:

—Yagavejaquetari inejacajairi shamponcajvetatsica, ¿teempa iragavejeji irogueshi-tavajerime iricatica aatoniji imetoji?

Jesoshi yovochantajiriguete Irasaro

³⁸ Arimpa ishimampoancavaetanaca Jesoshi. Ariqueate yarejetapojacaroquea omoro-tacaguete imperita yoguijaantajicarica, iroguenti iticaacotantajicari inirotsentseina mapi. ³⁹ Icanti Jesoshi:

—Pintanarejeroja mapi.

Oquenquetsatanaquequeate Marita itsijoite metojanquitsica, ocantiquea:

—Nomajirote, aricaja pojitanaque, yoguijaitsijicaritari chapinqui, icaratacovaetana-quetari 4 savincaguiteri.

⁴⁰ Icantiro Jesoshi:

—¿Arimpa tee noncantempi incajaranqui pinquemisanquenaguete pamenaqueo-quea iragavejane Aapani Irioshi?

⁴¹ Ariquea itanarejiaquero mapi. Iriaquea Jesoshi yamenanaque jenoqui inquitequi icanti:

—Ariotesa, Aapani, noshinevaetacaqueate piquemavaquenatarite. ⁴² Notsaquetari irosati picoguitanica piquemaquena, cotanquitsiqueate nocanqueguete imaica, iroguenti inquemisantimentajiaquempinijite maasano iricajia catintijianquitsica, intsajiaquenijite arimaja aviguenti tigarancaquena.

⁴³ Iroompaquea icanqueguete imaica iririjencatanaquequea icajemanaquequea icanti:

—Irasaro, pisotoapojaje.

⁴⁴ Ari isotoapojaji metojavetanquitsica aguiaguaatacari omagopae iracopaequi, igui-tipaequi, maasano. Oraquea ivoroqui ipashicacaro paaño. Icanti Jesoshi:

—Poishorejacoterijate iroanajeta.

Isariajicariquea Jesoshi irimetojacaantajitaqueri

(Mt. 26.1-5; Mr. 14.1-2; Irc. 22.1-2)

⁴⁵ Irootaquequea iquemisantantajiacarica oshequi joriojia oananquitsica tsipajiacaroca Maria yamenajiaqueroguete yantaqueca Jesoshi, itsajiaipojaque iriomajaca.

⁴⁶ Cotanquitsiquea iconoagarantajiacaquea manaquea yoajianaque icamantajiaipojaque-riquea pariseojia taa opajita yantaque Jesoshi. ⁴⁷ Ariquea icapioacajiacaquea pariseojia itsipajiacariquea saserorotejia anaantajanquitsica jerijia itsipajia majirontajiat-ica, icantajiguica:

—¿Queroquea ancojiaquerini irintatica? Yantaguetaquetari oshequi ocaantantatsica intati. ⁴⁸ Aatogueteitari acantajigui manaquea inquemisantajianaqueri maasano, ari-quea incoraquejiaque Iromaquitica irisoveaqueo-quea teempero itsarotentantajitarica Aapani Irioshi, irashintsijiaipojacajiroquea aguepatsijiate iroguivorocajiacajiquea intati.

⁴⁹ Ariquea ichooaque saserorote anaantamajatanquitsica icantajitica Caipashi. Iri-atimpaquea iquenquetsatanaquequea icanti:

—Teequea pintsajigueti aviatimpajia. ⁵⁰ Tee pinquenquejajigueti ocameetsamajataque apatiroti caquinte irimetojavenaqueri caquinteja, aatoniji ateroncajiga maasano aguinteni-qui.

⁵¹ Ora icanqueguete imaica teequeate inchiquiojitsita inquenquejashitemparoji iri-atimpa. Iriotaquetari saserorote anaantamajatanquitsica oratica ajagantsi, irootaque-queate iquejetacaantantacarica Aapani Irioshi icantacotaqueriguete Jesoshi irimeto-javentajiaqueri maasano joriojia. ⁵² Cotanquitsiquea aatoquea apaniro irimetojavena-queri joriojia, irimetojavenaqueriqueate aisa maasano irijanijiate Aapani Irioshi guin-tenigueteatsica osamanipaequitica, incapioacajiaquerinijite apapiro incantanajempa.

⁵³ Irosatiquea isarijantajanacarica irimetojajiaqueri Jesoshi. ⁵⁴ Ariqueate iriatimpa teequea ironigaajajempajia ichoocamajajiaqueguete joriojia, manaquea yoanaque guinteninintsiqui icantajitica Eperaine oquempejigueti oquitamampororoipojigueti. Ariquea ichooapojaji oraniqui itsipajiacariquea itsatacaaneja.

⁵⁵ Pajiniquica aapojempa ishineventajiacaca joriojia icantajitica Paashicoa. Oshequiniquica quenagueta-quetari querocaguete iguinteniguete yoayaitanaquequea Jerosarequi irinetsanamajajiaquempa tequerataguete arejetempa Paashicoa, irootarite

yamejigaca iriatimpajia. ⁵⁶ Icoaguequerquea Jesoshi oraniqui. Ariquea ichoocajiaquegueti teemporoqui oniganquirequi icantavacaajiaquea:

—¿Quero pincanteni? ¿Arimpa incoraqueque imaica Paashicoaqui?

⁵⁷ Irirajia pariseojia jerijia saserorotejia anaantajianquitsica icantajiaqueritarite maasano:

—Pitsaquegueti quero ichoocaqueni Jesoshi, pincoraqueque pincamantajiguena cameetsaniji naacaanqueri.

12

Maria oshaguiguititancari Jesoshi casancajari

(Mt. 26.6-13; Mr. 14.3-9)

¹ Ocaratapojaquegueti 6 savincaguiteri arejetantapojaquempaca Paashicoa, iriraquea Jesoshi yoanaquequea Vetaniaqui iguintenitaguete Irasaro metojavetanquitsica yovochantajica. ² Ariquea oraniqui itijaiqueroquea irishecaquempaca Jesoshi, irishineventajiavaquempariquea. Oraquea Marita iroguenti amajiaqueneri. Iriraquea Irasaro ari ichoocaque oraniqui shitaponcarontsiqui iconoajiacari maasano tsipajiacarica Jesoshi. ³ Ariquea ocoraquepojaquequea Maria amacotaquequea apanaquitiro vegaramajatanquitsica casancajencajatatsica ipeantajitaroca naarero, tee inconoajatantajitemparoji otsipaja. Oshaguiguitancariquea iguitiqui Jesoshi, iroompa oshetantavacariquea omae. Ariquea ocotanaca oponcajajencatanaquequea otsitacajencatanacaro tsovironaqui. ⁴ Ariqueate ichoocaque oraniqui Jorashi Ishicariote irijanite Shimo, iriguentiqueate itsatacaane Jesoshi amampivenquerineca coajica. ⁵ Icanti:

—¿Queroquea ocotacani teequea irojocantajiteroji? Iraantajiquemparome oshequi imentaquipae irooriji ovegaravaevetaca 300 tenario, irojocajitaquenerime coguitejacojianquitsica.

⁶ Cotanquitsiquea teequea arimaja inquenquejamajateriji coguitejacojianquitsica, manaqueate icanquegueti imaica yamenaque iriguenti ajiricacotapiniquenerica imentaquitsitepae itsipajiacaca, ariquea yaagarantsitaqueriquea. ⁷ Cotanquitsiqueate Jesoshi icantsitariquea:

—Ari ocotaca, naroguentitarite otsotejatashitaca oshaguiganquenaca imaica, iroguigajajiquenatari omoroqui coajica nometojanaquegueti. ⁸ Iriraqueate coguitejacojiatsica icancanitarite intsipajiaquempi, naatimpaquea aatotari nocoguitani notsipajiguimpi.

Isariajitanacari Irasaro irimetojacaantajiaqueri

⁹ Ariquea iquemacojiaqueriguete oshequini joriojia chooca Jesoshi Vetaniaqui, yoayoaitanaquequeate iramenajiaquiteri, cotanquitsiquea tee apaniro iroashijianaqueriquea iriatimpa, yoayoaitashitanaqueriquea aisa Irasaro yovochantajica Jesoshi imetojavetacaguete. ¹⁰ Ariqueate iquemavacaajianaquea saserorotejia anaantajianquitsica irimetojacaantajiaqueri aisa Irasaro, ¹¹ yamenajiaquetarite irio iquemacojiaque oshequi joriojia yovashiantantajianajarica iriatimpajia teequea inquemisantajiajeriji, iriguentiquea inquemisantajianaque Jesoshi, yaventajianacari.

Ishineventajiacariguete Jerosarequitica Jesoshi

(Mt. 21.1-11; Mr. 11.1-11; Irc. 19.28-40)

¹² Choocaquea oraniqui Jerosarequi oshequini coraquejianquitsica irishineventajiguempari Paashicoa. Ariqueate osavincaguitetamanaqueguete iquemacojiaqueeriqueate Jesoshi coraquetaque. ¹³ Yaavashijianaquequea ovashi yoayoaitanaque itonquivojajiacariquea icajemajianaquequea icantajigui:

—¡Caaviji yoganejencamajataca!

—¡lintsishiatsi irishineventajiquempari iriratica coraquetapojatsica itigarancaqueca Majirontamajatatsica! ¡lriotaque Imajirote ishiraerijia!

¹⁴ Iroompaquea irira Jesoshi inepajojaqueri iriaqueraca quimogantirenatananquitsica aashino yaaqueriquea isavicanaqueri, ariquea onetsanatanaquea itioncacojiaqueriguete ocanti:

¹⁵ “Aatoja pitsaroajigui aviatimpajia Shionequitica, coraquetapojaquetari pimajirote,

ishiacotantapojari iriaqueraca quimogantirenatananquitsica aashino.”

¹⁶ Cotanquitsiqueate irirajia itsatacaanejia tequerata intsajigueji irootaquequea netsanataqueroca itioncacojiquerigueti, cotanquitsiquea ariquea yogajenocashitanajarogueti Jesoshi iroganejencare ariquea iquenquejajianaqueroquea maasano yamenaguetaqueca ari itsajipojaque: arimajasacanicate iriguenti oquenquetsatacotaque itioncacojiquerigueti, irootaquequea iquejetantajicarica imaica.

¹⁷ Irirajiaquea amenajiaquerica Jesoshi yovochantajirigueti Irasaro icajemaquerigueti yoguijaajivecarigueti icamantajiaqueriquea maasano. ¹⁸ Irootaquequea yoayoaitantanacaca itonquivojajivacariquea Jesoshi, iquemacojiaqueritari yantaquero oacaantantatsica intati. ¹⁹ Irirajiaquea pariseojia icantavacaajianacaqueate:

—Jeroquea nocantavequempi. ¿Queroquea ancojiaquempani imaica? Pamenajiguerija maasanojia yoguijajianaqueri.

Inintajiaquequea guiriegojia iramenajiaqueri Jesoshi

²⁰ Yoagarantajianaquequeate aisa guiriegojia Jerosarequi irogavisaajiguero Paashicoa intsaromentajiguempari Aapani Irioshi. ²¹ Iriatimpajia yoayoaitanaque ichoocaquegueti Jeripe poneanquitsica Vetsairaqui choocatantaroca Garireaquei, icantajiguiriquea:

—Nonintajiaque nonejajiaqueri Jesoshi.

²² Iriraquea Jeripe yoanaque icamantapojiriquea Antirishi, ariquea itsipatanacari yoayoaitanaque icamantajiaqueriquea Jesoshi.

²³ Iquenquetsatanaquequea Jesoshi, icantajiaqueri:

—Apojacaquea ironigaantantajitaquemparoca iroganejencare Irijanite Caquinte. ²⁴ Imaica noncamantamajajiaquempiquea, arigueti osacoroncaguete tirigoitsoqui quepatsiqui, aatoguete osamprocaguiti oitsoqui, aatoquea oshequigui, manaquea apaitsoquiro oncanquempa. Cotanquitsiquea osamprocaguitegueti ontsoroanaque oitsoquimajatanaque. ²⁵ Ariquea iquempetaca imaica quericaca tsaroacaatsica iriatimpa teequea irinintimateji irantsipeventaquempari itsipa, icavintsajavecaquea cotanquitsiquea irimetojaque coajica. Cotanquitsiquea iriraquea teeca incavintsajempaji iriatimpa acaniqui quepatsiqui iroguenti iquenquejacotaqueri itsipa yatsipevencariquea, iriguenticquea incoguitempaniquea iranijaguiteni. ²⁶ Quericaca nintanquitsica irantaguequero nonintaguetica naatimpa, irogujatacotenata. Querocaguete nonchoocaquegueti naatimpa, ari inchoocaque aisa iriatimpa notigaranquica. Iriraqueate antaguetiroca nonintaguetica naatimpa, irishinevenquempariquea Aapani incanqueriquea: ‘Cameetsavaetaquequea.’

²⁷ “Imaicaquea noshoshoguitevaetanacaquea, cotanquitsiquea ¿queroquea noncanteni? ¿Arimpa noncante: ‘Aapani, pincavintsajenashia aatoniji natsipeta nometojaque?’ Aatoquea nocantiritsi, irotaquetarite nocoraquetashique, irotaque narejetantapojacaroa oatica savincaguiteri. ²⁸ Aapani, ponigaantero poganejencare irishineventajiaquemparoniji pivajiro.”

Ariquea iquenquetsajitanaquequea ontaniqui jenoqui inquitequi icanti: “Nonigaantaquerotari noganejencare, coajicaquea nonigaantajero aisa.”

²⁹ Ariquea iquemajiaquerigueti maasano catintiitanquitsica iconoagarantajiaquea icantajianaque mana oseroroncaguitetanaque intati, cotanquitsiquea itsipa cantajianquitsica:

—Iriocaja quenquetsatanquitsi irashivantite Aapani Irioshi.

³⁰ Iriraqueate Jesoshi icantajiguiriquea:

—Tee iro inquenquetsatantempaji nonquemero naatimpa, iquenquetsatantacaca cameetsaniji pinquemajiaqueroniji aviatimpajia. ³¹ Imaicaquea apojaca incantantajitaquempara quero incojitaquerini covaeguishejiatsica quepatsiquitica, aisa iroguisotoajiteri irira majirontavetanquitsica acaniqui quepatsiqui. ³² Oraqueate irogatiacojitaquenaguete acaniqui quepatsiqui noncajemashirentajiaqueriquea maasano.

³³ Oraqueate icanquegueti imaica manaqueate itsavetantanaqueroquea quero incojitaqueri irimetojajiquerigueti.

³⁴ Irirajiaquea capiocaventajiacarica icantajiguiriquea:

—Noquemajiaque itsatacajaitanaguete Itioncacaantaqueca Aapani Irioshi ocanti irira Quirishito incoguitempani inchoocaguiteni. Imaica ¿queroquea ocotacani picantantacaca irogatiacojitaqueri irira Irijanite Caquinte? ¿Queriquea imaica Irijanite Caquinte?

³⁵ Iriraquea Jesoshi icantajiguiriquea:

—Imaicaquea igantagatiraja ichoocatimojiaquempi Tsirencari, cotanquitsiquea capichajaniquinivani. Panijijiaquequea imaica igantagatirajaguete itsirenquimojiaquempi, tequerataguete pimpitsecacojigueji. Iriraquea anijitatsica pitsecariqui teequea intsateji quero iquenanaqueni. ³⁶ Nocantantaquempicaquea, pinquemisantajiguerija Tsirencari choocatirajaguete, pinquejetimentajianaquempariniji iriatimpa.

Ariquea iquejequeroguete imaica Jesoshi iquenquetsataqueguete yoanaquequea, ipeapitsajianajari.

Quero ocotacani teeca inquemisantantajiguempaji oshequi jorio

³⁷ Iriraquea Jesoshi yantavecaquea maasanopae oacaantantatsica intati yamenacajaivecariquea maasano, cotanquitsiquea iriatimpajia teequea intsajiavaqueriji, teequea inquemisantajiavaqueriji. ³⁸ Iroguentiquea oquejetantanacaca imaica cameetsaniji onetsanatanaquempañijite itioncaqueca tsavetantatsica Isaiashini, ocantiquea:

“Nomajirote, notsavetantajiavecaroquea picanqueca cotanquitsiquea ¿taa quemisantavaquero?”

Ponigaajivetaçari pagavejica cotanquitsiquea ¿taa tsatavaquero?”

³⁹ Oquejetantanacaca imaica teequea iragavejajigueji inquemisantajigueji, iroorijite icanque Isaiashini aisa itioncaqueroguete icanti:

⁴⁰ “Iriraquea Aapani Irioshi ishamponcajatacaajiaqueri,

iquishoshirentacaanaqueri,

aatonijite inejantajajarotsi iroquiya,

aatoniji itsajigui ishirequi,

aatoniji ipitsecashijigana nogueshishirentantajemparica.”

⁴¹ Iriraquea Isaiashini icanqueroquea ocativa imaica yamenaqueritarite Jesoshi caaviji yoganejencaajata irootaquequea itsavetacotantacarica.

⁴² Oquempavecaquea imaica cotanquitsiquea ichoocajiaque oshequini caquinte-
jia aisa imajirojiate cantajianquitsica Jesoshi iriguenti Quirishito Meshiantatsica,
cotanquitsiquea inchiqiojiquea icantajiaque imaica itsarocaaajiacaritarite pariseojia
icantimentajiguiritsiqueate inqijajianaqueguete shinagogaqui icapiocantapinijiacaca.

⁴³ Inintajivetaçatari irishineventajiaquempañime Aapani Irioshi, cotanquitsi iroguenti inintamajiaque irio shineventajiaquempañine caquintepae.

Icanqueca Jesoshi oncatsimatatacaantaqueri irira teeca inquemisantavaqueroji

⁴⁴ Ariquea iquenquetsatanaquequea Jesoshi iririjenciaquea icanti: “Maasano quemisantanaca teequea apaniro inquemisantena naatimpa, iriguenti iquemisantaque tigarancaquenaca. ⁴⁵ Ariquea iquejetacaquea nejaquenaca, inejaqueriqueate aisa tigarancaquenaca. ⁴⁶ Naroguenti Tsirencari, iroguenti nocoraquetashitaque quepatsiqui aatoniji ipitsecacotaji quericaca aventaquenane. ⁴⁷ Cotanquitsiqueate quericaca quemavetavaquenane aatoguete inetsanatiro nocanqueca aatoquea naroguenti cantatsi incatsimatimentajiteri igovaeguishere, teequea iro noncoraquetashite noncantacoteri caquintejiatsica incatsimatimentajiteri igovaeguishere, iroguentiquea nocoraquetashique naajivajeri aatoniji ipega. ⁴⁸ Quericaca manintaquenane, teeca irininteji inquemisantano nocanqueca, choocaquea cantacaanquerineca: iroguentiquea nocanqueca noquenquetsavetacaguete. Irootaquetari cantacaanquerine aapojaquempaguete savincaguiteri vegaratapajaatsineca. ⁴⁹ Teenicaquea inchiqiojitsi naashitemparoji naatimpa maasano querocaca nocanqueca. Iriguentiqueate cantaquena Aapani tigarancaquenaca. ⁵⁰ Notsaquequea ora icantacaantaqueca Aapani, iroguenti anijacaantantatsica iranijantaguitempanica, irootaquequea noquejetantacaroca imaica: ora icanquenaca Aapani irootaque nocanque.”

13

Jesoshi iquivaguitijiaqueri itsatacaanejia

¹Tequeratagueti aguempaji Paashicoa, itsaquequea Jesoshi aapojaca irojocantanajem-paroca ocatica quepatsi iroanajequea Aapaniqui. Igantagaquea coramani ipintsajiacari yashintajiacaca acaniqui quepatsiqui, icoguitaniquea ipintsamajajianacari, irosati yonigaantamajataquero quero ocarataqueni ipintsamajatacari caquinte. ²Opitsecanajigueti ishecajiaca. Incajaranqui iquenquejacaqueri ampatsini Jorashi Ishicariote, irijanite Shimo, iramampijaqueneri Jesoshi iraacaanqueri. ³Itsaquequea Jesoshi yagavejacaqueri Aapani Irioshi maasano, itsaque iponeaca Aapaniqui Irioshiqui aisa iroanaje iriatimpaqui, ⁴irootaquequea icatiantanacaca ishecajiacagueti, iquitsaarejanacaro iitsaare jenoquitanquitsica, yaaquero ishetantajitaca ishипitacaro. ⁵Ariquea ishajataqueroquea oja vantejaqui, iquivaguitijiaqueriquea itsatacaanejia, isheguititantajiajari ishипitacaca. ⁶Yarejetapojacariqueti Shimo Peerero, icantavaqueri:

—Nomajirote, ¿aviguentimpa quivaguititenane naatimpa?

⁷Icantiriquea Jesoshi:

—Tequeratanicate pintsateroji quero ocotacani noquejetancaroca imaica, cotanquitsiquea coajicaquea pintsapojero.

⁸Icantsitariquea Peerero:

—¡Aatoja piquivaguititimatana naatimpa!

Icantiquea Jesoshi:

—Aatogueti noquivaguititimpi, aato nagaveji notsipatajimpi.

⁹Ariquea icantiriquea Shimo Peerero:

—Nomajirote, arisacanicate aatoqueate aparo piquivaguititana, pinquivacotaqueanaquea, aisa pimaqueroquea noguito.

¹⁰Cotanquitsi Jesoshi icantiri:

—Irraquea cajatatsica mana inquivaguititajempa intati, ariquea onetsanatanaja maasano itsinoqui. Imaica aviatimpajia netsanajivetaquempiquea, cotanquitsiquea teequea maasano pinetsanajiguempaji.

¹¹Itsatsitacatari queri amampijaquenerineca aacaanquerineca, irootaquetari icantantacaca: “Teequea maasano pinetsanajiguempaji.” ¹²Ariqueate iteroncaqueroqueti iquivaguitijiaquerigueti iquitsaatanajaquea yovanquetacaca, yoanaji isavicapojaji shitaponcarontsiqui, icantajiguiriquea:

—¿Pitsajiavaquerompate taa opaji noquejetacaacaca noquejejiaguempirogueti imaica? ¹³Aviatimpajiaquea iroguenti picantajigana: ‘Tsatacaantantatsica’, aisa picantajigana: ‘Nomajirote.’ Tampaticaquea poaquero, aritari nocota.

¹⁴Arivetaca imaica naroguentivetacaquea tsatacaajiguimpica, aisa naroguentivetaca Pimajirote, cotanquitsiquea noquivaguitijiaquempiquea. Ari pinquejetacaajiajemparo aviatimpajia pinquivaguititavacaajiaquempaqueate. ¹⁵Naatimpaquea manaqueate noquejetaqueroqueti imaica cameetsaniji namenacajiaquempironijite pimampiatimenqueronijite aviatimpajia, pinquejejiacquenaquea naatimpa imaica.

¹⁶Noncamantamajajiaquempiquea irirajia aajanirentsi teequea iranagueriji aajanitarica. Ari iquejetaca itigarancajitica teequea iranagueriji tigarancaquerica. ¹⁷Imaica pintsajiaqueroqueti ocatica nocantajiaquempica, pinquejejiavaqueroqueti aviatimpajia, ariqueate pishinemajajianaquempaquea.

¹⁸“Cotanquitsiqueate nocanquegueti imaica teequea nonquenquetsatacojiguempiji aviatimpajia maasano, notsamajajiguiritari nocoguiajiaqueca. Cotanquitsiqueate oquejetantanacaca imaica onetsanaquempaniji Itioncacaantaqueca Aapani Irioshi ocantigueti: ‘Irraquea shecatacoquenaca icatsimatanaquena.’ ¹⁹Nocamantsijiaquempiquea imaica tequeratagueti onetsanatempaniji, cameetsaniji coajica onetsanaquempanigueti pintsajiaquenaniijite narotaque. ²⁰Noncamantamajajiaquempiquea quericacaquea shineventavaquemparineca notigarancaqueca naroguentiquea shineventavaca, aisa quericaca shineventavaquenanece naatimpa iriguenti shineventavaca tigarancaquenaca.”

Jesoshi icamantaquerigueti iraacaanqueri Jorashi
(Mt. 26.20-25; Mr. 14.17-21; Irc. 22.21-23)

²¹ Iroompa icanquitigui Jesoshi imaica, ariqueate icotanaca ishimampoancavaetanaca, ariquea icamantamajianaqueri icantajiguiri:

—Imaica noncamantamajiaquempiquea, chooca aparo atsipajiacaca ocaniqui iraa-caanquena.

²² Ariquea icojianaca itsatacaanejia yamenavacaajianaca, tee intsateji queri iquenquetsatacotaqueca. ²³ Iriraqueate itsatacaane ipintsamajataca Jesoshi choocaquea ipimerequijaca iquempejimajacari ishecajiacaguete. ²⁴ Iriraquea Shimo Peerero icanquiti guitoc incoacotimenqueriniji Jesoshi quericaca iquenquetsatacotaqueca. ²⁵ Ariqueate iriatimpa itsipamajatapocariquea Jesoshi icantiri:

—Nomajirote, ¿queri?

²⁶ Icantiri Jesoshi:

—Imaica nojocajaqueroguete ocatita pan ashecajiacaca, quericaca nojocaqueneca iriotaque.

Ariquea iquejetaquero yojocajaquero pan yojocaqueneriquea Jorashi Ishicariote ir-ijanite Shimo. ²⁷ Iroompaquea ishecataquitigaro ariquea icotanaca iquijanaqueriquea Satanashi. Iriraquea Jesoshi icantiri:

—Oraquea piquenquejaqueca iintsija pantero taampina.

²⁸ Cotanquitsiquea itsipajia shecajianquitsica teequea intsajigueji quero oocani ican-taqueriguete imaica. ²⁹ Iconoagarantajiacaquea iquenquejajiaque arica Jesoshi ican-queri Jorashi iroanaque irovegaraquite irishecajiaquempaca Paashicoaqui, iroocampa irojocajigueneri imentaquipae coguitejacojianquitsica. Iriguentitari ajiricacogiguinirica imentaquitsitepae iriatimpajia. ³⁰ Ariquea yagaqueguete ishecatacaro pan yojocaque-nerica Jesoshi, ari isotoapanajanti. Pitsecanaque.

Jesoshi itsatacajianaqueriquea impintsatavacaamajiaquempa

³¹ Iroompa yoanaquitigui Jorashi icantiquea Jesoshi:

—Aapocajaquea irogajenocashitantanajaroca iroganejencare Irijanite Caquinte; irooquea irinejantajitaquemparoa iroganejencare Aapani Irioshi.

³² Ironigaanqueroguete iroganejencare Aapani Irioshi, ariqueate inquejetaquempa iriatimpa ironigaanqueroquea iroganejencare Irijanite Caquinte, taampinaquea ironigaanquero. ³³ Irijanijia, imaica aato osamani notsipamajajajimpi. Ariquea pamenaguetajenaquea, cotanquitsi noncamantajiaquempi aviatimpajia nocamantajiaquerica apijoriojiate: Aatoquea pagavejajigui poajigue querocaguete noanajeni naatimpa. ³⁴ Imaica noncamantajiaquempiqueate iroaqueratanquitsica pinetsanajiaqueca: pimpintsatavacajiaquempaja. Pinquejejiguenaquea naatimpa nopintsamajiaquempiguete, ariqueate pinquejejiguenpa aviatimpajia aisa pimpintsatavacaamajiaquempaja. ³⁵ Pinquejejiaquempaguete imaica pimpintsatavacaamajiaquempaguete irooquea intsatantajitaquempica aviguentijia notsatacaanejia.

Icantaqueguete Jesoshi iromanacotaqueriquea Peerero

(Mt. 26.31-35; Mr. 14.27-31; Irc. 22.31-34)

³⁶ Ariquea irira Shimo Peerero icantiri Jesoshi:

—Nomajirote, ¿queroquea poanajeni?

Iriatimpaquea icantiri:

—Querocaguete noanaqueni naatimpa, aatoquea pagaveji poguijatana aviatimpa, cotanquitsiquea poguijatanajena coajica.

³⁷ Iriatimpa icantiri:

—Nomajirote, ¿queroquea ootacani aatoca nagavejanta noguijatimpi noanaque-queate imaica? Naatimpaquea nometojavenquempi.

³⁸ Iriraqueate Jesoshi icantiri:

—¿Arimajampa pimetojavenquena? Imaicaquea noncamantamajaquempi, coajica tequerataguete irinijeji chaapa pomanacoquenaquea 3.

¹ “Aato pitsaroashirentajigui. Iriguenti pavenquempa Aapani Irioshi, aisa pavenquena naatimpa. ² Ontaniqui itsovironaquitequi Aapani chooca oshequini piguintenitantapojajempaca. Oraqueate aatomegueti ochoocatime, noncantajiaquempimequeate. Imaicaqueate noanaje novetsicaguetapojempiro pinchoocatantajiapojajempaca aviatimpajia. ³ Ariquea noanajeguete novetsicaguetapojempirota pinchoocatantajiapojempaca, nompishijiaquempimequeate naajiatempi poimentajianaquenijite pinchoocatantajiapojempaca ontaniqui naatimpaqui. ⁴ Pitsajiaqueroquea quero noanaqueni, aisa pitsajiaquero quenavoquirontsi.”

⁵ Icantiri Tomashi:

—Nomajirote, tee nontsajiguenica quero poanaqueni, ¿querocampate noncojiaquempani nontsatantajiaquemparoca quenavoquirontsi?

⁶ Iriaqueate Jesoshi icantiri:

—Naroguentitari quenavoquirontsi, aisa naroguenti arimajatatsica, aisa naroguenti anijagantsi. Teenicate iragavejajitempaji iroashijitanaqueri Aapani aatoguete iquenantanaquena naatimpa. ⁷ Pintsajiaquenameguete naatimpa, pintsajiaquerimequea Aapani aisa. Aritaque imaica pitsajiaqueri, pinejajiaqueri.

⁸ Iquenquetsatsitanacaqueate Jeripe icantiri:

—Nomajirote, iintsija ponigaajiguenari Piri, ariquee ovegarapojempa.

⁹ Icantiriquea Jesoshi:

—Jeripe, notsipatsijavetaquempiquea coramanitacotapojimpiquea. ¿Tequeratatarajampa pintsatenaji? Maasanoquea nejaquenaca naatimpa inejaqueriquea aisa Aapani. Imaica ¿queroquea ocotacani picantantaquenaca: ‘Ponigaajiguenari Piri’?

¹⁰ ¿Teempa pintsateji naatimpa nochoocaqueri Aapani, iriatimpa Aapani ichoocatana? Maasanoquea nocantajiaquempica teequea inchiqioji naashitemparoji naatimpa, ichoocaguitanitari Aapani irootaquequeate maasano nantaqueca irioquea antaquero.

¹¹ Pinquemisantajiaquenaja noncamantajiaquempiguete naatimpa nochoocaqueri Aapani, iriatimpa Aapani ichoocatana. Aatoguete piquemisantajiguero nocanqueca, irooquea pinquemisantantaquenaca pamenajiaquerogeti nantaguetaqueca.

¹² “Imaica noncamantamajajiaquempimequeate quericaca quemisantaquenanea inquejetaquenaquea naatimpa irantaguequequea nantaguetaqueca, aisa irantaguetaquequea otsipapae anaqueroca nantaguetaqueca naatimpa, noanajetarite Aapaniqui. ¹³ Taaca opajita pamanantaqueca novajiroqui,* irootaque nantavaque nonigaanqueronijite yoganejencamajata Aapani intsaroventantajitanaquemparica. ¹⁴ Pamanaquenaguete novajiroqui, nonetsanatavaquempiro.

Jesoshi icantajiaqueri intigarancaqueri Ishire Aapani Irioshi inchoocashirentajiaqueri

¹⁵ “Ariguete pipintsajiaquena, pinetsanajigueroquea nocantajiaquempica. ¹⁶ Ariquee naatimpa namaneri Aapani intigarancaqueriquea itsipa Amitacotantatsica incoguitempininiji intsipajiaquempi. ¹⁷ Iriotaque Ishire Aapani Irioshi cantaqueroca iroomajatatsica. Itsipajia quepatsiquitica aatoquea yagaveja ishineventajivajari, teenicate irinejajigueriji, teequea intsajigueriji. Cotanquitsiquea aviatimpajia pitsajiguiri, ichoocatimojiaquempitari ariquee inchoocashirentajiaquempi.

¹⁸ “Aatoquea novashiantajiguimpi pinquejejiaquemparime metojacori, noncoraque-tashijajempitari. ¹⁹ Capichajaniquinivani aato inejajaana quepatsiquitica, cotanquitsiqueate aviatimpajia pinejajajena. Iroorijite nanijaguitini naatimpa, ariquee panijaguiteni aviatimpajia aisa. ²⁰ Aapojempaguete oratica savincaguiteri ari pintsajiaque arimaja nochoocataqueri Aapani, aviatimpajia pichoocajiaquena, naatimpaquea nochoocajiaquempiquea. ²¹ Iriaquea tsatavaqueroca nocantica netsanatiroca, iriotaque pintsataquenaca. Iriaquea Aapani impintsataquempariquea pintsataquenaca. Ariquee nonquejetaquempa naatimpa nompintsataquempariquea, aisa nonigaqueriquea quero nocotani.”

²² Iquenquetsatanaquequeate itsipa Jorashi (teequea irio Ishicariote), icantiri Jesoshi:

* 14:13 novajiroqui. Amanantaquempariguete ivajiroqui Jesoshi oncanque amanaqueri iroorijite aquenquejamajaquero ininqueca iriatimpa, aato amanacoventiro anintashitacaca aatimpa intati.

—Nomajirote, ¿queroquea ocotaca apaniro naatimpajia ponigaajiaquena quero picotani, itsipajia caquinteja aatoquea ponigagari?

²³ Icantiri Jesoshi:

—Quericacaqueate pintsatanaca irinetsanataqueroquea nocantica. Iriraquea Aapani impintsataquempariquea. Naatimpa nontsipataquempariquea Aapani noncoraque-tashijiaquerigueti noguintenitapojempa iriatimpaqui. ²⁴ Iriraquea teeca impintsatenaji teequeate irinetsanateroji nocantica. Teequea inchiqioji naashitemparo nocantajiaquemmpica imaica. Iriguentiquea cantaquena Aapani tigarancaquenaca.

²⁵ “Nocanquempiroquea ocatica imaica choocativirajanaguete nontsipajiaquempiqueti.

²⁶ Cotanquitsiquea intigarancaqueriguete Aapani Ishire, Amijiajempineca quejetajenaneca, intsatacaajiaquemmpiquea iriatimpa maasanopae, aisa inquenquejacaajiajempiroquea maasano nocantajiaquemmpica.

²⁷ “Imaica noshinetacaajianaquemmpiquea aatonijite pitsaroajigui, pinquejianaquenaquea naatimpa noshinevaetanacaguete. Naatimpaquea teequea nonquejetempariji ishinetacaantaguete caquinteguetatsica. Aatoquea pishimampojancajiga, aisa aatoquea pitsarogui. ²⁸ Imaica piquemajiaqueroquea nocanquempiqueti noanaje, coajicaquea noncoraque-tashijiajempipi. Arimajamequea pimpintsajiaquename pishinejianaquem-pamequea piquemajiaqueroguete nocanqueguete noanaje Aapaniqui, yanaaquenatari. ²⁹ Nocamantajiaquemmpiquea imaica tequerataguete arejetempaji noantanajempaca cameetsaniji coajica arejetapojempaguete pintsajiaqueniji arimajaquea nocamantamajiaquempi irosatiquea pinquemisantajianaquena. ³⁰ Imaicaquea aato osamanitaji noquenquetsatacaajimpi, coraque-tapojaque-tarite irira majirontavetanquitsica acaniqui quepatsiqui. Aatoquea yagavejana, ³¹ cotanquitsiquea onquejetaquempaquea imaica cameetsanijite intsatimentajiaqueronijite maasano naatimpaquea nopintsamajatacariqueate Aapani, aisa nonetsanataqueroquea maasano icanquenaca.

“Imaicaqueate pincatijianaque, jamequetiro.

15

Itsavetancaquea Jesoshi iquejetacaró ovorentsamajaca ova

¹ “Naatimpa noquejetacaró ovorentsamajaca ova. Iriraquea Aapani iquejetacari shiacotiroca. ² Irvatejatsaguetavaqueroquea maasano notsegotsa teeca onchoocatan-temparoji oitsoquipae. Oraquea otsipapae pitsaraquijacotanquitsica manaquea irinetsanaguetavaquero intati intotacoguetavaquero cameetsanijite ompitsaraquijacotimentamajatanaquempanijite. ³ Imaicaquea aviatimpajia netsanataquemmpiquea shejiacatari piguempaveare, iroguentiquea netsanajiaquempi quenquetsatsarentsi nocantajiaquemmpica. ⁴ Pincoguitempaniquea pintsipamajajiaquenaja, ariquea nonquejetaquempa naatimpa noncoguitempani nontsipamajajiaquempi. Pameneroja oratica otsegotsa ova aatoguete ogavitario ovorentsa aatoquea ochoocati oitsoqui, aatotari ochoocata-shita inchiqioji. Ariquea piquejejiaca aviatimpajia, aatoguete quisho poajigana, aatoquea pagavejajigui inchiqioji pinetsanajiguero inintaguete Aapani Irioshi.

⁵ “Naatimpaquea quejequena ovorentsa, aviatimpajiaquea quejequempi otsegotsapae. Quericaguete tsipamajataquenane nontsipamajataquempariguete irantague-queeroquea inintaguete Aapani, inquejetanaquemparoquea otsegotsa pitsaraquijacotatsica. Ariguete pintsiparejanaquempa aatoquea pagaveji. ⁶ Iriraquea caarica tsipamajata manaquea inquejetanaquemparoquea otsegotsapae ova icaratsajitaqueca impishoncajigueteavaqueroquea intati, ariqueate ompirijatanaque coajicaquea iravijiquero irojocajiquero paamariqui omorecanaquequea samimimimi. ⁷ Imaica aviatimpajia pincoguitempaniguete pintsipamajajiaquena, aisa aatoguete pipeacojigaro notsataca-jiaquemmpica, pamanajiaqueriquea Aapani taaca opajita pinintaguequeca, ariquea irinetsanataquempiro. ⁸ Jeroquea irinejantajitaquemparoca iroganejencare Aapani: pimpitsaraquijacotaquempaguete pimpeantamajiaquemmpaca notsatacaane.

⁹ “Naatimpaquea nopintsamajajiaquemmpiquea aviatimpajia, noquejetacari Aapani ipintsamajatanaguete. Imaica picancanija quisho poajiguena noncoguitempaninijite nompintsamajajianaquempi. ¹⁰ Naatimpaquea nonetsanatiroquea icanquenaca Aapani,

ariqueate iriatimpa icoguitaniquea ipintsamajataquenaquea. Ariquea pinquejejaque-mpa aviatimpajia pinetsanjiaqueroguetai nocantajiaquempica, naatimpaquea noncoguitempaniquea nompintsamajajianaquempi. ¹¹ Manaquea nocantajiaquempiquea imaica cameetsaniji noguishinejajiaquempiniji pishinemajajianaquempiniji.

¹² “Jero ocativa noncantaquempica poguijajianaquea: pimpintsatavacaajiaquem-paja, pinquejejaquea naatimpa nopintsajiaquempiguetai. ¹³ Quericaca metojaventirica itsipavijimajajia iriotaque pintsamajatacarica. Tee iragavejeji itsipa iranaa-queru ocativa. ¹⁴ Ariguetai pinetsanamajajianaquero nocantajiaquempica aviguentiquea notsipavijimajajia. ¹⁵ Imaica teequea noncantajiajempiquea naajanirejia, iriraquea aajanirentsi teequea intsateroji maasano yantaguetica aajanitarica. Iroguentiquea nocantajiaquempi notsipavijijia, notsatacajiaquempirotarite maasano icanquenaca Aapani. ¹⁶ Teequea aviroquea coguijaiguenane, naroguentiquea coguijaiaquempi. Mana nonintacaajiaquempi intati poajianaque pantaguetaqueo cameetsaguetatsica pinquejetantajianaquempiparoca pitsaraquijacotatsica sovenaguetatsica, aatoquea opega. Noninque pinquejejaquero imaica cameetsanijite irinetsanataquempironiji Aapani pamaquerica novajiroqui.* ¹⁷ Jero noncantaquempica poguijajianaquea: pimpintsatavacaajiaquempaja.

Teeca inquemisantajigueriji Aapani Irioshi incatsimajiaqueriquea quemisantajiguirica Jesoshi

¹⁸ “Pamenajiaqueriguetai irisemaneguintajiaquempiguetai quepatsiquitica pinquen-quejajiajeroquea naroquetitari isemaneguintajia. ¹⁹ Pinquejejaquempiparime quepat-siquitica teeca inquemisantajiguenaji impintsajiaquempimequea, inquejetacaajiaque-mpimequea ipintsatavacaajigaguetai iriatimpajia. Cotanquitsiquea nocoguijiaquempi piconoajiavetacariguetai irooquee isemaneguintantajiaquempica, teetarite pinquemp-ejjajempari iriatimpajia. ²⁰ Pinquenquejajigueroja nocantajiaquempica incajaranqui nocanti: ‘Irirajia aajanirentsi teequea iranagueriji aajanitarica.’ Yatsipetacaajiaquenaquea naatimpa, ariquea inquejetacaajiaquempiquea aviatimpajia aisa irantsipetacajiaquempiquea. Itsipajia iquemisantajiaqueroquea notsatacajiaquerica, ariquea inquejejaque-mpa aviatimpajia aisa inquemisantajiaquempiquea pintsatacaqueriguetai. ²¹ Ariquea in-quejejaquempiquea imaica incatsimatimentajiaquempiro piquemisantajiaquenaguetai, teetari intsajigueriji tigarancaquenaca. ²² Aatomeguetai nocoraquetime nontsatacajia-queriquea, aatomequea icatsimatimentajitirime ocativa yantaguishejiaquea, cotan-quitsiquea imaica nocoraquetaquetari notsatacajiavetacaritari irootaquequea aato-quea yagavejajigui incantajiaquequea: ‘Tee nontsajiguenicate, noquejetantajiacaroca imaica.’ ²³ Maasanotari semaneguintajiganaca naatimpa isemaneguintajiacariquea aisa Aapani. ²⁴ Ariquea oquempetaca aisa aatomeguetai namenacajaiguirime taaca opajitapae teeca irantajiguetaji aatome iquejetacaantame, cotanquitsiqueate imaica yamenaji-avecrotari nantaguetaquea cotanquitsiquea arimpaquea isemaneguintajianaquea naatimpa aisa Aapani. ²⁵ Oquejetantacaca imaica cameetsaniji onetsanatanaquempiniji ocantica itioncacaantajiaquenerica Aapani Irioshi, ocanti: ‘Mana isemashijiaquea intati.’

²⁶ “Ariquea noncamanqueri Aapani intigarancaquempiri irira Amitacotantatsica, irio-quea Ishire tsatacaajiaquempineca iroomajatatsica. Ariquea incoraquequeguetai intsave-tantaquenaquea. ²⁷ Ari pinquejejaquempa aviatimpajia pintsavetantajiaquenaquea, pit-sipajiaquenatari iroaqueraguetai noparianacaroguetai notsatacantiguetai irosati imaica.

16

¹ “Imaica nocantajiaquempiquea maasano ocativa aatonijite povashiantajianajiro piquemisantajiaquenaguetai. ² Incantimentajiaquempirotaritari poavetanaquempiguetai shinagogaqui icapiofantapinijiacaca, aisa aapojaquempiguetai savincaguitari irimetojajiaquempiguetai irijique iro yantajiaque ininquea Aapani Irioshi. ³ Inquempejiaqueroquea imaica teenica intsajiguerinica Aapani, aisa naatimpa tee intsajiguenaji. ⁴ Manaquea nocamantajiaquempiroquea ocativa imaica cameetsaniji

* 15:16 novajiroqui. Amanantaquempiriguetai ivajiroqui Jesoshi oncanque amanaqueri iroorijite aquenquejamaja-queru ininquea iriatimpa, aato amanacoventiro anintashitacaca aatimpa intati.

aapojaquempagueti coajica pinquenquejajiajeronijite nocamantsijiaquempitari coramani. Coramaniquea tee noncamantajiguempi, choocanatarari notsipajiaquempi.

Icamantajiaqueri taa opajita intsatacaajiaqueri Ishire Aapani Irioshi

⁵ “Imaicaquea imaica noanajequea ichoocaquegueti tigarancaquenaca, cotanquitsiquea aviatimpajia teequea pincoacojiguenaji queroca noanajeni. ⁶ Manaquea intati noshimampojancaajiaquempiquea nocamantajiaquempigueti. ⁷ Cotanquitsiquea imaica noncamantamajajiaquempi ocameetsamajataquetari noanajegueti. Aatoguettitari nogui aatoquea icoraqueti irira Amitacotantatsica oguishinejajiajempineca, cotanquitsi noanajegueti nontigarancajiaapojaquempiriquea. ⁸ Oraquea incoraquepojaquegueti inquenquetsashirentacaajiaqueriquea caquinteja quepatsiquitica iramenajiaquempa manaquea iquempevaejiaca, aisa intsatacaajiaqueriquea quero icotani comajamajatatsica, jeroquea aisa intsajiaque incatsimajiaqueriquea Aapani Irioshi coajica maasano teeca inquemisantajigueriji. ⁹ Inquenquetsashirentacaajiaqueriquea cameetsaniji intsajiaqueniji mana iquempevaejiaca, teenicaquea inquemisantajiguenaji. ¹⁰ Intsatacaajiaqueriquea quero icotani comajamajatatsica, noncantanajempatari naatimpa Aapaniqui, aviatimpajiaquea aatoquea pinejajijaana. ¹¹ Intsatacaajiaqueriquea intsatimentajiaqueniji incatsimajiaqueriquea Aapani Irioshi coajica maasano teeca inquemisantajigueriji, imataquerotari icantacotsitacari irira majirontavetanquitsica acaniqui quepatsiqui.

¹² “Choocaquea otsipapae oshequi noncamantajiaquempimeca, cotanquitsiquea aatoquea pagavejajiguiroica imaica. ¹³ Oraquea incoraquequegueti Ishire Aapani Irioshi tsatacaajiaquempironeca iroomajaca, intsatacaajiaquempiroquea maasano. Aatoquea inchiquioji iquenquejashitaro iriatimpa, iroguentiquea incamantajiaquempi iquemaqueca. Aisa intsatacaajiaquempiroquea quero oncoguetanaquempiani coajica. ¹⁴ Iraagarantaque nocanqueca intsatacaajiaquempiroquea, irootaquequea ironigaantantatuemparooca noganejencare. ¹⁵ Maasanoquea yashincaca Aapani irooquea nashi aisa, irooquea nocantantacaca irira Ishire iraagarantaque nocanqueca intsatacaajiaquempiro.

Jesoshi icamantajiaqueri irishimampojancajavequempa cotanquitsi irishinejianajempa

¹⁶ “Irooshipojaquequea imaica aatoquea pinejajijaana, osamaniguitepojaquegueti ariquea pinejajijena aisa, noncantanajempatari Aapaniqui.”

¹⁷ Ariquea iconoagaranca itsatacaaneja iquenquetsatavacaajianaca icantajiaquequea: —¿Taa opaji oca icancajica icanquegueti irooshipojaque aato anejajiri, osamaniguitepojaquegueti ariquea anejajeri, manataro iroanaje Iririqui? ¹⁸ ¿Taa opaji icanquegueti ‘irooshipojaque’? Tee antsatavaqueroji iquenquetsatacotaqueca.

¹⁹ Iriiraquea Jesoshi itsajiavaqueriquea inintajiavecaquea incoacoquerime, irootaquequea icantantajiacarica:

—¿Iroompa picoacotimentajiaquero nocanquempigueti ‘irooshipojaquequea imaica aatoquea pinejajijaana, osamaniguitepojaquegueti ariquea pinejajijena aisa’? ²⁰ Imaica noncamantamajajiaquempiquea aviatimpajia pishimampojancajianaquempaquea pirajianaquempa intati, irirajiaquea teeca inquemisantajiguenaji irishinevaejianaquempaquea. Cotanquitsiquea aviatimpajia pishimampojancajiaavetaquempa, coajicaquea pishinejianajempaquea. ²¹ Pinquenquejeroja oratica manquigarentsi oncatsitegueti oshimampojancaquempaquea oquemavaquerotari ocatsitanaquerogueti, cotanquitsiquea ovoacotanajigueti teequea onquenquejajeroji ocatsivecagueti manaquea oshinevaetanaca intati, voajitari irijanite. ²² Ariquea piquejejiaca aviatimpajia imaica pishimampojancajavequempaquea cotanquitsiquea naatimpa nonejajiajempiquea ariquea pishinevaejianajempa, aatoquea ichocati agavejanquitsineca irishimampojancaajiajempiquea. ²³ Oraquea onquejetaquempagueti imaica aatoquea pincoacojijana naatimpa. Noncamantamajataquempiquea taacaquea pamanajiaquerica Aapani novajiroqui* irojocajiaquempiroquea.

* 16:23 novajiroqui. Amanantaquemparigueti ivajiroqui Jesoshi oncanque amanaqueri iroorijite aquenquejamajaquero ininqueca iriatimpa, aato amanacoventiro anintashitacaca aatimpa intati.

²⁴ Cotanquitsiquea imaica tequerata pamananteji novajiroqui. Iintsija pamanajigueri, irojocajiaquempiquea cameetsaniji pishinemajajianaquempianiji.

Yanaantanaque Jesoshi

²⁵ “Oraquea notsatacajiaquempigueti manaquea noquejetacaajiaquempiro taaca opajitapae, cotanquitsiquea coajica aato noquejetacaaguetajimpuro, manaquea nontsavetacomajataqueri Aapani noguisotoamajajiaquempiroquea pintsamajatimentajiaqueniji. ²⁶ Onquejetaquempagueti imaica ariquea pamanante novajiroqui. Teequea ari noncanteji naroguenti amanacoventajiaquempine, ²⁷ ipintsamajajiaquempitari Aapani iriatimpa, yamenajiaquempitari pipintsamajajiaquenaquea naatimpa, aisa piquemisantajiaqueroquea nocanquegueti mana noponeaca iriatimpaqui. ²⁸ Arimajatari noponeaca Aapaniqui nocoraquequea acaniqui quepatsiqui, cotanquitsiquea imaica ariquea noanaje noncantanajempa Aapaniqui.”

²⁹ Irirajiaquea itsatacaanejia icantajiaqueriquea:

—Imaicaquea picamantamajajiaquenaquea, teequea pinquejetacaaguetajemparoquea intati. ³⁰ Imaicaquea notsajiaquequea caaviji pitsamajatiro maasano, inchiqiojitari pitsatsitaroquea iquenquejaguetica caquinte tequeratagueti incoacojiguempiji. Not-satantajiacaca manaquea piponeaca Aapaniqui Irioshiqui.

³¹ Iriraquea Jesoshi icantajianaqueriquea:

—¿Iroosacanicate pitsajiaquenampate imaica? ³² Aapojempa savincaguitari, jac aapojacatari imaica, pimporocantajianaquempaca poapoaitanaque querocagueti pojocajianaquenaquea apaniro, cotanquitsiquea aatoquea apaniro nochoocati, itsipataquenatari Aapani. ³³ Nocamantajiaquempiroquea maasano ocatica pishinemajajianajempianiji paventamajajiaquenagueti. Ocaniqui quepatsiqui irantsipetacajiaquempiquea, cotanquitsiquea pishinemajajianaquempa, nanajiaqueritari maasano quepatsiquitica.

17

Yamanacoventacagueti Jesoshi

¹ Ariquea iteroncanaquerogueti Jesoshi iquenquetsatacaajiaquerigueti, yamenanaquequea jenoqui inquitequi icantiquea: “Aapani, aapojaca. Ponigaantaguetajero imaica iroganejencare Pirijanite, ironigaantantaquemparoaca Pirijanite aisa poganejencare aviatimpa. ² Aviatimpaquea pipeacaacari imajirojiate maasano caquintejiatsica cameetsaniji iragavejaqueniji iranijacaajiajeri maasano pojocajiaquenerica incoguitempianiniji inchoocaguiteni. ³ Iriguentijia anijaguitatsine, irirajia tsajiaquempineca aviatimpa, apaniro picota Pirioshimajati, ariquea inquejejaquempa intsajiaqueriquea Jesoquirishito pitigarancaqueca. ⁴ Naatimpa nonigaanquero poganejencare acaniqui quepatsiqui, nonetsanaquerotarite maasano picanquenaca nantaque. ⁵ Imaicaquea, Aapani, ponigaantaguetajero noganejencare aviatimpaqui, pinquejetacaamajatajena notsipatimpigueti iroaqueragueti tequeratagueti onchoocateji quepatsi.

Jesoshi yamanacoventajiaqueri itsatacaanejia

⁶ “Irirajia picoguiajiaqueca pojocajiaquenaca notsatacajiaqueriquea quero picota. Aviguentiquea ashintavetari, ariquea pojocajiaquenari, iriatimpajiaquea inetsanajiaqueroquea picanqueca. ⁷ Imaica itsajiaquequea maasano pojocaquenaca aisa pagavejacaquenaca ariguenti oquenapoji aviatimpaqui. ⁸ Nocamantajiaqueritari maasano picanquenaca, ariqueate itsatavaquero. Itsamajajiaquequea arimaja noponeaca aviatimpaqui, aisa iquemisantajiaquenaquea nocamantajiaquerigueti aviguentiquea tigarancaquena. ⁹ Iriguentijiatari namanacoventajiaque. Tee irio namanacoventajigue imaica maasano quepatsiquitica, iriguentiquea namanacoventajiaque pojocajiaquenaca, pashintajiacaritari. ¹⁰ Maasanotarite nashintajiacaca pashintajiacariquea aviatimpa aisa. Ariquea oquejetaca aisa maasano pashintajiacaca nashintajiacariquea naatimpa aisa. Iriatimpajiaquea yonigaantajiaquero noganejencare.

¹¹ “Naatimpaquea aatoquea nochoocataji acaniqui quepatsiqui, cotanquitsiquea iriatimpajia icancaniquea inchoocajiaje acaniqui. Noncoraquetajequea naatimpa aviatimpaqui. Aapani Oganejencamajatatsica, pinquemoguijamajatantaquempariquea

pivajiroqui irirajia pojocajiaquenaca, intsipamajatavacaajiaquempaniji inquejejiacajiniji aatimpa atsipamajatavacagagueti. ¹² Oraquea notsipajiacarigueti quepatsiqui noquem-poguijantajiacariquea pivajiroqui; noquem-poguijajiaqueri pojocajiaquenaca, teequea impeimatempaji, apaniroquea peanquitsi irira pomatsatanquitsineca onetsanatimentanaquempaniji Tioncarentsimajaca.

¹³ “Imaicaquea noncoraquetaje aviatimpaqui, cotanquitsiquea imaica choocatirajanagueti acaniqui noncanquempiquea maasano ocatica irishinevaetimentajianaquempaniji iriatimpajia inquejejianaquea naatimpa noshinevaetagueti. ¹⁴ Notsatacajiaqueriquea piguenquetsatsare, cotanquitsiquea irirajia quepatsiquitica teeca inquemisantajiguempiji manaquea isemaneguintajiacari yamenajiaquerigueti tee inquempejiguempariji iriatimpajia, mana iquejejiaquena naatimpa teequea nonquempejiguemparinica quepatsiquitica. ¹⁵ Tee iro namanimentempi noncanquempi paajianajeri taampina aatoniji ichoocataji acaniqui quepatsiqui, iroguentiquea pinquem-poguijamajateri aatonijite agavejajiguiri covaeguisherentsi. ¹⁶ Iriatimpajia tee inquempejiajempariji quepatsiquitica, mana iquejejiaquena naatimpa teequea nonquempejiguemparinica quepatsiquitica. ¹⁷ Pinashitacaantajiajempari iroomajatatsica irisavicaventamajiaqueroniji pininqueca. Piguentsatsare iroguentiquea iroomajatatsica. ¹⁸ Oquejetacatari naatimpa pitigarancaquenagueti ocaniqui nontsatacajiaqueriniji teeca intsaromentajiguempiji, ariquea nonquejetaquempa naatimpa nontigarancajiaqueriquea iriatimpajia intsatacaajiaqueri. ¹⁹ Naatimpaquea nocoguitaniqua nosavicaventiro pinintaguetic aaviatimpa. Iroguentiquea nonquejetancaroca imaica cameetsaniji inquempejiaquenaniji iriatimpajia aisa.

Jesoshi yamanacoventajiaqueri maasano quemisantajiaquerineca

²⁰ “Cotanquitsiquea teequea apaniro namanacoventajiguerriji irirajia notsipajiacaca imaica. Namanacoventajiaqueriquea aisa quemisantajiaquenanece coajica inquemajiaquerigueti iriatimpajia intsavetantajiaquerogueti picanqueca.

²¹ Namanacoventajiaqueriquea cameetsaniji apanironiji incantajianajempa, quejetaca, Aapani, pichoocaquena naatimpa aisa naatimpa nochoocaquempi aviatimpa, ariquea inquejejiaquempa iriatimpajia apaniro incantajiaquempa inquemisantajiacajigueti, cameetsanijite intsajiaqueniji itsipajia caquinteja aviguenti tigarancaquenaca. ²² Oraquea noganejencare pojocaquenaca, ariquea nojocajiaqueneri cameetsaniji apaniro incantajianajempa, quejetacaquea aatimpa apaniro acanca. ²³ Nochoocaqueri iriatimpajia aisa aviatimpa pichoocaquena naatimpa, cameetsaniji apaniromajaca incantajianaquempa. Inquejejiaquempagueti imaica irirajia teeca inquemisantajiguenaji intsajianaquequea aviguenti tigarancaquena, aisa intsajianaquequea pipintsamajajiacari quemisantajiaquenaca piquejetacaajiacari pipintsamajatanagueti naatimpa.

²⁴ “Aapani, nonintaquequea irirajia pojocajiaquenaca iroajianaque inchoocajiapoje ontaniqui naatimpaqui iramenimentajiaqueroniji noganejencare pojocaquenaca iroorijite pipintsamajataquena iroaqueragueti tequeratagueti onchoocateji quepatsi.

²⁵ Aapani Comajamajatatsica, irirajia quepatsiquitica teequea intsajiguempiji, naatimpaquea notsamajatimpi. Ariquea iquejejiaca irirajia notsipajiacaca imaica, itsajiaquequea aviguenti tigarancaquena. ²⁶ Notsatacajiaqueriquea quero picotani aviatimpa, irosatiqua noncoguitempani nonquejejianaquempa intsatimentamajataqueniji arimaja pipintsamajajiacari piquejetacaajiacari pipintsamajatanagueti naatimpa, aisa naatimpa noncoguitempaniquea nontsipamajiaquempariquea.”

18

Yaajitaquerigueti Jesoshi

(Mt. 26.47-56; Mr. 14.43-50; Irc. 22.47-53)

¹ Ariqueate iteroncanaquerogueti Jesoshi yamanaquerigueti Iriri, itsipatsipaitanacariquea itsatacaaneja imontemonteitanacaro ajavinteri icantajitica Sereroone, yoayoaitanaquequea panquirentsimashiqui choocatatsica oraniqui. ² Iriaquea Jorashi aacaanquerineca itsatiroquea iriatimpa aisa, aritarite yoapinique Jesoshi itsipatsipaipinicare itsatacaaneja. ³ Ariquea icoraquepojaquequea Jorashi itsipajiacari oshequini coaretapae Iromaquitica jerijia aisa coaretapae quem-poguijajiguero

teemporo itigarancajiaqueca pariseojia aisa saserorotejia anaantajianquitsica. Yamajiaipojaquequea yashimirintantajigaca jeriquea aisa itsivotantajiacaca.
⁴ Cotanquitsiqueate Jesoshi itsaquetari queroquea incojitaquerini, yoanaquequea itonquivojajiacariquea icantajiaqueriquea:

—¿Taa ipaji pamenagueque?

⁵ Iriatimpajia icantajiguiquea:

—Jesoshi Nasarequitica.

Icantiqnea iriatimpa:

—Naroguentitari.

Ari icatiaca aisa Jorashi aacaanquerica, iconoajiacari. ⁶ Ariquea icantajiaquerigueti Jesoshi: “Naroguentitari”, ariquea icojianaca ipiatiganajanacaquea intati itejatejai-tanaquequea isavi. ⁷ Ariquea yapijitajiri aisa icantajiguiriquea:

—¿Taate ipaji pamenagueque?

Icantajiguiriquea:

—Jesoshi Nasarequitica.

⁸ Ariquea icantajajiriquea Jesoshi:

—Nocamantaquempitari naroguenti. Imaica naroguentica pamenagueque, povashiantajiajeriquea iricajia iroaroaitanajeta.

⁹ Oraquea oquejetantacaca imaica cameetsaniji onetsanamentanaquempaniji icanqueca Jesoshi icanquegueti: “Irraquea pojocaquenaca teequea impejaiguempaji aparo.” ¹⁰ Ariquea iriraquea Shimo Peerero inoshicaqueroquea itsaampitsantsamenirite itoguempitataqueri irajaanire saserorote anaantamajatanquitsica, iguempitarejantacaro itincamijempequiquitica. Ipajitaquea aajanirentsi Maaroco. ¹¹ Jesoshi icantsitariquea Peerero:

—Pisaquiajero pitsaampitsantsamenirite. ¿Aatempa natsiperejarotsi icanquenaca Aapani?

Yaajitanaquerigueti Jesoshi ichooaquegueti saserorote anaantamajatanquitsica
 (Mt. 26.57-58; Mr. 14.53-54; Irc. 22.54)

¹² Ariqueate iriraqueate imajirote coaretajia Iromaquitica itsipajiacariquea maasano igoaretatepae jerijia aisa igoaretatepae joriojia quempoguijajiguiroca teemporo, yajiricajiaqueriquea Jesoshi, yoishojiaqueri. ¹³ Iroqueti yaajianaqueri itsovironaquitequi Anashi,* iriotarite igoonquinite Caipashi saserorote anaantamajatanquitsica oratica ajagantsi. ¹⁴ Irraquea Caipashi iriotaque cantajiaquerica irapijorioteni ocameetsamajataque apatiroti caquinte irimetojamentaqueri caquinteja.

Peerero yomanacoquerigueti Jesoshi
 (Mt. 26.69-70; Mr. 14.66-68; Irc. 22.55-57)

¹⁵ Ariquea yoguijavetanacariquea Shimo Peerero, itsipatanacariquea itsipa itsatacaane Jesoshi. Irica itsatacaane irio itsatica saserorote anaantamajatanquitsica, irootaquequeate itsipatantacarica Jesoshi yoguijajitaquerigueti intsompogui. ¹⁶ Irraquea Peerero tee inquijeji, mana icatiapoja intati oraniqui sotsiqui sotomorontsiqui, cotanquitsiquea irira itsipa itsatacaane Jesoshi itsatica saserorote anaantamajatanquitsica yoanaquequea iquenquetsatacaaquero aajanirentsi quempoguijiroca sotomorontsi, cameetsaniji inquijapoje Peerero. Ariquea iquijapojaque. ¹⁷ Ocantavaqueriquea Peerero:

—¿Aviroquea aisa itsatacaane Jesoshi?

Iriatimpaquea icantiro:

—Tee.

¹⁸ Ariquea icatintiitaca aajanirentsijia jeri aisa coaretapae paamariqui itsitacajiaqueca, ocatsincaguitetaquetari, ari itajiaque. Ari iquejetaca Peerero itsipajiacari icatiaca itaque.

* 18:13 Irira Anashi iriovetaca saserorote anaantamajatanquitsica, cotanquitsiquea yoguisotoaqueri Iromaquitica, irio piajari Caipashi. Cotanquitsiquea irirajia joriojia yamenajiaqueri Anashi iriomaja saserorote anaantamajatanquitsica.

Saserorote anaantamajatanquitsica icoacotaquerigueti Jesoshi
(Mt. 26.59-66; Mr. 14.55-64; Irc. 22.66-71)

¹⁹ Ariquea irira Anashi saserorote anaantamajatanquitsica icoacoqueriquea Jesoshi querijia itsatacaanejia, aisa taaca itsatacaantaguetaque. ²⁰ Iriraquea Jesoshi icantiri:

—Naatimpa notsatacaantigueti noquenquetsatacaajiaqueriquea maasano quericaca nintanquitsica inquemisantavaquero, notsatacaantaquetari shinagogapaequi aisa teemporoqui, icapiocantapinijiacaca maasano joriojia. Tee nomanacotimateroji nocantaqueca capichaji. ²¹ ¿Queroquea ocotacani picoacotantaquenaca naatimpa taaquea notsatacaantaque? Pincoacojiguerija quemajiaquenaca taa opajita nocantajiaqueri, itsajiaquerotari iriatimpajia nocantaqueca.

²² Ariquea icanquitigui Jesoshi imaica, aparo coareta catianquitsica oraniqui yapatonquitariquea icanti:

—¿Cameetsampa pinquejetaqueri imaica saserorote anaantamajatanquitsica?

²³ Yacanaqueri Jesoshi, icanque:

—Piquemaquenagueti nocanquegueti teeca oncameetsateji iintsija pincamantajigueri maasano querocaca nocantini. Iroguentigueti cameetsa nocanqueca ¿queroquea ocotacani papatoncanquenaca?

²⁴ Ariquea irira Anashi itigarancacaantaqueriquea Caipashiqui, igantagaquea yoishotaca. Irira Caipashi irioquea saserorote anaantamajatanquitsica.

Peerero yomanacotajirigueti aisa Jesoshi
(Mt. 26.71-75; Mr. 14.69-72; Irc. 22.58-62)

²⁵ Iriraquea Peerero choocatirajaquea icatiaca oraniqui paamariqui itataque. Ariquea icantajitiri:

—¿Aviroquea itsatacaane irinta?

Iriatimpaquea yomanaqueroquea icanti:

—Teequea naroguenti.

²⁶ Ariquea ichoocaque oraniqui ijitica iguempitarejaqueca Peerero. Iriguentiquea irajaanire saserorote anaantamajatanquitsica, icoacotsitariquea iriatimpa aisa icantiri:

—¿Aviroca namenaqueca pitsipatacarigueti ontaniqui panquirentsimashiqui?

²⁷ Ariquea yapijitajiro Peerero yomanajiro, icanquitiguiquea imaica injanaque chaapa.

Yaajitanaquerigueti Jesoshi Piratoqui
(Mt. 27.1-2, 11-31; Mr. 15.1-20; Irc. 23.1-5, 13-25)

²⁸ Ariquea pajinigueti osavincaguitetanaje yoguisotoajianajiri Jesoshi itsovironaquitequi Caipashi, yaajianaqueriquea itsovironaquitequi majirontatsica Pirato itigarancane majirontamajataatsica Iromaqui. Irirajia joriojia teequea inquijajigeeji intsompogui aatonijite icovaeguishejitiri iragavejajiaquenijite irishecajiaquempa coajica ompitsecanaquegueti, iroguentitarite Paashicoa. ²⁹ Irootaquequea Pirato isotoantanacaca sotsiqui iquenquetsatacaajipojaqueriquea icantajiguiriquea:

—¿Taa opaji picatsimatimentajiaqueri? ¿Taate yantaque?

³⁰ Iriatimpajia icantajiguiri:

—Aatomegueti yantime teeca oncameetsateji aatomequea namimpirime.

³¹ Ariquea icantajiguiriquea Pirato:

—Iroosacanicate paajianaqueriquea, inchiquiojita pincantimentajiaqueriquea aviatimpajia pinquejetacaajiaquempariquea ocantigueti paperi poguijatacojiguica aviatimpajia.

Cotanquitsiquea icantajianaquequea joriojia:

—Naatimpajia joriojia aatoquea nagavejajigui nometojimentiri, icantimentajiganarotarite Sesa.†

† 18:31 Iriraquea Sesa majirontatsica Iromaqui yagavejajiaquerigueti quepatsipaequitica icantajiaqueri majirontaguevetatsica irinetsanatacojiaqueri igonorjia, cotanquitsi aato imetojimentiri caarica quemisantiro ican-tacaantaqueca. Iriguenti agavejanquitsi incante queri metoanquitsine irira Iromaquitica quejetaca Pirato itigarancaqueca Sesa irinetsanatacojiaqueri joriojia.

³² Oquejetantacaca imaica onetsanatanauquempaniji icanqueca Jesoshi icanquegueti quero incojitaquerini irimetojajiquerigueti. ³³ Ariquea iquijanaji Pirato icajemaqueriquea Jesoshi icoacotaqueri:

—¿Arimajaca aviguenti Imajirote jorio?

³⁴ Icantiriquea Jesoshi:

—¿Inchiquiojitsita paashitacaro aviatimpa picanquenagueti ‘Imajirote jorio’? ¿Choocampate itsipa camanquempica?

³⁵ Icantiri Pirato:

—¿Narompate jorio? Irirajia pigonorojia iriguentijiatari amajiaquempica acaniqui, itsipajiacari saserorotejia anaantajianquitsica. ¿Taate opajita pantaque?

³⁶ Icanti Jesoshi:

—Nomajirontagueti naatimpa, teequea omponeguempaji ocaniqui quepatsiqui. Omponequempamequea ocaniqui quepatsiqui impigamentajiaquenamequea guijatanaca aatome yaajiganame joriojia. Cotanquitsiquea imaica nomajirontagueti tee omponeguempaji ocaniqui.

³⁷ Ariquea icantiri Pirato:

—Arisacanica, ¿avirompa majirontatsica?

Irraqueate Jesoshi icantiri:

—Tampatica poaquero picanquerogueti naroguentiqueate majirontatsica. Irootaquetari novoashitaque nocoraquetashitaque ocaniqui quepatsiqui nontsavetanqueroniji iroomajaca. Maasanoquea nintanquitsica intsajiaquero iroomajaca iquemisantajiaque-naquea nocantigueti.

³⁸ Icantiri Pirato:

—¿Taate opajita iroomajaca?

Ariqueate icanquegueti imaica isotoanajiquea iquenquetsatacaajiapojajiriquea joriojia icantajiguiri:

—Naatimpa namenaqueri tecatsi iranteca. ³⁹ Cotanquitsiquea aviatimpajia oraquea aapojacagueti Paashicoa pamejiaca noguisotojaempiri apaniro yashitacojistica santanaqui antiroca teeca oncameetsateji. ¿Irioquea pinintajiaque noguipaquijajempiri Imajirote jorio?

⁴⁰ Iriatimpajiaquea icajemitsijianaquea icantanaque:

—¡Aato irica! ¡Irioquea poguipaquijaje Varavashi!

Iriaquea Varavashi iriguenti pigatsatanteneri.

19

¹ Ariquea Pirato icantacaantaqueri Jesoshi, ipasapasatacaantaqueriquea. ² Irirajia coaretapae itenempoashiqueri samerento yamatsaetantajiacariquea, aisa iquitsaatantajiacariquea quitsaarentsi camachoncamagori. ³ Mana icantamampeajiaquitari intati:

—¡Aviroquea Imajirote jorio!

Yapatompatojiaqueriquea. ⁴ Ariquea isotoanaji aisa Pirato icantajiapojajiri joriojia:

—Pamenajigue, namajeri pintsatimentajiaquenijite naatimpaquea namenaqueri teequea onchoocateji iranteca.

⁵ Irooquea isotoanajigueti Jesoshi yamatsaecaroquea samerento, aisa iquitsaataca quitsaarentsi camachoncamagori. Ariqueate icanti Pirato:

—Jeri iricatica shirampari.

⁶ Ariqueate yamenajivaquerigueti saserorotejia anaantajianquitsica jerijia aisa coaretapae quempoguijajiguiroca teemporo icajemamajajianaquequea:

—¡Pompajacoteri! ¡Pompajacoteri!

Icantajiguiriquea Pirato:

—lintsija paajianaqueriquea pompajacogigueri aviatimpajia. Naatimpaquea namenaqueri teenica irantenica.

⁷ Yacanajiri joriojia:

—Choocaquea cantacaantanentsi noguijatacotaqueca naatimpajia, ocantiquea irime-tojajiqueriquea, ipinajacaritari Irijanite Aapani Irioshi.

⁸ Iroompaquea iquemaquitigui Pirato icantajiaquegueti imaica arimpaquea itsaroomajatanaquequea. ⁹ Iquijanajiquea aisa intsompogui icoacopojaqueriquea Jesoshi icantiri:

—¿Quero piponeaca aviatimpa?

Cotanquitsiquea Jesoshi teequea iranqueriji. ¹⁰ Iriraquea Pirato icantiri:

—¿Quero picotacani caarica pacantana? ¿Arimpaquea tee pintsateji nagavejaque novashiantajempi, aisa nagavejaque nompajacotacaantaquempi?

¹¹ Icanti Jesoshi:

—Aatomegueti ishinetimpirome irira choocatanquitsica jenoqui, aatomequea pagavejaname. Irootaquequea irira cantacaanquenaca yamajitaquenagueti acaniqui aviatimpaqui yanaaque iquempevaemajataca.

¹² Ariquea iquemaquegueti Pirato icanquerigueti imaica ariquea inintamajave-tanacaquea irovashiantajerime, cotanquitsiquea irirajia joriojia arimpaquea icajemacomajajianaqueriquea icantajianaqueriquea:

—Povashiantajerigueti irintatica teequea pinquenquejacomajatero irashi majirontatsica Sesa, maasanotari inchiqioji cantashitatsica: ‘Naroguenti majirontatsica’, manaquea icatsimaqueri Sesa.

¹³ Ariquea iquemavaquitiguiquea Pirato isotoacanaqueriquea Jesoshi, isavicapoji shitaponcarontsiqui ontaniqui icantomajantapiniquegueti icantajitirogueti “Ishitamen-cotantajitacarogueti Mapicotapae”, ora evereotsaqui opajita Gavata. ¹⁴ Pajiniquea intampaticate catsirincaiteri irootapojitari aapojempa Paashicoa. Iriraquea Pirato icantajiguiriquea joriojia:

—Jeri irica pimajirote.

¹⁵ Cotanquitsiquea icajemajianaquequea iriatimpajia:

—¡Irimetojeta! ¡Irimetojeta! ¡Pompajacoteri!

Iriraquea Pirato icantajiguiri:

—¿Arimpa nompajacoqueri pimajirote?

Cotanquitsiquea irirajia saserorotejia anaantajanquitsica icantajiguiriquea:

—Tee inchoocatenica itsipa nomajirote. Apaniroquea icoca majirontatsica Sesa.

¹⁶ Ariquea icantajiaqueriquea Pirato irompajacojiaqueriquea. Iriatimpajia yaajiana-queriquea.

Yompajacojiquerigueti Jesoshi

(Mt. 27.32-44; Mr. 15.21-32; Irc. 23.26-43)

¹⁷ Ariquea inatanaquero Jesoshi igoroshite, isotoanaque iroanaque ontaniqui icantajitirogueti Shocoitontsi. Oraquea evereotsaqui opajita Gorogota. ¹⁸ Ariquea oraniqui yompajacojiaqueriquea, itsipatacaantajiacariquea mavite, apaniro yogatiacojiqueri it-incamijempequiqui Jesoshi, iriraquea itsipa irajampatequi. ¹⁹ Iriraquea Pirato itioncaquequea ovataquiqui ocanti: “Jesoshi Nasarequitica, Imajirote jorio”, ariquea yoguipatacacaantaqueroquea igoroshitequi. ²⁰ Iroguentiquea itioncancaro iguenquetsatsarepaequi evereo, guiriego, Iromaquitica. Yapatsajajiaqueroquea oshequini joriojia, aritarite yompajacojiquerigueti Jesoshi oquempajicaro ochoocagueticugeti tsovironaquipae. ²¹ Irootaquequea irirajia saserorotejia anaantajanquitsica icantantajiavetacarica Pirato:

—Aatoquea pitionquiro ‘Imajirote jorio’, iroguentiquea pintioncaque oncanque: ‘Cantatsica naroguenti Imajirote jorio.’

²² Cotanquitsiquea Pirato icantiriquea:

—Oraquea notioncaqueca ari ococa, notioncaquerotari.

²³ Ariquea irirajia coaretapae ompajacojiaquerica Jesoshi iteroncaquerogueti yompajacojiaquerigueti yashintajijaaro iquitsaaguevecaca,* yaajiajiroquea apaniropae, icarajiaque 4. Apanivaniquea iitsaare intsompoguitica. Iroatimpaquea tee avotempajiyontijajiqueroquea maasano ojamorenataque. ²⁴ Ariquea icantajianaquequea:

—Aatoquea aperejajiguiro, manaquea ampegavijijiaquempa antsantajiaquempaca quericaca aaqueroneca.

* 19:23 iquitsaaguevecaca. Irooca icantacotaque isavoguinaro, igaviguitire, ichompimashite, aisa yogataacaca, ocarataque 4.

Oraquea oquejetantacaca imaica mananiji onetsanatantanacaca intati Itioncacaantaqueca Aapani Irioshi ocantigueti: “Yashintajijaaro noquitsaaguevecaca yaajajiroquea apaniropae, aisa ipegavijijiaca intsatantajiaquempaca quericaca aaqueroneca noitsaare.” Aritari iquejejiaca imaica coaretapae.

²⁵ Oraniquiquea yompajacojitaquerigueti Jesoshi choocaquea catiaca iriniro aisa ogueytyote, jero aisa Maria imanquigare Quereopashi, jeroquea aisa Maria Magararaquitica. ²⁶ Iiraquea Jesoshi yamenaquerogueti iriniro ocatiaca otsipatacariquea itsatacaane ipintsamajatacaca, icantiroquea:

—Manquigarentsi, jeri pirijanite.

²⁷ Ariquea icantiri aisa itsatacaane:

—Jero piniro.

Ariquea yoanajigueti itsipatanajaroquea itsovironaquitequi, ariquea ochoocapojaji.

²⁸ Ariquea irira Jesoshi itsaquetari ariquea onetsanatata maasano. Imaicaquea, cameetsaniji onetsanaquempaniji Itioncacaantaqueca Aapani Irioshi, icantiquea:

—Mirepojana.

²⁹ Choocaquea oraniqui yojoquijitacojitaqueca apanaqui vinoja cachonerontojajaro, shatecaja. Ariqueate iticajajitaqueroquea achomiicajatiroca oja yogatiacotancaroquea oguiji isopoquiji ivagantequi Jesoshi. ³⁰ Ariquea yatsimijicajataqueroquea icantiquea:

—Imaica netsanamajatanacaquea maasano.

Ariquea yoguivotanaca, yoguipaquijapanajantiro ishire metoc.

Isatajajitaquerigueti Jesoshi

³¹ Oraqueate imetojantacaca Jesoshi iroguenti savincaguiteri inetsanatantajiacaca jorioja maasano inintajiaqueca aapojaquempagueti imagorejantajitaca, irotaquequea inintantajiacaca intsopajacotacaantaguetajeri metojaguetaananquitsica yompajacojiqueca tequeratagueta aguempaji. Oraticaquea savincaguiteri imagorejantajitaca icantajitica Paashicoa anaaguequeroquea maasano imagorejantajitaca. Irotaquequea icantantajiacarica Pirato intigarancajiaqueri igoaretate irijararejajiaquiteri itasaquijiqui irimetojanaqueniji taampina intsopajacotimentajiaqueriniji. ³² Ariquea yoayoaitanaque ijararejajiaqueroquea itsipatacaca Jesoshi yompajacojitaquerigueti, imajiaqueriquea itsipa. ³³ Ariquea inquejetacaajiaquemparime Jesoshi iriatimpa yamenajavepojacariquea metojanaque, teequea irijararejeriji. ³⁴ Cotanquitsiquea apaniro coareta isatajaquigtiquiriquea imerequiqui, osotoajatanaque iriraja aisa oja. ³⁵ Iira amenaqueroca, iriguenti camantacotaqueroca, iroomajacaquea itsavetantaqueca. Itsamajaquequea itampaticataquero icantaquegueti cameetsanijite pinquemisantajianaquenijite aviaticampajia aisa. ³⁶ Manatarite oquejetantacaca imaica cameetsaniji onetsanatimentanaquempaniji Itioncacaantaqueca Aapani Irioshi ocantigueti: “Aatoquea ijararejimajitiri apatonquiro itonqui.” ³⁷ Choocaquea otsipa itioncajitaqueca ocanti: “Iramenajiaqueriquea isatajajiaqueca.”

Yogujajitaquerigueti Jesoshi omoroqui

(Mt. 27.57-61; Mr. 15.42-47; Irc. 23.50-56)

³⁸ Ariquea imaica yoanaque Jose Arimateaquitica icamantaquitiriquea Pirato inintaque iraanajeroquea itsino Jesoshi. Irira Jose iriguenti itsatacaane Jesoshi cotanquitsiquea teequea irininteji intsajiaqueriquea jorioja, itsaroacaajiacaritarite icatsimajitiritsi. Iiraquea Pirato icantanaquequea:

—Iintsija.

Ari yoanaque yaanajiriquea. ³⁹ Ariquea icoraquetaquequea aisa irira Nicoremo oashininquirica Jesoshi tsiteniriqui, yamaquequea casancari icantajitica mira oconoacaroquea otsipa icantajitica aaroe. Maasanoquea otenataquequea 30 quiro. ⁴⁰ Ariquea yaajianajiro itsino Jesoshi, yampiguiricacojiaqueriquea omagopaequi, itsipatacaantacaro casancari, ariquea iquejetacaajiacariquea querocaca icojigani iquitatantajiguigueti jorioja. ⁴¹ Ontaniquiquea oquempejiquero yompajacojiaquerigueti Jesoshi choocaquea panquirentsimashi. Ari ochoocaque imperitaqui imorotashijitirica metojatsica, iroaqueramorotirajaquea tequeratatiraja irojoquijitajitajitempariji metojatsica. ⁴² Ariquea

oraniqui yojoquijijitajiriquea Jesoshi, irootari quempejitanquitsi, aisa pajiniquea aapo-jempa savincaguiteri imagorejantapinijiacaca joriojia.

20

Ipochatanajiguetai Jesoshi

(Mt. 28.1-10; Mr. 16.1-8; Irc. 24.1-12)

¹ Ariquea osavincaguitetamanaque parianajaroca semana* ogantagatirajaquea opit-sequi oanaquequea Maria Magararaquitica yojoquijijitaqueriguetai Jesoshi, amenavepo-jaroquea mapi iticaacotantajivetacarica jac quitsorejanaquequea. ² Oshiashitanacari Shimo Peerero aisa itsipa itsatacaane, irira ipintsamajatacaca Jesoshi, ocamantajiapo-jaqueriquea:

—Yaajitapanajantiriquea Amajirote. Tee inchoocatajeji yojoquijijivetacariguetai. Tee-quea nontsateji querocaca yojoquijijitajirini.

³ Ariquea irira Peerero itsipatanacari itsipa itsatacaane Jesoshi, yoajjanaque yojo-quiijivetacariguetai Jesoshi. ⁴ Ishiashiaivetanacaquea mavite, cotanquitsiquea ishiama-jatanaca itsipa, yojocanaqueri Peerero, iriquetiquea arejetapojatsi. ⁵ Itavincapojiquea yamenapojaquero joquijimagotaca omagopae yampiguiricacotantajivecarica, cotan-quitsiquea teequea inquijeji. ⁶ Ariquea yarejetapojacaguetai Shimo Peerero iquijanaque-quea iriguenti intsompogui. Ariquea iquejetaca iriatimpa yamenaguequero omagopae joquijiguetaquea oraniqui. ⁷ Yamenaquequea aisa omago ipashicavorotantajivecar-ica Jesoshi, teequea ontsipatemparoji otsipapae omagopae, manaquea apitivica ojoqui-jica tiijai. ⁸ Ariquea iquijanaque itsipa itsatacaane Jesoshi iriquetica arejevetanquitsica incajaranqui, yamenaquequea maasano, ari iquenquejanaque arimaja pochatanaji. ⁹ Tequeratanicate intsajivetemparoji ocanqueca Tioncarentsimajaca ocanqueguetai im-pochatanaje. ¹⁰ Ariquea ipiapiaitanaja itsatacaane.

Jesoshi yonigaajaroquea Maria Magararaquitica

(Mr. 16.9-11)

¹¹ Cotanquitsiquea Maria ocatiaca sotsiqui oraniqui yojoquijijivetacariguetai Je-soshi, iracaquea. Ariquea otavincanaque ameni intsompogui. ¹² Onejaqueriquea mavite irashivantijitete Aapani Irioshi iquitsaataro quitamarori, savicaque ipitsantsa-jajivetacariguetai Jesoshi, apaniroquea savicanquitsi iguitovecaguetai, iriraquea itsipa ichooaque igontavecaguetai. ¹³ Icantajigueroquea:

—Manquigarentsi, ¿taaqueuea piraacoque?

Ocantanaqueriquea:

—Yaajitanaqueri Nomajirote. Teequea nontsatajeriji querocaca yojoquijijitajirini.

¹⁴ Iroompaquea ocanquitigui opitsocavetanacaquea onejiriquea catiaca Jesoshi, cotanquitsiquea tee ontsatavajeriji, ojiquequea tee irio Jesoshi. ¹⁵ Icantiro Jesoshi:

—Manquigarentsi, ¿taaqueuea piraacoque? ¿Taaqueuea pamenagueque?

Iroatimpaquea ojiqueriquea irio shiacotiroca panquirentsimashi, ocantsitariquea:

—Avirocagate aanaqueri, iintsijate pincamantena queroquea pojoquijitajirini, naaja-terita.

¹⁶ Icantiroquea Jesoshi:

—¡Maria!

Opitsocanacaquea oquenquetsatacantanacariquea evereotsaqui ocantiri:

—¡Ira voni! —oncanquequea: “Tsatacantantsica”.

¹⁷ Cotanquitsiquea Jesoshi icantiro:

—Aato pajiricana, tequeratanicate noanajeji jenoqui Aapaniqui. Cotanquitsiquea imaica poanaque pincamantajiapojaqueriquea iguentijeguipae:† ‘Noanaje jenoqui Aa-paniqui, iriguentiquea aisa Piri aviatimpajia. Iriguenti Nirioshite aisa Pirioshite aviatim-pajia.’

¹⁸ Ariquea oanaque Maria Magararaquitica ocamantajiapojaqueriquea itsatacaanejia:

* 20:1 Iroguenti opariantanaja otsipa semana savincaguiteri tominco. † 20:17 Icanqueguetai Jesoshi iguenti-jeguipae iriguenti icantacoque itsatacaanejia. Pamenero Mt. 28.10; Irm. 8.29; Ev. 2.11-12.

—Nonejajiriquea Amajirote.
Ariquea ocantajiaqueriquea aisa maasano icantaguetaqueeroca.

Yonigaajijarigueti Jesoshi itsatacaanejia
(Mt. 28.16-20; Mr. 16.14-18; Irc. 24.36-49)

¹⁹ Ariquea opitsecanaquegueti oratica savincaguiteri parianajaroca semana,[‡] icapiocajiacaquea itsatacaanejia Jesoshi, yashitacojiacaquea itsaroacaajiacaritari joriojia, ariquea imapocashijiapojacariquea Jesoshi icatiimojiapojacari niganqui ichoocajiaquegueti icantajiaipojaqueriquea:

—Pishinejiguempaquea.

²⁰ Icantajiaquerigueti yonigaajiaqueriquea iraco aisa imerequiqui. Ariqueate iriatimpajia ishinemajajianacaquea yamenajiaqueritari Amajirote. ²¹ Icantsiijaariquea Jesoshi:
—Pishinejiguempaquea. Quejetacaquea naatimpa itigarancaquenagueti Aapani, ariquea nonquejetacaajiaquempi naatimpa imaica nontigarancajiaquempiquea.

²² Ariquea itasoncajiaqueriquea soo icantajiaqueriquea:

—Paajivaqueriquea Ishire Aapani Irioshi. ²³ Querica pincantajiaque: ‘Peanajaquea piguempevaerejia’, peanajaquea. Cotanquitsiquea quericaca pincantajiaque: ‘Choocati-rajaquea piguempevaere’, choocati-rajaquea.

Tomashi yamenajirigueti Jesoshi

²⁴ Cotanquitsiquea iriraquea itsatacaane Jesoshi icantajitica Tomashi Tsipari teequea inchoocateji iriatimpa yonigaajiaquerigueti Jesoshi itsatacaanejia. ²⁵ Manaquea icamantajiaqueri intati icantajiguiriquea:

—Namenajiajiriquea Amajirote.

Cotanquitsiquea iriatimpa icantiquea:

—Aatogueti nameniro iracoqui yompajacojitaquerigueti cavorotonquiqui, aisa aatogueti noguijaguero nochapaqui omorotaquerigueti, aisa aatogueti noguijaavacota imerequiqui aatoquea nocanti: ‘Arimaja ipochatanaji.’

²⁶ Cotanquitsiquea aapojacaguete 8 savincaguiteri iriraquea itsatacaanejia Jesoshi icapiocajiaaquea aisa, imaicaquea ari ichoocaque Tomashi. Yashitacojiavetacaquea cotanquitsiquea Jesoshi imapocajiaipojajiriquea icatiimojiapojacari niganqui ichoocajiaquegueti icantajiaipojaqueriquea:

—Pishinejiguempaquea.

²⁷ Icampojiriquea Tomashi:

—Imaicaquea jeroquea naco poguijaguero pichapaqui, aisa poguijaavacotempa nomerequiqui. Aatoquea pitsojencana, manaquea pinquemisanquena intati.

²⁸ Iquenquetsatanaquequea Tomashi icantiriquea:

—¡Nomajirote, Nirioshite!

²⁹ Icantiriquea Jesoshi:

—Pinejajana, irotaque piquemisantantajanaca. Irishinejianaquempaquea irirajia teeca irinejajavetenaji cotanquitsiquea inquemisantajianaquena.

³⁰ Iriqueate Jesoshi yonigaantaguequeroquea otsipapae oshequi ocaantantatsica intati yamenacajiaqueriquea itsatacaanejia, cotanquitsiqueate teequea ontionquem-paji acaniqui paperiqui. ³¹ Ocatita tioncaguetanquitsica manaquea otioncaca cameet-saniji pintsajiaqueniji Jesoshi iriguenti Quirishito, Irijanite Aapani Irioshi; aisa cameet-saniji paventajiaquempariniji ivajiroqui, ariquea iranijacaajiajemp.

21

Yonigaajijarigueti Jesoshi 7 itsatacaanejia otsapijaqui omotija

¹ Ariqueate Jesoshi yonigaajiajariquea aisa itsatacaanejia ontaniqui otsapijaqui omotija Tiveriashi. Ari oquejetanaca imaica. ² Icapiocajiacaquea itsatacaanejia. Choocaquea Shimo Peerero, Tomashi icantajitica Tsipari, Natanaere poneanquitsica

[‡] 20:19 oratica savincaguiteri parianajaroca semana. Pamenero tioncanquitsica isavivanaqui otsapaqui 20.1. Aisa pamenero Mt. 28.1; Mr. 16.2, 9.

Canaaqui Garireaquei, jerijia irijanite Severeo, jerijiaquea aisa itsipa mavite. ³ Ariquea icanti Shimo Peerero:

—Nonquitsataquitetaquea.

Icantajiguiriquea iriatimpajia:

—Noncoraquejiaquequeate naatimpajia aisa.

Yoajianaque itejiapojaca quenajarontsiqui. Iquitsaquitsajivetacaquea iroosatiquea isavincaguitetacojianaji, teequea irajaigueji apapaquiro. ⁴ Ariquea osavincaguitetamanaquegueti ari icatiapoja Jesoshi otsapijaqui, cotanquitsiquea itsatacaanejia teequea intsajigueji iriguenti Jesoshi. ⁵ Ariquea iriatimpa icantiquea:

—Irijanijia, ¿paajiaquete?

Icantajianaqueriquea:

—Tee anejeriji.

⁶ Ariquea icantajiguiriquea:

—Iintsijate pinquitsajigue otsipasotaqui quenajarontsiqui pitincamijempequiqui, ariquea paajiaque.

Iriatimpajiaquea iquitsajiaque, iroompaqueate inoshicaajivetajaro teequea iragavejajajeroji irantsomajajajero, itseraiquitacarotarite shimapae.

⁷ Iquenquetsatanaquequea itsatacaane ipintsamajatacaca Jesoshi icantiriquea Peerero:

—¿Iriguenti Amajirote!

Ariqueate iquemavaquitiguiquea Shimo Peerero iquitsaatanajaro iitsaare, isapocacatari incajaranqui, ariqueate yojocajatsitanacaquea pon. ⁸ Iriaquea itsipajiacaca manaquea iquenantajianacaro quenajarontsi, inoshicajatacojianaqueroqueate quitsari, teenica osamanajateji otsapijaqui, arica ocarataque 100 meetero. ⁹ Iroompaquea yaguijiguijitanaque inejapojiroquea quichagantesevaetaque paamari jocavoquitaca shima aisa pan. ¹⁰ Icantavaqueriquea Jesoshi:

—Iintsija pamagarantajiaque shimapae paajiaqueca imaica.

¹¹ Iriaquea Shimo Peerero itetanajaquea quenajarontsiqui inoshicajatacotavaqueriquea shima tseraiquicataris antarinquetepae, yaacotanaqueriquea imparaguequi. Maasanoquea icaravaeque 153 shima. Icarapiovaevetaca, cotanquitsi teequea imperejeroji quitsari. ¹² Ariquea Jesoshi icantajiguiriquea:

—Caacate pishecajiananempa.

Inintajivetaca itsatacaanejia incantajiaquerime: “¿Taampa aviguenti?”, cotanquitsi tecatsi canterine, itsajiaqueritari iriguenti Amajirote. ¹³ Ariquea icoraquetaque Jesoshi, yaaquero pan, yojocajiaqueneri, ariquea iquejetacaacari aisa shima. ¹⁴ Ocaquea ocatica ocaratiquea 3 yonigaajajari Jesoshi itsatacaanejia ipochatanajigueti.

Jesoshi iquenquetsatatacaquerigueti Shimo Peerero

¹⁵ Ariquea yagashcajajianacagueti iriraquea Jesoshi icantiri Shimo Peerero:

—Shimo, irijanite Jonashi, ¿pipintsamajataquena, panajiaaqueri irica pitsipajiacaca?

Icantiriquea Peerero:

—Jeejeguitatsi, Nomajirote, pitsaque aviatimpa nopintsataquempi.

Icantiriquea:

—Iroosacanicate pojocajigueneri novejajaniquite isheca.

¹⁶ Icantsitajariquea aisa:

—Shimo, irijanite Jonashi, ¿pipintsamajataquena?

Icantiriquea Peerero:

—Jeejeguitatsi, Nomajirote, pitsaque aviatimpa nopintsataquempi.

Icantiriquea:

—Iroosacanicate pinquempoguijajiguenari novejate.

¹⁷ Ariqueate yapijitsitajariquea aisa icantsitajari:

—Shimo, irijanite Jonashi, ¿pipintsataquena?

Ariquea ishimampojanacanaca Peerero yamenanaqueroqueti otsipatapojacaquea icoaquerigueti icantiri: “¿Pipintsataquena?” Icantiriquea:

—Nomajirote, pitsaquerotari maasano. Pitsaquequea nopintsataquempi.

Icantiriquea Jesoshi:

—Iroosacanicate pojocajigueneri novejate isheca. ¹⁸ Imaicaquea noncamantamajaji-aquempi, iroaqueragueti piquenquevaritapojigueti inchiquiojitsita aviatimpa poishotacotaca piquitsaatagueti, aisa piquenaguetanaque querocagueti pininqueni, cotanquitsiquea coajica pinquenquevarivaetanajegueti aato piquejetaja imaica. Manaquea pincantajempequitanajempa iroishojitajempiquea intati, irajaitanaquempiquea querocagueti teegueti pinintavetempaji pogueji.

¹⁹ Oraquea icanquegueti Jesoshi imaica iroguentiquea icantacoque quero incojitaquerini Peerero coajica irimetojajiquerigueti cameetsaniji iramenimentajitaqueriniji Aapani Irioshi caaviji yagavejamajati. Ariquea icantiri:

—Poguijatacoguitenani.

Itsatacaane Jesoshi ipintsamajataca

²⁰ Ariquea ipitsocavetanacaquea Peerero yamenavaqueriquea yoguijatapojiriquea itsatacaane Jesoshi ipintsamajatacaca. Iriatimpa irioquea pimerequijanquitsi imerequiqui Jesoshi itsipatacarigueti itsatacaanejia ishecajiacagueti pajinigueti irimetoje, irioquea cantanquitsi: “Nomajirote, ¿queri aacaanquempineca?” ²¹ Ariquea yamenavaquerigueti Peerero, icantiri Jesoshi:

—Nomajirote, iricatica ¿quero incoquempani?

²² Icantanaqueriquea Jesoshi:

—Arigueti noninque naatimpa incoguitempani inchooqueue irosatiquea noncoraquepojjagueti, ¿queroquea oocani piquenquejacotsitantacarica aviatimpa? Aviatimpaquea poguijatacoguitenani.

²³ Irootaquequea icantantajavetanacaca quemisantajiaquerica Jesoshi aato imetoji itsatacaane ipintsamajatacaca, ariquea ishimerancaguevetacaro, cotanquitsiquea Jesoshi teequea ari incanteji aato imetoji. Iroguentiquea icanque: “Arigueti noninque naatimpa incoguitempani inchooqueue irosatiquea noncoraquepojjagueti, ¿queroquea oocani piquenquejacotsitantacarica aviatimpa?”

²⁴ Irioquea tsavetantaqueroca ocativa yamenamajaqueca, iriotaque tioncaqueroca ipintsamajatacaca. Itsajitaqueroquea itampaticamajataquero, tee incantashitempaji.

²⁵ Choocaquea oshequi yantaguetaqueca Jesoshi teequea ontioncacotempaji. Arimegueti interoncajitaquerome intioncacojiguetaqueromegueti maasano, aricampa anaanaquerome quepatsi.

YANTAJIGUICA ITIGARANCANEJIA JESOSHI

Antsatantaquemparoca

Ocatica iroguenti antsatantaquemparoca itioncaqueca Irocashi itioncacotaque-rogueti yantajiguica itigarancanejia Jesoshi yagavejacaajiaquerigueti Ishire Aapani Irioshi. Irocashi teequea irio jorio. Irguenti aavintantatsica (Cor. 4.11-14). Itsipatacari Paavoro iquenaguetanaquegueti quepatsipaequi (Ya. 16.9-10). Irocashi itioncaquero ot-sipa paperi tsavetacotaquerica Jesoshi, tequeratagueti intionqueroji ocatica. Irootaque ochocatatantacaca mavite tsavetacotaqueroca yoantanajaca Jesoshi jenoqui inquitequi (Irc. 24.50-53 aisa Ya. 1.1-11). Iquenquejajitaque itioncaquero Irocashi ocatica paperi iroaqueragueti iteroncaquerogueti otsipa itioncaqueca tsavetantaquerica Jesoshi, arica ajagantsiniqui 62 irooca otsipa ajagantsini arejevaetacaro 65. Teequea intsajiteji quero ichocataqueni itioncaquerogueti.

Itioncaqueneri shirampari pajitatsica Teopiro aisa itsipajia teeca irio joriojia cameet-saniji intsajiaque itsavetantaqueca itigarancanejia Jesoshi, itsavetacotimojiavetacari joriojia, cotanquitsi oshequini tee inquemisantajigueroji, iriguentijia quemisantaji-avaquero teeca irijorijoigueji, aisa cameetsaniji intsajiaqueniji quero icojiacani ma-jirontajatsica icatsimajiaquerigueti itigarancanejia Jesoshi. Itioncacotaqueri Jesoshi icamantajiaquerigueti itigarancanejia itsavetantero Quenquetsatsarentsi Oganejen-catatsica intsavetantimojiaqueri caquinteguetatsica. Icanti: “Ariquea pintsavetantaji-aquenaqueate ontaniqui Jerosarequi, pinquejetacaajiaquemparo Joreaqui aisa Samari-aqui, pintsitacaguitejajianaquero. Coajica pintsitacaguitejajianaqueroqueate maasano quepatsi pintsavetantajianaquena.” (Ya. 1.8) Itioncacotaquero quero icojiaqueroni ipariajianacarogueti irinetsanajiaquero icantajiaquerica Amajirote Jesoshi. (1) Itsavetantimojiaqueri choocajianquitsica Jerosarequi (1.1-6.7); (2) itsavetantimojiaqueri choocajianquitsica quepatsipaequi pajitatsica Jorea aisa Samaria (6.8-9.31); (3) aisa itsavetantimojiaqueri choocajianquitsica otsipapaequi quepatsipae (9.32-28.31): iri-rajia choocajianquitsica guinteninintsiqui pajitatsica Antioquia (9.32-12.24), irirajia choocajianquitsica quepatsiqui pajitatsica Ashia (12.25-16.5), irirajia choocajianquitsica otsapijaqui quentijaniqui pajitatsica Ejeo (16.6-19.29), aisa choocajianquitsica guin-teninintsiqui pajitatsica Iroma (19.21-28.31).

Irocashi itioncaqueneri Teopiro

¹ Otsipaquei paperiqui iroquetica notioncaquempica, Teopiro, notsavetantagueta-queero maasano yantaguetaquitica Jesoshi, aisa itsatacaantaguetaquitica iroaqueragueti iparianacarogueti ² irosatiqueate aavaetanaja savincaguiteri yaajitanajirigueti jeno-qui inquitequi. Tequeratagueti iroanaje jenoqui, iquenquetsatacaajiaqueri itsata-caanejia icoguiajiaqueca icamantajiaqueri inintacaaguetaquerica irantajiaque, iriguen-tiquea Ishire Aapani Irioshi agavejacaquerica Jesoshi. ³ Yatsipetacatarite imetojave-taquitagueti, cotanquitsi ariquea coajica ipochatanaji yonigaajianajari itigarancanejia, yantaguetaquequeate oshequi cameetsanijite iramenamajajiaquerinijite intsamajaji-aquenijite arimaja ipochatanaji. Yonigaajianajari 40 savincaguiteri itsavetantagueta-queri Aapani Irioshi quero icotani imajirontagueti.

⁴ Ariquea itsipajiacarigueti itigarancanejia icantajianajiriqueate:

—Coramani nocamantajiaquempi icanque Aapani intigarancajiaquempiri Ishire. Imaicaquea aatota pijajigui otsipaquei, pinchoocajiaqueta acaniqui Jerosarequi pogu-ijajiaqueta irinetsanataquero icanqueca Aapani. ⁵ Irooriji irirampani Joanca iviña-cajatantaque oja, cotanquitsi imaicaqueate quempejitapojaque inchoocashirentajia-po-juempi Ishire Aapani Irioshi quejetaca iroviñacajatantajitaquempiri Ishire, aato oshe-quiaji savincaguiteri onetsanatananaquempaca.

Jesoshi yoanajigueti jenoqui inquitequi

⁶ Ariquea icapiocaventajarigueti aisa icoacojiaqueri iriatimpajia icantajiguiri:

—Nomajirote, ¿ariqueate imaica aviguenti pincapiocajiajena naatimpajia ishiraerijia pimpejaempa Nomajirote, pimpigamentajiaquena cameetsanijite nonchoocajiajeniji intati?

⁷ Yacanaqueriqueate:

—Teenicate irinintacaguemproji Aapani pintsajiguero quero oncarateni oncogue-tanaquempani coajica. Iriguenti cantanquitsine Aapani. ⁸ Cotanquitsiqueate inco-raquepojaquegueti Ishire inchoocashirentajiaipojaquepigueti, ariqueate iragavejacaajianaquempiqueate. Ariquea pintsavetantajiaquenaqueate ontaniqui Jerosarequi, pin-quejetacaajiaquemparo Joreaqui aisa Samariaqui, pintsitacaguitejajianaquero. Coajica pintsitacaguitejajianaqueroqueate maasano quepatsi pintsavetantajianaquena.

⁹ Ariqueate iquejetanaquerogueti imaica iriatimpajiaquea yamenajiajavajiri yogajeno-canaja yoanaji jenoqui inquitequi. Ariqueate ipeantapojajaro mararo, tee inconijatajeji.

¹⁰ Ogantagatirajaquea yamenajigui sorerere jenoqui inquitequi inejaitatiguiri icatiimo-jiapojacari mavite shirampari, quitamarocantajiavaeque iitsaare. Icantajiaipojaqueri:

¹¹ —Aviatimpajia Garireaqueitica, ¿taaqueate oajiaquempi ogantagatiraja pamenajigui jenoqui inquitequi? Imaica pinejajiajavajirigueti Jesoshi yoanaji jenoqui inquitequi, ariqueate inquejetapojajempa oncoramanitapojajegueti impijaategueti.

Icoguijiaquerigueti Matiashi impijaempari Jorashi

¹² Iriatimpajia ariqueate yoguirincajianajaro Orivotsempi, ipiapaitanaja Jerosarequi. Ora Jerosare tee osamanitacoteri Orivotsempi, ocarataque ishinetantacarica iranijitanaque savincaguiteriqui imagorejantajitaca.* ¹³ Iroompaqueate yarejerejeipo-jacagueti tsovironaqui yagatsonquijianaque otsipamencoqui jenoquitica. Aritarite oraniqui imajaigui Peerero, Joanca, Santiago,† Antirishi, Jeripe, Tomashi, Varitorome, Mateo, Santiago (irijanite Areje), Shimo (icantajitiri aisa Serote), Jorashi (irijanite Santiago). ¹⁴ Maasano iriatimpajia ogantaga icapiocapinijica itsipajiacari iriguentije-guitepae Jesoshi aisa Maria iriniro jero aisa otsipapae manquigarentsijia, isavicaventajia-quero iquenquetsatacaajiaqueri Aapani Irioshi yamanajiaqueri.

¹⁵ Ariqueate otsipa savincaguiteri icapiocajica oshequini tsarotentajigarica Aapani Irioshi aricampa ivegarajica 120. Ariqueate icatianaca Peerero icanti: ¹⁶ “Napiguemisantarijiate, inintaque Aapani Irioshi onetsanatanaca Tioncarentsimajaca icanquegueti Ishire coramani ivagantequi Taavini itsavetantsitacariqueti Jorashi amampijajiaquerica aajiaquerica Jesoshi. ¹⁷ Iroaqueragueti itsipajiavetacaji iquejejiavetacaji aatimpajia aguiajiguirigueti Jesoshi. ¹⁸ Iro cotanquitsi yaajitanaqueri imentaquitsitepae yojocajitaquenerica Jorashi incovaeguishequeniji, ivegaratantajitacararo quepatsi. Ariquea ontaniqui iparianaquequeate ityaquisanaque imotijiaqui tyaquic. Osocataetanaca iseito. ¹⁹ Iroompaqueate iquemacojiaquerogueti Jerosarequitica ariqueate ipajijiaquero ora quepatsi Asererama. Oraquea iguenquetsatsarequi ocanti Irajantsiguete. ²⁰ Itioncacotaquerotarite paperiqui icantajitica Saremo ocanti:

‘Irovashiantisijitaquerija itsovironaquite aatoja ichoocataji nantajemparoneca.’

Aisa ocanti:

‘Cameetsa inchoocataje piajemparineca impejaempa itigarancane Amajirote.’

²¹⁻²² “Imaicaquea imaica choocajia acaniqui atsipajiacaca coramani iroaqueragueti iviñacajataqueri Joanca Jesoshi quigonquero yoanajigueti jenoqui inquitequi. Imaica jame aajiaje itsipa piajemparineca Jorashi cameetsanijite irionijite antsipajiaquempa antsavetantajiaquerigueti Jesoshi ipochatanajigueti iroorijite irootaque ininqueca Aapani Irioshi.”

* 1:12 ocarataque ishinetantacarica iranijitanaque savincaguiteriqui imagorejantajitaca. Aricampa onaque aporoquiromeetero. † 1:13 Santiago. Iguenquetsatsarequi guiriego ipajita Iakobos. Iconoagarantaca quimajareri yoguipitsocaquerogueti ivajiro ipajitiri Santiago, itsipa ipajitiri Jacobo. Mavite oponeca iguenquetsatsarequi evereo, ipajitiri Yaakob. Aisa pamenero tioncanquitsica isavivanaqui otsapaqui Irc. 6.16.

²³ Ariqueate icajemajiaqueri mavite. Apaniro ipajita Jose aisa icantajiri Varesava Joshito. Iriraqueate itsipa ipajita Matiashi. ²⁴ Yamanajiaqueri Aapani Irioshi icantiri:

—Nomajirote, pamenashirentajigui maasano caquinteja. Jeri irica mavite, pongaajiaquenari queri picoguaqueca ²⁵ impejaempa itigarancane Jesoshi intsipajiajena, iriratarite Jorashi yovashiantaguetanaquero maasano, yoanaquequea ontaniqui otampaticataquerigueti inchoocatantanaquempaca.

²⁶ Ariqueate ipegavijijiaca cameetsaniji intsatimentajiaqueriniji quericaca inintacaqueca Aapani Irioshi. Ariqueate iriguenti sotoacotanquitsi Matiashi. Irioqueate peajatsi itigarancane Jesoshi. Iconoajiarigueti inajiaji 12.

2

Iroaqueraqueti icoraquetaque Ishire Aapani Irioshi inchoocashirentajiaqueri tsaromentajigarica

¹ Ariqueate aapojacaguetei savincaguiteri ipajijitica Pentecoshite ariqueate ichoocajiaque maasano tsaromentajigarica Jesoshi icapiocajia tsovironaqui. ² Ariquea catsiqueti iquemajiatiguiro opojimajencapojaque quejencataca inirojenca tampija oponeajencataca jenoqui inquitequi. Iquemajiaquero maasano savicajanquitsica tsovironaqui. ³ Ariqueate oconijaguetapojaque quejegueta morecaripae oashiguetanaqueri maasano apaniropae. ⁴ Ariqueate ichoocashirentajiaipojaqueri Ishire Aapani Irioshi yagavejacaajianaqueriquea maasano. Ariqueate imapocajianaca iquenquetsatantajanacaro otsipapae quenquetsatsarentsi teeca intsajiavetempaji, iriguentitarite quenquejacaqueri Ishire Aapani Irioshi.

⁵ Ariqueate ichoocajiaque oraniqui Jerosarequi oshequini jorioja tsamajajiguiroca itioncanaqueca Moishishini ariguenti iponeajiaca otsipapaequi quepatsi. ⁶ Iroompaqueate iquemajiaquaquerogueti opojimajencatanaquegueti ishiashiaitanacaqueate icapiocaventajanacari maasano tsavetantajiguirica Jesoshi, tee intsajiaipojaquero quero ococani iquemajiaipojaqueriguetei iquenquetsatsitantajiacari iquenquetsatsareja.

⁷ Mana yoajianaque intati yamenajianaque sorerere, icantavacaajianacaqueate:

—¿Teempaquatee tee irioja Garireaquitica maasano irirajia? ⁸ ¿Quero ocotaca aquemajiaqueri iquenquetsatantajiacaro quenquetsatsarentsipae? Aquemajiaqueritarite imaica iquenquetsatantajiacaro aguenquetsatsareja ⁹ aatimpajia ponejiaanquitsica osamanipaequitica Paritiaqui, Meriaqui, Eramequi, Mesopotamiaqui, Joreaquei, Caparoshiaqui, Pontoqui, Ashiaqui, ¹⁰ Pirijiaqui, Pampiriaqui, Ejepitoqui, aisa ovegarguetapojacaguetei Irvia oquempejiqueguetei Shirene. Jeri aisa ponejiaanquitsica Iromaqui: irirajia jorijiamajaca aisa oguijatacojiguirica jorioja. ¹¹ Aisa choocajia ponejiaanquitsica Queretaqui aisa Araviaqui. Maasano aatimpajia aquemajiaquaqueri iquenquetsatantajanacaro aguenquetsatsareja itsavetantajiaquerogueti yantica Aapani Irioshi yagavejamajatiuguetei.

¹² Mana yoajianaque intati tee intsajigueroji icantavacaantajanacaca:

—¿Taate opajita ocatica?

¹³ Cotanquitsiqueate iconoagarantajia mana ishirontimentanajiacari intati icantajianaque:

—Mana imiramajatacaro cachojari.

¹⁴ Icatianacaqueate Peerero itsipajianacari itigarancaneja Jesoshi carajianquitsica ¹¹ iquenquetsatanaquequeate iririjenca icanti: “Napijoriojiate aisa maasano choocajianquitsica acaniqui Jerosarequi, iintsija pinquemisantamajajiaquena noncamantajiguempiqueate nontsavetanqueroqueate ocatica pamenajiaqueca. ¹⁵ Imaica pijijiaqueji ishinquijiaca iricajia, cotanquitsi teequeate ari irishinquijiguempaji, iroaquereatarite yogajenocapojaca catsirincaiteri. ¹⁶ Manaqueate onetsanatanaca itsavetanqueca coramani tsavetantirina Aapani Irioshi Joereni icantaqueguetei:

¹⁷ ‘Icantaque Aapani Irioshi: Oncoramanitapojajeguetei pajiniguetei aapojempa savincaguiteri vegaratapojaaitsineca, nontigarancajiaqueneriqueate Noshire inchoocashirentajiaqueri maasano caquintepae.

Iiraquea irijanitepae, intsavetantajiaquero nocanquerica.

Iiraquea iriaqueraca quenquevarijiananquitsi nonigaajiaqueri cantashitatiagueta-
nquitsica, cotanquitsi mana onquejetimojiaquempari iguimaanequi.

Iirajia quenquevarijianatsica mana nonigaajiaqueri iguimaanequi.

¹⁸ Ariqueate noncojiaquerini maasano quemisantajiaquenanea, shiramparijia aisa man-
quigarentsijia,

nontigarancajiaqueneri Noshire inchoocashirentajiaqueri

intsavetantajiaqueroquea nocanquerica.

¹⁹ Ontaniquiqueate jenoqui inquitequi nonigaantaguequero teeca irinejajite,

aisa nonigaanquero nagavejane acaniqui quepatsiqui

iramenajitaquero irajantsi, aisa omorecanaque paamari jero aisa ompoasecantanaque-
queate ogatsiaca.

²⁰ Impitsecanaquequea catsirincaiteri,

aisa irira taai inquityoncamentatanaque inquejetanaquempari irajantsi.

Ariquea oncotanaquempa tequerataguetei aapojempa savincaguiteri anaantanquitsineca
oganejencaguitetanquitsineca ironigaantantaquemparoca Majirontamajatatsica
iragavejane.

²¹ Cotanquitsiqueate maasano aventajiaquemparoneca ivajiro Majirontamajatatsica,
iraajivajeri.'

²² "Shiramparijia ishiraerijia, pinquemisantamajajiguena noncamantajiaquempara.

Iriguenti nontsavetantaque Jesoshi, irira Nasarequitica. Yagavejacaqueri Aapani Irioshi
yantaguetaquerogueti cameetsaguetatsica teeca irinejajiguete, cameetsanijite pintsaji-
aquenijite irio Aapani Irioshi tigarancaqueri. ²³ Ogantaga itsataque Aapani Irioshi

quero incojitaquerini Jesoshi. Coramani iquenquejaquero intigarancaqueri irimeto-
jaque acaniqui quepatsiqui. Avirojiaquea paacaantajiaqueri pimetojacaantajiaqueri

picantajiaquequeate irompajacojiaqueri quempevaejiatsica. ²⁴ Cotanquitsi ivochantajiri

Aapani Irioshi aatonijite icoguitani yatsipetaro metojagantsi, teenicate agavejaguiterini.

²⁵ Iiraqueate majirontatsica Taavini itioncaqueguetei coramani itsavetanqueri Jesoshi
icanti:

'Nonejapinitaqueri Nomajirote itsipataquena.

Ogantaga inaque notincamijempequiqui, caarica taaca notsaroacaanta.

²⁶ Irootaquequeate noshinevaetancaca noshirequi,

noquenquetsataqueguetei shine nocanca.

Notsino aisa onchoocataquena, aviguentitari noguijacoque,

²⁷ aatonicate povashiantiro noshire Areshiqui,*

aato pishinetiro aisa avejanquempara itsino Pigomajamajare.

²⁸ Pitsatacaaquena quero noncoquempani nanijaguiteniniji aviatimpaqui. Pincoguitem-
pani pintsipataquena poguishinejamajataquena.'[☆]

²⁹ "Imaica, nogonorojia, atsamajajiaque irira Taavini avaesatiniteni imetojaque-
queate, ariquea iquitajitajiri, aritarite onaque iquitatantajaca acaniqui aguinteni-
quiqui.

³⁰ Iriatimpa iriguenti tsavetantironica icanqueca Aapani Irioshi coramani. Itsama-
jatironi icantaquerica Aapani Irioshi, icantiri: 'Coajica inchoocataque pinchoviquiqueca

irimajirontajiajempaca ishiraerijia inquejetajempi aviatimpa. Aatoqueate namatavi-
jimpitsi, naroguentitari Irioshi.'

³¹ Tequerataguetei impochatanaje Quirishito itsata-
quero Taavini coramani, irootaquequeate itsavetacotantacarica irimetojaqueguetei aato

yovashiantajitiri ishire Areshiqui, ariqueate oquejetaca itsino iroatimpa aatoqueate
opatsajitsi. ³² Iriotaquetarite irira Jesoshi yovochantajica Aapani Irioshi, namena-
majajiaqueritarite maasano naatimpajia. ³³ Ariqueate yoguisavicajiri itincamijem-
pequiqui, yanaantamajataquequeate. Ariqueate yojocaqueneri Ishire icantaquerica

* 2:27 Areshiqui. Oraquea Areshi iroguenti ichooaqueguetei ishirejia metojajiatsica tequerataguetei impishoncaji-
teriji camorecariqui. Irira guiriego icanquero hades, iguenquetsatsarequi evereo icanquero sheol. ☆ 2:28 Sar.
16.8-11.

coramani irojocaqueneri cameetsanijite intigaranquimentaquerinijite acaniqui quepat-siqui inchoocashirentajiaqueri maasano tsaroventajigarica. Imaicaqueate imaica coraqueataquequeate, irootaquequeate maasano ocatica pamenajianaqueca aisa piquemajianaqueca, iriotaquequeate quejetacaaguecaro imaica. ³⁴ Iriraqueate Taavini teenicate irioqueate ogatsine jenoqui inquitequi, cotanquitsiquea icanti:

Iriraquea Majirontatsica Aapani Irioshi icanqueri Nomajirote:

‘Pisaviquetaja pisenampijaquenaja notincamijempequiqui,

³⁵ pintsipataquenaquea arejevaetanaquempa

nagavejajiaquerigueti maasano catsimajiaquempica, onquejevequemparo povanque-gontatsitempari.’

³⁶ “Imaica nonintaque antsamajiaquero maasano aatimpajia ishiraerijia: irira Jesoshi pompajacotacaantajiavetacaca ivochantajiri Aapani Irioshi, ipeacaavajari Amajirote, irisatiqueate Quirishito Meshiantatsica.”

³⁷ Iroompaqueate iquemajiaquerigueti ishimampojancajianaqueate, icantajiguiri Peerero aisa itsipapae itigarancanejia Jesoshi:

—Imaica, nogonorojia, ¿querocampa noncojiaquempani?

³⁸ Icantajiguiri Peerero:

—Povashiantajanajero pipeacaaguishetacaca pincantashitatianajempa. Poviñacajatacaantimentajiguempari Jesoquirishito ivajiroqui cameetsaniji irishetajempironijite Aapani Irioshi piguempevaere, irimaisantsitajempironijite. Ariqueate intigarancajiaquempi Ishire inchoocashirentajiaquempi. ³⁹ Ariqueate inquejetacaajiaquempi maasano aviatimpajia, jerijia maasano pinchoviquijianaqueca, aisa maasano osamanipaequitica. Arimaja inchoocashirentajiaqueri maasano inintacaajiaqueca Amajirote Aapani Irioshi.

⁴⁰ Irira Peerero arimpaqueate iquenquetsatanaque icantajiaqueriqueate otsipapae icanti:

—Paventajiguemparija aajivajempineca, aatonijite icatsimatimentimpiro Aapani Irioshi pigovaeguisher itsipatacaantimpiritsiquea covaeguishemajajatsica.

⁴¹ Iroompaqueate iquemajiaquerigueti Peerero iquenquetsaquegueti ishineventajianacaro icanquerica ariqueate iviñacajatacaantajia. Arimpaqueate yoshequiamajatanaquequeate tsaroventajigarica Jesoshi. Aricampa ivegarajia 3,000 iriaqueraca quemisantajanquitsi ocatica savincaguiteriqui. ⁴² Ogantaga isavicaventajiaquero iquemisantajiaquero itsatacaajiaquerica itigarancanejia Jesoshi, tee irovashiantajigueroji. Mana itsipatavacaaajia iquemavacaajia aisa yamanajiaqueri Aapani Irioshi. Jero aisa icotarejapinijiaquero pan ishecajiacaro iquenquejantajiajarica Quirishito imetojaventajiacajigueti.

⁴³ Irirajia itigarancanejia Jesoshi yantapinijiaqueneri caquintepae caarica inejajiti, aisa yantajiaquero oacaantantatsica intati itsatantacarica arimaja itsipatacari Aapani Irioshi. Mana yoajianaquequeate intati maasano. ⁴⁴ Iriraquea quemisantajiguirica Jesoshi itsipatavacaaajia iquemavacaajia, ipavacaajia yashintajiacaca.

⁴⁵ Yojocantaguequero taaca opajitapae yashintajia yaantajiacaro imentaquipae ipacaantagarantajiaqueri maasano coguitejacojianquitsica. ⁴⁶ Maasano savincaguiteri icapiocapinijia teemporoqui oniganquirequi. Ontaniquiquea tsovironaquipaequi itsipatavacaaajiaqueate ishecajia. Icotarejapinijiaquero pan ishecajiacaro iquenquejantajiacarica Quirishito imetojaventajiacajigueti. Ishecajiacagueti ishinejia tee iraventacojiguempaji. ⁴⁷ Iriguentitari ishineventajia Aapani Irioshi. Maasano caquinteja guintenijatsica oraniqui yamenajiaquerigueti iquejejia imaica, ishineventajianacariqueate. Maasano savincaguiteri iriraqueate Amajirote arimpaqueate ijatiri yoshequiamajatanakeri quemisantajiaquerica.

3

Yogueshijitajirigueti irira magovirosiri

¹ Otsipa savincaguiteri ariqueate irira Peerero aisa Joanca yoajianaque itoncoajianaque teemporoqui itsaroventantajitarica Aapani Irioshi. Ogantagatari ijaguitetanjigueti catsirincaiteri yoapinijiaque maasano joriojia yamanapinijiaqueri Aapani Irioshi.

² Ariquea oraniqui sotsiqui teemporoqui isavicaque irira magoviroshiri, igantagaqueate ivoacoquero imagoviroshica. Aritarite yamapinijiaqueri sotomorontsiqui icantajitica Cameetsari yoguisavicanajiri cameetsanijite iramanajivaqueri imentaquitsite quiijap-inijiatsica. ³ Iriatimpa inejajivaquerigueti Peerero itsipatacari Joanca inquijajipoje teemporoqui, yamanajavevari imentaquitsite. ⁴ Iriatimpajia yamenajianaqueri, ariquea icanque Peerero:

—Iintsija pamenajiguena.

⁵ Iriatimpa yamenajiaqueri yoguijacovetaca ijiqueji ariji irojocaqueneri imentaquit-site, ⁶ cotanquitsi Peerero icanti:

—Naatimpa ejempacona taampate nojocaquempi, tee inchoocatenica nomentaquit-site, cotanquitsi yagavejacaquena Jesoquirishito Nasarequitica nogueshitajempi intati, irootaquequeate imaica iintsija pincatianaje panijitanaje.

⁷ Ariqueate yacatsataqueri itincamijempequiqui yogatiaqueri. Ariquea icantapanajanti itampishitanaji iguitiqui aisa ishonquiriguitoqui. ⁸ Isapocanaque, icatiamajatana-jaqueate yanijitanaji. Ariquea yoguijajianaqueri Peerero aisa Joanca iquijajitanaque oticaacoroqui oniganquirequi teempero, ariqueate yanijinjivaetanaque itincotincovae-tanaquequea icantanaquequeate:

—Caaviji yoganejencamajata Aapani Irioshi.

⁹ Maasano yamenajivaquerigueti yanijitanaquegueti ishineventanacarigueti Aapani Irioshi, ¹⁰ ariqueate itsaroajianaque, mana yoajianaque intati, maasanotarite itsajiguiri isaviquigueti teemporoqui yamanantapiniquegueti imentaquipae ontaniqui osotomoroqui icantajitica Cameetsari.

Itsavetantaque Peerero teemporoqui

¹¹ Irira magoviroshiri yogueshijitajica ogantagaqueate quisho yoajiaqueri yajiricaji-queri Peerero aisa Joanca. Maasanoqueate ishiashiaitashitanacariqueate iriatimpajia ontaniqui oveshintaacagueti iniropoapae ocajaratsencoataquegueti icantajitica Irashi Saromoni.

¹² Yamenajivaqueri Peerero icanti: “Shiramparijia ishiraerijia, ¿quero ocotaca poan-tajianacaca intati? Iroguentica pijijiaqueji nocameetsamajati nogueshitantajarica irica. Aricampa pijijiaqueji nagavejashitaca intati nanijitacaantajarica. ¹³ Iriraquea Irioshite Averaameni, Ishaaconi, Jacovoni, Irioshite avaesatinite, iriguentiquea antaqueri oca, yonigaantaqueroquea iroganejencare Jesoshi Irijanite. Iriraqueate Jesoshi iriotaque-queate paacaantajavetacaca aviatimpajia, picantajiaqueri majirontatsica Pirato irime-tojacaantaqueri. Iriraqueate Pirato inintavecaqueate iroguipaquiijajerime, cotanquit-siqueate aviatimpajia tee pinintajigueji. ¹⁴ Pimanintajiaqueriquea irira Oganejencama-jatatsica Comajamajatatsica, iriguenti pinintajiaque iroguipaquiijajitajempiri meto-jantatsica. ¹⁵ Aritarite piquejejiaca imaica pimetojacaantajavetacari irira Anijacaantantat-sica, cotanquitsi ivochantajiri Aapani Irioshi, namenamajajajiritari ipochatanajigueti. ¹⁶ Iriotaque naventajianacaca ivajiroqui, irootaquequea itampishitantanajaca irica pa-menajiaqueca pitsajiaqueca. Iroguenti ogueshimajatantajarica iragavejane Jesoshi naventajiacarigueti ivajiroqui, pinejajiaqueroquea aviatimpajia maasano.

¹⁷ “Imaica nogonorojia, naatimpa notsataque pimetojajiaquerigueti Jesoshi teeni-cate pintsajigueriji iriguenti itigarancaqueca Aapani Irioshi. Ariquea iquejejiaca pimajirojiate tee intsajigueriji. ¹⁸ Cotanquitsi oquejetacagueti imaica mana in-etsanataquero Aapani Irioshi icantsitacarica coramani tsavetantirinica itsavetanta-guetaquero irantsipevaequempa Quirishito. ¹⁹ Irootaquequeate nocantantajiaque-mpica povashiantajianajero picovaeguishejiacagueti pincantashitatijaianajempa, pin-quemisantamajajigueri Aapani Irioshi cameetsanijite irishetajempiro piguempevaere. Ariqueate apojaquempa intampishitacaantajiaquempica iroguishinejantajiaquempica. ²⁰ Ariqueate aisa intigarancajajempiri Jesoshi, irira Quirishitotatsica. Iriotarite coramani inintacaitsitaquempica irimeshiajiaquempi. ²¹ Cotanquitsi irira Quirishito ogantaga inchoocaque ontaniqui jenoqui inquitequi arejevaetanajemparoquea irinet-sanaguetajerogueti Aapani Irioshi maasano. Irootaquetarite icantajiaqueca igoma-jamajarejia tsavetantajiguirinica coramani icantashirentajiaquerigueti Aapani Irioshi.

²² Icanquetarite Moishishini: ‘Majirontamajatatsica Pirioshite irogatiaquempiri choocatomojajerineca pigonorojia, impeacaaquempari tsvetantatsica camantajiaquempara icanqueca, inquejetaquena naatimpa. Taaca opajita incantajiaquempi pinquemisanqueri. ²³ Maasanotarite aatogueti iquemisantajigui interoncajitaqueri, aato itsipatajari igonorojia.’ ²⁴ Maasanoqueate tsvetantirica Aapani Irioshi itsvetantaguetaquero maasano pamenaguetaqueca imaica. Iriqueti mapocaquero tsvetantiririca Aapani Irioshi irira Samoirini. Ariqueate imajianaca impoiguatananquitsica. ²⁵ Oraqueate iquenquetsatacaquerigueti Aapani Irioshi Averaameni icanquerigueti: ‘Coajicani inchoocataque pinchoviquitaqueca, iriguentiquea noncavintsajacotantajiaquemparica maasanopae caquinteguatananquitsica quepatsiqui’, aviatimpajia iquenquejajiaque incavintsajajiaquempi, aviatimpajia aviguentijatarite ichoviquijia tsvetantajiguirinica. ²⁶ Iroompaqueate ivochantajirigueti Aapani Irioshi irijanite aviqueti itigarancajiaquene incavintsajajiaquempi cameetsanijite povashiantajanajeronijite piguempevaerejia.”

4

Icatsimajitaqueri Peerero aisa Joanca

¹ Choocatiraja iquenquetsajiaque Peerero aisa Joanca icoraquejiapojaque saserorotejia itsipajiacari imajirojiate coaretajia quempoguijajiguiroca teemporo. Itsipajiacari aisa saroseojia. (Iriatimpajia iriguenti cantajiatatsica aato itancorejajigui metojajiatatsica). ² Icatsimajiaapojaqueri itsajiaqueritarite itsatacaajiaqueri maasano intancorejajianaje oncoramanitapojajegueti metojajiavetanquitsica inquejejianajempari Jesoshi ipochatanajigueti. ³ Ariqueate yaajiaapojaqueri yaajianaqueri, cotanquitsi teequea incantajigueriji mana yoguijaajiaqueri santanaqui iroorijite tsitenijencaguitetanaque. Ariqueate osavincaguitetanaajegueti ariqueate incoacojiaqueri. ⁴ Cotanquitsi iconoagarantajia oshequi quemajiavaquerica Peerero iquemisantajiaque. Irirajia shirampari quemisantajanquitsica aricampa ivegarajia 5,000.

⁵ Iroompaqueate osavincaguitetanaajigueti icapiocajia aisa acaniqui Jerosarequi imajirojiate joriojia, itsipajiacari jivajiatsica jeri aisa tsatacaantiroca itioncacotanaqueca Moishishini. ⁶ Ariqueate ichoocaque saserorote anaantamajatanquitsica icantajitica Anashi, itsipajiacari Caipashi, Joanca aisa Arijantero. Aisa ari ichoocajiaque maasano ijtanejia. ⁷ Ariquea itigarancajiaqueri irajiaiquiteri Peerero aisa Joanca incoacojiaqueri. Ariquea yamajitaqueri isatecaciaqueri niganqui icantajiaqueri:

—¿Taaqueate agavejacaajiaquempi? ¿Taaqueate cantajiaquempi poganijitantajarica magoviroshiri?

⁸ Irida Peerero yagavejacaanaqueri Ishire Aapani Irioshi iquenquetsatacaajianaqueriquea capiocajanquitsica icantiri:

—Nomajirojiaca aisa jivajiatsica, ⁹ iroosacana picoacojiaquena quero nococa noncavintsajantacarica magoviroshiri, quero nocoquerini noganijitajirigueti. ¹⁰ Imaica noncamantajiaquempi catinca noajiaquempiro cameetsanijite pintsajiaque aviatimpajia aisa intsajiaquenijite maasano ishiraerijia iriguenti agavejacaquena Jesoquirishito Nasarequitica nogueshitantajarica ivajiroqui. Irida Jesoshi iriotarite pompajacojiavetacaca, cotanquitsi yovochantajiri Aapani Irioshi. ¹¹ Irida Jesoshi iquejetacaró mapi pimanintajiavetacaca aviatimpajia pantajiguirogueti mapipanco pivichajacotancarogueti mapi, cotanquitsi opeaja anaantamajatanquitsica quishotacaqueroca. ¹² Teequea inchoocateji itsipa aajiajavineca aatoniji apegá camorecariqui, teetarite onchoocatomateji otsipa vajirontsi ipajijitaquerica caquinte acaniqui isaviji quepatsiqui aventajiaquem-pameca irantajiajavajimeca, apaniro icanca Jesoshi.

¹³ Maasano imajirojiate iquemajiavaquerigueti iquenquetsatacaajiaquerigueti Peerero aisa Joanca yamenajiaquerigueti tee intsaroajigueji, mana yoajianaque intati, itsajiaqueritarite tee iranaantajigueji aisa tee intsamajajigueroji paperi. Ariqueate itsajianaqueri iriguentijia itsipajia Jesoshi. ¹⁴ Aritarite itsipajiacari irira magoviroshivetatsica catiaca iriatimpa ¡querocampate incantajigueri iriatimpajia! ¹⁵ Ariqueate yoguisotoacaantaqueri sotsiqui cameetsanijite inquenquetsatavacaquempa iriatimpajia. Ariquea icantajiguiri:

¹⁶ —¿Imaica quero ancojiaquerini? Maasanotarite Jerosarequitica iquemacojiaqueri yantajiaque caarica inejajiti. Aato agaveji acantajiguiri: ‘Tee irogueshitanteji.’
¹⁷ Iquemajiguetirotsiqueate. Iintsija imaica ancantimentajiguiri aatonijite itsavetantajajiri Jesoshi.

¹⁸ Ariqueate icajemacaantajiaqueri icantajiaqueri:

—Imaica aato pitsavetantimatajajiritsi Jesoshi, aato paventaro ivajiro, aato pitsatacaantiniri.

¹⁹ Cotanquitsiquea Peerero aisa Joanca yacajianaqueriqueate:

—Pamenerojate quero ininqueca Aapani Irioshi: ¿cameetsavaequempate nonquemisantajiaquempigueti aviatimpajia? ¿Iroompate irio Aapani Irioshi nonquemisantaque? ²⁰ Naatimpajia aato nagaveji novashiantajiguiri notsavetantajiaquero oca nonejajiaqueca aisa noquemajiaqueca.

²¹ Icantsijijaariqueate aisa:

—Aato pitsavetantajajiritsi Jesoshi.

Ariqueate yovashiantajajiri yamenajiaqueritarite querocampate incojiaquerini incatsimajiaquerigueti, maasanotarite caquinteja ishineventajiacari Aapani Irioshi itsajiaquerigueti yogueshitajiri magoviroshivetatsica, ²² iroorijite yajagantsitacovetanaca 40 ajagantsi magoviroshivetatsica.

²³ Iroompaqueate yovashiantajajirigueti yoajianaji ichoocajiaquegueti irapiguemisantarijiateni icamantajipojaqueri maasano icantajiaquerica saseroroteja anaantajanquitsica aisa jivajiatsica. ²⁴ Iroompaqueate iquemajiaquegueti, maasano yamanajiaqueri Aapani Irioshi icantajiguiri:

—Aapani Irioshi Majirontamajatatsica, avirotarite peacaaguetacaroca inquite, quepatsi, quentija aisa maasano choocatantajigaroca. ²⁵ Pitigarancaqueri Pishire quenquejacaquerica paajanire Taavini novaesatiniteni, picanquequea ivagantequi:

¿Quero ocotacani icatsimatantajiacaca caquinteguetatsica?

¿Quero icojiacani isariajavecaro taaca opajitapae teeca oncameetsateji?

²⁶ Irirajia majirontajiatatsica quepatsiquitica aisa iramajiroreja caquinteguetatsica

icapiocaventajiacari icatsimajiaqueri Majirontamajatatsica aisa Quirishito icoguaqueca.

²⁷ Tampatica oanaquero picanqueca icapiocantajiacarica Erorishi aisa Pontsio Pirato itsipajiacari teeca irijorijoigueji aisa ishiraerijia iquemavacaajiaca irimetojajiaqueri Pirijanite Jesoshi Oganejencatatsica pinintacaaqueca impeaquempa Meshiantatsica. ²⁸ Coramani pitsatsitaca picantsitacaqueate: ‘Aritaquequeate oncoquempani.’

Ariqueate imaica inetsanataquero irintapae. ²⁹ Imaica, Nomajirote, pinquenquejiaquero maasano icantajiaquenaca icatsimajiaquenagueti. Pagavejacaajiguena naatimpajia pomperaneja aatonijite notsaroguitsi nontsavetacojiaquerogueti picanqueca.

³⁰ Pagavejacaajiguena naventajiacarogueti ivajiro Pirijanite Jesoshi teeca inquempevaetimatempaji, cameetsanijite nogueshijajeri ashinoncajajiatsica, aisa nantajiaquenijite cantashitatiaguetanquitsica caarica inejajiti intsatimentajiquerinijite caaviji yagavejamajati iriatimpa.

³¹ Iroompaqueate yagajianaquitigui yamanaquerigueti Aapani Irioshi, ariqueate ocotanaca omoguecanaque tsovironaqui, yagavejacaamajajianaqueri aisa Ishire Aapani Irioshi. Iriatimpajia ariqueate itsavetantajianajiro aisa Iguenquetsatsare Aapani Irioshi teequeate intsarajajajiji.

Icavintsajavacaajiacagueti quemisantajiatatsica

³² Maasano quemisantajiatatsica itsipatavacaajiaca iquemavacaajiaca. Taaca yashintajia tee irimashitsatapitsatavacaajiguemparoji, tee incanteji: “Apaniro nashinquemparojia naatimpa”, mana ipavacaajiaca intati. ³³ Irirajia itigarancaneja Jesoshi arimpaqueate itsavetantamajajianaqueri ipochatanajigueti, yagavejacaajiaqueritarite Aapani Irioshi, aisa yoguishinejamajajianaqueri. ³⁴ Tee inchoocajiajeji coguitejacojianquitsica, maasanotarite choocajianquitsica iguepatsijiate aisa itsovironaquiijiate yojocantaguequero yaantajiacaro imentaquipae. Ariqueate yaajianaqueneri ³⁵ itigarancaneja Jesoshi cameetsanijite irojocajiaqueneri maasano coguitejacojianquitsica.

³⁶ Ariquea iquejetaca irira Jose poneatsica Tsiperequi, iriguenti ichoviqui Irevi. Iriiraqueate itigarancanejia Jesoshi ariquiteate ipajijajiri aisa Verenave ocantiqueate Oguishinejantatsica. ³⁷ Iriatimpa yojocantaquero iguepatsite yaancaro imentaquipae. Ariquiteate yaajianaqueneri itigarancanejia Jesoshi.

5

Yamataajiacaguete Ananiashi aisa Sapira

¹ Cotanquitsi chooca itsipa icantajitica Ananiashi itsipatacaro imanquigare Sapira yojocantavetacaro iguepatsite ² yaantajivetacaro imentaquipae, cotanquitsi iquemava-caajiac ariquee yaagarantavetavaja iriatimpa iriraquea choocapojajatsica yaavetanacariquiteate itigarancanejia Jesoshi quejevetacaqueate jocaguetaquenerica maasano.

³ Cotanquitsi Peerero icantavaqueri:

—Ananiashi, ¿quero ocotaca piquemisantantacarica Satanashi pinintantavetacaca pamatavijaquerime Ishire Aapani Irioshi paagarantantavajaca imentaquipae ivegarajitaquempirogueti piguepatsiteni? ⁴ ¿Arimpate tee aviguenti ashintamajatemparone iroaqueraguete? Ariquiteate oquejetaca imaica pojocantaqueroguete, ¿arimpate tee aviguenti ashintemparine pimentaquitsitepae? Aatotarite piquejetiro imaica, teenica apaniro pamatavijigueme caquinte, aisa iriguentiqueate pinintavetaca pamataviterime Aapani Irioshi.

⁵ Iroompaquea iquemavaqueguete Ananiashi, ariquee iquenaque itejanaque imetojanaque. Maasano quemacojiavaquerica itsaroajianaque. ⁶ Ariquee iquijaquijaipoji iriaqueraca quenquevarijiananquitsi yaajianaqueri yampiguiricacojianaqueri yaajianaqueri inquitajiguete.

⁷ Iroompaqueate osamanipojaqueguetequea ocoraquevepojaca imanquigare oquijapojaque, teequeate ontsateji imetojaqueguete manquigavetaronica. ⁸ Irira Peerero icantavaquero:

—Iintsija pincantena, ¿arimaja yojocaquenari manquigatimpica maasano imentaquipae paantajiacaca piguepatsite?

Iroatimpa ocanti:

—Jeejeguitatsi, arimajaguitatsi yojocaquemperi maasano.

⁹ Icantiroquea Peerero:

—¿Quero ocotacani piquemavacaantacaca pamatavijajiguerime Ishire Aapani Irioshi? ¿Ari pijiqueji aato icatsimatimentimpro? Coraquetapojaque quitajijatirica manquigavetimpinica, imaica aviroqueate inquitajijate.

¹⁰ Iroompaqueate icanquitiguero ariquee oquenaque otejimotanaqueri ometojanaque. Ariquee iquijaquijaipojaque quitajijatirica manquigavetaronica inejajapojiro iroatimpa metojaque. Irooquea yaajianaquero iquitajijatiro ichooaqueguete manquigavetaronica. ¹¹ Maasano quemisantajiatatsica choocajianquitsica acaniqui aisa maasano quemacojiaqueroca itsaroajianaque.

Itigarancanejia Jesoshi yogueshijajiri oshequi joquijijavetanquitsica

¹² Irira Aapani Irioshi yagavejacaajiaqueri itigarancanejia Jesoshi yantimojiaqueri caquinte caarica inejajiti intsatimentajiquerinijite caaviji yagavejamajati iriatimpa. Maasano quemisantajiguirica Jesoshi icapiocajiac teemproqui oveshintaacaguete iniroopapae ocajaratsencoataqueguete icantajitica Irashi Saromoni. ¹³ Irira itsipajia itsaroajianaque inconoajiaquempariguete cotanquitsi ishineventajiacari.

¹⁴ Arimpaqueate yoshequiamajatatiguinimaja quemisantajiguirica Amajirote, shiramparijia aisa manquigarentsija. ¹⁵ Yamenajivaqueriguete yantajiaquetaqueca, yaantajanacarica ashinoncajajiatatsica quenavoquirontsiqui yoguinorijaqueri inorijantajiguetaqueca, yoguijacajiaqueri Peerero cameetsanijite iroocampa ontsimanquimentajiaquerinijite ivaantorite iriveajanajempanijite. ¹⁶ Ariquiteate iquejejiaca poneaguetanquitsica oquempejiqueguete Jerosare yamajiaqueneri yashinoncajajiatatsica aisa yatsipetacaajiacaca ampatsini, maasano ivejajanaja.

Saserrotejia anaantajanquitsica icatsimajianaqueri itigarancanejia Jesoshi

¹⁷ Cotanquitsi irira saserorote anaantamajatanquitsica, jerijia saroseojia tsipamajajigarica arimpaqueate icatsimajianaqueri itsajiaqueritari ishineventajicari.

¹⁸ Yaacaantajiaqueri itigarancanejia Jesoshi, yashitacotacaantajiaqueri santanaqui.

¹⁹ Cotanquitsi ariqueate onianquitepojaquegueti icoraquetashijiaqueri irashivantite Amajirote yashirejapojaqueneri ashitacorontsi, yoguisotojiaaqueri, icantavajiri:

²⁰ —Pija, pincatiapojaje oniganquirequi oticaacoroqui teemporo, pincamantajiguero maasano quero incojiaquempani incoguitempaniniji iranijaje.

²¹ Iriatimpajia iquemajiavaque, ariqueate osavincaguitetamanaquegueti yoajia-manaque teemporoqui itsitijianaquero itsatacaajiapojajiri.

Cotanquitsi irira saserorote anaantamajatanquitsica aisa itsipajiacca tequerata intsajigueriji. Icajemajiaqueriqueate imajirojiate ishiraerijia jerijia jivajiatsica. Iriatimpajia itigarancajiavetacari oanantquitsineca irajiaquiterime ontaniqui yashitacojiavecariguete, iramajiaqueneri iriatimpaqui. ²² Cotanquitsi yoajiavetanacaqueate coaretapae, tee anejeriji. Ipijajia icamantajiaqueri, ²³ icantajiapojaqueri:

—Noajiavetanaca namenajiavepojacaro ashimajatatacanta. Iriaquea amenajiaquerica timashijiaque sotorontsiqui aatoniji isotoajigui, cotanquitsi nashirejajiavetacaro cajaraguitevaetaque intsompogui.

²⁴ Iroompaqueate iquemajiavaquitigui imajirote coaretajia quempoguijajiguiroca teemporo, jerijia saserorotejia anaantajianquitsica, mana yoajianaque intati icantava-caajianaca:

—¿Querocate icojiacani?

²⁵ Ariquea icoraquepojaque aparo icampojiri:

—Iriira pashitacotacaantajiavetacaca chapinqui arimpate chooca itsatacaantajiaque oniganquirequi oticaacoroqui teemporo.

²⁶ Ariqueate icamevaquegueti imajirote coaretajia itsipajianacari igoaretatepae yoajianaque cameetsaqueate yaajiajatiri, itsaroajiaquetarite itsinacajitiritsi.

²⁷ Yamajiapojaqueri yogatijiapojaqueri icapioacajiacaguete. Ariqueate iquenquetsataque saserorote anaantamajatanquitsica icanti:

²⁸ —Nocamantamajiavetaquempi povashiantajianajero, aatoja pitsavetantajiajirotsi yantaguetaqueca Jesoshi. Cotanquitsiquea pitsitacaguetejaquero Jerosare pitsavetantajiaquero pitsatacaantane, mana pinintajiaque incantacojiaquena: ‘Iriguenti metojacaantajiaquerica Jesoshi, mana iquempevaejiaca.’

²⁹ Iquenquetsajianaque Peerero jerijia aisa itsipajiacaca itigarancanejia Jesoshi icantajigui:

—Iriquetimpa nonquemisantamajajiaque Aapani Irioshi. Incanqueguete caquinte otsipasato, aatoqueate noquemisantajiguiritsi. ³⁰ Arimajatarite pimetojacaantajiavecari Jesoshi pompajacotacaantajiavetacari coroshiqui, cotanquitsi yovochantajiri Irioshimajaca itsaromentajiganica avaesatiniteni coramani. ³¹ Yoguisavicajiri itincamijempequiqui, imajirontacaacari aisa ipeacaacari Meshiantatsica, cameetsanijite incantashitatijianaquempa ishiraerijia irovashiantajianaquero yantajiguica teeca oncameetsateji, cameetsaniji irishetajenerinijite Aapani Irioshi iguempevaejeja, irimaisantajeronijite. ³² Namenamajiaqueritarite notsavetantajiacarica. Ariqueate iquejetaca Ishire Aapani Irioshi itsavetacoqueri, iriotarite iriguenti itigarancaqueca Aapani Irioshi inchoocashirentajiaqueri maasano quemisantamajajiguirica.

³³ Iroompaqueate iquemajiavaqueriguete opejaianaqueri itsimajenca, inintajiavetaca irimetojajiaquerime. ³⁴ Cotanquitsi ariqueate ichoocataque acaniqui pariseo icantajitica Gamarieri, yamenajiaqueriqueate igonorojia caaviji icameetsati. Iriatimpa iriguenti tsatacaantantiroca itioncacotanaqueca Moishishini. Icatiimojianacariqueate majirontajiatitsica, icantiri itsipa:

—Paajianaquerita sotsiqui capichajaniqui.

³⁵ Ariqueate icantiri capioacajianquitsica:

—Shiramparjia ishiraerijia, inchiqiojia pimetojajiguiritsija. Iroquete pinquenquejamajiaque. ³⁶ Pinquenquejajiajero coramanitica ichoocavetacaguete Teorashini inintavetacaguete iranaantaquemequeate yoguijajiavetanacari oshequini caquinte, aricampa icarajiaque 400. Cotanquitsi teequeate iragavejeji, mana imetojajiaqueri.

Irira oguijavietanacarica ariquea yoayoaitanaji, teequeate intsipatavacaajijempaji.
³⁷ Ariqueate oquejetaca aisa coramani itioncacotacaantajiaquerigueti majirontatsica irajaanire intsataque querocaca ivegaracani maasano, choocaqueate itsipa, irira Garireaquitica icantajitica Jorashini. Iriatimpa inintavetaca iranaantaqueme inquejetaquemparime Teorashini. Ariqueate iquejetaca iriatimpa yoguijavietanacari oshequini caquinte, cotanquitsi iroompa imetojajitaquerigueti ariqueate iporocajianaque oguijavietarica. ³⁸ Irootaquequeate noncantantajiaquemica imaica ariotaque icoca irirajia, povashiantajiajeri aato picantajiguiritsi. Maasano itsatacaantaqueca inchiquiojica yaashijiacaro intati iriatimpajia, inchiquitsi ompeashitanajempa. ³⁹ Cotanquitsi iriguentigueti tigarancaqueri Aapani Irioshi intsatacaantantajiaque querocate pincoji-aquerini. Aatoshiatsi picatsimamanatiritsija Aapani Irioshi.

⁴⁰ Iroompa iquemajiaquerigueti icantajiguiri:

—Iroosacanicate cameetsavaeque.

Ariqueate icajemacaantajiajiri itigarancanejia Jesoshi, ipasatacaantajiaqueri. Ariqueate yoguipaquijajiajiri icantajiaqueri:

—Aato pitsavetantimataji ivajiroqui Jesoshi.

⁴¹ Ariqueate isotosotoitanaji icapiocaventajiacarigueti majirontajatsica, yoajianaji ishinejianaja itsajiaquetarite ishinevencari Aapani Irioshi, iriguentitarite yatsipeventajiacarica Jesoshi. ⁴² Maasano savincaguiteri itsatacaantapinijiaque ontaniqui oniganquirequi oticaacoroqui temporo aisa tsovironaquipaequi, teequea irovashiantajigueroji, itsavetantajiaqueri Jesoshi, icanti iriguenti Quirishito.

6

Icoguiaque 7 amitacotantanquitsineca

¹ Ariqueate yoshequiamajatanaquegueti quemisantajatsica, ariqueate itsitijianaquero irirajia quenquetsatantacaroca guiriego inijashijianacariqueate irirajia quenquetsatantacaroca evereo, icantajiaquequeate:

—Maasano savincaguiteri icavintsajajiaquerogueti metojacoguetanquitsica, tee iran-tajigueji cameetsa, teenicate irojocamajajiguenero oshecajia agonorojia.

² Irirajia itigarancanejia Jesoshi carajianquitsica 12 icapiocajiaqueriqueate maasano quemisantajatsica icantajiguiri:

—Teenicate oncameetsateji novashiantajianaquero notsavetantajiguerogeti Iguenquetsatsare Aapani Irioshi irooqueate nantajiaque nojocapinijiaquenero oshecapae.

³ Irootaquequeate, napiguemisanterijiate, noncantantajiaquemica imaica pincoguijague 7 tsamajajatsica irira comajamajajianquitsica ichoocashirentamajajiaqueca Ishire Aapani Irioshi cameetsanijite irionijite savicaventajiaquerone irojocantajiaque.

⁴ Naatimpajia manaqueate ogantaga nosavicaventajiaquero namanajiguero Aapani Irioshi aisa nontsavetantajiaquero Iguenquetsatsare nontsatacaantajiaquero.

⁵ Iroompaqueate maasanoqueate ishineventajiacaro icantajiaquerica. Icoguiajiaqueriquea Ishitivano, itsajiaqueritarite iquemisantamajataque aisa ichoocashirentamajataqueri Ishire Aapani Irioshi. Ariqueate icoguiajiaqueri aisa Jeripe, Porocoro, Nicanori, Timo, Parimenashi, jeri aisa Nicoraashi. Irira Nicoraashi ariguenti iponeaca Antioquiaqui. Tee irio jorio cotanquitsi yoguijatacotaqueri joriojia itsarotentacariqueti Aapani Irioshi. Imaica iquemisanqueri Jesoshi aisa. ⁶ Ariqueate icantajiguiri itigarancane Jesoshi:

—Jeri iricatica.

Ariqueate iriatimpajia ipamijiaqueri yamanajiaqueri Aapani Irioshi impeacaimenquemparinijite amitacotantajanquitsineca. ⁷ Arimpaqueate otsitacacovaetanacaroni Iguenquetsatsare Aapani Irioshi Jerosarequi, iquemantajiavacaroca oshequini. Arimpaqueate ijatiri yoshequiamajatanaque quemisantajatsica. Imajianacaqueate oshequini saserorotejia iriatimpajia iquemisantajianaque.

Icatsimajitaqueri Ishitivano

⁸ Irira Ishitivano iriguenti caaviji icavintsajamajataqueri Aapani Irioshi, yagaveja-caamajataqueri, yonigaaguetaqueri irapijoriojiate ni teeca irinejajiguetaji, intsatimentajiaquerinijite iriguenti agavejacaqueri Aapani Irioshi. ⁹ Cotanquitsi choocaqueate ontaniqui shinagoga icapioicapinijiacaguete jorio ipimantajivetaca coramani cotanquitsiqueate yovashiantajiri aavetacarica. Ariqueate iconoagarantajiacari iriatimpajia itsipajiacari ponejiaanquitsica Shirenequi, Arejantiriaqui, Shirishiaqui, jero aisa Ashiaqui, yoashijianaqueri Ishitivano incatsimajigueri. Iriatimpajia icapioaventajiacari icatsimajiaqueri. Irooquee icanti, irooquee icanti, ¹⁰ cotanquitsi teequeate iragavejajigueriji iroguemisantajigueri, caavijitarite itsaque, iriguentitari tsatacaqueri Ishire Aapani Irioshi. ¹¹ Irootaquequeate yojocantacarica imentaquipae itsipa caquinte cameetsanijite iramataajiaquempa. Iriatimpajia icantajiaque:

—Noquemajiaqueri inijashinatari Moishishini, ariqueate iquejetaqueri Aapani Irioshi iriatimpa.

¹² Iroompaqueate iquemajiaqueguete maasano opejaianaqueri itsimajenca, ari iquejijanaca irirajia jivajiatsica aisa tsatacantajiguiroca itioncacotanaqueca Moishishini. Yaajianaqueri yamajianaqueri ichoocajiaqueguete imajirojiate. ¹³ Ariqueate icajemajiaque itsipa amataajianquitsica icantajiaqueri:

—Iricatica iroguenti ichoocavenque inijashinatacaro ocatica teemporo yashintacaca Aapani Irioshi aisa inijashinatacaro itioncacotanaqueca Moishishini. ¹⁴ Noquemajiaqueritarite icanqueguete: ‘Irraqueate Jesoshi Nasarequitica irisoveaquero teemporo, aisa irogaaguetaquero maasano itsatacantinica Moishishini.’

¹⁵ Irira capiocaventajiacarica yamenajiaqueriqueate inejajiaqueriqueate ivoroqui Ishitivano quejetaca ivoro irashivantite Aapani Irioshi.

7

¹ Ariquee irira saserorote anaantamajatanquitsica icantiri Ishitivano:

—¿Arimaja piquejetaquero imaica?

² Iriatimpa icantiri: “Imaica nogonorojia aisa jivajiatsica, iintsija pinquemisanta-jiaquena noncamantajiaquempiguete. Coramani itsariventajiacari avaesatinijiateni Aapani Irioshi Oganejencamajatatsica, ariqueate noquejetaca naatimpa aisa notsaroventacari. Choocatirajaguete Averaameni Mesopotamiaqui tequerataguete iroanaqueji ontaniqui Jaranequi, yonigaacari Aapani Irioshi, ³ icantiri: ‘Pija povashiantanaquero piguinteni, povashiantajianaqueri pijitaneja, poanaquequeate otsipaque quepatsi nonigaaquempica.’ ⁴ Ariquee icatianaca Averaameni yovashiantanaquero iguepatsite Carereaqueitica, yogaanaja Jaranequi, iguintenipoja ontaniqui. Oraquee imetojanaqueguete iriri, ariqueate itigarancaqueri Aapani Irioshi icoraquequequeate acaniqui piguintenijiacaguete imaica. ⁵ Cotanquitsi tee irojocamajatenijite quepatsi, teenicate irashintemparoji capichaji, cotanquitsi icashiaacari icantaqueriqueate: ‘Pimetojanaqueguete irioqueate ashintajemparone pinchoviquijianaqueca.’ Oraqueate icashia-caacariguete tequeratanica iroacaantenica, ⁶ cotanquitsi icanqueri: ‘Irirajia pinchoviquijianaqueca mana iriguintenitantajiaquemparo iguepatsite itsipajia. Iromperaperaajitaquempari intati, aato ivegaratiri. Irantsipetacajiaquempari aavaetanaquempa 400 ajagantsini. ⁷ Cotanquitsi naatimpa noncatsimatimentajigueri maasano omperajiacarica intati. Ariqueate irovashiantajiajeriguete incoraquejiaje acaniqui intsariventajiaquena.’ ⁸ Icanqueri aisa: ‘Noninque imaica intotsaiquijiquero pichonquimashi aisa ariqueate iroguijatacojiajeroqueate maasano pinchoviquijianaqueca cameetsanijite inquenquejiaqueronijite nocanquempica aisa cameetsanijite ironigaaquenanijite arimajaqueate inintamajataque inquemisantaquena. Ariqueate naatimpa nashintajiaquempari noncavintsajajiaqueri pinchoviquijianaqueca.’ Irootaquequeate yoacaanqueriguete Ishaaco iroompaqueate aapojacaguete 8 savincaguiteri itotsaiquitaqueri ichonquimashi. Ariqueate iriatimpa Ishaaco yoacaanqueriguete Jacovo imaqueri iriatimpa. Ariqueate iquejetaca Jacovo itotsaiquitaqueri ichonquimashijia irijanijiate. Irraqueate irijanijiate ivegarataca 12 iriojitarite choviquijiacajica maasano aatimpajia.

⁹ “Apaniro irijanite Jacovo ipajita Jose. Iriraqueate iriguentijeguijiate icantajigui: ‘Yanajajaitsi coajica’, irootaquequeate icatsimatimenquerica yojocantantacanicarica iromperataquempari Ejepitoquitica. Cotanquitsiqueate itsipatacari Aapani Irioshi, ¹⁰ yompetanacari yatsipetacaguete, irootaquequeate ishineventantacanicarica imajirote Ejepitoquitica icantajitica Paraone. Yamenaqueri iriguenti tsamajatatsica irootaquequeate ipeacaantajarica iriatimpa iquejemajirontantajarica imajirontantajarica maasano Ejepitoquitica aisa iconoajiaca Paraone. ¹¹ Ariqueate yatsipetanaca itase maasano Ejepitoquitica aisa Canaanequitica, maasano avaesatinijiateni, querocampate irajaijaero isheca. ¹² Ariqueate Jacovo itigarancajiaqueri irijanitepae Ejepitoqui iramanantajiaquitequeate isheca, iquemacojiaqueritarite iriguenti choocatacojianquitsi tirigo itseraiquijiaquero tsovironaquipaequi itsotejiacaro iriatimpa irishecacajajempaca coajica onteroncaguetanaquempaguete maasano. ¹³ Coajica yoajianajiquea aisa iramanajiaquiteri isheca, ariquea icantajiaqueri Jose: ‘Naroguentitarite piguentijeguite’, itsatantacanicarica Paraone queri oacaantirica Jose. ¹⁴ Ariquea Jose icajemacaantaqueri Jacovo iriri, jerijia aisa maasano ijitanejia. Maasano icarajiaque 75. ¹⁵ Yoantanacaca Jacovo iguintenitapojaca Ejepitoqui. Ariquea ontaniqui imetojanaji. Ari iquejejianaca maasano irijanijiate, irirajia choviquijianacajica, imetojajiaque ontaniqui. ¹⁶ Ariquea yaajitanajiri ontaniqui Shiquemequi, yojoquijijitapojajiri omoroqui yojoquijitantajitarica metojatsica, irootarite ivegaraqueca coramani Averaameni yamanajiaqueriguete irijanijiate Amore Shiquemequi, yojocaqueneri imentaquitsite.*

¹⁷ “Ariqueate pajiniguete aapojempa irinetsanatantaquemparoca Aapani Irioshi icanquerica Averaameni coramani icantaqueriguete irovashiantajiajeri omperaperaajivecarica inchoviquijiaqueca, ariqueate yoshequijajianaquequeate avaesatinijiateni ontaniqui Ejepitoqui. ¹⁸ Ocoramanitapojajiguete yoshequijajianaqueguete, ariqueate imajirontaja Ejepitoqui itsipa teeca inquemacoteriji Jose. ¹⁹ Iriotaquequeate amatavijajivecarica avaesatinijiateni, yatsipetacaajiacari, ipishoncacaajiaqueri irijanijiate iriaqueraca voaguetanquitsi cameetsanijite irimetojajiaque aatonijite yoshequiguetsi. ²⁰ Irootaquequea ivoantacaca Moishishi. Irira Aapani Irioshi ishinevencari. Ocarataque 3 taai iquemoguijajitaqueri itsovironaquitequi iriri. ²¹ Cotanquitsiquea aapojacaguete yojoquijitantajitacanicarica sotsiqui irimetojeme, aaqueriqueate irorijanite Paraone, oguimoncaqueri aajanacari oquejetacaacari irijanijimate. ²² Itsatacaajitaqueriqueate Moishishi maasano itsaguetica Ejepitoquitica. Cameetsaqueate iquenquetsataque, itsamajaguetaqueroqueate taaca opajitapae yantaguetaqueca.

²³ “Ariqueate ovegaratacaguete irajagantsite Moishishini 40, iquenquejanaque iroanaque irinejeri igonorojia, ichoviquijiani Ishiraerini. ²⁴ Inejapojaquequeate apaniro yatsipetacaacaca Ejepitoquitica, ariqueate ipigamempojiri Moishishini, imetojaqueriqueate Ejepitoquitica. ²⁵ Ijiqueji ariji intsajivaqueriji igonorojia iriguenti tigarancakeri Aapani Irioshi iramijiaqueriqueate irajaianajeri, cotanquitsi iriatimpajia tee intsajivaqueriji. ²⁶ Osavincaguitetanajiguetequeate inejiri mavite igonoro taviavacaaca. Inintaveca irogameetsajiajerime icantiri: ‘Shirampari, pigonorontavacaaca; ¿querocate pincantempaji pitaviavacaantaca?’ ²⁷ Iriraqueate taviaquerica itsipa itatsinquiriqueate icantiri: ‘¿Taampate cantaquempi pimpeaquempa nomajirojiate cameetsanijite pincantomajajiaquena? ¿Taampate peacaquempi nojoesete?’ ²⁸ ¿Aricampa pinintaque pimetojaquena naatimpa pinquejetacaguena Ejepitoquitica pimetojaqueca chapiniqui?’ ²⁹ Iroompaqueate iquemavaqueguete Moishishi ishianaca yoanaque otsipaqui quepatsi icantajitica Mariane. Ariqueate ichoocapoji ontaniqui iconoajiacari itsipapae. Yaapojaque imanquigare, yoacaanquequeate mavite shirampari.

³⁰ “Ariqueate anaapojacaguete 40 ajagantsi, ichoocaqueguete Moishishi oquitamampororoipojaqueguete quempejitacoquero otsempi Shinai yonigaacari irashivantite Aa-

* 7:16 Jen. 50.7-13 ocanti yojoquijitajiri Jacovoni omoroqui morotashitatsica Macaperaquitica yashintavecaca Eperoneni (Jen. 49.29-32). Irootaque ivegarataqueca Averaameni. Josoe 24.32 ocanti iriraquea Joseni iriotaque yojoquijitajica Shiquemequi quepatsiqui ivegarataqueca Jacovoni (Jen. 33.18-19).

pani Irioshi. Ichooatantacaro inchatojaniqui maequitatsica, omorecanaque more, more, more, more. ³¹ Yamenaquerogueti Moishishi, mana yoanaque intati. Iquempejive-tapojaca iramenamajaquero, iquemaitatiguiri iquenquetsatanaque Amajirote, icanti: ³² ‘Naroguenti Irioshite pivaesatinijiate. Naroguenti Irioshite Averaame, Ishaaco aisa Jacovo.’ Ariqueate icanquiti Moishishi soroc itsaroamajatatiguinimaja yompi-oncanacaqueate pion, pion, pion, tee iramenajeroji capichaji. ³³ Ariqueate icantiri Aapani Irioshi: ‘Pasaterejanauempari pigaviguitire, picatiantacarotarite noganejenca-guitere. ³⁴ Naatimpa namenajiaqueri nashintajiacaca choocajanquitsica Ejepitoqui yatsipejiacagueti, aisa noquemajiaqueri icajemajiaquegueti, irootaquequeate nagui-jitashitantapojarica naajiajeri namitacojiaqueri cameetsanijite irovashiantajiajeri at-sipetacaajiacarica. Imaicaquea nontigarancaquempi pimpianaje Ejepitoqui.’

³⁵ “Iriotaquetarite irira Moishishi imanintajiaqueca icantajiavecarigueti: ‘¿Taampate cantaquempi pimpeguempaja nomajirojiate cameetsanijite pincantomajiaquenani-jite? ¿Taampate peacaquempi nojoesete?’ Imaica noncantajiaquempi iriotarite itigarancaqueca Aapani Irioshi impeaquempa imajirojiate aajianajerineca. Iriguenti-tarite tigarancaqueri irashivantite Aapani Irioshi yonigaacarigueti inchatojaniquiqui maequitatsica. ³⁶ Oraqueate ontaniqui Ejepitoqui yantaguetaque Moishishini oshequi teeca irinejajiteji intsatimentajiaqueniji iriguenti Aapani Irioshi amitacojiaquerica, ariqueate yaajianajiri avaesatinijiate. Ariqueate iquejetaca aisa ontaniqui Quentijani Quityoncajaroqui aisa ontaniqui oquitamampororoipojaquegueti yantaguetaque oshe-qui teeca irinejajigueteji. Ovegarataca 40 ajagantsi yantapinguetaquero. ³⁷ Iriotaqueate Moishishini iriotarite cantajiaqueri ichoviquijia Ishiraerini: ‘Intigarancajempi Aapani Irioshi pigonoro tsavetantaquerineca, inquejetaquena naatimpa.’ ³⁸ Iriotaquetarite Moishishini tsipajiacarica avaesatinijiate ontaniqui icapiocajiacagueti oquitamamporo-roipojaquegueti. Aisa itsipatacari irashivantite Aapani Irioshi quenquetsatacaquerica otsempiqui Shinai. Iriotaquequeate quemavaqueroca quenquetsatsarentsi oganijan-tatsica, yogaajiacajiro aatimpajia atsatantajiacaroca imaica. ³⁹ Cotanquitsi irira avae-satinijiateni imanintajiaqueri teenica irinintajigueti inquemisantajigueri manaqueate intati ipintsapintsajianaja Ejepitoqui. ⁴⁰ Icantantajiacarica Aaronini: ‘Panteshiatsi irioshijiate itsipapae cameetsanijite irionijite jivajianajineca. Iriovetaca Moishishi aaji-avetajajica ontaniqui Ejepitoqui, cotanquitsi tee antsateji taa opajita oaqueri, ari ipeaca.’ ⁴¹ Ariqueate yantajiaque iriatimpajia irioshivijitashicaca iquejetacaacari caapironcaari iriaqueraca quimogantirenajaniquitanquitsica. Ariqueate imetojajiaqueneri viratsipae itajajiaqueneri ishinevaejiaca, ishineventashijivacetacari yantajiaqueca. ⁴² Ariqueate yovashiantajianaqueri Aapani Irioshi intsaromentajiguemparita catsirincaiteri, taai, impoquiropae. Itioncacotaquerotarite coramani tsavetantatsica itioncacaquerigueti Aapani Irioshi icanti:

‘Aviatimpajia ishiraerijia,

pimetojajiaquegueti viratsipae pitajiaaquerigueti pichoocajiaquegueti ontaniqui oquita-mampororoipojaquegueti 40 ajagantsi

¿arimpate naroguentimpa pojocajiaquene pitajiaaquene?

⁴³ ¡Teequeate!

Iriguentitarite pishineventajia pirioshivijitashitaca icantajitica Moroco,

irootaquequeate querocagueti poajianaque paajianaquero tsovironaqui ichooatancaca.

Aisa pishineventajiacari impoquiro irashi pirioshivijitashitaca icantajitica Irepana.

Iriojia pantajiaqueca pintsaromentajiaquempaca.

Irootaquequeate naacaantantajiaquempica irajaitanaquempi osamani anaacagueti Vavi-ronia.’

⁴⁴ “Ariqueate ontaniqui oquitamampororoipojaquegueti irira avaesatinijiateni itsaromentantacariqueate Aapani Irioshi quitsaarentsivanco oraquea ochoocatantaca itioncacaqueca Aapani Irioshi ontaniqui Shinaiqui. Ariqueate iquejetacaajiacaro icanquer-ica Aapani Irioshi Moishishini yonigaquerigueti quero incojiaqueroni. ⁴⁵ Ariqueate

imetojanajigueti Moishishini, irioqueate pijaari Josoe itsipajianajari avaesatinijiate icoraquetashitajiro ocativa quepatsi icashiacaajiacarica Aapani Irioshi coramani, yaajiana-jiroqueate iitsaarevanco. Ariqueate yarejerejeivetapojacagueti inejajipojaqueri teeca iriojia joriojia guintenijiavetatsica acaniqui, cotanquitsi ariqueate yoguishiiajaqueri Aapani Irioshi cameetsanijite irojocajiaquenerinijite irionijite ashintajiajemparone. Ogantaga ochoocaque iitsaarevanco Aapani Irioshi arejevaetapojacaro ichoocaquegueti Taavini. ⁴⁶ Ariquea irira Aapani Irioshi ishinevencari Taavini, icavintsajaqueri. Ariqueate iriatimpa inintavetaca irantaquenerime tsovironaqui inchoocantatuempaca Aapani Irioshi itsaroventacaca Jacovoni. ⁴⁷ Cotanquitsiqueate teequeate irinintacagueriji iranteneri, iriguentiqueate antajiniri irijanite icantajitica Saromoni. ⁴⁸ Cotanquitsi irira Aapani Irioshi Anaantamajatatsica tee inchoocatantemparotsovironaqui ishitiquica caquinte, icanquetari tsavetantirinica Aapani Irioshi:

⁴⁹ Icanti Aapani Irioshi:

‘Maasano jenoquipaetica manaqueate oquejevecaro noshitaponcaro aisa quepatsi manaqueate oquejevecaro novanquegontare.

¿Arimpate pagavejajiaque pishiticajiaquena tsovironaqui nonchoocatantempara?

¿Queroquea ochoocaque nomagorejantatuempaca naatimpa?

⁵⁰ ¿Arimpate tee naroguenti peacaaguetaroca maasano choocaguetatsica?’

⁵¹ “Aviatimpajia aviguentijia tee pinquemeji, mana pogapianaca intati. Mana piquejejiacari teeca intsatimajigueri Aapani Irioshi, manaquea pipigatsajiacari Ishire Aapani Irioshi piquejejiacari pivaesatinijiate. ⁵² Iriguentijiarite atsipetacaajiacarica maasano tsavetantirinica Aapani Irioshi aisa imetojajiaqueri maasano camantajiavetacarica: ‘Incoraquetaque coajica irira Comajamajatatsica.’ Ariqueate icoraquevetacagueti aviatimpajiaqui paacaantajiaqueri intati, pimetojacaantajiaqueri aisa. ⁵³ Pitsajiavetacaro icanqueca Aapani Irioshi yogaaajiacajica irashivantijitete, cotanquitsi tee pinquemisantajigueroji.”

⁵⁴ Iroompaqueate iquemajiaquitigui icanquegueti opeamajajianaqueriqueate it-simajenca yatsicayajimajatashijianacariqueate. ⁵⁵ Iriraqueate Ishire Aapani Irioshi ichoocashirentamajatanaqueri Ishitivano, yamenanaquequeate jenoqui inquitequi in-jaquero ishimpoquirereane Aapani Irioshi cantavaetaque shimpoquirererere. Iriraqueate Jesoshi catiaca itincamijempequiqui. Icantanaquequea Ishitivano:

⁵⁶ —Jac, imaica naatimpa nonejaquero inquite otanarejanaca. Jeri irinta Irijanite Caquinte, catiaca itincamijempequiqui Aapani Irioshi.

⁵⁷ Ariquea icojianaca ishepijanaquero iguempitapae aatoniji iquemajigui, icajemajianaque ishiashijianacari itaviajanaqueri. ⁵⁸ Yaajianaqueri ovegaraguetacagueti tsovironaquipae ipishoncashijiaqueri itsinatsinajiaqueri. Iriraqueate tsinacajiaquerica mana isapocajianacaro iitsaare jenoquitansiquisica yojocajianaqueneriqueate itsipa itsipajiacaca icantajitica Saoro, iquemoguijajiniriqueate. ⁵⁹ Iroompaqueate itsinacajianaquerigueti Ishitivano, iriatimpa yamanaqueri Amajirote, icantiri:

—Nomajirote Jesoshi, paavajero noshire.

⁶⁰ Ariquea iguerotanaca icajemapanajanti iririjencani icanti:

—Nomajirote, aato piquenquejacaguiritsi ocativa iquempevaecagueti.

Iroompaqueate iquejetanaqueroqueti imaica imetojanaque.

8

¹⁻² Irira Saoro yamenavaquerigueti imetojanaquegueti yamenavaquero cameetsa.

Saoro yatsipetacaajiacari quemisantajiatatsica

Aritarite ichoocajiaque acaniqui quemisantamajajiguirica Aapani Irioshi, yaajiana-jiriqueate Ishitivano iquitajiajatiri. Iraacomajajianaqueriqueate. Ariqueate irira teeca inquemisantajigueriji Jesoshi itsitijianaqueroqueate icatsimajianaqueri maasano quemisantajiatatsica choocajiatatsica Jerosarequi, ishiantajianacaca maasano iriatimpajia yojajianaque iporocajianaquequeate Joreaque aisa Samariaqui. Iriguentinivani choocajiatatsi itigarancanejia Jesoshi. ³ Iriraqueate Saoro inintavecaqueate interoncajiguerime

irira quemisantajiatsica, yoashijianaqueri itsovironaquitepaequi, iquijashijianaqueri inoshicajianaqueriqueate shiramparijia, manquigarentsijia, maasano. Yaajianaqueri yoguijajiaqueriqueate santanaqui.

Itsavetantajiquerigueti Jesoquirishito Samariaqui

⁴ Irirajiaqueate porocajiananquitsica yoajianaque itsitacaguitejajiaquero itsavetantaqueroquea Quenquetsatsarentsi Oganejencatatsica. ⁵ Apaniro icantajitica Jeripe yoanaque Samariaqui itsavetanqueri Quirishito. ⁶ Oshequini quemajivaquerica Jeripe iquemisantamajajiaqueri, yamenajiaqueritarite yantaguetaquequeate teeca irinejajiteji. ⁷ Yoguisotoaguequeriqueate ampatsinipae choocatantajiacarica caquinte. Icajemajianaquequeate isotoajianaque. Ariqueate aisa yogueshijajiri magoviroshiri, jerijia aisa teeca ironquempaji. ⁸ Irootaquequeate ishinevaetantajiacaca oshequini guinteni-jianquitsica Samariaqui.

⁹ Ariqueate chooca acaniqui aparo shirampari icantajitica Shimo. Yaventapinicarero iragavejane ampatsini yamitantajiavecarica, yamatavijantajiacarica Samariaquitica. Yaventacoca icanti: “Naroguenti anaantatsica.” ¹⁰ Maasanoqueate iquemisanta-majajiavetacari, majirontajiatatsica, aisa teeca iranaantajigueji, icantajiavetacaquea: “Iriogavejavaetatsica yagavejacaqueca Aapani Irioshi.”

¹¹ Iquemisantajiaqueri maasano, yonigaajiaqueritari taaca opajitapae teeca irinejajiteji yagavejacaquerigueti ampatsini, yamatavijantajiacarica. Iriatimpajia mana yoajianaque intati. ¹² Cotanquitsiquea yarejetapojacagueti Jeripe itsavetantaquerogueti Quenquetsatsarentsi Oganejencatatsica tsavetantaquerica Aapani Irioshi quero icotani imajirontagueti aisa tsavetantaquerica Jesoquirishito, ariqueea iquemisantajiaqueri iviñacajatacaantajiacaquea, irirajia shiramparijia aisa manquigarentsijia. ¹³ Imatanacaqueate Shimo iriatimpa. Iroompaqueate iquemisantaquegueti iviñacajatacaantaca, ariqueate yoguijatanaqueri Jeripe. Mana yoanaque intati inajaqueritarite yantaque teeca iragavejeji caquinte.

¹⁴ Irira itigarancanejia Jesoshi choocajianquitsica Jerosarequi iquemacojiaquerigueti Samariaquitica ishineventamajjianacaro iriatimpajia Iguenquetsatsare Aapani Irioshi, ariqueate itigarancajiaqueriqueate Peerero aisa Joanca iramenajiaquiteri. ¹⁵ Iroompaqueate yarejerejeipojacagueti yamanajiaqueriqueate Aapani Irioshi, yamanacoventajiaqueri cameetsanijite inchoocashirentajiaipojaqueri Ishire Aapani Irioshi, ¹⁶ tequeratanicate inchoocashirentajigueriji, manatarite yoviñacajatimentajiacari ivajiroqui Amajirote Jesoshi. ¹⁷ Ariqueate Peerero aisa Joanca ipamijiaqueriqueate, ariqueate ichoocashirentajianaqueri Ishire Aapani Irioshi. ¹⁸ Iroompaquea yamenavaquerigueti Shimo yantaqueca itigarancanejia Jesoshi ipamijiaquerigueti caquinte cameetsanijite inchoocashirentajiaipojeri Ishire Aapani Irioshi, inintavetacaquea irivegarajiaquenerime imentaquitsite, ¹⁹ icantiri:

—Iintsishiatsi pagavejacaguenaja naatimpa aisa nonquejetaquempi aviatimpajia cameetsanijite quericaca nompamitaque inchoocashirentajiaipojaqueri Ishire Aapani Irioshi. Iintsija pagavejacaguena, novegaraquempitarite imentaquipae.

²⁰ Icantiri Peerero:

—Intaaquempashinete pimentaquitsitepae. Pitaatsishiatsi aisa aviatimpa camorecariqui iroorijite pijiqueji povegaratantaquemparo imentaquipae ora yojocashitantaca Aapani Irioshi. ²¹ Aatoqueate pagaveji piconoajigana pinquejejaquena naatimpa, tequeratanicate pincantashitiamajatanajempaji. Yamenaquempi Aapani Irioshi teequea ontampaticateji pishire. ²² Povashiantanaquero ocatica piquenquejaguishetaqueca imaica, pincantashitiamajatanajempa. Pamaneri Aapani Irioshi, arica impeacotajempiro piquenquejaguishequeca. ²³ Notsataquempitari oshequi picatsimatacotsitanaquenaro, ajiricashirentavaquempi covaeguisherentsi.

²⁴ Icanqueriquea Shimo:

—Pamanacoventajiguenashiatsi pincantajigueri Aapani Irioshi aatoniji nogui camorecariqui notagatsiqueate quejetaca picantajiaquenaca imaica.

²⁵ Ariqueate itigarancanejia Jesoshi icamantacojiaquerogueti maasano yamenaji-
aqueca aisa itsavetantajiaquerogueti Iguenquetsatsare Aapani Irioshi, ariqueate ique-
naguetanaque iguinteniguetaqueti itsipapae Samariaquitica, itsavetantaqueroquea
Quenquetsatsarensi Oganejencatatsica. Ariqueate ipiapiaitanaja Jerosarequi.

Iquemisanquegueti Etiopiaquitica

²⁶ Ariquea irashivantite Amajirote iquenquetsatacaqueri Jeripe icantiri:

—Pija oquitamampororoipojaquegueti pinquentanaquemparo quenavoquirontsi
quenavoquipojatsica Jerosarequi oavoquitananquitsica Gasaqui.

²⁷ Ariqueate icatianaca Jeripe yoanaque quenavoquirontsiqui, ariquea itonquivojava-
jari shirampari eonocotatsica* poneatsica Etiopiaqui. Iriatimpa iriguenti amitacotiroca
ora imajirojiate Etiopiaquitica ora icantajitica Cantase. Iriguentitari netsanatiniroca
omentaquitsitepae, cavorejaguetatsica. Iponeajaqueate Jerosarequi yoaquitiqueate
itsarovoltaquitari Aapani Irioshi. ²⁸ Imaicaqueate iroanaje iguinteniqui, itetajaro itigar-
itacomento yapatsjavantaquero paperi itioncacotanaqueca coramani tsavetantirinicca
Aapani Irioshi icantajitica Isaiashini. ²⁹ Irira Ishire Aapani Irioshi icantiri Jeripe:

—Poanaque pintonquivojamajatavaquempari quempeji.

³⁰ Ishiashitanacariqueate Jeripe iquemapojaqueri yapatsjavantaquero
itioncanaqueca tsavetantatsica Isaiashini, icampojaqueri:

—¿Pitsatavaquerompa papatsjavantaqueca?

³¹ Iriatimpaqueate icantiri:

—¿Querocampate noncoquempani nontsatantavaquemparo? Teenicate
inchoocateji tsatacaquenaroneca. Iintsija caacateja pantaitapojaque aviatimpa
pisavicapojaque acaniqui naatimpacqui pintsatacaapojena.

Ariqueate yataitanaque Jeripe isavicapojaque. ³² Oraqueate yapatsjavantaqueca
mana ocanti:

Yaajitanaqueri iquejetacaajitanacari yaajitiriguete oveja ipesaitiriguete.

Teequeate incajemanaqueji, iquejetanacari yogarajamaejitiriguete ovejajanicqui yaaji-
tiroguete imae, mana iquemisantacotanaca.

³³ Ariqueate ivosantejajiaqueri, inijashinajiacariqueate, quericampate cantacotanaque-
rineca.

Ariquea imetojajiaqueri, tee inchoocateji quepatsiqui.

¿Imaica quericampa agavejanquitsine inquenquetsatacotaqueri inchoviquijianaqueca?

³⁴ Iriraqueate eonoco icantiri Jeripe:

—Pincamantenaja, ¿queri iquenquetsatacotaqueca tsavetantirinicca? ¿Iriocampa
quenquetsatacotajatsi, aricampa iquenquetsatacotaqueri itsipa?

³⁵ Ariqueate itsititanaquero Jeripe acaniqui ocanqueca paperi yapatsjavantaqueca,
itsatacaamajataqueri itsavetantaquero Quenquetsatsarensi Oganejencatatsica tsaveta-
coquerica Jesoshi. ³⁶ Ariqueate yoajianaque inejajiaipojaquero osamponaja. Icanquequea
irira eonoco:

—Jerosa oca osamponaja. ¿Cameetsataquempa noviñacajatacaanquempa?

³⁷ Icantiri Jeripe:

—Avirompate. Piquemisantamajataqueriguete Quirishito, cameetsa piviñacajatacaan-
quempa.

Iriatimpa icantiri:

—Arimajatarite noquemisantamajataqueri, notsataquetarite irira Jesoquirishito
iriguenti Irijanite Aapani Irioshi.

³⁸ Ariqueate icantiri tigaritacoquerica irogatiguero itigaritacotantaca, yaguiji-
tanaque mavite, irira Jeripe aisa eonoco, yoajianaque osamponajacqui iviñacajataqueri.

³⁹ Iroompaqueate yagajianajatigui otsapijacqui yaanaqueri Ishire Aapani Irioshi Jeripe,
ariquea ipeanaca. Iriraqueate eonoco, teequeate irinejajeriji Jeripe, cotanquitsiqueate
yoanajiqueate ishinevaetanaca. ⁴⁰ Ariqueate irira Jeripe iconigavaeti Asotoqui itsave-
tantanaquero Quenquetsatsarensi Oganejencatatsica, yoavaetanaque itsitacaguetejana-
quero guinteninintsipae, yarejevaecaro Sesareaqui.

* 8:27 Eonoco irio isoitsorejitaqueca iguemaaqui.

9

*Iquemisanquegueti Saoro**(Ya. 22.6-16; 26.12-18)*

¹ Iriaqueate Saoro arimpaqueate icatsimajianaqueri quemisantajiguirica Amajirote inintavetaca irimetojajiaquerime maasano. Yoantanacaca saserrotequi anaantamajatanquitsica, ² yamanapanajantiri irojocavaqueneri paperipae cameetsanijite injashitimentajianaquerinijite shinagogapaequi icapiocontajiacajoriojia Tamashicoqui incoaguequiteri maasano guijatacojiguiroca icantajitica Quenavoquirontsi, irajianaqueri iroguiaajiaqueri santanaqui Jerosarequi, shiramparijia aisa manquigarentsijia. Ariqueate itioncaqueneri paperi, yojocavaqueneri. ³ Iroompaquea iquenavetanacaguete quenavoquirontsi qui quempejivepojaqueate Tamashico ocantanaquitiguiqueate morec oponeajencataca jenoqui inquitequi otsirencapojaqueeriqueate anquiritacotapojacari. ⁴ Ariqueate itejanaque quepatsiqui iquematiguiqueate icantapojacari:

—Saoro, Saoro, ¿taate picatsimatantaquenaca?

⁵ Iriatimpa icoacotanaqueri icantiri:

—¿Queroquea pipajitani, Nomajirote?

Icantiri:

—Naatimpa naroguenti Jesoshi pipatimanataqueca. ⁶ Imaica pincatianaque poanaque Tamashicoqui. Ariqueate oraniqui incantajiquempi querocaca pincoquempani.

⁷ Iriaqueate itsipatsipaicaca Saoro itsaroajianaque iroorijite iquemajiavetaca iquensajiquegueti cotanquitsi teequeate irinejeriji, cajaraguiteni. ⁸ Icatiavetanaja Saoro, ipityaquirejavetanaca, tee iragavejajempaji irinejaje. Manaqueate yacatsajianaqueri intati, yaajianaqueri Tamashicoqui. ⁹ Ariqueate ichoocataque oraniqui 3 savincaguiteri tee irinejajeji, aisa tee irishecatajempaji, tee irimirajeji.

¹⁰ Ontaniquiquea Tamashicoqui ariqueea ichoocataque quemisantatsica icantajitica Ananiashi. Inegaacari Amajirote mana oquejetanacaro iguimaanequi icantiri:

—Ananiashi.

Icantiri iriatimpa:

—Choocana, Nomajirote.

¹¹ Icantiri Amajirote:

—Pija ontaniqui itsovironaquitequi Jorashi, ari ochoocaque quenavoquirontsi qui icantajitica Catincapouqui, pincoacotantapojacari Saoro poneanquitsica Tarisoqui. Imaica yamanaquena. ¹² Nonigaaqueritarite oquejetacaro iguimaanequi inejacari shirampari pajitatsica Ananiashi iquijapojaque ipamitapojaqueeriqueate cameetsanijite iramenimentanajenijite.

¹³ Iroompaqueate iquemavaquitigui Ananiashi icantiri:

—Cotanquitsi, Nomajirote, noquemacotiri iriguenti catsimari yatsipetacaantajiacarica pigomajamajarejia choocajanquitsica Jerosarequi. ¹⁴ Imaicaqueate imaica coraqueataque acaniqui itigarancajiaqueri saserrotejia anaantajanquitsica cameetsanijite irajianaquerinijite maasano aventajiguimpica pivajiroqui. Irootaquetarite icoraquetashitaque.

¹⁵ Cotanquitsi icantiri Amajirote:

—Piija, iriotaquetarite nocoguiaqueca, nonintaquetarite naatimpa intsavetanqueaqueate incamantajiaqueri teeca iriojia joriojia aisa imajirojiate. Aisa incamantajiaqueri ishiraerijia. ¹⁶ Nontsatacaguequeri naatimpa maasano quero incoquempani irantsipeventaquena.

¹⁷ Ari yoanaque Ananiashi, iquijapojaque tsovironaqui qui. Ariqueate inejapojacari ipamitapojaqueeriqueate, icantiri:

—Napiguemisariteni Saoro, irira Amajirote Jesoshi onigaaquempica quenavoquirontsi qui itigarancaqueca cameetsanijite pinejanaje, aisa inchoocashirentaquempinijite Ishire Aapani Irioshi iragavejacaanaquempi.

¹⁸ Iroompaqueate icanquitigui ariqueeate ocotanaca opariapentaquigepojaque iroquijacari quempeguetaca iventaqui shima ariqueeate yamenanaji. Iroompaquea yoanaque iviñacajataca. ¹⁹ Ariqueeate ishecatanaca itampishitanaji. Ariqueea

ichoocatanaji Saoro aparopae savincaguiteri, imaimojianajiri quemisantajiatsica Tamashicoqui.

Itsavetanquegueti Saoro Tamashicoqui

²⁰ Ariqueate Saoro itsavetantaguetanaqueri Quirishito shinagogapaequi icapiocantajiac joriojia icantanaquequeate: “Jesoshi iriguenti Irijanite Aapani Irioshi.” ²¹ Maasano quemajiaquerica mana yoajianaque intati icantajigui:

—¿Teempaquatee tee irio irira catsimajiaquerica quemisantajiguirica Jesoshi choocajiatatsica Jerosarequi? ¿Teempaquatee tee irio coraquetashijiavetacarica quemisantajiatatsica choocajiatatsica acaniqui iroishojiaquiterime irajaianaquerime saserorotejiaqui anaantajanquitsica?

²² Cotanquitsi irira Saoro arimpaquatee itsavetantamajatanaqueri Jesoshi, icanti iriguenti Quirishitotatsica.* Ariqueate irirajia irapijoriojiateni choocajiatatsica Tamashicoqui tee iragavejajempaji impigajajempajiji.

²³ Ariqueate oshequianaquegueti savincaguiteri isariajiavecariquea joriojia irimetojajiaquerime, ²⁴ cotanquitsi icamantajiqueri Saoro. Ogantaga tsiteniriqui aisa savincaguiteri itimashijiavecaro sotomorontsiqui itantajitaquerogueti ocapiocagueti tsvironaquipae inintajiavetaca irisotoanajegueti irimetojajiajaverime. ²⁵ Cotanquitsiqueate opitsecanaquegueti yaajianaqueri irapiguemisantarijiate otantotacagueti guinteninintsi, itetanaca cantiriqui, ariquea inchiqiuojisano yogaguijitaquero yoganoncorencacojiaqueri antaqueronta.

²⁶ Iroompaquatee yarejetapojacagueti Jerosarequi inintavetacaqueate inconoajiapempajime quemisantajiatatsica, cotanquitsiqueate maasano itsaroacaajiavetavacari ijitashivetavacaritarite tee arimaja inquemisanteriji Quirishito. ²⁷ Cotanquitsiqueate yaanaqueri Verenave itsipatanacari Saoro ichoocajiaquegueti itigarancanejia Jesoshi, icamantajiaqueri quero ocotacani yonigaacarigueti Amajirote quenavoquirontsiqui iquenquetsatacaapojaqueri. Coajica ontaniqui Tamashicoqui teequea intsarogueji iquenquetsatanaquequea ivajiroqui Jesoshi, itsavetacotaqueri.

²⁸ Iroompaquatee iquemajiaquitigui yaajianaqueriqueate itsipajianacari. Ariqueate iquijaguetanaque tsvironaquipaequi Jerosarequi, ²⁹ iquenquetsatanaquequea ivajiroqui Amajirote, itsavetacotaqueri, teequea intsarogueji. Aisa iquenquetsatacaajiaqueri joriojia irirajia quenquetsatantacaroca guiriego. Iriatimpajia inintajiavetaca inquemisantacajiaquerime cotanquitsi tee iragavejajigueri. Ariquea itsimajajianaqueri inintantajiavetacaca irimetojajiaquerime. ³⁰ Cotanquitsi iroompaquatee iquemavaquitiguiqueate irapiguemisantarijiateni yoacaajianaqueri Sesareaqui. Ariqueate itigarancajiaqueri Tarisoqui.

³¹ Ariquea ichoocajiaque cameetsa maasano quemisantajiatatsica guintenijiatsica Joreaqi, Garireaqi aisa Samariaqui, teequeate irasereajitajeri. Yoshequiamajatanaquequeate oraniqui quemisantajiatatsica, arimpaquatee iquemisantamajajianaqueri Amajirote itsamajajianaquero maasano inintica iriatimpa, iriguentitari tampishitacajiaqueri Ishire Aapani Irioshi.

Peerero yogueshitajiri Eneashi

³² Ariqueate yoanaque Peerero inejantaguetaque guinteninintsipaequi, inejajiaqueri irapiguemisantarijiate, irosati yarejetantaca Iritaqui, inejajiaqueri aisa itsipapae irapiguemisantarijiate guintenijiatsica ontaniqui. ³³ Ariqueate oraniqui inejapojiaqueri teeca ironquempaji icantajitica Eneashi inorijaniqueate 8 ajagantsi. ³⁴ Icantiri Peerero:

—Eneashi, imaica iriveajempi Jesoquirishito. Pincatianaje, pampiguiricanajero pinorijantacaca.

* 9:22 Quirishitotatsica. Iguenquetsatsarequi guiriegojia canquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempajiji Imajirojiate maasano.

Iroompaqueate icanquitiguiri icatianacaqueate. ³⁵ Maasano guintenijiatsica Iritaqui aisa Saronequi iroompaqueate inejavaquerigueti yogueshitajiri iquemisantajianaqueri Amajirote.

Yovochantajirogueti Irorocashi

³⁶ Ontaniquiqueate Jopequi ariqueate ochoocaque otsipa quemisantatsica icantajitica Tavita. Oraqueate iguenquetsatsarequi guiriego mana icantajitiro Irorocashi. Iroatimpa caaviji ocavintsajanti ocavintsajajigui coguitejacojianquitsica. ³⁷ Ariqueate ashinoncajanaca ometojanaque. Iquivatsinojitavaquero aritari icojiga joriojia. Ariqueate yaajitanaquero shitamencorentsiqui jenoqui. ³⁸ Ariqueate irira quemisantajiatatsica guintenijiatsica ontaniqui Jopequi itsajiaqueritarite ariquea ichoocaque Peerero quempeji Iritaqui, itigarancantajiacaca mavite iroajianaque incantajiaquiteri incoraqueataque taampina. ³⁹ Iroompaqueate iquemavaquitigui Peerero icatianaca yoguijaguijaitanaqueri. Oraqueate yarejerejeipojacagueti tsovironaqui qui itsipajianacari ojoquijicagueti otsino Irorocashini. Ariqueate ochoocajiaque oraniqui metojajianquitsica omanquigarejia iracojiaquero. Iroompaqueate onejajiaquitigui Peerero ocapiocaventajiacari onigaajiaqueri quitsaarentsipae ontijaguequeca Irorocashini choocatirajagueti otsipavetacarogueti.

⁴⁰ Irira Peerero yoguisotojiaquero maasano iguerotanacaqueate yamanaqueri Aapani Irioshi. Ariqueate ipitsocashitanacaro metojatsica icantiro:

—Tavita, pintinajanaje.

Ariqueate opityaquirejanaque onejatigui Peerero otinajanaca osavicanaque.

⁴¹ Yacatsataquero yogatiaquero icajemajajiroqueate metojacojiatsica aisa itsipajia quemisantajiatatsica, icantajigui:

—Jero oca, pochatanaji.

⁴² Irira guintenijiatsica acaniqui Jopequi maasanoqueate iquemacojiaquero. Ariqueate yoshequiamajatanaquequeate quemisantajiguirica Amajirote. ⁴³ Ariqueate ichoocaque Peerero oshequi savincaguiteri Jopequi itsovironaquitequi Shimo savicaventirica iticajaguetiri imeshinapae.

10

Iquemisantaquegueti Coronerio

¹ Choocaqueate Sesareaqui coareta icantajitica Coronerio. Iriatimpa iriguenti imajirote coaretajia. Ariquea ivegarajiacaca 100 igoaretajiate. Iriatimpajia itsipajiacaca itsipajia oshequi coaretajia poneanquitsica Itariaqui. ² Iriatimpa iriguenti pincatsatirica Aapani Irioshi itsipajigari ijitanajia itsarotentajigari. Icavintsajajigui joriojia coguitejimojiacarica. Yamanapinitiri Aapani Irioshi irosati savincaguiteri. ³ Oraqueate icononcanajagueti catsirincaiteri mana oquejetimovecari iguimaanequi icoraquetapojaque irashivantite Aapani Irioshi iconijamajatapojaque, icampojaqueri:

—Coronerio.

⁴ Yamenavaqueriqueate sorerere, itsaroanaquequeate icantiri:

—¿Taa opajita, Nomajirote?

Icantiri:

—Iquemaquempi Aapani Irioshi pamanapinitaquerigueti, aisa yamenaquempi caaviji picavintsajanti. Irootaquequeate icavintsajantaquempica. ⁵⁻⁶ Imaicaquea imaica pintigaranque iroanaque Jopequi cajemaquiterineca Shimo Peerero, incamantempi quero pincoquempa. Iriguenti imaimoque itsipa Shimo guintenitatsica quantijaqui savicaventirica iticajatiri imeshinapae.

⁷ Iroompaqueate yoanajatigui irashivantite Aapani Irioshi irira Coronerio icajemaquequeate mavite irajaanire aisa aparo coareta amitacotirica. Irira coareta caaviji ipincatsatiri Aapani Irioshi. ⁸ Oraqueate icoraquejiaquegueti icamantajiaqueriqueate maasano icanquerica irashivantite Aapani Irioshi, ariqueate itigarancajiaqueri Jopequi. Ariqueate yoajianaque.

⁹ Iroompaqueate osavincaguitetanajigueti itampaticatanaquegueti catsirincaiteri pajinigueti irarejejiguetem, iriraqueate Peerero yataitanaque jenoqui sotsiqui omencotapojacagueti tsovironaqui ovancaitoqui iramaneri Aapani Irioshi. ¹⁰ Itaseaque inintavetaca irishecaquemame, iroaquera itijaitanaque tequeratatoraja irishecatempaji. Ariqueate mana oquejetimovecari iguimaanequi. ¹¹ Ariqueate otanarejaguitetanaca inquite ocoraquetacopojaque quepatsiqui quejetaca iniromago quitsaarentsi mana ishiticajiguequero ovegaramagoguetacagueti. ¹² Itehiteitaca taaca ipajitapae tomirishipaequitica canaaguetsica, jeri soancaguetsica, araguetsica, maasano teeca irishecatempariji jorio. ¹³ Ariqueate iquemiri iquenquetsajencajitanaque icanti:

—Peerero, pincatianaque paaguetaqueri pimetojaguetaqueri pishecataquem-pari.

¹⁴ Icanti Peerero:

—Nomajirote, aatotarite noshecataritsi, teenicate noshecatempariji icantimentantajitica; tee noshecatempariji covaetantaguetsica.

¹⁵ Iquenquetsajencatsijitanaja aisa icantiri:

—Iriraqueate icantacoqueca Aapani Irioshi: ‘Cameetsa inaque’, aatoquea pipinquiritsi, aato picanti: ‘Covaeguishedaca.’

¹⁶ Otsipatapojaca aisa iquejejiqueri imaica iquenquetsajencatsijitanaja, ariqueate opiacotanaja opeanaja jenoqui inquitequi. ¹⁷ Ariqueate icanti Peerero:

—¿Taate opajita ocatica?

Iroompaqueate iquenquejaquerogueti yarejerejitapojaca itigarancajiaqueca Coronerio. Icamantajitiri incajaranqui quero onaqueni itsovironaquite Shimo savicaventirica iticajatiri imeshinapae. ¹⁸ Yarejerejitapojacagueti icoacojiapojaqueri ashincaroaca tsovironaqui icantajiapojaqueri:

—¿Ari imaimoquempi Shimo Peerero?

¹⁹ Iriraqueate Peerero ogantagatoraja iquenquejiro yamenaqueca, icantiri Ishire Aapani Irioshi:

—Coraquejiaque 3 shirampari icojaiaquempi. ²⁰ Pincatianaque poanaque isavi. Aato pitsarogui poguijaguijaitanaqueri, naroguentitarite cantajiaqueri icoraquetantajiacaca.

²¹ Yaguijitanaja Peerero ichoocaquegueti shiramparijia [itigarancaqueca Coronerio], icantajiapojaqueri:

—Naroguenti picojaiaque. ¿Taaqueate picoraquetashijiaque?

²² Iriatimpajia icantajiguri:

—Iriguenti tigarancajiaquena nomajirojiate icantajitica Coronerio. Iriatimpa iriguenti caaviji icameetsati aisa ipincatsatiri Aapani Irioshi. Maasano joriojia ishineventajiacari. Chapinqui iquenquetsatacaapojaqueri ashivanti comajashirentanquitsica icantiri: ‘Pincajemacaaneri Peerero pitsovironaquitequi. Taaca incamantaguequempi pinquemisantavaquerija.’ Irootaquequeate nocoraquetashitaque noncantajiaquitempi.

²³ Irira Peerero yoguijaajivaqueri yonigaajivaqueri irimaantajiaquempaca. Ariqueate osavincaguitetanajigueti ipijaijanaqueate yoguijaguijaitanaqueri, aisa itsipajianacari irapiguemisantarijiate choocajitsica oraniqui Jopequi.

²⁴ Osavincaguitetanajigueteate aisa yarejejapojaca Sesareaqui. Ariqueate ichoocaque Coronerio, icapiocajiaqueri ijitanejia jerijia aisa itsipavijitaca, yoguijajivaqueri Peerero. ²⁵ Iroompaqueate iquijapojigueti Peerero, itonquivojavacari Coronerio, yogueroaventavetavacari iguitiqui, iquejetacaacari irioca Irioshi.

²⁶ Cotanquitsi Peerero yogatiavajiri icantiri:

—Pincatianaje, caquintetajanatari. Aritarite noquejetajimpi aviatimpa.

²⁷ Ariquea iquenquetsatavacaaca iquijajipojaque tsovironaqui, inejapojaqueri oshequi capiocajianquitsica, ²⁸ icantajiapojaqueri:

—Aviatimpajia pitsajiganatarite naatimpajia joriojia nocantashitatijaiaca, caaviji icantimentajitiro nonconoajiaquemparigueti teeca iriojia joriojia aisa nonquijitajiaquerigueti itsovironaquitequi. Icantajiaque nogonoro: ‘Tee irininteroji Aapani Irioshi.’ Cotanquitsi itsatacaquena Aapani Irioshi cameetsanijite aatonijite nopinquiritsi aisa aatoniji nocantajitsi: ‘Tee incameetsateji, covaeguishedaca.’ ²⁹ Irootaquequeate imaica

picajemacaantajiaquenagueti taampinaqueate nocoraquetaque, tecatsiquea nameven-tempaca. Imaicaqueate pincantajiguena, ¿taaqueate picajemimentajiaquena?

³⁰ Icantiquea Coronerio:

—Oraqueate chapinqui iquejetanajagueti imaica catsirincaiteri icononcanajagueti nochocaquegueti acaniqui notsovironaquitequi namanaquerigueti Aapani Irioshi, ariqueate yonigaaquena shirampari quitamarocantavaetaquequeate iitsaare.

³¹ Icampojana: ‘Coronerio, iquemaquempi Aapani Irioshi pamanapinitaquerigueti, aisa yamenaquempi caaviji picavintsajanti. ³² Imaicaqueate imaica pintigaranque iroanaque Jopequi cajemaquiterineca Shimo Peerero. Iriguenti imaimotaque itsipa Shimo guintenitatsica otsapijaqui quantija savicaventirica ticajagueterica imeshinapae.’

³³ Notigarancantajiacaca camantajiaquitimpica. ¡Ariotesaa picoraquetaque! Imaicaquea imaica acapiocajiacaca ariqueate achoocatimojiaqueri Aapani Irioshi. Nonintaque pintsatacaajiaquena maasano taaca opajitapae icanquempica Aapani Irioshi.

³⁴ Iquenquetsatanaquequea Peerero icanti:

—Imaica notsamajataque yamenajiacaji Aapani Irioshi aquejetavacaajiacaca, teequeate ancantashitatijaguempaji. ³⁵ Ishineventamajajiacaritarite maasano caquinteguetatsica quepatsipaequitica quericaca pincatsamajaquerica aisa icomajamajajianaca.

³⁶ Itigarancaqueroqueate Iguenquetsatsare itsatacaajiaquena naatimpajia ishiraerijia quero icotani Jesoquirishito imeshiantigueti cameetsanijite Aapani Irioshi irishineventajiacajinjite. Irira Jesoquirishito iriguentitarite Amajiromajate maasano caquinte.

³⁷⁻³⁸ Aviatimpa piquemacojiaqueritarite Joanca itsavetanquerigueti aisa iviñacajatantaquegueti. Ariqueate piquemacojiaqueri Jesoshi Nasarequitica itigarancaqueneri Aapani Irioshi Ishire jero aisa yagavejacaamajataqueri. Ariqueate iquenaquenaguetaque manaqueate icavintsajantaguetaque yogueshijiaqueriqueate maasano yatsipetacaajiacaca ampatsini. Iparianacarouquea Garireaquei, ariqueate itsitacaguetejaquero maasano iguepatsijiate joriojia. Iriguenti tsipacari Aapani Irioshi iquejetancaca. ³⁹ Naatimpajia namenamajajiaqueri maasano yantaguetaqueca Jesoshi ontaniqui Jerosarequi aisa otsipapaequi iguintenipaequi joriojia. Ariqueate imetojajiaqueri yompajacojiaqueri coroshiqui. ⁴⁰ Cotanquitsi aapojacagueti 3 savincaguiteri ivochantajiri Aapani Irioshi itigarancajiri yonigaajianajana. ⁴¹ Cotanquitsi teequeate maasano ironigaajianajempajiji, naroguentijia yonigaajianajana, naroguentijiarite inintacaaqueca Aapani Irioshi coramani nonquemisantajiaqueri aisa noncamantajiaqueri maasano. Ipochatanajigueti ariquea itsipajijaana noshecatacaavajari aisa nomiracaavajari. ⁴² Ariqueate itigarancajiaquena nontsavetantajiaquero Iguenquetsatsare Aapani Irioshi noncamantajiaqueri maasano caquinte, aisa noncamantajiaqueri iriotaque inintacaaque Aapani Irioshi incanque coajica quero incojiaquempa maasano, metojajianquitsica aisa tequerataca irimetojajigueji. ⁴³ Maasanotarite tsavetantirinicaca itsavetantajiaqueri icantajigui quericaca quemisantaquerineca Quirishito impeacotajeneri iguempevaerejia iraventaquemparigueti ivajiroqui.

⁴⁴ Ogantagatirajagueti iquenquetsati Peerero icoraquepojaque Ishire Aapani Irioshi ichoocashirentajiaipojaqueri maasano quemisantajiaquerica iquenquetsaquegueti.

⁴⁵ Irira joriojia quemisantajiatatsica itsipajiacaca Peerero iponeacagueti Jopequi mana yoajianaque intati, yamenavaqueritarite itigarancajiaqueri Aapani Irioshi Ishire ichoocashirentajiaipojaqueri teeca iriojia joriojia. ⁴⁶ Iquemajiaqueri iquenquetsatantajianacarouquea otsipapae quenquetsatsarentsi teeca intsajiavetempaji aisa ishineventamajajianacari Aapani Irioshi, icantajigui:

—Yoganejencamajata Irioshimajaca.

⁴⁷ Iquenquetsatanaquequea Peerero icanti:

—Imaicaquea imaica ¿arimpate incantimentajiaqueri iriviñacajajiaquempagueti? Aritarite iquejejiacaji aatimpajia joriojia ichoocashirentajiacajigueti Ishire Aapani Irioshi.

⁴⁸ Ariquea yoviñacajatacantimentajiacari ivajiroqui Jesoquirishito.

Ariqueate iriatimpajia icantajiaqueri Peerero inintajiaque inchoocataje aparopae savincaguiteri.

11

Iquemacojitavaquerigueti Jerosarequi iquemisantajiaque teeca iriojia joriojia

¹ Ariqueate irira itigarancanejia Jesoshi jerijia irapiguemisanterite guintenijiatsica Joreaqui iquemacojiaqueri teeca iriojia joriojia itsavetantimojianaquerigueti Iguenquetsatsare Aapani Irioshi ariqueate iquemisantajiaque. ² Iroompaqueate yoanajigueti Peerero Jerosarequi, icatsimajencajiavaqueri irapijoriojiate quemisantajiatatsica, icantajiguiri:

³ —¿Quero ocotaca poashitantajianacarica teeca iriojia joriojia iriraquea teeca intotsaiquijiquero ichonquimashi pishecatacojiaquitari?

⁴ Ariqueate yoguisotoanaqueneri Peerero icamantaqueri maasano, icantiri:

⁵ —Iintsija nontsavetantero. Naatimpa nochooaquegueti Jopequi namanaqueri Aapani Irioshi. Ariquea oquejetimovequena manaca noguimaaca namenavaquero quejetaca iniromago quitsaarentsi oponeapojaca jenoqui inquitequi, yoishojiquero ocaramagopaequi. Ariquea aguijitaipojaque naatimpaqui. ⁶ Namenamajatavaquero namenaguequeri taaca ipajita tetantacaro. Namenaguequeri itehiteitaca canague-tatsica viratsipae aisa tomirishipaequitica. Itejiacaro aisa soancaguetatsica aisa araguetatsica. ⁷ Ariqueate iquenquetsajitanaque, icanquena: ‘Peerero, pincatianaque paaguetavaqueri pimetojaguetavaqueri pishecatavaquempari.’ ⁸ Cotanquitsi naatimpa nocantavetacari: ‘Nomajirote, aato noshecataritsi, teenicate noshecatempariji icantimentantajitica; tee noshecatempariji covaetantaguetatsica.’ ⁹ Iquenquetsatsijitanaja aisa quenquetsatanquitsica inquitequi icanti: ‘Iriqueate icantacoqueca Aapani Irioshi: “Cameetsa inaque”, aatoquea pipinquiritsi, aato picanti: “Covaeguishedaca.”’ ¹⁰ Otsipatapoja iquejetaquena imaica iquenquetsatacaaquena, ariqueate opianaja opeanajaqueate jenoqui inquitequi. ¹¹ Teequeate osamaniteji arejerejeipojaca tsovironaqui nomaantaca 3 shirampari poneanquitsica Sesareaqui itigarancajitaqueca camantenaneca. ¹² Ariqueate itigarancaquena Ishire Aapani Irioshi icanti: ‘Pija poguijajianaqueri, aato pitsaroguitsi.’ Ariqueate noanaque yoguijaguijaiquenaqueate irira 6 napiguemisanteriteni, ariqueate narejerejeipojacaguete noquijaquijaipojaque itsovironaquitequi irira cajemacaantaquenaca. ¹³ Iriatimpa icamantajiavaquenaqueate yonigaacariguete irashivantite Aapani Irioshi icatiimotapojacari itsovironaquitequi icantiri: ‘Pintigarancaneja oajiananquitsineca Jopequi cajemaquiterineca Shimo Peerero. ¹⁴ Irioqueate camantajiaquitempine quero pincojiaquempani aviatimpa jerijia maasano pigonorojia cameetsanijite irimeshijajajempinijite Aapani Irioshi.’ ¹⁵ Iroompaqueate noquenquetsatacaanaquitatiguiri icoraquepojaque Ishire Aapani Irioshi ichoocashirentajiapojiri iquejetacaajiacajiguete aatimpajia ichoocashirentajiacajiguete iroaqueraguete. ¹⁶ Noquenquejapojajiroqueate icanqueca Amajirote: ‘Irirampani Joanca iviñacajatan-taque oja, cotanquitsi inchoocashirentajiapojaquempi Ishire Aapani Irioshi quejetaca iroviñacajatanajitaquempiri Ishire.’ ¹⁷ Icaavintsajajiaqueritarite Aapani Irioshi iquejetacaajiacaji aatimpajia aquemisantajiguiriguete Amajirote Jesoquirishito. ¿Arimpate noncanqueri Aapani Irioshi aatoniji icavintsajajiguiri?

¹⁸ Iroompaqueate quemajiavaquitigui irapiguemisanterijiateni iquemisantajianaque, ariqueate ishineventajianacari Aapani Irioshi icantajiguiri:

—Caavijisano icavintsajanti Aapani Irioshi, irootaquequeate icavintsajantajiacarica aisa teeca iriojia joriojia cameetsanijite incantashitatijaianaquempa, aatonijite imetajajitsi, ogantaga incoguitempani.

Quemisantajiatatsica Antioquiaqui

¹⁹ Oraqueate imetajajitaqueriguete Ishitivano ariqueate omapocanaca yatsipetacaajitacari quemisantajiatatsica, ariqueate iporocajianaque ivarajajianaque yoajianaque Penishiaqui, Tsiperequi aisa Antioquiaqui. Iriguentiqueate iquenquetsatimojianaji joriojia icamantajiaqueri quero icota Aapani Irioshi imeshiantiguete. ²⁰ Iconoagarantajiaqueate porocajiananquitsica iponeajiacaricamani Tsiperequi aisa Shirenequi. Iroompaqueate yarejejiapojacaguete iriatimpajia Antioquiaqui iquenquetsatacaajiaqueriqueate aisa guiriegojia, itsavetanquero

Quenquetsatsarensi Oganejencatatsica tsavetacotaquerica Amajirote Jesoshi.
²¹ Iriguentitarite agavejaccuqueri Amajirote iquemisantantajiacarica oshequini, yovashiantajianajiro ishineventajavetaca, irioqueate iquemisantajianaji Amajirote.

²² Ariqueate iquemacojiaqueri quemisantajatsica guintenijiatsica Jerosarequi itigarancajiaqueri Verenave ontaniqui Antioquiaqui. ²³ Iroompaqueate yarejetapojacagueti inejajiapojaqueri icavintsajajiaqueri Aapani Irioshi, ishinevaetanaca icantajigui:

—Imaica pincoguitempani pinquemisantamajajiaqueri Amajirote, pinetsanajiaque-roja maasano inintaguequeca. Aatoqueate povashiantajiguirotsi.

²⁴ Irira Verenave caaviji icameetsati ichoocashirentamajataqueri Ishire Aapani Irioshi, aisa caaviji iquemisantamajatiri, irootaquequeate iquemisantantajiacarica oshequini caquinte.

²⁵ Ariqueate yoanaque Verenave Tarisoqui icoaqueri Saoro, inejapojajiri icantiri:
 —Jame Antioquiaqui.

Ariqueate yoayoaitanaque. ²⁶ Ariqueate ichoocajiaipojaque aparo ajagantsi, icapio-cap-inijiaca itsatacaajiaqueri oshequini quemisantajatsica. Aritarite oraniqui Antioquiaqui imapocajitaqueri icantajiaqueri quemisantajatsica “quirishitiano”, ocanti guijatacotirica Quirishito.

²⁷ Oraqueate choocatirajagueti Verenave aisa Saoro Antioquiaqui icoraquejiaque tsavetantajatsica iponeponeica Jerosarequi. ²⁸ Chooca aparo icantajitica Agavo. Iri-atimpa icatiimojianacariqueate, ariqueate iquenquejaccuqueri Ishire Aapani Irioshi icanti irantsipejitaquemparo taseti onsitacaguitejanaquemparo maasano quepatsi. Ariqueate imajirontagueti Caraorio, onetsanatanaca icanqueca Agavo. ²⁹ Iroompa iquenquejajiaquequea quemisantajatsica incapioajiaqueneri imentaquipae cameet-saniji impacaantajiaqueri irapiguemisanariteni guintenijiatsica Joreaqi. Apaniropae yojocagarantajiaque yashintajiacaca. Iriraqueate ashintamajianquitsica irioqueate jocamajianquitsi. Iriraqueate teeca irashintamajajiguempaji capichajipae yojocajiaque. ³⁰ Ariqueate yojocajiaqueneri Verenave aisa Saoro irajaianaqueneri quempoguijajiguir-ica irapiguemisanariteni Jerosarequitica.

12

Erorishi icatsimamajajianaqueri quemisantajatsica

¹ Ariqueate irira majirontatsica Erorishi* imapocanaquero icatsimamajagarantajia-queri quemisantajatsica. ² Imetojaccuqueri Santiago iriguentijeguite Joanca, iroguenti ijitorejantajitacari cotsiro. ³ Ariquea iriatimpa itsanirotaque ishineventamajajiacari joriojia, yaacaanqueriqueate Peerero aisa. Iro yaacaantantacarica savincaguiterpae ishecatantajitaroca pan teeca onconoguemparoji anempoantaca. ⁴ Yoguijacaantaqueri santanaqui, itigarancajiaque 16 coaretajia amenajiaquerineca. Ijivetaca avisanaquegueti Paashicoa iramacaantaqueri icapioajiacagueti maasano incatsimatimentajiaquerini-jite. ⁵ Ariqueate yoguisantajiaqueri santanaqui, cotanquitsi iriraqueate quemisan-tajatsica igantaga yamanajiaqueri Aapani Irioshi yamanacoventajiaqueri Peerero. ⁶ Apanivani tsiteniri intsitenitacotanaje, ariqueate osavincaguitetanaquegueti ira-macaantaquerimequeate Erorishi. Imaanaque Peerero, niganqui yoajavetacari mavite coareta, ishiticacotantajiavecari mavite cavorejatsari ijempequiqui. Iriraqueate itsipa-pae coareta iticaajavetaca sotorontsiqui. ⁷ Ari imapocapojaca irashivantite Ama-jirote, otsirencanaca intsompogui santanaqui. Iriraqueate ashivanti ichagatapojaqueri Peerero imerequiqui, itinajaqueri, icantiri:

—Pintinajanaque taampina.

Ariqueate mana oishorejaguetanaca cavorejatsaripae ishiticantajivetacarica.

⁸ Ariquea icanqueri ashivanti:

—Pinchompimashitacotanajempa, pincaviguititanajempa.

Iroompaqueate yagacagueti, icantsitariqueate aisa ashivanti:

* 12:1 Iriratica Erorishi irio icantajitica Erorishi Aguiripa I, irio ishaine iriquetica Erorishini majirontanquitsica ivoaquegueti Jesoshi (Mt. 2.1).

—Pampinaicanajemparo pimorenatsite quitsaarentsi, caacate poguijatanaquena.

⁹ Icatianaca yoguijatanaqueri, cotanquitsi tee intsateji arimajaca yaanajiri irashivantite Aapani Irioshi, mana oquejetimotacari yoguimagaguetei. ¹⁰ Iroompaqueate iso-toanajiguetei iriquetei yavisajianaque coaretapae amenajivecarica isantanatacojiguetei, ariqueate iquejianaqueri choocajanquitsica ontaniqui. Ariquea yarejetapojacaro otsipa sotorontsi yashitantajitacaca cavorejamentari agasotoncacaguetei quenavovoirontsiqui ochoocaguetaqueguetei tsovironaquipae. Ariqueate mana inchiqiojitsitaqueate ashirejashitanaca. Isotosotoitanaque yoajianaque yagatejiaqueroguetei otsipapoqui, ariqueate ipeapitsatajari ashivanti. ¹¹ Iriraqueate Peerero isavigarejacotanajiguetei icanti:

—Iroosacanicate arimajasacanicate itigarancaquenari Aapani Irioshi irashivantite, yoguisotojaana aatonijite imetojacaantana Erorishi, aisa aatonijite yatsipetacaajianatsi napijoriojiateni.

¹² Ariquea yamenamajavetanajaguetei teequeate inchoocatajeji santanaqui, yoanaji otsovironaquitequi Maria iriniro Joanca pajitatsica aisa Maricoshi. Ariqueate ichoocajiaque oraniqui irapiguemisantarijiateni icapiocajiaca yamanajiaqueri Aapani Irioshi. ¹³ Itinquiapojaqueroqueate ashitacomentonsi, ariquea ocoraqueque aajanirentsi icantajitica Irore amenaquitiri taaca ipajita. ¹⁴ Ariqueate oquemapojaqueri iriguentei quenquetsatanquitsi Peerero oshinetanacaqueate, cotanquitsi teequeate ashirejacoteriji, mana opianaca intati oshianacaqueate ocamantajiaqueri chooca Peerero sotsiqui. ¹⁵ Iriatimpajia icantajiguero:

—Mana pishoncacotaca intati.

Cotanquitsi ocanti iroatimpa:

—Arimaja.

Iriatimpajiaqueate icantajiguero:

—Iroosacanicate, iriocajate irashivantite Aapani Irioshi quempoguijirica.

¹⁶ Cotanquitsi iriatimpa arimpaqueate itinquianaquero ashitacomentonsi. Iroompaqueate yashirejacojiavecariguetei yamenajiguero iriguentei Peerero, mana yoajianaque intati. ¹⁷ Iriatimpa icantiri vacoc cameetsanijite irimajerejianaquenijite. Ariqueate icamantajiaqueri quero icotajirini yoguisotojairiguetei Aapani Irioshi santanaqui. Aisa icantajiguero:

—Pincamantajiguero Santiago,† jerijia maasano atsipajia apiguemisantarijiateni.

Ariqueate yoanaque Peerero otsipaquei tsovironaqui.

¹⁸ Iroompaqueate osavincaguitetanajiguetei itinajavetanajaguetei coaretajia yame-navetari cajaraguiteni Peerero. Itsaroajianaque icantavacaajianacaqueate:

—¿Querocate yoanaqueni?

¹⁹ Iriraqueate Erorishi itigarancajiaqueri itsipa coaretajia incojaiaquiteri, cotanquitsi yamenajivepojari cajaraguiteni. Ariqueate icoacojiaqueri quempoguijaviacarica, ariqueate imetojacaantajiaqueri. Ariqueate yojocanajiro Erorishi Jorea, yoanaque Seseraqui, ariquea iguinenitaja ontaniqui.

Imetojaqueguetei Erorishi

²⁰ Irira Erorishi icatsimajiaqueri guintenijiatsica Tiroqui aisa Shironequi, teequea capichaji incatsimajiguero, cotanquitsi iriatimpajia iquemavacaajiaca iroajianaque irogameetsajiajateri, iriotarite majirontatsica oponeacaguetei isheca. Iriqueti yogu-ishinejajipojaque iramajirore icantajitica Verashito cameetsanijite irionijite amitacojiaquerine cantajiaquerineca inintaque irogameetsajiajeri. ²¹ Ariquea irira Erorishi icajemacaantajiaqueri querocaca savincaguiteni incoraquejiaque irogameetsantavacaajijempaqueate. Ariquea aapojaca incoraqueantajiaquempace iquitsaatanacaqueate

† 12:17 Santiago. Iricatica Santiago, tee irio iriguenteijeguite Joanca imetojacaantaqueca Erorishi (otsapa 2), iricatica iriguentei iriguenteijeguite Jesoshi (Mt. 13.55; Jn. 7.3-5; Ya. 1.14). Iriocajate amenaqueca imaica jivaquerica quemisantajiatatsica Jerosarequi (Ya. 15.13; 21.18; Ga. 1.19; 2.9). Irio tioncaquero ca paperi icantajitica Santiago.

Erorishi iitsaare iquitsaatapinicaca icapiocajiagueti. Ariqueate icoraquejiaque isavicaque iriatimpa isavicampiniquegueti iquenquetsatapiniquegueti, ariqueate iquenquetsatacaajiaqueri. ²² Ariqueate iquemajiaqueri capiocajanquitsica icajemajianaquequeate ishineventajianacari icantajiguiri:

—Irinta quenquetsatanquitsica teenicate irio caquinte, iriguenti irioshitatsica.

²³ Iroompaqueate iquemavaquitigui Erorishi yaventacomajatiganimaja tee incantamajateji cameetsa, tee incanteji: “Naroguenti caquinte, choocatarite apaniro Irioshimajaca agavejamajatatsica.” Iroompaqueate iquejetanaquerogueti imaica icoraquetapojaque irashivantite Amajirote yashinoncajacaanacari. Ariqueate iquenaque yashinoncajanaca iquenitanaqueriqueate quenitsi, ariquea imetोजनाque.

²⁴ Oraqueate Iguenquetsatsare Aapani Irioshi arimpaqueate ovarajacovaetanacani otsitacaguitejacovaetanaca maasano, itsavetantajitanaquero. ²⁵ Iriraqueate Verenave jeri Saoro iteroncaquerogueti icoraquetashitaqueca Jerosarequi ipijaianaja Antioquiaqui itsipajianacari Joanca Maricoshi.

13

Yoajianaquegueti Verenave aisa Saoro intsavetantajiguiri Amajirote Jesoshi

¹ Iira quemisantajatsica guintenijiatsica Antioquiaqui iconoagarantajiacca iriguenti tsavetantajiguiroca icanquerica Aapani Irioshi, itsipa iriguenti tsatacaantiroca Iguenquetsatsare Aapani Irioshi. Jeri irica: Verenave, Shimeone (icantajitica Quisaari), Iroshio Shirenequitica, Saoro, jeri Manaene (itsipataca majirontatsica Erorishi* iquenquevarijiguigueti). ² Ariqueate icapiocajiacca iriatimpajia yovashianquitiro isheca, iriguenti isavicaventajiaque itsarotentajigari Amajirote. Ariqueate icantajiguiri Ishire Aapani Irioshi:

—Poashitenari Verenave jeri aisa Saoro irisavicaventenaroniji nocajemimentajiaquerica.

³ Iroompaqueate yovashianquitirogueti isheca, yamanajiaquerigueti Amajirote, ipamijiaqueriqueate Verenave jeri Saoro icantajiaqueri:

—Pija imaica.

⁴ Ariqueate itigarancajiaqueri Ishire Aapani Irioshi yoajianaque ontaniqui Sereoshiaqui quantijaqui. Itehiteitanaca yaacojianaqueri tampija yoajianaque inirovogorequi icantajitica Tsipere. ⁵ Iroompaqueate yarejerejeipojacagueti yagatacojiapojaque guinteninintsiqui icantajitica Saramina, yoajianaque shinagogapaequi icapio-cantapiniyacaca joriopae itsavetantajianaquero Iguenquetsatsare Aapani Irioshi. Itsipatanacariqueate aisa Joanca† yamitacojiaqueri. ⁶ Ariqueate itsavetantajianaquero itsitacaguitejajianacaro guinteninintsi pae ontaniqui Tsiperequi, iroompa yarejejiaca Paposhiqui. Ariqueate inejajiapojaqueri amataatsica aventaroca iragavejane ampatsini, icantamampeaca: “Jero icanquenaca Aapani Irioshi.” Iriatimpa iriguenti jorio icantajitica Varejesoshi, ipajijitajiri aisa Erimashi. ⁷ Iriguenti itsipataca majirontatsica Sergio Pavoro, caaviji itsamajati. Iira Sergio Pavoro ininquetarite inquemisanquero Iguenquetsatsare Aapani Irioshi icajemacaantantajiacarica Verenave, Saoro cameetsanijite intsatacaajiaqueri. ⁸ Cotanquitsi Erimashi, irira aventaroca iragavejane ampatsini (irootaquetari oncanque ivajiro oguipitsoquerogueti), iticaticatacovetavacariqueate yaacananantajavetavacarica aatonijite iquemisantajiguiritsi majirontatsica. ⁹ Iriraqueate Saoro (pajitatsica aisa Paavoro) ichoocashirentamajatanqueri Ishire Aapani Irioshi, ariquea yamenanaqueri intati sorere, ¹⁰ icantiriqueate:

—Aviguenti amatavijantatsica guijatacotirica ampatsini pantaguishetantacaroca covaeguisherentsi, manaquea pimanintaquero maasano iroomajatatsica. Ogantaga pogaaquero itsatacaantaqueca Amajirote. ¿Aatempa povashiantiro pantanaqueca?

* 13:1 Iriratica Erorishi irio icantajitica Erorishi Antipashi; pamenero tioncanquitsica isavivanaqui otsapaqui Irc. 3.1.

† 13:5 Joanca. Iriorquea icantajitica Joanca Maricoshi, mavitetatsica ivajiro. (Pamenero 12.12, 25; 13.13; 15.37-38.) Iriguenti ijitane Verenave (Cor. 4.10).

¹¹ Imaicaqueate incatsimatimenquempiro Aapani Irioshi, pishamponcajatanaquequeate. Osamanitanaque aatoqueate pamenajitsi, ompitsequimotaquitempiqueate.

Ariqueate taampinaqueate opitsecacotanaqueri, teequeate iramenajeji. Ipamipamiguitetanaquequeate intati, ininquequeate quericampa acatsatanajerineca. ¹² Ariqueate yamenavaquerigueti Sergio Pavoro iquemisanqueri Quirishito, manaquea yoanaque intati iquemaquegueti itsatacaantajiaqueca itsavetanquerigueti Amajirote.

Yoajianaquegueti Paavoro aisa Verenave Antioquiaqui choocatantacaroca Pishiria

¹³ Iiraquea Paavoro aisa itsipajiacaca itejianaca Paposhiqui, iquenajatacojianaque yoajianaque Perejequi choocatatsica Pampiriaqui. Irirampani Joanca ipiapitsatanajari yoanaji Jerosarequi. ¹⁴ Iriatimpajia yarejetapojacagueti Perejequi, yavisanaque aisa yoajianaque ontaniqui otsipaquei Antioquiaqui, ora Pishiriaquitica. Ariqueate aapojacagueti saavaro imagorejantajitaca iquijaquijaitanaque shinagogaqui icapiocontajiacca joriojia, isavicajiaipojaquequeate. ¹⁵ Ariqueate iteroncajitaquerogueti yapatsajavantajitaquerogueti itioncacotanaqueca Moishishini aisa itioncacojianaqueca tsavetantajiguirica Aapani Irioshi, iriraqueate jivajianquitsica shinagogaqui icapiocontapinijiacca icamantacaantajiaqueri Paavoro jeri Verenave icampojaqueri:

—Napijoriojiateni, choocagueti pinintajiaqueca pincamantajiaqueca cameetsanijite pintampishitacamentajiaquenaniijite, iintsija pincamantajiguena.

¹⁶ Icatianacaqueate Paavoro icanqueri vacoc cameetsanijite irimajerejianaque, ican-tajigui: “Pinquemisantajiavaquenaja shiramparjia ishiraerijia, aisa maasano itsipajia pincatsajiguirica Aapani Irioshi. ¹⁷ Coramani Irioshite ishiraerijia icoguiajiaqueriquea avaesatiniteni, yoshequiamajatanaqueri iguintenijavetacagueti Ejepitoqui. Iroompa yonigaajiaqueri itampishica, yaajianajiri. ¹⁸ Yatsiperejacojiacariqueate Aapani Irioshi ovegarataca 40 ajagantsi ichoocajiaquegueti oquitamampororoipojaquegueti. ¹⁹ Ariqueate yamitacojiaqueri yagavejacaajiaqueri iteroncajiaqueri oshequini guinteni-jitsica Canaanequi, yaapitsajiaqueri iguepatsite, irioqueate yojocajiajini avaesatinijiateni. Iiraqueate caquinteguetatsica teroncajianquitsica ovegarajiacca iguenquetsatsarepae 7. ²⁰ Ariquea ocaratapojaque 450 ajagantsini maasano ocatica.

“Iroompa icanque Aapani Irioshi inchoocataque joese comajamajiaquerineca. Ariquea imetojavetaca, cotanquitsi choocaqueate piaguetajarica irosati aapojacagueti ichoocaquegueti Samoirini irira tsavetantirinica Aapani Irioshi. Irioqueate carapojaque-roca. ²¹ Iroompa iriatimpajia icantajiaqueri Aapani Irioshi inintajiaque inchoocataque imajirojiate. Ariquea Aapani Irioshi iquemisantajiaqueri ipeacaantacarica imajirote Saoroni irijaniteni Quishini ichoviquini Vejamineni. Ariquea imajirontaca 40 ajagantsi. ²² Iroompa Aapani Irioshi yovashiantajiri Saoroni, irioqueate ipeacaaja imajirojiate Taavini irijaniteni Isaini. Ariqueate icamantacoqueri icanti: ‘Namenaquequea Taavi irijanite Isai, noshineventamajatacari, irantaguequeroquea iriguenti maasano nonin-queca.’ ²³ Imaica inetsanataquero Aapani Irioshi icanqueca coramani, itigaranca-queriquea acaniqui Ishiraeriqui irira Aantavanquitsica ichoviquiqueca Taavini, irio-quea Jesoshi. ²⁴ Tequeratagueti incoraqueate Jesoshi intsavetante, iriqueti parianacaro Joanca itsavetantaque ican-tajianaqueri maasano ishiraerijia incantashitatijaianaque-mpa irovashiantajianaquero yantajiguirogueti teeca oncameetsateji iriviñacajatacaan-tajianaquempa. ²⁵ Ariqueate pajinigueti interonquero Joanca yantaqueca icantanaque: ‘¿Taa pijiquenaji? Tee naroguenti, irioquea impoitapojenaneca. Iriatimpa caaviji yanaaquena, aatotarite noquempejitaritsiquea iriatimpa nompeaquempame amiquer-ineca noishorejacoquerime igaviguitire.’

²⁶ “Imaica nonintaque noncamantajiaquempiqueate aviatimpajia nogonorojia ichoviquijianaqueca Averaameni, aisa aviatimpajia teeca pijorijoigueji pincatsajiguirica Aapani Irioshi, aroguenti itigarancacajiro ocatica Quenquetsatsarentsi irantavajajica.

²⁷ Maasano guintenijsica Jerosarequi, aisa imajirojiate teenicate intsajiguenicate iroguenti icoraquetashitaque Jesoshi irimeshijajajaji, teenicate inquemeroji itioncacotaqueca tsavetantirinica Aapani Irioshi yapatsajavantapinijavetacarogueti savincaguiteri imagorejantajitaca. Cotanquitsiqueate imetojacaantajiaquerigueti

onetsanatanaca itioncacojiquerogeti.²⁸ Teequeate onchoocavetempaji onquenantapojempaca irimetojimentantajitaquemparica, cotanquitsiqueate arimpaqueate icantajianaqueri Pirato: ‘Pimetojacaanteriorshinete.’²⁹ Iroompa inetsanajiaquerogueti maasano itioncacojitaquerica, imetojaquegueti ariqueate yogaguijitaqueri coroshiqui, yoguijaajitaquitiri omoroqui.³⁰ Imetojamajavetaca, cotanquitsi Aapani Irioshi ivochantajiri.³¹ Ariqueate ovegaratanaca oshequi savincaguiteri yonigaaguetajari oguijajianaquerica iponeacagueti Garireaquei yoanaquegueti Jerosarequi. Iriojiatarite imaica tsavetantajiajirica icamantajiaqueri caquinte.

³² “Imaica nocamantajiaquempiro aviatimpajia oguishinejantatsica: oratica icantajiaquerica Aapani Irioshi avaesatinijiate,³³ inetsanacajiroquea aatimpajia ichoviquijianaqueca, yovochantajiritarite Jesoshi. Iriotaque itioncacojique Saremoqui 2 icanquegueti Aapani Irioshi:

‘Aviatimpa aviguenti Irijani,

ocatica savincaguiteri aviro nashimajaca nirijanite.’

³⁴ Icanquetarite Aapani Irioshi coramani irovochantajeri Jesoshi aatonijite avejancatsi itsino. Aritarite ocanque itioncacojiqueca ocanti:

‘Aviatimpajia nonetsanaquempiro maasano nocanquerica Taavini.’

³⁵ Aisa itioncacojiquero otsipaquei [Saremo] ocanti:

‘Aato pishinetiro avejanquempa itsino Pigomajamajare.’

³⁶ Iriaqueate Taavini yamitacojiaqueri igonorojia coramani, yagaqueneri maasano inintacaaquerica Aapani Irioshi, cotanquitsi coajica imetojanaquegueti iquitajitajiguiro itsipajiaari avaesatinijiate, ariquea yavejancanacaqueate.³⁷ Cotanquitsiqueate iriraticaquea ivochantajica Aapani Irioshi teequeate iravejanquimatempaji.³⁸ Irootaquequea, nogonorojia, nonintantacaca pintsamajiaque iriraquea Jesoshi, iriguenti agavejatsi irishejiajajiro aguempavejereja, irootaque notsavetantimojiaquempi.³⁹ Ora itioncacoqueca Moishishini teenicate agavejeji ogameetsajiajeri iriraqueate oguijatacojiaqueroca, teequeate omeshiajigueriji. Cotanquitsi irira aventajigarica Jesoshi irimeshijajajeri irogameetsantajajeri.⁴⁰ Shoshoh, inchiqiojijata piquejajigaritsi irirajia icantacojiaqueca Aapani Irioshi itioncacaquerigueti tsavetantajiguirica icanti:

⁴¹ ‘Pamenajigue aviatimpajia shirontimentantatsica, mana poajianaque intati, pimpeajiaquempaquea maasano, irooriji choocatirajampigueti nantaquequea ocaantantatsica intati, cotanquitsiquea oratica nantaqueca aato piquemisantajiguiro inchoocajiavequempagueti camantajiavequempineca.’ ”

⁴² Iroompaqueate isotosotoitanajigueti shinagogaqui, irirajia quemisantajiaquerica icantajiavaqueri:

—Pimpiajeja pinquenquetsatacaajajena aapojajempagueti otsipa saavaro imagorejantajitaca, pinquenquetsatacotajero ocatica.

⁴³ Iroompaqueate icatijianaja Paavoro jeri Verenave yoguijaguijaitanaqueri oshequini joriojia, jerijia teeca iriojia joriojia guijatacojiguiroca itioncacotanaqueca Moishishini. Ariquea icantajiaqueri ogantagaja inquemisantamajiaqueri Jesoshi.

⁴⁴ Ariqueate aapojajagueti saavaro imagorejantajitaca icapiocajianaqueate oshequini caquinte, icoraquetashijiaqueri Paavoro jeri Verenave iquemisantajiaqueri itsavetantajiaquerogueti Iguenquetsatsare Amajirote. Tee iroshequiguijeji irira teeca incoraquejiguijeji.⁴⁵ Cotanquitsi irira joriojia iroompaqueate yamenajiavaquerigueti icapio-caventajianacari ocanquitiri shirec icatsimajianaquequeate. Ariqueate inijashijianacari Paavoro icantajiguiro maasano:

—Aatoqueate piquemisantajiguiritsi, mana yamatavijajiaquempi intati.

⁴⁶ Irira Paavoro jeri Verenave tee intsaroajiguijeji arimpaqueate iquenquetsajianaque icantajiguiro:

—Aviquetitarite nocoraquetashijiajetaca iroaqueragueti nontsatacaajiaquemprome Iguenquetsatsare Aapani Irioshi, aviguentitarite joriojia, cotanquitsi teequeate pishineventajiavaquemparoji, teecampa pinintajiguijeji pincoguitempani panijajiaje.

Imaicaqueate iriguenti noashijianaje nontsatacaajiaqueri teeca iriojia joriojia.
⁴⁷ Irootarite icantajiaquenaca Nomajirote, icanti:

‘Nopeacaaquempi tsivotacojiguirica caquinteguetatsica,
 cameetsanijite pintsatacaajiaqueri quero nocotaca nomeshiantigueti,
 pintsitacaguitejanaquemparo maasano quepatsi ovegaraguetapojacagueti.’

⁴⁸ Iroompaqueate iquemajiavaquitiguri teeca iriojia joriojia ishinejianaca icantajianaque:

—Oganejencamajata Iguenquetsatsare Amajirote.

Ariqueate iquemisantajiaque maasano inintacajiaqueca Aapani Irioshi coramani incoguitempani inconoajiaquempari jenoqui inquitequi. ⁴⁹ Arimpaqueate ovarajacotanacari Quenquetsatsarentsi tsavetantaquerica Amajirote iquemajiaquero maasano guintenijiatsica oraniqui. ⁵⁰ Cotanquitsiqueate irirajia joriojia iquenquetsatacaajiaqueriqueate imajirojiate Antioquiaquitica jerojia manquigarentsijia anaantaguetatsica ora caavijica oquemisantamajiavetari Aapani Irioshi, injashijiacari Paavoro aisa Verenave. Ariquee iroompaqueate iquemajiavaquitigui iriatimpajia icatsimajiaqueri Paavoro aisa Verenave itigarancajiajiri aatoniji ichoocataji iguinteniqui. ⁵¹ Iriatimpajia ipanerejama-jajianajiroqueate quepatsivane yagaticacojiaquerica cameetsanijite iroonijite iramenantajiaquempariguetei intsajiaqueri aato ipiajatsi, teenica irinintajigueti inquemisante. Aritaquequeate yoajianaque Iconioqui. ⁵² Cotanquitsi iriraqueate quemisantajiaatsica Antioquiaquitica ishinejianaqueate, ichoocashirentamajianaqueri Ishire Aapani Irioshi.

14

Paavoro jeri Verenave ichoocajiaque Iconioqui

¹ Ariqueate yarejejiapojaca Iconioqui iquijajiapojaquequeate shinagogaqui icapiocantajiacajia joriojia iquenquetsajiaque. Iquemisantagarantajiaque oshequini joriojia jerijia aisa teeca iriojia joriojia. ² Cotanquitsi irira joriojia teeca irinintajigueti inquemisantajigueti iquenquetsatacaajiaqueri teeca iriojia joriojia yagavejajianaqueri, irootaquequeate itsititantajianacaca icatsimajianaqueri quemisantajiaatsica. ³ Cotanquitsiqueate Paavoro, Verenave teequeate intsaroajigueti arimpaqueate itsavetantajianaqueri Amajirote. Osamani ichoocajianaqueni itsatacaantajianaque. Iriguentitarite agavejacaqueri Aapani Irioshi yantantajiacaca teeca irinejajiteji cameetsanijite iramenimentajiaquerinijite iriguenti tigarancakeri Aapani Irioshi. ⁴ Cotanquitsi iriraqueate guintenijiatsica Iconioqui teequeate inquemavacaajianajempaji. Inconoagarantajiaqueate iriguentijia ishineventajiacajia joriojia. Choocaquea aisa shineventajiacarica itigarancanejia Jesoshi. ⁵ Ariqueate irira joriojia jerijia teeca irijorijoigueti iquemavacaajiacajia itsipajiacari imajirojiate icantajiguri:

—Jameshiatsi ancatsimajigueri antsinacajigueri.

⁶ Iroompaqueate iquemacojiaqueriguetei ishiashiaitanaca yoajianaque Irishitiraqui aisa Terevequi choocaguetatsica Iricaoniaqui, jero aisa ovegaraguetapojacaguetei Iricaonia, ⁷ itsavetantajianaquero Quenquetsatsarentsi Oganejencatatsica. ⁸ Ontaniquiqueate Irishitiraqui inejajiapojaqueri savicaque irira magoviroshiri ogantagaivoacoquero iroaqueraguetei imagoviroshica. ⁹ Iriatimpa iquemisantamajatavaqueri Paavoro iquenquetsataqueguetei. Iroompaqueate yamenaqueriguetei Paavoro yamenamajatavaqueri itsatantacarica arimaja itsataque iragavejaque Aapani Irioshi irogueshitajeri. ¹⁰ Icajemacotsitariqueate:

—¡Pincatiamajatanajeja!

Icatianaqueate catic yanijitanaji. ¹¹ Irirajiaqueate capiocajianquitsica yamenajia-avaqueriguetei yogatijiri Paavoro icantajianaque inirojencani Iguenquetsatsarejiaqui Iricaoniaquitica icantajigui:

—Yaguijijapojaque irioshijia, caquintejiapojaque.

¹² Irira Verenave icantajiaque iriguenti Seoshi,* iriraquea Paavoro icantajiaque iriguenti Eremeshi, iriguentitarite quenquetsamajatanquitsica. ¹³ Oraqueate teemporo itsaromentantajitarica Seoshi ochooque ovegarraguetapojacaguete otantotacaguete Irishitira. Iriraqueate saserorote quempoguijiroca teemporo yamacaantajiaqueate caapironcaaripae iconconatacaaguecari ochotentegapae itsipajiapojacari oshequini caquinte. Inintajiavetaca irijitorejajiaquenerime caapironcaaripae, irojocaquenerime Verenave jeri Paavoro. ¹⁴ Cotanquitsiquea iquemajiaqueguete Verenave jeri Paavoro itigarancanejia Jesoshi, iperejacojianaca iitsaare iramenimentajiaquerinijite teequeate irinintajigueti intsaromentajiaquempari, teequeate irinintajigueti irijijiaqueri iriguenti irioshi. Ishiashijianacariqueate icapiocajiacaguete icajemajianaque icantajigui:

¹⁵ —Aato piquejiguiro imaica. Aato pitsaromentajigana. Naatimpajia ariqueate noquejiaquempi aviatimpajia, caquintetarite nonajiaque. Iroguenti nocoraquetashijiaque noncamantajiguempi povashiantajianajeronijite pishineventashijiacaca intati, irionijite pinquemisantajiaje Irioshimajaca peacaaguetacaroca inquite, quepatsi, quantija aisa maasano choocatantaguecaroca. ¹⁶ Coramani Aapani Irioshi yovashiantajiavecari maasano caquinteguetatsica manaqueate ichoocatashijiaquea intati yantajiavetaca taaca opajitapae inintajiaqueca. ¹⁷ Cotanquitsiqueate teequeate impeacomajajiguempariji irosati imaica teequea impeacojiaji aatimpajia, ogantagaqueate icavintsajajiaji cameetsanijite antsajiaquenijite chooca iriatimpa. Itejajiro incani aisa yoguimoncaguetajiro panquirentsipae ochoocatantajaca ashecajia ashinetantajiacaca. Iriguentiqueate pintsaromentajiguempa.

¹⁸ Iquejejiavecariqueate imaica teequeate inquemajigueti, querocampate incojiaquerini, arimpaqueate inintajiavetanacaqueate irijitorejajiaquenerime caapironcaari, irojocajiaquenerime. ¹⁹ Ariqueate yarejerejeipojaca joriojia Antioquiaquitica jerijia Iconioquitica iquenquetsatacaajipojaqueri maasano icantajiaqueri incatsimajiaqueri, irootaquequeate yaantajiancarica Paavoro ipishoncashijiaqueri mapi taan, taan, itsinatsinajiaqueri. Ariqueate ijijiaqueriji metojamajatanaque inoshicajianaqueri yaajianaqueri ipishoncajiaquitiri ovegarraguetapojacaguete tsovironaquipae. ²⁰ Cotanquitsi ariqueate icapiocaventajiapojacari irapiguemisanariteni itinajanaja icatianaca yoanaji Irishitiraqui. Osavincaguitetanajigueti itsipatanajari Verenave yoajianaque Terevequi ²¹ itsavetantajianaquero Quenquetsatsarentsi Oganejencatatsica. Iquemisantajiaque oshequini. Ariqueate iteroncajianajiroguete ipiapiaitanaja Irishitiraqui, Iconioqui aisa Antioquiaqui. ²² Itampishitacajianajiri maasano quemisantajiatatsica icantajianajiri:

—Pincoguitempani pinquemisantamajajianaque, aato povashiantajiguero piquemisantajiaqueca. Aritarite antsipejiaquempa oshequi anquijantanaquempana imajirontaguete Aapani Irioshi.

²³ Ariqueate yaagarantajiaqueri cameetsanijite inquemoguijajiajeri quemisantajiatatsica capiocapinijiatatsica. Yamanajiaqueri Aapani Irioshi, yoguipaquijajiaquitiro isheca teequeate irishecajiguempaji, ariqueate icantajianajiri:

—Inquemoguijajajempi Aapani Irioshi piquemisantajiaqueca.

²⁴ Ariqueate yoajianaque Paavoro jeri Verenave iquenajianaquequeate Pishiriaqui yarejerejeivaetaca Pampiriaqui. ²⁵ Itsavetantajianaquero Iguenquetsatsare Aapani Irioshi Perejequi, ariquea yoajianaque Atariaqui. ²⁶ Ariquea itejianaja yoacojianaji Antioquiaqui. Ariqueate oraniqui itigarancajitaqueri iroaqueraguete, icantajitiri Aapani Irioshi: “Jeri irica pincavintsajajiaqueri irinetsanajiaquempiroguete taaca opajitapae pinintacaajiaquerica.” Ariqueate inetsanajiaquero. ²⁷ Imaica yarejetapojajaguete icajemajiaqueriqueate maasano quemisantajiatatsica icamantajiapojiaqueriqueate maasano yagavejacaquerica Aapani Irioshi aisa icamantajiaqueri icavintsajajiaqueriguete Aapani Irioshi teeca iriojia joriojia cameetsanijite inquemisantimentajiaquenijite iriatimpajia. ²⁸ Ariqueate osamani ichoocajiaque ontaniqui itsipajiacari irapiguemisanarijiateni.

* 14:12 Seoshi (Zeus) aisa Eremeshi (Hermes) iroguenti ivajirocae irioshivijirentsipae itsaromentajiacaca guiriegouja. Irira Iromaquitica ipajitaqueri Seoshi Júpter, ipajitaqueri Eremeshi Mercurio. Icantajiaque irira Seoshi iriguenti irioshi anaantamajiatatsica, irira Eremeshi icantajiaque iriguenti itigarancane irioshipae, itsavetacotaquero icantajiaquerica.

15

Icapiocajiaca Jerosarequi iquenquetsatacojiaquero itioncacotanaqueca Moishishini

¹ Choocatirajagueti Paavoro aisa Verenave Antioquiaqui icoraquejiaque joriojia poneponeitanquitsica Joreaqui itsatacaajiaqueri quemisantajiatsica icantajiguiri:

—Pinetsanajiaquero itioncacotanaqueca Moishishini, pintotsaiquitacaantajiguero pichonquimashi. Aatogueti pitotsaiquijiguero aato imeshiguimpitsi Aapani Irioshi.

²⁻³ Cotanquitsi iriraqueate Paavoro aisa Verenave icantimentajiaqueri. Arimpaqueate ipígatsatavacaajianaca teenicate inquemavacaajiguempaji. Irootaquequeate itigarancantajiacarica Paavoro aisa Verenave, jerijia itsipa quemisantajiatsica icantajiaqueri:

—Poajianaque Jerosarequi pincoacojiaquiteri querocaca incantajigue itigarancanejia Jesoshi jerijia quempoguijajiguirica quemisantajiatsica.

Itigarancajiaqueri, ariqueate yoajianaque iquenaquenaitanaque Penishiaqui aisa Samariaqui icamantaguetapojaqueri:

—Imaica iquemisantajiaque oshequi teeca iriojia joriojia.

Iroompaqueate iquemacojiavaquerigueti maasano quemisantajiatsica ishinejianaqueate.

⁴ Ariqueate yarejerejeipojacagueti Jerosarequi yamenajiavaquerigueti quemisantajiatsica ishinejianaqueate. Aritarite ichoocajiaque itigarancanejia Jesoshi jerijia quempoguijajiguirica quemisantajiatsica. Icamantajiajojaqueri maasano yantaguetaqueca Aapani Irioshi yamitacojiaquerigueti itsavetantajiaquerigueti.

⁵ Cotanquitsi ariqueate iconoajiacari pariseojia quemisantajiaquerica Quirishito icatintiitanaqueate icantajiguiri:

—Intotsaiquitacaantajiaqueroqueate ichonquimashijia quemisantajiatsica teeca iriojia joriojia, aisa irinetsanajiaquero maasano itioncacotanaqueca Moishishini.

⁶ Ariqueate icapiocajiaca itigarancanejia Jesoshi jerijia quempoguijajiguirica quemisantajiatsica inquenquetsatavacaajiaquempa inquemavacaajiaquempa.

⁷ Osamaniqueate isavicaventajiaquero iquenquetsatavacaajia. Ariqueate icatianaca Peerero icanti:

—Napiguemisantarijiateni, aviatimpajia pitsajiaquetarite icoguiaquena Aapani Irioshi coramani, pinejacojiaquenatarite. Ariqueate itigarancanejia nontsavetanquero Quenquetsatsarentsi Oganejencatatsica, nonquenquetsatacaajiaqueriqueate teeca iriojia joriojia cameetsanijite inquemajiavaquerogueti inquemisantajiaqueri Jesoquirishito.

⁸ Ariqueate irira Aapani Irioshi amenashirentajiguirica maasano caquinte itigarancajiaqueneri Ishire teeca iriojia joriojia iquejetacaajiacaji aatimpajia cameetsanijite antsamajajiaquenijite ishineventajiacari iriatimpajia aisa. ⁹ Ipintsajiacari iquejetacaajiacaji aatimpajia, iquemisantajiaqueritarite ariqueate imeshiajiaqueri ipeacotsijajari iguempavaerejia. ¹⁰ Imaica ¿arimpate pamentempari Aapani Irioshi? ¿Arimpate pijiqueji teeji intsateji? Picantavetaritarite teeca iriojia joriojia aatogueti inetsanajiguero itioncacotanaqueca Moishishini aato imeshiajiguiri Aapani Irioshi. Aroguenti jorio amejavetaro, cotanquitsi tee agavejajigueti anetsanamajiaquero, aisa maasano avaesatinijiate tee iragavejajigueroji. ¿Quero incojiaquempa itsipapae caquinte irinetsanantajiaquemparo? ¹¹ Cotanquitsi imaica atsajiaque mana icavintsajajiacaji intati Amajirote Jesoshi yaantajavajica aatoniji apegá. Ari iquejejaqueri iriatimpajia aisa teeca irijorijoigueti, mana icavintsajajiaqueri intati.

¹² Iroompaqueate yagatanaquitigui Peerero, imajerejianaque maasano iquemisantajiaqueri Verenave jeri Paavoro itsavetantajiaqueroqueate maasano yantajiaqueca yagavejacaajiaquerigueti Aapani Irioshi iquenquetsatacaajiaquitirigueti teeca iriojia joriojia, yantajiaque oacaantantatsica intati intsatimentajiguenijite iriatimpajia irio tigarancanejia Aapani Irioshi.

¹³ Ariqueate iteroncajianaqueerogueti itsavetantajiaqueca, irio quenquetsatanquitsi Santiago, icanti:

—Pinquemisantajiaquena aviatimpajia napiguemisantarijiateni. ¹⁴ Imaica icaman-tajiacaji Shimo* quero ocotacani iroaqueragueti imapocaqueroqueti Aapani Irioshi icavintsajajiaqueri itsipapae caquinte teeca irijorijoigueti, manatarite inintacaqueri inquemisantajiaqueri iriatimpajia aisa. ¹⁵ Tampatica oanaquero itioncacojiaqueca tsave-tantajiguiroca icanquerica Aapani Irioshi ocanti:

¹⁶ ‘Oncoramanitapojajeguete noncoraquetaje,
nogatijero iitsaarevanconi Taavini† soveanquitsica,
novetsicajero pomatsavetsica,
nonetsanatajero.

¹⁷ Ariqueate nonquejetaquero imaica cameetsanijite itsipapae caquinteguetatsica inco-
aguetaqueri Majirontamajatatsica,
irirajia teeca irijorijoigueti nocantacojiaqueca nashintajiacari.’

¹⁸ Aritarite iquejetaquero imaica iquenquetsataqueguete Amajirote, itsavetanquerogueti coramani.

¹⁹ “Irootaque noncantantajiaquem-pica aato asereajiguiritsi teeca iriojia joriojia quemisantajiaatsica, aato acantajigui-
ri irinetsanajiaquero maasano itioncacotanaqueca Moishishini. ²⁰ Iroguentiqueate antioncaciaqueneri ancantajiaqueri: aatoja ishecatimajijaaritsi yojocajivetanarica ipeashijia caquinte irioshivijitashitaca intati; aatoqueate ijatashijiajirotsi manquigarentsi teeca iro irashi, aisa manquigarentsi, aato ojatashijia-jiritsi teeca irio ashi; aatoja ishecatimajijaaritsi icaticajiguetica aisa aatoja ishecatacojijaaritsi irirajapae ishecajiguetaca. ²¹ Aritarite ocanque itioncacotanaqueca Moishishini icantimenqueriqueate oca aritarite yapatsajavantapinijiguiro coramani shinagogaqui savincaguiteri qui imagorejantajitaca arejevaetanaca imaica.”

²² Iroompaqueate iquemajiaquitigui itigarancanejia Jesoshi, aisa maasano quemisantajiaatsica jerijia quem-poguijajiguirica, icantajiguiro:

—Iintsija antigarancajiaque mavite iroguijajianaqueri Paavoro aisa Verenave iroajianaque Antioquiaqui.

Iriguenti itigarancajiaque Jorashi icantajitiriquea aisa Varesava, jeri Tsirashi. Iri-atimpajia iriguentijia quemisantajiaatsica anaantajiaatsica. ²³ Itioncaciaqueneriqueate paperi qui yojocajiaqueneri irajianaqueneri, icantajiaqueri:

Imaica napiguemisantarijiateni, nontioncaciaquem-pi paperi aviatimpajia teeca pijorijoigueti guintenijiaatsica oraniqui Antioquiaqui, Shiriaqui aisa Shirishiaqui. Naatimpajia ocantiqui novegarajia itigarancanejia Jesoshi, itsipapae quem-poguijajiguirica quemisantajiaatsica aisa maasano quemisantajiguirica Jesoshi. ²⁴ Imaica nontioncaciaquem-pi aviatimpajia noquemacojiaquem-pitarite yoajianaqueguete guintenijiaatsica acaniqui yasereajiaquem-pi icantashitajiaianacaro notsatacaajiaquem-pica. Icantajiaquem-pi poguijajiajeroja itioncacotanaqueca Moishishini pintotsaiquitacaantajiaquero pichonquimashi, picantantajiacaca: “¿Querocampa noncojiaquem-pani cameetsanijite nontsajiaque queri nonquemisantajiaqueca?” Cotanquitsi teequete naatimpa nontigarancajigueriji, inchiqiuotsitarite yoashijianaca iriatimpajia. ²⁵ Ariquea noquemavacaajia nontigarancajiaqueri nocoguijiaqueca iroajianaque irinejajiaquitampi, iriguenti iroguijaguijaitanaque Verenave aisa Paavoro nopintsajiacaca. ²⁶ Iriatimpajia tee intsarocaguemparoji irimetojaqueguete itsavetanquerigueti Amajirote Jesoquirishito. ²⁷ Iroguenti notigarancamentajiaqueri Jorashi aisa Tsirashi incamantamajiaquem-piqueate maasano oca notioncaciaquem-pica. ²⁸ Iroguenti noncantajiaquem-pi inintaguequeca Ishire Aapani Irioshi, ariquate nocantajiaque naatimpajia aisa: “Cameetsavaeque, iintsija ancamentajiaqueri.” Imaica jeroqueate pinetsanajigueca: ²⁹ aatoja pishecajijaaritsi yojocajiguevecanarica ipeashijia caquinte irioshivijitashitaca intati; aatoja pishecajijaaritsi irirajapae ishecajiguetaca; aatoja pishecajijaaritsi icaticajiguetica; aatoja pijatashijiajirotsi manquigarentsi teeca

* 15:14 Shimo. Iriotaque Shimo Peerero. (Pamenero otsapa 7.) Iroquetinica paperi itioncaqueca guiriegotsaqui ocanti “Simeón”, iroguenti ivajiro iguenquetsatsarequi evereo. † 15:16 Icanqueguete nogatijero iitsaarevanconi Taavini, icantacotaqueri inchoviquitanaqueca majirontanquitsineca quejetajemparineca Taavini imajirontaguete.

iro pashi; pinquejetaquempa aisa aviatimpajia manquigarentsijia, aatoja pijatashijia-jiritsi shirampari teeca irio pashi. Pinetsanjiaquerogueti oca pincomajamajiaquempa. Imaica ariotapojaque.

³⁰ Iriraqueate itigarancajiaqueca yoajianaquequeate Antioquiaqui icapiocajiapojaca maasano yojocajiapojaqueneri paperi. ³¹ Iroompaqueate yapatsajavantajiaquerogueti ishinevaejiaca. ³² Iriraqueate Jorashi aisa Tsirashi iriguentijiatarite tsavetantajiat-sica, iquenquetsajiaque itampishitacajiaqueri yoguishinejajiaqueri irapiguemisantari-jiateni, icamantamajiaqueri. ³³ Osamani queate iconojiaquitari. Ariqueate iquenquet-satacaajiajaviri irira irapiguemisantarijiateni icantavajiriqueate:

—Cameetsataque poajianaje iguintenijiaqui tigarancajiaquempica iroaqueragueti. Pamenanontaguetanajempaja.

³⁴ Cotanquitsi irira Tsirashi ariqueate yamepojaca, apaniro yoanaji Jorashi.† ³⁵ Irira Paavoro aisa Verenave ari ichoocajiaque Antioquiaqui itsipajiacari itsipapae itsatacaan-tajiaquequeate itsavetantajiaquero iguenquetsatsare Amajirote.

Yapijitajiro Paavoro yoaguetanaque intsavetantajeri Amajirote

³⁶ Oshequianaquegueti savincaguiteri ariqueate Paavoro icantiri Verenave:
—Iintsija ampiapiaitanaje anejajijaateri maasano apiguemisantarijiateni acamanta-jiaquitica coramani atsavetanquerogueti iguenquetsatsare Amajirote. Amenajateri queroca icojiacani.

³⁷ Inintavetaca Verenave intsipatanajempari Joanca, icantajitica aisa Maricoshi.

³⁸ Cotanquitsiquea tee irininteji Paavoro intsipatanajempari, yamenaqueritari cora-mani Pampiriaqui ipiapitsatanajaritari tee interonqueroji iquenaguetanaquegueti it-savetantaquerigueti Quirishito.

³⁹ Iquenquetsatavacaajiavetajaqueate aisa teequeate inquemavacaajianajempaji ariqueate itsinampirejavacaanaca. Irira Verenave itsipatanacari Maricoshi itehiteitanaca yoajianaque Tsiperequi. ⁴⁰ Irira Paavoro iriguenti itsipatanaca Tsirashi. Maasano irapiguemisantarijiateni yamanacoventajiaqueri cameetsanijite incavintsajiaqueri Aapani Irioshi, quishoniji iroajianaqueri. ⁴¹ Icatiajianaca yoajianaque Shiriaqui aisa Shirishiaqui itampishitacajiaqueri maasano quemisantajiat-sica.

16

¹ Ariqueate yoajianaque Terevequi aisa Irishitiraqui. Inejajipojaqueri quemisan-tatsica icantajitica Timoteo, oraqueate oguirica iroguenti jorio quemisantatsica. Iri-raqueate oacaantirica iriguenti guiriego. ² Irirajiaquea quemisantajiat-sica guinteni-jiatsica Irishitiraqui aisa Iconioqui yamenajiaqueri iriguenti caaviji icomajamajata. ³ Inintantacaqueate Paavoro intsipatanaquempari, cotanquitsi iroquetiqueate itot-saiquitacaanqueri ichonquimashi aatonijite icatsimajiavaqueritsi joriojia guinteni-jiat-sica iroaroaitanaquegueti. Maasanotarite itsajiaqueri iriguenti oacaantiri guiriego. ⁴ Ariqueate querocagueti iquenaquenaitanaquegueti guinteninintsipaequi icaman-tajianaqueri irapiguemisantarijiateni icantajiaquerica itigarancanejia Jesoshi jerijia quempoguijajiguirica quemisantajiat-sica guinteni-jiat-sica Jerosarequi. Ariquea icanta-jiaqueri inintajiaque irinetsanamajajianaquero. ⁵ Iriraqueate quemisantajiat-sica arim-paqueate iquemisantamajajianaqueri Amajirote. Maasano savincaguiteripaequi arim-paqueate yoshequiamajatanaque. ⁶ Ariqueate inintajiavetaca intsavetantajiaquiterome Iguenquetsatsare Aapani Irioshi Ashiaqui, iro cotanquitsi tee irinintacageriji Ishire Aapani Irioshi, yoantajianacaca Pirijiaqui aisa Garashiaqui. ⁷ Yarejerejeivaetanaca oveg-araguetapojacagueti Mishia. Inintajiavetaca iroajianaqueme Vitiniaqui, ari oquejetaca iroatimpa tee irininteji Ishire Jesoshi iroajianaque. ⁸ Ariquea iquenaguijianaquero yanajianaquero Mishia, yoajianaque yarejejiapojaca Toroashiqui. ⁹ Ariqueate onianqui-itetapojaquegueti irira Paavoro ariqueate mana oquejetimotacari iguimaane, yameniri icatiimotacariqueate Maseroniaquitica, icampojaqueri:

† 15:34 Choocaguetaque paperipae iroquetinica iguenquetsatsarequi guiriego teeca intioncajiteroji ocانىق تىونقانقىسىسا اوساىاقى 34.

—Caacate pinquenapojaque acaniqui Maseroniaqui, pamijapojena.

¹⁰ Yamenaquerigueti, taampinaquea nonetsanajianaquero* cameetsaniji nosotoajianaque noajianaque Maseroniaqui, notsajiaquequeate imaica iriguenti nintanquitsi Aapani Irioshi nonquenquetsatacaajiaqueri Maseroniaquitica nontsavetantapojaquero Quenquetsatsarensi Oganejencatatsica.

Yoanaquegueti Paavoro Piripoqui

¹¹ Ariquea notejianaca Toroashiqui namajatacojianaque, apatiroti noajianaquero Samoterashiaqui. Ariquea osavincaguitetanajigueti aisa ariquea narejejiapojaca Neaporishiqui. ¹² Ariqueate nanijiniijitanaque quenavoquirontsiqui noajianaque Piripoqui. Irootaque guinteninintsi anaqueroca otsipapae quempejitanquitsica choocajianquitsica Maseroniaqui. Iriguenti guintenipojaro poneanquitsica Iromaqui. Ariquea nochoocajianaque aparopae savincaguiteri. ¹³ Ariqueate aapojacagueti saavaro imagorejantajitaca nosotosoitanaque ovegaraguetaapojacagueti tsovironaquipae noajianaque ojaaqi yamanapinijitirigueti Aapani Irioshi. Ariqueate nosavicaipojaque nontsavetantajiapojaro Iguenquetsatsare Aapani Irioshi nocamantajiaquero manquigarentsijia capiocajianquitsica. ¹⁴ Ariqueate ochoocaque ocaniqui icantajitica Riria poneanquitsica Tiatiraqui. Iroatimpa iroguenti jocantaguetiroca ametsomagori camachoncamagori. Iroguenti tsaroverarica Aapani Irioshi. Oquemisantamajatavaqueri Paavoro iquenquetsataquegueti, iriguentitarite quenquetsashirentacaquero Amajirote, irootaquequeate oquemisantantavacarica. ¹⁵ Ariqueate oviñacajatantacaca otsipajiacari maasano maimojiguiroca. Ariqueate ocantajiaquena:

—Pitsaquenagueti arimaja noquemisantamajataqueri Amajirote pincoraquejiaque notsovironaquitequi pimaimojiaquitenata.

Ariqueate otsipajianaquena noajianaque.

¹⁶ Ariqueate noanoaitanaque yamanapinijitirigueti Aapani Irioshi, notonquivojajavacaro aajanirensi iroaqueraca quenquevarotananquitsi ichoocashirenquero ampatsini otsavijiguevetantacaroca querocaca oncoguetanaquempani coajica, iroguentiqueate yaampinijiacaca imentaquipae aajanijigaroca. Ininquegueti igonoro ontsatsiquenempari taaca opaji ininque, ari irovegarataquero.

¹⁷ Iroatimpa oguijajianaqueriqueate Paavoro aisa naatimpajia, ocajemaquequeate ocanti:

—Irirajia iriguentijia itigarancanejia Irioshi Anaantamajatatsica, itsavetantaquequea icamantajiaquempani quero pincojiaquempani irimeshiimentajitajempinijite.

¹⁸ Ariqueate oquejetaquero imaica oshequi savincaguiteri noapinijiaquegueti. Ariqueate asereaqueri Paavoro ipitsocashitsitanacaroqueate icantsitariqueate choocatanacaroca:

—Noncantantaquempiro ivajiroqui Jesoquirishito pisotoanajero.

Ariqueate iquenanaque isotoanaque. ¹⁹ Cotanquitsi irira aajanijigaroca itsajiaquetarite aato yaantajijaaro imentaquipae, yaitsijianacariqueate Paavoro aisa Tsirashi yaajianaqueri niganqui ochoocataquegueti tsovironaquipae, aritarite ichoocajiaque oraniqui imajirojiate. ²⁰ Yonigaajiapojiri icantajiguiri:

—Jeri irica joriojia iroguenti icoraquetashijiaque yasereaajiaquenaqueate itsimajiaquena maasano guintenijiatsica ocaniqui aguinteniqui. ²¹ Itsatacajipojaquenaquea yamejigaca iriatimpajia. Tee oncameetsateji anquemisantajiguero itsatacaapojacajica, icantimentajitajirotsi. Aatimpajitarite agonoroncari Iromaquitica.

²² Opejianaqueriqueate itsimajenca maasano. Iriraqueate majirontajiatatsica icantacaantajiaqueri isapocajiaqueri itavatavaajiaqueri. ²³ Ariqueate yagajiaquerigueti itavatavaajiaquerigueti yaajianaqueri yoguijajiaqueriqueate santanaqui, icantajiaque-
riqueate ashitacotantatsica:

—Pinquempoguijacomajajiaquerija, ishianacatsi.

* 16:10 Jero acaniqui amenaquero itioncaquegueti nonetsanajianaquero ocantacotaqueri Irocashi tioncaquero, itsipatacari imaica Paavoro.

²⁴ Ariqueate iquemaquerogueti icantaquerica arimpaqueate yoguijamajianaqueri intsompogui, yavinaacojiaqueri iguitiqui inchacotaqui. ²⁵ Ariqueate onianquiritetapojaquegueti, irira Paavoro, Tsirashi yamanajiaqueri Aapani Irioshi aisa itsarontaventajiacari. Iquemisantajiavaqueriqueate itsipajia santanatacojianquitsica. ²⁶ Cotanquitsiqueate omoguecanaquequeate ocantanaquequea santana mogué, mogué, mogué, ariqueate otanarejaguetanaca sotomorontsipae, oshiticarejaguetanaca opariitarianaquequeate cavorejatsaripae ishiticacotantajivetacarica maasano yoguijaitaqueca santanaqui. ²⁷ Itinajanaqueate ashitacotantatsica santanaqui yameniroqueate tanarejaguetanaca sotomorontsipae itsaroanaquequeate ijiqueji shiajianaca yoguijajiaqueca santanaqui, yaavetanaqueate igotsirote irimocorojempamequeate.† ²⁸ Cotanquitsiqueate icajemanaquequeate Paavoro icanti:

—¡Aato pimocoroja! Maasano choocajiana ocaniqui.

²⁹ Iroompaqueate iquemavaquitigui icanti:

—Pintsivoteri tsivorentsi namenamajajiaquerita.

Ariqueate yamaqueneri, ishianaqueate iriatimpa iquijanaque intsompogui itsaroanaquequeate yompioncanaqueate, yogueroaventanacariquea Paavoro aisa Tsirashi. ³⁰ Ariqueate itsipajianacari yoguisotojaiajiri icantajiguiri:

—Iintsija pincamantena, ¿quero noncoquempani iraantavajenaca aatoniji nogui camorecariqui?

³¹ Icantajiguiriquea:

—Paventanajempari Amajirote Jesoquirishito, irioquea aavajempineca aatoniji pogui camorecariqui, ariqueate inquejetacaajiaquempari maasano piconoacaca.

³² Ariqueate itsatacaajiaqueri iriatimpa jerijia maasano iconoajiacaca, itsavetantaquero Iguenquetsatsare Amajirote. ³³ Iroompaqueate iteroncajianajirogueti itsatacaajiaquerigueti, iriraqueate ashitacotantatsica santanaqui yaajianaqueri iquivaguetajiniri iquirajashitequitacaquerigueti itavaajiaquerigueti. Ariqueate iviñacajatacaantaca iriatimpa jerijia maasano iconoajiacaca. ³⁴ Ariqueate yaajianaqueri itsovironaquitequi yojocajiaqueneri isheca. Ishinevaejiaca iriatimpajia jerijia aisa iconoajiacaca iroorijite iquemisantajiaqueri Aapani Irioshi.

³⁵ Ariqueate osavincaguitetanajigueti iriraqueate majirontajiatsica itigarancajiaqueri coaretapae incantajiaquiteri:

—Poguiपाquijajeri irintatica shiramparijia.

³⁶ Iriraqueate ashitacotantatsica icantiri Paavoro:

—Icanti majirontajiatsica noguiपाquijajempi. Imaicaqueate pisotosotoitanaje cameetsaqueate poajianaje.

³⁷ Cotanquitsiqueate Paavoro icantsijigariqueate coaretapae:

—Aato noajiguitsi. Arimpate chapinqui manaqueate itavaajiaquena intati. Naatimpajatarite nogonoroncari Iromaquitica cotanquitsiqueate teequeate iroquetita incoacojiavaquenaji taaca nantaque. Ariqueate yamenajiaque maasano yoguijajiaquena santanaqui. Imaicaquea imaica ¿arimpate iromanaquero iroguisotoajiajenagueti? Iintsijate incoraquejiaque iriatimpajia, iriotaquequeate oguisotojajiaatenane.

³⁸ Ipiapiaitanajaqueate coaretapae icamantajiaipojaqueri majirontajiatsica. Ariqueate iquemacojiaquerigueti iriguentijia igonoroncari Iromaquitica, ariqueate itsaroajianaque. ³⁹ Yoashijianaqueriqueate yogameetsajijaatiriquea yoguisotojajiaatiri icantajiguiri:

—Nonintaque poajianaque, povashiantanajero noguinteni.

⁴⁰ Iroompaqueate isotosotoitanajigueti yoajianaque otsovironaquitequi Riria iquenquetsatacaajianajiriqueate irapiguemisanarijiateni yoguishinejajiaqueri. Ariqueate yoajianaji otsipaqui guinteninintsi.

† 16:27 Yamejigaca iriatimpajia coramani aatogueti iquemoguijamajatiri yashitacoqueca irishianaquegueti, ariquea irantsipetacaajiaquempari quemoguijavetacarica, irimetojajiteri. Irootaquequeate itsaroantanacaca ashitacotantatsica.

¹ Ariqueate iquenaquenaitanaque Ampiporishiqui aisa Aporoniaqui irosati yareje-tantapojacaro Tesaronicaqui. Ariqueate oraniqui chooca shinagoga icapiocantapini-jiacaca joriojia. ² Iriraquea Paavoro iquijapinitaquequeate ³ savincaguiteri imagore-jantajitaca iquenquetsatavacaajiaca, itsatacaajiaqueri Tioncarentsimajaca, oganta-gatarite yamecaro itsatacaantapinique imagorejantajitaca icapiocajiacaguete joriojia. ³ Yoguisotoaqueneri ijicoguetaqueneri Tioncarentsi qui ocanqueguete irantsipevae-taquempa irira Quirishito, irimetojaque, cotanquitsi impochatanaje. Icanti: “Iricatica Jesoshi notsavetantaquempica, iriotaque Quirishitotsica.”

⁴ Iconoagarantajia joriojia iquemisantajiaque ariqueate iconoajiacari Paavoro aisa Tsirashi. Aisa iquemisantagarantajiaque guiriego tsarventajigarica Aapani Irioshi. Ariqueate oquejejiaca oshequini manquigarentsijia anaantajiat-sica oquemisan-tajiaquequeate. ⁵ Yamenajivaqueriguete joriojia teeca inquemisantajigüe opeaco-jianaqueri itsimajenca, icapiocantajiacarica peraguetatsica teeca incameetsajigüe. Iriatimpajia icajemajiaquetanaqueriquea icatsimajianaquequeate maasano, itsipatsi-paitanacariquea, yoajianaque itsovironaquitequi Jasoni icojaiavecariqueate Paavoro aisa Tsirashi irinoshicajiaquerimequeate irojocajiaquenerimequeate capiocajianquit-sica. ⁶ Cotanquitsiqueate tee irinejajiapojaqueri. Iriguentiqueate inoshicajiaque Ja-soni jerijia itsipa irapiguemisantarijiateni, yaajianaqueneri majirontajiat-sica icajema-jianaquequeate icantajigui:

—Irirajia asereajiguirica maasano caquinte quepatsipaequi, imaica ariqueate ico-raquejiaque ocaniqui, ⁷ yaajivaqueriqueate Jasoni. Iriatimpajia yojocaavaquero icantica majirontatsica Sesa teequeate inquemisantajigueriji, icantajiaquetarite chooca itsipa majirontatsica icantajitica Jesoshi.

⁸ Iroompaqueate iquemajivaquerogueti maasano capiocajianquitsica jerijia majirontajiat-sica opejianaqueriqueate itsimajenca. ⁹ Icantajigui Jasoni jerijia irapiguemisantarijiateni:

—Iriraqueate Paavoro aisa Tsirashi teequeate nonintajigueriji ocaniqui, antigaranca-jiajeri iroajianaje. Cotanquitsi imaica pojocajigüena pimentaquitsitepae, coajicaqueate iroajianajegueti noguipiajajempiriqueate.

Ariqueate yojocajiaqueneri, iroompa yoguipaqui jajajiri. ¹⁰ Ariqueate opitsecanaque-gueti iriraqueate quemisantajiat-sica itsipajianacari Paavoro aisa Tsirashi yoajivajiri iroajianaquequeate Vereaqüi. Iroompaqueate yarejejiapo-jacaguete iquijajaitapojaque shinagogaqui icapiocantapini-jiacaca joriojia. ¹¹ Iriraquea joriojia guintenijiat-sica Vereaqüi teequeate inquejigüempariji guintenijiat-sica Tesaronicaqui. Iriatim-pajia inintamajiaque inquemisantajivaqueri itsatacaajiaquerica. Irosati savincagui-teriqui yapatsajavantamajivaquero Iguenquetsatsare Aapani Irioshi iramenajiaquero cameetsaca itsatacaajiaquerica. ¹² Irootaquequeate iquemisantantajiacarica Jesoshi oshequini jorio aisa guiriego. Iquemisantajiaqueri shiramparijia jerojia manquigar-entsijia anaantajiat-sica. ¹³ Cotanquitsi iquemacojivaqueriguete joriojia guintenijiat-sica Tesaronicaqui chooca Paavoro itsavetanqueroqueate Iguenquetsatsare Aapani Irioshi Vereaqüi, icoraquejiaque icantajipojaqueri Vereaqüitica:

—Aato piquemisantiri Paavoro, mana pincatsimajigueri intati.

¹⁴ Iroompaqueate iquemajivaquitigui irapiguemisantarijiateni Paavoro, itigaran-cantajiacarica iroanaque otsapijaqüi quentija. Iriguentinivani choocatajatsi Tsirashi aisa Timoteo. ¹⁵ Iriraqueate tsipajianacarica yoajivaquitiri Atenashiqui, ariqueate ipiapaitaja. Iriraquea Paavoro icantajivajiri:

—Pincantajipojajerija Tsirashi aisa Timoteo taampinaja incoraquejiaje.

Paavoro iquenquetsataque Atenashiqui

¹⁶ Ariqueate Paavoro yoguipajivaqueriguete Atenashiqui, yamenaguequeri ipejaiguica irioshivijitashitaca guintenijiat-sica ocaniqui, yoshequiamajatatigüinimaja, ariqueate ishimampojancavaetanacaqueate. ¹⁷ Iquenquetsatantacacaqueate shinagogaqui ica-piocantapini-jiacaca joriojia. Iquemisantajivaqueri iriatimpajia jerijia itsipa caquinte tsarventajigarica Aapani Irioshi. Ariqueate iquenquetsatavacaajiaca. Aisa ogan-taga savincaguiteri qui yoapiniquequeate oniganquiqueguete guinteninintsi yojocan-tajiaquetiroguete taaca opajitapae iquenquetsatacaajiaqueriqueate choocajianquitsica

oraniqui, iquenquetsatavacaajiaca. ¹⁸ Ariqueate ichoocajiaque guijatacojiguiroca itioncacotanaqueca Epicoro jerijia aisa guijatacojiguiroca itioncacojianaqueca tsatacaantajiat-sica icantajitica eshitoicojia. Iriatimpajia itsipajiacari Paavoro iquenquetsajiaquequea, cotanquitsi ariqueate iconoagarantajiaica icantajiaque:

—¿Querocate icocani irira quenquetsavaeri?

Itsipaqueate icantajiaque:

—Iriocampate quenquetsatocotirica itsipapae irioshipae.

Icantantajiaica imaica itsavetanquerotarite Paavoro Quenquetsatsarensi Oganejencatatsica tsavetacotirica Jesoshi aisa ipochatanajigueti. ¹⁹ Ariqueate yaajianaqueri aatonquiriti icantajitica Areopago icapioicapinijiacagueti majirontajiat-sica icoacojia-queriqueate icantajiguiri:

—¿Taate opajita ocatia iroaquerari pitsatacaantaqueca? ²⁰ Teequeate nontsajigueroji pitsatacaajiaquenaca, nonintantajiacaca poguisotoamajataquenaro.

²¹ Icantantajiacaricaqueate imaica iriguentijitarite Atenashiquitica jerijia ponejainquitsica otsipapaequi guinteninintsi oraniqui iroguentitarite isavicaventajiaque iquemisantajiaqueriqueate iquenquetsatacojiguirogueti otsipapae teeca intsajigueroji, coajiaqueate irioqueate quenquetsajiajatsi. ²² Icatianacaqueate Paavoro niganqui Areopagoqui icantiri:

“Aviatimpajia guintenijiat-sica Atenashiqui, namenajiaquempi caaviji pishineventamajaviavacari pirioshivijitashitacaca. ²³ Ontaniquiqueate noquenaguetanaquegueti namenitsiguetaquempiro pitsaromentapinijiacaca, nonejapojaquero aretare pitsaromentacaca chooca itioncajitaquero ocanti: ‘Iriguenti antajiaqueneca irioshi teeca inquemacojiteriji.’ Iriraqueate teeca pinquemacojigueriji, manaca pitsaromentashijiacaca intati, iriotaquequeate nontsavetantica naatimpa. ²⁴ Iriatimpa iriguenti Irioshimajaca. Iriotaquequeate peacaaroca quepatsi, jeri maasano choocatantaguecaroca. Iriatimpa iriguentitari ashintaguetaroca inquite aisa quepatsi, teequeate inchoocantemparoji tsovironaqui ishitiqica caquinte. ²⁵ Teetarite incogumentempaji irantaqueneri caquinte. Iriotari peacaajiacaji, aisa irioqueate anijacaajiacaji yojocajiacajiroqueate maasano. ²⁶ Iroaqueragueti ipeacaacari caquinte apaniroqueate ichoocaque. Ariqueate yoshequiaqueri, ariqueate ijatacojiaque maasano caquinteguetatsica teequeate incantashitajiaiguempaji. Ivorocaqueriqueate cameetsanijite intsitacaguitejajianaquempari maasano quepatsi. Iriotaquequeate cantanquitsi quero avoajiaqueni aisa queroca aguintenijiaquempani. ²⁷ Ariqueate iquejejiacaji imaica cameetsanijite anintajiaquenijite antsajiaqueri, antsatantajiapojemparica, teenica irisamanitacoteji itsitacaguitejacarotarite maasano. ²⁸ Iriotaquequeate anijacaajiacajica tampishitacajiacajica. Aatomegueti ichoocatime iriatimpa aatomete achoocajiguime. Aritarite icantajiaque pigonorojia caavijica itsamajajigui: ‘Aroguentijia irijanijiate Aapani Irioshi.’ ²⁹ Aroguentigueti irijanijiate Aapani Irioshi, aato ajijiguiri imaica iquejetacari ipeacaajitacavaorejaguetatsica irooca mapi, ora iquenquejashitaca intati caquinte. ³⁰ Coramani teenicate intsajiguenicate caquinte, teequeate incantajigueriji Aapani Irioshi, cotanquitsiqueate imaica icantajiacajiqueate maasano ancantashitajiaianajempa avashiantajianajero aguempaveerejia. ³¹ Choocatarite savincaguiteri itsatsicaca Aapani Irioshi, iriraquea shirampari inintacaaqueca incanquequea quericaca intsipatajempaca Aapani Irioshi aisa quericaca oananquitsine camorecariqui, cameetsaqueate iroaquero, iriguentitarite cantaqueri coramani Aapani Irioshi. Iriraqueate Aapani Irioshi yovochantajiri cameetsanijite antsatimentajiaquerinijite iriguenti inintacaaqueca.”

³² Iroompaqueate iquemajiavaquitigui iquenquetsatacotaquerogueti intancorejajianaje coajica metojaguevetatsica, iconoagarantajianaca ishirontajianaca inijashijianacariqueate. Choocaqueate itsipapae cantajianquitsica:

—Coajica nonquemajajempi aisa.

³³ Ariqueate icatianaja Paavoro. ³⁴ Cotanquitsi iconoagarantajiaica iquemisantajiaqueri Jesoshi, ariqueate yoguijaguijaitanaqueri Paavoro. Iquemisantaque apaniro majirontatsica Areopagoqui icantajitica Tionishio. Aisa oquemisanque manquigarentsi icantajitica Tamarishi. Ariqueate iquejejiaca itsipapae iquemisantajiaqueri Jesoshi.

18

Paavoro iquenquetsataque Corintoqui

¹ Ariqueate iponeanacani Paavoro Atenashiqui yoanaquequeate Corintoqui.

² Ariqueate inejapojaqueri jorio icantajitica Aquira guintenivetatsica Pontoqui. Iriaquerasano coraquetanquitsi iponeaca Itariaqui itsipatacaro imanquigare icantajitica Pirishira. Icoraquetantacaca manatarite yoguishiaqueri majirontatsica Caraorio, teenicate irinintajeji inchoocajiaje joriojia Iromaqui. Ariqueate yoanaque Paavoro itsovironaquitequi irinejajigueri. ³ Ariquea iquejetavacaajiaqueate, irio avoguetiroca quitsaarentsivanco, irootaquequeate iconoampojarica itsipatavacaaajiaqueate ontaniqui yantajiaquequeate. ⁴ Ogantaga savincaguiteri qui imagorejantajitica yoapinitaque shinagogaqui icapiocantajiacarica joriojia iquenquetsatacaajiaqueri iriatimpajia jerijia aisa guiriegojia cameetsanijite inquemisantacaimentajiaquerinijite.

⁵ Ariqueate yarejerejeipojacagueti Tsirashi aisa Timoteo iponeponeitaca Maseroniqui, iriraqueate Paavoro arimpaqueate isavicaventanaquero Iguenquetsatsare Aapani Irioshi itsavetantamajatanquero icamantamajajiaqueri joriojia icanti:

—Irira Jesoshi iriguenti irira Quirishito Meshiantatsica poguijajavecaca.

⁶ Iriatimpajia ipigatsajanacariqueate injashijianacari, ipotecantanacaroca Paavoro iitsaare cameetsanijite intsajiaquerinijite mana yovashiantajianaqueri aatoqueate isavicaventajajiritsi intsatacaajiajeri. Icantajiguiri:

—Nocamantajavetaquempiqueate, teequeate pinquemisantajiguenaji. Imaicaqueate inchiqiotsiqueate pinquejetacaantajiaquempa aviatimpajia pimetojajianaquagueti, aato naatimpa noquejetacaantimpitsi. Iroosacanicate imaica iriotaquequeate noashijianaque teeca iriojia joriojia nontsatacaajiaqueri.

⁷ Iroompaqueate icantajiaquerigueti isotoanaji yoanaque itsovironaquitequi Tishio Joshito tsaroveratarica Aapani Irioshi. Oraqueate itsovironaquite mana otsipatacaro shinagoga icapiocantajiacarica joriojia. ⁸ Irira Quirishipo jivatanquitsica shinagogaqui iquemisantajiaqueri Amajirote. Ariqueate iquejejiaca ijitanejia jerijia aisa oshequini Corintoquitica, iquemajivaqueroqueti Iguenquetsatsare Aapani Irioshi iquemisantajiaqueri Amajirote, ariqueate yoviñacajatacaantajiacarica. ⁹ Ariqueate yoguimaaca Paavoro tsiteniriqui, ariqueate yoguimaacarica Amajirote icampojaqueri:

—Aatoja pitsaroguitsi. Arimpaqueate pinquenquetsatanaque, aato povashiantirotsi. ¹⁰ Ogantagaqueate quisho noaquempi aato yantajitimpi, choocatarite acaniqui oshequini quemisantajiaquenaca.

¹¹ Ariqueate ichoocaque Paavoro Corintoqui apatiroti ajagantsi aisa otsipa niganqui ajagantsi, itsatacaantaquero Iguenquetsatsare Aapani Irioshi.

¹² Oraqueate ichoocaquegueti acaniqui icoraquetaquequeate Gario ipeacaqueate imajirojiate Acayaquitica. Ariqueate irira joriojia icapiocaventajiacarica Paavoro yaajianaqueneri iriatimpaqui, ¹³ icantajiguiri:

—Iricaqueate iroguenti yantaque icantimentajitica, iroguentitarite isavicaventajiaque iquenquetsatamampeanacarica Iguenquetsatsare Aapani Irioshi cameetsanijite inquemisantimentajiaquerinijite maasano, cotanquitsi icantashitatiacarica.

¹⁴ Iroompaqueate inquenquetsatanaqueme Paavoro iquenquetsatanaquequeate Gario icantajiguiri joriojia:

—Imaicaquea joriojia, arimequeate iraitsitanaqueme, iroguenticame irimetojantaquemequeate, arimequeate nonquemisantajiaquempime. ¹⁵ Cotanquitsi teequeate ariqueea inquejeteroji imaica, iroguenti picatsimatimentajiaqueri itsatacaajiaquem-pigueti icantashitatiitajiaquempirogueti pitsatacaantajiguica. Pinetsanajiguerojate aviatimpajia. Aatoqueate noquemisantajiguimpitsi.

¹⁶ Ariqueate yoguisotoajiaqueri. ¹⁷ Ariqueea maasano [guiriegojia] icatsimajianaqueri Soseneshi jivatanquitsica shinagogaqui icapiocantapinijiacarica joriojia yaajianaqueri itavaajiaqueri tac, tac. Yamenajavecariqueate Gario, cotanquitsiqueate tee incantajigueriji.

¹⁸ Ariqueate irira Paavoro ichoocaque oshequi savincaguiteri oraniqui Corintoqui. Ariqueate yoanaji iquenquetsatacaajianajiri irapiguemisantarijiateni. Ariqueea itejianaca yamajatacojianaque iroajianaque Shiriaqui itsipatanacarica Pirishira aisa

irira Aquira, cotanquitsi yoajiapanajanti Senquereaque yojocaguinatapanajantaque-ate cameetsanijite irinetsanataquero icantaquerica Aapani Irioshi, icantiri: “Coajica nonteroncaquerogeti nocamantaquemica nojocaguinataquempa.” Ariqueate ite-jianaca yamajatacojianaque. ¹⁹ Ariquea yarejerejeitaca Epesoqui, ariquea oraniqui aguijitanaque Pirishira aisa Aquira. Irira Paavoro yoapanajanti shinagogaqui icapiocantapinijiacaca joriojia iquenquetsatacaajiapanajantiriqueate capiocajianquitsica.

²⁰ Iriatimpajia icantajavetavajari:

—Aatotacaja pijatitsi, pimaimojianaquena.

Cotanquitsi iriatimpa tee irininteji, icantajiguiriqueate:

²¹ —[Nonintaque noanaque Jerosarequi nogavisaaquitero Pentecoshite.] Ininquegueti Aapani Irioshi nompijaje.

Itetanaca yoajianaque isotoantanajaro Epeso. ²² Yagatacopojaque Sesareaqui yoanaque Jerosarequi inejajiaquitiriqueate quemisantajiatsica. Ariqueate yoanaque Antioquiaqui. ²³ Osamani ichoocatanaque acaniqui, ariqueate yoanaque iquenaguetanaque Garashiaqui aisa Pirijiaqui intampishitacamentajianaquerinijite maasano quemisanta-jiatsica inquemisantamajajiaquerinijite Amajirote.

Itsatacaantaque Aporoshi Epesoqui

²⁴ Ariqueate yarejetapojaca apaniro jorio Epesoqui iponeaca Arejantiriaqui. Iriatimpa ariguenti ipajita Aporoshi, iriguenti quenquetsatatsica cameetsa aisa itsamajatiro Itioncacaantaqueca Aapani Irioshi. ²⁵ Iquemacomajataqueri Amajirote Jesoshi. Itsave-tantamajataqueri, aisa itsatacaantaquegueti yoguisotoamajataqueroqueate, cotanquitsi iroguenti itsavetaca itsatacaantica Joanca Viñacajatantatsica. ²⁶ Ariqueate imapoc-anaquero iquenquetsatanaque shinagogaqui icapiocantajiaca joriojia, teequeate impashiventempaji. Iroompaqueate iquemajivaquitigui Aquira aisa Pirishira yaajiana-queri oraniqui intsatacaimentamajajiaqueriniji, yoguisotoamajajiaqueneri quero oco-cani iguenavoquiro Aapani Irioshi. ²⁷ Ariqueate Aporoshi iquenquejanaji iroanajequeate Acayaqui. Iriaqueate irapiguemisantarijiateni icantajiaqueri cameetsataque iroanaque inquenquetsate ontaniqui.

Itioncajiaqueneri quemisantajiatsica Acayaquitica irajivaquerija. Ariqueate cora-mani icavintsajajiaqueri Aapani Irioshi Acayaquitica irootaquequeate iquemisantan-tajajarica. Imaica yarejetapojacaguete Aporoshi oshequiqueate itampishitacajaiapo-jaqueri. ²⁸ Iriatimpa inetsanajianaqueneriquea maasano joriojia capiocajianquitsica itsatacaantajiavecaca, cameetsa yoanaquero maasano, iroguentitari ipampiatanaque Itioncacaantaqueca Aapani Irioshi itsavetantaqueriguete Jesoshi canqueguete iriguenti irira Quirishito Meshiantatsica. Irootaquequeate querocampate incojiaquerini iriatim-pajia.

19

Ipianajaguete Paavoro Epesoqui

¹ Oraqueate choocatirajaguete Aporoshi Corintoqui, irira Paavoro itoncotoncogue-tanaquequeate otsempipae ipianaja Epesoqui. Inejajipojaqueri quemisantajiatsica. Teequeate iroshequiamajateji. ² Icoacojiaqueri icantajiguiri:

—Iroaqueraguete piquemisantaqueguete ¿ari icoraquetaque Ishire Aapani Irioshi ichoocashirentaquempi?

Icantajiguiri:

—Teequea nonquemacojiguete chooca Ishire Aapani Irioshi.

³ Icantajiguiri Paavoro:

—Iroosacanicate ¿taampate opajita piviñacajatashijiaca?

Iriatimpajia icantajiguiri:

—Iroguenti noviñacajatashijiaca cameetsanijite nonetsanatementajiaqueronijite itsa-tacaantica Joancani Viñacajatantatsica.

⁴ Icantiri Paavoro:

—Oraqueate iviñacajatantaquegueti Joancani mana iviñacajatantaque cameetsanijite iroonijite intsatantajitaquemparoca jac yovashiantanaquero iguempevaerejia, cotanquitsi icantajiaqueri: ‘Pinquemisantajiaqueri impoitapojenaneca’, irioquea Quirishito Jesoshi.

⁵ Iroompaqueate iquemajiavaquitigui yoviñacajatacaantajianaca ivajiroqui Amajirote Jesoshi. ⁶ Ariqueate Paavoro ipamijiaqueriqueate, ariqueate icoraquetapojaque Ishire Aapani Irioshi ichoocashirentajipojaqueri, imapocantajianacaca iquenquetsatantajianacaro otsipapae quenquetsatsarentsipae teeca intsajiavetempaji, itsavetantajiaque-roqueate icamantajiaquerica Aapani Irioshi. ⁷ Iriraqueate viñacajianquitsica yovegarataca 12.

⁸ Ariqueate yoapinitaque Paavoro 3 taai shinagogaqui icapiocapinijiacaguete joriojia iquenquetsataque, teequea impashiventempaji. Itsavetanqueri Aapani Irioshi quero icota imajirontaguete, icamantamajiaqueri. ⁹ Cotanquitsi iconoagarantajiaa imanintajiaquero icamantajiaquerica, teenicate irinintajiguenicate inquemisantajigueriji irira Quirishito, ariquea icapiocajiacaguete maasano manaquea injashinajianacaro Quenavquirontsi Iroomajaca.

Itsinampirejantanajaca Paavoro itsipajianacari quemisantajiatasica yoajianaque itsatacaantiguete Tirano. Ariqueate iquenquetsatavacaapinijiaca oraniqui ogantaga savincaguiteri. ¹⁰ Ariqueate iquejetanaquero imaica aavaepojacani mavite ajagantsi itsavetantanaqueri Amajirote Jesoshi, irootaquequeate iquemacotantajiacarica maasano guintenijiatsica Ashiaqui, joriojia aisa guiriegojia. ¹¹ Aapani Irioshi yagavejacaamajataqueri Paavoro yantaguetantacaca teeca irinejajiguetaji. ¹² Irootaquequeate yantimatavaquerogueti Paavoro paañopae irooca quitsaarentsipae, ariqueate icoraquejiapoji itsipa yaanaquero, yaajianaqueneri ashinoncajiaquitsica, ariqueate ipejaianaja. Ariqueate iquejejianaja ichoocashirentajiaqueca ampatsinipae isotoajianaque choocashirentajia-avetacarica. ¹³ Cotanquitsiqueate chooca iconoagarantajiaa joriojia iquenaguetanaque guinteninintsipaequi mana yantavaeventiroqueate yonigaanontajiapinitacari caquinte-
jia ichoocashirentajiaqueca ampatsini. Ariqueate inintajiavetaca inquejejiacquemparime Paavoro yonigaaguetariguete ampatsinipae iroguenti yaventashijiacari ivajiro Amajirote Jesoshi, icantantajiacarica choocashirentajiaquerica apaniro caquinte:

—Imaica naventashitantajiaquempiro ivajiro irira Jesoshi itsavetantica Paavoro noncantajiaquempiqueate pisotoajianaje pijajiaje.

¹⁴ Ariquea iquejejiaca irijanijiate jorio icantajitica Eseva. Irira Eseva irio saserorote anaantanquitsica, irijanijiate ivegarataca 7. ¹⁵ Cotanquitsiqueate iquejejiacaguete imaica icantajiavecariguete ampatsini, mana ipigatanacari icantiri:

—Naatimpa notsataqueri Jesoshi iriguenti agavejamajatatsica, aisa irira Paavoro noquemacotiri, cotanquitsi ¿taampate pinajiaque aviatimpajia?

¹⁶ Ariqueate irira caquinte ichoocashirenqueca ampatsini ishiashitanacariqueate itaviajianaqueri icapocapotanaqueri yagavejajiaqueriqueate iperejacojiaqueri iitsaare, irootaquequeate ishiantajianacaca cajaratsinojia chochororo iriraja.

¹⁷ Iroompaqueate iquemacojiaqueriguete maasano joriojia jerijia maasano guiriegojia guintenijiatsica Epesoqui itsaroajianaque, irootaquequeate ishineventantajianacarica Amajirote Jesoshi, icantajigui:

—Iriraqueate Amajirote Jesoshi iriguenti caaviji yagavejamajati.

¹⁸ Ariqueate icoraquejiapojaque oshequi quemisantajiatasica icamantacojiaquero yantaguishejiguica, icantajigui:

—Jero oca nantaqueca teeca oncameetsateji. Nonintaque irogameetsantajena Aapani Irioshi.

¹⁹ Oshequini matsiguetsatsica aisa itsipajia aventapinijigaroca iragavejane ampatsini yamatavijantajiacarica itsipapae, yamajiaqueroquea tioncarentsipae yashintajiaa, irootaque otsatacaavecarica yantantaguevecaroca. Icapiocajiaquero ariqueate itaimojiaqueri maasano caquinteja. Ocapiocacaguete maasano paperi ovegaravaetaca, ari ovegaratacani 50,000 imentaquitsitepae. ²⁰ Arimpaqueate yoshequiamajatatiguinimaja

quemisantajiguirica Amajirote aisa arimpaqueate iquemisantamajajianaquero quenquetsatsarentsi tsavetantaquerica Amajirote, yamenajiaquerotarite arimaja ocantamajataque.

²¹ Ariqueate Paavoro ipintsatanaja iroanaje Jerosarequi inquenanaqueate Maseroni-
aqui aisa Acayaqui, icanquetarite:

—Noanaquegueti Jerosarequi, ariqueate nopintsataca noavaetanaque Iromaqui.

²² Ariquea itigarancaqueri mavite amitacojiguirica, irira Timoteo aisa Erashito, iroanaque Maseroniaqui, cotanquitsi iriatimpa choocatiraja Ashiaqui.

Icatsimajianaquegueti Epesoquitica

²³ Ariqueate irira Epesoquitica icantimentajiaquero Quenavoquirontsi Iroomajaca, teequeate capichaji incatsimajigueji. ²⁴ Iriguentiqueate quejetacaantaquero Irimutio vichajiroca cavorejatatsica. Iriatimpa iriguenti vichajiroca teemporojaniqui iquejeta-
caacaro teemporo itsaromentajigarogueti irioshivijitashitaca Aretemisa.* Iriaqueate antimojiguirica yaantamajataroqueate imentaquipae. ²⁵ Icapiocantajiacarica aisa que-
jigarica iriatimpa vichajiroca cavorejatatsica icantajiguri:

—Aviatimpajia pitsajigui irooqueate aantajiac a imentaquipae antajiguica.

²⁶ Cotanquitsi imaica pamenajigueja irira Paavoro iquenquetsataquegueti icanquequeate iriraqueate irioshivijirentsi yantajiguica caquinte teequeate irioquea irioshimajaca. Piquemajiaqueri aviatimpajia. Imaicaqueate imaica yoshequianaque guintenijiatsica acaniqui Epesoqui quemisantajiaquerica. Cotanquitsi teequeate apaniro inquejetero ocatica, ariqueate itsitacaguitejanacaro aisa maasano Ashiaqui.

²⁷ Quejetanquitsica imaica teequeate oncameetsateji, manaqueate aato aantajijaarotsi imentaquipae, aisa oteemporote ariosHITE Aretemisa anaantanquitsica manaqueate irovashiantajitanaquero intati, aatoqueate ishineventajitajarotsi. Maasanotarite shineventajiacaroca guintenijiatsica Ashiaqui jerijia aisa otsipapaequi aatoqueate ishineventajijaarotsi.

²⁸ Iroompaqueate iquemajivaquitigui opejaianaqueri itsimajenca icajemajianaque-
quea icantajigui:

—¡Cameetsavaetaque Aretemisa, atsaromentajiac Epesoquitica!

²⁹ Icajemajianaque ishianajacaqueate maasano guintenijiatsica oraniqui, yaajiapoja-
queri Gayo aisa Arishitarico, yaajianaqueri yoajianaque icapiocapinijiacagueti. Iriguen-
tija Maseroniaquitica itsipajiacaca Paavoro itsavetantirigueti Amajirote. ³⁰ Irira Paavoro inintavetacaqueate iroanaqueme iriatimpa, cotanquitsiqueate irapiguemisantarijiateni icantajivaqueri:

—Aatota pijati.

³¹ Ariqueate iquejejiaca majirontajiatatsica Ashiaquitica iconoagarantajiacaqueate ipintsatacari Paavoro, icantacaantajiaqueri aatonijite ijati icapioacajiacagueti.

³² Ontaniquiqueate icapioacajiacagueti icajemajianaque, itsipaqueate cantashita-
tiavacaroca, cotanquitsi yoshequiamajatatiguinimaja teeca intsajigueji taaca icapioquimentajiac. ³³ Iconoagarantajiac jorioja inejaitatigui Arijantero ariqueate ichooaque iriatimpa oraniqui, ariquea yaajianaqueri yoajiaqueri niganqui inquen-
quetsatacaimentajiaqueriniji. Ariquea iriatimpa itinajavacovetanaca cameetsanijite inquemisantimentajivaquerinijite maasano inquenquetsatacaquerime. ³⁴ Cotanquitsi iroompaqueate itsajiaquerigueti iriguenti jorio, arimpaqueate icajemamajajianaque aricampa mavite hora, icantajigui:

—¡Cameetsavaetaque Aretemisa, atsaromentajiac Epesoquitica!

³⁵ Iriaqueate sequeretario tioncatsica ariqueate yagavejianaquerigueti yoguima-
jarentajiaquerigueti icantajigui:

—Aviatimpajia Epesoquitica, pinquemisantajiguena, maasanotarite otsitacaguiteja-
covaetanacaro itsajitiro aatimpajia aroguentija quemoguijajiguiroca teemporo it-
saromentantajitaroca Aretemisa jero aisa mapí quejecaroca iroatimpa parianquitsica

* 19:24 Aretemisa. Iriajia Iromaquitica icantajiguiroquea Diana.

jenoqui inquitequi coramani. ³⁶ Aato ichoocati cantashitatiequemparoneca, irootaquequeate nocantantajiaquempica pinquemisantajiguena. Aatoqueate taaca opajita pantajiguisi. Aatoshiatsi, iroquetita pinquenquejamajigue. ³⁷ Iricatica pamajiaqueca tee iraitsigueteroji choocaguetanquitsica teemporoqui itsaromentantajitaroca Aretemisa, aisa tee irinijashitemparoji ariosHITE. ³⁸ Pincantajigueriqueate Irimitio jerijia antavaetimojiguirica, choocaca inintajiaqueca incatsimajiaqueri, iintsija iroajianaque icantomajantajiguigueti joese irioqueate quemaquerine, irootarite ichoocatashijiaque incantajiaqueriqueate quericaca quejetanquitsica aisa quericaca teeca inquejetempaji. ³⁹ Cotanquitsi choocagueti otsipa tsimajiaquempica poguijajigueriqueate majirontajiat-sica incapioacajiaquempiguete ariqueate pincantajigueri. ⁴⁰ Imaicaquea imaica aatoshiatsi icamantacojitajitsi amajirojiatequi, ijiqueji irooca acapiocashijiaa anaimanajiaqueri, ariqueate incoacojiacajiguete: ‘¿Taate picapiocashijiaa?’ querocampate ancantajianaque.

⁴¹ Iroompaqueate icantaquegueti, itigarancajajiri maasano capioacajianquitsica iroajianaje.

20

Yoanaquegueti Paavoro Maseroniaqui

¹ Ariqueate isanticojianajiguete Epesoquitica, irira Paavoro icajemajiaqueri irapiguemisantarijiate ni icapioacajiaqueri itsatacaajiaqueriqueate yavinajavajiri. Ariqueate iquenquetsatacaajianajiri icantajiguri:

—Noanaquequeate Maseroniaqui.

Ariqueate yoanaque. ² Iquenaguetanaquequeate iquenquetsatacaajianaqueriqueate irapiguemisantarijiate ni itampishitacajianaqueriqueate inquemisantamajiaquerija Quirishito. Ariqueate yarejerejeivaetani Guereshiaqui. ³ Ariqueate ichoocatanaque ontaniqui 3 taai. Ariqueate pajinimequeate intetanaquempame iroanaqueme Shiriaqui iquemacojiaqueri joriojia isariajiacari irimetojajiaqueri, ipiantanajaca Maseroniaqui. ⁴ Iriguenti itsipajianaca Sopatere (irijanite Piro poneanquitsica Vereaque), Arishitarico jeri Segonto (ponejainquitsica Tesaronicaqui), Gayo (poneanquitsica Terevequi), Timoteo, Tiiquico jeri Toropimo (ponejainquitsica Ashiaqui). ⁵ Iriatimpajia ijivajianaque yoguijaguijaivaetana Toroashiqui. ⁶ Ariqueate anaapojacagueti savincaguiteri ishecantajitaroca pan teeca inconoantajitemparoji anempoantaca notenoteitanaca noponepoteitanaca Piripoqui. Ariqueate aapojacagueti 5 savincaguiteri notonquivotonquivoitavajari Toroashiqui. Ariqueate nochoocajianaque 7 savincaguiteri. ⁷ Ariqueate aapojacagueti savincaguiteri pariapojajaroca semana* nocapioacajiaa notsipajiacari napiguemisantarijiate ni noncotarejaquero pan noshecajiaquemparo nonquenquejajiaqueri irira Quirishito imetojaventajiaquitajiguete. Ariquea iquenquetsataque Paavoro iroosatiquea inianquii tetacovaetanaque, itsaquetarite osavincaguitetanajeguete iroanaje. ⁸ Ariguenti nochoocajiaqueni oshitamencoshitamencoatagueti jenoqui not-sivojiacaqueate. ⁹ Ariqueate ichoocaque oraniqui iriaqueraca quenquevaritananquitsica icantajitica Eotico, isavicaque omorotacagueti. Osamanitarite iquenquetsataque Paavoro, iriraquea Eotico ipochoquitanaque imaanaque, cotanquitsi iroompaqueate imaamajavetanacagueti isorocanaquequeate yomposapojaca isavi tan. Yoajavetanacaqueate yaajavetapojacariqueate, jac metojanaquequeate. ¹⁰ Cotanquitsiqueate irira Paavoro yaguijashitsitanacari yovanquetapojacari ineguiqui yavinatanaqueri, icantajiaqueri maasano:

—Aato pitsaroajiguisi, jeri pochatanaji.

¹¹ Ariqueate ipianaja Paavoro jenoqui, icotarejaquero pan yojocajiaquenaro maasano, ariqueate noshecajiaa. Yapijitajiroqueate iquenquetsatanaji aisa irosatiquea isavincaguitetacotantanajaca. Ariqueate yoanaji. ¹² Irira Eotico itsipajianajari itsovironaquitequi peamajatanajaqueate ishinejiaca maasano.

* 20:7 Iroguenti opariantanaja semana savincaguiteri tominco. Irootaque ipochatantajaca Jesoshi.

¹³ Naatimpajia nojivajivaitanaquequeate namajatacojianaquequeate quenajarontsiqui noajianaque Asoqui naajiapanajanteriqueate Paavoro, iriatimpa iroguenti ishivoquitanaque quenavoquirontsiqui. ¹⁴ Ariqueate notonquivojajajari Asoqui notejiana-jiriqueate noajianaque Mitirenequi. ¹⁵ Osavincaguitetamanaquegueti nogaajianaca nanajianaquero Quio. Ariqueate otsipatapojacaguete savincaguiteri nagatacojiapanajanti Samoshiqui. [Nagatacojiapanajanti Torojirioqui,] otsipa savincaguiteri nagatacojiaque Miretoqui. ¹⁶ Apatiroti noajianaquero teequeate nagatacojigueti Epesoqui, teenicate irininteji Paavoro inchoocate oshequi savincaguiteri Ashiaqui, manatarite taampina inanaque inchiqiuompate irarejetempa Jerosarequi aricaca iragavejaquem-paguete irogavisaaquitero ontaniqui savincaguiteri icantajitica Pentecoshite.

¹⁷ Ontaniquiqueate nochoocajiaqueguete Miretoqui ariqueate itigarancaque Paavoro camantajiaquiterineca quempoguijajiguirica quemisantajiatitica guintenijiatitica Epesoqui, icampojaqueri:

—Icagemacaanquempi Paavoro.

¹⁸ Icoraquejiapojaqueguete icantajiavaqueri: “Aviatimpajia pitsajiaque quero nocotaquita nochoocatomojiaquitimpiguete. Iroaqueraguete nocoraquetaque acaniqui Ashiaqui nocomajataca irosati imaica. ¹⁹ Ogantaga nantavaetaqueneri Amajirote, tee naventacotempaji, mana oparijaatanaque oshequi nojaquija, aisa natsipevaetaca isarijavetaquenaguete joriojia, inintajiavetacatari irimetojajiaquename. ²⁰ Teequeate novashianteji aparó noquenquetsatacaajiaquempiguete noguisotoamajataquempiro maasano. Notsatacaajiaquempi pichoocajiaqueguete icapiocajitaguete jero aisa pitsovironaquitapaequi. ²¹ Aisa notsatacaajiaqueri joriojia jerijia aisa guiriegojia nocantajiaqueri incantashitatijaijanajempa irovashiantajanajero iguempevaerejia inquemisantajiajeri Aapani Irioshi jeri aisa Amajirote Jesoquirishito. ²² Imaica noanaque Jerosarequi, iriguentitari tigarancaquena Ishire Aapani Irioshi. Teequea nontsateji taaca oaquenane. ²³ Iroguenti notsataque querocaguete noanaque icanquenaqueate Ishire Aapani Irioshi mana irashitacojitaquena santanaqui aisa irantsipetacajiaquena. ²⁴ Cotanquitsi naatimpa tee nontsarogueji capichaji, teenicate nontsarocaguemparoji nometojaqueguete. Iroguenti nonintaque nonteroncamajaquero maasano icantaguetaquenaca Amajirote Jesoshi, nontsavetantaquero Quenquetsatsarentsi Oganejencatatsica camantacajica quero icota Aapani Irioshi icavintsajantiguete.

²⁵ “Coramani noquenquetsatacaajiaquempi noquenaguetanaqueguete nontsavetanqueri Aapani Irioshi quero icota imajirontaguete. Imaica notsamajataque aato pinejajijaanatsi maasano aviatimpajia. ²⁶ Irootaquequea imaica nocamantantajiaquempica choocaguete teeca inquemisantajigueti teequeate naroguenti quejetacaanterine impeaquempaguete. ²⁷ Nontsavetantaguequerotari maasano icanquenaca Aapani Irioshi, teequeate nomanacoteji aparó. ²⁸ Irootaquequeate nocamantantajiaquempica inchiqiuotsiqueate pamenajiajempa aviatimpajia. Pinquempoguijajiajerija maasano quemisantajiatitica, iriguentitarite cantajiaquempi Ishire Aapani Irioshi pinquempoguijajiajerija quemisantajiguirica Amajirote metojaventajiacajica, ivegaratantajiacajiro iriraja. ²⁹ Naatimpa notsamajataque iroompaqueate namerencanaquitatiguempa incoraquetashijiaquempi amataajiatitica iroguivorocajiaquempi inquejejiapojaquempari lobo† yoguivoroquiriguete oveja. ³⁰ Aisa iconoajiaquempi amataajiatitica intsatacaajiaquempiqueate teeca iroomajaca iramatavijajiaqueriqueate intati yapiguemisantavetacaca iriguentijiatari iroguijatacojianaque. ³¹ Cotanquitsi naatimpa nontcantajiaquempi inchiqiuojia yamatavijajiguimpitsi. Aato pipeacojigarotsi ogantagatarite notsatacaajiguimpi savincaguiteriqui aisa tsiteniriqui niraaniraavaetacaqueate irosatiqueate najagantsitacotanaque 3 ajagantsi.

³² “Imaica, napiguemisantarijiateni, nocanqueri Aapani Irioshi inquempoguijajiajempipi. Pinquemisantamajatero Icanqueca camantajiacajica icavintsajajiacajiguete iriatimpa, irooqueate tampishitacaajiajempineca. Coajica incapiocajiacaji ontaniqui

† 20:29 Irira lobo iquejevecari shiishi iririjeguini catsimari. Ichocati tomirishiqui otsipaniqui guinteninintsiqui.

ichoocaquegueti iriatimpa, anconoajiaquempari maasano icoguiajiaqueca imeshiajiaqueca. ³³ Naatimpa teequeate nonintsijigueri itsipa igavorejaquirite, imentaquitsite, iitsaarepae. ³⁴ Pitsajiaquetarite aviatimpajia, inchiqiuotsi nantanontaca naatimpa nacoqui naaguetigueti nonintaguequeca aisa nojocajiguinirica notsipajiacaca. ³⁵ Oraqueate noquejetaqueroqueti imaica cameetsanijite poguijatacotimentajiaquenianijite pincavintsajimentajiaquerinijite coacojianquitsica. Pincavenquejajiajero icanqueca Amajirote Jesoshi icanti: ‘Caaviji anaantaque ocameetsamajataque pincavintsajantajiaquegueti, anaaquero aviguentijiaa incavintsajaitaque.’ ”

³⁶ Iroompaqueate icantajiaquerigueti igueroncanaca yamanaqueri Aapani Irioshi itsipajiacari maasano. ³⁷ Irajaianaaqueate maasano, yavinajavajiri Paavoro, inintavorotavajiriqueate. ³⁸ Ishimampoancavaejianaqueate iquemajiaqueritarite icantajanajiri aato inejajajiritsi. Ariqueate itsipatsipaitanacari yojocajijaatiri inirojeguiqui quenajarontsi yamenajavajiri itetanaja.

21

Yoanaquegueti Paavoro Jerosarequi

¹ Ariqueate nopintsamajajavecaru napiguemisantarijateni, aritaque noajianaji notejianaja namajatacojianaque, catinca noajianaquero Coshiqui. Ariquea osavincaguitetanajigueti nogaajianaca, ariquate noquenajatacovaetanaque Irorashiqui. Osavincaguitetanajigueti nogaajianaca aisa, noquenajatacovaetanaque aisa Pataraqui. ² Ariquate nonejajipojaquero inirojegui quenajarontsi oananquitsineca Penishiaqui, ariquate notejianacaro. ³ Ariquate namajatacojianaque noajianaque, namenacojianaquero Tsipere iroguenti ochoocatantaca najampatequi. Nanaanaquero noajianaque Shiriaqui, ariquea nagatacojiapanajanti Tiroqui irogaguijitanaqueroqueate ajaararontsi. ⁴ Ariquate oraniqui nonejajipojaqueri quemisantajiatitsica, yaajivaquena ariquate nomaimojianaqueri 7 savincaguiteri. Ontaniqui nochoocajiaquegueti Ishire Aapani Irioshi iquenquetsashirentacaajiaqueri iriatimpajia icantantajiavetavacarica Paavoro: —Aatocaja pijati Jerosarequi.

⁵ Aapojacagueti nopintsatancaca ariquate noajianaji nosotosotoitanaqueroqueate ovegarapojacagueti tsovironaquipae. Maasano iriatimpajia jerojia aisa imanquigarejia jerijia irijanijiate itsipajianaquena otsapijaqui impanequiqui. Notigueroajianaqueate namanajiaqueri Aapani Irioshi. ⁶ Ariquate noquenquetsatacaajianajiri, icantajavajana iriatimpajia: “Iintsija”, ariquea notejianaja noajianaji. Iriatimpajia ipiapiaitanaja itsovironaqueequi.

⁷ Ariquea noponeanaca Tiroqui, namajatacotanaque noajianaquero Toremairaqi, ariquate nagatacojiapojaque oraniqui. Noajianaquequeate nonejajipojaqueri napiguemisantarijateni, aparato nomaimojianaqueri. ⁸ Osavincaguitetanaquegueti noajianaque Sesareaqui narejerejeipojaca itsovironaqueitequi Jeripe tsavetantiroca Quenquetsatsarentsi Oganejencatatsica. Iriatimpa iriguenti itsipajiaa 7 cavintsajajiguirica quemisantajiatitsica inintacajaitaqueca iroaqueragueti savicavenqueroneca irojocajiaquenero osheca coacojianquitsica guintenijiatitsica Jerosarequi. ⁹ Choocaqueate 4 irorijanitejia majinarojia. Iroatimpajia iroguentijia tsavetantajiguiroca icantajiguiroca Aapani Irioshi. ¹⁰ Nochoocajianaquequeate oshequini savincaguiteri, icoraquetaquequeate tsavetantiroca icanquerica Aapani Irioshi icantajitica Agavo. Iponeaca Joreaqi, ¹¹ iroguenti icoraquetashitaque irinejajiaquitena. Yaitsitanaqueriqueate ichompimashite Paavoro yoishoguititaca aisa iracoqui, icanti:

—Icanti Ishire Aapani Irioshi: ‘Ariquate inquejejaqueri joriojia Jerosarequitica iroishojiaqueri ashintarica irica ichompimashite, ariquate irojocajiaqueneri teeca iriojia joriojia irajaianaqueri.’

¹² Iroompaqueate noquemajivaquitigui naatimpajia jerijia aisa guintenijiatitsica Sesareaqui nocantajiavetavajiriqueate Paavoro:

—Aatocajate pijatitsi Jerosarequi.

¹³ Cotanquitsiqueate icanti Paavoro:

—¿Taaquea oaquempi piraantajiacaca? Naroguenti pishimampojancacaanaca. Teenicate nompincatsateroji iroishojitaquenagueta. Iriogueta nintanquitsine Amajirote Jeroshi nometojavenaqueri Jerosarequi, aatoqueate nagamajarotsi nometojaquegueta.

¹⁴ Nocantajavecari, cotanquitsi teequeate inquemisantajiguenaji, aatoquea nocantajiri, ariotapojaque. Nocantajiaqueri:

—Iriompate Aapani Irioshi querocaqueate ininqueca.

Yarejetacagueta Paavoro Jerosarequi

¹⁵ Ariqueate nonetsanajianaca noajianaque Jerosarequi. ¹⁶ Yoguijagarantajianaquena napiguemisantarijiateni guintenijiatsica Sesareaqui, yamajiaquenari Manaso poneanquitsica coramani Tsiperequi irioquea quemisantatsica coramani, ariqueate nomaimojiaqueri. ¹⁷ Ariqueate narejerejeipojacagueta Jerosarequi yaajiajavanaqueate napiguemisantarijiateni ishinejianaja. ¹⁸ Osavincaguitetanajigueta itsipajianaquena Paavoro noajiaquitiqueate nonejiaquitiri Santiago. Ariqueate ichoocajiaque maasano quempoguijajiguirica quemisantajiatetsica icapiocajiaqueate. ¹⁹ Iriira Paavoro iquenquetsatacaajiaqueri itsavetacotaquero maasano quero icotani yagavejacaaguetaquerigueta Aapani Irioshi iquenquetsatacaajiaquerigueta teeca iriojia joriojia. ²⁰ Iroompaqueate iquemajiavaquitigui ishineventajianacariqueate Aapani Irioshi. Icantajiguiriquea:

—Cameetsataque, napiguemisantarite, cotanquitsi choocajia yoshequiamajatatigunimaja apijoriojiateni quemisantajiguirica Quirishito iroguenti inintaque irinetsanajiguero itioncacotanaqueca Moishishini. ²¹ Iriatimpajia iquemacojiaquempi pitsatacaajiaqueri joriojia guinteninijiaatsica osamani conoajiacarica teeca iriojia joriojia ijijiaqueji pitsatacaajiaqueri cameetsanijite aatonijite inetsanajiajiro itioncacotanaqueca Moishishini. Aisa ijijiaqueji picantajiaqueri aatonijite itotsaiquitsijajiri ichonquimashi irijanijiate aisa aatonijite yoguijatacojiajirotsi icantajiguinica avaesatinijiate. ²² ¿Querocampa ancojiaquempani? Imaica inquemacojiavaquempigueta incapiocaventajiapojempi. ²³ Noquenquejiaque caaviji ocameetsataque pinquemisantajiaquenagueta noncantajiaquempica. Chooca acaniqui 4 shiramparijia jocaguinatacaantajianquitsineca irinetsanajiaquerogueta icantajiaquerica Aapani Irioshi icantajiguiri: ‘Coajica nonetsanajiaquerogueta nocamantajiaquempica nojocaguinatacaantajiaquempica.’ ²⁴ Paajianaqueri teemporoqui pintsipajianaquempari pincanteri Aapani Irioshi irogameetsatantajiaquempica. Pivegarajigueneri maasano cameetsanijite irojocaguinajiaquempica. Irootaquequeate intsatantajiaquempica apijoriojiateni mana itsojeventajitaquempi intati, ogantagatirajatarite pinetsanatiro itioncacotanaqueca Moishishini. ²⁵ Cotanquitsi irira teeca iriojia joriojia quemisantajiatetsica notioncajiaqueneri mana noncantajiguiri intati aatoqueate ishecajjaaritsi imetojajitaquenerica ipejaiguica irioshivijitashitaca, aatoqueate ishecatacojjaarotsi iriraja, aatoqueate ishecajjaaritsi icaticajigueta, aisa aatoja ijatashijiajirotsi manquigarentsi teeca iro irashi.

²⁶ Ariquea iquemisantajiaqueri Paavoro. Osavincaguitetanajigueta itsipajianacari jocaguinajianquitsineca irogameetsajiaquempica. Ariquea yoanaque teemporoqui itsarotentantajitarica Aapani Irioshi icamantajiaqueri saserrotejia querocaca onteroncantanajempaca irogameetsatantajiaquempica cameetsanijite irijitorejiaqueneri Aapani Irioshi viratsipae.

Yashitacojitaquerigueta Paavoro santanaqui

²⁷ Ariqueate pajinigueta onteroncanajempaji 7 savincaguiteri yogameetsatantajiacaca, iriraquea joriojia poneaguetanquitsica Ashiaqui inejajiaqueri Paavoro oniganquirequi oticaacoroqui teemporo yogametsajiaqueriquea capiocajianquitsica, icatsimajianaquequea, ariqueate yaajiaqueri. ²⁸ Ariqueate icajemajianaque icantajigui:

—Shiramparijia ishiraerijia, pamitacojiguenashiatsi. Iriotaque irira quenaguetaatsica amatavijajiguirica caquinte. Iroguenti isavicaventi itsatacaajiaqueriqueate maasano, iquenquetsatacoguishetaqueri agonorojia jero aisa maasano itioncacotanaqueca Moishishini. Aisa inijashicaro ocativa teemporo. Aisa yamajiaqueri guiriegojia

yoguijaaiaqueri acaniqui teemperoqui, icovaeguishetacaantacaroca ocatica yashintacaca Aapani Irioshi.*

²⁹ Icantantajiacarica yamenajiaqueri itsipajiacari Toropimo poneanquitsica Epesoqui ijiqueji ariji itsipatacari iriatimpa teemperoqui itsarotentantajitarica Aapani Irioshi.

³⁰ Opejaianaqueri itsimajenca maasano, ishijaiapojaca yaajiaipojaqueri Paavoro, inoshicajianaqueri sorororo soaa yaajianaqueri sotsiqui otantotacotacaguetei teempero. Taampina yashijiaquero osotomoro.

³¹⁻³² Irovepojaca irimetojajiaquerime, cotanquitsi iroompaqueate icamantajitaqueri imajirote coaretajia opejaianaqueri itsimajenca maasano Jerosarequitica, icajemajiaquequeate icapiocajiaqueriqueate igoaretajiate jerijia aisa itsipajia imajirojiate, ishiamajajanaca yoajianaque iramenajiaquiteri. Iroompaquea inejajivaqueri iriatimpajia, yovashiantajajiriqueate Paavoro teequeate intavaajiajeriji. ³³ Ariqueate icoraquepojaque imajirote coaretajia yajiricapojaqueri Paavoro ishiticacaanqueri mavite cavorejatsari. Icoacojiaqueri catsimajiaquerica icantiri:

—¿Taa ipajita irica? ¿Taate opajita picatsimatimentajiaqueri?

³⁴ Cotanquitsi iriatimpajia arimpaqueate icajemajianaqueri icantashitatijaijanacaro icantaguetaquerica itsipaqueate cantashitativacaroca teequeate aparo incantajigueriji, irootaquequeate tee inquemamajajigueri imajirote coaretajia, yaacaantantacarica Paavoro itsovironaquitequi coareta. ³⁵ Iroompaqueate yarejejiapojacaguetei yataitapinijiguetei coaretajia, icompijianacariqueate yogajenocajianaqueriqueate aatonijite yaajivaqueri catsimajiaquerica. ³⁶ Yoguijaguijaipojaqueriqueate icajemajiaipojaquequeate:

—¡Imaicashia irimetoje!

Paavoro iquenquetsatacaajiaqueriguetei capiocajianquitsica

³⁷ Pajiniguetei inqijacaanaquerime sotomorontsiqui iquenquetsatanaque Paavoro icantiri imajirote coaretajia:

—¿Cameetsampa nonquenquetsatacaguempi?

Icantiri:

—¿Pitsatirompate aviatimpa iguenquetsatsare guiriego? ³⁸ Iroosacanicate, ¿teesacanicate aviguenti irira Ejepitoquitica nintavetanquitsica iroguisotoaquerime majirontatsica aajianaquerica 4,000 metojantatsica ontaniqui oquitamampororoipojaqueguetei?

³⁹ Icantiri Paavoro:

—Tee. Naatimpa naroguenti jorio, ariguenti novogui Tarisoqui ora caavijica iquemacomajajiti Shirishiaquitica. Iintsija pincante nonquenquetsatacaqueri capiocajianquitsica.

⁴⁰ Iriraqueate imajirote coaretajia icantiri:

—Iintsija.

Icatianaqueate Paavoro yataitampinitacaca coareta, icanti vacoc. Imajerejianaqueguetei maasano iquenquetsatacaajiaqueri, iquenquetsatantacaro iguenquetsatsare evereo, icanti:

22

¹ “Nogonorojia aisa nomajirojiate, pinquemisantajiaquena nonquenquetsaventanaquempaguetei.”

² Iquemajivaqueriguetei iquenquetsatantanacaro iguenquetsatsare evereo iquemisantamajiaivaqueri. Ariqueate icanti Paavoro:

³ “Naatimpaqueate naroguenti jorio, ariguenti novogui Tarisoqui choocatanquitsica Shirishiaqui, cotanquitsiqueate ariguenti noquenquevaritaque acaniqui Jerosarequi. Iriguenti tsatacagana Gamarieri maasano itsatacantica avaesatinijiate. Ogantaga noquemisantamajatiri Aapani Irioshi noquejejiaquempi aviatimpajia imaica. ⁴ Coramani caaviji nocatsimamajatiri guijatacojiguiroca ocatica icantajitica Quenavoquirontsi. Naa-jianaqueri shiramparjia aisa manquigarentsijia irashitacojitaqueriqueate santanaqui

* 21:28 icovaeguishetacaantacaroca ocatica yashintacaca Aapani Irioshi. Chooca 3 oniganquitejirepae teempero. Chooca aparo irashi shiramparjia ishiraerijia, chooca otsipa ashi manquigarentsijia ishiraero, chooca otsipa irashi itsipajia teeca irio ishiraeri. Inqijajeguetei teeca irio ishiraeri niganquitejirentsiqui irashi ishiraeri, irimetojajiteri, icanquequea covaeguishetanaca.

irosatiqueate irimetojajiguetaqueri. ⁵ Irira saserorote anaantamajatanquitsica, jerijia majirontajiatsica itsamajajiaquena arimaja nocantamajataque imaica, iriojiatarite jocajivaquenaroca paperi naajianaqueneri agonorojia guintenijiatsica Tamashicoqui cameetsanijite naimentajiaquerinijite quemisantajiatsica naajianaqueriqueate Jerosarequi irantsipetacaimentajitaquempariniji.

⁶ “Cotanquitsiqueate iroompaqueate naavetanacarogueti oquempajipojaquegueti Tamashico pajinigueti intampaticatapojaque catsirincaiteri ocantanaquitiguiqueate morec oponeaca jenoqui inquitequi oashitapojaquena anquiritacotapojaquena.”[☆]

⁷ Notejanaque isaviji quepatsiqui toren noquemiqueate icantajipojana: ‘Saoro, Saoro, ¿taa picatsimatantaquenaca?’

⁸ Naatimpaqueate nocantsitariqueate: ‘¿Taampate aviatimpa, Nomajirote?’ Icantanaqueate: ‘Naatimpa naroguenti Jesoshi Nasarequitica picatsimaqueca.’

⁹ Iriraqueate notsipajiacaca yamenavaquerogueti ocantaquegueti morec, itsaroajianaquequea, cotanquitsiqueate teequeate inquemajigueriji quenquetsatanquitsica. ¹⁰ Naatimpaqueate nocantiri: ‘Nomajirote, ¿quero noncoquempani?’ Icanti iriatimpa: ‘Imaica pintinajanaque poanaque Tamashicoqui, ariqueate incantajiquempiqueate ontaniqui maasano taaca pisavicaventaqueca.’

¹¹ Navenavaquerogueti ocantanaquegueti morec ariqueate tee namenajaji, manaqueate yacatsajianajanaquea intati notsipajiacaca, yaajianaquena Tamashicoqui.

¹² “Ariqueate ichooaque oraniqui apaniro icantajitica Ananiashi tsamajatiroca itioncacotanaqueca Moishishini. Maasano joriojia guintenijiatsica ontaniqui Tamashicoqui cameetsaqueate iquenquetsatacojiaqueri. ¹³ Icoraquequitiqueate inejaquitanaqueate. Yarejetapojacagueti icampojaquenaqueate: ‘Napiguemisanterite Saoro, pamenanaje.’

Ariqueate nocotanaja namenajaji, nonejaqueriqueate. ¹⁴ Ariqueate icanquena: ‘Irira Irioshite avaesatinijiate icoguiaquempiqueate cameetsanijite pintaqueronijite inintaguequeca. Icoguiaquempi cameetsanijite pinejaquerinijite irira Caavijica Icomajamajata aisa pinquemaqueronijite icanqueca ivagantequi. ¹⁵ Aviatimpa pintsavetanqueri pintsatacaajiaqueri maasano caquinte pincamanteri maasano pamenaguetaqueca aisa piquemaqueca. ¹⁶ ¿Taampa opajita poguijavaque? Pincatianaqueja poviñacajatemala paventemparija Amajirote, pincajemaqueri ivajiroqui, cameetsanijite inquivitsitajempironijite piguempevaere.’

¹⁷ “Ariqueate nopianaja Jerosarequi noanaquequeate teemproqui itsarorentajitarica Aapani Irioshi namanaqueriqueate. Ariqueate nonejaitatiguiro manaqueate oquejetimotaquena noguimaanequi. ¹⁸ Inegaaquena Amajirote icanquena: ‘Pijashiatsi taampina, pisotoantanaquemparo Jerosare, acaniquitarite pintsavetantavequenaqueate aato iquemisantajiguimpitsi.’

¹⁹ Naatimpa nocantiri: ‘Nomajirote, iriatimpajia yamenamajajiaquena coramani noapinitaquegueti shinagogapaequi icapicopinijiacagueti joriojia naajianaqueri tsarorentajiguimpica nashitacojiaqueri santanaqui notavaacaantajiaqueri. ²⁰ Aisa coramani imetojajitaquerigueti tsavetantimpinica Ishitivano, ariqueate nochooqueate naatimpa noshinevaetanacaqueate, irootaquequeate nonetsanatsitanta-vajaricaqueate iitsaarejia metojajiaquerica.’ ²¹ Cotanquitsiqueate iriatimpa icantana: ‘Pija, nontigarancaquempitarite osamani pinquenquetsatacaajiaqueri teeca iriojia joriojia.’ ”

²² Ariqueate iroaqueragueti iquenquetsatanaquegueti Paavoro iquemisantajiavetavacariqueate maasanojia, cotanquitsi iroompaqueate iquemajivaquerigueti iquejetanaquero imaica icantigueti inquenquetsatacaajiaqueri teeca iriojia joriojia icajemajianaquequeate:

—Imaicashia irimetoje aatoniji ichoocataji acaniqui quepatsiqui. Teequeate oncameetsateji iranijajegueti.

²³ Arimpaqueate icajemajianaqueri ipishoncamagojianaqueroqueate otsipamago iitsaare ipishoncavanejianaqueroqueate quepatsivane cameetsanijite intsatimentajiaquerinijite icatsimamajatatiguirinimaja Paavoro. ²⁴ Irira imajirote coaretajia yoguijajianaqueri intsompogui intavaacaantajiaqueri cameetsanijite incanquequeate taa opajita

[☆] 22:6 Ya. 9.1-19; 26.12-18.

icatsimatimentajiaqueri. ²⁵ Iroompaqueate yoishojiavecarigueti intavaajiaquerimequeate iquenquetsatanaque Paavoro icantiri tsipatarica imajirote coaretajia catianquitsica acaniqui:

—Naroguentitarite gonorontarica Iromaquitica. ¿Arimpate pagavejaque pintavaa-caanquena tequeratanicate incoacomajajitenaji?

²⁶ Iroompaqueate iquemavaquitigui yoanaque icamantaquitiri imajirote icanti:

—Aatoshiatsi pitavaacaantiritsi, iriguentisacanicate gonorontarica Iromaquitica.

²⁷ Ariqueate yoanaque ichooaquegueti iriatimpa icantiri:

—Iintsija pincantena, ¿arimaja aviroompaqueate gonorontarica Iromaquitica?

Icantiri:

—Jeejeguitatsi, naroguentiguitatsi gonorontarica Iromaquitica.

²⁸ Icantiri:

—Naatimpaqueate mana novegaraventaca intati oshequi imentaquipae nompeaque-mpaqueate igonorojia Iromaquitica.

Icantiri Paavoro:

—Naatimpaqueate naroguentiqueate nopeaca igonoro Iromaquitica iroaqueragueti novoaque.

²⁹ Ariquea iquenajianaquequea itsaroajianaquequeate tavajiaaquerinemeca ariqueea itsipacarejajapanajantiri. Ariqueate iquejetaca imajirote coaretajia iriatimpa itsaroanaque inejaquetarite ishiticacaanqueri gonorontarica Iromaquitica.

Yaajitanaquerigueti Paavoro incoacojiteri

³⁰ Iroompaqueate osavincaguitetanaquitigui inintaque imajirote coaretajia intsama-jaquero taaqueate opajita icatsimatimentajiaqueri joriojia, ishiticarejacotacaanqueri igavorejatsarite. Ariqueate icajemacaantajiaqueri saserorotejia anaantajianquitsica jerijia majirontajiaatsica icapiocajiaqueri. Ariqueate yaajitanaqueri Paavoro yogatijaji-ipojaqueri ichooajiaquegueti iriatimpajia.

23

¹ Irira Paavoro yamenajiaqueri sorerere majirontajiaatsica icantajiguiri:

—Nogonorojia, naatimpa ogantaga noquemisantamajatiri Aapani Irioshi nocomajamajata irosati imaica. Notsataque tee onchoocateji incatsimatimenquenaca.

² Iriaqueate saserorote anaantamajatanquitsica icantajitica Ananiashi iquemavaquitigui icantajiguiriqueate choocajianquitsica Paavoroqui:

—Pampatoncavaganteteritsija.

³ Icantanaquequea Paavoro:

—Aviroompaqueate irampatoncaque Aapani Irioshi, aviatimpa mana picameetsa-tamampeaca intati. Iroorijite imaica iroguenti pisavicashivetaca acaniqui pim-pampiatavaqueroqueate itioncacotanaqueca Moishishini cameetsanijite pincanque aricampate nantaque teeca oncameetsate aricaca tee. Cotanquitsi imaica mana pantaque icantimentantaqueca papatoncavagantetacaantaquenaguete.

⁴ Irira choocajianquitsica acaniqui icantajiguiri:

—Oraqueate aato piquejetiri imaica saserorote anaantamajatanquitsica antinirica Aapani Irioshi.

⁵ Icantiri Paavoro:

—Nogonorojia, teenicate nontsatenica nojiqueji tee irioji saserorote anaantamajatanquitsica. Nontsaquemequeate aatomequeate noquejetirome imaica. Ocantitarite itioncacojiqueca: 'Aatoja pinijashinataritsi pimajirojiate.'

⁶ Ariqueate iriraquea Paavoro yamenajiaquerigueti majirontajiaatsica iconoagarantajiaa jerijia saroseojia, itsipa jerijia pariseojia, icajemanaquequeate icanti:

—Nogonorojia, naatimpa naroguenti pariseo, iriguenti oacaantana pariseo, cotanquitsi imaica iroguenti icatsimatimentajitaquena nocanquegueti intancorejajianaje metojajivetanquitsica.

⁷ Iroompaqueate icantaquitigui ariqueate icojianaca iquenquetsatavacaajianaca yacavacajaianaca pariseojia jeri saroseojia icatsimatavacaajianaca. ⁸ Icantajiaquetarite saroseojia aato itancorejanaji metojajiaatsica. Icantajiaquequeate aisa tee inchoocateji irashivantijitete Aapani Irioshi, aisa tee inchoocateji jeocanquitsica. Iriaqueate

pariseojia icantashitatijaiacaqueate mana icantajiaque intati intancorejajianaje meto-
jajivetanquitsica, aisa chooca irashivantijitete Aapani Irioshi, aisa choocaqueate jeo-
canquitsica. ⁹ Arimpaqueate icajemajianaque maasano. Icatiagarantajianacaqueate
pariseojia tsatacaantajiguiroca itioncacotanaqueca Moishishini icantajiguiri:

—Notsajiaqueri teequeate iranteji teeca oncameetsateji. Iriocampate quenquetsata-
caaqueri jeocanquitsica irioca irashivantite Aapani Irioshi.*

¹⁰ Iriatimpajia arimpaqueate icatsimatavacaajianaca irootaquequeate yamentacarica
icamajirote coaretajia yagamajacotanacari Paavoro icanti aricampa iriserajiaaqueri,
icajemacaantajiacarica igoaretajiate iraapitsajivajeri irajaijanajeri intompogui itso-
vironaquitequi coaretajia. ¹¹ Oraqueate osavincaguitetanajigueti coajica otsitenitana-
jigueti aisa irira Amajirote yonigaacari Paavoro, icatiapojaca quempeji icantiri: “Pishine-
tanaquempa, Paavoro, aato pitsaroguitsi. Quejetaca pitsavetanquenagueta acaniqui
Jerosarequi, ariqueate pinquejetaquempa ontaniqui Iromaqui.”

Isariajivecarigueta irimetojajiquerime Paavoro

¹² Osavincaguitetanajigueta iconoagarantajia joriojia iquemavacaajia isariajiacari
irimetojajiaqueri Paavoro, icantajigui:

—Imaica, aatogueta ametojiri, aato ashecajijaatsi aisa aato amirajijaatsi. Iintsijate
irogashinoncajimentajiro Aapani Irioshi aatogueta anetsanajiguiro.

¹³ Yavisajiaquero 40 sariajiacarica irimetojajigueri. ¹⁴ Yoashitantajianacarica sasero-
rotejia anaantajanquitsica jerijia majirontajiatitsica icantajiaipojaqueri:

—Naatimpajia noquemavacaajia nocantajiaque aatogueta nometojiri Paavoro, aato
noshecajijaatsi. Aatogueta nonetsanajiguiro nonintajiaque irogashinoncajimentenaro
Aapani Irioshi. ¹⁵ Imaica aviatimpa poajianaque pamatavijajiaqueteri imajirote coareta-
jia pincantajiaqueriqueate iramajianaquempiri Paavoro cameetsanijite pincoacotimen-
tajiaquerinijite. Naatimpajia nosenacashijiaquempariqueate quenavoquirontsiqui
nometojajiaqueri.

¹⁶ Cotanquitsi iroompaqueate iquemacoquerigueta irijanite itsijoite Paavoro,
yoanaque itsovironaquitequi coaretajia icamantapojaqueri Paavoro. ¹⁷ Iroompa Paavoro
icajemaqueri itsipataca imajirote coaretajia, icantiri:

—Jeri irica notineri paanaqueri pimajirotequi cameetsanijite incamantimentagueta-
querinijite.

¹⁸ Yoanaque itsipatanacari icamantapojaqueri:

—Irira Paavoro yashitacojitaqueca santanaqui canquena namampijaquempiri irica,
inintaque incamantaguetaquempi.

¹⁹ Iriatimpa yacatsatanaqueri yaanaqueri oraniqui icantiri:

—Iintsija imaica pincamantena.

²⁰ Iriatimpa icantiri:

—Noquemacojiaqueri joriojia iramatavijajiaquempi incantajiaquempi osaitquera
paajianaqueri Paavoro imajirojiatequi incoacomajajiaqueriqueate. ²¹ Cotanquitsi aato
piquemisantajiguiritsi, choocajiarite yavisajiaquero 40 senacashijiaquemparineca
irimetojajiaqueri, icantajiaquetarite: ‘Aatogueta ametojiri Paavoro, aato ashecajijaatsi
aisa aato amirajijaatsi. Iintsijate irogashinoncajimentajiro Aapani Irioshi aatogueta
anetsanajiguiro.’ Imaica chooca yoguijacojiaquempi quero pincanterini.

²² Iroompaqueate iquemaquitiguiri imajirote coaretajia itigarancajiri icantavajiri:

—Imaica aatoja pitsavetitsi.

²³ Ariqueate icajemajiaqueri mavite itsipataca icantajiaqueri:

—Pincajemajigueri coaretajia pincapiocajiaqueri, 200 irovegarajiaquempa anijijianan-
quitsineca, aisa 70 shiacojiananquitsineca quitavaireriqui, ariquea aisa 200 ajiricajianan-
quitsineca imocorojamento. Oraqueate ompitsecamajatanagueta paajianaqueri Paa-
voro Sesareaqui. ²⁴ Imaica pinetsanajigueneri Paavoro quitavaireripae irishiacotan-
tanaquempaca cameetsanijite parejetacamentajiaquemparinijite ichoocaquagueta ma-
jirontatsica Perishi.

²⁵ Yojocajiaqueneri paperi itioncaquenerica majirontatsica Perishi ocanti:

* 23:9 Chooa iroquetinica tioncanquitsica ogavitaquero acaniqui, ocanti: “Oquejetacagueta, shoshoh acatsimatiritsi
Aapani Irioshi.”

²⁶ Narotaque Caraorio Irishia, notioncaquempi, nomajirote Perishi nopincatsatica. ¿Cameetsaca pichoocaque? ²⁷ Imaica nonintaque nontioncacotaqueri irira Paavoro yaajianaquempica coaretajia. Irira joriojia yaajiaqueri icatsimajiaqueri inintajiavetaca irimetojajiaquerimequeate, cotanquitsi naatimpa iroompaqueate noquemacoquerigueti iriguenti gonorontarica Iromaquitica noanaque notsipajianacari nogoaretajiate namiqueriqueate naajiavajiri. ²⁸ Ariqueate nonintaque naatimpa nontsataque taa opajita icatsimatimentajiaqueri. Irootaquequeate naantajiavetanacarica ontaniqui ichoocajiaquegueti imajirojiate. ²⁹ Ariquea iriatimpajia icamantajiaquena iroguenti icatsimatimentajiaqueri yamenajiaquerigueti teequeate irinetsanatajeroji itioncacotanaqueca Moishishini, cotanquitsi naatimpa namenaqueri tee onchoocateji querocampate irogujaimentajiaqueri santanaqui aisa irimetojajitaquerigueti. Manaqueate isarijashijiavecari intati. ³⁰ Irootaquequeate iroompaqueate noquemacoquerigueti isarijajiacari joriojia irimetojajigueri notigarancantacarica aviatimpaqui. Aisa nocantajiaqueri catsimajiaquerica iroajianaque inchiquitsi incamantajiaquitempi. Imaica ariotapojaque.

³¹ Ariqueate irira coaretajia inetsanamajajiaquero icantajiaquerica. Iroompaqueate onianquiptepojigueti yaajianaqueri Paavoro Antipatirishiqui.

³² Osavincaguitetanaquegueti irira coaretajia anijjijiananquitsica ipiapiaitanaja Jerosarequi. Irira shiacojiananquitsica quitavaireriqui irioqueate tsipajianacari Paavoro.

³³ Ariqueate yarejerejeipojacagueti Sesareaqui yojocajipojaqueneri majirontatsica paperi, ariquea icantajiguiri:

—Jeri Paavoro irica.

³⁴ Iteroncaqueroguetiqueate yapatsajavantaquerogueti paperi, icoacoqueri Paavoro icantiri:

—¿Quero piguintenita?

Icantiri:

—Shirishiaqui.

Iquemaquegueti ariguenti iguintenita Shirishiaqui, icantiri:

³⁵ —Nonquemisanquempi incoraquejiaquegueti catsimajiaquempica.

Ariqueate icantajiaqueri coaretajia irajianaqueri imapipancotequi Erorishini, inquemopoguijamajajiaqueriqueate aatonijite ishianajatsi.

24

Iquenquetsatacotanaca Paavoro ipigamentacotanaca

¹ Ariqueate avisanaquegueti 5 savincaguiteri yarejetapojaca Ananiashi irira saserorote anaantamajatanquitsica, itsipatsipaitacari imajirojiate joriojia jeri cantacoventantatsica icantajitica Teritorio irira amitacoquerineca Ananiashi. Iroguenti icoraquetashitaque incantajigueri Perishi imajirojiate taa opajita icatsimatimentajiaqueri Paavoro. ² Irira Perishi icajemacaantaqueri Paavoro. Ariqueate yarejetapojatiga iquenquetsatanaque Teritorio icantiri Perishi:

—Noshineventajiaquempiqueate, jeematsiqueate aviguenti peanquitsi nomajirojiate. Imaica nochoocajiaque cameetsa, teequeate inchoocateji asereajenaneca. Pinetsanaguetajero oshequini teeca oncameetsavetempaji acaniqui aguinteniqui, cameetsatari piquenquejitsitacaro. ³ Maasano nogonorojia querocagueti ichoocajiaque itsaquero, nomajirote Perishi, nocantantajiaquempica: ‘Arioteesaa.’ ⁴ Imaica aato nasereamajajiguimpitsi iroguenti nonintaque pinquemisantaquena capichaji noncanquempica. ⁵ Irira Paavoro iriguenti caaviji yasereanti aisa yoanaque itsitacaguetejanaquero iquenquetsatacaajiaqueri nogonorojia joriojia quepatsipaequi, ariqueate icatsimatavacaajianaca itsinampirejavacaajianaca. Iriatimpa iriguentitarite jivatirica quemisantirica Jesoshi Nasarequitica. ⁶ Inintavetaca aisa incovaeguishetaquerome teemporo, irootaque naantajiacarica nonintajiavetaca noncasiticajiaquerime nogujatacojiaquerome icantaantica nomajirojiate. ⁷ Cotanquitsi icoraquetaque Irishia imajirote coaretajia itavimentaguetapojaquenari yaapitsajiaquenari. ⁸ Icantajiaquena quericaca catsimataquerica Paavoro incoraquejiaque incantajiaquempi taate opajita icatsimatimentajiaqueri.

Imaicaquea imaica avirompate pininquegueti pincoacotaqueri, pincoacoqueriqueate cameetsanijite pintsatimenqueronijite taaca opajita nocatsimatimenqueri.

⁹ Irirajia joriojia tsipajiacarica icantajiaque:

—Jeejeguitatsi, arimajaqueate icantamajataquequeate.

¹⁰ Ariqueate icanque vacoc irira majirontatsica inquenquetsatantanaquempaca iriatimpa Paavoro. Ariquea icanti Paavoro:

—Noshinevaetaca pinquemisanquena imaica nonquenquetsaventanaquempagueti, notsaquetarite pimajirontsitacani coramani, pinetsanatacopinitavajiri nogonorojia.

¹¹ Imaica nonintaque noncamanquempi, maasano itsajiaque iroaquera avisananquitsi
¹² savincaguiteri noaquitiqueate Jerosarequi notsarovenquitariqueate Aapani Irioshi.

¹² Querocaguetei nochoocagueque, aricampa teemoroqui, aricampa shinagogaqui, aricampa ocapiocaguetaqueti tsovironaqui, teequea ariquea noncantimajigeriji choocajianquitsica ontaniqui cameetsanijite onquenantaquemparo noncatsimatavacaajiaquempa iroguentica incatsimatavacaajiaquempa iriatimpajia. ¹³ Querocampate irajaiaquero iricajia ironigaaquempica incantajiaquequea arimaja inejajiaquena nocatsimajiaqueriguetei. ¹⁴ Cotanquitsi jero noncamantaquempara: nogujatacotaquero oratica icantajitica Quenavoquirontsi icantacojivetacaca iriatimpajia, 'Iro iguemisantashitane.'

Irootaque nantaque noquemisantamajataqueriguetei Irioshimajaca itsaromentajianica novaesatinijiateni. Notsamajaque iroguenti iroomajaca maasano itioncacotanaqueca Moishishini, aisa maasano itioncacotanaqueca tsavetantironica icanquerica Aapani Irioshi. ¹⁵ Cotanquitsi ariqueate noquejejiacari iriatimpajia notsaromentajiacari Aapani Irioshi, nocantajiaquequeate intancorejajianaje maasano metojajivetanquitsica. Intancorejajianaje antajiguiroca cameetsaguetatsica jerijia aisa antaguetiroca teeca oncameetsateji. ¹⁶ Irootaquequeate nonintantacaca noncoguitempani noncomajamajaquempa cameetsanijite iramenaquenanjite Aapani Irioshi jerijia maasano caquinte naroguenti comajamajatsica.

¹⁷ "Naatimpa mana nochoocaque osamani, ariqueate anaapojacaguetei oshequi ajagantsi nopianaja Jerosarequi, naajianaqueneri imentaquipae napijoriojiateni coguitejacojianquitsica, jero aisa nojocaqueneri Aapani Irioshi noguishinejantacarica.

¹⁸ Ariqueate noteroncaguetanajiroguetei nogameetsatanajeguetei ontaniqui teemoroqui icoraquejiaque joriojia ponejainquitsica Ashiaqui yamenajiapojana, cotanquitsi tee apaniro nonejeji incapiocaventajiaquenaqueate caquinte, aisa tee nonejeji noncatsimatavacaguempaji. ¹⁹ Iriomete coraquejianquitsineme imaica incantajiaquempime taa opajita icatsimatimentajiaquenaca onchoocagueme nantaqueca teeca oncameetsateji.

²⁰ Pincantajiguerijate imaica iricajia quero incantajigue. ¿Taate ineqaque ontaniqui chapinqui nochoocagueguetei icapiocantajiacaca majirontajiatatsica? ¿Choocampate nantaqueca teeca oncameetsateji? ²¹ Aricampa iroocampa inejajiaque nocajemanaqueguetei nocanqueguetei: 'Iroguenti picatsimatimentajiaquena nocanqueguetei intancorejajianaje metojajianquitsica.'

²² Irira Perishi iquemacomajaquerotarite ocatica Quenavoquirontsi Iroomajatsica, irootaquequeate iquemavaquifiguiiri Paavoro icanti:

—Imaicaquea ariotapojaque. Coajica incoraqueetaqueguetei Irishia imajirote coaretajia, irioqueate camantamajataquitenane.

Ariqueate isanticojianaji.

²³ Ariqueate icantaqueri itsipataca imajirote coaretajia:

—Tee onchoocateji otsipa, cotanquitsi aato picantimentajiguiiri incoraquepinijiaquequeate itsipajia irinejapinjiaqueriguetei iramajiaqueneriqueate taaca opajita icoguitejaguequeca.

²⁴ Ariqueate anaapojacaguetei oshequi savincaguiteri icoraquetajiqueate Perishi itsipatacaro imanquigare. Iroatimpa iroguenti jorio icantajitica Toroshira. Ariquea icajemacaantaqueri Paavoro iquemisanqueri itsavetanquerogueti quero ancoquempani aventamajaquempariguetei Jesoquirishito. ²⁵ Itsavetanquero quero ancoquempani comajamajaquempa aisa cameetsa anchoocaque. Aisa icanqueri coajica aapojempaguetei savincaguiteri irogashinoncajajiaqueri Aapani Irioshi quempevaejiatsica. Ariqueate itsaroanaque Perishi, icanqueri:

—Imaica ariotapojaque. Pijataje. Coajica aatoguetei taaca opajita nosavicaventi, ariqueate noncajemacaantajempi nonquemisantajempi pinquenquetsataje.

²⁶ Iriguentitarite yoguijacovetavaca irojocaquenerime imentaquipae cameetsanijite irovashiantajeri irootaquequeate icajemacaantantapinicarica inquenquetsatacajaeri.

²⁷ Ariqueate iquejetaquero imaica aavaetanaca mavite ajagantsi. Irioqueate piajari Poroshio Peshito. Irira Perishi manatarite inintaque iroguishinejajigueri joriojia irootaquequeate tee irovashiantantajemparica Paavoro.

25

Paavoro yaventacariguetei Sesa

¹ Ariqueate icoraquepojaque Peshito Sesareaqui impeguempa majirontatsica. Avisanaqueguetei ³ savincaguiteri yoanaque Jerosarequi. ² Iroompaqueate yarejetapojatiga icoraquetashijiaqueri saserorotejia anaantajianquitsica itsipajiacari itsipa joriojia anaantajiatsica itsojeventajiapojacari Paavoro. ³ Ariquea icantajigui:

—Nonintajiaque pincajemacaantenari Paavoro iramajiaqueri acaniqui Jerosarequi.

Iroguentitarite icantimentajiaque cameetsanijite irisenacashitimentajiaquempairinijite quenavoquirontsiqui irimetojajiaqueri. ⁴ Cotanquitsi Peshito icantiri:

—Irira Paavoro choocatarite yoguijaajitaqueri santanaqui Sesareaqui. Naatimpatarite taampinatarite nompianaje. ⁵ Imaica pincantajigueriqueate pimajirojiate iroguijaguijaitanaquenaqueate cameetsanijite intsavetacotimentajiaquerinijite ariguetei arimajaca yantaquero teeca oncameetsateji.

⁶ Irira Peshito ichoocaquiti ontaniqui ⁸ savincaguiteri, aricampa ¹⁰, ariqueate ipianaja Sesareaqui. Iroompaqueate osavincaguitetanajiguetei yoanaque isavicaque icantomajantiguetei, ariqueate icajemacaantaqueri Paavoro. ⁷ Iroompaqueate iquijapojaque Paavoro itsipajiapojacari joriojia ponejiaanquitsica Jerosarequi, itsojeventajiacariqueate icantajiaquequea yantaquero oshequi covaeguishemajaca. ⁸ Cotanquitsi Paavoro ipigamentanaca icantiri:

—Teequea taaca opajita nantagueteji: tee noncantashitatiguemparo icantacaantajitaquenerica jorio; teequea nanteji teeca oncameetsateji teemproqui, tee noncovaequisheteroji; aisa teequeate nonijashinatempairiji majirontatsica Sesa.

⁹ Cotanquitsi irira Peshito ininquetarite iroguishinejajiaqueri joriojia icantiri Paavoro:

—¿Pinintaque poanaque Jerosarequi cameetsanijite noncoacomajaquempi?

¹⁰ Icanti Paavoro:

—Oraqueate arimete pincoacomajataquenename acaniqui, aritarite icanque majirontatsica Sesa incoacotantajitaquero acaniqui. Pitsamajataque aviatimpa tee queroca noncantimajigueriji joriojia cameetsanijite incatsimajiaquenaniijite. ¹¹ Oraqueate aviroguetiqueate nejaquena nantaqueguetei teeca oncameetsateji, iintsija irimetojajitena, nonquemisantacoquempaqueate aatoqueate nopigamentatsi. Cotanquitsi oraqueate teeguetei arimaja onchoocateji icantajiaquenaca, aato queri agavejatsi irojocaquena irimetojajiguenana. Arimpaqueate nonintaque noanaque Sesaqui, irioqueate coacomajataquenane.

¹² Irira Peshito icoacojiaqueri itsipatashijiacaca icantomajajiaqueriguetei iramene quero incojiaquerini iriatimpajia. Ariqueate icantiri Paavoro:

—Irootarite pinintavintsataque incoacoquempi Sesa, ariqueate poanaque iriatimpajia.

Paavoro iquenquetsatacaqueriguetei majirontatsica Aguiripa

¹³ Avisanaqueguetei oshequi savincaguiteri, ariqueate irira majirontatsica Aguiripa* yoanaque Sesareaqui irinejeri Peshito. Oguijatanaqueriqueate itsijoite Verenise.

¹⁴ Ichocajiaqueguetei ontaniqui oshequi savincaguiteri, iriraquea Peshito iquenquetsatacaqueri majirontatsica, itsavetacotaqueri Paavoro. Icantiri:

—Chooca acaniqui apaniro yashitacotacaantaqueca santanaqui Perishi.

¹⁵ Ontaniquiqueate noanaqueguetei Jerosarequi, irirajia saserorotejia anaantajianquitsica jerijia aisa imajirojiate joriojia icoraquejiaque naatimpajia, itsojeventajiacari,

* 25:13 Aguiripa. Irio icantajitica Erorishi Aguiripa II, irio irijanite Erorishi Aguiripa I (pamenero Ya. 12.1, aisa tioncanquitsica isavivanaqui).

inintajaveca nometojacaanquerime. ¹⁶ Cotanquitsi naatimpa nocantajiaqueri irira Iromaquitica tee irimetojantajigueji intati, mana iroqueti incajemacaantajiaqueri catsimajianquitsica jerijia icatsimajiaqueca, inquenquetsaventaquempa inquemajiaqueri maasano. ¹⁷ Irootaquequeate iroompaqueate icoraquejiaquegueti iriatimpajia acaniqui tee osamani nogueroji, iroompaqueate osavincaguitetanaquegueti ariqueate noanaque nosavicaque nocantomajantigueti nocajemacaanqueri Paavoro. ¹⁸ Iroaqueraguete nojiqueji ariji incantajiaquena yantaque icantimentantica Sesa, cotanquitsi teequea inquejeteroji imaica. ¹⁹ Iroguenti icantajiaquena yogaaquero yamejigaca itsaromentajigariguete Irioshi aisa iquenquetsatacojiaqueri apaniro metojatsica icantajitica Jesoshi, cotanquitsi irira Paavoro icanti: ‘Pochatanaji.’ ²⁰ Naatimpaqueate anaquena nocoacotantavetacarica Paavoro: ‘¿Pinique poanaque Jerosarequi incoacojitaquempiqueate ontaniqui?’ ²¹ Cotanquitsi iriatimpa teequea irininteji, manaqueate inintaque iroashitanaqueri Sesa, irioqueate coacotaquerine. Ariqueate nocantantacaca aato yovashiantajitiritsi ogantaga inchoocaqueni acaniqui irosati nontigarancaqueriguete ontaniqui iriatimpaqui.

²² Irida Aguiripa icantiri Peshito:

—Nonintaque nonquemaqueri naatimpa.

Iriatimpa icanti:

—Iintsija osaitequera pinquemaqueri.

²³ Iroompaqueate osavincaguitetanajiguete yoanaque Aguiripa inquemaqueri Paavoro, itsipatanacaro itsijoite pajitatsica Verenise, jerijia imajirojiate coaretajia jerijia aisa jivajiguirica igonorjia, netsanatacojiaavaetacaqueate maasano. Iroompaqueate iquijaquijaipojaqueguete, iriraquea Peshito icajemacaanqueri Paavoro.

²⁴ Icanti Peshito:

—Majirontatsica Aguiripa, aviguentijia maasano, jeri irica Paavoro icatsimajiaqueca maasano joriojia Jerosarequitica jerijia guintenijiatsica acaniqui. Ogantaga icantajiaquena nometojacaanteri. ²⁵ Naatimpaqueate namenaqueri teequeate iranteji quero-campate irimetojimentajiquerica, cotanquitsi iriotarite nintanquitsi iroashitanaqueri Sesa, irioqueate coacotaquerine. Irootaquequeate nontigarancantaquemparica iriatimpaqui. ²⁶ Cotanquitsi quero-campate noncanteni nontioncaqueneriguete Amajirote Sesa noncamantaqueriguete taa opajita icatsimatimentajitaqueri, teenicate onchoocateji. Irootaquequeate imaica namacaantantacarica pinejajiaqueriniji aviatimpajia, aisa aviatimpa, nomajirote Aguiripa, nonintamajataque aviguenti nejaquerine cameetsanijite pincoacotimentamajataquerinijite, irooqueate nontsatantaquempaca quero noncanteri nontioncaqueneriguete. ²⁷ Namenaquerotari tee oncameetsateji nontigarancashive-taquempariguete intati santanatacotanquitsica aatoguete notioncacotaqueri taa opajita icatsimatimentajitaqueri.

26

Paavoro icatiimotanacari Aguiripa ipigamentanaca

¹ Ariqueate iquenquetsatanaque Aguiripa icantiri Paavoro:

—Iintsija pinquenquetsaventaquempa.

Irida Paavoro icanti vacoc iquenquetsatanaque icanti: ² “Majirontatsica Aguiripa, not-sataque piquemacojiaqueri apijoriojiateni icatsimajiaquenaguete icantajiaquenaguete taaca opajitapae. Imaicaqueate imaica noshinetaca nonquenquetsatacaaquempiguete nonquenquetsatacoventanaquempa. ³ Aviatimpa pitsamajatarite yameguetaca apijoriojiateni aisa pitsati taa opajita icatsimatimentantajigui. Irootaquequeate nonintantacaca pinquemisantamajataquena, aato piperatanatsi.

⁴ “Naatimpa noguintenitimojiacari apijoriojiateni coramani chaajaniquitirajanaguete irosati imaica. Yamenamajajiaquena noguintenicaguete Tarisoqui jero aisa Jerosarequi, irootaquequeate itsatantamajajiaquenaca quero nocotani. ⁵ Irootaquequeate imaica irinintajiaqueguete incamantajiaquempi, incamantajiaquempiqueate. Naatimpa noponeanacaro iroaqueraguete noquenquevaritapojaque nogujatacomajataqueri pariseojia. Iriatimpajia caaviji yanaaque itsamajatiro itioncacotanaqueca Moishishini.

⁶ Coramani Aapani Irioshi icantajiaqueri avaesatiniteni intancorejajiajeri metojajiat-sica. Ariqueate noquejetaca naatimpa notsataque nometojavetaquempagueti intancorejajena, irootaquequeate yaimentajiaquena acaniqui cameetsanijite pincatsimati-menquenaniijite pimetojacaantimenquenaniijite. ⁷ Arimajaqueate icanque Aapani Irioshi intancorejajiajeri metojajiat-sica, irooqueate yoguijajiaque maasano agonorojia irirajia ichoviquiguetaqueca 12 irijanijiateni Ishiraerini. Irootaquequeate ogantaga isavicaventajiguiro irinetsanamajajiaquero inintaguetica Aapani Irioshi cameetsanijite intancorejajiajeri coajica. Irootaquequeate, Nomajirote Aguiripa, icatsimatimentajiaquena imaica joriojia yamenajiaquenaguete noquejejiacari iriatimpajia nocanquequeate nontancorejanaje naatimpa aisa. ⁸ ¿Pijijiaqueji aviatimpajia aato itancorejajiajeri Aapani Irioshi metojajiat-sica?

⁹ “Noquenquejavetaca naatimpa coramani cameetsavaetaque nantaguetaque oshequi taaca opajitapae nonticaacotantaquemparoca ivajiro Jesoshi Nasarequitica. ¹⁰ Ariqueate noquejetaca Jerosarequi nocatsimajiaqueri nonintaquequeate noguijajiaqueri santanaqui. Irootaquequeate nocantantajiacarica saserorotejia anaantajanquitsica irojocajiaquena paperi iroonijite navenquempaca, ariquea noguijajiaqueri santanaqui oshequini igomajamajare Aapani Irioshi. Oraqueate imetojajiaqueriguete noshinevaetacaqueate. ¹¹ Ariquea noquejeveca nocatsimapinijiaqueri ontaniqui maasano shinagogapaequi icapiocantapinijiacaca cameetsanijite novashiantacaajiajerinijite aatonijite itsariventajijaaritsi Jesoshi. Ariqueate nocatsimamajajianaqueri irootaquequeate noashitantajianacarica osamanipaequitica aisa, nocatsimajiaqueri natsipetacajiacariqueate.

¹² “Ariqueate naanaquero paperi yojocajiaquena saserorotejia anaantajanquitsica, noanaquequeate Tamashicoqui naajiguerime aisa itsipapae. ¹³ Cotanquitsiqueate, majirontatsica, iroompaqueate itampaticatapojaqueguete catsirincaiteri noavetanacaqueate quenavoquirontsiqui,[☆] nonejaitatiguiro ocantanaque morec oponeaca jenoqui inquitequi, cavorejavaequequeate anaqueriqueate ivoreguiguete catsirincaiteri, otsirencapojaquenaqueate anquiritacotapojana naatimpa jerijia maasano notsipajianacaca. ¹⁴ Maasano notejatejaitanaquequeate isaviji quepatsiqui, noquemiqueate icantajipojaquenaqueate iguenquetsatsarequi evereo: ‘Saoro, Saoro, ¿taa picatsimatantaquena? Avisatiqueate atsipetacajatsi. Piquejetanacari caapironcaari impigatanaquempariguete quempoguijirica impateateroguete inchaquiji, irisatiquea chaticavatsatajatsine.’ ¹⁵ Naatimpaqueate nocantsitariqueate: ‘¿Taampate aviatimpa, Nomajirote?’ Icantanaqueate: ‘Naatimpa naroguenti Jesoshi picatsimaqueca. ¹⁶ Imaica pintinajanaque pincatianaque, mana nonigaaquempi noncanquempiqueate nonintaque nontigarancaquempiqueate pintsavetacuena pintsavetacotero maasano pamenagueuca imaica jero aisa maasano nonigaaguequempica coajica. ¹⁷ Nontigarancaquempiqueate pinquenquetsatacaajiaqueriqueate joriojia jerijia aisa teeca iriojia joriojia. Namiquempiqueate cameetsanijite irajiaivequempiguete irovashiantajiajempiqueate. ¹⁸ Irooqueate nontigarancantaquempara intsatantajiajempaca. Oquejetimovecariqueate opitsecashirentimovecariqueate: teetarite intsajigueriji Aapani Irioshi, iriguenti Satanashi amatavijajiaqueri. Poashitanaqueriqueate pintsatacaajiaqueri cameetsanijite irovashiantimentajiajeronijite iquenquejaguishejiguica taaca opajitapae, aatonijite iquemisantajiajiritsi Satanashi, irioqueate inquemisantajianaje Irioshi, aisa inquemisantamajajiaquenaqueate naatimpa cameetsanijite nonetsanajiajeri, aato noquenquejacaajiajiritsi iguempevaerejia, inconoajiaquempariqueate maasano nomeshiajiaqueca.’

¹⁹ “Irootaquequeate imaica, majirontatsica Aguiripa, nonintaque noncanquempi nonetsanaquero maasano icanquenaca Jesoshi yonigaaquenaguete ontaniqui quenavoquirontsiqui. ²⁰ Iriquetiquea noquenquetsatacaajiaque guintenijiatsica Tamashicoqui. Ariqueate noquejejiaqueri guintenijiatsica Jerosarequi jerijia maasano guintenigueta-sica Joreaqui. Noquenquetsatacaajiaqueri aisa teeca iriojia joriojia nocantajiaqueri incantashitantajianajempa irovashiantajianajero iguempevaerejia, irioqueate intsaroven-

☆ 26:13 Ya. 9.1-19; 22.6-16.

tamajiaquempa Aapani Irioshi, cameetsaqueate inchoocajianaje intsatantajiaquemparica caquinte arimaja iquemisantaqueri Aapani Irioshi. ²¹ Irootaquequeate yaimentajiaquenaca joriojia teemperoqui itsaromentajitarica Aapani Irioshi inintajiavetacaqueate irimetojajiaquename. ²² Cotanquitsi yamiquena itampishitacaquena Aapani Irioshi, arimpaqueate notsavetantanaqueri arejevaetanacaqueate imaica, notsatacaajiaqueri irirajia anaantajiatsica jerijia aisa teeca iranaantajigueji, mana notsatacaajiaqueri icantajiguinica tsavetantirinica Aapani Irioshi jeri aisa Moishishini. Teequeate naashitemparo intati. ²³ Iriatimpa icantajiaquetarite irantsipevaetaquempa irira Quirishito, ariquea irimetojavequempa impochatanaje. Iriqueti jivatanajatsine impochatanaje cameetsanijite intsavetantero tsirencaguitirimajaca intsatimenqueronijite maasano joriojia jerijia teeca iriojia joriojia.”

²⁴ Iroompaqueate iquemavaquerigueti Peshito iquejetanaquero imaica iquenquet-saventanacagueti icajemanaquequeate:

—¡Paavoro, ariqueate pishoncacotanaca! Iroorijite pisavicaventaquero pivaperite manaca oshoncacotanaquempi intati.

²⁵ Icanti Paavoro:

—Teequeate noshoncacotempaji, nomajirote Peshito. Maasano nocanquempica iroguenti arimajaca teequeate namataguempaji. ²⁶ Irica majirontatsica Aguiripa iriatimpa itsamajatiro oca nocantajiaquempica, irootaquequeate noshinetantacaca iquemaqueroqueti maasano. Itsatiro iroguenti arimajaca, teenicate iromanacojiteroji noquenquetsatacoguetaqueca imaica. ²⁷ Aviatimpa majirontatsica Aguiripa, ¿quero pincante aviatimpa? Oraqueate itioncacojiaqueca tsavetantajiguirica Aapani Irioshi coramani ¿iro iroomajaca?

²⁸ Icanti Aguiripa:

—Pajiniqueate pinquemisantacaguena naatimpa aisa, nonquemisantantaquemparica Quirishito.

²⁹ Icanti Paavoro:

—Aricampa imaica, iroocampa coajica, naatimpa nonintavetaca pinquemisanqueme, cotanquitsi aato apaniro aviatimpa piquemisanti, inquemisantajiaquequeate aisa maasano quemajiaquenaca imaica inquejejiaquena naatimpa, cotanquitsi aato yoishojitiri cavorejatsariqui.

³⁰ Iroompaqueate icanquitigui imaica icatianaca majirontatsica Aguiripa aisa majirontatsica Peshito itsipajianacaro Verenise. Ariqueate iquejedianaja maasano itsipajiacaca. ³¹ Yoajianaquegueti iquenquetsatacojiaqueri Paavoro, icantajiaquequeate:

—Namenaqueri naatimpa teequeate taaca opajita iranteji irimetojimentajiquerica aisa aatomesano yoguijaajitirime santanaqui.

³² Icantiriquea Aguiripa Peshito:

—Aatomeguitatsi inchiquitsi icantime iriatimpa ininque incoacoqueri majirontatsica Sesa, ovashiantajajerimequeate.

27

Yaajitanaquerigueti Paavoro Iromaqui

¹⁻² Icantajiaquequeate iroanaque Paavoro Itariaqui. Icamantajiaqueri imajirojiate igoaretajiate majirontatsica Sesa Aogoshito irajianaqueri. Iriatimpa ipajita Joorio. Itsipatacaantajianacari itsipapae yoguijaajiguequeca santanaqui. Naatimpa notsipajianacari Arishitarico noguijaguijaitanaqueri Paavoro. Irira Arishitarico ariguenti iponeaca Tesaronicaqui Maseroniaqui. Notejianaca inirojeguiqui quenajarontsi poneanquitsica Ataramitioqui, pajini oanaque Ashiaqui onquenanaque guinteninintsipaequi ontaniqui otsapijaqui quentija. Ariqueate noajianaquequeate namajatacojianaquequeate. ³ Osavincaguitetanajigueti nagatacojiapojaque Shironequi. Irira Joorio icavintsajiaqueri Paavoro icantiri:

—Pijashiatsi pinejajiaquiteri pitsipavijijiaca irojocajiaquempinijite taaca opajita pinintajiaqueca.

⁴ Ariquea nogaajianaca aisa, noajianaque. Pajini oguipticotajename tampija, irootaquequeate nopitsocacotantanacaroca ovogore Tsipere antaqueronta.

⁵ Nosenaguijacojianacaro Shirishia aisa Pampiria narejerejeipojaca Miraqui choocatanquitsica Irishiaqui. ⁶ Ariqueate inejapojaquero imajirote coaretajia quenajarontsi poneanquitsica Arejantiriaqui oananquitsineca Itariaqui. Irooqueate itetantajianaquena nogaaianaca aisa noajianaque. ⁷ Inchiqiojisano nocantacojianaque namajatacojianaque nopomerentsijianacaro oshequi savincaguiteri. Osamani nantajiaquero cotanquitsi noquempejipojaquerogueti Guiniro oguipiacojiavaquena tampija, irootaquequeate nocononcacotantajianacaca nomontejacojianaqueate niganquivogorequitica icantajitica Quereta. Nopitsocacotanaca araquerora ontaniqui oquempejiquegueti Saramona. ⁸ Nopomerentsijianajaro nosenaguijacojianacaro Quereta, irosati narejerejeivaetani nagatacojiapojaqueni agapiniquegueti quenajarontsi icantajitica Cameetsatatsica Agatapinitaquegueti, oquempejiquegueti guinteninintsi icantajitica Irasea.

⁹ Iroorijite oshequiacotanaquena savincaguiteri noponeajiacagueti Sesareaqui pajini nontejaatacotaje, irootaquequeate arimpaqueate ojamajatiri ocovejencatanaqueni namajatacojianaquegueti, irootaquequeate icantantajiacarica Paavoro:

¹⁰ —Naatimpaqueate notsataque oajianaquegueti imaica mana antsipejianaquempa. Aato apaniro ojocajajigui quenajarontsi aisa ajaararontsi aricampa ojocajajiaquempa aatimpajia aisa.

¹¹ Cotanquitsi irira imajirote coaretajia teequeate inquemisanteriji Paavoro, iriguenti iquemisantajiaque taquijatanaqueroca quenajarontsi aisa ashintaroca. ¹² Oraqueate agapiniquegueti quenajarontsi teenicate oncameetsateji tejarontsiqui, irootaquequeate inintantajiacaca oshequini irogaajianajempa aisa, ijijiaqueji iragavejajiaquempa irarejijiaquempaji ontaniqui Penisequi choocatatsica aisa Queretaqui, inchoocajiaquemequeate ontaniqui irosati irivoreanajegueti catsirincaiteri. Ontaniquiqueate Penisequi aato yarejeta choviga poneanquitsica oquempejitacoquerogueti isotoguigueti catsirincaiteri. ¹³ Ariqueate yamenajiaquaquerogueti inchiqioji otampijatapojaque ijijiaqueji cameetsataqueji iroajianaje arinijite aacotimentajianaquerinijite iquenquejiaquegueti, ariqueate inoshicajatajiro cavorejatatsica agaparancajatatsica itetajiroqueate, ariquea noajianaque nopantsapijatacojianaquero otsapijaqui quentija Queretaqui. ¹⁴ Cotanquitsi capichaji osamanijencaguitepojatigui otampijatapojiqueate inirojencamajaca choviga poneanquitsica oquempejitacoquerogueti isotoguigueti catsirincaiteri, ocantavaetanaquequeate jeoc jeoc jeoc. ¹⁵ Nonintajiavetacaquea nonquenajatacojianaqueme oquenapojaquegueti choviga, taaja esho oguipiacotanaquena, ariquea aacotanaquena intati choviga quenajarontsiqui. Naatimpajia noquemisantacojiavaca querocampate noncojiavajeroni. ¹⁶ Ariqueate noacojianaque antaqueronta otsipa niganquivogorequitica icantajitica Caraora, ariqueate teesaconaqueate ontampijamajatajeji. Osamani nantajianaquero chaajaniquitica quenajarontsi ishiticacojitica, najiricamajaquero. ¹⁷ Ariqueate itejiaquero. Ariquea ijijiaqueroji ontsiratsiraitanaque ogotapae ipeacaantacaroca inirojegui quenajarontsi, ariqueate yaguiaguaataquero ishitaquero. Aisa itsaroajianaquequeate irivanquetacojiaquemparome onicoaquegueti impanequi icantajitica Shirete, ishiticarejaquero quitsaarentsimago yogaguijijiaquero cameetsanijite aacojianaquena choviga. ¹⁸ Cotanquitsiqueate osavincaguitevetanacagueti arimpaqueate ojatiri otampijamajatanaqueri, ariqueate iparianacaro ipishoncajaguequero ajaararontsi yamajavetacaca. ¹⁹ Ariqueate otsipatapojacagueti savincaguiteri narosatiqueate pishoncajajiaquero iniromagotanquitsica, ovoapae, otsipapae ashincaca quenajarontsi. ²⁰ Oraquea oshequianaquegueti savincaguiteri opitsecanaquequeate teequeate irivoreajeji catsirincaiteri aisa impoquiropae. Arimpaqueate ojamajatatigui otampijamajatatigui nimaja nojiqueji arijite nojocacojiaquempaji. ²¹ Naanaatacoguetanaque tee noshecajajempaji, icatianaqueate Paavoro icantiri:

—Aviguentijiarite cotanquitsi, pinquemisantajiaquenamegueti iroaqueragueti nocantajiaquevempigueti arimequeate anchoocajianaqueme Queretaqui, aatomecate atsipejigame imaica, aisa aatomequeate opeaguetame maasano pamajiavetacaca. ²² Imaica aato pitsaroajiguitsi ontsiavetanaquempaqueate quenajarontsi, cotanquitsi aatimpajia aatoqueate ojocajajigatsi. ²³ Incajaranqui tsiteniriqui icatiimotapojaquena irashivantite Aapani Irioshi ashintanaca nantavaetina, ²⁴ icampojaquena: ‘Paavoro, aato

pitsaroguitsi, poanaquetarite pinejeri majirontatsica Sesa. Aato yojocajatimajigatsi apaniro pitsipajiacaca quenajarontsiqui, icavintsajaquempitarite Aapani Irioshi.’²⁵ Nocantantajiaquempica aato pitsaroajiguitsi pishinejiguempa. Naatimpa notsataque irinetsanataquero Aapani Irioshi maasano icanquenaca irashivantite. ²⁶ Cotanquitsi mana ovanquetacotacaji tampija ovogorequi.

²⁷ Ariqueate anaapojacaguete 14 savincaguiteri noquenacotashijianaca quantijaqui icantajitica Arriatico, oraquate tampija ariqueate aacojianaquena. Oraquate onianquiiitepojigueti irira taquijajiaqueroa iquenquejajiaque quempejitapoji quepatsi. ²⁸ Igomarojiaquero osaanajataqueguete, ariqueate ovegarapojani 36 meetero. Ariquea osamanijencaguitepojigueti imajajiro aisa, ariquea ovegarapojani 27 meetero. ²⁹ Itsaroajianaquequeate itsinacotarotsi mapi yogaguijitantajiacaroca ovataquiqui cuatro cavorejatatsica agaparancajatanquitsineca quishotacaaqueroneca quenajarontsi. Ishoshoguitejianaca yoguijajivajiro savincaguiteri. ³⁰ Irira taquijajiguiroca inintajiavetaca irishiajianaqueme irovashiantajianajenamequea, yantamampeajianaqueate iroajianaque irojocajajiaquero cavorejatatsica quishotacaaqueroneca otsovi, cotanquitsi iroguenti irojocajajiaqueme chaajaniquitica quenajarontsi inquenajatacotantajianaquempameca. ³¹ Cotanquitsi iquenquetsatanaquequea Paavoro, icantajiguiri imajirojiate coaretajia jerijia aisa igoaretajiate:

—Iramerencapitsajianaquempiguete ariqueate pojocajajiaquempa aviatimpajia.

³² Iroompaqueate iquemavaquitigui ipeshacojiaquero chaajaniquitica quenajarontsi, ariqueate opariajatanaquequeate. ³³ Ariqueate iroompaqueate osavincaguitetanaquitigui irira Paavoro icantajiguiri maasano irishecajiguempa, icantajiguiri:

—Manaqueueate anaapojaqueate 14 savincaguiteri irosatiqueate piquempoguijajiaquero, aisa teequeueate pishecajajempa. ³⁴ Nocantantajiaquempica pishecajiguempa cameetsanijite pintampishitimentajianaquenijite, aatotarite opeimata capichajaniqui pimajeaniqui.

³⁵ Iroompaqueate iteroncanaquerogueti icantajiaquerigueti, yaaquero pan, icatiimojiacariqueate maasano, icanqueriqueate Aapani Irioshi: “Ariotesaa pojocajiaquenar nosheca”, icotarejaquero ishecatacaqueate. ³⁶ Yamenacojiaquerigueti maasano itampishishirejianaji ishecajiacaqueate. ³⁷ Ari novegarajia 276 maasano quenajarontsiqui. ³⁸ Ariquea yagashecajaiacaguete ipishoncajajiaquero tirigoitsoqui cameetsanijite oga-jenocajamajamentanaquempanijite quenajarontsi.

³⁹ Ariqueate osavincaguitemajatanajigueti teequeueate intsajiapojeroji quepatsi, mana yamenacojiaquero ocasoguiroquiatacaguete ariqueate ochoocaqueni impanequi, inintantajiacaca impanquenajianaquemparojijiaqueji iragavejajiaque intsinampijatacójiaquempa. ⁴⁰ Ipeshacojiaqueroquea cavorejatatsica agaparancajatatsica quishotacaaqueroca quenajarontsi, ari ochoocataji quantijaqui. Ariqueate itsajacojiaquero itaqui-jatantajigaroca. Ariquea itinajacotajiro quitsarentsimago choocatajatsica otsoviqui cameetsanijite aacotimentajianaquenianijite tampija impanequiqui. ⁴¹ Cotanquitsi aacojiavetanaquena mana opishoncajiaquena otampishijamajataqueguete oja, ovanquetantamajatapojaroca impanequi otsovi. Oraqueueate ovataqui otsirajanaquero otampishiaca ovore quantija. ⁴² Irira coaretajia inintajiavetaca irimetojajiaquerimequeueate yoguijajiguetica santanaqui aatonijite yamajamajaitanaquetsi ishijaianacatsiqueate. ⁴³ Cotanquitsi irira imajirote coaretajia teequeueate irininteji intsipatacaantempariji Paavoro, icantantajiacarica:

—Ariotaque icojiacani. Quericaca tsajiatsica yamajajigui iriquete jivajiananquitsine iramajamajaitanaque iragajianaque. ⁴⁴ Iriqueueate teeca intsajigueji iramajajigueti irajianaque inchacotapae aisa taaca opajitapae cameetsanijite iragatimentajianajenijite.

Ariqueate noquejetacajianacaro imaica nagajiapojaque maasano otsapijaqui.

¹ Iroompaqueate nagajiapojaquegueti maasano, icamantajitaquena ocatica ovogore opajita Marata. ² Irira guintenijiatsica oraniqui cameetsaqueate yaajivaquena icavintsajajivaquena itsitacashijiavaquena paamari, catsincaguiveaetaquetarite otejaquetarite incani. ³ Irira Paavoro yaviguetapojaque inchajempequi. Iroompaqueate itsitacavetacarogueti iquemaitatiguiiri tac camaarini iracoqui, isoancanaca oguishianaqueri paamari. ⁴ Iriiraqueate guintenijiatsica oraniqui yamenajivaquerigueti itsatanaca iracoqui, icantavacaajianaca:

—Iriocajate metojantatsica, irootaquequeate yagavetajagueti yojocajavetacagueti, imaica irioqueate atsicakeri camaarini. Aricajate yogashinoncajimentaqueri Irioshi.

⁵ Irira Paavoro ipotecaqueri paamariqui, cotanquitsi teequeate ireeretanaqueri. ⁶ Iriatimpajiaqueate ijijiaqueji arijite ireeretanaque ariqueate inquinaque intejanaque irimetojanaque, cotanquitsi yoguijajivecari intati tee iragavejeriji. Ariqueate icantajiaque:

—Iriocajate irioshitatsica.

⁷ Chooaqueate quempeji iguepatsitepae Povirio, irio jivatanquitsica ovogorequi. Iriatimpa yaajivaquena icavintsajajivaquena, ariqueate nomaimojianaqueri 3 savincaguiteri. ⁸ Yojoquijitacaquea iriri Povirio, inorijaca, icatsirincajencatanaque, ishijat-acotaquero iriraja. Ariquea yoanaque Paavoro irinejeri. Yamanacoventapojaqueri ipamitapojaqueri, ariqueate ipeanaja. ⁹ Iroompaqueate iquemacojiaquitiguiiri icoraquetashijiaqueri maasano ashinoncajajatsica iroveajajerita, ariqueate iriatimpa yovejaajiri. ¹⁰ Iriatimpajia ishineventajiaquenaqueate icavintsajajivaquena. Ariqueate nonetsanajianaja noajianaje, yojocajivaquenaqueate maasano nocoguitejajiaqueca.

Yarejetapojacagueti Paavoro Iromaqui

¹¹ Ariqueate nochoocajianaqueni 3 taai ontaniqui ovogorequi. Notejianaja quenajarontsi qui poneanquitsica Arejantiriaqui. Chooa isheroncaguetica ontaniqui otsovi qui, iquejetacaacari irioshivijirentsi tsipari, aparo icantajitica Caashitoro, itsipa Porokuishi. Irira ashintaroca ichoocavaetanaquequeate oraniqui niganquivogorequitica nochoocatantajiacaca naatimpajia, yoguijavaquero osariapojajetaqueate. ¹² Ariqueate noajianaji nagatacojiapanajanti Shiracosaqui, ariqueate nochoocajianaque 3 savincaguiteri. ¹³ Ariqueate nogaajianaca aisa, noquenacojianaque otsapijaqui narejevaetaniqueate Irejioqui. Osavincaguitetanajigueti otampijapojiqueate aacojianaquena noquenquejaquegueti. Namajatacojianaque mavite savincaguiteri, narejejiaca Potejoriqui. ¹⁴ Ariquea oraniqui nonejajipojaqueri napiguemisantarijiateni. Iriatimpajia yaajivaquena icantajivaquenatarite: “Pinchoocatimojianaquenataja 7 savincaguiteri.” Ariqueate noajianaque Iromaqui. ¹⁵ Irira napiguemisantarijiateni Iromaquitica iquemacojivaquenagueti iconagarantajiacaqueate icoraquejiaque itonquivojajivaquenaquea Pororeapioqui. Itsipa mana icoraquejiaque yoguijajivaquena ontaniqui icantajitica Tereshi Taverenaqui. Irira Paavoro iroompaqueate yamenajipojaquerigueti icampojiri Aapani Irioshi: “Ariotesaa”, ariqueate ishinevaetanaca. ¹⁶ Ariquea noajianaque narejejiaca Iromaqui. Irira imajirote coaretajia yaajianaqueri yashitacojitica, yojocajipojaqueneri imajirote coareta santanaqui. Icantajiqueriquea Paavoro inchoocatashiquempa iriatimpa, iramenaqueriqueate apaniro coareta.

¹⁷ Ichooatapojigueti 3 savincaguiteri irira Paavoro icajemacaanqueri joriojia anaantajiatatsica icantajiguiri:

—Napijoriojiateni, teequeate nonijashijiguempariji agonorojia, aisa teequeate noncantashitatuemparoji canqueca avaesatinijiate coramani, cotanquitsi iriatimpajia yaajivaquena Jerosarequi, ariqueate yojocajiaquenari yaajianaquena Iromaquitica. ¹⁸ Ariquea yagajianaquegueti majirontajiatatsica icoacojiaquenagueti inintajiavetaca irampaquijajiajenname, itsaquetarite teequeate taaca opajita nanteji querocampate irimetojimentajiquenaca. ¹⁹ Cotanquitsi irira agonorojia joriojia tee irinintajigueji irampaquijajiajena, irootaquequeate nocantantajiacarica Peshito noncoraquetaque acaniqui

cameetsanijite incoacoquena Sesa. Cotanquitsi teequeate noncatsimajigueriji agonorojia, iroguenti nonintaque nonquenquetsaventaquempa. ²⁰ Irootaquequeate noca-jemimentajiaquempica imaica cameetsanijite namenajiaquempi nonquenquetsatacaajiaquempi. Pinejantajiaquenaca ishiticajiaquena cavorejatsariqui mana notsavetanqueri irira Quirishito aguijajivaqueca aatimpajia ishiraerijia.

²¹ Iriatimpajia icantajiguiri:

—Irira guintenijiatsica Joreaquei teequeate impacaantimajiguenaji paperi tsavetantaquempineca, aisa agonorojia coraquejianquitsica teequeate incantimajigueji: ‘Chooqa yantaqueca’, teequeate incantaguishetacojiguempiji. ²² Imaica nonintaque nonquemisantajiaquempi quero pincanteni aviatimpa. Noquemacojiaqueritarite maasano guinteninintsipaequi icatsimajiguiritarite quemisantajiguirica Jesoquirishito.

²³ Ariqueate yoajianajigueti icantajianaqueri querocagueti savincaguiteri incoraqueantajiaquempaca inquemisantajiaqueri. Ariqueate aapojacagueti incoraqueantajiaquempaca icoraquejiaquequeate oshequi iquemisantajiaqueriqueate. Iriatimpa imapocanaquero iquenquetsatanaquequea iroaquerasano savincaguitetamananquitsi ariqueate itsitenijencaguitetacovaetanaque itsavetanqueri Aapani Irioshi quero icota imajirontagueti. Iquejijianaquerigueti imaica cameetsanijite inquemisantimentajiaquerinijite Jesoshi, iroguenti ipampiataque itioncacotanaqueca Moishishini jero aisa itioncacotanaqueca tsavetantajiguirinica Aapani Irioshi. ²⁴ Iconoagarantajiacaqueate iquemisantajiaqueri, choocaqueate itsipapae teeca inquemisanteriji. ²⁵ Ariquea iriatimpajia yamenajiaquegueti tee inquemavacaajiguempaji, ariqueea yoajianaji. Irira Paavoro icantajiaavajiriqueate:

—Arimajasacanicate icantamajataque Ishire Aapani Irioshi coramani iquenquejacaquerigueti tsavetantirinica Isaiashini, ariqueate irioqueate cantajiaqueri avaesatinijiate icanti:

²⁶ ‘Pijashia pincantajiaquiteri irica caquinteja:

“Pinquemajivequempaquea, cotanquitsiquea aato piquemajiaavajirotsi.

Pamenajivequempaquea, cotanquitsiquea aato pitsatimajiaavajirotsi.”

²⁷ Iquishoshirentanaquetarite iricajia.

Oraquea iguempita tee inquemamajatantajemparo,

aisa imatsivocajataque,

aatonijite inejantajiajarotsi iroquiija,

aatoniji iquemantajiajarotsi iguempita,

aatoniji itsajigui ishirequi,

aatoniji ipitsocashijigana nogueshishirentantajemparica.’

²⁸ “Imaica nonintaque noncamantamajajiaquempi iriotaquequeate inquenquetsatacaajitaque teeca iriojia joriojia incamantajitaqueriqueate quero icota Aapani Irioshi imeshiantigueti. Iriatimpajia inquemisantamajajiaque.”

²⁹ Iroompaqueate icanquitigui Paavoro ariqueate yoajianaji joriojia, itampishijencajianaque iquenquetsatavacaajianaca.

³⁰ Iriaqueate Paavoro ichoocaguitini mavite ajagantsi. Ogantaga ivegaraqueri ashintacaroca tsovironaqui cameetsanijite irimaantimentaquemparonijite. Yaajivaqueri maasano coraquejiatsica. ³¹ Itsavetantiri Aapani Irioshi quero icota imajirontagueti. Itsatacaajiaqueriqueate itsavetanqueri Amajirote Jesoquirishito. Teequeate intsarogueji, aisa tecatsiqueate ticaguerineca.

PAAVORO ITIONCAJIAQUENERI IROMAQUITICA

Antsatantaquemparoca

Ocatica iroguenti antsatantaquemparoca itioncacaantaqueca Paavoro itioncaciaquenerigueti tsaromentajiacarica Jesoshi choocajianquitsica guinteninintsiqui pajitatsica Iroma. Iriaquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanarica. Irocashi itioncacotaqueri irira Paavoro otsipaquei paperiqui (Ya. 7.57–8.1; 9.1–31; 13.1–28.31). Itioncacotaqueri ichooaquegueti Iromaqui otsapapaequi Ya. 28.14–31. Tequeratagueti intioncacaanteriori Paavoro ocatica itioncacaanquero otsipapae mavite paperi itioncaciaqueneri Tesaronicaquitica, aisa otsipa mavite paperi itioncaciaquenerica Corintoquitica, otsipa paperi itioncaciaquenerica choocajianquitsica provinciaqui pajitatsica Garashia. Coajica icamantaqueri Tereshio intionquero ocatica paperi intioncacijgueneri choocajianquitsica Iromaqui (16.22). Paavoro icantaqueri Tereshio maasano intioncacaqueca ocantiqui ocatica paperiqui. Itioncacaantaquero ajagantsiniqui irooca 56 irooca 57, otsipatapojacagueti iquenaguetanaquegueti quepatsipaequi itsavetantavaequerigueti Jesoquirishito. Itioncacaantaquero gueti Paavoro ocatica paperi iquenquejaitaque ichooaque Corintoqui irooca otsipaquei guinteninintsi choocatanquitsica quepatsiqui pajitatsica Guereshia.

Ocaniqui paperiqui itioncacaantaqueca Paavoro itsatacaajiacaji maasano aatimpajia caquinteja yamenajiacaji Aapani Irioshi chooca antaqueca icantimentantaqueca iriatimpa. Irirampani Jesoquirishito yamenaqueri Aapani Irioshi teequea inquempevaetimatempaji. Itsatacaacaji quericaca aventaquemparineca Jesoquirishito metojaventajiacajica iramenaqueri Aapani Irioshi quejetaca tee inquempevaetimatempaji. Itsatacaajiacaji quero ancojiaquempani aatimpajia quemisantajiaquerica Jesoshi anchoocajiaqueniji cameetsa, anetsanaguetaqueroniji inintaguetica Aapani Irioshi yamitacojiacajigueti Ishire.

¹ Naroguenti Paavoro tioncaquempica, iriguenti ashinquena Jesoquirishito, icajemashirentaquena nompeaquempa itigarancane, inintacaquenaqueca nontsavetantero Quenquetsatsarentsi Oganejencatatsica* itigarancaqueca Aapani Irioshi. ² Oraticaquea Quenquetsatsarentsi Oganejencatatsica irootaquequea icantsitacaca coramani itioncacaquerigueti tsavetantajiatatsica tioncaquero Tioncarentsi Iroomajatatsica. ³ Iriguenti icantacoque Irijanite Aapani Irioshi, iriotari Amajirote Jesoquirishito. Oraquea icaquintetapojaquegueti, iriguenti choviquivaetanaqueri majirontatsica Taavini. ⁴ Ariquea imetojavecagueti Amajirote Jesoquirishito manaquea ipochatanaji, yonigaantantacaroca iriguenti Irijanite Aapani Irioshi, aisa irooquea itsatantajitacaroca iriguenti caaviji yagavejamajati, yonigaantaqueriquea Ishire Iriomajaca. ⁵ Iriaquea Aapani Irioshi icavintsajamajiaquenaqueca, inintacaantajiaquenaca Jesoquirishito nompeajiaquem-paquea itigarancane nontsavetantimojiaqueri maasano caquinteguetatsica cameetsaniji inchoocagarantajiaqueniji aventaventaquemparineca Aapani Irioshi tsaromentajiaquemparineca irinetsanatantajiaquemparoca icanquerica. ⁶ Ariqueate iquempetacajiaquempiquea aviatimpajia inintacajiaquempani Aapani Irioshi irashintajiaquempiquea Jesoquirishito.

⁷ Nontioncaciaquempiquea aviatimpajia guintenijiatatsica oraniqui Iromaqui, ipintsajiacaca Aapani Irioshi icajemantajiaquempica pimpeajiaquempaniji igomajamajare.

* 1:1 Quenquetsatsarentsi Oganejencatatsica. Irootarite tsavetantaquerica Jesoshi Irijanite Aapani Irioshi, shetacoshirentajiaquerineca maasano coguisherijia aventaventaquemparineca.

Namanacoventajiaquempiquea incavintsajajiaquempinijite Aapanite Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoventajigaro taaca opajitapae.

Inintaveca Paavoro iroanaquemequeate Iromaquiniqui

⁸ Imaica iroquetitaquea noninque noncamanquempi, querocaguete quepatsipaequi itsavetacojiquempiquea aviatimpajia caaviji pitsaromentamajajianacari Aapani Irioshi. Irootaquequea nariotelesatantanacarica Aapani Irioshi, iriotaquequea agavejacaque-naca Jesoquirishito noquempetancaroca imaica. ⁹ Yamenaqueaqueate Aapani Irioshi nocantacoguitani namanacoventajiaquempiquea, aparo iriatimpa nosavicaventaque-quea, notsavetantaquero Quenquetsatsarentsi Oganejencatatsica tsavetacoquerica Iri-janite. ¹⁰ Oraqueate namanacoventajiguimpiguete nocanqueri Aapani Irioshi iriogueti nintanquitsine intigarancaquenaqueate noanaquequea oraniqui aviatimpajiaqui name-najijatempi. ¹¹ Noninquequea namenajijatempi namitacojiaquempiniji pishirequi pintampishishiretantamajianaquempaca. ¹² Teequea ariqueate noncanteji aparo nontsatacaajiaquempiquea naatimpa, iroguenti nocanque noninque antampishitava-caajiaquempaquea aatimpajia, ariqueate aquejetavacaajiaca atsaromentajiacariguete.

¹³ Napitsaromentarijiate, noncamanquempi nopintsapintsavecaqueate namenajia-jatempimequea, cotanquitsiquea teequea nagavejeji noncoraqueeteji arejevaetanaca imaica. Iroguenti nopintsatashivetaca nontsavetantimojiaquitempi pimpishivoroquija-coshirentimentanaquempanijite pinquempetantajianaquemparica guinteniguetsica osamanipaequitica notsavetantimojiaqueriguete. ¹⁴ Ininquequeate Aapani Irioshi nontsavetantimojiaqueriquea maasano, irioca guiriego irioca teeca iriguiriegote, irioca tsavaetatsica irioca teeca intsavaeteji, namenajiaqueritarite inchoocatetajate tsavetan-timotaquerineca. ¹⁵ Irootaquequea nonintantacaca noncoraqueataquequea nontsavetan-timojiaquempiqueate aviatimpajia guintenijatsica oraniqui Iromaquiniqui, nontsataca-jiaquempiro Quenquetsatsarentsi Oganejencatatsica.

Agavejica Quenquetsatsarentsi Oganejencatatsica

¹⁶ Teequea nompashiventacaguemparoji Quenquetsatsarentsi Oganejencatatsica tsavetantaquerica Jesoquirishito, iroguentitarite iragavejane Aapani Irioshi irimeshiantajiaquemparica maasano aventaventaiquemparineca. Iriquetitaquea intsavetantimojitaquequea joriojia, iroompaquea inquempetsijiguempariquea teeca irijorijoigueji. ¹⁷ Oraticaquea Quenquetsatsarentsimajaca otsatacaajiacaji quero icota Aapani Irioshi icomajashirentacajaariguete caquinteji. Iroguenti icomajatacajajaa irirajia aventaventajiacarica aisa nintanajatsiquea yaventajiacari. Ariquea ocanque itioncajiqueca: “Iriaquea comajashirentanquitsica incoquempani inchoocaguiteni irooriji yaventaguitarini Aapani Irioshi.”[☆]

Aapani Irioshi icatsimajiaqueri covaeguishejiatsica

¹⁸ Iriaquea Aapani Irioshi choocatatsica inquitequi yonigaantacaro igatsimare, icat-simamajatariquea maasano teeca intsaromentempariji aisa maasano peacaaguishejiac-aro covaeguisherentsipae. Iriatimpajia iticaaqueroquea iroomajatatsica, iticaantavac-aro igovaeguishe. ¹⁹ Choocaguetaquetarite iragavejaqueca caquinte intsaguetaque quero icoguetani Aapani Irioshi, ariquea itsajavecaroquee iriatimpajia, inchiqiojita yoguiconijataqueneri iriatimpa. ²⁰ Aatimpajia teequea amenajivetempariji Aapani Irioshi, cotanquitsiquea oraqueate yamenajiguetroguete maasanopae ipeacaaguecaca paesatoniqui iroaqueraquete ipeacaacaroguete quepatsi aisa maasanopae choocatan-taguetaroca, ariquea iroguenti itsajiquero iriguente Irioshimajaca caavijica yagaveja-majati, incoguitempani iragavejaguiteni, jero aatoquea queri agavejatsi incantama-jate: “Naatimpa teequea nontsateroji.” ²¹ Itsajivecashinete chooca Irioshi, cotan-quitsiquea teetari intsaromentajiguempariji, teequea intsarocaaajiguempariji, teetarite incanteriji: “Ariotelesaa”, iroguenti iquenquejaguishevaequero covaeguisherentsi, jero teeca intsatimajigueji, quejetacaquea ipitsecashirentacojianaque. ²² Icantajivecaquea:

[☆] 1:17 Avc. 2.4.

“Notsamajajigui”, cotanquitsiquea teequea intsajigueji. ²³ Yovashiantaquero iroganejencare Irioshimajaca icocanica ichoocati, iriguenti ishineventajiaja irioshivijjiacaca intati ipeacaacaca iriatimpajia, iquejetacaavecari caquinte teeca inquishometojaneteji, iquejetacaavecari aisa quejecarica araguetatsica, canaaguetatsica, soancaguetatsica.

²⁴ Irootaquequea iticaarejantanacaca Aapani Irioshi impeacaaguishejiguemparota taaca inintaguishejiaqueca iriatimpajia, ariquea yaagavacaajianaca impashiventacaaquempameca. ²⁵ Teequea inquemisantajigueroji iroomajaca quenampojarica Irioshimajacaqui, manaquea ipiacaantajaro amataarontsi. Itsarovensijjivetariquea ipeacaajicaca, ishineventaguitarini, teequea intsaromentajiguempariji Peacaavecarica. Cotanquitsiquea iriatimpa ancoguitempani ashineventaguitemparini ancantajiaque-riquea: “Caaviji poganejencamajata.” Ari oncoquempa.

²⁶ Irootaquequea iticaarejantanacaca Aapani Irioshi impeacaaguishejiguemparota inintaguisheguetaqueca impashiventacaaquempameca. Oraquea manquigarentsijia teequea onintajiajeji irimanquigatajemparoji shirampari, manaquea onintaguishe-avaajianaca apimanquigarojiate. ²⁷ Ariquea iquempejiaca shiramparijia teequea irinintajiajeji irimanquigatajemparoji manquigarentsi, manaquea yaagavacaajianaca irapishiramparijiate opeacojianaqueriquea itiontare. Inchiquiojita iquempetacaantajiaqueca iriatimpajia yatsipetantajiacaca iroorijite ipeacaaguishejianacarero ovashiventajantague-tatsica.

²⁸ Teequea irinintajigueji inquenquejacojiajeriji Aapani Irioshi, irootaquequea iticaarejantanacaca inquenquejaguishejianaquero tiontarentsijencani ipeacaaguishejianacaroquea covaeguisherentsi. ²⁹ Iroguenti isavicaventajiaque cantashitatiaguishejencatatsica: ipeacaaguishejianacaroquea tiontarentsijencapae, inintsiguesqueriquea irashijiapae itsipapae, itsipatacaantavacaro covaeguisherentsi, icatsimatacotantaque, imetojantajiaque, icatsimatantajiaque, yamatavijantajigui, iquenashivaepojaca intati, aisa icantaguishe-tacojiaqueri igonorolja. ³⁰ Itsojeventajiacari itsipapae, isemajiacari Aapani Irioshi, caaviji ipigatsatanta, yamenajiaque caaviji yanaajencavaeque, yaventajiacaro maasanopae itsanire. Yaaguishe-tashiguetacaroquea impeacaaguishejiaquempaca. Teequea inquemisantajigueriji irijanintajiacarica. ³¹ Tee irinintajigueji intsajiaque, tee irinetsanajigueroji icanqueca, tee impintsatantajiguempaji, tee impeacotantempaji, tee impintsatacotantempaji. ³² Itsajiavecaroquea icanque Aapani Irioshi quericaca quempetanquitsineca imaica irimetojaquegueti iroanaque camorecariqui, cotanquitsiquea iriatimpajia teequea inquemajigueji, arimpaquea yogaajianaca ipeacaaguishejianacaroquea covaeguisherentsi, yogavitsitaroquea ishineventajiacari yamenajiaquerigueti itsipajia ipeacaaguishevaetacarogueti covaeguisherentsi.

2

Aapani Irioshi teequea incatsimatantashitempaji intati

¹ Piconoagarantajiaqueca aviatimpajia manaquea picantajiaque cameetsavaeque incatsimamajiaqueriquea quempejiaqueroca imaica. lintsijate pamenajigujate intati. Oraquea picantajiaquegueti imaica aviguentiquea quempetacaantajianquitsica, pipeacaaguishejiacarotari aviatimpajia aisa ipeacaaguishejiacaca iriatimpajia. ¿Arim-pate quero pincojiaquerini Aapani Irioshi aatonijite icatsimajiguimpitsi? ² Oraquea icanquegueti Aapani Irioshi incatsimajiaqueri quempeguequeroca imaica, itsamajia-quero manaquea ipeacaaguishejiacaroquea covaeguisherentsi, teetarite incatsimatan-tashitempaji Aapani Irioshi intati, iroomajaca maasano icanqueca. ³ Aviatimpajia pi-cantajiaveca incatsimajiaqueriquea quempeguequeroca imaica, cotanquitsiquea irooriji piquejejiavaca pipeacaaguishejianacaroquea quempeguetaroca ipeacaaguishejiacaca iriatimpajia, ¿arimpate quero pincojiaquempani aatonijite icatsimajiguimpitsi Aa-pani Irioshi? ⁴ Jmm aricajate pimanintavaquero igavintsajare icavintsajantan-tamajatiagueti, aisa yatsipetacojiaquempigueti, pamenajiaque tequerata incatsima-jiguempi. ¿Arim-pate teequea pintsajigueji manaquea icavintsajajiaquempi cameet-saniji povashiantajianajeroniji pipeacaaguishejiacaca pincantashitatijaijanajempaja?

⁵ Cotanquitsiquea piquishoshirentajiaque, aisa teequea pinintajiguenica povashiantajigueroji pipeacaaguishejiacaca cameetsaniji pincantashitatijaianajempaniji. Arimpaqueate picovaaguishejianaca, teequea pinquenquejajigueroji oncoramanitapojajegueti arejetapojaquemparogueti incatsimatantajiaquemparica Aapani Irioshi caquinteja, caaviji irogaamajajiaquempiquea incatsimajiaquempi, pinquejetacaantajiaquemp. Iriraquea Aapani Irioshi incantamajajiaqueri maasano querocaca icojiacani. ⁶ Iriatimpa itsamajatiroquea ipeacaaguishejiacaca maasano, aisa itsamajatiro cameetsaguetatsica ipeacaaguetacaca maasano, incantantaquemparica quero incojiquerini. ⁷ Iconoagarantajiaca caquinte icantacotacaaguitarini icomajamajaca, irooriji inintajiaque iroganejencatacaavajempari Aapani Irioshi, irishineventajiaavajempari inquitequi, incoguitempani iranijaguiteni. Maasano quempejiatsica imaica incantajiaqueri Aapani Irioshi incoquempani inchoocajiaque iriatimpaqui. ⁸ Cotanquitsiquea caaviji incatsimamajajiaqueriquea maasano iroguentigueti irisavicaventajigue taaca inintajiguica iriatimpajia, maasano teeca irinintajigueji inquemisantajigueroji iroomajatatsica, manaquea ipeacaaguishejiacaroquea covaeguisherentsi. ⁹ Irantsipejiaquempaquea incanquempa maasano caquinte peacagaroca covaeguisherentsi, irishimampojancajiaquempaqueate. Irantsipejiaquempaquea joriojia, iroompaquea inquejetsijianaquempaquea aisa teeca irijorijoigueji. ¹⁰ Cotanquitsiquea iriraquea comajamajajatsica iroganejencatacaajiaavajempari Aapani Irioshi, irishineventajiaavajempari inquitequi, inchoocamajapojaje cameetsa, aatoquea ochoocatimatajitsi asereajerineca. Ariqueate inquempeta-caajiaquempari maasano iriatimpajia, joriojia aisa teeca irijorijoigueji. ¹¹ Aapani Irioshi yamenajiaqueriquea caquinteguetatsica ijamirincaque, aato ichoocatitsi impeacoquem-paca.

¹² Maasano covaaguishejiatsica incatsimajiaqueri. Irirajia teeca intsajiavetemparoji igantacaantane Aapani Irioshi itioncacotanaqueca Moishishini incatsimatimentajiaqueriquea iriatimpa igovaeguishere aisa, cotanquitsiquea aatotarite icantajiguiritsi Aapani Irioshi: “¿Queroquea ocoani teequea pinetsanajigueroji nogantacaantane?” Iriraquea tsajiavecaroca cotanquitsiquea nintanatsi icovaaguishejiaca irioquea iriguenti incatsimamajajiaque Aapani Irioshi inquenquejacaajiaqueriquea, teetarite irinetsanajigueroji. ¹³ Teenica irioquea yamenajiaque Aapani Irioshi icomajashirentaca irirajia quemajiavetaroca intati igantacaantane, iriguentiquea incantacojiaque icomajashirentaca netsanamajatiroca. ¹⁴ Iriraquea teeca irijorijoigueji teequea intsajiavetemparoji igantacaantane itioncacotanaqueca Moishishini, cotanquitsiquea oconoacaqueate icomajamajaca iquempetacaajiacaroquea itioncacojiquerogueti, inchiqiojita itasatashijiacaroquea iriatimpajia. ¹⁵ Oraquea iquempejiacagueti imaica itsajiquero itsajiaqueroquea iriatimpajia querocaca incojiaquempani incomajamajajiaquempagueti, iriguentiquea tsatacaajiaqueriquea Aapani Irioshi quejetacaquea itioncajtiro iguenquejanequi, oconoacaquea iquenquejantajiacaca: “Nocovaeguishedaca”, oconoacaquea aisa iquenquejanaque: “Cameetsataque nantaqueca.” ¹⁶ Ariqueate onquempetanaquemp oncoramanitapojajegueti arejetapojajempagueti incantantaquemparica Aapani Irioshi Jesoquirishito incatsimajiaqueri maasano senacajiavecaroca ipeacaaguishejiacaca. Irootaque ocanque Quenquetsatsarentsimajaca Oganejencatatsica notsavetanqueca.

Joriojamajaca

¹⁷ Cotanquitsiquea piconoagarantaca picanque: “Naroguenti jorio, aatoquea icatsimatantatsi Aapani Irioshi, notsamajatirotarite itioncacotanaqueca Moishishini.” Manaqueate aisa pisemeti pijiqueji aviguenti ivintsaremajaca Aapani Irioshi. ¹⁸ Pijivecaji pitsaqueroji inintica Aapani Irioshi, aisa pitsatiroquea taaca opaji cameetsatatsica irooca aisa taaca opaji covaeguishedatsica. ¹⁹ Aisa pijivecaji caaviji panaaque pitsati, jero pinintantacaca pintsatacaqueriquea teeca intsateji, pijivecaji piquejetacari acatsavacotanaquerica shamponcajari, pijivecaji piquejetacari tsirencacotaquerica pitsecacotatsica. ²⁰ Inchiqiojita pipeaca tsatacaantantatsica pamenaque ariqueate pagavejaque pintsatacaajiaqueriquea teeca intsateji aisa iriaqueraca tsajiananquitsica taaca opajita cameetsaguetatsica aisa taaca opajita covaeguishedguetatsica, pamenaquetarite

pitsamajaqueroquea itioncacotanaqueca Moishishini, aisa pamañaque irooqueuea tsatacaaquempironeca pintsamajaqueroniji maasanopae taaca opajitapae itsavaejitica irooca aisa maasanopae iroomajaca. ²¹ Iriguentiquea pitsatacaajianaquequea itsipapae, ¿ari pitsatacaacampa aviatimpa? Ariqueuea oquempetaca picanque: “Teequeuea oncameetsateji paitsitanteguetei”, ¿arite paitsitantimpa aviatimpa? ²² Irootaquequea picanti aisa: “Teequeuea oncameetsateji poashitirotsi manquigarentsi”, ¿arite poashitantimpa aviatimpa? Ariqueuea iquempetaca ipeajitica irioshivijijitacaca intati, irootaquequea pamañaquequeate covaeguishevaeca, ¿arite paitsitirimpa yashintacajaiguetaacarica choocagueta-sica itemporotequi? ²³ Pisemetacocaró pitsavetarogueti igantacaantane Aapani Irioshi itioncacotanaqueca Moishishini, cotanquitsiquea aatoguetei pinetsanatiro ocanqueca manaqueuea oquejevetaca picantaguisshetacotaqueri Aapani Irioshi. ²⁴ Ariqueuea otionca-queuea ocanque: “Irirajia teeca irijorijoigueti icantaguisshetacotaqueri Aapani Irioshi, aviguentijiaqueate quempetacaantajiaqueri.”

²⁵ Aviatimpajia napijoriojateni pamañajiaque totsaiquijiaquempi pichonquimashi pijijiaqueji ariqueuea irishineventajiaquempiquea Aapani Irioshi, cotanquitsiquea naatimpa noncantajiaquempiquea pinetsanamajajiaqueroja maasanopae itioncacotanaqueca Moishishini, ariqueuea iroguenti irishineventajiaquempinijite pitotsaiquijiacaguetei. Oraqueate aatoguetei pinetsanajiguirotsi maasano igantacaantane, quejetaca teeca intotsaiquijiteroji pichonquimashi. ²⁶ Irirajiaquea teeca irijorijoigueti teequeuea intotsaiquijivetempariji, cotanquitsiquea intampaticaterogueti inintaguetica Aapani Irioshi, iriatimpa iramenajiaqueri quempeca totsaiquijia. ²⁷ Iramenajiqueriguetei teeca intotsaiquijivetempariji cotanquitsi inetsanataquero inintaguetica Aapani Irioshi, ariqueuea onconijavaequequea manaqueuea piquempetacaantajia aviatimpajia totsaiquijiavetanquitsica tsajivecaroca itioncacotanaqueca Moishishini, cotanquitsiquea teequeuea pinetsanamajajigueroji. ²⁸ Iriraqueuea managuetei itotsaiquijiqueriquea imeshinaqui teequeuea irio joriomajaca yashintamajatacaca Aapani Irioshi, aisa teequeuea irishineventempariji Aapani Irioshi iramenaqueriguetei mana itotsaiquijiqueru itsinoqui. ²⁹ Iriraqueuea tsaróventamajatarica Aapani Irioshi, aisa inetsanamajaquero icantica, irioqueuea iriguenti joriomajaca yashintamajatacaca Aapani Irioshi, icantashitiamajatanajataru ishirequi, teequeuea irooqueuea iraventempaji itotsaiquijiqueriguetei. Teetari irooqueuea cantashitiatiaajempariji inetsanatiroguetei itioncacotanaqueca Moishishini, iriguenti cantashitiatiaajari Ishire Aapani Irioshi. Iriraqueuea quempetiroca imaica ishineventajicari, cotanquitsiquea teequeuea irioqueuea shineventajajemparine caquinteja, iriguentiquea shineventajari Aapani Irioshi.

3

¹ Iroosacanica ¿taa opajita ocameetsatantacaca irijorijoiteguetei? ¿Taaqueuea opajita ocameetsatantacaca intotsaiquijiteriguetei? ² Oshequiqueate ocameetsavaetantacaca. Aatimpajiatari joriojia icavintsajamajajiaqueca Aapani Irioshi. Jeroqueuea anaavaeque-roca maasanopae: yojocacotacaantajiacajiro Iguenquetsatsare cameetsaniji anquem-poguijajiaquero agaajiaqueneru itsipajia. ³ Oraqueate choocaguetei teeca irinetsanateroji inintacaaquerica, ¿arimpate iquejeta Aapani Irioshi aato inetsanatiro icanqueca? ⁴ ¡Aatoshine! Intsojeajivetaquempaqueate maasano caquinteja, cotanquitsiquea Aapani Irioshi aatoqueuea itsojegatsi, irinetsanamajaqueroqueuea icanqueca. Ariqueuea itionca-cojiritiriquea cantatsica:*

“Iramenajiquempiquea picoguitani pitampaticamajatiro, teequeuea pintsojeguempaji. Incantacojivequempiguetei chooca pipeacaaguishetacaca, panaantequeuea iramenajique picomajamajata.”

⁵ Oraqueuea apeacaaguishetaguetei covaeguissherentsi onigaantavecaroqueuea icomajamajata Aapani Irioshi, Iriomajaca. Iroosacanica, ¿querocaca ancantajigueni imaica? Aricaja ancante: “Irooqueuea nogovaeguisshere nigaantaqueroica icomajamajata Aapani

* 3:4 Sar. 51.4. Iriraqueuea Taavini itioncacotanaqueru Aapani Irioshi.

Irioshi, ¿querocaquea ocotacani icatsimatimentantaquenaroca nigaantaqueroca icomajamajata iriatimpa? Teecajate intampaticateroji.” (Irootarite icantica caquinte.)⁶ ¡Aatoshinete acantirotsi! Aatomegueti itampaticamajatirome Aapani Irioshi, ¿querocampate incoquempani intsatantajiaquemparica quepatsiquitica incatsimatimentajigueri igovaeguisherere? ⁷ Aricajate incante nintavetanquitsineca irompetacotanajempa: “Notsojeagueti irooquea yamentantajitarica Aapani Irioshi iriguenti tampaticamajatiroma, onquenantanaquempaca intsarotentantajitaquemparica. ¿Quero ocotacani incatsimatimentantaquenaroca Aapani Irioshi notsojeagueti incanque: ‘Iriosacanica covaeguishereri?’” ⁸ Arimequeate onquempetaquempamequeate, ¿quero ococani teequea ancantajigueti: “Jaame ampeacaaguishejiguetempajate covaeguisherentsi cameetsaniji anigaantajiaqueriniji Aapani Irioshi teequea incovaequishetimatempaji?” Ariqueate chooca cantashijavetatsica: “Ari incanque Paavoro, irooquea itsatacaantaque”, manaquea itsojeaca intati. Cameetsataquequea incatsimatimentajiaqueri Aapani Irioshi, iriotari quempetacaantajanquitsi.

Maasano aatimpajia agavejajiacaji covaequisherentsi

⁹ Iroosacanica imaica ¿querocaca ancantajigueti? ¿Arica ancantajigueti aatimpajia joriojia caaviji anaavaequeriquea teeca irijorijoigueti? ¡Aatoshine acantajiguetsi! Aritaque nocantaque incajaranqui, maasanoquea aatimpajia agavejajiacaji covaequisherentsi, iquempejiaca joriojia aisa teeca irijorijoigueti icovaequisherijaca. ¹⁰ Ariquea itioncacojitiroquea, ocanti:

“Teequea inchoocatiemeji caquinte comajarimajaca teeca incovaequishetimatempaji, tee inchoocateji aparo.

¹¹ Teequea quericaca tsamajatatsineca, teequea queri nintamajatatsineca intsaqueri Aapani Irioshi.

¹² Maasano itomicapitsajiaqueri, maasanoquea ipomatsajiacaji.

Tee inchoocatiemeji comajamajatanquitsica, tee inchoocateji aparo.”☆

¹³ “Iquenquetsaguishemajaqueroquea chomisaaromajaca, quejetaca itsano iroome omoro yojoquijitantajitarica metojari. Yamatavijanenetantapinitacaro inene.”☆

“Iquepigavagantevaetaque iquejetacari camaarini irooriji icantaguishetacoqueri igonorojia.”☆

¹⁴ “Icantacoguitaniquea icatsimatsajencaguitirini igonorojia, manaquea osotoajencatanaque igatsimajencare.”☆

¹⁵ “Yamejiacarero iguiti yanijitantacarero ishintsitashitanaquero irimetojantajigueti oshivaririncajatanaque iriraja.

¹⁶ Querocagueti iquenajiaqueni yatsipetacaajiacariquea itsipapae, ishimampojancaaguitarini.

¹⁷ Teequea intsajiajaji iraavacaajiajempaji inchoocajiajaji cameetsa.”☆

¹⁸ “Teequeate intsarocaaajiguempariji Aapani Irioshi.”☆

¹⁹ Imaicaquea atsajiaque oraquea maasanopae Itioncacaantaqueca Aapani Irioshi, itioncaciaqueneriquea irirajia inintacajiaqueca irinetsanajiguero. Itioncacaanqueroquea cameetsaniji irimajeretacaajiaqueriniji maasanojia, iramenajiqueriquea maasano caquinteja teequea irinetsanajiguero, ariquea incanque Aapani Irioshi quero incojitaquerini maasano. ²⁰ Teequea inchoocateji agavejatsica irinetsanamajatero maasano Itioncacaantaqueca Aapani Irioshi iroome incantantaquempameca Aapani Irioshi: “Iriguenti comajarimajaca, tee incovaequishetimatempaji.” Oraquea itioncacaanqueca manaquea otsatacaajiacaji arosacanica covaequisherijia.

Incomajatacajiaqueri Aapani Irioshi maasano aventajiaquemparineca Jesoquirishito

☆ 3:12 Sar. 14.1-3; 53.1-3; Eeq. 7.20. ☆ 3:13 Sar. 5.9. ☆ 3:13 Sar. 140.3. ☆ 3:14 Sar. 10.7. ☆ 3:17 Is. 59.7-8. ☆ 3:18 Sar. 36.1.

²¹ Cotanquitsiquea imaica yonigaacajiro Aapani Irioshi quero icotani icomajatacaantagueti. Teequea onquejetemparoji ipanquenajivetarogueti igantacaantane. Yonigaacajica imaica irootaquequea itioncacojiaqueca coramani Moishishini aisa itsipajia tsavetantajiatsica. ²² Incomajatacajiaqueri Aapani Irioshi maasano aventajiaquemparineca Jesoquirishito, irioca joriojia, irioca teeca irijorijoigueji, iconoacaantajiacari, ²³ aritarite icovaeguishejiaca maasano, tee inchoocateji moncarateroneca iroganejencare Aapani Irioshi. ²⁴ Cotanquitsiquea iriatimpa icavintsajacojiaqueri itigarancaqueri Quirishito Jesoshi imetojaventajiacaji ariqueate imeshiajiaqueriquea maasano aventajiacarica. Aatimpajia teequea taaca opaji ampeacaajiaquempaca cameetsaniji irimeshiajiajiniji, inchiqiojita ininque iriatimpa irimeshiajiajicaji. ²⁵ Paesatoniqui tequeratagueti incoraqueateji Jesoquirishito yamenajavecaro Aapani Irioshi coramanipaequitica covaeguishe-majataca, cotanquitsiquea yatsipetacojiajicari itsaquequea irimetojaventajiaqueri oncoramanitapojajegueti Jesoquirishito. Ocoramanipojajuegueti inchiqiojita itigarancaqueri irantsipeventajiacaji irimetojaventajiacaji maasano covaeguishejiatsica, ipi-apojajaji. Oraquea yompajacojiquerigueti ochovivincajatanaquequea iriraja aatonijite icatsimajiguiritsi Aapani Irioshi aventajiaquemparineca Jesoquirishito incantajiaquegueti: "Arimajasacanica imetojaventajiaquena." Ininquequea Aapani Irioshi intsajiaque maasano teequea quericaca irishetacotantashiquempaqueate intati, aisa teequea quericaca incatsimatantashitaquempaquea intati. ²⁶ Ariquea oquempetaca imaica cameetsaniji antsajiaqueriniji aatimpajia iriraquea Aapani Irioshi icocani tampatica iroaquero. Oraquea ishetacojiaquerigueti aventajiacarica Jesoshi, teequea irimeshiantashitempaji intati, manaquea yamenajiaqueriquea yaventajiapojari, itsajiaquequea imetojaventajiaqueri.

Taaqueate asemejiaquempacate

²⁷ Iroosacanicate ¿taaqueueate opaji asemetantajiaquempacate aatimpajia? ¡Taampate! ¿Arimpate quero ococani? Teequea irooquea irishetacotantajiaji Aapani Irioshi iramenajiacajigueti anetsanamajajiaquero maasanopae igantacaantane, manaquea icavintsajamajajiacaji yamenajiacaji aventaventashirentajianajari Jesoquirishito. ²⁸ Irootaquequea noncantantajiaquempica irishetacojiaqueriquea Aapani Irioshi maasano aventajiaquemparineca Jesoquirishito, teequea incantacojitajeroji imaica: "Intsishiatsi pinetsanatajeroshiatsi itioncacotanaqueca Moishishini irishetacotimentajitaquempinijite." ²⁹ Iriraquea Irioshimajaca ¿arimpate apaniro irioshicari joriojia? ¿Arimpate teequea irioshitempariji caquinteguetatsica? Jeejeguitatsi, irioshitacari aisa caquinteguetatsica. ³⁰ Tee inchoocateji itsipa Irioshimajaca, apaniromajaca icocani iriatimpa yamenajiaqueri maasano aventajiacarica Jesoquirishito quempejiaca teeca incovaeguisheetimatempaji, irioca totsaiquimashitacaantatsica, irioca teeca intotsaiquimashitacaantempaji. ³¹ Iroosacanicate aquempejiaquerogueti imaica aventajiacarigueti Jesoquirishito ¿arimpate ovashiantajianaqueroqueate itioncacotanaqueca Moishishini? ¡Teequeueate! Arimpaquea anquempejianaquero imaica iroaqueraqueti, anetsanamajajiaqueroquea.

4

Quero icocani Averaameni

¹ Imaica iroguenti noninque nonquenquejacaajiguempirijate Averaameni choviquimajajiaquenaca naatimpajia joriojia, ¿quero icocani iriatimpa? ² Iroomequea irishinevenquemparimequeate Aapani Irioshi Averaameni taaca opajitapae ipeacaaguetacaca, iragavejaqueme irisemetacovaequemparomequeate, cotanquitsiquea yamenaqueriquea Aapani Irioshi tee onchoocateji taaquea irisemetacotempaca. ³ ¿Quero ocanque Tioncarentsimajaca? Ariquea ocanque: "Iriraquea Averaameni yaventanacariquea Aapani Irioshi,* jeroqueate yamenantacarica quejevaecaquea tee

* 4:3 Ocanquegueti Iriraquea Averaameni yaventanacariquea Aapani Irioshi manaquea ocanque itsamajaquero iriatimpa irinetsanaquero Aapani Irioshi maasano icanquerica, yaventanacarica. (Abraham creyó a Dios.)

incovaeguishedimatempaji.”[✠] 4 Iroguenti oquempetacaroquea ocatica, quericaca shiacotatsica, iroompaquea irivegarajitavajeri teequea incantajiteriji: “Manaquea nojocashiquempiri intati, nocavintsajashiquempiquea”, manaquea ivegaratsijitaroqueea ishiacoquegueti irooriji yaacotantaque. 5 Cotanquitsiquea inchoocategueti itsipa aatoquea taaca opajita ipeacagatsi cameetsaniji irishetacojiquerinijite manaquea iraventapojempari Aapani Irioshi, inquenquejanaquequea incanque: “Notsamajaque iriraquea Aapani Irioshi ishetacotiri covaequishejiatsica”, ariqueea iroguenti irishetacotaqueriqueate yamenaqueritari yaventapojajari. 6 Ariqueea iquempetaca Taavini coramani incanque irishinevaequempa quericaca iramenaqueca Aapani Irioshi quempeca teeca incovaeguishedimatempaji, manaquea inchiqiojita icavintsajashivaecari intati, teenicate onchoocatenica cameetsatatsica impeacaguempaca caquinte incavintsajacotantaquemparica Aapani Irioshi. 7 Ariqueea incanque:

“¡Ishinevaetanaja maasano ipeacotsitajaca Aapani Irioshi ipeacaaguishecaca, irirajia imaperincacotsitaqueca igovaeguisherejia!

8 ¡Ishinevaetanaja irirajia teeca inquenquejacagueriji Amajirote igovaeguisherejia!”[✠]

9 ¿Arimpa apaniro irio shinejianquitsine irirajia icantajitica “totsaiquimashitacaantatsica”? ¿Aatempa irio shinejianquitsine teeca intotsaiquimashitacaantempa? Iintsi-jate pinquenquejajiguerijate Averaameni. Iriatimpa iquemisanqueri Aapani Irioshi inquenquejanaque: “Arimaja Aapani Irioshi irinetsanaquero incanqueca”, irootaquequea yamentacarica quempeca teeca incovaeguishedimatempaji. 10 Cotanquitsiquea ¿querote yamentacarica Aapani Irioshi quempeca teeca incovaeguishedimatempaji? ¿Ari yamenaqueri itotsaiquijiquerogueti ichonquimashi, irooca tequeratagueti intotsaiquijiteriji? Teequeate ariqueea irameneriji itotsaiquijiquerigueti, manaquea yamenaqueri tequeratagueti intotsaiquijiteriji. 11 Iriraquea Averaameni iroquetitaquea iquemisanqueri Aapani Irioshi incanquerigueti incavintsajamajaqueri, ocoramanitacovaetanaquequea itotsaiquijiqueriquea intsatantajiquemparoca jac yamenaqueriquea Aapani Irioshi quempeca teeca incovaeguishedimatempaji irooriji yaventanacari. Quempetacaquea ipeantajaca choviquishirentajianaquerineca maasano aventaventaipojajemparineca Aapani Irioshi, totsaiquivetatsica aisa teeca intotsaiquijivetempariji. Ariqueate iquempetsijigari Aapani Irioshi iriatimpajia aisa, yamenajiaqueriquea quempeca teeca incovaeguishedimatempaji. 12 Arimajaguitatsi Averaameni iriguenti choviquijianaquerica irirajia itotsaiquijiqueca, cotanquitsiquea teequea noncantacoteriji itotsaiquitamampeashijitacaca intati, iriguentiquea ichoviquimajianaqueca irirajia quempeamajatarica iriatimpa Averaameni itsaraventacagueti, itsaque irinetsanamajaqueroquea Aapani Irioshi incanquerica. Ariqueate iquempetaca imaica tequeratagueti intotsaiquijiteriji.

Aapani Irioshi inetsanamajaqueroquea incanquerica Averaameni

13 Iriraquea Aapani Irioshi incanqueri Averaameni oncoramanitacovaetanaquegueti irojocaqueneri maasanopae quepatsi, irashinquemparoquea iriatimpa aisa inchoviquijiaqueca, cotanquitsiquea teequea ariqueea incanteriji imaica yamenaquerigueti inetsanataqueroquea itioncacotanaqueca Moishishini, tequeratanica onchoocatenica. Manaquea incanqueri inejaquerigueti iquemisanqueriquea incanquerigueti incavintsajamajaqueriquea incaramirincajianaquequea inchoviquijianaqueca. 14 Oraqueea iriomegueti ashintajiaquemparomequea maasanopae quepatsi irirajia netsanamajiaquerooca itioncacotanaqueca Moishishini, aatomequea amitacotajime aventaventaivequemparigueti Aapani Irioshi, aatomequea ashintajigarotsi icantacaquerica Aapani Irioshi Averaameni yamenaquerigueti itsarovencari. 15 Iriraquea tsajivecaroca icantaguetica Aapani Irioshi irinetsanamajajiqueca cotanquitsiquea teequea irinetsanamajateroji, incatsimatinenqueriquea. Oraqueea aatomegueti itsajitiromequea querocampate incojiqueroni irinetsanajiquero, teetarite intsajiteroji, aatomequeate querica quempetacaantatsineca.

[✠] 4:3 Jen. 15.6; Ga. 3.6. [✠] 4:8 Sar. 32.1-2.

¹⁶ Iroosacanica imaica, inchiqiojita ininque Aapani Irioshi incavintsajacoqueriquea Averaameni aisa inchoviquijianaqueca, icanqueri ariquea inquempetaqueroquea imaica. Cotanquitsiquea oraquea icanquerigueti incavintsajacomajaqueriquea inchoviquijianaqueca, teequea apatiroti iriguentijia inquenquetsatacojigueti inchoviquijianaqueca netsanajiaqueroneca itioncacotanaqueca Moishishini. Iriguentiquea aisa icantacojiaque maasano aventajianajemparineca Aapani Irioshi quempemajajiaquemparineca Averaameni yaventsitarigueti. Irootaquequea icantantajicarica Averaameni iriguenti choviquijianacajica maasano aatimpajia aventajiacarica Aapani Irioshi. ¹⁷ Ariqueate ocanque Tioncarentsimaajaca: “Nopeacaaquempi choviquijianaquerineca oshequini caquinteguetananquitsineca.”[✠] Iriguentiquea cantanquitsi Aapani Irioshi yamenaquerigueti Averaameni yaventanacari. Iriatimpa iriguenti tancoretancorejajajerineca metojaguevetatsica, aisa iquenquetsatacotsitacaro tequerataca onchoocateji quejetaca chooca.

¹⁸ Oraquea icanquerigueti Aapani Irioshi Averaameni ipeacaacariquea choviquijianaquerineca oshequini caquinteguetananquitsineca, jac icantapaeni quenquevarivaetanaji, tequerataquea irijanintempaji. Querocampate incaramir-incatantajianaquempaca inchoviquijianaquempaca. Cotanquitsiquea iriatimpa yaventanaguitarini Aapani Irioshi yoguijaguitiniquea irinetsanatavaquerotajate icanquerica, icanqueriqueate: “Ariqueate inquejejaquempaquea pinchoviquijianaqueca iroshequiavaetanaquequea.”[✠] ¹⁹ Iriraquea Averaameni irooshipoji irajagantsitacotanaque 100, yamenaca iriatimpa jac quenquevarivaetanaji icanca irooshipoji irimetoje, querocampate incoquempani iroacaantaquegueti. Ariqueate oquempetaca Sara imanquigare, pirijavaetaque oamento, cotanquitsiquea irira Averaameni teequea irimagoshirentanaqueji arimpaqueate yaventanamajatanacari Aapani Irioshi. ²⁰ Teequea incanteji: “Aricajate irinetsanataqueroquea Aapani Irioshi icanquenaca.” Manaquea arimpaquea yaventanamajatanacari, aisa arimpaquea ishineventamajatanacari icanque: “Caaviji yagavejamajati Aapani Irioshi.” ²¹ Itsamajaquequea teequea omanapitsatempariji irinetsanaqueroqueate icanquerica, yagavejamajatariti. ²² Irootaquequea yamentacarica Aapani Irioshi Averaameni quempeca teeca incovaeguishetimatempaji. ²³ Cotanquitsiquea otioncacagueti “yamentacarica quempeca teeca incovaeguishetimatempaji”, teequea apaniro intioncacotimentajiteriji Averaameni. ²⁴ Itioncacotsijitacajiquea aatimpajia aisa, yamenajiacajiqueate quempeca teeca ancovaeguishetimatempaji aventajianajaritari iriatimpa, iriotaquequea vochatajiri Amajirote Jesoshi imetojavecagueti. ²⁵ Iriraquea Amajirote iriotaquequea itigarancaqueca Aapani Irioshi irimetojavejajiacajiquea aatoniji icatsimatimentajajirotsi agovaeguisherejia. Ariquea imetojaguegueti ivochatajiri cameetsaniji iramenimentajajinjite quempeca teeca ancovaeguishetimatempaji.

5

Aapani Irioshi yamenajiacaji quempeca teeca ancovaeguishetimatempaji

¹ Imaicaquea imaica jac yamenajiacaji Aapani Irioshi quempeca teeca ancovaeguishetimatempaji, yamenajiacajitarite aquemisanqueroquea icanquegueti irisheta-cojiaqueriquea iguempevaere maasano aventajiaquemparineca Jesoquirishito. Jero imaica teequea antsaroacaajajempari incatsimajiacaji manaquea ashinejiaca, iriotaquequea quempetaqueroquea imaica Amajirote Jesoquirishito. ² Iriotaquequea metojavejajiacaji, jero icocani icavintsajamajacaji Aapani Irioshi yamenajiacajitarite aventajiacari. Ashinejiaca acanca aguijacojiacagueti oncoramanitapojajegueti amenajiapojero iroganejencare Aapani Irioshi. ³ Cotanquitsiquea teequea aparó onchoocateji ocatica. Aisa ashinevaetaquea atsipevaecagueti, atsamajajiaquetari antsipevaetaquempagueti

✠ 4:17 Jen. 17.5. ✠ 4:18 Jen. 15.5.

irootaquequea antsatantajianaquempaquea cameetsaniji agavejajiaqueniji antampishitashijiaqueroniji covaeguishedantatsica arimpaquea antsaromentamajatanauempari.⁴ Oraquea antampishitashijiaquerogueta antsipevaequempagueta intsajiaqueroquea arimajaca otampaticataque atsaromentamajacari, iroompaquea aguijacojianaca anquempejianaquempariquea iriatimpa oncoramanitapojajegueta.⁵ Oraquea aguijacotavajerogueta onetsanatantaquempaca icanqueca Aapani Irioshi aatoquea ovashiventajaji. Choocatarite ichoocashirentajiacaji Ishire Aapani Irioshi yojocajiacajica, iriotaquequea tsatacaajiacaji ipintsamajajiacaji Aapani Irioshi.

⁶ Coramani aatimpajia teequea antsajigueji querocampate ancojiaquempani asheta-cotacaantajiaquempagueta, cotanquitsiquea ocoramanitapojaquegueta arejevaepojaca savincaguiteri inintantacaroca Aapani Irioshi, ariquea imetojaventajiacaji Quirishito maasano aatimpajia covaeguishejiatsica.⁷ ¿Arimpate quericampate nintanquitsineca irimetojavenqueri irapicaquintejiate comajamajatatsica? Iroompaquea inchoocategueta cavintsajantamajatanatsica, iriotaquequea arica iragavejajite irimetojaventajiqueri.⁸ Cotanquitsiquea jeroquea yonigaantantacajiroca Aapani Irioshi arimaja ipintsamajajiacaji: Quirishito imetojaventajiacaji aatimpajia maasano covaeguishejiatsica tequeratirajagueta ancantashitajiguempaji.

⁹ Ochovivincajaventanacaji iriraja, irootaquequea yamenantajiacajica Aapani Irioshi quempejiacaji teeca ancovaeguishedimatempaji. Jero atsamajatanacaca arimajacatari yaajjavajitari Quirishito aatonijite icatsimatimentajajirotsi Aapani Irioshi agovaequishere oncoramanitapojajegueta.¹⁰ Coramani teequea ashineventajiavetempariji Aapani Irioshi. Ariquea iquempetaca iriatimpa teequea irishineventajiavetajaji aatimpajia, cotanquitsiquea ocoramanitapojaquegueta itigarancaqueri Irijanite imetojaventajiacaji cameetsaniji ashineventavacaajiaquempaniji. Quempeca imaica ashineventavacaajiacagueta, iroompaqueate caaviji irajjavajaji aatoniji apegacamorecariqui, pochatanajitarite ariquea icocani ichoocati.¹¹ Teequea aparo ocatoca, yoguishinejajiacaji Aapani Irioshi aisa, iriotaquequea quempetaqueroquea imaica Amajirote Jesoquirishito metojaventajiacajica cameetsaniji irishineventajajiniji Aapani Irioshi.

Araini aisa Quirishito

¹² Paesatoniqui apatsinoro caquinte covaeguishedantatsica, ariquea icanqueri Aapani Irioshi irimetojanetanaje. Irootaquequea imetojantajajaca caquinteguetatsica iroguentiquea quejetacaajajaquea igovaeguisherjia, maasanotari icovaeguishejiaca.¹³ Coramani tequeratagueta intioncacoteroji Moishishini maasanopae icanquerica Aapani Irioshi, jac covaeguishejiaca maasano caquinteguetatsica, cotanquitsiquea teequea incanteji Aapani Irioshi: “Teequea irinetsanajigueroji nogantacaantane, nonquenquejacaajiaqueriquea oncoramanitapojajegueta.” Tequerataqueate intioncacaanteroji.¹⁴ Irirajaquea caquinteguetatsica ichoviquijianaqueca Araini maasano icovaeguishejiaca, cotanquitsiquea teequea inquempemajatajempariji Araini peacaaguishecaroca icantimenquerica Aapani Irioshi. Icojiacaniquea iquempejiaca imaica arejevaecaroquea itioncacotantanacaroca Moishishini icanquerica Aapani Irioshi. Oraquea icovaeguishecagueta Araini irooquea oshimerancantapojaca yamenantajajiaroca maasano imetojane, cotanquitsiquea iriraquea coraquetaquitatsica ocoramanitapojaquegueta manaquea imetojaventsijigari maasano cameetsaniji irimeshijiaquerinijite.¹⁵ Apatsinoroquea covaeguishevetatsica Araini ariquea yamenajiaqueroquea imetojane maasano caquinteguetatsica, cotanquitsiquea Aapani Irioshi caaviji icavintsajamajajiacaji niganquiquea anaavaetanaqueroquea icovaeguishecagueta Araini metojacaajiavecajica. Itigarancantacarica apatsinoro Jesoquirishito irimetojaventajiacaji. Ocoramanitapojaquegueta icoraquetaque iriatimpa ariquea iquempetaqueroquea imaica ipintsamajajiacaji imetojaventajiacaji irimeshijiaqueriquea incaramirincanjiaque caquinteguetatsica.¹⁶ Oraquea icavintsajacajigueta Aapani Irioshi, tee onquempetemparoji icovaeguishecagueta Araini. Iroaqueragueta apatsinoroquea Araini icovaeguishecagueta ariquea ishimerancacajiro yamenantajiacajica Aapani Irioshi maasano

acovaeguishejiaca, cotanquitsiquea caaviji ipintsamajajiacaji aatimpajia caramirincat-acaacaroca covaequisherentsi, ivetsinantacotajaji yamentantajajajica quempeca teeca ancovaeguishtematempaji. ¹⁷ Iroaqueraguetei icovaeguishecaguetei apatsinoro ari aapojacajaji metojagantsi, imaicampani icavintsajacopojajajiguetei apatsinoro Amajirote Jesoquirishito yanijacaashirentapojajaji imajirontacaashirentapojajaji maasano aatimpajia ishetacojiaqueca apeantanajaca comajari.

¹⁸ Icovaequishecatarite apatsinoroveca Araini icantomajacotantajitacarica maasano caquintejiá imetojanetantanacaca. Ariquea iquempetaca coramani apatsinoroquea Jesoquirishito imetojaventajiaqueri maasano cameetsaniji iramenajiaqueriniji Aapani Irioshi quempeca teeca incovaeguishtematempaji iroompaquea incoquempani inchoocajiaje. ¹⁹ Apatsinoroquea icocani Araini teequea inquemisanteriji Aapani Irioshi, ariquea icovaeguishtantajianacaca maasano caquinteguetatsica. Ariquea oquempetaca aisa apatsinoroquea icocani Jesoquirishito iquemisantamajaqueri Aapani Irioshi, yamentantajicarica caramirincajianquitsica quempeca teeca incovaeguishtematempaji.

²⁰ Coramani Aapani Irioshi icanqueri Moishishini intioncaqueroquea maasanopae icantaguetica cameetsaniji intsajiaqueniji ishiraerijia manaquea icovaeguishejiaca, teequea irantajigueroji inintaguetica iriatimpa, cotanquitsiquea arimpaquea itiroroncamajatanacaro. Cotanquitsiquea icaramirincatacaajivecaroguetei covaequisherentsi, arimpaquea icavintsajamajajiaqueriquea Aapani Irioshi anaavaetanaqueroquea jmm.

²¹ Coramani mana oquejevetaca omajironca covaequisherentsi imetojanetantanacaca caquintejiá. Cotanquitsiquea imaica iroguenti majirontamajapojajatsi igavintsajacotantare Aapani Irioshi ancomajatimenquempaniji anijaguiteniji. Iriotari quejequero Amajirote Jesoquirishito.

6

Ametojapitsajiaqueroquea covaequisherentsi

¹ Iroosacanica ¿querocaca ancantajiguenei imaica? ¿Arimpa jatanatsi ancovaeguishejiguempani cameetsaniji incavintsajamajajiacajinijite Aapani Irioshi? ² ¡Aatoshinete! Pamenerijate metojari imetojimaque teequea jatanatsi incovaeguishtajatempaquee, jac metojaque. Ariquea aquempejiaca aatimpajia aisa atsaromentimajiacari Quirishito quempetaca ametojapitsajiaqueroquea covaequisherentsi, ¿ariquea quero ancojiaquempani jatanatsi ancovaeguishtajatempataja? ³ ¿Arimpa tee pintsajigueji, maasanoquea aviñacajatimentajiacariguetei Quirishito Jesoshi, oquempetaca atsipajiacari imetojaqueguetei? ⁴ Oraquea imetojaqueguetei Quirishito yoguijaajivequitari omoroqui. Ariquea oquempetaca aviñacajiacaguetei aatimpajia iroguenti ocantacoque yoguijaajivetaquitariguetei coramani, quempetaca aricaca aconoitajari yoguijaajiqueriguetei, cotanquitsi ipochatanaji. Iroguentiquea vochatajiri iroganejencare Aapani Irioshi. Ariquea oquempetaca aisa asotoajajianajiguetei ojaaqui quempeca aricaca aconoitajari ipochatanajiguetei cameetsaniji ancantashitatijaijanajempanijite aatoniji aquempejiatatsi tequerataguetei antsaromentempariji.

⁵ Jac aconoajiacari Quirishito imetojaqueguetei quejetaca ametojajiaque aatimpa, ariquea anquejejiacquempa anconoajiaquempani aisa ipochatanajiguetei. ⁶ Imaica atsamajajiaque oraquea yompajacojiqueriguetei Quirishito quempetaca aricaca itsipatacantajiacajiri ampajacojia aatimpajia ametojapitsajiaqueroquea covaequisherentsi aatonijite omperaperaatajaji. ⁷ Iriratari metojari tee inquemajeroji covaequisherentsi omperaperaavecarica. ⁸ Imaica jac atsipajajari Quirishito ametojajiaque, atsajiaquequea anijajianaje anconoapojajempani. ⁹ Atsamajajiaquequea ipochatimatanaji Quirishito imetojavetacaguetei aatoquea imetojimatajitsi aisa, yagavejamajaqueroquea metojagantsi, aato agavejajiri. ¹⁰ Oraquea imetojantacaca iroguenti imetojimenta que agovaeguishejia, aparo imetojaquiti iteroncaquitiro. Cotanquitsiquea yanijanajiguetei iriguentiquea yanijimentanaji Aapani Irioshi. ¹¹ Imaica ariquea pinquempejiacquempa aviatimpajia, pamenempajate quempani pimetojapitsaquero covaequisherentsi, iriguentiquea panijimentanaji Aapani Irioshi, itsipatanajimpitari Quirishito Jesoshi. ¹² Shoshoh

pimajirontacajaarotsi covaequisherentsi pitsinometojanequi, piquemisantajirotsi pinintaguishevecaca. ¹³ Oraquea pacopae, piguitipae, pinene, poquija, maasanopae, aatoja pipeacaaguishetantajarotsi taaca opajitapae covaequisherentsi, iriguentiquea ashintajemparone Aapani Irioshi. Pincantsitempariquea irashintamajatempi iroorijite yanijacaajimpi pimetojashirentavecagueti. Manaquea irashintatsinotajempi maasano pimpeacaantanajemparoca cameetsaripae. ¹⁴ Aatotarite omperaperaatajimpitsijate covaequisherentsi, teetarite onquejetajemparoji ipanquenapanquenajiveguitaroni itioncacotanaqueca Moishishini, manaquea icavintsajacojiaquempi Aapani Irioshi yagavejacaajiaquempi.

Quero icotani savicaventiroca covaequisherentsi aisa savicaventiroca inintaguetica Aapani Irioshi

¹⁵ Iroosacanica ¿querocaca ancantajigue imaica? Amenajiaqueriquea icavintsajamajajiacaji Aapani Irioshi, teequea incantajiajaji anetsanajiajeroji maasanopae icantaguetica coramani irinetsanajitaje, ¿arimpate nintanatsi ancovaequishejiguempanijate? ¡Aatojate aquempejiguirotsijate imaica! ¹⁶ Aviatimpajia pitsajiguitarite inchoocategueti aparo caquinte inchiquiojita impimantaquempa irashintajiquempari, inquemisantamajaqueriquea ashinquemparineca iroompaquea irashintaquitiguempari incoquempani inquempetaquempaquea imaica, ¿arimpate queroquea incoquempani iroanaje osamani inchoocatashitajempanijite intati? ¡Aatoja yagavejitsi! Ariquea piquempejiaca aviatimpajia imaica, iroogueti pishineventajiaquempaquea pincovaequishejiguempaquea, quempecaquea ashintamajaquempi covaequisherentsi, iroompaquea pimetojajianaque poapoaitanaque camorecariqui. ¡Querocampate pincojiaquempani povashiantajianajerojate! Oraquea iroogueti pishineventajiaquempaquea pinquemisantajianajeri Aapani Irioshi, intampishitacaajianaquempiquea cameetsaniji pincomajamajianaquempaniji. ¹⁷ Coramani oquejetaca omperaperaavetaquempi pigovaequishere ashintavetaquempi, cotanquitsiquea imaica iroguenti piquemisantajiajaji itsatacaajitaquempica pinintamajajivaquero, irootaquequea nocantantacarica Aapani Irioshi, “Ariotesaa.” ¹⁸ Yaajitanajimpi, tee ashintajempi covaequisherentsi, irooquea imaica omperaperaatanajimpi comajamajatagantsi. ¹⁹ (Iroguenti notsavetacoguetanaquequea imaica yamenaguetica caquinteja cameetsaniji pinquemajiaqueniji taaca opaji nocanqueca, namenaquequeate aatogueti noquempetiroquea imaica manaquea omanapitsajiaquempiquea.) Quejetaca coramani pipimantatsinonetaca pimpeacaaguishetaquempaniji covaequisherentsijia pintigariseavaequeroniji, imaicampani iroguentiquea pimpimantatsinotajempa pimpeacaantajemparoca cameetsaguetatsica pincomajatimentajempaniji.

²⁰ Ogantagatirajaguete omperaperaaquempi covaequisherentsi, teequea pincomajamajajiguempaji. ²¹ Oraquea piquempejiavecagueti, ¿arimpate queroquea ocojiaquempini? ¿Arimpate ocoani oshinetacaajiaquempi ovashiventajiaquempica imaica? ¡Teequeate! Teequea anijacaanteji quempeguetacaroca imaica, manaquea ocaanti camorecariqui. ²² Cotanquitsiquea imaica jac yaavajimpiquea Aapani Irioshi aatonijite omperaperaatimpi covaequisherentsi, iriguentiquea ashintajiajimpi, pisavicaventanajiroquea inintaguetica iriatimpa, ariquee picotanaca picomajamajianaca, pincantacoguitempani panijaguiteni. ²³ Oraquea irivegaratantajitaquemparica peacaacaroca covaequisherentsi, iroguenti metojanentsi. Cotanquitsiquea ora irojocashijiaquenerica Aapani Irioshi tsipashirentajiaquemparineca* Amajirote Quirishito Jesoshi, iroguenti anijagantsi, incoguitempani iranijaguiteni.

7

Tsaroventajiatistica iquempejiacaros ometojacotegueti manquigarentsi

* 6:23 tsipashirentajiaquemparineca Amajirote Quirishito Jesoshi. Iriojiaquea aventajigarica Quirishito, tsaroventajigarica. Pamenero aisa 8.1; 2 Co. 5.17.

¹ Napitsaroverentarijiate, iintsijate pamenajigue intati. Aviatimpajia pitsajiguiro-
tarite quero ocotani maasanopae icantimentantajiguetic. Iroguentiquea ican-
timentajiqueriquea tequeratagueti irimetoje. Oraquea irimetojaquegueti ariquea
iroguenti aatojate icantimentajitajiritsi, metojaquetarite. ² Pameneja icantanta-
jicaroca manquigarentsi shiramparitatotsica teequea oncameetsateji ovasiantsi-
taquemparigueti manquigataroca tequeratagueti irimetojeji irimanquigatajemparo-
quea itsipa. Oraquea arigueti irimetojanaje, ariquea iroguenti aatojate icantimentajita-
jirotsi. ³ Cotanquitsiquea oraquea choocatirajagueti ichoocati manquigataroca iroom-
paquea oncanqueri irimanquigatajemparoquea itsipa, ariquea iroguenti manaquea
opeacaaguisheca covaequisherentsi. Oraquea arigueti irimetojanaje manquigataroca,
ariquea iroguenti querocampate incantimentajiqueriquea, cameetsavaeque iriman-
quigatajemparoquea itsipa, aatoquea icantajititsi: “Opeacaaguishecaro covaequisher-
entsi, aimentacari manquigataroca.”

⁴ Irootaquequea imaica, napitsaroverentarijiate, aviatimpajia quempejiaquempiquea
pimetojapitsajiaqueroquea itioncacotanaqueca Moishishini, piconoitajari Quirishito
imetojaquegueti cameetsaniji irashintamajajajempiniji, iriotaquequea tancorejanajat-
sica yoguijaajivecarigueti. Ariquea oquempetaca imaica cameetsaniji pinetsanama-
jaqueronijite inintaguetic Aapani Irioshi. ⁵ Oraquea tequeratagueti antsaroverenta-
jiguempariji manaquea asavicaventajiaqueroquea apeacaaguishejiacaroquea taaca opaji
anintajiguica aatimpajia. Oraquea atsavetacarogueti icantimentantajiguetic caaviji an-
intamajajianaque ampeacaaguishejianaquemparoquea taaca opajitapae covaequisher-
entsi, nintanatsimequea anquempejiaquempamequea imaica oahoaitanaquemequeate
camorecariqui. ⁶ Cotanquitsiquea imaicaquea imaica quempeca aricaca ametojapitsaji-
aqueroquea itioncacotanaqueca Moishishini cantimentajavecajiroca taaca opajitapae
covaequisherentsi. Imaica manaquea asavicaventajianaje anetsanamajajianajeroquea
maasanopae inintaguetic Aapani Irioshi. Teequea irooquea quempejiajine itioncaco-
jiqueca, iriguentiquea cantashitajiajiajia Ishire Aapani Irioshi.

Covaequisherentsi pantashirentavaetaquenaca

⁷ Iroosacanica, ¿querocaca ancantajigue imaica? ¿Arimpate ariquea ancantajigue
ooquea coguishero itioncacotanaqueca Moishishini? ¡Aatoshine! Oraquea aatomegueti
notsatiromequea queroca ocanti, aatomequeate notsatimequea manaquea nocova-
aeguisheca. Pameneja aatomegueti ocanti: “Aatoja pinintsigueteritsi yashintaguecaca
itsipa”,[☆] aatomequeate notsatiromequea covaequisherentsi nonintsitantagequegueti.
⁸ Imaicaquea imaica notsaqueroquea, irootaquequea oshimerancantapojaca nonin-
tamajaqueroquea nompeacaaguishejiacquemparoquea taaca opajitapae covaequisher-
entsi natsirecacotanacaroquea, nashiquea noaquero iroaqueraqueti nocovaequishe-
vaecagueti. Oraquea aatomegueti atsajiguimequea icantimentantajitiroquea taaca opa-
jitapae, aatomequeate anintamajatimequea ampeacaaguishejiacquemparoquea, cotan-
quitsiquea atsajiaqueroqueti icantimentantajiqueriquea manaquea anintamajajianaque
ampeacaaguishejianaquemparoquea taaca opajitapae covaequisherentsi. ⁹ Coramani
tequeratagueti nontsamajateroji itioncacotanaqueca Moishishini tee anejeroji que-
rocampate shoshoguitetacaavaequenaneca, teequea nontsatenica manaquea noco-
vaeguishetaca, cotanquitsiquea iroompaquea nontsamajatanaqueroqueti namenama-
jataquequea manasacanica nocovaequishevaeca ariquea noshimampojancaetaanaca,
notsatanaquequeate incatsimatenanishiatsi Aapani Irioshi oncoramanitapojajegueti.
¹⁰ Coramani Aapani Irioshi itioncacaqueriquea Moishishini maasanopae icanquer-
ica irinetsanajiqueriquea cameetsaniji inchoocatimentajiaqueniji maasano netsana-
jiaqueroneca, cotanquitsiquea naatimpa namenaqueroquea irooquea oshimerancan-
tapojaquempaca incatsimatantaquenaca Aapani Irioshi oncoramanitapojajegueti, tee-
quea nonetsanamajajigueronica. ¹¹ Irooquea nontsamajaqueroqueti itioncacotanaqueca
Moishishini, teequea noshineventajemparoji nonetsanamajatajeroja, iroguentiquea
noshineventavaetanaca maasanopae icantimentantajitica, irooquea nopeacaaguecaca.

[☆] 7:7 Eq. 20.17; Ireo. 5.21.

Irootaquequea itsatantajicaroca manaquea incatsimatenanishiatsi Aapani Irioshi, naroguentiquea quempetacaantanquitsineca. ¹² Cotanquitsiquea atsajiaque oratica itioncacotanaqueca Moishishini iroguenti caaviji oganejencaca, irootaquequea itioncotaqueca icantaguetica Aapani Irioshi, aisa otsatacaajiacaji ancomajamajajiaquempaja.

¹³ Oraticaquea cameetsatsica itioncacotanaqueca Moishishini, ¿arimpa irooqueea oacaantaquenameca camorecariqui? ¡Aatoquea! Oraquea covaequisherentsi, iroguenti metojacaantaquenameca noantanaquempameca camorecariqui. Notsavecaroqueea icanqueca Aapani Irioshi, cotanquitsiquea iroguentiquea oshimerancantapojacaroqueea nopeacaaguishevetanacaroqueea icantimentantajitica. Irooqueate itsatantajicaroca caaviji anaqueroqueea nocovaequisheca. ¹⁴ Atsajiaquetari itioncacotanaqueca

Moishishini oponeaca Ishirequi Aapani Irioshi, cotanquitsiquea naatimpa naroguenti caquinte, oquejevetaca ipimantajitaquena irooqueea ashintajana covaequisherentsi. ¹⁵ ¿Querocaca nococani naatimpa? Nonintaveca nonetsanaqueromequeea

icanqueca Aapani Irioshi, cotanquitsiquea teequea nagavejeji. Iroguentiquea nopeacaanacaquea teeca nonintavetemparoji nompeacaguemparoqueea. ¹⁶ Oraquea nopeacaacagueti teeca nonintavetemparoji nompeacaguemparoqueea, notsaque iroguenti covaequisherentsi, irootaquequea nocantantacaca caaviji oganejencaca itioncacotanaqueca Moishishini, ocantimenquenaroqueea nopeacaacaca. ¹⁷ Aritarite

teequea naroguenti quejevetatsine, iroguentiquea quejetacaaquena covaequisherentsi pantashirenquenaca. ¹⁸ Notsaquequeea ariquea nococani naatimpa, teequea nagavejeji noncomajamajatempaji, caquinte nonaque. Nonintavecaqueea noncomajamajaquempamequeate, cotanquitsiquea teequea nagavejeji. ¹⁹ Nonintaveca

nonetsanaqueromequeate inintaguetica Aapani Irioshi, cotanquitsiquea teequea nagavejeji. Manaquea nopeacaacaroqueea covaequisherentsi teeca nonintavetempaji naatimpa nompeacaquemparoqueea. ²⁰ Ariguetei nompeacaquemparo teeca nonintavetempaji, teequea naroguenti quejetatsine, iroguenti quejetacaaquena covaequisherentsi pantashirenquenaca.

²¹ Jeroqueea namenaqueca: noninquetuetei nompeacaquemparo cameetsari, quishotia oaquena covaequisherentsi. ²² Noshineventavecarotari noshirequi maasanopae icantaguetica Aapani Irioshi, ²³ cotanquitsiquea namenaquero otsipa notsinoqui quejevetaca ashimirintaguenquejanetacaro nonintaveca, quejetaca oishotacotaquena covaequisherentsi. ²⁴ ¿Querocashiatsi noncotempani naatimpa!

¿Querocampate oishorejacoquenane aatonijite agavejajana covaequisherentsi choocatirajanaguetei notsinometojanequi? ²⁵ Noshineventavaetanacari Aapani Irioshi, nocantanaqueri: “¡Arioteesa!” iriotaquetari oishorejashirentacotajana Amajirote Jesoquirishito.

Jeroqueea namenaqueca: naatimpaquea noguenquejanequi nonintamajataque nonetsanataqueroqueea maasano igantacaantane Aapani Irioshi, cotanquitsiquea notsinoqui noquemisantavecaroqueea covaequisherentsi.

8

Queroca icojigani ichoocashirentajiaqueca Ishire Aapani Irioshi

¹ Imaicaqueea imaica aatoqueea icatsimajiguiritsi Aapani Irioshi irirajia tsipashirentajicarica* Quirishito Jesoshi, irioqueea irirajia teeca irisavicaventajiajeroji impeacaaguishetajemparo taaca opaji inintajiguica iriatimpajia, manaquea isavicaventajiaji inintaguetica Ishire Aapani Irioshi. ² Aritarite itsatacaantane Ishire Aapani Irioshi anijacaaquerica maasano aventajigarica Quirishito Jesoshi ocanquequeea aato agavejajana tioncarentsi cantatsica irimetojaque maasano covaequishejiatsica. ³ Oraquea teeca agavejempaji itioncacotanaqueca Moishishini irooriji acojiaca caquinteja teequea antampishitashiteroji covaequisherentsi, yantaqueroqueea Aapani Irioshi itigarancaqueriguetei Irijanite irimetojaventajiacaji. Iriatimpa iquempetsinomajatacaji aatimpajia

* 8:1 tsipashirentajicarica Quirishito Jesoshi. Iriojiaqueea aventajigarica Quirishito, tsariventajigarica. Pamenero aisa 2 Co. 5.17.

covaeguisheri, cotanquitsiquea teequea incovaeguishetimatempaji, jero yagavejantacaca imetojaventajiacaji. Oraquea imetojaventajiacajigueti icatsimatimenqueri Aapani Irioshi agovaeguisherijia aatonijite icatsimajiajitsi aatimpajia oncoramanitapojajegueti. ⁴ Iquempetaqueroquea imaica cameetsaniji agavejajiaquenijite anetsanamajajiaque-ronijite maasanopae icanqueca Aapani Irioshi, teequeate irooquea asavicaventajiajeji ampeacaaguishetajemparoquea taaca opaji anintajiguica aatimpajia, manaquea asavicaventajiaje inintagueticas Ishire Aapani Irioshi.

⁵ Irirajiaquea savicaventajiguero caaca opaji inintajiaqueca iriatimpajia, iroguenti iquenquejacogueque irashipae caquinte, cotanquitsiquea irirajiaquea savicaventajiaqueroca inintagueticas Ishire Aapani Irioshi manaquea iquenquejacoguequeroquea irashipae Ishire Aapani Irioshi. ⁶ Irirajiaquea savicaventajiaqueroca inintajiguica iriatimpajia irimetojajianaque. Cotanquitsiquea irirajiaquea savicaventajiguero inintagueticas Ishire Aapani Irioshi iranijacaajitaqueriquea ishijerajiaqui aatonijite itsaroacaajajaritsi incatsimajiajeriquea Aapani Irioshi. ⁷ Irirajiaquea maasano savicaventajiguero inintajiguica iriatimpajia iriguentijia catsimacatsimatirica Aapani Irioshi. Teequea irinetsanajigueroji icanqueca, aisa aatoquea yagavejajiguetsi irinetsanajiaqueroquea. ⁸ Irirajia savicaventiroca inintaguishejiaqueca teequea iragavejajigueti iroguishinejajiaqueriji Aapani Irioshi.

⁹ Cotanquitsiquea aviatimpajia teequea irooquea pisavicaventajigueti pinintajiguica aviatimpajia, iroguenti pisavicaventajiaque inintagueticas Ishire Aapani Irioshi, arimajagueti ichoocashirentajiaquempica. Querica teeca inchoocashirenteriji Ishire Quirishito, teequea irioquea ashintemparine Quirishito. ¹⁰ Cotanquitsiquea imaica ichoocashirentajiaquempiquea Quirishito, oraquea pitsino iroguentiquea metoanquitsine irooriji picovaeguishejiavetaca, orampani pishire anijanaji, yamenajiaquempitari quempeca teeca pincovaeguishetimatempaji. ¹¹ Iriogueti choocashirentajiaquempica Ishire vohatajirica Jesoshi imetojaventajiacajigueti, ariquea irira vohatajirica Quirishito Jesoshi inquempetacaajiaquempiquea aviatimpajia aisa, iranijacaajiajempiro pitsino teeca onquishometoaneteji. Iriotaquequea anijacaajempirone Ishire choocashirentajiaquempica.

¹² Napitsarorentarijiate, irootaquequea imaica apatsinoroquea iriatimpa antsarorentajiaquempica aatonijite irooquea asavicaventajiguetsi taaca opaji anintajiguica aatimpajia. ¹³ Iroogueti pisavicaventajiaquequea taaca opaji pinintajiguica, ariquea pimetojajianaque, cotanquitsiquea pinquemisantajiaquerigueti Ishire Aapani Irioshi, iragavejacaajiaquempiquea panaantavaquemparoca maasanopae pipeacaaguishejiavecaca, oncoramanitapojajegueti panijaguiteni iriatimpaqui. ¹⁴ Maasanotari ijivatanaqueca Ishire Aapani Irioshi, iriguentijia irijanijiate Aapani Irioshi. ¹⁵ Iriraquea Ishire Aapani Irioshi ichoocashirentajiaquempiquea, teequea irooquea inchoocashirentashijiguempiniji iromintsarajiaquempiquea pinquempejiaquempa tequeratagueti pintsarorentajiguempiriji Aapani Irioshi pitsarocaamajatarigueti incatsimajiaquempiquea. Iroguentiquea ichoocashirentashijiaquempiquea impeacaajiaquempiquea irijanijiate Aapani Irioshi, jero amanantajiacarica Aapani Irioshi acantantajiacarica: “¡Aapani!” ¹⁶ Iquenquetsashirentacaajiacaji Ishire Aapani Irioshi atsatantajiacaca aroguentijia irijanijiate Aapani Irioshi. ¹⁷ Aromajagueti irijanijiate atsajiaque irojocajiacajiro Aapani Irioshi maasanopae inintacaitisijiacajica, cotanquitsiquea iroguentiqueate coguitejacomajatanquitsica antsipejiaquempaquea anquempejiaquempari Quirishito yatsipevaetacaguetsi cameetsaniji anquempejiaquempariniji iriatimpa oncoramanitapojajeguetsi, antsipatsipaitanajempiriquea ashintashintaipojajemparo maasanopae yashintacaca iriatimpa, anquempetapojajempari yoganejencacaguetsi.

Oncoramanitapojajeguetsi anquempejiaquempari Quirishito

¹⁸ Iroomajaca noncantajiaquempica caaviji ashinevaequempaquea oncoramanitapojajeguetsi oahoaitanaquetsi jenoqui amenajajeriguetsi Quirishito anquempejiaquempiriquea, anaavaetaqueroquea maasanopae atsipevaetacaca imaica. ¹⁹ Maasanopae

ipeacaaguecaca Aapani Irioshi oguijajiaquequea aapojempagueti ironigaantantajitaque-mparica irijanijiate Aapani Irioshi. ²⁰ Maasanojiatari ipeacaaguetaacaca teequea onquempetajemparoji iroaqueragueti ipeacaacarogueti, imaicampani atsipetsipeica, ot-soroavequita, ichoocavequita. Teenica irio ninterone iveacaane, iriguenti quejequero peacaacarica yamenaquerigueti icovaeguishetaca caquinte. Manaquea yoguijaguijai-quero onetsanatantajempaca. ²¹ Aatotari icotani iquempejiatatsi imaica yatsipeji-acarogueti maasano imetojane, yavejancajiaquea maasano, manaquea intsipatsipai-tanaquempariquea maasano irijanijiate Aapani Irioshi incantashitatijaianaquempaquea iroganejencajiaquempa. Ariquea onquempeguetaquempa maasanopae ipeacaagueta-caca aisa, aatonica ochoocatimatajitsi avejancaguetajatsineca. ²² Atsamajajiaqueroquea maasanopae ipeacaaguecaca Aapani Irioshi atsipeguitani oguijaquequea oncantashita-tianaquempaquea, quempetacaqueate atsipevaetagueti manquigarentsi ocantague-tirogueti. ²³ Cotanquitsiquea teequea aparó atsipetatsine ipeacaaguecaca Aapani Irioshi, atsipevaecaqueate aatimpajia aisa. Ichocashirentajiacaji Ishire Aapani Irioshi atsatantajiacaca incantashitatijiacaji Aapani Irioshi oncoramanitapojajeguetai, cotanquitsiquea imaica atsipeshirentavaeguitani aguijacojiaca irojocajiacajiroquea Aapani Irioshi inintacajiacajica maasano irijanijiate, ampeamajaquempaquea irijanijiate, incantashita-tijiacajaji aatoniji ametojatsinotaji. ²⁴ Oraquea iroaqueraguetai atsaroventajiacariguetai Quirishito atsajiaque oncoramanitapojajeguetai ancantashitatijianajempaquea aatoniji ametojaji, irootaquequea aguijajiaqueca imaica. Cotanquitsiquea arimequea amenajia-queromequea imaica irishinejiacajimequeate Aapani Irioshi aatomequea aguijacojigu-romequea, jac amenajiaqueromequea. ¿Arimpate nintanatsi aguijacojiaguitempani? ¡Aatoshine! ²⁵ Cotanquitsiquea irooquea aguijacojiacaquea tequerataca amenajigueroji, imaica netsana aguijacojiaguempaquea antsipetacojiaguempaquea maasanopae.

Iquenquetsaventajiacaji Ishire Aapani Irioshi

²⁶ Ariquea oquempeca aisa iriraquea Ishire Aapani Irioshi iramitacojiacaji intampishitacaajiacaji, teetari antampishijigueji. Aatimpajia amanajiguiriguetai Aapani Irioshi teequea antsajigueji querocaca ancantajiguerini, cotanquitsiquea iroguentiguetai ancantashirentajiavequitempaquea shirerec inquenquetsaventajiacaji Ishire Aapani Irioshi, incanqueriquea teeca agaveji aatimpa ancanteji. ²⁷ Iriraquea Aapani Irioshi amenamajatsicajiroca aquenquejajiaqueca anintajiaqueca itsaqueroquea ininqueca Ishire, irooriji yamanacoventavaqueneriguetai igomajamajarejia iroguenti iramanacovenqueneri inintaguetica Aapani Irioshi.

Antampishitashijianaqueroqueate maasanopae

²⁸ Aisa atsajiaque maasanoquea irantsipejiavetaquempaca pintsajigarica Aapani Irioshi osotoanaqueneriquea cameetsa, iriojiatari icajemajiaqueca onetsanatimentanaquempanijite inintaguetica Aapani Irioshi. ²⁹ Paesatoniqui itsaqueroquea Aapani Irioshi queri tsaroventajiaquemparineca, jero icantantacarica oncoramanitapojajeguetai inquempemajajiaquempariquea Irijanite, irijivajiaquerinijite iriatimpa iriguentijeguetai incaramirincajiavaeque jmm. ³⁰ Irirajiaquea icanqueca inquempemajajiaquempariquea Irijanite icajemashirentajiaqueriquea cameetsaniji intsaroventajiaquemparinijite. Irirajiaquea icajemashirentajiaqueca manaquea yamenajiaqueriquea quempeca teeca incovaeguishetimatempaji, iroompaquea iroganejencatacaajiaquempariquea.

³¹ Iroosacanicima imaica ishineventajiacaji Aapani Irioshi itsipatsipaicaji, ¿arimpate quericampate agavejajiacajineca? ¡Aatoshine queri agavejatsineca! ³² Iriraquea teeca intsaneguempariji Irijanitemajaca, manaqueate itigarancaqueri imetojaventajiacaji, ¿aatompate yojocajiajirotsi aisa maasanopae cameetsaripae? ³³ Aatimpajia iroguenti inintacajiacaji Aapani Irioshi irashintajiacaji. Imaica jac yashintajiacaji. ¿Arimpate quericampate cantajiacajineca chooca agovaeguisherejia? ¡Aatoshine queri agavejatsineca icantajiguetai! Iriotaquequea Aapani Irioshi amenajiacaji quempeca teeca ancovaeguishetimatempaji, ³⁴ ¿arimpate quericampate agavejanquitsineca inquempetacaantajiacaji incatsimajiacajinijite Aapani Irioshi? ¡Aato queri agavejatsineca!

Iriotaquequea Quirishito Jesoshi metojaventajiacaji. Teequea aparo irimetojaventajiacaji, manaquea itancorejanaji aisa, imaica ichoocapojaji isenampijapojajari Aapani Irioshi itincamijempequiqui iquenquetsaventajiacaji. ³⁵ ¿Arimpate quericampate agavejanquitsineca irovashiantacaaitajeri Quirishito aatoniji ipintsamajajiacaji icavintsajamajajiacaji? ¡Aatoshine queri agavejatsineca! Antsipevaevetaquempaqueate irooca ashimam-
pojancajavequempaquea, cotanquitsiquea iriraquea Quirishito incoquempaniquea impintsamajajiacaji incavintsajamajatanacaji. Iroocaquea irantsipetacaajivetaacaji itsipapae incatsimajajiacajiquea intati, irooca antsipevaevequempaquea atase, aricaca aatoquea ochoocaveta querocampate anquitsaajiaquempaca, irooca onchoocagueve-
taquempaquea taaca opajita managuetanquitsineca, aisa ametojajivetanajempaquea, cotanquitsiquea iriraquea Quirishito incoquempani impintsamajajiacaji incavintsajamajajiacaji. ³⁶ Ocanque tioncanquitsica:

“Icantacoguitani inintajiaque irimetojajiaquenaquea yamenajiaquenaguete notsaroven-
tjiaquempiquea,

inquempetacajiaquenaqueate oveja irooshipojiguete irijitorejajitaqueri.”[☆]

³⁷ Jero antsipejavequempaquea quejegueta caroca ocativa, cotanquitsiquea yagavejacaajiacajiqueate pintsamajajiacajica arimpaqueate antampishitashimajajianaqueroqueate maasanopae, caaviji anaamajatanajianaquemparoca maasanopae. ³⁸ Irootaquequea imaica naatimpa notsamajaque aatoquea queri agavejatsineca irovashiantacaqueriquea Aapani Irioshi aatoniji ipintsamajajiacaji icavintsajamajajiacaji. Aatoquea yagavejajiguetsi irashivantijitete Aapani Irioshi. Ariquea iquempejiaca ampatsinipae aisa quericaca itsipapae majirontajiatista, aatoquea yagavejajiatista. Irooca ametojajivequempaquea, irooca choocatirajajiguete anchoocajiaje, incoquempani impintsamajajiacaji. Ariquea oquempetaca maasanopae imaica aisa ocarauquiguetananquitsineca. ³⁹ Ariquea oquempetaca aisa choocatista jenoqui, irooca isavijitica, aisa taaca opajitapae otsipapae ipeacaagueta caca Aapani Irioshi aatoquea agavejitsi ovashiantacaguri Aapani Irioshi aatoniji ipintsamajajiacaji, icoguitanitarite ipintsamajajiacaji aatimpajia maasano tsaromentajiacarica Amajirote Quirishito Jesoshi.

9

Aapani Irioshi inintacaajiaqueri ishiraerijia incavintsajamajiaqueri

¹ Naatimpa naroguenti tsaromentarica Quirishito, aisa ichoocashirenquenaquea Ishire Aapani Irioshi. Irioquea nigaimoquenaqueate quero nococani noshirequi, irootaquequea notsatantacaca imaica manaquea iroomajaca noncanquempica aatoquea notsojega intati. ² Noshimampojancavaetacaqueate noquenquejacotaqueriguete nogonorojia teeca iraventajiguempajiri Jesoshi, nocantacoguitani ocatsishirentavetanauena. ³ Nonintavecaquea nompiapiaitajemparime napijoriojiate nashimaja nogonorojia cameetsaniji naroguentiniji incatsimataque Aapani Irioshi, iriatimpajia irishetacojiaque, aisa naatimpa irovashiantaquequea Quirishito, irioqueate impintsamajatanauempaca incavintsajamajajiaqueri. ⁴ Irirajiaquea nogonorojia ichoviquijiani Ishiraeri iriguentijia inintsijiacaca Aapani Irioshi coramani impeajiaqueriquea irijanijiate. Iriatimpajiaquea itsipajia coramani, jero iquejetantacarica itsirencashimpoquirerejimojiaqueriquea cantavaetaque tsiren. Aisa iriguentijia yojocajiaqueneca Aapani Irioshi oratica paaquitopae,* icantajiaqueri intsaromentajiaquempajiguete incavintsajamajiaqueriquea. Itioncacaanqueneriquea maasanopae inintaguequea irinetsanajiaqueca. Aisa itsatacaqueri Moishishini quero incojiaquempani intsaromentajiaquempajiguete ontaniqui Taverenacoroqui. Iroompaguea icamanqueri aisa quero incojiaquerini incavintsajajiaqueriguete. ⁵ Iriatimpajia iriguentijia ichoviquijiani Averaameni, Ishaconi, Jacovoni aisa irijanijiate. Ocoramanitapojaqueguete ivoapojaque Quirishito ocaniqui

[☆] 8:36 Sar. 44.22. * 9:4 Oraquea paaquito iroguenti icantamajajitirica itsipa irinetsanamajajitenerica. Ochoocagueataquequea paaquitopae iroquetinica icanquerica Aapani Irioshi caquintepae: chooca aparo icanquerica Noeni, otsipa icanquerica Averaameni, otsipa icantajiaquerica ishiraerijia ichoocagueguete Moishishini, otsipa icanquerica Taavini.

quepatsiqui, aisa iriguenti ichoviquitanaqueca, iriguentiquea Irioshimajaca, iriguenti ashintaguecaroca maasanopae. ¡Intsijate incoquempanijate irishineventajiguitemparinijate! Ari oncoquempa.

⁶ Iroosacanica, ¿arimpate ancantajigue manaquea yamatavijajiaqueri Aapani Irioshi ishiraerijia, teequea irinetsanateroji icantajiaquerica coramani? Teequeate iramatavijajigueriji, teetarite maasano ichoviquijiani Ishiraeri impeajiguempaji ishiraerijiamajaca irashimajaca Aapani Irioshi. ⁷ Ariquea iquempetacaajiacari coramani ichoviquijiani Averaameni, iquenquetsatacojiaqueriguetei Aapani Irioshi teequea inquenquetsatacojigueriji maasano, irootaquequea icantantacarica Averaameni: “Iriguentiquea nocantacotsitacaca Ishaaco pinchoviquivaetantanaquempaca.”[☆] ⁸ Irootaquequea atsantajiacarica Aapani Irioshi teequea impeajigueriji ishiraerijiamajaca maasano ichoviquijiani Averaameni. Iriguentiquea peamajajianquitsica ichoviquijiani Ishaaconi, ⁹ iriotaquetari icanqueca Aapani Irioshi coramani iquenquetsatacaaqueriguetei Averaameni icanqueri: “Ontsipatapojajempaguetei ajagantsini onquejetapojajempaguetei imaica, noncoraquetajate namenajatempi, ariquea irivoaje oshiramparijanique Sara.”[☆]

¹⁰ Cotanquitsiquea teequea aparo onchoocateji ocatica. Irirajia irijanijiate Ireveca, apatiroti irijanincarica, iriotaquequea avasatinite Ishaaconi. ¹¹⁻¹³ Oraquea tequerataguetei ovojaigueriji, iriraquea Aapani Irioshi icanquero: “Iriraquea jivavetapojatsineca manaquea impejaitajeri iromperare carapojatsineca.”[☆] Oraquea icanqueroguetei Aapani Irioshi tequeratatiraja impeacaguemparo cameetsatatsica aisa covaeguishetatsica, tequeratatirajanica ovojaigueriji. Ariqueate icanque tioncarentsiqui: “Nopintsatacariquea Jacovo, irirampani Esao nomanintaqueri.”[†] Irootaquequea itsatantajiacaroca maasanopae ocatica inchiqiojita icanque Aapani Irioshi iriatimpa queri inintacaaqueca incoguique incavintsajamajaqueri, ariquea irinetsanamajaqueroquea maasanopae icanqueca. Teequea iroquetei iramenajigueriji ogameetsareni ipeacaaguecaca, inchiqiojita icajemashirentaqueri iriatimpa.

¹⁴ Iroosacanica ¿querocaca ancantajigue imaica? ¿Arimpate ancantajigue teequeate intampaticateroji Aapani Irioshi, mana icoguiashitanta intati? ¡Aatoshine!

¹⁵ Icanqueriqueate Moishishini coramani icanque:

“Quericaca noninque naatimpa nompintsatacoquempari nompintsatacoquempariqueate.

Aisa quericaca noninqueca noncavintsajamajaqueri noncavintsajamajaqueriqueate.”[☆]

¹⁶ Irootaquequea imaica teequea irooquea impintsatacotimentajiacaji iramenajiacajigueti inchiqiojita anintajiaque aatimpajia impintsatacojiacaji, irooca irooriji apanquenapanquenavaecaro antajiaque cameetsa, manaquea inchiqiojita ininque iriatimpa impintsatacojiacaji, irootaquequea ipintsatacotantajiacajica. ¹⁷ Itioncacojitaqueroquea aisa icanquerica Aapani Irioshi Paraone, icanque: “Manaquea nopecaaquempiquea majirontatsica cameetsaniji aviguentiniji intsatantajitaquempaca nagavejamajati, cameetsaniji intsavetacotimentajitaquenani onsitacaguetejanaquemparo maasano quepatsi, intsavetacojitaqueroquea novajiro.”[‡] ¹⁸ Ariqueate iquempetaca Aapani Irioshi imaica. Ipintsatacojigari quericaca ininqueca impintsatacojiguempari, aisa quericaca ininqueca inquishoshirentacaaqueri, ariqueate inquishoshirentacaitempariquea.

¹⁹ Cotanquitsiquea arica chooca aparo cantenaneca: “Iroosacanica, oquempetacaguetei imaica ¿queroquea ococani icatsimatantajiacarica Aapani Irioshi teeca intsarovenajiguempariji? ¿Arimpate quericampate agavejanquitsineca incantashitatiejemparoquea icanqueca Aapani Irioshi?” ²⁰ ¿Arimpate quericampate aviatimpa cameetsaniji

[☆] 9:7 Jen. 21.12. [☆] 9:9 Jen. 18.10. [☆] 9:11-13 Jen. 25.23. [†] 9:11-13 Mara. 1.2-3. nomanintaqueri. Oguipitsocaqueroguetei acaniqui “nomanintaqueri”, iguenquetsatsarequi guiriego agavejaque oncanque “nomanintaqueri” irooca “nosemacari”. [☆] 9:15 Eq. 33.19. [‡] 9:17 Eq. 9.16. Yomperaperaitacariguetei Paraone maasano ishiraerijia ichoocajiaqueguetei Ejepitoqui, Aapani Irioshi incantacaantaqueriquea Paraone: “Poguiquijajerija nashintajiacaca”, cotanquitsiquea iquishoshirentanaque Paraone, tee inquemisanteriji, irootaquequea itigarancantacananarica Aapani Irioshi atsipetagantsipae caratanquitsica 10. Iquemacojiaqueroquea caquinteguetsatsica itsatantajiacaca arimaja yagavejamajati Aapani Irioshi.

pimpigajencatavaquempari Aapani Irioshi? Pinquenquejeroja chomo quepatsinaqui ipeacajaitarogueti, ¿arimpate oncanqueri peacaacaroca: “¿Queroquea ocoani piquempetanquenaca?”²¹ Iriraquea vichajari ¿aatompate yagavejitsi impeacaaquempa taaca opajitapae inintaguequeca? Iraitsitempaquea apapitsaro iraagarantsitemparoquea impeacaaguequemparo inintaguequeca, irooca cameetsamajatanquitsineca irishineventamajajitempa, irooca aatoca ishineventamajajita.

²² Ariquea iquempetaca Aapani Irioshi iriatimpa, inintavetacaquea ironigaanquero igatsimaca aisa iragavejane, cotanquitsiquea teequeate incatsimatanteji taampina, manaquea yatsipetacovaejiacariquea ipeacaajiacaca catsimatacaajiaquerica teroncajianquitsinemeca. ²³ Manaquea iquempetaca imaica cameetsaniji iramenajitaqueriniji caaviji yoganejencamajata icavintsajamajatantajiacarica ipeacajaiacaca inintacotsijiacaca paesatoniqui incavintsajamajajiaqueri cameetsaniji iramenajiajeroniji iroganejencaca. ²⁴ Irootarite icajemashirentantajiacajica aatimpajia maasano, teequea aparo incajemashirentajigueriji joriojia, icajemashirentajiaqueri aisa teeca irijorijoigueti. ²⁵ Ariqueate itioncacaquerigueti Oseashini icanque:

“Irirajia teeca nashintajavetempariji oncoramanitapojajegueti nashintajajempari. Ariquea inquempajiaquempa irira teeca irio novintsare, nompeaqueriquea novintsare.”[☆]

²⁶ “Querocagueti oraniqui ichoocajiaqueni nocantajiavecaca: ‘Teequeate nashintajiguempiji’, ariquea oraniqui inquenquetsatacojitaqueri incantajitaque: ‘Iriguenti irijanijiate Aapani Irioshi anijatsica.’”[☆]

²⁷ Cotanquitsiquea Isaiashini itioncacojiaqueri ichoviquijiani Ishiraeri icanque: “Incaramirincajavetanaquempaquea ichoviquijiani Ishiraeri inquempajavetanaquemparoquea impanequi ocaratsapijajaquitica inirojani quentijani, cotanquitsiquea iriguentijiani choocajajatsineca apaopae irajjavajeca Aapani Irioshi.

²⁸ Irinetsanamajaqueroqueate Amajirote icanqueca coramani, catsiqueti incatsimatimentajiaqueriquea quepatsiquitica igovaeguisherjia, intampaticamajateroquea.”[☆]

²⁹ Ariqueate icanque aisa Isaiashini coramani icanque: “Aatomegueti ipintsatacojajimequeate Agavejamajatatsica Imajirojiate caramirincajiat-sica, interoncamajajiacajimequeate maasano, anquempejiaquemparimequea guintenijavetatsica coramani Soromaqui, anquempejiaquemparimequea aisa Gomoraquitica.”[☆]

Irirajia joriojia teequea irishineventajiguempariji Jesoquirishito

³⁰ Iroosacanica ¿querocaca ancantajigue imaica? Atsajiaquequea irirajia teeca irijorijoigueti teequea inquenquejajavetempaji quero incojiaquempanti cameetsaniji irishineventajiaquempariniji Aapani Irioshi, cotanquitsiquea imaica yamenajiaqueri quempeca teeca incovaeguishetimatempaji, yaventaventaicaritari Jesoquirishito. ³¹ Irirajia ishiraerijia iroguenti yoguijaguijaiveca icanqueca Aapani Irioshi itioncacaantajiaquerica, inintajiavecaquea irinetsanajiaqueromequeate cameetsaniji irishineventajiaquempariniji Aapani Irioshi, cotanquitsiquea teequea iragavejajigueti. Oraquea irinetsanajiaqueromegueti maasanopae, ariquea iroguenti irishineventajiaquemparimequeate Aapani Irioshi. ³² ¿Queroquea ocoani teeca irishineventajiguempariji Aapani Irioshi? Manaquea yaventaventaicaroquea itioncacotanaqueca Moishishini inintajia-veca irinetsanamajajiaqueromequea cameetsanijite irishineventajiaquempariniji Aapani Irioshi, teequea iro irinintajigueti iraventaventaiquempariquea Quirishito, icomijiacariqueate. Irootaquequea itsavetacotantajitacarica Quirishito iquempetacaajitacari mapi tivatantatsica. ³³ Jero itioncacotantajitacarica coramani ocanque: “Oncoramanitapojajegueti nojoquijique mapi ontaniqui Shionequi,

[☆] 9:25 Os. 2.23. [☆] 9:26 Os. 1.10. [☆] 9:28 Is. 10.22-23. [☆] 9:29 Is. 1.9. Pamenero Jen. 19.24-29.

manaquea intivatantajitaquemparoquea,
cotanquitsiquea quericaca avenquemparoneca aatoquea yoguipashiventajitiri, aatonica
yaventashitarotsi intati.”[✠]

10

¹ Napitsaromentarijiate, caaviji nonintamajaque irishetacojiqueri nogonorojia ishi-
raerijia, irooquea nocanqueri namanaquerigueti Aapani Irioshi. ² Naatimpaquea na-
menajiaqueri arimajaca inintajiaveca intsaromentamajajiaquemparimequeate Aapani
Irioshi, cotanquitsiquea teequea intsajigueji taaqueate ininque Aapani Irioshi, man-
aquea omanimojiacari. ³ Teequea intsajigueji querocaca incojiaquempani cameet-
saniji Aapani Irioshi iramenajiaquerinijite quempeca teeca incovaeguishetimatempaji,
iroguentiquea inintajiaveca inchiqiuojita irishinetacaajiaquempari iriatimpajia. Tee-
quea irinintajigueji iraventaventaquempari cameetsaniji Aapani Irioshi iramenajiaque-
riniji quempeca teeca incovaeguishetimatempaji. ⁴ Iriatari Quirishito inetsanatacoma-
jaqueroquea Icantacaantaqueca Aapani Irioshi itioncacotanaqueca Moishishini, icarat-
acaapojajiro irigomajaretacaajanajempariniji maasano aventaventaquemparineca.

⁵ Iriaquea Moishishini itioncacojiaqueri nintajiavetanquitsica irinetsanamajaque-
roquea icanqueca Aapani Irioshi cameetsaniji iramenajiaqueriniji quempeca teeca
incovaeguishetimatempaji, icanque: “Iriaquea netsanamajaquero ca maasano ocajia,
irooquea iranijantajempaca.”[✠] ⁶ Cotanquitsiquea quericaca aventaventaquempar-
ineca Quirishito cameetsaniji irigomajaretacaanajempariniji, aatoquea icantashiren-
titsi: “¿Quericaampate atsomajanquitsineca jenoqui inquitequi?” iraguijitaapo-
jaquerime Quirishito. ⁷ Ariquea oquempetaca aisa aatoquea icantitsi: “¿Quericate
oanquitsineca isaviji oagantavaequegueti ichoocajiguigueti metojari?” intancore-
jajerime Quirishito iramajerime.[✠] ⁸ Iroosacanica, ¿querocampate ocanqueni Tion-
carentsimajaca? Manaquea ocanque: “Oraquea icanqueca oquempejimajaquempi,
ochoocavagantetaquempi aisa ochoocashirenquempi.”[✠] Irootaquequea notsavetan-
tajiguica naatimpajia aisa nocantajiaquempica: paventaventaquemparija Quirishito
cameetsaniji irishetacojiaquempiniji Aapani Irioshi. ⁹ Pincanquegueti pivagantequi:
“Jesoshi iriguenti Majirontamajatatsica”, aisa pintsashirentamajaqugueti iroomajaca
ivochatajiri Aapani Irioshi imetojavecagueti, ariquea iroguenti irishetacotaquempiquea
Aapani Irioshi. ¹⁰ Irootarite ashire antsashirentantamajaquempaca iroomajaca aven-
taguitempariniji irigomajaretacaantajicajica, aisa irooquea avagante ancantantempaca:
“Iriguenti Majirontamajatatsica”, irishetacotantajiacajica. ¹¹ Ocanquequea Tioncar-
entsimajaca: “Querica avenquemparineca iriatimpa, aatoquea yoguipashiventimaji-
tiriti, aatonica yaventashitaritsi intati.”[✠] ¹² Oraquea icanquegueti imaica, iriguenti
icantajiaque maasano caquinteguetatsica, iriatimpa yamenajiacajiquea ajamirincaji-
aque, aquempetavacaajiacajica joriojia aisa teeca irijorijoigueti, iriguentitari Amajirote
maasano. Jero caaviji icavintsajamajiacajica maasano cajemajianaquerica. ¹³ Aritarite
“maasano aventajiaquemparoneca ivajiro Majirontamajatatsica, irajavajeri.”[✠]

¹⁴ Cotanquitsiquea aatogueti itsajiguiritsi iriguenti itigarancaqueca Aapani Irioshi
¿querocampate incojiaquempani incajemantajiaquemparica iravajerinijite? Aisa
aatogueti iquemacojiguiritsi, ¿querocampate incojiaquempani iraventantajianaquem-
parica? Aisa aatogueti itsavetantimojitiriti, ¿querocampate incojiaquempani inquema-
cotantajiaquemparica? ¹⁵ Aatogueti ichoocatitsi tigarancajiaquerineca, ¿querocampate
incojiaquempani iroarointantanaquempaca intsavetante? Ariquea ocanque tioncan-
quitsica: “¿Cameetsaguitivaeque iguiti amiroca quenquetsatsarentsi oguishinejantatsica
tsavetanquero ca cameetsaguetatsica!”[✠]

[✠] 9:33 Is. 8.14; 28.16. Pamenero 1 Pe. 2.4, 6-8 aisa Irc. 20.17-18. [✠] 10:5 Irev. 18.5. [✠] 10:7 Ireo. 30.12-13.
[✠] 10:8 Ireo. 30.14. [✠] 10:11 Is. 28.16. [✠] 10:13 Joere 2.32. [✠] 10:15 Is. 52.7.

¹⁶ Cotanquitsiquea itsavetantimojivecari, teequea maasano inquemisantajigueroji Quenquetsatsarentsi Oganejencatatsica. Aritari icanque Isaiashini coramani: “Nomajirote, ¿choocampate quemisantaqueroca notsavetantimojiaquerica incantantaquem-paca: ‘Iroomajaca?’”[☆] ¹⁷ Irootaquequea nocantantaquempica, anquemajiaquerogueti itsavetantajitaqueca agavejaque aventaventaiquempari Quirishito. Iroguentiquea anquemajiavaque icanqueca Aapani Irioshi.

¹⁸ Cotanquitsiquea naatimpa nocanque: Iroosacanica, ¿teecacajate inquemajigueroji? ¡Iquemajiavecaroquea! Otioncacatari ocanque:

“Yoayoaaitanaquequea tsavetantajiatsica itsitacaguitejavaetanaqueroquea maasano quepatsipae,

iquemajiavaqueriquea itsavetantimojiaquerigueti ocaraguepojaquegueti.”[☆]

¹⁹ Cotanquitsiquea noncantsijiajempiqueate aisa: ¿Aricajate iroocajate cotanquitsiquea teecajate inquemajigueriji ishiraerijia taaca opaji icantajaqueca irirajia tsavetantimojiaquerica? ¡Iquemajiavecaqueate!, cotanquitsiquea teequea irishineventajiguemparoji icamantajiavecarica. Itioncacotanaquero Moishishini coramani icanqueca Aapani Irioshi, icanque:

“Pincatsimatacotsitaqueri itsipajia teeca irigonorontavacaajiguempaji noncavintsajia-querigueti.

Noncatsimatacaaquempiri caquinteja teeca intsajiavetempaji.”[☆]

²⁰ Iroompaquea Isaiashini teequea intsarogueji, tampatica yoaqueroquea itioncaco-queroquea icanqueca Aapani Irioshi iquenquetsatacojiaquerigueti teeca irishiraerijiate, icanque:

“Irirajia teeca inquenquejiajavenaji intsajiaquenaniji, imaica itsajiapojajana.

Ariquea iquempejiaca irirajia teeca incoacojiavetenaji, imaicaquea imaica naatimpa notsatacaajiaqueri quero nocotani.”[☆]

²¹ Oraquea itioncacotaqueroquea icanqueca Aapani Irioshi iquenquetsatacojiaqueri ishiraerijia, icanque:

“Nocajemavacoveguitarini caquinteja pigapigatsatantenerijia, eeshotia inaque.”[☆]

11

Inconoagarantajiaquempaquea ishiraerijia choocagarantajatsineca tsaromentamajajianaquemparineca Aapani Irioshi

¹ Iroosacanica imaica nocanque: ¿Aricajate yovashiantajianajiri Aapani Irioshi maasano ichoviquijiani Ishiraeri icantajaivecaca: “Iriguenti nashijia”? ¡Teequeate! Pamenejate naatimpa naroguenti igonorona ishiraerijia, iriguenti choviquitanaquena Vejamine ichoviquini Averaameni, cotanquitsiquea iriraquea Aapani Irioshi teequeate irovashiantanajenaji. ² Ariquea iquempejiaqueri nogonorojia teequea irovashiantajianajeriji, itsatsitacariquea coramani, icoguiajiaqueri, ariquea imaica icocani yashintajiacari. Pitsajiguirotarite itioncacojitaquerigueti Iriashini iquenquetsatacaquerigueti Aapani Irioshi, icamanqueri quero icoguishejiacani ishiraerijia, icanqueri: ³ “Nomajirote, iteroncajiaqueriquea imetojajiaqueri tsavetantajiatsica pitigaranquimojiavecarica. Aisa ipishonquitaguequempiroquea paretaretepae. Aparoquea nochoocataji naatimpa, cotanquitsiquea isariimenquenaro irimetojajiaquena.”[☆] ⁴ Cotanquitsiquea ¿quero icanqueri Aapani Irioshi? Icanque: “Noquempoguijajajiriquea 7,000 shiramparijia tsaromentamajiaquenaca teeca irogueroventempariji Vaare ipeajiaqueca pigonorojia irioshi-tashijiacaca.”[☆] ⁵ Ariquea oquempetaca imaica ichoocajiaque apaopae tsaromentajiacarica Aapani Irioshi, inchiquiojita icavintsajamajiaqueri iriatimpa, iriotari cavintsajanteneri, icoguiajiaqueriquea cameetsaniji intsaromentajiaquemparinijite. ⁶ Teequea

☆ 10:16 Is. 53.1. ☆ 10:18 Sar. 19.4. ☆ 10:19 Ireo. 32.21. ☆ 10:20 Is. 65.1. ☆ 10:21 Is. 65.2. ☆ 11:3 1 Maj. 19.10, 14. ☆ 11:4 1 Maj. 19.18.

irooqueea incavintsajimentajigueriji yamenavecagueti icomajavaeca iriatimpajia, man-atari intati icavintsajashijiacari iriatimpa. Aatomegueti oquempetaca imaica, aatome-queate otampaticatime igavintsajantantinerini Aapani Irioshi.

⁷ Iroosacanica, ¿querocampate ocoani? Manaqueea oquempetaca imaica. Iiraqueea ishiraerijia inintajiaveca irishineventajiavaquempari Aapani Irioshi, cotanquitsi tee-queea irishineventajigueriji maasano, manaqueea ishineventajiacari icoguiajiaqueea pae-satoniqui irashintajiaquempari. Irirajiaqueea igonorojia arimpaqueea iquishoshirenta-jianaque.* ⁸ Ariqueea itioncacojiquero coramani ocanque:

“Aapani Irioshi imaguempishirentacaitsijigari.

Yoquijatacaitsivetari, teequeea irinejantajiguemparoji.

Iguempitatacaitavetari, teequeea inquemantemparoji.

Icocaniquea iquempejiaca coramani arejevaetanacaquea imaica.”☆

⁹ Aisa icanque Taavini:

“Irishecashecaivequempaguete irivaracajiterita ontsatojiguerita.

Intivativaitempata, onquejetacaajemparita icatsimavecaca.

¹⁰ Impeacaitsijitemparita teeca iramenimateji.

Omititsatacaaguitemparinita yantaguishequeca.”☆

Aapani Irioshi ishetacojiaqueriquea teeca irijorijoigueji

¹¹ Imaica noncanque: Iroosacanica ariqueeate iquempejiacaguete imaica joriojia teequeea irinintajigueji intsaroventajiaquempari, ¿arite yovashiantamajajianaqueri Aa-pani Irioshi aatonijite ishetacojiguiritsi? ¡Teequeate! Arimpaqueea iquempejiacaguete imaica teequeea intsaroventajiguempariji irootaquequeea ipitsocashitantajiacarica itsi-papae teeca irijorijoigueji irishetacojiaqueriniji cameetsaniji irinintajiaquenijite jori-ojia impitsocashijiaquempari inquejetsijiajempariqueea iriatimpajia aisa incavintsaja-majajiaqueri irishetacojiaquerinijite. ¹² Oraqueea teequeea intsaroventajiguempariji iri-atimpajia joriojia, irooqueea oshimerancantapojaca icavintsajamajaqueriquea maasano caquinteguetatsica. Aisa inintaveca Aapani Irioshi incavintsajamajajiaquerimequeea joriojia, irishetacojiaquerimequeate, cotanquitsiquea teequeea irinintajigueji, irootaque-queea oshimerancantapojacaca icavintsajamajaqueri teeca irijorijoigueji ishetacojia-queri. Oquempetaca imaica oshimerancantapojacaroqueea icavintsajamajajiaqueri teeca irijorijoigueji, jiroompaqueate intsaroventajiaquempariguete iriatimpajia joriojia, caavi-jiquea oshimerancantamajaquemparoqueea incavintsajamajaqueriqueate iroshequiama-jatatiguenimaja!

¹³ Cotanquitsiquea piconoagarantajiacaquea teeca aviguentijia joriojia. Imaica non-inque noncantajiaquempi iriguenti tigarancaquenaqueea Aapani Irioshi noanaquequeea nontsavetantimojiaqueri pignonorojia, irootaquequeea noshineventantacaroca nosav-icaventamajatantacaroca, ¹⁴ namenaquetari aricaqueea iramenajiaquempiquea no-gonorojia pitsaroventajiacari Quirishito aviatimpajia, ariqueea irinintajiaque impitso-cashijianaquempari Aapani Irioshi incavintsajamajajiaquerija iriatimpajia aisa, cameet-saniji inquempejianajempinijite aviatimpajia irishetacogarrantajiqueri. ¹⁵ Oquempetaca imaica oshimerancantacaroea icatsimajiaqueriguete Aapani Irioshi joriojia irio-queea ipitsocashijianaca teeca irijorijoigueji imeshiajiaqueri, arimpaqueate intsaroven-tajianaquempariguete joriojia caaviji oshimerancantapojajemparoquea irishineventa-jiaquempariqueea Aapani Irioshi iriatimpajia aisa, irishetacojiajeriquea. Iroaquer-aguete quempetacatari manaca imetojajiaveca, cotanquitsiquea irimeshiajiaqueriguete

* 11:7 Pamenero 9.32: “¿Queroqueea ocoani teeca irishineventajiguempariji Aapani Irioshi? Manaqueea yaventaven-tacaroea itioncacojanaquea Moishishini inintajiaveca irinetsanamajajiaqueromequeea cameetsanijite irishin-eventajiaquempariniji Aapani Irioshi, teequeea iro irinintajigueji iraventaventaquempariqueea Quirishito, icomiji-acariqueeate. Irootaquequeea itsavetacotantajiacarica Quirishito iquempetacaajicari mapi tivatantatsica.” ☆ 11:8 Ireo. 29.4; Is. 29.10. ☆ 11:10 Sar. 69.22-23.

ariqueate onquempetaquempa ipochajianaji. ¹⁶ Nonquejetacaguempiroja irojocagaran-tajitenerigueti Aapani Irioshi capichase ose pan iroquetica impecaajitempaca, iramenajiqueroquea maasanose irashintacoquemparo Aapani Irioshi. Ari oquejetaca aisa irashintacoquemparogueti Aapani Irioshi ovarishitsa inchato, maasanoshimpoqueja irashintacoquemparo.†

¹⁷ Irireaquea joriojia teeca intsaromentajiguempariji manaqueate iquempejiacarouquea ojempequipae orivo ometojajempequitigueti icaratsijitarouquea ipishonquitajitaro. Iroompaquea yaashitsijitarouquea orivojempequiniro yovinchaquitsitantajitajaro cameetsaniji anijacaavajeroniji ojaviare. Cotanquitsiquea maasano aviatimpajia teeca pijorijoigueji, manaquea piquempejiacarou orivojempequiniro yovinchacantajitarogueti metojajempequivetanquitsica. Aviguentiquea ipitsocashijiaja Aapani Irioshi ishetacojiajimpiquea, yanijacaashirentajiaquempi aviatimpajia, teetari intsaromentajiguempariji joriojia. ¹⁸ Cotanquitsiquea inchiquiojita pisemejiguitsijate pamenajiaque panaajiaque-riquea iriatimpajia, aviguentijiaquea ishetacojiaqueca Aapani Irioshi. Pisemejiaquegueti iintsija pinquenquejajigueroja iriquetiquea tsaromentacari coramani Averaameni, irooquea oshimerancantantacaroca pitsaromentajiacari aviatimpajia imaica, teequea aviquetica tsaromentajiguemparine. Pameneja orivo teequea irooquea anijacagueroneca ojempequi, iroguenti anijacaguiroquea ovarishitsa.

¹⁹ Iroompaquea arica pincante: “Picantamajataque, cotanquitsiquea icatsimajiaqueri Aapani Irioshi joriojia teeca intsaromentajiguempariji, naroguentiqueate ipitsocashijiaji irishetacojiaje, quempetaca icarajitirogueti metojajempequivetanquitsica irooqueate iquejetacaantajitajaro yovinchacantajitajaroquea orivojempequiniro.” ²⁰ Arimajatarite, cotanquitsiquea teequea incatsimatashijiguempari Aapani Irioshi intati, iroguentiquea icatsimatantajiacarica yamenaqueriquea tee iraventempariji. Aviatimpa manaquea paventajianacari, irootaquequea ishetacotantajiaquempica. Jero noncantantaquempica imaica aatoja pisemejiguitsija, manaquea pintsarouajiaque. ²¹ Iquejetacarogueti Aapani Irioshi orivojempequimajaca icaratsitaro, ¿arimpate aato iquejetacaitarotsi orivojempequiniro? Aviguentijia ocantacoque piquejejiacarou orivojempequiniro.

²² Iintsija pamenejate intati. Caaviji icavintsajantamajati Aapani Irioshi, cotanquitsiquea aisa caaviji incatsimajiaqueri covaeguisherijia. Irootaquequea icatsimatantajiacarica joriojia tivashirempojatsica, aviatimpa manaquea icavintsajamajaquempiquea, cotanquitsiquea pincoquempanija pintsaromentamajatanauemparija cameetsaniji incoquempaniniji incavintsajamajaquempiquea. Oraquea aatogueti piquempetirotsi imaica, incatsimaquempiquea aviatimpa aisa, pinquempetaquemparoquea metojajempequiro icarajitica. ²³ Iriatimpajiaquea aatogueti icancani iquenquejajiaji: “Aato naventari”, iriraquea Aapani Irioshi inconoacaantsijiajempariquea irapijoriojiate tsaromentajiacarica, onquempetajemparo ivinchacantajitajaruogueti ojempequi inchato, yagavejaquequea iriatimpa irivinchacantajiajempari. ²⁴ Pinquenquejajeroja orivojempequiniro, yaajivaequitiroquea ontaniqui otsoroashitanacagueti, yamajiro ivinchacampojarou orivomajaca iniganquitejirequi. Imaica iramanajerogueti ojempequimajaca icarajivetacaca choocatiraja teequea ometojamajateji, taampina iraitsitemparou irivinchacantajemparo ashimajaca ova. Quempeca aviatimpa ariqueate ishetacotimpiquea Aapani Irioshi itsipatacaajiaquempiri maasano tsaromentajiacarica, iri-ompaqueate joriojia intsaromentajiaquemparigueti caaviji intsipatacaantajiaquempari igonoroujia tsaromentajiacarica coramani.

Ishiraerijia iraventajianajempari Aapani Irioshi

²⁵ Imaica, napitsaromentarijiate, noninque pintsajiaqueroquea teeca intsajivetemparou coramani cameetsaniji aatoniji pisemejiguitsi pincantajiaque pitsajigui. Iconoagarantajiaca ishiraerijia iquishoshirentajianaque, cotanquitsiquea oncoramanitapojajegueti intsaromentajiaquemparigueti maasano teeca irijorijoigueji tsaromentajianquitsineca, ariquea aato iquempejiaja imaica. ²⁶ Onquempetanaquempagueti imaica

† 11:16 Capichase ose ocantacoqueri ivaesatiniteni joriojia iriquetinica tsaromentajiacarica Aapani Irioshi, maasanose ocantacoqueri ichoviquijianaqueca iriatimpajia. Ari oquejetaca ovarishitsa inchato ocantacoqueri ivaesatiniteni joriojia.

ariquea irishetacojiqueriquea maasano ishiraerijia, ariquea ocanque Tioncarentsima-jaca:

“Incoraquetaque Ompetantatsica irisotoantapojemparo Shionequi, irovashiantacaajipojajeri icovaeguishejiacagueta ichoviquijiani Jacovo.”[☆]

²⁷ “Irootaquetari nocantajiaquerica nonetsanajiaquenerica noshetacojiaquerigueta igovaeguishere.”[☆]

²⁸ Irirajia nogonorojia joriojia tee irinintajivajero Quenquetsatsarentsi Oganejencatatsica irootarite icatsimatimentantacarica Aapani Irioshi, cotanquitsiquea imanintaquerogueti irooquee amishiretantajimpica aviatimpajia teeca pijorijoigueji itsavetantimojitaquempitotari. Cotanquitsiquea iroorijite icoguiacovaequeri ivaesatiniteni irashintajiaquempariniji, icocaniquea ipintsajajari. ²⁹ Aritarite aatoquee icantashitajiarotsiquea Aapani Irioshi icanqueca. Taaca opaji irojocajiacaji aatoquee yaapitsajiajajirotsi. Ariquea oquempetaca quericaca icajemashirentajiaqueca aatoquee icantiritsi: “Teetari noncajemempinica.” ³⁰ Oraquee coramani aviatimpajia teequee pinquemisantajiavetempariji Aapani Irioshi, cotanquitsiquea iriatimpa ipintsatacomajaquempiquea imaica, yamenajiaqueritari joriojia teequee inquemisantajigueriji. ³¹ Ariqueate iquempajiac iriatimpajia imaica teequee inquemisantajigueriji, cotanquitsiquea oncoramanitapojajegueta impintsatacojiaquempariquea Aapani Irioshi inquempetacaajiaquempiquea aviatimpajia ipintsatacojiaquempigueta. ³² Yamenajiaqueriquea Aapani Irioshi icovaeguishejiaca maasano caquinteja, teequee inquemisantajigueriji, irootaquequee icantantacaca: “Ari icojiaca maasano caquinte.” Manaquee iquempetacaajiacari imaica cameetsaniji impintsatacojiaquemparinijite maasano incavintsajajiaqueri.

³³ ¡Jeejeguitatsi, caaviji icavintsajantamajati Aapani Irioshi!

¡Caaviji itsamajati, itampaticamajatiro maasanopae!

Aatoquee atsajiguirotsi iquenquejaguetica iriatimpa, ariquea oquempetaca aisa aatoquee atsajiguetsi quero icotani iriatimpa.

³⁴ “¿Quericampate tsatiroca iquenquejaguetica Aapani Irioshi?

¿Quericampate agavejanquitsineca intsatacaqueri?”[☆]

³⁵ “¿Quericampate agavejanquitsineca irojocaqueneriquea taaca opajitapae cameetsaniji iroguipiantajate iriatimpa?”[☆]

³⁶ Maasanoquee yamenajiguetica iriguenti peacaaguecaro, aisa iriguenti tampishitacaaguetrooquee, iriotaquequee ashintaguecaroquee maasanopae.

Irioshiatsi antsaromentamajatempaca, ancoguitempaniquea ancantajiaqueri: “¡Caaviji poganejencamajataca!” Ari oncoquempa.

12

Pimpaquerija Aapani Irioshi pitsino

¹ Imaicaquee imaica, napitsaromentarijateni, aritaquequee ipintsatacojiaquempica Aapani Irioshi, irootaquequee nocantantajiaquempica iintsishiatsi pimpaquerija pitsino, pinquejevequempariquea viratsi imetajajiquenerica, cotanquitsiquea aviatimpajia panijimojianajiri, pincomajamajaventanajempari pishinetacaajemparinijite, irootarite pintsaromentashirentantamajaquemparica. ² Aatoja piquejejajaritsijate choocajanquitsica imaicatica quepatsiqui, manaquee piroaqueraquenquejanetanaje pincantashitatanajempaca, cameetsaniji pintsajiaqueniji oganejencaropae inintaguetica Aapani Irioshi, iroguentitari shinetacaantatsica, oganejencavaeca.

³ Iriaquea Aapani Irioshi icavintsajaquea inintacaaquenaquee nontsavetantimojiaqueri maasano, irootaquequee imaica nocantantajiaquempica aatoquee pise-mejiguetsi pincantajiaque: “Nanaaqueri itsipapae”, manaquee iroquetiquea pamenamajaquempa apaniropae quero picojiacani cameetsaniji pintampaticamajaqueroniji poaqueroquee. Irooquee pamenaquempa quero picojianacani yagavejacaquempigueta Aapani Irioshi paventajiaquemparigueta: irooca pitampishitashimajatanaquero paventacarigueta, irooca mana paventavetaquitari capichaji. ⁴ Quempetaca aatimpajia chooca

☆ 11:26 Is. 59.20. ☆ 11:27 Jer. 31.33-34. ☆ 11:34 Is. 40.13. ☆ 11:35 Jope 41.11.

acojia, aquijajia, aguitijia, maasanopae. Teequea ariquea onquempemajatemparoquea ogonoropae, apaniropae ocantashitatiajia. Pameneroja acotsi manaquea yajiricantajicaro, oraquea oquijantsi manaquea yamentantajicaroquea, irooquea guititsi manaquea yanijitantajitaroquea. ⁵ Ariquea aquempejiaca aatimpajia tsaromentajiacarica Quirishito, acaramirincavaeveca cotanquitsiquea iriatimpa yamenajiacaji aparo achoocajiaque, aquempejiacaroquea itsino apatsinoro ocantaca, ariqueate atsipatavacajiaaca at-saromentajiacari. ⁶ Aapani Irioshi icantashitatiacaajiacaji apaniropae yagavejacaajiacaji. Taaca inintacaajiacajica iriatimpa antajiaquea yagavejacaajiacaji. Choocagueti aparo iroogueti yagavejacaquerica intsavetantero icanquerica, iintsija intsavetanteroja, cotanquitsiquea incoquempanija iraventanaquempari. ⁷ Iroogueti yagavejacaquerica iramitacotantavaequegueti, intampaticamajaqueroja iroaquerico iramitacotantavaequegueti. Iroogueti yagavejacaquerica intsatacaantantaquequea, irooquea irisavicaventaque intsatacaantantavaeque. ⁸ Ariquea oquempetaca iroogueti yagavejacaquerica intampishitacaantantaque, irooquea irisavicaventaque. Arigueti icanqueri Aapani Irioshi incavintsajajiaqueriquea irapitsaromentarijiate ni irojocagarantajiaqueneri yashintaguecaca, cameetsavaeque irojocajiaqueneriquea aatoquea itsaneapitsataritsi. Iroogueti yagavejacaquerica irijivajivaitante, cameetsaja iroaquerico. Iroogueti yagavejacaquerica impintsatacoquempariquea atsipejianquitsica, irishinevaequempaqua in-cavintsajiaquerigueti.

Quero incojiaquempani tsaromentamajatarica Aapani Irioshi

⁹ Pimpintsamajatantempaja, aatoquea pipintsatantamampega intati. Pisemaquemparoja covaeguisherentsi, quisho poaquericoja cameetsaripae. ¹⁰ Pimpintsamajaquemparijate papitsaromentarijiate ni, pinquempetacaamajaquemparija iriguentica pigonoromajaca. Pamenajiaquerijate yanaajiaquempiquea pishineventajiaquempari. ¹¹ Taaca opaji pantajiaque aatoquea peeshojiguitsi, manaquea pishineventajiaquemparoquea, pitsajiaque iriguenti pantajiaquenequeate Amajirote. ¹² Pishinevaequempaquate pincanquempa, pitsajiaquetari irinetsanaqueroquea Aapani Irioshi inintacotsijiaquempani incavintsajajiaquempiquea. Cameetsavaeque pantsipetacovaequempari taaca opaji pantsipejiaquempani, picancanija pamanapiniqueriquea Aapani Irioshi. ¹³ Pincavintsajajiaqueriquea igomajamajarejia Aapani Irioshi coguitejacojianquitsica, pojocagarantajiaqueneri icoguitejacojiacaca. Querica arejetimojiguimpica paacameetsatavaqueri.

¹⁴ Pamanacoventajiaquerijate atsipetacajiaquempani. Aatojate picantiri Aapani Irioshi: "Pincatsimatimentero", manaquea pincantsitempariquea: "Pincavintsajeri."

¹⁵ Pamenajiaquerigueti pigonoro irishinevaequempaqua, pishinevaetanaquempani aviatimpa aisa. Oraquea pamenajiaquerigueti ishimampojancaeva, pishimampojanca-cotanaquempaniqueate aviatimpa.

¹⁶ Aatoja picatsimatavacajiaatsi, cameetsaja paavacajiaquempani. Aisa aatoja pisemetimatitsi, manaquea pinconoajiaquempani teeca iranaanteji. Aatoquea piquenquejajiguitsi: "Notsamajati nocanca."

¹⁷ Querocagueti incoquempani itsipa, aatojate pipigajigaritsijate. Pincomajamajiaquempani pinchoocajiaqueniji cameetsa, iramenajiaquempanijite maasano arimajaca otampaticataque picomajamajajia teequea pamatavijanteji. ¹⁸ Arigueti pagavejaque, pivetsinantavacajiaquempani paavacamentajiaquempani. ¹⁹ Napitsaromentarijiate ni nopintsamajataca, aatoquea pipigatanta, manaquea poguijivaquero igatsimare Aapani Irioshi. Otioncatari: "Icanque Amajirote: Naro ashincaro pigmentagantsi, naroquea vegaratacaquerine." ²⁰ Irootari ocanque:

"Pamenavequemparigueti catsimaquempani taseanaque, pojoquitsitenempariquea isheca.

Irooca imire, pojoquitsitenempariquea irimireta.

Pinquempetarogueti imaica ariquea incotanaquempani ovashiventajavaetanaquempaniquea,

☆ 12:19 Ireo. 32.35.

onquempetanaquemparoquea pogataacotenerigueti ishinquireguishiqui quichagante-menquiro.”*

²¹ Aatojate pishinetirotsi agavejimpitsija covaeguisherentsi, manaquea panaanaquero, jeroquea panaantantanaquemparoca pincavintsajacotantanaque.

13

¹ Imaica noncantajiaquempi cameetsavaeque maasanojiaquea pinquemisanta-jiaquerija pimajirojiate. Ijamirincajiaque teequea inchiqiojita impeajiguempaji intati pimajirojiate. Iriguenti majirontacaacari Aapani Irioshi. ² Jero quericaca catsimatashitaquemparineca imajironcaca pigatsataquemparineca, incatsimaqueriquea Aapani Irioshi, teetari inquemisanteriqueate ipeacaavecaca imajirote. Iriatimpaquea quempetacaantanquitsineca. ³ Irirajiaquea pimajirojiate teequea irooquea inchoocatashiteji iromintsaromintsarovaequeriquea comajamajianquitsica, iroguentiquea ichoocatashijiaque iromintsaromintsarovaequeri peacaaguishetanquitsica covaeguisherentsi. Teegueti pininteji iromintsaromintsarovaequempiquea pimajirojiate, iroosacanica pinchoocajiguequeate cameetsa irishineventajiaquempinijite. ⁴ Irooguentitari ipeacaimentajiacariquea Aapani Irioshi pimajirote irinetsanjiaquempiniji pinchoocatantajiaquempaca cameetsa. Oraquea aatogueti piquemisantajiguiritsi, ariquea iroguenti pintsaroacaajiaquempariquea, teequea intati impeacaajiguempariji Aapani Irioshi pimajirojiate. Iroguentiquea ipeacaimencari incatsimajiaqueriquea peacaaguishetatsica covaeguisherentsi. ⁵ Irootaquequea noncantantajiaquempica pinquemisantamajiaquerija pimajirojiate. Aatoquea aparo piquemisantajiguiritsi aatoniji icatsimajiguimpitsi, manaquea aisa pinquemisantajiaqueri irooriji pitsajiaque inique Aapani Irioshi pinquemisanta-jiaqueriquea. ⁶ Irootaquequea povegaratantacaroca icantajitica *impuesto* * pojocagarantantajiacanarica majirontatsica pimentaquitsitepae, iroguentiquea isavicaventajiaque inintacaajiaquerica Aapani Irioshi irantajiaqueca irimajironquempa. ⁷ Povegarajigueri maasano paacotirigueti. Incanquegueti majirontatsica povegarataqueroquea icantajitica *tributo* † irooca *impuesto*, povegaraqueroquea pojocagarantajiaqueneriquea pimentaquitsite, aatoquea pipeacojigaritsi. Irirajia comajarijia, pinquenquejacameetsatacovaequeri, pinquenquetsatacoventaquerija cameetsa.

⁸ Onchoocateguete paacotanteguete aatoja pipeacotantajigui, manaquea poguipia-jeneri taampina paacoqueca. Pincoguitempani pimpintsatavacaamajaquempaquea. Aritarite quericaca pintsamajacarica irapicaquintete, jac netsana inetsanaqueroquea icantacaantaqueca Aapani Irioshi itioncacotanaqueca Moishishini. ⁹ Icantajiquerotarite: “Pimpintsataquemparija pigonoro pinquejetacaajempa pipintsataguete aviatimpa.” Iri-raquea quempetiroca imaica inetsanataqueroquea itioncacojiqueca ocanti: “Aatoja picantatsatacotantitsi, aatoja pimetojanti, aatoja paitsitantitsi, aatoja pitsojeventaritsija pigonoro, aatoja pinintsigueteritsija yashintajiacaca itsipa.” Aisa irinetsanatsiguetequeroquea ogonoro quempeguetacaroca ocativa. ¹⁰ Maasanoquea pintsamajatarica igonoro teequea querocaca incojiguerini. Irootaquequea nocantantacaca iriraquea pintsatantamajataatsica inetsanaqueroquea maasanopae itioncacotanaqueca Moishishini.

¹¹ Imaica noncantajiaquempiquea pinquempejiaquempaquea imaica, pinquenqueja-comajateroja savincaguiteripae achoocatantacaca. Aapojacaquea pintinajashirentantajianaquempaca, irooshipojitari incoraquetajate Amajirote irajiajajatajiqueate intsipatsipaitanajaji inquitequi. Oquempejitacotapojacaji imaica incoraquetantajempaca, anaqueroquea oquempejitacovetapojacajiguete iroaqueraguete atsaroventajiacariguete. ¹² Imaicaquea imaica achoocajiaquequea ocانىqui oncaviacaguete co-

* 12:20 Tsa. 25.21-22. Pinquejetaquempaguete arica incantashitatianaquempa iraventanaquempari Aapani Irioshi irishetacotajeriniji. * 13:6 impuesto. Oraquea icantajitica impuestoiroguenti icantaqueca majirontatsica irojocajiqueneri cameetsaniji irovegarataqueneri amitacojiaquerica quejearica coareta, itsipajia netsanatiroca quenavquirontsipae, maasano. † 13:7 tributo. Iroguenti quejevecaroca impuesto. (Pamenero otsapa 6.) ✨ 13:9 Irev. 19.18; Eeq. 20.13-15, 17; Ireo. 5.17-19, 21.

vaeguisherentsi iroguentica quempetaca manaca amanquimanquitacovaequequea, cotanquitsiquea irooshipojaji incoraquetajate Amajirote. Oraquea incoraqueta-jateguete ariquea iroguenti onquempetaquemparoquea asavincaguitetacojiguiguetei, aatoqueate amenajajirotsi covaeguisherentsi. Irootaquequea imaica jaame ampishoncajianajerojate maasanopae isenacajigueticapitsecacotanquitsica, irooquea asavicaventajianaje inintaguetica Aapani Irioshi, onquempetaquempaquea anquitsaatajemparo aguishorijiate tsirencanquitsica ticaavaqueroneca covaeguishtetacaajinemeca.¹³ Ancomajamajianaquempaqueate quejetaca savincaguitetacotajaji. Aatoja apeacaajjatsijate taaca opajitapae ovashiventajantaguetatsica. Aatoquea oimatitsi yomporoguijajiacaguetei ipeacaaguishejiacarogueti tiontarentsijencani covaeguisherentsi. Aatoja ashinquitatsi. Aatoja oashitirotsi manquigarentsi. Aatoja ationtajigatsi. Aatoja acatsimatavacaajigatsi, aisa aatoquea acatsimatacotsitiritsi itsipa.¹⁴ Iriguenticaquea pinquitsaatajempa Amajirote Jesoquirishito, aatoja piquenquejajiguetsi queroquea pincoqueroni pimpeacaaguishtaquemparogueti pinintaguishevecaca.

14

Irirajia teemajaca intsateji quero ancojiaquempani aventamajacariguetei Quirishito

¹ Choocaguetei papitsaroventarijiate teemajaca intsateji quero ancojiaquempani aventamajacariguetei Quirishito, cotanquitsiquea ininquequea inconoajiaquempiquea ontaniqui picapioacajigaguetei, aviatimpajia paajiavaqueriqueate aatoja picantajiguiritsija: “Teemajacatarite pintsamajateji.” ² Pamenejate iconoagarantajiacaquea icantajiaque cameetsavaeque ashecajiaquempacea taaca opajitapae: iteshipae, maasano. Itsipa teemajacaca intsajigueti teequea irishecajiguempariji iteshi. ³ Iriraquea shecajiicarica iteshi aatoquea icantajiguiritsi teeca irishecajiguempariji: “Teequea pintsateji.” Iroguetei teeca irishecatempariji aatoja icantajiguiritsi shecajiicarica: “Manaquea pipeacaaguishecaroquea covaeguisherentsi pishecatacariguetei iteshipae”, jac yashincariquea Aapani Irioshi ipeaqueriquea irijanite. ⁴ ¿Arimpate taampate aviatimpa cameetsaniji pincanqueriniji papitsaroventarite ariguetei ichooaque cameetsa aricaca tee? Iriotari ashincari Amajirote. Inchiquiojita incanqueri iriatimpa, iriotaquequea amenamajaque-riquea quero icotacani. Cotanquitsiquea inchooque cameetsa, iragavejacaqueritari Amajirote.

⁵ Oquempetaca aisa iconoagarantajiac chooca cantajiatsica: “Chooca savincaguiteri caavijica anaaque oganejencavaeca, manaquea irisavicaventajiquerojate irishineventajiaquemparinijite Aapani Irioshi.” Itsipapaequeate cantajianquitsica: “Ojamirincavaeque savincaguiteri ariquea oquempetavacaaca.” Cotanquitsiquea aviguentimpate aviatimpajia, apaniropae pinquenquejamajiaqueroquea quero pincojiaquempani cameetsaniji irishineventajiaquempinijite Amajirote. ⁶ Iriraquea cantajiatsica chooca savincaguiteri caavijica anaaque oganejencavaeca, manaquea icanque imaica cameetsaniji iroguipaquijajateronijite yantavaequeguetei irionijite irisavicavenquerinijite Aapani Irioshi irishinevenquempariquea. Ariqueate iquempetaca aisa shecajiicarica iteshi, ishecaji-acari yamenajiaquetari irooquea ininqueca Aapani Irioshi, jero icantacoguitani ishecajiicaguetei ishineventajiacari Aapani Irioshi, yamanajiaqueri icanqueri: “Ariotesaa, Aapani.” Ariqueate iquempejiaca teeca irishecajiguempariji iteshipae, yamenajiaque arica teeca irininteji Aapani Irioshi irishecajiaquempari. Aisa iriatimpajia icantacoguitani ishecajiicaguetei ishineventajiacari Aapani Irioshi icantajiaqueri: “Ariotesaa, Aapani.” ⁷ Teequea anchoocatashijiguemparoji intati cameetsaniji antajiaqueroquea taaca opaji anintajiguica aatimpajia. Ariqueate onquempetaquempa ametojajiaqueguetei, aatoquea inchiquiojita ametojimentiro anintajiguica aatimpajia. ⁸ Choocatirajajiguetei, iroguenticaquea achoocatashijiaque antajiaqueroquea inintaguetica Amajirote. Oraquea ametojajiaqueguetei, manaquea oahoaitanaque iriatimpaqui antsipatsipaipojajempari. Ariqueate oquempetaquea imaica, arica anchoocajiaque irooca ametojajiaquequea, icocani irashintajajaji Amajirote. ⁹ Imetojaquititarite Quirishito ariquea ipochatanaji

cameetsaniji impeaquempaqueeate Imajirojiate maasano tsaromentajiacarica, choocata-jatsica iriguentijia aisa metojajianquitsica.

¹⁰ Iroompaquea aviatimpaquea,* ¿quero ocotacani picantacotancarica papitsaroveritarite incatsimatimentajiterinishiatsi iquejequerogueti imaica? Aviatimpampani aisa ¿quero ocotacani pitsojencancarica papitsaroveritarite? Maasanoquea aatimpajia ancatintiitimojiaqueriquea Aapani Irioshi oncoramanitapojajegueti incantajiacaji aricaca atampaticamajajiaqueroquea ininqueca iriatimpa aricaca tee. ¹¹ Choocaquea tioncanquitsica ocanque:

“Icanque Amajirote: ‘Arimajaca nochooqaque naatimpa, maasanoquea irogueroventajiapojajena,

incantajiaquequea: Arimajacatarite aviguenti Irioshimajatatsica.’”[☆]

¹² Irootaquequea atsatantajiacaca oncoramanitapojajegueti ironigaajiacajiro Aapani Irioshi maasano agoguisherejia, incoacotsitaji maasanojia apaniropae: “¿Quero ococani piquejetancaca?”

Aatojate ativashirentacagaritsi apitsaroveritarijiate

¹³ Irootaquequea ovashiantantanajemparoca acantaguishetacotavacaavetacagueti. Manaquea pincantajigue: “Aatojate notivashirentiritsi napitsaroveritarite, ocoguishetanaqueritsi. Aatojate noticaashirentiritsi.” ¹⁴ Naatimpa notsaroveritamajatacariqueate Amajirote Jesoshi notsamajatantacaca tee onchoocateji shecatsipae covaequisheshirentacaantatsineca, cotanquitsiquea inchooqaquegueti quenquejanquitsineca: “Shoshoh ashecataritsi, icoguisheshirentacaanacajitsi”, aatoquea ishecataritsi. Irishecaquemparigueti manaquea impeacaaquempa covaequisherentsi. ¹⁵ Arigueti pishimampojancaaacari papitsaroveritarite pishecataquemparigueti iteshi icanqueca teequea oncameetsateji irishecajiquempariquea, oraquea pinquejetaquerogueti imaica, teequea pimpintsamajatempariji papitsaroveritarite. Shoshoh picovaequishetacagaritsijate iramenaquempigueti oo shecaquempi, ariquea incotanaquempa aato itsaroverentajaritsi Quirishito. Iriguentitari imetojavenaqueca Quirishito. ¹⁶ Pamenaquegueti aviatimpa cameetsavaeque pishecataquempariquea iteshi, cotanquitsiquea choocagueti itsipapae papitsaroveritarite cantanquitsineca teequea oncameetsateji pishecataquemparigueti, iroosacanica aatoquea pishecataritsi aviatimpa aatonijite icantitsi picovaequisheca. ¹⁷ Aritarite imajirontacagueti Aapani Irioshi teequea irooquea anaantamajatatatsine ashecapae irooca amirepae. Jero anaantamajatanquitsica ancomajamajaquempagueti, antsipatavacaquempaqueea cameetsa aisa aatoja ashoshoguitetatsi, manaquea ashineshirentajiavaequempa, irioquea agavejacaacajirone Ishire Aapani Irioshi. ¹⁸ Quericaca quempetemparineca imaica irantaventenerigueti Quirishito, iriguenti ishinevenca Aapani Irioshi, ariquea inquempaquempetanaquempa caquintejia.

¹⁹ Iroosacanica imaica jaameshiatsi ancomajamajianaquempaqueea cameetsaniji aatoniji acatsimatavacaajiajatsi, iroonijite amitacotavacaajiaquempaniji arimpaqueate antsaroveritamajatanaquempariquea Aapani Irioshi. ²⁰ Aatoja pipomatsatirotsi yantaqueca Aapani Irioshi ishirequi pigonoro pishecaquemparigueti icantimentantavetacaca papitsaroveritarite. Cameetsaveca pishecajiaquempariquea cantashitatiague-tanquitsica iteshipae, cotanquitsiquea oraquea pincovaequishetacaaquemparigueti papitsaroveritarite pishecatacarigueti iteshi, ariquea iroguenti teequea oncameetsateji pishecataquemparigueti. ²¹ Cameetsamajataque aatoja pishecataritsi iteshipae, irooca pimirarotsija quepishijaripae, irooca pantaguetaque taaca opajitapae pamenaquegueti ontivashirentacaanaquempari papitsaroveritarite. ²² Oraquea pamenacagueti aviatimpa

* 14:10 Icanquegueti Paavoro aviatimpaquea iriguenti icanque teeca irishecatempariji iteshipae. Icanquegueti aviatimpampani manaquea ipitsocashitari itsipa shecatarica iteshi. [☆] 14:11 Is. 45.23.

cameetsavaeque pishecataquempariquea iteshi, aatojate pisemetitsi picamantiritsi it-sipa, iriguentiquea pincamanque Aapani Irioshi. Cameetsavaeque iroquetitaja pinquen-quejamajaqueroja taaca opaji cameetsatatsica pimpeacaguempaca, ariquea pimpea-caaquemparoguete pishinevaequempaquea irooriji pintsaque teequea pincovaeguisheti-matempaji. ²³ Cotanquitsiquea iriraquea teeca intsamajate aricaca cameetsavaeque irishecaquempariquea iteshi aricaca tee, ishecatacaguete iroguentiquea icovaeguisheca, ariqueate icanque: “Aricajate teecajate oncameetsateji noshecataquempariguetei.” Aritarite taaca opaji antajiaque, ariguetei ancantajiaque: “Aricajate teecajate oncameetsateji nompeacaquemparoquea”, iroguentiquea acovaeguishejiaca.

15

Anquenquejacojiaqueri itsipajia

¹ Irootaquequea imaica aatimpajia tampishishirentajiatsica cameetsavaeque an-tampishitacajiaqueriquea apitsarorentarijiate teeca intampishishirentamajateji. Aa-toja aparo aatimpa aquenquejacotajatsi anetsanjiaquero anintajiguica aatimpajia. ² Anquenquejacotsijiguempariquea apitsarorentarijiate ancavintsajajiaqueri ashineta-caajiaquemparijate cameetsaniji arimpaquea intsarorentamajatanaquempariquea Aa-pani Irioshi. ³ Aritarite iquempetaca Quirishito, teequea irioquea quenquejacota-jatsineca iriatimpa iranquequeate ininqueca iriatimpa, manaquea iquejetacari ition-cacojiqueca Tioncarentsimajacaqui, ocanqueguetei: “Oraquea icantaguishtacojiaque-mpiguetei, naroguentiquea otiavaetapojaca.”[☆] ⁴ Maasanoquea Itioncacaantaqueca Aa-pani Irioshi manaquea itioncantajicaroca ontsatacaacaji, cameetsaniji antsipetaco-guitempaniguetei ontampishishirentacaacaji arimpaquea aguijacoshirentajianaquempa irinetsanatanquemparo ca maasanopae icanqueca paesatoniqui. ⁵ Iriotaquequea Aapani Irioshi agavejacaajiacaji antsipetacovaequempaquea, aisa irioquea shinetacaajiacajine. Noninquequea iragavejacaajiaquempiquea pintsipashirentavacaajiaquempa pinqueje-jiaquempariguetei Quirishito Jesoshi, ⁶ cameetsanijite pintsipashirentavacaajiaquempa pishineventajiaquempariguetei Irioshite Amajirote Jesoquirishito, iriotaque aisa Iriri, pincantajiaque: “Caaviji yoganejencavaeca Aapani Irioshi.”

Teeca irijorijoigueji itsavetantimojiqueri Quenquetsatsarentsi Oganejencatatsica

⁷ Irootaquequea imaica noncantantajiaquempica paavacaajiaquempajate, aritarite iquempetacaajiacaji Quirishito aatimpajia icavintsajavajaji yaavajaji. Iquempetaca-ajiacaji imaica cameetsaniji iramenajiquerinijite Aapani Irioshi caaviji yoganejenca-majataca. ⁸ Imaica noncantajiaquempiquea, coramani icoraquetaquiti Quirishito Je-soshi ocانىqui quepatsiqui ichoocatimojiaquitiri nogonorojia joriojia yamitacojiaque-riquea cameetsaniji onetsanatementaquempianiji icantajiaquerica Aapani Irioshi cora-mani choviquijiaquenaca naatimpajia joriojia iroonijite intsatimentajiquerinijite Aapani Irioshi teequea incantashitatiguemparoji icanqueca. ⁹ Icoraquetashijiaqueriquea aisa teeca irijorijoigueji cameetsaniji irishineventajiaquemparinijite Aapani Irioshi, incanta-jiaque: “Caaviji ipintsatacotantaca Aapani Irioshi.” Ocanquequea Tioncarentsimajaca: “Irootaquequea noshineventantajiaquempica nontsipatsipaitaquempariguetei teeca iri-jorijoigueji,
namashaiventajiaquempiquea.”[☆]

¹⁰ Aisa chooca otsipa itioncacojiqueroquea ocanque:

“Maasano teeca pijorijoigueji, ipishinejiaquempaja pintsipatsipaitaquempariquea igaquintejiate Aapani Irioshi!”[☆]

¹¹ Ariqueate chooca otsipa ocanque:

“Pishineventajiaquemparija Amajirote maasano teeca pijorijoigueji, maasanoqueate caquinteji pincantajiaqueri caaviji icavintsajantamajati.”[☆]

¹² Itioncaque aisa Isaiashini coramani icanque:

[☆] 15:3 Sar. 69.9. [☆] 15:9 2 Sam. 22.50; Sar. 18.49. [☆] 15:10 Ireo. 32.43. [☆] 15:11 Sar. 117.1.

“Oncoramanitapojaque irivoaque aparo ichoviquini Isaini. Iriatimpa peanquitsineca oncoramanitapojajegueti Imajirojiate maasano caquinteguetatsica.

Irirajia teeca irijorijoigueji irogujacojiaquemparija incavintsajajiaqueriquea.”[☆]

¹³ Iriraquea Aapani Irioshi iriotaquequea agavejacaajiacajica aguijacojiaquempagueti onetsanamajaquempa maasanopae icanqueca paesatoniqui inintacaitsicajica irisheta-cojiaqueca. Noninquequea iroguishinejajiaquempiquea aatoniji taaca pishoshoguiteventatsija, paventaventaicaritarite. Aisa noninque iragavejacaajiaquempiquea Ishire Aapani Irioshi aatonijite piperataro poguijacoquemparigueti.

¹⁴ Napitsaroveritarijiate, imaica tsamajataquenaquea picavintsajantamajataque, aisa pitsamajatanaquero maasanopae icanqueca Aapani Irioshi, pagavejamajajiaque pincantomajavacaajiaquempa cameetsa, aisa pintsatacaavacaajiaquempa cameetsa.

¹⁵ Cotanquitsiquea naatimpa teequea nontsarogueji nontioncajiaquempiquea quempetaca imaica noquenquejacaajiaquempiroquea nocamantajiaquempica coramani aatonijite pipeacojigarotsija. Notioncantajiaquempica imaica

icavintsajaqueate Aapani Irioshi, ¹⁶ inintacaaquenaquea Jesoquirishito nontsavetantimojiaqueriquea teeca irijorijoigueji, noquejetanacariquea saserorote nontsavetantavaequero Quenquetsatsarentsi Oganejencatatsica itigarancaqueca Aapani Irioshi, cameetsanijite irinetsanashirentacaajiaquemparigueti Ishire Aapani Irioshi iriraquea teeca irijorijoigueji, onquempevetaquempa irio namaquenerica Aapani Irioshi nojocapojaqueneri irishineventajavaquempariniji.

¹⁷ Cameetsavaeque noshinevaequempaquea namenaquerogueti yantacaaquenaca

Quirishito Jesoshi nantinirigueti Aapani Irioshi. ¹⁸ Iroguenti nonquenquet-satacoque yagavejacaquenugueti Quirishito notsaromentacaajiacariquea teeca irijorijoigueji iquemisantantajiacarica Aapani Irioshi. Iquemajaqueate nontsavetantimojiaquerigueti, aisa yamenajaqueate quero nococani naatimpa.

¹⁹ Yagavejacaquenaqueate Ishire Aapani Irioshi nonigaantantaqueroquea oacaantantatsica intati cameetsaniji intsajiqueronijite arimajaca iriguenti tigarancaquenaquea Aapani Irioshi. Noquempetaca imaica nontsavetantavaequero Quenquetsatsarentsi Oganejencatatsica tsavetacoquerica Quirishito. Nopari-apanajantaroquea Jerosarequi nontsitacaguitejavaetanaqueroqueate oraniqui arejevaequemparoquea Iriricoqui. ²⁰ Iroguentiquea noninque nontsavetanterogueti Quenquetsatsarentsi Oganejencatatsica nontsavetantimojiaqueriquea irirajia tequeratataca inquemacotimateriji Quirishito aatonijite iriguenti nosavicaventajiguetsi nontsavetantimojiaqueriquea irirajia itsavetantimojiqueca. ²¹ Iroguentiquea noninque onetsanamajaquempa ocanqueca coramani Tioncarentsimajaca ocanque:

“Inquemacojiaqueri teeca inquemacojiavetempariji, intsajianaque teeca inquemacotimajiavetempariji.”[☆]

Paavoro inintaveca iroanaquemequeate Iromaquiniqui

²² Nontsavetacotimojiaquerigueti itsipapae, irooquea tempajacaquenaquea, nonintagueveca noanaquemequeate namenajajatepimequeate. ²³ Cotanquitsiquea imaica nontsitacajiaqueriqueate nontsavetantimojiaqueriquea guintenijatsica ocaniqui. Nococaniquea nopintsataca namenajajatempiquea. ²⁴ Ariqueate noanaquegueti Esepañaqui noninque narejetimotapanajantempi. Aapojempagueti noncoraquequegueti oraniqui namenajapanajantempiquea noshinevaequempa noncanquempa amenavacaajiaquem-paqueate. Iroompaquea navisanaquegueti Esepañaqui noninque poavoquijiaquite-naqueate, arica pagavejajigue pojocajavaquenaqueate nocoguitejacovaecaca.

²⁵ Cotanquitsiquea imaica iroquetiquea narejetapanajantemparoquea Jerosarequi, namitacojiaqueri apitsaroveritarijiate guintenijatsica ontaniqui.

²⁶ Icapiocajiaqueneritari Maseroniaquitica aisa Acayaquitica imentaquipae itigarancacaantajiaqueneriquea apitsaroveritarijiate coguitejacovaetanquitsica guintenijatsica ontaniqui Jerosarequi. ²⁷ Iriatimpajia teetari irio joriojia cotanquitsiquea iquenquejacojiaqueriquea iramitacojiaqueri joriojia tsaromentajatsica, yamenajiaqueriqueate irioquea joriojia tsavetantimojiaqueri icamanqueriquea quero

[☆] 15:12 Is. 11.10. [☆] 15:21 Is. 52.15.

incojiaquempani irishetacojiquerigueti. Inintantajianacaca iraagarantajiaquequea yashintajiacaca iriatimpajia intigarancacaantajiaqueneriquea. ²⁸ Irootaquequea imaica noantanaquempaca Jerosarequi nojocajapanajantenerija, iroompaquea nontempajantanajemparo Esepaña, ariqueate namenajapanajantempiquea pichoocajiaquegueti. ²⁹ Notsamajaquequea noncoraquequegueti oraniqui incavintsajamajaquequea Quirishito iragavejacaquaqueate nontsavetantimojiaquempiqueate cameetsaniji ashinejiaquempaniji.

³⁰ Napitsaroveritarijiate, aviatimpajia pitsaroveritarijiate Amajirote Jesoquirishito, aisa yagavejacaajiaquempiquea Ishire Aapani Irioshi pipintsajiaquenaquea. Noncantantajiaquempica imaica nonintamajataque pamanacoventajiaquenajate. ³¹ Pincantajiaqueneriquea Aapani Irioshi irompetaquenaqueate aatonijite queroca icojianatsi Joreaquitica teeca intsaroveritarijiguempariji, aisa cameetsanijite irajiaquaquerinijite imentaqui namajiaquenerica apitsaroveritarijiate Jerosarequitica, ³² cameetsaniji iroompaquea iriogueti nintanquitsineca Aapani Irioshi narejevaequempaquea oraniqui noshinevaequempaquea namenajiaquempigueti, ariqueate ashinetacaavacaajiaquempaquea. ³³ Imaicaquea noninque maasano aviatimpajia quisho iroaroaitanaquempi Aapani Irioshi, iriguentitari choocatacaajiacajica cameetsa aatoniji ashoshoguiteta. Ari oncoquempa.

16

Paavoro iquenquejacojiaqueri irapitsaroveritarijiate guintenijatsica Iromaqui

¹ Aricaca pamenajiaquaqueroquea oratica apitsaroveritarijiate Peve arejetaquempagueti oraniqui. Iroatimpa iroguenti amitacopinijiguirica tsaroveritarijatsica capiocapinijatsica Senquereaquei. ² Cameetsaja paajiaquaquerojate ariqueate oquempajiaquempiquea aviatimpajia otsaroveritarijigueti Amajirote. Pinetsanajiaquaqueroja, aviguentijatarite tsaroveritarijatsica. Pamitacojiaquaqueroqueate, aisa pojocajiaqueneroquea taaca opaji oncoguitejacoquempaca. Ariqueate oquempetaca iroatimpa amitacotantavaeque, amitacotanaquenaqueate naatimpa aisa.

³ Pincantajiaquaqueroquea Pirishira* aisa irira Aquira noquenquejajiaqueri cameetsa ichoocajiaque. Iriguentijia notsipatashijiacaca coramani nantavaequenerigueti Quirishito Jesoshi. ⁴ Ipajiavetanacaroquea imetojane aatonijite naroguenti metojatsi, irootaquequea imaica noshineventantajiacarica nocanca, cotanquitsiquea teequa aparo naatimpa noshineventajiaquempari ishineventajiacariquea aisa maasano tsaroveritarijatsica teeca irijorijoigueti capiocapinijatsica osamanipaequitica.

⁵ Pincantajiaqueri aisa noquenquejajiaqueriquea apitsaroveritarijiate capiocapinijatsica itsovironaquitequi. Noquenquejajiaqueri aisa nopintsatacaca Epeneto iriquetica tsaroveritarijatsica Quirishito ontaniqui Ashiaqui.

⁶ Pincantajiaquaqueroja aisa Maria noquenquejajiro, namenaquequea antavaeque amitacojiaquempiquea aviatimpajia.

⁷ Noquenquejajiaqueri nogonorojia Anteronico aisa Joniashi itsipatacaantajiaquenaca coramani isantanatacojitaquenagueti. Iriatimpajia iriquetica tsaroveritarijatsica Quirishito tequeratagueti nontsaroveritarijiguempariji naatimpa. Maasano itigarancanejia Quirishito ipintsamajiacariqueate icancani ishineventamajatacari.

⁸ Pincantajiaqueriquea aisa Ampiriato noquenquejajiaqueri, iriguenti napitsaroveritarijiate nopintsamajacari.

⁹ Noquenquejajiaqueri aisa Orovaano, notsipatashijiacaca coramani nantavaejiaquenerigueti Quirishito Jesoshi. Noquenquejajiaqueri aisa nopintsamajatacaca Esetaqui.

¹⁰ Noquenquejajiaqueri aisa Apereshi. Iriatimpa yatsipevaeca cotanquitsiquea arimpaquea itampishitanaquequea itsaroveritarijatsica Quirishito. Iriguentijia aisa choocatimojiaquericarica Arishitovoro noquenquejajiaqueri.

¹¹ Pincantajiaquerija aisa Eroriono noquenquejajiaqueri, iriguenti nogonoro. Iriguentijia aisa choocatimojiaquericarica Narishiso tsaroveritarijatsica Amajirote pincantajiaquerija noquenquejajiaqueri.

* 16:3 Pirishira aisa opajita Pirishica. Pamenero 2 Ti. 4.19.

¹² Noquenquejaquero aisa Tiripena aisa Tiriposa antajiguinirica Amajirote.

Noquenquejaquero aisa Perishira apintsamajajiacaca. Ariquea oquempetaca iroatimpa antavaequeneri Amajirote.

¹³ Pincantajiaqueri aisa Iropo icoguiaqueca Amajirote noquenquejaqueri. Ariquea oquempetaca iriniro iroatimpa noquenquejamajaqueroquea, oquempetacaamajaquenaquea naroguentica ashimajaca irijanite.

¹⁴ Pincantajiaqueri noquenquejajiaqueri aisa Ashinquirito, Peregonte, Eremeshi, Paterova, Eremashi, iriguentijia aisa apitsaroveritarijiate tsipajiacarica.

¹⁵ Noquenquejajiaqueri aisa Pirorogo aisa Joria, iriguenti aisa Nereo aisa itsijoite. Noquenquejaqueri aisa Orimpashi iriguentijia aisa maasano apitsaroveritarijiate tsipajiacarica.

¹⁶ Netsana pinintavorotavacaavaquempa.† Maasanoquea tsaroverentajiacarica Quirishito capiocapinijsica inintajiaque pinquemacojiaqueriquea choocajia iquenquejajiaquempiquea.

¹⁷ Imaica napitsaroveritarijiate, noncantajiaquempi shoshoh yamatavijajiguimpit-sijate itsipa tsatacantajiguiroca teeca onquempetemparoji notsatacaajiaquempica naatimpa aisa itsipajia tsavetacotantajiaquerica Quirishito. Pinquemisantajiaquerigueti iriatimpajia ariquee pincojianaquempaquea pincatsimatavacaajiaquempaquea iroompaquea pintsinampirejavacaajianaquempa aatoquea pitsipatavacaajatsi. Aatoja piconoajigaritsija. ¹⁸ Iriatimpajia teequea irioquea irantajigueneci Amajirote Jesoquirishito, iroguenti isavicaventajigui taaca opaji inintajiguica iriatimpajia. Iquenquetsavijitanaque cameetsaja itampaticamajaveca ariquee yamatavimatavivaequeri teeca intsamajajigueji. ¹⁹ Maasanoquea iquemacojiaquempi piquemisantamajataque, irootaquequea noshineventantajiaquempica, cotanquitsiquea noninque pintsamajajiaquequea cameetsaniji ponigaantajiaqueronijite inintaguetica Aapani Irioshi. Oraquea taaca opaji covaeguisherentsi irooquea iroguenti aatoja piquenquejajiguitsijate. ²⁰ Pinquempejiaquempaguetei imaica, iriraquea Aapani Irioshi choocatacaajiaajica cameetsa caarica ashoshoguitetanta incatimatsitempiquea iragavejacaajiaquempi pagavejajiaquerinijite Satanashi, onquempetaquempa pagaticanaqueri impotsocanaque. Imaica noninque incavintsajavaequempiquea Amajirote Jesoquirishito.

²¹ Iriiraquea Timoteo notsipatashitaca nantiriniriguetei Amajirote ininque pinquemacojiajeri iquenquejajiaquempi. Ariquee iquempejiaca nogonorojia Iroshio, Jasoni aisa Soshipatero iquenquejajiaquempi.

²² Ariquee noquempetaca naatimpa noquenquejajiaquempi. Naroguenti papitsaroveritarijiate nopajitaca Tereshio. Naroguenti tioncavaqueneriquea Paavoro icanqueca ocaniqui paperiqui.

²³ Iquenquejajiaquempi aisa Gayo nomaimoqueca, iriotaquequea imaimojiguica maasano tsaroverentajiatatsica avisavisaitatsica ocaniqui. Ariquee iquempetaca Erashito iriatimpa iquenquejajiaquempi. Iriguenti *tesorero* amitacotirica majirontatsica guinteninintsiqui, inetsanaguetaqueneri imentaqui icapioajiguica guintenijiatsica ocaniqui ashi irinetsanatantaquemparoica iriguinteninintantajiaquempaca. Aisa apitsaroveritarijiate Coareto ininque pinquemacojiaqueri iquenquejajiaquempiquea.

²⁴ Imaica, napitsaroveritarijiate, noninque incavintsajamajaquempiquea Amajirote Jesoquirishito. Ari oncoquempa.

Ashineventajiaquempari Aapani Irioshi

²⁵ Imaicaquea imaica jame ashineventajiaquempari Aapani Irioshi, iriotaquequea agavejanquitsineca intampishitacaantajiaquempiroquea Quenquetsatsarentsi Oganejencatatsica camantajiacajica quero icotani iriatimpa ishetacotantiguetei. Irootaquequea notsavetantica naatimpa notsavetantiriguetei Jesoquirishito. Aisa irootaquequea yonigaimojiacajica Aapani Irioshi imaica. Iriatimpa icocani inintacotsijiacaji coramani irishetacojiaajaji, cotanquitsiquea teequea intsajivetemparoji. ²⁶ Imaicaquea imaica

† 16:16 Netsana pinintavorotavacaavaquempa. Yamejiaca coramani inintavorotavacaajivaca yamenavacaajiacaguetei, ari iquejajiacarica tsaroverentajiacarica Quirishito coramani.

jeroquea itsatantajicaroca, onigaacajiroquea itioncacojianaqueca coramani tsavetanta-
jiatsica, iriotaquequea cantanquitsica Aapani Irioshi onquempetaquempaquea imaica.
Iriatimpa icoguitani ichoocaguitini coramani tequerataguete onchoocagueteji, aisa inco-
guitempani inchoocaguiteni. Icanque onquempetaquempaquea imaica cameetsanijite
ontsitacaguitejavaetanaquemparoniji jmm inquemajiaquenijite maasano caquintegue-
tatsica, cameetsaniji incaramirincajiaque iraventaventaiquempari inquemisantajiaque-
riquea. ²⁷ Iroosacanica imaica iintsijate incoquempani irishineventajiaquempari Aapani
Irioshi, aparo icota iriatimpa itsamajati, irioquea Jesoquirishito amenacaajiaquerineca
maasano arimajaca caaviji yanaaque yoganejencamajataca. Ari oncoquempa.

PAAVORO ITIONCAJIAQUENERI CORINTOQUITICA

Antsatantaquemparoca

Ocatica iroguenti antsatantaquemparoca iroquetica itioncacaantaqueca Paavoro itioncajiaquenerigueti tsaromentajiacarica Jesoshi choocajianquitsica guinteninintsiqui pajitatsica Corinto. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueti itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanicarica. Irocashi itioncacotaqueri irira Paavoro otsipaquei paperiqui (Ya. 7.57–8.1; 9.1–31; 13.1–28.31), aisa itioncacotaqueri ichooaquegueti Paavoro Corintoqui otsapaquei Ya. 18.1–18. Tequeratagueti intioncacaanterioroji ocatica Paavoro itioncacaanquero otsipapae mavite paperi itioncajiaqueneri choocajianquitsica guinteninintsiqui pajitatsica Tesaronica. Paavoro icamantaqueri amitacoquerica intioncajiaquenerica Corintoquitica. Itioncacaantaquero ocatica paperi ajagantsini irooca 54 irooca 55, otsipatapojacagueti iquenaguetanaquegueti quepatsipaequi itsavetantavaequerigueti Jesoquirishito. Itioncacaantaquero gueti Paavoro ocatica paperi ichooaque guinteninintsiqui pajitatsica Epeso (16.8; Ya. 19).

Ocaniqui paperiqui itioncacaantaqueca Paavoro itsatacaajiacaji aatimpajia tsaromentajigarica Jesoshi quero ancojiaquempani anchoocajiaquegueti. Yoguisotoajiaqueneri icoacajiaquerica Corintoquitica itioncajiaquenerigueti. Icoacajiaqueri quero incojitaquempani irimanquigajitempagueti (capitolo 7), quero incojitaquerini iteshi yojocajitinerica irioshivijirentsi (cap. 8), aisa quero incojiaquempani intsatantajiaquemparoca cantashitatiaguetanquitsica yagavejacaajiaquerica Ishire Aapani Irioshi apaniopae tsaromentajiacarica (cap. 12–14). Itsatacaajiaqueri quero incojiaquempani incapiocajiaquenerigueti imentaquitsitepae itigarancacaantajiaquenerica coguitejacojianquitsica quemisantajiaquerica Jesoshi choocajianquitsica Jerosarequi (cap. 16). Aisa icantomajajiaqueri quemisantajiatatsica Corintoqui yamenaquerigueti mana itsinampirejavacaajanaca tee intsipatavacajajempaji (cap. 1–3), aisa yamenaquerigueti choocajianquitsica Corintoqui teequea incantomajajigueriji irapiguemisariteni icovaeguishetacagueti (cap. 5). Icantomajajiaqueri aisa yamenaquerigueti icatsimatavacaajiacagueti teequea irivetsinantavacaajajempaji, irioquea yaventajianaca joesepae teeca intsaromentajiguempariji Jesoshi (cap. 6). Otsipaquea icantomajimentajiaqueri yantajiaqueca teeca oncameetsateji incapiocajiacagueti (cap. 11). Paavoro itsatacaajiaqueri quero incojiaquempani quemisantajiatatsica, inquejiaquempariquea itigarancanejia Jesoshi (cap. 4), aisa icamantaqueri inquejiaquempari iriatimpa (cap. 9), aisa iquenquejacaajajiri ishiraerijia quemisantajiaquerica Aapani Irioshi coramani (cap. 10). Aisa iquenquejacaajajiri Quenquetsatsarentsi Oganejencatatsica tsavetacoquerica Jesoshi (cap. 15).

¹ Naroguenti Paavoro itigarancane Jesoquirishito, iriotari nintacaaquena Aapani Irioshi. Iriguenti notsipataca apitsaromentariteni Soseneshi. ² Imaica nonintaque nontioncajiaquempi aviatimpajia choocajiatatsica Corintoqui tsaromentajigarica Aapani Irioshi. Inintacajiaquempi pintsaromentajiaquempari Quirishito Jesoshi cameetsanijite irashintamajiaquempiniji. Aisa inintacajiaquempi povashiantajianaquero maasano teeca oncameetsateji irooqueate pisavicaventajianaje maasano inintaguetica iriatimpa, pintsipajiaquempari maasano choocajiatatsica osamanipaequitica aventajigarica Amajirote Jesoquirishito. Iriatimpaqueate iriguenti irashijia Imajirojiate, aisa iriguentiqueate ashijia Amajirojiate maasano aatimpajia. ³ Namanacoventajiaquempiqueate incavintsajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoventajigaro taaca opajitapae.

Paavoro ishineventacari Aapani Irioshi yamenaquegueti icavintsajajiaquerigueti Corintoquitica

⁴ Nocancaniquea nocanqueri Aapani Irioshi, “¡Arioteesa!”, namenaquegueti icavintsajajiaquempi aviatimpajia, pitsariventajiacaritarite Quirishito Jesoshi. ⁵ Piquemisantajiaqueriquea irootaquequeate yagavejacaantajiaquempica piquenquetsajiaquegueti aisa pitsajiaquegueti. ⁶ Pitsajiaquetarite arimajaquea nocantamajataque notsavetanquerigueti Quirishito noquenquetsatacaajiaquempigueti iroaqueragueti. ⁷ Irootaquequeate tecatsi coguitejacojiaquempine pishirequi yagavejashirentacaajiaquempigueti Aapani Irioshi pantajiaqueneriniji poguijajavajirigueti ironigaantajajempaca Amajirote Jesoquirishito. ⁸ Iriatimpaqueate igantagaquea intampishitacajiaquempi aatonijite povashiantajianajirotsi pitsariventajiacarigueti, aatonijite ochoocati querocaca incantomajimentajiaquempica Amajirote Jesoquirishito savincaguitariqui incoraqueantapojajempaca. ⁹ Iriira Aapani Irioshi igantagaqueate inetsanatiro icantaguequeca, iriotaquequea cajemajiaquempica inintacaaquempiri pintsariventajiaquempari Irijanite, irootaquetari pitsipamajatantajianacarica Amajirote Jesoquirishito.

Icantajiaqueri: “Pinquemavacaajiaquempaja”

¹⁰ Imaica, napiguemisantarijiate, noncantajiaquempi quejetaca iriguentica cantanquitsi Amajirote Jesoquirishito, pinconoavacajiaquempa pintsipatavacamajiaquempica, aatoqueate picatsimatavacaajiatzi mana pinquemavacaajiaquempa. ¹¹ Manaqueate noncantajiaquempi imaica, napiguemisantarijiate, noquemacojiaquempitarite picatsimatavacaajiaica, icamantajiaquenatarite oconogaca Coroe. ¹² Apaniropae picantajiaque: “Naatimpa iriguenti noquemisantaque Paavoro.” Itsipaqueate mana icantajiaque intati: “Iriguenti noquemisantaque Aporoshi.” Itsipaqueate mana icantajiaque: “Iriguentiqueate noquemisantaque Sepashi.”* Itsipaqueate cantajianquitsica: “Naatimpa iriguentiqueate noquemisantaque Quirishito.” ¹³ ¿Arimpate ivorocacampate Quirishito irootaquequeate piquejetantajiacaroca imaica? ¿Arimpate naroguenti yompajacajitaqueca nometojaventajiaquempi naatimpa Paavoro? ¿Arimpate poviñacajatacaantajiaica ivajiroqui Paavoro? ¹⁴ Noshinevencari Aapani Irioshi namenaquegueti tee noviñacajajiaquempiji naatimpa, iriguentiqueate apaniro noviñacajataque Quirishito, jeri aisa Gayo. ¹⁵ Irootaquequeate aatoqueate quericaca cantashitatsine mana iviñacajatahajitaqueri impampiatacoquenaniiji naatimpa. ¹⁶ Aisa noviñacajataqueri Esetepana jerijia iconoajiacaca itsovironaquitequi. Arigueti noviñacajataqueri itsipa tee nonquenquejajeroji. ¹⁷ Teenicate iroguenti intigaranquimentenaji Quirishito noviñacajatacaguiteni, iroguentiqueate itigaranquimenquena nontsavetantero Quenquetsatsarentsi Oganejencatatsica. Cotanquitsiqueate nocamantajiaquerigueti, tee nontsatacageriji iquenquejaguetaqueca intati caquinteja. Iroomegueti nontsatacaquerime iquenquejaguetica caquinte, aatome yaventajigarime Quirishito metojaventajiacajica coroshiqui.

Aapani Irioshi caaviji itsamajati, yanaajiaqueri maasano tsajivetsica

¹⁸ Oraqueate atsavetanquerigueti Quirishito imetojaventajiacajigueti coroshiqui irirajiaqueate oananquitsineca camorecariqui yamenajiaqueroqueate teequeate querocaca oncameetsatantempaji. Cotanquitsiqueate aatimpajia imeshiajiaqueca Aapani Irioshi atsajiaque irootaquequeate imeshiantajiacajica. ¹⁹ Aritarite ocanque Itioncacaantaqueca ocanti: Coajica iramenajiaqueriqueate teequeate intsatimateji irirajia tsaguevetatsica. Ariqueate onquejetaquempaqueate maasano iquenquejajiguica tsatamampeajitsica iramenajitaqueroqueate tee ontampaticamajateji. Naroguentitarite quejeguetaquerone imaica.

²⁰ ¿Taa opajita ocameetsatantacaca itsatamampeajiacaca tsatamampeajitsica, jeri aisa tsatacaantamampeajitsica, jeri aisa quenquetsatacoventajiguero ca taaca opajitapae quepatsipaequitica? Yonigaanquerotarite Aapani Irioshi maasanopae ocatica itsatamampeajiacaca quepatsipaequitica teequeate onetsanamajatempaji. ²¹ Iriiraqueate

* 1:12 Sepashi. Irootaque otsipa ivajiro Shimo Peerero. Pamenero Jn. 1.42.

Aapani Irioshi caavijiqueate itsamajati, irootaquequeate icantantacaca aato inchiquioji itsatashitari caquinteja iraventajavetaquemparogueti itsatamampeajavetacaca, iriguentiqueate ininque irimeshijaque quemisantaqueroneca Quenquetsatsarentsi itsavetantajitaqueca, yamenajavetacaroqueate itsipapae ijiqueroji teequeate onetsanamajatempaji. ²² Iriraqueate joriojia inintajiaque iramenacaajitaqueri oacaantantatsica intati. Iriraqueate guiriegojia manaqueate inintajiaque intsajiaque. ²³ Cotanquitsiqueate naatimpajia manaqueate notsavetantajiaqueriqueate Quirishito yompajacojitaquerigueti. Iriraqueate joriojia manaqueate ocatsimatacajiaqueri. Iriraqueate teeca irijorijoigueti manaqueate yamenajiaquero ijiqueroji teequeate onetsanatempaji. ²⁴ Cotanquitsiqueate maasano inintacajiaqueca Aapani Irioshi intsariventajiaquempari iriogueti joriojia jerijia aisa guiriegojia itsajiaquequeate iroguenti imeshiimentajiaqueri Aapani Irioshi intsariventajiacarigueti Quirishito. Aatomegueti yaventajigarime querocampamequea incojiaquempame irimeshijajempame, igantagatarite icanquequeate Aapani Irioshi paesatoniqui onquejetaquempa imaica, caavijitarite itsamajati. ²⁵ Oraqueate itsatica Aapani Irioshi yamenajaveca caquintejiatsica ijiqueroji teequeate ontampaticamajateji, caaviji anaamajaquero itsajiguica iriatimpajia. Ariqueate oquejetacaqueate yagavejica Aapani Irioshi, yamenajavecaroqueate iriatimpajia ijijiaquejite teeji iragavejeji Aapani Irioshi, caaviji anaamajaquero yagavejajavetacaca iriatimpajia.

²⁶ Pinquenquejajiguero, napiguemisantarijiate, quero picojiacani icajemajiaquem-pigueti. Teequeate poshequigueti tsamajajavetacaroca itsatica caquinte, teequeate poshequigueti agavejajavetanquitsica, teequeate poshequigueti anaantajavetanquitsica. ²⁷ Inintacajiaqueritarite intsariventajiaquempari teeca intsajavetempaji cameetsanijite iroguipashiventajimentajiaquerinijite caavijica itsajaveta. Ariqueate iquejeji-aqueri aisa inintacajiaqueri teeca iragavejajavetempaji cameetsanijite iroguipashiventajiaquerinijite agavejajavetatsica. ²⁸ Inintacaqueritarite intsariventajiaquempariqueate teeca iranaantajigueti, jeriquea aisa teeca irinintajiteriji, jeriquea aisa teeca irishineventajitempariji aatonijite yanaantajajitsi yamenapinijivetacaca yanaantajiaque. ²⁹ Ariquea iquejetaquero Aapani Irioshi imaica aatonijite quericaca agavejatsi isemetimotiri. ³⁰ Iriguentiquea Aapani Irioshi tsipashirentacajiaquemprica Quirishito Jesoshi. Iriotari itigarancaqueca Aapani Irioshi antsatimentamajajiaquenijite. Iriatimpa iriguentiquea shetaqueroca aguempavejajia cameetsanijite iramenimentajiacajinijite Aapani Irioshi quejevaetanaca teenica anquempavejajiguempaji. Aisa iriguentiquea agavejacaajiacaji ancomajajiaquempa asavicaventajiaqueroqueate inintaguequeca Aapani Irioshi. Imetojaventajiacaji imeshijiacaji aatonijite yashintajiaaji ampatsini, iriguentiquea ashintajajine Aapani Irioshi. ³¹ Aritarite ocanqueni itioncajitaquerogueti ocanti: "Aatoqueate aventacota, irioquea ashineventamajataquempa Amajirote."

2

Quero icoca Paavoro itsavetanquerigueti Quirishito

¹ Napiguemisantarijiate, coramani noaquitigueti noquenquetsatacaajiaquitimpigueti notsavetanquerigueti Aapani Irioshi quero icota imeshiantigueti, teequeate nonquejetempariji iquenquetsajavetacagueti tsamajavetaroca itsatica caquinte, teequea nonquenquetsateji cameetsanijite pishineventaquena naatimpa. ² Aisa teequeate nonintimateji nonquenquejajeti otsipa nochoocatimojiaquem-pigueti, iriguentiqueate noquenquejamajataque Jesoquirishito imetojaventajiacajigueti coroshiqui. ³ Oraqueate nocatiimojiaquem-pigueti noquenquetsatacaajiaquem-pigueti manaqueate notsaroanaquequea intati nompioncanacaqueate, namenacatarite teequeate inchiquiojitsita nagavejempaji naatimpa. ⁴ Ariqueate oquejetaca aisa noquenquetsatacaajiaquem-pigueti notsavetanquerogueti Iguenquetsatsare Aapani Irioshi teequeate ariqueea nonquejajiguempariji tsamajavetaroca itsatica caquinte iquenquetsajiguigueti, teequea noninteteji nagavejanquempiro nocanqueca naatimpa, inchiquiojitsiqueate yagavejajiaquem-piqueate Ishire Aapani Irioshi iquemisantacajiaquem-pi, pamenajiaquetarite iriguentiquea agavejacaquena Aapani Irioshi. ⁵ Oraqueate noquejetancaroca imaica aatonijite

iroguenti piquemisantimentajigui pishinetimentajiguiro itsatica caquinte, manaqueate pinquemisantajiaque pamenajiaquegueti iriguenti agavejacaquena Aapani Irioshi.

⁶ Cotanquitsiqueate oraqueate noquenquetsatacaajiaquerigueti irirajia quemisanta-majajiananquitsica ariqueate nocamantajiguiriqueate taaca opajitapae managuetanquitsica, cotanquitsiquea teequeate iroguenti itsatica quepatsiquitica, aisa teequeate iroguenti itsajiguica majirontajiavetanquitsica imaica teroncaguetanajatsineca coajica. ⁷ Iroguentiqueate notsavetacotanque iquenquejaguetica Aapani Irioshi teeca intsajivetemparoji coramani. Aritarite tequerataguetei impeacaguemparoji quepatsi inintacajaiacaji irimeshijiacaji intsipajianacaji ontaniqui jenoqui inquitequi. ⁸ Teequea intsatimajigueroji majirontajiavetanquitsica quepatsiqui imaica. Oraqueate intsajiaquerome aatomecajate yompajacojiguirime Amajirote caavijica yoganejencamajata. ⁹ Cotanquitsiqueate aritarite ocanque itioncacojitaqueroguetei ocantiquea:

Choocaquea oshequi cameetsaguetatsica inetsanataqueca Aapani Irioshi cameetsanijite incavintsajimentajiaquerinijite irirajia pintsajigarica, cotanquitsiqueate teequeate quericaca nejerone, tee inquemacotimajiteroji, aisa tee inquenquejimajiteroji.

¹⁰ Cotanquitsiqueate aatimpajia yonigaajiacajiroqueate Ishire Aapani Irioshi, itsamajaquerotarite maasano iquenquejaguetica Aapani Irioshi teeca intsajiteroji, iteroncamajaqueroqueate. ¹¹ Arimpate caquinte teequeate inchoocateji tsateroneca taaca iquenquejaque, apaniroqueate itsataque iriatimpa ishirequi. Iriompa Aapani Irioshi aatoqueate quericaca tsatatsi taaca iquenquejaque, apaniroquea itsataqueroqueate Ishire. ¹² Aatimpajiaquea imaica teenicate anquenquejajiajeji onquejetajemparoji iquenquejajiguica teeca intsarotentajiguempariji Aapani Irioshi, itigarancajiacajiritarite Aapani Irioshi Ishire cameetsanijite antsajiaquenijite inintacajaiacajica icavintsajiajiajigueti. ¹³ Oraqueate notsatacaantajiguiroguetei maasano ocatica teequeate inchiquiojitsita nontsatacaantashijiguemparoji intati naatimpajia, iriguentitarite tsatacaajiaquenaroquea Ishire Aapani Irioshi. Aisa itsatacajiaquenaro quero noncantajiaque nontsatacaantajiaqueguetei, irooquea notsatacajiaqueri irirajia ichoocashirentajiaqueca Ishire Aapani Irioshi.

¹⁴ Irirajiaqueate teeca inchoocashirentajigueriji teequeate irishineventajiavaquemparoqueate itsatacajiaicajica, yamenaquerotarite ijigueroji tee onetsanatempaji. Teequeate iragavejeji intsatavaqueroji, teenicate inchoocashirenteriji Ishire Aapani Irioshi tsatacaquerineca. ¹⁵ Cotanquitsi iriraqueate ichoocashirentaqueca irioquea tsatavaquero, aisa itsaque queroca cameetsatatsica aisa queroca teeca oncameetsateji. Iriraqueate teeca inchoocashirenteriji aatoquea yagaveji itsatacaguiritsi ichoocashirentaqueca, aato yagaveji icantiri queroca cameetsaguetatsica aisa queroca teeca oncameetsagueteteji.

¹⁶ Aritarite ocanque itioncacojiqueroquetei ocanti: “¿Queriqueate tsataqueroca iquenquejica Amajirote cameetsanijite intsatacaquerinijite?” Cotanquitsiqueate aatimpajia iriguentiqueate tsatacaajiacaji Ishire Aapani Irioshi, irootaquequea atsatantajiacaroca iquenquejaguetica Quirishito.

3

Itsinampirejavacajaiianacaqueate Corintoquitica

¹ Imaica, napiguemisantarijiateni, noncantajiaquempiqueate oraqueate noquenquetsatacajaatimpiguetei teequeate nonquejetacaajiguempiji noquenquetsatacaajiguiriguetei quemisantamajajiguirica Ishire Aapani Irioshi, manaquea noquenquetsatacaajiaquempi noquejetacaajiaquempiqueate teeca inquemisantamajajigueriji, noquejetacaajiaquempi iriaqueraca aventajianacarica Quirishito, quejejaquempitarite chaajaniquitirajaca iriaqueraca voananquitsica. ² Iroguentiqueate notsatacajiaquempica teeca omanempaji, noquejetacaajiaquempiqueate yatsojitiriguetei chaajaniquitirajaca iriaqueraca voanquitsi tequeratatirajaca intijaiteriji, tequeratatirajatarite pagavejajigueti pintsajiavaqueroqueate mananquitsica. Arimpate imaica tequeratatirajaja pagavejajigueti pitsajiavaqueroqueate, ³ tequeratatirajatarite pinquemisantamajajigueriji Ishire Aapani

Irioshi. Pigantagatiraja picatsimatimentajiguiriqueate querocaguete icojiacani papiguemisantarite, aisa picatsimatavacaajiacaqueate pitsinampirejavacajaianacaqueate. Pigantagatiraja piquejejiacari tequeratatirajaca inquemisantajigueriji Aapani Irioshi. ⁴ Choocatarite cantanquitsica: “Naatimpa iriguenti noguijatacotaque Paavoro.” Itsipaquea cantanquitsica: “Naatimpaqueate iriguenti noguijatacotaque Aporoshi.” Piquejejiakeroguetiqueate imaica manaqueate piquejejiacari intati teeca intsariventempariji Aapani Irioshi.

⁵ ¿Taampa ipaji Paavoro? ¿Taampa ipaji Aporoshi? Mana amitantatsica nonajiaque intati, naroguentijiatari irajaanire Aapani Irioshi itigarancaqueca nonquenquetsatacaquempiniji paventantajiacarica. Apaniropaequeate nonetsanajiaquero icantajiaquenaca Amajirote. ⁶ Naatimpaqueate quejetaca manaca noquitataquero oitsoqui, naroguentitarite tsatacaajiaquitimproca Icanqueca Aapani Irioshi. Iriiraqueate Aporoshi quejetacaquea iriguentica orenacotavaqueroca, iriguentitarite tsatacaamajiaquempiroqueate. Cotanquitsiqueate apaniroqueate Aapani Irioshi itampishitacajiaquempiqueate arimpaniji pintsariventamajajianaquempiriqueate. ⁷ Teequea omanempaji iquitajitirogueti oitsoqui aisa yorencacojitirogueti, cotanquitsiqueate apaniroqueate Aapani Irioshi yagavejaquequeate intoroacaquero. ⁸ Iriiraqueate quitajatsica jeriqueate aisa orenacotiroca ariqueate iquejetavacaajiaca, cotanquitsiqueate coajica irovegarejajeriqueate apaniropae querocaguete ovegaraquempiani yantajiaquegueti. ⁹ Naatimpa ariqueate noquejetacariqueate Aporoshi, iriguentitarite notsipatashitaca nantajiguiniriguete Aapani Irioshi. Aviatimpajia manaqueate piquejejiacaro iniganquitejire Aapani Irioshi, aisa manaqueate piquejejiacaroqueate mapipanco itsinetacojistica.

¹⁰ Naatimpaqueate naroguenti quejetaca caavijica itsatiro tsinetacomajatiroca mapipanco, inintacaaquenatarite Aapani Irioshi naroqueti jivaqueroca noqueecashiquero notsinetacotantamajatacaro mapicota isavi cameetsaniji onquishomajatanaqueniji. Itsipaquea itantotavaquero. Cotanquitsiqueate apaniropae tantotavaqueroca irinetsanamajatavaqueroja aatonijite omanimotari. ¹¹ Aatoquea queri agavejatsine inqueecaje ot-sipa quishotacajaeroneca. Iriotaque ocantacotaque Jesoquirishito quishotacaqueroca. Iriotaque nocantacotaque notsatacajiaquempiguete. ¹² Cotanquitsiqueate irirajiaqueate tantojivaqueroneca intantotantajivaquemparoqueate cavorejamajatatsica icantajitica ooro, iriguentica itsipa cavorejatatsica icantajitica perata, iroguentica oganejencaguetatsica mapi, irooca ogota, irooca savoroquiji, irooca ovashi. ¹³ Oraqueate coajicaqueate aapojempaguete incatsimatantajiaquempiricaquea Aapani Irioshi maasano teeca intsariventajiguempiriji, ariqueate iramenajitaqueroqueate taa opajita intantotantajiacaro apaniropae. Iriguenticaqueate intantotantacaro ooro, iriguenticaqueate perata, iroguenticaqueate oganejencaguetatsica mapi, aatoqueate otaguirotsi paa-mari, quishovaetaquetarite. Cotanquitsiqueate iroguentiguete intantotantacaro ogota, iroguentica savoroquiji, iroguentica ovashi, ontaaquempaqueate. ¹⁴ Aatoguete otaga yantaqueca irovegarejiqueriqueate. ¹⁵ Oraqueate ontaaquempaguete ompomatsaquempaqueate maasano yantaqueca, cotanquitsiqueate iriatimpa aato itaga, onquejetaque-mpa manaqueate irajaitavajeri pajiniguete intaguempame.

¹⁶ ¿Arimpate teequeate pintsajigueti aviatimpajia quejejiaquempi iteemporote Aapani Irioshi, ichoocashirentajiaquempitarite Ishire? ¹⁷ Taacaguete pomatsataquerone iteemporote Aapani Irioshi, ari inquejetaqueri Aapani Irioshi, impomatsataqueriquea iriatimpa, yashintamajatacarotarite. Aviguentijiatari iteemporote.

¹⁸ Aato pamatavijatsi avisati. Choocaguete oraniqui aviatimpajiaqui jivetatsica itsamajati taaca opajitapae itsanirovecaca quepatsiquitica, iintsija iramenaquempaqueate iriatimpa teequeate intsatimateji. Iramanaqueriguete Aapani Irioshi ariqueate intsatacaqueriqueate, coajica ariqueate intsamajataquequeate. ¹⁹ Maasanotarite itsajiguica quepatsiquitica ijivetacaroji cameetsavaeque, iriraquea Aapani Irioshi yamenaqueroqueate teequeate oncameetsateji. Choocaqueate itioncacojiqueca ocanti: “Iriiraqueate Aapani Irioshi manaquea yoguipiashitantajigari intati tsanirojiavetatsica yamatavijantajiaqueguete, irisatitari amatavijaatsi, manaquea apitivitanajari iriatimpagui.” ²⁰ Aisa ocanti: “Iriiraqueate Amajirote itsamajatiroqueca maasano iquenquejajiguica caquinte

tsanirovetatsica yamenitaqueriquea teequea oncameetsateji.”²¹ Irootaquequeate imaica aatoquea pisemetacotsitajari irirajia caquintepae, maasanotarite choocague-tatsica ipeacaajiaquempiroquea Aapani Irioshi.²² Ariqueate noquejetaca naatimpa aisa Aporoshi jeri aisa Sepashi,* itigarancajiaquenaqueate nontsatacajiaquempi. Aisa ipeacaajiaquempiro maasano choocaguetatsica quepatsiqui. Ariguettequea pinchooca-jiaquegueti manacampaqueate pimetojajiaque intati, pishineventajiaquempariqueate. Pishinetimentajiaquemparoqueate choocaguetatsica imaica jeroqueate aisa choocague-tanquitsineca coajica, aviguentijatarite ashintajigaroqueate maasano.²³ Aviatimpajia iriguentiqueate ashintajiguimpi Quirishito. Iriraquea Quirishito irioquea tigarancaqueri Aapani Irioshi.

4

Itigarancanejia Jesoquirishito

¹ Pitsajiaquequea naroguentijiaquea irajaanirejia Quirishito, inintacajiaquenatarite nontsatacajiaquempiro iquenquejagueticata Aapani Irioshi teeca intsajiteroji.² Quericacaqueate inintacajiaquea iroguentiqueate inintajiti irinetsanamajataquero maasano icanquerica nintacaaquerica.³ Cotanquitsi queroca pincantajiaquena aviatimpajia aatoqueate querocaca nocantitsi naatimpa. Aviguentijia cantajiaquenane, iriguentica cantajiaquenane itsipa nonetsanjiaquegueti icanquenaca Amajirote, aatoqueate querocaca nocanti. Iroguentica pincantajiaquena tee nonetsanateroji, ariqueate nonquejetaquempaqueate aisa, aatoqueate querocaca nocanti. Noquejetaca naatimpa namenacocaguete, teequeate noncanteji.⁴ Namenavecaqueate naatimpa nonetsanaqueroqueate, cotanquitsiquea jmm iriompate Amajirote, inchiquiojitsitarite incantaquenaqueate iriatimpa.⁵ Irootaquequeate nocantantajiaquempica imaica aatoqueate inchiquiojitsita picantajiguiritsi aviatimpajia papiguemisanterijiateni arica inetsanamajajiaquero icanquerica Amajirote, arica tee. Oraqueate incoraquepojajeguete iriatimpa ariquea ironigaajipojaqueri tsitivetanquitsica ariqueate intsajitaqueroqueate quero iquenquejaguetaqueca apaniropae. Ariqueate irira Aapani Irioshi irishineventamajaquempariquea maasano netsanamajajiaquero inintagueticata, incantajiaqueriqueate: “Cameetsavaeque.” Cotanquitsiquea irirajia teemajaca irinetsanamajatero aato ishineventajigari.

⁶ Napiguemisanterijiate, maasano ocativa nocantaqueca imaica noquenquetsataco-tacaguete naatimpa, jeroqueate aisa noquenquetsatacotaqueriguete Aporoshi, man-aquea nocantajiaquempiqueate cameetsanijite pintsajiaqueroniji pinetsanjiaquero Itioncacaantaqueca Aapani Irioshi, aatoniji ichoocatajitsi pisemetacojiaquempaca itsi-paqueate pincatsimajiaqueca.⁷ ¿Ariquea quericampa amenajiaquempineca panajai-aqueri itsipa? ¿Arimpate pagavejaque aviatimpajia inchiquiojitsita aatoguete yagave-jacaguimpi Aapani Irioshi? Irioguete agavejacaquempi, iroosacanicate ¿queroqueate ocotaca panaantacaca quejacaquea inchiquiojitsita pagavejajiaque aviatimpa?

⁸ ¿Arimpate jac tsamajajiaquempi maasano Iguenquetsatsare Aapani Irioshi, teempaquea pincoguimentajempaji intsatacajaitajempi? ¿Arimpate jac agavejamajajiaquempi? ¿Arimpate pipeajiacata majirontajiatatsica panajaiquenampa naatimpajia? ¿Arimajamequea pimpeamajajiaquempame majirontajiatatsica cameet-samequea nonquejiaquempamequea naatimpajia nomajirompajaquempamequea!

⁹ Namenajiaquetarite naatimpajia itigarancane Amajirote quejecaqueate manaca iquejetacaavaejiaquenaqueate Aapani Irioshi irirajia ipincajitica, quejecaqueate manaca inintajitaque irimetojajitaquena. Yamenajiaquenaqueate maasano: caquintejiatsica jerijia aisa irashivantijitete Aapani Irioshi.¹⁰ Naatimpajia notsavetantajiaqueriqueate Quirishito irootaquequeate yamenantajiavetaquenaca teeca intsariventajiguempariji teequeate nontsajigueti, cotanquitsiqueate aviatimpajia pitsariventajiacariguete Quirishito ariqueate pamenajiaqueate pitsamajajiaque. Naatimpajia mana yamenajiaquena teequeate nagavejajigueti, cotanquitsiqueate aviatimpajia pamenajiacata pagavejamajajiaque. Aviguentijia ishineventajiacata, naatimpajia tee irinintajiavetenaji.

* 3:22 Sepashi. Irootaque otsipa ivajiro Shimo Peerero.

¹¹ Natsipejiacaqueate notase jero aisa nomirejia, aisa notsoncashitequijacoca irosatiquea imaica. Itavatavaajiquenaquea, noanoaitapiniquequea, teequeate onchoocatajeji notsovironaquite. ¹² Natsipejiacaqueate nantajiaquegueti nacoqui naanquempaca. Icatsimatsajivequenaquea, cotanquitsiqueate naatimpajia tee nompigajiguempariji, manaqueate nocantajiaqueri Aapani Irioshi incavintsajajiaqueri. Yatsipetacaajive-taquenaqueate, cotanquitsiqueate natsiperejacojiacaro. ¹³ Icantacantajivetaquenaquea, cotanquitsiqueate naatimpajia cameetsa noanaqueri. Iquempetacaajitaquena otaqui, quejevaequena cantaitero irosati imaica.

¹⁴ Teequeate iroguenti nontionquimentajiguempiji noguipashiventajiaquempi, manaqueate nonintaquequeate noncantomajajiaquempi nonquejetacaajiaquempi aviguentijia niri janitejia nopintsamajajiacaca. ¹⁵ Inchoocajivetaquempaquate iroshequiamajavequempaquate tsatacaajiaquempineca pintsaromentamajajiaquemparinijite Quirishito, cotanquitsiquea aatoquea yoshequiguitsi irijanintajiaquempineca, apanirotarite nococa naatimpa niri janintajiaquempi, naroguentitari quemisantacaajiaquempi iroaqueragueti notsavetanquerigueti Quirishito Jesoshi notsatacaajiaquempirogueti Quenquetsatsarentsi Oganejencatatsica. ¹⁶ Irootaquequeate imaica nonintantacaca pinquejemajajiaquena naatimpa. ¹⁷ Irooquea nontigarancantaquemparica imaica Timoteo quejemajatacaquea irijani, nopintsamajatari. Iriatimpaqueate isavicaventamajatiro inintaguetica Amajirote. Oraqueate iroanaquegueti oraniqui inquenquejacaajiaquempiroqueate quero nocotaca naatimpa notsaromentarigueti Quirishito notsatacaantigueti querocagueti oraniqui icapiocajigagueti tsaromentajigarica Quirishito.

¹⁸ Piconoagarantajiaqueate aviatimpajia panaantajiaque pijijiaqueji aato noanaque namenajiajatempi. ¹⁹ Cotanquitsiqueate iriogueti nintanquitsine Amajirote noanaquequea taampina, ariqueate namenajiajateri irirajia anaantaguetatsica arimajacagueti yagavejajiaque, manaca iquenquetsatashijia intati. ²⁰ Aritarite imajirontagueti Aapani Irioshi, teequeate aparo inquenquetsatashitempa intati, manaqueate yagavejacaantiqueate aisa. ²¹ ¿Taaqueate pinintajiaque aviatimpajia? ¿Aricaqueate pinintajiaque noncantomajajiajapojempi, irooca pinintajiaque noncavintsajajiajapojempi cameetsaqueate nonquenquetsatacaajiajapojempi?

5

Icantimentajiaqueriqueate inconoajiaquemparigueti antanquitsica tiontagantsi

¹ Noquemacojiaquempi chooca apaniropapiguemisanterite peacaacaroca tiontagantsi caarica iquemacojiti inquempetajemparo impeacaguemparo teeca intsaromentajiguempariji Aapani Irioshi: ipashinincacarotari imanquigavetacaca iriri, yaajiroquea. ² ¿Querocaquea picojiacaniquea aviatimpajia aventacojiaquempi? ¿Quero ocotacani teequea pishimampo jancacotempariji? Pincantajiaqueriqueate quejequeroca imaica aatoqueate itsipajijaimpi. ³ Teequeate nontsipajivetempiji, cotanquitsiqueate noquenquejajiaquempiquea quejeca manaca notsipajiaquempi. Iriiraqueate quejequeroca imaica jac nocanquequea manaquea ipeacaaca covaequisherentsi. ⁴ Irootaquequeate nocantantajiaquempica imaica queroqueate pincojiaquerini, quejevaetaca iriguentica cantanquitsi Amajirote Jesoquirishito. Pincapiocajiaquempagueti pintsajiaque nocancani noquenquejajiaquempiquea, aisa iragavejacaajiaquempiqueate Amajirote Jesoshi, ⁵ pincantajiaqueri aatonijite itsipajijaimpitsi picapiocapinijiacagueti cameetsanijite irantsipetacaimenquemparinijite Satanashi itsinoqui. Pinquejejaquempaqueea irovashiantanajeronijite yantaqueca imaica arinijite iraimentajitavajerinijite ishire coajica incoquetajegueti Amajirote Jesoshi.

⁶ Teequeate oncameetsateji paventacojiacagueti piquejejiacagueti imaica. ¿Arimpa tee pintsajigueroji icantajitiro impeacajaitemparogueti pan: “Onconoaquemparogueti capichajaniqui anempoacaaqueroneca, ariqueate oncotanaquempa anempoanaquequea maasano ose”? ⁷ Imaicaqueate pincantajiaqueriqueate irira quejequeroca imaica aatoqueate itsipajijaimpi cameetsanijite pinquejejaquemparonijite pan ishecajitaca Paashicoaqui teeca onconoguemparoji anempoantaca. Iriatimpa manatarite iquejetacaroqueate iroquetinica anempoantaca pan. Oraqueate aatogueti piquejejiguiritsi

imaica manaqueate paajencatsijiaqueriqueate aviatimpajia aisa, pinquejejianaquempariqueate iriatimpa. Aviatimpajia manatarite piquejejiacarora queate pan ishecacajitaca Paashicoaqui teeca onconoguemparoji anempoantaca, imetojaventajiacajitarite Quirishito ishetaqueroqueate aguempaveerejia. Iquejetacariqueate ovejajaniqui imetojajitica ishecacajitaca Paashicoaqui. ⁸ Iroosacanicate imaica anquejetaquempariqueate shineventacaroca Paashicoa ipishoncaqueroqueti maasano iroquetinica anempoantaca pan, iintsija avashiantamajajianaqueroqueate maasano teeca oncameetsateji ancomajamajajianaquempa, ancantamajajianaque aatoqueate amatavijantajajitsi.

⁹ Oraqueate notioncajiaquempiguete iroquetica nocantajiaquempiqueate aatoqueate piconoajigaritsi oashitiroca manquigarentsi teeca iro irashimajaca. ¹⁰ Cotanquitsiquea teequea irio noncantacoteji irirajia teeca intsaromentajiguempariji Quirishito oashitaqueroca manquigarentsi, jerijia nintsitantaguetiroca yashintaguetacaca igonoro, jerijia aitsitantajatsica, iriguentica irioshivijitashitsica irioshivijire. Oraqueate iriomeguete noncantacojiaqueme, queroquea poajianaqueme aatonijite piconoajjaaritsi. ¹¹ Iriguentiqueate noncantacojiaquequeate irirajiaquea cantajatsica: “Naroguentiqueate papiguemisanterite, naroguenti tsaromentarica Quirishito”, cotanquitsiqueate igantagatirajaquea yaacogiguro manquigarentsi, aricaquea igantagatiraja inintsiguetiri yashintaguetacaca igonoro, aricaquea irioshivijitashitaca irioshivijire, aricaquea igantagatiraja iquenquetsaguisheguetaquequeate intati, aricaquea igantagatiraja ishinquitaca, aisa aricaquea igantagatiraja yaitsitantagueti. Irioqueate iriguenti noncantaquequeate aatoquea piconoajijaari, aatoqueate pitsipajijaari pishecajiaquempaguete. ¹²⁻¹³ ¿Arimpa querocampate noncantajiaqueriqueate irirajia teeca intsaromentajiguempariji Quirishito? Iriguentiqueate Aapani Irioshi inchiqiojitsiquea incanqueri iriatimpa. Cotanquitsiqueate aviatimpajia pincantajiaqueriqueate quero incojitaquerini papiguemisanterite antaqueroca quempevaerentsi. Irootaquequeate nocantantajiaquempica imaica pincantajiaqueriqueate iriraquea manquigatacaroca imanquigavetacaca iriri aatonijite iconoajajimpitsi picapiocapinjiaquete.

6

Queroquea pincojiaquempani pivetsinantavacaajiaquempaguete

¹ Ariguete pincatsimaqueriguete papiguemisanterite pamenakeriguete querocaguete icotaquempi, ¿arimpate oncameetsataque poanaque pincamantaqueri joese cantacotantatsica teeca intsaromentajiguempariji Quirishito cameetsanijite incanque quero incojitaqueri irira picatsimataqueca? Iriguentijiaquea pincamantajiaquequeate papiguemisanterijiate cameetsanijite incantajiaquempinijite quero incojitaqueri. ² ¿Arimpaqueate tee pintsajigueti aviatimpajia irirajiaqueate tsaromentajigarica Aapani Irioshi iriguentiqueate cantajianquitsine coajica queroqueate incojitaqueri maasano caquintejiatsica? Oraqueate ariguete pinquejejiaquempa imaica, caavijiqueate pagavejajiaquequeate pincantajiaque imaica quero incojitaquerini querica catsimatacaquerineca irapiguemisanterite. ³ ¿Arimpate teempa pintsajigueti aroguentijiaquea cantajianquitsine quero incojitaqueri ashivantijite? Atsajiaquetarite ariqueate onquejetaquempa imaica coajica, iroosacanicate imaica caavijiqueate agavejajiaquequea ancantajiaque quero incojitaquero taaca opajitapae amenajiaqueca teeca oncameetsateji. ⁴ Ariguete picatsimatavacaajia querocaguete picotavacaajiacani, ¿queroqueate ootaca iriguentiqueate paventajia teeca intsaromentajiguempariji Quirishito incantajiaquempiqueate quericaca quejetanquitsica? ⁵ Imaicaqueate imaica ariqueate mana notionquimentajiaquempi oca noguipashiventajiaquempinijite. ¿Arimpaqueate teempa inchoocatimateji apaniro papiguemisanterite tsatanquitsineca cantanquitsineca quero pincojiaquempani pivetsinantavacaajiaquempaguete? ⁶ Cotanquitsiquea picatsimataqueriguete papiguemisanterite, iriguentiqueate paventajiaqueate joese cantacotantatsica teeca intsaromentajiguempariji Quirishito. ⁷ Oraqueate piquejejiacaguete imaica teequeate oncameetsateji. Arimequeate pantsiperejacojiaquemparome querocaguete icojiaquempini papiguemisanterite. Quejecaqueate impomatsatsijiaquempiroguete taaca opajitapae pashintaguetacaca irooca irimatavijaquempiguete, pantsiperejacojiaquemparoqueate. ⁸ Cotanquitsiqueate

aviatimpajia patsipetacaantajiacaqueate, pamatavijantajiaquequeate, piquejetacaa-jianacariqueate aisa papiguemisantarijiate iriatimpajia.

⁹ ¿Arimpaqueate tee pintsajigueti maasano antajiatatsica teeca oncameetsateji aatoquea yoguitsi ichooaquegueti Aapani Irioshi? Inchiquiojija picomijigarotsi ocatica. Aatotarite yoajiguitsi ichooaquegueti Aapani Irioshi oashitanaquero ca teeca iro imanquigare, jerijia irioshivijitashitatsica, jerijia aimentaroca imanquigare, jerijia cantatsajiguirica irapishirampariteni, ¹⁰ jerijia aitsitantajiatatsica, jerijia nintajiatatsica irajaan-tajiaquempa, jerijia shinquijiatatsica, jerijia cantacotashitantatsica, jerijia aisa amatavijantatsica. ¹¹ Piconoagarantajiacaqueate aviatimpajia ariqueate piquejejiavecaqueate imaica, cotanquitsiqueate oraqueate pitsarotentajiacarigueti Amajirote Jesoquirishito ishejiacquempiroqueate maasano piguempaveerija, yamentantajiaquempicaqueate Aapani Irioshi quejevaeca teeca pinquempevaetimajiguempaji, ariqueate yagavejacaajiaquempi Ishire Aapani Irioshi povashiantamajajianaqueroqueate pantaguishejiavetaca, ariqueate pisavicaventajianaqueroqueate inintaguetica Aapani Irioshi.

Yashintajiacaji Aapani Irioshi atsinojia

¹² Choocaqueate taaca opajitapae teeca incantimentenaroji Amajirote, cotanquitsiqueate mana nonquenapitsatapanajantero intati querocagueti namenaqueca naatimpa manaqueate ovashiantacaanaquenaro notsarotentamajatarigueti Amajirote. Teequeate incantimentenaroji Amajirote, cotanquitsiqueate querocagueti namenaqueca arica agavejaquena coajica, manaquea nontomicapitsapanajantero intati. ¹³ Arimajaqueate ipeacaaguecaroqueate Aapani Irioshi maasano ishecajiguetaca cameetsanijite oanaquenijite atsicotoqui anquemimentajianaquempanijite. Ariqueate oquejetaca atsicoto iroatimpa manaqueate ipeacaashitacaroqueate ontetantaquemparoshecaquequempaca, cotanquitsiqueate coajica aatoqueate oquejetajatsi imaica, impejaerotarite Aapani Irioshi atsicoto aisa asheca. Cotanquitsiqueate atsino teequeate iroguenti impeacaashijigaji Aapani Irioshi oashitantajiaque. Iroguentiqueate ipeacaantajiacajica antsarotentajiaquempariqueate Amajirote, iriatimpaqueate Amajirote inchoocashirentajiacajiqueate. ¹⁴ Ariquea iquejetacaacariquea Aapani Irioshi Amajirote ivochantajiriqueate, ariqueate inquejejiacaji aatimpajia aisa irovochantajijaajiqueate coajica, yagavejamajatarite.

¹⁵ ¿Arimpate teequeate pintsajigueti aviatimpajia yashintamajajiaquempiqueate Quirishito? Pitsino iroguenti irashi iriatimpa. ¿Queroqueate incoquempani yashincaca Quirishito iroashitanaqueroqueti icantatsapinijitica? Inquejetaqueroqueti imaica jooshiatsi, quejevaecaqueate iriguentica quejequero Quirishito imaica! ¹⁶ ¿Arimpaqueate teequeate pintsajigueti querica oashitanaqueroqueca icantatsapinijitica ariqueate incotanaquempa intsipamajatanaquemparoqueate quejecaqueate apanironica inchoocatanaquequeate? Aritarite ocanque itioncacojiqueroqueti ocanti: “Iroaqueragueti mavite icarajiaavetaca, cotanquitsiqueate ariqueate icojianaca quempetanaja apatsinoronica icantaja.” ¹⁷ Cotanquitsiqueate quericaca tsarotentamajatarica Amajirote itsipamajatacariqueate ariqueate iquejetanacariqueate iriatimpa quejetaca apanironica ichooocatanaque ishire.

¹⁸ Pishiapitsatanaqueroja quempevaetagantsi: aatoquea picantatsatimajiguirotsi teeca pimanquigatempaji; aisa manquigarentsi aatoquea pinevejigaritsi caarica manquigatimpi. Maasanotarite otsipapae quempevaetagantsi yantaguishejitica teesacona onquejetemparoji ocatica: iriraqueate cantatsataquero ca teeca iro imanquigare iqumpevaetacaacaroquea itsino iriatimpa. ¹⁹ ¿Arimpate tee pintsajigueti aviatimpajia oraquea pitsino iroguentiquea ichooocatantacaca Ishire Aapani Irioshi itigarancajiaquempica? Oquejetacaroquea itemporote. Teequea aviguenti ashintajatsine, ²⁰ yamanantaquempitarite yovegarataquempi* cameetsanijite irashintamajajiaquempinijite. Irootaquequeate imaica nocantantajiaquempica pincomajamajajiguempaqueate cameetsanijite pamenacajiaquerinijite maasano caavijiqueate yoganejenca-

* 6:20 yamanantaquempitarite yovegarataquempi. Irootaque yovegaratantaquempica imetojane Quirishito. Pamenero 1 Co. 7.23; Yonig. 5.9; Irm. 3.24.

majata Aapani Irioshi. Pinquejejiacquempaqua pitsinoqui [aisa pishirequi, iriotari ashintaroqa].

7

Icamantajiaqueri quero incojiaquempani manquigajiatsica

¹ Imaicaqueate imaica irooqueate noncamantajiaquempi picoacojiaquenaca pitioncajiaquenagueti. Cameetsavaetaquequeate aatogueti imanquigajigatsi shirampani. ² Cotanquitsiqueate aatonijite yoashitajirotsi manquigarentsi cameetsavaetaquequeate irimanquigajiaquempa apaniropae shirampani imanquigare. Ariqueate onquejejiacquempa queate manquigarentsijia iroatimpajia omanquigajiaquempa queate omanquigare. ³ Oraqueate manquigarentsi aatoqueate otsinampirejiritsi manquigataroca irininqueguete inquishtajemparo. Ariqueate inquejetaquempa queate iriatimpa aatoqueate itsinampirejirotsi iroatimpa. ⁴ Oraqueate manquigarentsi manquigatatsica teenicaqueate ashintemparo otsino, iriguentitarite ashintaroqueate omanquigare. Ariqueate iquejetacaqueate manquigataroca, teequea irashintemparo iriatimpa itsino, iroguentitari ashintaroquea imanquigare. ⁵ Noncantantajiaquempicaqueate aatoqueate pitsinampirejavacajaiatsi, cotanquitsiqueate mavitegueti pinintajiaquegueti pinorijashijiajempa cameetsanijite pisavicaventajiaquero pamanajiaqueri Amajirote cameetsavaetaquequeate. Coajicaqueate pintsipatavacajaijempa queate aatonijite iquempevaeta-caajiguimpitsi Satanashi imajirote ampatsini, aatotarite pagaveji pitampishitashijiguiro pinchoocatashijiaquempaguete. ⁶ Cotanquitsiqueate nocantajiaquempiguete imaica teequeate ariqueate noncantajiguempiji pimanquigajiaquempaja, manaqueate nocantajiaquempiqueate ariguete pinintajiaquegueti pimanquigajiaquempa cameetsavaetaquequea. Oraqueate aatoguete pinintajiguetsi cameetsavaetaque aisa.

⁷ Naatimpa nonintavecaqueate inquejejiacquename naatimpa maasano shirampanijia, cotanquitsiqueate irira Aapani Irioshi icantashitatijaiacaji apaniropae yagavejacaajiacajiguete. ⁸ Irirajiaqueate tequeratatirajaca irimanquigajiguempaji cameetsataquequea inchoocatashijiaquempa intati inquejejiacquenaqueate naatimpa. Ariquea onquejejiacquempa tequeratatirajaca omanquigajiguempa, jerojiaqueate metojacoguetanquitsica manquigataroca. ⁹ Cotanquitsiqueate aatoguete pagaveji pinchoocatashitempa cameetsavaequequea pimanquigatempa, anaaqueroqueate pinevetashigucaroguete intati. ¹⁰ Cotanquitsiqueate oraquea manquigajiatsica noncantajiaqueroqueate aatoquea ovashiantajiguiritsi manquigataroca, teequea naroguenti cantatsine, iriguentiqueate cantanquitsi Amajirote. ¹¹ Ariguete ovashiantanaqueri manquigataroca, aatoqueate omanquigatimatajatsi itsipa, cotanquitsiqueate oninqueguete ompiashtanajeriquea manquigataroca cameetsavaetaquequea. Ariquea inquejetaquempa shirampanijia aatoqueate yovashiantimajiguirotsi imanquigarejia.

¹² Imaicaqueate imaica irioquea nonquenquetsatacaajiaque tsaroventajigarica Quirishito choocajiaatsica imanquigarejia teeca ontsaroventajiguempariji, cotanquitsiqueate teequeate iriguenti cantatsine Amajirote, naroguentiquea cantanquitsi. Noncantajiaqueriqueate ariguete onintaque imanquigare quisho oanaqueri, aatoqueate yovashiantirotsi.

¹³ Ariqueate onquejetaquempa manquigarentsi tsaroventarica Quirishito choocaguete manquigataroca teeca intsaroventempariji, ariguete inintaque quisho iroaquero, aatoqueate ovashiantiritsi.

¹⁴ Iriatimpa teequea intsaroventavetempariji Quirishito, cotanquitsiqueate otsaroventacaritarite iroatimpa ariquea intsipatacanquemparoqueate Aapani Irioshi incavintsajaqueri. Ariquea oquejetacaquea aisa manquigarentsi teeca ontsaroventempariji Quirishito, irioguentiqueate tsaroventarica manquigataroca ariqueate intsipatacanquempariqueate Aapani Irioshi incavintsajaquero. Aatomequeate oquejetame imaica irijanijiate inquejemajiaquemparime irijanijiate teeca intsaroventempariji Quirishito, cotanquitsiqueate imaica iriri iriguentiquea tsaroventarica irootaquequeate incavintsajantajiaquemparica Aapani Irioshi.

¹⁵ Cotanquitsiqueate choocaguete teeca intsaroventempariji Quirishito, iriogueti nintanquitsine irovashiantanajero imanquigare tsaroventarica, manaquea oncanque:

“Querocaguete pininque, avirompate.” Ariquea oquejetacaquea manquigarentsi teeca ontsaromentpariji Quirishito irooguetiqueate nintanquitsineca ovashiantajeri omanquigare tsaroveratarica, manaquea incanquero: “Querocaguete pininque, avirompate.” Ininquetarite Aapani Irioshi anchoocajiaquequeate cameetsa, teequeate irininteji ancatsimatavacaguempa. ¹⁶ Aviatimpaqueate manquigarentsi, tee pintsateji arica pagavejaque pimeshiacaanqueri manquigatimpica, arica aato. Ariquea piquejetacaqueate aviatimpa shirampari, tee pintsateji arica pagavejaque pimeshiacaanquero pimanquigare, arica aato.

¹⁷ Querocaguete picotacani iroaqueraguete icajemajiaquempiguete Aapani Irioshi imaicaqueate pantaqueneri iriatimpa, iriotarite nintacaquempica pinquejetaquem-paqueate imaica. Aritarite noquejéjiguiriqueate imaica nocantajiguiriguete maasano tsaromentajigarica Aapani Irioshi querocaguete icapioaventajiacari. ¹⁸ Ariguete itot-saiquijiquero pichonquimashi pogujatacotaqueroguete yamejigaca joriojia tequer-ataguete incajemempi Quirishito, ari ocotaca aato pipashiventacagaro imaica. Oraqueate teeguete intotsaiquijitempiji ariqueate onquejetaquem-paqueate aisa, ariqueate pinco-quempani imaica aatoquea pitotsaiquitacaantatsi. ¹⁹ Teenicaqueate iroguenti irishin-eventempa Aapani Irioshi iramenaquempi itotsaiquitsijitaquempiro pichonquimashi, iroguentica tee intotsaiquijitempiji, manaqueate ishineventamajacaroqueate pinet-sanapinitaqueroguete icantaguetaqueca iriatimpa. ²⁰ Irootaquequeate nocantantacaca querocaqueate picojiacani iroaqueraguete icajemajiaquempiguete Aapani Irioshi, aritaque picotaca. ²¹ Ariguete yashintajitaquempi icajemajiaquempiguete Aapani Irioshi, aatoquea pishoshoverarotsi queroca pincojiaquempani pinchoocatashijiaque-mpaguete intati, cotanquitsiqueate ariguete irovashiantajitajempi cameetsavaetaque-queate irovashiantajitajempiqueate. ²² Maasanotarite yashintajitaca icajemajiaque-riguete Amajirote, quejecaqueate manaca ichoocatacajairiqueate intati, teetari irash-intajempariji ampatsini. Irirajiaqueate teeca irashintajitempariji icajemajiaqueriguete Quirishito, iriguentiquea ashintajari Quirishito imaica. ²³ Oquejetaca yamanantaquempi iriatimpa, imetojaventajiaquempitarite cameetsanijite irashintimentajiaquempinijite Aapani Irioshi. Imaicaquea imaica, aatoquea pishinetiri irashintajiajempi caquinte. ²⁴ Irootaquequeate nocantantajiaquempica, napiguemisantarijiateni, queroquea picoji-acani iroaqueraguete icajemajiaquempiguete Aapani Irioshi, ariquea picoca pintsipama-jiaquempariguete iriatimpa, ariqueate irio tsipamajiaquempine.

²⁵ Imaica irooquee nonquenquetsatacojiaque tequeratatirajaca omanquigajiguem-paji, cotanquitsiqueate teequea iriguenti cantenane Amajirote nonquenquetsatacojia-queero, inchiqiojiqueate naatimpa nonquenquetsatacojiaqueero, namenaquequea icav-intsajaquena Amajirote yagavejacaquena nonquemisantamajataqueri. ²⁶ Imaicaquea chooca atsipetagantsi, irootaquequea namenantacaca naatimpa oca: querocaca picocani imaica, aritaque pincoquempa. ²⁷ Choocaguete pimanquigare, aato pinintitsi povashi-antero. Oraqueate teeguete onchoocateji, aatoqueate pinintitsi pimanquigatempa. ²⁸ Cotanquitsiqueate pimanquigatempaguete cameetsataquequeate, aatoquea icatsima-timentimpirotsi Aapani Irioshi. Ariquea oquejetacaqueate manquigarentsi iroatimpa omanquigaquempaguete cameetsataquequeate aisa. Cotanquitsiqueate quericaca man-quigatanquitsineca irantsipetaquemparoqueate taaca opajitapae yatsipejigaca caquinte. Nonintavecaqueate aatosacona patsipemajajiga, irootaquequeate nocantantajiaquem-pica imaica.

²⁹ Imaicaqueate imaica, napiguemisantarijiate, manaqueate nocantajiaquempi na-menaque aatoquea osamanititsi agavejajigui antajiaqueneri Amajirote. Irootaque-queate noncantantajiaquempica imaica irirajia manquigajiatsica aatoqueate iroguen-tiqueate iquenquejajiguetsi imanquigarejia, manaqueate inquenquejamajiaquequeate quero incojiaquempani irisavicaventajiaqueronijite maasano ininqueca Amajirote. ³⁰ Ariqueate inquejejaquempaqueate irirajia shimampojancajianquitsica irisavicaven-tajiaqueeroqueate ininqueca Amajirote quejecaqueate teeca irishimampojancajempa. Ariqueate inquejejaquempaqueate aisa shinejianquitsica. Iriojiaqueate quericaca ash-intajianquitsica taaca opajitapae aatoqueate iroguenti ishineventatsi, quejetacatari tee

Irioshimajaca, apaniroquea icoca Aapani Irioshi ichoocataquequeate. Iriguentitarite choocatacaaqueero maasano choocaguetatsica, aisa aatimpajia iroguentiqueate achoocatashijiaque asavicaventajiaqueeroqueate maasano inintaguequeca. Aisa choocaqueate apaniromajaca Amajirote, irioquea Jesoquirishito. Iriguentitarite peacaaguetacaroca maasano choocaguetatsica, aisa iriguentiqueate anijacaajiacajica aatimpajia.

⁷ Cotanquitsiqueate choocaqueate tsaromentajigarica Aapani Irioshi teeca intsamajateroji oca nocamantaquempica. Iconoagarancaqueate irirajia amejavetatsica ishineventajavetariqueate irioshivijitashiguetaca, igantagatirajaqueate itsaroacagari irishecaciaquemparigueti iteshi yojocajiquenerica irioshivijitashirentsi, yamenajiaquequeate irishecaciaquemparigueti manaqueate irantajiaquequeate teeca oncameetsateji quejecaqueate manaca ishineventajiacariqueate irioshivijitashijiguetaca. ⁸ Iriraqueate Aapani Irioshi aatoqueate iroguenti ishineventajiajiqueate ashecaciaquemparigueti, aatonicate ishineventamajajigaritsi shecagigarica, aisaquea aatoqueate icatsimati-mentajiguiritsi teeca irishecajiguempariji. ⁹ Cotanquitsiqueate oraquea pincantajiaquegueti cameetsataque irishecajitaquemparigueti iteshi yojocajiquenerica irioshivijirentsi inchiqiuojitsitaja piquempevaetacaajigaritsija papiguemisantarite tequeratatarajaca intsajigueti. ¹⁰ Pamenejate arigueti iramenaquempigueti papiguemisantarite tequerasanotirajaca intsateji shecaquempiqueate tsovironaqui qui itsaromentajitarica irioshivijirentsi, ariqueate arica irinintaquequeate inquejetaquempaqueate iriatimpa, yamenaquempitarite aviguenti irapiguemisantarite. ¹¹ Arigueti inquejetaquempa imaica aviguenti quejetacaantaqueri, aviguentitarite iramenacotaquequeate pinquejetaquerogueti imaica, ariqueate irovashiantanaqueeroqueate iquemisantavetacagueti. Aviguentiquea quejetacaantaqueriquea papiguemisantarite imetojaven- taqueca Quirishito. ¹² Oraqueate pinquejetaquempagueti imaica pinquempevaeta- caaquemparigueti papiguemisantarite tequeratatarajaca intsateji, iriraqueate Quirishito iramenaquempiqueate mana pantaque teeca oncameetsateji, iriatimpaqueate teenica irininteji anquempevaetacaguempari apiguemisantarite. ¹³ Irootaquequeate nonqueje- tantanaquempaca naatimpa namenaquegueti manaqueate nonquempevaetacaquem- pari napiguemisantarite noshecatemparigueti iteshi, aatoja noshecatajaritsi aatonijite noquempevaetacagaritsi.

9

Quero icocani Paavoro isavicaventirogueti ininqueca Aapani Irioshi

¹ Naatimpaqueate naroguenti itigarancane Amajirote Jesoshi, namenaqueritari, aisa iriguentitarite tigarancaquena notsavetantimojiaquempiqueate pitsaromentantajianacarica. Nagavejaquequeate nantaque taaca opajita teeca incantimentenaroji iriatimpa. ² Arigueti choocagueti itsipa teeca irinintajigueti incantajiaquena itigarancane Quirishito, cotanquitsiqueate aviatimpajia pitsamajajiaque iriguentiqueate tigarancaquena, naroguentitarite quenquetsatacaajiaquempi pitsaromentantajiacarica. Aviguentijia imaica iramenajitaque intsatantajitaquempa naroguenti itigarancane Amajirote.

³ Jero imaica noncantajiaquerica irirajia tsojencaguevetaquenaca, noncantajia- queriquea: ⁴ Cameetsavetacaqueate irojocajitaquena intati nosheca jeroqueate nomire querocagueti oraniqui nonchoocaqueni notsavetantimoquerigueti. ⁵ Aisa cameetsavetacaqueate nomanquigataquempa manquigarentsi quemisantama- jataquerica Quirishito nontsipatanaquemparonijite nonquejejaquempariqueate itsipapae itigarancaneja Amajirote, jerijia iriguentijeguijiate, jerijia aisa Sepashi,* cotanquitsiquea teequea nonquejetero imaica. ⁶ Iriatimpajia teequea irishiacojigueti irisavicaventajiaqueronijite intsavetacotaqueri Quirishito, ¿arimpate pamenajiaque apaniro naatimpa nontsipataquempari Verenave nantsipeventajiaquemparo novegarajiaqueronijite nosheca? ⁷ Nonquejetacaguempiro: Iriraquea coareta ¿arimpate irovegarataque inchiqiuojitsita iriatimpa isheca? Ariqueate iquejetaca sevaguetiroca

* 9:5 Sepashi. Irootaque otsipa ivajiro Shimo Peerero.

ova ¿arimpaqueate isevatashitacaro intati teequea irishecatavaquemparo? Ariqueate iquejetaca quempoguujirica oveja iriatimpa ¿arimpaqueate incantimentajiqueriqueate irimiraquerogueti itsomija?

⁸ Imaica aatoja pijijiguitsi mana noquenquetsatacoguetaque intati itsatacantica caquinteguetsatsica. Irosatiquea iquejetantacaroca Aapani Irioshi itioncacaquerigueti Moishishini coramani. ⁹ Ocanquetari itioncanaqueca Moishishini: “Aatoquea pisavotsovatiritsija caapironcaari pisagorejacaantaquemparigueti tirigoqui.” Oraqueate ocanquegueti imaica, ¿arimpate apaniro iriguenti icavintsajaque Aapani Irioshi caapironcaaripae? ¹⁰ ¿Teempaquee aroguentijia oshiacaantaca? Jeeje, aroguentijia itionquimentajiaquero, irooriji iriraqueate quitencavatsatashitiroca tirigo† inquitataqueroniji itsaquequeate irojocajitajeneriqueate coajica onchoocatanaquegueti. Ariqueate iquejetaca isagorejajaitica itsaquequeate irojocagarantajiqueriqueate. ¹¹ Imaica naatimpajia notsatacaajiaquempirogueti Icanqueca Aapani Irioshi quejecaqueate manaca noquitaguujiaqueroqueate Icanqueca pishirequi. ¿Imaicaquee aatempa pagavejajigui pojocagarantajiaquena nosheca, noitsaare, taaca opajitapae? ¿Pamenajiaquerompa tee oncameetsateji? Cameetsavetacaqueate, oquejetacatari yojocagarantajitirigueti quitaguujiaatsica. ¹² Aritarite pojocagarantajiaqueneriqueate itsipapae tsatacaajiguimpica, naatimpajiaqueate caavijiqueate pojocagarantajiaquenamequeate. Cotanquitsiqueate naatimpajia teequeate noncantimajiguempiji pojocagarantajiaquena taaca opajitapae, manaqueate natsipetacaqueate aatoniji querica cantanquitsine mana notsavetanqueri Quirishito irovegaraquenerianijite, iroompa arica aato ininti iquemisantiro Quenquetsatsarentsi Oganejencatatsica tsavetacotaquerica. ¹³ Aviatimpajia pitsajiguitarite maasanoqueate amitacotantajiaatsica teemporoqui itsaromentajitarigueti Aapani Irioshi ishecagarantajiacaroqueate maasano yamapinijiguequeca irojocajitaqueneri Aapani Irioshi. Irirajiaqueate savicaventajiguica itajiaqueneriqueate iteshi viratsipae yojocajiquerica Aapani Irioshi aretarequi yaagarantajiaquequeate ishecajiacariqueate, iriguentitarite cantanquitsi Aapani Irioshi. ¹⁴ Ariqueate oquejetacaqueate imaica iriguenti cantanquitsi Amajirote maasano tsavetantajiguero Quenquetsatsarentsi Oganejencatatsica cameetsataquequeate irojocajitaqueneriqueate taaca opajita coguitejimotacarica, iriguentiqueate jocajiaquenerine irirajia itsavetantimojiaqueca.

¹⁵ Cotanquitsiqueate naatimpa teequeate noncantajiguempiji pojocajiaquena taaca opajita coguitejimotajiaquena, aisa imaica teequeate irooqueate nontionquimentajiguempiji noncantajiaquempi pojocajiaquena. Arimpate ometojanaquenugueti notase ometojenataquea, caavijiqueate anaaquequeate noshinemajacagueti notsavetantigueti intati aatoqueate taaca opajita namanimpitsi. ¹⁶ Naatimpaqueate notsavetantirogueti Quenquetsatsarentsi Oganejencatatsica teequeate nosemetimateji, iriguentitarite cantaquena Aapani Irioshi nontsavetantaqueroquea. Oraqueate aatogueti notsavetantiro jooshiatsi! ¹⁷ Oraquea inchiqiojitsimequea noninque naatimpa nontsavetantaquero ariqueate noncantaquemequea irovegaraquenaquea, cotanquitsiqueate teequea onquejetempaji imaica, iriguentitarite nintacaaquena Aapani Irioshi nontsavetantaquero. ¹⁸ Arisacanicate imaica ¿taaquea shinetacaaquenane? Teequea noninteji irovegaraquena nontsavetanterogueti Quenquetsatsarentsi Oganejencatatsica, mana noshinevaetacaqueate nagavejaque nontsavetantero intati.

¹⁹ Cotanquitsiqueate imaica teequea inchoocateji ashinquenaneca, aatoqueate querica cantana taaqueate nosavicaventaque. Inchiqiojitsitaquea naatimpa noquejetacaacaquea naroguentinica irajaanirejia maasano, natsipeventajiacariqueate maasano nonintamajataque nonquemisantacaajiaqueri intsaromentajiaquemparinijite Quirishito. ²⁰ Oraqueate notsipajiacarigueti nogonorojia joriojia noquejemajajiacariqueate iriatimpajia cameetsanijite nonquemisantacamentajiaquerinijite. Teenicaqueate noguijat-acovetajemparoji naatimpa itioncanaqueca Moishishini, cotanquitsiqueate noquejijiacariqueate iriatimpajia, noninquetarite nonquemisantacaajiaqueri. ²¹ Oraqueate notsipajiacarigueti teeca iroguijatacojigueroji itioncanaqueca Moishishini, ariquea noquejijiacari iriatimpajia cameetsanijite nonquemisantacaajiaqueri iriatimpajia aisa,

† 9:10 quitencavatsatashitiroca tirigo. Pamenero ivaantorite Irocashiqui 9.62.

cotanquitsiqueate nocancaniquea nonetsanamajatiro inintaguetica Aapani Irioshi, noquemisantaqueritarite Quirishito. ²² Oraqueate notsipajigarigueti quemisantajiguirica Quirishito tequeratatiraja intsamajajigueji, noquejejianacariqueate iriatimpajia cameetsanijite nontampishitacajaiaqueriniji arimpanijite inquemisantamajajianaque-riniji. Arimajatari noquejetaqueroqueate imaica quericaca notsipajiacaca manaque-ate noquejejiacari iriatimpa cameetsanijite nonquemisantagarantacaajiaquerinijite irimeshijiaquerinijite Aapani Irioshi. ²³ Nosavicaventaquerotarite Quenquetsatsarentsi Oganejencatatsica, irootaquequeate noquejetantacaroca imaica aisa nonintaquetarite nontsipajiaquempariqueate maasano icavintsajajiguica Aapani Irioshi.

²⁴ Aviatimpajia pitsajiguirotarite oraqueate ishiashiavijijigagueti iramenajiaque quericaca anaantanquitsineca, maasanoqueate ishiashijianaca, cotanquitsiqueate coajica teequeate maasano iramatsaejiteriji, apaniroquea yamatsaejitaqueri iriraqueate anaantamajatanquitsica. Imaica aviatimpajia pinquejejiacquempari iriraqueate anaantamajatanquitsica pintampishitashijiaqueroqueate taaca opajitapae inintacajaiaquempica Aapani Irioshi cameetsanijite irishineventaquempinijite. ²⁵ Maasanotarite nintajiat-sica iranaantajigue irishiashiavijijiaquegueti icomajamajajiacaqueate cameetsanijite iragavejimentajiaquenijite iranaantajiaqueniji. Iriatimpajia manaqueate inintajiaque iranaantajiaque cameetsanijite iramatsaetimentajitaquerinijite amatsaerontsi teeca onquishoteji teroncanajatsineca. Cotanquitsiqueate aatimpajia iroguentiqueate ancomajatashijiaquempaqueate cameetsanijite irishineventajiacaji Aapani Irioshi irojocajiacajiro amatsaerontsimajaca caarica teroncatsi. ²⁶ Irootaquequeate naatimpa noquejetantacarica shianquitsica teeca irishiashiavijitashitempaji intati. Aisa noquejetacariquea capojantatsica teeca incapojaguiteteji intati. ²⁷ Oraqueate onintacaaguevetaquenaca notsino teequea nonquemisantavaquero, naroquea cantavaquero quero oncoquempani. Manaquea nocomajamajatanaca intati. Namenaquetari naatimpa notsatacajaiaque-riqueate itsipa intsariventajiaquempari Aapani Irioshi, teequeate noninteji incanquena iriatimpa coajica: "Tee noshineventempiji."

10

Icantajiaqueri aatoquea itsariventajigaritsi irioshivijitashijiguetaca intati

¹ Imaica, napiguemisantarijiate, nonintaque nonquenquejacaajajempiro quero ocotacani paesatoniqui ichoocajiaquegueti novaesatinijiateni ontaniqui oquitamampororoipojaquegueti. Maasanoqueate omararotacojiaqueriqueate mararo, aisa maasanoqueate yagategateitanaquero Quentijani Quityoncajaro ocaranarejatanaquequea niganquija opijoncaguitetanaquequea. ² Ontaniqui mararoqui aisa quentijaniqui quejecaqueate manaca iviñacajajitaqueriqueate ironijite intsatantajitaquemparoca iriguenti iroguijatacojigüe Moishishini. ³ Ariqueate oquejetaca aisa maasano ishecajiacaroqueate manaa yojocajiaquenerica Aapani Irioshi. ⁴ Aisa maasanoquea imirajiacaroqueate oja yojocajiaquenerica Aapani Irioshi imotojataqueneriquea mapiqui. Oraqueate mapi iriguenti quejecaro Quirishito tsipajiacarica ontaniqui oquitamampororoipojaquegueti. ⁵ Maasanoquea yamenajavecaroquea maasano ocatica, cotanquitsiqueate iriraquea Aapani Irioshi tee irishineventajiguempariji oshequini yamenajiaquerigueti teequeate inquemisantamajajigueriji, irootaquequeate imetojantajianacaquea ontaniqui oquitamampororoipojaquegueti.

⁶ Ariqueate oquejetacaquea imaica cameetsanijite amenajiaquero aatimpajia aatonijite aquempejigaritsi iriatimpajia anintajiaque antajiaque teeca irininteroji Aapani Irioshi antajiaque. ⁷ Irootaquequeate nocantantajiaquempica aviatimpajia imaica aat-oquea pitsariventajigaritsi irioshivijitashijiguetaca intati pinquejejiacquempariqueate iriatimpajia, iconoagarantajiacatarite itsariventajiacari. Ariqueate ocantaquequeate Itioncacaantaqueca Aapani Irioshi ocanti: "Iriatimpajia isavicaventajiaqueroqueate

ishecajiaca aisa imirajiaca, ariqueate iteroncajianaqueerogueti icatintiitanaca itontoroncaventajiaqueri irioshivijitashitaca itsarorentajiacariqueate.”⁸ Aisa aatoquea oashitan-tajigui aquempejigaritsi iriatimpajia yoashitantajiguigueti ariqueate imetojajiaque-queate aparo savincaguiteri 23,000.⁹ Ariqueate oquejetaca aisa aatoqueate amenan-tajigaritsi Amajirote. Aatoquea aquejejigari iriatimpajia iconoagarantajiacaqueate yamentajiacari irosatiquea itigarancantajiacanarica camaarini yatsicajiaqueriquea, ariqueate imetojajianaque.¹⁰ Jeroqueate aisa aatoqueate atsojenquitiritsi Aapani Irioshi irioca itsipa, aquejejigaritsi iriatimpajia iconoagarantajiacaqueate itsojenquitsi-jiaqueri, ipincajiaquero yojocajiaquenerica icantajiaquero tee oncameetsateji, ariqueate itigarancajiaqueneriqueate irashivantite imetojajiaqueri.

¹¹ Ariqueate iquejejaqueriqueate Aapani Irioshi imaica anquenquejajiaqueronijite, ariqueate itioncacojiqueroqueate antsajiaquenijite aatimpajia choocajiaatsica imaica pajiniguete aapojempa savincaguiteri veparatapojaatsineca. Ininquetarite Aapani Irioshi antsajiaquero aatoniji aquejejigaritsi iriatimpajia.¹² Pamenavequempaguete pagavejaque pitampishitashiquero quempevaerentsi, ¡shoshoh! Pagamajamajaque-mparoja aatoniji piquempevaeta.¹³ Taacaqueate opajita coraquetashijiaquempica teequeate apaniro oncoraquetashijiguempi aviatimpajia, ocoraquetashijiguiriquea aisa maasano caquintejiatsica. Cotanquitsiqueate Aapani Irioshi icoguitanitari inetsanatiro icantica, paventajiaquempariguete aatoquea yoguishinejiro oncoraquetashijiaquem-pime agavejajianaquempimeca, manaqueate intsatacajiaquempiqueate quero pincoji-quempani aatonijite agavejajiguimpi taaca opajitapae coraquetashijiaquempica.

¹⁴ Irootaqueetari nocantantajiaquempica imaica, nopintsamajajiaca, aatoqueate pit-sarorentajigaritsi irioshivijitashijia intati.¹⁵ Manaquea noquenquetsatacajiaquem-piquea imaica notsaquetari pinquemajivaquena, aisa pitsajiaque pincantajiaque arica nocantamajataque arica tee.¹⁶ Oraqueate atsipatavacajiacaguete aquenquetsatacajia-queriqueate Aapani Irioshi ashineventajiacaro amire cantacotaqueroca iriraja Quirishito osotoajatanaqueguete imetojaventajiacajiguete. Oraqueate aquejejiacaguete imaica man-aqueate iramenajitaquero atsipatavacajia aquenquejajiaqueroquea iriraja shetaque-roca aguempevaereja. Ariqueate oquejetaca aisa ashecajigarogueti pan quejecaroca itsino manaquea iramenajitaqueroquea atsipatavacajia aquenquejajiaquero yompa-jacojitaqueriguete.¹⁷ Oshequi acarajivecaquea aatimpajia tsarorentajigarica Quirishito, cotanquitsiqueate maasanoqueate atsipatavacajiacaqueate ashecajiacarogueti ocatita pan, aparatarite ocanca. Irootaquequeate maasano aatimpajia ashecajigarogueti atsi-patavacamajajiacaqueate quejecaqueate apaniroca achoocajiaque.

¹⁸ Pinquenquejajiguerijate ichoviquijiani Ishiraerini queroqueate icojigani. Irraque-ate shecajigarica iteshi viratsipae yojocajiquenerica Aapani Irioshi aretarequi itsipama-jatariqueate Aapani Irioshi.¹⁹ Cotanquitsiquea iriraqueate irioshivijitashijiguete intati teequeate noncanteji arimaja irioshivaequempate, aisa teequeate noncantempi iri-raqueate viratsipae yojocajiguete nirica icantashititaca, manaqueate iquejetacariquea itsipapae iteshi.²⁰ Manaqueate nocanque irirajiaqueate jocajiguinirica iteshi irioshiv-ijitashijia iriguentiquea yojocaquene ampatsinipae, teequeate iriguenti irojoquene Aapani Irioshi. Naatimpaquea teequea nonintimateji pintsipajiaquempari ampatsini-pae.²¹ Oraqueate pimirajigarogueti vinoja quejetacaroca iriraja Amajirote, aato pagaveji pimiraventajigari aisa ampatsinipae pishineventajiaquempari. Ariqueate oquejeta-caqueate aisa pitsipatavacajigaguete pishecaventajigariguete Amajirote piquenquejaji-aqueriguete imetojaventajiacajiguete, aatoqueate pagavejimajiguetsi pishecaventajigari aisa ampatsinipae.²² ¿Arimpa anintajiaque incatsimajiacaji Amajirote ashineventaji-aquempariguete irioshivijitashijitaca intati? ¿Arimpate atampishimajati anajiaqueri Amajirote?

²³ Arimajaqueate chooca taaca opajitapae teeca incantimenteroji Amajirote, cotan-quitsiqueate querocaca anejajiaquea manaqueate ovashiantacajaiacajiro atsaroven-tamajajigariguete Amajirote, teequeate oncameetsateji antajiaqueroquete. Teequeate incantimentajiavetajiroqueate, cotanquitsiqueate querocaca anejajiaquea ariguete aato otampishitacajiaquiritsi apiguemisantarijiateni inquemisantamajajianaqueniji,

arisacanicate aatoqueate antajiguirotsi. ²⁴ Aatoqueate aparo aquenquejatsi aatimpa, anquenquejajiaqueriqueate apiguemisantarijiate aisa.

²⁵ Cameetsataquequeate pishecajiaquempariqueate iteshipae yojocajiqueca ontaniqui yovegaratapinijitigueti iteshi, aatoqueate picoacojiguiritsi queroqueate yaajitaquerini aatonijite piquenquejajiguirotsi aricaqueate cameetsataque pishecajiaquemparigueti arica tee. ²⁶ Maasanotarite quepatsi jeroqueate aisa maasano choocaguetsica iriguentiquea ashintaro Amajirote.

²⁷ Arigueti incajemajiaquempi teeca intsaromentempariji Quirishito irishecaquem-pagueti pincavintsajajiaqueriqueate aviatimpajia poajianaque, cotanquitsiqueate pishecajiaquemparoquea taaca opajita yojocajiaquemfica. Aatoqueate picoacojiguiritsi iteshi aricaca yojocajivetacanari irioshivijitashijigueta intati aatonijite piquenquejajiajirotsi aricaca cameetsataque pishecajiaquemparigueti aricaca tee. ²⁸⁻²⁹ Cotanquitsiqueate oraqueate choocagueti cantajiaquempineca incanquegueti: "Iricatica irica iteshi yojocajivetacanarica irioshivijitashigueta intati", ariqueate aatoqueate pishecajigaritsi, manaqueate pinquenquejajiaqueriqueate irira camantajiaquemfica. Iriatimpaquea yamenaquetarite arica tee oncameetsateji irishecaquemparigueti irootaquequeate ican-tantacaca imaica. Iroosacanicate arigueti yamenaque iriatimpa tee oncameetsateji irishecaquemparigueti, aatoqueate pishecataritsi. Pishecajivequemparigueti aatoqueate queroca icojiguimpitsi pishecajiaquemfica, cotanquitsiqueate irioqueate pinquenquejajiaque irira camantajiaquemfica aatonijite piquempevaetacaimajigaritsi.

Cotanquitsiquea arica chooca cantanquitsineca: "¿Querocaca ocotacani tee oncameetsateji noshecataquempari iteshi yamenaqueca itsipa arica teeca oncameetsateji, teenicaqueate incantimenteroji Aapani Irioshi? ³⁰ Nocancaniquea noshecatarigueti iteshi noshineventariqueate Aapani Irioshi notsaquequea iriguenti jocaquenari. ¿Querocampaquea oncoquempa incantajiaquena tee oncameetsateji noshecataquemparigueti?" ³¹ Imaicaqueate imaica noncantajiaquemfiqueate quero ocotacani. Maasanoqueate taaca opajita pantajiaque pamenacajiaqueriqueate maasano arimaja yagavejamajati Aapani Irioshi, iroogueti pishecajiacagueti, iroguentigueti pimirajiacagueti, aisa taaca opajitapae pantajiguca. ³² Aatoqueate aquempevaetacaajigaritsi apiguemisantarite. Aisa aatoqueate antajiguetsi taaca opajitapae iramenajiacajigueti teeca intsaromentajiguempariji Quirishito ariqueate aato inintajiguetsi intsaromentajiguempari iriatimpajia aisa, iriguenticaqueate joriojia, iriguenticaqueate teeca irijorijoigueti. ³³ Ariqueate noquejetacaquea naatimpa manaquea nonintaque noshinetacaajiaquempariquea maasano, teequeate narosati quenquejaatsine, iriguentiqueate noquenquejajiaque itsipa queroquea noncojiaqueri cameetsanijite irimeshiimentajiaquerinijite Quirishito.

11

¹ Noninquequeate poguijatacojiaquenaqueate pinquejejaquena naatimpa noguijatacotirigueti Quirishito.

Quero oncoquempani manquigarentsi amanaquerigueti Aapani Irioshi icapiocajiacagueti

² Noshineventajiaquemfiqueate namenaquegueti picancaniquea piquenquejajiaquena, aisa picancani piquenquejajiaquero notsatacajiaquemfica pinetsanajianaqueroqueate. ³ Cotanquitsiquea jeroquea ocatica noninque pintsajiaque: iriraquea shirampari irio cantaquerine Quirishito quero incoquempani, oraqueate manquigarentsi irioquea cantaquerone manquigataroca, ariqueate iquejetacaquea Quirishito iriatimpa irioquea cantaquerine Aapani Irioshi.

⁴ Irootaquequeate iriraquea shirampari iramanaquerigueti Aapani Irioshi ontaniqui icapiocajiaqueti aisa intsavetanterogueti Icanqueca Aapani Irioshi, teequea irametemparoji intatainatempa. Oraqueate intatainataquempagueta quejeaqueate iriguentica iquemisanti irapicaquinteteni, teequea iriguentiquea inquemisantamajateji Quirishito. ⁵ Cotanquitsiqueate oraqueate manquigarentsi iroguentiquea ametaro ontatainataquempa amanaquerigueti Aapani Irioshi picapiocajiaqueti irosati ontsavetanterogueti icanqueroca. Oraqueate aatogueta

otatainatatsi manaqueate quejetaca teeca onquemisanteriji manquigataroca aisa quejetacaquea manaca yojocaguinajiqueroqueate. ⁶ Oraqueate aatoguete onintitsi ontatainataquempa iintsija ojocaguinataquempa. Cotanquitsiqueate teequea ametemparoji manquigarentsi onquejetaquempari shirampari, ompashivenquempatari ojocaguinatacanquempaguete irooca aamajaqueroguete omae, irootaquequea nocantantacaca iintsija ontatainataquempa.

⁷ Cotanquitsiqueate irira shirampari aatoqueate itatainatatsi, aritarite iquejevecariqueate Aapani Irioshi, aisa irootaquequeate iramenantajiquemparooca arimaja yagavejamajati Aapani Irioshi. Oraqueate manquigarentsi ontatainataquempaguete irootaquequeate iramenantajitaquemparooca yanaantaque shirampari. ⁸ Iriquetitarite ipeacaaca Aapani Irioshi shirampari, ariqueate yaaqueroqueate imerequi ipeacaantacaro manquigarentsi, teequeate iroquetiqueate impeacaguempa manquigarentsi. ⁹ Teequea impeacagueriji shirampari ashi manquigarentsi, iroguentiquea ipeacaanariquea manquigarentsi irashi shirampari. ¹⁰ Irootaquequeate imaica cameetsataque ontatainataquempa manquigarentsi cameetsanjite iramenajiaqueronijite irashivantijitete Aapani Irioshi arimajaquea oquemisantaqueriqueate manquigataroca. ¹¹ Cotanquitsiquea atsaroventajiacariguete Amajirote yamenajiacajiquea ariqueate aquejetavacaajiacaquea: teequeate inchoocatashitajempa intati shirampari, ariqueate oquejetacaqueate manquigarentsi teequeate onchoocatashitempa intati. ¹² Iroorijite iroaqueraguete ipeacaaroguete Aapani Irioshi manquigarentsi iroguentiquea ipeacaantacaro imerequi shirampari, ariqueate iquejejiacaquea shirampari iroguentiquea oajiaqueri manquigarentsija, cotanquitsiqueate iriguenti anijacaajiaqueriqueate Aapani Irioshi peacaaguetacaroca maasano. ¹³ Iintsijate pamenajigueroqueate aviatimpaja: ¿Ari cameetsataque amaneri Aapani Irioshi manquigarentsi aatoguete otatainata? ¹⁴ Aatimpaja teequeate amejiguemparoji irontijavenajaquempa quea shirampari, impashiventacaaquemparoquea. ¹⁵ Cotanquitsiqueate oraqueate manquigarentsi irooquea iroguenti cameetsataque quea ontijavenajaquempa queate. Irootarite oshineventacaqueate iroatimpa, aisa iroguentitarite ochoocatashitaque omae onticaacotaqueroqueate aatonijite ejeguinatitsi. ¹⁶ Cotanquitsiqueate choocaguete cantanquitsineca teequea ariquea onquejetempaji imaica, nonintaque intsataque naatimpajiaquea irooquea namejigaquea noquejejiga imaica. Ariquea iquejejiacaquea aisa maasano tsaroventajigarica Aapani Irioshi querocaguete icapiocapiniija.

Paavoro icantomajiaqueri Corintoquitica

¹⁷ Cotanquitsiqueate oraquea noncantajiaquempiguete imaica aatoqueate noshineventajiguimpitsi manaqueate noncantomajiaquempiquea, irosatitarite picapiocajaguete tee oncameetsateji pantajiaqueca, teequea pintampishitavacaajiguempa pinquemisantamajianaqueniji. ¹⁸ Noquemacojiaquempitarite irosati picapiocajiacaguete teequeate pinconoavacaamajajiguempaji. Naatimpa nocantanaque arimajacampate. ¹⁹ Aritarite oquejetantanacaca imaica pitsinampirejavacaantajanacaca irootari yamenantajitacaca queriquea caavijica yanaaque itsaroventamajatari Amajirote. ²⁰ Irootaquequeate picapiocajiaquetacaqueate pishecaventajiacariguete Amajirote piquenquejiaqueriguete imetojaventajiacajiguete, teequeate ariquea pinquejetacaajiguemparo itsatacajaiacajica iriatimpa, quejevaecaqueate teeca iriguenti pinquenquejigie. ²¹ Teetari poguivavacaajiguempaji pintsipatavacajiaquempa pishecajiaquempaguete. Manaqueate pishecatapitsatavacaajiacaqueate pamajiavetacaca. Iconoagarantajiacaqueate tee inquemajiguempaji, itsipaqueate mana iquenajiaquero intati imirajia irosati ishinquitantajanaca. ²² Aatoquea piquejejiguiro imaica. Pamenajavecaquea piquejejiaceroguete imaica arimequeate pishecajiaquempame pitsovironaquitepaequi. Oraqueate piquejejiaceroguete imaica mana panaimanajiaqueriquea papiguemisantarijiate, aisa mana poguipashiventajiaqueriquea coguitejacojianquitsica. Imaica ¿queroqueate noncojiaquempi? ¿Arimpa noshineventajiaquempiqueate? Aatoquea noshineventajiguimpitsi piquejejiacaguete imaica.

Quero ancojiaqueroni ashecaventajiaquemparigueti Amajirote anquenquejajiaquerigueti imetojaventajiacajigueti

²³ Notsatacajaivequempitarite coramani itsatacaquenaca Amajirote, nocanti: Iroompa opitsecanaquogueti iracaantantajiquemparica Amajirote Jesoshi irimetojantajitaquemparica, yaaqueroqueate pan yajiricaquero, ²⁴ icantiquea: “Arioteesa, Aapani.” Ariqueate icotarejaquero, icanti: “Paajiavaqueja pishecajiavaquemparo. Iroguenti notsino,* metojaventajiaquempineca. Pinquejepinijiaquempa imaica pishecaventajiaquena pinquenquejajiajenaqueate naatimpa.” ²⁵ Ariqueate iteroncanaqueroqueti ishecajiacagueti, iquejetaqueroquea chovintyoriqui, yaacotaquero, icanti: “Ocatuca choocatanquitsica chovintyoriquiqui ocantacoquero iroaqueraro paaquito† nonetsanataqueca osotoajatanaguogueti noriraja. Pinquejepinijiaquempa imaica pimirapinijiaqueroqueti, pinquenquejajiajenaqueate naatimpa.” ²⁶ Aritarite pishecatapinijiaquemparogueti ocatica pan, pimirajiaqueroqueti choocatanquitsica chovintyoriquiqui, ariquea irooquea pintsavetacotantemparoca imetojane Amajirote arejevaetempa incoraquetantapojajempaca.

²⁷ Irootaquequeate imaica nocantantajiaquempica quericaca shecatashitaquemparoneca intati, irooca irimirashitaquemparogueti intati aatogueti iriguenti iquenquejitsi Amajirote imetojaventajiacajigueti, inchiquiojitsitaquea inquejetacaanquempa iriatimpa, icovaeguishequerotarite itsino jero aisa iriraja Amajirote. ²⁸ Irootaquequeate quericaca nintanquitsineca irishecaquemparo pan aisa irimiraquero vinoja inquenquejajerigueti Amajirote imetojaventajiacajigueti iroquetiquea inquenquejamajaquequeate, iroompaqueate arigueti icomajamajaca cameetsataquequeate irishecaquemparo aisa irimiraquero. ²⁹ Queriacatari shecatashitaquemparoneca intati, aisa irimirashitaquemparogueti intati, aatogueti iquenquejirotsi iroguenti ocantacotaque itsino Amajirote, inchiquiojita inquejetacaantaquempa iriatimpa irishecataquemparogueti aisa irimiraquemparogueti, incatsimatimentajiqueriquea. ³⁰ Irootaquequeate pojoquijigarantantajianacaca, itsipaquea teequeate intampishijigueti, itsipaquea mana imetojajiaque. ³¹ Oraqueate iroquetitaquea amenashirentamajajiaquempaqueate acomajajiacaca ariquea querocampa incatsimatimentantajiacajica Aapani Irioshi. ³² Cotanquitsiqueate oraquea iramenajiacajigueti Aapani Irioshi antajiaqueroqueti teeca oncameetsateji, incantomajajiacajiqueate aatonijite itsipatacaantajajiritsi teeca intsaromentajiguempariji incatsimatimentajiaquerigueti coajica.

³³ Irootaquequeate imaica, napiguemisantarijiate, nocantantajiaquempica oraqueate pincapiocajiaquempagueti pishecaventajiaquemparigueti pinquenquejajajerigueti Amajirote imetojaventajiacajigueti poguivavacajiaquempa pintsipatavacajiaquempa. ³⁴ Quericaqueate taseanquitsica irishecataanquempa itsovironaquitequi aatonijite icatimatiro ontaniqui picapiocajiacagueti, aatonijite incatsimatimentiri Aapani Irioshi. Oraqueate otsipapae picoacojiaquenaca noncamantajiaquempiquea coajica noanaquogueti nonejajiaquitempigueti.

12

Quero icota Ishire Aapani Irioshi yagavejacaajiacajigueti

¹ Imaica napiguemisantarijiate, noninque noncamantajiaquempi quero icota Ishire Aapani Irioshi yagavejacaajiacajigueti apaniopae. Noninque pintsamajajiaquero aatoniji picomijigaro. ² Aviatimpajia pitsajiaquetarite tequeratagueti pintsaromentajiguempariji Quirishito manaquea yamatavijajiaquempiqueate ampatsini pishineventantajiacarica irioshivijitashijiguetaca intati teeca inquenquetsajigueti. ³ Irootaquequeate nonintantacaca pintsajiaque teequeate iriguenti quenquejacaguerine

* 11:24 Iroguenti notsino. Pamenero Mt. 26.26-28. † 11:25 Oraquea paaquito iroguenti icantamajajitirica itsipa irinetsanamajajitenerica. Ocaticaquea iroaqueraro paaquito icantajiacajiquea Aapani Irioshi irishetacotajeri igovaeguisheere maasano aventaventaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

Ishire Aapani Irioshi quericaca cantanquitsineca: “Tee incameetsateji Jesoshi.” Aisaaquea aatoqueate querica cantanquitsineca inchiquiojiqueate: “Jesoshi iriguenti Majiromtamajatsica”, aatoguete iriguenti quenquejacaguiri Ishire Aapani Irioshi.

⁴ Icantashitaticajaiavecajiqueate yagavejacaajiacajiguete apaniropae, cotanquitsiqueate iriguenti agavejacaajiacaji Ishire Aapani Irioshi. ⁵ Aisa acantashitaticajaiavecaqueate antajiaqueca apaniropae, cotanquitsiqueate apaniroqueate antajiaqueneri Amajirote. ⁶ Teequea anquejetacaamajajivetemparoji querocaguete icojiguiro itsipa yantajiguiguete, cotanquitsiqueate iriguentiquea agavejacaajiacaji Aapani Irioshi apaniropae. ⁷ Yagavejacaajiacajitarite Ishire Aapani Irioshi apaniropae cameetsanijite amitavacaimentajiaquempanijite arimpanijite anquemisantamajajianaqueri Amajirote. ⁸ Apaniroquea yagavejacaqueriqueate Ishire intsavetanquero itsatacaquerica. Itsipaqueueate iroguenti yagavejacaqueri intsatavaquero itsavetantajiquerogueti Icanqueca Aapani Irioshi ariqueate intsatacaantanaquequea iriatimpa. ⁹ Itsipaqueueate iroguenti yagavejacaqueri intsamajaque caaviji yagavejamajati Aapani Irioshi yaventashirentamajatanacarica. Ariqueate itsipa iroguenti yagavejacaqueri irogueshijiaqueri joquijiguetatsica. ¹⁰ Iconoagarantajiacaca itsipa iroguenti yagavejacaajiaqueri ironigaantajiaquero oacaantantatsica intati. Itsipaqueuea iroguenti yagavejacaajiaqueri intsavetanquero icanquerica Aapani Irioshi. Itsipaqueuea iroguenti yagavejacaqueri intsatavaqueri quenquetsatsica iriguentica agavejacaqueri Ishire Aapani Irioshi iriguentica agavejacaqueri ampatsinipae. Choocaqueate itsipa iroguenti yagavejacaqueri inquenquetsatantaguetaquemparoji otsipapae quenquetsatsarentsipae teeca inquenquetsatantajitemparoji, ariqueate itsipa yagavejacaqueriqueate intsaque impitsocavaquero cameetsaniji intsatimentajiaqueronijite maasano queroqueate icanti. ¹¹ Pamenequeate imaica yagavejacaajivetacajiqueate taaca opajitapae cotanquitsiqueate iriguentiqueate Ishire Aapani Irioshi agavejacaajiacajiquea, apanirotarite icota. Yagavejacaajiacajiqueate apaniropae antajiaque taaca ininqueca iriatimpa antajiaque.

¹² Apaniroqueate ochoocavetaca itsino caquinte, cotanquitsiqueate choocaguequeate iraco, iguiti, iguempita, maasano. Ariqueate aquejejiacaqueate maasano aatimpajia tsariventajigarica Quirishito oshequiavetacaqueate aisa acantashitaticajaiavetaca, cotanquitsiqueate apaniroquea ichoocataque atsariventajiacaca quejetaca apaniroquea achoocajiaque. ¹³ Ariqueate oquejetaca aisa apanirotarite icotaca Ishire Aapani Irioshi viñacajatacaajiacajica, ariqueate atsipatavacaajiacaqueate quejeca apaniroca achoocajiaque. Aconoagarantajiavecaqueate aroguentijia jorioria aisa guiriegojia. Ariqueate oquejetaca aisa aconoagarantajiavecaqueate manaquea yaajanjitacaji, aisa aconoagarantajiavecaqueate manaquea achoocajiaque intati, cotanquitsiqueate ichoocashirentajiacajiguete Ishire Aapani Irioshi aquejetavacaajiacaqueate.

¹⁴ Oraquea itsino caquinte teequea manaquea onchoocatashitempaji yamenantaca intati. Choocaqueate aisa yajiricantaca, jero aisa yanijitantaca, jeroqueate aisa iquemantaca, maasano. ¹⁵ Oraqueate onquenquetsataquemeguete iguiti oncanquemeguete: “Iroorijite imaica tee nonquejetemparoji iraco, teequea irashintenaji”, aatoqueate yovashiantajiro, igantagaqueate irashintemparoji. ¹⁶ Iroomeguete quenquetsatanquitsineme iguempita oncanquemeguete: “Iroorijite tee nonquejetemparoji iroquija, teequea irashintenaji”, aatoquea yovashiantajiro, igantagaquea irashintemparoji. ¹⁷ Iroomeguete choocatanquitsine intati iroquija, ¿taaquea inquemantaquemepame? Ariquea oquejetaca aisa iroomeguete choocatanquitsine intati iguempita, ¿taaquea inquemajencatantaquemepame? ¹⁸ Cotanquitsiquea Aapani Irioshi inetsanataquero atsino ipeacaacarogueti, irootaquequeate ochoocatantaguetacaca aquemantajiacaca, aisaaquea amenantajiacaca, jeroqueate aisa anijitantajiacaca, maasano. Aisa ichoocatacaaguetacajiroqueate querocaguete ininqueca inchoocatacaacajiro. ¹⁹ Oraqueate iroomeguete choocatanquitsine intati amenantaca ¿querocampate onchoocaqueni atsino? ²⁰ Cotanquitsiquea teequea ari onquejetempaji imaica, manaquea ochoocagueataqueate aisa aguít, aguempita, aco, maasano. Oquejeguetacaqueate imaica ochoocagueataqueate maasano, cotanquitsiquea apaniroqueate ochoocaque atsino.

²¹ Oraqueate aquija aatoqueate ocantimajiguirotsi aco: “Teequeate nonintempiji.” Ariquea oquejetacaquea aguito iroatimpa aatoquea ocantimatiro aguiti: “Teequeate nonintempiji.” ²² Choocatarite atsinoqui taaca opajitapae teeca ontampishiteji, cotanquitsiqueate anintamajajiaqueroqueate, teequea onchoocatashitempaji intati. ²³ Ariquea oquejetaca aisa teeca anintajigueji iramenajiguequero, caavijiqueate aco-majamajajiaqueroquea irootaquequeate aquitsaatantajiacaca aatonijite yamenajiguetirotsi, apashiventacajaiacarotarite. ²⁴⁻²⁵ Cotanquitsiquea oraquea teeca ampashiventacajaiguemparoji teequea anquejejugeroji imaica. Ariqueate iquejetacaajiacajiqueate Aapani Irioshi aatimpajia tsaromentajigarica, itsipatacaantajiacaji cameetsanijite ancavintsajajiaqueriniji caarica inintajiveta aatonijite acatsimatavacaajiansi antsinnampirejavacajaiacquempaueate, manaquea anquenquejavacajaiacquempauea ancavintsajava-caajiaquempa intati. ²⁶ Ariguetei yatsipetacaguetei apaniro, maasanoqueate atsipejiaca. Oraqueate managuetei ishineventajitacaruetei itsipa, ariqueate aquejejiacaquea aatimpajia maasano atsipajiacariqueate ashinejiacaquea.

²⁷ Irootaquequeate aviatimpajia imaica pitsaromentajiacaruetei Quirishito piconoavacaajiacaqueate quejecaquea apaniroca pichoocataque, piquejejiacarotarite itsino Quirishito. ²⁸ Avegarajiacaquea oshequi tsaromentajigarica Quirishito cotanquitsiqueate Aapani Irioshi inintacajiacajiqueate apaniropae antajiaqueneri. Iriquetiquea yoguijivajiaquequeate itigarancanejia Quirishito intsavetantajiaque-riqueate. Itsipajia inintacajiaque tsavetantajiaqueroica icantajiaquerica. Ariqueate iquejejiacquericquea aisa tsatacaantajiaqueroica Iguenquetsatsare Aapani Irioshi. Ariqueate iconoagarantajiacaqueate itsipa inintacajiaqueri ironigaantajiaquero oacaantantatsica intati. Itsipaqueate manaqueate inintacajiaqueriqueate irogueshijiaqueri joquijiguetatsica, itsipaquea manaquea incavintsajantajiaque, itsipaquea manaquea incantajiaqueriqueate irapiguemisanterite taacaqueate irantajiaque, ariqueate itsipa manaquea inquenquetsatantajiaquemparoqueate otsipapae quenquetsatsarentsipae teeca inquenquetsatantajitempaji. ²⁹ ¿Arimpa maasano iriguentijia itigarancanejia Quirishito? ¿Arimpa maasano iriguentijia tsatacaantajiguiroica Iguenquetsatsare Aapani Irioshi? Ariquea oquejetacaquea aisa ¿arimpa maasano yagavejajiaque ironigaantajiaquero oacaantantatsica intati? ³⁰ ¿Arimpa maasano yagavejajiaquequeate irogueshijiaqueri joquijiguetatsica? ¿Arimpa maasano iquenquetsatantajiacaro otsipapae quenquetsatsarentsipae teeca inquenquetsatantajitempaji? Ariquea oquejetacaquea aisa ¿arimpa maasano yagavejajiaquequeate impitsocajivaquero cameetsaniji intsatimentajiaqueronijite maasano queroca icanti quenquetsatantaroca? Teequeate. ³¹ Cotanquitsiquea pinintamajajiaquequeate iragavejacaajiaquempi Aapani Irioshi pantajiaqueneri caavijica anaantaque ontampishitacajiaqueriniji papiguemisanterite. Cotanquitsiquea choocaqueate otsipa noninque nontsatacaajiaquempi imaica, caavijiqueate oganejencamajataca.

13

Quero icotani pintsatantatsica

¹ Ariguetei nonquenquetsatantaguevetaquemparoqueate otsipapae quenquetsatsarentsipae irooca iguenquetsatsare irashivantijitete Aapani Irioshi, cotanquitsiqueate aatoguetei nopintsamajatanta, manaqueate noquenquetsatamampeacaquea intati, quejecaqueate cavorejamentatatsica iteencajitiroguetei opojimatanaquequea teen teen teen, teequea queroca oncanteji. ² Aisa manaca nagavejavetaquempaguetei nontsavetan-tavequemparo icanquenaca Aapani Irioshi, cotanquitsiqueate aatoguetei nopintsama-jatanta, teequea noncameetsatimateji. Ariqueate oquejetaca aisa ariguetei nontsagueve-quemparo taaca opajitapae teeca intsajivetemparoji, managuetei nontsitacaguevequemparo nontsaguevequemparoqueate maasano, cotanquitsiqueate aatoguetei nopintsama-jatanta, nontsatashiquemparoquea intati. Aisa managuetei nontsavetaquemparoqueate yagavejajiaque Aapani Irioshi iragavejacaquena nogaaquero otsempi, cotanquitsiqueate aatoguetei nopintsamajatanta, manaquea nontsatashiquemparoqueate intati, teequea

noncameetsatimateji. ³ Ariqueate oquejetaca aisa arigueti nojocashijiavetaquenem-
 pari coacojianquitsica maasano nashintaguevetaca, aisa arigueti incatsimatimenta-
 jiquena nontsaroventaquemparigueti Aapani Irioshi intaimentantajiquenaca, cotan-
 quitsiqueate aatogueti nopintsamajatanta, ¿arimpa irishineventaquenaquea Aapani
 Irioshi?

⁴ Iriraquea pintsatantamajatatsica yatsiperejacoca intati, aisa caavijiquea icav-
 intsajanti. Teequea incatsimatimenteriji itsipa yamenaquerigueti yanaaqueri, tee-
 quea irisemeteji, aisa teequea iraventacotimatempaji. ⁵ Iriraquea pintsatantama-
 jatatsica ichooaque cameetsa, manaquea yamenaquerogueti guipashiventajagueteri-
 ca itsipa aatoquea iquejetiro imaica. Teequeate apaniro inquenquejacotempaji iri-
 atimpa. Teequeate incatsimateji, aisa teequea incoguitempani inquenquejaguiteroni
 querocagueti icoquerini itsipa, manaqueate ipeacotajaro intati. ⁶ Iriraquea pintsatan-
 tamajatatsica yamenaquegueti yantajitaqueroqueate teeca oncameetsateji, teequeate
 oshinetacaguempariji, manaquea oshimampojanacaanacari intati. Cotanquitsiqueate
 iroguentigueti yantajitaque cameetsaguetatsica irosati iquenquetsajitaquerogueti ari-
 majatatsica, ariquee irishinevaetanaquempa. ⁷ Querocagueti incovetaquempariquea
 igonoro irantsiperejacotemparo, manaqueate incoguitempani impintsamajataanaquem-
 pari. Arigueti inquemacotaqueri injashinajitacari aato yaquiro iriatimpa, manaqueate
 incantanaque intati: “Jmm arica tee inquejetempaji iriatimpa.” Arigueti irame-
 navetaquemparo yantaguishetaque teeca oncameetsateji manaquea inquenquejanaque
 intati: “Arica impishoncajero coajica.” Arigueti irantsipetacajaitempari icancaniquea
 impintsatantanaquempa.

⁸ Aatoquea opega pintsamajatagantsi. Intsavetantajivetemparogueti icanquerica Aa-
 panni Irioshi, ari ovegarapojempa; inquenquetsatantajivetemparogueti quenquetsatsar-
 entsipae teeca inquenquetsatantajitemparoji, majere incantanajempa; intsajiguevetem-
 paca, mana oshetajempa intati. ⁹ Imaicaquea imaica teequea antsamajajigueji,
 aisa teequea antsamajajigueji antsavetantajigueroji Iguenquetsatsare Aapani Irioshi.
¹⁰ Cotanquitsiquea oraquea coajica incantashitiamajiacajigueti Aapani Irioshi, aato-
 quea aquejejijaa imaica teemajaquea antsajigueji. ¹¹ Oraqueate chaajaniquitirajanagueti
 noquejemajatacariqueate maasano chaajaniquitica iquenquetsatigueti aisa iquenque-
 jajigugueti. Cotanquitsiquea noquenquevaritanaquegueti teequea nonquejetajempa-
 riji chaajaniquitirajaca. ¹² Ariqueate oquejetaca imaica teemajaquea antsamajajigueji
 quero icota Aapani Irioshi, quejecaquea manaca amenantajiacaroquea amenajarontsi
 teemajaca onconijateji, cotanquitsiqueate coajicaquea amenamajajiaqueriquea ariquee
 antsamajajiaque quero icota quejetaca yamenamajajiacajigueti aatimpajia, itsama-
 jajiacajiquea. ¹³ Ancoguitempaniquea antsaroventamajajiaquempari Aapani Irioshi,
 ancoguitempani antsamajajiaquequea irinetsanamajajiaquero maasano icantaqueca,
 aisa ancoguitempaniquea ampintsamajatantajiaquempa, cotanquitsiquea caaviji
 ocameetsamajataque ampintsamajatantajiaquempa.

14

*Quero incojiaquempani tsavetantajiguiroca icanquerica Aapani Irioshi aisa quero incojiaque-
 panii quenquetsatantajigaroca quenquetsatsarentsipae teeca intsajiteji*

¹ Pinintajiaquequeate pimpintsatantamajataquempa, aisa pinintaquequeate iragave-
 jacaajiaquempi Ishire Aapani Irioshi taaca inintaque iragavejacaajiaquempi, iroguen-
 tiquea pinintamajajiaqueja pintsavetantajiaqueroqueate incantajiaquempica Aapani
 Irioshi. ² Iriraquea quenquetsatantaroca quenquetsatsarentsi teeca inquenquetsatanta-
 jitemparoji, iriguentiqueate iquenquetsatacaaquequea Aapani Irioshi. Teequea iriguenti
 inquenquetsatacaaquequea igonorolja, teenicate inquemajigueriji. Iriguenti agave-
 jacaqueri Ishire Aapani Irioshi iquenquetsatantaroca, cotanquitsiquea iroguenti
 iquenquetsatacotaque teeca intsajiteroji. ³ Cotanquitsiquea iriraquea tsavetantaque-
 roca icanquerica Aapani Irioshi, iriguentiqueate iquenquetsatacaaque irapiguemisan-
 tarijiate itampishitacajiaqueriqueate arimpaniji inquemisantamajajianaquequea man-
 aquea aisa irishinetacajiaquempariquea. ⁴ Iriraquea quenquetsatantaroca quen-
 quetsatsarentsi teeca intsajiteroji, irisatiquea tampishitacaajatsi inquemisantama-

jatanaquequeate. Cotanquitsiquea iriraquea tsavetantaquero caicanquerica Aapani Irioshi, iriguentiquea itampishitacajiaquequea maasano irapiguemisantarijiate arimpapaniji inquemisantamajajianaquequea. ⁵ Nonintavecaqueate iragavejacaajiaquempi Ishire Aapani Irioshi maasano aviatimpajia pinquenquetsatantajiaquemparoqueate quenquetsatsarentsipae teeca inquenquetsatantajitemparoji, cotanquitsiquea caavijiquea nonintamajataquequea iragavejacaajiaquempiqueate pintsavetantajiaquero icanquempica Aapani Irioshi, caavijitari oganejencavaetaca pintsavetanquegueti anaqueroquea pinquenquetsatantaquemparogueti quenquetsatsarentsi teeca intsajiteroji aatogueti ichoocati pitsocavaqueroneca pincantajiaquerogueti cameetsaniji pintampishitacamentajiaqueriniji papiguemisantarijiate incoguitempaniquea inquemisantamajajianaque.

⁶ Imaicaquea, napiguemisantarijiate, ariguete noanaque namenajiaquempiguete iroogueti nonquenquetsatantaquemparoqueate quenquetsatsarentsipae teeca intsajiteroji ¿arimpate irooqueate nontampishitacaantajiaquempi? Cotanquitsiquea oraquee managueti nonquenquetsatantaquemparoquea piguenquetsatsare nontsatacaajiaquempi yonigaaquenaca Aapani Irioshi irooca itsatacaquenaca, iroogueti noncamantajiaquempi icanquenaca Aapani Irioshi nontsatacaajiaquempiguete, ariqueate irooquea nontampishitacaantajiaquempiquea.

⁷ Nonquejetacaaquempiroqueate soncari: teequea anijavetempaji cotanquitsiquea pojimavaetaquequea. Oraquee isoncajitiroguete, aatogueti inetsanajitirotsi, aatoqueate itsajitavaquero querocaca ocantini. Ariqueate oquejetacaquea itencatsajitica iroatimpa itencatsajitiroguete.

⁸ Ariqueate oquejetacaqueate aisa yoajiguiguete yashimirintajigaguete, aatogueti inetsanajitirotsi itivojitiguete tivorentsi, aatoquea itsajitavaquero taaquea itivotantajitacaroca, aatoquea quericaca netsanatatsi iroanaque irashimirintaquempa.

⁹ Ariqueate piquejejiacaqueate aisa aviatimpajia pinquenquetsatantajiaquemparogueti quenquetsatsarentsipae teeca intsajigueteroji ¿queroquea incojitaquempiani inquemantajitavaquempica pincantavequempariguete? Quejetacaquea mana piquenquetsatashitaca intati.

¹⁰ Choocavecaquea oshequini quenquetsatsarentsipae cantashitatiaguetaquitsica, cotanquitsiquea maasano aquemajiguero aguenquetsatsare.

¹¹ Cotanquitsiquea ariguete inquenquetsatacaqueate itsipa teeca nontsateroji iguenquetsatsare intsaquequea teequea naroguenti igonororo. Ariquea nonquejetaquempaquate naatimpa nontsataquequea teequea irio nogonororo.

¹² Irootaquequea noncantantajiaquempica imaica notsataquequea pinintajiaquequeate iragavejacaajiaquempi Ishire Aapani Irioshi taaca opajitapae, ariqueate imaica iroomajaquea pinintamajajiaqueja oraqueate tampishitacajiaquerineca papiguemisantarijiate incoguitempaniniji inquemisantamajajianaqueri Amajirote.

¹³ Quericaquea quenquetsatantaquemparoneca quenquetsatsarentsi teeca intsajiteroji iramanaqueriqueate Aapani Irioshi iragavejacaqueri impitsocavaqueroquea icanquerica.

¹⁴ Pamenenaja naatimpa ariguete nonquenquetsatacaqueri Aapani Irioshi quenquetsatsarentsi teeca intsajiteroji manaqueate nonquenquetsatacaqueri noshirequi, cotanquitsiquea aatoquea notsati quero nocanti.

¹⁵ Iroosacanica ¿queroquea noncoquempaquee? Nonquenquetsatacaqueriqueate Aapani Irioshi noshirequi, cotanquitsiquea nontsatacaqueroqueate aisa nocanquerica. Namashaiventaqueriquea noshirequi, cotanquitsiquea aisa nontsatacaqueroqueate namashaiqueguete.

¹⁶ Pamenejate aviatimpa ariguete pishineventaquempari Aapani Irioshi cotanquitsiquea iroogueti pinquenquetsatantaquempa quenquetsatsarentsi teeca intsajiteroji, ariquea ¿quero incoquempiani intsatantavaquemparoca papiguemisarite teeca intsateroji quenquetsatsarentsi piquenquetsatantacaca cameetsanijite intsipataquempinijite irishinevenquempariquea iriatimpa aisa?

¹⁷ Pinquejetaquerogueti imaica oncameetsaguevetaquempaquee pincanquerica Aapani Irioshi, cotanquitsiquea aatogueti iquemajiguimpi papiguemisarite aatoquea otampishitacajiguiri.

¹⁸ Naatimpaquee noshineventacariquee Aapani Irioshi namenaqueguete yagavejacaquenaquea Ishire noquenquetsatantacaroca quenquetsatsarentsipae teeca intsajiteroji. Noquenquetsatantacaroquea

naatimpa oshequi. Piquenquetsatantacarogueti aviatimpajia maasano teequea omoncaratemparoji. ¹⁹ Cotanquitsiqueate nontsipajiaquempargueti napiguemisantarijiate noncapiocajiaquempagueti, namenaquequea caavijiquea anaaque ocameetsataque nonquenquetsataquequeate capichaji nontsataqueca naatimpa cameetsanijite nontsatacajiaaqueri, anaaqueroqueate noncantacoguitempanigueti nonquenquetsaguitenigueti oshequini quenquetsatsarensiqui teeca intsajiteji, aatotari iquemajitavaquena.

²⁰ Imaica, napiguemisantarijiate, noncantajiaquempiquea aato piquenquejajigui quejejiaca iquenquejajiguica chaajaniquitirajaca, manaqueate pinquejejiacquempariquea maasano quenquevarijia tsajiatsica iquenquejamajati. Aparoquea pinquejejiacquempariquea iriaqueraca voanquitsi, teequeate inquenquejero quero incojiaquempani irantajiaquero teeca oncameetsateji. ²¹ Ocantiquea Itioncacaantaqueca Aapani Irioshi: "Icanti Amajirote: 'Nontigarancajiaqueneri itsipapaetica quenquetsatantajigaroca otsipapae quenquetsatsarensi, inquenquetsatacaajiaipojaqueri iricaticajia incamantajiavetaquempariquea nocanqueca, cotanquitsiquea igantaga aato iquemisantajigana.' "

²² Irootaquequea atsatantajiacaca yagavejacaajiacaji Ishire Aapani Irioshi anquenquetsatantajiaquemparo otsipapae quenquetsatsarensi teeca intsajiteji cameetsanijite intsajianaqueniji teeca inquemisantajigueti incatsimajiaqueriquea Aapani Irioshi. Cotanquitsiquea anquenquetsatantajiaquemparogueti aguenquetsatsare yagavejacaajiacajigueti antsavetantajiaquero icantajiacajica Aapani Irioshi, iroguentiquea tampishitacajiaaquerine quemisantajiaatsica, ariquea irijamajatanaque intsaromentamajatanaquempari. ²³ Oraquea pincapiocajiaquempagueti iroguentigueti maasano pinquenquetsatantajiaquempa quenquetsatsarensipae teeca intsajiteroji, ariguentiquea inquijapojaque itsipa teeca intsaromentempariji Quirishito iriguentica tequeratatirajaca intsateji quero picojiaca piquejejiacagueti imaica, ¿arimpate aato icomijiguimpi ijiquequeate ariji pishoncacojiacaquea? ²⁴ Cotanquitsiquea irooca pinquenquetsatantaquemparo piguenquetsatsare pintsavetantajiaqueroqueti icanquempica Aapani Irioshi, ariguenti inquijapojaque itsipa teeca intsaromentempariji iriguentica tequeratatirajaca intsateji, inquemajiaquempigueti ariqueate irame-naquempa iriguentiquea quempevaetatsica inquenquejanaqueroquea yantavetacaca. ²⁵ Intsapojaquequea covaeguishedaca iquenquejaguetaqueca itsitivetacaca, ariquea irogueroventanaquempariquea Aapani Irioshi intsaromentaquempariquea, incantaque: "Arimajasacanicate itsipajiaquempi Aapani Irioshi."

²⁶ Irootaquequea imaica, napiguemisantarijiate, noncantantajiaquempica oraquea pincapiocajiguempagueti iroguentiquea pincapiocaventajiaquempa pintampishitavacaajiaquempa. Pinconoagarantajiaquempa pincantajiaqueriqueate maasano: "Intsija amashaiventajigueri Aapani Irioshi." Ariquea itsipa manaqueate intsatacaantaque. Itsipaquea manaqueate intsavetanqueroqueate icanquerica Aapani Irioshi. Itsipa manaqueate inquenquetsatantaquemparoqueate quenquetsatsarensi teeca intsajiteroji, ariquea itsipa impitsocavaquero icantaqueca. ²⁷ Oraquea pinquenquetsatantajiguemparogueti quenquetsatsarensipae teeca intsajigueteroji ariquea inquenquetsate mavite arica mavitepae, cotanquitsiquea apanirota quenquetsatavanquitsine, aisa inchoocataquequea apaniro pitsocavaqueroneca. ²⁸ Oraquea aatogueti ichoocati pitsocavaqueroneca ariquea aatoquea piquenquetsatantaro picapiocajiacagueti, manaquea pamenajiaque pinchoocaquegueti apaniro, ariquea cameetsavaequequea pinquenquetsatantajiaquemparoqueate inquemajiaquempiquea Aapani Irioshi. ²⁹ Ariquea oquejetaca aisa iroguentigueti pintsavetantajiaquequeate icantajiaquempica Aapani Irioshi, ariquea inquenquetsate mavite arica mavitepae, ariquea itsipajia capiocajianquitsica incantajiaquequea iriguentica agavejacaqueri Ishire Aapani Irioshi aricampa teeca. ³⁰ Cotanquitsiqueate choocagueti itsipa savicanquitsica iquenquetsashirentacaqueriqueate Aapani Irioshi irioquea tsavetantaquerone imaica, iriraqueate iriquetica quenquetsatanquitsica interoncanajeroqueate cameetsanijite irioquea quenquetsatapojaatsine. ³¹ Ariqueate pinquejejiacquempa quea imaica apaniropae quenquetsatanquitsine arinijite pagavejimentajiaqueronijite maasano pintsavetantajiaquero icanquempica Aapani Irioshi cameetsanijite pintsatacaimentajiaquerinijite

maasano papiguemisantarijiate, aisa pintampishitacaimentajiaquerinijite. ³² Iriraquea yagavejacaajiaqueca Ishire Aapani Irioshi intsavetantajiaquero icanquerica Aapani Irioshi irinetsanajiaqueroquea intsavetantajiaqueroqueti, aatoquea ininti apaniro inquenquetsaquequea iriatimpa. ³³ Teetari irininteji Aapani Irioshi ancantavacaajiaquempa manaqueate ininque anetsanajiaqueroqueate maasano. Ariquea iquejejiaca igomajamajarejia Quirishito querocagueti icapioicapinijiaca.

³⁴ Oraquea pincapioicapinijiaquempagueti majereniquea oncanquempa manquigar-entsijia, teenica irishinejiteroji onquenquetsategueti iroatimpajia. Aritarite ocunquequea itioncanaqueca Moishishini onquemisantajiaquequea. ³⁵ Oraquea onintajiaquegueti ontsajiaque taaca opajita, oncoacotaqueriqueate manquigataroca otsovironaquitequi. Teequea oncameetsateji onquenquetsajiaquegueti manquigarentsijia icapioicapinitagueti maasano. ³⁶ ¿Arimpate oponeaca Iguenquetsatsare Aapani Irioshi aviatimpaqui? ¿Iroocampa apaniro aviatimpaqui arejetapojaca? ³⁷ Quericaquea amenanquitsineca yagavejacaqueri Ishire Aapani Irioshi intsavetanquero icanquerica Aapani Irioshi, iroguentigueti yamenaque yagavejacaqueri taaca opajitapae otsipa, intsaquequeate iriguentiquea cantaquena Amajirote noquejetancaroca imaica notioncajiaquempigueti. ³⁸ Aatogueti iquemisantiro oca, aatoquea piquemisantiri iriatimpa.

³⁹ Irootaquequea imaica, napiguemisantarijiate, noncantantajiaquempica pinintamajiaqueja iragavejacaajiaquempi Ishire Aapani Irioshi pintsavetantajiaquero icanquem-
pica, aisa aatoqueate picantimentajiguiritsiqueate itsipa inquenquetsatantajiguem-
parogueti quenquetsatsarentsipae teeca intsajiteroji. ⁴⁰ Maasanoquea pantajiaqueca pinetsanatavaqueroquea cameetsa.

15

Ipochatanajigueti Quirishito

¹ Imaica, napiguemisantarijiate, nonintaquequea nonquenquejacaajiajempiroqueate Quenquetsatsarentsi Oganejencatatsica notsavetantajiaquempica, ariqueate piquemisantajiaquero, irosati imaica picancaniquea piquemisantajianaque, pitsamajiaquequea iroomajaca. ² Irooquea meshiantajiaquempica arigueti quisho poajiguero Quenquetsatsarentsi notsavetantimoquempica, aisa teegueti pinquemisantamampeajiguempaji intati.

³ Ariqueate iroquetiquea notsatacajiaquempiqueate itsatacajaiquenaca naatimpa, nocantajiaquempiquea imetojaventajiacajiqueate Quirishito irishetajero aguempavejia, aritarite ocantsitaca Itioncacaantaqueca Aapani Irioshi.

⁴ Yoguijaajivetacariqueate omoroqui, ariquea aapojacagueti ³ savincaguiteri ipochatanajiqueate, aritarite ocantsitaca aisa Itioncacaantaqueca Aapani Irioshi.

⁵ Ariqueate yonigaacariquea Sepashi,* ariquea iquejetacaajiacariqueate aisa itsatacaanejia carajiavetanquitsica ¹². ⁶ Coajicaquea yonigaajiajariquea aisa oshequini apiguemisantarijiate icapioajiacagueti. Icarajiavaetaquequea yanaaqueroquea ⁵⁰⁰. Imaica choocatirajaqueate oshequi amenajiaquerica, cotanquitsiquea iconoacaquea imetojajiaque.

⁷ Yonigaacariqueate aisa Santiago† ariquea iquejetacaajiacari maasano itigarancanejia. ⁸ Coajicaquea yonigaaquenaquea naatimpa, manaquea noquejetacariquea chaajaniquitirajaca voashitatsica niganqui. ⁹ Caavijitarite yanaaquenaquea iriquetica peajianquitsica itigarancane, teenicaquea nomoncaratempariji iriatimpajia. Aatomequea naroguentime itigarancane, caavijitari nocatsimajiavetacari quemisantajiguirica Quirishito natsipetacaajiacariquea. ¹⁰ Cotanquitsiquea icavintsajaquenaquea Aapani Irioshi iquejetacaquenaqueate itigarancane, ariquea nanajiaqueriquea maasano itigarancane nantaquenerigueti, cotanquitsiquea teequea inchiqiojitsi nagavejashitempa naatimpa nantaqueneri, iriguentiqueate agavejacaquenaquea Aapani Irioshi cavintsajaquenaca. ¹¹ Cotanquitsiquea imaica aatoquea iroguenti noquenqueji queri

* 15:5 Sepashi. Irootaquea otsipa ivajiro Shimo Peerero. † 15:7 Santiago. Iguenquetsatsarequi guiriego ipajita Iakobos. Iconoagarantaca quimajareri yoguipitsocaqueroqueti ivajiro ipajitiri Santiago, itsipa ipajitiri Jacobo. Mavite oponeaca iguenquetsatsarequi evereo, ipajitiri Yaakob.

caavijica yanaaque, naroguentica, iriguentica itsipapae itigarancanejia, maasanotarite notsavetantajiaqueriqueate Aapani Irioshi nocamantajiaquempiquea quero icota Aapani Irioshi imeshiantigueti, irootaquequea piquemisantantajiacaca.

Intancoretancoreitanajegueti

¹² Itsavetantajiqueritarite Quirishito ipochatanajigueti imetovavetacagueti. ¿Queroqueate ocotaca piconoagarantajiacaquea aviatimpajia picantajiaque aatoquea itancorejajiti? ¹³ Aatomegueti arimajatime itancorejajiti, aatome ipochatime Quirishito. ¹⁴ Aatomegueti ipochatime Quirishito, manamequea nonquenquetsavijitashitaquem-pame intati, arimequea pinquejejiacquempame aviatimpajia manamequea pinquemisan-tamampeaquempame intati. ¹⁵ Aatomegueti itancorejajitime, antsaqueme teequea irovochateriji Aapani Irioshi Quirishito. Arime onquejetaquem-pame imaica naatimpajia manameca namataaventashijiaquemparime Aapani Irioshi notsavetantajiaquerigueti nocantajiaquegueti yovochantajiriqueate Quirishito. ¹⁶ Picantajiaquetarite aatoquea itancorejajiti, iroosacanica aatomegueti arimajatime itancorejajiti, arime inqueje-taquempame Quirishito iriatimpa aatome ipochatime. ¹⁷ Oraquea aatomegueti itan-corejajime Quirishito maname pinquemisantashijiaquem-pame intati, aatome imeshi-ajiguimpime Aapani Irioshi choocatirajamequea piguempaveerjia incatsimatantaji-aquem-pimeca. ¹⁸ Arimequea onquejetaquem-pame, inquejetaquem-pamequea aisa metojajianquitsica tsariventajiacarica Quirishito iroajianaquemquea camorecariqui. ¹⁹ Oraquea aatomeguetiquea arimajatime antancorejajianaje coajica, iroosacanica man-ame antsariventashijiaquemparime Quirishito intati, maname ancantashijiavetaque-mpame imaica intancorejajifanaje, cotanquitsiquea coajicaquea amenajiaquem-pame caavijiquea acota aatimpajia amatavijajiacaquea aatimpa, incantacojitacajime: “Oo caaviji yatsipetashitaca intati.”

²⁰ Cotanquitsiquea teequea ariquea onquejetempajiqueate imaica, atsajiaquetarite arimaja ipochatanajiqueate Quirishito imetovavetacagueti. Iriotarite pariacaroca ipochatanajiqueate iroaqueragueti, ijivajiaqueriquea maasano metojajianquitsica tan-corejajianajatsineca oncoramanitapojajegueti. ²¹ Aritarite oquejetacaquea iroaque-ragueti apaniroquea pariacaro metovavetanquitsica ariquea imetovavetanaquequea imaica, ariquea oquejetacaquea aisa apaniroqueate jivatanquitsica ipochatanajiquea imetovavetacagueti. ²² Maasanoqueate ichoviquijianaqueca Araini ametojaquequea. Ariquea oquejetacaquea aisa maasanoquea tsariventajiacarica Quirishito intancoreja-jianaje. ²³ Cotanquitsiquea iriquetitari pochatanajatsi Quirishito. Ariquea incoraque-tajategueti intancorejajianajequeate maasano tsariventajiacarica. ²⁴ Ariquea oncarat-apojaque maasano, iriraqueate Quirishito iragavejajiaqueriqueate maasano imajirojiate quepatsiquitica, jerijiaquea imajirojiate teeca inconijateji, jerijiaquea aisa agavejaji-atsica, apaniroquea iriatimpa irimajirontajiaquempariqueate maasano choocajiat-sica acaniqui quepatsiqui jero aisa jenoqui inquitequi. Ariquea incanqueriquea Aapani Irioshi: “Jero imaica, Aapani, apaniroquea aviatimpa pimajirontamajata.” ²⁵ Iriraquea Quirishito irimajirontaquempaqueate irosatiquea iragavejajiaquerigueti Aapani Irioshi maasano catsimajiaquerica, impincatsajiaquerinijite Quirishito. ²⁶ Coajicaquea aato imetovavetajajitsi. ²⁷ Aritari iriraquea Aapani Irioshi yagavejajiaqueriqueate Quirishito yanaamajatantacarocaqueate maasano. Cotanquitsiquea oraquea ocan-quegueti itioncajitaquerogueti yanaamajataquero maasano, teequea ariquea oncanteji yanaaqueri Aapani Irioshi aisa, iriguentitarite agavejajiaqueriquea. ²⁸ Ariquea ira-gavejajiaquerigueti Aapani Irioshi maasano, irimajirontajiaquemparigueti Quirishito maasano, iriatimpaquea incanqueri Aapani Irioshi agavejajiaquerica: “Imaica, Aa-pani, apaniroquea picoca aviatimpa pimajirontamajataqueate, aviguenti anaquena.” Ariquea onquejetaquem-paquea cameetsanijite apaniroquea irimajirontamajiaquem-panijite Aapani Irioshi, iranaajiaqueriquea maasano.

²⁹ Choocaquea aviatimpacui irirajia cantajiat-sica aato itancorejajiti, cotanquitsiquea iconoagarantajiacaqueate iviñacajatashitavajariquea metovavetatsica. Iroomajataquemegueti icantavetacagueti aatoquea itancorejajiti, ¿queroquea ocotaca

iviñacajatashitantavajarica? ³⁰ Ariquea noquejejiacaquea naatimpajia oraquea aatomegueti itancorejajiti ¿arimpa nantsipeventapinijiaquero nantajiaquenerigueti Amajirote? Maname nantsipetashitaquempame intati. ³¹ Nocantaguitanitarite natsipetacaqueate. Maasano savincaguiteri qui chooca nintavetanquitsica irimetojena, arimajaquea nocantamajataque. Ariquea oquejetaca aisa arimajaqueate noshinemajaca namenajiaquempigueti pitsaromentajiacarigueti Amajirote Jesoquirishito. ³² Yatsipetacaajitaquenaquea Epesoqui icatsimajitaquenaquea, quejeca manaca ipishoncajitaquena casecariqui irishecaquena. Oraqueate arimajame aatomegueti itancorejajiti maname nantsipetashitaquempame intati, cameetsame nonquejejiacquempame cantajatsica: “Jame ashecajiguempa aisa ashinquirijiguempa, osaiteraterari ametoje.”

³³ Inchiquiojita yamatavijajitimpitsi piquejejigaritsi. Icantamajajititari: “Pintsi-pajiaquemparigueti teeca incomajajiguempaji manaqueate pinquejetanaquempari iriatimpa.” ³⁴ Iintsija pinquenquejamajataje, manaquea pincomajamajajiaquempaquea intati, aatoquea piquempavejiaja. Piconoagarantajiacatarite teequeate pintsjajigueriji Aapani Irioshi. Manaquea intati nocantajiaquempiqueate imaica ironiji pimpashiventantajianaquempaca.

Quero oncoquempani intancoretancoretanajeguete metojajivetanquitsica

³⁵ Cotanquitsiquea arica inchooacque nintanquitsineca incanque: “¿Queroca oncoquempani intancorejantajanajempaca metojajianquitsica? Oraqueate intancoretancoretanajeguete ¿querocaca oncotajempani itsino?” ³⁶ Quericaca quejequeroneca imaica cantanquitsineca, teequea intsateji. Itsajitaquerotarite aatoguete iquitajiguitiro, aatoquea otsorogui. Ontoroanaqueguete ompejaempaquea oratica oitsoqui. ³⁷ Oraquea iquitajitiroguete teequea iro inquitatacojite otasaquiji, ojempequi, ovana, maasano; iroguentiqueate iquitajiti oitsoqui, irooca tirigo irooca taaca opajitapae otsipa choocatatsica oitsoqui. ³⁸ Ariquea inchiquiojita yoguitsoroaquero Aapani Irioshi iriatimpa, iquejetacaamajatajaroquea querocaguete inintacaaqueroni. Pameneroja iquitajitiroguete tirigoitsoqui iroguentiquea tsoroananquitsi tirigo. Ariquea oquejetacaquea oitsoquipae iquitajiqueroguete irosati tsoroanajatsine. Ocantashitatiaguecaquea teequea onquejetavacaguempaji. ³⁹ Ariqueate oquejetaca aisa maasano anijaguetatsica, teequea inquejetavacaguempa manaquea icantashitatiaguecaquea. Pamenerija caquinte teequea inquejetempariji canaaguetatsica. Ariquea iquejeguetaquea aisa araguetatsica, teequea inquejetempariji choocaguetatsica ojaaquiniqui. Maasanoquea icantashitatiaguecaquea. ⁴⁰ Ariquea oquejetaca aisa chooacqueate choocajatsica jenoqui inquitequi aisaquea acaniqui quepatsiqui, cotanquitsiquea teequea inquejetavacaguempa yoganejencaguecaguete, icantashititajiacatarite yoganejencajiacaguete choocajianquitsica jenoqui inquitequi, ariquea iquejejiaca aisa choocaguetatsica quepatsiqui icantashitatiaguecaqueate yoganejencajiacaguete. ⁴¹ Pamenerijate catsirincateri ivoreguiguete teequea inquejetempariji iquitasetiguete taai, aisaquea teequea inquejetempariji iquitamiriaquitiguete impoquiropae, cotanquitsiquea iconoagarantacaquea irira anaantanquitsica iquitamiriaquimajatanaquequea, itsipaquea teesaconaquea.

⁴² Ariquea oquejevacaquea aisa intancorejajianajeguete metojajianquitsica. Oraquea iquitajiqueriguete yavejancavetanacaquea, cotanquitsiquea intancorejanajeguete aatoquea yavejancaja. ⁴³ Oraquea iquitajiqueriguete itsino teequeate irishineventajitajemparoji, cotanquitsiquea intancorejanajeguete aatoquea oquempetaja imaica manaquea oganejencamajatanaquempaquea. Ari oquejetaca aisa iquitajiqueriguete teequea intampishiteji, cotanquitsiquea intancorejanajeguete incantapanajante intampishimajatanaquequea. ⁴⁴ Iroaqueraguete irooquea iquitajitaque itsino gametatsica ocaniqui quepatsiqui, cotanquitsiquea coajica manaquea ontancorejanaje otsipa itsino iroaquerari gametanquitsineca ontaniqui jenoqui inquitequi. Choocatarite gametatsica ocaniqui quepatsiqui. Ariqueate oquejetaca aisa chooacquea gametatsica jenoqui inquitequi. ⁴⁵ Aritarite ocanquequea itioncajitaqueca ocanti: Iriraqueate Araini iriquetica parivecaro “ipeacaajitacari anijatsica”. Imaicaquea irira Arai impoitajatsica[‡] irioquea

[‡] 15:45 Ocanqueguete Arai impoitajatsica iriotaque ocantacotaque Quirishito.

anijacaantantsica, yanijacaacajitarite Ishire. ⁴⁶ Cotanquitsiquea teequea iroqueti pariguemparone atsinojia gametanquitsineca jenoqui inquitequi. Iroquetiquea pariacaro gametatsica quepatsiqui, ariquea omapojempaqua gametanquitsineca jenoqui inquitequi, impoitapojequea. ⁴⁷ Iriraquea iriquetica ipeacajaitacaca iroguentiquea ipeacaantajitacariqueate quepatsi, aisa manaquea ichoocataque ocaniqui quepatsiqui. Iriraquea impoitajatsica manaquea iponeaca jenoqui inquitequi. ⁴⁸ Ijamirincataquequea caquinte ariquea iquejetacariquea Araini ipeacaantajitacariquea quepatsi, iriotarite paesatijianaquerica iroaqueraguete. Ariquea inquejejiacquempaqua aisa maasano tsaromentajiacarica iriraquea poneanquitsica jenoqui inquitequi, ariquea inquejejiacajempaquea iriatimpa. ⁴⁹ Aritarite aquejejiacariquea iriraquea ipeacaantajitacaca quepatsi, ariqueate anquejejiacquempaqueate aisa irira poneanquitsica jenoqui inquitequi.

⁵⁰ Imaica, napiguemisanarijiate, nonintaquequea noncamantajiaquempi oraquea aquejejiaguete acaniqui atsinojiguete aisa arirajajiguete, aatoquea ojaiguetsi jenoqui ichoocaqueguete Aapani Irioshi. Oraquea atsinojia teequeate onquishoteji irootaquequeate aatoquea agavejajigui oantajianaquemparo ontaniqui jenoqui inquitequi, ontaniquitarite aatoquea ametojajajitsi. ⁵¹ Aisa imaica nonintaquequea pintsajiaque teeca intsajiteji. Aatoquea ametojajigui maasano, cotanquitsiquea maasanoquea ancantashitatijaianaquempaqua, irojocajiacajitarite Aapani Irioshi atsinojia iroaquerari. ⁵² Iroompaqueate anquemajivaqueroguete intivojiqueroguete tivorentsi carapojeroneca, ariquea ancojianaquempa ancampañante ancantashitatijaianaquempa. Intivojitaqueroguete tivorentsi ariqueate inquenapanajante intancorejajianajequa metojajivetanquitsica, ariquea aatoquea imetojimajaji, aatimpajiaquea tequeratatirajaca ametojajigui ancantashitatijaianaquempaquate. ⁵³ Oraquea atsinojia avejancatsica aatotarite irooquea anijanajatsine, otsipaquea pajeroneca aato avejancajatsi. Ocatiquea imaica iroguentiquea metojatsica, jeroquea otsipa pajeroneca aatoquea ometojajitsi. ⁵⁴ Aapojempaguete avejancatsica ompeajempaguete caarica avejancatsi, aisa oratica metojatsica ompeajempaguete caarica metojatsi, ari onetsanatanquempaqua itioncajatica cantatsica:

“Iteroncajiquero metojagantsi yanajaiquero.”

⁵⁵ “Metojagantsi, ¿querocaquea pitseji?”

Areshi, § ¿arimpa pagavejaque panaante imaica?”

⁵⁶ Oraquea quempevaerentsi, iroguenti otseji metojagantsi. Oraquea cantacaantantsi, iroguenti otampishica quempevaerentsi. ⁵⁷ Cotanquitsiquea imaica arioteesaa icavintsajiacajiaquea Aapani Irioshi yagavejacaajiacaji antampishitashitimentajiaqueronijite quempevaerentsi aatoniji aquempevaejaja, atsaromentajiacaritarite Amajirote Jesoquirishito. ⁵⁸ Irootaquequea imaica, napiguemisanarijiate nopintsamajajiacaca, nocantantajiaquempica picancaniquea pinquemisantamajajiaqueri Amajirote pintampishitashimajajiaqueri nintajivetanquitsica irovashiantacaajiaquempiro piquemisantajiaqueguete. Aisa picancaniquea pantamajajiaqueneri, aatoquea piperajiga, pitsamajajiaquetarite aatoquea mana pantajiguiniri intati.

16

Incapiocajiaqueneriqueate imentaquipae intigarancajiaqueneri irapiguemisanarijiate

¹ Imaicaquea imaica irooquea noncamantamajajiaquempi quero pincojiaquempañi pincapocajiaqueneriguete imentaquipae pintigarancajiaqueneriguete igomajamajarejia Aapani Irioshi. Manaquea noninque pinquejetacaajiaquemparoqueate nocantajiaquerica apiguemisanarijiateni Garashiaquitica. ² Pincoguitempañiquea savincaguiteri pariantajemparoca semana* apaniropae aviatimpajia paagarantajiaque pimentaquitsitepae ivegarajitimpigueti pantajiguica. Iriraquea aamajatanquitsica iragarantaquequea oshequi. Iriraquea capichajica aanquitsica iragarantaquequea

§ 15:55 Oraquea Areshi iroguenti ichoocajiaqueguete metojatsica. Iquejetacaaca acaniqui, quejetaca iquenquetsatacaquero “Metojagantsi” aisa “Areshi”. * 16:2 Iroguenti opariantanaja semana savincaguiteri tominco.

capichajiquea. Ariquea pojoquijijiaqueriquea ontaniqui pitsovironaquitequi pojoquijitashiquempariquea tijacoñaji aatoniji iroaquera pincapiohajianaqueri noncoraquepojaquegueti. ³ Ariquea narejetapojaquempagueti nontigarancajiaqueriqueate irirajia pinintajiaqueca iroajianaque Jerosarequi. Nontioncavaquequeate paperi irajianaquerinijite imentaquipae pintigarancajiaqueneriquea apiguemisanterijiate choocajiat-sica ontaniqui. ⁴ Arigueti namenaque cameetsataque noanaque naatimpa aisa, ariquee nontsipajianaquempariquea.

⁵ Oraquea noncoraquequegueti manaquea noapanajante Maseroniaqui, ariquee narejevaetapojaquempa oraniqui Corintoqui. Noninquetarite noapanajante Maseroniaqui. ⁶ Aviatimpajiaqui arica osamani nonconoajiaquitempiquea, arica nontejaatacovaequitequea irosatiquea ajagantsitanajegueti, ariqueeate pagavejajiaquequea pincavintsajajia-avaquena noanaquegueti querocagueti noncantanaquempa aisa. ⁷ Teequea noninteji mana namenajapanajantempi intati, manaquea nonintaquequea osamani nonconoajianaquempiquea, iriogueti nintanquitsine Amajirote. ⁸ Cotanquitsiquea imaica mana noninque nonchoocataque acaniqui Epesoqui irosati arejetantapojempaca savinca-guiteri Pentecoshite. ⁹ Namenavecaquea choocaquea oshequi catsimajiaquenaca, cotanquitsiquea aisa choocaquea oshequi tsariventajigarica Aapani Irioshi. Ariquee oquejetacaquea aisa choocaquea oshequi nintanquitsica nonquenquetsatacaajiaqueri.

Iteroncaquerogueti itioncaquetaqueca

¹⁰ Arigueti irarejetapojaquempagueti Timoteo oraniqui pincavintsajajiaquerija pinconoajiaquempariquea cameetsanijite irishinetaquempanijite, aatoniji ishoshoguiteta. Aritarite iquejetaquenaquea naatimpa, yantiniriquea Amajirote. ¹¹ Irootaquequea nocantantajiaquempica inchiqiojija pitsojencavaqueritsi. Arigueticquea incantanajempagueti pincavintsajajiaquerija pinquenquetsatacaajiaqueriquea cameetsanijite incoraketaje acaniqui, noguijajiritarite incoraketaje iriatimpa jerijia aisa apiguemisanterijiate oguijaguijaitaquerineca. ¹² Iriiraquea apiguemisanterite Aporoshi nocantavecariqueate iroanaque oraniqui irinejajiaquitempime, intsipajianaquemparime itsipapae tsariventajigarica Quirishito. Teequeate irininteji iroanaque imaica, cotanquitsiquea coajica iragavejaquegueti ariquee iroanaque.

¹³ Inchiqiojija yamatavijajitimpitsija yovashiantacajaiguimpirotsi piquemisantajiaquegueti. Manaquea picancaniquea pinquemisantamajajianaque. Aatoquea pitsaroi-mentajiguiro piquemisantajiaquerigueti Quirishito, manaquea pintampishitashijiaque-roquea. ¹⁴ Taaca opajitapae pantajiaqueca pimpintsatavacaajiaquempaquea.

¹⁵ Napiguemisanterijiate, aviatimpajia pitsajiaquetarite iriraqueate Esetepana jerijia iconoajia iriguentijia iriquetica tsariventajiacari Amajirote Acayaqui, ariqueeate isav-icaventajiaqueroquea icavintsajajiaqueri igomajamajarejia Aapani Irioshi, yamitacojia-queriquea. ¹⁶ Imaicaquea noninque pinetsanajiaqueroja incanquempigueti iriatimpajia, cotanquitsiquea aatoquea apaniro iriatimpajia. Ariquee pinquejajiaquempariquea aisa maasano quejigarica iriatimpajia yamitacotantajiguigueti, aisa yantajiguinirigueti Amajirote. ¹⁷ Jeematsitia icoraquegajoitaquequea acaniqui Esetepana, aisa Jorotono, jeriqueate aisa Acaico, yoguishinejajiaquenatarite noquenquejajiaquempigueti pichoocajiaquegueti osamani. ¹⁸ Yoguishinejajiaquenaquea naatimpa aisa aviatimpajia. Pishineventajiaquempariquea iriatimpajia pamenajiaquerigueti caaviji yantajiaqueneri Amajirote.

¹⁹ Iriiraquea tsariventajigarica Quirishito capiocapinijiat-sica iguintenipaequi Ashiaqui inintajiaquequea pinquemacojiaqueriqueate irosatiquea iquenquejajiaquempi. Ariquee iquejetacaquea Aquira aisa iroatimpa Pirishira jerijiaquea aisa maasano capiocapinijiat-sica itsovironaquitequi, inintajiaquequea pinquemacojiaqueri irosatiquea iquenquejajiaquempi, iquejajiaquempitari pitsariventajiacarigueti Amajirote. ²⁰ Ariquee iquejajiaquea aisa maasano apiguemisanterijiate acaniqui icancani iquenquejajiaquempi. Netsana pinintavorotavacaavaquempa.†

²¹ Naatimpa Paavoro ocatia imaica inchiqiojita notioncaquero nacoqui, noncantajiaquempiquea noquenquejajiaquempi.

† 16:20 Netsana pinintavorotavacaavaquempa. Yamejiaca coramani inintavorotavacaajia-
vacueta, ari iquejajia tsariventajigarica Quirishito coramani.

²² Quericaquea teeca impintsamajatempariquea Amajirote incatsimajitaqueriquea. ¡Nomajirote, pincoraquetajequeti!

²³ Namanacoventajiaquempiquea incavintsajimentajiaquempinijite Amajirote Jeso-quirishito. ²⁴ Nopintsamajataquempiqueate maasano aviatimpajia, atsaroventajiacari-tari Quirishito Jesoshi. Ari oncoquempa.

PAAVORO ITIONCAJIAJINIRI CORINTOQUITICA

Antsatantaquemparoca

Ocatica iroguenti antsatantaquemparoca mavitetapojatsica itioncacaantaqueca Paa-
voro itioncajiaqueneriguetti tsaromentajiacarica Jesoshi choocajianquitsica guintenin-
intsiqui pajitatsica Corinto. Iriraquea Paavoro iriovetaca jorio, cotanquitsi irio it-
igarancane Jesoshi tsavetantimojiaquerica teeca irijorijoigueti itsavetantimojiaqueri
Quenquetsatsarensi Oganejencatatsica, teetarite inquemisantajigueroji jorio itsavetan-
timojiavetacagnarica. Irocashi itioncacotaqueri irira Paavoro otsipaquei paperiqui (Ya.
7.57-8.1; 9.1-31; 13.1-28.31), aisa itioncacotaqueri ichoocaqueguetti Paavoro Corintoi
otsipaquei Ya. 18.1-18. Tequerataguetti intioncacaanteroji ocatica Paavoro, itioncacaan-
quero otsipapae mavite paperi itioncajiaqueneri choocajianquitsica guinteninintsiqui
pajitatsica Tesaronica aisa itioncacaantaquero iroquetica paperi itioncajiaquenerica
Corintoquitica. Itioncacaantaquero ocatica paperi ajagantsini 55, otsipatapojacaguetti
iquenaguetanaqueguetti quepatsipaequi itsavetantavaequeriguetti Jesoquirishito. Iquen-
quejajitaque itioncacaantaqueroquetti Paavoro ocatica paperi ichoocaque guintenin-
intsiqui pajitatsica Piripo choocatatsica Maseroniaqui (Ya. 20.1-2).

Ocaniqui paperiqui itsavetanqueroquea Paavoro quero icojiaquerini Aapani Irioshi
aventajiacarica Jesoshi iramenajiaqueriniji quempetaca tee incovaeguishetimatempaji.
Icanti Paavoro itsatacaajiaqueri iroomajatatsica ichoocatimojiaqueriguetti Corintoquit-
ica, cotanquitsi imaica chooca tsatacaantamampeajiatsica ontaniqui tsatacaantanta-
jiguiroca teeca iroomajateji, icantajiavetaca itsavetacojiaqueri Jesoshi. Iriatimpajia
icantashijiacari Paavoro teequea irio itigarancane Jesoshi. Niganquiquea itioncacaan-
tajiaquenerica Paavoro icamantajiaqueri quemisantajiaatsica incapiocajiaqueri imen-
taquitsitepae iramitacojiaqueriniji quemisantajiaatsica coguitejacojianquitsica (cap. 8-
9).

¹ Naroguenti Paavoro itigarancane Jesoquirishito, iriotari nintacaaquena Aapani
Irioshi. Imaica noninque nontioncajiaquempiquea aviatimpajia Corintoquitica
tsaromentajiacarica Aapani Irioshi aisa maasano igomajamajarejia choocatantaguetaroca
Acaya. Iriguenti notsipataca apitsaroveritariteni Timoteo.

² Namanacoventajiaquempiquea incavintsajamajajiaquempinijite Aapani Irioshi
aisa Amajirote Jesoquirishito, inchoocatacaajiaquempinijite cameetsa aatonijite
pishoshoventajigaro taaca opajitapae.

Ishinetacagari Aapani Irioshi atsipejiatsica

³ Jaameshiatsi ashineventajiaquempiquea Irioshite Amajirote Jesoquirishito,
iriotaque aisa Iriri, ancanqueriquea: “Poganejencamajata”, ipintsatacomajajiacaji
yoguishinejajiacaji ⁴ atsipevaejiacaguetti cameetsanijite agavejajiaquenijite
oguishinejajiaquerinijite itsipapae atsipevaetanquitsica anquempajiaquempari
iriatimpa yoguishinejajiacajiguetti. ⁵ Quejetacaquea atsipejiaca atsipajajariguetti
Quirishito, ari onquejetaquempa aisa iroguishinejavaejiacaji iriatimpa. ⁶ Oraquea
natsipejiacaguetti naatimpajia iroguenti cameetsanijite iroguishinejajiaquempinijite
aviatimpajia, aisa iroguentinijite irimeshiimentajiaquempiniji. Ariquea oquejetaca
aisa yoguishinejajiaquenaguetti Aapani Irioshi iroguenti cameetsanijite pintsatimen-
tajiaqueniji ariquea inquejetacaajiaquempi aviatimpajia aisa iroguishinejajiaquempi
iramenajiaquempiguetti pantsipevaetaquempa quea pinquempejiaquena quea
naatimpajia natsipevaetaquetti. Iroguenti iroguishinejajiaquempiquea ironijite
pantsipevaetantanaquemparoca. ⁷ Notsamajajiaquequea pinquejejiaquenaguetti
pantsipejiaquempaguetti, ariquea pinquejejiaquena naatimpajia aisa iroguishinejaji-
aquempiquea Aapani Irioshi.

⁸ Imaica, napitsaromentarijiate, nonintajiaque pintsajiaquequea natsipevaecaquea Ashiaqui namenajiaque aricaca nometojajiaque, namenajiavacaquea teequeate nagavejajiajeji nontampishitashijajeroji. ⁹ Noquenquejantavetacaca: “Imaicashiatsi nometojavaeteni.” Cotanquitsiquea iroguenti oquejetacaquea imaica cameetsanijite nontsajajiaquenijite aatoquea inchiqiojiquea naatimpa nagavejajiguitsi nontampishitashijiaquero, iriguenti naventajiaquempa Aapani Irioshi tancoretancoretirica metojajiavetatsica. ¹⁰ Ariquea iriatimpa yompejiaquenaquea, jero teeca nometojantajiguempaji. Ariquea inquejetanaquempa imaica irompejianaquena. Notsajiaquequea icocaniquea iramitacojiaquenaquea taaca opaji nantsipevaequempaca. ¹¹ Pamijiaquenaquea aviatimpajia pamanacoventajiaquena. Iroshequiavaequetu amanacoventajiaquenaca, ariquea onquempetaquempaquea aisa incaramirincavaequaquea shineventajiaquemparineca Aapani Irioshi iramenajiaquegueti icavintsajamajajiaquena, incanquequea: “Ariotesaa.”

Quero cocani teeca iroantempaji Paavoro Corintoqui

¹² Noshinevaejiacaquea nocanca namenajiaquegueti nococani nocomajamajajiaaca caniqui quepatsiqui, aisa teequea namataajiguempaji, pamenamajajiaquenaquea aviatimpajia noguintenitimojiaquitimpigueti. Cotanquitsiquea noquejejiacagueti imaica, teequea noguijatacojigueroji itsatica caquinte, manaquea icavintsajaquena intati Aapani Irioshi yagavejacaantaquenaca. ¹³ Oraquea notioncaciaquempigueti maasanopae tee nomanacaguemparoji aatonijite omanapitsajiguimpitsi pampatsajavantajiaquerogueti, manaquea pinquemamajajiaquero, noninquetari ¹⁴ pintsamajajiaquenaquea quero-caca nococani naatimpajia. Pitsajiavequena capichaji, noninque pintsamajajiaquenaquea cameetsanijite pishineventamajajianaquenaniijite oncoramanitapojajegueti incoraquetajategueta Amajirote Jesoshi, pinquempejiaquenaquea naatimpajia noshineventajiaquempigueti.

¹⁵ Irootaquequea nopintsatantavecaca iroaqueragueta aviquetime nonejajijaateme, cameetsaniji pishinevaequempaniji mavite narejetimotajatepime. ¹⁶ Nopintsaveca noanaquegueta Maseroniaqui ariquea noncoraquetaquemequea oraniqui narejetimojapanajantempimequea aviatimpajia. Iroompa noanajegueta ari narejetsitimopana-jantempimequea aisa. Iroompaquea aisa noquenquejavecaquea nonchoocaque-megueta oraniqui nonquenapojequea aviatimpajiaqui noanaquequea Joreaqui pincavintsajajavajena pojocajavajena noncoguitejacoquempaca, ariquea pamenajavajena. ¹⁷ ¿Nopintsavecagueta arimpate tee nonquenquejamajateroji? ¿Arimpate noquejejiacari teeca intsaromentempariji Aapani Irioshi icantajiguigueta manaquea icantashitajia-avajiro intati teequea irinetsanajigueroji? ¹⁸ Cotanquitsiquea Aapani Irioshi teequea inquempetempaji imaica, manaquea inetsanamajatiro icanqueca, ariquea noquempejiaca naatimpajia, teequea namatavijanteji, nocanquegueta: “Jeeje”, teequea noncantashitempaji aisa: “Tee.” ¹⁹ Ariqueate iquejetacaquea aisa Jesoquirishito, Irijanite Aapani Irioshi, notsavetacotaqueca naatimpa notsipatashijiacarigueta Shirivano* aisa Timoteo notsavetantimojiaquempigueta aviatimpajia. Pinquenquejerija iriatimpa quero-ca icanque icocani inetsanamajatiro. ²⁰ Aisa oraquea icoraquequitigueta iroguenti netsanamajajiqueroquea maasanopae icanqueca Aapani Irioshi paesatoniqui icanquegueta intigarancaqueri Meshiantanquitsineca. Irootaquequea imaica ashineventantajiacarica Aapani Irioshi acanqueriquea: “Ari netsana”, atsajiaquetari iriguenti Jesoquirishito quempetacaaguecaroca. ²¹ Iriotarite Aapani Irioshi tsaromentacaamajatacajiri Quirishito, naatimpajia aisa aviatimpajia, cameetsanijite aguijamajaqueriniji aatoniji ogui-paquijajiguirotsi atsaromentajiacarigueta. Icoguiajiacaji. ²² Ariquea oquejetaca iseyotacaji ocanque aatimpajia irashimajaca, jero itigarancantacajirica Ishire inchoocashirentajiajojacaji cameetsanijite antsajiaquenijite irinetsanamajajiacajiro maasanopae icanqueca.

²³ Imaica pamenajiaque teequea nogueji oraniqui Corintoqui namenajijatempime, teetarite noninteji noshimampojancaajiajojempji, nopintsatacojiaquempitarite. Yamenaquenaquea Aapani Irioshi teequea namatavijajiguempiji arimajacatarari nocanque.

* 1:19 Iriaquea Shirivano icantajitiri aisa Tsirashi.

²⁴ Teequea irooqueea nonintajigueti noncanquempiquea pinquemisantamajajiaquenaja naatimpajia pinetsanamajajiaqueroqueea nocantajiaquempica, iroguenti nonintamajajiaque nontsatacaajiaquempiroqueea otsipapae cameetsanijite pincoguitempaninijite pishinevaejiaquempanijite, iroorijite paventaicariqueti Aapani Irioshi pitampishishiretantajanacaca.

2

¹ Irootaquequeea noquenquejantacaca aatotaja noguitsi namenajiatempi cameetsanijite aatonijite noshimampoancacaajiguimpitsi ariqueea noshimampoancanaquempaqueea naatimpa aisa. ² Namenaquetari ariguetei noshimampoancacaajiaquempi, ¿quericampate oguishinejanajenanece? Aparo picojiacaqueea aviatimpajia pogu-ishinejajiaquenaqueea, cotanquitsiquea ariguetei noshimampoancacaajiaquempi ¿querocampate noncotajempani naatimpa noshinetantajempaca? ³ Irootaquequeea notioncantajiaquempica nocantajiaquempi pincomajamajajianaquempaja, namenaqueea noncoraquevetaquempaguetei manaquea pishimampoancacaajiaquenaqueea, teetarite irooqueea noninteji onquempetaquempaquea imaica, iroguentiqueea noninque pogu-ishinejajiaquenaqueea naatimpa cameetsanijite pishinetimentajiaquempanijite aviatimpajia aisa. ⁴ Oraqueea notioncaciaquempiqueti coramaniqui taaja noshimampoancavaequea nocanca noquenquejacojiaquempiqueti, niganquiquea niraanaca. Cotanquitsiquea teequea irooqueea nontionquimentajiguempiji noshimampoancacaajiaquempiniji, iroguenti noninque pintsajiaque caaviji nopintsamajajiaquempiqueea.

Icantajiaqueri impeacojiajemparijate peacaanquitsica covaeguisherentsi

⁵ Iriraqueea peacaanquitsica covaeguisherentsi teequea aparo irishimampoancacaguenaji naatimpa, aviguentijiamaja ishimampoancacaajiaquempiqueea, cotanquitsiquea teequea noninteji noncanque caaviji ishimampoancacaamajajiaquempi, teequea noninteji nontiavaetacaantempro. ⁶ Ariqueea picapiocajiacaguetei piconoagarancaqueea picantajiaque incantimentajiqueriquea peacaaguishetanquitsica covaeguisherentsi. Itsipapae cantanquitsica aatoja incantimentajitiritsi, cotanquitsiquea iriguenti oshequijianquitsica cantajianquitsica incantimentajiqueriquea, jero piquempejiaqueri imaica. Cotanquitsiquea imaica ariotapoji oncaratapoje picantimentajiaqueriguetei. ⁷ Irootaquequeea nocantantajiaquempica imaica pimpeacojiajemparija, aisa pogu-ishinejajiajerija aatonijite otiroroncavaetanacari ishimampoancare irishoshoguitevaetanaque. ⁸ Aisa aviatimpajia noncanquempiquea imaica pamenacaajiajerija picocani pipintsajiacari. ⁹ Oraqueea notioncaciaquempiqueti coramani, nocantajiaquempiqueti querocaca pincopincoitaquerini, manaquea noninque nontsaque aricaca pinquemisantajiaquenaqueea pinetsanamajajiaquero nocantajiaquempica. ¹⁰ Quericaca pimpeacojiajempaca aviatimpajia, ariqueea nonquejetaquempaquea naatimpa nompeacotajempariqueate. Teequea querocaca incovetenaji, cotanquitsiquea yamenaquenaqueea Quirishito arimajaca nopeacotsitajari, iroorijite nopintsatacojiaquempi. ¹¹ Iroguenti noquempequeroqueea imaica cameetsanijite aatoniji ochoocatsi ompampiatantaquempaca iragavejajiacaji Satanashi, atsamajajiguiritari queroqueea icota iriatimpa icocani isemajiacaji iramatavimatavivaeacaji.

Icanqueri iriguenti agavejacaajiaqueri Quirishito

¹² Narejetsipojacaguetei Toroashiqui nontsavetanteroniji Quenquetsatsarentsi Oganejencatatsica tsavetacoquerica Quirishito, choocajia icaramirincavaeque nintajianquitsica nontsavetantimojiaqueri, iriguenti nintacaajiaqueri Amajirote, oquejevetaca yashirejacotaquena Amajirote sotomorontsi. ¹³ Cotanquitsiquea naatimpa noshoshoguitevaeca teequea nontonquivojapojempari apitsaroveritarite Tito, ariqueea nocantajianajari choocajiatatsica oraniqui noanaquequeea Maseroniaqui.

¹⁴ Noshineventajiacariqueea Aapani Irioshi, nocanqueriquea: “Ariotesaa”, yagavejacaajiaquenatari nagavejajiaqueriniji maasano catsimatashitarica, notsipamajajiacaritari Quirishito, irootaquequeea yagavejacaantajiaquenaca nontsavetacojiaqueriquea iriatimpa, nontsitacaguetejavaetanaqueroqueea maasano quepatsi. ¹⁵ Aquempetacarooqueea casancajencaro. Iriraqueea Aapani Irioshi ishineventajiacajiquea yamenajiacajiguetei

atsavetacojiaqueriquea Quirishito atsavetantimojiaqueriquea irimeshiajiaqueca aisa aatoca imeshiajiti. ¹⁶ Iriaquea aatoca imeshiajiti teequea irishineventavaquemparoji, yamenaquero quejetaca aajencatirogueti metojantatsica, cotanquitsiquea irirajia irimeshiajiaqueca ishineventajiavacaro, oquempetomotacari aajencatirogueti oganijantatsica casancajencatatsica. Cotanquitsiquea ¿taampate agavejanquitsineca intsaroventacaajiaquempariquea itsipapae aatogueti irioquea agavejacaguiritsi Aapani Irioshi? ¹⁷ Chocajiatarite icaramirincavaeque amatavijantajiatsica manaquea itsavetantamampeajiacaroquea intati, inintajiaque iraatajiaquemparoji imentaquipae. Cotanquitsiquea naatimpajia teequea nonquempejiguempariji iriatimpajia, manatarite itigarancajiaque-naquea Aapani Irioshi nontsavetantajiaquero Iguenquetsatsare. Itsaquequea iriatimpa arimajaca nocantamajaque teequea namataguempaji, iriguenti agavejacaajiaquena Quirishito.

3

Irimeshiajiaqueriquea maasano tsariventajiaquemparineca Quirishito

¹ Oraquea nocantajiaquempigueti imaica, aricaca pamenajiaque naroguentica semetajatsi nocanquegueti cameetsatia nochoocavaejigui. Teequea ariquea nonquempejiguempaji imaica, aisa teequea noncoguitejacojiguempaji nontigaran-cacaantajiaquempiroquea paperi itioncacojiquenagueti itsipa icantacojiaquena cameetsatia nochoocavaejigui. Ariquea oquempetaca aisa teequea nonintajigueji pintioncacojiaquenaquea aviatimpajia pintsavetacojiaquena nocomajamajiacagueti. ² Aviatimpajiatari piquejejiacaro paperi itioncajitaquenaca, itioncajitaqueca noshirequi, cotanquitsi itsajiaquero maasano, quejetaca yapatsajavantaquero maasano. ³ Manaquea piquejetacaro paperi itioncaqueca Quirishito. Teequea intioncacotenaji paperiqui, cotanquitsiquea itigarancajiaquena nontsavetantimojiaquempigueti, ariquea Ishire Aapani Irioshi anijatsica icantashitajiaquempi, jero itsatantajiacaca maasano tee namatavijanteji. Teequea intioncacotantajitenaroji mapicotaqui, manaquea oquejetaca iroguenti itioncacojiquena pishirequi.

⁴ Notsamajiaque nocantajiaquempigueti imaica teequea noncantashitempaji, yamenaquenatari Aapani Irioshi notampaticamajiaqueroquea, iriguentitari agavejacaajiaquena Quirishito noquejetantajiacaca imaica. ⁵ Teequea noncanteji inchiquiojiaque nagavejajiaque naatimpajia nompeacaajiaquempa cameetsaripae, iriguentiquea agavejacaajiaquena Aapani Irioshi. ⁶ Yagavejacaajiaquenaquea ipeacaajiaquena tsavetan-tiroca iroaqueraro paaquito.* Teenicate onquejetemparoji iroquetinica tioncanquitsica mapicotaqui, ocaticaquea iroaqueraro yamaqueroquea Ishire. Oratica tioncanquitsica, aatogueti inetsanajitiro anaqueri camorecariqui. Cotanquitsiquea Ishire Aapani Irioshi yanijacaanti.

⁷ Coramani itioncajiaquenerigueti Aapani Irioshi ishiraerijia maasanopae ininqueca irinetsanajiaqueca iriatimpajia, iroguenti itioncancaro mapicota, iroompaquea yojocaqueneri Moishishini irajaianajeneri. Iroompaquea icoraquevetaja Moishishini ichoocajiaquegueti iriatimpajia tsirencashimpoquirerencavaetanaca icanca ivoroqui. Querocampate incohincoitaquempani iramenajiajaverigueti, itsirencajiaipojaqueritari, cotanquitsiquea opeitanaja. Ocaticaquea ocatica itioncajiaquenerica Aapani Irioshi ishiraerijia iroguenti oquempetacaantajiaqueri maasano teeca irinetsanamajigueroji, cotanquitsiquea oraquea yojocaquenerigueti Moishishini manaquea itsirencacaa-queri. ⁸ Oraquea yojocavecanarigueti quempetacaantantatsica ariqueate itsirencashimpoquirerejacaavaequeri, iroompaqueate yonigaimojiajajica Ishire Aapani Irioshi ashirejiaqui caaviji anaavaequero oganejencamajataca, ⁹ otsatacaajiaajitari yamenajiacaji Aapani Irioshi quempeca teeca ancovaeguishetimatempaji. Ocaticaquea

* 3:6 Oraquea paaquito iroguenti icantamajajitirica itsipa irinetsanamajajitenerica. Ocaticaquea iroaqueraro paaquito icantajiacajiquea Aapani Irioshi irishetacotajeri igovaeguishere maasano aventaventaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

ocatica caaviji anaaque oganejencamajataca, anaavaetaqueroquea yamenacaajiaque-rica Aapani Irioshi ishiraerijia coramani yamajiaquenerigueti Moishishini itioncaqueca Aapani Irioshi quempetacaantajiaquerica maasano teeca irinetsanajigueroji. ¹⁰ Oganejencaveca itioncajiaquenerica otsatacaajivecari quero icotani iriatimpa, cotanquitsiquea caaviji anaavaeque oganejencamajataca yonigaimojiacajica Ishire Aapani Irioshi imaica. ¹¹ Yojocavecanarigueti carapojatsineca itsirencashimpoquirereja-caavaevetacari, imaicampani ¿aatompate oganejencamajatatsi caaviji anaamajaque iroaqueraca coguitatsica? Anaavaequeeroquea.

¹² Notsajiaque arimaja onquejequempa, irootaquequea notsavetantajiaquegueti noguisotoamajatantacaroca caarica nopashiventacaantantaro. ¹³ Teequea nonquempejiguempariji Moishishini iticaacoquerogueti ivoro paañoqui aatonijij yamenajiguirotsi ishiraerijia ompeanajempatajate otsirencashimpoquirerejanequi.

¹⁴ Manaquea oquejeveca oticaacagueti paaño, icocani ishiraerijia arejevaeca imaica yapatsajavantavetarogueti iroquetinica paaquito itioncanaqueca Moishishini tee intsatacoteroji, quempetaca opaañotacotaca. Tequerataquea impaañoorejaco-jiteneriji, iriguentitari Quirishito paañoorejacoquerone antsarovenquemparigueti, ironigaajiacajiro. ¹⁵ Yarejetacovaetaca imaica yapatsajavantajivecarogueti itioncanaqueca Moishishini teequea inquemajigueroji, quempetaca ipaañoshirentacoca.

¹⁶ Cotanquitsiquea taacagueti pitsocashitanajemparine Amajirote, impaañoorejashirentacotajeri, inquemamajaquero. ¹⁷ Iriraquea Amajirote iriotaque Ishire. Querica ichoocashirentajiaquea Ishire Amajirote tecatsi omperaperaashirentajemparineca.

¹⁸ Ariquea oquejeveca ipaañoorejacojicaji atsirencashimpoquirerejanaque itsirencanequi Amajirote, icantashitatanacajitari anquejetantaquemparica iriatimpa, yoganejencatacaanacaji oavaetanaque anquejemajatantanaquemparica. Irioquea quejetacaacaroca Ishire Amajirote.

4

Paavoro tampatica yoaquero itsavetantavaequerogueti Iguenquetsatsare Aapani Irioshi

¹ Ipintsatacojiaquea Aapani Irioshi inintacajiaquea nontsavetantavaequeero Iguenquetsatsare, irootaquequea pamentantajiaquenaca teeca noshimampojanamajatempariji, teeca novashiantimajigueroji. ² Teequea noshineventemparoji isenacashijiguetaacaca guipashiventantatsica. Teequea namatavitanteji, aisa teequea noncantashitatuemparoji Iguenquetsatsare Aapani Irioshi. Yamenajiaquea queate iriatimpa aisa maasano caquinteji notampaticatacotaquero notsavetantirogueti iroomajaca. ³ Cotanquitsiquea arigueti omanaca Quenquetsatsarentsi Oganejencatatsica notsavetantajiaquea quempetaca ipashicapitsajitaqueri iguenquejanequi quemajavetavacaroca, iriguentijia omanapitsajiacaca irirajia peajianquitsineca. ⁴ Iriraquea Satanashi icantajitica “irioshite quepatsiquitica” ishamponcajashirentajiaqueri maasano teeca iraventempariji Quirishito, aatonijite yagavejajiguetsi intsajiaquero Quenquetsatsarentsi Oganejencatatsica. Quejetacaquea tee irinejeroji tsirencari shiacaroca iroganejencare Quirishito quempemajatacarica Aapani Irioshi. ⁵ Teequea naatimpa tsavetantajatsineca, iriguenti notsavetantajiaque Jesoquirishito nocantajiaque iriguenti Imajirojiate maasano. Nantajiaqueneri Jesoshi jero nocantantajiacaca quempejiaca naroguentijiacaca paajanire, inintacaaquenatari namitacojiaquempi. ⁶ Iriraquea Aapani Irioshi irioquea cantanquitsi: “Ontsirenquempara pitsecamajavetanquitsica”, aisa irioquea tsirencashirentacotacajicaji antsatantajiaquemparoca quero ocotani iroganejencare Aapani Irioshi otsirencashimpoquirerecavaetanaca ivoroqui Jesoquirishito.

Quero icoqueroni itsarorentamajatacarigueti Jesoquirishito

⁷ Quempetacaquea itejitajirogueti cavorejatatsica oganejencaro chomopitoqui ipeacaantajitacaca quepatsi. Mana noquempejiacaro chomo teeca ovegaramajatempariji, cotanquitsiquea oraquea notsavetanqueca iroguenti oganejencamajaro. Teequea

taaca opaji nagavejajiguempaji naatimpajia inchiqiojita, cotanquitsiquea yagavejacaamajaquenaquea Aapani Irioshi notsavetantajiaquerigueti cameetsaniji intsatimentajiqueroneji teequea inchiqiojita nagavejashijiaquemparoji naatimpajia, iriguenti agavejacaajiaquenaqueate Aapani Irioshi. ⁸ Jero natsipevaevecaroqueate covaequishetacaantatsica cotanquitsiquea teequea agavejajiguenaji, choocatirajana tsavetacotanatsinaqueate Quirishito. Aisa ochoocaveca oshequi noquenquejajiaqueca teeca nontsavetemparoji quero noncoqueroni, cotanquitsiquea tee noshoshoguiteteji. ⁹ Yatsipetacaavaequenaquea caquinteja, cotanquitsiquea tee intsinampirejenaji Aapani Irioshi. Aisa yoncaracaravaevequena, cotanquitsiquea tee irimetojajiguenaji. ¹⁰ Querocagueti noanoaitaqueni icatsimacatsimavaetaquenaquea iquempetacaavaequena Jesoshi inintajiaque irimetojajiaquena, irootaquequea yamenantajicaroca ariquea noquempejiacari natsipevaeagueti. Cotanquitsiquea iriatimpajia teequea iragavejajiguenaji, irootaquequea itsatantajitacaroca iriraquea Jesoshi icocani ichoocati, iriguenti agavejacaajiaquenaca. ¹¹ Naatimpajia anijajajatsica, nocantacoguitani natsipevaejiaca icatsimajiaquenagueti, inintavecaquea irimetojajiaquenename irooriji noguijatacomajaqueri Jesoshi. Noquejetantajiacaca cameetsaniji namenacaajiaqueriniji maasano teequea inchiqiojita nagavejajigueti naatimpajia, irioquea agavejacaajiaquena Jesoshi notsinometojanequi. ¹² Notsavetantavaequerigueti iroovepojaca irimetojajiquenename, cotanquitsiquea aviatimpajia piquemisantajiaqueri irootaquequea pinchoocatantajajempaca pincoguitempani.

¹³ Chooca itioncacojiqueca ocanque: “Notsatajimpi naventanaquempi, irootaquequea noquenquetsatantacaca.”[☆] Irootaquequea noquempetantajiacaca naatimpajia imaica, notsamajajiaquequea caaviji yagavejamajati Aapani Irioshi, jero nontsavetacotantajiacarica. ¹⁴ Naatimpajia notsamajajiaque iriraquea vohatajirica Amajirote Jesoshi imetojavetacagueti inquempetacaajiajenaquea naatimpajia aisa, irivochajajena intsipatsipaitanajena jenoqui ichoocatigueti iriatimpa, intsipatacaantajajaji ironigaantajajapojajaji. ¹⁵ Aviguentijia natsipeventajiacaca cameetsaniji inchoocajiaqueniji incaramirincatimentanaqueniji incavintsajajiaqueca Aapani Irioshi, iroompaquea inchoocajiaque aisa incaramirincavaequequea cantajiaquerineca: “Ariotelesaa”, ariqueate iramenajiqueriquea iriatimpa caaviji icavintsajamajatanti.

¹⁶ Irootaquequea noquempetantajiacaroca imaica teequea noshimampojancajatempani. Manaquea natsancotsinojiavetanaca, cotanquitsiquea noshirejiaqui itampishishirentacajaitanajana maasano savincaguiteri, ijananeshirentacajaitanajana. ¹⁷ Notsajiaque ocatica capichajaniqui natsipevaejiavecaca imaica, taampina ompeanajempa. Ompampiatantanaquempaca noshinevaetantajempaca ontaniqui inquitequi oganejencavaetapojajempa, noncoguitempani nonchoocajiapojaje, anaavaetajero maasano natsipevaevecaca. ¹⁸ Irootaquequea teeca nonintamajatantajiguemparoji yamenajiguetica imaica, iroguentiquea nonintamajajajaji teeca iramenajiteji. Maasanotari yamenajiguetica imaica taampina onteroncaguetanajempa, cotanquitsiquea oraqueate tequeratata iramenajiteji aatotari oteroncatsi, oncoguitempaniquea onchoocaguiteni.

5

Paavoro itsamajaque irimetojanajegueti iroanaje inquitequi

¹ Naatimpajia notsajiaque aricagueti irimetojajiquena oraquea notsinojia imaicatica avejancanajempa, mana onquempetaquemparojaveajitirogueti quitsaarentsivanco, cotanquitsiquea onchoocataje notsinojia otsipa impeacaajempaca Aapani Irioshi inquitequi, oncoguitempani onchoocaguiteni, aatoquea oquejetajarotsi quitsaarentsivanco ipeacaacaca caquinte. ² Ocaniquiquea ocaniqui quepatsiqui noshimampojancaeva natsipevae nontantajiacaca incantashitajajajenagueate Aapani Irioshi, onchoocaque notsinojia iroaqueraro, onquejetajemparo tsovironaquimajaca inquitequitica. ³ Onquejetajemparo aisa oitsaare noshire, nonquitsaatajempagueti aato no-
cajarashirentajitsi. ⁴ Oraqueate choocatirajanagueti ocaniqui quitsaarentsivancoqui

[☆] 4:13 Sar. 116.10.

noshimampojancaevaevetacaqueate natsipevaeca, cotanquitsiquea teequeate irooquee nonintajigueti irisoveajitero, iroguentiquea noninque nonchoocatantapojajemparo notsovironaquitemajaca inquitequitica. Aritarite choocatirajanagueti notsinoqui teequea nonintajigueti nometojajiaque avejancanajempa notsinojia, iroguenti nonintajia-aveca nojoquijipanjantero noanoaitanaque inquitequi onchoocaque iroaqueraro notsinojia aatoca oteroncatsi. Ocaticaquea ocatica teequea onquishometojaneteji, cotanquitsiquea ontaniquiquea ontaniqui noncoguitempani nonchoocajiaaguiteni. ⁵ Iriiraquea peacaajiacajica cameetsaniji anchoocajiaaguiteni, irio Aapani Irioshi. Iriotaquequea aisa tigarancajiacajirica Ishire, atsatantajiacaca irinetsanamajaquero maasano otsipapae icantaguequeca icanquegueti quero oncotaquempani oncoramanitapojajegueti.

⁶ Irootaquequea imaica nocantacoguitani notampishishirentanaque. Notsajiaque choocatirajana nochoocajiaquegueti ocaniqui notsinojiaqui tequeratamajaca nonconoamajatempariji Amajirote. ⁷ Imaica tequerata namenajiavetempariji cotanquitsiquea notsajiaque oncoramanitapojajegueti namenajiaqueri, noquemisantajiaqueri icanquegueti irajaianaquenaquea iriatimpaqui. ⁸ Irootaquequea teequea nontsaroocajaguemparoji nometojane, caaviji anaaque oganejenca nojocanajero notsino noanoaitanaque ontaniqui jenoqui nonconoamajapojajempari Amajirote. ⁹ Irootaquequea nonintamajajiaquequea nantajiaque inintaguetica iriatimpa cameetsaniji noshinetacajiaquemparinijite, arigueti choocatirajanagueti notsinoqui ocaniqui quepatsiqui irooca noanoaitanaque ontaniqui jenoqui nonintajiaque nonquempejiaquempaquea imaica. ¹⁰ Iriiraquea Quirishito yamenamajataqueroquea maasanopae taaca opaji antajiaqueca tequeratatac ametojajigueti, jero oncoramanitapojajegueti arejetapojajempagueti incapiocantajiaajica maasanojia, ancatintiitimojiaqueri imajirontamentoqui incantajiacajitaaca ontampaticajiacaji maasano, intsitacajiacaji.

Aapani Irioshi yamenajiacaji quempetaca teeca ancovaeguishetimatempaji

¹¹ Nocantacoguitani notsaroocaamajajiacari Amajirote irootaquequea nopanquena-panquenaguitarini maasano caquinteji nontsaroventacajiaquempari. Iriiraquea Aapani Irioshi itsamajatiro arimajaca nocomajamajajiacaca notsavetantimojiaquempigueti teequea namatavijiguempiji. Imaica nonintajiaque pintsajiaque aviatimpajia aisa. ¹² Oraqueate nocantajiaque imaica teequeate nonintajigueti naatimpajia semetacajiajatsine noncantajiaquequea noganejencare nocojiaca nantajiaqueneriquea Amajirote, manaquea noncantajiaquempiquea aatoniji pipashiventacajiganatsija, manaquea pishineventajiaquenaquea cameetsaniji pagavejajiaqueniji pimativicacajiaqueri irirajia cantimanajianaca. Iriatimpajia isemejiaque, cotanquitsiquea manaquea itsaroventamampeajiacaca intati. ¹³ Oraqueate yamenajiaquenagueti iriatimpajia manaquea noshoncacojiaca, teequea noshoncacojiguempaji, iroguenti nantajiaaguitinirini Aapani Irioshi noshinetacajiaquemparinijite. Oraqueate notsatacaamajajiaquempigueti aviguentijia noquenquejacojiaqueca cameetsaniji pintsaroventamajajianaquemparinijite Aapani Irioshi. ¹⁴ Ipintsamajajiaquenaquea Quirishito icavintsajamajiaquenaquea, irootaquequea tigarancavaquenaca. Oraqueate imetojaventajiacajigueti Quirishito quempetaca aricaca ametojajiaque aatimpajia. ¹⁵ Imetojaventajiacaji maasano cameetsaniji imaica aatimpajia yanijashirentacajiaqueca aato asavicaventajiajiro anintajiaqueca, iroguenti asavicaventajiaque inintaguetica iriatimpa metojaventajiacajica ariquea ipochatanaji. ¹⁶ Irootaquequea teeca namenantajiguemparica itsipajia quejetaca yamenajiaqueri teeca intsaroventempariji Aapani Irioshi, teequea irooquee noshineventimentempariji aricaca yanaajencavaevetaca irooca tee. Ariquea noquempetacajiavecari Quirishito coramani manaquea namenajiavecari tee iriomajateji, cotanquitsiquea teequea nonquempetajempaji imaica. ¹⁷ Irootaquequea noncantantajiaquemparica imaica iriraquea tsipashirentacarica Quirishito imaica, iroaque-rashiretanaji icantanaja. Teequea inquempetajempaji coramani, icantashitatanajitari, maasano iroaqueratimotanajiritari.

¹⁸ Iriotaquequea quempequeroca Aapani Irioshi imaica. Itigarancaqueri Quirishito irajiajavajajinijite, yovetsinantantajiaajica. Imaica inintacajiaquenaquea nontsave- tantimojianaqueri maasano irovetsinantantajiajemparica. ¹⁹ Itigarancaqueriquea Quirishito coramani acaniqui quepatsiqui irovetsinantajiaqueriniji quepatsiquitica

cameetsaniji iramenajiaqueriniji quempeca teeca incovaeguishetimatempaji. Imaica inintacaajiaquenaquea naatimpajia nontsavetantero quenquetsatsarentsi vetsinantantatsica. ²⁰ Irootaquequea imaica itigaranquimenquenaca Quirishito noncantajiaquempi inintacaquempica. Manaquea nonququetsatacaajiaquempi quempeca irioca cantanquitsica Aapani Irioshi. Intsishiatsi ininque Quirishito pivetsinantajiajerija Aapani Irioshi. ²¹ Iriraquea Quirishito teequea incovaeguishetimatempaji, cotanquitsiquea icatsimatimenqueri Aapani Irioshi agovaeguisherija, iquempetacaacari covaeuguisheru cameetsaniji irimetojaventajiacajiniji aatimpajia. Ariquea iquempetaquero imaica Aapani Irioshi cameetsaniji aventaventaiquempariniji Quirishito iramenajiacajiniji Aapani Irioshi quempeca teeca ancovaeguishetimatempaji.

6

¹ Naroguentijia amitacojiaquempica, irootaquequea noncantantajiaquempica imaica, shoshoh pitsariventamampeajisijate intati, pipomatsajiguirotsijate icavintsajacotaquempigueti Aapani Irioshi. ² Icanquetari:

“Oraquea aapojacagueti savincaguiteri ocameetsatantanacaca nonquemaquempi, noquemaquempiquea.

Aapojacagueti savincaguiteri naantavajimpica, ariquea nocavintsajitsitimpiquea.”[☆]
Imaicaquea imaica jac aapojaca ocameetsatantanacaca inquemaquempiquea, imaicaquea aapojaca iraantavajempica.

³ Teequea nantajigueji taaca opajita intivashirentajitaquempaca aatonijite icantaguishetacogigana nontsavetantajiaquegueti. ⁴ Maasanopae taaca opaji nantajigui manaquea nocomajamajacaqueate cameetsaniji nonigaajiaquempariniji maasano arimajaca naroguentijia inintacaajiaqueca Aapani Irioshi nontsavetantavaetaqueroquea Iguenquetsatsare. Manaquea natsiperejaguitaroni taaca opajitapae coraquetashijiaquenaca: yatsipetacaajitaquenaquea, oconoaca nocoguitejacovaejiaca, natsipevaecaquea. ⁵ Itavatavaavaejiaquenaquea catsimajiaquenaca, oconoacaquea manaquea isantanatcojitaquenaqueate. Ochoocaque manaquea itiavaejiapojana icatsimajiaquenagueti. Nantajiaque oshequi, otiavaetanaquenaquea pochoquirentsi manaquea aisa aajivetananaquenaqueate notase. ⁶ Cotanquitsiquea nococaniquea nocomajamajajiacaca, aisa notsamajajiaque iroomajatatsica. Natsipetacovaeacari catsimajiaquenaca, aisa nocavintsajamajajiaqueriquea maasano, ichoocashirentajiaquenatari Ishire Aapani Irioshi yagavejacaajiaquenaqueate. Arimajaca nopintsatantamajajiacaca. ⁷ Nocantacoguitani taaca nocantajiaque arimajaca notampaticamajaqueroquea teequea namataajiguempaji. Aisa icocani yagavejacaajiaquenaqueate Aapani Irioshi. Oquejevetaca nashimirintajiacaca, najiricaquero nogotsirote notincamijempequiqui aisa noguishorite najampatequi aatoniji taaca quempevaetacagana. ⁸ Oconoacaquea ishineventajitaquenaquea, oconoacaquea manaquea inintajiaque iroguipashiventajitaquena. Oconoacaquea icantaguishetacojitaquenaquea, oconoacaquea itsavetacojitaquena cameetsa. Oconoacaqueate aisa manaquea icantashijitaquenaquea: “Iriguentijia amataatsica”, cotanquitsiquea nocantacoguitani notampaticamajataqueroquea teequea namatavijanteji. ⁹ Oconoacaquea ariquate icantashijitaquenaquea: “Tee intsajiteriji”, cotanquitsiquea maasano notsavetantimojiaqueca itsamajajiaquena quero nocogigani. Nococani nopajivecaroquea nometojane, cotanquitsiquea choocatatsitirajana nochoocajijaji. Itavatavaajivetaquena, cotanquitsiquea tee irimetojajitenaji. ¹⁰ Noshimampojancajiveca, cotanquitsiquea nococani noshinevaeca. Teequea nashintajiavetempaji, cotanquitsiquea quempeca iroguentica naajarantacaajiacari itsipapae icaramirincavaeque, irooriji nopaguenquejanequeri. Teequea taaca opaji nashintajiguempaji naatimpajia, cotanquitsiquea Aapani Irioshi icavintsajamajiaquenaquea, jero quempetaca naroguentica ashintajigaroca maasano.

¹¹ Corintojiaquitica, nocamanquempiquea maasanopae, teequea taaca opaji nontsittimateji, nopintsamajajiaquempi. ¹² Teequea nomashitsatapsatimojiguempiroji

[☆] 6:2 Is. 49.8.

pintsatagantsi nopintsajiaquempigueti, aviguentijia quejejianquitsi, tee pimpintsamajianaquenaji naatimpajia. ¹³ Imaica noncantajiaquempi quempeca aviroca nirijanijiate. Nonintajiaque pimpintsamajajiaquenaquea, pinquempejiaquenaquea naatimpajia nopintsamajajiaquempi.

Aatimpajia aroquentijia itsovironaquite Aapani Irioshi

¹⁴ Quejetaca irira ashintarica caapironcaari aato itsipatacaantari tampishitatsica aisa teeca intampishiteji titonquirontsiqui ishiguitiqui, ari pinquejejiaquempa aato pitsipamajajigari caarica tsaromentari Aapani Irioshi, teequea ariquea pinquejetavacaajiguempaji. Iriraquea comajamajajiatatsica ¿arimpate iragavejiaque intsipatsipaitaquempari savicaventajigueroa covaeguisherentsi inquemavacaajiaquempa? ¿Aatotarite yagavejitsi! ¿Arimpate agavejaque tsirencari onconoaquemparo pitsecari? ¹⁵ Quempeca Quirishito ¿arimpate iragavejaque inconoaquempari Veriari* inquemavacaajiaquempa? ¿Aatoquea yagavejitsi! Ariquea iquempetaca aisa tsaromentajiatatsica ¿arimpate iragavejaque intsipatsipaitaquempari caarica tsaromentatsi inquemavacaajiaquempa? ¿Aatotarite yagavejitsi! ¹⁶ Oraquea itemporote Aapani Irioshi, ¿arimpate ocameetsataque inchoocatantajiguemparo ipeajitica irioshivijirentsi intati? ¿Aatotarite ocameetsati! Aatimpajia aroquentijia itemporote Aapani Irioshi anijaguitatsica.✠

Icanque Aapani Irioshi:
“Nonchoocatimojiaqueri nontsipatsipaitaquempari;
iriatimpajia impeaquenaquea Irioshite intsaromentajiaquempaca,
naatimpa nashintajiaquempari.”✠

¹⁷ Irootaquequea icantantacaca aisa Amajirote Irioshi:
“Pintsinampirejajianajerija pisotoapitsapanjanteri,
pomporoguijashijianajempajate.
Aato pantajiguero covaeguisherentsi.
Pinquempejiaquempagueti imaica naatimpa noshineventajiaquempi.”✠
¹⁸ “Ariqueate nompeaquempa Piri,
nompejaiaquempiquea nirijanijiate aisa orijanijia.
Ariqueate icanque imaica Amajirote Agavejamajatatsica.”✠

7

¹ Imaica, nopintsajiacaca, atsajiaquero ocativa icanqueca Aapani Irioshi irinet-sanaqueca, iintsijate ampishoncamajianaqueroquea maasanopae covaeguisherentsipae irooca aquenquejaguishejiaqueca irooca apeacaaguishejiacaca, maasanopae covaequishetaqueroneca atsino irooca ashire, manaquea antsaroacaajiaquemparija Aapani Irioshi ancomajamajianaquempa, isaancashirencajitarite.

Paavoro ishineventajiacariquea Corintoquitica

² ¿Pishinetacaamajatenaja pimpintsamajajiaquenaajate! Naatimpajia teequea querica noncotimajigueriji, teequea querica noncovaeguishetacaimatempaji, aisa teequea querica namatavijimajigueji. ³ Teequea irooquea nontionquimentajiguempiji noncantajiaquempiquea pipeacaaguishejiacarogueti covaeguisherentsi. Nocantajiaquempiquea coramani nopintsamajajiaquempiquea oshequi. Notsajiaque ancoquempani antsipatavacaajiaquempa quea choocatirajajajigueti irooca ametojajianajegueti ancoquempaniquea antsipatavacaajiaquempa. ⁴ Notsamajajiaquequea piquemisantajiaquenaquea jero noshineventantajiaquempica. Natsipevaevetacaqueate cotanquitsiquea nocantacoguitani noshinevaeca, aviguentijiaquea shinetacaajiaquena.

⁵ Irooquea narejejiacagueti Maseroniaqui teequea nomagoremagorejiteji, ichoocajiaque icaramirincajiaque catsimajiaquenaca teeca intsaromentajiguemparija Quirishito. Aisa noshoshoguitejiaca nocanca notsaroaneguintavaetanaquequea. ⁶ Cotanquitsiquea

* 6:15 Veriari. Jero otsipa ivajiro imajirote ampatsinipae, icantajitiri aisa Satanashi. (Iguenquetsatsarequi quimajareri itioncajiquero Belial ocaniqui.) ✠ 6:16 1 Co. 3.16; 6.19. ✠ 6:16 Irev. 26.12; Jer. 32.38; Esq. 37.27.
✠ 6:17 Is. 52.11. ✠ 6:18 2 Sam. 7.14; 1 Crn. 17.13.

Aapani Irioshi ishinetaantatarite ishimampojancajitaqueti, ishinetaajiaquenaquea namenajavajirigueti icoraquetaji Tito. ⁷ Teequea aparo noshinejaquempaji namenajavajirigueti, manaquea aisa icamantajipojana pishinetacaajiacari iriatimpa, aisa pinintajigui pamenajajena, pishimampojanacovaejiacaroquea notioncajiaquempica coramani pishoshoguitementajiaqueroquea pinintajiaque pinetsanamajajiaqueroquea maasanopae nocantajiaquempica cameetsaniji pishinetacajiajenaniji. Iroompaquea irooquea noquemavaquitiguiquea noshinemajatanacaquea nocanca.

⁸ Coramani notioncajiaquempiquea noshimampojancaajiaquempiquea, ariquee noquemacojiaquempigueti noshimampojanquitsitanacaqueate naatimpa aisa. Cotanquitsiquea teequea oncantacoguitempani noshimampojancaquitempani, ariqueeate piquempejiaca aviatimpajia teequea pincantacoguitempani pishimampojancaquitempani. ⁹ Imaica shinevaetajana. Teequea irooquea noshineventempaji pishimampojancajiaqueti, iroguenti noshinevenca namenaquequea pishimampojancaavaetanacagueti pamenajiaquegueti pipeacaaguishejiacaro covaequisherentsipae, iroompaquea picantashitatijaianaja. Oraqueate piquempejiacagueti imaica picantashitatijaianacagueti manaquea pishinetacaajiacari Aapani Irioshi. Irootaquequea noshinevaetantanacaca namenaquequea teequea ariquee novashiantacaajiguempiroji pitsaromentajiacarigueti. ¹⁰ Oraquea shimampojancaarentsi inintica Aapani Irioshi irooquea ashimampojancaotaquemparogueti aguempaveere avashiantanajero cameetsaniji irishetacojiajinijite irajavajaji aatoniji apejaiga. Oraticaquea shimampojancaarentsi aato aquenquejacotiro: "Aatomesano noshimampojancame." Cotanquitsiquea irishimampojancahitanaquempagueti intati irirajia teeca intsaromentempariji Aapani Irioshi, mana irimetojashirentanaque. ¹¹ Aviatimpajia arimaja ishimampojancaajiguimpi Aapani Irioshi yamenajiaquempigueti pipeacaaguishevaecaroquea covaequisherentsipae, iroompaquea pinintamajajiaque pintsaromentajianaquempari pincomajamajajianaquempa, osemajencatacaajianaquempi pamenaqueroqueti ipeacaaguishejicaca, aisa pitsarojianaque. Iroompaquea pinintamajajiaquequea noanaque nontsipatsipaitaquempi, cotanquitsiquea iroquetitaquea pinintamajatanaquequea pintampaticamajajiaqueroquea nocantajiaquempica. Imaicaquea imaica pinetsanamajatanaquequea maasanopae, tee anejeroji querocampate incatsimatimentajiaquempica Aapani Irioshi, jac comajamajajiaquempiquea. ¹² Oraqueate notioncajiaquempica teequea aparo nonquenquejajigueriji irira peacaaguishetanquitsica covaequisherentsipae, iriguentica aisa ishimampojancaacaca. Aviguenti noquenquejajiaque aisa noninquequea pintsamajajiaque yamenaquempitari Aapani Irioshi arimajacaca pipintsamajajiaquenaquea.*

¹³ Imaica noquemacojiaquempiquea piquempejiaqueroqueti imaica pishineventajiaquena, irooquea shinetacaajiaquenaquea, cotanquitsiquea caaviji noshinevaetanaca namenajavajirigueti Tito cameetsa icoraquetaji ishinevaetapoja, aviguentijiaquea shinetacaajiacari, paajivaqueri cameetsa pinetsanajivaqueriquea. ¹⁴ Oraquea tequeratagueti nontigaranqueriji Tito oraniqui aviatimpajiaqui nocanqueri: "Noshineventajiacari tsaromentajiatrica Corintojiaquitica, notsaque cameetsa irajavajempiquea." Ariquee imaica yamenajiaquempigueti itsaque arimajaca nocamanquerica teequea namatavijeriji, manaquea noquempejiaquempi aviatimpajia teequea namatavitempiji. ¹⁵ Imaicaquea imaica iriatimpa caaviji ipintsajiaquempi, yamenaquequea piquemisantamajajiaqueriquea taaca opaji icantajiaquempica, aisa paajivaqueri cameetsa, pishineventajiavacari. ¹⁶ Naatimpa aisa noshineventajiaquempi oshequi notsaque pinintajiaque pincoquempani pisavicaventajiaquero inintaguetica Aapani Irioshi.

8

Icavintsajantajiaque Maseroniaquitica

* 7:12 Ochoocataquetari otsipa paperi iguenquetsatsarequi guiriego ocanti ocaniqui: "pintsamajajiaque yamenaquenatari Aapani Irioshi arimajacaca nopintsamajajiaquempi."

¹ Imaica, napitsaroveritarijiate, noninque noncamanquempiquea quero icocani Aapani Irioshi icavintsajajiaquerigueti tsaroveritajatsica capiocaguetanquitsica guintenintsipaequi Maseroniaqui, jero ariquea iquempejiaca iriatimpajia ipintsatan-tajia. ² Yatsipejiavecaquea iquemisantajiaquegueti, cotanquitsiquea ishinejiaca icanca. Teequea irashintajavetempaji cotanquitsiquea icavintsajantajiaque quempeca iroguentica yashintajia. ³ Namenaquequea naatimpa manaquea yaagarantajiaque-quea imentaquitsitepae itigarancacaantajiaqueneri irapitsaroveritarijiate coguitejacov-aetanquitsica. Teequea irioqueate iraagarantajigueji choocagarantajatsica ichoocataji teeca incoguitejacotempariji, yaagarantajiaque aisa icoguitejacovetacaca iriatimpajia. ⁴ Iroompaquea inchiqiojita icantacantajiaquenaquea inintajiaquegueti inqueje-jianaquempauea iriatimpajia incavintsajajiaqueri irapitsaroveritarijiate guintenijiat-sica Jerosarequi. ⁵ Cotanquitsiquea teequea aparo irinintajigue incavintsajajigueriji irojocagarantajiaqueneri imentaqui, manaquea inintamajajiaque irantajiaque taaca opaji ininque Aapani Irioshi, aisa inintamajajiaque iramitacojiaquenaquea naatimpajia aisa, irootaquequea ininque Aapani Irioshi. Yanaitsipojanaroquea noquenquejajiveta-caca. ⁶ Jero noquenquetsatacanarica Tito iroanaquequeate oraniqui iramijajatempi paagarantajiaje itsipa pimentaquitsitepae pintigarancajajenerija papitsaroveritarijiate pinetsanajajerojate pipariajiavetanacaca coramani icantajiaquitimpica yoaquitigueti yamenajiaquitimpigueti. ⁷ Aviatimpajia caaviji picojiaca, caaviji pitsamajajiaque inet-sanamajaqueroquea Aapani Irioshi maasanopae icantaguetica. Pitsamajajigui pitsave-tantajiaquerogueti Iguenquetsatsare Aapani Irioshi, aisa pitsamajajiaqueroquea queroca ocanque. Pishineventamajacaroquea pantavaequenerigueti Amajirote, manaquea aisa pipintsamajajiaquenaquea. Imaica noninque aisa pinetsanamajaquero ocatica pincav-intsajantegueti pojocashigueta canarigueti itsipapae.*

⁸ Cotanquitsiquea teequea noncantajiguempiji: “Iintsijate pinetsanamajajiaque-roja.” Manaquea noninque noquenquejacaajiaquempiroquea quero icojiacani icav-intsajantajiaquegueti itsipa papitsaroveritarijiate pinquejetantajianaquemparica avi-atimpajia, irootarite intsamajatantajitanaquemparoca arimajaca pipintsatantajianaca. ⁹ Pitsajiaquequea icavintsajamajaquempiquea Amajirote Jesoquirishito. Yashintama-javetacaroquea iriatimpa maasano coramani, cotanquitsiquea yojocapanajantiro iquem-petacotapojacari teeca irashintimatempaji cameetsaniji incavintsajajiaquempiniji avi-atimpajia, inquempetacajiaquempiniji ashintavaejitsica.

¹⁰ Imaica namenaque cameetsa pinetsanajiaqueroquea pipariajianacaca coramani cameetsaniji pishinejiaquempaniji, aviguentijiaquea nintajianquitsica iroaqueragueti paagarantajiajeneri pimentaquitsite, iroompaquea ariquea pipariajianacaroquea.

¹¹ Imaica pincoquempanija paagarantajiaquenerija pinetsanajiaqueroquea pipariajianacaca aviatimpajia iroaqueragueti, pishineventajiacarotari. Inchiqiojijate pinquenquejajiaqueroquea aviatimpajia querocaca pagavejajiaque paagaran-tajiaque. ¹² Arimajacagueti netsana pinintamajajiaque pojocantajiaquequea, irishineventajiaquempiquea Aapani Irioshi querocaca pojocantajiaque. Iriraquea ashintamajatanquitsica irojocantaquequea oshequi. Iriraquea teemajaca irashintempaji capichajaniqui irojocantaque, teequea incanteji Aapani Irioshi pojocantajiaquequea teeca pashintempaji.

¹³ Teequea ariquea noncantajiguempiji pincavintsajajiaquerijate itsipapae papitsaroveritarijiate cameetsaniji onchoocaquenijite icoguitejacojiacaca iriatimpajia ariquea aviatimpajiaquea atsipejianquitsineca pincoguitejacovaeguitepani.

¹⁴ Iroguenti noninque pinquempetavacaajiaquempauea. Imaicaquea imaica aviatimpajia pashintajia jero picavintsajantajiacarica papitsaroveritarijiate, cotanquitsiquea iroompaquea ariqueate avirogueti coguitejacojianquitsineca irioqueate cavintsajajajempineca. Pinquempejiaquempagueta imaica ariquea iroguenti manaquea pinquejetavacajiaquempa. ¹⁵ Otioncacatarite: “Iriraquea aamajatanquitsica teequea

* 8:7 Pamenero 1 Co. 16.3. Icantajiaque Corintoquitica inintajiaque impintsatocajiaquempari irapitsaroveritarijiate Jerosarequitica iraagarantajiaqueneri imentaquitsitepae intigarancajiaqueneri.

onchoocatajeji choocatajatsica. Ariquea iquempetaca aanquitsica capichajaniqui teequea interoncacotempaji.”[☆]

Iroqjate Tito iramenajiajateri

¹⁶ Noshinevencari Aapani Irioshi namenaquequea iquenquejacaqueriquea Tito iquenquejacojiaquempi iquempetaquenaquea naatimpa noquenquejacojiaquempi. ¹⁷ Jero ishinevaetantacaca nocanqueriguete nonintaveca iroqjateja iramenajiaquempi, irotaquequea inintamajaque iriatimpa. ¹⁸ Nontigarancajiaqueri aisa itsipa papitsaroventarite intsipatanaquempaca. Ishineventamajajiacari maasano tsaroventajiatsica capiocapiniatsica, icamantacojiaqueriquea yamenajiaqueriquea caaviji itampishiventamajaque Quenquetsatsarentsi Oganejencatatsica. ¹⁹ Cotanquitsiquea teequea aparo onchoocateji ocatica, inintacaajiaqueriquea aisa nontsipatanajempari oncoramanitapojajeguete naajianaqueneriguete imentaquipae pojocashijiaquenemparica coguitejacojianquitsica. Ariquea nonquempejiaquempaquea imaica cameetsaniji iramenajitaqueriniji Amajirote caaviji icavintsajantavaeti ariquea irishineventajitaquempari, aisa cameetsaniji iramenajitaqueroja arimajaca nonintajiaque naatimpajia noncavintsajiaqueriquea apitsaroventarijiate. ²⁰ Noshinevaeca intsipatsipaitanaquenaquea aatoniji icantaguishtacotimentanaritsi imentaqui iriraquea aagarantajiaquerica. ²¹ Teequea aparo nonintajigueti iramenajiaquenaqueate Amajirote nocomajamajaca, iroguentiquea nonintajiaque intsamajajiaque caquinteja aisa.

²² Imaica nontigarancaqueri aisa itsipa apitsaroventarite intsipatsipaitanaquempari, namenamajajiaqueriquea iriguenti caavijica itsaroventamajatarari Aapani Irioshi. Aisa nocamantaqueri caaviji pinintajiaque pincavintsajajiaqueri papitsaroventarijiate, irotaquequea inintantacaca iroaquite oraniqui iramenajiaquitempi. ²³ Iricatica Tito, iriguenti notsipamajare nantiniriguete Quirishito noconoajiaquempi. Irirajia apitsaroventarijiate intsipatsipaitanaquempaca iriguenti itigarancajiaqueca tsaroventajiatsica capiocapiniatsica guinteninintsipaequi. Iriatimpajia caaviji itsaroventamajatariquea Quirishito. ²⁴ Irotaquequea noncantantajiaquempica imaica netsanaja paamajajiaqueri cameetsaniji intsajiaqueniji maasano tsaroventajiatsica capiocapiniatsica arimaja notampaticamajaquequea nocantajiaqueriguete caaviji pipintsamatantaca.

9

Incapiocajiaqueri imentaquitsite intigarancacaantajiaqueneri irapitsaroventarijiate

¹ Nocantajiaquempi imaica cotanquitsiquea notsaque teequea pincoguimentacojiguemparoji nontioncaciaquempiquea noncantajiaquempi paagarantajiaquenerijate pimentaquitsitepae papitsaroventarijiate. ² Notsamajaque caaviji picavintsajantajiaque. Nocantantajiacarica apitsaroventarijiate Maseroniaquitica pinintamajajiaquequea aviatimpajia guintenijiatsica Acayaqui paagarantajiaqueneriquea pimentaquitsitepae Jerosarequitica, pipariavaetanacaroquea otsipaniqui ajagantsiniqui. Oraqueate iquemajiaqueguete iriatimpajia ariquate inintagarantajiaque inquempejiaquempiquea aviatimpajia iragarantajiaqueneriquea iriatimpajia aisa. ³ Irotaquequea imaica nontigarancantajiaquemparica apitsaroventarijiate iramijiaquempiquea paagarantajiaqueriguete aatoniji manaquea intati noncamanqueri Maseroniaquitica pinetsanajiaqueroquea maasanopae. ⁴ Noncoraquetaquetarite namenajiaquempiquea aricaquea nontsipagarantajiaquempari Maseroniaquitica. Oraqueate noncoraquecoraqueivequempaguete ariguete namenajiapojempiquea teequea pinetsanamajajigueroji nocantajiaquerica, manaquea ovashiventajavaetanaquenaquea, ariquate pinquempejiaquempaquea aviatimpajia ovashiventajavaetanaquempiquea. Iroompaquea noncanque: “Arimpate nocanque irinetsanajiquerojate maasanopae.” ⁵ Irotaquequea namenantacaca aricaquea cameetsaca nontigarancajiaqueri iriatimpajia apitsaroventarijiate iriquetitaquea oahoaitanquitsineca iramenajiaquempiquea iramijiaquitempi paagarantajiaqueriguete pimentaquitsitepae pinetsanamajajiaqueroquea picantajiaqueca coramani. Pinquempejiaquempaguete imaica intsajiqueroquea inchiquiojita aviatimpajia pinintajiaque pincavintsajantajiaquequea, teequea naatimpajia cantajiguempironeca.

⁶ Iintsija pinquenquejajiguerojate ocatica:

[☆] 8:15 Eeq. 16.18.

Querica vintyacatsica capichajaniqui,
capichajaniqui iraaje.

Iiraquea vintyacamajatatsica,
oncarapiovaetanaqueuea iraaje.

⁷ Inchiquiojiquea pamenajiaquempa aviatimpajia querocaca incarajigueni pimentaquitsite pinintajiaque pojocagarantashitantempa, irooquee pojocantajigue; cotanquitsiquea aatoja picatsimajencatacojiguiritsijate pojocantajiaquegueti. Aisa aatoja irooquee pojocantantajiga pamenajiaquegueti incantajitaquempi: “Pojocantetsija.” Iiraquea Aapani Irioshi iriguenti ishinevenca shinevenca irojocantavaetaqueueate.

⁸ Yagavejaqueuea Aapani Irioshi incavintsajamajiaquempi cameetsaniji pagavejiaqueni pincantacoguitempuni pincavintsajantajiaque aviatimpajia aisa. Irioquee oshequiajempirone pincoguitejacojiaquempaca onchoocatantaquempaca otsipa cameetsaniji pojocagarantajiaqueneri coguitejacovaetanquitsica. ⁹ Otionccatari:

“Ipintsatacotacari coguitejacovaetanquitsica yojocaguetaqueneri;
itampaticamajataquero yoaquero, ariquea incantacoguitempuni.”

¹⁰ Iiraquea Aapani Irioshi iriotaqueuea jocaqueneri vintyacatsica oitsoqui aisa ishecaguetacaca, ariquea inquempetacaquempiroquee aviatimpajia aisa, iroshequiaqueroquee pashi pincavintsajacomajatantanaquemparica itsipajia. ¹¹ Arimajaca iramitacoguetaquempiquea Aapani Irioshi onchoocamajaqueni cantashitatiaguetatsica cameetsaniji pagavejiaqueni pincoguitempuni pincavintsajantajiaque. Oraqueate arejetapojaquempagueti naajianajenerigueti paagarantajiaquenerica papitsaromentarijate irishineventamajitaquempariquea Aapani Irioshi incantajiaque caaviji ipintsamajantaca. ¹² Aritarite pojocantajiacanarica, teequea mana pojocajigueneri intati icoguitejacojiacaca igomajamajarejia Aapani Irioshi, irooquee onquenantanaquempaca aisa incantantajiaquemparica: “Arioteesa, Aapani.” ¹³ Ariqueate iramenajiaquegueti pintigarancacantajiaqueneri pimentaquitsite intsajiaque teequea pimashitsajiguempaji manaquee pipintsajiacariquea iriatimpajia aisa maasano tsaromentajiatatsica, ariquea irishineventajiaquempariquea Aapani Irioshi iramenajiaquetari tee pincantashijiguempaji intati: “Noquemisantaquero Quenquetsatsarentsi Oganejencatatsica tsavetantaquerica Quirishito”, iroguentiquea iramenajiaque arimaja pitsaromentamajiacari Quirishito pinetsanamajaqueroquee icanqueca. ¹⁴ Ariqueate iramanacoventajiaquempiquea impintsamajiaquempi iramenajiaquempigueti picavintsajiaqueri, iriguentitari chagashirentajiaquempiquea Aapani Irioshi piquempetantajiacaroca imaica. ¹⁵ Jaameshiatsi ashineventajianaquemparija Aapani Irioshi, ancantajiaqueri: “Arioteesa”, caavijitari ipintsamajantaca!

10

Icanque Paavoro iriguenti tigarancaqueri Quirishito

¹ Imaica naatimpa Paavoro noncantajiaquempigueti nonintacotaquempica, noninqueuea nonquejetaquempari Quirishito yatsipetacovaetagueti icavintsajantigueti. Icantacojivetaquena notsaroanaque nochoocatimojiaquempigueti, cotanquitsi nochooquegueti osamani notampishivetaca. ² Nonintaqueuea nonchoocatimojiaquempigueti aato noshiramparitimogiuempi noncantomajiaquempiniji, irirampani jive tanquitsica noguijatacotiro iquenquejaguetica caquinte, arica irioquee noncantomajiajipojaque. ³ Arimajasacanica naroguentijia caquinte, cotanquitsiquea teequea nonquempejiguempariji itsipajia caquinte nashimirintempagueti. ⁴ Nashimirintamentopae teequea onquejetemparoji yaventajiacaca teeca intsaromentempariji Aapani Irioshi, iroguentiquea navenca itampishica Aapani Irioshi, nagavejantacarica tampishijavetatsica. ⁵ Nagavejiaqueriquea maasano teeca irishineventemparoji Iguenquetsatsare Aapani Irioshi manaquee itampishitashijavetavacaroquee. Jero yagavejacaantajiaquenaca cameetsanijite nomajeretacaajiaqueriniji maasano ticaticaaquerineca itsipajia aatoniji

itsajigui Aapani Irioshi. Iquenquejaguetaqueca caquinte oquejevecariquea ashimirintavecajica aajiavaqueca. Yagavejacaajiaquenaquea aisa Aapani Irioshi nagavejajiaqueriquea quenquejaguishejiatsica covaeguisherentsi cameetsaniji aatoniji iquenquejaguishevaetajitsi irioquea inquemisantamajianaque Quirishito. ⁶ Iroquetitaquea noninque pinquemisantamajianaqueriquea, iroompaquea noncantimentsijiguempariquea irirajia maasano pigatsatacarica.

⁷ Aviatimpajia pijijiaqueji pitsajiaque, cotanquitsi tee pamenamajajiguroji. Cotanquitsiquea choocaguete amenanquitsineca iriguenti tigarancaqueri Quirishito, iintsijate intsaque iriatimpa itigarancquitsijianaquea naatimpajia aisa. ⁸ Choocaguete quenquejashitanquitsica: “Mana isemetaque”, nocantajiaquempiguete iriguenti tigarancajiaquenaquea Amajirote, cotanquitsiquea teequea ovashiventajenaji nocanqueca, arimajacatari iriguenti tigarancajiaquenaquea yagavejacaajiaquenaqueate nontsatacajiaquempimpari arimpaqueate pintsaromentamajianaquempari pintsipatavacaamajianaquempa, aatoquea nopeacotacajiaiguimpimpari pintsaromentajiacariguete pincampanajante pintsinampirejavacaajianaquempa. ⁹ Teequea noninteji onquempetimojiguempimpari notioncajiaquempimpari nomintsarocajiaquempimpari. ¹⁰ Iconoagarantajiacatari icantajiaque: “Oraquea itioncajianaqueca Paavoro ooqueate itampishijaniquique icatsimajiaquenaquea, cotanquitsiquea oraquea ichoocaguete quempeji itsaroque teequea intampishiteji, aisa teequea intsatimateji inquenquetsateji.” ¹¹ Cotanquitsiquea imaica noncantajiaqueriquea irirajia cantajianquitsica imaica, noncoraquequeguete oraniqui aviatimpajiaqui, ariqueate nonquempetacajiaquempimpari notioncajiaquempimpari nontampishimajiaquequea noncanquempa.

¹² Naatimpajia aatoja noquempejigaritsi irirajia aventajiaatsica cantajiaatsica: “Notsajiaque nocanca”, inchiqiojitaja icantajiaja iriatimpa. Iriatimpajia yamenavacaavetaca ijiqueji irioji cameetsari, cotanquitsiquea teequea intsatimateji taaca opaji cameetsatatsica, aisa taaca opaji covaeguishetatsica. ¹³ Naatimpajia teequea nonintajigujeeji nosemejigujee nonquempejiaquempimparimequea iriatimpajia. Oraqueate nocantacojiaquerogueti nantajiaquenerica Amajirote, teequea nonquenacaashitemparoji, manaquea tampatica noajiaquero, iriguenti cantanquitsi Aapani Irioshi iroaqueraguete querocaguete oraniqui nonchoocajiaque nontsavetantajiaquerogueti Iguenquetsatsare, jero arejetantajiacaroca oraniqui aviatimpajiaqui. ¹⁴ Oraquea aatomeguete nontsavetantimojiguimpimequea, ariquea iroguenti manamequea noncanqueme intati naatimpajia tsaromentacaajiaquempimpari, cotanquitsiquea teequea ariquea nonquempetempajia imaica, narouquetitarite itigarancaqueca Amajirote nontsavetantimojiaquempimpari Quenquetsatsarentsi Oganejencatatsica tsavetantirica Quirishito. ¹⁵ Teequea ariquea naitivacotantimateji noncantajiaque naroguentijia tsaromentacaajiacari itsavetantimojiaqueca itsipa. Imaica manaquea nonintamajajiaque pintsaromentamajianaquempimpari cameetsaniji nontsatacajiaquempimpari otsipa nontampishitacaajiaquempimpari arimpaquea pintsaromentamajianaquempimpari. ¹⁶ Iroompaquea namenajiaquempiguete pinquempejiaquempa imaica, ariquea noanoaitaque osamanipaequi tiijacoñajisano ontaniqui ichoocajiaqueguete tequerataca intsavetantimojiteriji noncamantaqueriquea iriatimpajia aisa Quenquetsatsarentsi Oganejencatatsica. Manaquea nonquempejiaquempa imaica aatoniji nopinajavacovaetantatsi. ¹⁷ Iriira shineventacotatsica, iriguenti irishineventacotimentempa Amajirote. ¹⁸ Aatoquea irio ishineventajita irira cantacotatsica: “Caaviji nonetsanamajatiro.” Iriguentiquea irishineventajitempa incantacotaqueca Amajirote: “Caaviji inetsanamajatiro.”

11

Paavoro aisa irirajia tsavetantamampejiaatsica

¹ Teequeate nonintavetempajia nonquempetaquempimpariquea aventacovaetatsica intati, cotanquitsiquea pantsipetacovaajiaquenaquea nonquempetaquempaguete imaica.

☆ 10:17 Jer. 9.24.

² Oshequi nagamajacotaquempi, irira Aapani Irioshi quejetacaaquenaro, namenaque-roquea naroguenti tsaromentacaajiaquempica jero nonintantacaca apaniro poamaja-queri Quirishito cameetsaniji oncoramanitapojajeguetei incoraquetajateguetei irame-najapojajempiniji comajamajajiaquempiquea quempejiaquempiqueate majinaro comajamajatatsica, aparo oguijaqueri manquigataquemparoneca. ³ Pinquenquejerija coramani iriraquea camaarini* manaquea yamatavijaquero Evani icovaeguishevaeta-caacaroquea, irootaquequea notsaromentacaca imaica namenaque choocaguetei irirajia amataajatsica inquempetacaajiaquempiquea aviatimpajia aisa, iroompaquea pinquenashijianajempa aatoquea quisho poajiajiritsi Quirishito, aatoquea pitsaromentajia-jari. ⁴ Namenajiaquempitari iriguenti pishineventamajajiaica iriatimpajia. Oraque-ate itsavetantajiavecariguetei Jesoshi teequea intampaticateroji iroajigueroji, quem-petaca iriguentica itsipa itsavetantajiaque. Ariquea oquempetaca aisa manaquea pinintajiaquequea irishaquiajapojempiquea itsipa teeca irioquea Ishire Aapani Irioshi choocashirentajiavequempica iroaqueraguetei. Aisa piquemisantamajajiaquitirini tsave-tantajiavecaroca otsipa oganejencavetatsica teeca onquempetemparoji Quenquetsatsar-etsi Oganejencatatsica notsavetantimojiaquempica piquemisantajiaquea iroaquer-aguetei. ⁵ Cotanquitsiquea namenaque teequea iranaajiguenaji irirajia tsavetantajiaatsica amenajiaatsica iriguentijia itigarancanemajaca Jesoshi. ⁶ Arica tee nonquenquetsavetem-paji cameetsa notsavetantiguetei, cotanquitsiquea oraquea notsaqueca cameetsavaeque onaque. Irootaquequea pamenantajiavaquenaca notsatacaajiaquempiguetei, noguicone-jamajataquempiro.

⁷ ¿Arimpate pinejaquero tee oncameetsateji teeguetei novegaratacajaguempiroji not-savetantaquempiroguetei Quenquetsatsarentsi Oganejencatatsica itigarancaqueca Aa-pani Irioshi? ¿Arimpa pinejaquero iroguenti coguisherentsi teeguetei nanaajenca-jiapojajuempica, aviguentiquea nanaajencatacaajiaipojaque? ⁸ Aisa manaquea quem-peca iroguentica naapitsajiaqueriquea imentaquitsitepae tsaromentajiaatsica osamani-paequitica, yojocajiaquenatarite cameetsaniji onchoocaqueniji nocoguitejacocaca na-gavejaquenijite nontsavetantimojiaquempiniji aviatimpajia intati. ⁹ Quempeca nocogu-itejacovaecaguetei teequea ariquee nasereseretempiji namanajiaquempiquea. Oraque-ate icoraquecoraqueieguetei apitsaroverentarijiate Maseroniaquitica ariquee yojocaji-aquenaquea. Ariqueate noquempetaqueroquea coramani teequea noninteji nasere-serejiaquempi, imaica nococani noquempetaqueroquea imaica. ¹⁰ Notsamajaquequea iriguenti nintacaaquenaquea Quirishito nontsavetacoqueriquea, ariquee oquempetaca aisa notsamajaque teequea namataguempaji. Irootaquequea noncantantajiaquem-pica imaica naatimpa aatoja yojoquimajiganatsi imentaqui guintenijiaatsica Acayaqui, aatonica nonintitsi, iroguentiquea noninque nontsavetantimojiaquempiquea intati. ¹¹ ¿Queroquea oco-cani noquempetantacaroca imaica? ¿Arite teete nompintsama-jajiguempiji? ¡Irraquea Aapani Irioshi itsamajaque arimajaca nopintsamajaquem-piquea! ¹² Cotanquitsiquea arimpaquea nonquempetanaqueroqueate imaica aatonica nonintsijiguimpiritsi pimentaquitsite cameetsaniji aatoniji yagavejajiguitsi semejiaatsica tsavetantamampejiaatsica intati incantajiaque: “Manaquea noquempejiacari Paavoro notsavetantajiaqueguetei.” ¹³ Iriguentijia amatavijantajiaatsica, teequea irioquea tigaranc-querine Aapani Irioshi, manaquea ipeamampejiaica intati itigarancanejia Quirishito. ¹⁴ Iriatimpajiaquea caaviji iquempejiaica imaica, quempeca Satanashi ariqueate iquem-petamampejaariquee irashivantite Aapani Irioshi iramatavijanquenijite. ¹⁵ Ariqueate iquempetacaquea iriatimpa imaica, jero irirajia antajiguinirica ariquee inquempempe-ji-empica iriatimpajia aisa impeamampejiaquempaquea tsatacaantantajiguirica comajata-gantsi, cotanquitsiquea incatsimamajajitaqueriquea oncoramanitapojajeguetei, yamatavimatavitantavaequetari.

Paavoro yatsipeventavaetacarocua itsavetantavaetaqueguetei

¹⁶ Noncantsijiajempiquea aisa aatoja pijijiguitsijate ariji nopigataca intati, pantsipeta-covaequenaquea nonquempetaquempaguetei imaica cameetsaniji naventacovequittem-panijite capichajaniqui. ¹⁷ Oraquea nocanqueca imaica teequea irioquea cantenane

* 11:3 camaarini. Pamenero Jen. 3.1-7. Irraquea Satanashi yonigaacaroquea Evani, iquejetapojacari camaarini.

Amajirote inchiqiojitaquea nocanque naatimpa naventacoquempaguetei quempeque-naquea naroguentica shoncacori. ¹⁸ Quempetaca irirajia catsimajiaquenaca ican-taguishetacovaequenaguetei icantacoguitani yaventacojiaca, irootaquequea namenanta-caca aricajate nonquempetaquempajate naatimpa naventacotempajate. ¹⁹ Aviguentijia tsajiavetatsica, patsipetacotantavaevecarica irirajia shoncacorijia, aisa pishineventajia-acari. ²⁰ Aisa patsipetacojiaca yomperperaivaequempiguetei quempeca irioca ashin-tajiguimpi, aisa yamanamanavaequempiquea cantashitatiaguetanquitsica taaca opaji inintajiaquea, manaquea aisa yanaajencavaetaquequea, ariquea aisa yapatoncavorot-sijiguimpi. ²¹ Aricaquea pinintajiaveca aviatimpajia nonquempejiaquemparimequeate iriatimpajia, cotanquitsiquea teequea nagavejeji, teequea ariquea nonquempejiguem-pariji iriatimpajia itampishijiguetei.

Manaquea noncantajiaquempiquea aisa taaca opaji yaventacojiaca iriatimpajia, ariqueate nonquempetaquempa naatimpa naventacovaequempajate (iroguenti noquen-quetsaque quempeca naroguentica shoncacori). ²² Irooguetei yaventacojiaca icantajia-que iriguentei evereojia, ariqueate noquempetaca naatimpa aisa naroguenti evereo. Irooguetei icantajiaque iriguentei ishiraerijia, ariqueate noquempetaca naatimpa aisa naroguenti ishiraeri. Irooguetei icantajiaque iriguentei ichoviquijianaquea Averaameni, naatimpa naroguenti aisa ichoviquini. ²³ Arica icantajiaque iriguentei yantajiaque Quirishito, ariqueate noquempetaca naatimpa aisa iriotaquequea nantaquene, cotan-quitsiquea caaviji nanajiaqueri iriatimpajia. Manaquea noquempetacari shoncacotat-sica noquenquetsaqueguetei, cotanquitsiquea caaviji nanajiaqueri nantiniri Amajirote. Aisa caaviji nanaaque naatimpa itavatavaavaetanaquequea, aisa isantanatacojitanaque-naqueate. Aisa caaviji nanaaque natsipevaeguitaniqueate irooshivetapojaca irime-tojajitenamequea. ²⁴ Ipasapasavaetaquenaquea nogonorojia joriojia agompiaquitana ocaravaeque 39. Yaitsitajanaquea aisa yarejetacaavaetanaro 5. ²⁵ Ariquea oquempetaca aisa itavatavaajitaquenaquea inchaquijiqui, yarejetacaavaequenaro 3. Itsipajia itsinatsi-navaejiaquena. Ocarataque 3 notsitijaatacovetanaca quenajarontsiqui noquenajatanta-vetanacaca. Aisa notsitijaatacotanaqueguetei ontaniqui niganquijaqui inirojani quen-tijani teequea noncatimatajempaji nagatsitajempaji, manaquea nopitsecacotanaque apajencaro aisa nocantacoguitani namajaguitini apajencaro savincaguiteri. ²⁶ Oshequi noquenaguetaque. Ochoocaguetaque covejencaguetatsica: chooca covejencatatsica ojaaquiniqui, chooca aisa aitsitantaguetatsica senacashitaquenaca. Iriraquea no-gonorojia iquejetsijianacaquea iriatimpajia aisa, irooshivetapojaca irimetojaquename. Ariquea iquempejiaca itsipapae caquinteja teeca irioquea nogonorojia. Choocaquea covejencatatsica nochoocaqueguetei guinteninintsipaequi, aisa noanaqueguetei teeguetei inchoocamajateji caquinte, chooca aisa noquenajatanaqueguetei inirojaniqui quenti-janiqui. Aisa ariquea iquempejiaca cantajiavetanquitsica iriguentei tsaroventajiat-sica inintajiaveca irimetojajiaquename. ²⁷ Natsipevaeca nocanca nantaqueguetei, natsipeve-tacaroqueate taaca opajitapae. Otiavaetanaquenaqueate novochoquire, aisa otiavae-tanaquenashiatsi notase aisa nomire. Oconoacaquea nosavicashitacaqueate intati teequea noshecatimajaniquitempaji. Natsipevaecaro catsincaguiteri, aisa nocajaratsi-novaetanaque.

²⁸ Teequea aparo nantsipetemparoji ocaticapae, manaquea oavaetanaque savinca-guiteri noquenquejacojiaqueriquea aisa maasano tsaroventaripae noshoshoguiteti-mentajiacari. ²⁹ Quericaca noquemacoqueca teeca intampishiteji irooca yojoquijitaca oquejetimotaquenaquea naroguentime joquijitanquitsi. Quericaca noquemacoqueca icovaeguishetacajiacari manaquea ocatsishirentavaetanaquena.

³⁰ Oraquea naventacoquempameguetei iroomecaquea naventacoquempame name-naquequea teequea nagavejeji. ³¹ Iriraquea Aapani Irioshi Iriri Amajirote Jesoquirishito itsaque teequea namatavijanteji. Iriatimpa caaviji yoganejencamajataca ancoquem-panija ashineventajiaquemparija. ³² Oraqueate coramani nochoocaguetei Tamashico-qui iriraquea iramajirore majirontatsica Aretashi itigaranquitsijiavecari igoaretajia-te isenacashijiaquenaquea sotomorontsiqui yanquitsaegotatantarogueti mapi oca-piocaguetei tsovironaquipae irajiaquenaqueate irisantanatacojiaquenamequea.

³³ Cotanquitsiquea iriraquea napitsarorentarijiate itetsijianaqueate cantiriqui yoguiso-toacotsitana ishagaraquirejajiquerogueti yoguivarintsajacojiaquenaquea yovanquirejacojiaquena antaqueronta noshiapitsatapanajantari.

12

Paavoro itsavetantajiro yonigaimojiquerica

¹ Teequea nonintavetempaji nosemetaque namenaquequeate nosemevequempagueti ariqueea queroca noncoqueroni, cotanquitsiquea imaica irooqueate nontsavetacotaque yamenajiguetaqueca quejevecaroca yoguimaacaguetei aisa yonigaantaqueca Amajirote. ² Notsataqueri irira shirampari yashintacaca Quirishito, ocoramani-vaetapojaquegueti ocarataque 14 ajagantsini imaica, yatsomajajitaquitiri inquitequi jenoquimajatanquitsica, cotanquitsiquea teequea nontsateji aricaca yatsomajajitanaqueri maasanotsino irooca yaashirentajitanaqueriqueate, aparo itsaqueroquea Aapani Irioshi. ³ Noncantsijajempiquea aisa, teequea nontsateji aricaca yatsomajajitanaqueri maasanotsino manaca yaashirentajitanaqueriquea, aparo itsaquequea Aapani Irioshi. ⁴ Iroguenti notsaque arimajaca yatsomajajitanaqueriquea ontaniqui jenoqui paraisoqui,* ariqueea oraniqui iquemagueque cantashitajencaro iquenquetsajencajitagueueti, cotanquitsiquea teequea iragavejeji caquinte incante queroca icantajiqueni, teequea irininteji Aapani Irioshi intsavetantero. ⁵ Nagavejaque nontsavetacoteri quempecarica, cotanquitsiquea aatoquea nosemetitsi, iroguenti nosemetacoquempaquea namenaquegueti teequea nagavejempaji. ⁶ Arimegueti noninquemeguetei nontsavetacotaca maasano cameetsaguetatsica nantaguetaqueca, aatomequea querica agavejatsi incanque manaquea isemetaque intati, arimajacatari nocantamajati nontsavetacotaguetei. Cotanquitsiquea aatoja noquejetimatirotsijate imaica aatonijite pitiavaeta-caantajigarotsi pishineventajianaquena, iroguentiquea noninque pishineventajiaquemparoja pamenaqueca nantaguetaqueca aisa nocanqueca.

⁷ Oraqueate yonigaimoquenaca Aapani Irioshi caaviji oganejencamajataca oacaavaequenaqueate intati, cotanquitsiquea iriatimpa teequea irininteji nosemete jero iticaarejantacarica Satanashi irantsipetacaavaequenaquea. Oquejevetacaquea otseji opirijapatitacoquena. ⁸ Tres nocantavecari Amajirote intsoparejacotajenaromequea aatonijite natsipevaetajatsi. ⁹ Cotanquitsiquea iriatimpa icanquena: "Aritaque ocoani noncavintsajacoguitempini. Iroguenti nonigaanquero nagavejane caquintequi caarica agavejamajatatsi." Jero imaica noshinevaetantacaca nontsavetantaquerogueti teequea inchiquiojita nagavejeji naatimpa, cameetsaniji iroguenti agavejacaamajaquenane iragavejane Quirishito. ¹⁰ Irootaquequea noshinevaetantanacaca namenaquegueti teequea inchiquiojita nagavejempaji naatimpa, aisa icantaguishejitanaquenaguetei, natsipevaetacaguetei, aisa yatsipetacaavaequenaguetei catsimajiaquenaca, manaquea aisa taaca opajitapae tiavaequenaca natsipevencariguetei Quirishito. Namenaquetari oraquea teeguetei nagavejeji naatimpa, choocaquea agavejacaquenaca.

Paavoro ishoshoventajiacari Corintoquitica

¹¹ Aviguentijiarite quejetacaajiaquena imaica nontsavetacotantacaca quempeca manaquea noshoncacoca, aviguentijamequea quenquetsatacoventanaquenename pishineventajiaquenename. Naatimpa arimajaca teequea taaca opaji nagavejempaji, cotanquitsiquea teequea iranaajiguenaji irirajia tsavetantamampeajiatsica pishineventajiacaca piquemisantajiaqueca pajitashitajatsica "itigarancanemajaca Jesoshi". ¹² Oraqueate nochooqaquitiguetei aviatimpajiaqui nontsavetantimojiaquitimpiguetei natsipetacovaecaroquea nonigaimoguevetaquempiroguetei oganejencaropae teeca iragavejeji caquinte oacaantantatsica intati pintsatimentajiaqueniji arimajaca naroguenti itigarancane Jesoshi. ¹³ Ariqueea noquempetacaamajaquempi maasano tsarorentajiatatsica capiocapiniijatsica

* 12:4 paraiso. Irimetojaqueguetei tsarorentarica Aapani Irioshi, ari iroanaque ontaniqui paraisoqui, ari inchoocaque irosati aapojempaguetei savincagueteri intancorejantanajempaca. Pamenero aisa Yonig. 2.7; Irc. 16.22; 23.43.

tsovironaquipaequi, apanivani arica pamenajiaquena tee nasereacotsitempiri noncantajiaquempi pojocajiaquenaquea nocoguitempiquea. ¡Imaica iintsija pimpeacotsitajenaro pamenajiaquenaguetei noquempetaqueroquea imaica teequea taaca opaji namanajiguempiji!

¹⁴ Imaica noanaque namenajiaquitempiquea aisa. Oraqueate noanaqueguetei irooquea trestapojatsineca namenajiatempiquea. Cotanquitsiquea aatoja nasereseretimpitsi namanajiguimpitsi, teequea irooquea noashite pashintajiacaca, aviguentijiaquea noashijianaque nontampishitacaajiaquempiquea arimpaqueate pintsaroven-tamajatanauempari Quirishito. Iriraquea irijanintajiatistica irioquea jocajiaquenerineca irijanijiate icoguitempiquea, aatoquea iriatimpajia jocajiguiniritsi irijanijiate. ¹⁵ Naatimpa noshinevaequempaquea noncanquempa nonteroncacaamajaquempiro maasanopae nashincaca, cotanquitsiquea aatoquea aparo noteroncacajaiguimpiquea nashincaca, manaquea nonquetanauempaquea naatimpa nantsipeventajiaquempiquea pajinitia ometojanaquena magorentsi. Oncantacoguitempanguetei nompintsamajianaquempi naatimpa, ¿arimpaqueate aviatimpajia capichajaniqui pimpintsavequena? ¹⁶ Iconoagarantajiacacatsimajiaquenaca, yamenajiaveca teequea noncantimatempiji pojocajiaquenajate nocoguitempiquea, cotanquitsiquea icantajiaque: “Teequea iramanajiavetempiji imentaquipae, cotanquitsiquea caaviji itsamajati yamatavijantiguetei, jero teequea pamenacojiguempaji yaitsijiaquempiriguetei pimentaquitsitepae.” ¹⁷ ¿Arimpate ariquea nocantajiaqueri irirajia notigarancajiaqueca iramenajiatempiquea iramanamanavaequempiniji pimentaquitsite cameetsaniji naagaran-tavaqueniji naatimpa? ¹⁸ Coramani nocanqueri Tito iroaqueitequea oraniqui iramenajiaquitempiquea. Oraqueate yoanaqueguetei notigarancajiaquea itsipa apitsaroven-tarite intsipatanauempaca. ¿Arimpate yamatavijijiaquempi Tito? Mavitepaetari naatimpajia ariquea noquempetavacaajiacaca noquenquejajiguetei, aisa ariquea noquempetavacaajiacaca nantiniriguetei Amajirote.

¹⁹ Oraqueate nocantajiaquempiguetei imaica aviatimpajia arica pamenajiaque aricajate nonintajiaque nonijacoventajianaquempa, cotanquitsiquea teequea irooquea nonintajigueji. Yamenaquenaqueate Aapani Irioshi manaquea noquempejiaqueroquea imaica cameetsaniji nontampishitacaajiaquempi arimpaqueate pintsaroven-tajianaquempari, aviguentijiaquea napitsaroven-tarijiate nopintsajiacaca, aisa iriguenti nintanquitsica Quirishito noquempetantajiacaroca imaica noquenquetsatacaajiaquempi. ²⁰ Otsaroneguintavaequitanauempaqueate namenaquequea arica noavetempaguetei oraniqui namenajiavepojajempiquea cotanquitsiquea aato noshineventajiguimpitsi, iroompaquea ariquea pinquempejiaquempaquea aviatimpajia aisa aatoquea pishineventajianatsi. Aisa arica manaqueate namenajiapojempiquea catsimatsatavacaajiaquempi, catsimajencatacotantajiaquempi, catsimatsitantajiaquempi, aviguentijiaquea quenquejacojiajatsi, tsojeventantavacaajiaquempi, nijashitavacaajiaquempi, nintajiaquempi panaimanatavacajiaquempa, aisa teequea pinquemavacaajiguempaji. ²¹ Otsaroneguintavaequitanauempaqueate namenaquequea noncoraquetajateguetei aisa namenajiatempiquea arica manaquea irovashiventajavaequenaqueate Aapani Irioshi namenajiapojajempiquea picaramirincavaeque aviatimpajia teequeate povashiantajigueroji pigovaeguisherjia, nintanatsiqueate poashitantajiaquequea, aisa pipashinincajiacaca irooca aisa teequea pinejashitemparoji manquigarentsi, ariquea niraacojiaquitempiniquea.

13

Icanque Paavoro inique irinetsanavaejiaquempa

¹ Imaicaqueate imaica otrespojaque noncoraquetantaquempaca namenajiatempiquea. Otioncacaquea: “Choocaguetei mavite irioca 3 amenajiaquerica itsipa icovaeguishecaguetei, ariquea iroguenti pincantomajitsitempariquea.”[☆]

² Coramani namenajiatimpiguetei nocantajiaquitiri irirajia covaeguisherjianquitsica irovashiantajianajeroja maasanopae ipeacaaguisherjiaquea. Imaica nochoocaveca osamani, cotanquitsiquea noncantsijajempiqueate iriatimpajia aisa maasano

☆ 13:1 Ireo. 17.6; 19.15.

quericaca peacaaguishejiacaroca covaeguisherentsipae, noncoraquetajategueti noncantomajamajiaqueri. Aatotarite notsarocaaajigaritsi. ³ Pinintajiaquetarite pamenajiaque arimajacaca iriotari Quirishito quenquetsatantacaroca novagantequi. Iriatimpa teequea intsarogueji incatsimatimentajiaquempiroquea pipeacaaguishejiacaca. ⁴ Oraquea yompajacojitaquerigueti quempeca teeca iragavejajeji, cotanquitsiquea arejetapojagueti ivochatajiri Aapani Irioshi yagavejacaajiri. Ariqueate noquempejiaca naatimpajia imaica teemajaca nagavejajigueji, cotanquitsiquea iriraquea Aapani Irioshi yagavejacaajiaquenaquea iquempetacaajiaquenariquea Quirishito yagavejacaquerigueti, irootaquequea nagavejantajiaquempaca noncantomajajiaqueriquea peacaaguishejiacaroca covaeguisherentsipae.

⁵ Iintsija pamenajiajempaqueate aviatimpajia arimajacaca pitsaromentamajiacari. Noncantsijiajempiquea aisa iintsijate pamenajiajempajate. ¿Arimpate teequea pintsajigueji ichoocashirentaquempi Jesoquirishito? Teeguete pintsaromentamampeajiguempariji intati, ichoocashirentaquempi. ⁶ Ariquea oquempetaca imaica noninque pintsajiaquequea arimajaca naatimpajia naroguentijia itigarancanejia Jesoquirishito, teequea naroguentijia amataajiatsica. ⁷ Namanacoventajiaquempi nocantajiaqueri Aapani Irioshi intampishitacaajiaquempiniji aatoniji pipeacaaguishetajarotsi taaca opaji covaeguisherentsi. Cotanquitsiquea teequea ariquee noncantajigueji imaica cameetsaniji iramenajiqueriniji cameetsa nantajiaqueneriquea Amajirote, manaqueate nonintamajataquequea pincomajamajajiaquempajate. Iroompaquea aricaguete oshimerancavetapojempa incantacojivetaquenaqueate: “Teecajate iriguentijia itigarancanemajaca Jesoquirishito”, aviatimpajiaquea pincantacoguitempani pincomajamajajiaquempa. ⁸ Teetari nagavejajigueji naatimpajia nonticaajiguero Iroomajatatsica, manaquea noninque nontampishiventajiaquero. ⁹ Nonintamajajiaquequea pintsaromentamajajiaquemparija. Oraqueate arimajameguete pintsaromentamajatemparimeguete noshinevaetaquempamequeate, aatomequeate querocaca ocojiganamequea naatimpajia pamenajiaquenaguete teequea nagavejajigueji. Manaquea nintanatsi namanacoventajiaquempiquea cameetsaniji arimpaquea pintsaromentamajajianaquemparijate pincomajamajajianaquempaja. ¹⁰ Irootaquequea notioncantajiaquempica ocatita paperi tequerataguete noanoaiteji namenajiajatempiquea cameetsaniji pincomajamajajianaquempiniji aatoniji nocantomajamajatapojimpi. Iriraquea Amajirote itigarancaquenaqueate nontsatacaajiaquempiquea arimpaquea pintsaromentamajajianaquempariniji pintsipatavacaamajatanaquempaquea, aatoquea iroguenti novashiantacaajiguimpitsi pintsinampirejavacaajiaquempa.

Paavoro iteroncanajiro icantajiaquerica

¹¹ Imaicaquea imaica, napitsaromentarijiate, noninque pishinejiguempajate, aisa noninque pincomajamajajiguempajate. Pinquenquejacomajateroja notioncajiaquem-pica imaica. Pinquemavacaajiaquempajate aatoja picatsimavacaajiatsi. Pinquempajiaquempaguete imaica intsipamajajiaquempiquea Aapani Irioshi, iriatimpa iriguenti pintsatantamajatantatsica, iriguenti choocatacaajica cameetsa aatonijite taaca opaji ashoshomentajiajatsi. ¹² Netsana pinintavorotavacaavaquempa.* ¹³ Maasano ipeacaajiacaca Aapani Irioshi igomajamajarejia inintajiaque pinquemacojiaqueri chooca iquenquejajiaquempi.

¹⁴ Noninque incavintsajamajajiaquempiquea Amajirote Jesoquirishito. Aisa noninque pintsamajajiaquequea iriraquea Aapani Irioshi incoguitempani impintsamajajiaquempiquea, aisa Ishire intsipamajajiaquempiquea.

* 13:12 Netsana pinintavorotavacaavaquempa. Yamejiaca coramani inintavorotavacaajivaca yamenavacaajiacaguete, ari iquejijaca tsaromentajigarica Quirishito coramani.

PAAVORO ITIONCAJIAQUENERI GARASHIAQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaciaquenerigueti tsaromentajiacarica Jesoshi choocajianquitsica quepatsiqui pajitatsica Garashia. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacagnarica. Irocashi itioncacotaqueri irira Paavoro otsipaqui paperiqui (Ya. 7.57-8.1; 9.1-31; 13.1-28.31), aisa itioncacotaqueri ichoocaquegueti Paavoro Garashiaqui paperiqui Yantajiguica 13-14; 16.1-6. Chooca quenquejanquitsica itioncacaantaquero Paavoro ocatica paperi ajagantsiniqui 48, ichoocaquegueti guinteninintsiqui pajitatsica Antioquia quepatsiqui icantajitica Shiria. Itsipajia iquenquejajiaque itioncacaantaquero ajagantsiniqui 52, mavitetapojacagueti iquenaguetaquegueti quepatsipaequi itsavetantavaequerigueti Jesoquirishito, ichoocaquegueti guinteninintsiqui pajitatsica Corinto. Itsipajia iquenquejajiaque itioncacaantaquero ajagantsiniqui 56, otsipatapojacagueti iquenaguetaquegueti quepatsipaequi itsavetantavaequerigueti Jesoquirishito, ichoocaquegueti guinteninintsiqui pajitatsica Epeso.

¹ Naroguenti Paavoro tioncaciaquemparoca imaica. Naroguenti itigarancane Jesoquirishito. Teequea iriguenti nintacaguenane caquinte, teequea iriguenti tigarancaguenane caquinte, iriguentitarite tigarancaguenane Jesoquirishito jeri aisa Aapani Irioshi vochantajirica. ² Notsipajiacariqueate apitsaromentarijiate notioncaciaquemparogueti maasano aviatimpajia choocajiatatsica ontaniqui Garashiaqui capiocapinijiatatsica tsovironaquipaequi. ³ Namanacoventajiaquemparoquea incavintsajajiaquemparinijite Aapani Irioshi aisa Amajirote Jesoquirishito, inchoocatacaajiaquemparinijite cameetsa aatonijite pishoshomentajigaro taaca opajitapae. ⁴ Ipacajiroquea Quirishito imetojane irishejiajajironijite agovaeguisherajia aatonijite aquejijjaari choocajianquitsica imaica antaguishetiroca covaeguisherentsi, irootaquetari ininqueca Aapani Arioshite. ⁵ Cameetsaquea ancoguitempani antsaromentajiaquitemparini Aapani Irioshi. Ari oncoquemparoca.

Tee onchoocateji otsipa Quenquetsatsarentsi Oganejencatatsica itigarancaqueca Aapani Irioshi

⁶ Icajemajiaquemparoquea Aapani Irioshi incavintsajajiaquemparinijite Quirishito. Imaicaquea manaquea namenanaque intati noquemacojiaquemparogueti teequea picancani pinquemisantamajajigueroji Quenquetsatsarentsi Oganejencatatsica itigarancaqueca Aapani Irioshi, iroguentiquea taampinaquea pipitsocashijianacaro icantajiaqueca cantashitatigaroca. ⁷ ¿Pijiqueji chooca otsipa Quenquetsatsarentsi Oganejencatatsica itigarancaqueca Aapani Irioshi? ¡Teequea onchoocateji! Manatarite ichoocajiaque intati cantashitiatijiacaroca Quenquetsatsarentsimajaca tsavetantaquerica Quirishito, iriotari asereajiaquemparoca. ⁸ Quericaca cantashitiatiaquemparoneca Quenquetsatsarentsi Oganejencatatsica notsavetantimojiaquemparoca cameetsaquequea iroanaque camorecariqui. Arigueti naatimpa noncantashitiatiaquemparoca incatsimatimenquenaroquea Aapani Irioshi. Ariquea inquejetaquemparogueti irashivantijitete manaquea inquenavepojaquemparoca jenoqui inquitequi, iriogueti cantashitiatiaquemparone incatsimatimenqueriquea iriatimpa. ⁹ Nocantajiaquemparoqueate coramani imaicaquea noncantsitajiemparoqueate aisa: cameetsaque iroanaque camorecariqui quericaca cantashitiatiaquemparone Quenquetsatsarentsimajaca paajiaqueca nocamantajiaquemparogueti. ¹⁰ Teequea irooquea noninte irishineventena caquinte. Iroguentiqueate nonintaque irishineventaqueca Aapani Irioshi. Iriomegueti nonintaque noshinetacaquemparime caquinte

aatomequea nopegame itigarancuica Quirishito, aatome nocantirime: “Quirishito, pashintenaja.”

Quero oquenapojini itsavetantica Paavoro

¹¹ Napitsaromentarijiate, imaica nonintaque pintsamajajiaquequea oratica Quenquetsatsarentsimajaca Oganejencatatsica notsavetantaqueca teequeate iroguenti irashijia caquinte iguenquejane. ¹² Teetari irioquea camantenaarone caquinte, teetari irioquea tsatacaajiguenane. Iriotaquequea tsatacaaquequero Jesoquirishito. ¹³ Piquemacojiavetaquenatarite quero nocotani coramani noquejejiavetariqueate nogonorojia joriojia savicaventiroca itioncanaqueca Moishishini, caavijiquea nocatsimajiguiuri tsaromentajigarica Quirishito, natsanajiacariquea nonintavecaquea nonteroncaciaquerimequea maasano. ¹⁴ Noquejejiavecariquea nogonorojia joriojia nonetsanamajavetacaroqueate icantajiguica novaesatinijiateni nanaaqueriquea maasano notsipajiacaca noquenquevarijiguueti. ¹⁵ Cotanquitsiquea caaviji icavintsajamajataquena Aapani Irioshi, icoguiaquequea coramani tequeratagueti novogueji, ariquea icajemaquena. Aapojacagueti savincaguiteri inintantacaca ¹⁶ yonigaaquenariquea Irijanite cameetsanijite nontsavetantaqueriniji noncamantajiaqueriquea caquinteguetsatsica teeca irijorijoigueti. Yonigaaquenariguete teequeate quericaca caquinte naventanaquempariquea noashitanaqueriquea noncoacotaquiteri taa nantaque. ¹⁷ Teequea ariquea noncantanaquempaji Jerosarequi ichoocajiaquegueti iriquetica peajianquitsica itigarancane Jesoshi naventajianaquemparimequeate noncoacotaquiterime, manaquea taampina nocantanaca Araviaqui. Coajica noanaji Tamashicoqui.

¹⁸ Ariqueate avisanaquegueti 3 ajagantsi ariquea noaquiti Jerosarequi nonejaatiriquea Peerero, noconoaquitariqueate 15 savincaguiteri. ¹⁹ Ontaniquiqueate aisa nonejaqueri Santiago* iriguentijeguite Amajirote. Tee nonejeriji itsipajia itigarancanejia Jesoshi. ²⁰ Yamenamajataquena Aapani Irioshi teequeate namatavijajiguempiji, arimajaquea nocantajiaquempi. ²¹ Ariquea noanaque nochoocaquiti quea Shiriaqui jero aisa Shirishiaqui. ²² Iriaqueate Joraquitica tsaromentajigarica Quirishito tequerataquea irinejajiguenaji. ²³ Manaquea iquemacojiacquena intati icantacojitaquenaguete icantajitiqueate: “Iriacatsimavetacajica nintavetanquitsica interoncaciaajime imaica chooca icamantajiaqueri maasano: ‘Paventempari Jesoquirishito irimeshiantaquempica.’ ” ²⁴ Irootaquequeate ishineventantajianacarica Aapani Irioshi iquemacojiacquenguete.

2

Yoanaquegueti Paavoro Jerosarequi

¹ Ariqueate ocoramanivaetapojiguete 14 ajagantsi ariqueate noajati aisa Jerosarequi, iriguentiqueate notsipatanaca Verenave notsipatsipaitanacariqueate Tito. ² Iriguentitari tigarancaquea Aapani Irioshi noantanacacaquea. Ontaniquiquea Jerosarequi iriguentiqueate noconoajiajoja quemoguijajiguirica quemisantajiatatsica, nocapioajiacaqueate nocamantamajajiaqueriquea quero nococa notsavetantimojiaqueriguete teeca irijorijoigueti notsavetacotaquerogueti Quenquetsatsarentsi Oganejencatatsica. Nocamantantajiacarica cameetsanijite iramenimentajiaquenijite iriatimpajia teequea ari nonquenquetsatashitempaji intati. ³ Iriaqueate Tito iriguentivetacaqueate guiriego cotanquitsi teequea quericaca cantatsine intotsaiquimashitacaantaquempa inquejetantanaquemparica joriojia. ⁴ Oraqueate nocapioajiacaguete ariquea iconoapojana irira tsaromentamampeajiatatsica. Icantavetacaquea iquemisantajiaqueri Quirishito cotanquitsiquea manaqueate icoraquetashijiaquequea intati iramenajiaquena querocaca nocojiacani notsaromentamajiacariguete Quirishito Jesoshi. Teequea incantajiaji Quirishito anetsanajiajero itioncanaqueca Moishishini cameetsaniji irimeshiantajajica, cotanquitsiquea inintajavetacaquea iriatimpajia acancani anetsanajiaquerome quejetaca

* 1:19 Santiago. Iguenquetsatsarequi guiriego ipajita Iakobos. Iconoagarantaca quimajareri yoguipitsocaquerogueti ivajiro ipajitiri Santiago, itsipa ipajitiri Jacobo. Mavite oponeaca iguenquetsatsarequi evereo, ipajitiri Yaakob.

omperaperaatajaji. ⁵ Cotanquitsi naatimpajiaquea teequeate nonquemisantimajigueriji aatonijite icantashitatiimajitarotsi Quenquetsatsarentsimajaca itigarancaqueca Aapani Irioshi, noninquetari pintsamajajiaqueroqueate Quenquetsatsarentsi Oganejencatatsica.

⁶ Choocajiavetaca jivatatsica, teequea intsatacaguenaji otsipa, manaquea icantajiaque: “Cameetsavaeque pitsavetanqueca.” Iriovecaquea jivatatsica cotanquitsiquea teequeate irooquea nameneji, manaquea yamenajiacaji Aapani Irioshi maasano ari aquejetavacaajiac. ⁷ Teequeate intsatacajaiavaquena, yamenajiaquetarite iriguenti tigarancaquena Aapani Irioshi notsavetanquero Quenquetsatsarentsi Oganejencatatsica, notsatacajaiaqueri teeca irijorijoigueti. Aritarite iquejetacaacari Peerero itigarancaquerigueti Aapani Irioshi intsavetantimojiaqueriniji joriojia. ⁸ Irira Aapani Irioshi tigarancaquerica Peerero intsatacajaiaqueri joriojia, iriofarite tigarancaquena naatimpa aisa nontsatacajaiaqueri teeca irijorijoigueti. ⁹ Oraqueate nocapioacajiacagueti ariqueea ichoocajiaque Santiago, Sepashi,* jeri Joanca. Iriatimpajia iriguentijia quempoguijajiguirica quemisantajiatatsica. Ariqueea yamenajiaquenagueti iriguenti cavintsajaquena Aapani Irioshi, iriguenti tigarancaquenaca nontsavetante, yaajiaquenaquea yaava-cojiaquena naatimpa aisa Verenave, icantajiaquenaqueate: “Aviatimpajia cameetsavaetaque pisavicaventajiaqueriqueate teeca irijorijoigueti pintsavetantimojiaqueri. Naatimpaquea nocancaniquea nosavicaventajiaqueriqueate agonoro jorio nontsavetantimojiaqueri. ¹⁰ Cotanquitsi aparo nonintajiaque pincavintsajajiaqueriqueate irira apitsarorentarijiate teeca onchoocatimoteriji, aato pipeacojigari.” Tampatica yoaquero, irootaquequea nonintamajataqueca naatimpa, irootari nameta.

Paavoro icantomajaqueriqueate Peerero Antioquiaqui

¹¹ Ariqueea icoraquequegueti Peerero Antioquiaqui nocantomajaqueriquea namenaqueritarite mana yantaquequeate teeca oncameetsateji. ¹² Oraqueate tequeratagueti incoraquejigueti itigarancajiaqueca Santiago† iriraquea Peerero manaquea iconoavajari ishecatapinicagueti apitsarorentarijiate teeca irijorijoigueti, cotanquitsiquea coajica yamenajiaqueriguetiquea icoraquejiaque ariqueeate icantapanajanta itsinampirejajianaqueriquea, itsaroacaajiacaritarite incatsimatimentajiaipojaqueri iramenajiaipojaquerigueti inconoajiaquempari teeca irijorijoigueti irishecajiaquempagueti. ¹³ Ariqueea yamenajiaquerigueti itsipapae jorio, ariqueeate iquejetanacari itsinampirejajianaqueriquea apitsarorentarijiate teeca irijorijoigueti, aisa Verenave iquejetsitanacaquea iriatimpa aisa. Itsajiavetacaroquea cameetsataque inconoajiaquempari irishecajiaquempagueti, cotanquitsiquea manaquea itsaroajianaque intati iquejetantanacaroca imaica itsinampirejantajianacarica. ¹⁴ Cotanquitsiquea naatimpa namenajiaquerigueti iquejijianacagueti imaica notsaquequea teequea irinetsanatajeroquea ocatica Quenquetsatsarentsimajaca. Nocantsitariquea Peerero nocapioacajiacagueti: “Joriovequempiqueea aviatimpa, cotanquitsi tee poguijatacotajeroji yameguetaca jorio, mana piquempetacotacari teeca irijorijoigueti. ¿Queroquea ocotacani imaica picantantacaca irirajia caquinte teeca irijorijoigueti iroguijatacoteraja yameguetaca jorio?”

¹⁵ Naroguentijia joriojia, iriguentitari irijanintajiaquena. Teequea iriguenti irijanintajiguenane irirajia teeca irijorijoigueti, irirajia teeca intsateroji itioncanaqueca Moishishini. ¹⁶ Cotanquitsiquea notsajiaquequea aatoquea iroguenti imeshiimentajiganatsi Aapani Irioshi iramenajiaquenagueti nonintajiavetaca nonetsanajiaquero maasano itioncanaqueca Moishishini, aatotarite nagavejajigui nonetsanajiguiro. Notsajiaquequea iroguentiquea irimeshiimentajiacaji aventaquemparigueti Jesoquirishito anquemisantaquerigueti, irooqueate iramenantajiacajica Aapani Irioshi quejetaca tee ancovaeguishetimatempaji. Irootaquequea noquejetantajiacaca naatimpajia aisa, naventajianacariquea Jesoquirishito cameetsaniji irimeshiajiaquenani. Noncantsijiajempiqueate aisa aatoquea iroguenti imeshiimentajaji anintajiavequempagueti anetsanajiaquero itioncanaqueca Moishishini.

* 2:9 Sepashi. Irootaque otsipa ivajiro Shimo Peerero. Pamenero Jn. 1.42. † 2:12 Santiago. Yoguijitsocajitirogueti ivajiro icantajitiri aisa Jacovo.

¹⁷ Cotanquitsiqueate anintajiaquegueti irimeshiajiacaji Aapani Irioshi aventajiaquemparigueti Jesoquirishito arigueti incantajite: “Jeriquetisa covaeguishetanquitsica teeca inquemisanteroji itioncanaqueca Moishishini”, ¿iroompa oncanque icovaeguishetacajiacaji Quirishito? ¡Teequeate! ¹⁸ Oraqueate arigueti nompiashitanajerogueti novashiantaguetanaqueca noquemisantavetacagueti iroaqueragueti, ariquea manaquea noncovaeguishetaquempaqueate intati. ¹⁹ Coramani nonintavetacaqueate nonetsanataquero maasano itioncanaqueca Moishishini, cotanquitsiqueate teequea nagavejeji nonquejetacaamajaquemparoquea. Irootaque notsatantacaca naroguenti covaeguishetatsica. Imaicaquea teequea iroguenti nonquenquejacotajeji itioncanaqueca Moishishini nonetsanaquero ironijite irimeshiimenquena Aapani Irioshi, manaquea namenaquero quejetaca teeca onchoocatajeji. Iriguentitarite noquemisantamajatanaque Aapani Irioshi nonetsanatanaqueoqueate maasano icanqueca iriatimpa. ²⁰ Oquejetacaquea yompajacojitaquerigueti Quirishito coroshiqui mana itsipatacaantajiquenari yompajacojitaquena naatimpa aatonijite noquenquejacotajiro maasano covaeguishetacaaquenaca. Oquejetanacaquea mana nometojapitsatanaquero intati. Choocavequenaquea cotanquitsiquea teequea ariquea nonchoocatashitajempaji intati, iriguentitarite choocatanaquena Quirishito. Imaica choocatirajanagueti notsinoqui irioquea agavejacaquena Irijanite Aapani Irioshi noquemisantamajatanaqueerigueti. Iriatimpa caaviji ipintsamajataquena imetojavejantaqueenaca. ²¹ Irootaquequea naatimpa aatoquea nocantitsiquea mana imetojaque Quirishito intati. Oramequea iroomeguete irimeshiimentajiacajime Aapani Irioshi anetsanamajajiaqueroguete itioncanaqueca Moishishini manamequea irimetojaqueme Quirishito intati.

3

Ichocashirentajiguiriqueate Ishire Aapani Irioshi maasano quemisantajiguirica

¹ Aviatimpajia, Garashiaquitica, ¿arimpate tee pintsatimateji? ¿Teequea pamenacojivaquempaji yamatavijitaquempiguete? Pitsajiavetacaquea noquenquetsatacaajiaquempigueti coramani iriguenti notsavetantaque Jesoquirishito yompajacojitaqueriguete coroshiqui. Oconijatimomajajiaquempiqueate, notampaticamajataquerotari nocantajiaquemfica. ² Imaica pincantajiguena, ¿taaqueate itigarancantacarica Aapani Irioshi Ishire ichocashirentajiaipojaquempiguete? Teequea iro intigarancantaquemparica pinetsanamajajiaqueromeguete itioncanaqueca Moishishini. Iroguentiquea itigarancantacarica manaquea yamenajiaquempi piquemacotavaqueriguete Quirishito Meshiantatsica ariquea piquemisantajianaqueri. ³ ¿Queroquea ocotanacani teequeate pintsajiajeji? Pipariajanacaroguete iroaqueraguete piquemisantajiaqueriguete Quirishito, iriotaque agavejacaajiaquempi Ishire. ¿Pijiquejei imaica pagavejaquero aviatimpa pitampishicaqui? ⁴ Iroaqueraguete piquemisantajiaqueriguete oshequiquea patsipeventajiacariquea Jesoquirishito. Imaicaquea aatoguete poguijatacotanajiri manaquea patsipetashitaquita intati. ⁵ Aapani Irioshi itigarancajiaquempi Ishire yagavejacaajiaquempiquea ariquea pamenacaantajiaquero oacaantantatsica intati, cotanquitsiquea teequea irooquea intigarancantajiguempiri pinetsanamajajiaqueromeguete itioncanaqueca Moishishini. Iroguentitarite itigarancantajiaquempirica yamenajiaquempi-tari piquemacojiaqueriguete Quirishito Meshiantatsica piquemisantajianaqueriqueate.

⁶ Ariquea iquejetaca Averaameni iquemisanqueriqueate Aapani Irioshi, irootaquequea yamenantacarica iriatimpa quejevaecaquea tee incovaeguishetimatempaji. ⁷ Irootaquequea pintsatantajiaquemfaca maasano quemisantamajajiaquerica quejejiacaquea iriguentica ichoviquini Averaameni, iquejejiacaritarite. ⁸ Coramani itsaquequea Aapani Irioshi incavintsajajiaqueri caquinteguetatsica teeca irijorijoigueti, irimeshiajiaqueriquea maasano aventajiaquemparineca iramentajiaquemparica quejevaeca tee incovaeguishetimatempaji. Ariquea icantacotsijiacariquea icanqueriguete Averaameni, itsavetantaqueroquea oguishinejantatsica, ocanquetari itioncacaantaqueroguete ocanti: “Aviguentiquea noncavintsajacotantajiaquemparica

maasano caquinteguetatsica quepatsipaequitica.”⁹ Ariqueate iquejetacaajiacariqueate Aapani Irioshi maasano aventajiacarica icavintsajajiaqueriquea iquejetacaajiacari Averaameni yaventacarigueti.

¹⁰ Maasanotari aventavetaroca yantaqueca ipanquenavetacarogueti irimoncarata-querome Cantacaantanentsi itioncanaqueca Moishishini, ariquea incatsimatimenta-
jiaqueri Aapani Irioshi. Itioncacojiquerotarite ocanti: “Incatsimatimenqueriquea Aapani Irioshi maasano teeca irinetsanamajatanaqueroji maasano Cantacaantanentsi itioncanaqueca Moishishini.”¹¹ Itsamajajitaqueroquea teequea quericaca agavejatsine irinetsanamajataqueroquea maasano Cantacaantanentsi itioncanaqueca Moishishini iroonijite iramenanquemparime Aapani Irioshi quejecaqueate tee incovaeguisheti-
matajempaji. Choocatarite otsipa itioncajitaqueca ocantiquea: “Iriaquea coma-
jashirentanquitsica incoquempani inchoocaguiteni irooriji yaventaguitarini Aapani Irioshi.”¹² Oraqueate Cantacaantanentsi teequea oncanteji mana aventajiguempari Aapani Irioshi anquemisantajigueri cameetsanijite acancani anchoocaguiteni, man-
atarite ocantavecaquea: “Quericacaquea netsanamajataquerone ocaticapae incoguitem-
paniquea inchoocaguiteni.”

¹³ Cotanquitsiquea ivegaraventacajiro Quirishito aatoniji icatsimatimentajitacajiro tioncanquitsica teeca anetsanajigueji, iriguentitari piyajaji yatsipetacaantajitacarica iriatimpa. Choocatarite tioncanquitsica ocanti: “Yompajacojitirigueti caquinte in-
chapoaqui yonigaantajiaqueriquea mana icatsimatimenqueri Aapani Irioshi igov-
aeguisherere.”¹⁴ Iriaquea Quirishito Jesoshi teequea apaniroquea irimetojaventajiguen-
naji naatimpajia joriojia, imetojaventajiaqueriqueate aisa teeca irijoriojigueji cameet-
sanijite irimeshijiaquerinijite maasano aventajiaquemparineca quemisantajiaquer-
ineca, aritarite icanquerini Averaameni coramani. Imeshijiacajiquea cameetsani-
jite intigarancaquerinijite Ishire inchoocashirentajiacaji aatimpajia aventajiaquempar-
ineca, icanquetari coramani intigarancacajiri.

Icanquerica Aapani Irioshi Averaame

¹⁵ Imaica, napitsariventarijiate, nonintaquequea pinquenquejajiguero ocatica ameji-
gaca. Taaca opajitapae anintacaanaquerica ojocanajenerica itsipa, manaquea antionca-
cotsitemparoquea paperiqui, ariqueate aisa antioncaquero avajiro aatoniji yogaashiji-
tajaro acantajiaqueca. ¹⁶ Coramani icamantaquerigueti Aapani Irioshi incavintsaja-
queri Averaameni icantiriquea inquejetacaquempariquea aisa inchoviquitanaqueca.
Teequea incanteriji: “pinchoviquijianaqueca”, manaquea icantiri: “pinchoviqui-
tanaqueca”, iriguentitarite icantacoque Quirishito. ¹⁷ Ariquea ocoramanitapojaquegueti
aapojacagueti 430 ajagantsini iquenquetsajencatacaqueriquea Moishishini icaman-
queriquea quero incojiaquempa ishiraerijia intsariventajiaquemparigueti. Ariquea
itioncavaqueroquea Moishishini, cotanquitsiquea Aapani Irioshi teequea incantashita-
tiguemparoji icanquerica Averaameni coramani, iroorijite icanqueri irinetsanataque-
roquea icanquerica. ¹⁸ Iroomequea incavintsajimentajiacajime anetsanajiaquerogueti
itioncanaqueca Moishishini arimequea aatomequea icantirime Averaameni mana incav-
intsajiaqueri intati yamenaquerigueti iquemisantaqueri. Cotanquitsiquea inchiqiojit-
sita inintanaque Aapani Irioshi incavintsajiaqueri, ariquea irooquea icantaquerica.

¹⁹ Iroosacanicate ¿taaqueate itioncacaantacaricaquea Aapani Irioshi Moishishini?
Manatarite itioncacaantacarica intsamajatementajiquerinijite mana yantaguishejiguiro
covaeguisherentsi maasano caquinte. Manatarite inintaque Aapani Irioshi irinetsana-
jitaquero itioncacotanaqueca Moishishini arejevaetapojemparoquea irinetsanataquero
icanquerica Averaameni coramani incoraquepojaquegueti inchoviquitanaqueca. Iti-
garancaqueritarite Aapani Irioshi irashivantijitete incamantajigueri Moishishi maasano
icantajiaquerica, irioquea tsatacaajiaquerine igonorjia. Ariquea yogaaajivaqueneri.
²⁰ Cotanquitsiquea icamanquerigueti Averaameni, inchiqiojitsitaquea icamanqueri
iriatimpa, teequeate iriguenti incajemeji itsipa aanaquenerineca. ²¹ ¿Arimpate orat-
ica itioncanaqueca Moishishini mana ocantashitaticaro icanquerica Aapani Irioshi
Averaameni? ¡Teequeate! Oraquea anijacaantemegueti itioncanaqueca Moishishini

acancaninijite anchoocajiaque, iroomequea anetsanashirentantajiaquempamequea.²² Cotanquitsiquea oraquea Tioncarentsimajaca ocanti agavejajiaqueri covaeguisherentsi maasano caquinteja, oquejevetaca osantanatacotaqueri, teequeate iragavejajigueji irovashiantajigueroji. Oquejetantacaca imaica cameetsanijite onetsanatimentaquempanijite icanqueca Aapani Irioshi coramani, irinetsanataqueneriquea maasano aventajiaquemparineca Jesoquirishito.

²³ Coramani tequerataguete aguempaji ocativa aventashirentagantsi, oquejevetaca oquempoguijajiacaji itioncanaqueca Moishishini, oquejevetaca ashitacojiacaji arejevaetantacaros yonigaantantajitacaroca aventashirentagantsi. ²⁴ Oraquea itioncanaqueca Moishishini oquejetacari quemmpoguijantatsica aajianacajineca Quirishitoqui irinetsanashirentajiacajiniji aventajiaquempariguete. ²⁵ Cotanquitsiquea imaica aventashirentaquempariguete, teequea irio camantajajine quemmpoguijantatsica.

Maasano quemisantamajajatsica quejejiacaquea iriguentica ichoviquitanaqueca Averaameni

²⁶ Maasano aviatimpajia aviguentijia irijanijiate Aapani Irioshi, piquemisantajiaqueritarite Quirishito Jesoshi, paventajiacari. ²⁷ Maasanotarite aviatimpajia viñacajianquitsica quemisantajiaquerica Quirishito manaquea piquejejiacari iriatimpa, oquejetaca piquitsaajajari. ²⁸ Imaica acarajivetacaquea jorio jeri teeca irijorioteji, yaajanijitacaca jeri teeca irajaanijitempariji, shirampari jero aisa manquigarentsi, cotanquitsiquea aquejetavacaajiaquea maasanotarite atsipajiacariquea Quirishito Jesoshi ariquea aquejejianacari. ²⁹ Quejejiacajiquea apatiroti acanca. Imaica aviatimpajia quemisantajiguirica Quirishito quejejiacquempiqueate aviguentijia ichoviquitanaqueca Averaameni, icavintsajantajiaquempica Aapani Irioshi inetsanaqueroquea icanquerica Averaameni.

4

Quero icojiavetani tequerataguete incoraqueteji Quirishito

¹⁻² Jero imaica nonquejetacaajiaquempiroquea aisa. Quericaca irijanintanquitsica incanquequea: "Oraquea nometojanajeguete irioqueate ashintajemparone irijani maasano nashintaguetacaca, cotanquitsiquea aatotaquea yojoquitajitanari. Oraqueate inquenquevaritanajeguete ari irojocajitajeneri irashintamajatajemparoqueate." Pamenerija, irira irijanite yashintaguevetacaroqueate maasano, cotanquitsiquea tequeratanicate inquenquevariteji manaquea iquejemajatajariqueate aajanirentsi, choocatarite aajanitajarica oguimoncajirica. Iriatimpaqueate yoguijaqueriquea inquenquevaritanaqueta, ariquea irojocajitajeneri irashintamajatajemparoqueate. ³ Ariqueate aquejejiacaquea aatimpajia iroaqueraguete tequerataguete anquenquevarishirenteji, apampiatacojiavetacaroquea yamejigaca caquinte, itsatacantica quepatsiquitica. Quejevetacaquea aajanijiacaji. ⁴ Cotanquitsiquea aapojacaguete savincaguiteri inintacaaqueca Aapani Irioshi coramani, ariquea itigarancaqueri Irijanite, ovoaqueriquea manquigarentsi, inetsanantacaroca iriatimpa itioncanaqueca Moishishini. ⁵ Oquejetantacacaquea imaica cameetsanijite irovegaraajataaji aatimpajia maasano irooriji omperatacaji itioncanaqueca Moishishini aguijatacojiaqueroguete. Yovegaraajatajiqueate cameetsaniji impeantajiajajica Aapani Irioshi irijanijiate. ⁶ Aroguentijia irijanijiate imaica, irotaquequea itigarancantacarica Ishire Irijanite inchoocashirentajiacaji, icajemaquequea: "¡Aapani! ¡Aapani!" ⁷ Teequea omperatajempipi omperavetaquempica, imaicaquea avirotaquequea irijanite Aapani Irioshi. Irijanintamajaquempiquea Aapani Irioshi, icavintsajaquempitarite yojocantaquempiroca maasano irojocajiaquenerica irijanintajiacaca.

⁸ Coramani tequerataguete pintsajiavetempariji Aapani Irioshi, iriguentiquea pirioshimajiajetaca caarica irioshimajatatsi, ariquea yomperajivequempipi. ⁹ Cotanquitsiquea imaica pitsajiaqueriquea Aapani Irioshi, arimequea noncanteme iriatimpa itsajiaquem-piquea icavintsajajiaquempiquea. Imaicaquea ¿quero ocoani pinintantajiacaca pinquetanajempa coramani poguijatacojiavetacaroguete yamejigaca caquinte teeca agavejeji

omeshiante? ¿Arimpa pinline omperajajempi? ¹⁰ Aviatimpajia pishineventajiana-jaroquea savincaguteripae aapojacaguete pishinetantacaca, aisa iroaqueraguete isotoaji taai, jero aisa ishinetantajitaca yogavisajaguete arejetajaguete ajagantsipojajiguete, maasanoqueate pishineventajianajaro pijijiaqueje ariji poguishinejantajiaquemparica Aapani Irioshi. ¹¹ Notsarocojianaquempiquea aricaja natsipeventashijiaquempi intati notsatacajiaquempiqueti piquejetanajampaquea coramani poguijatacotantanajarica itsatacaantajiguica caquinte.

Paavoro iquenquejiaqueriqueate quemisantajiatsica

¹² Napitsaroveritariate, coramani teequeate poguijatacojiavetemparoji itioncanaqueca Moishishini. Ariqueate noquejejaquempi naatimpa iroaqueraguete noquemisantaque novashiantanaquero teequeate nonetsanatajeroji. Imaicaquea aviroquea poguijatacojiavetanajaro, cotanquitsiquea nonintaquequea pinqueje-jianaquena naatimpa povashiantajianajeroqueate, aatoqueate poguijatacojiajirotsi. Coramani noimojijaatimpiguete cameetsa paajivaquena intati teequea pimanintenaji.

¹³ Pitsajiaquetari nashinoncacaguete teequea nagavejajempaji noaguetajeje osamani, manaquea aviguentiquea nochoocatimoguitimpini nopariantanacaroca notsatacaajiaquempi notsavetantaquero Quenquetsatsarensi Oganejencatatsica.

¹⁴ Nashinoncamajavetacaquea cotanquitsiquea teequea pimanintajiguenaji, manaquea patsiperejacocaró intati. Piquemisantajivaquenaquea manaquea piquejetacaajivaquenaquea irioaquea coraquetanquitsi irashivantite Aapani Irioshi, aisa quejetaca irioca coraquetanquitsi Quirishito Jesoshi. ¹⁵ Coramani pishinevaejianacaquea noconoajiaquempiqueti. Noncantajiaquempiquetiquea “Pojoquenaroshiatsi poquija”, pinquitsorejaquenarome pojocajiaquenaromequea. ¿Quero ocotacani imaica teequea pishineventajiajenaji? ¹⁶ Notsatacaamajiaquempitari iroomajatatsica. Imaica ¿iroocampa picatsimatimentajiaquena?

¹⁷ Iiraqueate itsipa caquinteja manatarite inintajiaquequea povashiantajianajenaquea aatoquea piquemisantajianajana, irootaquequea inintantajiacaca intsatacajiaquempiquea itsatacaantajiguica iriatimpajia cameetsaniji pishineventajiaquempariniji pinquejianaquempariquea. Irootaquequea yoguishinejantamampeajiaquem-pica. ¹⁸ Cameetsavecaqueate irinintajiaqueguete itsipa pishineventajiaquempari, cotanquitsiquea cameetsaquea irinintajiaqueguete, aatoquea yamatavijajiguimpi. Arimpa naatimpa teequea namatavijajiguempiji tampaticaquea noaquero notsatacajiaquempiqueti, cotanquitsiquea imaica nochoocaqueguete osamani jac pimaisantajianajanaquea. Aatomesano piquejejiga imaica, nonintavecatarite picancaniquea pishineventajiaquenaquea. ¹⁹ Nirijanijiate, naatimpaquea natsipeventajiaquempiquea aisa, nonintamajataquetarite namenajiaquempi pinquejemajiaquempariquea Quirishito, caavijiqueate natsipeventajiaquempi quejecaquea atsipetaguete manquigarentsi ovoacotiguete. ²⁰ Nonintavecaquea imaica nonchoocaqueme aviatimpajiaqui anquenquetsatavacaquempa, nontsaqueroniji queroca oocani piquejetantanajaca.

Iquejetacaacanari Agare aisa Sara

²¹ Pincantajiguenajate aviatimpajia nintajiatatsica pinetsanajiaqueroqueate itioncanaqueca Moishishini: ¿arimpate tee pintsamajajigueroji maasano ocanqueca?

²² Itioncacojiquerotarite ocanti choocaquea mavite irijanite Averaame, aparoquea ashi iroatimpa ashincaca imanquigaremajaca, choocaquea itsipa ashi iroatimpa imanquigaremajaca teeca irashintajitemparoji. ²³ Iiraquea irijanite ovoaqueca yashintajitaca manaquea ivoaque iroorijite inintashitacari caquinte, cotanquitsiquea irira irijanite ovoaqueca teeca irashintajitemparoji ivoaque irooriji iriotaque icantacotsitacaca Aapani Irioshi irojocaqueneri Averaameni.

²⁴ Choocaquea oshiacaantacaca ocativa, oraquea manquigarentsijia oshiacaantac-arotari mavite paaquito. Aparo paaquito oponeaca otsempiqui icantajitica Shinai, iroguenti quejetacaró Agare voaquerica chaajaniquirijia peajianquitsineca yashintajitaca. ²⁵ Oraquea Agare ocantacotaquero otsempi Shinai choocatanquitsica Araviqui, aisa ocantacotaquero Jerosare choocatanquitsica imaica, maasanotari joriojia

ipomerentsiventajavetacaro itioncacotanaqueca Moishishini irinetsanajiaquero, quejetaca omperaperaajiacari. ²⁶ Cotanquitsi aatimpajia aroguenti aquejejiacari ochoviquijianaqueca imanquigaremajaca Averaame teeca iromperaperaajitempaji. Iroatimpa iroguenti ocantacotaque otsipa Jerosare inquitequitica. ²⁷ Choocatarite itioncanaqueca Isaiashini ocanti:

Pishinetempaja shiravaro, aviatimpa teeca pogueji.

Tequerataquea pantsipetimatempariji pirijanite, imaicaquea pishinevaetempaja.

Iroshequiamajatanquetari pinchoviquijianaqueca,

iranaamajajianaqueriqueate onchoviquijianaqueca pomperare irijanintacaacaca manquigatimpica.

²⁸ Napitsaroveritarijiate, aatimpajia quejejiacajiqueate Ishaaco, irijanintajiacajitarite Aapani Irioshi quejetaca icanquerica Averaame. ²⁹ Coramani iriraquea irijanite voanquitsica irooriji inintashicari iriatimpa, icatsimapiniqueriqueate Ishaaco ovaqueca Sara yagavejacaqueroguete Ishire Aapani Irioshi. Ariqueate iquejejiacariqueate imaica netsanajiaquero itioncanaqueca Moishishini icatsimapinijiacajiqueate aatimpajia irijanintajiacaca Ishire Aapani Irioshi. ³⁰ Cotanquitsiqueate ¿quero ocanque Tioncarentsi? Ocantiquea: “Manaquea pintigaranquerotsija osamani oratica omperarentsi ontipatanaquempariqueate irijanite. Irijanite omperarentsi aatotarite itsipatashitimaritsi irijanite manquigarentsi teeca iromperaperaajitemparoji irashintaquemparoguete yashintaguevetacaca iriri.”

³¹ Imaicaqueate, napitsaroveritarijiate, teequea iro choviquitajine omperarentsi, oquejevecaquea irooquea choviquijiacaji teeca iromperaperaajitemparoji.

5

Aatoqueate piquemisantajiquiritsi cantajatsica: “Pinetsanajiaquero itioncanaqueca Moishishini”

¹ Yoguiquijacaantajiacajiqueate Quirishito aatoniji atsipeventajarotsi aquemisantajajirotsi omperaperaajavetacajica, mananijite anchoocatashijajempa intati. Imaicaquea pintimanaque, aato piquemisantajirotsi omperajavetaquempica.

² Naroguentiquea Paavoro tioncaquempiroca. Pinquemisantamajajivaqueroja noncamantajiaquempica imaica: pintotsaiquimashitacaantavequempaguete pijiqueguete irooquea irishetantajempiroca Aapani Irioshi pigovaeguishere—pinquejejiacquempaguete imaica aato yagaveji Quirishito irimeshiguempi.

³ Noncantsijajempiquea quericaca nintanquitsineca intotsaiquimashijiqueri, manaquea irinetsanamajateroja maasano itioncanaqueca Moishishini, teequea apaniro oncanteji intotsaiquimashijiqueriquea. ⁴ Aviatimpajia nintajianquitsica pinetsanajiaquero itioncanaqueca Moishishini iroonijite irimeshiantajiaquempicaquea Aapani Irioshi, manaquea piquenashijianaca intati teequeate pintsipajajempariji Quirishito, aisa teequeate pinintajigueji incavintsajajiguempiji Aapani Irioshi. ⁵ Cotanquitsiquea naatimpajia noguijajiaquequea incavintsajajiaquenaquea oncoramanitapojajeguete, incameetsamajajajena iramenajiaquenaquea quejetaca tee noncovaeguishetima-

jiguempaji. Irioquea agavejacaguenane Ishire noguijatanquemparica, naventacaritarite. ⁶ Arimajaguete aquemisantamajajiaqueri Quirishito Jesoshi iriraqueate Aapani Irioshi aatoquea iquenquejacotiro aricaca atotsaiquimashijia aricaquea tee, iroguentitarite inintamajati iriatimpa anquemisantamajajiaqueri. Anquemisantamajajiaqueriguete ariquea ampintsajianaquempari maasano caquintepae.

⁷ Oraqueate iroaqueraguete piquemisantamajajiavecaroquea iroomajatatsica. Ariquea iticaajitavaquempi irootaquequea povashiantantajanacaroca. ⁸ Teequeate irioquea quejetacajaguempine Aapani Irioshi, iriguentitarite cajemajiaquempiquea iroaqueraguete. ⁹ Icantajitiquea: “Onconoaquemparoguete capichajaniqui anempoacaqueroneca pan, ariquea oncotanaquempa anempoanaquequea maasano ose.” Ariqueate iquejejiaca caquinte inchooacagueguetequea apaniro amataatsica impajencajiaqueriqueate igonoro.

¹⁰ Naatimpaquea notsaqueriquea Amajirote, irioquea amitacojiaquempine aatoniji

piquenashitanaca pipampiatacotirotsi teeca iroomajaca. Cotanquitsiquea quericaca asereaquempica incatsimaqueriquea Aapani Irioshi. ¹¹ Napitsaroveritarijiate, naatimpaquea arimegueti nocancanimegueti noncanqueme intotsaiquimashitacaantajiaquem-paquea maasano inquejetantajianaquemparica joriojia, aatomequea icatsimajiganame nogonorojia joriojia, aisa aatomequea icatsimatimentajiganarome notsavetanquerigueti Quirishito imetojaventacajigueti coroshiqui. ¹² Iroosacanicate iquejevintsajiaquerogue-tiqueate imaica, jarimesano incanquempame tsein tsatic iriatimpa maasano asereaji-aquempica cantajiatsica pintotsaiquimashijiaquempa!

Arigueti pimpintsatavacaajiaquempa, ari ovegarapoja

¹³ Aviatimpajia, napitsaroveritarijiate, icajemajiaquempiqueate Aapani Irioshi irimeshijiaquempiniji, aatoniji patsipeventajijaaro pinetsanajiajero itioncanaqueca Moishishini, cotanquitsiquea teequea irininteji ancovaeguishejiaquempa, aatoquea picantajiguetsi: “Imaicaquea cameetsavaeque nantaquequeate taaca opajitapae non-inqueca naatimpa.” Manaqueate pimpintsatavacaajiaquempa pamtavacaajiaquempa intati. ¹⁴ Icanquetarite Aapani Irioshi itioncacaquerigueti Moishishini: “Pimpintsa-taquemparija pignonoro pinquejetacaajempa pipintsatagueti aviatimpa.” Pinquejeta-caajiaquemparogueti imaica piteroncaqueroquea pinetsanaqueroquea maasano itionca-caaquerica. ¹⁵ Cotanquitsiquea namenajiaquempi manaqueate picatsimatavacaajianaca intati, piquejejianacari chaonarjite yatsicavacaaguetsi. Inchiqiojisanaja pitsinam-pirejavacajianacatsijate aatoquea pitsipatavacaaja.

Pinquemisantamajiaqueri Ishire Aapani Irioshi

¹⁶ Imaica noncamantajiaquempiqueate pincoguitempanija pinquemisantamajia-querijate Ishire Aapani Irioshi tsatacaashirentajiaquempica. Pinquejejiaquempaguetsi imaica aatoquea pipeacajajaa pinintaguishejiguica aviatimpajia. ¹⁷ Choocatarite covaequistetacaacajica anintajiguica ampeacaaguishejiguempa, cotanquitsiquea irira Ishire Aapani Irioshi iroguentiquea inintaque ancomajamajiaquempa, irotaque-quea ampeacaajiaquempaguetsi anintaguishejiaqueca aatimpajia aatoquea aquemisan-tajiguiritsi iriatimpa. Oraquea anquemisantajiaqueriguetsi, aatoquea apeacajajaaitsi anintaguishejiaqueca aatimpajia. ¹⁸ Iriogueti choocashirentajiaquempine Ishire Aapani Irioshi, aatoquea irooquea patsipeventajijaatsi pinetsanajiajero itioncanaqueca Moishishini aatoniji icatsimajiguimpi Aapani Irioshi.

¹⁹ Atsajiguirotarite yantaguishejiguica irirajia quemisantaqueroa inintashigueve-tacaca: yoashijiguiro teeca iro imanquigare, manaquea icovaeguishejiaca intati, yantaguishejiaquerogueti teequeate impashiventacaguemparo. ²⁰ Itsaroverantajiacari irioshivijitashitacaca, imatsitantajigui, icatsimatantajigui, yantashitantajiga, icatsi-matacotsitantaguetiro taaca opajitapae, icatsimajiaquequea, iriguenti quenquejacota-jatsi, aisa teequea intsipatavacaajiguempaji manaquea itsinampirejavacaajiacaca intati. ²¹ Inintsijiguiriqueate yashintaguetaca itsipa, imetojantajigui, ishinquijiga, aisa iconoa-jiavaqueroquea yantaguishejiaquequea taaca opajitapae. Noncantsijajempiqueate iri-raquea quejejiaqueroa imaica aato yoajigui ichoocatiguetsi Aapani Irioshi.

²² Cotanquitsiquea ichoocashirentajiacajiguetsi Ishire Aapani Irioshi apintsatavacaajiacaquea, ashinevaejiacaquea, teequea ashoshoguitejajempa, manaquea atsipereja-cojiaca intati, apintsatantajianacaquea, acavintsajantajianaquequea, netsanaquea oa-quea acanqueca. ²³ Aisa aquemisantacojiacaquea intati teequea ampigatantajiguem-paji, aisa atampishitashiguetaqueroquea taacaguetsi opajitapae. Teequea incanti-mentajitajiroji anquejejiaquempaqueate imaica. ²⁴ Irraqueate tsaroverantamajajigarica Quirishito Jesoshi quejetanacaquea itsipajiacari yompajacojitaqueriguetsi coroshiqui, manatarite imetojapitsajianaquero inintajiavecaca, irotaquetari teeca irantantajia-jemparoji. ²⁵ Ichocashirentajiacajiguetsi Ishire Aapani Irioshi itsatacaajitacajiqueate, iroosacanicate imaica jamequetirofe anquemisantamajajianaqueriquea anetsanajiaque-roqueate maasano inintaguequeca. ²⁶ Aatoquea aventacajiga, aatoquea acatsimat-acaguiro itsipa, aisa aatoquea anintajigui anaimanatantajiaquequeate.

6

Pamitacotavacaajiaquempa

¹ Napitsarorentarijiate, aviatimpajia ichoocashirentamajajiaqueca Ishire Aapani Irioshi pamenajiaqueriguete pigonoro ipeacaaca covaequisherentsi cameetsaquea poa-queri pincantomajajiaqueriquea cameetsanijite impishonquimentanajeronijite, cotanquitsiquea inchiqiojia picatsimajiguiritsi, manaquea pincavintsajeriquea. Ariquea pamenamajajiaquempaquee aatonijite piquejejianaca aviatimpajia aisa pincovaeguisherianaquempa. ² Pamitacotavacaajiaquempaquee pintampishitashitimentajiaqueronijite covaequishetacaantatsica. Pinquejejaquempaguete imaica jac pinetsanajiaque-roquea itsatacajaiacajica Quirishito. ³ Choocaguete teeca iranaantimateji cotanquitsiquea iramenaquempaguete ijiqueji caaviji yanaantaque, irisatiquea amatavijaatsi. ⁴ Pamenajiguempaja maasano aviatimpajia, pamenajiaquempaguetequee picomajamajiacaca aviguentiquea shineventajatsine. Aatoqueate iro pishineventajiga pijiqueguete panaaqueri itsipa. ⁵ Maasanojiatari inchiqiojitsitarite iquejetaca iriatimpa yantajiguete irooca cameetsatatsica irooca covaequishetatsica, tee irio itsipa quejetacaguemparine.

⁶ Imaica nonintaque noncamantajiaquempiquea ancavintsajajiaqueriquea tsatacaajiacajica Iguenquetsatsare Aapani Irioshi, ojocajiaqueneriquea taaca opajitapae cameetsaguetsatsica.

⁷ Inchiqiojijata pamatavijatsi aviatimpa: iriraqueate Aapani Irioshi incatsimajiaqueri maasano cantimanajiguirica. Taaca opajita itsaqui caquinte, irootaque iraavaje. ⁸ Iriira antaguishejiguiroca inintashiguete, quejetaca iro itsaquica, coajica ontsoroanaque, ariquea iraviguitaje covaequisherentsi; cotanquitsiquea iriraquea savicaventiroca inintaguete Ishire Aapani Irioshi, quejetaca iro itsaquica, ariquea iraavaje anijagantsi poneanquitsica Ishirequi Aapani Irioshi, incoguitempani iranijaguiteni. ⁹ Imaica jamejate antampishitashijiaquero antajiaquequee cameetsaguetsatsica, aatoquea aperataro. Aatoguete aperajiga anquejetaquempariquee aavajiroca oitsoqui, incavintsajacajitari Aapani Irioshi oncoramanitapojajeguete. ¹⁰ Irootaquequee nocantantajiaquempica jaameja ancavintsajajiaqueriquea maasano, ariquea agaanaquempa ancavintsajamajatanaqueri apitsarorentarijiate tsarorentajiacarica Quirishito.

Iteroncajianajiriguete icantajiaquerica

¹¹ Imaica narotaque Paavoro tioncavaquempiroca ocativa. Irootaque pintsatantavaquemparoca: inirojegui nocanquero notioncaquerogeti nacoqui.

¹² Iriraqueate cantajiatsica pintotsaiquimashitacaantajiaquempa manatarite inintajiaque irishinetimentajiaquempari igonorojia joriojia. Yamenajiaquetari incantajiavequempaguete: "Iriguentiquea anquemisantajiaque Quirishito metojaventajiacajica coroshiqui", manaquea irantsipetacajiaquempariquee incatsimajiaqueri. Irootaquequee icantantajiaquempica pintotsaiquimashitacaantajiaquempa. ¹³ Jeriquea totsaiquimashitacaantajiatsica teequee arimaja irinetsanamajajigueroji itioncanaqueca Moishishini, cotanquitsiquea manaquea inintajiaque pintotsaiquimashitacaanquempa irooquea iraventantajianaquempaca iramenajiaqueguete yagavejajiaquempitiotsaiquimashitacaajiaquempiquea pinquejetantajianaquemparica iriatimpajia pitsinoqui. ¹⁴ Cotanquitsiquea naatimpa teequee noninteji naventacotempaji, irooquea noshineventamajataca imetojaventacajiguete Amajirote Jesoquirishito coroshiqui, teequee noshineventajemparoquea maasano ishineventaguishetacaca quepatsipaequitica, quejetacaquea mana ometojapitsatanaquena intati, aisa oquejetaca nometojapitsatanaquero, teequee noninfimatajeroji nonquenquejaguetajero. ¹⁵ Aritarite aventajiaquempariguete Quirishito Jesoshi, teequee iro incoacotempaji antotsaiquimashitaquempa irooca aato, iroguentiquea icoacotaca iroaquerashirentajianajaji. ¹⁶ Maasano quemisantajiaqueroneca ocativa, noninque Aapani Irioshi inchoocatacaajiaqueri cameetsa, incavintsajajiaqueri, iriojiaquee yashintamajiacaca quejetaca yashintajiacari ishiraerijiani coramani.

¹⁷ Imaicaquea ariotapojaque yasereaquitaena ipigapigajiquena, choocatarite notsinoqui piropiroini ipiropiroitimentajiquenari Amajirote Jesoshi.

¹⁸ Imaica, napitsaromentarijiate, noninquequea incavintsajajiaquempi Amajirote Jesoquirishito pishirequi. Ari oncoquempa.

PAAVORO ITIONCAJIAQUENERI EPESOQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaciaquenerigueti tsaromentajiacarica Jesoshi choocajianquitsica guinteninintsiqui pajitatsica Epeso. Irraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueti itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacancarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31), aisa itioncacotaqueri ichoocaquegueti Paavoro Epesoqui paperiqui Yantajiguica 18.19–20.1; 20.17–38. Tequeratagueti intioncacaanteroji ocatica paperi, itioncacaantaquero otsipa mavite paperi itigarancaciaquenerica quemisantajiatsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiatsica choocajianquitsica Iromaqui. Chooca quenquejajianquitsica tequeratagueti intioncacaantajiaqueneri Epesoquitica, itioncacaantajiaqueneri Piripoquitica. Paavoro itioncacaantaquero 3 paperipae ajagantsiniqui 60, ichoocaquegueti santanaqui Iromaqui: aparo itioncacaantajiaqueneri quemisantajiatsica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Ocaniqui paperiqui Paavoro icantaque, tequeratagueti impeacaguemparoji Aapani Irioshi maasano ipeacaacaca, itsatsitacaquea incapiocajiaqueriquea maasano quemisantajiaquerineca Jesoquirishito, irioca jorio aisa teeca irijorijoigueti, maasanoquea irimajirontajiajempari Jesoquirishito. Chooca 3 iquempetacaacaca Paavoro antsatantajiaquemparoca ichoocashirentacajigueti Quirishito quejetaca aparo anajiaje. Jero imaica: (1) aatimpajia aquejejiacaró tsovironaqui ipeacaajitaca mapipanco, irira Quirishito irio quejetacaró mapi anaantamajatanquitsica itampaticatocotantacaroca otsipapae (2.20–22); (2) aatimpajia aquejejiacaró tsinotsi, iriraquea Quirishito irio quejetacaró aguito (4.15–16; 5.23); aatimpajia aquejetacaró manquigarentsi, irira Quirishito irio quejetacaró manquigatacajica (5.25–32). Icamantajiaqueri Paavoro maasano quemisantajiaquerica Quirishito irashimirintajiaquempari ampatsini, iquejetacaacari coareta Iromaquitica yashimirintagueti chooca yashimirintanguetacaca (6.11–17).

¹ Naroguenti Paavoro itigarancane Jesoquirishito, iriotari nintacaaquena Aapani Irioshi. Imaica nontioncaciaquempiqueate maasano aviatimpajia choocajianquitsica Epesoqui yashintajiacaca Aapani Irioshi, aisa tsaromentamajajigarica Quirishito Jesoshi.

² Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatoniji pishoshomentajigaro taaca opajitapae.

Icavintsajajiacajiquea Quirishito

³ Iintsija ashineventajiguempari Irioshite Amajirote Jesoquirishito, iriotaque aisa Iriiri, ancantajiaque caaviji yoganejencamajata. Irio cavintsajajiacajica ontaniqui inquitequi, icavintsajamajajiacaji ashirequi yashintajiacajigueti Quirishito. ⁴ Coramani tequeratagueti impeacaguemparó quepatsi icoguiajiacajiquea inintacaajiacaji acanicaniquea antsaromentajiaquempariqueate Quirishito ancomajatimentajiaquemparinijite aatoniji acovaeguishejajaja, aisa iramenimentajiacajiniji quejevaecaquea teeca ancovaeguishetimatempaji. ⁵ Aritarite iquejetaquero imaica icantsicaróquea paesatoniqui impeajiacaji irijanijiate, ipintsajiacajitarite, itigarancantacarica Jesoquirishito irimetojaventajiacaji, iriotarite nintanquitsi Aapani Irioshi irootaque iquejetancaroca imaica.

⁶ Iintsija ashineventajiaquempariqueate Aapani Irioshi irooriji icavintsajamajajiacaji

itigarankuimojiacajiriquea Irijanite ipintsamajataca. ⁷ Iriotaque oguisotoajajaji yovegaratantacaji iriraja, ipeacojiacajiroquea agovaeguisherejia, caavijitari icavintsajanti Aapani Irioshi, ⁸ icavintsajamajatantajiacajica, anaavaetaquetari itsamajare, iroomajaca iguenquejane. ⁹ Coramani teequeate antsajivetempaji intigarankuimojiacajiri Quirishito irimetojaventajiacaji, tequeratatirajatari ironigaanteroji icanquerica iroaqueraguete. Cotanquitsiquea imaica atsajiaqueroquea, jac netsanatapoja itigarancakeriquea. ¹⁰ Icanquetarite coramani: “Noncapiocamajajajeriqueate maasano choocajatsica jenoqui inquitequi jerijia aisa quepatsipaequitica cameetsaniji irimajirontajiaquempariniji Irijani Quirishito.” Oraqueate oncoramanitapojajeguete aapojempaguete irinetsanatanguequemparoca, irinetsanataqueroqueate icanqueca.

¹¹ Icoquiujacajiquea aatimpajia tsaromentavaquemparineca Quirishito intspatimentavajajiniji jenoqui inquitequi inquejetacaamajajiacajiqueate irijanite. Coramanitari tequerataguete onchoocatimaguetaji inintacaitajiacajiqueate irashintajiacaji. Iriatimpaquea inintaquequea ariquea oncoguetanaquempani imaica, iriotaquequea amenaguequeroquea cameetsavaequequea. ¹² Inintaquejarite Aapani Irioshi noshineventajiaquempariquea naatimpajia, noncantajiaqueriquea iriguenti caavijica yoganejencamajata. Naroquetiquea pariacaro noquemisantajiaqueri Quirishito. ¹³ Ariquea piquejejiacaquea aviatimpajia iroompaquea piquemajiavaquerogueti Quenquetsatsarentsimajaca tsavetanquerica Quirishito meshiajiaquempineca, paventamajajanacariquea, irootaquequea icoraquetantacaca Ishire Aapani Irioshi ichoocashirentajiaquempiquea, pitsatantajiacaca aviguentijia irijanimajajiate. Aritarite icanque Aapani Irioshi coramani itigarancakeri. ¹⁴ Arimajaquea itigarankuimojiacajiriquea Ishire, ichoocashirentajiacajiquea aatimpajia cameetsanijite antsatimentamajajiaquenijite irinetsanajiaqueroquea Aapani Irioshi maasano icantajiacajica, intspajianacajiqueate jenoqui inquitequi incavintsajiacajiqueate maasano aatimpajia yashintajiacaca. Iroosacanicate iintsija ashineventamajajiguempariquea, ancantajiaqueri: “Poganejencamajata.”

Paavoro yamanacoventajiaqueri quemisantajiaquerica Quirishito

¹⁵ Coramani noquemacojiacquempiqueate pitsaromentajiacari Amajirote Jesoshi aisa pipintsamajajiacari maasano igomajamajarejia, irootaquequea ¹⁶ noquenquejantajiaquempani namanaqueriguete Aapani Irioshi nocancaniquea nocantacoventajiaquempani: “Arioteesaa.” ¹⁷ Namanaqueriquea Irioshite Amajirote Jesoquirishito, iriotaquequea Aapani oganejencatatsica, namanacoventajiaquempani intsatacajiaquempani Ishire pintsatimentamajajiaqueronijite maasano inintaguetica, aisa namanaqueri ironigaajiaquempani quero icota iriatimpa pintsatimentamajajiaqueriniji. ¹⁸ Namanacoventajiaquempaniquea intsatacajiaquempani cameetsanijite pintsamajajiaquenijite quero oncotanaquempani oncoramanitapojajeguete anchoocajiaquaguete ontaniqui iriatimpaqui, oganejencavaetacaquea. Icajemajiaquempanitarite incavintsajiaquempaniniji irishinetacaamajajiaquempani. Ariquea inquempetacaajiaquempani maasano igomajamajarejia. ¹⁹ Aisa namanacoventajiaquempaniquea pintsamajajiaque iriraquea Aapani Irioshi iriguentiquea caavijica yagavejamajati yanaajiaqueriquea maasano, yagavejacaantajiacajicaquea aatimpajia atsaromentajiacariguete. ²⁰ Pamenejate arimajaguitatsi yagavejamajati, yonigaanquerotarite yagavejica coramani ivochantajiriguete Quirishito imetojavetacaguete. Ariqueate yaanajiriquea jenoqui inquitequi yoguisavicajiriquea itincamijempequiqui. ²¹ Yanaamajatantajiacaricaqueate maasano majirontaguetatsica, iramajiroropae, agavejaguevetatsica, jivaguetatsica, maasano. Yanaajiaqueriqueate maasano choocajianquitsica imaica jerijia aisa coajicajanajatsineca. ²² Aapani Irioshi yanaacaqueriquea Quirishito yashintacaaguecariquea maasano, aisa ipeacaavajari imajiromajajiate maasano imeshiajiaqueca. ²³ Aatimpajia quemisantajiaquerica aquejejiacariquea itsino Quirishito, aroguentijia ichoocashirentamajataqueca. Iriguentiquea peacaaguetacar maasano choocaguetatsica inetsanamajiaqueroqueate itsitacamajaguetaqueroqueate maasano.

2

Icavintsajajiacajiqueate Aapani Irioshi yaajijajiqueate

¹ Coramani oquejetacaquea metojajaque pishirejia, pantajivetacarotari icantimentaguetaqueca Aapani Irioshi, pipeacaajivetacaquea covaeguisherentsipae. ² Irooquee pantapiniijavetaca, pogujatacojiaqueroquee iquenquejajiguica quepatsiquitica, piquemisantajiaqueriquea imajirote ampatsinipae quenaguetatsica otampijaguitetigueti. Iriatimpa iriguentitarite omperajigarica maasano pigatsajigarica Aapani Irioshi. ³ Aatimpajia maasano aritarite aquejejiavecariqueate iriatimpajia. Aquenquejaguishevetacaquea, aisa antaguishejiavetacaquea taaca opajitapae anintajiguica. Irootaquequea icatsimatantajivacajica Aapani Irioshi, iquejetacaajivetacajiquea iriatimpajia. ⁴ Cotanquitsiquea Aapani Irioshi cavintsajantamajatantatsica yagamajacomajajiacajiquea, caavijitari ipintsamajiacaji, ⁵ yanijacaantajiacajicaquea ashirequi ometojashirentavetacajigueti agovaeguishere, itsipatacaantajiacajiri Quirishito yanijacaajirigueti. (Inchiquiojitaquea icavintsajajiacaji imeshiantajiacajicaquea.) ⁶ Ariquee itsipatacaantajiacajiriqueate Quirishito Jesoshi ivochantajajajiquea, ariqueate yaajianacajiqueate jenoqui inquitequi yoguisavicajivacajiquea iriatimpaqui. ⁷ Iquejetacaacajiquea imaica cameetsaniji oncoguitempaniquea intsamajajaque maasano caavijiquea ipintsamajiacaji. Aritarite icotaca iriatimpa, irootaquequea icavintsajantajiacajica aatimpajia tsaromentajigarica Quirishito Jesoshi. ⁸ Inchiquiojitaquea icavintsajajiaquempiquea Aapani Irioshi imeshiajiaquempiquea paventajiacarigueti Quirishito, pamenajiaquetarite arimaja imetojaventajiaquempi. Teequeate inchiquiojitsita pimeshiajiguempaji, inchiquiojitsitarite inintaquequea iriatimpa irimeshiajiaquempi. ⁹ Tee onchoocateji ampeacaguempaca aatimpa ameshiantaquempameca, arimequea aventacoquemparomequea. ¹⁰ Iriotaquetari peacaajiacaji Aapani Irioshi, imeshiajiacajiquea aventaventaicarigueti Quirishito Jesoshi. Icantashitatijaiacajiquea anetsanajiaqueroniji maasano cameetsaguetatsica inintsitacaajiacajica coramani tequeratagueti anchoocajigueji.

Ariquee aquejetavacaajiacaquea maasano tsaromentajigarica Quirishito

¹¹ Imaicaqueate imaica aviatimpajia teeca pijorijoigueji, iintsijate pinquenquejajeroja queroqueate picojivavetani coramani, manatarite teequea inconoajivavetempiji joriojia yamenajiaquempiqueate teequea pinquejajiguempariji iriatimpajia itotsaiquijitirogueti ichonquimashi, irootaquequea icantantajiaquempica teequea pintsajiguempiji Aapani Irioshi. ¹² Pinquenquejacojigueroja coramani teequea pintsajivavetempariji Quirishito, yamenaquempiquea teequea irashintajiaquempiquea Aapani Irioshi jero aisa teequea pintsajivavetemparoji icantajiaquerica Aapani Irioshi ishiraerijia coramani irinetsanatavaqueneriquea incavintsajajiaquerigueti, teetari aviguenti igonorroja. Pichoocatashijavetaca quepatsiqui, tecatsi poguijacovetempaji, teetari pintsajivavetempaji ininque incavintsajajiaquempi, teequea pintsajivavetempariji Aapani Irioshi. ¹³ Coramani teequeate pintsajivavetempariji Aapani Irioshi, quejevetacaquea pichoocavaetini jmm osamani. Cotanquitsiquea imetojaventajiaquempiquea Quirishito Jesoshi, osotoajatimentajiaquempi iriraja. Imaicaquea paventajiacariquea yaantajiaquempicaquea, quisho yoajimpi.

¹⁴ Coramani maasano naatimpajia joriojia nocatsimaneguintajiaquempiquea maasano aviatimpajia teeca pijorijoigueji, tee pinquemisanteronicate itioncanaqueca Moishishini. Ariquee acatsimaneguintavacaajivavetaca, cotanquitsiqueate imeshiajiaqueate Quirishito, ipejairoquee acatsimaneguintacojivavetacaca. Imaicaquea teequea ancatsimatavacaajiajempaji, manaquea aconoavacajaiacaquea, yamenajiacajitari Aapani Irioshi ariquee aquejetavacajiajaaquea maasano quemisanquerica. ¹⁵ Imetojaque Quirishito itsinoqui aatonijite quericaca atsipeventajemparone irinetsanatajero itioncanaqueca Moishishini iroonijite irimeshiantajempa. Irootaquequea imaica teeca ancantashitatijajiguempaji, ariquee aquejetavacaajiacaquea maasano irioca joriojia iriguentica teeca irijorijoigueji. Imaicaquea aquemisantajiaqueriquea iriatimpa teequea ancatsimatavacaajiajempaji. ¹⁶ Imetojaventajiacajitarite Quirishito coroshiqui

cameetsanijite antsaromentajiaquempariniji, ariqueate imaica atsaromentajiacarigueti ariqueate ashineventajiacariqueate Aapani Irioshi. Ariqueate iquejetaca iriatimpa ishineventajiacaji maasano. Imaicaquea imaica ariquea aquejetavacaajiacaquea atsaromentajiacarigueti, teequeate ancatsimatavacaajiajempaji icameetsatacofijiaajitari.

¹⁷ Naatimpajia joriojia notsajivetarō Icanqueca Aapani Irioshi, cotanquitsiquea teequea nontsaromentamajajiguempariji. Aviatimpajiaquea teequea pintsatimajiavetempariji, cotanquitsiquea oraquea icoraquequitigueti Quirishito ariquea itsatacajiaicajiquea maasano aatimpajia quero ancojiaquempani antsaromentajiaquemparigueti Aapani Irioshi arinijite antsipatavacajiaquempaquea aatonijite acatsimatavacaajiajatsi.

¹⁸ Imetojaventajiacaji Quirishito, irootaquequea nagavejantajiacaca naatimpajia joriojia nocancani noncoraquetashiqueri Aapani Irioshi namanajigueri, cotanquitsiquea teequea apaniro nagavejajigueti naatimpajia, pagavejajiguiquea aviatimpajia aisa pamanajigueri, iriguentitarite agavejacaquempi Ishire Aapani Irioshi agavejacaajiaquenacaquea. ¹⁹ Coramani teequea pignonrontajiavetenaji, teequea pintsajiavetemparinica Aapani Irioshi, cotanquitsiquea imaica manaquea piquejejianajana maasano tsaromentajigarica Aapani Irioshi, pitsaromentajiacaritarite aviatimpajia aisa, irootaquequeate irijanintantajiaquempaquea, ariquea agonorontavacaajiacaquea. ²⁰ Aquempejiacarō aisa imapipancote itsinetacotica. Irirajiaquea itigarancanejia Jesoquirishito jerijia tsavetantajiguiroca icantajiaquerica Aapani Irioshi, irio quempejiacarōca mapicotapae isavijitica itsinetacotantamajatacaca cameetsaniji onquishomajatanaqueniji. Iri-
raquea Jesoquirishito, irioquea quempetacarōca mapi anaantamajatanquitsica itampaticatacotantacarōca otsipapae. ²¹⁻²² Imaica maasanoquea aatimpajia tsaromentajiacarica Quirishito aroguentijia itsovironaquite Aapani Irioshi, aroguentijia iteemporote, ichoocashirentajiacajitarite Ishire. Yagavejacaajiacajiquea maasano antampishitavacaajiaquempaqueate antsaromentamajajianaquemparicacaquea. Pitsipajiaquenaqueate aviatimpajia aisa, pitsaromentamajajianacaritarite, aisaquea ichoocashirentajiaquemparitarite Ishire.

3

Isavicaventica Paavoro

¹ Naroguenti Paavoro isantanatacojitaqueca notsavetantaquerigueti Quirishito Jesoshi nosavicaventajiaquempigueti aviatimpajia teeca pijorijoigueti. ² Piquemacojiaquenempaquea icavintsajaquenagueti Aapani Irioshi itigarancaque-nagueti nontsavetantimojiaquempiqueate maasano aviatimpajia teeca pijorijoigueti. ³ Iriatimpa yonigaaquenaroqueate isenacavetacaca, itsatacaaquenaquea notioncantavacarōcaquea capichaji. ⁴ Imaica papatsajavantajiaquerogueti pintsamajiaquequea arimaja notsaquero maasano yonigaaquenaca Aapani Irioshi yonigaanquerigueti Quirishito. ⁵ Coramaniquea tee inchoocateji caquinte tsataqueroneca, cotanquitsiquea imaica irira Ishire Aapani Irioshi icoguiajiaquenaquea yonigaajiaquenaroquea naatimpajia itigarancanejia Jesoshi jerijia aisa tsavetantajiguirica. ⁶ Jeroquea teeca intsajiavetempaji: Aapani Irioshi incavintsajajiaqueriquea maasano teeca irijorijoigueti quemisantajiaquerōca Quenquetsatsarentsi Oganejencatatsica tsavetacoquerica Quirishito Jesoshi, inquejetacaajiaquempariquea icavintsajajiguirigueti ishiraerijia quemisantamajatacaca. Oraquea icantajiaquerica joriojia coramani, ariquea inquejetacaajiaquempariquea iriatimpajia imaica, aritarite igonorontavacaaja.

⁷ Irooquea notsavetanque, icavintsajaquenatari Aapani Irioshi inintacaquenaquea nontsavetanqueri Jesoquirishito, irootaquequea inchiqiojitsitaquea iriatimpa itigarancaquea yagavejacaquena. Irootaquequea imaica nagavejancaca nontsavetantaqueri. ⁸ Caavijiquea yanaajiaquena maasano itsipajia tsaromentajigarica Aapani Irioshi, cotanquitsiquea icavintsajaquenaquea Aapani Irioshi itigarancaquea nontsavetantimojiaqueri teeca irijorijoigueti noncamantajiaqueri quero icota Quirishito, caavijiquea icavintsajamajajiaqueri. ⁹ Iriaquea Aapani Irioshi peacaaguetarōca maasano igantagaquea coramani inintaque irimeshijitajeri teeca irijorijoigueti, cotanquitsiqueate

mana isenacacovecaroqueea ininqueca. Ariquea itigarancaquenaqueea nontsatacajiaqueri quero incojiaquempa cameetsanijite irimeshiimentajiajeriniji. ¹⁰ Ariqueate iquejetaca imaica ininquequeea irimeshiajiaqueri quericaca tsaromentajiaquemparineca ironijite intsatantajiaquempaca maasano majirontajatsica choocajatsica jenoqui inquitequi jerijia aisa agavejajatsica choocajatsica inquitequi caavijiqueate itsamajaque Aapani Irioshi. ¹¹ Igantagaqueea coramani iroaqueraguete inintaque irimeshiajiaqueri maasano tsaromentajiaquemparineca Amajirote Quirishito Jesoshi. ¹² Imaica atsaromentajiacariquea teequee antsaroajigueji amanajiguiriguete Aapani Irioshi, atsajiaquetarite igantagaqueea iquemajiacaji. ¹³ Imaica pitsajiaquequeea choocatirajana acaniqui, isantanatacojiquena natsipetacaqueea, cotanquitsiquea pishinejiguempaquea aatoqueea pishimampojancajiajatsi, aviguentijiarite natsipeventajiacaca.

Paavoro yamanacoventajiaqueri Epesoquitica

¹⁴ Irootaquequeea nogueroventantacarica Iraapanite Amajirote Jesoquirishito. ¹⁵ Iriguentitarite ashintajigarica maasano tsaromentajigarica, irirajia choocajatsica jenoqui inquitequi jerijia aisa choocajatsica acaniqui quepatsiqui, icantantajitarica "irijanijiate Aapani Irioshi". ¹⁶ Iriatimpa iriguenti caavijica yoganejencamajata, aisa caaviji yagavejamajati, irootaquequeea namanantacarica nocanqueriquea nonintaque iragavejacaantajiaquempira Ishire, intampishitacajiaquempi intsompogui pishirequi. ¹⁷ Namanacoventajiaquempiquea aisa nocanqueriquea noninque incoguitempani inchoocashirentajiaquempi Quirishito, piquemisantajiaqueritarite. Noninquequeea taaca opajitapae pantajiaque picancaniquea pimpintsatantamajajiaquempa, ¹⁸ iragavejacaajiaquempiniji aviatimpajia aisa maasano itsipajia igomajamajarejia pintsajiaquequeea caavijiquea yanaaque ipintsamajajiaquempiquea Quirishito. ¹⁹ Atsajiavetacaqueea ipintsamajajiacajiquea Quirishito, cotanquitsiquea aatoqueea agavejajiguetsi antsamajajiaqueroqueate, anaamajaquerotari apintsatantajigaguete aatimpajia caquinteja. Cotanquitsiquea nonintaquequeea pintsamajajiaque caavijiquea yanaaque ipintsamajajiaquempiquea. Pintsamajajiaqueroguete ariquea pinquenquejamajajiaqueriquea Aapani Irioshi aisa inchoocamajajiaquempiquea.

²⁰ Caavijiquea yagavejamajataquequeea iriraquee choocashirentajiacajica, yagavejaque iranaamajatavaqueroqueea taaca opajita amanaquerica, jero aisa maasano anquenquejavequempaca. ²¹ Irootaquequeate imaica maasano aatimpajia quemisantajiaquerica Quirishito Jesoshi iintsija ashineventajiguempariquea Aapani Irioshi. Iintsija acananiquea ashineventajiaquempariquea. Cameetsaquea inquejejaquempa aisa maasano anchoviquijianaqueca, incoguitempani intsaromentajiaquempari ajagantsinipaequi. Ari oncoquempa.

4

Icantajiaqueriqueate intsipashirentavacajiaquempa maasano tsaromentajigarica Quirishito

¹ Notsavetacotaqueriguete Amajirote, irootaquequeea isantanatacotimentantajique-narica. Imaica noncantajiaquempiquea pincomajamajajiaquempaquea pinetsanatenqueroniji inintacaquempica Aapani Irioshi iroaqueraguete icajemajiaquem-piguete. ² Aatoqueea panaanatavacajiga, pincavintsajavacaajiaquempaquea, pamena-cojianaquempaquea intati irantashijitaquempiguete. Pimpintsatavacaajiaquempaquea pantsiperejacotavacaajiaquempa. ³ Imaica piquemisantajiaqueriguete Aapani Irioshi ichoocashirentajiaquempiquea Ishire, iriotaquequeate agavejacaajiaquempica pitsipatavacaantajiacaca cameetsa, piquemavacaajiacaca. Cotanquitsiquea pincoguitempani pinquejianaquempa imaica. ⁴ Maasanotarite aatimpajia tsaromentamajajigarica manaquea atsipatavacaajiacaquea quejecaquee apanironica achoocajiaque, apatirotitarite ichoocaque Ishire Aapani Irioshi choocashirentajiacajica. Aisa maasano icajemajiacajiquea Aapani Irioshi cameetsaniji incavintsajajiacajiniji oncoramanitapojagueuete ontaniqui jenoqui inquitequi. ⁵ Chooca apatiroti Amajirote, apatiroti aventajiacaca aatimpajia maasano, apatiroti aviñacajatimentajiacaca maasano. ⁶ Chooca apatiroti Aapani Irioshi, iriguentiquea Aapanite aatimpajia maasano. Iriatimpa iriguentiquea

Amajirojiate maasano, iriguentiquea agavejacaajiacajica maasano, aisa iriguentiquea choocashirentajiacajica maasano.

Icantashitaticaaaguecajiquea yagavejacaajiacajigueti Quirishito

⁷ Caaviji icavintsajamajiacajiquea Quirishito maasano, cotanquitsiquea icantashitaticaaaguecajiquea maasano yojocaguecajigueti yagavejica antajiaqueneriniji inintacaajiacajica. ⁸ Itioncacojiqueriguetequea coramani ocanti:

“Yoanaji jenoqui, ijivajianaqueri yaajiaqueca yanaajiaqueca.

Ariquea yojocajiaqueneriquea caquinteja inintacaajiaquerica.”

⁹ Imaica ¿taaca opaji oncanque “yoanaji jenoqui”? Jeroquea oncanque aritarite iquenapoji iroaqueraguete ontaniqui jenoqui inquitequi icoraquequitiguete acaniqui quepat-siqui. ¹⁰ Iriraqeua quenapojatsica jenoqui inquitequi iriotaquequea atsomajanajatsica, yoavaetanaji jenoqui yavisanaajiro inquite, intsitacamajaguetaqueronijite maasano, yanaajiaqueriquea maasano. ¹¹ Iriatimpaquea yagavejacaajiaqueriquea quemisantajiguirica irantajiaqueneriniji inintacaaguetaquerica: iconoagarantajiacaquea ipeacajiacariqueate itigarancane; itsipaquea ipeacajiacariquea tsavetantajiguiroca icanquerica; itsipaquea yagavejacaajiaqueriguete yaanaqueroquea Quenquetsatsarensi Oganejencatatsica, itsavetantajiaquero; itsipaquea ipeacajiacariquea quempoguijajiguirica quemisantajiatatsica itsatacaajiaqueriqueate. ¹² Ariquea iquejetacaajiacajiquea maasano aatimpajia yashintajiacaca cameetsanijite agavejajiaqueneriniji amitacotavacaajiaquempa antampishitavacaajiaquempa arinijite anquemisantamajajianaqueri Quirishito maasano aatimpajia quejejiacaroca itsino. ¹³ Acancaniquea anquejianaqueroquea imaica arejevaetapojempa antsipatavacamaajiaquempaguete maasano, anquemisantamajajiaqueriquea Irijanite Aapani Irioshi, aisa antsamajajiaqueri. Ariquea anquenquevarishirentanaque, anquejemajaquempariquea Quirishito. ¹⁴ Aatoquea aquejejijaaritsi chaajaniquipaetirajaca tequeratatirajaca intsajigueji, shinetimentajiatitirajaquea taaca opajitapae icantajiaquerica. Aatoquea aquemisantajiguiritsi cantashitaticaroca Iguenquetsatsare Aapani Irioshi. Iriatimpajiarite itsanirojiguitari yamatavijantajigui, manaquea inintajiaque intati iramatavijajiacaji aatoniji aquemisantamajajijiritsi Quirishito. ¹⁵ Cotanquitsiquea aatimpajia iintsija ampintsamajajiguempariquea maasano, ancantamajataquequea anquenquetsatacaajiaqueriguete arimpanijite anquenquevarishirentanaquequea arejevaetajemparoniji anquejianaquempariquea Quirishito anetsanajiaqueroquete maasano inintacaajiacajica, iriguentitarite Amajirote. ¹⁶ Iriguentitarite agavejacaajiacajica antsipatavacaaantajiaquempacaqueate asavicaventajiaqueroquete taaca opajita ininqueca iriatimpa, maasanotarite icantashitaticaaaguecajiquea yagavejacaajiacajiguete antajiaque taaca opajita inintaguetica. Iroosacanicate maasanojia asavicaventamajajiaqueroquete ariqueate anquemisantamajajianaqueriquea antampishitavacaajianaquempaquea ampintsatavacaamajajianaquempaquea.

Aatoquea piquejejijaatsi tequerataguete pinquemisantajigueji

¹⁷ Imaica noncantajiaquempiqueate aatoja piquejejijaaritsi teeca inquemisantajigueji quenquejaguishejiatsica intati, teenicate irininteji Amajirote pinquejejiajempaquea imaica. ¹⁸ Iriatimpajia ipitsecaquenquejanetanaque, teequea iranijashirentacaajigueriji Aapani Irioshi aisa teetarite irinintajigueji intsajiaqueriquea, manaquea iquishoshirentajianaque. ¹⁹ Iroguentiquea yantajigui yantaguishejiaquequea taaca opajitapae covaeguisherentsi, manaquea itsanirojiaquequea intati, teequea impashiventacajaiguemparoji, ishineventajiacarotarite intati. ²⁰ Cotanquitsiquea aviatimpajia teequea iro itsatacaajitaquempica pitsapojiaqueriguete Quirishito, ²¹ arimajaguete piquemajiaqueri, arimajaguete iro itsatacaajitaquempi iroomajatatsica itsatacaantica Jesoshi. ²² Imaica aatoquea piquempejijaquea paesatoniqui pantaguishejiavetacaguete covaeguisherentsi, aritarite picojiacani pishineventajiavecaroquea, manaquea amatavijajiaquempi. ²³ Imaicampani iroaqueraro oncantanajempa pishire aisa piguenquejane. ²⁴ Piroaquerashirentajianaje, irootaquetari ipeacamentantajiaquempica Aapani Irioshi pinquempejiaquempariniji iriatimpa, comajashirerimajaca pincantajempa, pincomajamajianajempa.

Icantajiaqueriqueate quero incotajempa incomajamajiaquempagueti

²⁵ Aatoquea pamatavijajajiritsi pignonropae, manaquea pincantamajataque, aatoquea picantashita intati, maasanotarite aatimpajia manaquea atsipatavacajaicaquea intati atsariventajiacarigueti Amajirote Jesoquirishito.

²⁶ Piquemavaquerogueti oncoraquetaquegueti pigatsimare, aatoja picovaeguisheta, taampinaquea pimpetsimarejajianaje tequeratagueti ompitsequeji, ²⁷ aatonijite yagavejajiguimpitsi ampatsini incovaeguishetacaajiaquempiquea.

²⁸ Iriiraquea aitsitantajiatsica ariotapojaque paitsitantaque, manaquea pincatsique-taque intati, irooca pantajiaque otsipa cameetsaguetatsica irootaquequea onchoocatan-taquempaca pincavintsajanquemparica coguitejacojianquitsica.

²⁹ Aatoquea picantaguishetitsi, manaquea pincanquequea cameetsaguetatsica amiji-aquerineca quemisantajiaquempineca pintampishitacaantajiaquemparica. Cameet-saquea pinquenquetsatacaajiaqueri irooquea pincavintsajanquemparica. ³⁰ Aatoquea pishimampojancaajigaritsi Ishire Aapani Irioshi, iriotaquetarite itigaranquimojiaque-mpica Aapani Irioshi ichoocashirentajiaquempiquea, quejetaca iseyotaquempi intsa-tantajitaquempaca aviguentijia irashimajaca arejevaetantapojempaca savincaguiteri iraantajiaavajerica Amajirote maasano yashintajiacaca.

³¹ Imaicaquea pimpishoncajero picatsimashirentajiguigueti, aatoquea picatsimajen-cajaji, manaquea povashiantanajero pigatsimaca. Aatoquea pitampishijencatanta-jaji, aatoquea picantashitari itsipapae. Povashiantajianaqueroqueate maasanopae covaeguisherentsi quejecaroca oatica. ³² Pincavintsajiaqueriqueate pignonroja, aisa pimpintsamajiaquempariquea. Aatoquea picatsimashirentiri itsipa querocagueti incoquempini, manaquea pimpeacotajemparo intati, pinquempajiaquempariqueate Aapani Irioshi ipeacotsitajimpirogueti picovaeguishejiacagueti, aatoquea icatsimati-mentimpiro, paventajiacaritarite Quirishito.

5

Icantajiaqueriqueate inquenjejiaquempariqueate Quirishito

¹ Aviatimpajia aviguentijiatarite irijanijiate Aapani Irioshi ipintsamajiacaca, imaica pinquejiaquempariqueate iriatimpa. ² Picancanija pimpintsatantamajataquempa, quejetaca Quirishito ipintsamajiacaji ipimantantacaroca imetojane imetojaventajiacajiquea. Irootaque oquempetacaroca cameetsajencatatsica yojocajitaquenerica itaajitaque-nerica Aapani Irioshi, ishineventavacaro.

³ Aatoquea poashitimajiguirotsi manquigarentsi teeca irooquea pimanquigare. Ari pinquejiaquempaquea aisa manquigarentsijia, aato poashitiritsi shirampari teeca irio pimanquigare. Aatoquea piquenquejacotimajiguirotsi taaca opajitapae cov-aeguishetatsica. Aato pinintsigueteri yashintaguecaca itsipa, aisa aatoquea pinin-tavaque pinintavaque. Icoquajiaquempitarite Aapani Irioshi pincomajamajiaque-mpaniji. ⁴ Aatoquea piquenquejajiguitsi taaca opajitapae oquipashiventajantatsica. Aatoquea picantaguishejigui intati, aisa pinquenquetsataquegueti aatoquea piconoan-tavacaro covaeguisherentsi, manaquea pinquenquetsajiaque cameetsa pishineventaji-aquempariqueate Aapani Irioshi cavintsajiaquempica. ⁵ Pitsamajiaquetarite aato yogui ontaniqui imajirontagueti Quirishito jeri aisa Aapani Irioshi quericaca oashitiroca manquigarentsi, jeri aisa antaguishehetroca taaca opajitapae covaeguisherentsi, jeri aisa nintsiguequerica itsipa yashintaguetacaca, jeri aisa quejecarica irinintavaque irinin-tavaque. Iriiraqueate nintatsica irajaarantamajaquempa quejevaetacaquea manacaquea iroguenti irioshivijique irajaararopae. ⁶ Inchiquiojitaja yamatavijajiguimpitsija cantashijiatsica intati. Icatsimamajajiguiritarite Aapani Irioshi maasano quejiguiroca imaica teeca irinintajigueji inquemisantajigueriji. ⁷ Irootaquequea noncantantajiaque-mpica aatoquea pitsipaguishejigaritsi iriatimpajia.

⁸ Paesatoni oquejeveca pipitsecacojiaque iroorijite pantaguishejiavetacaqueate taaca opajitapae covaeguisherentsi teenicate pintsajiavetempariji Aapani Irioshi, cotanquit-siquea imaica pitsajiaqueriquea piquemisantajiaquerigueti Amajirote, quempecaquea

itsirencacotapojajimpi. Irootaquequea noncantantajiaquempica: arimpaquea pinquempejianajempariquea choocatatsica savincaguiteri, manaquea pincomajamajianaquempa. ⁹ Maasanotarite tsamajajiguirica manaquea icavintsajantajiguiquea intati, icomajamajajigaquea, aisa icantamajajiaquequea, teequea iramataajiguempaji. ¹⁰ Irooquea pintsajiaque ishineventaguetaca Amajirote. ¹¹ Aatoqueate pishineventimajijaarotsi maasano yantaguishejiaqueca irirajia pitsecacojianquitsica, manaquea pincantimentantajiaqueroquea, teetarite irishineventemparoji Aapani Irioshi. ¹² Aato ocameetsati anquenquetsaguishetacotsitantaqueroqueti taaca opajitapae yantaguishejiguetica imanavecaca, oguipashiventajantitarite intati. ¹³⁻¹⁴ Cotanquitsiquea aviatimpajia pincomajamajajiaquempagueti, iriraquea antaguishejiguiroca covaeguisherentsi inchiquiojitsitarite iriatimpajia iramenajiaquempa manaquea icovaeguishejiaca, iroompaquea arica irinintajiaquequea inquejianaquempi aviatimpajia inquemisantajianaqueriquea Quirishito. Irootaquequeate itioncacojiqueroqueti ocantiquea:

“Pintinajanaquequea aviatimpa maanquitsica,
aviatimpa metojanquitsica pimpochatanajequea,
ariquea intsirencacotaquempiquea Quirishito.”

¹⁵ Imaica pincomajajiguempaqueate aatoquea piquempejijaaritsi teeca intsajigueti, manaquea pinquejejiaquempariquea tsajiatsica icomajajigagueti. ¹⁶ Pisavicaventamajajiaqueroqueate pantsipeventamajajiaquempariquea Aapani Irioshi imaica, choocatarite oshequini antaguishejiguiroca covaeguisherentsi. ¹⁷ Irootaquequea noncantantajiaquempica aatoquea piquejejigari teeca intsajigueti inquenquejajigueti, manaquea pincantajiaqueriquea Amajirote intsatacajiaquempiro maasano inintaqueca pantajiaqueca. ¹⁸ Aatoqueate pishinijiga, piquenanaquetsiqueate picovaeguishetatsi. Irooquea pinintamajate inchoocamajatanaquempi Ishire Aapani Irioshi. ¹⁹ Pinquenquetsatavacaajiaquempaquea, pincantsitemparoquea ocanqueca amashairentsipae itsariventantajitarica Aapani Irioshi. Pamashaiventajiaqueri Amajirote, pintsariventamajajianaquempariquea onquenavaetanaque pishirequi. ²⁰ Paventajiacaritari Amajirote Jesoquirishito imaica, iintsija pincoguitempani pishineventajiaquempariquea Aapani Irioshi pincantapinitaqueriquea: “Ariotelesaa”, iroorijite icoguitaniqua icavintsajajiaquempiquea.

Quero incojiaquempiani inchoocajiaqueniji cameetsa manquigajitsica aisa imanquigare

²¹ Arigueti pitsariventamajajiacari Quirishito aatoquea pinintajigueti panaanaatavacajiaquempaquea, maasanoquea pinquemisantavacaajiaquempaja pamitavacaajiaquempaquea intati.

²² Manquigarentsijia, pinquemisantamajajiaqueri manquigatimpica quejetacaquea piquemisanquerigueti Amajirote. ²³ Iriraqueate shirampari iriguentitarite jivatiroca imanquigare iquejetacariqueate Quirishito ijivajiguirigueti maasano tsariventajigarica, aisa irioquea meshajiaquerica. Iriraquea Quirishito yamenajiaqueri quemisantajiat-sica quempetacaquea iriojia itsino, Quirishito irio quejecaroca iguito. ²⁴ Aritarite oquejetacaquea imaica maasano tsariventajigarica iquemisantajiaqueriquea Amajirote Quirishito, ariquea onquejejiaquempaquea manquigarentsijia onquemisantamajajiaqueriqueate manquigataroca, aatoquea opigapigatsajigariquea.

²⁵ Shiramparijia, pimpintsamajajiaquempaqueate pimanquigare, pinquejejiaquempariqueate Quirishito ipintsamajajiacarigueti maasano tsariventajigarica, iquejetacaacari imanquigare, ipacaro imetojane imetojaventaqueroquea, ²⁶ cameetsanijite irogameetsantajiaquero, apanironijite irashintajiaquemparo. Isaancantacaro iquivantacaro oja aisa iguenquetsatsare.* ²⁷ Ininquetarite iramajero intsipataquemparo, aato

* 5:26 Coramani ontaniqui Joreaque yamejigaca irooshipojigueti irimanquigajitaquemparo manquigarentsi, otsipataca onquvamajataquero aisa onetsanamajataquero onquitsaatajemparo saancamorenaro teeca ontsiñoamagoteji.

opintatimata, aato otsiñoamagoti, aato ochoocati quejecaroca, manaquea oganejencataquempa oncameetsamajataque. Ariquea inquejetacaajiaquempari maasano iga-piocane, iroganejencatacaajiaquempari. ²⁸ Imaica aviatimpajia shiramparijia, pimpintsajiguemparojate pimanquigare pincavintsajajiaqueroquea pinquejetacaajiaquemparopipintsajigagueti aviatimpa. Iriraquea cavintsajiroca imanquigare irisatiqua cavintsajaatsi. ²⁹ Tecatsi sematsine itsino iriatimpa, maasanoquea acavintsajajiaquea ashecajiaquea aatonijite ametojajiguitsi, aisa amenanontajiaquea aatonijitaa oajigaji. Ariqueate iquejetacaajiacariqueate Quirishito maasano tsaromentajigarica ipintsajigarigueti. ³⁰ Aatimpajia aisa tsaromentajigarica maasanoquea atsipajiacariqueate atsaromentamajajigarigueti quejevaecaquea aroguentica itsino, irootaquequea icavintsajantajiajajica. ³¹ Ariquea itioncacojiquerogueti ocanti: “Irootaquequea imaica shirampari intsinampirejanaqueriqueate iriri aisa iriniro, quisho iroamajataquero imanquigare, apatsinoroquea incantanajempa. Ariquea iroaqueragueti tequeratagueti irimanquigatemparaji, mavite icarajiavetaca, ariquea imanquigacarogueti ariqueate icojianaca tee irimavitetajempaji, quempetanajaqueate apatsinoronica icantaja.” ³² Omanavecaquea ocatica, cotanquitsiquea mana nocantajiaquempiroquea irooquea pintsatantajiaquempaca ariquea iquejetacaajiacajiquea Quirishito maasano aatimpajia atsaromentajigarigueti. Itsipajiacajiqueate iriatimpa quejevaecaquea aparoquea acantaja, quishoquea yoajiacaji. ³³ Noncantsijajempiqueate aisa maasanopae shirampari impintsamajataquemparoqueate imanquigare, incavintsajaqueroquea inquejetacaquemparoquea icavintsajagueti iriatimpa. Aisa maasanopae manquigarentsi onquemisantamajajiaqueriquea manquigataroca.

6

Quero incojiaquempani irijanintajatsica aisa irijanijiate

¹ Aviatimpajia chaajaniquipaetirajaca, arigueti piquemisantajiaqueri Amajirote inque pinquejetacaitempariquea piri aisa piniro pinquemisantajiaqueriqueate, caavijiquea ocameetsati pinquejetaqueroqueti imaica. ²⁻³ Paesatoniqueate Aapani Irioshi icantavecariqueate Moishishini taaca opajitapae, ariquea itioncacoguequeroquea cameetsanijite irinetsanajiaquero avaesatinijiateni, cotanquitsiquea teequea incanteji irinetsanajiaqueroquetiquea maasano osamaniqueate inquishojiaque acaniqui quepatsiqui. Cotanquitsiqueate choocaquea apatiroti icantaquerica irinetsanataqueroqueti osamaniquea inquishojiaque acaniqui quepatsiqui, irootaquequea ocatica: “Pinquenequejacameetsatacotaquerija piri aisa piniro.”

⁴ Aviatimpajiaquea irijanintajatsica, aatoquea picatsimatataashijigaritsiquea intati pirijanijiate aisa porijanijiate, manaquea pintsatacaajiaqueriquea maasano icanqueca Amajirote, aisa pincantomajajiaqueriquea irantajiaquegueti covaeguisherentsi.

Quero incojiaquempani yashintajitaca aisa ashincarica

⁵ Aviatimpajia yashintajitaca, pinquemisantamajajiaqueriqueate ashinquempica acaniqui quepatsiqui, aatoquea pipigapigajigari manaquea pintsarocaajiaquempariqueate, aisa aato pamatavijajiguri, manaquea pincatsiquejiaqueneriqueate quempecaquea iriguentica picatsiquejiaqueneca Quirishito. ⁶ Aatoquea apatiroti pinetsanajiguirotsi icantajiaquempica yamenajiaquempigueti irooqueate pishinetacaantajiaquemparica, picancaniquea pincatsiquemajajiaqueate, iriotaquetari ashintamajiaquempica Quirishito, aviguentijatarite irajaanirejia Quirishito. Pinintamajajigueja pinetsanamajajiguero maasano inintaguetic Aapani Irioshi. ⁷ Pinetsanamajatanaqueroja incanquempigueti ashinquempica quejecaquea irioquea pantamajaquene Amajirote Quirishito, aatoquea aparoquea pishinetacagari papicaquinteteni. ⁸ Pitsajiaquetarite iriraquea Aapani Irioshi irishineventajiaquempariquea maasano antiroca cameetsatatsica, irivegarajiaqueneriquea. Inquejetacaajiaquempariquea irirajia yashintajitaca, jerijia aisa teeca irashintajitempariji, maasano.

⁹ Aviatimpajiaqueate ashintajigarica caquinte yojocantajitica, iintsijate pinquenequejajigueroquea ocatica. Choocaqueate apaniromajaca ashintajiguimpica aviatimpajia

jerijiaquea aisa pashintajiacaca, iriotarite pimajiromajate choocatatsica jenoqui inquitequi. Iriatimpaquea yamenajiaquempi teequea pincantashitatijaiguempaji, ariquea piquejetavacaajiacaquea maasano. Irootaquequea noncantantajiaquempica pincavintsajajiaqueriqueate pashintajiacaca, aatoquea picatsimajiguiritsi.

Quemisantajiatsica iquejetacariquea ashimirintajiatsica

¹⁰ Napitsaroveritarijiate, apanivaniqueate noncantajiaquempiqueate, aviguentijiarite tsaroveritajigarica Amajirote imaica pamaneriquea pincantajiaqueri intampishitacaamajiaquempi, aisa iragavejacaamajiaquempi, caavijitarite yagavejamajati. ¹¹ Iiraqueate ashimirintajiatsica yashimirintavacaajiacaguete iroguentiquea yaventajiga iguishoritepae aatoniji isatajajitiri. Imaica aviatimpajia pinquejianaquempariquea paventajianaquempariqueate Aapani Irioshi irojocajiaquempiquea maasano pimpigatantajiaquemparica ampatsini aatonijite yagavejajiguimpitsi yamatavijajiguimpitsi. ¹² Aatimpajiaqueate teetari iriguenti ashimirintajiguempa choocatanquitsica itsino, iriraja. Iriguentijiaquea ashimirintajiacaquea majirontajiavetanquitsica teeca inconijajigueji, irirajia tigarancajiaquerica quemisantajiaquerica, iriguentijia agavejajiaquerica pitsecashirentacojianquitsica acaniqui quepatsiqui, iriguentijia ampatsinipae quenaguetanquitsica inquitequi peacagaroca covaeguisherentsi. ¹³ Irootaquequeate noncantantajiaquempica imaica, pinquejetempariquea ashimirintatsica yaventarogueti iguishoritepae, paventamajiaquempariquea aviatimpajia Aapani Irioshi yojocaquempitari maasano pimpigatanquemparica ampatsini pagavejajiaqueniji pintampishitashitimentajiaquerinijite incoraquetashijiaquempiguete, aatonijite yagavejajiguimpitsi, manaquea pinquemisantamajianaqueriquea Aapani Irioshi.

¹⁴ Pintimanaqueshiatsi! Picancaniquea pinquenquejajiaqueroqueate maasano arimajatatsica teecaquea amatavijanteji, oquejetacaquea yoishotacomajatacarogueti ashimirintatsica ichompimashite. Pincomajamajiaquempaquateate pinquejetantanaquemparicaquea ashimirintatsica yavencarogueti isavoneguitacaca. ¹⁵ Quejetacaquea irira ashimirintatsica icavimajatanacaqueate cameetsanijite iranijitantanaquemparonijite, ariqueate pinetsanatanaquempaqua poajianaquequea, pinquenquetsatacaapojeriquea caquintepae pintsatacaajiapojeriquea Quenquetsatsarentsi Oganejencatatsica inchoocatantajiaquempaca cameetsa. ¹⁶ Aisa choocaquea ashimirintatsica iticaancaca, iticaantavacaroquea shiquiripi morecatsica aatoniji iquentajitiri. Aisa aviatimpa, paventamajatanaquemparija Aapani Irioshi, pinquemisantamajatanakeriquea aatonijite yagavejimpitsi ampatsinipae incovaeguishetacaquempiquea. ¹⁷ Aisa, quejetacaquea ashimirintatsica yasatirijarogueti cavorejatatsica ichooocatantajaca, pintsamajiaquequea arimajaquea imeshiajiaquempi Quirishito pinchoocatantajempaca. Choocaquea aisa ashimirintatsica itsaampimenirite yagavejantarica yashimirincaca. Oquejetacaroquea Iguenquetsatsare Aapani Irioshi yojocajiacajica Ishire agavejanquemparicaquea ampatsinipae. ¹⁸ Picancaniquea pinquenquetsatacaqueri Aapani Irioshi, pamanamajapinjiaqueriqueate pincantajiaqueriquea incavintsajajiaquempi iramitacojiaquempi. Pinquemisanqueriquea Ishire intsatacaajiaquempiguete querocaca pincanqueni. Pinquenquejamajajigue pamanaqueriguete, aatoquea piperajigarotsi. Picancaniquea pamanacoventajiaqueri maasano tsaroveritajiaatsica.

¹⁹ Pamanacoventajiaquenaqueate naatimpa aisa, intsatacaguenaniji Aapani Irioshi quero noncanqueni aatoniji notsarogui nontsavetanquerogueti Quenquetsatsarentsi Oganejencatatsica teeca intsajivetempaji. ²⁰ Aapani Irioshi itigarancaquea quea nontsavetanqueroquea, irootaquequea isantanatacotimentajitaquenaca yoishoitsijitanaquea cavorejatsariqui. Pamanacoventajiaquenaja cameetsanijite nontsavetanqueronijite, pincantaqueriquea intampishitacaaquena aatoniji notsarocagarotsi, irootaquetari inintacaaquena.

Interoncacaajianajerica

²¹ Ariquea ichoocataquequea apitsaromentarite Tiiquico apintsajigaca. Iriatimpa yan-tamajatiniriqueate Amajirote. Imaica nontigarancaqueriquea iroanaquequea aviatimpajiaqui pinquemacotimentajiaquenanjite, inchiquiojitsitarite incamantajiapojempiroquea maasano. ²² Irootaquequea nontigaranquimenquerica irishinetacajaiapojempiquea intampishitacajaiapojempiquea.

²³ Imaica, napitsaromentarijiate, nonintaque irishinetacajaiaquempi Aapani Irioshi jeri aisa Amajirote Jesoquirishito inchoocatacaajiaquempiquea cameetsa, aatonijite taaca opajita pishoshomentajiajatsi, aisa intampishitacajaiaquempiquea pintsaromentamajianaquempariniji, aisa pimpintsatavacaajiaquempiniji. ²⁴ Aisa nocanqueriquea incavintsajajiaqueriquea maasano pintsamajiaaguitarica Amajirote Jesoquirishito.

PAAVORO ITIONCAJIAQUENERI PIRIPOQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaciaquenerigueti tsaromentajiacarica Jesoshi choocajianquitsica guinteninintsiqui pajitatsica Piripo. Iriroquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueti itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacancanarica. Irocashi itioncacotaqueri irira Paavoro otsipaqui paperiqui (Ya. 7.57-8.1; 9.1-31; 13.1-28.31), aisa itioncacotaqueri ichooaquegueti Paavoro Piripoqui paperiqui Yantajiguica 16.11-40; 20.1-6. Itioncacaantaquero Paavoro ocatica paperi isantanatacotacagueti. Chooca quenquejajianquitsica itioncacaantaquero ajagantsiniqui 55 isantanatacotacagueti Epesoqui. Itsipajia iquenquejajiaque itioncacaantaquero irooca ajagantsiniqui 60, irooca otsipa ajagantsini arejevaetacaro ajagantsini 63, isantanatacotacagueti Iromaqui. Irootaquequea iquenquejantajitacaca, tequeratagueti intioncacaaneroji ocatica, itioncacaantaquero paperipae itigarancaciaquenerica Tesaronicaquitica, aisa mavite paperi itioncacaantajiaquenerica Corintoquitica, aisa paperi itigarancaciaquenerica Garashiaquitica. Chooca itsipajia quenquejajianquitsica itioncacaantajiaqueneri Iromaquitica, Epesoquitica, Corosaquitica, jeri aisa Piremoni tequeratagueti intioncacaantajigueneri Piripoquitica.

Ocaniqui paperiqui Paavoro iquenquejajiajiri tsaromentajiatatsica Piripoquitica icavintsajajiaquenerigueti itigarancaciaqueneri imentaquitsitepae iramitacojiaqueneriniji itsavetacotantaquerigueti Quirishito (2.25; 4.14-19). Isantanatacojivetacarigueti Paavoro, ogantaga ishinemajataca (1.12-26; 2.17-18; 3.20-4.1; 4.10-13). Itioncacaantajiaquenerigueti itsatacaajiaqueri iro ininqueca Aapani Irioshi ogantaga irishinejiaquempa quemisantajiaquerica, irooca onchooquegueti cameetsaguetatsica, irooca aisa managuetanquitsica ichooaquegueti acaniqui quepatsiqui, ari iquejetaca iriatimpa Jesoquirishito (2.5-11). Itioncacotaqueri Timoteo (2.19-23), aisa Epaperorito (2.25-30), aisa itsavetacotaca yantaguetaqueca iriatimpa (1.3-8, 12-26; 3.4b-14), aisa icamantajiaqueri quero incojiaquempani inchoocajiaquenijite cameetsa quemisantajiatatsica (1.9-11, 27-2.4; 2.12-16; 3.1-4a; 4.2-9).

¹ Naroguenti Paavoro, notsipatacari Timoteo, naroguentijia inintacajiaqueca Jesoquirishito nantajiaqueneri. Imaica nontioncaciaquempiqueate maasano aviatimpajia choocajiatatsica Piripoqui yashintajiacaca Aapani Irioshi, pitsaromentajiacaritarite Quirishito Jesoshi. Notioncaciaquempi maasano, aviatimpajia aisa quempoguijajiguirica quemisantajiatatsica jerijia aisa amitacojiaquerica. ² Namanacoventajiaquempiqueate incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshomentajigaro taaca opajitapae.

Paavoro yamanacoventajiaquempiqueate quemisantajiatatsica

³ Nocoguitaniqueate noquenquejajiaquempigueti nocantaqueri Aapani Irioshi noshinevaeca. ⁴ Namanacoventajiaquempigueti noshinevaetaqueate ⁵ namenaquequea aquejetavacaajiacaca antajiaqueneri Amajirote cameetsanijite intsavetantimentajiaqueronijite Quenquetsatsarentsi Oganejencatatsica, piparianacaroquea iroaqueragueti piquemisantajiaquempigueti arejevaecaquea imaica. ⁶ Notsamajaquequeate incoguitempani incavintsajajiaquempi Aapani Irioshi iragavejacaajiaquempi, incoguitempaniqueate incavintsajajiaquempi inquejetacaajiaquempi iroaqueragueti piquemisantajianaque arejevaetapojempa aapojajempagueti incoraquetantapojajempaca Jesoquirishito. ⁷ Noshinimentajianaquempiqueate. Cameetsatarite nonquejetaquempagueti imaica, nopintsamajajiaquempitarite, namenaquempiqueate yagavejacaajiaquempiqueate Aapani Irioshi patsipeventajiacaroquea Iguenquetsatsare, piquejajiaquenaqueate naatimpa nantaquenerigueti Amajirote. Coramaniqueate tequeratagueti irisantanatacojitenajia choocanaqueate notsavetantaqueroquea

Quenquetsatsarentsi Oganejencatatsica tsavetantaquerica Jesoquirishito, nocantajiaqueriqueate maasano iroguentiquea iroomajaca. Aviatimpajiaqueate picavintsajajiaquenaqueate pamicotajiaquenaquea. Ariqueate oquejetacaqueate imaica yoguijaajitaquenaguetei santanaqui picoguitaniqueate picavintsajajiaquenaqueate. ⁸ Itsamajaqueroquea Aapani Irioshi nopintsamajajiaquempiquea noquenquejajiaquempiquea, iriguentitarite quenquejacaamajataquenaqueate Jesoquirishito. ⁹ Irootaquequea namanacoventantamajajiaquempica arimpaniji pimpintsatavacaamajajianaquempaqueate, pinquenquejamajajianaqueroqueate oganejencamajatatsicaquea, aisa pintsamajajianaqueroqueate maasano ininquea Aapani Irioshi. ¹⁰ Namanacoventajiaquempiqueate pintsamajajiaqueronijite querocaca cameetsaguetatsica, pincomajamajajiaquempianijite, aatonijite ochocati querocaca incantomajimentajiaquempica Quirishito savincaguitariqui incoraquetantapojajempaca. ¹¹ Yagavejacaajiaquempitarite Jesoquirishito pincomajamajajianaquempaqueate onquejetanaquemparo pimpitsaraquijacomajajianaquempa, irooquee irishineventantamajajitanaquemparica Aapani Irioshi, incantajitequea caavijiquea yoganejencamajata Aapani Irioshi.

Ishinevaecaquea Paavoro itsavetantajiaqueriguetei Jesoquirishito

¹² Napitsaroveritarijiate, noninquequea pintsajiaquequeate isantanatacojivequeaqueate, cotanquitsiquea arimpaquea itsavetantamajajitanaqueroqueate Quenquetsatsarentsi Oganejencatatsica tsatacaajiacajica quero icota Jesoquirishito imeshiantiguetei. ¹³ Maasanotarite coareta quemoguijajiguinirica itsovironaquite majirontatsica jerijiaquea maasano quemacotaquenaca isantanatacojitaquenaguetei itsajiaquequeate iroguentiquea isantanatacotimentajiquenaqueate nococanitari notsavetantajiaqueate Quirishito. ¹⁴ Choocaquea oshequi apitsaroveritarijiate tsaroverantajigarica Quirishito yamenajiaquenagueteiquea yoguijaajitaquenaguetei santanaqui teequeate intsaroajianaquequeate iriatimpajia, icocaniquea itsavetantajiaqueroquea Iguenquetsatsare Aapani Irioshi.

¹⁵ Cotanquitsiqueate ichoocagarantajiaquequea itsipa manaqueate icatsimatimentajiaquenaroqueate intati yamenajiaquenaguetei icaramirincatimentajianaquenaquea ontaniqui caquinte, irootaquequeate itsavetacotantavecariqueate, inintajiavetacatarite iranaajiaquename intati. Cotanquitsiqueate ichoocagarantajiaqueate itsipa manaquea itsavetacovintsamajajiaqueri Quirishito, ishineventamajajiacarotarite Iguenquetsatsare Aapani Irioshi. ¹⁶ Iriatimpajiaquea ipintsamajajiaquenaquea yamenajiaquenaguetei iriguentiquea nintacaaquena Aapani Irioshi nontsavetantajiaqueriquea Quirishito nontsatacajiaqueriquea maasano quero icota imeshiantiguetei. ¹⁷ Cotanquitsiquea irirajiaquea nintajiavetanquitsica iranaajiguena teequea irantamajateniriji Quirishito, manaquea itsavetantavetacariquea intati ijiqueji ari noshimampojancaquempa, yamenajiaquenatarite isantanatacojitaquena. ¹⁸ Noncamantajiaquempiqueate choocaqueate tsavetantamajajiaquerica Quirishito. Choocajiaqueate aisa itsipa tsavetantajiguirica manaqueate inintajiaquequea intati irishimampojancajajiaquena, cotanquitsiqueate naatimpa teequea noshimampojanquempaji, manaqueate noshinevaetanacaquea namenaqueriguetei iriguentiquea itsavetantaquequea Quirishito.

Imaicaquea arimpa noamajatanaque noshinemajatanaquempaquea, ¹⁹ notsaquetari pamanacoventajiaquenaguetei aisa yamitacotaquenaguetei Ishire Jesoquirishito, irooquee iraantajitavajenaca. ²⁰ Teequea noninteji nantaque taaca opajita guipashivenquenanea, manaquea noninque nonquemisantamajatanakeriquea Quirishito, aatoquea notsaroguitsi. Ariguetei osamanigueteiquea nonchoocaque, aricampa irimetojajiquenaquea, noninquequeate noncoguitempaniquea nonquejetaquempa imaica intsaroverimentamajajiquemparinijite Quirishito. ²¹ Imaicaqueate imaica choocaturajanaguetei iroguentiquea noninque nonchoocaventaqueroqueate nantaqueneriqueate Quirishito. Cotanquitsiquea caavijiquea anaquero nometojaqueguetei, noninquequeate manaquea noanaque iriatimpaqui noncoguitempaniquea nonconoapojempariquea. ²² ¿Querocacaquea caavijica anaantamajatanquitsica? Jmm, teequea nontsateji. Iroguentiqueate notsaquequea

choocaturajanaguete acaniqui quepatsiqui noncoguitempani nontsavetanqueriqueate Quirishito intsaromentajiaquemparinijite itsipa caquinte. ²³ ¿Querocaquea noncoquempani? Omanamajatacaquea, mavitetarite noninquequea. Nonintavecaqueate nometojaque imaica noanaquequea nonconoapojajempariquea Quirishito noshinevae-tapojajempauea. ²⁴ Cotanquitsiqueate ariquea nonintavajiqueate aatotaquea nome-toji, namenaquetarite caaviji ocameetsataque nonchoocataquequea namitacomajaji-aquempinijite. ²⁵ Irootaquequeate notsatantacaca aatotaquea nometojitsi, iroguen-tiquea nonchoocatashitaque nontampishitacajiaquempiquea pishinevaejiaquempani-jite pintsaromentamajajianaquempariguete Jesoquirishito. ²⁶ Oraquea irovashiantajita-jenaguete ariquea noncoraquetajatequea namenajiajatempi pintsatimentajiaquenijite manaqueate icavintsajamajataquea queate Quirishito Jesoshi, ariquea pishineventama-jajianaquempani.

²⁷ Jeroquea aparo pinquempejianaquempa: pincomajamajapinijiaquempaquea pin-quejetantanaquemparoca ocanqueca Quenquetsatsarentsi Oganejencatatsica tsave-tantirica Quirishito. Pinquejejaquempaguete, aricaguete noashijianaquempiquea iroguenticaquea nonchoocavetaquempaquea osamani, nonquemacojiaquempiquea pi-cancani pitsaromentamajajianacari Quirishito teequeate povashiantajigueriji, aisa pi-conoavacajaianacaquea patsipeventajiacarocquea Quenquetsatsarentsi Oganejencatatsica pitsatacajiaqueriquea maasano quero ocanti. ²⁸ Aatoquea pitsarocagaritsi catsimajiaquempineca, ariqueate iramenajiaquempiquete teequea pintsarocaaajiguem-pariji ariquea intsamajajiaquequea iriatimpajia arimajaquea incatsimamajajiaque-riquea Aapani Irioshi oncoramanitapojajeguete, cotanquitsiquea aviatimpajia man-aquea irajjavajempiquea. ²⁹⁻³⁰ Teequeate apaniroquea irinintacaajiguempiji Aapani Irioshi pintsaromentamajajiaquempariquea Quirishito. Inintacajiaquempiqueate aisa pantsipeventajiaquempariqueate pinquejejaquenaquea naatimpa natsipeventariguete Quirishito, aisa imaica piquemacojiaquenaquea atsipetanatsinaqueate.

2

Pinquejejaquempariqueate Quirishito

¹ Imaica itampishitacajiaquempiquea Quirishito, aisa ipintsamajajiaquempi irootaquequea pishinevaeantajiacaca. Aisa ichoocashirentajiaquempiquea Ishire Aapani Irioshi aisa picavintsajavacaajiacaquea pipintsatavacaajiacaquea.

² Irootaquequea nocantantajiaquempi pinintajiaqueguete pishinetacaajiaquenaquea, pincomajajiaquempaqueate aatoquea picatsimatavacaajiga, pimpintsatavacaajiaquempaqueate, pinquemavacaamajajiguempaquea aisa pintsipatavacaajiaquempaquea pantajiaqueneriguete Amajirote. ³ Aatoquea pinintajiguitsi panaimanajigueri papitsaromentarite. Aatoquea piquenquejajiguirotsi pantajiaque paventacojiaquempacaca. Majereni pincanquempa, pimpintsamajaquempariquea maasano pinquejetacaguempari pipintsamajatacariguete anaamajaquempica.

⁴ Aatoquea apaniro piquenquejatsi aviatimpa, pinquenquejacojiaqueriqueate aisa itsipapae.

⁵ Pincoguitempaniquea pinquejejaquempariquea Quirishito Jesoshi, pinquenquejajigue quejetaca iquenquejaqueca. ⁶ Arimpate iriatimpa

iriguentivetacaqueate Irioshimajaca, cotanquitsiquea teequeate iranaanteji. Irootaquequeate icanqueriguete Iriri incoraquequequeate acaniqui quepatsiqui irivoaque inquejejiacajiquea aatimpajia, teequea incantanaquequea: “Aatoquea noguitsi, naroguentitari Irioshi.” ⁷⁻⁸ Manaquea yovashiantaguetanaqueroqueate maasano yashintaguevetaca icoraquequitiquea acaniqui quepatsiqui, ivoaquitiquea icaquintemajatanaquequea, teequea irimajirontajempaji, manaquea iquejetanacariquea yomperaperaitaca. Yatsipetacaqueate iquemisantacocaquea intati. Icoquitaniqua iquemisantamajataqueri Iriri, jeroquea inchiquiojita ipanacarocquea imetojantacaca imetojantajiacajiqueate coroshiqui. ⁹ Irootaquequeate icajemantanacarica

Aapani Irioshi irimajirontamajatapojajempanijite, yanaacaavaetajiri irootaquequea ivajiro anaavaetantacaroca ivajiro pae maasano. ¹⁰ Iquejetantacaricaqueate imaica irogueroventajiaquemparinijite Jesoshi maasanojia choocaguetsica

jenoqui inquitequi, acaniqui quepatsiqui, aisa isavipatsaqui. ¹¹ Maasanoquea incantajiaquequea: “Jesoquirishito iriguentiquea Majirontamajatatsica”, ariquea intsaromentajiaquempariquea Aapani Irioshi.

Ironigaacaantajiaquempa arimajaca itsaromentajatacari Jesoquirishito

¹² Nopintsamajajiacaca, coramaniquea nochoocavecagueti aviatimpajiaqui piquemisantamajajiaquenaqueate pinetsanamajajiaqueroquea maasano nocantajiaquem-pica. Cotanquitsiquea imaica nochoocaquegueti osamani noninquequea arimpaquea pinquemisantamajajianaquenaqueate. Imeshiajiaquempitarite Aapani Irioshi nocantantajiaquempicaquea pimpincatsamajajiaqueriqueate pinetsanamajajiaqueroqueate maasano inintaqueca. ¹³ Iriguentitarite quenquetsashirentacaajiaquempiqueate Aapani Irioshi pinintimentajiaquenijite pantajiaquequea maasano ininqueca iriatimpa, aisa iriguentiquea tampishitacaajiaquempineca pagavejantajiaquempaca pantantajiaquemparoca.

¹⁴ Maasanoquea pantaguequeca ariguetei asereaquempi aatoquea picantanaque pitse, manaquea pishinevaetanaquempauea intati, aisa aatoquea pipigatsatava-caanaca, ¹⁵ aatoniji ochoocatitsi querocaca incantomajimentajiaquempica. Aisa netsana poguero piguenquejane, aatoquea piconoaguishetiroquea covaeguisherentsi pinquejemajatimentajiaquemparinijite Aapani Irioshi, aviguentijiarite irijanijiate. Ariquea irirajiaquea antaguishejiaqueroca covaeguisherentsi iramenajiaquempiqueate quejevaejiaquempi impoquiropae iquitamiriaquitiguetei opitsecaqueguetei, teetari pinquejiguempariji iriatimpajia, manaquea picomajamajatanacauea intati, ¹⁶ aisa pitsatacantamajajiaqueroquea Quenquetsatsarentsimajaca Anijacaantantatsica. Ariqueate incoraquetajateguetei Quirishito noshinevaequempaueate, iramenaquenatarite tee-quea nantsipeventashitempariquea intati, manaquea noquemisantacaamajajiaquem-piquea. ¹⁷ Noquejetacarocquea imirajitaca ishaguitsijitantacarica viratsi itaajiqueneriguetei Aapani Irioshi, aviguentijia quejejiaquempiquea itaajiquenerica, patsipeventajiacaritari paventajiacaca pantajiaqueneriquea. Natsipevetacauea, iro cotanquitsi noshinevaetaca namenajiaquempiguetei aviatimpajia pishinevaejianaca. ¹⁸ Imaicaquea ariquea pinquempejiaquempaueate aviatimpajia aisa pishinejiaquempauea pamena-jiaquenaguetei nococaniquea noshinevaetanacauea natsipeventacariguetei.

Timoteo aisa Epaperorito

¹⁹ Irininqueguetei Amajirote Jesoshi, iroaquerasanoquea nontigarancaqueriquea Timoteo iramenajiaquitempi. Irarejepojajempaguetei incoraquetajeguetei noshinevae-tanaquempauea nonquemacojiajempiguetei. ²⁰ Tee anejerijiquea itsipa quejetaquem-parineca iriatimpa, iquejetaquenaqueate naatimpa noquenquejamajajiguimpiguetei. ²¹ Itsipapaequea iriguentiquea quenquejacojiajatsi, teequea irioquea inquenquejama-jajiguo Quirishito Jesoshi. ²² Cotanquitsiquea aviatimpajia pitsamajajiguiritari Timoteo itsipamajatanaqueate yamiquenaquea notsavetantiroguetei Quenquetsatsarentsi Oganejencatatsica quejevaeacauea irio nirjanitemajaca. ²³ Ariguetei nontsaquegueteiquea querocaca incojiaquenani santanatacojiaquenaca nontigarancaqueriquea iramenajiaquitempi. ²⁴ Ariquea nonquejetaquempauea naatimpa, noquenquejaquetari inintaque Amajirote iroguipaquiujajajena taampina, ariquea noncoraquetaquitequea namenajiajatempi.

²⁵⁻²⁶ Coramani pitigarancajiaqueriquea papitsaromentariteni Epaperorito iramitaco-quea. Irioquea notsipatashitaca notsavetantaqueriguetei Quirishito. Imaicaquea namenaquequea cameetsataque nontigarancajeri iroanaje pinejajavajeriquea, ininque-queate inchiquiojita iramenajiapojajempi, itsaquetarite piquemacojiaqueri yashinon-cajavaetaca. ²⁷ Arimajaquea yashinoncajamajatacauea pajinimequea irimetojeme, cotanquitsiquea icavintsajaqueriquea Aapani Irioshi. Teequea apaniroquea incav-intsajeriji iriatimpa, icavintsajaquenaqueate naatimpa aisa aatoniji noshimampojan-camajata. ²⁸ Irootaquequea nonintantacaca nontigarancajeri taampina iroanajequea aviatimpajiaqui cameetsaniji pishinetimentajianajempaniji, aatonijite noshimampojan-quimentajiguimpitsi. ²⁹ Iriatimpa iriguentiqueate papitsaromentarite pinconoajivajem-pariquea pincavintsajavajeriquea, ariquea pinquejetacaajiaquempariquea maasano

quejejiacarica iriatimpa. ³⁰ Coramaniquea pajinimetarite irimetojaventanaquerome yantaquenerica Quirishito. Iriguentiqueate coraquetanquitsica yamiquenaquea, teenicate pagavejajigueji aviatimpajia pinchoocajiaque naatimpaqui pamijiaquenaquea.

3

Inchiquiojitaja piconoajigaritsijate cantashitataroca Quenquetsatsarensimajaca

¹ Imaica, napitsaroveritarijate, pishineventamajajiguempariqueate Amajirote. Teequea nomperatemparoquea notioncajjajimpiguetei aisa, napijijajimpiquea nocantajiaquempica coramani pincomajatimentajiaquempanijite aatonijite querica amatavijajiguimpitsi. ² Pagamajajiaquempari irirajia amatavijantatsica quempevetacarica shishi, pagamajajiaquempari irirajia peacagaroca covaeguisherentsi, irirajia nintanquitsica intotashivijitacaantempi intati pitsinoqui.* ³ Aroquentijiatari totsaiquimashimajatanquitsica, atsarovertamajajiacaritarite Aapani Irioshi yagavejacaajiacajiguetei Ishire, yashintajiacajiquea Quirishito Jesoshi irooquea ashineventajiacaca, teequea aventajiguemparo amenavequempaca atsinoqui. ⁴ Cotanquitsiqueate naatimpa noninquemegueteiquea naventavetaquemparo amenaqueca atsinoqui, nagavejaquemequeate. Choocaguetei jivetatsica iragavejaque iraventemparo amenaqueca itsinoqui cameetsanijiiro irimeshiantajitaquemparica, caaviji anaaque nashi naatimpa naventavetaquem-pameca. ⁵ Iroorijite novoaquegueteiquea iroompaquea aapojacaguetei 8 savincaguiteri itotsaiquijiqueroqueate nochonquimashi, naroguentitarite ishiraeri ichoviquini Vejameneni, evereomajaca nonaque, noguenquetsatsare iroguentequeate evereotsa, naroguentiquea pariseomajaca notsipajiacariqueate nogonorojia pariseojia nonetsanajiavetacaroquea itioncacotanaqueca Moishishini. ⁶ Caavijiquea nonintamajaveca nontsarovertamajataquemparime Aapani Irioshi, nocatsimatantajanacaricaquea tsarovertajiacarica Quirishito, nojiqueji arijiquea icantashitaticaro nonetsanaguevecaca, namenavecatarite caavijiquea nocomajamajatacaquea. ⁷ Cotanquitsiquea imaica teequeate nonquenquejacotajeroji maasano noshineventavetacaca coramani, teequea noshineventajemparoquea iriguentinijite nonquenquejamajaquequea Quirishito nontsamajatimenquerinijite. ⁸ Caavijiquea anaaqueeroquea oganejencamajataca nontsamajataqueriqueate Amajirote Quirishito Jesoshi, anaaguequeroqueate maasano. Namenaguetanaqueroqueate maasano nonintaguevetanica quejetanacaquea cajarashitequi nontsatimentamajataquerinijite iriatimpa, ⁹ aisaquea nonconoimentamajaquemparinijite. Teequea noncameetsatashitempaji naatimpa. Nonetsanaguevecaroquea itioncanaqueca Moishishini, cotanquitsiquea tee onetsanatenaji. Manaquea naventacariguetei Quirishito, irootaquequea inetsanantantaquenaca Aapani Irioshi. Ariquea inquejetacaguempariquea maasano aventajiaquemparineca irinetsanajiaqueriquea. ¹⁰ Imaicaquea naatimpa manaquea nonintamajataquequea nontsamajaqueiri Quirishito. Noninquenequea iragavejacaquenaquea naatimpa quejetacaquea yagavejacaqueriguetei Aapani Irioshi yovochantajiriguetei. Aisa noninquenequea nantsipevenquempari nonquejetaquempariquea iriatimpa yatsipeventajiacajiguetei. Teequea noninteji nonquenquejajeroquea nonintaguevetacaca naatimpa, quejecaquea manaca notsipatacari Quirishito imetojaqueguetei, ariquea nometojapitsatanaqueroquea maasano nonintaguevetacaca. ¹¹ Noninquetarite nontancorejanaje oncoramanitapojajeguetei nonchoocapojaquea iriatimpaqui.

Isavicaventamajatica Paavoro

¹² Teequea noncanteji netsanataca maasano nocantacoguequeca imaica, aisa teequea noncanteji jac cameetsamajatanajana. Manaquea panquenatanatsinaquea nonetsanatimenqueroniji inintacaquenaca Quirishito Jesoshi iroorijite yashintajana. ¹³ Napitsaroveritarijate, tequerataqueate nonetsanamajaguetaquero maasano inintacaquenaca. Cotanquitsiquea jeroquea nosavicaventica imaica: teequea noninteji nonquenquejacotajero querocaca nantaguetaqueca coramani, manaquea arimpaquea

* 3:2 nintanquitsica intotashivijitacaantempi intati pitsinoqui. Iriojia icantacotaque irirajia cantajanquitsica intotsaiquimashitacaantempa maasano cameetsanijite irishineventavaquempari Aapani Irioshi.

noamajatanaque nomoncaraqueroniji inintacaaquenaca. ¹⁴ Ariqueate noncotanaquempaniqueate imaica incavintsajimenquenaniijite Aapani Irioshi iraanaquenaquea jenoqui inquitequi, irootaquetari icajemantimentajiacajica aventacariguetei Quirishito Jesoshi. ¹⁵ Maasanoqueate tsaromentamajajigarica Quirishito ariqueate inquejejaquempaquea imaica. Choocaguetiqueate itsipaquea cantashitaticaroca iquenquejajiaquegueti, inchiquiojitaquea ironigaajiaqueriqueate Aapani Irioshi. ¹⁶ Cotanquitsiquea aatimpajia iintsija anetsanajiaqueroquea maasano itsatacajaiacajica iriatimpa.

¹⁷ Napitsaroveritarijiate, pincomajajiguempaqueate pinquempejiaquenaqueate naatimpa nocomajamajataca, nonigaajiaquempiratarite naatimpajia quero nocojigaquea noquemisantamajajiguiriguetei Quirishito. Nocantantajiaquempicaquea anquejejanaquempariqueate maasano quejejaqueroquea imaica.

¹⁸ Nocantajiavequempiqueate coramani, cotanquitsiqueate imaica noncantsijajempiqueate aisa, choocaqueate oshequini teeca irinintajigueroji Quenquetsatsarentsi Oganejencatatsica tsavetantaquerica Quirishito imetojaventajiacajiguetei coroshiqui imeshiajiacajiqueate. Noshimampojanquimentajiacariqueate irirajia quejejianquitsica imaica, oparijaatantanacaca nojaquija nocantajiaquempiguetei. ¹⁹ Iriatimpajia iroaroaitanaquequea camorecariqui. Iroguentitarite ichoocaventajiaquequeate isheca, quejetaca iro irioshite. Teequea impashiventajiguempaji yantaguishejaqueroquetei covaeguisherentisi, manaquea isemetacojiaqueroquea intati. Iroguentiqueate iquenquejajiaquequea quepatsipaequitica. ²⁰ Cotanquitsiquea aatimpajia atsajiaquequea manaquea oajianaquequeate jenoqui inquitequi ancoguitempaniqueate anchoocajiaque ontaniqui. Irootaquequeate imaica oguijantajiacaricaqueate incoraquequetajeguetei Amajirote Jesoquirishito meshiajiacajica, iriguentitarite aajanajajineca.

²¹ Oraquea incoraquepajajeguetei incantashitatijaiapoajajiroqueate atsinojia teetarite onetsanamajatempani, oganejencatanajempaquea onquejevetanaquemparoniji irashi iriatimpa itsino oganejencataguetei. Iroguentiquea incantashitatieantajiacajiroquea iragavejane yagavejancarocaqueate maasano.

4

Icantajiaqueriquea irishinejaquempaquea

¹ Imaica, napitsaroveritarijiate, irootaquequea nocantantajiaquempica pincoguitempanija pintsaromentamajajianaquemparija Amajirote. Naatimpa noquenquejajiajimpiquea noninquequea nonejajiaquitempi iroorijite nopintsajiaquempiquea. Aviatimpajiaquea pishinetacaajiaquenaquea, aviguentijiarite noshinetimentajiacaca.

² Oraqueate Evoria aisa Shintique noninquequea ovetsinantavacaajajempaqueate onconoavacaajajempanijite, iroguentijiarite tsaromentajigarica Amajirote Jesoquirishito. ³ Aviatimpa napitsaroveritarite, notsipatashitacaca antaqueneriguetei Amajirote, noninquequeate pintsatacaajiaqueroquea ovetsinantavacaajajempaqueate onetsanatanajempanijite. Iroguentijiarite notsipatashijiacaca coramaniqui natsipeventajiacaroguetei Quenquetsatsarentsi Oganejencatatsica notsavetantajiaqueriguetei Jesoquirishito. Jeriqueate aisa notsipatashijiacaca Querimente jerijia aisa itsipapae amita-cojiaquenaca, tioncacoguetacatari ontaniqui jenoqui inquitequi itioncacotantajiacarica Aapani Irioshi maasano choocajiapojajatsineca ontaniqui jenoqui inquitequi aatonijite imetojajajitsi.

⁴ Pincoguitempanijate pishinetimentajiaquempariqueate Amajirote. Noncantsijajempiquea aisa pishinejiguempa. ⁵ Pincavintsajantajiaquequeate, aatoquea pipigatsantantajatsi iramenimentajiaquempinijite maasano picomajamajajiacaquea intati, irooshipojajitari incoraqueetaje Amajirote. ⁶ Aatoquea querocaca pishoshomentajajatsi, manaquea pincamantajiaqueriquea Aapani Irioshi pamanajiaqueriqueate taaca pinintajiaqueca. Pincoquempaniquea pishineventaquempariquea pincanqueriquea: “¡Ariotesaa!” ⁷ Pinquejejaquempaguetiquea imaica iroguishinejamajajiaquempiquea. Pincoguitempaniquea pishinemajajiaquempaquea pishirequi aatoniji pishoshoguitejajatsi, pitsaromentamajajiacaritarite Quirishito Jesoshi. Cotanquitsiquea aatoquea oquejetarotsi

oguishinejantajiguigueti aatimpajia, caavijitarite anaqueroquea. Aatimpajiaquea teequeate agavejajigueti antsajiaquero quero icojiacajini Aapani Irioshi yoguishinejajiacajigueti.

Icantajiaqueriquea inquenquejacojiaqueroquea cameetsaguetatsica

⁸ Imaica, napitsaromentarijate, apanivaniquea noncantajiaquempi noninquequea pinquenquejacoguequeroja maasano iroomajaguetatsica teeca amatavijanteji, jeroquea aisa maasano atsatacoguetica caavijica ocameetsamajati. Manaquea pinquenquejajigueti pantajigue cameetsaguetatsica, aatoquea piquenquejajigueti pantajigue covaequisherentsi. Pinquenquejajigueti quero pincojiaquempa pincomajamajajiaquempagueti, aisa pinquenquejamajajigueti quero pincojiaquerini pignonropae pinchoocatantajiaquem-paca cameetsa. Pinquenquejacojigueti maasano acantacojiaqueca oganejencavaeca. Iroguentiqueate pinquenquejacojigueti maasano cameetsaguetatsica caavijica ishineventacaca Aapani Irioshi. ⁹ Coramani nochocatomojiaquitimpigueti piquemisantajiaque-naqueate notsatacajiaquempigueti, aisa pamenajiaquena quero nocota. Imaicaquea imaica noninquequea pinetsanamajajiaqueroqueate maasano notsatacajiaquempica, aisa pincomajamajajiaquempaqueate pinquejiaquenaquea naatimpa nocomajamajagueti. Pinquejiaquempaqueate imaica iriraquea Aapani Irioshi quisho iroaquempi, inchoocatacajiaquempiquea cameetsa aatoniji taaca opajita pishoshoventajajatsi.

Iriraquea Piripoquitica icavintsajajiaqueriquea Paavoro

¹⁰ Imaica noshinetacaquea noshinetimentanacariquea Amajirote namenaquegueti piquenquejajiajanaquea irootaquequea picavintsajantajiajanaca. Cotanquitsiquea teequea noncanteji pipeacojiavetajana coramani, notsaquetarite piquenquejajiavetaque-naquea cotanquitsiquea teequea pagavejajigueti picavintsajajigueti. ¹¹ Teequea noncanteji nocoguitejacoca, irooriji namecaroquea nococani noshinevaetaca, aatogueti ochocaveta shinetanatsinaquea. ¹² Notsamajaquerotarite quero noncoquempa nantsipetaquempagueti. Ariguettequea noncoguitejacoquempagueti aricaquea aato, iroocaquea nontaseaquegueti ariguettequea onchoocaquegueti oshequiavaetaquegueti nosheca, cotanquitsiquea aatoquea noshimampojanatsi, nococaquea noshinevaetanaquempaquea. ¹³ Nagavejaguequeroqueate maasano inintacaquenaca Aapani Irioshi, iriguentitarite agavejacaquenaqueate Quirishito. ¹⁴ Cotanquitsiquea cameetsavaetaquequea picavintsajajiaquenuagueti, pitigarancacaantajiaquenaquea nocoguitejacovetacaca.

¹⁵ Notsaquequea teequeate pimpeacojigueti arejevaecaroquea coramani notsavetanquerogueti Quenquetsatsarentsi Oganejencatatsica Maseroniaqui. Irootapojegueti nosotoanaque noanaquegueti osamani, apaniroquea picojiaca aviatimpajia Piripoquitica picavintsajajiaquenaqueate pitigarancacaantajiaquenaquea nocoguitejacovetacaca. Itsipapae quemisantajiaquea teequea irojocajigueti.

¹⁶ Ariquea piquejetaqueroquea aisa choocatirajanagueti Tesaronicaqui pitigarancacaantajiaquenaquea nocoguitejacovetacaca, coajicaquea papijitsijajanaquequea aisa. ¹⁷ Noshinevaetanacaquea namenaquegueti pojocajiaquena, cotanquitsiquea arimpaqueate noshinemajatanacaqueate notsaquetarite incavintsajajiaquempiqueate Aapani Irioshi, yamenaquempitari iriatimpa picavintsajajiaquenuagueti.

¹⁸ Yojocapojajanaroquea Epaperorito maasano pitigarancacaantaquenaca, choocaquea imaica anaapojajiroquea nocoguitejacovetacaca, oshequiavaepojiquea. Namenaquequea mana pojocajiaquenaqueate quejecaquea irioca pojocajiaquene Aapani Irioshi. Ishineventanacaroquea iriatimpa, yamenaquerotarite oganejencavaeca, oquejetimotacari casancajencari. Oquempetacaros aisa imetojajiquenerigueti viratsipae itajaiqueneri. ¹⁹ Ariquea Nirioshite irojocamajajiaquempiro maasano coguitejimojiaquempica, oganejencavaetacatari iragavejane aisa yashintavaetacaca yashintacaacarica Quirishito Jesoshi. ²⁰ Ancoguitempaniqueate antsaromentajiaquempariquea Aapani Irioshi, aatotari oteroncajatsi intsaromentajiaquemparigueti. Ari oncoquempa.

Icamantajiaqueriquea inquenquejajiaqueri maasano

²¹ Pincamantajigueriquea maasano tsaromentamajigarica Quirishito Jesoshi nococaniquea noquenquejajiaquempi. Iriraqea napitsaromentarijiate notsipatsipaitacaca inintajiaquequea pinquemacojiaqueri icancaniquea iquenquejajiaquempi. ²² Ariquea iquejejiacaquea maasano quemisantajatsica choocajatsica acaniqui, ininquequea pinquemacojiaqueri icancaniquea iquenquejajiaquempi. Iriguentiqueate nintamajajianquitsi pinquemacojiaqueri choocajatsica itsovironaquitequi Sesa. ²³ Noninquequeate incavintsajashirentajiaquempiquea Amajirote Jesoquirishito maasano aviatimpajia pishirequi.

PAAVORO ITIONCAJIAQUENERI COROSAQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncajiaquenerigueti tsarotentajiacarica Jesoshi choocajianquitsica guinteninintsiqui pajitatsica Corosa. Irocashi itioncacotaqueri irira Paavoro otsipau paperiqui (Ya. 7.57–8.1; 9.1–31; 13.1–28.31). Tee iroavetempaji Paavoro Corosau, cotanquitsi ipintsajiacari tsarotentajiatatsica Corosaquitica, irootaquequea itioncacaantantajiacanarica (2.1–5), aisa irira Epaperashi icamantaqueri Paavoro quero icojiacani Corosaquitica (1.7–8). Tequeratagueti intioncacaanteroji ocatica paperi, itioncacaantaquero otsipa mavite paperi itigarancajiaquenerica quemisantajiatatsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiatatsica choocajianquitsica Iromaqui. Chooca quenquejajianquitsica tequeratagueti intioncacaantajiaqueneri Corosaquitica, itioncacaantajiaqueneri Piripoquitica. Paavoro itioncacaantaquero 3 paperipae ajagantsiniqui 60, ichoocaquegueti santanaqui Iromaqui: aparo itioncacaantajiaqueneri quemisantajiatatsica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Ocaniqui paperiqui Paavoro icamantajiaqueri quemisantajiaquerica Jesoshi quero incojiaquempani intsipamajajiaquemparigueti Amajirote (3.1–4.6). Itsavetacojiaqueneri Quirishito, iriotaque peacaacaroa maasano aisa iriotaque choocatacaqueroca, iriotaque agavejamajatatsica yanaajiaqueri maasano (1.15–23). Apaniro iriatimpa yagavejaque iramitacojiaqueri quemisantajiaquerica incomajamajajiaquempa aatoniji yamatavijajigui tsatacaantamampeajiatatsica (2.6–23).

¹ Naroguenti Paavoro itigarancane Jesoquirishito, iriotari nintacaquena Aapani Irioshi. Choocana acaniqui notsipatacari apiguemisanteriteni Timoteo. ² Imaica nonintaque nontioncajiaquempi paperi maasano aviatimpajia choocajiatatsica Corosau comajamajajiatatsica quemisantamajajiguirica Quirishito. Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoguiteventajigaro taaca opajitapae.

Paavoro ishineventacari Aapani Irioshi

³ Nocancani namanacoventajiaquempigueti nocanqueriquea Aapani Irioshi, Iriri Amajirote Jesoquirishito: “Arioteesaa.” ⁴ Noquemacojiaquempitari piquemisantamajajiaqueri Quirishito Jesoshi, aisa noquemacojiaquempi pipintsamajajiacari maasano yashintajiacaca, irootaquequea noshinevaetantanacaca. ⁵ Piquejetantanacaca imaica poguijacojiaacatarite incavintsajajiaquempi Aapani Irioshi jenoqui inquitequi. Aviatimpajia iroaqueragueti piquemajiaquerogueti Quenquetsatsarentsimajaca, piquemaquegueti irimeshijiaquempi, ariqueate piquenajiaque poguijacojianaca incavintsajajiaquempi. ⁶ Ocatica piquemaqueca ojatacoguetanaque otsitacaguetejanacaro maasano quepatsi, icantashitatantajanacaca oshequi caquinte iquejejiaquempi aviatimpajia piquemisantajiaquerigueti Aapani Irioshi. Aritarite iroaqueragueti piquemajiaquerogueti aviatimpajia, pitsajiaipojaquegueti arimaja incavintsajajiaquempi Aapani Irioshi, ariqueate icantashitatijiaquempi. ⁷ Coramani notigarancaqueri notsipajiacaca Epaperashi nopintsajiacaca itsatacaamajajiaquempiquea Quenquetsatsarentsimajaca, iroomajaca. Iriatimpa iriguentiquea aisa savicaventiroca inintaguetica Quirishito. ⁸ Ariquea icoraquetajigueti icamantapojaquena icanti caaviji pipintsatantajanaca aviatimpajia, yagavejajiaquempitari Ishire Aapani Irioshi.

Yamanacoventajiaqueri Corosaquitica

⁹ Irootaquequea icamantajiaquenaguetei nocancani namanacoventajiaquempi nocantajiaqueri Aapani Irioshi iroguiconijajiguempiro ininqueca, intsatacajiaquempi pintsamajajiaqueniji pishirequi quero pincojiaquempani. ¹⁰ Irooquee namanantajiacarica cameetsaniji pagavejajiaqueniji aviatimpajia pinetsanavaejianaquempa, irishineventaquemparoniji maasano pantaguetaqueca. Ariquea pantajiaque taaca opajitapae cameetsaguetatsica, aisa pintsamajajiaqueri Aapani Irioshi. ¹¹ Namanacoventajiaquempi aisa intampishitacaajiaquempi Aapani Irioshi, iriotarite tampishitacaantamajatatsica. Nocantiri intampishitacaajiaquempi cameetsaniji pantsiperejacojiaquempaniji maasano, aatoniji pisemarotsi mana pishinevaejiaquempa intati. ¹² Pincanqueri Aapani Irioshi pishinevaejiaquempa, pitsaquetari imeshiajiaquempi cameetsaniji pintsipajiaquempariniji maasano tsarotentamajajiacarica incavintsajiaqueriguetei coajica ontaniqui otsirencaguitemajaqueguetei.*

Jesoquirishito

¹³ Coramani iriguenti ashintajiavecaji ampatsini, oquejevetaca aguintenivetacaguetei ontaniqui opitsecamajaqueguetei. Imaica yaavajaji Aapani Irioshi, irioquee ashintajaji Irijanite ipintsamajatacaca, irosati ipeanaca Amajirote. ¹⁴ Irioquee metojaventacaji ochovivincajaventanacaji iriraja irooquee yovegaratantacaji cameetsaniji irajaiavajaji Aapani Irioshi iroguipejajeroniji aguempaveerija.

¹⁵ Iriaquea Quirishito iquejemajatacari Aapani Irioshi teeca inconijateji, yonigaa-jiacajiri. Iriatimpa iriguenti iriquetica choocatatsica, yanaajiaqueri maasano ipeacaajiacaca. ¹⁶ Iriotarite ipeacaantajiguetacana maasano: choocaguetsica jenoqui inquitequi aisa choocaguetsica quepatsiqui, conijaguetsica irisati teeca inconijajigueji, maasano. Iriaquea teeca inconijajigueji chooca imajirojiate, irira itsipa anaantatsica, aisa agavejajatsica, cotanquitsi iriguenti Quirishito ipeacaantajitacana maasano cameetsaniji irashintajiaquempariniji. ¹⁷ Iriatimpa icancani ichoocatin coramani tequerataguetei onchoocagueteji, irioquee aisa netsanamajaquero maasano imaica. Icanqueri maasano ipeacaacaca: "Aritaque pincojiaquempani." ¹⁸ Iriotaque iguito quemisantajiaquerica, aatimpajia quemisantajiaquerica aroguenti itsino. Iriotaque meshiajiacaji, irio aisa jivaqueri maasano tancorejajiananquitsineca cameetsaniji irimajirontamajaquempariniji maasano, iranaamajajiaqueriniji. ¹⁹ Inchiquiojitarite ininque Aapani Irioshi icantaguitani inquejemajataquempari iriatimpa. ²⁰ Ininque aisa irogameetsatanajeri maasano catsimajiaquerica choocajiatsica quepatsiqui aisa choocajiatsica jenoqui inquitequi, irishineventajiajempariniji. Irootaque itigarancantacarica Quirishito osotoajatimentajiacajiniji iriraja coroshiqui imetojimentajiacajiguetei.

²¹ Coramani aviatimpajia tee pintsipashirentajiguempariji Aapani Irioshi, mana picatsimajiaqueri piguenquejanequi, picovaeguishejiacatari. Cotanquitsiquea imaica ivetsinantajajimpi, ²² irooquee yogameetsatantajiaquempani itsino Quirishito imetojaventajiaquempaniguetei. Iquejetantacaca imaica cameetsanijite irinejajiacaji netsanajiacaji quejetacanica tee anquempevaetempaji, aatoniji icantajigaji: "Chooca piguempaveere." ²³ Cotanquitsi imaica pinquemisantamajajiaqueroja Quenquetsatsarentsi Oganejencamajatatsica piquemajiaqueca iroaqueraguetei, aato povashiantajiguero, aisa aatoja piquemisantajiguero cantashitataroca aatoniji pipeacojigaro imeshiajiaquempi Aapani Irioshi. Irootaquequea ocativa Quenquetsatsarentsi imaica itsavetantajitanaqueca otsitacaguetejanacaro maasano. Irootarite nosavicaventaque naatimpa notsavetantaquero.

Paavoro iriguenti amitacojiguirica quemisantajiguirica Quirishito

²⁴ Imaica noshinevaeca natsipeventajiaquempaniguetei, notsaquetarite irootanaque nonteronquero acaniqui notsinoqui inintacaaquenaca Quirishito: natsipeventajiacari maasano quemisantajiguirica, maasano irirajia iquejetacaajiacaca itsino. ²⁵ Iriotaque tigarancaquena Aapani Irioshi nosavicaventajiaquempi maasano tsarotentajigarica, nontsatacamajajiaquempani maasano Iguenquetsatsare. ²⁶ Coramani tee intsajiteroji,

* 1:12 Ontaniqui otsirencaguitemajaqueguetei ocantacotaquero inquite ichoocaqueguetei Aapani Irioshi, teeguetei onchoocateji covaeguisherentsi.

irogumentitari yomanavecaro Aapani Irioshi, cotanquitsi imaica imaquero yoguiconijajiaqueneri maasano quemisantajiguirica. ²⁷ Ininquetari Aapani Irioshi pintsajiaquero ocatica: iriraquea Quirishito ichoocashirentajiaqueri maasano quemisantajiguirica irioca joriojia aisa teeca irijorijoigueji, irootaque ichoocashirentantajiaquempica aviatimpajia. Iroompa iraanquempi jenoqui ichoocatigueti pinquejetajempari iriatimpa. ²⁸ Iriotaque notsavetantajiaque. Nocantsijiavacari maasano namitacojiaqueri aatoniji icovaeguisheta, aisa notsatacaajiaqueri cameetsaniji intsamajajiaqueriniji, intsaroventamajajiaqueriniji Quirishito Jesoshi. ²⁹ Jeroquea nosavicaventaquero natsipevencaro, irigumentitari tampishitacaaquena Quirishito, yagavejacaamaquena.

2

¹ Imaica noninque pintsajiaque oshequi natsipeventajiaquempi namanacoventajiaquempi aviatimpajia, aisa maasano choocajiatsica Iraoriseaqui, aisa maasano teeca irinejajivetenaji. ² Noquejetaca imaica cameetsaniji pishinejiaquempaniji, aisa pimpintsatavacajaiquempaniji. Noninque pintsamajaque aatoniji ichoocati amatavijaquempineca, aisa noninque pintsamajajiaqueri Quirishito. Coramani tee intsajiteji irio meshiajiacajineca, yomaniquerotari Aapani Irioshi, cotanquitsi imaica imataquero atsajiaque, yonigaajiacajiroitari. ³ Iriatimpa Quirishito itsamajataque. Apaniro iriatimpa iragavejamajataque intsatacaacaji maasano.

Shoshoh yamatavijajitimpitsi

⁴ Irooquea nocamantajiaquempi cameetsaniji aatoniji yamatavijajitimpitsi, pijijigurotsi cameetsa icantavequempica. ⁵ Tee nontsipajivetempiji, cotanquitsi oshequi noquenquejajiaquempi. Noshinevaetaca noquemacojiaquempi pitsipatavacajaijanaca cameetsa, quisho poamajajianajiri Quirishito, paventajianajari. ⁶ Imaicaquea imaica piquemisantajiaqueritari Amajirote Jesoquirishito, picancanija poguijamajajianaquerija. ⁷ Nonquejetacaaquempiro: oratica panquirentsi irooquea oshipaqui anijacaquero, aisa irooquea tampishitacaaquero. Aisa pinquejejiaquempa aviatimpajia, quisho poanaqueri Quirishito intsatacaquempi, aisa intampishitacaaquempi. Picancaniquea pinquemisantamajajianaqueri, pinquejetacaajianaquempari itsatacaajitaquempica. Picancani pishineventajianaquempari Aapani Irioshi, pincanqueri: "Ariotesaa."

⁸ Inchiquiojitaja yamatavijajiguimpitsi cantashijigaroca iquenquejashiguetacaca caquinte; tee iroonica inquenquetsatacojigue itsatacaacajica Quirishito, iroguenti iquenquetsatacojiaque yamejigaca caquinte, itsatacantica quepatsiquitica.

⁹ Aritarite Aapani Irioshi ichoocatsinomajatantacari Quirishito. ¹⁰ Imaica piquemisantamajajiaqueritari Quirishito, tecatsi pincoacojiajempaji pinchoocajajeniji cameetsa, iriotari agavejacaquempineca maasano. Iriatimpa caaviji yanaanti, yanaajiaqueri maasano majirontaguevetatsica, irirapae anejaqueca aisa teeca irinejajiteji, yagavejamajaketarite. ¹¹ Paventashirentaquemparigueti iriatimpa, quejetaca itotsaiquijitaquempi, cotanquitsi teequea iro totsaiquitempi iraco caquinte, irio totsaiquitempi Quirishito pishirequi, ipishoncajimpuro pinintaguishevetacaca. ¹² Ariquea iviñacajajitaquempigueti ari oquejetaca pitsipajiacari Quirishito yoguijajitaquerigueti yoguijantapinijitarica metojaguetatsica, iroompaquea pisotojaatanajigueti ari oquejetaca pitsipajijaari itancorejanajigueti. Pinejajiaqueriquea caaviji yagavejamajati Aapani Irioshi, iriotari tancorejajiri Quirishito. Irootaquequea itancorejantajimpica paventajiacarogueti iragavejane. ¹³ Coramani pipeacaaguishejiaca covaeguisherentsi, quejetaca metojajiaque pishirejia. Tee pintotsaiquivetempaji, cotanquitsi icavintsajajiaquempi Aapani Irioshi, itancorejajajimpi, quejetaca pitsipajijaari Quirishito itancorejajirigueti. Ariquea ipeacotsitajajiro maasano aguempavejereja. ¹⁴ Coramani atsiperejacojiacaro itioncacoanaqueca Moishishini antsajiaquerome cameetsaniji irimeshiajiniji Aapani Irioshi, cotanquitsi tee agavejeji irootari oacaanacajinemeca camorecariqui. Oquejetaca itioncacojiquero antavetacaca covaeguishesatsica antsipetaquempameca coajica. Cotanquitsi imetojaventajiacajigueti Quirishito coroshiqui imeshiajajaji ipishoncaquero itioncacojitacajigueti aatoniji atsipejajaro coajica. Quejevetaca yompajacojiquero coroshiqui.

¹⁵ Ontaniqui imetojaventacajigueti coroshiqui, irooquee yagavejantajiacarica maasano agavejaguevetatsica aisa majirontaguevetatsica, yoguipashiventajiaqueri, inejacaajiaqueri maasano arimaja yanaamajajiaqueri iriatimpajia maasano.

Aatoja piquemisantajiguiri teeca intsaromentajiguempariji Aapani Irioshi

¹⁶ Imaica aatoja piquemisantajiguiri cantajiatsica pantajiaque teeca oncameetsateji irinejajiaquegueti pishecajiaquemparo irooca pimirajiaquero icantimentantajitica. Irooca aisa incanque piquempevaetaca irinejajiaquegueti tee pishineventajiguemparo savincaguiterpae ishineventajiacaca iriatimpajia, iroguentica iroaqueraguete irisotoaje taai. Iroguentica aisa incanque tee oncameetsateji pantaqueca irinejajiaquerogueti pantajiaque icantimentantajitica irivetsicajitempagueti savincaguiteri imagorejantajitica. ¹⁷ Maasano oratica isavicaventajiaqueca joriojia iroguenti mana oquejevetacaro intati ivaantorite coraquetanquitsineca, ocantacoqueri Quirishito incoraquetaque irimeshijiacaji. Imaicaquea imaica mataca coraquetaque. Iroguenti iriomajatatsica. ¹⁸ Aatoja piquemisantajiguiri irirajia cantajiavetaquempineca: "Aatoguete pitsaromentajigari irashivantijitete, ¿arimpate irimeshijiaquempi Irioshi? Teenica pintsajigueti aviatimpajia. Naatimpa iroguenti iquenquetsatacaaquena Irioshi noguimaanequi, irootaque notsatantajiacaca." Maasano quejejiaqueroa imaica iroguenti amataatsica, mana yaventacojianaca intati, iroguentitari iquenquejajiaque irashipae caquinte. ¹⁹ Teenicate intsaromentamajiguempariji Quirishito Amajirote. Iriotaque tampishitacaajiacaji maasano quemisantajiguirica cameetsaniji antsipamajajiaquempari, arimpaquea antsaromentamajajianaquempari quejetaca ininque Aapani Irioshi.

²⁰ Ariquee pitsipajiacariguete Quirishito imetojaqueguete, oquejetacaro iroguentica pimetojapitsajiaquero itsatacaantajiguica caquinte aatoniji piquemisantajiacarica teeca intsaromentajiguempariji? ²¹ Iriatimpajia icantimentantajiaqueri irishecaguempari maasanopae iteshipae, icantajiaque: "Aatoja pishecataari irira, ari icoca, aisa aatoja pipamitiri. Picoguishetatsi." ²² Cotanquitsi maasano irira icantimentajiaqueca iroguenti cantimenqueri caquinte, teenicate irio cantimenterine Aapani Irioshi. Iroguenti ipeacaancarica ashi ashecajiguempaca, iroompa ashecajiacariguete tee anejeriji. ²³ Irirajia quejejiaqueroa imaica ijiqueji iriatimpa itsajiaque, aisa ijiqueji yantajiaque ininqueca Aapani Irioshi, yatsipejiacararo itijiqui itijiacaguete, cotanquitsi iroguenti yamatavijajiacaca. ¿Querocaquea incojiguempanti ititantajiacaca? ¿Arimpa agavejaque onchoocatacaajiaqueri cameetsa aatoniji ipeacaaguisheta teeca oncameetsateji? Mana yaventacojia intati.

3

¹ Aviatimpajia itancorejajajimpi Aapani Irioshi pishirequi quejetaca pitsipatacari Quirishito yovochantajiriguete, irootaquequea pinquenquejajiaquero choocaguetatsica ontaniqui jenoqui ichoocatiguete Quirishito: isavicaque itincamijempequiqui Aapani Irioshi, itsipatacari imajirontajiacaqueate. Pinquenquejajigueroquea ininqueca iriatimpa. ² Arimpaquea pinquejajiaquempa imaica pinquenquejamajajianaquero choocaguetatsica jenoqui, aatoquea piquenquejamajajiguero isavijiquitica quepatsiquitica. ³ Oquejetacataari pimetojaque, aatoquea imaica piquejetaja coramani. Cotanquitsi tancorejanajitari pishire pintsipajajempariniji Quirishito Irioshiqui. Omanaca pishire imaica, tee irinejajiteroji. ⁴ Cotanquitsi oncoramanitapojajeguete ironigaanquempaguete Quirishito tancorejajajimpica, ariquee ironigaantajiaqueri maasano quero picojiacani, pintsipajiaquempari poganejencavaequempa.

Pimpishoncamajajianaqueroja pipeacaaguishejiavetacaca

⁵ Noncantajiaquempi aatoja papijitajiro aisa pipeacaaguishejiavetacaca: aatoja poashitantajigui; aato piquenquetsaguisheti, aisa aato pantaguisheti; aato piquenquejavijiti teeca oncameetsateji, aisa aatoja pantajiro piquenquejaguishequeca; shoshoh aatoja pinevemajataro ajaarontsi, pishineventamajatarotsi quejetaca iro Irioshi. ⁶ Maasanotarite quempevaetatsica quejecaroca incatsimatimentajiaqueri coajica Aapani

Irioshi, teenicate inquemisantajigueriji. ⁷ Aisa piquejejiavecari aviatimpajia coramani piquempevaeguishejiavetaca oshequi. ⁸ Cotanquitsi imaica pimpishoncamajatanaque-roja maasano teeca oncameetsateji. Pimpishoncanaqueroja pitsimajencajia, aatoja picatsimatantajiaji, aatoja picatsimashirentantajiaji, aatoja picaveantajigui, aisa aatoja pinijaguishejigui. ⁹ Aatoja pamatavijavacaajiaja, picantashitatanacatari. Tee pinquempejiajempa coramani, pipishoncaguetanaquerotari pantaguevetacaca. ¹⁰ Ariquea icantashitajiajaimpi Aapani Irioshi, aisa imaica igantaga icantashitajiaianaquempi cameetsaniji pinquejejiajempariniji iriatimpa peacaquempica irosati pintsamajajia-queri. ¹¹ Ariguetei atsarovencari Quirishito yamenajiacaji Aapani Irioshi ari aquejetavacaajiaa maasano aatimpajia. Ariquea iquejejiaca joriojia aisa guiriegogia, ari iquejetavacaajiaa. Ari iquejejiaca aisa quenajiajojatsica otsipaqui guinteninintsi aisa catsimari, itsipajia aisa teeca irinetsanateroji yamejigaca joriojia tee intotsaiquijiter-iji, ari iquejejiaca netsanatiroca. Ariquea iquejetaca aisa yomperanajitaca, iqueje-tacari irira teeca irashintajitempariji. Maasano iquemisantajiaqueriguetei Quirishito ichoocashirentajiaqueriquea, yamentajiajarica Aapani Irioshi ari iquejetavacaaca.

Pinchoocajigue cameetsa

¹² Maasano aviatimpajia ipintsamajajiaquempi Aapani Irioshi, icoguajiaquempi in-tincaajiaquempi irashintamajajiaquempi, nocantantajiaquempica: pishimampojan-cacoventajiaqueri atsipejianquitsica; pincavintsajante; aatoja panaavacaga; aatoja pipigatanacari catsimajiaquempineca, pinquenquetsatacaguetei cameetsa; aisa pin- quenquetsatacaguetei cameetsa irasereajiaquempiguetei. ¹³ Pimpintsatavacaajiguempa pantsiperejacojiguempa. Aatoja picatsimajigui papiguemisantariteni catsimajiaque-mpica, iroguenti pimpeacotajemparo querocaguetei canquempini. Irira Amajirote imeshajiacaji imasantajajiro maasano antavetacaca teeca oncameetsateji. Ariquea pin- quejejiaquempari iriatimpa pimpeacotsitajempari papiguemisantariteni. ¹⁴ Cotanquitsi picancani pimpintsatavacaamajajiaquempa, caavijitari anaantamajataque. Ampintsatavacajiaquempaguetei anquejeshirentavacaajiaquempa. ¹⁵ Noninque iroguishineja- jiaquempi Quirishito aatoniji taaca opajita pishoshoguiteventa, irootaque inintaque Aapani Irioshi iroaqueraguetei inintacaquempiguetei pintsipajiajempariniji maasano tsarorentajigarica. Aisa pishineventajiaquempari iriatimpa, pinejaqueritari caaviji icavintsajiaquempi.

¹⁶ Pinquenquejamajatapinijiaqueroja maasano canqueca Quirishito. Pintsatacaava- caajiaquempaja pintampishitavacaajiaquempaja pinquejejiaquempari quenquejamaja- jiguirica Aapani Irioshi. Pamashaiventajiaquerija Aapani Irioshi, pinquenquejajiajerija quero icotacani icavintsajaquempiguetei. Pamashajiaquero sarempopae yamashaiven- tirica joriojia coramani, aisa pamashaitacoqueri Quirishito, aisa pamashaitacojiaquero otsipapae itsatacaquempica Ishire Aapani Irioshi. ¹⁷ Taaca opajitapae pantajiaque aisa taaca opajitapae pincantajiaque pinquenquejajiaquerija Amajirote Jesoshi, irooquea pantajiaque ininqueca iriatimpa. Aisa picancani pishineventajiaquempari Aapani Irioshi, pincanqueri caaviji icavintsajanti, itigarancaqueritari Jesoshi.

Quero incojiaquempiani tsarorentajigarica inchoocajiaquaguetei cameetsa

¹⁸ Aviatimpajia manquigarentsijia, pinquemisanqueri manquigatimpica aatoja pipigatsatari, irootaquetari ininqueca Amajirote. ¹⁹ Aviatimpajia shiramparijia, pimpintsamajaquemparo pimanquigare aato picatsimajigui. ²⁰ Aviatimpajia chaajaniquiguetanquitsica, irosatija pinquemisantajiaqueri piri aisa piniro, irootaquetari ishineventaca Amajirote. ²¹ Aviatimpajia choocajiajatsica pirijanite irooca porijanite, pintsatacaguetei cameetsa. Aato picantimentashitari intati. Arica pincantimentashiquempiguetei intati aato inintaji iquemisantajimpi. ²² Aviatimpajia yashintajitaca, pinquemisantamajiaquerija ashintimpica acaniqui quepatsiqui, pantajiaqueroja maasano querocaca incantajiaquempica, cotanquitsi aato apatiro piquemisanti pamenajiaqueri iramenajiaquempiguetei poguishinejimenqueriniji, picancani pinquemisanqueri, iriguentitari pinquenquejaque Aapani Irioshi poguishinejantaquemparica. ²³ Maasano taaca opajita pantajiaque pishinejiaquempa

quejetaca iriotaque pantajiaquene Amajirote, pintampishiventeneri teenica apatiro pamitacoqueri omperatimpica. ²⁴ Pitsajiaque icavintsajaquempi Amajirote Quirishito irovegaramajiaquempiro ontaniqui jenoqui, iriotaquetari pantajiaquene. ²⁵ Cotanquitsi iriraquea covaeguishetatsica inchiqiojita inquejetacaanquempa iriatimpa irantsipevaequempa, yamenajiacajitari Aapani Irioshi maasano ari aquejetavacaaca.

4

¹ Choocagueti caquinte povegarataqueca pashintacaca, pincavintsajajiaquerija, choocatarite ashintajiaquempica aviatimpajia aisa ontaniqui jenoqui inquitequi.

² Imaica noncantajiaquempi maasano aato piperajiga pamanajiguerigueti Aapani Irioshi, pinquenquejamajiguero, aisa picancani pishinevenquempari pincanqueri: “Ariotesaa.” ³ Aisa pamanacoventajiaquena naatimpajia cameetsaniji nagavejamajiaqueniji nontsavetantajiaqueri Quirishito noncamantajiaqueri maasano quero icotani imeshiantigueti, irootaque yashitacotantajivequenaca. ⁴ Pamanacoventajiguena cameetsaniji quishoniji nontsavetacotantamajataqueriniji noguisotoajiaqueneriniji maasano, irootaquetari inintacaaquenaca Aapani Irioshi.

⁵ Aviatimpajia pintsipajiaquemparigueti teeca intsarovenajiguempariji Amajirote, pinchoocajiaquequea cameetsa, pinquenquetsatacaajiaqueri cameetsa aatoniji icatsimajiguimpi. Aatoquea pichoocatashijiga intati. ⁶ Aatoja piquenquetsatashijiga intati jeoc jeoc jeoc. Cameetsaja pinquenquetsajiaque cameetsaniji irininque inquemisantamajajiaquempi, aisa pinquenquejamajaque cameetsaniji pintsajiaqueniji querocaca pincanqueri taaca coacojiaquempine.

Itioncacoqueri Tiiquico

⁷ Imaica nontigarancaqueri apiguemisanteriteni Tiiquico nopintsajiacaca, iroanaque pichoocajiaquegueti, irosati incamantajiaquitempi quero ocoani acaniqui nochoocajiaquegueti. Iriatimpa iriguenti caaviji yamitanti. Irioquea notsipataca nantajiguinirigueti Amajirote. ⁸ Iroguenti nontigarancaquaquemparica ashi iroguishinejajiaquitempi pinquemacotantajiajenaca choocatirajana. ⁹ Iriguenti intsipatanaquempa apiguemisanteriteni Oneshimo nopintsajiacaca conoajivetaquempica. Aisa iquejetaca iriatimpa iriguenti quemisantamajafatsica. Iriatimpajia iriotaque camantajiaquempineca maasano.

Ovegarapojaca itioncaquenerica

¹⁰ Iiraquea Arishitarico notsipatacaca nashitacojiacagueti ininque pinquemacojiajeri chooca iquenquejajajimpi. Aisa iquejetaca Maricoshi iriguentijeguitsorite Verenave,* iquenquejajajimpi iriatimpa. Imaica noncantajajempi aisa, arigueti iroanaque irinejajiaquitempi cameetsaja paajivaqueri. ¹¹ Jeri irira Jesoshi icantajitica aisa Joshito, ininque pinquemacotajeri chooca iquenquejajajimpi. Ichoocajiveta oshequini jorijia quemisantajiguirica Quirishito, cotanquitsi apaniroquea iriatimpajia itsipajiaquena nontsavetantigueti nocamantajiaquerigueti maasano quero icocani Aapani Irioshi imajirontagueti. Oshequi yoguishinejajiaquena. ¹² Iiraquea pigonoro Epaperashi ininque pinquemacotajeri chooca iquenquejajajimpi. Irio irisati antavaetinirica Jesoquirishito. Irosati yamanacoventajiaquempi picancaniniji pintsarovenquempari Quirishito Jesoshi aisa pintsamajajiaqueroniji maasano ininqueca Aapani Irioshi. ¹³ Nonejaqueritari yatsipeventamajajiaquempi aviatimpajia, aisa yatsipeventajiacari irirajia Iraoriseaquítica aisa irirajia Yeraporishiquítica. ¹⁴ Aisa ichoocaque acaniqui aavintantatsica Irocashi, caaviji ipintsajitari. Ininque pinquemacotajeri chooca iquenquejajajimpi. Aisa iquejetaca Temashi.

* 4:10 iriguentijeguitsorite Verenave. Omanaca oguipitsocaquerogueti ocatita tioncanquitsica acaniqui guiriegotsaquí: ocanti anepsios. Agavejaque ojicotaqueri irioca itineri, irioca aisa iranianishite, irioca iriguentijeguitsorite Verenave. Yoguipitsocaquerogueti quimajareri versión Reina Valera icanti “el sobrino de Bernabé”, ancanque “itineri”. Yoguipitsocaquerogueti quimajareri Versión Popular icanti “el primo de Bernabé”, ancanque irooca “iranianishite” irooca “iriguentijeguitsorite”.

¹⁵ Pincamantajigueri apiguemisantarijateni choocajiatsica Iraoriseaqui choocana noquenquejajajiri. Pinquejetaquempa pincamantero iroatimpa Nimpa, aisa maasano quemisantatsica capiocajianquitsica otsovironaquitequi, pincamanquerija choocana noquenquejajajiri iriatimpajia aisa. ¹⁶ Pinteroncaqueroqueti pampatsajavanqueroqueti ocatica notioncaqueca imaica, pintigarancajiaquenerija quemisantajiatsica choocajiatsica Iraoriseaqui irampatsajavanquero iriatimpajia, iroompa iriatimpajia impacaanquempiro notioncacaantajiaquenerica, aviatimpaquea pampatsajavantajiaquaero. ¹⁷ Pincantajigueri Arequipo: "Pisavicaventavaetanaquero maasano inintacaquempica Amajirote, pimoncaramajaquero."

¹⁸ Naroguenti Paavoro, jeroquea inchiqiojita notioncajiaquempiro oca nacoqui. Pinquenquejajajiena choocatirajana yashitacojitaquena. Nonintaque incavintsajamajiaquempiquea Aapani Irioshi.

IPARIACANARIGUETI PAAVORO ITIONCAJIAQUENERI TESARONICAQUITICA

Antsatantaquemparoca

Ocatica iroguenti antsatantaquemparoca iroquetica paperi itioncacaantaqueca Paa-
voro itioncajiaquenerigueti tsaromentajiacarica Jesoshi choocajianquitsica guintenin-
intsiqui pajitatsica Tesaronica. Irocashi itioncacotaqueri irira Paa-
voro otsipaquei pa-
periqui (Ya. 7.57–8.1; 9.1–31; 13.1–28.31), aisa itioncacotaqueri ichoocaquegueti Paa-
voro Tesaronicaqui paperiqui Yantajiguica 17.1–10; 20.1–5. Itioncacaantaquero Paa-
voro ocatica paperi tequeratagueti intioncacaanteroji maasano otsipapae paperipae ition-
cacaantaqueca choocajianquitsica paperiqui icantajitica *Tsavetacoquerica Jesoquirishito*.
Itioncacaantaquero ocatica paperi irooca ajagantsiniqui 50, irooca 51, iquenaguetana-
jigueti mavitetapojatsica itsavetacovaequerigueti Quirishito.

Timoteo icamantaqueri Paa-
voro quero icojiacani tsaromentajiat-
sica Tesaronicaqui,
cotanquitsi tee iragavejeji Paa-
voro irogueti iramenajiaqueri, iroo-
taquequea intionca-
caantantajiacanarica ocatica paperi (2.17–3.6). Icamantajiaqueri iraventamajiaque-
mpari Quirishito intampishitacaajiaqueriniji, aatoquea yovashiantajiguirotsi yaventaji-
acarigueti, irantajiaqueroquea inintacaajiaquerica Jesoshi (1.2–10; 3.7–9). Icamantajia-
queri quero incojiaquempani irinetsanajiaqueroniji inintacaajiaquerica Aapani Irioshi
(4.1–12; 5.5–22), tee inchoocateji tsatanquitsineca quero oncarateni incoraquetanta-
jatempaca Quirishito acaniqui quepatsiqui aisa intancorejantajanajempaca quemisan-
tajiaquerica (4.13–5.11). Paa-
voro iquenquejacaajiaqueri Tesaronicaquitica quero icotaca
iriatimpa ichoocatimojiaquerigueti, aatoniji iquemisantajiguiri tsojeventajiacarica Paa-
voro (2.1–12).

¹ Imaica naatimpaquea Paa-
voro notsipatacari Shirivano aisa Timoteo, notioncaji-
aquempiquea maasano aviatimpajia choocajiat-
sica oraniqui Tesaronicaqui tsaromenta-
jigarica Aapani Irioshi aisa Amajirote Jesoquirishito. Namanacoventajiaquempiquea
incavintsajiaquempinijite Aapani Irioshi aisa Amajirote Jesoquirishito, inchoocataca-
ajiaquempinijite cameetsa aatonijite pishoshoguiteventajigaro taaca opajitapae.

Irirajia Tesaronicaquitica iquemisantamajiaqueroquea Quenquetsatsarentsi Oganejen- catatsica

² Nocantacoguitaniqua namanaguitirini Aapani Irioshi nocantajiaqueriquea
noshinejiaca namenajiaquempigueti pitsaromentamajatanacariquea Amajirote
Jesoquirishito. ³ Aisa namanajiaquerigueti nocantacoguitaniqua noquenqueja-
jiaqueroquea pisavicaventamajatanaquero maasanopae inintagueticata iriatimpa,
iriotaqueitari paventajiacaca. Picocani pantamajiaqueneriquea, pipintsajiacaritarite.
Aisa patsipetacojianaca maasanopae, irooriji poguijajiaqueri incoraquetajategueta
Amajirote Jesoquirishito oncoramanitapojajegueta. ⁴ Napitsaromentarijiate,
ipintsamajiaquempiquea Aapani Irioshi, aisa notsajiaquequea icoguiajiaquempi.

⁵ Oraquea notsavetantimojiaquempigueta notsatacajiaquempiroquea Quenquet-
satsarentsi Oganejencatatsica, teequea nonquenquetsatacaashijiguempiquea intati,
iriguentiquea agavejacaquenaquea Ishire Aapani Irioshi. Aisa notsamajiaquequea
oraquea Quenquetsatsarentsi notsavetantimojiaquempica iroomajaca. Aviatimpajia
pamenamajiaquenaquea queroquea nocojiacani nochoocatimojiaquitimpigueta.
Noquejetacaajiacariquea imaica cameetsanijite pintsamajiatimentajiaqueniijite.

⁶ Iroompaquea pamenamajiaquenaqueta piquejejianacaquea aviatimpajia,
piquejejianacaquea naatimpa, aisa piquempejianacariquea Amajirote.
Patsipevaejiacaquea cotanquitsiquea pishineventamajiacariquea notsave-
tantimojiaquempica, iriguenti oguishinejaquempi Ishire Aapani Irioshi.

⁷ Jeroquea irooquea iquemacojiaquempigueta maasano tsaromentajigarica
Maseroniaquitica aisa Acayaquitica iquempejianaquempiquea aviatimpajia.

⁸ Cotanquitsiquea teetarite aparoquea inquemacojiteroji Quenquetsatsarentsi

Oganejencatatsica Maseroniaquitica aisa Acayaquitica, iquemacojiavaqueroquea aisa osamanipaequitica, otsitacaguitejavaetanacroquea. Aisa iquemacojiaquempi maasano pitsariventamajatanacariquea Aapani Irioshi. Teequea noncamantajajeriji naatimpajia, ⁹ itsavetacojiaquempitari maasano, iquenquetsatacojiaquempi querocaca picojiacani pishineventamajatacaroguetei notsavetantimojiaquitimpiguetei coramaniqui narejerejeitaquitaguetei namenajiaquitimpiguetei, ariqueea pipishoncajianaqueeriquea pipeaguevetacaca pirioshiguetea intati iriotaquequea pitsariventamajajianaja Irioshimajaca teeca irimetojimateji. ¹⁰ Aisa iquenquetsatacojiaquempiquea icantajiaque picocaniquea poguijajiaqueri incoraquejateguetei Jesoshi Irijanite Aapani Irioshi ivochatajica, iriotaquequea meshiajiacajica aatonijite icatsimajiajiquea Aapani Irioshi oncoramanitapojaguetei.

2

Queroquea icocani Paavoro ichoocaqueguetei Tesaronicaqui

¹ Imaicaquea, napitsariventarijiate, pitsajiaquequea coramaniquea narejerejeitaquitaguetei namenajiaquitimpiguetei teetarite noanoitashitempaji intati. ² Pitsajiaquequea ontaniquiquea ontaniqui Piriponiqui, icantacantaivaequenaquea yatsipetacaajiaquena, cotanquitsiquea nocoraquejiaqueguetei aviatimpajiaqui itampishitacajiaquenaquea Aapani Irioshi noquenquetsatimojiaipojaquempiquea notsatacajaiapojaquempirotarite Quenquetsatsarensi Oganejencatatsica. Ichooajavecaquea oshequini catsimajiaquenaca, cotanquitsiquea naatimpajia teequea nontsaroajigueji. ³ Manatarite notsavetacovintsajianaqueroquea Quenquetsatsarensimajaca, teequea noncantashitatuemparoji. Teetarite nonquenquejajajeriji taampaquea naantajiajemparo naatimpajia, aisa teequea namatavijantajigueji. ⁴ Inintacaajiaquenatari Aapani Irioshi notsavetacojiaqueroquea Quenquetsatsarensi Oganejencatatsica. Ariqueea noquejajiguiroquea imaica notsavetantavaetiguetei. Teetarite irioquea nonintajigue noshinetacaajiaquempari caquinte, iriguentiquea nonintajiaquequea noshinetacaajiaquempa Aapani Irioshi amenamajajiacajica querocaquea acojiacani ashirequi. ⁵ Pitsajiaquequea aviatimpajia noquenquetsatacaajiaquempiguetei teequea noshinetacaamampejaguempiji intati, aisa teetarite noshoshoventemparoji pivegarajiaquenanjite pimentaquitsitequi. Yamenajiaquenaquea Aapani Irioshi arimajaca nocantajiaquempica. ⁶ Naatimpajia teequea nonintimateji inquejetacaajitaquenaquea quempeca naatimpajiacajia majirontajiaatsica, tee nonintajigueji pinquejetacaajiaquena aviatimpajia, aisa tee nonintajigueji inquejetacaajiaquena itsipajia. Nagavejajavecaquea nomperajiaquempime, naroguentijiatari itigarancanejia Quirishito, cotanquitsiquea teequea nonquempejiguempaji imaica, ⁷ manaquea inchiquiojiquea nonetsanajiaquempiquea noquempetacaajiaquempi chaajaniquitirajaca oguimoncajiguiriguetei iriniro. ⁸ Caavijiquea nopintsamajajiaquempi, jeroquea teequea aparo nonintajigue nontsavetantaquempiro Quenquetsatsarensi Oganejencatatsica itigarancaqueca Aapani Irioshi, quempecaquea nometojaventajiaquempi, teetari nontsaroacaguemparoji iroorijite nopintsamajajiaquempi. ⁹ Napitsariventarijiate, picocanicajate piquenquejajajiro quero nocojiaca naatimpajia: nantajiaquequea nomagotimentajiaqueroquea nosheca. Noquejiaqueroquea imaica savincaguiteriqui aisa pitsecariqui aatonijite natsipetacaajiguimpi aviatimpajia pojocashijiaquenameguetei intati arinijite nontsavetantimojiaquempironijite Quenquetsatsarensi Oganejencatatsica itigarancaqueca Aapani Irioshi.

¹⁰ Aviatimpajia tsariventajigarica Aapani Irioshi pamenajiaquenaquea nochoocatimojiaquempiguetei, aisa Aapani Irioshi yamenajiaquenaquea, nocomajamajajiacajia teequea noncovaeguishedempaji. Aisa nonetsanamajajiaqueroquea maasanopae icantaguetaqueca Aapani Irioshi cameetsanjite iramenajiaquenijite teequea taaca opajita nompeacaimatempaji covaeguisherentsi. ¹¹ Aisa pitsajiaquequea nocantajiaquempiquea arimpaquea pintsariventamajajianaquempari Aapani Irioshi, jero aisa noguishinejajiaquempi noquempetacaajiaquempiquea

aviguentijia niri janijate. ¹² Notsatacaamajiaquempiquea nocantamajiaquempiquea pincojianaquempani pincomajamajianaquempanijite cameetsanijite irishineventajiaquempinijite Aapani Irioshi. Iriotaquequea cantatsica iroaqueragueti iniquequea pintsipajiaquempani impeaquempagueti Imajirojiate maasano, iramenajiaquerigueti maasanojia yoganejencamajata.

¹³ Nocantacoguitaniqua nocantajiaqueri Aapani Irioshi noshinevaetacaquea, name-najiaquequea notsavetantimojiaquempigueti Iguenquetsatsare piquemisantajiaque-roquea pishineventajiavacaroquea, pamenajiaquetarite teequea iro iguenquetsatsare caquinte, pitsajiavaqueroquea iroguenti Iguenquetsatsare Aapani Irioshi, arimajatarite irootaquequea. Irootaque cantashitajianaquempica aviatimpajia quemisantajiana-queroca, agavejacaajianaquempi. ¹⁴ Napitsaroverentarijiate, oraquea coramaniqui icatsimamajianaquempigueti pigonoropae yatsipetacaajiaquempigueti manatarite iqueje-tacaajiaquempiquea tsaroverentajigarica Quirishito Jesoshi choocajatsica Joreaquei capio-caventapinijigarica Aapani Irioshi. Aritarite iquejetacaajiacari igonorojia iriatimpajia jorijia, manaquea yatsipetacaajiacari. ¹⁵ Iriatimpajia jorijia metojacaantajiaquerica Amajirote Jesoshi iquejetacaajiaqueriquea imetojajiaquerigueti coramani tsavetanta-jiatsica. Ari iquejejaiquenaquea naatimpajia, icatsimamajiaquenaquea, yoguisoto-jajiaquena. Teequea irinetsanateroji inintacaquerica Aapani Irioshi, icatsimajiaque-riquea aisa maasanopae caquinte, ¹⁶ aritarite inintajiavecaquea irojocaavaquename ya-menaquenagueti nonintajiaque nontsatacaajiaqueri teeca irijorijoigueji cameetsanijite irimeshijataquerinijite. Iquejejiacagueti imaica, icovaeguishemajajia, irootaquetari aapojaca imaica, icatsimamajiaqueriquea Aapani Irioshi.

Inintavecaquea Paavoro irinejajaterime Tesaronicaquitica

¹⁷ Napitsaroverentarijiate, coramaniqua nojocajianaquempigueti oraniqui Tesaroni-caqui teetarite namenajiavetajempiji, cotanquitsiquea nococani noquenquejajiaquempi, teetarite nompeacojiguempiji. Imaica nonintamajiavecaqueate namenajiajatempime. ¹⁸ Irooshivecaquea noncoraquejiaquemequea, naatimpa Paavoro nonintamajapinive-taca noncoraqueetaquequea, cotanquitsiquea teequea nagavejajigueji, yojocaavaque-natarite Satanashi. ¹⁹ Cotanquitsiquea imaica noninquequea noncantajiaquempi taa ipajita noguijamajatavaje naatimpajia. Iriguentiquea noguijamajatavaje incoraque-tajeguete Amajirote Jesoquirishito, oncoramanitapojajeguete nontsipatsipaitanaquempi noncantajiaqueri: "Jeeri irirajia notsaroverentacaajiacaca." ¿Quericaquea shinetacaaji-aquenanea? ¿Quericaquea noshineventamajataquempaca oncoramanitapojajeguete? Aviguentijiaquea noshineventajiaquempa. ²⁰ Arimajacaquea aviguentijiaquea shineta-caajiaquenanea, aisa aviguentijia noshineventamajajiaquempa.

3

¹ Coramaniqua nopintsapintsajiavetaca cotanquitsiquea namenajiaquequea teequea nagavejajigueji noncoraquejigueji, noquenquetsatavacaajiacaquea, iroompaquea no-cantajiaqueri irioqueate oanankuitsine Timoteo, naatimpajia choocajajatsine Ate-nashiqui. ² Iroompaquea notigarancaqueriquea Timoteo iramenajiajatempiquea. Iriguentiquea apitsaroverentarite antaquenerica Aapani Irioshi, iriguenti notsipatashiji-acaca notsavetantaqueroguete Quenquetsatsarentsi Oganejencatatsica tsavetacotaque-rica Quirishito. Namenajiaquequea iragavejaque intsatacaamajiaquempiroquea, aisa intampishitacaajiaquempi ³ aatonijite quericaca ovashiantirotsi itsaroverenta-jatariguete iramenaqueguete yatsipetacaajitacariguete, inintacaacajitari Aapani Irioshi antsipeventajiaquempari Quirishito. ⁴ Oraquea nochoocatimojiaquitimpiguete nocan-tajiaquempiquea: "Ariquea irantsipetacajiacaji." Imaica pitsajiaque onetsananaca. ⁵ Nonintamajataquequea nonquemacomajajiaquempi, notigarancantacaricaquea Tim-oteo iramenajiaquitempi picantacoguitanica pitsaroverentamajatanacariquea Quirishito. Notsarocaanaquempiquea noquenquejaque arica yamatavijajiaquempi ampatsini nin-tatsica incovaeguishetacaante. Aricaja manacajate noquenquetsatimojiavetaquem-piquea intati.

⁶ Imaicaquea coraquetajiquea Timoteo yamenajiatimpi icamantajiapojajanaquea arimpaquea pitsaromentamajianacari, aisa pipintsatantajanaca. Icamantajiaque-naquea piquenquejajianaquenaquea pinintamajajiaque pamenajiajena piquejejaquea naatimpajia nonintamajajiaquequea namenajiatempi. ⁷ Natsipevaejiacaquea taaca opajita, aisa yatsipetacaajiaquenaquea itsipa caquinte, cotanquitsiquea poguishinejajataquenaquea, napitsaromentarijiate, noquemacojiaquempigueti arimpaquea pitsaromentamajianacariquea Amajirote Quirishito. ⁸ Arimajacaquea noshinemajianajaquea, noquemacojiaquempitari picoguitaniqua pitsaromentamajaguitarini teequea povashiantajeriji. ⁹ Jeroquea namananaquerigueti Aapani Irioshi nogaamajatanacaquea noshinemajatanaca oshequi teequea nontsajigueji querocaquea noncantajigue, caavijitari yoguishinejajianaquena namenajiaquempigueti pitsaromentamajianacari. ¹⁰ Oavaetanaquequea savincaguitari aisa pitsecariqui namanajiaqueriquea Aapani Irioshi nocantajiaqueri nonintajiaquequea namenajiatempi nontsatacaamajajiaquitempiro tequerataca pintsamajajigueji.

¹¹ Nonintajiaquequea irojacaconventavaquena Aapani Irioshi aisa Amajirote Jesoquirishito nagavejajiaqueniji noncoraquejiaquitequea namenajiatempi. ¹² Aisa nonintajiaquequea iragavejacaajiaquempi Amajirote arimpaniji pimpintsamajatavacajianaquempa, aisa arimpaquea pimpintsamajajianaquempari maasano caquinte, pinquempejiaquenaquea naatimpajia nopintsamajajiaquempigueti aviatimpajia. ¹³ Ariquea pinquejajianaquempaquea imaica cameetsanijite intampishitacaimenquempinijite Aapani Irioshi pishirequi aatonijite pipeacajaiga covaeguisherentsi manaquea pincomajamajianaquempaquea. Oncoramanitapojajegueticquea incoraquetajegueticquea Amajirote Jesoshi intsipatsipaitaquemparigueticquea maasano igomajamajarejia, iramenajiaquempiquea Aapani Irioshi netsanamajajiaquempiquea.

4

Queroquea incojitaquempiani iroguishinejajitaqueriniji Aapani Irioshi

¹ Napitsaromentarijiate, coramaniqui nontsatacajiaquempiquea queroquea pincojiaquempiani pincomajajiaquempagueti cameetsanijite pishinetacaajiaquempariniji Aapani Irioshi, ariqueea piquemisantamajajianaquenaquea nocantajiaquempica. Imaica noncantsijajempiquea arimpaquea pinquejajianaquempa imaica, iriguentiquea cantanquitsi Amajirote Jesoshi. ² Pitsajiaquerotari nontsatacajiaquempica icantacaaquenaca Amajirote Jesoshi. ³ Ininquequea Aapani Irioshi pincomajamajajiaquempaquea. Aatoquea poashijiguiro manquigarentsi teeca irooquea pashiquea pimanquigare. Ariqueea pinquejajiaquempaquea manquigarentsijia aatoquea poashijiguiritsi itsipa shirampari teeca irionica pashiquea manquigajiguempica. ⁴ Iriiraquea shiramparijia noninque intsajiaque cameetsataquequea irimanquigajiaquempa manquigarentsi, cotanquitsiquea netsanaquea iroajiaquero irimanquigajiaquemparogueti. ⁵ Aatoquea iquejigaritsi irirajia teeca intsaromentajiguemparijia Aapani Irioshi, opeacojianaqueriquea itsanirore yoashijiaqueroquea manquigarentsijia intati. ⁶ Aisa teequea oncameetsateji pincantatsatacotsijiguero pigonoro. Nocantajiaquempiquea coramaniqui, cotanquitsiquea imaicaquea noncantsijajempiquea aisa, incatsimamajajiaqueriquea Amajirote maasano quempejiguiroca imaica. ⁷ Teetarite irooquea incajemimentacajiquea Aapani Irioshi cameetsanijite ancoquempaniquea ampeacaaguitemparoni taaca opajitapae covaeguisherentsi. Iroguenticquea icajemimentajiacajiquea ancomajamajajiaquempianiji antajiaqueroquea cameetsaripae. ⁸ Nocantantajiaquempicaquea, quericacaquea teeca irininteji inquemisantajigueroji ocatica nontsatacajiaquempica tee naroguentijia irimaninteji, iriguenti imanintaque Aapani Irioshi tigarancaquerica Ishire inchocashirentajiaquempi.

⁹ Nontsataquequea Aapani Irioshi itsatacaajiaquempiroquea pimpintsatavacaamajajiaquempaquea. Irootaquequea imaica aatoquea notioncajiguimpi noncantajiajempiroquea aisa. ¹⁰ Aritarite piquejejiacaquea imaica pipintsajiacariquea maasano papitsaromentarijiate choocajatsica guinteninintsipaequi Maseroniaqui, cotanquitsiquea nonintaquequea arimpaquea pimpintsamajajianaquempariquea. ¹¹⁻¹² Cameetsaquea

pinchoocajianaquequea. Iroguentiquea pisavicaventamajajianaquequea pashipae pantajiaqueca. Inchiqiojitaquea pincatsiquetimojajempauea aviatimpajia irooca ot-sipa panteca, aatoquea pasereantajiguitsi, manaquea pinquempetacaajiguempaquea nocantajiaquempica cameetsanijite aatonijite ishirontimentajiguimpi itsipa teeca intsariventempariji, aisa cameetsanijite onchoocatimenquenijite taaca opajitapae picoguitejacojiacaca.

Quero oncotanaquempani oncoramanitapojajeguetei incoraquetajateguetei Amajirote

¹³ Napitsaroveritarijiate, nonintajiaquequea pintsajiaque queroquea incojianaquempani oncoramanitapojajeguetei metojajianquitsica cameetsanijite aatonijite pishimampojancajiga piquempelijaritsija itsipa teeca intsajigueti intancoretancoreitanaje.

¹⁴ Aatimpajia atsajiaquequea imetojavetaca Jesoshi, ariquee ipochatanaji. Aisa atsajiaquequea ariquee inquempetacaajiaquempariquea Aapani Irioshi irivochajajeriquea maasano tsariventajiacarica metojajivetanquitsica cameetsanijite iramamirincajajeri oncoramanitapojajeguetei incoraquetajateguetei Jesoshi.

¹⁵ Itsatacajiaquenaquea Amajirote notsatantajiacaca, aatimpajia tequeratacaquea ametojajigueti incoraquetajateguetei iriatimpa aatoquea aro jivajigueti metojajianquitsica. ¹⁶ Ariquee iraguijipoje Amajirote, incantajiacaji iririjencani, ariquee inquejetsitempa irashivantite anaamajatanquitsica iririjencani incanquempa, aisa intivojiqueroquea itivore Aapani Irioshi. Iriquetiquea tancoretancoreitanajatsine metojajivetanquitsica aventajiacarica Quirishito. ¹⁷ Coajicaquea aatimpajia tequerataca ametojajigueti anconoajianaquempari iriatimpajia metojajivetanquitsica oahoitanaquequea mararogui antonquivojajivaquempari Amajirote jenoqui, ancoguitempaniquea antsipamajatajempari iriatimpa. ¹⁸ Irootaquequea noncantantajiaquempica imaica pinquunquejava-caajiaquemparoja ocatica poguishinejavacaajiaquempanijite.

5

¹ Imaicaquea, napitsaroveritarijiate, tee pincoacotajempaji nontioncaquempi noncamantajiaquempi quero incarate catsirincaiteri aisa quero oncarate savincagueti onetsanatantanaquempacaca ocapae. ² Pitsajiaquetari oratica savincagueti incoraquetantajempaca Amajirote manatarite incatimajajempauea inquempetapojajempari aitsitantatsica icoraquetiguetei pitsecariqui. ³ Incantajiaivequempagueti maasano: “Imaicaquea cameetsavaequequea achoocajiaque, aatoquea taaca opajita oajaji”, incatimajiaqueriquea incatsimamajajiaqueriquea Aapani Irioshi irantsipetacaajiaquempari, querocampate iroaraitanaqueni. Manaquea onquejetaquemparoquea oncantaguetanajerogueti manquigarentsi, ocatimajajiro oquemavaquero ocantaguetanajiroguetei, queroquea oncoquempani.

⁴ Cotanquitsiquea aviatimpajia, napitsaroveritarijiate, teetarite pinquempelijuempariji teeca intsariventajiguempariji, teequea pimpitsecashirentacojigueti. Aatoja ari iquejetacaajiguimpiquea iriatimpajia oncoramanitapojajeguetei incatimajajeriguetei.

⁵ Aviatimpajia quempetaca pitsirencashirentacojiaque, pisavincaguiteshirentacojiaque, jeroquea poguijantajavajemparica incoraquetajateguetei, teetarite pinquempelijuempariji covaeguisherijia pitsecashirentacojiatsica. ⁶ Iriatimpajia teequea inquenquejeroji incoraquetantajempaca Amajirote, quempevetacaquea mana imaajiaque. Cotanquitsiquea aatoquea aquempelijaritsi iriatimpajia. Jaamejate agamajaguitemparini anquenquejamajajigue. ⁷ Iriiraquea maajianquitsica iroguentiquea imaajiaque pitsecariqui. Ariquee iquempejiacaquea aisa shinquijianquitsica iroguenti ishinquijiacaca pitsecariqui.

⁸ Cotanquitsiquea aatimpajia mana asavincaguitetacojiaquequea atsariventajiacaritarite Amajirote, jeroquea jamejate anquenquejamajajianaquequea. Oncoraquetashicajiguetei covaeguishedagantsi jeroquea anticaanquemparoca: aventajiaquempariquea Amajirote, aisa ampintsatavacaamajajianaquempacea, iroocaquea aisa aguijaguiteniquea aapojajempagueti savincagueti oahoitantanaquempacaca jenoqui inquitequi antsipajiaquempariquea Jesoquirishito meshiajiacajica. ⁹ Teetarite incanteji Aapani Irioshi inique incatsimajiacaji, manaquea canque iniquequea irimeshiajiacaji aventajiaquempariguetei Amajirote Jesoquirishito aatonijite oahoititsi camorecariqui.

¹⁰ Iriatimpa imetojaventajiacajiquea cameetsanijite ancoquempaniquea antsipajiaquempari, aricaquea choocatatsitirajajigueti oncoramanitapojajegueti incoraquetantajempaca, aricaquea ametojajiaque. ¹¹ Jeroquea nocantantajiaquempica poguishinejavacaajiaquempaqua, aisa pintampishitavacaajiaquempaja, aritarite picojiaca piquempejiaque-roquea imaica.

Icamantajiaqueri quero incojiaquempani

¹² Imaicaquea, napitsaroveritarijiate, noninquequea pinquemisantajiaqueriquea irirajia inintacajiaqueca Aapani Irioshi intsatacaajiaquempi aisa intampishitacaajiaquempi pinetsanamajiaqueroniji icanqueca Amajirote. ¹³ Icoquitaniquea isavicaventamajajiaquero itsatacaajiaquempica, irootaquequea nocantantajiaquempica pishineventamajajiaquemparija pimpintsamajajiaquemparija. Aisa noninquequea pintsipatavacajiaquempagueti pinchoocajiaquequea cameetsa.

¹⁴ Jero aisa, napitsaroveritarijiate, nonintajiaquequea pincantomajajiaqueriquea perajatsica, pintampishitacaajiguerija tsarontijia aisa teeca intampishitashijigueroji taaca opajita coraquetashijiaquerica, pantsiperejacojiaquemparoja querocaca incoquempani maasano. ¹⁵ Querocaca incojiaquempini papitsaroveritarijiate aatoquea pipigajigari, manaquea pincavintsajavacaajiaquempaja aisa pincavintsajitempariquea maasano.

¹⁶ Pincoquempanija pishinejiaquempaja. ¹⁷ Pincoquempaniquea pamanajiaqueri Aapani Irioshi. ¹⁸ Aricaquea pinchoocajiaque cameetsa, arica pantsipevaequempa, cotanquitsiquea pincoquempaniquea pishineventamajataquempari Aapani Irioshi, pincanqueriquea: "Ariotesaa", irootaquequea ininqueca iriatimpa, aviguentijiatari tsarventajigarica Quirishito Jesoshi.

¹⁹ Aatoquea pisantereguiri Ishire Aapani Irioshi. ²⁰ Aisa aatoquea pimanintajiguiro icanqueca tsavetantajiguiroca icanquerica Aapani Irioshi. ²¹ Cotanquitsiquea iroquetiquea pinquemisantajiavaqueriquea itsatacaajiaquempica, iroompa pamenajiaquegueti tampatica yoaquero, ariquea pinquemisantsijiguempariquea. ²² Oraquea maasano covaeguisherentsi aatoquea piquenquejajiguirotsi, aatoja pipeacagarotsi.

²³ Iriraquea Aapani Irioshi irioquea choocatacaajiacajica cameetsa aatonijite ashoshoguiteta. Imaicaquea noninque intampishitacaajiaquempiquea cameetsanijite pinquenquejamajaquerinijite iriatimpa, aisa pisavicaventamajaqueronijite maasanopae inintaguequeca. Noninquequea inquempoguijamajajiaquempiroquea pishire, piguenquejane, pitsino, maasano, cameetsanijite incoraquetapojajegueti Amajirote Jesoquirishito iramenajiapojajempiquea netsanamajajiaquempi. ²⁴ Iriraquea cajemajiaquempica icancaniquea inetsanamajaquero maasano icanqueca, ari irinetsanaqueroquea maasano ocatica.

²⁵ Imaicaquea, napitsaroveritarijiate, noninquequea pamanacoventajiaquenaja.

²⁶ Netsana pinintavorojiavaqueri* maasano apitsaroveritarijiate. ²⁷ Ocaticaquea paperi notioncajiaquempica noninquequea pampatsajavantajiaquenerija maasano papitsaroveritarijiate choocajatsica oraniqui, iriguentiquea nintanquitsica Amajirote.

²⁸ Namanacoventajiaquempiquea maasano incavintsajimentajiaquempinijite Amajirote Jesoquirishito.

* 5:26 Netsana pinintavorojiavaqueri. Yamejiaca coramani inintavorotavacaajivaca yamenavacaajiacagueti, ari iquejiaca tsarventajigarica Quirishito coramani.

PAAVORO ITIONCAJIAJINIRI TESARONICAQUITICA

Antsatantaquemparoca

Ocatica iroguenti antsatantaquemparoca mavitetapojatsica paperi itioncacaan-
taqueca Paavoro itioncaciaquenerigueti tsaromentajiacarica Jesoshi choocajianquitsica
guinteninintsiqui pajitatsica Tesaronica. Irocashi itioncacotaqueri irira Paavoro otsi-
paqui paperiqui (Ya. 7.57–8.1; 9.1–31; 13.1–28.31), aisa itioncacotaqueri ichoocaquegueti
Paavoro Tesaronicaqui paperiqui Yantajiguica 17.1–10; 20.1–5. Iteroncaqueroqueti
Paavoro iroquetica paperi itioncacaantajiaquenerica Tesaronicaquitica, avisanaque-
gueti aparopae taai, ari itioncacaantaquero ocatica ichoocaquegueti Corintoqui, irooca
ajagantsiniqui 50, irooca 51, iquenaguetanajigueti mavitetapojatsica itsavetacovae-
querigueti Quirishito.

Itioncacaantaqueroqueti Paavoro ocatica paperi icamantajiaqueri Tesaronicaquitica
intampishitashitero yatsipeventajiacarigueti Jesoshi (1.3–12; 2.13–3.5), aisa itsatacaa-
jiaqueri quero oncotanaquempiani incoraquetantajatepaca Jesoquirishito ocaniqui
quepatsiqui, aatoniji ijijigui coraquetaji quejetaca icantashijiacarigueti amataajiatsica
(2.1–12), aisa icantajiaqueri quemisantajiaquerica Jesoshi incatsiquejiaque irooca otsi-
papae cameetsaguetatsica irantajiaque, aato iperajiga (3.6–15).

¹ Imaica naatimpaquea Paavoro notsipatacari Shirivano aisa Timoteo, notioncaji-
aquempiquea maasano aviatimpajia choocajiatsica oraniqui Tesaronicaqui tsaromenta-
jigarica Aapani Irioshi aisa Amajirote Jesoquirishito. ² Namanacoventajiaquempiquea
incavintsajajiaquempinijite Aapani Irioshi aisa Amajirote Jesoquirishito, inchoocatacaa-
jiaquempinijite cameetsa aatonijite pishoshoguiteventajigaro taaca opajitapae.

Aapani Irioshi incatsimajiaqueriquea maasano teeca intsaromentamajjiguempariji

³ Napitsaromentarijiate, noquemacojiaquempiquea arimpa pogaamajajianaca pit-
saromentamajajianacariquea Aapani Irioshi, aisa pipintsatantamajajianaca, jeroquea no-
cantacoguitaniqua namanajiaquerigueti Aapani Irioshi noshinemajajiacaquea nocan-
queri noshineventajianaquempi aviatimpajia aisa, notsataquequea irooquea ininque iri-
atimpa. ⁴ Aisa noquenquetsatacojiaquempiquea nocamantajiaqueri maasano tsaroven-
tajigarica Aapani Irioshi capiocapinijianquitsica tsovironaquipaequi noshineventaji-
aquempi oshequi, namenajiaquempiquea patsipetacojiacariquea maasano catsimaji-
aquempica asereajiaquempica, teequea pimpigajiguempariji, picocaniquea pitsaroven-
tamajatanacariquea Aapani Irioshi. ⁵ Irootaquequea itsatantajitacaroca iriraquea Aapani
Irioshi teequea queri incatsimatashitempariji intati, iriguentiquea Iriomajatatsica, tam-
patica yoaquero. Iriguentiquea tampishitacajaiquempiquea patsipetacotantajiacaroca
taaca opajita, cotanquitsiquea oncoramanitapojajeguete impeaquempaguete Imajirojiate
maasano incajemajiaquempiquea poapoaitanaquequea pinchoocatimojiaqueri pame-
najiapojeroquea maasanopae patsipeventajiacaca imaica. ⁶ Otampaticatimotaqueri
Aapani Irioshi impigataquempari atsipetacajaiquempica irantsipetacajaiquempari-
quea, ⁷ cotanquitsiquea incavintsajajiaquempiquea aviatimpajia atsipejianquitsica
imaica, aatoqueate patsipevaejiaja, ariquea inquempetacaajiaquenaquea naatimpa-
jia aisa. Ocaquea onetsanatanauempa ironigaantaquempaguete Amajirote Jesoshi,
inquenapojajequea jenoqui inquitequi, intsipatsipaipojajempariquea irashivantijitete
caavijica yagavejamajajigui. ⁸ Oraqueate incoraquetajateguete anquiritacotapojem-
pariqueate paamari, incatsimamajajiaqueriquea maasano teeca intsajigueriji Aapani
Irioshi, maasano teeca irinetsanajigueroji Quenquetsatsarentsi Oganejencatatsica tsave-
tantaquerica Amajirote Jesoquirishito. ⁹ Ariquea incoquempaniquea irantsipegui-
tempani camorecariqui. Aatoquea yagavejajigui inchoocatimojiaqueri Amajirote,
aisa aatoquea yamenimajajiroquea iroganejencare ironigaantaqueroquete iragavejane.

¹⁰ Oraqueate incoraquetajategueti manaquea incoraquetashiquequea irishineventajia-avaquempariquea maasano yashintajiacaca, inquenquetsatacaajiavaqueriquea maasano tsaromentajiacarica incanqueriquea iriguenti caaviji yoganejencamajata. Aviatimpajia aisa pintsipatsipaitanaquempariquea iriatimpajia, piquemisantajiaquenatari notsaveta-coquerigueti.

¹¹ Irootaquequea nocantacoguitaniquea namanacoventajiaquempi aviatimpajia. Namanejigui iragavejacaajiaquempi Aapani Irioshi pantajiaquequea maasanopae inintacaaguequempica icajemajiaquempigueti irishineventajiaquempiniji. Aisa namana-coventajiaquempi iragavejacaajiaquempi pantajiaque maasanopae cameetsaguetatsica pinintajiaqueca aviatimpajia. Aisa nocantajiaqueri nonintajiaque iragavejacaajiaquempi pinetsanamajiaquero maasano pantajiaquenerica pintsaromentamajianaquemparigueti. ¹² Ariqueate pinquejiaquempagueti imaica iramenajiaquempiquea caquinteja irioqueate agavejacaajiaquempine Amajirote Jesoshi, irishineventajiaquempariquea. Ariqueate inquempajiaquempiquea iriatimpa irishineventajiaquempiquea cameetsaniji iramenajiaquequea aviguentijia irashijia, icavintsajamajiaquempitari Aapani Irioshi aisa Amajirote Jesoquirishito.

2

Queroquea oncoquempani irooshipojajeguetei incoraquetajategueti Quirishito

¹ Imaicaquea, napitsaromentarijiate, pitsajiaquequea oncoramanitapojajeguetei incoraquetajategueti Amajirote Jesoquirishito iromporoguijajiapojacajiquea cameetsanijite amporoguijaventajiaquempariquea. Imaicaquea noncantajiaquempiquea, ² ariguetei pinquemajiaqueri incantajiavetaquempiquea: “Jac coraquetapojaji Amajirote”, aatoquea pitsaroajigui aisa aatoquea pishoshoguitejiga. Arigueteiquea inconoagarantajiaquempipa incanque: “Iriotaquequea tsatacaquenaroquea Ishire Aapani Irioshi”, cotanquitsiquea aatoquea piquemisantimatiritsi. Ariguetei intsavetacoguetanajuempariquea incantajiaquequea: “Ariquea ocanque paperi itioncaqueca Paavoro”, ³ cotanquitsiquea aatoquea piquemisantimajiguiriquea aatonijite yamatavijajiguimpi. Oraquea irooshipojajeguetei incoraquetajategueti Quirishito iroquetiquea inconoagaranquempaquea tsaromentajiarica irovashiantajianajeroquea itsaromentajiavecariguetei incatsimajianaqueriquea Aapani Irioshi. Iroompaquea ironigaantanaquempa irira caavijica iranaaque pigapigamajataquemparinca Aapani Irioshi, cotanquitsiquea oncoramanitapojajeguetei intsijaiqueriquea camorecariqui. ⁴ Iriatimpa iriotaque catsimacatsimataquerinca Irioshimajaca iranaimanataqueriqueate. Ariquea inquempetacaajiaquempariquea aisa maasano ipeajiguetica irioshivijirentsi intati itsaromentajivetacaca, arimpaquea irogaamajatanajuempipa incatsimamajiaqueriquea. Iroompaquea inquijanaquequea teemproqui itsaromentantajitarica Aapani Irioshi irisavicanaquequea inquejetamampeanaquempariquea Aapani Irioshi incanquequea: “Naroguentiquea Irioshimajaca.”

⁵ ¿Arimpaqueate teequea pinquenquejajigueroji nocantajiaquempica coramaniqui nochoocatimojiaquitimpiguetei? ⁶ Imaicaquea aviatimpajia pitsajiaquequea taacaquea ipajita ticaacotaquerica aatoniji yonigaantsita, cameetsanijite aapojaquempaguetei savincaguiteri inintacaquerica Aapani Irioshi ironigaantanaquempa, ariquea iroguentiquea ironigaantanaquempa. ⁷ Imaicatari imaica jac icovaeguishetanacaquea, cotanquitsiquea tejemajacaquea onconigamajatejiquea, manaquea isenacacojiqueroquea. Cotanquitsiquea irira ticaacoquerica inquejetanaquempa irosati arejetapojempaguetei irajaitantajemparica inticaarejantajempaca. ⁸ Iroompaquea ironigaantajitaquempari iriatimpa, irira caarica quemisantiro canqueca Aapani Irioshi, cotanquitsiquea iriraquea Amajirote Jesoshi incoraquepojjajeguetei irimetojantapojempari ijenca sotoanquitsica ivagantequi, interoncantapojempari itsirencashimpoquirerejane. ⁹ Oraquea tequerataguetei irimetojeriji, iriraquea Satanashi iragavejacaqueriquea irantacaague-taqueriquea taaca opajitapae iramenamenaitanaquequea intati oshequini caquinte cameetsanijite iramatavijijianaqueriquea iramenajiaqueriguetei irijijiaquequea ipeacaaguecaro teeca iramenajigueteji. ¹⁰ Arimajacaquea irantaguishetanajuempipa taaca opajitapae covaeguisherentsi iramatavijitanaqueriquea irirajia oahaitananquitsinca

camorecariqui, teetarite irinintajiguejiquea irishineventajiguemparoji Quenquetsatsarentsimajaca irimeshiimentajiquerinijite. ¹¹ Irootaquequea icantantacaca Aapani Irioshi: “Intsiquetiroshiatsi inquemisantamajigueri amatavijantatsica, inquemisantajiguero tsojetsi.” ¹² Ariquea oncoramanitapojajegueti incatsimamajajiaqueriquea maasano teeca irininteji inquemisantajigueroji Quenquetsatsarentsimajaca, iroguentiquea ishin-eventamajaca covaeguisherentsi.

Aapani Irioshi icocaniquea inintacaajiacaji antsaromentajiaquempari

¹³ Napitsaromentarijiate ipintsamajajiacaca Amajirote, cameetsataquequea noncoguitempaniquea noshineventajiaquempariquea Aapani Irioshi, iroorijite notsajiaquequea paesatoniqui tequerataguetei onchoocatimatejiquea icocaniquea icoguijiaquempi irimeshijiaquempi. Iroompaquea iriraquea Ishire Aapani Irioshi icantashirentajiaquempiquea cameetsanijite pincomajamajatanaquempaquea pinquemisantamajatanaque-roquea Quenquetsatsarentsimajaca, irootaquequea imeshiantajiaquempicaquea Aapani Irioshi.

¹⁴ Piquemisantajiaquaerogueti Quenquetsatsarentsi Oganejencatatsica notsavetantimojiaquempica, icajemajiaquempiquea cameetsanijite pinquempejiaquempariquea Amajirote Jesoquirishito yoganejencamajataguetei. ¹⁵ Iroosacanea imaica, napitsaromentarijiate, pincoquempaniquea pintsaromentamajajianaquempariquea Amajirote, aatoquea pipeacojianajaroquea notsatacajiaquempica notsavetantimojiaquitimpiguetei, aisa aato pipeacojianajaro notioncajiaquempica paperiqui. ¹⁶⁻¹⁷ Iriraquea Amajirote Jesoquirishito aisa Aapani Irioshi ipintsamajatacajiquea icavintsajamajajiacaji. Oavetanaquequea ishinetaajiacaji, aisa itampishitacajiacaji cameetsanijite ancoguitempaniquea aguijiaque oahoaitanaquequea jenoqui antsipajiaquempariquea. Irootaquequea namanacoventantajiaquempica iroguishinejajiaquempi, aisa intampishitacajiaquempi pincomajamajajianaquempaquea pinchoocamajatanaque cameetsa.

3

Paavoro icantajiaqueri: “Pamanacoventamajajiaquena”

¹ Imaicaquea, napitsaromentarijiate, noninquequea pamanacoventamajajiaquena naatimpajia cameetsanijite nontsavetacotantajiaquerinijite Amajirote taampinanjite intsitacaguetejacovaetanaquempaquea, aisa irishineventajiaquemparinijite oshequini caquinte intsaromentajiaquempari Jesoquirishito inquempesianaquempiquea aviatimpajia pishineventamajajiacariquea piquemacojiaqueriguetei irosatiquea piquemisantajianaqueri. ² Choocatarite oshequini catsimajiaquenaca antaguishetiroca covaeguisherentsi. Irootaquequea noninantajiacaca pamanacoventajiaquenaquea cameetsanijite irompejiaquenanjite Aapani Irioshi aatonijite quericaca agavejajiatsi irovashiantacaajiaquenaro nonquenquetsajiaqueguetei, teetarite intsaromentajiguempariji maasano. ³ Cotanquitsiquea iriraquea Amajirote icocaniquea inetsanamajaqueo icanqueca. Iriatimpa intampishitacajiaquempi, aisa irompejiaquempi aatonijite yagavejajiguimpi ampatsini. ⁴ Nonintajiaquequea arimpaquea pinquempejianaquero imaica pinetsanamajajiaqueroquea maasanopae nocantajiaquempica. Iriquentiquea agavejacaajiaquempine Amajirote. ⁵ Namanacoventajiaquempiquea iragavejacaajiaquempi Amajirote pimpintsatantajiaquempianijite pinquejiaquempariquea iriatimpa ipintsamajatantaguetei, aisa intampishitacajiaquempiquea pantsipetacojiaquempianijite pinquempejiaquempariquea Quirishito yatsipetacotaguetei.

Aatoquea iperajiga tsaromentajigacarica Quirishito

⁶ Imaicaquea, napitsaromentarijiate, noncamantajiaquempiquea oca inintacaaquempica Amajirote Jesoquirishito. Aatoquea piconoajigariquea papitsaromentarijiate peratatsica teeca irininteji irantsipevenquemparo ishecapae, aisa teeca irinintajigueji irinetsanjiaquero notsatacajiaquempica. ⁷ Aviatimpajia pitsajiaquequea queroquea pincojiaquempiani pinchoocajiaqueniji cameetsa, pinquejianaquenaquea naatimpajia coramani nochoocatimojiaquitimpiguetei teequea nomperatimatempaji. ⁸ Teequea

noshecatimotantempaji intati, manaqueate nantajiaquequea savincaguiteri qui aisa pitsecari qui natsipevencaroquea nosheca novegarajiaqueroquea aatonijite natsipetacaa-jiguimpiquea aviatimpajia pojocajiaquenaromequea intati. ⁹ Cameetsavaevecaquea namanajiaquempromequea pojocajiaquenaromequea intati, cotanquitsiquea naatimpajia teequea nonintajigueti. Manaquea nantajiaquequea cameetsanijite pinquejetimentajianaquenaniijite aviatimpajia. ¹⁰ Pamenajiaquenaquea coramaniqui nochoocatumojiaquitimpigueti notsatacajiaquempiquea nocantajiaquempi: "Aatoguete ininti irantsipevenquemparo ishecapae, aato ishecata." ¹¹ Noquenquejacaajiaquempiroquea imaica manatarite noquemacojiaqueriquea iconoajiaquempiquea perajiatistica, teetarite irinintajigueti irantsipevenquemparo isheca, iroguentiquea isavicaventajiaque iquenquetsavijitashijia intati yasereantajiaque. ¹² Imaicaquea nontantajiaqueriquea irirajia perajiatistica aatotarite iquejiajiaquea imaica, manaquea irantajiaquequea cameetsanijite inchoocatacojiaquenijite taaca opajitapae icoguitejacojiacaca, iriguentiquea nintacaajiacajiro Amajirote Jesoquirishito.

¹³ Napitsarovenarijiate, aatoquea piperajigaro pantajiaqueroqueti cameetsaguetanquitsica. ¹⁴ Inchoocajiaquemetiquea caarica nintanquitsi irinetsanataqueroquea notioncajiaquempica imaica paperiqui, aatoquea piconoajiajariquea cameetsanijite impashiventajianaquempanijite. ¹⁵ Cotanquitsiquea aatoquea picatsimajiguiritsijate, cameetsaquea pincantajiaqueriquea pincantomajiaqueroqueti, ariqueate pinquejetacaajiaquempiqueate pitsatacajiaqueroqueti papitsarovenarijiate.

Irovegatanajerogueti incantajianajerigueti

¹⁶ Amajirote inetsanatacaavajajiro ashirequi aatoniji ashoshoguiteta. Imaica namanacoventajiaquempiquea incantacoguitempani irinetsanatacaavaquempiro pishirequi aatonijite taa opaji pishoshoguitementajiatisti, aisa intsipatsipaitaquempiquea querocagueti pinchoocajiaqueni.

¹⁷ Imaicaquea naatimpa Paavoro inchiquiojitaquea nontioncavaquempiro oca acaniqui paperiqui cameetsanijite pintajiaquenijite naroguentiquea tigarancaantajiaquempiro. Irooquea nametaca noquejequero notioncacaanqueroqueti paperiqui. ¹⁸ Imaicaquea noninque incavintsajiaquempiquea Amajirote Jesoquirishito aviatimpajia maasano.

IPARIACANARIGUETI PAAVORO ITIONCAQUENERI TIMOTEO

Antsatantaquemparoca

Ocatica iroguenti antsatantaquemparoca paperi iroquetica itioncacaantaqueca Paa-
voro itioncaquenerigueti Timoteo. Irocashi itioncacotaqueri irira Paavoro otsipaque
paperiqui (Ya. 7.57–8.1; 9.1-31; 13.1–28.31), aisa itioncacotaqueri Timoteo paperiqui Yan-
tajiguica 16.1-3; 17.13-16; 18.5; 19.22; 20.4. Tequeratagueti intionqueroji Paavoro ocatica
paperi itioncacaanquero otsipapae 10 paperipae choocajanquitsica paperiqui icantajit-
ica *Tsaretacoquerica Jesoquirishito*. Iroaqueragueti iteroncaquerogueti Paavoro ocatica
paperi itioncacaantaqueneri Tito, coajica itioncacaantaquero mavitetapojatsica paperi
itioncacaantaquenerica Timoteo. Itioncacaantaquero ocatica paperi ajagantsiniqui 63,
ichoocaquegueti quepatsiqui icantajitica Maseronia.

Itioncacaantaqueneri Timoteo acaniqui intampishishirentacaaqueriniji (1.18-19; 4.1-
16; 6.11-21), aisa cameetsaniji incantaqueri Timoteo incamantajiaqueri Epesoquitica
aato itsatacaantajiajiro caarica iroomajatatsica (1.3-11; 6.3-10), aisa intsatacaajiaqueri
quero incojiaquempani jivajiguirica quemisantajiaatsica aisa amijiguirica (3.1-16; 5.1-
6.2), aisa intsatacaajiaqueri quero incojiaquempani intsaromentajiaquempani Aapani
Irioshi (2.1-15).

¹ Naroguenti Paavoro itigarancane Jesoquirishito, iriguentiquea tigarancaquena Aa-
pani Irioshi Shetacojiacajica, aisa iriguentiquea tigarancaquenaquea Jesoquirishito agui-
javiavajeca aventajiaquempani, irooquea oguishinejajajajica. ² Imaica nontioncaque-
mpi, irijani Timoteo. Nirijanintamajataquempani, naroguentitari tsaromentacaaquempani.
Noninquequea incavintsajamajataquempani Aapani Irioshi aisa Amajirote Quirishito Je-
soshi, noninque impintsatacomajataquempani, inchoocatacaaquempin cameetsa aatonijite
pishoshoguitetajatsi.

Inchiquiojitaja yamatavijajiguimpitsija amataajiatsica

³⁻⁴ Coramaniquea noanaquegueti Maseroniaqui nocantanaquempiquea picocani pin-
choocaque Epesoqui. Imaicaquea noncantsitajempiquea aisa pincoquempanija pin-
choocaque oraniqui, choocatarite tsatacaantajiguirica otsipapae teeca irooquea Quen-
quetsatsarentsimajaca, manatarite isavicaventajiaqueroquea iquenquejajiguica pae-
satinipaequitica, yapatsajavantacojiacqueroquea ipajiguetaqueti choviquijianaquerica
ariquea itsavetacojiacqueroquea. Manatarite isavicaventajiaqueroquea intati. ¿Quero-
campaquea incojiaqueroquea? Irotaquetarite oquenancacaca icatsimatavacaantan-
tajiaca. Teetarite irooquea inintagueticica Aapani Irioshi. Iroguenti inintagueticicaquea
iriatimpa manaqueate antsaromentamajataquempaniquea Jesoquirishito, aisa ancoma-
jamajajiaquempaniquea. Imaicaquea, aviatimpa Timoteo, pincantajiaquerija irovashi-
antajianaqueroquea oratica itsatacaantaguishejiaqueca. ⁵ Nonintaquetari pincomaja-
majajianaquempaniquea aatonijite ochocatiquea taaca oguipashiventajiaquempaniquea.
Aisa pintsaromentamajajiaquempaniquea Aapani Irioshi cameetsanijite pagavejajiaque-
nijite pimpintsatavacaamajajianajempanijite. ⁶ Choocajiaquea iconoagaranca manaque-
ate icantashitajiaicaroquea itsatacaantajiguica. Teequea ariquea inquempajajiquea
aatimpajia atsatacaantajiguirigueti. Iroguentiquea iquenquetsatashijiaquea intati.
⁷ Inintajiavecaquea intsatacaantajiaqueroquea igantacaantane Aapani Irioshi ition-
cacotanaqueca Moishishini quempeca arimajaca itsamajaquero, cotanquitsiquea tee-
quea intsatimajigueroji taaca ocantacoque manaquea iquenquetsatashicaro intati.

⁸ Aatimpajia atsajiaquequea maasano igantacaantane Aapani Irioshi iroguenti caav-
ijica oganejencavaeca, cotanquitsi mana inintajiti intsajite queri icantacaqueca aa-
toniji icomijitaro. ⁹ Atsamajajiaqueroquea teequea iriojia incantacajajuejeji comaja-
majajianquitsica, iriguentiquea icantacaqueca teeca inquempantajiguejeji iriguentijia

aisa pigatsatantajiatsica. Aisa iriguentiquea icantacaaqueca caarica tsaroacagari Aapani Irioshi, iriguentijia aisa covaeguishevaetaroca coguisherentsipae, iriguentijia aisa teeca intsaromentajiguempariji Aapani Irioshi, iriguentijia aisa metojajiguirica iriri aisa iriniro, iriguentijia aisa maasano metojantajiatsica. ¹⁰ Aisa iriguentiquea icantacaaqueca oashijiguiroca manquigarentsi, aisa manquigarentsijia oashijiguirica shirampari. Iriguentiquea icantacaaqueca cantatsajiguirica irapishirampariteni iquempeta-caacari manquigarentsi, iriguentijia aisa aguírca caquinte irojocantajiaqueri, iriguentijia aisa tsojeajiatsica, iriguentijia aisa cantashijiatsica: “Yamenaquenaqueate Aapani Irioshi tee nontsojeguempaji”, cotanquitsiquea itsojeajiacaquea. Aisa iriguentijia icantacaaque maasano peacagaroca taaca opajitapae ocantimentantaqueca Quenquetsarentsimajaca ¹¹ tsavetacoquerica Aapani Irioshi quero icocani imeshiantigueti. Iroguentiquea caaviji oshinetacaanta. Irooquea itigaranquimenquenaquea Aapani Irioshi nontsavetantaguiteroni. Iriatimpa iriguentica caavijica yoganejencavaeca.

Paavoro ishinevencariquea Aapani Irioshi yamenaqueriquea iriguenti caaviji ipintsatacovae-cari

¹² Noshineventacariquea agavejacaquenaca, iriraquea Quirishito Jesoshi, Amajirote, nocanqueriquea: “Arioteesa”, yamenaquenatari nocoguitani noguijamajatanaqueri, inintacaantaquenaca nantavaetaqueneri. ¹³ Coramaniquea caaviji nocantaguishtacovecari, aisa nocatsimamajaviavecariquea tsaromentajigarica natsipetacaajiacari, cotanquitsiquea ipintsatacovaequenaquea Aapani Irioshi, yamenaquenaquea noquejeta-querogueti imaica teequea nontsateji, teetarite nontsaromentavetempariji Quirishito. ¹⁴ Cotanquitsiquea coajicaquea icavintsajamajataquenaquea Amajirote itsaromentacaaquena, aisa yagavejacaquenaquea nompintsatantamajaquempari nonquempeji-aquempari maasano tsaromentajigarica Quirishito Jesoshi.

¹⁵ Ocaticaquea ocatica noncanquempica imaica iroguentiquea arimajaca, cameetsaquea paamajajavaqueroja: iroguentiquea icoraquetashitaquiti Quirishito Jesoshi irimeshijiaqueri covaeguishtatsica. Ariquea iquempetacaquenaquea naatimpa nanaavecaquea nocovaeguishtemajavetaca. ¹⁶ Cotanquitsiquea yamenaquenagueti Aapani Irioshi noquejetaquerogueti imaica, ipintsatacovaequenaquea cameetsanijite iramenajitaquenaniijite icocaniquea yatsipetacomajaquenaquea Jesoquirishito teequea incatsimatimatenaji. Iroompa iramenajiaquerogueti oshequini caquinteji incantajiaque: “Iroosacana impintsatacojiaquenashiatsi naatimpajia aisa.” Iroompaquea intsaromentajianaquempariqueti Jesoquirishito incoguitempaniquea inchoocaguiteni. ¹⁷ Jaamejate ancoquempaniquea ashineventajiaquempari Aapani Irioshi, ancantajiaqueri: “Caaviji poganejencamajata.” Iriotaquetari Majirontamajatatsica irimajirontaguitempanti, icocaniquea ichoocati, teequea inconijateji, aparoquea icocani iriatimpa Irioshimajaque. Ari oncoquempa.

Itsatacaamajaqueri Timoteo

¹⁸ Irijani Timoteo, ocatica nocamanquempica oquejetaqueroquea itsatacotsitaquempica tsavetantajiatsica coramaniqui. Nocanquempiquea cameetsanijite poguij-atacotaquerogueti pinquejetaquempari coareta yashimirintagueti itampishiventaquero icanquerica imajironcaca. ¹⁹ Pincoquempaniquea paventamajatanaquempari Amajirote, pintsaromentamajatanaquempari, pincomajamajaquempaquea aatoniji ochoocati chagashirentapajaquempineca. Iconoagarantajiacaquea itsavecaroquea covaeguishevaeca taaca opajitapae, cotanquitsiquea arimpaquea ipanacaro, iroompa yovashiantajianaqueroquea itsaromentajiavecarigueti ipomatsatantajiacaroca. ²⁰ Ariquea iquejianaqueroquea Imeneo aisa Arijantero. Irootaquequea nocantantacaca cameetsaquea irantsipeta-caaguitemparini Satanashi* intsajiaquenijite aatoquea icantaguishtacotiritsi Aapani Irioshi.

* 1:20 Pamenero 1 Co. 5.5, 13. Icanqueri aatonijite itsipajajari tsaromentajigarica icapiocajiaqueti cameetsanijite irantsipetacaaguitempariniquea Satanashi.

2

Quero incoqueroni iramanajiterigueti Aapani Irioshi

¹ Iroquetiquea noninquequea noncantaquempiquea pamanacoventajiaqueri maasano caquinteja pincantajiaqueri Aapani Irioshi impintsatacojiaquempari, aisa pincantacoventajiaqueri: “Arioteesa.” ² Pamanacoventajiaqueriquea majirontajiatsica aisa iguejemajirojiate, jivajiatsica, maasano, anchoocajiaquenijite cameetsa aatonijite ochoocati taaca ashoshoventajiaquempaca, manaqueate asavicaventamajaqueroquea maasanopae inintaguetica Aapani Irioshi, ancomajamajiaquempa. ³ Cameetsavaequequea anquempejiaqueroqueti imaica amanajiaqueriquea Aapani Irioshi Meshiantanquitsica, irootaquequea ishineventaca iriatimpa, ⁴ irooriji ininque irimeshijiaqueriquea maasano, aisa ininque intsamajiaqueroquea Quenquetsatsarentsimajaca. ⁵ Chooaqueate aparo Irioshimajaca. Aisa chooca aparo cantacoventajiguirica caquinte aatonijite icatsimajiguiritsi Aapani Irioshi, iriotaquequea Jesoquirishito caquintetatsica. ⁶ Iriatimpa ipanacaroquea inchiquiojitaquea imetojaventajiaqueri maasano aatonijite yashintajajari ampatsini, iriguentiquea ashintajajempari Aapani Irioshi. Iroompaquea aapojacaguetei savincaguiteri inintantacaca Aapani Irioshi intsajitaqueronijite teeca intsajivetemparoji, itigarancajiaqueriquea itigarancaneja intsatacaajiaqueriquea maasano. ⁷ Jeroquea ipeacaanquenaca itigarancane camantantanquitsineca, icanquenaquea nontsatacaajiaqueri maasano teeca irijorijoigueti queroquea icotani Aapani Irioshi imeshiantiguetei. Arimajaca nocanqueca, teequea nontsojeguempaji.

⁸ Imaicaquea noninque querocaguetei ichooajiaqueni shiramparijia iramanajiaqueriquea Aapani Irioshi, irancojempeventanaqueri, cotanquitsiquea incomajatimenquempari, aatoquea icatsimashirenti, pinquenquetsatavacaquempaguetei aatoquea pipigapigatavacaaca. ⁹ Aisa noninquequea manquigarentsijia netsanaqueate onquitsajiaquempa, aatoquea onintajigui osemejiaquequeate. Aisa aatoquea iroguentiquea osavicaventajiaquequea ampitapitaaqueroquea omae. Aisa aatoquea caavijiquea os hineventajiaquemparoquea nenquetsiqui, ooro, quitsarentsipae aisa taaca opajitapae vegaramajatatsica. ¹⁰ Iroguentiquea osavicaventajiaque oncavintsajantajiaquequea. Irootarite ininque Aapani Irioshi onquempejiaquempaquea imaica manquigarentsijia cantajiatsica otsarotentajiacari. ¹¹ Oraquea manquigarentsijia onquemisantamajiaquequea itsatacajaiqueroca ontaniqui tsovironaqui qui icapioicapinijitaguetei, omativicaquempa. ¹² Teequea noshineteroji ontsatacaantajiaquequea iroatimpajia icapioicapinijitaguetei. Aisa teequea oncameetsateji anaimananaqueriquea shirampari, manaquea omativicaquempa. ¹³ Iriquetitarite ipeacaacaqueate Aapani Irioshi Araini, iroompaquea iquejetacaitaroqueate Evani. ¹⁴ Teequea irio Araini iramatavije ampatsini. Iroguentiquea icoraquetashitaque Evani yamatavijitsitaroquea ocovaeguishetantacaca. ¹⁵ Irooquea icantantacaroca Aapani Irioshi antsipevaequempa irijanintaquempaguetei, cotanquitsi incavintsajacoqueroquea maasano manquigarentsijia ariguetei oncoquempani avenquempari, aisa ompintsatacotanquempa aisa onquenquejamajiaquero quero oncoquempani oncomajamajiaquempaguetei.

3

Quero incojiaquempani quempoguijajiguirica tsarotentajiacarica Aapani Irioshi

¹ Arimajaquea noncantajiaquempica: choocaguetei nintanquitsineca impeaquempaquea quempoguijajiguirica tsarotentajiacarica Aapani Irioshi, cameetsavaeque. ² Cotanquitsiquea irira quempoguijajiguirica tsarotentajiacarica incoquempanijate incomajamajiaquempajate aatonijite ochoocatitsi taampate incantimentajiquerica, manaquea iramenajitaqueriquea icomajamajaca, aisa irimanquigatimataquempaquea aparo manquigarentsi. Aatojate ishinquitatsi, intsamajaque inquenquejamajaque, irinetsanamajiaquempa, cameetsa irajiavaqueriquea iroguisavisaviitavaqueriquea arejetimojiacarica, intsamajaque intsatacaantaque. ³ Aatoquea ishinquiguitani, aatoquea yaashitantatsi, manaquea incavintsajantaquequea, iroguishinejantanaje, aisa aatoquea

ishineventaritsi imentaquipae incaraquisequivaequeri. ⁴ Intsamajaquequea irinetsanajiaqueriquea choocatimojiaquerica, aisa intsatacaajiaqueriquea irijanijiate inquemisan-tamajiaqueriquea aatoquea ipigatsataritsi. ⁵ Quericaca teeca intsateji irinetsanaqueri choocatimojiaquerica, ¿arimpate iragavejaque irinetsanajiaqueri maasano tsaroven-tajiatsica inquempoguijajiaquerigueti? Aatotarite yagavejitsi. ⁶ Iriraquea iriaquer-aca tsaromentatsica teequeate oncameetsateji impeaquempaqua quempoguijajiguir-ica tsaromentajiatsica, isemetitsi, iquempetaritsi ampatsini isemetaquegueti jero icat-simatantacarica Aapani Irioshi. ⁷ Iriraquea quempoguijajiguirica tsaromentajiatsica iintsijate incomajamajatacama cameetsanijite iramenajiaquerinijite teeca intsaroven-tajiguempariji Aapani Irioshi manaquea icomajamajatacama. Oraquea aatogueti icoma-jamajata, iroguenti incantaguishetacojiaqueri maasano, iroompaquea iragavejaqueri ampatsini manaquea incovaeguisheretacaamajataquempari.

Quero incojiaquempani amitacopinijiguirica tsaromentajiatsica

⁸ Ariqueate inquejejaquempaqua amitacopinijiguirica irapitsaromentarijiate, in-coquempanijate incomajamajiaquempaqua, aisa irinetsanamajiaqueroquea ican-queca. Aatoquea ishinquiguitani, aisa aatoquea yamatavijiguiritsi igonorojia iraitsijia-queriquea imentaquitsitepae intati. ⁹ Manaqueate incomajamajaquempajate intsaque-niji tee anejeroci yantaqueca, aisa intsatacaantamajaqueroja iroaqueraro yonigaimo-jiacajica Aapani Irioshi teeca intsajivetemparoji coramani. ¹⁰ Iroquetitaquea irame-namajitaqueri arimajacaca icomajamajaca, iroompaquea iramenajiaquerigueti itam-paticamajataqueroquea ipeacaaguecaca maasanopae, irooquea iintsijate impeaquem-paqueate amitacopinijiguirica irapitsaromentarijiate. ¹¹ Ariqueate onquempejaque-mpaquea manquigarentsijia oncomajamajiaquempaqua, aisa onetsanamajiaquero ocanqueca, aatoquea ocantashijia intati, aatojate oshinquitatsi, aisa ontampishi-tashijiaqueroquea maasanopae covaeguisherentsipae. ¹² Iriraquea amitacopinijiguir-ica irapitsaromentarijiate irimanquigatimataquempaqua aparò manquigarentsi, aisa intsaque irinetsanamajiaqueriquea irijanijiate aisa maasano choocatimojiaquerica. ¹³ Intampaticamajataqueroqueti yamitantaquegueti, irishineventamajianaquempari irapitsaromentarijiate, aisa iragavejaque intsavetacomajaqueriquea Quirishito Jesoshi, aatoquea itsaroimatitsi, yaventamajatacaritarite.

Iroaqueraca yonigaimojiacajica Aapani Irioshi

¹⁴ Noninque taampina noanaque namenajiatempi, cotanquitsi notioncantaquem-piroca ocatica ¹⁵ cameetsaniji aatogueti nagavejitsi noguitsi taampina, pintsaqueniji quero ancojiaquempani ancomajamajiaquempagueti maasano aatimpajia choocatimo-jiaquerica Aapani Irioshi itsovironaquitequi, maasanotari aatimpajia yashintajiacaca Aa-pani Irioshi anijatsica, apeanaja quejetaca ova titaqueroca iroomajatacama, aroguenti ompetanacaroca. ¹⁶ Arimajaca caaviji anaquequea oganejencamajatacama maasanopae teeca intsajivetemparoji iroaqueraca yonigaimojiacajica Aapani Irioshi. Irootaquequea ocatica:

Yonigaampojaca Quirishito icaquintepojaquegueti.

Ishire Aapani Irioshi yagavejacaqueriquea intsajiquerinijite iriguenti Irijanite,

aisa irashivantijitete yamenajiaqueriquea.

Itsavetantimojitaqueri caquinteguetatsica,

itsaromentajanacariquea quepatsiquitica.

Yatsomajanaja jenoqui, yaajitavajiri inquitequi.

¹ Imaica noninque noncamanquempi iriraquea Ishire Aapani Irioshi icanque oncora-manitapojaquegueti arejetapojaquempagueti savincaguiteri inchoocagarantajianaque-quea irovashiantajianajero itsaromentajivacarigueti. Iriguenti iroguijatacojianaque-quea amatavijajiaquerica, aisa iroguenti inquemisantajianaquequea itsatacaantica ampatsinipae. ² Iriguenti inquemisantamajajiaquequea cameetsatamampeajisica caav-ijica yamataamajaca, yamemajatanajarotari igovaeguisher aatotari ochagashirenta-jiri. ³ Irirajia quejejiaqueroca imaica icantimentantajiaqueroquea irimanquigajitem-parogueti manquigarentsijia, aisa manquigarentsijia omanquigajiaquemparigueti shi-rampari. Aisa icantimentantajiaqueroquea irishecajitaquemparogueti taaca opajitapae teeca incantimentantavetemparoji Aapani Irioshi, ipeacaaguetacarotari irishecajitaque-mpaca cameetsaniji ashecajiaquemparoniji aatimpajia tsaromentajisica tsamajajigu-iroca iroomajatatsica, ancantajiaqueri: "Arioteesa." ⁴ Maasanopae ipeacaaguecaca Aa-pani Irioshi iroguenti cameetsavaeque. Aatoquea icantimentantajitirotsi ashecajiaque-mparogueti arigueti ancantajiaqueri: "Arioteesa." ⁵ Irootarite cameetsatacaguerone Iguenquetsatsare Aapani Irioshi aisa amanacoventaquerogeti.

Quero incoquempani Timoteo irisavicavenquerogeti inintagueticas Jesoquirishito

⁶ Pintsatacaajiaquerigueti papitsaromentarijiate maasanopae ocaticapae, iramenaque-mpiquea Jesoquirishito pinetsanamajiaqueroquea ininqueca iriatimpa. Arimpaquea pintsamajatanaqueroquea Quenquetsatsarentsimajaca piquemisanqueca. ⁷ Aatoquea piquemisantajiguero itsavetashijiacaca caquinte, irooca otsavetashijiavetacaca quenquevarovaejianquitsica. Iroguenti pisavicaventajiaquequea inintagueticas Aapani Irioshi. ⁸ Oraqueate anintajiguigueti antampishijiaquequea atsinoqui cameetsaveca, cotanquitsiquea caaviji anaaque ocameetsavaeque anquenquejamajaqueri Aapani Irioshi asavicaventajiaqueroquea inintagueticas iriatimpa anchoocajiaquenijite cameetsa ocantiqui quepatsiqui aisa ontaniqui jenoqui. ⁹ Iroomajacaquea ocatica nocanquempica imaica, cameetsavaeque inquemisantamajajiquero. ¹⁰ Aatimpajia aventaventaicari Aapani Irioshi anijatsica. Irootaquequea asavicaventantajiacaroca maasanopae inintagueticas, aisa atsipetacovaejiaca taaca opajitapae. Iriatimpa inintavecaquea irimeshijiaquerimequea maasano caquinteguetsatsica, cotanquitsiquea iriguenti imeshijiaquequea aventaventaicarica irimeshijiaqueriniji.

¹¹ Pincantajiaqueriquea maasano tsaromentajigarica irinetsanatavaquero ocatica notioncaquempica, pintsatacaamajiaqueriquea. ¹² Pintsavetantimojiaquerigueti Iguen-quetsatsare Aapani Irioshi inchiquiojitaja pipeacagatsi covaeguisherentsi, manaquea pincomajamajaquempa cameetsaniji iramenajiaquempinijite papitsaromentarijiate ariqueate inquempeljianaquempaquea iriatimpajia. Pimpintsatacojiaquempari pigonoro, pintsaromentamajataquempariquea Aapani Irioshi, pincoquempaja pincomajamajajiaquempajate. Pinquempetaqueroquea imaica inquemisanta-majajiaquempinijite aatonijite icantajigui: "Arisa icota quenquetsatanquitsica iriaqueraca quenquevaritananquitsica, aatoqueate iquemisantiriti." ¹³ Oraqueate aatogueti nocoraquetsatsi, pisavicaventamajiaquerojate pampatsajavanqueroja Iguenquetsatsare Aapani Irioshi picapiocapinijiacagueti pintsavetantaqueroquea, aisa pintsatacaantamajataqueroja. ¹⁴ Pinquenquejeja coramani ipamijiaquempiquea pishinquireguishiqui quempoguijajiguirica tsaromentajiacarica iquenquetsashirenta-caajiaquerigueti Aapani Irioshi icantantajiaquempica pisavicaventamajiaquero pintsavetantaguiteni, aisa pintsatacaantajiaquequea, iroompaquea ariquea yagavejacaquempiquea Aapani Irioshi. Irooquea imaica pisavicaventamajaque, inchiquiojitaja povashiantanajirotsijate.

¹⁵ Noncantsijajempiquea aisa pisavicaventamajataquerojate iramenajiaquempini-jite maasano picancani pitsatanaquequea. ¹⁶ Pincomajamajaquempajate, cameetsaquea pintsatacaantaguiteni, pintampaticamajatero. Pincoquempanija pisavicaventamaja-queroquea. Pinquempetanaquerogeti imaica incoquempani incavintsajamajaquempi Aapani Irioshi. Ariquea inquempeljiaquempariquea quemisantajiaquempineca.

5

Quero incoquempani Timoteo intsatacaajiaquerigueti tsaromentajatsica

¹ Aatojate picantomajiritsijate quenquevarivaetatsica, cameetsaja pintsatacaaque-riquee pinquempetacaaquempariquee irioca piri. Iriraquee iriaqueraca quenquevar-ijiananquitsica pinquempetacaaajiaquemparija irioca piguentijeguitepae. ² Oraqueate quenquevarovaetatsica pinquempetacaaajiaquemparoquee irooca irijanintajiguimpica. Irooquee iroaqueraca quenquevarojiananquitsica pinquempetacaaajiaquemparoja pitsi-joitepae, pincomajaquenquejanequempaja.

³ Pimpintsamajiaquemparoja metojacorojia teeca inchoocateji ojitane. Iroatimpajia caaviji ocoguitejacovaejiaca. ⁴ Cotanquitsiquea choocagueti irijanijiate, orijanijiate, iri-oca oshaijiate, oshaojiate, intsajiaquequee impintsatacojiaquemparoquee irojocajiaque-nerojate ocoguitejacojiacaca, iroorijite coramani iriri, iriniro, ityaine, ityaone yojocaji-aqueneriquea iriatimpajia. Inquempejiaquerogueti imaica irishinevaetanaquempaquea Aapani Irioshi, irootaquequee ininqueca iriatimpa. ⁵ Oraquee metojacoromajaca cogu-itejacomajatanquitsica choocatajatsica apaniro, teeca inchoocateji ojitane, manaquea oguijaguitiniquea incavintsajaqueronijite Aapani Irioshi, ocoguitani osavicaventagui-tirini amanaguitirini savincaguiteriqui aisa pitsecariqui. ⁶ Cotanquitsiquea oraquee metojacoro savicaventiroca taaca opajita oninqueca iroatimpa, manaquea quem-petacaqueate metojaque, teetarite ontsaterinica Aapani Irioshi. ⁷ Pincamanterijate tsaromentajatsica irinetsanatavaquero maasanopae ocatita aatonijite icantimanajitir-itsi. ⁸ Iriraquee teeca incavintsajacojigueriji ijitanepae, teeca irojocajiaqueneriquea ico-guitejacojiacaca ijitanemajaca, manaquea yovashiantaquero itsaromentavecagueti, caav-iji yogaamajataquero yantaguishequeca teeca intsaromentimatempariji Aapani Irioshi.

⁹ Oraqueate pitioncacojiguirogueti metojacorojia, iroguentiquea pitioncacojiaque-quee quenquevaromajatananquitsica apanirontamajatirica manquigataroca tequer-atagueti irimetojeji, teeca omanquigatajempaji itsipa. Oraquee tequerataca ajagantsi-tacoteji 60 ajagantsite aatoja pitioncacotirotsijate. ¹⁰ Aisa iroguenti pitioncacoji-aquequee iquemacojitaqueca caaviji opintsamajatantajia: irooca oquenquevarijiajiri irijanijiate onetsanajajiri, aisa netsana aajiavaqueri apitsaromentarijiate coraquejian-quitsica, irooca aisa amijiaqueringuea itsipapae tsaromentajatsica, irooca aisa ocav-intsajacovaequeri atsipevaetanquitsica, irooca aisa taaca opajitapae cameetsaripae. ¹¹ Cotanquitsiquea aatoja pitioncacojiguirotsijate metojacorojia tequerataca onquen-quevaromajateji, iroorijite iroaqueragueti oncantajavequempari Quirishito: “Nonco-guitempani nosavicaventaguitempini”, cotanquitsiqueate iroompaquee manaquea on-intajianaque omanquigajiajempaquea ariqueate ompeacojianajemparoquee ocantaji-avecaca. ¹² Inchiquiojitsitaqueate onquejetacaantajiaquempaquea iroatimpajia, aato-tarite onetsanajiguirotsi ocantajavecaca. ¹³ Aisa omperamajajianaquempa iroguenti osavicaventajianaquequee onejantajianaquequee. Aatoquee aparo operajigatsi, aisa aajianaqueroquee tsojetsipae, oncantaguequequee veaa veaa, asereseretantaguetaque, onquenquetsaguishetanaque. ¹⁴ Irootaquequee nonintantacaca omanquigajiajempaja metojacorojia tequeramajaca onquenquevaromajateji, irijanintajiaquempaquea osavi-caventajiaqueronijite otsovironaquite onetsanajiaqueroquee aatonijite taaca opaji om-pampiatantaquempaca incantaguishtacojiaqueroquee teeca intsaromentajiguempariji Quirishito. ¹⁵ Choocatarite oconoagarantajia metojacorojia opeacojianajaroquee ot-saromentajavecarigueti, iriguenti opitsocashitanaja Satanashi oquemisantajianajiri.

¹⁶ Iriraquee tsaromentajatsica choocagueti ijitane metojacotanquitsica omanquigare, iintsija impintsatacotajemparoja iriatimpajia irojocajiajenerojate ocoguitejacojiacaca. Aatoquee icantitsi incavintsajerojate itsipa irapitsaromentarite itsipatsipaitacaca icapi-ocapinijigagueti, irioquee cavintsajerone, iragavejaqueniji itsipajia tsaromentajatsica incavintsajacojiaquero metojacoromajaca teeca onchoocateji ojitane.

¹⁷ Iriraquee quempoguijamajajiguirica tsaromentajatsica cameetsavaeque irishin-eventamajajitaquempari, aisa inquemisantamajajitaquerijate. Iriraquee savicaventa-jiaquerooca itsavetantajiaquero Iguenquetsatsare Aapani Irioshi itsatacaantajiaquero-quee, iriomajaca irishineventamajajiquempa. ¹⁸ Ocanquetari Itioncacaantaqueca Aa-pani Irioshi: “Aatoquee pisavotsovotiritsija caapironcaari pisagorejacaantaquempar-

igueti tirigoqui, cameetsataque irishecagarantavaquemparo.” Aisa otsipa otioncacoca ocanque: “Irraquea catsiquetatsica irovegaraajitaqueriquea.”

¹⁹ Choocagueti cantanquitsica ipeacaaca covaeguisherentsi quempoguijajiguirica tsarotentajatsica, aatogueti ichoocajiguitsi mavite irooca 3 amenamajatanquitsica, aatoquea piquemisantiritsi. ²⁰ Cotanquitsiquea choocagueti quempoguijajiguirica tsarotentajatsica, aatogueti yovashiantirotsi icovaeguishecagueti, pincantomajaque-riqueate picapiocapiniyacagueti cameetsanijite intsaraoajianaquenijite igonorojia aatonijite iquempejigaritsi iriatimpajia.

²¹ Ariqueate yamenajiacaji Aapani Irioshi, jeri aisa Amajirote Jesoquirishito, aisa irashivantijitete icoguiajiaqueca, irootaquequea noncantantajiaquempica imaica pintangamicamajaterojate maasanopae ocatica nocantaguetaquempica. Pintsatacaanteguete aisa pincantomajanteguete pinquejetacaajiaquempari maasano.

²² Aatoja paguiritsija taampina itsipa pimpeacaajiaquempariquea quempoguijaque-rineca tsarotentajatsica aatogueti iroquetita pamenamajajigui aatonijite piquejeta- caantatsi aatoguete icomajamajata. Aviatimpa arimpaqueate pincomajamajatanaquem- paquea.

²³ Pojoquijjoquijitaguete ocatsitimpiguete pimetijaqui, aatoquea aparo pitsatitsi pimiraroquea oja, pimiraguetafavajemparoqueate capichajaji vinoja.

²⁴ Choocajia iconoagarantajiaquea itsajiquero taampina ipeacaajiacaroguete cov- aeguisherentsipae ariquea icantomajajitaqueriquea, cotanquitsiquea iconoagarantaji- aca itsipapae oncoramanitapojajeguete intsajiqueroquea incatsimajiaqueriquea Aapani Irioshi maasano peacaaguishetacaroca covaeguisherentsi. ²⁵ Ariqueate iquempejiaca peacaajianquitsica cameetsaripae iconoagarantajiaquea itsajitaquero taaca opaji ipea- caajiacaca. Itsipapae teequea intsajiteroji, cotanquitsiquea oncoramanitapojajeguete intsajitaqueroqueate.

6

¹ Irraquea yashintajitacaca tsarotentatsica inquemisantamajataqueri ashincarica aatojate ipigapigatsataritsijate aatonijite icantaguishetacojitiritsi Aapani Irioshi, aisa aatonijite icovaeguishtacojitirotsi atsatacaantajiaqueca. ² Oraqueate iriguentiguete ashinquemparine tsarotentatsica aatoquea icantitsi: “Teequea nontsaroacaguempari- iji, iriguentiquea napitsaromentarite.” Caaviji iranaaque irantimomajiaqueriquea, ya- menaqueriquea iriguenti icatsiquetimoquequea irapitsaromentarite ipintsamajatacaca. Imaica, irijani, noninque pintsatacaanqueroquea ocatica, pincantajiaqueriquea papit- saroventarijiate irinetsanamajajivaquero.

Quero caaviji anaavaeque maasanopae

³ Oraqueate atsatacaantajiaqueca aatimpajia iroguenti Quenquetsatsarentsimajaca, atsatacaantaquequea icanqueca Amajirote Jesoquirishito, atsarotentamajatacariquea Aapani Irioshi. Cotanquitsiquea choocajiatarite teeca irinintajigueji inquemisantamaja- jgueriji, iroguenti itsatacaantajiaquequea teeca irooquea Quenquetsatsarentsimajaca. ⁴ Iriguenti caavijica yaventacovaeca. Teequea intsatimateji. Iroguenti ishinevenca impigapigajencatantajiaquempa, irootaquequea opampiatantapojacaroquea isemacot- sitanta, icatsimatataanti, icantaguishetacotanti, aisa mana iquenquejashitaca: “Ar- ica chooca yantaqueca.” ⁵ Icatsimatavacaapinijiaca irirajia quenquejajiguiroca co- vaeguisherentsi, teetari inquenquejajeroji iroomajatatsica, manaquea icomajamam- peaca intati, ijijavetaca igomajamampeane irantajiaquemparome taaca opajitapae. Pintsiparejitempariquea quejecarica. ⁶ Cotanquitsiquea ancomajatimenquempariquete Aapani Irioshi, aatoguete anintavaque anintavaque, manaquea ashinevaejianaquem- paquea, irooquea caaviji anaavaeque. ⁷ Oraqueate iroaqueraguete avoajiguete tee- quea taaca opaji ashintempaji. Ariquea onquempetaquempaquea ametojajiaqueguete aatoquea taaca opaji aajianajitsi. ⁸ Cotanquitsiquea imaicaquea imaica iroguentiguete choocaventanquitsineca ashecajia aisa aitsaarejia, ashinevaequempaquea. ⁹ Irraquea nintajatsica irajaarantaquempa irantamampeaguishequemparo taaca opajitapae in- carapiotantemparoca irajaararo. Ontiavaetapojempari iguenquejane. Yamenavecaro

cameetsavaeque, oquejetaca imorotashijitirigueti tomirishiquitica, manaquea isanarea-cotanaque yomposapojaca isavi. Ari iquejejiaca caarica quenquejamajatatsi, inintamampeacaro taaca opajitapae, iroompa aapojempagueti irimetojaquegueti impomatsavae-queempa iroaroaitanaque camorecariqui. ¹⁰ Arimajaca irinintamajajiterigueti imentaquipae oshimerancantapojemparo coguisherentsipae. Choocatarite iconoagarantajiaca tsaromentajavetatsica, inintamajaqueri imentaquipae, itsegoantanacaca yovashiantantanacaroca itsaromentavecarigueti, yatsipevaetantajiacaca.

Paavoro icanqueriquea Timoteo aatoquea yovashiantimatirotsi itsaromentacagueti

¹¹ Cotanquitsiquea aviatimpa, yashintamajatacaca Aapani Irioshi, aatojate pishineventimatarotsi maasanopae ocatica ishineventajiacaca iriatimpajia, pishiapitsatapanajanteroja. Iroguentiquea pishineventamajaquempaja pincomajamajaquempajate, pinetsanamajaqueroja inintaguetica Aapani Irioshi, paventamajatanajuemparijate Jesoquirishito, aisa pimpintsatantavaequempaquee, pantsipetacovaequempaquee, aatoja pipigatantatsijate. ¹² Pinquejetemparija ashimirintatsica, pintampishiventenerija Amajirote. Aatoquea povashiantiritsijate pitsaromentacarigueti arejevaequemparou-quea poanaquegueti piguintenitimotajemparigueti Aapani Irioshi pincoguitempani pinchocaguiteni, irootaquequea icajemanquempica, irootaquequea coramani picamantantacarica maasano capiocajianquitsica: "Notsarovencari Jesoquirishito." ¹³ Ariqueate yamenajiacaji Aapani Irioshi anijacaaguetirica maasanopae, aisa yamenajiacaji Jesoquirishito tsavetacotantanquitsica icoacoquerigueti Pontsio Pirato, itampaticamajaquero, teequea incantashitempaji. ¹⁴ Irootaquequea noncantantajiaquempica imaica pintampaticamajaterojate nocanquempica, aatoja picantashitatiimatarotsija, aatonijite ochocotitsi taaca opaji incantimenquempica. Ariquea pinquejetanaqueroja imaica pincoguitempani arejetapojempa incoraquetantajatempara Amajirote Jesoquirishito. ¹⁵ Iroompaquee arejetapojajempagueti savincaguiteri incoraquetantajempaca intigarancajeri Aapani Irioshi incoraquetaje ocaniqui quepatsiqui, choocatarite aparo Aapani Irioshi Agavejamajatatsica, iriguenti Irioshimajaca anaajiaquerica maasano majirontajiatatsica anaaguevetatsica, anaajiaqueriquea maasano anaajencavetanquitsica. ¹⁶ Aparomajaca ichoocaque iriatimpa icoguitani ichoocati paesatoniqui tequeratagueti onchoocatomateji, aisa icocani inchoocaguiteni aatoquea imetojimatitsi. Itsirencashimpoquirerejaveaquequea icanca, cantavaeque tsiren, teequea inchoocateji agavejanquitsineca inquempajitaquempari. Teequea inchoocateji caquinte amenimaterineca, aisa aatoquea yagaveji irameneri. Incoquempanijate irishineventamajajitaquemparija incantajiaqueriquea caaviji yanaaque yagavejamajati. Ari oncoquempa.

¹⁷ Pincantajiaqueriquea ajaarantavaetatsica ashintamajaguetaaroca quepatsiquitica, aatoja yaventacotatsija, aisa aatoja ishineventajigarojate yashincaca, onteroncaguetanajempatari oncoramanitapojajegueti. Iriguenti irishineventamajaquempaja Aapani Irioshi pintsatacarica, jocajiacajiroca maasanopae cameetsanijite ashinejiaquempaniji. ¹⁸ Aisa pincantajiaqueriquea incavintsajacotantajiaque, iramitacotantajiaque, irojocagarantajiaqueneri igonoro. ¹⁹ Inquempejiaquerogueti imaica oncoramanitapojajegueti iroaroaitanaquegueti jenoqui, incavintsajamajaqueriquea Aapani Irioshi iramenacaajiaqueriquea maasanopae yoguijacaaquerica, ariquea incoguitempani inchoocajiapojaje, iroguenti anijagantsimajaca.

Iteroncanajirogueti Paavoro itioncaquenerica Timoteo

²⁰ Imaica, Timoteo, pinquenquejamajatavaqueroja Quenquetsatsarentsimajaca itsatacaajitaquempica, pintampaticamajateroja, shoshoh picantashitatarotsijate. Aatojate piquemisantiritsija cantashijiatsica intati. Iriatimpajia icantajiavecata itsamajati, cotanquitsiquea teequea intsatimateji. Oraqueate itsatacaantajiaqueca teetari onquempetemparoji Quenquetsatsarentsimajaca aquemisantajiaqueca aatimpajia. ²¹ Choocajatarite iconoagarantajiacaca iquemisantajiaqueriquea quempejiaqueroja imaica, iroompaquee yovashiantajianajiro Quenquetsatsarentsimajaca iquemisantajiavecata.

Noninquen incavintsajamajajiaquempi Amajirote.

PAAVORO ITIONCAJINIRI TIMOTEO

Antsatantaquemparoca

Ocatica iroguenti antsatantaquemparoca paperi mavitetapojatsica itioncacaantaqueca Paavoro itioncaquenerigueti Timoteo. Irocashi itioncacotaqueri irira Paavoro otsipaqi paperiqui (Ya. 7.57–8.1; 9.1–31; 13.1–28.31), aisa itioncacotaqueri Timoteo paperiqui Yantajiguica 16.1–3; 17.13–16; 18.5; 19.22; 20.4. Ocatica paperi iroguenti teroncapojatsica itioncacaantaqueca Paavoro, choocaquea otsipa 12 paperipae itioncacaantaqueca choocajanquitsica paperiqui icantajitica *Tsavetacoquerica Jesoquirishito*. Itioncacaantaquero ocatica paperi ajagantsiniqui 64, ichoocaquegueti Iromaqi, pajinigueti irimetojaque. Itioncacaanquerogueti iriguenti itsipataja Irocashi, tee irovashianteriji (4.11).

Itioncacaantaquero ocatica paperi itsaquetari irooshipoji imetojajitaqueri, inintaque intampishishirentacaaqueri Timoteo aisa icantaqueri quero incoquempani inchoocaquegueti cameetsa (1.3–14; 2.1–13; 3.14–4.2, 5). Aisa itsatacaqueri aatoja iquemisantiritsi tsatacaantajiguira teeca iroomajateji (1.15–18; 2.14–3.9; 4.3–4). Icamantacotaca quero incojitaquerini (3.10–13; 4.6–8, 14–18). Aisa icanqueri Timoteo iramajeri Maricoshi aisa yashintaguetaacaca Paavoro yoanaqueca ontaniqui (4.9–13, 21).

¹ Naroguenti Paavoro itigarancane Jesoquirishito, iriguentiquea nintacaaquenaro Aapani Irioshi nontsavetantaqueroquea icantacaacajica icanquegueti iranijacaajaji Quirishito Jesoshi. ² Imaica nontioncaquempi, irijani Timoteo nopintsamajatacaca. Namanacoventaquempi incavintsajamajiaquempinijite Aapani Irioshi aisa Amajirote Jesoquirishito, impintsatacotaquempinijite, inchoocatacaajiaquempinijite cameetsa aatonijite taaca opaji pishoshoguiteventajigatsi.

Aatojate itsaroguitsi intsavetantaquerigueti Jesoquirishito

³ Nocoguitani tsiteniriqui aisa savincaguitariqui namanaquerigueti Aapani Irioshi noquenquejapinitaquempi, nocanqueri: “Arioteesa.” Iriguentiquea notsaroventacaca, noquempetacari choviquijianaquenaca, teequea onchoocateji nantaqueca chagashirentaquenaneca. ⁴ Noquenquejajiro pijaquija, nonintantacaca namenajatempiquea imaica cameetsanijite noshinevaequempanijite. ⁵ Aisa noquenquejacoquempi pitsaroventamajatacariquea Aapani Irioshi piquempemajajiacariquea pishaote Iroira aisa piniro Eonise. Notsamajaquequea arimajaca piquempejiacariquea iroatimpajia pitsaroventamajajiacariquea.

⁶ Irootaquequea nonintantacaca nonquenquejacaajempiroja coramani nopamiquempigueti pishinquireguishiqui yagavejacaanquempica Aapani Irioshi pintsavetantavaeque. Imaica noncanquempiquea pintampishiventerojate. ⁷ Teetarite irooqueuea intigarankuimenteriji Aapani Irioshi Ishire antsaroajiaquequea, iroguenti itigarankuimenqueriquea iragavejacaamajacaji, aisa cameetsanijite ampintsamajiaquemparinijite maasano caquinteguetaatsica, aisa antsajiaqueniji anquenquejamajaque anchoocatimenqueniji cameetsa. ⁸ Imaica noncanquempiquea aatoquea pipashiventatsi pintsavetantavaequerigueti Amajirote. Aisa naatimpa aatoquea pipashiventacaanatsi pamenaquenagueti isantanatacotimentajiquenaro notsavetantavaequerigueti. Manaquea pinquejetaquenaja pantsipeventaquemparo Quenquetsatsarentsimajaca Oganejencatatsica, iriotaque tampishitacaajiaquempineca Aapani Irioshi. ⁹ Iriatimpa imeshijiacaji, aisa icajemantacajica asavicaventajiaqueroniji inintagueticata, ancomajamajiaquempa. Teequea irooqueuea incajemacotantaji agameetsareni, inchiquiojitaquea iriatimpa inintacaajiacaji. Icocani icavintsajajiacaji paesatoniqui tequeratagueta onchoocatimateji, icantacoguitani coramani inintaguitini Aapani Irioshi incavintsajajiacaji Quirishito Jesoshi, ¹⁰ cotanquitsiquea imaica yonigaajiacajiro iconijataquegueti Meshiantatsica Quirishito Jesoshi icoraquequitigueta, yanaavaetaquitiroquea metojanentsi,

ariquea itigarancacajiro Quenquetsatsarentsi Oganejencatatsica, irooquee atsatantacaroa anijagantsimajaca, oguiconijatacajiroquee quero ancojiajempani ancoguitempaininiji anijaguiteni. ¹¹ Irooquee inintacaaquenaca Aapani Irioshi nontsavetantavaeque, ipeacaaquenaquee itigarancane aisa tsatacaantantatsica nontsatacaqueriniji teeca irijorijoigueji. ¹² Irootaqueuea natsipevaetantacaca, cotanquitsiquea teequea nom-pashiventacaguemparoji isantanatacotimenquenarogueti nontsavetantavaequerogueti, notsaquetarite queri navencaca. Aisa notsamajaqueuea aatoquee yamatavijanatsi, yagavejamajati inquem-poguijamajataquenaro nojoquitajanarica, arimpaquee incavintsajacomajatanaquea arejevaetapojempa incoraquetajategueti.

¹³ Ariqueate imaica pintsatacaantavaequerogueti pintampaticamajatanaqueeroquee Quenquetsatsarentsimajaca nontsatacaaquempica, aatoquee picantashitatarotsija. Pinquemisantamajatanaqueerija Quirishito Jesoshi, aisa pimpintsamajataquemparijate papsaroventarijiate. ¹⁴ Pintsavetantavaequeroguea Iguenquetsatsare Aapani Irioshi yojocajitaquem-pica, pintampaticamajateroja pincanquero, iriguentiquea agavejacaquem-pine Ishire Aapani Irioshi choocashirentajiacajica.

¹⁵ Pitsaqueuea maasano guintenijiatsica Ashiaqui yovashiantajianajana, iquejejiaca Pijero aisa Eremojene. ¹⁶ Namanacoven-tajiaqueriquea ijitanepae Oneshiporo impintsatacojiaquempari Amajirote. Iriatimpa icavintsajapiniquena ishinetacaajatana, teequea impashiventacaguenaji isantanatacojitaquenagueti. ¹⁷ Quempetaca yarejetapojacagueti ocaniqui Iromaqui icoapojana yamenaguevetapojana, itsitacavaepojajiro, ariquea yamenapojajana. ¹⁸ Namanacovenqueri incavintsajamajaqueeriquea Amajirote incoraquetajategueti oncoramanitapojajegueti. Aviatimpa pitsaquetarite yamitacovaequenaquee nochoocaquitigueti Epesoquiniqui.

2

Pinquempetaquemparija i-goaretate Jesoquirishito

¹ Imaica, irijani, arimpaquee pintampishitashimajatanaqueeroquee maasanopae inintaguetica Aapani Irioshi, iriguenti tampishitacaaquem-pine Quirishito Jesoshi. ² Oraqueate maasanopae piquemaquenaca nontsatacaantavaequegueti icapio-capinijiacagueti tsaroventajiacarica, imaica aviguentiquea tsatacaajiajerineca itsipapae papitsaroventarijiate comajamajianquitsica agavejajianquitsineca intsatacaajiaqueriquea itsipapae. ³ Aisa pinquempetaquenaja naatimpa pantsipetacovaequemparoquea maasanopae, pisavicaventamajaqueerijate maasanopae inintaguetica Amajirote Jesoquirishito, pinquempetaquempariquea coareta isavicaventirogueti maasanopae inintaguetica imajirote. ⁴ Iriraquee coareta teequea inquenquejeroji inintaqueca iriatimpa, iroguentiquea isavicaventavaequeuea taaca opaji icanquerica imajirote cameetsanijite irishinetacaaquemparinijite. ⁵ Ariquee iquempetaca neshintsicatavacagatsica iramenajitaqueriniji queri tampishimajatanquitsica, aatogueti inetsanatavaquero incantajiquerica, taampina iroguisotoitsijiquempari, aatoquee yojocajitiniri amatsaerontsi inintacajaivetacanarica iranaantaquemegueti. ⁶ Ariquee iquempetaca aisa vintyaquitaroca oitsoqui, iriquetiquea aavajatsine. ⁷ Pinquenquejacoterijate ocatita nocanquem-pica. Inchiquiojiquea iragavejacaquem-pi Amajirote pinquemamajataqueronijite maasanopae.

Inquenquejamajaqueerija Jesoquirishito

⁸ Pincoquempanijate pinquenquejamajaqueerija Jesoquirishito ichoviquitanaqueca Taavini, iriotaqueuea pochatanajatsica imetojavetacagueti. Irootaqueuea Quenquetsatsarentsi Oganejencatatsica nontsavetantaqueca. ⁹ Ariqueate natsipeventavaecaroquee, icavorejatsatacojiquena, iquempetacaavaequenaquee metojantatsica. Cotanquitsiquea oraqueate Iguenquetsatsare Aapani Irioshi aatoquee icavorejatsatacojiti-ro, arimpaquee onsitacaguitejavaetanaquempa. ¹⁰ Natsipetacovae-caroquee taaca opajitapae, iriguentiquea natsipeventavaetaca maasano icoguiajiaqueca Aapani Irioshi, noninqueuea iraventaventajitanaqueempari Quirishito Jesoshi irimeshijiaquerinijite, iroaroaitanqueuea ichoocatigueti Aapani Irioshi incoguitempaini inchoocaguiteni.

¹¹ Iroomajaca ocatita icantajitica:

Imetojanaquegueti Quirishito atsipajianacari, anchoocatantajiapojajempaca iriatimpauqui.

¹² Arigueti antsipevenquempari, anquejemajirontaquempari.

Managuetei ancantajiaque: “Teetarite nontsateriji”, ariqueate inquempetaquempa iriatimpa incanque: “Teequea nontsateriji.”

¹³ Ariguetei avashiantajianajeri, iriatimpa arimpaqueate irinetsanamajatanaqueroquea maasanopae icantaguequeca, teetarite iragavejempaji iramataguempaji.

Antamajaqueneri Aapani Irioshi irishineventantacajica

¹⁴ Pinquenquejacaajiaquerijate papitsaroveritarijate maasanopae ocatica nocantaguequempica. Iramenajiaquempiquea Amajirote pintsatacaqueriguetei. Pincantajiaqueriquea inquemavacaajiaquempaja, aatoja queroca icotavacaajiatasi. Oraqueate incotavacajiaquempaguetei querocampate incojiaqueroni, yovashiantacaguiritsi quemaquemaiquerica. ¹⁵ Pantamajaquenerija Aapani Irioshi irishineventantacquempica

aatonijite ochoocatitsi querocampate oguipashiventajaquempineca oncoramanitapojajeguetei. Pintsatacaantamajatanaquerojate Quenquetsatsarentsimajaca, aatojate picantashitatimatarojate. ¹⁶ Aatojate picantaguisheta, aisa aatoja picantashiguetsatsi intati. Iriaqueate quejequeroca arimpaquea impeacaaguishevaetanacquemparocovaeguisherentsi. ¹⁷ Oraqueate itsatacaantajiaqueca quempejiguroca imaica arimpaquea ontsitacaguetejavaetanacquemparoquea, manaquea onquempetaquemparocompatsajanaqueguetei ateshi. Jero yovashiantantajianajaroca itsaroverantajiavecariguetei Amajirote. Aritarite iquempejianaqueroquea Imeneo aisa Pireto. ¹⁸ Iriatimpajia iroguenti icantashitajianacaroquea Quenquetsatsarentsimajaca, icantajiaque: “Jac avisanaque itancoretancoreitantajitaca.” Iquejijanaqueroquetei imaica manaqueate yovashiantacaagarantajiaqueri tsaroverantajiavecatsica. ¹⁹ Cotanquitsiquea quempetaca tsovironaqui ivinchajacojitiroguetei oquishomajatiguetei, oraticaquea tsovironaqui ipeacaacaca Aapani Irioshi quishovaeque,* aritarite itioncacojiqueroquetei ocanque: “Iriaquea Amajirote itsamajati querica yashintamajatacaca.” Aisa ocanque: “Maasano aventacaroca ivajiro Amajirote, iintsijate irovashiantaguetaqueroja maasanopae covaequisherentsi.”

²⁰ Oraqueate tsovironaqui caratsantsanaquivaetanquitsica ochoocaguetaquequea ipijatantajiguetaaroca taaca opajitapae. Oconogarantacaquea ipeacaantajiguetaaroca cavorejatatsica icantajitica ooro, otsipa icantajitica perata. Ochoocagarantsitaquea ipeacaantajiguetaaroca inchatomenta, otsipapae ivinchajantajiguetaaroca quepatsi. Oconogarantaca ishineventamajatacaro irapapitero, otsipapae manaquea itariantajicaro carashitequi. ²¹ Quericaguetei shetacaantaqueroneca igovaeguisherere pishoncamajatanajeroneca covaequisherentsi, inquempetanajemparoquea ipijatantajitaca ishinevencaca ashincaroca. Irishineventsitempariquea Ashincarica iragavejaque intigaranquitsitempari irinetsanaguequeneri taaca opajitapae cameetsaripae inintaguequeca.

²² Pintomicaguenquejanetapitsapanajanteroja inintaguishetaqueca iriaqueraca quenquevarijananquitsica. Arimpaquea pincomajamajatanaquempaja, pintsaroverantamajatanaquemparija Jesoquirishito, pimpintsatantempaja, aisa pinconoajiaquemparija comajashirentajiatatsica amanajiguirica Amajirote, paavacaajiaquempa cameetsa. ²³ Aatoja piquemisantajiguiritsija quenquejamampeajiatatsica cantamampeajigaroca intati taaca opajitapae, pitsaquequea maasano quempejiacarica iriatimpajia manaquea icatsimatavacaajiacaca. ²⁴ Maasanopae antajiguinirica Amajirote aatoquea icatsimatantajitsi, manaquea impintsajianaquempari maasano, intsajiaque intsatacaantajiaque, aisa irantsipetacovaequempaquea. ²⁵ Netsanajate incantomajajiaquerija teeca irinintajigueti inquemisantamajajiaqueroquea Quenquetsatsarentsimajaca, aatoja icatsimajiguiritsi. Aricajate inchagashirentajiaqueriquea Aapani Irioshi, ariquea incantashitajianajempaquea irovashiantajianajero ipeacaaguishejiavecaca, inquemisantajianaje, ²⁶ iroompaquea intsajianaje inquenquejajianaqueroquea cameetsaripae aatonijite yagavejajiguiritsi ampatsini ashintajiavecarica aisa omperajiavecarica.

* 2:19 Maasano tsaroverantajiacarica Jesoquirishito aquempejiacaroc tsovironaqui ipeacaacaca Aapani Irioshi. Jesoshi iriguenti quempecaroca quishotacaqueroca. (Pamenero 1 Co. 3.9-11.) Maasano aventavaquemparineca aato ipega.

3

Quero incojianaquepani caquinteguetatsica oncoramanitapojajeguetei

¹ Noninque pintsaque oca: oncoramanitapojajeguetei pajiniguetei aapojempa savinca-guiteri vegaratapajaatsineca, omanavaequempa. ² Iiraquea caquinteguetatsica irisati quenquejacotajatsine, aisa iriguenti inquenquejacojianaquequea imentaquipae, iraventacovaequempa, irisemejiaque, incantaguishejiaqueriquea Aapani Irioshi, aatoquea iquemisantajiguiritsi iriri aisa iriniro, aatoquea iquenquejajajiritsi pintsatacojiacarica, aisa aatoquea iquemisantajajiritsi Aapani Irioshi. ³ Aatoquea ipintsatacotantajiga, aatoquea ipetsimarejajajatsi, incantaguishejacotantajiaque intati, aatoquea yagavejitsi itampishitashijiguirotsi covaequisherentsipae, irantsipetacaantavaejiaquempa, aisa aatoquea ishineventajigarotsi maasanopae cameetsaripae. ⁴ Iriatimpajia irampigaran-cashitantaquempa, aisa irantashitantaguetaquempa, caaviji iraventacoquempa. Aatoquea inintajiguetsi irishineventajiaquempariquea Aapani Irioshi, manaqueate irinintajiaquequea taaca opaji ishineventacaca iriatimpajia. ⁵ Aisa intsariventamampejiaquempari Aapani Irioshi, cotanquitsiquea aato itsaroacagaritsi, iroguenti iramenajiaqueriquea tee irioshimajateji. Aatojate piconoajigaritsija quempejiaqueroca imaica.

⁶ Iconoagarantajiaqueate yoayoaitanaquequea otsovironaquitequi manquigarentsija teeca ontampishitashijigueroji ogovaeguisher yamatavijijiaqueroquea, ocantacoguitaniqua oshineventamajatavacari quericaca tsavetantajiaqueroca otsipapae quenquetsatsarentsi, oquemisantamajatavaqueroquea. ⁷ Iroatimpajia ocantajiaveca onintajiaque ontsamajajiaquero Quenquetsatsarentsimajaca, cotanquitsiquea teequea agavejajigueti ontsatimajigueroji, ocancani oquemisantamajatanaqueriquea amatavitantajiatatsica. ⁸ Iriatimpajia iticaacovetavacaro Quenquetsatsarentsimajaca, manaquea iquempejiacari Janeshini aisa Jaampereshini ticaavetavacarica Moishishini coramani. Iquenquejaguishevaequeguetei taaca opajitapae covaequisherentsipae, yovashiantajajiro itsarotentajiavecariguetei. ⁹ Cotanquitsiquea aatoquea icojigani iquemisantajitajiritsi, maasanotari iramenajianaqueri teequea intsatimateji, manaquea inquempajiaquempari irirajia ticaavetavacarica Moishishini coramani teequea inquemisantajitajeriji.

Paavoro icantanajiri Timoteo incoquempanijate intsavetantavaequeriquea Jesoquirishito

¹⁰ Imaica, irijani, notsaque pitsamajatavaqueroquea notsatacaguequempica, ariqueate piquejetanacaquea aviatimpa piquempemajatanaquenaquea naatimpa. Pitsaquequea teequea nompeacaguempaji covaequisherentsi, manaqueate nosavicaventamajaqueroquea notsavetantavaequequeroquea Quenquetsatsarentsimajaca, aisa notsarotentamajacariqueate Jesoquirishito. Teequea noncatsimajigueriji teeca irinintajigueti inquemisantajigueroji Iguenquetsatsare Aapani Irioshi, manaqueate natsipetacovaececa, aisa nocavintsajajiaqueriquea maasano caquinteja, nocoguitani. ¹¹ Aisa pitsaque yatsipetacaavaequenaqueate ontaniqui Antioquiaqui, Iconioqui aisa Irishitiraqui. Caavijiquea icatsimacatsimavaequena, cotanquitsiquea ipintsatacotajanaqueate Amajirote yoguipaquijacotajana. ¹² Ariqueate inquempajiaquempaqua maasano nintajanquitsica intsarotentamajajiaquempari Quirishito Jesoshi, irantsipeventavaetanaqueriquea. ¹³ Cotanquitsiquea iriraquea peacaaguishevaecaroca taaca opajitapae coguisherentsipae, aisa irirajia amataajiatsica, caaviji irogaajianaquempaqua iramatavimatavitantanaque, aisa iramatavijitajitempari iriatimpa. ¹⁴ Cotanquitsiquea aviatimpa pincoquempanija pinquemisantamajataque-rojate itsatacaajitaquempica, pitsaquetari iroguenti iroomajaca, aisa pitsaquequea queri tsatacaaquempiroca. ¹⁵ Chaajaniquitirajampiguetei pitsatsimajacaroquea Iguenquetsatsare Aapani Irioshi. Irootaquequea tsatacaanaquempineca pintsatantamajatanaquempaca, aisa paventantamajatanaquemparica Quirishito Jesoshi poimentanaqueniji ichoocatiguetei pincoguitempani pinchoocaguiteni. ¹⁶ Iriguentiquea tioncacaantaqueroquea Aapani Irioshi maasanopae Iguenquetsatsare. Irootaquequea tsatacaajiacajica, ocantomajajiacaji, otampaticatacanacaji, otsatacanacajiro quero ancojiaquempani ancomajamajajianaquempanijite. ¹⁷ Irootaquequea oquempetantacaca imaica cameetsanijite intsamajaqueenijite yashintajiacaca Aapani Irioshi, iragavejajiaqueniji irinetsanaquero maasano cameetsaguetatsica.

4

Paavoro itampishitacaqueriquea Timoteo

¹ Oncoramanitapojajegueti incoraquetajategueti Jesoquirishito impeapojempaquate imajirojiate maasano choocatajatsica anijajiatsica aisa metojajianquitsica, incantajapojajeri quericaca peacaatsica cameetsari, aisa quericaca peacaatsica coguisherentsipae. Iriatimpa yamenajiacaji imaica. Ariqueate iquempetaca Aapani Irioshi yamenajiacaji iriatimpa. ² Irootaquequea noncantantaquempica pintsavetantavaequeriquea Jesoquirishito pincantajiaqueriquea maasano quero icotani Aapani Irioshi imeshiantigueti. Pintsavetantapiniteroja arigueti irinintajiaque, aisa aatogueti inintajiguetsi. Pincantomajantaquequea, pintampishitacaantaquequea. Netsanaja pintsatacaantaquequea, inchiquiojita pisemashirentaritsi. ³ Aapojaquempatarite savincaguiteri aatonicate inintajiguetsi inquemisantajajeri tsavetantajiguiroca Quenquetsatsarentsimajaca, iriguentiquea irinintajiaquequea itsipa tsatacaajiaquerineca taaca opajitapae inintajiaqueca iriatimpajia irishineventajianaquempaca. ⁴ Aatonica iquemisantajajirotsi iroomajatatsica, manaquea impitsocashijianajemparo iquenquejashijiacaca caquinteja. ⁵ Cotanquitsiquea aviatimpa arimpaquea pincomajamajatanaquempacea, pinquenquejamajatanaquerojate cameetsaripae. Pansipevaetanaquempaquea maasanopae, pisavicaventavaetanaquero pintsavetantavaetanaqueroquea Quenquetsatsarentsi Oganejencatatsica. Pintampaticamajatanaqueroquea maasanopae inintacaquempica Amajirote.

⁶ Imaica noquejetacaró imirajitaca ishaguitsijitantacarica viratsi itaajiquenerigueti Aapani Irioshi, natsipeventacaritari. Irooshipoji noantanaquempaca iriatimpaqui. ⁷ Noquejetacariquea ashimirintamajatatsica, aisa noquejetsitariquea shiamajatatsica narejetsipojajaro ocaratapojaquegueti, nonetsanamajaquerotari maasanopae ícanquenaca Amajirote, teequea novashiantimateroji notsarovencarigueti. ⁸ Iriatimpa iriguenti Majirontamajatatsica Joesemajaca tampaticamajatiroca maasanopae, incanquequea quero incohincoitaquerini maasano caquinte. Yamenaquena notsaroventamajatacari, irootaquequea imaica yoguujacaaquenaroquea amatsaerontsi* iramatsaetantaquenaroquea oncoramanitapojajegueti, cotanquitsiquea aatoquea aparo naatimpa yamatsaetitsi, inquejetsijiguempariquea aisa maasano oguijamajatavajirica incoraquetajategueti.

Icaratacaaguetañajiniri

⁹ Pinetsanatsitemparojaja pincoraquepojajejate taampina pinejaatenaja, ¹⁰ iroorijite itsinampirejanaquenaquea Temashi yoanaque Tesaronicaqui, caavijiquea anaaque ishineventavaetanacaroquea quepatsipaequitica. Irraquea Quereeseente yoanaquequea Garashiaqui. Irraqueate Tito yoanaquequea Tarimashiaqui. ¹¹ Apatiroti notsipatajari Irocashi. Arigueti pincoraquequegueti paajaterita Maricoshi pintsipatajempari, nonintaquetarite iramitacovaetapojajena nantavaetaquenerigueti Amajirote. ¹² Irraquea Tiiquico notigarancaqueri Epesoqui. ¹³ Pincoraquequegueti pamajenaroja nogataamorenare nojoquijitanaqueca Toroashiqui itsovironaquitequi Caripo. Aisa pamajenaroja novaperitepae, irootarite nonintamajataqueca nomeshinatsitepae notioncantaguetaçaca.

¹⁴ Irraquea Arijantero peacaaguetaçaca taaca opajitapae cavorejaguetaçatsica icatsimatacaantaquena. Inchiquiojitaquea inquejequeri Amajirote. ¹⁵ Shooshoh icatsimatacaantimpitsijate aviatimpa aisa, iticaaquenatari notsavetantaquerigueti Jesoquirishito.

¹⁶ Iroaqueragueti yaajitanaquenagueti jivatatsicaqui teetarite inchoocateji aparo amitacotanaquenaneça, maasanoquea itsinampirejajianaquenaquea, aparoquea noquenquetsaventanaca naatimpa. Cotanquitsiquea teequea noninteji inquenquejacaajiaqueriquea Aapani Irioshi oncoramanitapojajegueti. ¹⁷ Cotanquitsiquea iriraquea Amajirote yamitacovaequenaquea itampishitacaanaquena, nagavejantacaca notsavetantavaequeriquea Jesoquirishito cameetsanijite inquemajiaquenijite maasano teeca irijori-

* 4:8 amatsaerontsi. Manaquea iquempetacaacaro coramani ishiasiavijitagueti iramenajiaqueri quericaca anaantiquitsineca, iriraquea majirontatsica iraitsitempariquea iramatsaetsitempari.

joigueji. Aisa yaajitavajana yatancavequenaguete casecari.[†] ¹⁸ Arimpaqueate impintsat-
acomajatanaguena Amajirote querocaca incojivequenani, iroompa iranaquenaqueate
jenoqui inquitequi imajirontacaguete. Jaameja ancoguitempani ashineventajiaquem-
pari, ancantajiaqueri: “Caaviji poganejencamajata!” Ari oncoquempa.

¹⁹ Pincamanqueroja Pirishica nococani noquenquejajiro, aisa Aquira noquenque-
jaqueriquea, aisa ijitanēja Oneshiporo pincamanquerijate noquenquejajiaqueriquea.

²⁰ Iriraquea Erashito ichoocaque Corintoqui. Iriraquea Toropimo nojocanaqueri Mire-
toqui yojoquijitaca. ²¹ Aviatimpa, irijani, pincoraquepojajeja taampina tequerataguete
oncatsincaguiteteji. Irirajia Eovoro, Porente, Irino, jero Caraoria, aisa maasano apit-
saroventarijiate inintajiaquequea pinquemacojiaqueri choocajia iquenquejajiaquem-
piquea.

²² Noninque intsipamajaquempiquea Amajirote Jesoquirishito pishirequi, incavintsa-
jamajajiaquempiquea aviatimpajia maasano.

[†] 4:17 Icanqueguete yaajitavajana yatancavequenaguete casecari arica mana iquejetacaajiacanari intati, quejetaca
incante: “ipintsatocovaetaquena teeca irojocantajitenaji irimetojajiquenanijite, quejetacashia yatancavequenaguete
casecari”.

PAAVORO ITIONCAQUENERI TITO

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaquenerigueti Tito. Irocashi itioncacotaqueri irira Paavoro otsipae paperiqui (Ya. 7.57–8.1; 9.1–31; 13.1–28.31). Paavoro icantacotaqueri Tito itioncacaantajiaquerigueti Garashiaquitica aisa itioncacaantaquerogueti paperipae icantajitica 2 Corintoquitica aisa 2 Timoteo (2 Co. 2.13; 7.6, 13–14; 8.6, 16, 23; 12.18; Ga. 2.1, 3; 2 Ti. 4.10) Tequeratagueti intionqueroji Paavoro ocatica paperi itioncacaanquero otsipapae 11 paperipae choocajianquitsica paperiqui icantajitica *Tsavetacoquerica Jesoquirishito*. Pajinigueti itioncacaantaquerogueti Paavoro ocatica paperi itioncacaantaqueneri Timoteo, iroquetica itioncacaantaquenerica. Itioncacaantaquero ocatica paperi ajagantsiniqui 63, ichoocaquegueti quepatsiqui icantajitica Maseronia.

¹ Narogueti Paavoro antinirica Aapani Irioshi ashintajanaca, aisa narogueti itigarancane Jesoquirishito. Iriatimpa itigarancaquena nontsaraventacaajiaquempari maasano icoguijiaqueca Aapani Irioshi, cameetsanijite intsatimentajiaqueronijite Quenquetsatsarentsimajaca incomajatashitantaquemparoca. ² Aisa intsamajiaqueroquea iroaroaitanaquequea maasano tsaromentajiacarica inchoocaguiteniquea Irioshimajacae, aatoquea imetajaji. Iriraquea Aapani Irioshi teequea intojeimatempaji. Paeatoniqui tequeratagueti onchoocatomateji, icanque aatoja imetojitsi maasano quericaca tsaromentajiaquemparineca Quirishito, incoguitempani inchoocaguiteni iriatimpaqui. ³ Imaicaquea imaica jac aapojaca savincaguiteri intsatantajiaquemparoca maasano Iguenquetsatsare Aapani Irioshi Meshiacojiaajica. Irootaquequea itigarinquimenquea nontsavetacotaqueriqueate Jesoquirishito, noncamanqueriquea maasano.

⁴ Notioncaquempiquea aviatimpa Tito napitsaroveritarite, naroguentiquea tsaromentacaquempica nopeantajimpica nirijanitemajaca. Namanacovenquempiquea incavintsajamajaquempinijite Aapani Irioshi aisa Jesoquirishito Meshiajiaajica, noninquequea inchoocatacaquempicameetsa aatonijite taaca opaji pishoshoguiteventa.

Yantavaequeate Tito Queretaniqui

⁵ Oraqueate nojocanaquempigueti oraniqui Queretaniqui nocanquempiquea pinteroncaguetajerojate maasanopae tequeratata anteronqueji. Aisa nocanquempiquea querocagueti oraniqui guinteninintsipaequi icapicapinijiacagueti apitsaroveritarijiate, paajiaquenerijate quempoguijajiaquerineca, pinquempetacamajaquemparoja nocanquempica. ⁶ Iriraquea quempoguijajiguirica tsaromentajiatsica incoguitempanija incomajamajaquempaquea iramenajitaquerinijite inchoocamajaque cameetsa. Irampanironquemparoja imanquigacaca. Iriraquea irijanijiate intsaromentamajiaquemparija Quirishito incomajamajaquempaquea, aisa intsajiaqueriquea iriri aatoja ipigapi-gaataritsi. ⁷ Iriraquea quempoguijajiguirica tsaromentajiatsica iriguentiquea savicaventiroca maasanopae inintaguetica Aapani Irioshi, irootaquequea nocantantacaca incoguitempanija incomajamajaquempaja aatoniji ochoocatitsi incantimentajiaquerimeca. Aatoquea yaventacotatsi, aatoquea itijerequitatsi, aatoja ishinquiguitani, aisa aatoquea yaashitantatsi. Aatoquea yamatavijiguiritsi itsipapae iraaquenijite imentaquipae. ⁸ Cameetsa iraaquiaqueriquea iroguisavisaviitavaqueriquea coraquecoraquejianquitsica itsovironaquitequi. Irishineventamajaquemparoquea cameetsaripae, intampishitashiguetaqueroquea maasanopae covaeguisherentsipae, incomajamajaquempa, irinet-sanamajataqueneri Aapani Irioshi, aisa iramenanontamajaquempaja cameetsa incomajamajaquempinijite. ⁹ Iriraquea quempoguijajiguirica tsaromentajiatsica aatoja ican-tashitatigarotsijate Iguenquetsatsare Aapani Irioshi, manaqueate inquenquejamajaqueroquea cameetsanijite iragavejaquenijite intsatacaajiaqueriquea itsipapae, aisa iragavejaquenijite irimajeretacaajiaquerinijite maasano cantashitatiacaroca Quenquetsatsarentsimajaca.

¹⁰ Choocatarite icaramirincavaequetarite pigapigaatantatsica, manaqueate ican-tashijiacaro intati yamatavijantigueti. Iriojatarite quempetanquitsica imaica cantajianquitsica maasano tsarotentajatsica iroguijatacojianajero itsatacaantica joriojia icantajiaque intotsaiquimashitacaantajiaquempa maasanojia. ¹¹ Irirajia quempejiaque-roca imaica iintsija iramimicacaajitempari, manaqueate yovashiantacaagarantajiaqueri tsarotentajavetatsica, iquejetacaajitsitaroquee imanquigarejia aisa irijanijiate. Itsatacaantamampeajianaqueroquee intati, teetarite oncameetsateji, manaquee inintajiaque iraantajiaquemparo imentaquipae.

¹² Coramani ichoocaque tsavetantatsica Queretaquiticani. Iriatimpa iquenquetsatocajiaqueri igonorojia icanque: “Ari icojiaca Queretaquitica iriguenti tsojeajitsica, teequee impintsatocotantajiguempaji quempejiaquea chaonarijite. Iriguentijiaquea shecajanti perantijia.” ¹³ Icantamajataqueshiatsi. Irootaquequee nocantantaquempica pincantomajamajaterija irirajia quempejianquitsica imaica cameetsanijite intsaroven-tamajatanauemparinijite Quirishito, ¹⁴ aatonijite iquemisantajajiritsi joriojia tsaveta-mampeajigaroca iquenquejashijitacata intati. Aisa pincanquerijate aatojate iquemisan-tajiguiritsijate itsatacaantajiaqueca itsipa pitsocapitsatanacaroca Quenquetsatsarentsi-majaca. ¹⁵ Iiraquea comajari icocaniquea iquenquejacomajaquero maasanopae, man-aquea icomajatacocaroc, cotanquitsiquea iriraquea teeca incomajatempaji teeca irava-jeroji iroomajatsica icancaniquea teequee incomajatacotemparoji maasanopae. Man-aquea ocovaeguishedanaca iguenquejane, aisa chagashirentavequemparimeca aatoniji icovaeta manaquee ocovaeguishedanaca. ¹⁶ Iriatimpajia icantajiaveca itsatiri Aapani Irioshi, cotanquitsiquea ipeacaaguishejiacaca onigaantajianaqueri teemajaca intsateriji. Iriguenti coguisherimajaca, tee inquemisantanteji, teequee intsatimajigueji irinetsana-jiaqueroquee cameetsaripae.

2

Quero ancojiaquempani anchoocajiaquegueti cameetsa

¹ Aviatimpaquea pintsatacaantaquigueti pintampaticamajatanauerojate Quenquet-satsarentsimajaca. ² Irirajiaquea quenquevarimajajianquitsica aatoja ishinquitatsi, intampishitashijiaqueroquee maasanopae covaeguisherentsipae, irishineventajiaquem-paro cameetsaripae, intsarotentamajajiaquempari Jesoquirishito, impintsatantajiaque-mpa, incoguitempani. ³ Ariqueate onquempejiaquempaquea quenquevaromajajian-quitsica pincantajiaqueroquee oncomajamajajiaquempajate, aisa aatoja ocantashiguet-tatsi intati, aisa aatoquee oshinquitatsi. Iroguentiquea ontsatacaantajiaque cameet-saripae. ⁴ Onquejetaqueroqueti agavejajiaque ontsatacaajiaquero apimanquigarojiate tequerataca onquenquevaromajateji ompintsamajataquemparija manquigataroca aisa irijanijiate. ⁵ Aisa ontsatacaajiaqueroquee onquenquejamajaqueronijite cameetsaripae, oncomajamajaquempaquea, onetsanajiaquero otsovironaquite, oncavintsajantajiaque, aisa onquemisantajiaqueri manquigataroca. Noncantantajiaquempica imaica aatonijite icantaguishedacojitirotsi Iguenquetsatsare Aapani Irioshi.

⁶ Ariqueate pinquempejiaqueriquea tequerataca inquenquevarimajajigueji pincantajiaqueriquea intampishitashijiaqueroquee maasanopae covaeguisher-entsipae. ⁷ Maasanoquee pantaqueca pincomajatimenquemparo cameetsaniji inquejianaquempiniji. Pintsatacaajiaquerigueti pintampaticamajatero, pinetsanamajateroja. ⁸ Pinquenquetsatsitempari cameetsaguetatsica aatoniji ohoocati incantacoguishetimentajitempimeca, manaquee impashiventanaquempa ticaavequempimeca iramenajiaquegueti tee onchoocatetimeji.

⁹ Pincantajiaqueri yashintajitacaca irinetsanajiaqueroja maasano incantajiaque-rica ashincarica cameetsanijite iroguishinejajiaqueriniji, aatoja ipigatsajencataritsi. ¹⁰ Aisa aatojate yaitsitiritsi, manaqueate intsamajaqueri ashincarica aato yamatavirititsi, cameetsanijite iramenajiaquenijite maasano oganejencavaeca Quenquetsatsarentsimajaca tsavetantaquerica Aapani Irioshi Meshiajiacajica.

¹¹ Yonigaanquerotari imaica Aapani Irioshi icavintsajajiaquerigueti maasano caquin-teguetatsica inintantacaca irimeshijiaqueriquea. ¹² Irootaquequee atsatantajiacaca

cameetsanijite avashiantantajanacaroca apeacaaguishejiavecaca taaca opajitapae covaeguisherentsipae aatonijite aquempejigaritsi teeca intsaromentajiguempariji iquenquejaguishejiaqueroquea taaca opajitapae, manaquea antsajiaque antampishitashijiaquero maasanopae covaeguisherentsipae, anchoocajiaque cameetsa, ancoguitempañija antsaromentamajaguitempañini Aapani Irioshi achoocajiaquegueti quepatsiqui.¹³ Aatimpajia arimpaquea ancomajamajatanaquempaquea aguijaguijaitavajeroqueti onetsanamajaguempagueti oguishinejavaetacajica: iroguentiquea savincaguiteri ironigaantantajempaca Arioshite agavejamajatatsica Aavajajica, iriotaque Jesoquirishito, ariquea iroganejencavaetapojajempa.¹⁴ Aatimpajia apeacaaguishevevecaroquea taaca opajitapae covaeguisherentsipae, cotanquitsiquea ocoramanitapojaji imetojaventajiacaji ishetacojiacaji yoguipaquijacojiacaji yashintavecajigueti ampatsini, aisa ishetacomajatajaji cameetsanijite irionijite ashintamajajiajinijite anintamajajiaquenijite anetsanajianaquero maasanopae cameetsaripae.

¹⁵ Irootaquequea pintsatacaanteja. Pintampishitacaunque, aisa pincantomajanteja, iriotarite nintacaquempica Aapani Irioshi. Aato ocameetsatitsi intsojencajiguempi.

3

Quero incoquempani tsaromentajiatsica

¹ Noninque pinquenquejacaajajeri maasano tsaromentajiatsica inquemisantajiaqueriquea majirontajiatsica aisa jivajiguirica, aatojate ipigapigaataritsijate, manaqueate irinintanintaitanaque irantajianaquero cameetsaguetatsica.² Aatoquea icantaguishetacotiritsi itsipa, aatoquea icatsimatantajiguitsi, manaquea impeaquempa matinari, aato yanaaguenquejanetanti, manaquea impintsajiaquempariquea maasano caquinteja.

³ Coramanitari aatimpajia aritarite aquejetaca, teequea antsateji anquenquejamaajigujeji, teequeate anquemisantanteji. Atimpinashirentaveca, manaquea omperavecaji taaca opajitapae covaeguisherentsipae ashineventajiavecaca. Acatsimajencajiaqueriquea agonorojia, acatsimatacotsitantageueque. Aatimpa isemaneguintajitacaji, ariqueate acohacoitanaca asemaneguintavacaajianaca.⁴⁻⁵ Cotanquitsiquea ocoramanitapojaquegueti arejetapojacagueti savincaguiteri ipintsatacotantajiacarica Aapani Irioshi maasano caquinteguetatsica, iquejetacaajiacaji aatimpajia imeshiajiacaji, iriguentitari Meshiantatsica. Teequea irooqueuea irimeshiantajiajaji iramenajiacaji acomajamajajica, manaqueate ipintsatacojiacaji intati, irootaquequea imeshiantajiacajica. Oraqueate ishetacojiacajigueti agovaeguishejia manaqueate oncanque jac acantashitatiejianaaja quempetaja iroaquerasano voajiajatsi, iriguentiquea cantashitatiejiajaji Ishire choocashirentajiacajica.⁶ Aventaventaicaritarite Jesoquirishito Meshiajiacajica, jero itigarancantacarica Aapani Irioshi Ishire inchoocashirentajiapojacaji iragavejacaamajajiacajiqueate.⁷ Ariqueate iquempejiacaji imaica Aapani Irioshi ipintsajiacajigueti iramenajiacajinijite quempeca teeca ancovaeguishetimatempaji. Imaicaqueate imaica iroguentiquea aguijamajaquequea antsipatsipaitaquempari jenoqui inquitequi ancoguitempañi anchoocaguiteni.⁸ Maasanopae ocatita nuncanquempica iroguenti iroomajaca, nonintantacaca pintsatacaantamajateroja cameetsanijite maasano aventaventaicarica Aapani Irioshi irisavicaventamajajianaqueroquea irinetsanajianaquero maasanopae cameetsaguetatsica. Caaviji anaque ocameetsavaeque, aisa irootaquequea amitacoguirica maasano.

⁹ Imaica nuncanquempi aatojate pitsipajiaritsija itsipapae pinquenquetsatavacaajiaquempaquea intati pinquenquetsatacojiaqueroquea taaca opaji teeca irooqueuea iroomajatatsica, aisa aatoquea piquejetaritsi savicaventajiaqueroquea iquenquejajiaquero ipajiguetaqueti choviquijianaquerica, aatoja pipigatsajencatavacaga, aisa aato piquejetaritsija catsimatimentantajiguiroca itioncacotanaqueca Moishishini. ¿Aripate amiquempite? ¿Taa opaji ocameetsatantacaca? Teenica onchoocateji.¹⁰ Inchoocaquegueti gametsajantantquitsineca, paitempariquea pincantomajitsitempari. Aatogueti iquemisantimpitsi pinquejetacaitempariquea aisa. Iroompa inquejetsitajemparogueti aisa aatogueti iquemisantimpitsi pincantimentsitempari

aatoja iquijajitsi picapiocapinijigagueti. ¹¹ Itsajitaquetari quejejiacarica irica mana yaacoguishetanaca, aacoguisheni icantanaca, irioquea quempetacaantanquitsineca.

Iteroncacaanajiri

¹² Ariqueate nontigarancaquerigueti Aretemashi aisa Tiiquico aviatimpaqui oraniqui pintampinaquequea poanaquequea Nicoporishiqui. Ariqueate noanaquequea on-taniqui nonchoocavaequitequeate arejevaetajempa osaajencatanajeguetei catsincagui-teri. ¹³ Iriraquea Senashi, guisotoguiroca itioncacoguequeca majirontaguetatsica, aisa Aporoshi pinetsanamajajiavaquerijate pojocajiavaquenerija taaca opaji incoguitejacoji-aquempaca aatonijite iteroncacojianacatsi quenavoquirontsiqui. ¹⁴ Pincantajiguerijate apitsaromentarijiate guintenijianquitsica oraniqui irantapinitaque cameetsaguetatsica cameetsanijite inchoocatacotimenqueniji iramitacotantajiaquemparica coguitejacoma-jatanquitsica, aatonijite manaqueate irisavisaviitashitaquempaquea intati aatoquea taaca opaji yantitsi.

¹⁵ Maasano tsipatsipaitaquenaca ocانiqui inintajiaque pinquemacojiaqueriquea chooca iquenquejajajimpi. Pincamanquerijate maasano apitsaromentarijiate pintsaji-aquenaca choocajiana ocانiqui noquenquejajajiri. Imaica noninque incavintsajamaja-jiaquempi Aapani Irioshi aviatimpajia maasano.

PAAVORO ITIONCAQUENERI PIREMONI

Antsatantaquemparoca

Ocatia iroguenti antsatantaquemparoca paperi itioncacaantaqueca Paavoro itioncaquenerigueti Piremoni. Irocashi itioncacotaqueri irira Paavoro otsipauqui paperiqui (Ya. 7.57–8.1; 9.1–31; 13.1–28.31). Tequeratagueti intioncacaanteroji ocatia paperi, itioncacaantaquero otsipa mavite paperi itigarancajiaquenerica quemisantajiatsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiatsica choocajianquitsica Iromaqui. Chooca quenquejajianquitsica tequeratagueti intioncacaantaqueneri Piremoni, itioncacaantajiaqueneri choocajianquitsica Piripoqui. Paavoro itioncacaantaquero 3 paperipae ajagantsiniqui 60, ichooaquegueti santanaqui Iromaqui: aparo itioncacaantajiaqueneri quemisantajiatsica Epesoquitica, otsipa irashijia Corosaquitica, otsipa irashi Piremoni. Isoanaquerogueti Tiiquico Iromaqui, yaanaquero ocatia 3 paperipae yoanaquegueti quepatsiqui pajitatsica Ashia.

Iiraquea Oneshimo, irajaanire Piremoni, ishiapitsatanacari ashincarica, irosati yarejevaetaca Iromaqui. Ontaniqui iquemaqueri Paavoro itsavetantaquerigueti Jesoquirishito, ariquea iquemisantaque. Aritari ocantaque icantacaantaqueca majirontatsica Iromaqui iraavajerigueti aajanirentsi shiavetanquitsica, iroguipajeneri ashincarica. Irootaquequea imaica itigarancantajarica Paavoro Oneshimo, cotanquitsi itioncacaantaqueneri Piremoni icantiri incavintsajavajeri Oneshimo, icantiri: “Paavajeri quempetaca naroguentica paavaqueca.”

¹ Naroguenti Paavoro, choocana ocaniqui nosantanatacotaca, iroguenti isantanatacotimentajiquena notsavetantaguitirini Jesoquirishito. Notsipatavajari apitsaroveritarite Timoteo notioncaquempigueti aviatimpa Piremoni nopintsajiacaca. Aquejetavacaaca antaventiniri Jesoquirishito. ² Noquenquejajiroquea aisa apitsaroveritarote Aapia, jeri aisa Arequipo noquejetacaacaca apicoaretate, atsipevencaritari Jesoquirishito. Noquenquejajiaqueriquea aisa maasano tsaroveritajatsica capiocapinijitsica pitsovironaquitequi. ³ Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoveritajigaro taaca opajitapae.

Caavijisano ipintsatantamajataca Piremoni

⁴ Nocantacoguitani namanaguitirinigueti Aapani Irioshi nocanqueriquea: “Arioteesaa”, ⁵ noquemacoquempitari caaviji pipintsajiacari maasano tsaroveritajiacarica, aisa pitsaroveritamajatacariquea Amajirote Jesoshi. ⁶ Aritarite aquejeshirentavacaaca atsaroveritarigueti, nocantacoguitani namanacoventaquempiquea nocanqueri Aapani Irioshi noninque pintsamajatanaqueroquea quero icojiacajini Quirishito Jesoshi icavintsajajiacajigueti maasano aatimpajia tsaroveritajigarica. ⁷ Oshinetacaamajaquenaqueate, napitsaroveritarite, namenaquegueti pipintsajiacari igomajamajarejia Aapani Irioshi, pitampishitacaajianajiri, ariquea otampishishirentacaajana.

Paavoro icanqueriquea Piremoni cameetsa iraavajeri Oneshimo

⁸ Naatimpa naroguenti itigarancuica Quirishito jero nagavejatantacaca noncanquempime pinetsanamajaqueroja noncanquempica. ⁹ Cotanquitsiquea avirompate aviatimpa, caavijitarite pipintsatantaca. Ariqueate noquempetaca naatimpa nopintsataquempiquea. Naatimpa naroguenti Paavoro jac quenquevatanajana. Imaica choocatatsitirajana isantanatacotimentajiquenaroquea notsavetantaquerigueti

Jesoquirishito. ¹⁰ Irootaquequea nonintantacaca nontioncaquempi noncantacoven-
taqueriniji irira Oneshimo* nopeaqueca irijani, notsaromentacaacaritari ocaniqui
nosantanatacogueti. ¹¹ Coramani pashintavecarigueti tee incameetsatimotempiji,
cotanquitsiquea imaica peanajaquea amitacotantatsica, iramitacotapojajempi,
quempetaca naatimpa yamitacovaequena. ¹² Imaica nontigarancajempiri,
paavajerija pinquejetacaavajempari paavaquenagueti naatimpa, iriguentitari
nopintsamajatacaca. ¹³ Nonintavecaquea inchoocaquemequeate ocaniqui
iramitacoquenamequea choocatirajanagueti santanaqui, isantanatacotimentajiquenaro
notsavetantavaequerogueti Quenquetsatsarensi Oganejencatatsica. Arimequea
inchoocaqueme ocaniqui quempetaca aviguentica amitacoquena. ¹⁴ Cotanquitsiquea
teequea noninteji naavajeri tequeratagueti pincanteji, teetarite nonintenica
noncanquempi inchoocateta ocaniqui. Manaqueate noninque inchiuiojitatari
pincanquenaqueate aviatimpa pininquegueti. ¹⁵ Ishiapitsatanaquempigueti aricaqueate
itsinampirejavetaquitimpi cameetsanijite paavajerigueti pincoquempaniquea
pintsipatajempari. ¹⁶ Imaica aatoja aparo pashintajaritsi, imaicaquea iriotaque
papitsaroverarite pivintsare. Naatimpa nopintsamajatacari, imaicaquea panaavaeque
pimpintsamajatanaguempari aviatimpa, iriotarite apicaquinteteni, cotanquitsi caaviji
anaaque imaica iquejetsaromentajimpitari.

¹⁷ Iroosacanica imaica pamenamajataquenagueti naroguenti papitsaroverarite
paavajerijate quempetaca naroguentica paavaqueca. ¹⁸ Querocagueti icoquempini,
irooca yaacotaquempi, naatimpaquea pincoacotaje. ¹⁹ Naatimpa naroguenti Paavoro
tioncaquerooca oca nacoqui imaica, noncanquempi: naro vegaratajerone. Cotanquit-
siquea nagavejaqueme nonquenquejacaajempirome: aatomegueti notsatacaguimpime
pimpomatsaquempame. ²⁰ Nonintavecaquea, napitsaroverarite, pincavintsajacote-
name, apatsinorotari inaque Amajirote. Poguishinejavaequenaquea, agujatacoqueritari
Quirishito.

²¹ Notsaquequea pinetsanatero nocanquempica, irootaquetari notioncantaquem-
piroca ocativa, aisa notsaque panaavaetanaquero. ²² Imaica nonintaveca pinetsanate-
naro oraniqui nomaantapojempaca noncoraquequitegueti, namenaquequeate aricaca
iroguipaquijajitajena, iquemajiaquempiqueate Aapani Irioshi pamanacoventajiaque-
nagueti.

Paavoro iteroncanajiro icanquerica

²³ Chooa ocaniqui Epaperashi, itsipatacaantajiquenariquea isantanatacotimenta-
jiquenarogueti notsavetantavaequerigueti Quirishito Jesoshi. Iriatimpa ininque pin-
quemacotajeri chooca iquenquejacoquempi. ²⁴ Ariqueate iquempejiaca aisa Maricoshi,
Arishitarico, Temashi aisa Irocashi, inintajiaque pinquemacojiaqueri iquenquejajiaque-
mpiquea, iriatimpajia iriguentijia notsipatashijiacaca nantaquenerigueti Jesoquirishito.

²⁵ Noninquequea incavintsajashirentajiaquempi Amajirote Jesoquirishito pishirequi.

* 1:10 Oneshimo oncanque amitacotantatsica (pamenero otsapa 11).

ITIONCAJITAQUENERICA EVEREOJIA

Antsatantaquemparoca

Ocativa iroguenti antsatantaquemparoca paperi itioncajitaquenerica evereojia quemisantajiaquerica Jesoshi, ipajijitajiri aisa joriojia. Teequea intsajiteji queri tioncaqueroca ocativa paperi. Cotanquitsi jero atsaguetaqueca: iricativa tioncaqueroca tee irinejeriji Jesoshi, iriguenti iquemaque itigarancanejia itsavetacojiaquerigueti (2.3). Tee intsipajiguempariji itioncajiaqueneca (13.7). Inintaque impianaje ichoocajiaquegueti itioncajiaqueneca (13.19). Inintaque intsipatanaquempari Timoteo iroanaquegueti (13.23). Itsipajiacari quemisantajiaque choocajianquitsica quepatsiqui icantajitica Itaria (13.24). Chooqa quenquejajianquitsica irioca Aporoshi tioncaqueroca ocativa paperi (Ya. 18.24-28). Itsipajia iquenquejajiaque irioca tioncaquero Irocashi, yamenaquero oquejeguevetacaro otsipapae mavite paperi itioncaqueca iriatimpa (aparo opajita *Irocashi*, otsipa opajita *Yantajiguica Itigarancanejia Jesoshi*). Itsipajia iquenquejajiaque irioca tioncaquero Verenave (Ya. 11.22-26; Ga. 2.1-21). Tee intsajiteji quero itigarancaqueroni iroaqueraqueti, aisa tee intsajiteji quero ichoocaqueni tioncaqueroca itioncaquerogueti. Chooqa cantanquitsica arica itioncaquerogueti ichoocaque irooca Jerosarequi, Antioquiaqui, Iromaqui, irooca Arejantiriaqui. Iquenquejajitaque itioncaquero ocativa paperi tequeratagueti irisoveajigueroji coaretajia teemporo choocatanquitsica Jerosarequi, iroguentiquea isoveantajitacaroca ajagantsini 70. Iquenquejajitaque arica itioncaquero ajagantsiniqui 66.

Irira tioncaqueroca ocativa paperi itioncajiaqueneri joriojia quemisantajiaquerica Jesoshi aatoniji yovashiantajiguero iquemisantajiaquerigueti. Iquenquejajiavetacatari incantashitatiajiaquemparo quero icojiaqueroni itsarotentajiacarigueti Aapani Irioshi, impiashijianajemparo intsarotentajiajempari inquejetacaajiajemparo coramani itsarotentajiacarigueti tequeratagueti inquemisantajigueriji Jesoshi. Itioncajiaqueneri icantajiaqueri teequea inquenquejamajajigueroji iquenquejajiavetacaca. Inquenquejajiaqueme imaicaquea ipochatanajigueti Jesoshi imetojaventajiacaji ishetajajiro aguempavaerejia maasano aventajiacarica Jesoshi, yamentantajiacajica quempejiaca tee ancovaeguishedimatempaji. Avisanaquequea coramanitica: orativa teemporo, saserorotejia, aisa ijitorejajiaquenerigueti ivirapae aretarequi. Imaicaquea Aapani Irioshi ipeacaacari Jesoshi Asaserorotete Anaantamajatatsica, apaniroquea iriraja Jesoshi agavejaque ovegaratacajiro aguempavaerejia, apaniro choocatajatsi imaica teemporamajaca inquitequitica. Irira tioncaqueroca itsatacaajiacaji iroaquerari paaquito inetsanataqueca Jesoshi anaquero iroquetinica paaquito yojocaquenerica Aapani Irioshi Moishishini.

Aapani Irioshi itigarancaqueri Irijanite intsatacaajiacaji

¹ Paesatoniqui Aapani Irioshi iriguenti iquenquetsatacaaque tsavetantajiaque ajagantsinipaequi, icamantaguetaqueriqueate cantashitataropae aisa ocantashitatiequeca quero icoqueroni, iroompaqueate irioquea ogaajiavaqueneri avaesatiniteni. ² Cotanquitsiquea imaica itigarancanquitsitatiequea Irijanite intsatacaajiacajiqueate quero icotani. Iriotaquequea inintacaqueca irashintajemparo maasano, iriotaque aisa ipeacaantacaroca maasano choocaguetsica. ³ Iriotaque nigaantaqueroca iroganejencare Aapani Irioshi, iquempemajatacaritari Iriri atsatantacaca quero icotani iriatimpa. Oraquea icanqueca agavejamajatiequea, irootaquequea ichoocatacaantaquero maasano choocaguetsica ochoocatantacaca. Ishemajaqueroquea agovaeguisherjia, iroompa iteroncaquerogueti yatsomajanajaquea jenoqui inquitequi isavicapojaji isenampijapojajari Oganejencamajatatsica itincamijempequiqui. ⁴ Caaviji yanaavaepojajiri irashivantijitete Aapani Irioshi, iriguentitari Irijanimajate yanaantajiacarica ashivantijite.

Quirishito caaviji yanaaqueriequea irashivantijitete Aapani Irioshi

- ⁵ ¿Choocacampate ashivanti icantaqueca Aapani Irioshi:
 “Aviatimpa aviguenti Irijani,
 imaica ocatica savincaguiteri aviro nashimajaca nirijanite”?[✠]
 Teequea inchoocateji. Aisa teequea incantacoteriji irashivantijitete incanteji:
 “Impeaqueate Iriri,
 naatimpaquea nompeaqueriquea irijani.”[✠]
- ⁶ Cotanquitsiquea oraqueate itigarancaquerigueti Irijanite iriquetica choocatanquitsi incoraquetaquea ocaniqui quepatsiqui, icanti:
 “Maasano nashivantijitete intsaromentajiaquemparija.”
- ⁷ Cotanquitsiquea oraqueate icantacojiquerigueti irashivantijitete, iroguenti icantajique:
 “Aritari icotacagari irashivantijitete inquempesianaquempariquea choviga.
 Aisa irirajia irashivantijitete iriotaquequea itigarancaneja, inquempesianaquemparoquea osamimicatsantsajencatigueti paamari.”[✠]
- ⁸ Cotanquitsi iriraqueate Aapani Irioshi icantacoquerigueti Irijanite icantiri:
 “Irioshi, pincoguitempani pimajirontaguitempani pimajirontamentoqui pisavicantacaca, aatojate pisanticoguitejacotimatitsi.
 Pajiriquitemparoquea pimajirontaquijire pintampaticamajatantemparoca pimajirontagueti.
- ⁹ Caaviji pishineventamajataroquea cameetsaripae, irooqueate pisemaca covaeguisherentsipae.
 Irootaquequea nocoguiantaquemfica naatimpa Pirioshite Irioshimajaca, noshacojatan-taquempiro orejiqui pishinquireguishiqui,
 irootaquequea nonigaantacaca arimaja noshinetacaaquempiquea,
 nanaacaajiaquempiri maasanopae pitsipatsipaitacaca.”[✠]
- ¹⁰ Aisa icanti:
 “Majirontatsica, aviguenti peacaacaro iroaqueragueti quepatsi,
 aisa aviguenti peacaacaro inquite.
- ¹¹ Oncoramanitapojajegueti ompeaguetaajempaquea maasanopae pipeacaaguetaacaca, cotanquitsiquea aviatimpa picocani pichoocati.
 Maasanopae ompaesatoguetaaquequea onquempeguetanaquemparoquea opaesatogueti quitsaarentsi.
- ¹² Pampiguiricajeroquea pinquempetacaajemparoquea yampiguiricajitirogueti quitsaarentsi,
 aisa pinquejetacaajemparoquea otsipa iroaquerari,
 pinquempetacaajemparoquea quitsaarentsi isapocajitarogueti otsipaqueate inquitsaajitajempa.
 Cotanquitsiquea aviatimpa aatoquea picantashitatiatsi,
 aisa aatoquea pisanticoguitejacotajatsi.”[✠]
- ¹³ ¿Choocacampate irashivantijitete icanqueca Aapani Irioshi:
 “Pisaviquetaja pisenampijaquenaja notincamijempequiqui,
 pintsipataquenaquea arejevaetanaquempa nagavejajiaquerigueti maasano catsimacatsimajiguimpica, onquejevequemparopovanquegontatsitempari”?[✠]
- ¹⁴ Maasanoquea irashivantijitete iroguentiquea ichoocatashijiaque iramitacotantajiaque. Iriatimpajia manaqueate ivejencajiaca. Icocaniqueate itigarancajiaqueriquea iramitacojiaqueriquea maasano irajaitavajeca.

2

Ancoguitempaniquea antsaromentajiaquempari

¹ Irootaquequea noncantantajiaquemfica imaica jaameja ancoguitempaniquea anquenejamajaquerojate aquemajiaqueca, aatonijite avashiantanajirotsi. ² Paesatoniqui Aapani Irioshi itigarancajiaqueri irashivantijitete incamantanque icanquerica iriatimpa

✠ 1:5 Sar. 2.7. ✠ 1:5 2 Sam. 7.14; 1 Crn. 17.13. ✠ 1:7 Sar. 104.4. ✠ 1:9 Sar. 45.6-7. ✠ 1:12 Sar. 102.25-27.
 ✠ 1:13 Sar. 110.1.

intampaticamajajiqueronijite. Irirajia teeca irinetsanamajateroji maasano, inchiquiojitaquea iquempetacaantacaquea iriatimpajia, icatsimatimentantajitacarica, itampaticamajatirotari Aapani Irioshi. ³ Quempetaca icatsimajiaqueriguete irirajia teeca irinetsanajigueroji icantajiavecarica irashivantijitete, imaicampani aatimpajiaqueate aatoguete aquemisantiritsi icavintsajamajacajiguete Meshiantatsica ¿arimpate agavejaque ashiapitsatanaquempari aatoniji icatsimatimentajiro agovaeguisherejia? Aato agaveji. Iriquetitaqueate tsavetantaqueroca Amajirote queroca ancojiaquempanti irimeshiantantajiacajica, iroompa iriraquea quemisantajiaquerica itsatacaajiacaji aatimpajia. ⁴ Iroompa iriraquea Aapani Irioshi irioquea agavejacaajiaqueriquea tsarventajiacarica Jesoquirishito yonigaantajiaqueroquea oacaantantatsica intati cameetsanijite intsajitaqueroniji tampatica yoaqueroquea itsavetantajiaqueroguete. Aisa apaniropae ocantashitatiagueta yojocajiacajica iragavejane yagavejacaajiacajiguete Ishire Aapani Irioshi, iriotaquequea nintanquitsi Aapani Irioshi iquempetantaguecaroca imaica.

Jesoquirishito ipeacaajiacaji iriguentijeguijiate

⁵ Iriraquea Aapani Irioshi teequea irioquea incanteji irashivantijitete irashintajiaquemparoquea iroaquerari quepatsi choocatajatsineca nocantacoqueca imaica. ⁶ Itioncacojiquerotarite icantamajajitaque:

“¿Arimpate yanaantaque caquinte piquenquejacotantajiacarica? Caquintetari inaque, ¿queroca ocotacani pisavicaventajiaqueriquea?”

⁷ Panaacaavetaquitariquea capichaji pashivantijitete, cotanquitsiquea pishineventajiacariquea caquinte panaacaavaequeriquea.

⁸ Pinintacaajiaqueri maasanopae pipeacaaguecaca inquemisantajiaqueri.”[☆]

Ariqueate iquempetaqueroquea imaica Aapani Irioshi yanaacaamajatsitariquea maasanopae, teequeate iranoncorejanajeji aparó aatoca yanajaiguetsi, cotanquitsiquea imaica tequerataquea amenajigueji yagavejajiaqueroquea maasanopae.

⁹ Cotanquitsiquea Aapani Irioshi caaviji ipintsamajajiacaji maasano, itigarancantacarica Jesoshi ocánico quepatsiqui. Oraqueate icoraquequitiguete teetarite iranaapojajeriji irashivantijitete Aapani Irioshi, cameetsanijite irantsipeventajiacajinijite iroompaquea imetojaventajiaquitaji. Ariqueate ishineventamajatacari Aapani Irioshi itsipatanajari iriatimpaqui imajirontacaamajatajari yanaajapojajiri irashivantijitete.

¹⁰ Maasanopae choocaguetsatsica iriguenti peacaaguetaeroquea Aapani Irioshi, iriguenti nintanquitsi ochoocatantajiacaca, aisa iriatimpa inique iroaroaitanaquequea maasano irijanijiate inchoocatimójiaqueri inquempequempivetapojajempariquea yoganejencamajataguete. Irootaquequeate ocameetsamajatacaca itigarancaqueriquea Jesoshi yatsipetacaajivaecariquea cameetsanijite interoncamajaquero maasano irinetsanaqueca iragavejaquenijite irimeshijiaqueriniji maasano tsarventajiaquemparineca. ¹¹ Ishemajatajiroquea agovaeguisherejia icameetsashirentacaajaji, jero acantantajiacarica Iriri: “Aapani.” Iriatimpa Jesoshi teetarite impashiventacaajiacaji icantajiacaji: “Aviguentijia iguentijeguijia.” ¹² Irootaquequea iquenquetsatacantaacarica Iriri icanti:

“Nontsavetantimójiaqueriqueate iguentijeguijia nontsavetacotantaquempiquea. Oraqueate incapioacajiaquempaguete nontsipajiaquempariguete namashaiventajiaquem-piquea noshineventajiaquempi.”[☆]

¹³ Aisa icanti:

“Naatimpa aparoqueate naventanaquempari iriatimpa.”[☆]

Ariqueate icanti aisa:

“Chocana ocánico, notsipatsipaitacari irijanijiate Aapani Irioshi iquempoguijacaque-naca.”[☆]

¹⁴ Maasano irijanijiate ijamirincajiaque, choocaquea itsinojia, iriraja. Irootaquequea iquempetantacaca Jesoshi ivoaquequea iquempejapojacajiquea aatimpajia caquintejia cameetsanijite irimetojaquenijite iroonijite iragavejantaquemparica ampatsini agavejaguevetatsica irimetojacaante. ¹⁵ Paesatoniqui atsaroacaamajacaroquea ametojane,

[☆] 2:8 Sar. 8.4-6. [☆] 2:12 Sar. 22.22. [☆] 2:13 Is. 8.17. [☆] 2:13 Is. 8.18.

querocampate ancojiaquempani, cotanquitsiquea imaica icoraquequitiquea iriatimpa imeshiajiacaji, jero imaica teequea antsaroacaajemparoji. ¹⁶ Atsajiaquequeate teequea iriojiaqueate incoraquetashijigueji irashivantijitete Aapani Irioshi impintsatacojiaquempariquea, aroguentijiaquea icoraquetashijiaquiti, aatimpajiaquea ichoviquijianaquea Averaameni. ¹⁷ Irootaquequea iquempemajatantapojacajica aatimpajia iriguentijeguijiate cameetsanijite iragavejaquenijite impeaquempa Saserorote Anaantamajatatsica pintsatacotacajica, aisa netsanamajataqueroneca maasano inintaguetica Aapani Irioshi. Aisa iquempemajajiacaji cameetsanijite irimetojaventajiacajiniji impeacotajemparoquea Aapani Irioshi agovaeguisherjia. ¹⁸ Yatsipevaetacaquea iriatimpa, yamenantajivecariquea irovashiantacaajiquerime aatonijite iquemisantajiritsi Aapani Irioshi, irootaquequea yagavejantacaca iramitacojiacaji intampishitacaajiacaji aatonijite icovaequishetacaajitajaji.

3

Jesoshi caaviji yanaavaequeriquea Moishishini

¹ Imaicaquea imaica, napitsarorentarijiate igomajamajarejia Aapani Irioshi, noncantajiaquempiquea aviatimpajia icajemashirentaqueca irira Inquitequitica: pinquencuejamajaterija Quirishito Jesoshi itigarancane Aapani Irioshi, irio Asaserorotete Anaantamajatatsica, iriotaquequea atsarorentajiacaca aatimpajia. ² Iriatimpa iriguenti tampaticamajatiroca inintaguetica tigarancaquerica, iquempetacari Moishishini itampaticamajatirogueti yamitacojiaquerigueti maasano ishiraerijia icantajitica choocatimojiaquerica Aapani Irioshi itsovironaquitequi. ³ Cotanquitsiquea Jesoshi caaviji yanaavaequeriquea Moishishini. Manaqueate iquempetacari peacagaroca tsovironaqui, iriguenti anaanquitsi peacagaroca, yanaaqueroquea tsovironaqui. ⁴ Maasano tsovironaqui choocatarite peacaacaroca, cotanquitsiquea maasanopae choocaguetatsica iriguenti peacaaguecaroquea Aapani Irioshi. ⁵ Iriraqueate Moishishini iriguenti amitantatsica netsanaguequeroca maasanopae icantaguequerica Aapani Irioshi, manaqueate isavicaventiroqueate icamantsicariquea maasano ishiraerijia incantaguequeca Aapani Irioshi oncoramanitapojajeguete. ⁶ Cotanquitsiquea iriraquea Quirishito iriguentiquea Irijanitemajaca Aapani Irioshi netsanamajatapiniqueroca icanqueca Iriri, ipeacaancaricate Imajirote maasano choocatimojiaquerica itsovironaquitequi. Aroguentiquea choocatimojiaquerica itsovironaquitequi ariguete ancantacoguitempani aventajianaquempari aguijavequequea irinetsanataqueroquea maasano icantaguequeca.

Aapani Irioshi irimagorejacaajiaqueri maasano tsarorentajigarica

⁷ Irootaquequea noncantantaquempani ocatica Itioncacaantaqueca Ishire Aapani Irioshi ocanqueguete:

“Imaicaquea ocatica savincaguiteri pinquemajiaqueriguete Aapani Irioshi inquenquet-satacaajiaquempani,

⁸ aatojate piquishoshirentajiguetsijate

piquempejigaritsi choviquijianaquempani ipigapigatsajiacariguete,

yamenantajiacariguete ichooajiaqueguete oquitamampororoitapojaqueguete.*

⁹ [Icanti Aapani Irioshi:] Oraniquiquea irirajia choviquijianaquempani yamenajivecaroquea maasanopae nonigaimojiaquerica ovaetanaque 40 ajagantsini.

Osamaniqueate natsipetacojiavetacari,

cotanquitsiquea teequeate irinintajigueji inquemisantajiaquena.

¹⁰ Irootaquequea nocatsimatantajanacarica,

nocanque: ‘Icantacoguitani itimpinashirentapinijianaque,

tee irinintajigueji intsajiguero noguenavoqui.’

¹¹ Nocatsimamajiaqueri nocantantacarica:

* 3:8 Irirajia ishiraerijia caaviji yogaajica ichooajiaqueguete oquitamampororoitapojaqueguete, icantajiaque aatoca yagavejitsi Aapani Irioshi irajianaqueriquea quepatsiqui icantacaajiaquerica, ariquiteate ipigatsajanacarica.

'Iroosacanica imaica aatojate narejetacaajigaritsi ontaniqui nomagorejacaantajiaquemparimeca.' "✠

¹² Napitsarorentarijiate, inchiqiojitaja picovaeguisheshirentatsijate, piquenquejavetatsija picantitsi: "Aato naventari", povashiantiritsijate Aapani Irioshi anijatsica. ¹³ Imaicaquea imaica pintampishitavacaanaquempajate pincoquempani savincaguiteri aatonijite pinejacameetsatashitaro quempevaerentsi pinquishoshirentantaquempaca. ¹⁴ Arigueti quisho oamajaguiteri Quirishito arejevetapojajempagueti savincaguiteri ametojantaquempaca, aventaguitempargueti quejetaca iroaqueragueti aventanacargueti, ariquea iroguenti antsantantaquempaca arimajaquea ipeacaji itsipavijimajacaca yashintamajatacaji.

¹⁵ Irootaquequea ocantantacaca itioncacotantajitacaroca ocanti:

"Imaicaquea ocatica savincaguiteri pinquemajiaquerigueti Aapani Irioshi inquenquetsatacaajiaquempigueti,

aatojate piquishoshirentajiguetsi

piquempejigaritsi choviquijianaquempica ipigapigatsajiaquenagueti."✠

¹⁶ ¿Queri quemajavecarica Aapani Irioshi iquenquetsatacaajiaqueri, cotanquitsiquea ipigapigatsajiacari? Iriguentijia maasano guintenijavetanquitsica Ejepitoqui yaajijatica Moishishini itsipatsipaivetanajari osamani. ¹⁷ ¿Queri icatsimajiaqueca Aapani Irioshi anaavaetanajaqueate 40 ajagantsini? Iriguentijiaquea covaeguishejianquitsica, ariqueate imetometoitanañi ontaniqui oquitamampororoitapojaquegueti. ¹⁸ ¿Queri icanqueca Aapani Irioshi: "Aatojate narejetacaajigaritsi ontaniqui nomagorejacaantajiaquemparimeca"? Iriguentijia teeca irinetsanatavaqueroji icanquerica. ¹⁹ Irootaquequea amenantajiacaca teequea irarejejiapojemparoji quepatsi icantacaajavecarica Aapani Irioshi, teetarite iraventamajajiguempariji, manaquea iquenquejajivetaca: "Yamataaca Aapani Irioshi."

4

¹ Iroosacanica imaica, choocaturajaquea icanqueca Aapani Irioshi irinetsanajiacajica icanquequea irarejetacaajiacaji ontaniqui irimagorejacaantajiacajica. Irootaquequea noncantantajiaquempica inchiqiojitaja ochoocatitsi ticaavaquempineca aatoca parejetantajaro. ² Iriatimpajia coramani iquemajavecaroquea maasanopae icantajiaquerica Aapani Irioshi, cotanquitsiquea iquenquejajivetaca aatoca yagavejitsi Aapani Irioshi irinetsanataqueroquea, jero icantantajiacarica iriatimpa aatoja yamenajiguirotsi icantacaajavecarica irimagorejajiaquemequea. Ariqueate aquempejiacari aatimpajia imaica aquemajiaquero icamancajica itsavetantajiquerogueti Quenquetsatsarentsimajaca Oganejencatatsica. ³ Cotanquitsiquea aroguenti irimagorejacaajiaque, aatimpajia aventajiacarica Jesoquirishito, icanquetari Aapani Irioshi itsavetacojiaquerigueti choviquijianacajica, icanti:

"Nocatsimamajiaqueri nocantantacaca:

'Iroosacanica imaica aatojate narejetacaajiacaritsi ontaniqui nomagorejacaantajiaquemparimeca.' "✠

Cotanquitsiquea iriraquea Aapani Irioshi iteroncaqueroquea maasanopae paesatoniqui iroaqueragueti ipeacaaguetaarogueta quepatsi. ⁴ Choocatarite itioncacojiqueroquea savincaguiteri sietetapojatsica ocanti:

"Iiraquea Aapani Irioshi imagorejantacaroqueate savincaguiteri 7, irooriji iteroncague-taquero maasanopae ipeacaaguecaca."✠

⁵ Aisa chooca ontaniqui otioncacagueta, ocantiquea:

"Aatojate narejetacaajigaritsi ontaniqui nomagorejacaantajiaquemparimeca."✠

✠ 3:11 Sar. 95.7-11. ✠ 3:15 Sar. 95.7-8. ✠ 4:3 Sar. 95.11. ✠ 4:4 Jen. 2.2. ✠ 4:5 Sar. 95.11.

⁶ Cotanquitsiquea choocaturaja itsipajia irarejetacaajiaquempaca ontaniqui irimagorejacaantajiaquemparica. Iirajia iriquetica itsavetacotimojivetacaca icamantajivetacarigueta shinetacaajiaquemparinemeca teequea irarejeiajemparoji irooriji ipigapigatsajiacari. ⁷ Irootaquequea icantacotsitantacaroca Aapani Irioshi otsipa savincaguiteri ipajitaqueroquea “ocatica savincaguiteri.” Ocoramanivaetapojaji anaanaaguetanajirogueti oshequi ajagantsini iriraquea Aapani Irioshi ichagashirentaqueriquea Taavini itioncantacaca icanti:

“Imaicaquea ocatica savincaguiteri pinquemajiaquerigueta Aapani Irioshi inquenquetsatacaajiaquempigueta,

aatojate piquishoshirentajiguetsi.”[☆]

⁸ Arimegueta irimagorejacaajiaquerime Josoeni igonorjia, aatomequeate ocoramanitapojajigueta iquenquetsatacotirome Aapani Irioshi otsipa savincaguiteri irimagorejacaantajiaquemparica. ⁹ Irootaquequea itsatantajitacaroca iriraquea Aapani Irioshi irimagorejacaajiaqueriquea maasano yashintajiacaca. ¹⁰ Maasanotari imagorejacaajiguica Aapani Irioshi aatoquea yatsipeventajajarotsi ipanquenajivetacaca irimagorejacotapojaquequea,* manaqueate iquempejajari Aapani Irioshi iriatimpa imagorejaquequeate paesatoniqui iroaqueragueta iteroncaguetaquerogueta ipeacaaguecarogueta maasanopae. ¹¹ Iroosacanea imaica jaameshiatsi antampishiventamajateroja aguijamajatanakeriqueate Aapani Irioshi aatonijite aquempejajaritsi iriatimpajia coramanipaequitica teeca inquemisantajigueriji, manaqueate antsipatsipaiquempari amagorejajipojaje.

¹² Maasanoqueate iguenquetsatsare Aapani Irioshi anijaque aisa caaviji agavejamatati. Oquempevecaroquea cotsiro tsaampitsantsameniri mavite otsaampinampitaque cotanquitsiquea caaviji anaqueroquea, agavejaquequea onchagashirentajiacajiqueate ashirequi quejetaca tsaampitsantsameniri osatajavaecajigueta agaviroqui irooca aguesaqi, aisa oguisotoaguetaqueroqueate maasanopae aquenquejajiaqueca irooca cameetsari irooca covaeguisheru. ¹³ Yamenamajatiroquea Aapani Irioshi maasanopae, jero aatoquea quericaca agavejatsineca intsititapitsaquempariquea, aisa irioquea cantanquitsineca aricaca apeacaajiacaa inintaguetica irooca tee.

Jesoshi iriguenti Asaserorotete anajaiguirica maasano saserorotejia

¹⁴ Cotanquitsiquea choocaquea Asaserorotete anajaiguirica maasano saserorotejia. Iriatimpa iriguenti Jesoshi Irijanite Aapani Irioshi. Iriotaquequea atsomajanajatsica jenoqui itsipatapojajari Iriri inquitequi. Irootaquequea nocantantaquempica quisho oamajaterojate aventashirentacaca acantajiaquegueta: Notsarotentacari Jesoshi.

¹⁵ Iriraquea Asaserorotete Anaantamajataatsica teequea inquempejiguempariji itsipajia teeca iragavejajigueti impintsatacojiacajia yamenajiacajigueta teequeate antampishitashijigueriji covaeguisherentsipae. Ashi aatimpa Asaserorotete Anaantamajataatsica yamenaquitiroqueate coramani yatsipevaequitarogueta maasanopae atsipevaeacaca aatimpajia, jero aisa yasereserevaequeriquea ampatsini yamenantavetacari inintavecaquea irantacaquerime teeca irininteji Aapani Irioshi quempetaca yasereserejiacajigueta aatimpajia imaica incovaetacaajiacajiniji, cotanquitsiquea iriatimpa teequea iragavejeriji incovaeguisheretacaguempariji. ¹⁶ Iroosacanea imaica anquempejiquempejiitapojaquempari cavintsajantamajatanatsica savicanquitsica imajirontamentoqui, aatojate atsaroacagarotsija aventanaquempari impintsatacojiacajiniji, aritaque incavintsajamajacajia iramitacojiacajia.

5

¹ Maasanoquea ipeacaajitaca saserorote anaantamajatanquitsica icoguiimojitiri irapicacaintete inintacaajiqueriquea cameetsanijite irioniji quenquetsatacojiacajiaqueerine iramanapiniquerigueta Aapani Irioshi, aisa irajaiavaqueronijite yaajianaquenerica irojocaa

[☆] 4:7 Sar. 95.7-8. * 4:10 Ocaticaquea teequea oncanteji aato acatsiqueta acaniqui quepatsiqui. Choocaquea mavite ocantacoquea: (1) Maasano yashintajiacaca Aapani Irioshi aato imaica yatsipeventajajarotsi ipanquenajivetacaca cameetsanijite irimeshiaqueriniji, yagataquerotari Jesoshi imetojaventajiacajigueta ishetacojiacajiaqueerine maasano aventajiacarica. (2) Aisa ocantacotaquero arejeiaquempagueta inquitequi irimagorejacaamajiacajia maasano yashintajiacaca.

jiaquenerica Aapani Irioshi. Aisa irioquea jitorejajiaquenerineca viratsipae itaapiniija-queriquea cameetsanijite aatoniji icatsimatimentiritsi Aapani Irioshi igovaeguisherejia. ² Ariqueate iquempejiacariquea irapicaquinteteni, teetarite intampishitashijigueroji taaca opajitapae. Irootaquequea yatsipetacotantajiacarica irapicaquinteteni teeca intsajigueji itimpinashiretantajianacaca, ipintsatacojiacariquea. ³ Yamenaquequea ariqueate iquempetacari iriatimpa aisa icovaeguishetaca, jero icantacoguitani yaapini-jiguiniriqueate Aapani Irioshi viratsipae ijitorejajiaqueneriquea cameetsanijite aatonijite icatsimatimentiritsi igovaeguishere, ariquea iquempetsitaroqueea ijitorejajiaqueneriquea irapicaquintejiate cameetsanijite aatoniji icatsimatimentajiguiritsi Aapani Irioshi igovaeguisherejia irashijia iriatimpajia. ⁴ Teequee quericaca inchiquiojitsita impeashiquempa saserorote anaantamajatanquitsica, ijamirincaque iriguentiquea nintacaaqueriquea Aapani Irioshi. Quempetaca Aaronini iriotaquequea nintacaaquerica.✠

⁵ Ariqueate iquempetaca Quirishito teequee inchiquiojitaja impeguempaji saserorote anaantamajatanquitsica irishineventantajitaquemparica, iriguentiquea nintacaaqueriquea Aapani Irioshi ipeacaacariquea, icocanitarite icantiriquea paesatoniqui:

“Aviatimpa aviguenti Irijani,

imaica ocatica savincaguiteri aviro nashimajaca nirijanite.”✠

⁶ Aisa chooca otsipaqi itioncacojiqeroqueea icanqueca:

“Aviguenti saserorote, pincoguitempaniquea pisaseroroteguiteni,

quempetajimpiqueate Merequisereni.”✠

⁷ Coramani choocatirajagueti Quirishito acaniqui quepatsiqui, irooshipojigueti irime-tojate, yamanaqueriquea Aapani Irioshi agavejanquitsica iraavajeri aatoniji imetojitsi, icajemanaque iririjencani yapijipijivaequeneriquea yamanaquerigueti, oparijaatanaque ijaquija. Iriatimpa iquemavaqueri, iquemisantamajataqueritarite inetsanamajaquero-queea maasanopae inintaguetica. ⁸ Arimajaveca irio Irijanite Aapani Irioshi, cotanquitsiquea yatsipevaecaqueate cameetsanijite intsaquenijite inquemisantamajaqueri Iriri irinetsanamajaqueroqueea maasanopae inintacaaquerica. ⁹ Iroompaqueea inetsanama-jaqueroqueea maasanopae ipeantacaca meshiajiaquenerineca maasano quemisantaque-rineca netsanataqueroneca icanqueca cameetsanijite incoquempaninijite inchoocajia-que. ¹⁰ Irootaquequea inintacaantacarica Aapani Irioshi impeaquempa saserorote anaantamajatanquitsica, inquempetajempari Merequisereni.

Shoshoh povashiantajiguirotsijate pitsarotentajiacarigueti

¹¹ Chooca oshequi nonintavecaca nontsatacaajiaquempime quero oocani ocatica, cotanquitsiquea inchiquioji poanaquero caarica pitsatantajaro.

¹² Piquemitsijavetacaniqueate coramani itsavetacojiqeroqueea iguenquetsatsare Aapani Irioshi. Pintsatacaantajiaquemequeate aviatimpajia imaica, cotanquitsiquea coacojianatsimpiquea intsatacaajitajempi iroquetinica itsatacaajivequempica iroaqueragueti. Manaqueate quempetatsitirajampitarite chaajaniquirijia tequerataca irishecatempaji, inintajiaqueroqueea itsomija. ¹³ Irirajiaqueea coacojianquitsica intsatacaajitajeri iroquetinica itsatacaajiquerica teequee intsajigueji taaca opaji cameetsatatsica, aisa taaca opaji covaeguisherentsipae, manaqueate iquempejiacari chaajaniquiri tequerataca irantsopireje atsomitatsitiraja. ¹⁴ Cotanquitsiquea irirajiaqueea amejitsica icomajamajajiaqueate jac itsamajajiaqueroqueea taaca opaji cameetsatatsica aisa taaca opaji covaeguisherentsipae. Iriatimpajia iquempejiacari quenquevari shecaguetatsica, yagavejajiaquequeea inquemajiaqueroqueea managuetanquitsica.

6

¹ Irootaquequeea noncantantajiaquempica imaica jaame anaavaetanaquero nontsatacaajiaquempica iroaqueragueti noparianacarogueti nontsavetantaquerigueti Quirishito,

✠ 5:4 Eq. 28.1. ✠ 5:5 Sar. 2.7. ✠ 5:6 Sar. 110.4.

antsamajajiaqueroquea maasanopae Iguenquetsatsare Aapani Irioshi, anquenquevari-tantanajempaca ashirequi. Aatoja apijipijivaetiro intati notsatacaajiaquempica iroaque-ragueti. Jac notsatacaajiaquempirotarite teequea quericaca agavejatsineca irimeshia-caanquempauea inchiqiojijata. Iriguenti irishetacojitaqueeate irirajia pishonca-jianaqueroquea ipanquenajiavecaca metojashirentaquerimeca, ariqueate incantashitatija-ianaquempauea ishirequi iraventajiaquempari Aapani Irioshi. ² Aisa aatoja aquenquet-satacotapiniijajirotsi intati quejecaroca ocatica: iviñacajatantajitigueti, irooca ipamiji-tirigueti ishinquireguishiqui tsarorentajiacarica, irooca intancoretancoretanajequeate metojaripae, irooca aisa savincaguiteri incatsimatantajiaquemparica Aapani Irioshi teeca intsarorentajiguempariji. ³ Iriogueti nintanquitsineca Aapani Irioshi, arimpate antsamajataqueroquea maasanopae inintaguequeca.

⁴⁻⁶ Choocajiavecaqueate quemajiavecaroca Iguenquetsatsare Aapani Irioshi, cotan-quitsiquea yovashiantajianajiroquea itsarorentajiavecarigueti. Icavintsajamajiavecari Aapani Irioshi, aisa ichagashirentajiavecariquea Ishire irooca aisa itsajiavecaro caaviji oganejencamajataca Iguenquetsatsare, cotanquitsiquea iriatimpajia yovashiantajiana-jiroquea maasanopae. Yamenajiavecaroqueate aisa yonigaimojiaquerica Quirishito capichaji iragavejane ironigaamajataqueca oncoramanitapojajegueti, cotanquitsiquea querocaca icojiacani quempecaquea teeca iramenimajigueroji. Imaicaquea imaica que-rocampate ancojiaquerini incantashitiantajianajempaca inquempejianajempaquea it-sarorentajiavecarigueti iroaqueragueti, oquempetacaquea yapijitajiri aisa, yompajaco-jiajiriquea Irijanite Aapani Irioshi, yoguipashiventajajiajiri aisa, yamenacaajiaqueriquea maasano.

⁷ Oquempetacaroquea quepatsi omiguijaatapinitirogueti otejigueti incani, iroogueti tsoroantaguetaquemparone panquirentsi ishecajiguetaacaca ishineventacaca ashincaro-ca, iriguentiquea guitsoroaguequero Aapani Irioshi, icavintsajaqueriquea ashincaroca. ⁸ Cotanquitsiquea oraqueate quepatsi otsoroantacaca samerento aisa poronquetopae teequea oncameetsapatsateji, manaquea incantajiqueroquea: “Isaa”, iroompauea in-taitsijitemparoquea.

Aapani Irioshi inetsanamajiaqueroquea maasanopae icanqueca

⁹ Noquempejiavecaroquea imaica noquenquetsatacaajiaquempigueti, cotanquit-siquea notsajiaque aviatimpajia, nopintsajiacaca, imeshiajiaquempiquea, panaana-jiriquea nocantacovecaca iroaqueragueti. ¹⁰ Iriraquea Aapani Irioshi icocaniquea itampaticamajiaqueroquea maasanopae, jero incavintsajantajiaquempica oncoramani-tapojajegueti, aatoquea ipeacotsitimpitrotsi maasanopae cameetsaripae pipeacaajiacaca, aisa aatoquea ipeacotsitimpitrotsi pipintsamajatacarigueti pamitacojiaquerigueti papit-sarorentarijiate, pamitacoguitiriniquea arejevaeca imaica. ¹¹ Nonintajiaque maasanojia-quea pincoquempanijate pinquempejiaqueroquea imaica pintampishiventamajajiana-queeroquea ovaetantanaquempaca pamenamajatajemparoca poguijacoqueca onet-sanatantajempaca. ¹² Teequea nonintajigueji pimperajiguempa, iroguenti nonintajiaque pinquempejiaquempariqueate coguitatsica atsipetacovaetanquitsica tsarorentamaja-jianacarica, iriojiaqueate icavintsajamajataque Aapani Irioshi yojocajiaqueneriquea icantacaajiaquerica.

¹³ Coramani iriraquea Aapani Irioshi icanqueri Averaameni inchoocaque irijanite, cotanquitsiquea teequea incanteji: “Yamenaquenaquea anaaquenaca teequea namatai-matempaji”, teetarite inchoocateji anaaquerineca iriatimpa. Manaquea icantaque: “Arimaja nonetsanaquempiro, naroguentitari Yave cantaquempica.” ¹⁴ Ariqueate ican-queri: “Arimajaca noncavintsajamajaquempi noshequiamajiaqueriquea pinchoviqui-jianaqueca.”[☆] ¹⁵ Iriraquea Averaameni teequea imperatemparoji yoguijavaqueroqueti, manaqueate yoguijaguitiniquea irinetsanatavaquerotajate Aapani Irioshi maasanopae icanqueca, iroompauea inetsanamajiaqueroquea.

¹⁶ Cotanquitsiquea iriraquea caquinte taaca opaji ininqueca incanqueriquea it-sipa, ininquegueti inquemisantamajiaqueriquea, yaventacocaroquea ivajiro anaaque-rica, iroguenti icanqueri: “Arimajaca nocanque, yamenaquenaqueate Aapani Irioshi

☆ 6:14 Jen. 22.16-17.

tee nontsojeimatempaji. Oraqueate managueti namatavijaquempiquea incatsimataque-naqueate.” Iquempetaquerogueti imaica itsaque itsipa teequea iramatavijeriji. ¹⁷ Irootaquequea iquempetaancarooca imaica Aapani Irioshi, ininquequea intsajia-que irirajia incavintsajajiaqueca aatoquea icantashitatigarotsiquea icantajiaquerica, icantantacarica: “Nonetsanamajaqueroja maasanopae nocantajiaquempica, naroguentitari Irioshimajaca. Aatoquea nocantashitatigarotsi.” ¹⁸ Pinquenquejeroja, iriraquea Aapani Irioshi iroquetitaqueate icanque incavintsajacomajajiaqueri tsaroven-tajiaquemparineca, ariquea icanque aisa irinetsanataqueroquea maasanopae ican-tajiaquerica aatoquea icantashitatigarotsi, iriguentitari Irioshimajaca, aato yagave-jitsi yamataga, aisa aato yagavejitsi itsojega. Irootaquequea atsatsimajatantajiac-arooca aventaventaicariguetti amanajiaqueriguetti irimeshiacojajaji, jac imeshiajajaji. Irooquea shinetacaavaejiaajica aguijaguijaiqueriguetti irinetsanamajaqueroquea ican-queca. ¹⁹ Irootarite tampishishirentacaajiacajica aatonijite otatsincajitsi covaeguisheta-caantatsica, quishoquea ajiricamajaqueri aatonijite oguipegajitsi, quejetacaquea cavore-jatatsica agaparancajatatsica ajiriquiroca quenajarontsi aatoniji itatsinquiro choviga. Oraquea tampishishirentacaajica manaquea agaparancavaetapoja antaqueronta-morenaquitica intsomepoguiremajacaqui Taverenacoromajacaqui, ²⁰ iquijapojajiguetti Jesoshi, iroorijite ijivajivaitsitacaji inquenquetsaventapojajaji. Ipeapojaja Saserorote Anaantamajatatsica isaserorotepojaji, manaquea incoguitempani irisaseroroteguiteni, iquejetantapojajarica Merequisereni.

7

Jesoshi iriguenti saserorote quempecarica Merequisereni

¹ Coramani iriraquea Merequisere iriguenti imajirojiate Saremejiaquitica, aisa iriguenti isaserorotete Irioshimajaca Anaantamajatatsica. Iroompaquea aapojacaguetti savincaguiteri yoanaque Averaameni itsipatsipaitanacari yashintajiacaca itonquivo-javajari majirontajiatatsica aanaquerica irijanitsorite yashimirintavacaajiacca, ariqueate yagavejajiaqueriquea. Iroompaquea icoraquejiajiguetti, isotoanaque Merequisere yaa-jiavajiri icantavajiriquea: “Incavintsajamajaquempi Aapani Irioshi.” ² Ariquea iriraquea Averaameni yojocagarantsitanariquea 1/10 (*un décimo*) * maasanopae iraja-aropae yaapitsajiajavajirica majirontajiatatsica yashimirintavacaacaguetti. Oraqueate ivajiro Merequisere iroguenti ocanque “majirontatsica tampaticamajatiroca”. Aisa oraquea Sareme iroguenti ocanque “anchoocajiaque cameetsa, teequea taaca opaji ashoshoguitetimentempaji”, irootaquequea icantantajitacarica “Majirontatsica guin-tenitacaantantatsica cameetsa”. ³ Oraquea tioncarentsi teequea oncanteji taaquea irijanintacari aisa taaquea choviquitanaquerica. Aisa teequea oncanteji querocaca ivoantacaca aisa querocaca imetojantacaca, manaquea oquejevecaro teeca irimeto-janeteji, irootaquequea icantantajitacarica manaquea iquejevecari Irijanite Aapani Irioshi, icocaniqueate isaserorotetini.

⁴ Iriraquea Averaameni caaviji yanaantavecaquea iriguenti choviquijianacajica aatim-pajia, cotanquitsiquea yojocagaranqueneriquea Merequisere 1/10 yaapitsajiavaque-rica majirontajiatatsica yashimirintajiacariguetti, irootaquequea atsantantajiacaca caav-iji yanaaque Merequisere, yanaaqueriquea Averaameni. ⁵ Ocoramanitapojiguetti ichooaque Irevi ichoviquitanaqueca Averaameni. Iroompaquea ocoramanitapojajiguetti aisa iriraquea Aapani Irioshi iquenquetsashirentacaqueri Moishishini itioncantacaroca icanti: “Iriguenti peajianquitsineca saserorotejia ichoviquijianaqueca Irevi.” Aisa icanti: “Iriraquea saserorotejia irojocajitaquenerija 1/10, iriguenti jocajiaquenerineca maasano igonorolja.” Pinquenquejerijate iriraquea ishiraerijia, iriguentijiavetaca igonorolja, iriguentijiavetaca aisa ichoviquijianaqueca Averaameni, cotanquitsiquea yojocajiaque-neriqueate. ⁶ Iriraquea Merequisere teequea irioqueate choviquivetemparine Irevi,

* 7:2 Yojocagarantsitanariquea 1/10 (*un décimo*) ocanque onchoocaqueguetti 10 irojocagueneriquea aparo, onchoocaqueguetti 100 irojocagueneriquea 10.

cotanquitsiquea yaavaqueroquea 1/10 yojocaquenerica Averaameni. Ariqueate ican-tiri: “Incavintsajamajaquempiquea Aapani Irioshi.” Pinquenquejeja iriguenti can-tanquitsi imaica Merequisere iquenquetsatacaaquerigueti Averaameni icantacoquea Aapani Irioshi incavintsajamajaqueri. ⁷ Irira anaaquerica itsipa, iriotari cantaquerine: “Incavintsajamajaquempiquea Aapani Irioshi”, irootaquequea imaica itsamajatanta-jitacaroca iriraquea Merequisere yanaaqueriquea Averaameni. ⁸ Iriraquea sasero-rotejia yojocajiqueneca 1/10 iriguentijia metojanetatsica, cotanquitsiquea itioncacoji-querigueti Merequisere iroguenti iquempetacajitacari saserorote teeca irimetojaneteji. ⁹ Oraqueate yojocagaranquenerigueti Averaameni 1/10, quempecaquea iriguentica jocagaranquenerica Irevi aisa maasano ichoviquijianaquea, iriguentijiatari ichoviqui-jiani Averaameni. ¹⁰ Oraqueate yoanaquegueti Merequisere itonquivojavajarigueti Averaameni, quempecaquea ariguentica iconoajiacari Averaameni maasano inchoviqui-jianaquea, irooriji quempetaca ichoocajiaque itsinoqui Averaameni.

¹¹ Coramani itioncacotaquerogueti Moishishini Icantacaantaquea Aapani Irioshi, ocanquequea iriojia peajianquitsine saserorotejia ichoviquijiani Aaronini, ichoviqui-tanaquea Irevini. Irirajia saserorotejia itsatacaajiaqueriquea maasano irinetsanajia-quero, cotanquitsiquea teequea iragavejajigueti saserorotejia irogameetsashirentanta-jigueti. Arimegueti iragavejajiaquerome, aatomequea itioncacojitarime itsipa Sasero-rote quempetajemparineca Merequisere, aatoca ichoviquiti Aaronini. ¹² Aritarite inchoocategueti itsipa saserorote teeca inchoviquitanaque Aaronini, onchoocatejate otsipa Incantacaantaquea Aapani Irioshi irinetsanajiteca inchoocaquenijite itsipa saserorote. ¹³ Iriraquea icantacajitaquea quempetajarica Merequisere, teequea irio ichoviquini Irevini, itsipaquea choviquitaqueri teeca inchoocatimateji aparo igonoro peanquitsica saserorote amitacotirica ishiraerijia aretarequi. ¹⁴ Atsajiaquetarite iri-raquea Amajirote iriguenti choviquitanaqueriquea Joraa. Irirajiaquea ichoviqui-jianaquea Joraa teequea incantajigueriji Moishishini irisaseroroteteja. ¹⁵ Ariquea maasano oatica nocantaquea imaica oconijamajataquequea aquenquejaquerogueti choocaquea imaica itsipa saserorote quempetajarica Merequisere. ¹⁶ Ipeacagueti sasero-rote, teequea inquempevetempariji irirajia ocantacotaquea tioncarentsi cantatsica iriguentijia peanquitsineca saserorotejia ichoviquijiani Aaronini. Irirampani pean-quitsica saserorote imaica, choocaquea iragavejane, teequea agavejeriji metojagantsi, irootaquequea ipeantacaca saserorote. ¹⁷ Icantaquearitarite Aapani Irioshi:

Aviguenti saserorote, pincoguitempanija pisaseroroteguitenija,
quempetajimpiquea Merequisereni.✠

¹⁸ Choocavetaca icantacaantaquea Aapani Irioshi itioncacaantaquea coramani, cotan-quitsiquea icaratacaapojajiro, teetarite ontampishimajateji, tee agavejamajateji. ¹⁹ Jero teequeate agavejeji ogameetsashirentanteji. Cotanquitsiquea choocaquea imaica cameetsamajatanquitsica aguijacoshirenqueca piजारoca, irootaquequea aventaven-taquempaca anquempejipojempariniji Aapani Irioshi.

²⁰ Tee incantashitempaji Aapani Irioshi, icantamajataque: “Arimaja oca nonca-mantempica, naroguentitari Irioshimajaca.” Oraqueate ipejaiavecagueti ichoviqui-jianaquea Irevini saserorotejia, teequea incanteji Aapani Irioshi incoquempanijate irisaseroroteguitenija. ²¹ Cotanquitsiquea oraquea ipeacaacarigueti Quirishito sasero-rote, icantaqueeriquea. Choocaquea tioncanquitsica, ocanti:

“Irioquea Majirontamajatsica cantatsica, aatoquea yamatagatsi,
aatoquea icantashitatigarotsi icanquempica, icanquequea:
‘Aviguenti saserorote, pincoguitempaniquea pisaseroroteguiteni,
quempetajimpiqueate Merequisereni.’ ”†

✠ 7:17 Sar. 110.4. † 7:21 Sar. 110.4. Oconoagarantaca iroquetinica paperi iguenquetsatsarequi guiriego tee ontionquempaji acaniqui, “quempetajimpiqueate Merequisereni”. Maasano itioncaciaquero Evereojiaqui 5.6; 7.17.

²² Irootaquequea ipeantacaca Jesoshi amenamajatajeroneca iroaquerari paaquito[‡] onet-sanatimenquempañiji, ocaticaquea anaavaetapojajiro iroquetinica.

²³ Iriiraquea ichoviquijianaqueca Irevini peajavetanquitsica saserorotejia icaramir-incavaequequea jmm, teetarite inquishometojanejigueji, imetojajivajiqueate itsipaquea quejejiapojajarica. ²⁴ Cotanquitsiquea iriraquea Jesoshi icoguitani yanijaguitini, aatoquea ichoocati quejetimatajemparinca, incoguitempani irisaseroroteguiteni. ²⁵ Irootaquequea yagavejantacaca incoquempanijate irishemajataqueneri igovaeguisheremaasano aventajiaquemparineca aatonijite icatsimatimentiriti Aapani Irioshi igovaeguisherajia, icocanitarite ichoocati iquenquetsaventajiaqueriquea nintajianquitsica inquempajipojajempari Aapani Irioshi.

²⁶ Irootaquequea atsatantajiacarica Jesoshi iriosacanica Asaserorotete Anaantamajataatsica acoacojiacaca. Iriguentiquea Iriomajataatsica, teequea incovaeguishetimatempaji, teequeate impeacaaguishetimatemparoji covaeguisherentsi. Aisa teequea inconoajiguempañiji covaeguishejiatsica inquempajiaquempariquea iriatimpajia, aapojajagueti icajemajiri Aapani Irioshi yatsomajanajiri jenoqui ichoocatigueti, yanaacaavajiri yanaantamajataque. ²⁷ Teequea ariquea inquempajiguempañiji itsipa saserorotejia anaantamajianquitsica. Iriatimpajia icantacoguitaniquea ijitorejajiguiniriquea Aapani Irioshi viratsipae yojocajiaqueneriquea aatonijite icatsimatimentajiguiriti icovaeguishejiacagueti, iroompaquea iquejejiacqueneriquea igonorojia. Cotanquitsiquea iriraquea Jesoshi inchiqiuojitaquea ipimantaca imetojaventajiacaji iriatimpa. Irooqueuea imetojimataquegueti aparo, ari iteroncaquero maasano, teequea irinintacojitajeroji irimetojaventajiajaji aisa. ²⁸ Oraqueuea itioncacotanaqueca Moishishini coramani ocanti iriguenti peajianquitsineca saserorotejia anaantamajianquitsica ichoviquijianaqueca Aaronini. Cotanquitsiquea iriatimpajia tee intampishiteji, caquintejiatarite ijamirincati. Irootaquequea icantantacaca Aapani Irioshi ocoramantapojajigueti: “Naatimpa naroguenti Irioshimajaca teequea namataguempaji. Iriiraquea Irijani incoquempaniquea irisaseroroteguiteni, icocaniquea icomajamajataca teequea incovaeguishetimatempaji.”

8

Jesoshi iriguenti asatecapojanquitsica niganqui onetsanamajaquempaniji iroaquerari paaquito

¹ Jero ocatica imaica nonintamajataque pintsajigue: choocaquea Asaserorotete Anaantamajataatsica notsavetantaqueca. Imaica chooca jenoqui inquitequi isavicaque itincamijempequiqui Oganejencamajataatsica isenampijacari imajirontamentoqui.[☆] ² Isaserorotetaquequea Taverenacoroqui, oratica Taverenacoromajataatsica ipeacaacaca Amajirote, teequea impeacaajiguemparoji caquinte.*

³ Maasano saserorote anaantamajatanquitsica iroguenti ipeashicariquea saserorote anaantamajataatsica iramaquenerinijite Aapani Irioshi irojocapinijiquenerica, aisa irijitorejajiaquenerinijite viratsipae irojocajiaqueneriquea Aapani Irioshi aatonijite icatsimatimentajiguiriti igovaeguisherajia irashi iriatimpajia aisa irashijia igonorojia. Ariquea oquejetimotacari aisa iricatica Asaserorotete inintacotimentajiquero onchoocaque irojocajenerica Aapani Irioshi, ipimantatsinotantajaca. ⁴ Icocanime inchoocaqueme ocantiqui quepatsiqui aatomequea ipegame saserorote, choocajatarite saserorotejia jitorejajiguinirica Aapani Irioshi viratsipae iquempetacaajaroqueuea itioncacotanaqueca Moishishini. ⁵ Iriatimpajia manaquea yantapinijigui Taverenacoroqui

[‡] 7:22 Oraqueuea paaquito iroguenti icantamajajitirica itsipa irinetsanamajajitenerica. Ocaticaquea iroaquerari paaquito icantajiacajiquea Aapani Irioshi irishejiajeneri igovaeguisherajia maasano aventajiaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaguegueti Moishishini, otsipa icanquerica Taavini.

[☆] 8:1 Sar. 110.1. ^{*} 8:2 Oraqueuea quitsaarentsivanco icantajitica Taverenacoro isaserorotejia vetacagueti coramani, manaquea oquejevecaro ovaantorite Taverenacoromajaca choocatatsica jenoqui inquitequi, iroguentiquea Taverenacoromajaca itsarotentajitarica Aapani Irioshi. (Pamenero otsapa 5.)

ipeacaajicaca iquempetacaajitacaro icantajiaquerica Aapani Irioshi coramani, manaquea oquejevecaro ovaantorite Taverenacoromajaca inquitequitica. Irootaquequea icantsitancarica Moishishini coramaniqui irooshipojigueti impeacaaquemparo: “Arimajaca pimpeacaamajaquemparojate pinquempetacaamajaquemparojate nocantaguequem-pica ontaniqui otsempiqui nonigaaguetaquempirogueti.”[☆] 6 Cotanquitsiquea imaica isaserorotetaquegueti Jesoshi anaavaequero isaserorotetaquegueti iriatimpajia, irio-tarite amaqueroa paaquito anaantavaetanquitsica, anaantavaetaquetari icantacaaca-jica irinetsanaguecajica.

⁷ Oganejencamajataquempamegueti iroquetica paaquito, aatomequea inintacoji-tirome otsipa. ⁸ Cotanquitsiquea Aapani Irioshi teequea irishineventajiguempariji irirajia itioncaqueneca Moishishini, teetarite irinetsanamajateroji icantajiaquerica. Irootaquequea icantantacaca iriatimpa:

“‘Oncoramanitapojajegueti nompeacaquenempari inchoviquijianaqueca Ishiraeri aisa inchoviquijianaqueca Joraa paaquito iroaqueratajatsineca.’ Irootaque icanque Amajirote.

⁹ ‘Aatoja noquempetacaajarotsi paaquito nocantajavecarica choviquijianaquerica nacatsajianajirigueti noguisotojaijairigueti Ejepitoqui, teetari irinetsanapinjigueroji nocantajavecarica paaquitoquitica. Irootarite nopitsocapitsatanacarica.’ Irootaque icanque Amajirote.

¹⁰ ‘Jeroquea paaquito nompeacaajenemparica ishiraerijia oncoramanitapojajegueti.’ Icantiquea Amajirote:

‘Noamajaqueneri nogantacaantanejia iguenquejanejiaqui, nontioncantsitenempari ishirejiaqui.

Naroguentiquea irioshiquem-paca, iriojiaquea nashintajiaquem-paca.

¹¹ Aatoquea quericaca cantajiritsi igonorojia aisa ijitanepae: Intsishiatsi pintsatavaque-rija Amajirote, maasanotari intsajiaquena, intsajiaque maasano teeca iranaanteji aisa anaantajiatsica.

¹² Nompintsatacojiguempari nompeacotsitajempari igovaeguisherejia, aatoquea noquenquejajirotsi ipeacaaguishavecaca.’^{”☆}

¹³ Oraqueate icantacoquerogueti Aapani Irioshi ocatica paaquito “iroaquerari”, iroguenti ocanque opijaaro iroquetinica coramanipaequitica. Oraqueate iroquetinica paaquitoquitica opaesatotacovaetanaque, irooshipoji ompeanajempa.

9

Taverenacoro quepatsiquitica aisa otsipa inquitequitica

¹ Oraqueate iroquetica paaquito, iroguentiquea icamanquerica Aapani Irioshi intsati-mentajiaqueniji quero incojiaquempani intsarovenquemparigueti aisa impeacaajiaque-nemparigueti tsovironaqui quepatsiquitica irashintaquempaca. ² Ipeacaajicanari quitsaarentsivanco icantajitiro Taverenacoro. Ariquea oticaamorenataca ovagantepo-jacagueti. Intsompoguiguitepojaquegueti icantajitiro Igovejencarequi irooriji irashi Aapani Irioshi, ochoocatantapojacaro tsivorentsi manaquea ojerenquijerenquiataco-taca, aisa chooca mencotsi itaromaantajitaroca pan ipeacaajicanarica. ³ Antaqueronta tsipamorenatapojatsica ochooacque otsipaguete icantajitica Igovejencamajarequi inato-jencatapojacagueti Aapani Irioshi. ⁴ Ochooacque ashi iroatimpa itaantajitaroca casan-caveneri, yapamancajistica cavorejatatsica ooro. Ochoocatsita aisa inchacotanaqui icanta-jitica *aareca* ashi paaquito* yapamanquitsitantajitaro ooroqui. Oraqueate intsompogu-i qui inchacotanaquiqui ariquea osavicaque gorintenaqui ipeacaantajicaroquea ooro yoguijaantantajitaroca manaa, otsipatsipaicaro igotiro Aaronini peshiananquitsica, aisa

☆ 8:5 Eeq. 25.40. ☆ 8:12 Jer. 31.31-34. * 9:4 Ocatica paaquito ocantacoqueca iroguenti yojocaquenerica Aapani Irioshi Moishishini. Pamenero itsavetacojiquerogueti paaquito isavivanaqui otsapaqui 7.22, iro tsatacaaquempirone.

mavite mapicota itioncantacaroca Aapani Irioshi paaquito. ⁵ Oraqueate osavoqui incha-cotanaquiqui itsiquirijapinijitirogueti iriraja viratsipae aatonijite icatsimatimentiritsi Aapani Irioshi igovaeguisherejia choviquijianacajica, ariqueate ichoocajiaque mavite irashivantijitete Aapani Irioshi, ipeacaajitaca cavorejatatsica ooro, cantashivanquijia-acaquea ishivanquipae. Ipajitacaquea querovipae. Oraniquiqueate oraniqui ariquea icoraquepiniquequea Aapani Irioshi iriatimpa itsirencashimpoquirerejavaequequea. Imaica ariotapoji nocamantajiaquempica, aatoquea noguisotoamajatirotsi maasanopae.

⁶ Oraqueate iteroncamajajiaqueroqueti ipeacaajiacarogueta maasanopae, iquijajitaitapinique saserorotejia savincaguiterpaequi isavicaventajiaqueroquea icantague-queca Aapani Irioshi, cotanquitsiquea iroguenti iquijantapojaca iroquetiguitepojatsica.

⁷ Teequea inquijajitaitantajiguemparoji otsipaguite intsompoguiremajacaqui. Iriguentiquea quijantaro saserorote anaantamajatanquitsica. Iriatimpa apaniro iquiji apajencaro savincaguiteri ajagantsinipaequi. Aato iquijashita aatogueta yaajatanontanaca iriraja viratsipae aatonijite icatsimatimentiritsi Aapani Irioshi igovaeguishere teeca intsatacojiguempaji iriatimpa aisa igonorojia. ⁸ Iriraquea Ishire Aapani Irioshi iquen-quejacaajiacajiroquea maasanopae ocatia cameetsanijite antsajiaqueniji, choocatirajagueta iroquetica Taverenacoro, tequeratatiraja ironigagajiro quero ancojiaquempani anquijantapojempaca Igovejencamajarequi. ⁹ Ocameetsavaeque anquenquejajiaque-rojate cameetsanijite antsajiaqueniji maasanopae yojocajiquenerica Aapani Irioshi aisa maasano viratsipae ijitorejajiquenerica teequea iragavejajigueti irishejiaquero-queate igovaeguisherejia amajiaquenerica Aapani Irioshi aatonijite icatsimajiguiritsi, irootaquequea icantacotantaguitanica omintsaroashirentaguitirini yamenajiaquegueta icovaeguishejiaca. ¹⁰ Tequeratagueta incoraquejeti Quirishito, icocaniquea iquenquejajia-que iriatimpajia taaca opaji irishecajiguetempaca aisa irimirajiguetempaca teeca incantimentantajiteji, irooca aisa quero incojiaquempani inquivatsinojiaquempagueta, aisa otsipapae itsatacaantajitica tsinotsiquitica. Ocameetsaveca coramani, cotanquitsiquea imaica icantashitatijaaroquea Aapani Irioshi maasanopae.

¹¹ Jac icoraquequititarite Quirishito ipeaca Asaserorotete anaajiguirica maasano saserorotejia, irisaserorotetacotaquero cameetsaguetanquitsineca.† Ocoramanitapojigueta yatsomajanaja jenoqui iquijantapojaro Itaverenacorotemajaca Aapani Irioshi caavijica anaque oganejencamajataca, teequea irioquea peacaajiguemparone caquin-tejia, aisa teequea onchoocateji ocaniqui quepatsiqui. ¹² Oraqueate iquijapojirogueta Igovejencamajarequi ichoocamajatigueta Aapani Irioshi, teequea irooquea quijacaguerine iriraja caaverapae aisa irijanishigantirenajaniqui caapironcaaripae, iroguentiquea quijacaapojajiri iriraja irashi iriatimpa. Aparoquea iquijapojatigui ashijia maasano ivegaratacotanontajaji aatoniji yashintajajaji omperashirentajiavetacajica ancoguitempantinijite anchoocajiaje iriatimpaqui. ¹³ Arimajaca ocameetsaveca iriraja caapironcaaripae aisa caaverapae,✠ aisa intsiquirijaguinatantajiquemparoquea osamamporevaneja orijanishigantirenajaniqui caapironcaaro itaaqueca✠ cameetsanijite irisaancatsinotimentanajeniji choocagueta pantatsinotanacarica. ¹⁴ Quempetaca iriraja viratsipae agavejaveca osaancantiquea maasanopae covaetsinotantaguetatsica, iroompate iriraja Quirishito caaviji agavejamajaque osheshirentamajatacaji acovaeguishetacagueta cameetsanijite asavicaventajianaqueroniji maasanopae icantajiacajica Aapani Irioshi anijatsica. Iriraquea Quirishito teequea incovaeguishetimatempaji iriatimpa, ariquea Ishire Aapani Irioshi icocanica ichoocati itampishitacaaqueriquea impimanquempaniji yogameetsashirentantajajica Aapani Irioshi aatonijite omintsaroashirentajaji apeacaaguishejiaveca aantanaacajimeca camorecariqui.

¹⁵ Irootaquequea ipeantacaca Quirishito asatecapojanquitsica niganqui onetsanama-jaquempaniji iroaquerari paaquito, cameetsaniji irirajia icajemajiaqueca irashintajapojemparo inintacaitsicarica caarica teroncajatsi. Imetojaventajiaqueritari yoguipaqui-

† 9:11 irisaserorotetacotaquero cameetsaguetanquitsineca. Chooa mavite otsipa paperi iroquetinica iguenquetsatsarequi guiriego ocanti: "isaserorotetacotaquero cameetsaguetanquitsica". ✠ 9:13 Irev. 16.15-16. ✠ 9:13 Nm. 19.9, 17-19.

jacoventaqueri aatoniji omperaperaashirentajajari igovaeguisherejia ipeacajaiacaca choocatirajagueti iroquetica paaquito.

¹⁶⁻¹⁷ Pinquenquejerija inchoocategueti aparo caquinte iroompa intioncanaquequea paperi incanquequea taaquea ashintajemparoneca maasanopae yashintaguecaca iriatimpa oncoramanitapojajegueti irimetojanajegueti. Oraqueate aatotagueti imetojitatsi aatotaquea inetsanatsijitaroqueea tioncanquitsica, tequeratanica irimetojenica. Cotanquitsiquea oraqueate irimetojanajegueti ariqueea iroguenti irinetsanamajajiqueroqueea itioncanaqueca. ¹⁸ Ariqueate oquempetaca coramani iparianacarogueti iroquetica paaquito, teequea ompariguempa tequeratagueti iraashijiteroji iriraja. ¹⁹ Jero Moishishini iroquetitaquea yapatsajavantamajajiaqueneriquea maasano ishiraerijia icantaguequeca Aapani Irioshi, ariqueate yaaqueroqueea imae oveja yajavicamaejitica oquityoncamaetanaque, itsipatacotacaantsitaroqueea aisa ochajempequijaniquipae isopo, yojocajatsitaroqueea irirajaqui irijanishigantirenajaniqui caapironcaaripae aisa caaverapae iconojatsitantacaca oja, ariqueate itsiquirijitsitaroqueea itioncameshinantajicaroca paaquito, iroompaqueea iquejetacaajajariqueea maasano igonorojia itsiquirijantsijigariqueea. ²⁰ Ariqueea icantajiaqueri: “Ocatiquea iriraja iroguenti ashi paaquito[‡] icamantajiaquempica Aapani Irioshi pinetsanataqueca.”[☆] ²¹ Ariqueate iquempetsitaroqueea Taverenacoro ipeacaacarogueti itsiquirijantsijigaroqueea iroatimpa iriraja, ariqueea iquempetacaaguecaroqueea maasanopae choocatantaguecaroca ininqueca saserorotejia ashi irisaserorotegueti. ²² Aritarite ocanque itioncacotanaqueca Moishishini oraqueea iriraja irootaquequeea osaancantacaca maasanopae taaca opajitapae covaequishetanquitsica. Ariqueate iquempejiaca caquinte aatomegueti ichoocatime metojaventirica ochovivincajatanaque iriraja, aatomequeea ipeacotsijitarime igovaeguishere.[☆]

Imetojaque Quirishito cameetsanijite oshetantaquempaca covaequisherentsi

²³ Ocaniquiquea ocaniqui quepatsiqui ochoocaveca Taverenacoro aisa choocatantaguecaroca intsompoguiqui. Manaqueea oquejevecaro iroomajatatsica inquitequitica. Iriraqueea saserorote iquijanaque intsompoguiqui, itsiquirijantsiguetaoqueea iriraja viratsipae ijitorejancarica cameetsanijite osaancaguetajempa. Cotanquitsiquea oratica inquitequitica ocoacomajacaqueea otsipa caavijica anaavaequeroqueea iriraja viratsipae. ²⁴ Pinquenquejerojate imaica, imetojaventajiacajigueti Quirishito teequea irooqueea inquijantempaji Taverenacoro ipeacaacaca caquinte quempevecaroca iroomajatatsica, manaqueea iquijantapojajaro inquite ichoocaquegueti Aapani Irioshi iquenquetsatacoventajiapojajaji. ²⁵ Aisa teequea inquijeji inquitequi cameetsaniji impimampimantavaequempamequeea, inquempequemparimegueti saserorote anaantamajatanquitsica quepatsiquitica iquijapinitajini Igovejencamajarequi Aapani Irioshi ajagantsinipaequi iramacotapinitaqueni iriraja teeca iro irashi. ²⁶ Arimegueti onquempetaquempegueti imaica, irantsipetsipepiniquempamequeea iroaqueragueti ipeacaacarogueti Aapani Irioshi quepatsi arejevaeca imaica. Cotanquitsiquea imaica irooshipojajegueti onteroncapojajempagueti ajagantsinipae, aparo icoraqueequiti imetojaquitatigui cameetsanijite irishemajajiacajironijite Aapani Irioshi maasanopae agovaeguisherejia impeacomajatajemparoniji. ²⁷ Maasanomajaca caquinteguetsatsica imetojimaque aparo, iroompaqueea incanque Aapani Irioshi queri oanajatsineca inquitequi, aisa queri oanantquitsineca camorecariqui. ²⁸ Ariqueate iquempetaca Quirishito aparo imetojaquiti imetojaventajiaquitiri caramirincavaetanantquitsica caquintejia cameetsaniji iraitsijianaqueriniji igovaeguisherejia. Oncoramanitapojajegueti incoraquetaje aisa, cotanquitsiquea aatoqueea irooqueea icoraquetashitajatitsi irimetojaventajiajeriqueate covaequishejiatsica, iroguentiquea incoraquetashitajate irajajateriquea maasano oguijajavajirica.

10

¹ Oraqueea itioncacaquerica Aapani Irioshi Moishishini manaqueea oquejevecaro ovaantorijencate intati cameetsaguetsatsica coramanivaepojatsineca.

[‡] 9:20 iriraja iroguenti ashi paaquito. Oraqueea iriraja irooqueea intsantajitempaca icantavaajiacca arimaja irinetsanajiaquero tioncanquitsica paaquitoqui. [☆] 9:20 Eeq. 24.8; Mt. 26.28. [☆] 9:22 Irev. 17.11.

Teequea onquejemajatemparoji vaantorijencatacaacaroca, irootaquequea teeca agavejantempaji itioncacotanaqueca Moishishini oganejencashirenteriji quempejiquempejiipojaquerineca Aapani Irioshi ijitorejapinjitaquenerigueti viratsipae ajagantsinipaequi. ² Agavejaquemegueta, incaratacaapojerome ijitorejapiniquerigueta. Irisaancashirentaquerimetari aparo, ari oncaratapojeme, aatomequea iquenquejacotajime: “Choocasacanica nogovaeguishere.” ³ Cotanquitsiquea ijitorejapinjiguinirigueta Aapani Irioshi viratsipae icantacoguitani ajagantsinipaequi, irooqueea quenquejacaapiniqueriquea choocasacanica igovaeguisherejia. ⁴ Teetarite agavejempaji iriraja caapironcaari aisa caavera oncataroguero covaeguisherentsi.

⁵ Irootaquequea, icoraquequitigueta Quirishito ocانىقى isaviji quepatsiqui, icantantacarica Aapani Irioshi:

“Teequea pinintajeji irijitorejajitempiriji viratsipae irooca irojocajitempiji otsipapae iroguishinejantajitempica, irootari picaquintetsinotacaantaquenaca.

⁶ Teequea pishineventemparinica viratsipae irampevaneajitaquempirigueta irooca aisa irijitorejimentajiqueneri igoguishere.

⁷ Ariqueea nocanque: ‘Choocana acانىقى, quejetaca itioncacojiquenagueta yampinaicameshinajitaqueca.*

Iroguenti nocoraquetashique nonetsanatimenqueroniji pinintaguetica aviatimpa, Aapani Irioshi.’ ”☆

⁸ Iroquetitaquea icanque: “Teequea pinintajeji irijitorejajitempiriji viratsipae irooca irojocajitempiji otsipapae iroguishinejantajitempica, irooca irampevaneajitaquempirigueta viratsipae irooca aisa irijitorejimentajiqueneri igoguishere, teequea pishineventempariji.” Irooveca icantacaantaqueca Aapani Irioshi irinetsanajitaqueca itioncacaquerigueta Moishishini. ⁹ Iroompaquea icanque Quirishito: “Choocana acانىقى, iroguenti nocoraquetashique nonetsanatimenqueroniji pinintaguetica aviatimpa.” Yaitsitaroqueea iroquetica itsipacarejitsitaro cameetsanijite impiacaantajemparoniji iroaqueratajatsineca.

¹⁰ Inetsanamajaqueroqueea Jesoquirishito maasanopae inintaguetica Aapani Irioshi, ipimantatsinotsita apametojaro manaqueea oavaetanaje, irooqueea icomajashirentacaantajajica.

¹¹ Irirajiaqueea saserorotejia joriojia yoapinique Taverenacoroqui savincaguiteripaequi isaserorotetapinitigueta, yapijipijitapiniqueneri ijitorejajiniri viratsipae, cotanquitsiquea teequea agavejeroji oncatarogueroji covaeguisherentsi. ¹² Cotanquitsiquea iricampani Quirishito Asaserorotemajate aparoqueea ipimantaca imetojajentsijigaro covaeguisherentsijia manaqueea oavaetanaje, ariqueea isenampijapojajari Aapani Irioshi isavicapojaji itincamijempequiqui. ¹³ Chooca imaica yoguujacotaca iragavejamajaquerigueta Aapani Irioshi maasano catsimajiaquerica, ariqueea onquejevequempari Quirishito irovanquegontatsitempariquea catsimajavecarica, ¹⁴ iroorijite aparoqueea ipimantacagueta yoganejencashirentacaavaetajiriquea icomajashirentacaajajica iroganejencashirentaguitempani.

¹⁵ Ariqueeate iquempetaca Ishire Aapani Irioshi iriatimpa icantacomajacajiro, iroquetitaquea icanque:

¹⁶ “Icanque Majirontamajatsica: ‘Jero paaquito nonetsanajiaquenerica oncoramanitapojajegueta avisanajempagueta ajagantsinipae:

Noamajaqueneri nogantacaantanejia ishirejiaqui, nontioncantsitenempari iguenquejanejiaqui.’ ”☆

¹⁷ Ariqueea icantsitaquea aisa:

“Aatoqueea noquenquejimatajirotsi maasanopae igovaeguisherejia, maasanojia ipeacaaguishevaevecaca.”☆

* 10:7 yampinaicameshinajitaqueca. Coramani tequeratagueta intsajiteroji paperi, manaqueea itioncantacaro imeshinaqui, yampinaicacotsitantarooqueea maviquijite inchaquiji. ☆ 10:7 Sar. 40.6-8. ☆ 10:16 Jer. 31.33.

☆ 10:17 Jer. 31.34.

¹⁸ Aritarite impeacomajatanajemparogueti covaequisherentsi, aatoquea ijitorejimentajitajiro.

Anquempejiquempejipojajemparija Aapani Irioshi

¹⁹ Irootaquequea, napitsaroverentarijiate, aatoca atsaroacaantaro amanapojajiri Aapani Irioshi, iroguentitari quijacaanacajine Igovejencamajarequi iriraja Jesoquirishito.

²⁰ Itanarejavoquitajajiro iroaqueravoquitica anijashirentacaantantatsica avisanajeronijiticaamorenaveatatsica, irootarite quempecaroca itsino ipimantatsinoventajiacajigueti.†

²¹ Ariquea ipeapoja asaserorotete anaantamajatatsica, isaseroroteventajiaqueri maasanojia yashintajiacaca Aapani Irioshi.

²² Jaameshiatsi anquempejiquempejipojajempari Aapani Irioshi, iintsija anintamajateja, atsamajaquetarite Iriomajaca aventaventaitantaquemparica, itsiquirijashirentajitacajitarite irisaancacojitajajironijite coguisherentsi chagashirentavecajica, aisa aquivatsinotantajaroquea saancajariqui.‡

²³ Jaameshiatsi ancoguitempani antampishitashiguiteroni irinetsanataquero maasano atsavetacotanquea, aatojate asanticotavaji, atsajiaquetari iriratari camancajica: “Nonetsanatacaamajaquempiro”, icocaniquea inetsanamajatiro maasanopae icanquea.

²⁴ Jaame anquenquejamajateroja quero ancoqueroni antampishishirentavacaajiaquempagueti ampintsatantamajataquempaniji, aisa ampeacaimenquemparoniji cameetsaguetatsica.

²⁵ Aatoquea avashiantirotsi acapiocapinijiacagueti, choocapaetari quejepiniqueroca ovashiantapinitiroca icapiocagueti, manaqueate aatimpa antampishitavacaajianaquempaqueate. Arimpa agaamajatanaquempa amenavajerogueti irooshipojaji savincaguiteri incoraquetantapojajempaca Amajirote.

²⁶ Antsamajavequemparogueti iroomajatatsica, cotanquitsiquea avashiantanajerogueti, jatanatsigueti ancovae covaequishetanajempa, teequea inchoocatajeji metojaventajeroneca agovaeguishere.

²⁷ Iroguentishiatsi choocatanquitsine mintsaroamajacajineca oguijavetavajemparogueti oncatsimatacaantajinishiatsi ompishoncacaantajinishiatsi camorecariqui quichagantemenquimajatatsica, ontaniquiquea interoncapojaquempa maasanojia catsimataquerineca Aapani Irioshi.

²⁸ Paesatoniqui icanque Aapani Irioshi quericaca aatoca iquemisantirotsi itioncacotanqueca Moishishini, choocagueti mavite amenaquerica irooca 3, irimetojajiqueriquea, aatoquea ipintsatacojitaritsi.

²⁹ Yogaamajatanaquea covaequishetacotarica Irijanite Aapani Irioshi, oquejevetaca mana yagatigativaequeri intati, icantacoguishetiro iriraja Jesoshi. Oraquea iriraja iroguenti ashi paaquito, osaancashirentavecari iroaqueragueti. Iquejetacagueti mana icantaguishetaqueri Ishire Aapani Irioshi cavintsajajiacajica, caaviji incatsimamajajitaqueriquea.

³⁰ Atsamajajiaqueritari iriraquea cantatsica: “Naroguentiquea quenqueventaquerine caquinte. Inchiquiojitaquea naatimpa nonquenquejacaantaque noncatsimajiaqueriquea.”✧ Otsipa tioncanquitsica ocanti: “Iriraquea Amajirote iramenitsijiguempari igaquintejiate incantsitempaquea queri covaequishetanquitsica.”✧

³¹ ¡Ocovajencamajataque irajiricantaquegueti Aapani Irioshi anijatsica!

³² Imaica pinquenquejajiguerojate aviatimpajia coramani iroaqueragueti pitsivoshirentacotapojajigueti patsipetacovaeaquea yashimirintashirentajivequempigueti, arimpaquea pitampishijianaquequeate pitsaroverentajanacari teequea povashiantajigueroji.

³³ Piconoagarantajiacaca icaramirincatashivaetanaquempiquea icatsimajitaquempigueti icantaguishetacojiaquempigueti yatsipetacaajitaquempigueti. Aisa oconoaquea manaquea pisenampijajivacari papitsaroverentarijiate

† 10:20 Imetojaquegueti Jesoshi opecotarejanaque ticaamorenatanquitsica teemoroqui jocagatsica aatonijite iquijajitiro intsompoguiremajacaqui (Mt. 27.51; Mr. 15.38; Irc. 23.45). Opecotarejanaquegueti iroguenti quempecaro yatsipetsinovaecagueti anquijajajaitanajeniji ichoocamajatiagueti Aapani Irioshi. ‡ 10:22 aquivatsinotantajaroquea saancajariqui. Iquenquejacaajajiro saancajari iquivantajiacaca saserorotejia (Eq. 29.4) aisa irevitajia coramani iramanerigueti Aapani Irioshi (Nm. 8.6-7). Chooca cantajianquitsica arica ocantacotaquero aisa aviñacajatacaantagueti oguijatacotaquerigueti Quirishito. ✧ 10:30 Ireo. 32.35. ✧ 10:30 Ireo. 32.36.

pamenajiaquegueti iquejetacaajitacariqueti iriatimpajia. ³⁴ Pipintsatacojiacari isantanatacojitaqueca, aisa yaapitsatsijiquempirogueti pashincaca pishinevae-tanacaqueate, pitsajiaquetari choocatarite pashincaca inquitequitica anaavaequeroca, aatotarite oteroncajatsi. ³⁵ Irootaquequea pintampishishirentanaquempaca, aatoquea pitsarogui, pinquejequerogueti imaica irishinetacaavaetavajempi Aapani Irioshi. ³⁶ Pinquenavaquero pinetsanatanaqueerogueti inintaguetica Aapani Irioshi cameetsanijite paampojajemparoca icantsijiaquempica. ³⁷ Aritarite ocanque Itioncacaantaqueca Aapani Irioshi:

“Irooshipojishiatsi incoraquetapoje coraquetanquitsineca. Aatoquea osamani ipeatsi.

³⁸ Iiraquea comajashirentanquitsica incoquempani inchoocaguiteni irooriji yaventa-guitarini Aapani Irioshi.

Arigueti impianaje, aatoquea noshineventajaritsi.”[☆]

³⁹ Cotanquitsiquea aatimpajia teequea anquempejiguempariji pianajatsica oahoaitanan-quitsineca camorecariqui, iriguentitari aquejetaja aventaguitarinica inchoocatantagui-tempanica.

11

Coramanipaequitica aventashirentajiacarica Aapani Irioshi

¹ Oraquea aventashirentacarigueti Aapani Irioshi iroguenti ocanque arimajaca at-samajajiaque inetsanamajatiro icanqueca. Choocatarite oganejencatatsica teeca ame-najiavetemparoji imaica, cotanquitsiquea aventashirentaquemparigueti atsajiaque ari-maja amenajiapojajero oncoramanitapojajegueti. ² Irootaquequea ishineventantajiacar-ica Aapani Irioshi irirajia coramanipaequitica, manaquea yamenajiaqueriquea yaven-tashirentacari itsamajajiaquequea irinetsanamajataqueroquea maasanopae icantague-queca.

³ Oraqueate aventashirentajiacarigueti Aapani Irioshi irootaquequea atsatantajia-caca paesatoniqui iroaqueragueti irioquea peacaaguetacaroquea maasanopae quepatsi, inquite aisa maasanopae choocatantaguecaroca. Teequea taaca opaji choocati-matatsineca, cotanquitsiquea icantimaquitiguiquea ariquea ocotanaca ochoocague-tanaque maasanopae.

⁴ Pinquenquejerija Averini yaventashirentacarigueti Aapani Irioshi, ijitorejaquener-iquea ivira yojocaqueneri, ariquea ishineventantacarica yameniqueriquea quempetaca teeca incovaeguishedimatempaji. Iiraquea yojocaquenerica yanaaqueroquea yojocave-tacananica irira Caini.* Imaica imetojavecaquea Averi, cotanquitsiquea ochoocataji iquenquejacojitajiri yaventashirentacarigueti.

⁵ Ariqueate iquempetaca Enoconi iriatimpa, yaventashirentacarigueti Aapani Irioshi yatsomajantajitanajarica inquitequi maasanotsino, teequea irimetojeji. Tee irinejajita-geriji irooriji yatsomajanajiri Aapani Irioshi. Aritarite tequeratagueti irantsomajatsi-nojiteriji, icantacojitaqueriquea irio ishineventaca Aapani Irioshi. ⁶ Cotanquitsiquea Aapani Irioshi aatoquea ishinetantimatatsi intati aatogueti yaventashirentajitari. Taacagueti nintanquitsineca inquempajipojajeri iroquetitaja intsamajaquequea arimaja choocasacanica, aisa intsamajaquequea incavintsajamajajiavaqueriquea maasano coa-majaguetajerineca.

⁷ Iiraquea Noeni yaventashirentacariquea Aapani Irioshi, irootaquequea itsave-tacotsicarogueti teeca iramenajiteji, omintsaroanaqueri ipeacaantantanacaroca que-najarontsitsantsa icantajitica aareca, aatonijite yojocajajigatsi arejetapojempagueti

[☆] 10:38 Avc. 2.3-4. * 11:4 Aapani Irioshi teequea irishineventempariji Caini, teequea iraventashirentemparinica iramaquenerime viratsi, iroguenti yaavetanacanari tsoroanquitsica iniganquitejirequi. (Pamenero Jen. 4.3-10.)

agamirijaatantapojempaca incani anaaguetanaqueroquea maasanopae quepatsi. Aapojacagueti iquijantanacaca iriatimpa, irijanijate, imanquigare aisa iranropae, teequea irojocajajiguempaji. Iquemisanquegueti Noeni yonigaantaqueroquea iquejeta-caantajiacaquea quepatsiquitica, iteroncamaajatantajiacaca. Irirampani Noeni yaventashirentacarigueti Aapani Irioshi yamenancarica quempetaca teeca incovaeguishetimatempaji.

⁸ Ariqueate iquempetaca Averaameni, yaventashirentacariquea Aapani Irioshi, itsaque inetsanamajaqueroquea icanqueca, irootaquequea yoantanacaca icanquerigueti iroanaquequea otsipaqui quepatsi irashinquemparoquea, teequea intsavetempaji que-rocaca iroanaqueni. ⁹ Yaventashirentacariquea Aapani Irioshi, irootaquequea iguinten-itimotantajiacarica otsipapaequi quepatsi icantacaaquerica Aapani Irioshi irashinquem-paroquea, manaquea ichoocatimotantapojaque intati irooriji iquejetaca tequeratatiraja irashintemparoji. Iroguenti ichoocatantapojaca quitsaarentsivanco. Iroompaquea ariquea iquempejiaca Ishaaconi aisa Jacovoni, ariqueate iquempetacaajiacari Aapani Irioshi iriatimpajia icantajiaqueriquea irashintamajaquemparoquea oratica quepatsi. ¹⁰ Icocani iquempetaca imaica Averaameni irooriji itsamajaque intsipatsipaitajempar-iquea maasano tsariventajianquitsineca iriguinentantapojajemparoquea oganejen-catsovironaquiripae quishomajatanquitsica iquenquejacotsitacaca Aapani Irioshi ipea-caajiacanarica.

¹¹ Ariquea oquempetaca Sarani iroatimpa jac quenquevaromajavetanaja aatometarite ichoocatetime irijanite, cotanquitsiquea aventashirentanacariquea Aapani Irioshi, ame-naquetari irinetsanamajaqueroquea icanqueroca: “Inchoocaque pirijanite”, irootaque-quea ichoocatantacaca. ¹² Ariqueate iquempetaca iriatimpa Averaameni jac quenque-varimajavetanaja aatomequea irijanintame, cotanquitsiquea irijanintaca, iroompaquea icaramirincavaetanaquequea ichoviquijianaqueca ooqueate teequea iragavejajitajeriji intsajajeriji, manaqueate iquempejirincavaetanacari impoquiropae irooca aisa im-panequi ocaratsapijajaquitica inirojani quentijani.

¹³ Maasanojia noquenquetsatacojiaqueca imaica incanani yaventaventashirenta-jianacari Aapani Irioshi imetojaquegueti. Teequea iramenajavetanajemparoji irinet-sanateroji Aapani Irioshi maasanopae icantajiaquerica, cotanquitsiquea ishineventacot-sivaecaro quejetaca yamenacovaequero jmmtacovaeque. Yamenacojiaca ocaticaquea quepatsi teetarite iriguinentimajatemparoji, quempeca iquenaquenavaeque intati. ¹⁴ Oraqueate iquempejiaquerogueti imaica iro intsatantajitaquempaca icoaguetaquero iriguinentimajatantapojajempaca. ¹⁵ Iroomegueti inquenquejacojiaquemequea iguepat-site iquenaquenaitantapojacaca, iragavejaqueme iroaroaitanajeme. ¹⁶ Cotanquitsiquea iroguenti inintajiaquequea otsipa caavijica oganejencavaeca iriguinentantajiapojajem-paca, irootaquequea inquitequitica. Irootaquequea teeca impashiventantempaji Aapani Irioshi icantajiaquegueti: “Irguenti Nirioshite”, ipeacaajianaritari tsovironaquima-japae inconoavacaajiapojajempa.

¹⁷⁻¹⁸ Quempeca coramani ininquegueti Aapani Irioshi iramenanquempari Averaameni icanqueri: “Paanaquerija pirijanite Ishaaco pintaquenarijate.” Iriatimpa itsavetaca icanquerica Aapani Irioshi: “Irguenticquea nocantacotsitacaca Ishaaco pinchoviquivae-tantanaquempaca”,[☆] cotanquitsiquea yaventashirentanacari, yaantanacarica intaaque-rimequeate. ¹⁹ Itsaque intaaquerigueti Ishaaco iragavejaque Aapani Irioshi irovchan-tajeri. Aritaque quejetacaquea metojaque iroompa pochatanaji yaavajiri.

²⁰ Iriraquea Ishaaconi yaventashirentanacari Aapani Irioshi, icantantacarica Jacovoni aisa Esaoni incavintsajamajaqueriquea Aapani Irioshi oncoramanitapojajegueti.[☆]

²¹ Iririquea Jacovoni yaventashirentanacari Aapani Irioshi, jero irooshiveca irime-tojeme yovajecashitsita igotiquijiroqui itsariventanacari Aapani Irioshi. Icajemitsi-tari aisa irijanijate Jose yamanacoventsitanacariquea incavintsajamajaquerinijí Aapani Irioshi.[☆]

²² Ariqueate iquempetaca Jose iriatimpa yaventashirentacari, irootaquequea irooshipojgueti irimetojanaje itsavetacotsitantacarica inchoviquijianaqueca Ishiraeri,

[☆] 11:17-18 Jen. 21.12. [☆] 11:20 Jen. 27.27-29, 39-40. [☆] 11:21 Jen. 47.31-48.20.

icanque irisotosotoitanajemparo Ejepito. Iroompaquea icantajianajiri quero incotonquijitajerini.✠

²³ Irirajia irijanintajiacarica Moishishini yaventashirentanacariquea Aapani Irioshi, irootaquequea itsititantacarica 3 taai iroaqueragueta ivoaque, yamenajiaqueritari igameetsareni teequeate intsaroacaajempariji majirontatsica cantajiavecarica irimetojitavaqueri.

²⁴ Ariquea iquenquevaritanajigueta Moishishini yaventashirentanacariquea Aapani Irioshi, irootaquequea teeca irinintantajempaji incantacojiqueri iroguenti irijanintajari irorijanite Paraone. ²⁵ Yamenanontantacaca iroguenti intsipatsipaitajempari irashijia Aapani Irioshi yatsipetacaajitacariqueti, teetari irininteji irishinevenquemparo coguisherentsi shinetacaanirotaquemparimeca taampinaca avisanaque. ²⁶ Aisa yamenaque caaviji anaaque ocameetsavaeque irantsipeventavaequempariquea Quirishito, anaavaequeroquea irashinquemparogueta maasanopae choocaguetaatsica Ejepitoqui. Iroguentiquea yoguijacotaca incavintsajaqueriquea Aapani Irioshi oncoramanitapojajegueta.

²⁷ Yaventashirentanacariquea Aapani Irioshi, irootaquequea yovashiantanacaroquea Ejepito, caarica itsaroacaantantari majirontatsica icatsimaquerigueta, manaquea iquenaquero quejecaquea yamenaqueri irira Teeca Iramenajiteji. ²⁸ Yaventashirentanacariquea Aapani Irioshi, irootaquequea choocatirajagueta Ejepitoqui ipariantanacaroquea icantajitica Paashicoa, icamantajiaqueri igonorojia irinetsanataquero icanquerica Aapani Irioshi, itsiquirijantaguetacaroca iriraja ovoapaequi osotomorotapojacagueta itsovironaquitepaequi, cameetsanijite incoraquequegueta irashivantite metojajiaquerineca iriquetica voapojatsica, aatoquea imetojitajigueta irijanijiate ishiraerijia.

²⁹ Aisa irirajia ishiraerijia yaventashirentajianacariquea Aapani Irioshi, irootaquequea ocaranarejajatanacaca niganquija Quentijani Quityoncajaro oroguitantanaacaca isaquiritsaejianaquequea imontemonteitanacaroquea intatiqueroqui. Cotanquitsiquea iroompaquea iquejejiavepojacaquea igoaretajiate Ejepitoquitica patimajiavecarica, ariquateate ocotanaca oquejetanajaquea aisa, yojocajajiaqueate maasano.

³⁰ Irirajia ishiraerijia yaventashirentajianacariquea Aapani Irioshi, irootaquequea otaromaquirejantanacaca otantotantavetacaca Jerico, yanquitsaepinijiacarogueta 7 savincagueteri.

³¹ Oraquea Iraava icotapinijavetaca yoashitapinijiguero, cotanquitsiquea aventashirentajitari Irioshimajaca, irootaquequea icoraquejiaquegueta ishiraerijia amenanontantajiatatsica aahaitantavacarica cameetsa, teeca irimetojantajitemparoji iteroncajitaquerigueta teeca inquemisantajigueteri Aapani Irioshi.

³² ¿Queri itsipa nontsavetantajiaqueca? Aatoquea nagavejitsi notsitacovaetiritsi maasano quejejiacarica Jereonini, Varaconi, Sasonquini, Jepeteni, Taavini, Samoirini aisa itsipajia tsavetantajiatatsicani. ³³ Iriatimpajia yaventashirentanacariquea Aapani Irioshi, irootaquequea yagavejacaantajiacarica. Iconoagarantajiacarica yashimirintajiacariguinentinintsipaequitica, ariquea yagavejajiaqueri. Iconoagarantajiacarica yagavejacaqueri irinetsanamentajiaquerinijite igonorojia iriguinentinijiaquempanijite cameetsa, aisa yamenacojiaqueroquea icamantajiaquerica Aapani Irioshi irinetsanatacotsitantaquenemparica. Itsipajia yamimicacaajiacarica ajitsipae. ³⁴ Itsipajia yanaajiaquero paamari osamimincavaevetacagueta. Itsipajia inintajivecaqueate irimetojantajiaquemparime tsaampitsantsameniro. Itsipajia yojoquijijianacaqueate teequea intampishijiajeji, cotanquitsiquea yogueshijiajiriquea Aapani Irioshi itampishitacaajajiri. Itsipajia teequea intampishijiajivetempaji, cotanquitsiquea oraqueate itampishitacaajiaquerigueta Aapani Irioshi irootarite itampishitantajianacaca, yashimirintajiacarigueta catsimajiaquerica yagavejajiaqueriquea yoguishiantajiacarica maasano. ³⁵ Oconoagarantajiacarica manquigarentsijia aventashirentanacariqueti Aapani Irioshi itancoretancoretantanaajaca ometojacovecagueta. Itsipapae manaquea yatsipetacaajivecari, icantajivecari

✠ 11:22 Jen. 50.24-25; Eq. 13.19.

iroguipaquiujajitajeri aatogueti itsarorentajajaritsi Aapani Irioshi, cotanquitsiquea teequea irovashiantajigueroji, itsajiaquetari aatogueti yovashiantajiguiro intancoretan-coreitanaje oncoramanitapojajegueti iroaroaitanajequea ichoocatigueti Aapani Irioshi, anaavaetaqueroquea intancorejanirovetanajempagueti teeca intsarorentajiguempariji. ³⁶ Iconoagarantajiaca itsipajia yatsipetacovaeca icantaguishejiaquerigueti ishirontimentajiacarigueti, ipasapasataquerigueti. Itsipapae iroguenti yoishotantajicariquea cavorejatsari isantanacotsijitariquea. ³⁷ Iconoagarantaca imetojaqueri itsinatsinatan-tavaecari mapi, itsipapae manaquea iquitencaqueri mavicotate serochoqui. Itsipapae iroguenti imetojantajicari tsaampitsantsameniro. Itsipapae manaqueate ishiashiavaeguitani, iriguenti iquitsaajiaca ovejameshina aisa caaverameshina, teequea irashintimatempaji. Yatsipevaeca icoguitejacovaeca, aisa yatsanajivaecari icatsimacat-simatashijivaecari. ³⁸ Ishiapitsajianacari catsimajiaquerica yoayoivaetanaquequea oquitamampororoitapojaquegueti irooca aisa otsempitapojacagueti. Itsitijiaca imperitamoroqui aisa omorogucagueti quepatsi. Irirajiaquea quempejianquitsica imaica caaviji yanaavaetaquequea icameetsavaejiaque, yanaajiaqueriquea itsipajia quepatsiquitica.

³⁹ Iriraquea Aapani Irioshi ishineventajiacariquea yamenajiaquerigueti yaventashirentajiacariquea, cotanquitsiquea imetojajiaquegueti tequerataquea iramenajigueroji maasanopae icantacaajiaquerica Aapani Irioshi. ⁴⁰ Yamenaquequea iriatimpa caaviji anaaque ocameetsavaeque intsipatsipaitacaji aatimpajia tsarorentajiaquemparineca Quirishito oncoramanitapojajegueti, incomajashirentacaamajajiacaji aatimpajia maasano.

12

Jaame amenashirentaquerini Jesoshi ashirequi

¹ Imaica atsajiaque icaramirincavaequequea coramanipaequitica quejetaca notsave-tacotsitacaca nigaantajiaqueroca arimaja yaventashirentajiacari Aapani Irioshi, yanquitacojiacajiquea, quempetacaquea amenajiguerica shiashiavijijiatsica iramenantajitaquemparica queri shiamajatatsica, iroosacanica jaameshiatsi ovashiantamajatana-queroca maasanopae tenatavacajineca aisa coguisherentsijia avironcajiavacajineca, jaameshiatsi anquenaquero ashiaguiteni ampampiavoquimajatanaquero inintacaajitacajica. ² Jaameshiatsi amenashirentacomajajianaqueriquea Jesoshi pariacajaiacajiroca atsarorentantancarica aisa irio teroncacajaiacajirone antsarorentantamajatanaquemparica. Iriatimpa itsatsitacaro irishinevaepojajempa, irootaquequea yatsipevaetancaroca coroshi, teequea oguipashiventajeriji irimetojantajitemparogueti, iroompaquea isenampijapojajari Aapani Irioshi imajirontagueti imajirontamentoqui, isavicapojajiquea itincamijempequiqui.*

³ Pinquenquejajiguerija iriatimpa atsipetacojiacarica covaeguishejiatsica catsimacat-simavaequerica, aatonijite pimagoghirentapojitsi, aatonijite pishimampojanca-matanaca povashiantajiguirotsi maasano. ⁴ Tequeratatirajatari osotoajatacaitempiro piriraja pashimirintajencatarogueti coguisherentsi. ⁵ Pipeacojianajaro quenquetsat-sarensimajaca tampishishirentacaajiaquempica ipejaiquempigueti irijanijiate, ocanquetari:

“Irijani, aatoja pimanintavaquerotsija incantomajaquempigueti Majirontamajatatsica, aisa aatoquea pishimampojanca-matanaca incantimentajempirogueti pipeacaagui-shevecaca,

⁶ iroorijite Majirontamajatatsica icantomajajiguiriquea ivintsarejia, aisa icatsimatimentajiguiriquea igovaeguishere maasano ipejaiavajica irijanijiate.”[☆]

⁷ Incantomajaquempigueti Aapani Irioshi manaquea pantsipetacotavaquempari, manatari ipeajiaquempi irijanijiate icantomajimentantajiaquempiroca. ¿Choocampate chaajaniquiri teeca incantomajeriji iriri? ⁸ Ariquate iquempetaca Aapani Irioshi

* 12:2 itincamijempequiqui. Oraquea itincamijempequi, irootaque yamejiaca coramani iroguisavicaqueri ishineventamajatacaca. ☆ 12:6 Tsa. 3.11-12.

iriatimpa icantomajajiguiriquea maasano ipeamajaqueca irijanijiate. Aatogueti icantomajajiguimpitsi, teequea impeamajatempiji irijanijiate, quempetacaquea itsipauea irijaninquempica. ⁹ Quempetacaquea chaajaniquitirajajigueti icantomajajiacajigueti irijanintajiacajica, manauea amativicanaquequea amenacotanaqueritari cameetsani, iriompate Irijanintashirentajiacajica caaviji amativicajianaue incantomajajiacajigueti cameetsanijite ancoquempani anchoocajiaje iriatimpaqui. ¹⁰ Irirauea irijanintajiacajica icantomajajiacaji aparopae ajagantsinipaequi queroca yamenaueca cameetsatatsica, cotanquitsiquea irirauea Aapani Irioshi icantomajajiacaji cameetsanijite ancomajamajajiaquempinijite anquempetantajianaquemparica iriatimpa yoganejencomajatagueti. ¹¹ Arimajacauea teequea ashineventemparoji icantomajacantomajajitacajigueti, ogatsireni, oshimampojancaaanacaji, cotanquitsiquea anquenquejacomajajiaquerogueeti quero ococani icantomajantajitacajica, antsamajaquero itsatacaajiacajica, manauea ancomajamajajianaquempaquea aatoca ashoshoguitetanta manauea ashinevaetanaquempa.

Shoshoh pipomatsatirotsishiatsi icavintsajamajaquempigueti Aapani Irioshi

¹² Irootaqueuea noncantantaquempica pintampishitacaanajero patsancovacore aisa pisorocagueretore.† ¹³ Pimpeacaquempa pampavoquitanquitsica pinquenantaquempaca‡ aatonijite itacosatsi magotsari, mananijite impeanajempa.

¹⁴ Cameetsajate paavacaanaquempajate, aatoja picatsimatavacaanacatsijate, aisa pincomajamajajiaquempaja, aatotarite yamenimajiguiritsi Amajirote teeca incomajamajajiguempaji. ¹⁵ Pinquempoguijavacaajiaquempaja aatoniji ichoocatitsi pomatsataqueroneca icavintsajaquerigueti Aapani Irioshi, aisa aatoja pisemaneguintavacagatsija, inchiqiojita oquejetarotsi quepishishitsaqui ontsorogueueti, iroompauea pinatsimatavacaajiaquempa, iraaajencatsijiaquempiro caramirincajiatsica. ¹⁶ Shoshoh poashijiguiritsijate manquigarentsi teeca irooquea pashi, aisa aatojate piquempejigaritsija Esaoni coramani, teequea inquenquejerinicate Aapani Irioshi icavintsajamajavecarigueti. Pitsajiaqueuea aavetarigueti itase yamanitsivetariquea apatacoro isheca iriguentijeguite ichoviqui, cotanquitsiquea iriatimpa icanqueri ininque inquejetajemparija quempetaca iriguentica iriquetica voapojatsi cameetsanijite irionijite ashinquempariniji oncoramanitapojajegueti maasanopae irojocaquenerica iriri pariapojatsica. Iroompauea icanque Esaoni: “Intsija cameetsavaeque”, iroorijite irooshipojaque aguerime itase.✧ ¹⁷ Ariqueate inintavetaja inquempetajempaquea iroaqueragueti tequeratagueti inquejetempariji iriguentijeguite, cotanquitsiquea teequea iragavejajempaji incantashitajajempaquea icanquerica. Iraitsivetanacaueate, cotanquitsiquea querocampate incotajempuni, ipomatsaqueroquea.✧

¹⁸ Aviatimpajia teequea pinquempajiguempariji choviquijianaquempica oahoitananquitsica coramani otsempiqui Shinaiqui yagavejajiquero impamijiquero. Iriatimpajia iroguenti yamenajiaqueroquea osamimicatsempitanaquegueti, opitsecasecantajencavaetanaqueuea ocanca, ochovigaguitevaetanaqueuea jeoc jeoc jeoc. ¹⁹ Iquemajiaqueroquea tivorentsi itivojiqueroquea. Ariquea iquemajiaquerigueti Aapani Irioshi iquenquetsatacaquerigueti, ariquea icojianaca itsaroajianaue, icantantajiacarica Moishishini: “Intsishiatsi aatojate iquenquetsatacaajajitsi.” ²⁰ Iquempetantajiacaroca imaica itsaroantajianacaca irooriji icantajiaqueri Aapani Irioshi: “Incoraquetimaquegueti taaca ipajita incatiaquemparogueti oatica otsempinochoocatantacaca pintsinatsinavaequeriquea irooca pinquentajiaqueri, pimetojitempariquea, irioca viratsi aisa caquinte.”✧ ²¹ ¡Ooshiatsi ocovejencavaequeuea yamenaajaqueca! Icantantacaca Moishishini: “Notsaroamajatanaque nocanca nompioncavaetanacaueate.”✧

† 12:12 pintampishitacaanajero patsancovacore aisa pisorocagueretore. Manatarite iquejetacaacotacaro teeca intampishitashiteroji inintaguetic Aapani Irioshi. ‡ 12:13 Pimpeacaquempa pampavoquitanquitsica pinquenantaquempaca. Iroguentiquea iquejetacaacotaca icanquerigueti: “Pincomajamajajiguempajate aatonijite povashiantacaguiritsi papitsaroveritarite teemajaca intampishiteji.” ✧ 12:16 Jen. 25.29-34. ✧ 12:17 Jen. 27.30-40. ✧ 12:20 Eq. 19.12-13. ✧ 12:21 Ireo. 9.19.

²² Cotanquitsiquea aviatimpajia quempetaca jac arejevaetapojajimpiquea Shionetsempiqui, Jerosaremajacaqui inquitequitica, irootaquequea ichoocatantacaca Aapani Irioshi anijatsica. Piquempejitacopojajari irashivantijitete icaramirincavaequequea icanca itsaromentajiacariquea Aapani Irioshi. ²³ Pitsipatsipaitapojajari maasano irijanijiate Aapani Irioshi tioncacojianquitsica inquitequi, iquejetacaajajari iriquetica voatsi. § Aisa pitsipatsipaitapojajari Aapani Irioshi amenajiguirica maasano caquinteja, irio cantatsica queri comajamajatatsica aisa queri teeca incomajamajatempaji. Ariqueate pitsipatsipaitacariquea ishirejia comajarijia yogameetsashirentajitajica. ²⁴ Aisa pitsipatsipaitapojajari Jesoshi asatecapojanquitsica niganqui onetsanamajaquempaniji iroaquerari paaquito, irootarite iriraja iriatimpa itsiquirijaventajitaquempani. Oraquea ocantacoqueca anaavaequeroquea ocantacoqueca iriraja Averini.*

²⁵ Iroosacanica imaica pipigatsataritsi Aapani Irioshi quenquetsatacaajiaquempani imaica. Coramani teequea iragavejajigueji irishiapitsatanaqueri pigatsajavecarica icantajavecariguete acaniqui quepatsiqui. Aatimpajia jarimpate agavejaque ashiaipitsatanaqueri ampigatsajiaquempariguete inquitequitica cantajiacajica: “Shoshoh”? ²⁶ Oraqueate iquenquetsatacaqueriguete Aapani Irioshi coramani imoguecanaqueroquea quepatsi, cotanquitsiquea imaica icanque: “Apanivani nomoguecajeta, cotanquitsiquea aatoquea aparo quepatsi, nonquejetsitemparoquea aisa inquite.” ✧ ²⁷ Icanqueguete “apanivani”, iroguenti oncanque impishoncaguetajero maasanopae ipeacaaguecaca agavejanquitsica omogueque, irooquee choocatajatsine caarica moguecatsi oncoquempanica onchooacque. ²⁸ Oncoramanivaetapojajeguete ariquate ancoquempani anchoocataje ontaniqui amenajiaqueroquea caarica moguecatsi caarica teroncatsi, antsipatsipaitajempari Aapani Irioshi imajirontaguete. Iintsija imaica ancantajiguete: “Ariotesaa.” Antsarooacaajiaquempani antsaromentajiaquempariguete, ancantajiguete: “Caaviji poganejencamajata”, irootaquetari ishineventacaca iriatimpa. ²⁹ Iriratarite Arioshimajate iquejecaroquea samimicatsantsajencaro teronquiroca maasano otaaqueca. ✧

13

Quero ancojiaquempani cameetsanijite irishineventajiacajinijite Aapani Irioshi

¹ Pincoquempanija pimpintsaguitemparini papitsaromentarijiateni. ² Incoraquejiaqueguete papicaquinteteni incoguitejacojiaquempani querocaca irimaajipojajuene, aviatimpajia paajivaquerijate pitsovironaquitequi pincavintsajitempariquea. Ichocagarantajiaquetari itsipa teequea intsajigueji iriguenti yaajivaquequea irashivantijitete Aapani Irioshi. ✧ ³ Pinquenquejacojiguerija isantanatacojitaqueca quempani pitsipatajari isantanatacojitaquempani. Pinquenquejacojiguerija aisa yatsipetacaajitacaca quempeca aviguentijia atsipetsipeitanquitsi.

⁴ Pincomajamajianaquempani, apaniroqueate poanaquero pimanquigare, aatojate pinintitsi otsipa. Ariquea pinquejejaquempa aviatimpajia manquigarentsijia apaniroquea poanaqueri manquigatimpica. Incatsimatimentajiaqueritari Aapani Irioshi quericaca teeca irampanironteroji imanquigare, iriguentijia aisa oashijiguiroca manquigarentsi teeca irooquee imanquigare. Ariquea inquejejaquempani Aapani Irioshi manquigarentsijia oashitirica itsipa shirampari. ⁵ Aatoquea pishineventamajajigaritsi imentaqui pincaraquisequivaqueri. Taaca opajitapae pashincaca pishinejaquempani, icanquetarite Aapani Irioshi: “Aatoquea notsinampirejimpitsi,

§ 12:23 Iriraquea iriquetica voatsi iriguentequea ashintamajatajemparone yashintaguecaca iriri. * 12:24 ocantacoqueca. Orataquea iriraja Averini iroguenti ocantacoque incatsimatimenqueri Aapani Irioshi metojantatsica aisa itsipajia covaeguisherijia. (Pamenero Jen. 4.10.) Orampani iriraja Jesoshi chovivincajatananquitsica imetajaventajiacajiguete, iroguenti ocantacoque irishetajeneri igovaeguisherijia maasanojia aventaventaianajemparineca. Irootaquequea anaavaetantaroca. (Pamenero Ev. 9.12; 10.19; Cor. 1.20; 1 Jn. 1.7.) ✧ 12:26 Ajeo. 2.6. ✧ 12:29 Ireo. 4.24; 9.3; Mt. 3.12; 2 Ts. 1.7-8. ✧ 13:2 Jen. 18.1-8; 19.1-3; Irm. 12.13; 1 Pe. 4.9.

aatoquea novashiantimatimpitsi.”[☆]

⁶ Irootaquequea aatoca atsaroantamajata ancantantajiaquempaca:
“Irraquea Nomajirote irio amiquenaca, aatoquea notsaroguitsi.

¿Querocaca incojiavetaquenani caquinteja?”[☆]

⁷ Pinquenquejajerija jivajiguimpica tsatacaajiaquempica Iguenquetsatsare Aapani Irioshi, pamenajiaqueriquea quero icojiacani iriatimpajia, taa opaji sotoananquitsineca, ariquea pinquempequempeitanaquemparija yaventashirentamajacariqueti Quirishito. ⁸ Irraquea Jesoquirishito teequea incantashitatiguempaji, icocani iquejetaca coramani, arejevaeca imaica, ariquea incoguitempani inquejeguitempani. ⁹ Aatojate pogujatacotirotsi itsatacaantamampeajitica teeca onquejetemparoji Quenquetsatsarentsimajaca. Oganejencavaetaca ontampishishirentajiacaji igavintsajare Aapani Irioshi. Aatoquea iro tampishishirentaji ashecaquempaca irooca antiquempagueti. Maasano quejetaroca, aato amishirentaji.

¹⁰ Choocaquea ashijia aatimpa aretarete* imetojajitaquerigueti metojavencajica. Oraticaquea teequeate iragavejeji irishecatocotsitemparo saserorotevetanquitsica Taverenacoroqui iroquetinica. ¹¹ Irraquea saserorote anaantamajatanquitsica iroguenti yaajatapinijiaqueroquea iriraja viratsipae Igovejencamajarequi Aapani Irioshi intsompoguiremajacaqui Taverenacoroqui cameetsanijite oshequempanijite covaeguisherentsi, cotanquitsiquea oraquea itsinopae manaquea itajaiqueroquea osotsiquivaepojaquegueti iguintenijiacagueti. ¹² Ariqueate iquejetaca Jesoshi iriatimpa, manaquea yaajitanaqueriquea osotsiquivaepojaquegueti iguintenijiacagueti isotoacaitsitanacari osotomoroqui, ariquea yatsipevaetaca imetojaque cameetsanijite irogameetsashirentantajajironijite iriraja. ¹³ Irootaquequea noncantantajiaquempica imaica, jaame ovashiantaguetanaqueroquea maasanopae aventajiacaca paesatoniquitica, oahoaitashitanaqueri Jesoshi, onquejetaquempaquea oahoaitashitanaqueri osotsiquivaepojaquegueti, aatoja atsaroacagaro intsojencajitacaji quejetaca itsojencajiaqueri iriatimpa. ¹⁴ Ocaniquitarite quepatsiqui tee onchoocatenica aguintenitnantajiaquempaca oocanica ochoocati, manaqueate oguijacojiacaroquea guinteninintsimajaca irojocajiacajica Aapani Irioshi oncoramanitapojajegueti.

¹⁵ Aatimpajia atsarotentajiacari Jesoshi, irootaquequea noncantantajiaquempica jaameshia ashineventajiguempari Aapani Irioshi ancantajiaqueri: “Caaviji poganejenca-majataca.” Irootaquequea quejevecaroca yojocajitinerica aretarequi. Irooquea sotoan-tanaquemparoneca itseraqui cantatsica: “Irio Nomajiomajate Jesoshi.” ¹⁶ Aisa aatoja pipeacojigaro pantaguetaqueja cameetsaguetatsica, pamitacotavacaaquempaquea pin-cavintsajavacaaquempa, irootaquequea ishineventacaca Aapani Irioshi quejevecaroca yojocajitinerica aretarequi.

¹⁷ Pinquemisantajiguerija jivajiguirica tsarotentajiatatsica, aatoja pipigatsajigari. Ico-canitari iquempoguijashirentajiaquempi, itsajiaque oncoramanitapojajegueti incati-imojiaqueriquea Aapani Irioshi incamanqueriquea quero icojiaquempini iquempogu-ijajiguimpigueti. Pinquemisantajigueri irishinetimentaquempanijite irinetsanaque-rogueti, aatonijite otenatiri. Ontenavaequerigueti, aato amishirentimpi aviatimpa.

¹⁸ Pamanacoventajiguenaja. Notsamajajiaque tee onchoocatajeji chagashirenta-jenaneca, nonintajiaquetari noncoguitempani noncomajatimenquempari maasano. ¹⁹ Nonintamajaque pamanajiaqueriquea Aapani Irioshi cameetsanijite taampinanjite namenajiajempiniji nontsipajiajempiniji.

Iteroncapojaqueroquea tioncaqueroca

²⁰ Irraquea Aapani Irioshi iriguenti choocatacaajiacajica cameetsa aatoniji ashoshoguiteta, aisa iriguenti vochantajiri Amajirote Jesoshi quempoguijamajacajica aatimpajia irovejajiate. Iroguenti ivochatantajarica iriraja ashi paaquito coguitatsineca.

[☆] 13:5 Ireo. 1.6, 8; Jos. 1.5; Pp. 4.11-13. [☆] 13:6 Sar. 118.6-7. ^{*} 13:10 aretarete. Icanquegueti aretarete manaqueate oquenquejacaacajiro coroshi imetojantacaca Jesoshi, itsicarejanajiro iroquetica paaquito. Anquenquejacotajerigueti ashecatajempagueti pan cantacoqueroca itsino, oquejevecaquea ashecatacotaquempari aretarequi. Irirajiaquea ogantagatirajagueti iquenquejacotiro iroquetica paaquito aato yagaveja ishecatacotaro iroaqueratica paaquito.

²¹ Imaica noninque Aapani Irioshi iragavejacaantaquempiro maasanopae cameetsague-tatsica pinetsanatimenqueroniji inintaguetica. Aisa noninque intampishishirenta-caamajajiacaji cameetsanijite ancomajamajajiaquempaniji ashinetacajiaquempariniji, iriguenti iragavejacaantajiacaji Jesoquirishito. Ancoguitempanijate ancantacoguiterinini Quirishito: “¡Caavijisano poganejencamajata!” Ari oncoquempa.

²² Napitsarorentarijateni, noninque pampatsajavantamajatavaqueroja ocatica no-tioncajiaquempica, aato piperatsitavaquenaro notampishitacaaquempigueti, capichat-sajeaniquitari. ²³ Imaica noncamanquempiquea iriraquea apitsarorentarite Timoteo jac isantanatacorejajitajiri. Incoraquetajegueti taampina, nontsipatajempari noajiaquite namenajajatempi. ²⁴ Pincantajiguerija maasano jivajiguimpica aisa maasano yashin-tajiacaca Aapani Irioshi, noninque inquemacojiajenaja choocana noquenquejacojajiri. Ariquea iquempejiaca irirajia Itariaquitica inintajiaque pinquemacojiajeri chooca iquen-quejacojiaquempiquea.

²⁵ Imaica noninque maasano aviatimpajia incavintsajamajajiaquempiquea Aapani Irioshi.

ITIONCAQUECA SANTIAGO

Antsatantaquemparoca

Ocatica iroguenti antsatantaquemparoca itioncaqueca Santiago itioncaciaquenerigueti ishiraerijia tsaromentajiacarica Jesoshi oaguetananquitsica quepatsipaequi. Iri-raquea Santiago irio jorio iriguentijeguite Jesoshi. Iquenquejajitaque itioncaquero ocatica paperi ajagantsiniqui irooca 40, irooca otsipaqui ajagantsini arejevaetacaró ajagantsini 60. Itsipajia iquenquejajiaque itioncaquero tequeratagueti intioncajerioji otsipapae paperi choocajianquitsica ocaniqui paperiqui icantajitica *Tsavetacoquerica Jesoquirishito*, arica ajagantsiniqui 40, irooca otsipaqui ajagantsini arejevaetaro ajagantsini 50.

Acaniqui paperiqui icantajiaqueri quemisantajiaquerica Jesoshi intampishitashijia-querioja yatsipeventajiacarigueti (1.2-4, 12-18). Itsatacaajiaqueri cameetsaguetatsica irantajigüeca quemisantajiaquerica Jesoshi (1.5-11, 19-27; 2.14-26; 3.13-18; 5.7-20) aisa taa opajita teeca oncameetsateji irantajiaquerogueti (2.1-13; 3.1-12; 4.1-17; 5.1-6).

Iquenquetsatacaajiaqueri irira joriojia quemisantajiatitsica

¹ Naroguenti Santiago tioncaciaquempiroca oca, naroguenti savicaventiroca inintaguetica Aapani Irioshi aisa Amajirote Jesoquirishito. Imaica nonintaque nontioncaciaquempi maasano aviatimpajia oaguetananquitsica quepatsipaequi, aviguentijia ichoviquijiaqueca irijanitepae Ishiraerini carajianquitsica 12.*

Intampishitashijiaqueroqueate maasano irantsipejiaquempaca

² Napiguemisantarijiateni, pantsipejiaquempagueti taaca opajitapae pishinejiaquempaqueate. ³ Pitsajiaquetarite aatogueti piquemisantajigüiro patsipejiacaca irosati pamananaqueri Aapani Irioshi, ariqueate pintampishitashijianaquero pincoguitempañi. ⁴ Cotanquitsiquea irosati pintampishitashimajianaqueroja cameetsanijite pinquenquejamajiaqueronijite ora taaca opajitapae cameetsaguetatsica aisa cameetsanijite pincomajamajianaquempaniji, pagavejajianaquenijite pintsamajianaquero inintaguequeca Aapani Irioshi, aatoniji oquempevaetacaguimpi taaca opajitapae quempevaetacaantatsica.

⁵ Choocagueti oraniqui tequerataca intsamajajiguero ininqueca Aapani Irioshi iramanajiaqueriqueate incantajiaqueri intsatacamentajiaquerinijite. Iriatimpa inquemajiaqueri, igantagatarite iquemiri amanajiguirica ariqueate itsatacaamajiaqueri, teequea incanteji: “¿Quero ocotaca pamanantaquenaca?” ⁶ Cotanquitsi quericaca cantiquerineca Aapani Irioshi intsatacaqueri intsamajataquequeate arimaja intsatacaqueri, aatoqueate icantajigui: “Aricampa aatoca iquemana, aatocajate itsatacagana.” Maasanotarite quejejiatsica imaica mana iquejejiacaro otamacojatigueti quentija itampijatigueti choviga, ariqueate ojaquiti von von, yoguipiguipijaatanaqueroqueate. ⁷⁻⁸ ¿Arimpate inquemaqueri Aapani Irioshi irica quejetiroca imaica? Aatoquea iquemiri, teenicate apaniro oneji iquenquejamajataqueca manaqueate iroota icanti iroota icanti. Ari oquejetaca aisa yantaguevetacaca teenica intsateji quero incoquempa.

⁹ Cameetsavaetaquequeate irishinejiaquempagueti irirajia apiguemisantarijiateni teeca iranaantajigüejí, ipejiaiaqueritarite Aapani Irioshi irijanijiate. ¹⁰ Iriaqueate apiguemisantarijiateni ajaarantajiatitsica cameetsavaetaquequeate irishinejiaquempaqueate intsatacaajiaquerigueti Aapani Irioshi aatonijite yaventacojijaro yashintajiacaca, manatarite iquejejiacaro ovempenaqui teeca onquishopempenaquiteji, tee osamani onchoocateji. ¹¹ Arimpate iroatimpa arimpagueti icatsirincaguitemajatigueti catsirincaiteri icatsirincatanaqueroqueti ariqueate jac oshimpeguiricanaquequeate opariapempenaquitanaque teequeate oncameetsapempenaquitanajeji. Ariqueate

* 1:1 Icanquegueti ocaniqui oaguetananquitsica quepatsipaequi, icantacojiaqueri quemisantajiaquerica Quirishito, yamaqueriquea yoaguetanaquequea guinteninintsipaequi quejetaca iporocajianaque coramani ishiraerijia icatsimajiaquerigueti Ashiriaquitica aisa Vavironiaquitica.

iquejejiaca ajaarantajiatsica aatoqueate osamani ichoocajiguitsi, manaqueate taampina irimetojajianaque irovashiantaguetanaqueroqueate maasano isavicaventavecaca.

¹² Quericaca teeca inquemisantajeroji yatsipeguetacaca mana arimpaqueate itampishitashitanaquero ariqueate icavintsajamajataqueri Aapani Irioshi, yamenaqueritarite itampishitashiquero tee inquemisantero. Ariqueate intancorejajeriqueate, aatoquea imetojajitsi. Ariqueate inquejetacaajiaquempari maasano pintsamajajigarica, irinet-sanataquero icanqueca iroaqueraguefi.

¹³ Choocagueti quenquejanquitsica irante teeca oncameetsateji aatoqueate icanti: “Iriguenti quenquejacaquenaro Aapani Irioshi.” Iriraqueate Aapani Irioshi teenicate irinintencate irantaquero teeca oncameetsateji, aisa teequeate inquenquejacaanteriori yantaguishejiguica. ¹⁴ Inchiqiojitarite iquenquejashitacaro iriatimpa inintaquequeate irantaquero covaeguishetatsica. Irooqueate agavejaquerine inintaguisqueta. ¹⁵ Iroquetiqueate ocoraquetashiqueri iquenquejaquero, coajica inintamajaquerogeti ariqueate yantaquero. Oraqueate yantaquerogeti irooqueate onquenantanaquempa iroantanaquempaca camorecariqui.

¹⁶ Napiguemisantarijateni nopintsamajajiacaca, aatoqueate avisatiqueate amatavijaijaatsi. ¹⁷ Aapani Irioshi icavintsajamajajiacajiqueate irootaquequeate maasano cameetsaguetatsica irioqueate jocajiacajiro. Iriatimpa iriguenti peacaaguetarica taai aisa impoquiro jeri aisa catsirincaiteri savincaguitetacotantatsica. Teequeate incantashitatiguempaji, irosati icocani icavintsajantamajati. ¹⁸ Irijanintajiacaji, inchiqiojitarite inintaque iriatimpa. Irootaquetari choocatacaacaji Quenquetsatsarentsimajaca. Aatimpajia aroguentijia aroquetica irijanintajiacaca ajivatimentajiaquerinijite maasano irijanintajiaquempaca.

Quero incojiaquempani inquemisantamajajiaquegueti

¹⁹ Imaica, napiguemisantarijateni nopintsajigaca, pintsajiaquero oca: cameetsaque taampina anquemavaquero icancajica itsipa, aatoquea aquenquetsatacaguiri taampina tequeratagueti anquenquejamajateji querocaca ancantari, aisa aatoquea taampina acatsimati. ²⁰ Ancatsimajavetaquempagueti aatotari agaveji anetsanatero inintaguetica Aapani Irioshi, aato agaveji ancomajamajaquempa. ²¹ Irootaquequeate nocantantajiaquempica povashiantajianajero maasano piquenquejaguishejiguica, aisa taaca opajitapae pantaguishejiguica teeca oncameetsateji. Aato paventacojiga manaqueate pinquenquejamajajiaquero Iguenquetsatsare Aapani Irioshi itsatacaajiaquemmpica, irootarite meshiajajimpi. ²² Aatoqueate piquemashitaro intati manaqueate pinquemisantamajajiguero quero ocanqueni ariqueate pincojiaquempani. Oraqueate managueti pinquemashijiaquemparo intati avisatiqueate amatavijaijaatsi. ²³ Quericaca quemashitaroca Iguenquetsatsare Aapani Irioshi, aatoguete iquemisantiro ocantaqueca iquejetacari amenavorovetatsica amenajarontsiqui. ²⁴ Yamenajavetaca quero icocani, iroompaqueate yoanajatigui jac ipeacotajaro. ²⁵ Oraqueate Iguenquetsatsare Aapani Irioshi caaviji ocameetsamajataque, ovashiantacajiacajiroqueate teeca oncameetsateji antaguishejiveta. Irooqueate meshiajajiacajica, cotanquitsi Aapani Irioshi incavintsajamajataqueri quericaca teeca impeacotemparoji quero ocanqueca, mana inquemisantamajatanqueroqueate, aisa intsamajaqueroqueate ocantaqueca.

²⁶ Chooca cantatsica: “Naroguenti quemisantatsica”, cotanquitsi tee irampavirajero inene. Iriraqueate quejecarica imaica teequeate arimaja inquemisantamajatero icanqueca Aapani Irioshi, irisatiqueate amatavijajatsi. ²⁷ Iriraqueate yamenaqueca Aapani Irioshi arimaja iriguenti iquemisantamajataque irioqueate cavintsajajiaquerica chaajaniquipaetica metojacoguetatsica aisa manquigarentsijia metojacoguetatsica atsipejianquitsica, aisa inetsanajiacaca aatoniji opantari quempevaerentsi ipeacaapinjia-caca quepatsiquitica.

¹ Napiguemisantarijateni, imaica piquemisantajiaquerigueti Amajirote Jesoquirishito oganejencamajatatsica, aatoquea apaniro iriguenti pishineventajiga irira anaantague-tanquitsica, irioqueate pimanintajiaque teeca iranaanteji. Maasanoqueate pishin-eventajiaquempari, iriogueti anaantanquitsica irisati teeca iranaanteji. ² Arigueti picapiocajiaca ariqueate inquijajipojaquegueti mavite caquinte, apaniro iriguenti net-sanatacovaetaqueate aisa yasatecacari ichapaquiqui imaachapaquijitaca ipeacaajica cavorejatatsica vegaramajatanquitsica, iriraqueate itsipa tsoncashitequijacotaca; ³⁻⁴ iriguentigueti paajivaque netsanatacotanquitsica pinetsanajivaqueri poguisavica-jiavaqueri, iriraqueate teeca irinetsanatempaji manaqueate pogatiavaqueri intati irooca poguisavicajiavaqueri intati querocagueti, ¿arimajampate aviguentijia quemisan-tamajajiatsica? Teequeate, teenicate pincavintsajajigueriji teeca irinetsanajiguempaji, iriguentitarite pishineventajia netsanatacojianquitsica. Teequeate pinetsanajigueroji piquenquejajiaqueca, iroguenti piquenquejajiaque teeca oncameetsateji.

⁵ Napiguemisantarijateni nopintsamajajiaca, iintsija pinquemisantajiguena noncan-tajiaquempari. Aapani Irioshi icoguajiaqueri teeca irashintamajajiguempaji acaniqui quepatsiqui cameetsanijite inquemisantamajajiaqueri iroajianaquenijite iriguinteni-jiacquempa ontaniqui imajirontagueti. Aritarite inquejetacaajiaquempari maasano pintsamajajiacarica, iriotaquetarite cantanquitsi. ⁶ Cotanquitsi aviatimpajia mana pogu-ipashiventajiaqueri teeca irajaarantajiguempaji, iriguenti pishineventajia ajaarantaji-atsica. ¿Teempaueate iriguenti catsimajiguimpica ajaarantajiatsica nintatsicaqueate irashitacotacaantapinijiaquemqueate santanaqui? ⁷ Aviatimpajia pitsariventajiacari Jesoquirishito piquemisantajiaqueritarite, cotanquitsi iriatimpajia iriguenti cantima-natirica cantatsica: “Caari.”

⁸ Chooa otioncacotaca icanqueca Aapani Irioshi ora anaamajaguequeroca maasano cameetsamajatanquitsica, ocanti: “Pimpintsataquemparija pignonoro pinquejetaca-jempa pipintsatagueti aviatimpa.” Pinquemisantajiaquerogueti ocatica aisa pinet-sanamajajiaquerogueti, cameetsamajataquequeate. ⁹ Cotanquitsi teegueti maasano-ja pincavintsajajigueriji pignonorja, manaqueate pantajiaque teeca oncameetsateji, teenicate pintsamajajigueroji icantaqueca Aapani Irioshi. ¹⁰ Quericaca tsamajatiroca maasano itioncacotanaqueca Moishishini cotanquitsi onchoocatiamaquegueti aparo teeca irinetsanate, iquempevaetaca, ari oquempetaca tee irinetsanateroji otsipapae. ¹¹ Iriotaquetarite cantanquitsi Aapani Irioshi: “Aatoja poashitirotsi manquigarentsi”, aisa iriguentiqueate cantanquitsi: “Aatoja pimetojanti.” Irootaquequeate quericaca aatogueti yoashivetaro manquigarentsi cotanquitsi irimetojantaquegueti, tee irinet-sanatero icantica Aapani Irioshi, igantagatiraja iquempevaeta. ¹² Imaica aviatimpajia pinetsanamajajiaqueroja picanqueca aisa cameetsaja pinchoocamajajiaque. Aatogueti pinetsanata incatsimatimentajiaquempiro Quirishito oncoramanitapojajegueti, teeni-cate pinquemisantamajajigueroji Quenquetsatsarentsimajaca ovasiantacajaiacajiroca teeca oncameetsateji acoguishejiavetacaca. ¹³ Aatoqueate icavintsajajajiri Quirishito oncoramanitapojajegueti maasano teeca incavintsajantajigueti, iriguentiqueate incav-intsajajiaque maasano cavintsajantajiatsica, aatoquea itsaroajigui iriatimpajia oncora-manitapojajegueti incatsimatimentajiaquerigueti Quirishito quempevaejiatsica.

Arimajagueti aquemisantamajataqueri Aapani Irioshi, anteneri inintacaacajica

¹⁴ Napiguemisantarijateni, inchooquegueti cantavetanquitsineca: “Naatimpa naventacari Aapani Irioshi”, cotanquitsi aatogueti yantaguetaque cameetsaguetatsica, ¿arimpa amitacoshirenteri icantavetacaca intati? ¿Arimpate iro meshiashirenteri managueti incantashitaquempagueti intati: “Naventacari”? Aato. ¹⁵ Arigueti pineja-queri papiguemisantariteni tee onchoocateji inquitsaaquempacaca jero aisa irishecaque-mpaca, ¹⁶ iroompa pincantavetaquemparigueti intati: “Cameetsaquea pincantanajempa, pinquitsaatempa cameetsa aatoniji picatsincati, aisa pishecapinitaquempa cameetsa pinquemanaquempa”, cotanquitsiquea aatogueti pojocavaqueneri coguitejimotacarica, ¿arimpate picavintsajajiaqueri? ¹⁷ Aritarite iquejetaca imaica cantatsica: “Naventacari Quirishito.” Teegueti irinetsanatero icantica Aapani Irioshi manaqueate iquemisanta-mampeaca intati, teequeate arimaja iraventamajatempari.

¹⁸ Cotanquitsi arigueti incantajiquempi: “Aviatimpaqueate mana paventacari Aapani Irioshi intati, naatimpa nonetsanaqueroquea icanqueca”, cameetsataquequea. Aatogueti pinetsanaguetirotsi icantaqueca Aapani Irioshi ¿querocate ponigaanquenarocate arimaja paventacari? Naatimpa nonetsanaguetaqueroqueate icantaqueca irootaquequeate pitsatantajiacaca arimaja naventacari noquemisantaqueri.

¹⁹ Aviatimpajia picantajiaque chooca apaniro Irioshimajaca. Cameetsataquequeate, cotanquitsi itsajiguiqueate ampatsini iriatimpajia chooca apaniro Irioshimajaca, irootaquequeate itsaroantajiacaca yompioncantajiacaca piompiompio. ²⁰ Teequeate pintsatimajigueti aviatimpajia. Quericaca teeca irinetsanateroji icantaqueca Aapani Irioshi manaqueate iquemisantamampeaca intati. ²¹ Pamenerija avaesatiniteni Averaameni arimajagueti iquemisanqueri Aapani Irioshi inetsanaqueroqueate icantaquerica. Pajinimequeate irimetojanaquerime Ishaaco aretarequi intaque-nerimequeate, icantantacaqueate Aapani Irioshi: “Imaica namenaqueri Averaame quejetaca teeca inquempvaetimatempaji, inetsanaquerotarite nocantaquerica.”

²² Pameneri imaica Averaame teequeate apaniro inquemisanteriji Aapani Irioshi icanquerigueti: “Inchoocataque pinchoviqijianaqueca iroshequiamajatatiguenimaja”, inetsanataqueroqueate aisa icanquerica. Itsatantajitacarocaqueate arimaja iquemisantamajataqueri. ²³ Onetsanataca Itioncacaantaqueca Aapani Irioshi itioncacojiquerogueti ocanti: “Averaame iquemisantamajataqueri Aapani Irioshi, irootaquequeate icantantacaqueate: ‘Namenakeri Averaame quejetaca teeca inquempvaetimatempaji.’ ” Ariqueate icantajiqueri itsipataca Aapani Irioshi.

²⁴ Pamenamajajiaque imaica arigueti mana anquemisantamampeaquempari intati Aapani Irioshi, aatoqueate yamenajiaji quejetaca tee anquempevaetempaji, cotanquitsiqueate oraqueate aventajiacarigueti, aisa anetsanajiaquerogueti icanqueca, irooqueate iroguenti yamenantajiacajica quejetaca tee anquempevaetimatempaji.

²⁵ Ariqueate oquejetaca Iraava iroatimpa icotapinijiavetaca yoashitapinijiguiro, cotanquitsi cameetsaqueate aajiavaqueri omanajiaqueriqueate itigarancajiaqueca Josoe amenanontaguequiteroneca oguinteni, ariqueate yamenaquero Aapani Irioshi quejetacaqueate tee onquempevaetempaji. Ocamantajiaqueritarite aisa iroantajianajemparo otsipapoqui quenavoquirontsi irishiapitsajianaqueriqueate catsimajiaquerica.

²⁶ Oraquea itsino caquinte, aatogueti ochoocatantaro ishire, ompeaquempa, metojani oncantanaquempa. Ariqueate iquempetaca teeca irinetsanamajateroji icantica Aapani Irioshi, ompeaquempa quea yaventavetarigueti.

3

Caavijisano oquempevaetacaanta anene

¹ Napiguemisantarijateni, aato inchiqioji pishineventajigaro pintsatacaajiaqueri papiguemisantarijateni, pitsajiaquetarite maasano naatimpajia tsatacaantajiguiroca Iguenquetsatsare Aapani Irioshi yamenamajajiaquenaqueate Aapani Irioshi, yamenajiaquena aricaca nonetsanamajajiaquero notsatacaantajiguica aricaca tee. Aatogueti nonetsanamajatiro naroguenti incatsimamajajiaque oncoramanitapojajegueti. ² Maasano aatimpajia aquempevaejiaca, cotanquitsi choocagueti teeca inquempvaetantemparo icanqueca ivagantequi, iriguenti caavijica icameetsati, itsamajataque icomajamajataca maasanotsino. ³ Asatecaqueneri quitavaireri capichaji cavorejaquijitatsica ivagantequi iroonijite inquemisantantaquempaca atinincacoquerigueti, ariquea oacaanaquerini maasanotsino querocagueti aninqueni.

⁴ Ariqueate oquejetaca inirojegui quenajarontsi. Inirojeguiqueate aisa itampijaguevetanacaqueate tampija jeoc jeoc jeoc, cotanquitsi itaquiajatavaqueroqueate pataquitaquero ca itaquiajatantavacaro itaquiajatantajitaroca. Chaapataquijianiqui onavetaca cotanquitsi ivetincanjantavacaro yoacotanaquequeate querocagueti inintaque iriatimpa. ⁵ Ariqueate oquejetaca anene iroatimpa chaajaniquiqueate onavetaca, cotanquitsiqueate aquenquetsatantaguetacaros taaca opajitapae. Pameneroquea paamarianiqui, chaamenquijianiquiqueate onavetaca, cotanquitsi agavejaquequea ontaaquero inirojegui mencoanentsi antsicanaquetarite. ⁶ Ariquea ococa aisa anene, oquempetacaros paamari, caaviji oquempevaetacaajiacaji, ocovaetanaquero

maasanotsino, otsitacaquero maasano antaguetaqueca acovaeguishetantacaca. Oquejetaca iroguenti camorecari tsitacaqueroca anene.

⁷ Aatimpajia agavejajiaque avirajiaquempari taaca ipajitapae canaaguetatsica, arague-tatsica, soancaguetatsica, jeri aisa choocaguetatsica ojaaqi. Agavejajiaqueri antsa-tacaajiaqueri. ⁸ Cotanquitsi aatoqueate ichoocati agavejanquitsineca intsataca-aquero inene aatonijite iquenquetsatimati teeca oncameetsateji. Oraqueate asheca-jiguemparogueti quepigatatsica aatoqueate achoocajiaji, ametojajianaque. Ariqueate oquejetaca anquenquetsaguishejiguerogueti teeca oncameetsateji aatoqueate achooca-jiaji cameetsa, ancatsimatavacaajiaquempaquate intati. ⁹ Aatimpajia amanajia-queri Amajirote Aapani atsaromentajijaari, cotanquitsiqueate irooqueate atsipatava-quero anijashijavajempari agonorojia ipeacaajiacaca iquejetacaajiacaca iriatimpa. ¹⁰ Oconoacaqueate aquenquetsajiaque manaqueate atsaromentajiacari Aapani Irioshi. Oconoaca aisa mana anijashijiacari agonorojia. Napiguemisantarjiateni, teequeate oncameetsateji anquejajiaquempagueti imaica. ¹¹ ¿Arimpate inejajitiro oraniqui ocho-vivincajatigueti chovivincajari ontsipajapojemparo cameetsajatatsica aisa quepishi-jatatsica? Teequeate irinejajiteroji onquejetempaji imaica. ¹² Aisa, napiguemisantar-jiateni, ¿arimpate inejajitiro orivoitsoqui oraniqui ochoocatantaro iguera? Ariqueate oquejetaca igosovena ¿arimpate inejajitiro ochoocatantaro omantsa ova? Noncamantsi-jiajimpiqueate aisa tee irinejajiteroji. Ari oquempetaca chovivincajari cachojaama-jatanquitsica aato agaveja ompeanajempa cameetsajatatsica. Ari anquempetaquempa aatimpa, apaniro anquenquetsate cameetsatanquitsica.

Apaniroqueate Aapani Irioshi yagavejacaamajatacaji antsamajajiaquequeate

¹³ Choocagueti oraniqui tsatatsica quenquejatsica, iintsija incomajamajaquempa, aisa incavintsajantamajataqueja, cotanquitsi aatoqueate yaventacota cameetsaniji ironigaantaquempa arimaja itsamajataque. ¹⁴ Cotanquitsiqueate pincatsimamajaque-rigueti pigonoro pininquegueti panajiaqueri, aisa avisatigueti quenquejacotajatsi, aatoja pamataga pincanquegueti: "Notsamajati." ¹⁵ Teenicate irio quenquejacaguem-pirone Aapani Irioshi pinquejetaquempa imaica, inchiquiojitari piquenquejashicaro aviatimpa, aritarite icojiaca caquintepae, aisa iriguenti quenquejacaqueri ampatsini. ¹⁶ Noncantajiaquempi querocaca ichoocajiaqueni catsimamajajianquitsica, aisa irisati quenquejacotajatsi, igantaga icatsimatavacaaca, aisa yantaguishejiaque taaca opajitapae teeca oncameetsateji. ¹⁷ Cotanquitsi irira iquenquejacaamajataqueca Aapani Irioshi, ico-majamajataca, cameetsaqueate ichoocaque, teequeate incatsimatanteji, aisa iquenque-jacojiaqueri itsipapae quero incoquempa incavintsajaquerigueti. Querica quenquetsa-tacaqueri iquemisantavaqueri. Ipintsatantamajata, icavintsajajiaqueri maasano. Aisa inetsanamajataquero icanqueca, teequeate iramatavijanteji. ¹⁸ Taaca opajita apanquiti, aguero oitsoqui ashi. Aisa oquejetaca arigueti aguintenitaquempa cameetsa, agameet-santavacaquempagueti aatoniji acatsimatavacaga, ariquea anetsanajianaquempa.

4

¿Taa opajita icatsimatimentantajitica?

¹ ¿Quero ocotacani picatsimatavacaantajiacaca? Manatarite piquenquejaguishejiaque taaca opajitapae teeca oncameetsateji, irootaquequeate picatsimatavacaantajiacaca. ² Pinintajavetacaqueate pajaarantajiguempame, cotanquitsi teequeate pagavejajigueti, niganquiqueate pimetojavacaajianaca. Pashintsimanatsijiacari yashintajiacaca itsipa pamenajiaque tee pashintajiguemparoji, queroqueate pincojiaqueroni ariqueate pi-catsimatimentajianaquero. Teequeate pagavejajigueti pashintajiguemparoji pinintaji-avecaca, teenicate pamanajajeriji Aapani Irioshi. ³ Pamanajiavecarigueti teequeate irojocajiguemparoji, manatarite teenicatarite cameetsa pamanajigueriji. Manatarite pinintashijavetaca pantajiaquemequeate taaca opajita pishineventajiacaca aviatimpa-jia. ⁴ Manaqueate piquejejacaro manquigarentsi teeca apaniro ogueriji omanquigare. ¿Arimpate tee pintsajigueti pishineventajijajemparogueti inintaguishejiaqueca quepat-siquitica manaqueate pisemaneguintajiacari Aapani Irioshi? Nocamantantajiaquempica

quericaca shineventaquemparone inintaguishejiaqueca quepatsiquitica manaqueate icatsimajiaqueri Aapani Irioshi. ⁵ Teenicate oncanteroji intati Tioncarensimajaca ocantigueti: “Irraqueate Ishire Aapani Irioshi choocashirentajiaquempara inintamajataque pimpintsamajiaquempari apaniro poamajatanaqueri.” ⁶ Cotanquitsi Aapani Irioshi icavintsajajiacaji yamitacojiacaji antampishitashitantajiaquemparoca aatonijite ashineventajigarotsi teeca oncameetsateji yantaguishejitica. Aritari ocanque itioncacojiqueca: “Aapani Irioshi tee irishineventempariji aventacotatsica, cotanquitsi irira teeca iraventacotempaji irioqueate iriguenti icavintsajajiaque yamitacojiacaji.”

⁷ Nocantantajiaquemparicaqueate pinquemisantamajajiaquerija Aapani Irioshi pinetsanamajajiaquero icanqueca. Pintampishitashijiaqueri ampatsini aatoja piquemisantajiguiri. Pinquejiaquemparagueti imaica irishiapanajante. ⁸ Pinquempejijiapojaquemparija Aapani Irioshi, ariqueate inquempejijiapojaquempariquea aviatimpajia. Nocantajiaquempari aviatimpajia antaguishejiguiroca teeca oncameetsateji, povashiantajianajero, aato papijijajiro aisa. Aviatimpajia quemisantamampeajiatsica pinetsanamajajiguempa aatonijite pantaguishejijiro teeca oncameetsateji. ⁹ Pishimampoanajiguempa, pirajaiguempa, pamenajiguempa queate mana pantaguishejiaque teeca oncameetsateji. Aviatimpajia shirontajiaatsica pirajaiguempa, aisa aviatimpajia shinejianquitsica pishimampoanajiguempa. ¹⁰ Aatoja paventacojiga manaqueate pincantajiaqueri Amajirote: “Pamenaquena aviatimpa teequeate naatimpa nagavejempaji.” Pinquejetaquerogueti imaica iriatimpa iragavejacaquempariqueate.

¹¹ Napiguemisantarijiateni, aatoqueate pinijashinatantajijaatsi, pitsajiaquetarite ocanque Iguenquetsatsare Aapani Irioshi pimpintsatavacaamajajiaquemparija, cotanquitsi quericaca nijashinacarica igonoro irooca icanti: “Chooa yantaqueca”, teequea irinetsanateroji Iguenquetsatsare Aapani Irioshi, quejevaetaca manaca inijashinataro intati icanque: “Tee oncameetsateji Iguenquetsatsare Aapani Irioshi, aatoqueate nonetsanatiro ocantaqueca.” ¹² Apaniro icanca tigarancacajiroca Iguenquetsatsare, apaniro iriatimpa iriguenti Joese cantanquitsineca oncoramanitapojajegueti querica quempevaetanquitsica, aisa querica teeca inquempevaetempaji, apanirotari iriatimpa yagavejaque irimeshiantaque, aisa incatsimatimentajiaqueri quempevaejiatsica. Aviatimpa, ¿quero ocotacani picantacotantacarica pigonoro tee incameetsateji?

Icamantajiaqueriqueate pimantajiaatsica jerijia aisa ajaarantajiaatsica

¹³ Pinquemisantajiguena aviatimpajia cantajiaatsica: “Imaica, aricampa osaitequera oajianaque osamani, aguintenijiaquitempa apaniro ajagantsi, ampimantajiaquitequeate, aajigueta caquisequipae imentaquipae.” ¹⁴ Teequeate pintsateji taaca oajiaquempine osaitequera. Manatarite piquejejiacaro mararo omarrasecanquiti iroompaqueate taampina osaamencorencaguitetajia. ¹⁵ Iroguentiquea pincantajigueti: “Iriogueti nintanquitsine Aapani Irioshi anchoocajiaque antajiaquero aquenquejaguetaqueca.” ¹⁶ Cotanquitsi aviatimpajia manaqueate paventacojiaca piquemacaantajiaaca. Naatimpa noncantajiaquempari tee oncameetsateji pinquejejiakerogueti imaica. ¹⁷ Irraqueate tsavetanquitsica taa opajita ininqueca Aapani Irioshi iroompa tee irinetsanateroji, manaqueate iquempevaetaca.

5

Iquenquejacaajiaqueriqueate ajaarantajiaatsica

¹ Imaica noncamantajiaquempari aviatimpajia ajaarantajiaatsica. Pirajaiguempa aa aa, pincajemajiaque pantsipejiaquemparite coajica. ² Maasano pashintajiavetaca aatonica ocameetsatanaji. Aisa piitsaarepae irishecataquempari shecaguetaroca quitsaarentsi. ³ Irraqueate pigavorejaritepae aisa pimentaquitsitepae incantaiteguetanaquempa, aato ivegarataja. Incantaitetanaquemparigueti intsajitaquempari picapiocashicari intati. Irootaque atsipetacaantajiaquemparineca, onquempefaquempa onteroncaquero paamari

piteshi, picapiocajiaqueritarite pimentaquitsitepae pajinigueti aapojeempa savincagui-
teri vegaratapojaatsineca. ⁴ Teenicate pivegaramajajigueriji antimojiguimpica man-
aqueate pamatavijajiaqueri intati, irootaquequeate iriatimpajia imaica inquenquejaco-
jiajero teeca pivegarajigueriji. Irira Agavejamajatatsica Imajirojiate caramirincajiatsica
iquemajiaqueriqueate antimojiguimpica yamanaquerigueti. ⁵ Pajaarantavaejiaca taaca
opajitapae acaniqui quepatsiqui. Manaqueate pisavicaventajianaquero pishineventaji-
acaca aviatimpajia. Manaqueate piquejejiacar viratsi itijaitica iriguejintajiaqueriqueate
irishecajitaquempariqueate, interoncajiaquempitarite Aapani Irioshi coajica intigaran-
cajiaquempi camorecariqui. ⁶ Pitsojeventajiacaritarite netsanajiatsica pimetojacaanta-
jiaqueri. Iriatimpajia teequeate impigamentajianaquempaji.

Pagamajavajemparija Amajirote

⁷ Imaica, napiguemisantarijiateni, noncantajiaquempiqueate picancanija pantsipere-
jacojiaquempa irosati incoraquetajegueti Amajirote. Pinquejejiacquemparija panquitat-
sica teequeate incatimateroji iraguero ivanquire, manaqueate yoguijavaquero ajagantsi-
tanajigueti osampamajatanqueta ariqueate iraaquero. ⁸ Ariqueate pinquejejiacquempa
aviatimpajia pinquemisantacojiaquempa, aatoja piperajiga. Arimpaqueate pintampishi-
majajianaque pinquemisantamajajianaquequeate, pajinitarite incoraquetaje Amajirote.
⁹ Napiguemisantarijiateni, aatoja pinijashitavacaajiga aatoniji icatsimatimentajia-
jimpiro. Catiapojacatari sotomorontsiqui irira Joese cantanquitsineca quero incoji-
taquerini maasano caquinte. ¹⁰ Napiguemisantarijiateni, pinquejejiacquempariqueate
tsavetantajiguironica icanquerica Aapani Irioshi coramani, iquemisantacovaejiacaque-
ate yatsipeventajiacarigueti. ¹¹ Imaica pitsajiaque ishinevaejiaca maasano quemisan-
tacojiatsica yatsipetacaajiacarigueti catsimajiaquerica. Piquemacojiaqueritarite Jopeni
coramani iquemisantacocaqueate, teequeate irovashiantanaqueri Aapani Irioshi, arim-
paqueate ijatanaqueri iquemisantamajatanakeri. Ariqueate icavintsajaqueri Aapani
Irioshi arimpaqueate yojocamajataqueneri anaamajataqueroqueate iroquetinica yash-
intaveca. Caavijitarite icavintsajantamajati Aapani Irioshi, aisa ipintsatantamajata.

Aatoqueate picantashivijita

¹² Imaica, napiguemisantarijiateni, pinquemisantamajajiaquena noncantajiaquem-
pica. Pincantamajajiaquejate, aatoja pamataajiga, aato picantashita: “Yamenaque-
natarite Aapani Irioshi teequeate namataimtempaji.” Aato picantajigui: “Arigueti
namataaca ontsinacaquena inquite.” Ariqueate oquejetaca aisa aato picantajigui:
“Arigueti namataaca ontijaquena quepatsi.” Manaqueate pincantajiaque: “Jeeje ari-
maja”, irooca manaqueate pincantajiaque: “Teequea”, aatonijite icatsimatimentimpiro
Aapani Irioshi coajica.

Pamaneri Aapani Irioshi

¹³ Choocagueti atsipetanquitsica iramanaqueri Aapani Irioshi. Iriiraqueate
shinemajatanquitsica iramashaiventaqueri. ¹⁴ Choocagueti ashinoncajanquitsica
incajemajiaqueriqueate quempoguijajiguirica quemisantajiaatsica iramanacoventa-
jiapojaqueriqueate, aisa impantantajiaquempariqueate oreji ivajiroqui Amajirote.
¹⁵ Iramanacoventajiaquerigueti intsamajajiaque arimaja iquemisantavaqueri Amajirote.
Inquejetaquempagueti imaica ariqueate irogueshitajeri ashinoncajanquitsica, aisa
irishemajaquero maasano iguempevaere irimaisantajeneri. ¹⁶ Irootaquequea
nocantantajiaquempica pinquempevaejiacquempagueti pincamantajiaqueriqueate
papiguemisantarijiateni, aisa pamanacoventavacaajiaquempajate cameetsanijite
intampishitacaajiaquempinijite Amajirote pincomajamajajiaquempaja, aisa irogueshiti-
mentajiajempinijite pashinoncajajiacagueti. Iriiraqueate quemisantamajatirica
Aapani Irioshi yamanaquerigueti, oshequi agavejaque. ¹⁷ Pamenerija Iriashini, irira
tsavetantirinica Aapani Irioshi coramani, iquejemajajiacaji aatimpajia, cotanquitsi
yamanaquerigueti Aapani Irioshi icantaquerigueti aatoja otejajitsi incani ariqueate
tee ontejajeji irosati yaapojajagueti 42 taai. ¹⁸ Ariqueate yamanajiri aisa icantajiri
ontejapojaje incani, ariqueate otejapojaji, ariqueate otsoroaguetanaji ishecajia maasano.

¹⁹⁻²⁰ Napiguemisantarijiateni, pintsamajajiguero ocatita noncantajiaquempica.
Choocagueti quempevaetanquitsica quemisantavetacaroca Quenquetsatsarentsimajaca,

arigueti iramitacotaqueri itsipa irinetsanatanajempanijite, manaqueate
yamitacotaqueri aatonijite inejajiro imetojane, irimeshiaqueritari Aapani Irioshi
irimaisantsitajeri maasano yantaguishevetacaca oshequiavaevetanquitsica.

IROQUETICA ITIONCAQUECA PEERERO

Antsatantaquemparoca

Ocatia iroguenti antsatantaquemparoca iroquetica itioncaqueca Peerero itioncaji-aquenerigueti joriojia tsaromentajiacarica Jesoshi oaguetananquitsica quepatsipaequi icantajitica Ponto, Garashia, Caparoshia, Ashia, aisa Vitinia (1.1). Peerero irio jorio, irio itigarancane Jesoshi. Irocashi itioncacotaqueri irira Peerero otsipaequi paperiqui (Ya. 1.12-5.42; 8.14-25; 9.32-12.19; 15.7-11). Iquenquejaitaque itioncaquero ocatia paperi irooca ajagantsiniqui 63, irooca 64. Chooa quenquejajianquitsica itioncaquero ichooaquegueti guinteninintsiqui pajitatsica Vavironia (5.13). Cotanquitsiquea iconoagarantajiacarica pariacaroca quemisantajiaquerica Quirishito iquenquetsatacoquerogueti Iroma, teequea tampatica incanteroji ovajiro, mana yomanaquero, iquempetacaacaroc Vavironia iponeajiacagueti catsimajiaquerica ivaesatiniteni paesatoniqui. (Pamenero Yonig. 14.8; 17.5; 18.2.) Chooa quenquejanquitsica arica ichooaque Peerero Iromaqui itioncaquero gueti ocatia paperi.

Itioncajiagueneri inquenquejacaajiaqueriniji joriojia quemisantajiaquerica Jesoshi intampishitashijiaquero yatsipeventajiacarigueti Amajirote yoguijajiaquero gueti cameetsaguetsica irantaguetaqueca Aapani Irioshi yamenajiaquerigueti iquemisantajiaqueri Jesoshi (1.2-12), yatsipeventajiacajitari iriatimpa (2.18-25). Itsatacaajiaqueri icantashitajiacarica Ishire Aapani Irioshi (4.1-11). Icantajiaqueri irantsipejiaquempa acaniqui quepatsiqui quemisantajiaquerica Jesoshi (3.18-22; 4.12-19). Icantajiaqueri quero incojiaquempani inchoocajiaqueniji cameetsa igomajamajarejia Aapani Irioshi (1.13-2.3), aisa quero incojiaquempani irantajiaquenerigueti inintaguetica Aapani Irioshi (2.11-17). Itsatacaajiaqueri quero incojiaquempani shirampari aisa imanquigare inchoocajiaquegueti cameetsa (3.1-7), aisa quero incojiaquempani quempoguijajiguirica quemisantajiaquitsica (5.1-11). Icantajiaqueri irira Jesoshi iquempetacaroc mapi anijatsica, irirajia quemisantajiaquitsica iquejejiacaroc otsipapae mapicota anijatsica ipeacaantacaca Aapani Irioshi tsovironaqui inchoocashirentaqueca (2.4-10).

¹ Naroguenti Peerero tioncajiaguempiroca oca, naroguenti itigarancane Jeso-quirishito. Imaica nonintaque nontioncajiaguempi paperi maasano aviatimpajia icogu-iajiaqueca Aapani Irioshi porocajiananquitsica guinteninintsipaequi, oajiananquitsica Pontoqui, Garashiaqui, Caparoshiaqui, Ashiaqui jero aisa Vitiniaqui. ² Igantagaqueate coramani icoguijiaquempi Aapani Irioshi, itsatsijiaquempitarite tequeratagueti pin-choocateji. Ariqueate yogameetsashirentajiajimpini Ishire cameetsanijite pisavicaventa-
tajiage inintaguetica iriatimpa. Icoguijiaquempitari pinquemisantajiaqueriniji Je-
soquirishito, intsiquirijashirentantajiajempironiji iriraja. Namanacoventajiaquempi
incavintsajimentajiaquempiniji Aapani Irioshi inchoocatacaajiaquempinijite cameetsa
aatonijite pishoshoguiteventajigaro taaca opajitapae.

Peerero itsaromentacarica Aapani Irioshi

³ Iintsija ashineventajiaquempari Irioshite Amajirote Jesoquirishito, iriotaque aisa Iri-ri, ancantajiaqueriquea: "Poganejencamajata." Icavintsajamajiacajiqueate irijan-
intantajiacajica quejetacaqueate iroaquerasano avojajiaqueate cameetsanijite aniji-
mentajiajenijite coajica. Ivochantajiritarite Jesoquirishito, irootaquequeate atsan-
tajiaca anijajiajesacanica aatimpajia aisa oajianajesacanica ontaniqui jenoqui in-
quitequi. ⁴ Imeshiajiajajitarite Aapani Irioshi cameetsanijite oimentajianaquenijite
ontaniqui jenoqui inquitequi ivetsicajiacajigueti anchoocatantajiapojempaca. Aato-
queate opejaa, aato ocantaiteti, aisa ocancaniquea oganejencaguitemajataquempa.
Iquempoguijajiaquempiroquea ontaniqui inquitequi. ⁵ Paventajiacariquea Aapani

Irioshi irootaquequea iquempoguijantajiaquempica iragavejanequi, ariquea inquejetanaquempa arejevaetantapojempaca parejejiapojempagueti ontaniqui inquitequi pamenajiapojero maasano ironigaantajiaqueca oncoramanitapojegueti. ⁶ Irootaquequeate pishinemajatantajiacaca. Arica imaica pantsipejiaquempa taaca opajitapae, cotanquitsi aato osamanititsi avisanaque maasano patsipejiavetaca. ⁷ Oraqueate patsipejiacagueti mana iramenajitaquero arimajaca piquemisantamajataque, aricampa tee. Quejevae-taca cavorejatatsica icantajitica ooro itajaitirigueti cameetsanijite infaimentajiqueroni-jite conoacarca, iriguentiqueate igotanajatsine cavorejatanquitsica. Ivegaramajave-taqueate ooro cotanquitsiqueate oncoramanitapojegueti interoncanajempa. Aviatimpajia caaviji panajiaquero ooro, irootaquequeate imaica pantsipemajataquem-pagueti maasano arimpagueti pinquemisantamajataquero irishineventamajataquem-piqueate Jesoquirishito oncoramanitapojajegueti incoraquetajegueti incantajiaquem-piqueate: “Cameetsavaequempiqueate, imaicaqueate iintsija naajianaquempi jeno-qui inquitequi picancaniqueate pinconoajiaquena naatimpa, noshineventajiaquempitarite.” ⁸ Teequeate pinejaviavetempariji, cotanquitsi pipintsajiacari. Tee pinejaviavetempariji imaica, cotanquitsiquea paventajianacari, irootaquequeate pishinemajatantajiacaca. Caaviji pishinemajajia, oganejencavaeca ocatica shinevaetagantsi, ⁹ imeshiajiaquempitari pishirequi aatoniji pipejajaa, irootaquetari paventimentantajiacarca.

¹⁰ Coramani irirajia tsavetantajiatsica yapatsajavantamajajiaquero Itioncacaantaqueca Aapani Irioshi, aisa iquenquejamajajiaquero intsajiaque quero incojiaquempini Aapani Irioshi incavintsajajiaquempigueti irimeshiajiaquempigueti, aisa irajajiaempigueti coajica, ariqueate iquenquetsatacojiaquero aisa. ¹¹ Iriaqueate Ishire Quirishito choocashirentajiaquerica iquenquetsashirentacaajiaqueritarite itsatacajiaquero irantsipeventajiacaji Quirishito coajica, ariqueate irimetojaventajianacaji, coajica iramenajero iroganejencare. Ariqueate iriatimpajia iquenquejamajajiaquero inintamajajiaquetarite intsajiaqueme querocaqueate aanquempaca inquejetaquempa imaica, aisa quero oncoguetanaquempini. ¹² Cotanquitsi ariqueate itsatacajiaquero Aapani Irioshi aatoqueate yamenajiguero iriatimpajia onetsanamajataquempagueti maasano itsavetantajiaqueca, iriguentijiarite amenajiaquerone impoiguetanquitsineca. Irootarite imaica itsavetantajiaqueca quenquetsatacaajiaquempica icamantajiaquempigueti quero icota Aapani Irioshi imeshiantigueti, iriotaquequeate agavejacaajiaquerica Ishire Aapani Irioshi poneanquitsica jenoqui inquitequi. Iriaquea irashivantijitete Aapani Irioshi inintajiavetaca intsamajajiaqueromequeate maasano ocatica itsavetantajiaqueca.

Aapani Irioshi inintaque incomajamajajiaquempa maasano quemisantajiguirica

¹³ Irootaquequeate nocantantajiaquempica imaica pinquenquejamajajiaqueroja quero pincojiaquempani pincomajamajajiaquempagueti aisa pinquenquejamajajiguero quero incojiaquempi Aapani Irioshi incavintsajajiaquempigueti coajica incoraquetajegueti Jesoquirishito. ¹⁴ Pinquemisantamajajiaquero Aapani Irioshi, aviguentijiarite irijanijiate. Aatoquea piquejejijaa coramani tequeratagueti pintsajigueriji pantaquerogueti pinintashiguetaacaca intati. ¹⁵ Iroguentiquea pinquempejiaquempiquea Iriomajatatsica cajemajiaquempica teequea incovaeguishetimatempaji, pinquejetantajiaquempaca aviatimpajia pincomajamajajiaquempaja querocaca pantajiaqueca. ¹⁶ Aritarite ocantaque Itioncacaantaqueca: “Pincomajamajajiaquempaja aviatimpajia, irooriji nocomajamajataca naatimpa.”

¹⁷ Piquenquetsatacaajiguirigueti Aapani Irioshi picantajiguiri: “Aapani.” Iroosacanicate imaica picancanija pimpincatsamajajiaquero irosati pimetojajianaje, teenicate inchoocatenica apaniro iranaaque impintsamajataquempaca. Irosatiquea mana ipintsamajajiacari maasano intati, yamenajiaqueritarite ariqueate iquejetavacaajia maasano. Irootaquequeate icantomajantajiacarca maasano antaguishejiguiroca teeca oncameetsateji. ¹⁸ Coramani mana poguijatacojiavetacaroqueate itsatacaajiaquempica pivaesatinite, cotanquitsi manaqueate poguijatacotamampeajiacaro intati, teequeate omeshiajiguempiji. Cotanquitsi coajica yaajajimpiqueate Aapani Irioshi aatonijite piquempejijaa imaica. Tee irioqueate irovegarrantajiguempiji imentaquipae

teroncanajatsineca yaajiajimpigueti, ¹⁹ iroguentiqueate yovegaratantajiaquempi iriraja Quirishito quejetacarica ovejaniqui teeca incovaeguishedempaji, teeca incha-cotimateji.* ²⁰ Coramani tequeratagueti impeacaguemparo Aapani Irioshi quepatsi igantagaqueate icantsitaca quero incoquempani Quirishito, cotanquitsiquea imaica pajinigueti aapojempa savincaguiteripae vegaratapajaatsineca yonigaantaqueriquea incavintsajiaquempiniji. ²¹ Pitsajiaquerigueti Quirishito paventajiacariquea Aapani Irioshi tancorejajirica imetojavetacagueti, aisa yoganejencatacaajari, irotaquequea paventantajiacarica Aapani Irioshi, poguijajiaqueri incavintsajiaquempi.

²² Piquemisantamajiaquerogueti Quenquetsatsarentsimajaca ishejiajimpipro piguempevaere, imaicaquea jac netsanamajajianaquempi cameetsanijite arimaja pimpintsatimentajiaquemparinijite papiguemisantarijiate. Imaica picancaniquea pimpintsatavacaamajiaquempaja aatoqueate picatsimatavacaimajijaatsi.

²³ Quejejaquempiqueate iroaquerasanoca pivoajiaji. Teequeate iriguenti oacaantajiguempine caquinte metojajijaatsineca, iriguentiqueate irijanintajiguimpi Aapani Irioshi, piquemisantajiaquerotarite Iguenquetsatsare. Oraqueate Iguenquetsatsare anijaque, oncogitempani onchoocaguiteni, aato opega. ²⁴ Aritarite ocanti tioncanquitsica:

“Maasano caquinteja manaqueate iquejejiacaró cataroshi ometojitagueti, ariqueate iquejejiaca iriatimpajia teequeate inquishojigueti.

Ariqueate oquejetaca aisa yanaantajiguigueti manaquea oquejetacaró ovempenaquipae teequeate onquishopempenaquiteji, ariqueate inquejejaquempa iriatimpajia aatoqueate igantaga yanaantajigui.

²⁵ Cotanquitsi oraqueate Iguenquetsatsare Amajirote oncogitempani onchoocaguiteni.”

Irotaquequeate quenquetsatsarentsi itsavetantajitaqueca icamantajitaquempirogueti Quenquetsatsarentsi Oganejencatatsica.

2

¹ Irotaquequeate nocantantajiaquempica povashiantajianajero maasano pantaguevetacaca teeca oncameetsateji. Aatoqueate pamatavijantajiaji, aisa aato picantashijiaja intati. Aato picatsimatacotsitiri itsipa querocagueti icocani jero aisa taaca opajita yashintacaca, aisa aato pinijashitantajiaja. ² Aviatimpajia pinintamajiaqueroja Iguenquetsatsare Aapani Irioshi, pinquejejaquemparija chaajaniquitirajaca iriaqueraca voanquitsi yametarogueti itsomi imponcantanaquempaca. Ariqueate pinquejejaquempa pinquenquejamajiaqueroja Quenquetsatsarentsimajaca ontampishitacaajiaquempiniji pishirequi arimpanijite pinquemisantamajajianaqueri Aapani Irioshi irosati irajianaquempi jenoqui inquitequi. ³ Pitsajiaquetarite yoganejencamajataca Amajirote, icavintsajiaquempitarite.

⁴ Pinquempejijapojaquempari iriatimpa quempetacaroca mapi anijatsica. Irirajia caquinte imanintajiavetacaró ocatica mapi yantajiguigueti mapipanco, cotanquitsi Aapani Irioshi icoguaquero, ishinevencaro yamenaquerotarite oganejencamajata. ⁵ Aisa aviatimpajia mana piquejejiacaró otsipapae mapicota anijatsica ipeacaantacaca Aapani Irioshi tsovironaqui inchoocashirentaqueca. Aisa piquejejiacari isaserrotejiate, quejetaca pitaajiaqueneri viratsi ishineventacaca pisavicaventamajiaquerogueti maasano inintaguetica, piquemisantajiaqueritari Jesoquirishito. ⁶ Aritarite ocanti itioncajatica coramani:

Icanti Aapani Irioshi: “Nonquejetaquempari coguaquero mapi yantaquerogueti mapipanco, icoguaquero cameetsamajatanquitsica ompeaquempanijite anaantamajatanquitsineca. Aritarite nocoguaqueri Quirishito nontigarancaqueri Shionequi, namenaqueritarite caaviji yoganejencata.

Maasanoqueate quemisantajiaquerineca aatoquea ipashiventa.”

* 1:19 Coramani yamejiacaqueate jorioja icarajiguiniriqueate Aapani Irioshi oveja, cotanquitsi iriguenti icarajiaqueneri oveja cameetsamajatanquitsica quericaca teeca incha-cotimateji. Ariqueate iquejetaca Quirishito iriatimpa icameetsamajataque teequeate inquempevaetimatempaji, irotaquequeate yagavejantacaca imetojaventajiacaji.

⁷ Aviatimpajia quemisantajiatsica pamenajiaqueri yoganejencamajata. Irira teeca inquemisantajigueriji iriotaquequeate ocantacotaque itioncacojiquerigueti ocanti:

“Irraqueate antajiguiroca mapipanco itsinetacotantarogueti mapicota imanintaqueroqueate mapicota cameetsamajatanquitsica,

cotanquitsi opejaaqueate anaantamajatanquitsica quishotacaaquerooca otsipapae.”

⁸ Aisa onetsanataca itioncacojiquerigueti ocanti:

“Iriatimpa mana iquejetacaro mapi itivatantajitaca ariqueate iromposantajitaquemparo.”

Teenicate irinintajigueji inquemisantajiaquero Iguenquetsatsare Aapani Irioshi, irootaquequea tee intsatantajiaquemparica Quirishito, mana icomijiavacari, irootaquetarite icantaque Aapani Irioshi coramani.

⁹ Cotanquitsi aviatimpajia icoguiajiaquempi Aapani Irioshi igonorontajiajimpi, inintacajiaquempi pimpeajiaquempa isaserrotejiatē Majirontamajatsica. Aisa inintacajiaquempi pincomajamajiaquempaqueate maasano, yashintamajiaquempitarite. Mana oquejetaca imaica cameetsanijite pincamantimentajiaquerinijite maasano quero icota Aapani Irioshi, caaviji yoganejencamajata. Coramani teequeate pintsajiavetempaji quejevaevetacaqueate manaca pipitsecacojiaque intati, pantaguishejiavetacotarite teeca oncameetsateji, cotanquitsi ariqueate imeshiajiajimpi quejevaetaca manaca pisavincaguitetacojianaji, teenicatarite pantajiajeroji pantaguishejiavetacaca coramani.

¹⁰ Coramani tee irashintajiavetempiji Aapani Irioshi, cotanquitsi imaica aviguentijiaqueate irijanijiate. Aisa teequeate queri incavintsajiajiavetempiji, cotanquitsi imaica icavintsajiaquempiqueate Aapani Irioshi.

¹¹ Napiguemisantarijiateni nopintsamajajiacaca, aato osamani pichoocajigui acaniqui quepatsiqui. Ariguenti poajianaque pinchoocamajajiajojaquequea ontaniqui jenoqui inquitequi ichoocaquegueti Quirishito. Nocantantajiaquempicaqueate pintampishitashijiaquerojate maasano teeca oncameetsateji ishineventajiacaca caquinte, quejetacaquea ashimirintacaro pishire arisanoja oquempevaeshirentacaajianajimpitsi.

¹² Imaica pinconoajiaquemparigueti teeca inquemisantajigueji cameetsaqueate pinchoocajigue. Ariguetiija irinijashijiavetaquempi ijiqueji irooquea pantajiaque teeca oncameetsateji, cotanquitsi coajica iramenajiaquempi arimaja picomajamajajiacaca irishineventajiaquempariqueate Aapani Irioshi incoraquetajegueti, incantajiaqueri: “Arimajasacanicate yantajiaque cameetsatatsica.”

Peerero icantajiaqueri inquemisantajiaquerija majirontajiaatsica

¹³ Aviatimpajia piquemisantajiaquerigueti Amajirote, imaica pinquemisantajigueri aisa maasano pimajirojiate choocatanquitsica acaniqui quepatsiqui.

¹⁴ Pinquemisantajigueri pimajirote anaantatsica aisa quejemajirovecarica itigarancaqueca incantajiaqueriqueate antaguishejiguiroca teeca oncameetsateji incantomajajiaqueri, jero aisa irishineventajiaquempari netsanajianquitsica.

¹⁵ Irootarite ininqueca Aapani Irioshi pinetsanamajajiaquempaja cameetsanijite poguemisantimentajiaquerinijite nijashijiaquempica teeca intsajigueriji Aapani Irioshi. ¹⁶ Tecatsi omperajiaquempine imaica, nocantantajiaquempica pantajiaquero cameetsaguetatsica. Aatoquea picantitsi: “Imaica nantaguisshetaque taaca opajitapae nonintaguetica naatimpa, tecatsitarite omperataquenane.” Aato ocameetsati pinquejetaquempagueti. Pinquemisantajiaquerija Aapani Irioshi ashintamajajiaquempica.

¹⁷ Cameetsaja pinquenquetsatacaajigueri maasano caquinte, paajiaqueri maasano. Pimpintsajiaquemparija papiguemisantarijiateni. Pimpincatsajiaqueriqueate Aapani Irioshi, pintsariventajiaquempari. Pimpincatsajiaqueri aisa pimajirojiate, cameetsaja pinquenquetsatacaajiaqueri.

Quero incojiaquempiani aajanirentsijia

¹⁸ Aviatimpajia yomperajiacaca, pinquemisantamajajigueri omperajiguimpica aato pipigatsajigari. Aato apaniro piquemisantajiguiiri cavintsajiaquempica, pinquemisantajiaqueriqueate aisa semajiguimpica. ¹⁹ Incatsimatashijitaquempigueti intati pantsiperejacojiaquemparoqueate. Pinquejejiacquempagueti imaica pintsajiaque

iriguenti piquemisantajiaque Aapani Irioshi, ariqueate imaica irishineventaquempi.
²⁰ Oraqueate managueti pantsipejiaquempa incatsimatimentajiaquempirogueti pantaquerogueti teeca oncameetsateji, ¿arimpate irooqueate irishineventimenquempi Aapani Irioshi? Aatoqueate. Cotanquitsi oraqueate iroogueti pantsipejiaquempa pimajeretanaque incatsimatashijitaquempigueti intati pantaquerogueti cameetsatatsica, ariqueate imaica irishineventimentajiaquempi. ²¹ Irootaquequeate inintaque Aapani Irioshi pinquejejiaquempa imaica. Pinquenquejamajiaqueri Quirishito yatsipeventajiacajigueti, ariqueate intsatacajiaquempi quero pincojiaquempiani pantsipejiaquempagueti incatsimatashijitaquempigueti intati. ²² Iriatimpa tee inquempevaetempaji, aisa teequeate iramatavijantimateji. ²³ Oraqueate inijashijitacarigueti teequeate impigatantempaji. Aisa yatsipetacaajitacarigueti teequeate incatsimajigueriji atsipetacaajiacarica, mana icantaque: “Inchiquiojita incantaque Aapani Irioshi quero incojiaquempiani.” ²⁴ Oraqueate imetojaventajiacajigueti Quirishito coroshiqui manaqueate yaitajianacajiro aguempaveaerejia itsinoqui yatsipeventajiacaji aatonijite icatsimatimentajiro Aapani Irioshi. Imetojaventantajiacajica aatonijite aquempavejiajatsi, manaqueate ancomajamajianajempa intati. Yompajacojitaqueri coroshiqui cameetsanijite irimeshiimentajiajinijite ancoguitempaniniji anijajajeniji. ²⁵ Coramani manaqueate piquejejiavecari intati oveja timpinanquitsica, cotanquitsi imaica pipianaja ichoocaquegueti Quempoguijantatsica Agamajacoshirentaquempica.

3

Quero incojiaquempiani shirampari aisa imanquigare inchoocajiaquegueti cameetsa

¹⁻² Aviatimpajia manquigarentsijia pinquemisantamajiaquerija manquigatimpica. Irioguetiqueate teeca inquemisantero Iguenquetsatsare Aapani Irioshi cotanquitsi iramenaquempigueti pinquejetaquero imaica arica irinintanaque inquemisantanaque iriatimpa aisa. Aatoqueate icoacota pinquenquetsatacaajeri pincantajiaqueriqueate inquemisantajiaque, yamenaquempitarite picomajamajajaca, piquemisantajiaqueri. ³ Aato iroguenti piquenquejajiguetsi pinetsanamajiaquempagueti pinetsanajiaquero pitsinoquitica quejetacaroca pimaie jero pinenquequijiaquempa taaca opajitapae vegaramajatanquitsica jero aisa pinquitsaajiaquempa quitsaarentsi cameetsamagotantquitsica. ⁴ Iroguenti pinetsanajiaque pishire pinquenquejajiaque quero pincojiaquempiani pinchoocatimentajiaqueniji cameetsa aatonijite osemashirentacaguimpi taaca opajita. Aritarite anetsanajiaquerogueti ashire ancoguitempani anchoocajiaque cameetsa. Irootaquequeate inintamajatica Aapani Irioshi. ⁵ Aritarite oquejejiaca manquigarentsijia coramanitica quemisantamajajiguirica Aapani Irioshi, ochoocajiaque cameetsa, aisa oquemisantamajajigui manquigataroca. ⁶ Ariqueate oquejetaca coramani Sarani iroatimpa, oquemisantamajajitiri Averaameni, aisa opincatsamajajitiri amenaquerigueti iriguenti ashintaro. Imaica aviatimpajia pinchoocajiaquegueti cameetsa, aisa aatogueti pitsaroajigui, ariqueate pinquejejiaquemparo iroatimpa.

⁷ Aviatimpajia shiramparijia cameetsaqueate poajiaquero pimanquigarejia, teesaconatarite ontampishimajajigueji onquejejiguempi aviatimpajia, aisa mavitetarite icavintsajiaquempi Aapani Irioshi imeshiajiaquempigueti cameetsanijite irosatiniji pinchoocajiaque iriatimpaqui. Pinquejejiaquempa imaica cameetsaqueate poajiaquero pimanquigarejia cameetsanijite inquemimentajiaquempinijite Aapani Irioshi pamanajiguerigueti.

Quero ancojiaquerini atsipetacaajiacajica

⁸ Imaicaquea imaica mana noncantajiaquempi pinquemavacaajiaquempaja, aisa pincavintsajavacaajiaquempaja. Pimpintsajiaquemparija papiguemisantariteni, pincavintsajantajiaquequeate, aatoqueate pinintajigui panaantajiaque. ⁹ Querocagueti incojiaquempini itsipa aatoja pipigajigari. Incatsimajiaquempigueti incatitsajiaquempigueti, aatoja pipigajigari. Iroguentiquea pamanajiaqueri Aapani Irioshi incavintsajaqueri. Irootaquetari inintacaantajiaquempica Aapani Irioshi incavintsajimentajiaquempinijite. ¹⁰ Ocanquetarite itioncacojiqueca ocanti:

“Quericaca nintanquitsineca irishinevaequempa aisa iriguintenitaquempa cameetsa,

aatoqueate injaguishevaeti, aisa aatoquea yamataga.

¹¹ Aato yantaguishtajiro teeca oncameetsateji, mana irantaque cameetsaguetatsica, irinintamajataqueate inchoocajiaque cameetsa.

¹² Icavintsajajiguiritarite Amajirote maasano quemisantajiguirica, aisa icancani iquemajigui quenquetsatacaajiguirica, cotanquitsi iriraqueate antaguishtiroca teeca oncameetsateji teequeate irishineventajiguempariji.”

¹³ Pinintamajiaquegueti pantajiaquero cameetsaguetatsica, ariqueate querocampate incatsimatimenquempica. ¹⁴ Cotanquitsi inchoocajiaquegueti catsimatimentajiaquempironeca pantaquegueti cameetsaguetatsica, picancaniquea pishinejiaquempa. Aatoqueate pitsaroacagari, aatoja pishoshoguiteta. ¹⁵ Manaqueate pintsaromentamajiaquempari Quirishito, pamenajiaqueriqueate tee inquempevaetempaji, pincantajiaqueri: “Aviguenti Nomajirote.” Incoacojiaquempigueti quero ocotaca piquemisantantacarica Aapani Irioshi, pishinejiaquempa queate pincantajiaqueriqueate. Pincamantamajiaqueri quero picotacani pitsatantajiacaca poajianaque jenoqui inquitequi ichoocaquegueti Aapani Irioshi picancaniquea pinchoocajiaquempajiaque. ¹⁶ Cotanquitsi cameetsaqueate pinquensatacaajiaqueri, aatoja picatsimajigui. Pinetsanamajiaquempaja cameetsanijite impashiventimentajianaquempanijite quericaca catsimatimentajiaquempironeca Quirishito arigueti irivosantejimentajitaquempiri iramenajiaquempigueti piquemisanqueri. ¹⁷ Iriogueti nintanquitsine Aapani Irioshi pantsipejiaquempa incatsimatimentajiquempirogueti cameetsaripae, cameetsavaetaque, caavijitarite anaque ocameetsamajataque onquejetaquempagueti imaica, anaquero pantsipejiaquempagueti incatsimatimentajiquempirogueti pantajiguirogueti teeca oncameetsateji.

Yatsipetacagueti Quirishito

¹⁸ Aritarite yatsipetaca Quirishito aisa. Imetojaventajiacajigueti irishejiaqueronijite aguempevaerejia, apatiroqueate imetojaventajiacaji yagaqueroquea maasano. Iriatimpa yoganejencamajatacaqueate teequeate inquempevaetempaji, cotanquitsi imetojaventajiacaji aatimpajia quempevaejitsica cameetsanijite iraajianacaji anconoajiaquempariniji Aapani Irioshi. Imetojajivetacari itsinoqui, cotanquitsi yanijacaajiri Ishire. ¹⁹ Yoashirentanaquequea iquenquetsatacaajiaquitiriqueate ishirejia ashita-coshirejianquitsica. ²⁰ Iriojatarite teeca inquemisantajigueji coramani ichoocaquegueti Noeni. Oraqueate tequeratagueti interonqueroji inirojegui quenajarontsi icantajitica aareca, irira Aapani Irioshi osamaniqueate yoguijajivecari teetaqueate irantsipeta-caajiguempariji. Oraqueate iteroncaquerogeti quenajarontsi, ariqueate itejaquero inirojenca incani anancacojianaqueri maasano, ariqueate iteroncajiaca yojocajiaica. Iriguentinivani yaajivaji 8 amajatacojianquitsica aarecaqui. ²¹ Irooquea ogomaro-taque imaica piviñacajiacagueti iraaajivajempiniji Aapani Irioshi. Tee irooquea piviñacajatashijiguempaji pinquivero cantaitero pitsinoqui, manaqueate piviñacajatantajiacaca pincantajiaqueriniji Aapani Irioshi pinintaque irishejajempi pishirequi aatoniji ochoocataji incantomajimentaquempica manaquea pinquenejajianaquero cameetsaguetatsica. Ipochatanajitarite Jesoquirishito yagavejantacaca iraaajivajempi. ²² Cotanquitsi ipochatanaji ariqueate yoanaji jenoqui inquitequi. Imaica chooca isavicaque itincamijempequiqui Aapani Irioshi imajirontamajatagueti, yanaajiaqueri maasano: irashivantijitete Aapani Irioshi, majirontaguevetatsica, agavejantaguevetatsica, maasano.

4

¹ Nocamantantajiaquempicaqueate imaica cameetsataque pantsipejiaquempagueti aviatimpajia pinquejiaquempari Jesoquirishito yatsipeventajiacajigueti itsinoqui. Antsipeventajiaquemparigueti iriatimpa atsinoqui, aato aquenquejajiajiro teeca oncameetsateji. ² Imaica choocatirajajigueti atsinoqui acaniqui quepatsiqui, aatoqueate

coanatsi antaguishejiguero taaca opajitapae teeca oncameetsateji, iroguenti anquenquejamajiaque antajiaque inintaguetica Aapani Irioshi. ³ Coramani pantaguishejiaquetarite taaca opajitapae teeca oncameetsateji ishineventaca teeca inquemisanteriji Aapani Irioshi. Poashijiaquero manquigarentsi aisa piquenquejaguishejiaquero teeca oncameetsateji. Pishinquijsica, aisa picapiocajica cameetsanijite pishinquijsiquempa pantaguishejiaqueniji teeca oncameetsateji. Icantavecaqueate Aapani Irioshi: “Aatoja pitsariventari itsipa”, cotanquitsi teequeate pinquemisantajigueriji, arimpaquea pijatiri pitsariventajianacari pirioshivijitashitacaca. ⁴ Imaica teenicate pinconoajajempariji antaguishejiguiroca teeca oncameetsateji, irootaquequeate icantantajianacaca: “Querocate icojianacani imaica teequeate inconoajajajiji”, ariqueeate inijashijianaquempi. ⁵ Cotanquitsi chooca ontaniqui inquitequi irira Cantimentantatsica, incoacojiaqueeriqueate irira nijashijiaquempica, incantajigueri: “¿Quero ocotaca pinijashitantajivetarica irira quemisantajiaquenaca?” Aritarite incantimentajiaqueriqueate maasano taaca opajitapae yantajiaqueca maasano quempevaejiatsica imaica, iriocampa metojajianquitsica jerijia tequerataca irimetojajigueji. ⁶ Irootaquequeate iquenquetsatacantajitacarica irirajiaqueate metojajianquitsica coramani. Imetojajiavetaca, iriguentijatarite quempevaejiatsica quejekarica maasano igonorojia, cotanquitsi iquenquetsatacaajitaqueri itsavetacojitaquero Quenquetsatsarentsi Oganejencatatsica cameetsanijite incoguitempaninijite inchoocajiaque ishijerija inquempejajempari Aapani Irioshi.

Icantajiaqueriqueate incavintsajajiaquerija irapiguemisanteriteni

⁷ Imaica pajiniqueate aguempa onteroncantapojempaca maasano acaniqui quepatsiqui. Nocantantajiaquempica pinquenquejamajiaqueja quero pincojiaquempa, pincomajajiguempaja. Irosati pinquenquetsatacaajiaqueri Aapani Irioshi. ⁸ Pinintamajajigueja pimpintsatavacaamajajiaquempa. Pinquejejiaquempagueti imaica aatoquea piquenquejajiguiro quero incojiaquempini papiguemisanterijiateni, manaqueate pimpeacotajemparo. ⁹ Paavacaajiaquempa, poguimaajiaqueri osamanipaequitica, aato picantimanatiri. ¹⁰ Aapani Irioshi icantashitatijiaquempiqueate yagavejacaajiaquempi apaniropae. Irootaquequeate nocantantajiaquempica imaica querocaca yagavejacaajiaquempica irootaquequeate pisavicaventajiaque cameetsanijite pamicatojiaquerinijite papiguemisanteriteni, cotanquitsi pisavicaventamajajiaque-rojate cameetsanijite iramenimentajitaqueronijite arimaja icavintsajantamajati Aapani Irioshi. ¹¹ Choocagueti tsavetantatsica irooqueate intsavetantaque icanqueca Aapani Irioshi. Choocagueti amitacojiguirica irapiguemisanteriteni irooqueate iramitacomajajiaqueri, itampishitacaqueritari Aapani Irioshi. Pinquejejiaquempa imaica cameetsanijite intsaromentajitaquemparinijite Aapani Irioshi, iriguentitarite agavejacaquempine Jesoquirishito. Iintsija acancanija antsaromentajiaquempari, iriguentitarite caavijica yagavejamajati. Ari oncoquempa.

Icantajiaqueriqueate irishinejiaquempaja yatsipeventajiacarigueti Quirishito

¹² Nopintsamajajiacaca, aato poajianaque intati patsipejiacagueti, aato picantajigui: “¿Queroca ocotacani ocatita?” Aritarite onquejetaquempani imaica cameetsanijite iramenajiaquempinijite Aapani Irioshi arimajaca piquemisantamajataqueri. ¹³ Coramani yatsipevaetaca Quirishito. Imaica pishinejiguempa, piquejejiacaritarite iriatimpa patsipejiacagueti cameetsanijite pishinetimentajiaquempaninijite oncoramanitapojajegueti iramenajitaqueriqueate irimajirontamajatapojaquempa. ¹⁴ Pishinejiaquempaqueate irivosantejajitaquempigueti iramenajiaquempigueti piquemisanqueri Quirishito. Ichoocashirentajiaquempitarite Ishire Aapani Irioshi, iriguentiquea Oganejencari.

¹⁵ Inchiquiojitaja patsipeventajigarotsija pimetojantajiaquegueti, jero aisa pincoshijiaquegueti, aisa pantaguishejiaquerogueti otsipapae teeca oncameetsateji. Aisa inchiquiojia patsipeventajigarotsija piticaavaquerigueti taaca opaji irante. ¹⁶ Iroogueti pantsipeventajiaquempa pinquemisantajiaquerigueti Quirishito, aatoja pipashiventajiga, manaqueate pintsaromentajiaquempari Aapani Irioshi pamenajiaquegueti iriguenti patsipeventajiacaca Quirishito. ¹⁷ Apojacatarite impariantanaquemparoca Aapani Irioshi iramenantajiaquemparica maasano, cotanquitsi iriqueti parianacaro atsipejianquitsi

irijanintajiacaca cameetsanijite iramenajitaquero arimaja iquemisantamajajiaque ari-campa tee. Aritarite aquejejianaca aatimpajia imaica atsipejiacagueti, iriompate irirajia teeca inquemisantajigueroji Quenquetsatsarentsi Oganejencatatsica itigarancaqueca Aapani Irioshi ¿quero incojiaquempani iriatimpajia? Arimaja irantsipemajajiaque-mpa. ¹⁸ Irantsipejiavetaquempaqueate quemisantajiaatsica, cotanquitsi Aapani Irioshi irajaiavajeri. Irirampani covaeguishetatsica teeca inquemisanteriji Aapani Irioshi, ¿quero incojiaquempani iriatimpajia? ¹⁹ Irootaquequeate noncantantajiaquempica iriogueti nintanquitsi Aapani Irioshi pantsipeventajiaquemparo inintaguetica iriatimpa, arimpaqueate pantajianaqueroja cameetsaguetatsica. Iriotaquetarite peacaajiacaji, irooqueate cameetsataquequeate pinquenquetsatacaajiaqueri pincantajiaqueriqueate: “Nonintaque pamenacomajataquena, notsataquetarite pinetsanatero maasano pican-taqueca.” Aatotarite yamatavijiguimpi Aapani Irioshi.

5

Peerero icamantajiaquerigueti quempoguijajiguirica quemisantajiaatsica

¹ Imaica nonintaque nontsatacaajiaquempi aviatimpajia quempoguijajiguirica quemisantajiaatsica capiocapiniatsica ontaniqui, naroguentitari aisa quem-poguijajiguirica quemisantajiaatsica. Naroguentitarite amenamajataquerica Quirishito yatsipetacagueti. Oncoramanitapojajegueti incoraquetajategueti ironigaampojempa yoganejencavaeca, ariqueate intsipatanajena naatimpa aisa, nonquejevetanaquempari. ² Imaica irootaquequeate noncantantajiaquempica ocatica: Pinquempoguijamajajiaquerija papiguemisantarijiateni, inintacajiaquempitarite Aapani Irioshi pinquempoguijajiaqueri. Pintsatacaajiaqueriqueate, aatoja piperajiga. Inchiquiojita pinintajianaque aviatimpajia pintsatacaajiaqueri, aatoqueate icantajiguimpi itsipa, aisa aatoja iro pitsatacaashitanti paaqueniji imentaquipae, manaquea pinintamajajigue pamitacojiaqueri. ³ Aatoja picatsimatsajiguiri pinquempoguijajiaquerigueti, manaqueate cameetsaqueate pinchoocajiaque cameetsanijite iroguijatacojianaquempinijite iriatimpajia. ⁴ Pinquejejiacquempagueti imaica, oncoramanitapojajegueti incoraquetajegueti Jesoquirishito quempoguijajiajica maasano aatimpajia, irajaianajempi intsipajianaquempiqueate jenoqui inquitequi, incavintsajamajajiaquempiqueate pincoguitepani pinchoocamajajiaquequeate cameetsa pinquejejiacquempariqueate iriatimpa.

⁵ Imaica aviatimpajia quemisantajiaatsica pinquemisantamajajiaquerija quempoguija-jiguimpica, aisa maasano pinquemisantavacaajiaquempaja, aato pinintajigui panaanta-jiaque. Aritarite itioncacojiquerogueti ocanti:

“Aapani Irioshi ipigajiacari irirajia aventacojiatsica, cotanquitsi icavintsajamajajiaqueriqueate irirajia teeca iraventacojiguempaji.”

⁶ Irootaquequeate nocantantajiaquempica pimpincatsamajajiaquerijate Aapani Irioshi agavejamajatatsica. Oncoramanitapojaquegueti aapojempagueti irinintanaquegueti incovejencatacaajiaquempi, incovejencatacaajiaquempiqueate.

⁷ Taaca opajitapae piquenquejajiguica aatoja pishoshoguiteventajigaro, manaqueate pincantajiaqueriqueate Aapani Irioshi incavintsajajiaquempiqueate, igantagatarite iquenquejajiaquempi tee impeacojiguempiji.

⁸ Pinquenquejamajajiaque cameetsa, pagamajavaquemparija imajirote ampatsini catsimajiaquempica. Iquejetacariquea chaonari icantigueti morororo, iquenague-tanaque yamenaguetanaque irishecaquempaca. ⁹ Cotanquitsiqueate pintampishi-tashijiaquerija aatoqueate piquemisantajiguiri. Picancaniqueate pinquemisantamaja-jianaqueri Amajirote, aatoja povashiantajiguero piquemisantajiaquerigueti, pitsajiaque-tarite ariqueate iquejejiaca papiguemisantarijiateni guinteniniatsica osamanipaequit-ica yatsipejiacariqueate taaca opajitapae. ¹⁰ Ariqueate pinquejejiacquempagueti imaica pantsipejiacquempagueti, iriraquea Aapani Irioshi iramitacojiaquempiqueate aatonijite povashiantajiguero piquemisantajiaquegueti, aisa intampishitacajiaquempi jero aisa inquemisantacaamajajiaquempiqueate. Ariqueate osamanijencaquegueti pinquejeji-aquempa imaica, ariqueate intsipajianaquempi jenoqui inquitequi pincoquempaniquea pinchoocajipoje ontaniqui, pinquejejiacquempariqueate iriatimpa icovejencatigueti,

irootaquetari inintacaajiaquempi Aapani Irioshi, aisa icavintsajamajiaquempiqueate piquemisantajiaqueritarite Jesoquirishito. ¹¹ Iintsija acancaniquea antsaromentajiaquempari, iriguentitarite caavijica yagavejamajati, incoguitempani irimajirontamajaguitempani. Ari oncoquempa.

¹² Chooa acaniqui notsipatacari Shirivano. Iriatimpa iriguenti papiguemisan-tariteni quemisantamajatarica Quirishito. Iriotaquequeate notsipatashitacaca notion-cajiaquempigueti capichaji notsavetanquerigueti Aapani Irioshi quero icota icavintsajajiaquempigueti, aisa notampishitacajiaquempiqueate cameetsanijite arimpanijite pinquemisantamajajianaqueri. Aato povashiantajiajiro piquemisantajiaqueca.

¹³ Iriajiaqueate apiguemisantarijiateni guinteniatsica Vavironiaqui* inintajiaque pinquemacojiaqueri iquenquejajijimpi. Iriaqueate Aapani Irioshi inintacajiaqueri iriatimpajia inquemisantajiajeri inquejejaquempiqueate aviatimpajia. Ariqueate ique-jetaca aisa notsatacaane Maricoshi nopeaqueca nirijanite, iriatimpa inintaque pin-quemacojiaqueri iquenquejajijimpi. ¹⁴ Netsana pinintavorotavacaavaquempa,† pimp-intsatavacajiaquempa. Namanacoventajiaquempi piguintenijiaquempanijite cameetsa maasano aviatimpajia quemisantajiguirica Quirishito. Ari oncoquempa.

* 5:13 Vavironia. Iconoagarantajiaa pariacaroca quemisantajiaquerica Quirishito iquenquetsatacoquerogueti Iroma, teequea tampatica incanteroji ovajiro, mana yomanaquero, iquempetacaacaro Vavironia iponeajiacagueti catsimajiaquerica ivaesatiniteni paesatoniqui. (Pamenero Yonig. 14.8; 17.5; 18.2.) Arica ichooaque Peerero Iromaqui itioncaquerogueti ocatica paperi. † 5:14 Netsana pinintavorotavacaavaquempa. Yamejiaca coramani inintavorotavacaajivaca yamenavacaajiacagueti, ari iquejejiaca tsaromentajigarica Quirishito coramani.

MAVITETAPOJATSICA ITIONCAQUECA PEERERO

Antsatantaquemparoca

Ocativa iroguenti antsatantaquemparoca mavitetapojatsica itioncaqueca Peerero. Chooa quenquejajianquitsica itioncajiaqueneri joriojia tsarotentajiacarica Jesoshi oaguetananquitsica quepatsipaequi icantajitica Ponto, Garashia, Caparoshia, Ashia, aisa Vitinia (1 Pe. 1.1). Cotanquitsi itsipajia iquenquejajiaque itioncajiaqueneri maasano quemisantajiaquerica Jesoshi. Peerero irio jorio, irio itigarancane Jesoshi. Irocashi itioncacotaqueri irira Peerero otsipaequi paperiqui (Ya. 1.12-5.42; 8.14-25; 9.32-12.19; 15.7-11). Iquenquejajiaque itioncaquero ocativa paperi irooca ajagantsiniqui 64, cotanquitsi tee intsajiteji quero ichooaqueuni itioncaquerogueti. Chooa quenquejajianquitsica itioncaquero ichooaquegueti guinteninintsiqui pajitatsica Vavironia, itsipajia iquenquejajiaque arica ichooaque Peerero Iromaqui itioncaquerogueti.

Itioncajiaqueneri quemisantajiaquerica Jesoshi iragamajajiaquempari amataajiatsica, aatoniji yamatavijajiguiritsi intsatacajiaquerigueti teeca iroomajateji, aisa aatoniji yovashiantajianajiro iquemisantajiaquegueti (3.17). Icamantajiaqueri quero incojiaquempani quemisantajiaquerica Jesoshi (1.1-15). Itsavetacotajiro coramanitica icantashitatiimojiaquerigueti Jesoshi, aisa iquenquejajiaqueri icantajiaqueca tsavetantajiatricani coramanitica (1.16-21). Icantajiaqueri icantajiaquetacaca amataajiatsica (cap. 2), aisa iquenquetsatacotaquero incoraquetajategueti Jesoquirishito acaniqui quepatsiqui (cap. 3).

¹ Naroguenti Shimo Peerero tioncajiaquempiroca oca. Naroguenti irajaanire aisa itigarancane Jesoquirishito. Imaica nontioncajiaquempi maasano aviatimpajia quejiaquenaca naatimpajia aventajigarica Jesoquirishito Arioshite Aajiajavica aatoniji apega. Cameetsavaetaque paventajiacarigueti. Tampatica yoaguetaque maasano, irootaque yagavejacaantajiaquempi paventajigari. ² Namanacoventajiaquempiqueate pintsatimentamajiaquerinijite Aapani Irioshi aisa Amajirote Jesoshi cameetsanijite arimpanijite incavintsajamajiaquempi, aisa inchoocatacajiaquempiqueate cameetsa aatonijite pishoshoguiteventajigaro taaca opajitapae.

Icantajiaqueriqueate quero incojiaquempani inquemisantamajiaquerigueti Jesoquirishito

³ Irira Aapani Irioshi inintacajaiacaji anconoajiaquempari, aisa anquejiaquempari ancomajamajiaquempa. Imaica atsajiaqueritarite yagavejacaantajiacajica anquemisantamajiaqueriniji, aisa antajiaqueronijite maasano inintaguetica. ⁴ Inetsanataqueroqueate icantacajica, yagavejacaajiacaji antajiaquequeate cameetsaguetatsica aatonijite aquejejijaaritsi teeca inquemisantajigueti antaguishejiguiroca teeca oncameetsateji, manaqueate anquejemajiaquempari iriatimpa. ⁵ Imaica piquemisantajiaqueri, irootaquequeate nocantantajiaquempi nonintaque pincomajamajiaquempaja. Ariqueate pincomajamajianaquempagueti irooqueate pisavicaventajiaque pintsamajianaqueroqueate inintaguetica Aapani Irioshi. ⁶ Pintsamajianaqueroqueti ariqueate pintampishitashijianaquero maasano teeca oncameetsateji. Pintampishitashijianaqueroqueti ariqueate pantsiperejacojianaquempa. Pantsiperejacojiaquempagueti ariqueate pimpincatsajianaqueri Aapani Irioshi pishineventajiaquemparoqueate pantajiaquero inintaguetica iriatimpa. ⁷ Pimpincatsamajiaquerigueti ariqueate pimpintsajiguempari maasano papiguemisantaritani. Pimpintsajiaquemparigueti papiguemisantaritani, ariqueate pincavintsajigueri aisa maasano caquinte. ⁸ Pinquejiaquempagueti imaica arimpaqueate pintsamajianaqueri Amajirote Jesoquirishito pinquejianaquempariqueate iriatimpa, ariqueate aato piquemisantamampeajiga intati. ⁹ Iriraqueate teeca inquejetempaji imaica iquejevetacari caarica amenamajatatsi, iquejevetacariquea shamponcajari teenicate intsamajateriji Amajirote, aisa

ipeacocaró icavintsajaqueriguéti Aapani Irioshi yaajiriguéti ishetajiniriguéti maasano iguempvaere. ¹⁰ Cotanquitsi aviatimpajia, napiguemisantarijiate, aatoqueate piquejéjigari iriatimpajia mana picancani pantajiaquero nocantajiaquempica imaica cameetsanijite pintsamajajianaquenijite arimaja inintacajaiaquempi Aapani Irioshi pinquemisantajiaqueri aisa irashintamajajiaquempi. Pinquejéjiaquempaguéti imaica aato povashiantajajiro piquemisantajiguiguéti. ¹¹ Coajicaqueate poajianaquaguéti jenoqui inquitequi ichoocatiguéti Amajirote Jesoquirishito Meshiantatsica cameetsaqueate irajaiavajempi pinconoajiaquempariqueate ontaniqui igantagaguéti irimajirontamajataquempaqueate.

Icantajiaqueriqueate arimpa inquenquejajianaqueroja itsatacaajiaquerica

¹² Pitsajiaqueroqueate notsatacaajiaquempica, aisa piquemisantamajajiaque-roqueate, iroomajacatari; cotanquitsi irosatiquea nonquenquejacaajiajémpiro. ¹³ Otampaticataquequea nonquenquejacaapinijiajémpiro choocatirajanaguéti acaniqui notsinoqui, quejearoca noitsaarevanco, ¹⁴ notsaquetarite quempejitacotapoji savincaguiteri nometojantaquempaca nojocapanajantero notsino, itsatacaaquenarotari Amajirote Jesoquirishito. ¹⁵ Nonquejetaquempaqueate imaica cameetsanijite pintsamajajiaquenijite aatonijite pipeacojajaro nometojanajeguéti.

Cameetsavaequequeate inquemisantamajajiaqueri tsavetantamajatrira Quirishito

¹⁶ Oraqueate notsavetantajiguiriguéti Amajirote Jesoquirishito nocantajiaquem-piguéti incoraqueataguéti incovejencamajatapojaje teequeate oratica naashijiguem-paroji intati, namenamajajiaqueritarite coramani icantashitatiimojiaquenaguéti on-taniqui otsempiqui icovejencavaequequeate. ¹⁷ Icovejencatacaqueritari Aapani Irioshi, yonigaantacaroquea iroganejencare iquenquetsajencajitanaquaguéti jenoqui ogane-jencaguitetacaguéti, icanti: "Iricatica irio Irijani, nopintsatacaca, noshineventamajata-cari." ¹⁸ Noquemajiaqueroquea naatimpajia iquenquetsajencajitanaquaguéti inquite-qui itsipajiaquenaguéti Amajirote ontaniqui otsempiqui.

¹⁹ Aisa atsajiaque arimaja icantamajajiaque tsavetantajiguironica icanqueca Aapani Irioshi coramani. Imaica cameetsataque pinquenquejajiaqueroja maasano itioncaji-queca cameetsanijite pintsamajajiantajiaqueronijite, manatarite oquejetacari tsi-vorentsi itsivojitiriguéti pitsecariqui cameetsanijite onconijaguitetimenquenijite. Pin-quenquejajianaqueroquea arejevaetantanaquempaca oratica savincaguiteri incoraque-tantajempaca iriratica quejetacarica irira shigompiri amenaqueca osavincaguiteta-manaquaguéti, ariqueate iroguiconijataquempiro pishirequi. ²⁰ Coramani itioncaco-jiquero Iguenquetsatsarequi Aapani Irioshi icantajiaquerica tsavetantirínica. Imaica nonintaque pintsajiaquequeate tee inchoocateji agavejanquitsineca inchiqiojita incan-taque iriatimpa taaca opajita ocantacotaque. ²¹ Teenicate inquenquejashijiaquemparo intati irirajia tsavetantirínica. Manatarite iquemisantamajajiaqueri Aapani Irioshi ariqueate itsatacaajiaqueri Ishire Aapani Irioshi quero incantajigue.

2

Tsatacaantantajiatsica amataajiaatsica

¹ Cotanquitsiqueate coramani ichoocagarantajiaquequeate aisa tsavetantajiatsica amatavijajiaquerica ishiraerijia. Ariqueate onquejetanaquempani imaica inchooca-garantajianaquequeate tsatacaantantajiatsica amatavijantajiananquitsineca. Iromana-cojianaqueriqueate Amajirote metojaventajiacajica, aisa intsatacaantantajiaque teeca iroomajaca Quenquetsatsarentsimajaca, incomitacaajiaquempari quemisantajiavetem-parineca, cotanquitsiqueate taampinaqueate interoncajitaqueri irisatiqueate queje-tacaantajanquitsine. ² Oraqueate icancaniguéti intsatacaantantajiaque inquemisan-tajiaqueriqueate oshequini caquinte, ariqueate inquejéjianaquempari irantaguishe-jianaquequeate taaca opajitapae teeca oncameetsateji, irooqueate onquenantapo-jaquempa intsojencantajitanaquemparo ca Quenquetsatsarentsimajaca tsavetantaquer-ica Quirishito. ³ Irirajiaqueate amataajianquitsineca irinintavintsajiaquequeate imen-taquipae intsatacaajiaquempiqueate taaca opajitapae inquenquetsatashijianaquem-

paqueate intati, cotanquitsi Aapani Irioshi jac icantacotsitacari coramani. Interoncajiaqueriqueate coajica, aato ipeacotaro.

⁴ Arimpate coramani irirajia irashivantijitete Aapani Irioshi antaguishejiaqueroca teeca oncameetsateji teequeate iraaajajeriji, ipishoncajiaqueri ontaniqui isaviji yashitacojiaqueri opitsecaquegueti. Imaica icancaniqueate inchoocajiaque oraniqui irosati incantimentantajiaquemparica coajica. ⁵ Ariqueate iquejetaca igonorojiani Noeni antaguishejiaqueroca teeca oncameetsateji. Teequeate iraaajajeriji, manaqueate itejaqueneri inirojenca incani anaacojianaqueriqueate maasano, ariqueate iteroncajianaca yojocajiaqueate. Iriguentinivaniqueate yaajjavaji Noeni jerijia aisa ijitanerija vegarajianquitsica ⁷. Iriraqueate Noeni iriotaque tsavetantimojiavetacarica igonorija, icamantajiavetacariqueate incomajamajajiaquempame. ⁶ Aisa coramani iguintenijiavetacagueti oshequini caquinte Soromaqui aisa Gomoraqui, oshequiamajatatiguinimaja tsovironaquipae. Cotanquitsi iriatimpajia yantaguishejianaqueroqueate taaca opajitapae teeca oncameetsateji. Irootaquequeate icatsimatantajiacarica Aapani Irioshi yoguivariashijiaqueriqueate paamari yapevoquijajiaqueriqueate maasano, iteroncamajajiaqueroqueate maasano tsovironaquipae teequeate querica choocatanajatsineca. Ariqueate iquejetaquero imaica cameetsanijite intsatimentajiaquenijite maasano antaguishejiatsica taaca opajitapae teeca oncameetsateji iriguenti ogomarojiaque incatsimajiaquerigueti oncoramanitapojajegueti interoncajiaquerigueti. ⁷⁻⁸ Ariqueate ichooaqueni oraniqui apaniro caquinte icantajitica Iroteni, cameetsaqueate ichooaqueni. Igantagaqueate yamenapinjiaqueri guintenijiatasica oraniqui yantaguishejiaqueroqueti taaca opajitapae teeca oncameetsateji, aisa iquemajiaqueri inijaguishejiaquegueti ishimampojancaqueate oshequi, aisa ishoshoguitevaetaca. Irootaquequeate yaantavajarica Aapani Irioshi itigarancajiri ontaniqui aatonijite itaatsi iriatimpa.

⁹ Aritarite itsataque Amajirote quero incoquemparo iraaajajateri quemisantamajajianquitsica aatoniji agavejajiguiro taaca opajita coraquetashijiaquerineca, aisa itsaque quero incantomajajiaqueri maasano teeca inquemisantajigueriji, ariqueate aavaepojempa iramenacotantajiaquemparica irantsipetacamajajiaquempari. ¹⁰ Irioquea incatsimamajajiaque irirajia guijatacojiguiroca inintaguishejiguica. Iriatimpajia iroguenti isavicaventajiaque yantaguishejiaquero taaca opajitapae teeca oncameetsateji. Teequeate impincatsajigueriji Amajirote, aisa inijashinatacari irashivantijitete Aapani Irioshi teequeate impincatsajigueriji. ¹¹ Irirampani ashivantijite caaviji yanaajiaqueri nijashinatacarica yagavejavaevecaquea, cotanquitsi teequeate impigatimajiguempariji incantajiaqueri Amajirote irantsipetacajiaquempari.

¹² Imaica noncantajiaquempi irirajiaqueate amataajiatsica teequeate intsajigueji quejejiacaqueate tomirishipaequitica isavicaventajiguiro taaca opajitapae inintajiaqueca. Iroguenti ichooatashijiaque iraaajitaqueriqueate irimetojajitaqueriqueate. Iriatimpajia mana inijashijiajaro taaca opajitapae teeca intsajigueroji. Irantsipeta-caajiquempariqueate interoncajitaqueriqueate quejejiacaqueate tomirishipaequitica. ¹³ Irantsipejiaquempaquate iroorijite yatsipetacaantajiaa iriatimpajia. Icancani isavicaventajiguiro taaca opajita ishineventajiaa. Ooshiatsi apashiventacaqueate pitsipajiacarigueti pishecajiacagueti aisa ishinejiacagueti yamatavijantajiaquegueti. ¹⁴ Teequeate iramenashitemparoji manquigarentsi querocaca yamenajiaqueca. Igantagaqueate yantaguishejiaquero taaca opajitapae teeca oncameetsateji, teequeate irovashianteroji. Yagavejantajiacarica teesaconaca intampishitashijigueroji teeca oncameetsateji, iquempevaetacaajiacari. Ari canca iriatimpajia ineveguecaro ajaararontsipae, itsajiguirotari quero incojiaquempani irajaarantajiaquempagueti, cotanquitsi incatsimatimentajiaqueriqueate Aapani Irioshi interoncajiaqueri. ¹⁵ Yovashiantajianaquerotarite tampaticavoquitanquitsica, iquenashijianaca. Manaqueate iquejejiacari Varaameni irijanite Veori, inintavintsavetacaqueate irajaaranquempari yantaqueroqueate teeca oncameetsateji iraanquamparomequeate. ¹⁶ Cotanquitsi coajiaqueate irio aashino cantomajiaquerica, icantimentaqueri yantaqueca teeca oncameetsateji. Iriovetaca canaanquitsica teeca intsavetempaji inquenquetsate, cotanquitsi iquempetanacari caquinte iquenquetsatanaque icantomajiaqueri

tsavetantavetacaroca icanquerica Aapani Irioshi, iticaavaqueri aatoniji iquejetanajari shoncacotanquitsica.

¹⁷ Iriatimpajia mana iquejejiacaró ochaquirejiguéti motojavetatsica. Aisa mana iquejejiacaró oseetiguéti yamenajitiroguéti arica ontejapojaque incani, cotanquitsi yaanajiro tampija, tee ontejeji. Aritarite iquejejiaca iriatimpajia itsatacaantajiaveca cotanquitsi mana yamatavijantajiaque intati. Coajica incatsimatimentajiaqueri Aapani Irioshi impishoncajiaqueri opitsecamajaquégue, icancaniqueate irantsipejiaquempa. ¹⁸ Oshequi isemejigui, aisa iquenquetsaguishetashijiaca. Yantaguishejiaque taaca opajitapae teeca oncameetsateji ariqueate yovashiantacaajivajiri iriaqueraca comajiananquitsica quemisantavecaroca Quenquetsatsarentsimajaca. ¹⁹ Icantajiaqueri: “Imeshiajiaquempitarite Aapani Irioshi imaicaqueate cameetsaqueate pantajiaquero taaca pinintaque. Aatoqueate icatsimatimentajiguimpíro.” Icantajiavecaqueate imaica, cotanquitsi iriatimpajia teequeate iragavejajigúeji irantajiaquequeate taaca inintaque, iroguenti yantaguisheetaque teeca oncameetsateji teroncacajiaquemparineca coajica. Pitsajiaquetarite teequeate inchoocateji agavejanquitsineca inchiqiojita irovashiantajero iriatimpa taaca opajitapae agavejamajaquerica. ²⁰ Coramani yantaguishejiaquero teeca oncameetsateji. Ariqueate itsajiaqueriguéti Amajirote Jesoquirishito Meshiantatsica yovashiantajianaquero. Cotanquitsi imaica inquejetanajempaguéti iroaqueraguéti tequerataguéti intsjagueriji arimpaqueate irijajianaqueri, arimpaqueate irogaajianaquempani. ²¹ Aatomeja itsajiguirome Quenquetsatsarentsimajaca tsavetantirica Quirishito. Itsajiavetacarotarite cotanquitsi yovashiantajianajiro, irootaquequeate arimaja irantsipemajiaquempa. Aisa ipiashijianajaro yantaguishejiguica arimpaqueate ijajigui. ²² Icantajitarite imaica: “Irraqueate shiishi icamaranquiguéti, yoguipiajiro ishecatavajaro.” Aisa icantajiti: “Pincajateriguéti chancho irisati piashitanajemparone intigaritajemparo sampovatsa.” Ariqueate iquejetaca quemisantajiavetatsica piashijianajaro yantaguishejiguica.

3

Incoraquetajeguéti Amajirote

¹⁻² Napiguemisantarijateni nopintsamajajiaca, coramaniqui notioncajiaquempi nonquenquejacaimentajiaquempironijite iquenquetsatacojiaqueca tsavetantajiguirinica Aapani Irioshi, jero aisa notsavetantajiaqueca naatimpajia itigarancanejia Jesoshi, nocamantajiaquempiguéti maasano icantajiaquenaca Amajirote Meshiantatsica. Imaica notionquitajajimpiqueate aisa nonquenquejacaamajiaquempíro pinquenquejacojiaqueniijite cameetsaguetatsica.

³ Nonintaquetarite iroguéti pinquenquejamajiaque quero oncotanaquempani oncoramanitapojajeguéti pajiniguéti aapojempa savincaguiteri vegaratapojatsineca, inchoocajianaquetarite savicaventajianaqueroneca irantaguishejiaquero teeca oncameetsateji. Irishirontimentajianaquempiqueate incantajianaquequeate: ⁴ “¿Querocampate icoraqueti imaica Quirishito? Arimpate icantajitini incoraqueataje. Manaqueate imetojaguetanaji avaesatiniteni, cotanquitsi tequeratampate incoraqueateji imaica. Jac arimpate coramani iroaqueraguéti ipeacaacaro quepatsi irosati imaica choocatanatsi.”

⁵ Teenicate irinintajigúe inquenquejajiajéroji coramani ipeacaacaro Aapani Irioshi inquitepae aisa quepatsi, ipeacaantaguetacaróquea iguenquetsatsare. Oraqueate quepatsi osotoajatapojaque quantijaniqui, manaqueate ovogoretacocaró quantijani.

⁶ Irooquea aisa oja anaanaquero maasano quepatsi coramani, iteroncantajiacaca maasano choocatantaguetaroca, yojocajajiaca. ⁷ Cotanquitsi imaica mana icanque: “Nontsotetavaquemparota quepatsi jero aisa inquite aatota noteronquitaro imaica choocatantajiacaroca.” Cotanquitsi oraqueate coajica incatsimatimentajiaqueriguéti maasano teeca inquemisantajigúeji ariqueate intaaguetaquero maasano.

⁸ Imaica, nopintsajiacaca, aato pipeacotaró ocatíca. Irraqueate Amajirote tee inquejijaji aatimpajia: 1,000 ocarati ajagantsi iriatimpa yamenaquero oquejetimotacari apajencatiro savincaguiteri; ari oquejetaca aparo savincaguiteri ariqueate oquejetimotacari 1,000 ajagantsi. ⁹ Cotanquitsi imaica chooca cantajianquitsica: “Icantaveca Amajirote, ‘Noncoraqueataje.’ Imaica tequerata incoraqueatajeji manaquea ipeanaca ontaniqui.

Imaica aato icoraquetaji.” Cotanquitsi naatimpa noncantajiaquempi arimajaqueate incoraquetaje, tee impeguempaji intati. Iroguenti inintaque incantashitatijaianaque-mpata teeca inquemisantajigueriji irovashiantajianaquerota yantaguishejiguica teeca oncameetsateji inquemisantajiajerita, teenicate irinintenicate impeguempa apaniro. Irootaquequeate imaica pamenajiaque tequerata incoraquetantempaji, cotanquitsi incoraquetajequeate.

¹⁰ Oraqueate incoraquetajategueti Amajirote mana irimapocapojajempa inquejetapojempari aitsitantatsica imapocantigueti yaitsitantigueti. Ariqueate ompojimatanaque jenoqui inquitequi togn, ariquea ompeaquempa inquite. Intaaguetanaquempa catsir-inaiteri, taai, jeri aisa impoquiropae, maasano interoncamajatanaquempa. Ariquea onquejetanaquempa aisa quepatsi ontaaquempa, ontsipatanaquemparo maasano taaca opajitapae choocatantaguetaroca, maasano ariqueate onteroncamajatanaquempa.

Aapani Irioshi impeacaajempa otsipa quepatsi aisa inquite

¹¹ Iroorijite atsajiaque onteroncaguetanaquempa maasano, ¿querocampa pincojiaquempani imaica? Iroosacanicate imaica aviatimpajia pincomajamajajiaquempa pinquemisantamajajigueriqueate Aapani Irioshi. ¹² Poguijajivajero aapojempagueti savincaguiteri intaantaquemparoca Aapani Irioshi inquite, ariqueate avejancaguetanaquempa maasano choocatantaguetaroca. Pisavicaventamajajiaqueroja maasano inintaguetica iriatimpa cameetsanijite taampinanijite irinetsanaguetaquero taampina. ¹³ Aatimpajia aguijajiaquerotarite iroaquerari inquite aisa iroaquerari quepatsi impeacaajempaca Aapani Irioshi coajica. Iroorijite icanque coramani impeacaajempa coajica otsipa oganejencamajataquempaqueate, aatoqueate ichoocataji antaguishetajeroneca teeca oncameetsateji, manaqueate oganejencaguitetaquempa maasano.

¹⁴ Imaica aviatimpajia nopintsajiacaca, poguijajiaqueritarite incoraquetajeguete irinetsanataquero icanqueca. Irootaquequeate noncantantajiaquempica imaica aatotaguete icoraqueti iintsija pincomajamajatempa, aato pantajiguiro teeca oncameetsateji, iramenajiaquempinijite Aapani Irioshi piguintenimajajiguempa cameetsa. ¹⁵ Pamenajigue imaica tequerata incoraquetaje Amajirote, manatarite inintaque inquemisantajiaquerita itsipapae caquinte cameetsanijite iraimentajiajaverinijite. Iriraqueate apiguemisantariteni Paavoro apintsajiacaca itioncaciaquempi iriatimpa aisa, icantajiaquempiqueate quejetaroca nocantajiaquempica imaica. Iriguentitarite tsatacaqueri Aapani Irioshi, irootaquequeate icantantajiaquempica. ¹⁶ Ariqueate iquejetiro iriatimpa imaica itioncaguetiguete itsavetantiroguete ocapae. Oonoagarancaqueate itioncaguetaquequea manamajaguetanquitsica teequeate intsajitavaqueroji. Iriraquea teeca intsamajatero Iguenquetsatsare Aapani Irioshi jerijia teemajaca inquemisantamajajiguroji mana yogaajiaquero intati icanqueca, iquejetacaajiacaro yogaajiaquero guete otsipapae Itioncacaantaqueca Aapani Irioshi. Inchiquiojitarite inquejetacaantajiaquempa iriatimpajia.

Ivegaraquero guete icantajiaquerica

¹⁷ Imaica aviatimpajia nopintsajiacaca, pitsajiaquerotarite ocatia nocantajiaquempica, inchiquiojia yamatavijajiguimpitsija pigatsatantatsica, yovashiantacaajiguimpirot-sija piquemisantamajajiguica. ¹⁸ Mana arimpaqueate pinquimoshirentanaque icavintsajiaquempiguete Amajirote Jesoquirishito Meshiantatsica, aisa pintsamajajianaquerija. Jameja ashineventajiguempari imaica, ariqueate acanricaneate ashineventajiaquempari. Ari oncoquempa.

IROQUETICA ITIONCAQUECA JOANCA

Antsatantaquemparoca

Ocatica iroguenti antsatantaquemparoca iroquetica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iriguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1-4.22. Iquenquejajitaque itioncaquero ocatica paperi ichoocaquegueti Epesoqui, atsajiaquetari iriguenti quempoguijajiguirica quemisantajiatsica Epesoquitica. Iquenquejajitaque arica itioncaciaqueneri quemisantajiatsica quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevetaro ajagantsini 90, tequeratagueti intionqueroji ivaperite catsantsatanquitsica pajitatsica *Quenquetsatsarentsi Oganejencatatsica Itioncaqueca Joanca* itsavetacotaquerigueti Jesoquirishito, aisa tequeratagueti intionqueroji otsipa pajitatsica *Yonigaajiguequerica Joanca*.

Joanca itioncacotaqueri acaniqui caquinteja tsatacaantajavetacaroca teeca iroomateji, icantajavetaca, “Jesoshi teequea irio irijanite Aapani Irioshi”. Irootaque itioncantajiacanarica quemisantajiatsica cameetsaniji intsajiaque arimaja Jesoshi iriguenti Irijanite Aapani Irioshi, cameetsaniji irishinevaejiaquempa iquemisantajiaquerigueti Jesoshi, aisa intsajiaqueniji maasano aventajiacarica arimaja ipeacotsijajari iguempvaerejia, incoguitempani intsipajiaquempari jenoqui inquitequi (1.1-4; 2.18-3.3; 4.1-6; 5.1-15). Itsatacaajiaqueri Joanca jero anaamajatanquitsica: ampintsamajiaquempari Aapani Irioshi aisa ampintsajiaquempari apitsaroveritarijateni aisa maasano caquinteja (2.9-17; 3.11-24; 4.7-21). Itsatacaajiaqueri aisa quero incojiaquempanti quemisantajiatatsica arigueti inquempevaetaquempa (1.5-2.8; 3.4-10; 5.16-21).

Quirishito iriguenti Anijacaantantatsica

¹ Imaica nontioncaciaquempi nontsavetanqueri igantagaca choocatanquitsica coramani iroaqueragueti tequeratagueti onchoocatimateji, noquemajiaqueritarite ariqueate namenajiaqueri aisa nopamijiaqueriqueate. Iriguentitarite Quenquetsatsarentsi Anijacaantantatsica. ² Iriratica Anijagantsi, yonigaantaca, namenajiaqueri notsavetacotantajiacaricaqueate, iriguentitarite anijacaajiacajineca ancoguitempaninijite anchocajiaque Aapaniqui Irioshiqui. Manaqueate ichoocavetaca Aapaniqui cotanquitsi ariqueate icoraquequiti yonigaajiaquena. ³ Iriotaque notsavetacojiaque iriraquea name-namajiaqueca aisa noquemamajiaqueca. Nocamantantajiaquempica cameetsanijite pintsipashirentimentajiaquenaniijite pinquejejaquenaniijite naatimpa notsipashirentajiacarigueti Aapani Irioshi jeri aisa Irijanite, irira Jesoquirishito. ⁴ Nontioncaciaquempi cameetsanijite pishinemajianaquempantiijite.

Aapani Irioshi iriguenti Tsirencarimajaca

⁵ Iroguenti nocamantajiaquempica itsatacaajiaquenaca Jesoquirishito icanquegueti irira Aapani Irioshi iriguenti Tsirencari, teequeate impitsecacoteji, teenicate inquempevaetimatempaji, irootaque icantantajitacarica Tsirencari. ⁶ Ancantajiguegueti atsipamajajajari Aapani Irioshi cotanquitsiqueate agantagatirajagueti aquempvaejiga manaqueate amataajiaca intati, teenicate antajiguroji cameetsaguetatsica, quejecaqueate manaca apitsecacojiaque intati. ⁷ Cotanquitsiqueate ancomajamajiaquempagueti quejetaca aquenanaque tsirencaguiteri, anquempejiaquemparigueti Aapani Irioshi icomajamajatagueti, ariqueate atsipashirentavacaajiaca, ishejajirotarite maasano aguempvaerejia, ishetantajajiro iriraja Jesoshi Irijanite.

⁸ Ancantajiguegueti: “Tee nonquempevaetempaji”, aroguentiqueate amatavijajatsi, aisa tequerata antsamajateroji iroomajatatsica. ⁹ Cotanquitsiqueate ancamentajiaquerigueti Aapani Irioshi antajiaquerogueti teeca oncameetsateji, iriatimpa impeacojia-cajiro, irishetajajiroqueate maasano, icancanitarite inetsanatiro icanqueca, teenicate iramatavijanteji icameetsamajatarite. ¹⁰ Oraqueate ancantajiguegueti: “Tee nonquempevaetempaji”, quejetacaqueate manaca acantajiaque Aapani Irioshi iriguenti tsojenti, teequeate anquemisantamajigueroji icamantavetacajica.

2

¹ Napiguemisantarijiateni, aviatimpajia quejetaquempi irijanijia, iroguenti notionquimentajiaquempi aatoniji piquempevaejiaja. Cotanquitsi antajiaquerogueti teeca oncameetsateji chooca quenquetsatacoventacajica quenquetsatacaquerica Aapani Irioshi. Iriroquea Jesoquirishito teeca inquempevaetimatempaji. ² Apanirotarite iriatimpa metojaventajiacajica cameetsanijite irishetajajironijite Aapani Irioshi aguempvaerejia aatonijite iquenquejacaajajiro coajica. Cotanquitsi teequeate apaniro irimetojavertero ashijia, imetojavenaquerogueti irashijia maasano caquinteguetatsica.

Anetsanjiaqueroja icantajiacajica Aapani Irioshi

³ Oraqueate anetsanjiaquerogueti icantajiacajica Aapani Irioshi, irooqueate atsantajiacaca arimaja atsaqueri. ⁴ Choocagueti cantatsica: “Notsaqueri”, cotanquitsi aatogueti inetsanatiro icantajiacajica, iriguentiquea tsojenti, teequeate intsateroji iroomajaca. ⁵ Arigueti anetsanamajajiaquero Iguenquetsatsare, arimaja aroguenti pintsamajajigarica, irooqueate atsantajiacaca arimaja atsipamajajiacari. ⁶ Ancantajiaquegueti atsipamajajiacari aquemisantajiaqueri, iintsija anquejejaquempariqueate Jesoquirishito iriatimpa inetsanamajiaquerogueti maasano icanquerica Aapani Irioshi.

⁷ Napiguemisantariteni, ocatica oca notioncajiaquempica teequeate iro iroaqueraro quenquetsatsarensi, iroguentiquea paesatotica piquemajiaqueca coramani iroaqueragueti piquemisanqueri Quirishito. ⁸ Cotanquitsi quejetaca iro iroaqueraro. Amenaquerigueti Quirishito atsaque iroomajaca icantajiacajica, aisa iramenajitaquempigueti intsajitaque iroomajaca. Coramanitarite quejevaetaca apitsecacojiaque, cotanquitsi imaica manaqueate atsirencaguitetacojianaque intati. ⁹ Choocagueti cantashitatsica: “Tsirencaguitetacotanaquena”, cotanquitsiqueate igantagatirajagueti isemacari irapicaquintete, manaqueate igantagatiraja ipitsecacoti. ¹⁰ Iriraqueate pintsamajatarica irapicaquintete manaqueate itsirencaguitetacotanaque, teenicate onchoocatantajemparijiqueate taaca opajitapae onquenantapojaquempaca inquempevaetanquempaca. ¹¹ Cotanquitsi iriraqueate semacarica irapicaquintete quejetaca manaca ipitsecacotaque intati, irootaquequea teeca intsatantempaji querocampate incoquempani, oshamponcajatacaqueritarite pitsecari.

Iintsija ovashiantamajajianaquero maasano teeca oncameetsateji

¹² Irijanijia* notioncantajiaquempica ishejiaquempirotarite Aapani Irioshi piquempevaerejia, aatoqueate iquenquejacaajimpiro, piquemisantajiaqueritarite Jesoquirishito. ¹³ Irijanintajanquitsica, notioncajiaquempiqueate pitsajiaqueritari iriquetica choocatatsica coramani tequeratagueti onchoocatimagueteteji. Notioncantajiaquempica aviatimpajia iriaqueraca quenquevarijiananquitsica, pagavejajiaqueritarite ampatsini. Notioncantajiaquempica aviatimpajia napiguemisantarijiateni quejejiaca nirijanijiate, pitsajiaqueritarite Aapani Irioshi. ¹⁴ Notioncantajiaquempica irijanintajiatatsica pitsajiaqueritarite iriquetica choocatatsica coramani tequeratagueti onchoocatimagueteteji. Notioncantajiaquempica aviatimpajia iriaqueraca quenquevarijiananquitsica pitampishitashijiaquerotarite maasano, aisa Iguenquetsatsare Aapani Irioshi ochoocaguitaquempi, jero aisa pagavejajiaqueri ampatsini.

* 2:12 Iquenquevarivaetanaquegueti irira Joanca icantiri “irijani” maasano quemisantajiaquerica Amajirote Jesoquirishito.

¹⁵ Aatoqueate pinintamajigui pantajiguero yantapiniijiguica quepatsiquitica teeca intsariventajiguempariji Aapani Irioshi, aisa aatoqueate pinintamajiguiro choocague-tatsica acaniqui quepatsiqui. Quericaca nintamajatiroca quejecaroca imaica, tee impintsatempariji Aapani Irioshi. ¹⁶ Teenicate irishineventemparoji Aapani Irioshi ishineventacaca antiroca teeca oncameetsateji. Iriatimpajia manatarite iquenquejajia- quero taaca opajitapae inintamajiguiica iriatimpajia, aisa inintajiaquequeate irashin- tajaquemparo maasano yamenajiaqueca, jero aisa yaventacojiga yashintajigarogueti. ¹⁷ Oraqueate quepatsi onteroncaguetanajempatarite, aisa onteroncaguetanaquempa maasano teeca oncameetsateji ishineventaca caquinte, cotanquitsi iriraqueate antama- jajiguiroca inintaguetica Aapani Irioshi incoguitempaniqueate inchoocaguiteni.

Catsimajiguirica Quirishito

¹⁸ Irijanijia, imaica pajini aguempa incoraquetantajempaca Quirishito. Aviatimpajia piquemacojiaqueri incoraqueque catsimatirica, cotanquitsi naatimpa nocantajiaquempi chooca imaica yoshequiaque catsimajiaquerica. Irootaquequeate antsatantajiaquem- paca pajini aguempa incoraquetantajempaca Quirishito. ¹⁹ Iriatimpajia manaqueate iconojavetacaji, cotanquitsi teequeate inquempemajajigaji aatimpajia, teenicate in- quemisantajigueriji Quirishito. Arimequeate inquempemajajiacajime aatomequeate itsinampirejajiajime, igantagamequeate intsipajiacajime, cotanquitsi itsinampireja- jianacaji. Oquejetantacaca imaica cameetsanijite antsatimentajiaqueriniji tee inqueje- taji aatimpajia iquemisantajigueti.

²⁰ Cotanquitsi aviguentiquea itigarancajiaquempi Aapani Irioshi Ishire inchoocashirentajiaquempi, pitsatantajiacaroca Quenquetsatsarentsimajaca maasano aviatimpajia. ²¹ Teequea mana nontioncajiguempiji namenajiaquempi tee pintsajigueroji. Iroguentiqueate notioncantajiaquempica namenajiaquempitarite pitsamajiaquero. Aisa pitsajigui iriraquea cantamajatatsica teequeate iramataguempaji. ²² ¿Queri tsojegatsica? Iriguenti cantatsica Jesoshi tee irio Quirishito Meshiantatsica. Iriguentisacanicate catsimataquerica Quirishito, teenicate inquemisanteriji iriatimpa aisa Iriri, mana icanque teequeate inchoocajigueti. ²³ Quericaca tsojencaquerica Irijanite Irioshi tee intsateriji, aisa tee intsateriji Aapani Irioshi, cotanquitsi iriraquea cantamajatatsica: “Jesoshi iriguenti Irijanite Aapani Irioshi”, iriotaque tsamajatirica, aisa itsamajaqueri Aapani Irioshi.

²⁴ Pincoguitempanija pinquenquejajiaquero iroquetica piquemajiaque aatonijite pi- peacojigaro. Picancanigueti pinquenquejajiaquero pintsipamajajiaquempiriquea Aa- pani Irioshi aisa Irijanite. ²⁵ Icantajiacajitarite ancoguitempani anchoocajiaque iriatim- paqui.

²⁶ Imaica notioncacojiaqueri nintajavetanquitsica iramatavijajiaquempime. ²⁷ Cotanquitsi aviatimpajia ichoocashirentajiaquempi Ishire Aapani Irioshi itigarancajiaquempica Jesoshi, tee pincoguitentajempa intsatacaajajempi caquinte, maasanotarite itsatacaajiaquempi Ishire Aapani Irioshi. Iriatimpaqueate icantamajataque teequeate iramataguempaji, irootaquequeate imaica pincoguitempani pintsipamajajiaquempari Quirishito pinetsanamajajiaquero itsatacaajiaquempica Ishire Aapani Irioshi.

²⁸ Imaicaquea, irijanijia, pintsipamajajiguempari Quirishito cameetsanijite pishin- eventimentajiaquemparinijite incoraquetajegueti. Pintsipamajajianaquempirigueti aatoqueate apashiventacaavajari coajica. ²⁹ Pitsamajajiaqueriquea Jesoquirishito tee inquempaveatempaji, iriotarite comajamajatatsica, iroosacanicate pintsajiaquequeate aisa maasano comajamajajiatatsica iriguenti ivoashirentica Quirishito.

3

Maasano comajamajajiatatsica iriguentijia irijanijiate Aapani Irioshi

¹ ¡Pamenajigueroja! Caaviji ipintsamajajiacaji Aapani Irioshi ipeacaantajiacajicaque- ate irijanijiate. Arimaja aroguentijia irijanijiate. Jeroqueate teeca intsatantajiacajica itsipajia quepatsiquitica, teequea intsajigueriji Aapani Irioshi. ² Napiguemisantarijiateni nopintsajiacaca, imaica aroguentijia irijanijiate Aapani Irioshi. Teequeate antsajigueti

querocaca ancojianaquempani coajica amenajiaquerigueti Jesoquirishito, iroguenti atsajiaque incoraquetajeguetei anquejejiacquempari iriatimpa, amenamajiaqueritarite quero icota. ³ Maasano oguijajiavajirica incoraquetajeguetei yovashiantajiaquerotari covaeguisherentsi yantajiavetacaca igantaga icomajamajajiaca, iquejejiacari iriatimpa tee inquempevaetempaji.

⁴ Cotanquitsi iriraquea quempevaetatsica tee irinetsanatero icantica Aapani Irioshi, iroguentitarite quempevaerentsi teeguetei anetsanateroji icantica. ⁵ Imaica atsajiaque-queate irooqueate icoraquetashitaquiti Jesoquirishito irishetajajiroqueate aguemp-vaerejia. Iriatimpa teenicate inquempevaetimatempaji. ⁶ Maasano quisho oaquerica Quirishito, tee incovaeguishtetanajempaji, cotanquitsi irira covaeguishtetanajatsica tee irameneriji, tee intsateriji.

⁷ Irijanijia, inchiqiojia yamatavijajitimpitsi. Irirajia antiroca cameetsa iriguen-tiqueate cameetsatatsica, iquempetacari icameetsatiguetei Jesoshi. ⁸ Cotanquitsi irira antapinitiroca quempevaerentsi iriguenti ashintari ampatsini. Irira ampatsini igan-tagatarite iquempevaetaca coramani iroaqueraguetei ipigatsatacari Aapani Irioshi, irooqueate icoraquetashitaquiti Irijanite Aapani Irioshi irovashiantacaantaqueronijite yantavetacaca ampatsini aatonijite iquemisantajitajiri. ⁹ Irirajia irijanintacaca Aapani Irioshi teequeate irantajianajeji teeca oncameetsateji, ichoocashirentaqueritarite Ishire Aapani Irioshi. Ariqueate quero incotaquempa irantaguishejiageguetei, iriguentitari Aapani Irioshi irijanintacarica. ¹⁰ Jero itsatantajitacarica queri irijanijiate Aapani Irioshi, aisa queri yashintajiacaca ampatsini. Irira teeca iranteroji cameetsari aisa irira teeca impintsatempariji irapicaquintete teequeate irio ashintemparine Aapani Irioshi.

Ampintsatavacaajiaquempa

¹¹ Imaica mana noncantajiaquempi piquemajiaqueca iroaqueraguetei icantajique: “Pimpintsatavacaajiguempa.” ¹² Aato piquejigari Cainini yashintacariguetei ampatsini, irootaquequeate imetojantacarica iriguentijeguete. ¿Taa imetojimentaqueri? Mana ya-menaqueri yantaquero cameetsari, iriatimpa iroguenti yantaque teeca oncameetsateji, irootaquequeate imetojantacarica.

¹³ Napiguemisanterijiateni, aato poajianaque intati irisemajiaquempiguetei quepat-siquitica. ¹⁴ Atsajiaquequea, coramani anajiaque metojagantsiqui, cotanquitsiquea imaica anajiaji anijagantsiqui. Jeroquea atsatantajiacarica: apintsamajiacaritari apiguemisanterijiateni. Cotanquitsi maasano teeca impintsatantempaji icancani inajiaque metojagantsiqui. ¹⁵ Maasano semajigarica irapicaquintete mana iquejejiacari metojantatsica. Aviatimpajia pitsajiaque irira metojantatsica teequeate irimeshiguempajiqueate ishirequi, teequeate iranijacageriji ishirequi Aapani Irioshi. ¹⁶ Jero at-satantajiacaca quero ancojiaquempani ampintsamajatantajiaquempaguetei: irira Jeso-quirishito caaviji ipintsamajatacaji imetojaventantajiacajica, ariqueate anquejejiacquem-mpa aatimpajia aato atsaroacagaro ametojaventajiaqueriguetei apiguemisanterijiateni. ¹⁷ Querica ashintaguetanquitsica cotanquitsi aatoguetei icavintsajiri irapiguemisan-tariteni coguitejimotacarica, ¿arimpate ipintsatacari Aapani Irioshi? ¡Teequeate! ¹⁸ Irijanijia, aato acantashijigaro intati ancantajiaque: “Nopintsatavacaajiaca.” Oraque-ate arimajaguetei apintsatavacaajiaca anigaantajiaqueroqueate.

¹⁹ Oraqueate ampintsatavacaajiaquempaguetei irooqueate antsatantajiaquemparoca arimaja anetsanajiaquero Quenquetsatsarentsimajaca. Anquejetaquem-paguetei aatoquea atsaroajigui anquenquetsatacaajiaqueriguetei Aapani Irioshi. ²⁰ Amenajiaquempagueteiqueate chooca aguempvaerejia iriompate Aapani Irioshi caaviji yamenaquero, itsaquerotarite maasano. ²¹ Cotanquitsi, nopintsajiacaca, antsaquegueteiqueate teequeate onchoocateji antaqueca, aatoqueate atsarogui anquenquetsatacaajiaqueriguetei Aapani Irioshi. ²² Iriatimpa irojocajiacajiro maasano amanajiaquerica anetsanajiaqueroquetei icancajica aisa antajiaqueroquetei maasano inintaguetica. ²³ Jeroquea igantacaantane: aventajiaquempani Irijanite Jesoquirishito, aisa ampintsatavacaajiaquempa anetsanajiaqueroquea icantajiacajica iriatimpa coramani. ²⁴ Quericaca netsanamajatiroca icantaguetica Aapani Irioshi itsipamajatacari,

aisa iriatimpaquea ichoocashirentaqueri. Atsamajajiaque ichoocashirentajiacaji, itigarancajiacajiritarite Ishire.

4

Pintsajigueri maasano tsatacaajiaquempara

¹ Napiguemisantarijateni nopintsajiacaca, aato piquemisantajiguiri intati maasano cantajiacaca: "Iriguenti choocashirentaquea Ishire Aapani Irioshi." Iroquetitaja pamenaque irioca choocashirentaqueri. Itsitacaguitejanacarotarite amataajiatsica. ² Jero pintsatantajiaquempara ichoocashirentaquea Ishire Aapani Irioshi: maasano cantamajatanquitsica, "Irira Jesoquirishito icoraquetapojaque icaquintetanaque itsinotanaque" iriotaque ichoocashirentaquea Ishire Aapani Irioshi. ³ Cotanquitsi maasano teeca inquejigueroji imaica teequeate irio ashintajiguemparine Aapani Irioshi, iriguenti ashintajigari ampatsini catsimataquerica Quirishito. Piquemacojiaqueritarite incoraquetaque, imaicaquea imaica jac coraquetaque.

⁴ Irijanijia, aviatiimpajia iriguenti ashintajiguimpi Aapani Irioshi aisa ichoocashirentajiaquempara Ishire, irootaquequeate pitampishitashitantajiacarica amataajiatsica querocampate incojiaquemparini iramatavijajiaquemparigueti, iroorijite Ishire Aapani Irioshi choocashirentajiaquempara yanaaqueri ashintarica itsipajia quepatsiquitica. ⁵ Iriatiimpajia tee inquemisantajigueri Aapani Irioshi, irootaquequeate mana iquenquetsatacotantajiacarica intati inintaguetica caquinte, ariqueate itsipajia teeca intsarotentempariji Aapani Irioshi iquemisantajiaqueri. ⁶ Aatiimpajia iriguenti ashintajiacaji Aapani Irioshi. Irira tsamajajiguirica iquemisantajiacaji, cotanquitsi irira teeca irashintempariji Aapani Irioshi tee inquemisantajigaji. Irootaquequeate antsatantajiaquempara queri quenquetsatiroca iroomajatatsica aisa queri amataatsica.

Aapani Irioshi iriguenti pintsamajatantatsica

⁷ Napiguemisantarijateni nopintsajiacaca, jame ampintsatavacaajiguempa, aritarite iquejetaca Aapani Irioshi ipintsamajatanta. Maasano pintsatantatsica iriguenti irijanite Aapani Irioshi aisa itsamajajiguiri. ⁸ Cotanquitsi irirajiaqueate teeca impintsatavacaajiguempaji teequeate intsajigueri. Irira Aapani Irioshi iriguentitarite pintsamajatantatsica. ⁹ Iriatiimpa itigarancaqueri Irijanite apatirotica acaniqui quepatsiqui irimetojaventajiacaji iranijacaajijajinijite, irootaquequeate atsatantajiacaca arimaja ipintsamajajiacaji. ¹⁰ Jero antsatantaquempara quero icotani pintsamajatantatsica: aatiimpajia teequeate ampintsamajajiguempariji Aapani Irioshi, iriguentiqueate pintsamajatantatsica, ipintsamajajiacajitari itigarancantarica Irijanite imetojaventajiacaji irishetajajironijite aguempevaerejia aatonijite iquenquejacagajiro Aapani Irioshi coajica.

¹¹ Nopintsajiacaca, pitsajiaquequea quero icota Aapani Irioshi ipintsajiacajigueti, aritarite anquejejaquempara aatiimpajia aisa ampintsatavacaajiaquempara. ¹² Teequeate irinejajiteriji Aapani Irioshi, cotanquitsi apintsatavacaajiacagueti ichoocashirentajiacaji, ariqueate iragavejacaajiacaji ampintsamajatantajianaquempaniji. ¹³ Itigarancajiacajiritarite Ishire atsatantajiacaca itsipamajajiacaji. Ariqueate aquejejiaca aatiimpajia atsipamajajiacari. ¹⁴ Iriatiimpa itigarancaqueri Irijanite irajajateri maasano caquinteguetatsica. Naatiimpajia namenajiaqueriqueate, irootaquequeate notsavetacotantajiacarica. ¹⁵ Aapani Irioshi ichoocashirentajiaqueri maasano cantamajajiacaca Jesoshi iriguenti Irijanite Aapani Irioshi. Ariqueate iquejejiaca iriatimpajia ichoocatimojiaqueri. ¹⁶ Ariqueate amenamajataque atsajiaque ipintsamajajiacaji Aapani Irioshi. Iriatiimpa iriguenti pintsamajatantatsica. Maasano pintsatantatsica ichoocatimojiaqueri Aapani Irioshi. Ariqueate iquejetaca iriatimpa ichoocashirentajiaqueri iriatimpajia.

¹⁷ Onquejetaquemparigueti arimpaqueate ajajigueri ampintsamajatantajiapojempa aatonijite atsaroajigui oncoramanitapojagueti incantimentajiaquerigueti Aapani Irioshi maasano, iroorijite achoocajiavetacaqueate acaniqui quepatsiqui, cotanquitsi jac aquejejianacari Jesoquirishito. ¹⁸ Irira pintsatantatsica tee intsarogueji. Aritarite

ampintsamajataquempagueti querocampate antsaroacaguempaca. Arigueti atsaroanaque atsaroacagaro incatsimatimentacajirogueti Aapani Irioshi antaqueca teeca oncameetsateji. Irootaquequea atsatantacaca irira tsaroanquitsica teequea impintsamajantempaji.

¹⁹ Aatimpajia apintsajiacari Aapani Irioshi, iriquetitarite pintsajiacaji aatimpajia. ²⁰ Iriraqueate cantavetatsica: “Nopintsatacari Aapani Irioshi”, cotanquitsi isemacarigueti irapicaquintete, iriguenti tsojenti. Aatogueti ipintsatari irapicaquintete yamenavetacaca, aato yagaveji ipintsatari Aapani Irioshi teeca inconijatimoteriji. ²¹ Icantajiacajitarite iriatimpa: quericaca pintsamajatarica Aapani Irioshi impintsataquempariqueate aisa irapiguemisanteriteni.

5

Maasano irijanijiate Aapani Irioshi yagavejiaque intampishitashijiaquero teeca oncameetsateji

¹ Irijanintajiacari Aapani Irioshi maasano cantajatsica Jesoshi iriguenti Quirishito Meshiantatsica. Querica pintsamajacari Aapani Irioshi ipintsamajajiacari aisa maasano irijanijiate Aapani Irioshi. ² Oraqueate apintsajiacarigueti Aapani Irioshi, aisa anetsanajiaquerogueti icantaqueca, atsajiaque apintsamajajiacari irijanijiate. ³ Apintsajiacarigueti Aapani Irioshi anetsanajiaquero maasano icanqueca, teenicate omanempaji anquemisanquero icancajica. ⁴ Maasanotarite ivoashirentica Aapani Irioshi yagavejiaque intampishitashijiaquero maasano teeca oncameetsateji choocaguetatsica acaniqui quepatsiqui, iriguentitarite agavejacaajiacajine Quirishito aventajiaquemparigueti. ⁵ ¿Querica agavejanquitsineca intampishitashitaquero choocaguetatsica acaniqui quepatsiqui? Iriguentiqueate cantatsica Jesoshi iriguenti Irijanite Aapani Irioshi. ⁶ Iriotarite Jesoquirishito coraquetaquitatsica acaniqui quepatsiqui iviñacajajiqueri ojaaqi, ariqueate imetojajivetacari imocorojajiqueri osotoajatanaque iriraja. Teequeate apaniro iriviñacajajiteriji ojaaqi, aisa imocorojajiqueri osotoajatanaquequea iriraja. Iriguentitarite cantajiacaji Ishire Aapani Irioshi. Iriatimpa teequeate iramatavijanteji. ⁷ Choocatarite 3 tsatacaajica:* ⁸ chooca Ishire Aapani Irioshi, chooca aisa oja iviñacajatacaantacagueti, jero aisa iriraja imetojaventajiacajigueti. Irica 3 ari iquejetavacaaca icantacotaqueri Quirishito. ⁹ Arimpate aquemisantajiguero icamantacajica caquinte, iriompate Aapani Irioshi caaviji yanaajiaqueri maasano, arimaja anquemisan tamajataquero icamantacajica iriatimpa, itsavetanqueritarite Irijanite. ¹⁰ Querica quemisantamajatarica Irijanite Aapani Irioshi itsaque ishirequi iroomaja icamantacajica, cotanquitsi irira teeca inquemisanteriji Aapani Irioshi quejevaeca manaca icanque Aapani Irioshi iriguenti tsojenti, teenicate inquemisanteriji itsavetantaquerigueti Irijanite. ¹¹ Jero icanqueca itsavetanquerigueti: Aapani Irioshi yojocajiacaji anijagantsi coguitatsineca, oratica anijagantsi ochoocaqueri Irijanite. ¹² Iriraquea ichoocaqueca Irijanite Aapani Irioshi, ochoocaqueri anijagantsi; iriraquea caarica ichoocati Irijanite Aapani Irioshi, tee onchoocateriji anijagantsi.

Icamantajianajiriqueate

¹³ Notioncaciaquempi maasano aviatimpajia quemisantajiguirica Irijanite Aapani Irioshi cameetsanijite pintsatimentajiaquenijite yanijacaajajimpi pishirequi pincoguitempani pinchoocajiaque. ¹⁴ Aatimpajia tee antsaroajigueji amanajiguirigueti Aapani Irioshi, atsajiaquetarite amanajiaquerigueti taaca opajita inintaqueca irojocajiacaji, iquemajiacajiqueate. ¹⁵ Atsajiaque iquemajiacaji amanajiguirigueti, aisa atsajiaque irojocajiacajiro taaca amanajiaqueri.

* 5:7 Yoguipitsocantajitacarogueti coramani ocatica paperi iguenquetsatsarequi Iromaquitica (Latín), yogavijitaquero capichaji teeca ontioncavetempaji iroaqueragueti. Jero ocanqueca gavitanquitsica: “Chooa 3 tsavetacotantanquitsica inquitequi: Aapani, Quenquetsatsarentsi, jeri aisa Ishire. Irica trestanquitsica, aparo inaque.” Yogavijitaquero aisa capichaji otsapa 8, itioncajitaque: “Ari oquejetaca quepatsiqui, chooca 3 tsavetacotantanquitsica.” Irootaquequea itioncantajitacaroca oca iguenquetsatsarequi quimajareri paperiqui icantajitica La Santa Biblia versión “Reina Valera”.

¹⁶ Quericaca amenaquerineca irapiguemisanteriteni impeacaguemparogueti coguisherentsi caarica imetojashirentimentajitiri, cameetsataque iramanacoventaqueriquea, ariquea iranijashirentacaajeri Aapani Irioshi. Iriguentijia nocantacotaque peacaajigaroca coguisherentsi caarica imetojashirentimentajitiri. Choocaquea coguisherentsi irimetojashirentimentajiteri. Teequea iroguenti noncanteji iramanacovente.

¹⁷ Maasano ipeacaaguishejitaca iroguenti coguisherentsi, cotanquitsi chooca coguisherentsi caarica imetojashirentimentajitiri.

¹⁸ Atsajiaquetarite iriraqueate irijanincaca Aapani Irioshi teequeate irantaguishetana-jero teeca oncameetsateji, yamijiacajitarite Irijanite Aapani Irioshi ariqueate tee iragavejajajaji ampatsini inquempevaetacaajajajaji. ¹⁹ Atsajiaque aisa Iriguenti ashintajiacaji Aapani Irioshi, cotanquitsi maasano teeca inquemisantajigueriji Aapani Irioshi iriguenti ashintari ampatsini, irotaquequeate yagavejantajiacarica. ²⁰ Oraqueate aisa atsajiaque icoraquequiti Irijanite Aapani Irioshi itsatacaajiacaji atsatantajiacarica Iriomajatatsica. Imaica atsipamajajiacari Iriomajatatsica, atsipamajajiacaritari Irijanite Jesoquirishito. Iriotaque Irioshimajaca. Iriotaque aisa anijacaajiacajica ancoguitempaniniji anchoocajiaque iriatimpaqui. ²¹ Imaica, irijanijia, inchiquiojia pishineventajigaritsi irioshivetatsica. Ari oncoquempa.

MAVITETAPOJATSICA ITIONCAQUECA JOANCA

Antsatantaquemparoca

Ocatia iroguenti antsatantaquemparoca mavitetapojatsica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iquenquejajitaque itioncaquero ocatia paperi ichooaquegueti Epesoqui, atsajiaquetari iriguenti quempoguijajiguirica quemisantajatsica Epesoquitica. Iquenquejajitaque oratica manquigarentsi quemisantatsica aisa irijanijiate itioncaciaqueneca ochooque quepatsiqui pajitatsica Paritia. Tee intsajiteji quero ajagantsini itioncaquero ocatia paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevetaro ajagantsini 90, tequeratagueti intionqueroji ivaperite catsantsatanquitsica pajitatsica *Quenquetsatsarentsi Oganejencatatsica Itioncaqueca Joanca* itsavetacotaquerigueti Jesoquirishito, aisa tequeratagueti intionqueroji otsipa pajitatsica *Yonigaajiguequerica Joanca*.

Joanca itioncaciaqueneri quemisantajiaquerica Jesoshi cameetsaniji impintsamajiaquempari Aapani Irioshi aisa impintsajiaquempari irapitsariventarijiate aisa maasano caquinteja. Itsatacaajiaqueri aisa quero incojiaquerini nintajianquitsica iramatavijiaqueri quemisantajatsica.

Icamantajiaquerigueti ampintsatavacaajiguempa

¹ Imaica, manquigarentsi, nontioncaquempi paperi pashi aviatimpa icoguaqueca Aapani Irioshi. Naatimpa naroguenti quempoguijajiguirica quemisantajatsica, irootaquequeate nonintantacaca nontioncaquempi aviatimpa jerijia aisa pirijanijiate. Nopintsamajiaquempi, cotanquitsi tee apaniro naatimpa pintsajiguempine, ipintsajiaquempiqueate aisa maasano tsajiaqueroca Quenquetsatsarentsimajaca. ² Nopintsamajiaquempi, atsamajiaquerotarite Quenquetsatsarentsimajaca, oncoguitempani onchoocatimotacaji. ³ Irraquea Aapani Irioshi aisa Irijanite Jesoquirishito incavintsajiacaji, impintsatacojiacaji, inchoocatacajiacaji cameetsa, atsamajiaquerotaritari iroomajatatsica aisa apintsatavacaajia.

⁴ Noshinevaetaca namenajiaqueri pirijanijiate iconoagarantajiacaca inetsanamajiaquero Quenquetsatsarentsimajaca, iquejetacaamajiacaro icamantajiacajica Aapani Irioshi. ⁵ Imaica, manquigarentsi, noncamantaquempi iintsija ampintsatavacaajiguempa maasano aatimpajia. Aritarite ocatia notioncaquempica tee irooquea otsipa iroaquerari quenquetsatsarentsi, iroguenti icantaqueca Aapani Irioshi itsatacaajitacajica iroaqueragueti aquemisantajiaquerigueti. ⁶ Ampintsatavacaajiaquempagueti aatimpajia mana anetsanajiaquero maasano icanqueca Aapani Irioshi, piquemaquetari iroaqueragueti icanti: “Pimpintsatavacaajiguempa.”

⁷ Iquenaguetanaquequea quepatsipaequi oshequi amataajatsica cantajatsica tee incaquintetapoje Jesoquirishito, tee intsintapoje. Maasano quejetarica imaica iriguenti amataatsica aisa iriguenti catsimatirica Quirishito. ⁸ Inchiquiojitaja pamatavijacaantajigatsi ariquea povashiantajianajero pimpeacojiajemparo maasano notsatacaajiaquem-pica. Picancani pinetsanamajianaquero Quenquetsatsarentsimajaca cameetsanijite incavintsajimentajiaquempinijite Aapani Irioshi coajica ontaniqui jenoqui inquitequi iroguishinejamajiaquempiqueate. ⁹ Imaica noncamantajiaquempi aato itsipatari Aapani Irioshi irira cantatiguiroca itsatacaantaqueca Quirishito, cotanquitsi iriraquea netsanatiroca quisho oaqueroca irioquea intsipamajataquempa Aapani Irioshi jeri aisa Irijanite. ¹⁰ Querica coraquetanquitsine intsatacaajivetaquempi otsipa teeca onquejetemparoji itsatacaantaqueca Quirishito aato poguisavicajiaqueri pitsoviron-aquitequi, aisa aato pishineventajiacari. ¹¹ Irira shineventajiaquemparineca mana iquejetacari iriatimpa, yantaquero teeca oncameetsateji yamatavijantaquequeate.

Ivegaratanajirogueti itioncaqueca

¹² Nonintavetacaqueate noncamantamajajiaquempime maasano, cotanquitsi tee non-inteji nontioncajiaquempi paperiqui, noquenquejaquetarite noanaque oraniqui aviatimpajiaqui inchiqiojita nonquenquetsatacaajiaquitempi cameetsanijite ashinemajajiaquempa maasano. ¹³ Ariqueate ichoocajiaque acaniqui irijanijiate piguetyote icoguaqueca Aapani Irioshi onquemisantamajataqueri. Iriatimpajia inintajiaque pinquema-cojiajeri iquenquejajiajimpi. Ari oncoquempa.

OTSIPATAPOJACACA ITIONCAQUECA JOANCA

Antsatantaquemparoca

Ocatica iroguenti antsatantaquemparoca otsipatapojatsica itioncaqueca Joanca. Iriorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iguentijeguite pajitatsica Santiago, iquitsajiaque. Irocashi itioncaquero irira Joanca paperiqui Yantajiguica 3.1–4.22. Iquenquejajitaque itioncaquero ocatica paperi ichooaquegueti Epesqui, atsajiaquetari iriguenti quemoguijajiguirica quemisantajiatsica Epesoquitica. Iquenquejajitaque irira Gayo itioncaqueneca iguintenitaca quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequeratagueti intionqueroji ivaperite catsantsatanquitsica pajitatsica *Quenquetsatsarentsi Oganejencatatsica Itioncaqueca Joanca* itsavetacotaquerigueti Jesoquirishito, aisa tequeratagueti intionqueroji otsipa pajitatsica *Yonigaajiguequerica Joanca*.

Joanca itioncaciaqueneri Gayo cameetsaniji incantajiaqueri iriatimpa aisa Irimitio ishinevaetaca yamenajiaquerigueti icomajamajajia, cotanquitsi tee irishineventemparoji yantaqueca Tioterepeshi.

Joanca itioncaqueneri Gayo

¹ Imaica, nopintsatacaca Gayo, nonintaque nontioncaquempi paperi. Naatimpa naroguenti quemoguijajiguirica quemisantajiatsica. Arimaja nopintsamajaquempi.

Gayo icavintsajiaquerigueti maasano quemisantajiatsica

² Napiguemisanariteni nopintsatacaca, namanacoventaquempi cameetsanijite pincoquitimpanijite pinchoocataque cameetsa, aatoniji pojoquijita, onquejetaquempa pichooaquegueti cameetsa pishirequi pishinevaetaca. ³ Oraqueate icoraquejiaquegueti apiguemisanarijateni icamantapojanaquea picomajamajatanaca pinetsanamajatanaquero Quenquetsatsarentsimajaca. Noshinevaetanacaqueate noquemacotaquempigueti. ⁴ Caavijitarite oguishinejamajataquena noquemacojiaquerigueti nirijanijiate* inetsanamajajiaquero Quenquetsatsarentsimajaca.

⁵ Nopintsatacaca, cameetsavaequequeate picavintsajajianaquerigueti maasano quemisantajiatsica, irira pigonorogia aisa itsipapae teeca pinejavetempariji. ⁶ Iriaqueate coraquejianquitsica acaniqui icamantajiaqueri quemisantajiatsica icapioacajiacagueti icantajiaqueri pipintsamajajiacari. Imaica nonintaque picancani pinquejetajempa imaica iroajianaquegueti oraniqui, coajica iroajianajeguetei pojocajiaqueneri maasano icoguitejajiacaca cameetsanijite irishineventaquempiniji Aapani Irioshi. ⁷ Irooquea yoantanacaca yoantanacarotari ivajiro Jesoquirishito, cotanquitsiquea irirajia teeca intsaroventempariji Aapani Irioshi teequea iramitacojigueriji, tecatsi irojocajigueneriji. ⁸ Aroguentijiaqueate jocajiaquenerine maasano taaca inintajiaque cameetsanijite amitacojiaqueri itsavetantajiaquerogueti Quenquetsatsarentsimajaca.

⁹ Notioncaviavetacanari quemisantajiatsica capiocapinijiatatsica oraniqui, cotanquitsi iriraqueate Tioterepeshi mana yanaimanatanaquena intati tee inquemisanatenaji naatimpajia. ¹⁰ Imaicaquea imaica noncoraquequitegueti pincapioacajiaquempigueti noncamantamajajiaquempi maasano aviatimpajia quero icocani iriatimpa, inijashique-natarite intati. Cotanquitsi tee apaniro onchoocateji ocatica. Oraqueate yoajianaquegueti apiguemisanarijateni tee irajiaqueneriji aisa icatsimatimentajiaqueri quericaca nintavetanquitsica irajiaqueneri, ariquea icantimentajiaqueri inconoajajemparimequeate capioacajianquitsica.

* 1:4 Iquenquevarivaetanaquegueti irira Joanca icantiri “irijani” maasano quemisantajiaquerica Amajirote Jesoquirishito.

¹¹ Imaica, napiguemisanteriteni, aato piquejetari antiroca teeca oncameetsateji. Iriguenti pinquejejiacquempa comajamajajiatsica. Irira comajamajajiatsica iriguenti ash-intari Aapani Irioshi, cotanquitsi irira antajiguiroca teeca oncameetsateji tee intsateriji Aapani Irioshi. ¹² Maasano icamantacojiguiroca Irimitio, yamenajiaqueritarite inetsanamajatiro Quenquetsatsarentsimajaca. Ariqueate noquejejiaca naatimpajia nocamantacojiaqueri. Aviatimpa pitsataque tee namataajiguempaji.

¹³ Nonintavetacaqueate noncamantamajajiaquempime maasano, cotanquitsi tee non-inteji nontioncaquempi paperiqui. ¹⁴ Noninquetarite nonejaquitempi ariqueate anquenquetsatavacaajiaquempa. ¹⁵ Noninque pinchoocaque cameetsa. Ariqueate ichoocajiaque acaniqui atsipavijijiacaca, inintajiaque incamantajiaquempiqueate iquenquejiaquempi. Naatimpa nonintaque inchiqiojita pincamantajiaqueri maasano atsipavijijiacaca apaniropae choocana noquenquejiaqueri.

ITIONCAQUECA JORASHI

Antsatantaquemparoca

Ocatica iroguenti antsatantaquemparoca itioncaqueca Jorashi itioncaciaquenerigueti quemisantajiaquerica Jesoshi (otsapa 1-3). Tee intsajiteji queri itioncaciaqueneca aisa tee intsajiteji quero ichoocaqueni Jorashi itioncaquerogueti. Irraquea Jorashi irio jorio iriguentijeguite Jesoshi. Iquenquejaitaque itioncaquero ocatica paperi ajagantsiniqui irooca 66, irooca otsipauqui ajagantsini arejevaetacaro ajagantsini 90.

Jorashi itioncaciaqueneri quemisantajiaquerica Jesoshi iragamajiaquempari amataajiatsica, aatoniji yamatavijajiguiritsi intsatacaajiaquerigueti teeca iroomajateji, aisa aatoniji yovashiantajianajiro iquemisantajiaquegueti (4-16). Icamantajiaqueri quero incojiaquempani quemisantajiaquerica Jesoshi (17-23). Iteroncaquerogueti itioncaqueca ishineventacariquea Aapani Irioshi, icanqueri: “¡Arioteesaa!”, iriotaquetari aajjavajica maasano aatimpajia aventajiacarica Jesoquirishito metojaventajiacajica (24-25).

Itioncaciaqueneri icajemajiaqueca Aapani Irioshi

¹ Imaica nontioncaciaquempani paperi aviatimpajia icajemajiaqueca Aapani Irioshi. Naatimpa naroguenti Jorashi iriguentijeguite Santiago,* iriguenti nintacaquena Jesoquirishito nosavicaventaqueneri inintaguetica iriatimpa. Notioncantaquempani aviatimpajia ipintsamajiacaca Aapani Irioshi, iquempoguijajiaqueca Jesoquirishito. ² Namanacoventajiaquempani incavintsajajiaquempanijite Aapani Irioshi, inchoocatacamentajiaquempanijite cameetsa, aisa impintsamajajianaquempanijite.

Tsatacaantantajatsica amataajiatsica

³ Napiguemisantarijateni nopintsamajiacaca, nonintavetacaqueate nontioncaquempimequeate nonquenquejacaajiaquempimequeate quero icojiacajini Jesoquirishito imeshiajiacajigueti, cotanquitsi noquenquejaque caaviji picoguimenta nontioncaciaquempani noncantajiaquempaniqueate pintampishitashijiaqueri itsipapae teeca inquemisantamajajigueti aatonijite yamatavijajiguimpi, jero aisa noncantajiaquempani pintsamajiaquero maasano itsatacaajiacajica Quirishito, aatoja picantashitatigaro. Teenicate onchoocateji otsipa quenquetsatsarentsi tsavetacoquerineca quero icota Aapani Irioshi imeshiantigueti. ⁴ Irirajiaqueate amataajiatsica tee inquemisantajigueriji Aapani Irioshi, mana ipeamampeajica quemisantajatsica cameetsanijite iramatavijimentajiaquempanijite, ariqueate iconoagarantajiacajica iquijajiaquequeate picapioacajiacajigueti iconoajiaquempani. Icantajiaque icavintsajajiacajitarite Aapani Irioshi imeshiajiacajica cameetsataquequeate antajiaquero taaca anintajiaque, aato icatsimatimentajiro. Aisa imanintajiaqueri Amajirote Jesoquirishito irira apaniroca ashintamajiacajica. Irootaquequeate itioncacotantajitacarica paesatoniqui ocanti incatsimatimentajiaqueri Aapani Irioshi iroajianaque camorecariqui.

⁵ Pitsajivetacaroqueate maasano ocatica, cotanquitsi nonintaque nonquenquejacaajiaquempani ishiraerijia. Pameneri iriatimpajia ichoocajivetacagueti Ejepitoqui icavintsajajiaqueri Aapani Irioshi yaajianaqueri otsipauqui quepatsi, cotanquitsi coajica iteroncaciaqueri maasano teeca inquemisantajigueriji. ⁶ Ari iquejejiaca irashivanti-jitete Aapani Irioshi caavijica icameetsaveta, ipeajivetacariqueate Aapani Irioshi amitacotirica, cotanquitsi coajica yovashiantajianaquero iguintenijavetacagueti. Ariquea Aapani Irioshi yashitacojiaqueri opitsecaquegueti, yoishotacotaqueri cavorejatsariqui caarica teroncatsi igantagaqueate irosati aavaetantanaquempani oratica savincaguiteri anaanquitsineca incantimentantaquempani maasano. ⁷ Ariqueate iquejejiaca aisa

* 1:1 Santiago. Iguenquetsatsarequi guiriego ipajita Iakobos. Iconoagarantaca quimajareri yoguipitsocaquerogueti ivajiro ipajitiri Santiago, itsipa ipajitiri Jacobo. Mavite oponeca iguenquetsatsarequi evereo, ipajitiri Yaakob.

irirajia guinteninijiavetatsica Soromaqui aisa Gomoraqui jerijia quempejiguetanquit-sica iquempevaejiaca. Yoashitantajiaquequeate, aisa itsanirojiaquequeate manaqueate arimpa ijamajajianaque, irootaquequeate yoguivariantacanaarica Aapani Irioshi paamari iteroncajiaqueriqueate cameetsanijite amenajiaquero anquenquejimentajiaqueronijite camorecari aato otsivaqui antsaroantajiaquempaca ancomajamajatantajiaquempaca.

⁸ Ariqueate iquejejiaca aisa irirajia amataajiatsica iquenquejaguishejiaque taaca opajitapae, teequeate incomajajiguempaji mana icovaeguishequero itsino. Imanintajiaqueriqueate Amajirote teequeate impincatsajigueriji, aisa inijashinajiacari maasano oganejencaguetatsica inquitequitica. ⁹ Arimpate coramani irashivantite Aapani Irioshi icantajitica Miguero, arivetaca iriguenti imajirote maasano irashivantijitete Aapani Irioshi, teequeate irioqueate quejeterone imaica. Pameneri coramani imetojaquegueti Moishishini iriatimpa Miguero manaquea iquenquetsatacaavaqueri imajirote ampatsini. Iriaqueate imajirote ampatsini manaqueate inintavetaca iranaquerome itsino, iriraqueate Miguero teequeate irininteji, cotanquitsi teequeate incantimateriji incatsimaqueri mana icanqueri: “Inchiquiojita incantomajaquempi Aapani Irioshi.” ¹⁰ Cotanquitsi irirajia amataajiatsica mana inijashinajiacaro teeca intsajigueji. Aisa mana iquejejiacari tomirishipaequitica savicaventiroca taaca opajitapae inintaguetica, irootaquequeate interoncantajianaquempaca.

¹¹ Maasanotarite irantsipejiaquempa iriatimpajia. Iquejemajajiacaritarite Caini imetojaquerigueti iriguentijeguite, aisa mana iquejejiacari Varaameni ishinevencari imentaquipae. Pameneri iriatimpajia ishineventajiacarigueti imentaquipae yantaguishejiaquequeate taaca opajitapae teeca oncameetsateji. Aisa caaviji ipigatantajiga, iquejetacari Coreni ipigatsatacarigueti Moishishini, ariqueate icatsimatimentaqueri Aapani Irioshi imetojaqueri. Ariqueate inquejejiaquempa iriatimpajia aisa interoncajitaqueri. ¹² Iconoajiaquempi pitsipatavacaajiacagueti pishecajiaca piquenquejiaquerigueti Amajirote imetojaventajiacajigueti, cotanquitsi tee impashiventempaji manatarite ishecatapitsajiacari igonorojia irisati quenquejacotajatsi, irootaquequeate iriguenti shecamajajianquitsi iquemamajajiaqueate tee inquenquejajigueriji teeca onchoocate irishecajiaguempaca. Mana inijashijia intati, caaviji yamatavijantajigui quejejiacaqueate oseetigueti; ijijitaqueroji ari ontejapojaque incani, cotanquitsiqueate yaanajiro choviga, tee ontejeji. Aisa mana iquejejiacaro panquirentsi ishecama-jajitaca, yoguijajitavaqueroqueate oitsoquitanajeta inchiquioji irishecajitavajemparo, cotanquitsi aavetapojagueti oitsoquitigueti tee oitsoquitajeji. Ariqueate ichaquijiquero, aisa iponquitirejajitaquero, ometojamajatanaque. ¹³ Aisa mana iquejejiacaro quantija ovorevoraavaetigueti, ariqueate opishoncaquero oshimore otsapijaqui, yamenajitaqueroqueate quepatsishimoretaquequeate. Ari iquejejiaca iriatimpajia, yantaguishejiaque impashiventacaquempameca. Mana aisa iquejejiaca impoquiro teeca igantaga inquishoteji. Iriira taquijaaajiatsica querocampa incojiaquempani impampiatantajianaquemparica queroca iquenajianaque. Irootaquequeate icantantacaca Aapani Irioshi maasano quejejiacarica iriatimpajia iroajianaque opitsecaquegueti, igantagaqueate incantacotaque manquimanquimanqui.

¹⁴ Iriguentijia itsavetacojiaqueca Enoconi coramani. Iriira Enoconi irio sietetapojatsica itsavetacojitaquerigueti ichoviquijianaqueca Araini,[†] iquenquetsatacotaqueri amataajiatsica icanti: “Incoraquepojaque Amajirote coajica intsipajiaquempari irashivantijitete iroshequiamajatatiguenimaja. ¹⁵ Incampojaque quericaca antatsica cameetsari aisa quericaca antatsica teeca oncameetsateji, ariqueate incatsimatimentaqueri maasano antaguishejiguiroca teeca oncameetsateji nijashinajigarica iriatimpa.” ¹⁶ Iriatimpajia iroguenti savicaventajiaque inijashitantajia, aisa inintamampeaguevetaroqueate taaca opajitapae, jero aisa savicaventajiaquero taaca opajitapae inintaguishejiaqueca. Yaventacojia jero aisa ishinetamampeajiacari igonorojia cameetsanijite irojoquimentajiaquerinijite taaca inintajiaque.

[†] 1:14 irio sietetapojatsica itsavetacojitaquerigueti ichoviquijianaqueca Araini. Pamenero Jen. 5.1-24 itsavetacojitaquerigueti. Cotanquitsi ocativa icanqueca Enoconi, tee intioncajeriji Jeneshishiqui, oponeca otsipaqi paperi icantajitica Itioncane Enoco.

¹⁷ Cotanquitsi imaica aviatimpajia napiguemisantarijateni nopintsamajajiaca, pinquenquejajiguero maasano icantajiaquempica itigarancanejia Amajirote Jesoquirishito, aato pipeacotaro. ¹⁸ Icamantajiaquempitarite icantajigui: “Oraqueate pajinigueti aapojempa savincaguiteri vegaratapajaatsineca inchoocajiaque shirontimentantajiananquitsineca savicaventajianaqueroneca taaca opajitapae inintaguisheguetaqueca iriatimpajia.” ¹⁹ Iriraqueate quejejaqueroca imaica yamatavijajiaqueri oshequini quemisantajiaatsica ipigatsatavacaantajianacaca, teeca inquemavacaantajiguempaji. Iriratica shirontimentantajiaatsica mana ishineventajiacaro intati inintaguetica iriatimpa, teequea inchoocashirenteriji Ishire Aapani Irioshi.

Itampishitacajiaqueri quemisantajiaatsica

²⁰ Cotanquitsi aviatimpajia napiguemisantarijateni, nonintaque picancanija pisavicaventajiaqueroja Quenquetsatsarentsi Oganejencatatsica cameetsanijite arimpaqueate pinquemisantamajatanaqueri Jesoquirishito. Pincantajiaqueri Ishire Aapani Irioshi intsatacaajiaquempi pamanajiaquerigueti Aapani Irioshi. ²¹ Arimpaqueate pincomajajianaquempa cameetsanijite incavintsajimentamajajiaquempinijite Aapani Irioshi. Poguijajivaqueri Amajirote Jesoquirishito incoraquetajeguete incavintsajajiapojempi intsipajiaquempi jenoqui inquitequi picancaniquea pinchoocajiaqueni iriatimpaqui. ²² Pimpintsatacojiguempari irirajia teeca intampishishirentajigueji quenquejacojiavetacaroca iroomajatatsica: “Caaricampa.”[‡] ²³ Itsipapae mana pintsatacaajiaqueri inquemisantamajajiaqueri Aapani Irioshi quejevaecaqueate manaca paajivajiri intati pajinica intajiaquempa camorecariqui. Pincavintsajajiaqueri, cotanquitsi inchiquiojia ipajencajianaquempirotsija iguempevaerejia. Aatoja pishineventsijigari yantajiaqueca iriatimpajia.

²⁴⁻²⁵ Chooca apaniro Irioshimajaca meshiajiaquerineca quemisantajiaquerica Amajirote Jesoquirishito. Iriotaquequeate agavejanquitsineca intampishitacajiaquempi aatonijite piquempevaejiaja. Irajaianaquempi intsipajianaquempi iriatimpaqui, iramenajiaquempi cameetsaqueate pichoocataque quejevaeca teenica pinquempevaetimatempaji. Oraqueate ontaniqui ichoocaquegueti iriatimpa pincoguitempani pishinevaejiaquempa. Jameja acancani antsaromentajiaquempari, yoganejencamajatatari. Iriguentitarite Amajirote aisa caaviji yagavejamajati, jero aisa yaaguitejaquero maasano. Igantagaqueate iquejetaca coramani, ariqueate iquejetaca imaica, ariqueate igantagaqueate inquejetaquempa coajica, igantagaqueate incoguitempani. Ari oncoquempa.

[‡] 1:22 Oconoaca otsipa paperipae iroquetinica ocanti ocaniqui: “Pintsatacaajigueri irirajia teeca intampishishirentajigueji iramenamajaqueroniji iroomajaca.”

YONIGAAJIGUEQUERICA JOANCA

Antsatantaquemparoca

Ocatia iroguenti antsatantaquemparoca itioncaqueca Joanca paperiqui pajitatsica *Yonigaajiguequerica Joanca*. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iriguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iriguenti quempoguijajiguirica quemisantajiatsica Epesoquitica. Yamenaquero Joanca ocatia yonigaajiguequerica ichoocaquegueti ovogorequi pajitatsica Patimoshi (1.9). Chooqa quenquejanquitsica itioncaquero ichoocaquegueti ontaniqui. Itsipajia iquenquejajiaque itioncaquero ichoocaquegueti Epesoqui irooca otsipauqui guinteninintsi yoguipauijajitaquerigueti isotoanaquerogueti ovogore Patimoshi. Itioncaciaqueneri quemisantajiatsica Ashiaquitica capiocapinijiatsica guinteninintsipaequi carajianquitsica 7 (1.4). Tee intsajiteji quero ajagantsini itioncaquero ocatia paperi, cotanquitsi chooca quenquejajianquitsica itioncaquero arica ajagantsini 94, irooca otsipa ajagantsini arejevaetaro ajagantsini 98. Itioncaquero ocatia paperi iteroncajitaquerogueti maasano otsipapae paperipae choocajianquitsica ocaniqui paperiqui icantajitica *Tsvetacoquerica Jesoquirishito*.

Joanca itioncacotaquero acaniqui yonigaantaguequerica Jesoquirishito cameetsaniji intsajiaquenijite quemisantajiaquerica quero oncoguetanaquempani oncoramanitapojajeguete, irooshipojajitarite aapojajempa (1.1). Jesoshi icanqueri Joanca intioncaciaqueneri irashivantijitete tsaromentajiacarica capiocajianquitsica guinteninintsipaequi carajianquitsica 7 (cap. 2–3). Coajica itioncaque intampishitacaajiaqueriniji quemisantajiatsica atsipeventajiacarica Jesoquirishito iquemisantajiaqueriguete intsajiaqueniji quero oncoguetanaquempani onteroncanaquempaguete quepatsi, iragavejaqueriguete Jesoshi imajirote ampatsini, aisa omparianajempa iroaqueraro quepatsi.

Yonigaantaguequeca Jesoquirishito

¹ Ocatiaquea tioncanquitsica ocaniqui iroguenti icanquerica Aapani Irioshi Jesoquirishito ironigaajiaqueri irajaanirejia cameetsaniji intsajiaquenijite quero oncoguetanaquempani oncoramanitapojajeguete, irooshipojajitarite aapojajempa. Iriatimpa itigarancanquitsitari irashivantite incamantaqueriqueate irajaanire pajitatsica Joanca. ² Irira Joanca icantamajataquero maasano yamenaguetaqueca, itsavetacotaquero iguenquet-satsare Aapani Irioshi, aisa yonigaquerica Jesoquirishito.

³ Iriaquea Aapani Irioshi irishinetacaavaequempariquea quericaca apatsajavantaqueronca ocatia paperi. Ariqueate inquempetacaajiaquempani aisa maasano quemisantajiaqueronca irampatsajavantajiqueroguete ariguete irinetsanamajatavaqueroquea, irooshipojajitarite aapojajempa itsavetacotsitacaca ocaniqui.

Joanca itioncaciaqueneriquea capiocapinijiatsica Ashiaqui

⁴ Naroguenti Joanca tioncaquero oca. Nontioncaciaquempiquea maasano aviatimpajia tsaromentajiatatsica Ashiaquitica* capiocapinijiatsica guinteninintsipaequi carajiatatsica 7.† Noninque incavintsajamajajiaquempani irira Choocaguitatsica, icoguitaniqua ichoocaguitini coramani, ari incantacoguitempani inchoocaguiteni. Noninque inchoocatacaajiaquempani cameetsa aatonijite taaca opajita pishoshoguitetimentajiatatsi.

* 1:4 Ashia. Iroguenti provincia ochoocantantajiacaca guinteninintsipae. † 1:4 guinteninintsipaequi carajiatatsica 7. Pamenero 1.11 itioncaqueroguete ovajiropae guinteninintsipae ichoocajiaqueguete itioncaquenca.

Ariquea noninque inquempetaquempauea irirajia 7 jeocajianquitsica[‡] choocatimojiaquerica imajirontamentoqui isavicancaca, incavintsajajiaquempi inchoocatacaajiaquempiquea cameetsa. ⁵ Noninque inquempetaquempauea Jesoquirishito iriatimpa incavintsajamajajiaquempi inchoocatacaajiaquempi cameetsa. Iriotaqueuea tsavetacotantirica Aapani Irioshi tampaticamajatiroca, teequea iramataguempaji. Imetojave-taquea, cotanquitsi irio jivaqueri maasano tancorejajiananquitsineca, aisa iriguenti Majirontamajatsica anaajiaquerica maasano majirontaguetatsica quepatsipaequitica. Caaviji ipintsamajajiacaji imeshiajiacaji ishetsitajajiro agovaeguisherejia, manaqueate iquivantajajiro iriraja. ⁶ Ipeacaajiacaji majirontajatsica aisa ipeacaajiacaji sasero-roteja cameetsaniji asavicaventajiaqueroniji maasano inintaguetica Aapani Irioshi, Iriri iriatimpa. Caaviji yoganejencamajata, yagavejamajati, imajirontamajata, ariquea incoguitempani inquejetaquempa, cameetsavaetaqueuea irishineventaguitemparinija maasano. Ari oncoquempa.

⁷ Pameneja, coraquetapojishiatsi Quirishito, iquenantapojacaroquea mararo! Iramenajivajeriquea maasano,

inquejetsijianaquempauea satajacaantajivecarica iramenajivajeri iriatimpajia aisa.[☆] Maasano caquinteguetatsica guintenijanquitsica quepatsipaequi iramenajivajerigueti irirajianaquempauea oshimampojancaavaetanaquempari. Jeeje, ari oncoquempanti imaica.

⁸ Jeroquea icanqueca Amajirote Irioshi: “Naroguenti *Alfa* aisa naroguenti *Omega*, § naroguenti pariacaroca jivatanquitsica nochoocadini coramani, aisa naroguenti carapojatsica.” Iriguenti choocatatsica, icoguitani ichoocati aisa incoguitempani inchoocaguiteni. Iriguenti Agavejamajatsica.

Joanca yamenajiri Jesoquirishito

⁹ Naatimpa naroguenti Joanca papitsaroveritarite, aquejetavacaajiacaca atsipeventajiacari Jesoquirishito, amajirontajiacari aisa atsipetacojiaca maasanopae. Coramani yaa-jitanaquenaquea yojocajiquitana ovogorequi pajitatsica Patimoshi yamenajiquenagueti notsavetantavaequeroqueate Iguenquetsatsare Aapani Irioshi, notsavetacoqueriqueate Jesoquirishito. ¹⁰ Iroompaquea arejetapojajagueti isavincaguiterte Amajirote,^{*} yagavejacaashirentaquenaquea Ishire Aapani Irioshi, noquemitsitaroquea notaquiqui iquenquetsajencajique inirojencamajaca quempejencavaeca tivorentsi. ¹¹ Icantajiti: “Naroguenti *Alfa* aisa naroguenti *Omega*, naroguenti pariacaroca jivatanquitsica nochoocadini coramani, aisa naroguenti carapojatsica.[†] Pintioncacoguetavaqueroja paperiqui maasanopae pamenaguetavaqueca pintigarancacaantajiaqueneriquea tsaroven-tajatsica capiocapiniatsica guinteninintsiqui caratatsica 7 Ashiaqui, opajitaquea: Epeso, Eshimirina, Peregamo, Tiatira, Saririshi, Pirarerepia, aisa Iraorisea.”

¹² Iroompa nopitsocavetanaca nonejeri quenquetsatacaaquenaca. Namenitsitariquea 7 tsivorentsi jerenquijerenquiatacotatsica, ipeacaajitaca cavorejari ooro. ¹³ Iniganquitsitaroquea 7 tsivorentsi aparó quejevetarica irijanite caquinte. Onti-aseavaeca iitsaare arejevaeca yovegaraguitipojacagueti, yaguiatacari ineguiqui ichompimashite ipeacaajitaca ooro. ¹⁴ Oraquea iguitoqui iquitamaromaevaeque quempeni ovejamae irooca sharaca. Oraquea iroquija quempetaca omorequigueti paamari. ¹⁵ Oraquea iguitiqui otsirencavaeque ocanca quempetaca itajaitirogueti cavorejatatsica voronquise. Oraqueate iquenquetsaquegueti iririjencavaeque icanca quempetaca ampenejatagueti

[‡] 1:4 jeocajianquitsica. Irioca ocantacotaque ijeocarijitete Aapani Irioshi. Cotanquitsi itsipa iquenquejanaque irioca ocantacoque Ishire Aapani Irioshi cotanquitsi isietetashitaca, aparó inaque. Pameneroja aco, apapacoro onaque cotanquitsi ocarati 5 achapaquipae, ocincotashitaca. [☆] 1:7 Sac. 12.10; Jn. 19.34, 37. Pamenero aisa Sar. 22.16; Is. 53.5.

§ 1:8 Alfa aisa Omega. Oratica alfa iroguenti ojivatantanacaca abecedario irashi guiriego. Oratica omega iroguenti carapojatsica. ^{*} 1:10 isavincaguiterte Amajirote. Oraquea icantajitiro “isavincaguiterte Amajirote” maasano tominco, iroguentitari itancorejantanajaca, irootaqueuea icapiocantajiacaca tsaroven-tajiacarica coramani.

[†] 1:11 Choocaguetaque otsipapae paperi iroquetinica teeca intioncajeritiroji ocantiqui quejetaca tioncanquitsica otsapaqui 8: “Naroguenti Alfa aisa naroguenti Omega, naroguenti pariacaroca jivatanquitsica nochoocadini coramani, aisa naroguenti carapojatsica.”

ojaaquiniqui amarigueti. ¹⁶ Oraqueate itincamijempequiqui yajiricajiaqueri 7 impoquiropae. Osototsantsamenivaeque ivagantequi itsaampitsantsamenirite mavite ot-saampinampitaque. Oraqueate ivoroqui itsirencajatantavaetiquea icanca quempetaca catsirincaiteri itampaticatigueti.

¹⁷ Irooqueea namenaquitiguri notejimotanaqueriquea quempetaca arinica nometojaquenica. Cotanquitsiquea iriatimpa ipamitsitantanaroqueea itincamijempequi icanquena: “Aatoqueea pitsaroguitsi. Naroguentitari jivatatsica, naroguenti aisa carapojatsica. ¹⁸ Naroguenti Anijamajatatsica, nometojaveca coramani iroompaqueea nopochatanaji, noncoguitempaniquea nonchoocaguiteni aatoqueea nometojajitsi. Naroguenti ajiricaqueroca oyavine metojagantsi aisa oyavine Areshi.‡

¹⁹ Nocantantaquempica pintioncacoguetavaqueroja pinejaguetavaqueca incajaranqui, pinejaguetavaqueca imaica aisa maasanopae nonigaaguetaquempica coajica. ²⁰ Imaica noncamanquempi taaca opaji icantacoque irira 7 impoquiropae pinejaqueca najiricajiaqueca notincamijempequiqui, aisa 7 tsivorentsi jerenquijerenquiatacotatsica ipeacaajitaca ooro. Iriraqueea 7 impoquiropae iriguenti icantacojiaque 7 ashivantijite§ tsipajiacarica tsaromentajanaca capiocapinijiatsica guinteninintsipaequi carajiatsica 7. Oraqueea 7 tsivorentsi jerenquijerenquiatacotatsica iriguenti ocantacojiaque tsaromentajanaca capiocapinijiatsica oraniqui.

2

Itioncajiaqueneri tsaromentajiatsica guintenijiatsica Epesoqui

¹ “Imaica pintionqueneri irashivantite* tsaromentajanaca guintenijiatsica Epesoqui, pincante:

Iriraqueea ajiricajiaquerica 7 impoquiropae itincamijempequiqui, anijitimoguequerica 7 tsivorentsi jerenquijerenquiatacotatsica ipeacaajitaca cavorejari ooro icanti:

² Notsamajaque maasanopae pantajiaqueca, pipanquenapanquenaicaro patsipeventajiacaroqueea, teequeea povashianteroji. Teequeea pishineventajiguempariji pea-caaguishejigaroca covaeguisherentsi. Notsaque icoraquetimojiavequempi cantajia-avetapojimpica: ‘Naroguenti itigarancaneja Jesoshi’, cotanquitsiquea oraqueea itsatacaajiavequempigueti manaqueea pitsatsijiavaqueri teequeea inquempajiguempariji itsatacaantajiguica notigarancanemajaca, ariqueate tee pinquemisantajigueriji, pamenaajiavaqueritarite manaqueea yamataajiaa intati. ³ Arimajaca patsipetacojiaca patsipeventajiaquenaqueea teequeea pimperatanaquemparoji.

⁴ Cotanquitsiquea chooca aparo noncantomajimentajiaquempica, irootaquequeea ocatica: Teequeea pinquempejajempaji iroaqueragueti pipintsamajajiaquenagueti.

⁵ Iintsija pinquenquejajiajeroja quero picojiavetacani cameetsaniji pincantashitajiaianaquempianiji pinquempejianajempaqueea iroaqueragueti pipintsamajajiaquenagueti. Aatogueti picantashitajiajatsi noncoraquetashijiaquempiquea naacotsitanaquempiri pitsivore jerenquijerenquiatacotatsica, aato ochoocataji ochoocaquegueti imaica. ⁶ Cotanquitsiquea noshinevaeca namenaquequeea pisemacaro ipeacaaguishejiacaca nicoraitajia,† piquempajiaquenaqueate naatimpa nosemacaro.

⁷ Choocagueti guempitatanquitsica iintsija inquemeja icantajiaquerica Ishire Aapani Irioshi tsaromentajiatsica. Quericaa tampishitashijiaqueroneca maasanopae

‡ 1:18 Icanquegueti Jesoshi: Naroguenti ajiricaqueroca oyavine metojagantsi aisa oyavine Areshi, irooqueea ocanque iriguenti cantatsica quero iroaraitanaque maasano metojajianquitsica, iriguentitari agavejamajiaqueroca metojagantsi. Oraqueea Areshi iroguenti ichoocajiaquegueti metojatsica tequeratagueti impishoncajiteriji camorecariqui. Irira guiriego icanquero hades, iguenquetsatsarequi evereo icanquero sheol. § 1:20 ashivantijite. Iguenquetsatsarequi guiriego otioncaca aggeloi, ocanque ‘camantajiaatsica’, irio itigarancanjitica incamanteri itsipa. Chooca mavite ocantacotaque. (1) Irootaque icanquerica ashivanti, iriotaquetari itigarancaqueca Aapani Irioshi camantajiaquerineca caquinte. (2) Chooca otsipa ocantacoqueca: irira caquinte camanquerineca itsipapae. * 2:1 irashivantite. Pamenero otsapa 1.20 ovegaravanapojacagueti ocamantacotaquerigueti ashivanti. † 2:6 nicoraitajia. Teequeea intsamajajitajeriji irirajia icantajitica “nicoraitajia”. Iquenquejajitaque irioca guijatacojiguiroca itsatacaantica Nicoraashini. Arica iquejejiacari guijatacojiguirica itsatacaantica Varaameni. (Pamenero 2.14.)

coraquetashijiaquerineca nojocaqueneri irishecaquemparoquea osovena inchato anijacaantantsica choocatatsica jenoqui ivaraisotequi Aapani Irioshi.‡

Itioncaciaqueneriquea tsaromentajatsica guintenijatsica Eshimirinaqui

⁸ “Imaica pintionqueneri irashivantite tsaromentajianaca guintenijatsica Eshimirinaqui, pincante:

Irraquea metojavetanquitsica coramani iroompaquea ipochatanaji iriguenti jivatatsica, aisa iriguenti carapojatsica. Imaica icanti: ⁹ Notsamajaque patsipeventamajaquea, aisa teetarite taaca opaji pashintimatempaji, cotanquitsiquea caaviji incavintsajamajajiaquempi Aapani Irioshi. Notsaque icantaguishetacovaequempiquea cantajatsica: ‘Naroguenti jorioja’, cotanquitsiquea caari, iriguentijitari igapiocane Satanashi. ¹⁰ Aatojate pitsaroacaajigaro pantsipejiaquempaca. Irraquea ampatsini irisantanatacotacaantajiaquempi cameetsaniji namenajiaquempinijite arimajaca pitsaromentamajajiaquenaquea. Pantsipevaetaquempatarite ¹⁰ savincaguiteri, cotanquitsiquea arimpaqueate pintsaromentamajatanaqueaja, aatoquea povashiantajiguirotsijate piquemisantajiaquenaguete arejevaetanajempaqua pimetojantanaempaca, iroompaquea nontancoretancoretajempi oncoguitempaniquea noganijaquempi, onquejevetaquempa nojocajiaquempi amatsaerontsi anijacaantantsica.

¹¹ Choocaguete guempitatanquitsica iintsija inquemeja icantajiaquerica Ishire Aapani Irioshi tsaromentajatsica. Querica tamphishitashijiaqueroneca maasanopae coraquetashijiaquerineca aatoquea yatsipetimatajarotsi icantajitica ‘mavitetapojatsineca metojagantsi’.§

Itioncaciaqueneriquea tsaromentajatsica guintenijatsica Peregamoqui

¹² “Imaica pintionqueneri irashivantite tsaromentajianaca guintenijatsica Peregamoqui, pincante:

Irraquea ashincaroa itsaampitsantsamenirite mavite otsaampinampitaque icanti: ¹³ Notsaquequea quero piguintenijia, manaquea pichoocajiaque oraniqui imajirontacaguete Satanashi, piguintenitimojiacarimajirontajiacarica, cotanquitsi namenajiaquempi picancaniquea quisho poajiaquena poguijatacomajajianaquena. Teequea povashiantajigueroji paventashirentaquena irosati imetojajivecariguete Antipashini oraniqui piguinteniqui isavicaventavaequenaguete itsavetacotantavaeguitanani.

¹⁴ Cotanquitsiquea choocatiraja aparopae noncantomajimentajiaquempica, namequetarite piconoagarantajia teequea pimpishoncajigueroji itsatacantica Varameni. Irraquea Varameni iriotaquequea cantaquerica Varacani coramani incovaeguishetacajiaquempiquea ishiraerijia, jero ishecatacantaantajiacarica iteshi viratsipae ijitorejacaantajiaquenerica irojocajiquenerica ipeashiguetaacaca irioshivijitashijiacaca intati. Aisa icantajiaqueriquea cameetsavaeque incantatsajiaqueroquea manquigarentsija.☆ ¹⁵ Aisa piconoagarantajia teequea pinintajigueji pimpishoncajigueroji itsatacantaamampeajiacaca nicoraitajia.* ¹⁶ Irootaquequea nocantantajiaquempica pincantashitajianajempajate. Aatoguete picantashitajajiga noncoraquetaqueate noncatsimajiaquiteri quempejiguiroca imaica, nashimirintantajiaquempiquea notsaampitsantsamenirite novagantequitica.

¹⁷ Choocaguete guempitatanquitsica iintsija inquemeja icantajiaquerica Ishire Aapani Irioshi tsaromentajatsica. Querica tamphishitashijiaqueroneca maasanopae

‡ 2:7 ivaraisotequi Aapani Irioshi. Oraquea paraiso iroguenti oganejencajencatapojacaguete ichoocatiguete Aapani Irioshi. Irirajia tsaromentajigarica incoguitempani inchoocaguiteni ontaniqui, aatoquea imetojajitsi. § 2:11 mavitetapojatsineca metojagantsi. Irirajia atsipejiaquemparoneca icantajitica “mavitetapojatsineca metojagantsi” irantsipeguitempani camorecariqui. Pamenero aisa 20.6, 14; 21.8. ☆ 2:14 Nm. 25.1-3. * 2:15 nicoraitajia. Pamenero 2.6.

coraquetashijiaquerineca nojocaqueneri irishecaquemparoquea manaa caarica inejajiti. Aisa nojoquitenempariquea quitamaropiri mapi tioncanquitsica iroaqueraro ivajiro teeca intsajiteroji, iriguenti tsataquerone iriratica ashinquemparoneca.✠

Itioncaciaqueneri tsaromentajatsica guintenijiatsica Tiatiraqui

¹⁸ “Imaica pintionqueneri irashivantite tsaromentajanaca guintenijiatsica Tiatiraqui, pincante:

Iiraquea Irijanite Aapani Irioshi choocatanquitsica iroquiija quempecaroca omorequigueti paamari, aisa iguiti tsirencavaetanquitsica quempecaroca yamecantajitarogueti cavorejatatsica voronquise icanti: ¹⁹ Notsamajaqueroquea maasanopae pantajiaqueca. Notsaque pipintsatantajanaca, aisa paventajiaquenaquea pitsaromentajiaquea. Aisa notsaque picavintsajavaequeriquea papitsaromentarijiate manaquea patsipeventamajatanaqueate teequea pimpeacojiguenaji. Pantajiaqueca imaica anaavaetanaqueroquea pantajiaqueca iroaqueragueti.

²⁰ Cotanquitsiquea ochoocaque aparato noncantomajimentajiaquempica, name-naquequeate teequea pincantimateroji oratica manquigarentsi Jesavere cantamampeatsica: ‘Naroguenti tsavetantiroca icanquenaca Aapani Irioshi’, cotanquitsiquea manaquea amatavijajiaqueri naajanirejia ocantajiaqueri incantatsajiaqueroquea manquigarentsijia, aisa ocantajiaqueri cameetsavaeque irishecaciaquempari iteshi viratsipae ijitorejajiguetinirica irojocajiquenerica ipejaiguetic a irioshivijitashijiguetacaca intati. ²¹ Noguijaveguitaroni oncantashitanajempame ompishoncanajeroquea maasanopae opeacaaguishevaetacaca, cotanquitsiquea teequea oninteji. ²² Imaicaquea nojoquijitacaquemparoquea antsipevaequempaquea querocampate oncotajempani. Iiraquea tsipatsipaitacaroca covaeaguishejiacagueti ariquea nonquejetacaajiaquempari iriatimpajia aisa. Aatogueti ipishoncajianajirotsi ipeacaaguishejiacaca, nantsipetacaajiaquempariquea. ²³ Aisa nometojitsitaqueroquea irijanijiate† cameetsaniji intsajiaqueniji maasano tsaromentajatsica querocagueti inchoocajivequempa naatimpa naroguenti amenashirentajiguiri. Notsamajaqueroquea maasanopae iquenquejajiguica. Noncavintsajantajiaquemparica maasano comajamajajatsica, aisa noncatsimajiaqueriquea maasano peacaaguishecaroca covaeaguisherentsi.

²⁴ Cotanquitsiquea piconoagarantajiaa aviatimpajia Tiatiraquitica teequea pinquemisantajigueroji otsatacaajiaquerica amatavimatavivaequeca, aisa teequea pimpeacaaguishetemparoji maasano ipeacaaguishejiacaca oraquea icantajitica ‘isenacaguishemajataqueca Satanashi’. Aato nocantajiguimpi aviatimpajia. ²⁵ Cotanquitsiquea pincoquempanija pinquempejiaquempa imaica pintsaromentajiaquenajate arejevaetapojajempa noncoraquetantajempaca.

²⁶ Quericaagueti tampishitashijiaqueroneca maasanopae coraquetashijiaquerineca, aisa incomajamajaquempagueti irinetsanamajaqueroquea maasanopae nonintaguetica arejevaetapojempagueti onteroncantapojempaca, nompeacaquempari imajirojiate maasano caquinteguetatsica guintenijiatsica quepatsiqui. ²⁷ Querocagueti icoquenani naatimpa Aapani ipeacaquenagueti Majirontamajatsica, ariqueate nonquempetacaquempari iriatimpa. Irimajirontantaquempari imajirontaquijire ipeacaajitaca cavorejari quishomajatsica,‡ iragavejaqueriquea maasano teeca inquemisantajigueriji; interoncajiaqueriquea inquempetacaquemparoquea iporocajitirogueti chomo. ²⁸ Aisa nojocaqueneri shigompiri conijatatsica pitsecaguitetirajagueti.✠

²⁹ Choocagueti guempitatanquitsica iintsija inquememeja icantajiaquerica Ishire Aapani Irioshi tsaromentajatsica.

✠ 2:17 Eq. 16.14-15, 33-34; Jn. 6.48-50. † 2:23 Irijanijiate. Icanquegueti “irijanijiate Jesavere”, iriguentiquea icantacojiaque maasano guijatacojiaquero ca otsatacaantaqueca Jesavere. ‡ 2:27 Irimajirontantaquempari imajirontaquijire ipeacaajitaca cavorejari quishomajatsica. Irooquea oncanque intampishitashimajaqueroquea irimajironquemparagueti. Pamenero Sar. 2.9. ✠ 2:28 Pamenero 2 P. 1.19; Yonig. 22.16.

3

Itioncaciaqueneriquea tsaromentajatsica guintenijatsica Saririshiqui

¹ “Imaica pintionqueneri irashivantite tsaromentajianaca guintenijatsica Saririshiqui, pincante:

Iraquea tigarancaquerica* irirajia 7 jeocajianquitsica† irashi Aapani Irioshi, aisa irirajia 7 impoquiropae icanti: Notsamajaqueroquea maasanopae pantajiguica. Notsaque yamenajivetaquempiqua aviatimpajia tsaromentamajajatsica icantacotantajivequempiqua ‘Anijashireri’, cotanquitsiquea naatimpa namenajiquempi teequea pintsaromentamajajiguenaji, quempeca jac metojajiquempi.

² Iintsishiatsi pintinajanaqueshiatsi, pintampishitashivaetavaqueroshiatsi tequeratataraja pimpishoncamajateroji pitsaromentajiaquenaguetei aatonijite pipeacojianajarotsi maasanopae. Namenaquetarite teequea pinetsanamajateroji inintagueteica Aapani Irioshi. ³ Iintsijate pinquenquejajajeroja Noguenquetsatsare piquemajivecaca, pinquemisantamajaterojate, pincantashitajajianaquempi. Aatoguetei pitinajatsi noncoraquetashijiaquitempi noncomirejacaapojempi nonquempetapojajempari yaitsitantiguetei aitsitantatsica, aatotarite pitsajiguitsi querocaca noncoraquetantajempaca.

⁴ Cotanquitsiquea ichoocagarantaque aparopae conoconoaiquempiqua Saririshiqui icocani icomajamajajia, quejetacaquea tee incantaitejigueroji iitsaare. Oncoramanitapojajeguetei iriatimpajia inquitsajiaquemparoquea quitamarorimajaca quitsaarentsi, ariqueate noncoquempani nontsipatsipaitanaquempari, icomajamajacatarite itsaromentamajaqueate. ⁵ Taacaguetei tampishitashijiaqueroneca maasanopae coraquetashijiaquerineca inquejejaquempariquea iriatimpajia, incoquempani inquitsaquequemparoquea quitamarocantari quitsaarentsi. Aatoquea noshetsitajiri ivajiro itioncacojiqueriguetei jenoqui paperiqui itioncacotantajiguecaroca ivajiropae maasanopae incoquempanica inchoocaguiteni, manaquea nonquenquetsatacoventaqueri noncanqueriquea Aapani aisa irashivantijitete: Naroguenti ashincari.

⁶ Choocaguetei guempitatanquitsica iintsija inquemeja icantajiaquerica Ishire Aapani Irioshi tsaromentajatsica.

Itioncaciaqueneriquea tsaromentajatsica guintenijatsica Pirarerepiaqui

⁷ “Imaica pintionqueneri irashivantite tsaromentajianaca guintenijatsica Pirarerepiaqui, pincante:

Jeroquea icanqueca iraquea teeca incovaeguishetimatempaji, iriotari Iriomajaca, iriguenti ashincaro iyavine Majirontatsica Taavini. Taaca opajitapae intanarejaque iriatimpa aatoquea yagavejajiti irashijitajero, aisa taaca opajitapae irashitaque aatoquea yagavejajiti intanarejajitajero. Iriatimpa icanti: ⁸ Notsamajaqueroquea maasanopae cameetsaguetatsica pipeacajiacaca. Pameneroja, jero sotomorontsi notanarejaquempiqua, aatoquea yagavejajiti irashitajero. Notsaquempiquea teequea pintampishijiavetempaji, cotanquitsiquea piquemisantajiaqueroquea Noguenquetsatsare pinetsanataquero, aisa teequea pimpashiventacaajiguenaji, tee pincantacotenaji: ‘Tee notsateriji.’ ⁹ Choocaquea oraniqui igapiocane Satanashi. Iriatimpajia iriguentijia tsojenti, icantajiaquetarite: ‘Naroguentijia joriojia’, cotanquitsiquea teequea irio joriojia. Jeroquea oncoramanitapojajeguetei namajiaqueriquea picapiocapinijiacaguetei noguerotacaitsitepariquea pichoocajiaqueguetei aviatimpajia cameetsanijii intsajianaquenijite arimajaca nopintsamajajiquempi. ¹⁰ Patsipetacojiaca pinetsanamajajianaqueroquea nocantajiaquempiqua. Irootaquequea nonquempoguijacotantajiaquempiqua aatonijite patsipemajajatsi oncoramanitapojajeguetei irantsipejiaquempaguetei maasanopae guintenijatsica quepatsiqui iramenantajitaquempari arimajaca itsaromentajiaqueate. ¹¹ Irooshipoji noncoraquepojaje. Quisho poguero

* 3:1 Iraquea tigarancaquerica. Irio Jesoshi tigarancaquerica irirajia jeocanquitsica aisa impoquiropae. † 3:1 jeocajianquitsica. Pamenero otsapa 1.4 ovegaravanapojacaguetei ocamantacotaqueriguetei jeocajianquitsica.

piquemisantaqueca aatoniji yovashiantacaajitimpirotsi, oquejetacotimpitsi iraitsijitaquempiro pamatsaero irojocaquempimeca Aapani Irioshi. ¹² Taacaguetai tampishitashiguequeroneca maasanopae coraquetashijiaquerineca incoquempani inchoocaguiteni iteemporotequi Aapani Irioshi, inquejevetaquemparo omapipoate choocaguitatsica, aatoquea yogajaatsi osamani. Nontioncaquero ivajiro Aapani Irioshi ivancaqui aisa ovajiro iroaqueraro Jerosare, iroguenti guinteninintsi irashimajaca Aapani Irioshi. Iroatimpa manaquea onquenapoje inquitequi Irioshiqui oncoraquetaquequea ocaniqui isaviji. Aisa nonquejetsitemparoquea iroaqueratajatsineca novajiro nontionquitemparoquea ivancaqui.

¹³ Choocaguetai guempitatanquitsica iintsija inquemeja icantajiaquerica Ishire Aapani Irioshi tsaromentajatsica.

Itioncaciaqueneriquea tsaromentajatsica guintenijatsica Iraoriseaqui

¹⁴ “Imaica pintionqueneri irashivantite tsaromentajianaca guintenijatsica Iraoriseaqui, pincante:

Jero icanqueca iriraquea icantajitica ‘Amen’,[‡] icocanitari itampaticamajaqueroquea maasanopae, teequea iramataguempaji. Iriotaquequea pariacaroca maasano ipeacaantantacaca Aapani Irioshi. Imaica icanti: ¹⁵ Notsamajaqueroquea maasanopae pipeacaajiacaca teequea povashiantamajatenaji pitsaromentavequenaguetai, cotanquitsiquea aisa tee pintsaromentamajatenaji. Nonintaveca pintsaromentamajataque-name. Teeguetai pininteji, aato pitsaromentana. ¹⁶ Imaicaquea piquempetaqueroguetai, irootapoji nompishonquempi, irooriiji tee pintsaromentamajatenaji aisa tee povashiantamajatenaji. Manatari intati noncamarancaquempi. ¹⁷ Aviatimpajia picantajiavecaqueate: ‘Naroguenti ajaarantajatsica, nocapiocaequea nashintaguecaca, teequea noncoguitejacotimatempaji’, cotanquitsiquea teequea pamenimajiguempaji aviguentijia shimampoancarari, ishimampoancacojitacaca, aviguentijia coguitejacovaetsica. Aisa manatari pishamponcajashirentavaeque, manaquea cajaratsinoshirentavaequempi. ¹⁸ Irootaquequea noncantantajiaquempica povegaratsitenaro nashincaca naatimpa, naatimpaquea nojocajiaquempironijite oorumajaca itajaiqueca paamariqui osaancorencantamajatanacaca, pajaarantamajamentanaquempaniji. Aisa povegaratenajate naatimpa nojocajiaquempiroquea quitamaromorenari quitsaarentsi pinquitsaajiaquempica aatonijite pipashiventacajaijarotsi pigajaratsinore. Aisa povegaratenajate naatimpa, nojocajiaquempiroquea aavintajarontsi paavintajatacaantantajiajempaca cameetsaniji pamentanajeniji.

¹⁹ Iriraquea nopintsamajajiacaca noncantantajiaqueri cameetsaniji intsaromentantamajatanaqueca. Noncantantajiaquempica pishimampoancajiguempaja pamenajiaqueguetai picovaeguishejiaca, pincantashitajianajempajate pincoquempani pintsaromentamajatanaqueca. ²⁰ Pameneja. Nociatipojaca sotorontsiqui notinquiapojaquero nocajemacotapojimpi. Quericaca quemavaquenaneca iroompaquea intanarejacotsitenaqueate, nonquijanaquequea nontsipatapojempari noshecajiaquempa.

²¹ Taacaguetai tampishitashijiaqueroneca maasanopae coraquetashijiaquerineca nontsipatsipaitanaquempari jenoqui noguisavisaviitaqueriquea irisenampijajiaquea nomajirontamentoqui. Inquempemajajiaqueate naatimpa notampishitashiguetai roguetai maasanopae, jero iriraquea Aapani yoguisavicantaquenaca nosenampijantacarica imajirontamentoqui.

²² Choocaguetai guempitatanquitsica iintsija inquemeja icantajiaquerica Ishire Aapani Irioshi tsaromentajatsica.”

4

Ishineventamajajicari Aapani Irioshi inquitequi

[‡] 3:14 Amen. “Amen” ocanque “arimaja” aisa “ari oncoquempa”. Acaniqui iroguenti otsipa ivajiro Quirishito, ocanque “Iriomajaca”, itampaticamajaquerotari maasano icanqueca.

¹ Iroompaquea namenavetaja namenitsitaroquee ashitacoronsi tanarejamoroca inquitequi. Noquemitsitariquee aisa quenquetsatacaaqueenaca incajaraanquitica iririjencavaequequee icanca quempejencavaeca tivorentsi, icanquena: “Caacate ocaniqui jenoqui nonigaaguequempiroqueate queroca oncoguetanaquempani oncoramanitapojajegueti.”

² Irooquee iteroncaquerogueti iquenquetsatacaaqueagueti, iriraquee Ishire Aapani Irioshi yaashirentavaetanaqueaqueate inquitequi. Namenitsitaroqueate imajirontamento isavicantacaca Majirontatsica ariquea ochoocaque oraniqui, ichoocaque savicantacaroca. ³ Iriatimpa itsirencavaeque icanca quempevaeca mapi tsirencapiri pajitatsica jaashipe aisa otsipa mapi quityoncapiri pajitatsica coronarina. Chooqa anquirivogaacaroca isavicantacaca, manaquee oquejevecari yogue tsirencavaeque quempevaeca otsirenquigueti janapiri pajitatsica esemerarera. ⁴ Aisa namenaguequeroquee otsipapae 24 majirontamentontsipae. Manaquee anquitsaetacocaroea isavicantacaca Majirontatsica. Isavisaviitantacaroea 24 iramajiroreja quitamarocantavaequequee iitsaare. Yamatsaejiaqueri amatsaeronsi ipeacaantantajitarica ooro. ⁵ Oraquee imajirontamento isavicantantacaca Majirontatsica otimemecantapinicaroea careti ocantapinique timemec timemec, aisa ocantavaetaquiti serororon serororon tsijec tsijec. Aisa ochoocaque osamimicaguetaque 7 tsivorentsi, ocantacoqueri irirajia 7 jeocajianquitsica* irashi Aapani Irioshi. ⁶ Ariquea ochoocaque aisa oraniqui quempevecaroca incajare saancorenjavaeque, quempetaca potirinaqui, otampaticatacotacaroma jirontamentontsi.

Oraquee isavicantacaca Majirontatsica yanquitsaetacojiacaroma 4 anijaripae, yoquijaquijaavaeca iroquijapae ochoocaguetaque ineguiqui aisa itaquiqui. ⁷ Aparoma manaquee iquempetacari león.† Iriraquee itsipa manaquee iquempetacari caapironcaari iriaqueraca quimogantirenajaniquitantsica. Iriraquee trestapojatsica caquintevorovaetaque. Iriraquee itsipatapojatsica manaquee iquempetacari shirompito icantashivanquitigueti iraregueti. ⁸ Irirajia 4 anijaripae maasano ochoocaguetaque 6 ishivanquipae, ocaravaetaquequee iroquija yoquijaquijaatsinovaeca maasanopae aisa itapinashivanquipaequi. Icantacoguitani savincaguiteriqui aisa pitsecariqui teequee incarajigueji icantajiaque: “¡Iriomajaca, Iriomajaca, Iriomajaca Nomajirote Aapani Irioshi Agavejamajatatsica! Icoquitantiquea ichoocaguitini coramani, chooca imaica, ari incoguitempani inchoocaguiteni.”

⁹ Ari iquempepinijiaa ishineventajiacari irira savicanquitsica imajirontamentoqui, icoguitanitari ichoocatini coramani aisa incoguitempani inchoocaguiteni. Icanqueriquea: “Arioteesaa, poganejencamajataca.” ¹⁰ Ariquea icantajiaquegueti imaica, irirajiaquee 24 iramajiroreja ariqueate icohicoitanaca iguerogueroventajianacari savicapinitatsica imajirontamentoqui itsaroventajianacari, iriguentitari Majirontamajatatsica choocaguitatsica, incoguitempani inchoocaguiteni. Yamatsaerejitsitaro iramatsaerojia yojoquijijiaqueneri icaraguititapojaquegueti, icantajiguiri:

¹¹ “Nomajirote Aapani Irioshi, caaviji poganejencamajataca, ocameetsatantacaca noshineventajiaquempi, ochoocagueterite poganejencare, Pirioshimajati, aisa caaviji pagavejamajati. Aviguentitarite peacaaguetaacaroma maasanopae choocaguetaatsica, Aviguentiquea nintanquitsi pipeacaantantaguecarica, irotaquequee ichoocatantajiacaca.”

5

Paperi ampinaicanquitsica aisa Ovejajaniqui

¹ Ariqueate nameniroquee paperi ampinaicanquitsica otioncaca mavisotate. Iriraquee savicanquitsica imajirontamentoqui manaquee yajirincaro itincamijempequiqui. Ochoocaque 7 ovinchajacore otsinetacotantacaca iseyotacotantajicaroca aatonijite yampinaicarejajitirotsi. ² Iroompaquea nameniri irashivantite Aapani Irioshi caaviji

* 4:5 jeocajianquitsica. Pamenero otsapa 1.4 ovegaravanapojacagueti ocamantacotaquerigueti jeocajianquitsica.

† 4:7 Irira león iquejevecari casecari. Pamenero itsavetacojiquerigueti león isavivanaqui otsapaqui 5.5 aisa 10.3.

yagavejamajati. Icajemaquequea iririjencani icanti: “¿Queri caavijica yanaaque yoganejencavaeca intsinecarejacoguequeronijite ovinchajacoseyote paperi irampinaicarejaqueroniji?”³ Cotanquitsiquea teequea inchoocateji agavejanquitsineca intsinecarejacotaqueroquea irampinaicarejaqueroquea iramenavanquero. Teequea iragavejajiguempaji choocajiatsica inquitequi aisa quepatsipaequitica iriguentijica aisa choocajianquitsica isavipatsaqui.⁴ Niraitsitanacaquea niraaguitani namenaquegueti teequea inchoocimateji aparo cameetsamajatatsica cameetsaniji iragavejaqueroniji irampinaicarejaqueroquea iramenavanqueroquea.⁵ Cotanquitsiquea iquenquetsatacanaa quea aparo iramajirore icanti: “Aatotarite piragatsi. Pamenerija iriratica León* ichoviquitanaqueca Joraani, aisa iriguenti ichoviquitanaqueca Taavini. Yanaajiaqueriquea maasano. Iriguentiquea agavejamajatatsica. Iriatimpa iragavejaque intsinecarejacoguequeroqueate⁷ ovinchajacoseyote irampinaicarejaqueroquea.”

⁶ Iroompaquea nameniri Ovejajaniqui icatiaca oniganquirequi majirontamentontsiqui yanquitsaetacari irirajia 4 anijaripae aisa iramajiroreja Majirontatsica. Conijavaequequea isatajajitaquerigueti imetojajivecarigueti. Ochooqueue ocarataque⁷ ivaa, oraqueue iroquija 7. Oraqueue⁷ iroquija iroguenti ocantacoque irirajia 7 jeocajianquitsica[†] irashi Aapani Irioshi itigarancajiaqueca intsitacaguitejavaetanaqueroqueate quepatsi.⁷ Ariqueate iriraqueue Ovejajaniqui yoanaque yaitsitaroqueue paperi yajiricaqueca Majirontatsica itincamijempequiqui isavicaquegueti imajirontamentoqui.⁸ Irooqueue yajiricaquitiguiro ariqueue iquempejianaca irirajia 4 anijaripae aisa irirajia 24 iramajiroreja Majirontatsica igueroventajianacari Ovejajaniqui. Aparopae yajirijiriitaque itencatsajitica icantajitica aarepa aisa taso ipeacaajitica cavorejari ooro tseraiquivaeca casancapaneri itajaitica. Oraqueue casancapaneri iroguenti oncantacoque icantajiaqueca tsariventajiacarica Aapani Irioshi iramanajiaquerigueti.⁹ Yamashajiaquequea iroaque-raro amashairentsi icantajiaque:

“Caaviji poganejencamajataca pagavejantacaca pajiricancaroca paperi,
aisa pintsinecarejacotantaquemparo ovinchajacoseyote iseyotacotantajicaroca.
Imetojajitaquempitari ochovivincajatanaque piriraja,
irootaquequea pivegaratantajiacari caquinteja pimeshijiaqueca irashintajajem-
parinijite Aapani Irioshi.

Pimeshiagarantajiaqueriquea maasanopae caquinteguetatsica, gonorontava-
caaguetatsica, cantashitatiaguetatsica iguenquetsatsareja, aisa guintenigueta-
tica quepatsipaequi.

¹⁰ Pipeacajaiacari majirontaguetatsica, aisa pipeacajaiacari saseroroteja cameetsaniji
irantaqueneriniji Aapani Irioshi.
Iriguentijia majirontanquitsine quepatsiqui.”

¹¹ Iroompaquea namenajiguiri irashivantijitete Aapani Irioshi itirorencajianaca
icaramirincavaeque jmm ontaniqui, yanquitsaecari irirajia anijaripae aisa iramajiroreja
Majirontatsica. Noquemajiaqueri iquenquetsajiaquegueti.¹² Iririjencavaeque icantaji-
aque:

“Caaviji yoganejencamajataca irira Ovejajaniqui imetojajivecaca,
ocameetsatantacaca ochooqueue iragavejane, ochooqueue maasano yashintavaetacaca,
ochooqueue itsamajare, itampishire, iroganejencare,
itsariventajitari, ishineventajitari icantajitiri: ‘¡Caaviji poganejencamajataca!’ ”

¹³ Iroompaquea noquemajiaqueri maasano choocajiatsica inquitequi, quepatsiqui,
isavipatsaqui, inirojaniqui quantijani, maasano icantajiaque:

“Jaameja ashineventajiaquempari savicanquitsica imajirontamentoqui aisa Oveja-
janiqui,
ancantajiaqueri iriguentijia caaviji yoganejencamajataca, aisa yagavejamajati.
Ancoguitempanijate anquempetaquempaquea imaica.”

* 5:5 León. Irira león iquejevecari casecari, cotanquitsi ichooqueue otsipaqui guinteninintsi, quejecaroca Africaqui aisa Ishiraeriqui. Yanaaqueri itsipapae tomirishiquitica icovejencatigueti, irootaque icantantajitacarica covejencamajatatsica imajirote tomirishipaequitica. † 5:6 jeocajianquitsica. Pamenero otsapa 1.4 ovegaravanapojacagueti ocamantacotaquerigueti jeocajianquitsica.

¹⁴ Iriraquea 4 anijaripae icantajiaque: “¡Ari ancoquempanijate!” Iroompaquea iriraquea 24 iramajirorejia Majirontatsica Anijaguitatsica igueroqueroventanacari itsarotentajanacari.

6

Itsinecarejacaqueroquea paperi ampinaicanquitsica

¹ Iroompaquea nameniri Ovejajaniqui itsinecarejaquero aparo ovinchajacore iseyotacotantajivecaroca paperi ampinaicanquitsica, aisa noquemiriquea aparo anijari iririjencavaeque icanca quempejencavaeca careti, icanti: “¡Caacatejate!”* ² Namenitanaca iriguentimpa quitavaireri quitamarori. Iriraquea shiacotantacarica yajiricaque iveane. Ariquea yojocajiqueneri amatsaerontsi iramatsaetaquempauea. Teequea inchoocati-mateji agavejaquerineca. Iroompaquea yoanaque irashimirintaquempaueate iragavejantaqueuea.

³ Ariquea iquempetsitajaro Ovejajaniqui otsipa ovinchajacore iseyotacotantajivecaroca, itsinecarejaquero mavitetapojatsica, iroompaquea noquemiriquea itsipa anijari icanque: “¡Caacatejate!” ⁴ Ariquea isotoapojaque itsipa quitavaireri, iquityoncavaeque icanca. Iriraquea shiacotantacarica manaquea icantajiqueri iroanaque-quea quepatsiqui irooqueate ompampiatantanaquemparoquea incatsimatavacaantajiaquempaca maasano, irimetojavacaajiaquempaueate. Ariqueate yojocajiqueneri catsantsameniri tsaampitsantsameniri.

⁵ Iroompaquea iquempetsitajaro Ovejajaniqui otsipa ovinchajacoseyote, itsinecarejaquero trestapojatsica, ariquee noquemiriquea iquenquetsatanaque trestapojatsica anijari icanque: “¡Caacatejate!” Namenitanaca iriguentimpa quitavaireri quisaatsantsavaeque icanca. Iriraquea shiacotantacarica yajiricaquero itsatantajitaroca otenare. ⁶ Noquemiquea iquenquetsajencajitanaque ichoocajiaquegueti irirajia 4 anijaripae icantajiaque: “Apatacoro shovao tirigoitsoqui ovegaravaeca aparo tenario,† ariquee oquejetaca trestaco shovao sevaraitsoqui, ovegaravaeca aparo tenario. Iriraquea ashiti aisa vinoja, shooshoh pipomatsatirotsishiatsi.”

⁷ Ariqueate iquempetsitajaro Ovejajaniqui otsipa ovinchajacoseyote, itsinecarejaquero cuatrotapojatsica, ariqueate noquemiriquea iquenquetsatanaque cuatrotapojatsica anijari icanque: “¡Caacatejate!” ⁸ Namenitanaca iriguentimpa quitavaireri quiteshivaari icanca. Iriraquea shiacotantacarica ipajita Metojagantsi. Yoguijatapojiri itsipa pajitatsica Areshi.‡ Yagavejacaajiqueri irimetojajiaqueri oshequini quepatsipaequitica incaratacaavaequeri 1/4. Inconoagarantajiaquempauea irimetojantajiquempari tsaampitsantsameniriqui, itsipapae manaquea ometojagarantajianaqueriquea itase, itsipapae manaquea ometojagarantajianaqueriquea irojoquijire, itsipapae irioqueate metojagarantajiaquerine tomirishipaequitica catsimaguetatsica.

⁹ Iroompaquea iquempetsitajaro Ovejajaniqui otsipa ovinchajacoseyote iseyotacotantajivecaroca, itsinecarejaquero cincotapojatsica, ariquee namenaqueroquea aretare. Oraqueate otapinaqui namenajiaqueri ishirepae imetojimentajitaqueca Iguenquetsatsare Aapani Irioshi aisa itsavetantajiaquerigueti. ¹⁰ Iriatimpajia icajemajianaque icantajiaque: “Intsiquetiroshia Majirontamajatatsica Comajarimajaca Iriomajatatsica, ¿queroshiatsi oncaravaeteni pompetacovaetajenani pincatsimajiajari guintenijiatsica quepatsiqui metojajiaquevenaca?” ¹¹ Iriatimpa yojocajiaqueneri quitamarocantari quitsarentsi, iroompaquea icantajiguiri: “Poguijacojiguempataja, choocatarite papiaajanirentsiate papitsarotentarijiate quempejiaquempineca aviatimpajia, irimetojimentajiaqueriquea intsavetacotantajiaquenagueti. Oraquea inquempetacajitajemparigueti iriatimpajia, ariquee nompetaotsijiguempiqueate.”

* 6:1 Oconoaca paperi iroquetinica iguenquetsatsarequi guiriego otioncaca acaniqui: “¡Caacatejate pamenejate!” Otsipapae mana otioncaca: “¡Caacatejate!” Ari oquejetaca otsapauqui 3, 5, 7 otioncacagueti: “¡Caacatejate!” † 6:6 tenario. Iriraquea tenario iriguenti imentaqui yaancaca ishiacoquegueti icantacoguitani apajencaro savincaguiteri. Tee onchoocamajatajeji isheca, irootaqueuea ovegaravaetantacaca choocatajatsica. ‡ 6:8 Areshi. Oraquea Areshi iroguenti ichoocajiaquegueti metojatsica tequeratagueti impishoncajiteriji camorecariqui. Irira guiriego icanquero hades, iguenquetsatsarequi evereo icanquero sheol.

¹² Ariqueate namenaqueri Ovejaniqui iquempetsitajaro otsipa ovinchajacoseyote, itsinecarejaquero seistapojatsica, ariquee ocotanaca omoguemamajatatiguinimaja. Ariquee icotanaca catsirincaiferi icamaramentatanaque iquempetanacaroquea quitsaarentsi ipeacaajitaca caaveramae camaramaevaetatsica. Iriraquea taai iquityoncamentatanaque iquempetanacaroquea irajantsi. ¹³ Iriraqueate impoquiropae inquitequitica yasacaraaguetanacaquea quepatsiqui iquempetanacaroquea osacoroguitigueti iguera irooshivetapojacagueti agaguijempame onincacoguetirogueti inirojenca choviga. ¹⁴ Oraquea inquite jac opeaca oquempetanacaroquea yampinaicajitirogueti paperi. Oraquea maasano otsempipae aisa ovogorepae ogaaguetanaca. ¹⁵ Ariquee ishiashiaitanaca maasano majirontaguetatsica, jeri aisa imajirojiate coaretajia, aisa jivajivaitatsica, ashintavaejatsica, agavejavaetatsica, yashintajitaca, jeri aisa teeca irashintajitempariji. Ishiashiaitanacaquea maasano caquinteja, yaventaivaivanacaroquea omoroguetacagueti quepatsi aisa imperitamoropaequi aisa mapichonquiinapae otsempipaequi. ¹⁶ Iquenquetsajianaque icantajiguero otsempipae aisa mapipae: “¡Poaviotacotenashiatsi pintsititacojiaquea aatoniji yamenajajanatsi Majirontamajatsica savicanquitsica imajirontamentoqui, aisa aatoniji icatsimacatsimaitana Ovejaniqui! ¹⁷ Arejetapojacatarite savincaguiteri incatsimatantajiaqueate. ¿Queriscampate agavejanquitsineca intampishitashivaetavaquero?”

7

Iseyovancatsitantajitari ivajiroqui Aapani Irioshi 144,000 ichoviquijianaqueca Ishiraerini

¹ Iroompaquea namenajiaqueri 4 irashivantijitete Aapani Irioshi aparopae icatiague-tacaquea ocaratapojigueti quepatsi osotoajencaguetigueti chovigapae. Yojocajencatavaqueroquea aatoniji ochovigajencatajitsi quepatsiqui, aisa inirojaniqui quantijani, irooca aisa inchatopaequi. ² Ariquee nameniri itsipa irashivantite Aapani Irioshi iquenapojaque isotoguigueti catsirincaiferi yajiricapojaqueroquea iseyone* Aapani Irioshi anijatsica. Iriatimpa icajemacojiapojaqueri irirajia 4 irashivantijitete Aapani Irioshi yagavejacaajiqueca incantashitatiaguishevaqueroquea quepatsi aisa inirojani quantijani, icantajiguiri: ³ “Aatotashiatsi queroca picojiguirotsi quepatsi, aisa inirojanipae quantijani, aisa inchatopae, tequeratanica aseyoterinica irajaanirejia Aapani Irioshi ivancapaequi.”

⁴ Iroompaquea noquemiquea iquenquetsatacojiaqueriquea ichoviquiguetaqueca Ishiraerini seyojianquitsica ivancapaequi, icarajiaquequea 144,000 ichoviquiguetaqueca maasano irijanijiate Ishiraerini. Itsajiqueri iquempetacaajicari imaica:

⁵ Iriraquea ichoviquijiani Joraani icarajiaque 12,000.

Iriraquea irashijia Iroveneni icarajiaque 12,000.

Iriraquea irashijia Gareneni icarajiaque 12,000.

⁶ Iriraquea irashijia Ashereni icarajiaque 12,000.

Iriraquea irashijia Nepetarini icarajiaque 12,000.

Iriraquea irashijia Manaseshini icarajiaque 12,000.

⁷ Iriraquea irashijia Shimeoneni icarajiaque 12,000.

Iriraquea irashijia Irevini icarajiaque 12,000.

Iriraquea irashijia Isacareneni icarajiaque 12,000.

⁸ Iriraquea irashijia Savorooneni icarajiaque 12,000.

Iriraquea irashijia Joseni icarajiaque 12,000.

Iriraquea irashijia Vejamineni icarajiaque 12,000.

Quitsaajianquitsica quitamarocantari quitsaarentsi

* 7:2 iseyone Aapani Irioshi. Iroguentiquea itioncacotantajicaroca ivajiro Aapani Irioshi aisa ivajiro Ovejaniqui ivancapaequi yashintajiacaca. Pamenero 14.1 aisa 9.4.

⁹ Iroompaquea namenavetanaca namenitsitari itsipapae caquinteja icaramirincaji-
aque jmm. Iquenaquenaivaepoji osamanipaequi maasano quepatsipaequi, iconoagaran-
tajiaca maasano gonorontavacaaguetatsica, maasanopae caquinteguetatsica, ocan-
tashitatiaguetacaquea iguenquetsatsarepae. Maasanomaja quenquetsatsarensipae
chooca quenquetsatantacaroca. Iriatimpajia icatintiitimojiacari Ovejajaniqui aisa Aa-
pani Irioshi savicanquitsica imajirontamentoqui. ¡Itiorencaventajianacari icaramirin-
cavaeque jmm! Teequeate iragavejajitajeriji intsajitajeriji. Ijamirincavaeque quitsaaji-
aca quitamarocantari quitsaarentsi ajirijiriijiaquequea tsorenashi. ¹⁰ Ijamirincavaeque
icajemajiaque icantajiaque:

“¡Iriguenti aavajajica Arioshite
savicanquitsica imajirontamentoqui,
aisa Ovejajaniqui!”

¹¹ Maasano irashivantijitete Aapani Irioshi icatintiitacaquea yanquitsaetacotsitacari
imajirontamento, aisa iramajiroreja, jeri aisa 4 anijaripae. Maasano iriatimpajia
itigueroanaca irosati yarejevaequita ivancaqui isavi, itsaromentajiacari Aapani Irioshi,
¹² icantajiaque:

“¡Arimajaguitatsi!

Ancoquempani ashineventaguitemparini Arioshite, ancantaguiteriniquea: Caaviji
Pirioshimajati.

Aviguenti caaviji pitsamajati.

Incantajiaquempi maasano, ‘¡Arioteesaa! Caaviji picavintsajantamajatanti’, aisa
intsaromentanaquempi.

Aviguenti caaviji pagavejamajati, aisa aviguenti caaviji pitampishimajati.

¡Oncoguitempaniquea onquempetaquempaquea imaica!

¡Arimajaguitatsi!”

¹³ Ariqueate icanquena aparo iramajirore Aapani Irioshi: “¿Taa ipaji irirajia quitsaa-
jianquitsica quitamarocantari quitsaarentsi? ¿Queroquea iquenaquenaipojini?”

¹⁴ Naatimpa nocantiri: “Avirompate, nomajirote, pitsaquero aviatimpa.”

Iriatimpa icantana: “Iriguentijia sotoamposaroca omajirojencare atsipevaetagantsi,
iroguenti yajacantajitacaroquea iitsaare irirajia Ovejajaniqui, oquitamarocantanta-
nacaca.

¹⁵ Irootaquequea icatintiitomotantacarica Aapani Irioshi isavicaquegueti imajironta-
mentoqui,
incoquempaniquea irantajigueneriquea oraniqui itemporotequi savincaguiteri qui aisa
pitsecariqui.

Iriraquea savicanquitsica imajirontamentoqui irinetsanatsitenempari intinerenquit-
sitenempariquea iitsaarevanco.†

¹⁶ Aatoquea yatsipevaetajarotsi itase,

aatoquea imirejiajitsi,

aatoquea icatsirincatajiritsi catsirincaiteri,

aatoquea yatsipejajarotsi catsirincaguiteri.

¹⁷ Incoguitempani inquempajiaquempa imaica iroorijite inquempoguijajiaqueriquea
Ovejajaniqui choocatantacaroca oniganquirequi imajirontamentoqui Aapani
Irioshi.

Iramenajiaqueri inquempetacaajiaquempari inquempoguijajitiriguetei oveja, irajiana-
queri omotojatiguetei oja anijacaantantatsica.

Iriraquea Aapani Irioshi irisheoquijajeneriquea maasano ijaquija, aatoquea
ijaquitajitsi.”

8

Sietetapojatsica ovinchajacoseyote paperi

† 7:15 intinerenquitsitenempariquea iitsaarevanco. Irooquea oncanque incoquempani intsipatsipaitaquempari
inquempoguijimenqueriniji aatonijite taaca oahoitiritsi.

¹ Ariquea irooquee iquempetsitajaroquee Ovejajaniqui itsinecarejaquero sietetapojatsica ovinchajacoseyote otsinetacotantacaca paperi, ariquee icohicoitanaca imajerejianaque maasano inquitequitica yarejetacovaetapojaca niganqui hora. ² Iroompaquee namenajiaqueri 7 irashivantijitete Aapani Irioshi icatintiitimojiacariquee iriatimpa, aparopae yojocajiqueneriquea tivorentsi. ³ Iroompaquee icoraquetapojaque itsipa irashivantite Aapani Irioshi, yamaque yoguijaantajitaroca casancajencaro ipeacaajitaca ooro, icatiimotapojacaroquee aretare ipeacaajitaca aisa ooro. Yojocajiqueneri oshequi casancajencaro intaashiquerica Aapani Irioshi onconoajencatanaquemparoquea icantajiaqueca igomajamajare yamanajiguirigueti. Itaantsitaroquea aretarequi tampaticatacotaqueroca imajirontamento Aapani Irioshi. ⁴ Oraquee ovoga casancajencaro yajiricacotaqueca ashivanti ojajencavogavaequequea ocantajencavaetanaca ichoocaquegueti Aapani Irioshi, oconoajencatanacaroquee icantajiaqueca igomajamajare yamanajiguirigueti. ⁵ Ariqueate iriraquee irashivantite Aapani Irioshi yaanaque paamarimenqui choocatanquitsica aretarequi yoguijaaqueroquee yoguijaantajitaroca casancajencaro yajiricaqueca. Irooquee itseraiquitaquitiguiro ipishoncaquitiro quepatsiqui, ariqueate ocotanaca careti ocantavaetaquiti tsijec tsijec, serororo serororo, otsantsajencatsarenavaetanaque, aisa omoguecaguetanacaquee.

Itivojiqueroquee tivorentsi

⁶ Iriraquee 7 irashivantijitete Aapani Irioshi ajiricajianquitsica itivorepae inetsanajianaca intivojianaquequee.

⁷ Iroompaquee ijivatanaque aparo ashivanti itivotaque, ariqueate ocotanaca oparianaque incojariqui quepatsiqui otsipatanacaro paamari oconoapojaro irajantsi. Otaagarantsitaroquea quepatsi irootapoji oncaratacaaquerome niganqui, ocaratacaaquerotari 1/3. Otaagarantsitaroquea inchatopae ocaratacaaquero 1/3, aisa maasanopae etsocoreshipae cataroshipae apevoquijamajaquero.

⁸ Ariqueate itivotaque ashivanti mavitetapojanquitsica, ipishoncajajiqueroquee inirojaniqui quantijani taaca opaji quempetacaquee inirotsempi, osamimicatsantsajencavaetanaquequee. Ariqueate ocotanaca inirojani quantijani opeagarantanacaquee irajantsi irootapoji oncaratacaaquerome niganqui. ⁹ Imetojagarantajianaque guintenitajiacaroca ocaratacaavaequeri 1/3. Otsitijaagarantaguetanaquequee inirotsantsanapae quenajarontsipae ocaratacaaquero 1/3.

¹⁰ Iroompaquee itivotaque ashivanti trestapojanquitsica, ariqueate ocotanaca yomposanaca caramenquivaetanquitsica impoquiro, iquenaetaepoji inquitequi imorecatsantsajencavaetanaquequee, yomposapojaca ojaaquipaequi aisa osotoajaguetigueti oja, yoaviojatapojaro ocaratacaaquero 1/3 ojaaquipae. ¹¹ Iriraquee impoquiro ipajitaca Quepishiri, iquepishijaagarantaguetapojajiroquee ojaaquipaequi ocaratacaaquero 1/3. Imetojantajiacaca icaramirincajiaque caquinteja imirajiacarogueti quepishijatanquitsica oja.

¹² Ariqueate itivotaque ashivanti cuatrotapojanquitsica, ipitsecanampitanaque cat-sirincaiteri, irootapojatsi impitsecanaque niganqui, teequee irivoreamajatajempaji. Ariquee iquempetaca taai ipitsecanampitanaque iriatimpa, irootapojatsi impitsecanaque niganqui, teequee inquitasemajatajeji. Aisa impoquiropae ipitsecagarantanaque icaravaeque 1/3. Osavincaguitevetamanaca icononcavetanajatiga opitsequitsitanaja. Teequee inquitaseteji taai, tee inquitamiriaquiteji impoquiropae. Pajini onianquittete iquitasepoji irira taai, iriraquee impoquiropae iquitamiriaquitapoji.

¹³ Namenitsita iriguentimpa shirompito caramantaneivaeque icanca yaranaque iseontavaetanacaquee jenoqui icajemanaquequee icanque: “¡Ooo, ooo, ooo, imaicanishiatsi irantsipevaetempanishiatsi maasano guintenijiatsica quepatsiqui intivojianaquegueti itsipa tres irashivantijitete Aapani Irioshi tequerataca intivoteji!”

9

¹ Iroompaquee itivotsita ashivanti cincotapojatsica, nameniri itsipa impoquiro iquenaetaepoji inquitequi yomposapojaro quepatsi. Yojocajiqueneri yavi iriyavirejanquemparoca oamorovaetanquitsica jmm isaviji ovenaroncapojacagueti. ² Iroompaquee

irooquee iyavirejacotaquitiguiro ariquea ocotanaca ocaravogavaetanaquequea paamarivoga ooshiatsi oquisaaajencatacanaaqueriquea catsirincaiteri opitsecajencavaetanaquequea. ³ Iroompaquea nameniri quejevecarica tsinari iquenaquenaitantapojacaro paamarivogajenca iporocajencavaetanaque itsitacaguitejavaetanacaroquea quepatsi. Yagavejacaajiguequeriquea iroantaquegueti inquempetaquempariquea yoantigueti oseroticona. ⁴ Icantimentajitaqueri aato yantaguetiro cataroshipae quepatsiquitica, inchatoshimpopae, maasano tsoroaguetanquitsica. Iriguentiquea irantsipetacaajiquempa caquinteguetatsica teeca iriseyotantemparoji ivajiro Aapani Irioshi ivancaqui. ⁵ Cotanquitsiquea icantimentajitaqueri irimetojajigueri, manaquea irantsipetacaajiquempari 5 taai. Oraquea iroaquerigueti incatsivaequeriquea quempetaca yoantigueti oseroticona. ⁶ Irirajia caquinteja intsataitavetempa iroguijacoveguitempani irimetojitempame, cotanquitsiquea aatoquea imetojajiguetsi. Irinintamajajiavequempaqueea irimetojajianaqueme, cotanquitsiquea aato imetojitsi.

⁷ Iriiraquea tsinari quejevaeca quitavaireri inetsanajiguirigueti irooshitegueti iroaroaitanaque irashimirintaquempagueti. Yamatsaejiaca iguitojiaqui quempetaca amatsaerontsi ipeacaajitaca ooro. Oraquea ivoro quempetaca ivoro caquinte. ⁸ Ochoocaque imae ontiavenaavaeca oquempetacaroquea omae manquigarentsi. Oraqueate iraji quempetacaqueate iraji casecari. ⁹ Isavoneguitaca quishori quejecaroca yero. Oraqueate yarajiaquegueti opojimavaeque ivanqui quempevaeca opojimavaetigueti itigaritacotantajiguetaacaca ishiacaacarogueti quitavaireri yoayoaitigueti irashimirintavacaajiguempagueti coaretajia. ¹⁰ Ochoocaguetaque igojapae ochoocatantacaca itseji quempeca itseji oseroticona. Oraquea itseji irootaque irantsipetacaantajiaquemparica caquinte 5 taai. ¹¹ Chooa imajirojiate, ashivantiniro inavetaca, iriotaquequea imajirojiate maasano choocajanquitsica oamorovaetanaquegueti isaviji. Manaquea ipajica iguenquetsatsarequi evereo Avaroni, oraquea iguenquetsatsarequi guiriegojia ipajica Aporioni.*

¹² Jac teroncanaca iroquetica atsipevaetagantsi icantacotsitacaca “¡Ooo!”, cotanquitsiquea choocatiraja mavitetiraja icantacotsitacaca “¡Ooo!”

¹³ Iroompaquea itivotaque ashivanti seistapojatsica, noquemiroquea iquenquetsajencajitanaque osotoajencatantapojacaro ovaapae aretare choocatatsica Aapaniqui Irioshiqui ipeacaajitaca ooro. ¹⁴ Icantajitiri ashivanti seistatsica ajiricaqueroca tivorentsi: “Poanaque pishiticarejacojiaquiteri irira 4 ashivantijite shiticacojianquitsica ontaniqui ojaaquiniqui pajitatsica Eoperateshi.” ¹⁵ Irooqueea iquemavaquegueti yoanaquequea ishiticarejacojiaqueri cameetsanijite interoncagarantajiaquiteriniji caquinteja quepatsipaequitica incaratacaavaequeri 1/3, iriguentijiatari inintacaajiaqueca Aapani Irioshi interoncagarantajiaqueri. Iriatimpa itsatsivaetanitari coramani queroca aantapojempaca. Itsaque queroca ajagantsini, querica taai, queroca savincaguiteri, aisa querocagueti incarateni catsirincaiteri. ¹⁶ Iroompaquea noquemiriquea itsajitiri coaretajia shiacojiaquerica iguitavairerite, maasano icaramirin-cavaeque 200,000,000.

¹⁷ Irirajia quitavaireri aisa shiacotantajiacarica nonejaqueca quejetaca noguimaanequi, ari iquejejiaca imaica: Maasano isavoneguijiacaro quishori, ocantashitatiaguecaqueate oquityoncataquequea quejetaca paamari, otsipaquei oquisaaque, otsipaquei oquiteritaque quejetaca asopiri. Oraquea iguito quitavaireri quempevaeca iguito casecari. Osotoavagantetapojiri omorecare paamari aisa ovogajenca, oconoapojaro asopiri. ¹⁸ Imetojagarantajianaquequea caquinteja ocaratacaavaequeri 1/3, ometojajianaqueriquea maasanopae sotoajencatanquitsica ivagantequi quitavaireri: omorecare paamari, paamarivoga aisa asopiri. ¹⁹ Oraquea yagavejantajiacaca quitavaireri teequea aparo onchoocateji ivagantequi, ochoocatsitaquea aisa igojaqui, oquempevecari camaarini, iroguenti ityantya yoantajigarica caquinteja yatsipetacaantajigarica.

²⁰ Cotanquitsiquea iriraquea choocatajatsica tequerataca irimetojajigueji teequea incantashitatijaguempaji impishoncajigueroji ipeacaaguishejiacaca. Arimpaqueate itsaromentavaetanacari ampatsinipae aisa itsipapae ipeaguetica irioshivijitashitacaca

* 9:11 Avaroni aisa Aporioni. Mavite oncanque Jararejantaguetatsica.

ipeacaajitaca ooro, perata, voronquise, mapi aisa inchato—irirapae teeca irameni-majigueji aisa teeca inquemajigueji, aisa teeca iranijajigueji. ²¹ Iroompaquea aisa teequeate impishoncajigueroji imetojantajiguigueti, imatsitantajiguigueti, icantatsa-tantajiguigueti, aisa yaitsitantajiguigueti.

10

Ashivanti ajiricaquero ca paperijaniqui ampinaicanquitsica

¹ Iroompaquea namenitsitariquea itsipa ashivanti tampishivaetatsica, iquenapoji inquitequi, yaguijitaipojaquequea. Anquirivogaacotacariquea mararo, ari ichooacaqueri yogue iguitoqui. Oraquea ivoro oquempevetacari catsirincaiteri. Oraquea iguitiqui quempevetaca catsantsamorecari. ² Iroguenti yajiricaque paperijaniqui ampinaicarejaca. Oraqueate iguiti itincamijempequiquitica icatiantacaroquea inirojani quentijani. Irooquea ishinampijempequiquitica manaquea icatiantacaro quepatsi. ³ Iroompaquea icajemitsimajatanaca iririjencani icanca, iquempejencavecari león* icajemiguete. Irooquea icajemaquitigui ariquea ocojencatanaca oseroroncaguetanaquequea caretiguetanaquequea 7 careti, opojimajencavaetanacaquea inirojencavaetanaca ocanca. ⁴ Iroomequea nontioncacotavaqueromequeate ocantajiaqueca careti, cotanquitsiquea noquemiriquea iquenquetsatacaajitaquenaquea inquitequi icantajitana: “Aatoja pitioncacotirotsi ocantajiaqueca oratica 7 caretipae, aisa aatoquea querica picantitsi.”

⁵ Iroompaquea iriraquea irashivantite Aapani Irioshi namenaqueca incajaranqui catiancaroca inirojani quentijani aisa quepatsi icantajempequitanaqueroquea itincamijempequi inquitequi, ⁶ icantiquea: “Iriraquea icanconica ichoocati peacaagueta caroca inquite aisa quepatsi aisa maasano choocatantaguecaroca ipeacaacaro aisa inirojani quentijani aisa choocatantaguetaroca. Iriatimpa yamenaquenaquea iroomajaca noncanquempica. Imaica noncantajiaquempi aapojaca, aato yoguijavaji. ⁷ Ariquea irooshipojiguete intivotanaquequea irashivantite Aapani Irioshi sietetapojatsica, iriraquea Aapani Irioshi ironigaantaqueroquea yomanacoguevetacaca, irinetsanamajaqueroquea icantajiaquerica coramani irajaanirejia tsavetantajatsica.”

⁸ Ariqueate iquejetsijitajanaquea aisa iquenquetsatacaajitajana inquitequi icantajitana: “Poanaqueja paavaquero ampinaicarejanquitsica paperi yajiricaqueca irashivantite Aapani Irioshi, irinta catiantacaroca inirojani quentijani aisa quepatsi.”

⁹ Ariquea naatimpa noashitanaqueri ashivanti, namanapojaqueriquea paperijaniqui ampinaicarejanquitsica. Icantaquenaquea: “Jero, paguero, pishecateparo. Oraquea arejetapojemparogueti pitsicotoqui onquepishicanaquempi, cotanquitsiquea oraquea pivagantequi ompochatanaque quempeca ipochajatiguete earotoja.”

¹⁰ Iroompaquea naitsitaro paperijaniqui iracoqui ashivanti noshecatsitaro. Namenitsitaroquea arimajacatarite icantamajaque. Oraquea novagantequi pocha ocanca quempeca ipochajatiguete earotoja, cotanquitsiquea irooquea noniavecaroquea arejetapojacarogueti notsicotoqui oquepishicanaquena.

¹¹ Ariqueate icantajitana: “Imaica pinquejetacaajemparojate aisa pincamantantaje, iriguenti pintsavetacotsivaquempari caramirincavaetanquitsica caquinteguetatsica guintenijatsica quepatsipaequi cantashitatiaguetanquitsica iguenquetsatsarepae, iriguentijia aisa imajirojiate, pincanquequea quero incojiaquerini Aapani Irioshi oncoramanitapojaguete.”

11

Mavite tsavetacotantajiaquerica Aapani Irioshi

¹ Ariquea yojocajiquenaroquea savoroquiji igomarotantajitaca icantajitana: “Poanaque pigomaroquiteroja itemporote Aapani Irioshi, pinquejetsitemparoquea

* 10:3 Iriraquea león iririjeguimajataque inaque, iquejevecari casecari iririjegui. Cotanquitsi icajemiguete yampenejencavaetanaca icanca, antsaroacaanaquempari anquemaqueriguete. Ontaniqui otsipaqui guintenininti ichooaqueguete icantajiqueri iriguenti imajirote tomirishipaequitica.

aretare. Aisa pintsajiaqueriquea queroca icaramirincajiaqueni choocajianquitsica oraniqui tsaromentajiacarica Aapani Irioshi.² Oraquea otsoviaguitetapojaquegueti sotsiquitica aatoquea pigomarotirotsi, irooquea icantacaajiquerica itsipapae caquinteguetatsica inchoocatantapojempaca. Iriatimpajia manaquea irantanavintsajiaquero oratica guinteninintsi yashincaca Aapani Irioshi,* iragavejajiaqueroquea incantacoguitempani irarejevaetanaquemparoquea 42 taai.³ Naatimpa nontigarancaque mavite tsavetantajiaquenanea, nagavejacaqueri intsavetantajiaquenaqueate incantacoguitempani arejevaetanaquemparoquea 1,260 savincaguiteri,[†] manaquea inquitsaajiaquempaquea jiriquiquijiporoqui.”[‡]

⁴ Iriguentijia ocantacotaque mavite inchato orivo[§] aisa mavite tsivorentsi jerenquijerenquiatacotatsica yojoquijiqueca ichoocaquegueti Imajirojiate maasano quepatsiquitica.⁵ Querica catsimavequemparineca irinintajiavequempaquea irantsipetacaavaequempari, ariqueate incoquempani osotoamorecavaetanaquequea ivagantequi ontsiatsiavaetavaqueri ometojajiaqueri. Ariqueate inquempejiaqueri imaica maasano quepatsipaequitica nintavetanquitsineca irantsipetacaaquemparime.⁶ Iriatimpajia incanquegueti: “Aatoquea oteji incani”, aato oteji. Iroompaguea ariquea onquempetaquempa arejevaequempa interoncanajerogueti intsavetantavaequetu. Aisa iragavejajiaque impeacaajianaquemparoquea oja irajantsi. Aisa iragavejajiaque incantashitiatijencatashijiaqueriquea guintenijiatsica quepatsiqui, irantsipetacaaajiaquempari. Ariquea iriatimpa querocaca ininqueca irampijitajero, ari irampijitajero.

⁷ Cotanquitsiquea interoncaajianaquerogueti intsavetantajiaquegueti, incoraquetapojequea covejencavetatsica sotoapojatsineca omoroqui oagantavaetanquitsica isaviji, incatsimajiajojaqueri iragavejajiaqueri irimetojajiaqueriquea.⁸ Oraquea itsino manaquea irojoquijitantajiaquemparoquea quenavoquirontsi oraniqui guinteninintsiqui anaanquitsica, ariqueate oraniqui yompajacojiqueriquea Amajirote coramani. Oraquea ishiacaantacarogueti oratica guinteninintsi icantajiaqueroquea Soroma aisa Ejepito.⁹ Oncarate 3 savincaguiteri intariavaequempaquea oraniqui, aisa otsipa niganqui savincaguiteri, iramenajiaqueriquea caquinteguetatsica, incaramirincavaeque caquinteja cantashitatiaguetaquitsica iguenquetsatsarepae, majirontagueatarica majirontajiatatsica. Iramenajiaqueriquea metojajianquitsica cotanquitsiquea incantimentsitaquempari aatonijite iquitatiritsi.¹⁰ Maasanoquea guintenijiatsica quepatsiqui iramenajiaqueri metojajiaque, ariqueate irishinevaejianaquempaquea iraaagarantsitemparoquea yashintaguecaca irojocagarantavacaajianaquempa, irooriji iramenajiaqueriquea metojaque iririjia mavite tsavetantatsica atsipetacaajiacarica maasano guintenijiatsica quepatsiqui.

¹¹ Cotanquitsiquea avisanaquegueti 3 savincaguiteri aisa niganqui savincaguiteri, ariquea oquijajencajiajojajiri iranijajencare Aapani Irioshi, ariquea icatijianaja. Maasano amenajiaquerica itsaroamajianaquequea.¹² Iroompaguea iquemajiaque icajemacojitaqueriquea inquitequi icantajitaqueri iririjencani: “¡Caacateshiatsi acaniqui jenoqui!” Iroompaguea yoantajianajaro mararo jenoqui inquitequi, yamenamenaitavajiri maasano catsimajiaquerica.¹³ Ariqueate ocotanaca omoguemajatanaca quepatsi, osoveaguetanacaquea oshequi tsovironaquipae guinteninintsiqui ichoocavecagueteri ocaravaeque 1/10,^{*} imetojajiaque 7,000 caquinte. Iriraquea choocatajatsica itsaroajianaque, ariquea icantajiaque: “¡Caaviji Irioshimajati Aapani Irioshi choocatatsica inquitequi!”

¹⁴ Imaica jac teroncanaca mavitetanquitsica atsipevaetagantsi icantacotsitacaca “¡Ooo!”, cotanquitsiquea taampina arejetapojempa otsipatapojacaca.

* 11:2 oratica guinteninintsi yashincaca Aapani Irioshi. Iroguenti Jerosare. Pamenero Is. 63.18; Iran. 8.13; Irc. 21.24. † 11:3 1,260 savincaguiteri ocarataque 42 taai. Ocarataque aisa 3 ajagantsini aisa otsipa niganqui ajagantsi.

‡ 11:3 inquitsaajiaquempaquea jiriquiquijiporoqui. Oraticaquea jiriquiquijiporoqui iroguenti cajenimagori yametaca coramani inquitsaatempaca shimampojancanquitsineca. Manaquea ocanque iricatica mavite tsavetanatsica incantajiaqueriquea maasano: “Pishimampojancacoventempari pigovaeguisher.” § 11:4 inchato orivo.

Oraquea orivoitsoqui iroguenti yaantajitacaroca oreji itaantajitacaca tsivorentsiqui. * 11:13 osoveaguetanacaquea oshequi tsovironaquipae guinteninintsiqui ocaravaeque 1/10. Oncanque onchoocaquegueti 1,000 tsovironaquipae, soveananquitsineca 100.

Tivorentsi sietetapojatsica

¹⁵ Iroompaquea itivotaque irashivantite Aapani Irioshi sietetapojatsica, ariquea iquenquetsajencajitanaquequea inquitequi inirojencavaeque, icantajiti:

“Querocagueti imajirontajivetacagueti quepatsiqui, imaicaquea irimajirontajempa Amajirote aisa Iguirishitote. Incoguitempani irimajirontaguitempani, aatoquea isanticoguitejacovaetitsi.”

¹⁶ Iroompaquea namenajiaqueri irirajia 24 iramajiroreja Aapani Irioshi savisaviitanquitsica oraniqui imajirontamentoqui, ariqueate icojianaca itigueroaventajianacari yarejevaequita ivancaqui isaviji itsaromentajianacari, ¹⁷ icantajiguiri:

“Nomajirote Irioshimajaca Agavejamajatatsica, noshineventajiaquempi nocantajiaquempi, ‘Arioteesaa.’

Choocataquempiquea imaica, picocaniquea pichoocati coramani, pincoguitempani pinchoocaguiteni.

Imaicaquea jac pagavejamajaqueroquea maasanopae, peamajaquempi Imajiromajajiate maasano.

¹⁸ Icatsimajiavetacaquea quepatsipaequitica, cotanquitsiquea imaica aapojaca savincaguiteri pincatsimacatsimatantajiaquemparica iriatimpajia.

Pincantsijiaqueri aisa covaeguishejiatsica metojajiavetanquitsica irantsipetimentajiaquemparo ipeacaaguishejiacaca.

Irraquea paaanirejia tsavetacojiguimpica manaquea pishinetacaajiaquempariquea. Ariquea pinquempetacaajiaquempari aisa maasano pigomajamajarejia aventaventajiguimpica tsaromentamajaquempica,

irioca caavijica yanaantavaeque, irioca teeca iranaanteji.

Aisa aapojaca pinteroncantajiaquemparica maasano covaemajataqueroquea quepatsi.”

¹⁹ Iroompaquea namenitaro otanarejanaca iteemporote Aapani Irioshi inquitequitica, ontaniquiquea intsompogui oconijavaetanaque inchacotanaqui ashi paaquito.† Ariqueate ocotanaca ocantavaetaquiti careti tsijec tsijec, otsantsajencatsarenavetanaque, serororo serororo, omoguecaguetanaquequea, aisa incojariquiguitevae-tanaquequea.

12

Manquigarentsi aisa casantonqueniniro

¹ Iroompaquea oconijavaetanaquequea inquitequi antsatantaquemparoquea quero oncoguetanaquempani oncoramanitapojajeguetei. Namenitaro manquigarentsi* oquit-saacocari catsirincaiteri. Irraquea taai ocatiitari, aisa amatsaetacocari 12 impoquirojite. ² Iroatimpa otsaraquitaquequea agatsaraquijavaetanaja, jero ocajemavaequequea ocantaguetanajiroquea.

³ Ariqueate iconijavaetanaque aisa inquitequi itsipa. Namenitsitariquea casantonqueniniro iquityoncavaequequea icanca iririjeguini. Ochoocaque 7 iguito, oraquea ivaaguetaca 10. Aparopae iguito amatsaejiaca, maasano iramatsaeropae ocarataque 7. ⁴ Ipotecapetajishitanaqueroquea ivetajishi yasacaraagarantsigueteriquea impoquiropae, icaramirincavaetaque 1/3 itacoroitsijigari quepatsiqui. Iriatimpa icoraquepojaque icatiimotapojacaro manquigarentsi irooshipoji ovoacote irishecatsitavaquemparoquea irijanite.

⁵ Ariqueate ovoacoque, iriguenti shiramparijaniqui, iriotaquequea peanquitsineca imajirojiatemajaca maasano caquinteguetsica, irimajirontantaquemparo imajirontaquijire ipeacaajitaca cavorejari quishomajatatsica,† iragavejaqueriquea maasano teeca inquemisantajigueriji. Iroompaquea nameni inoshiquitsijitari yaajitanaqueri jenoqui isavicaqueguetei Aapani Irioshi imajirontamentoqui. ⁶ Oraqueate

† 11:19 inchacotanaqui ashi paaquito. Iroguenti ochoocatantacaca mavite mapicota itioncantacaroca Aapani Irioshi paaquito yojocaquenerica Moishishini irashi maasano igonor. * 12:1 Orticaquea manquigarentsi iriguenti oquejeca joriojia. Irraquea ovoaqueca iriguenti iquejeca Jesoquirishito. † 12:5 irimajirontantaquemparo imajirontaquijire ipeacaajitaca cavorejari quishomajatatsica. Irooquea oncanque intampishitashimajaqueroquea irimajironquempaguetei.

manquigarentsi oshianacaquea oanaquequea oquitamampororoitapojaquegueti ipeacaacanaroquea Aapani Irioshi onchoocatantaquempaca irojocajitaqueneroquee oshecaquempaca arejetacovaetapojempa 1,260 savincaguiteri.

⁷ Iroompaquea ochoocaque ashimirintagantsi inquitequi. Iriraquea Migueri itsipajiacari irashivantijitete yashimirintsitapojacari casantonqueniniro. Iriraquea casantonqueniniro itsipajiacariquee irashivantinirojitete, yashimirintsivetavacari, ⁸ cotanquitsiquea teequea iragavejavaqueriji. Yaitsitari yoguisotoitsijigari, irootaquequea teeca inchoocatantajempaji inquitequi. ⁹ Ipishonquitsijigari quepatsiqui. Iriraquea casantonqueniniro iriotaquequea camaarini coramaniquitica, ariquea icocani yamatavimatavivaequeriquea maasano caquinteguetatsica. Ipajitsitaquea ampatsini aisa Satanashi. Manaquea ipishonquitsijitari quepatsiqui, itsipatacaantsijitari irashivantinirojitete.

¹⁰ Iroompaquea noquemitsitaquea iquenquetsajencajitanaquequea inquitequi iniro jencavaequequea ocanca, icanque:

“Imaica jac yaantavajiquea Arioshite.

Imaicaquea yamenajiqueroquee yagavejamajatiquea iriatimpa, ipeamajatacaquea Ima-jirotemajaca maasano.

Ariquea iquejetaca Iguirishitote yagavejamajatiquea.

Iroorijite ipishoncajitaqueri isaviji irira ampatsini.

Irioquea catiimopinivetarica Arioshite savincaguitერიკი aisa pitsecariqui, itsavetacotapinivetacari apitsaroveritariate inintaveca inquejetacaantajiaquerime.

¹¹ Cotanquitsiquea iriatimpajia manaquea yagavejantsijigari iriraja Ovejajaniqui.

Iroguenti aisa yagavejantsijigari Iguenquetsatsare Irioshimajaca itsavetantajiaqueca, teequea intsaroacaajiguemparonica irimetojajiaquegueti, manaquea ipajiacaroquea imetojane.

¹² ¡Irootaquequea pishinetantajianaquempaca aviatimpajia inquitequitica, maasano guintenijiatsica inquitequi!

Aviatimpajiampani guintenijiatsica quepatsiqui irooca inirojaniqui quentijani, ¡ooshi-atsi pantsipevaetempashiatsi!

yaguijitatshitapojimpitarite ampatsini.

Icatsimamajatatiguinimaja,

iroorijite yamenaque irooshipojitari incatsimajiqueriquea iriatimpa.”

¹³ Iriraquea casantonqueniniro yamenaquegueti ipishoncajiqueriquea quepatsiqui, ipatimatsitanacaroquea manquigarentsi vojairica shiramparijaniqui.

¹⁴ Cotanquitsiquea iroatimpa iviquitajitanaro mavite ovanqui inirovanqui quempevaeca ivanqui shirompitomantaneji cameetsaniji arapitsatimentanaqueriniji ontaniqui onchoocaquegueti oquitamampororoitapojaquegueti, iquempoguijajiqueroquee oraniqui 3 ajagantsini aisa otsipa niganqui ajagantsite. ¹⁵ Oraquea casantonqueniniro ariqueate icotanaca yoguisotojaatsitaroquee ivagantequi apanatojaavaetanaca anaqueromequea manquigarentsi. ¹⁶ Cotanquitsiquea amitacotavaquero quepatsi, omorotanacaquea oquijaatanacaca oja sotojaatanquitsica ivagantequi casantonqueniniro. ¹⁷⁻¹⁸ Ariqueate icotanaca casantonqueniniro icatsimamajatanaqueroquee manquigarentsi yoayoaitashitantajianacarica irashimirintajiaquempari itsipajia ochoviquijiaqueca, irirajia netsanamajatiroca icantacaantaqueca Aapani Irioshi aisa tsavetantajiguirica Jesoshi netsanamajatiroca itsatacaantaguetica.

13

Mavite covejencavetatsica

¹ Ariquea nocatiaca impanequiqui ocaratsapijataquegueti inirojani quentijani. Iroompaquea nameniri isotoajatanaque aparo covejencavetatsica, ochoocaque 7 iguitopae, oraticaquea ivaapae 10, yamatsaetacoguetaca ivaqui maasanopae, ocarajiaque 10

iramatsaeropae. Aparopae iguito ochoocaque otioncaca ipajigueca iriatimpa, iquejem-anatacariquea Aapani Irioshi. ² Iriatimpa quempeca casecari, oraquea iguitipae quempevaeca iguiti vaavaiconca. Oraquea ivagante quempeca ivagante león.* Iroompaquea iriraquea casantonqueninero yagavejacaqueri irira covejencavetatsica iragavejama-jaqueniji iragavejajiaqueriquea maasano quepatsipaequitica irimajirontapojempa imajirontamentoqui casantonqueninero. ³ Iroompaquea apaguitotiro iguito conijavaeque icaraguinajivetacariguetei quejetaca irimetojajitaquerime, cotanquitsiquea yogueshijitajiri. Oraquea yogueshijitajiriguetei, ariqueate icohicoitanaca maasano quepatsiquitica yamenamenaitanaquequea intati, yoguijatacojianaquea. ⁴ Ariquea itsaromentajianacari casantonqueninero, yamenajiaqueritari iriguentei agavejacaaguequeri covejencavetatsica. Iroompaquea ariquea iquempetacaajianacari covejencavetatsica itsaromentajianacari iriatimpa, icantajigui: “Tecatsi quempetemparine iricatica. Tee inchoocateji agavejanquitsineca irashimirintaquempari.”

⁵ Ariquea yagavejacaajitaqueri covejencavetatsica inquenquetsataque iraventacovae-quempaquea incantaguishetacovaequeriquea Aapani Irioshi, aisa yagavejacaajitaqueri irimajirontaquempaquea incaratacoguiteni 42 taai. ⁶ Ariquea incantaguishetacovaequeri Aapani Irioshi, iquejetsitariquea ivajiro, Itaverenacorote, aisa maasano guintenijiatsica inquitequi. ⁷ Iroompaquea yagavejacaajitaqueri irashimirintajiaquempari tsaromentajiacarica Aapani Irioshi, iragavejajiaqueri. Ariquea yagavejacaajitaqueri impeantaquem-paca imajirojiate maasanomajaca caquinteguetatsica, maasano gonorontavacaaguetatsica, maasano cantashitatiaguetatsica iguenquetsatsarejia, maasano quepatsipaequitica. ⁸ Maasano intsaromentajiaquempariquea irira covejencavetatsica—maasano quepatsiquitica teeca intioncacotantemparoji ivajiro ivaperitequi Ovejajaniqui metojaventajiacajica. Coramanitari tequerataguetei impeacaajitemparo quepatsi, icanquequea Aapani Irioshi irimetojaventajiacaji, ariquea itioncacojiguetaqueroquea ivajiropae maasano icocanica iranijaguiteni iriatimpaqui.

⁹ Choocaguetei guempitatanquitsica iintsija inquemejate.

¹⁰ Quericaca ontampaticatanaqueca irajaitanaqueri irisantanatacojitaqueri, ariqueate irisantanatacotsijitempariquea.

Ariquea inquempetaquempace aisa quericaca ontampaticatanaqueca irimetojantajitaquempari tsaampitsantsameniro, irimetojitsitantajitempariquea.

Irootaquequea oncameetsatantanaquempace incoquempani irantsipetacojiaquem-paquea tsaromentajigarica Aapani Irioshi intsaromentamajatanaquempariquea.

¹¹ Iroompaquea namenitsitariquea itsipa covejencavetatsica isotoapojaque quepatsiqui, ochoocaque mavite ivaa quempevaeca ivaa ovejajaniqui, cotanquitsiquea oraquea iquenquetsaqueguetei manaquea iquempetacari iquenquetsatiguetei casantonqueninero.

¹² Chooaquea iragavejane quejetaca iragavejane iriquetica covejencavetatsica yagavejavaequeguetei, cotanquitsiquea iquemisantaqueri inetsanataqueroquea inintaguetica iriatimpa. Icantajiaqueri maasano guintenijiatsica quepatsiqui intsaromentajiaquempari iriquetica covejencavetatsica peanajatsica icaraguinajivetacariguetei quejetaca irimetojajitaquerime. ¹³ Aisa yonigaantaguequeroquea oacaantantatsica intati. Yasacaraavaequeroquea morecatsantsajencaro quepatsiqui, oquenajencavaetapojaque inquitetapojaqueguetei, yamenajiaqueriquea maasano caquinteja. ¹⁴ Yantaguetaque quempeguetacaroca ocatita inintacaquerica itsipa covejencavetatsica peanajatsica icaraguinatantajivetacariguetei tsaampitsantsameniro, yanijanaque. Irootaquequeate yamatavitan-tavaetacarica maasano guintenijiatsica quepatsiqui, aisa icantajiaqueri impeacaavantorijiaquempari iriquetica covejencavetatsica. ¹⁵ Ariquea yagavejacaajitaqueri yaajencatacaqueri ivaantorite iquenquetsatantanaqueca aisa yagavejantacaca irimetojacaantsijiguempari maasano teeca intsaromentajiguempariji ivaantorite.

¹⁶ Aisa icantajiaqueri maasano irisantoncajitaqueriquea iracoqui itincamijempequiquitica irooca ivancaqui, maasano caavijica yanaantavaeti aisa teeca iranaantajigueti, maasano ashintavaejatsica aisa teeca irashintavetempaji, maasano yashintajitaca aisa teeca irashintajitempariji. ¹⁷ Iroompaquea quericaca teeca irisantoncaticotemparoji

* 13:2 Pamenero itsavetacojiqueriguetei león isavivanaqui otsapaqui 5.5 aisa 10.3, iro tsatacaaquempirone.

ivajiro covejencavetatsica irooca inomerote iracoqui itincamijempequiquitica irooca ivancaqui, aatoquea yagavejitsi irovegarataje aisa aato yojocantajitsi.

¹⁸ Imaica cameetsa pinquenquejamajateroja pintsatimentavaqueroniji noncaman-taquempica imaica. Quericaca tsamajatatsica iintsija intsatavaqueroquea inomerote covejencavetatsica, irootaquequea inomerote caquinte, iroguenti 666.

14

Yamashaijiaquequeate 144,000

¹ Iroompaquea namenavetaja namenitsitariquea Ovejajaniqui icatiatsempitantac-aro Shionetsempi, itsipajiacari 144,000 caquinteja itioncacojitaqueca ivancaqui ivajiro Ovejajaniqui aisa ivajiro Iriri. ² Noquemitsitaroquee ampenejencavaetanaca oquenajencavaetapojaque inquitequi quempejencavaeca otaranquigueti ojaaquipae-qui, aisa quempejencavaeca careti. Aisa manaquea oquempejencavaecaro ocarajen-cavaetigueti itencatsajiguigueti aarepapae caramirincajianquitsica. ³ Irirajia 144,000 manaquea ichoocajiaque oraniqui imajirontamentoqui Aapani Irioshi, aisa ichooca-jiaquegueti irirajia 4 anijaripae aisa iramajiroreja Aapani Irioshi. Yamashaijiaque-roquea amashairentsi iroaqueratica. Tee inchoocaticateji tsajiaqueroneca oratica amashairentsi, iriguenti tsajiaqueroquea irirajia 144,000 quenajiapojatsica quepat-siqui ivegaratacotanontajiajica Ovejajaniqui.[☆] ⁴ Iricaticajia iriguentijia teeca incov-aeguishtantemparoji manquigarentsi, icomajaguitanitari. Irosati yoguijaguijaitana-queri Ovejajaniqui querocagueti iquenanaqueni. Iriguentijia ipariajiacaca Aapani Irioshi ivegaratacotanontajiajica intsaromentamajataquempariniji iriatimpa aisa Ovejajaniqui. ⁵ Teequea intsojeavagantetimatempaji. Yamenaqueriquea Aapani Irioshi shemajataja taaca opaji covaeguishejiavecarica.

Itsavetantaqueca 3 irashivantijitete Aapani Irioshi

⁶ Iroompaquea nameniri itsipa irashivantite Aapani Irioshi yaranaquequea inquite-qui niganqui itsavetantavaetanaqueroquea Quenquetsatsarentsi Oganejencatatsica choocaguitatsica. Itsavetantimojiaqueri maasano caquinteguetatsica guintenijatsica quepatsipaequi, gonorontavacaaguetatsica, cantashitatiaguetatsica iguenquetsatsare-ja, majirontaguetacarica majirontajiatatsica. ⁷ Iririjencavaequequea icanca icantajiguiri: “Imaica pintsaroacaamajaquemparija Aapani Irioshi pincantajiaqueri: ‘¡Caaviji pagave-jamajati!’ aapojacatarite incantantajiaquempara queiro incojitaquerini maasano caquin-teja apaniropae, maasano teeca inquemisantajiguieriji irantsipetimentajiaquempara-quea ipeacaaguishejiacaca. Pintsaromentajiaquempariquea, iriguentiquea peacaague-tacaroquea inquite, quepatsi, inirojani quantijani aisa osotoajaguetigueti ojaaquipae.”

⁸ Iroompaquea yoguijatsipojacari itsipa irashivantite Aapani Irioshi icanque: “¡Soveaca! Soveaca Vavironia oratica guinteninintsi anaantavetanquitsica, teroncajiaca guintenitantavetaroca irooriji opeacojianaqueri igovaeguishe, ariquea ipajenca-jianaqueri quepatsipaequitica. Oquempetacaquea irishinquitacaajitaquemparinica inquempevaetacaantajitaquemparica.”

⁹ Iroompaquea iquempetsitanaca trestapojatsica irashivantite Aapani Irioshi yoguijat-sipojacari, iririjencavaequequea icanca icanque: “Quericaca tsaromentajiaquemparineca covejencavetatsica aisa ivaantorite ipeacaajitaca, aisa irisantoncatacojitaquemparigueti ivajiro ivancaqui irooca iracoqui, ¹⁰ iriojiatari incatsimajiaque Aapani Irioshi. Aato-quea capichajaniqui icatsimatiritsi, irantsipetacaavaequempariquea intsiaquempaquea camorecariqui onconoquemparoquea asopiri. Iramenamenaiqueri ashivantijite co-majashirentanquitsica, ariquea irameneri aisa Ovejajaniqui. ¹¹ Oraquea ovogataque-mpagueti irantsipevaetantajiaquempara oncoquempani ompoasecantajencavaequem-paquea aatoquea osajaencatimatitsi. Aatoquea imagorejimajigui savincaguiteriqui aisa pitsecariqui, incoguitempaniquea irantsipeguitempaniquea tsaromentajiacarica cov-ejencavetatsica aisa ivaantorite ipeacaajitaca, ariquea inquejejaquempara irantsipevae-guitempani maasano isantoncatacojitaqueca ivajiro covejencavetatsica.”

[☆] 14:3 Pamenero Ev. 9.12.

¹² ¡Irootarite inintantajitacaca incoguitempani irantsipetacojiaquempaquea yashintajiacaca Aapani Irioshi, iriguentijia teeca irovashiantimateroji inetsanamajajiaqueroquea icantaguetica, aisa coanatsi itsariventamajatanacariquea Jesoshi!

¹³ Noquemitsitaroqueea opojimajencavaepojaca inquitequi icantajiquena: “Pintioncateroja noncanquempica: ‘Aapani Irioshi irishinetacaavaequempariquea metojajianquitsineca imaica tsaromentajiacarica Amajirote.’”

Icanquequeea Ishire Aapani Irioshi: “Arimajaguitatsi, irimagorejajiaque yantavaetigueti, ontsipataquempari yantaguetaqueca cameetsari.”

Icapiocacotavaqueroqueti tirigoitsoqui aisa ovaitsouqui quepatsipaequitica

¹⁴ Iroompaqueea namenitsitaro mararo oquitamarovaeque ocanca. Ichoocaque savicantacaroca iquempetacari irijanite caquinte. Yamatsaetacari iramatsaero ipeacaajitaca ooro. Yajiricatsicontetaqueroqueea tsaampitsicontero icantajitica hoz. ☆

¹⁵ Isotoanaque teemporoqui itsipa irashivantite Aapani Irioshi, icajemacotaqueri savicanquitsica mararoqui, iririjencavaequequeea icanca icantajigui: “Jac osampatanaquequeea tirigoitsoqui quepatsipaequitica. Imaica iintsija pintotacotantaquitemparojate.”

¹⁶ Iroompaqueea iriraqueea savicanquitsica mararoqui yogarajacoguetaquitiroqueea yaavaquero icapiocacotavaquero maasanopae quepatsipaequi.

¹⁷ Ariqueate isotoapojaquequeea itsipa ashivanti, isotoampojarooqueea teemporo inquitequitica. Ariqueea iquempetaca iriatimpa yajiricatsicontetaqueroqueea hoz tsaampitsicontero. ¹⁸ Iroompaqueea isotoanaquequeea itsipa ashivanti choocatanquitsica aretarequi. Iriatimpa iriguenti quempoguijiroca paamari. Icajemacoqueri ajiricaqueroca hoz tsaampitsicontero, iririjencavaequequeea icanca, icanque: “Iintsija pintotacotantaquitemparojate oratica ovaitsouqui quepatsipaequitica, sampajencatanaquequeea.”

¹⁹ Ariqueea iquempetacaacarooqueea imaica ashivanti, yogarajatsicontetantaguequitaroqueea ovaitsouqui quepatsipaequitica, icapioquitaguetaroqueea maasanopae. Iroompaqueea yaanaqueroqueea ontaniqui osamani ocaraguepojaqugueti tsovironaquipae ochoocaquegueti ipeacaashitantajicaroca yaajatantajitaroca otsironeja. Iroatimpa manaquea ocantacoqueri incatsimamajajiaqueri Aapani Irioshi maasano teeca intsaromentajiguempariji interoncamajajiaqueri. ²⁰ Ariqueate yagaticamirijaquijiqueroqueea ovaitsouqui, ariqueate ocotanaca osotoajatanaque irajantsi otserajatanacaroqueea yoguijaatanajitaroca oshirancajavaetanacaquea isaviji, ariqueea ocantajavaetanaca jmm arejejavaecaroqueea 1,600 estadiopae.* Osaanajavaetanacaquea arejejavaecaroqueea ivagantequi quitavaireri.

15

7 irashivantijitete Aapani Irioshi atsipetacaantantajianquitsineca

¹ Namenitsitaroqueea inquitequi otsipa iquempetacaacaroo aisa antsatantaquemparoca quero oncoguetanaquempani oncoramanitapojajegueti. ¡Ooshiatsi namenanaquequeea intati! Namenajiaqueri 7 irashivantijitete Aapani Irioshi atsipetacaantantajianquitsineca, irioqueea amacojiaqueroneca atsipetagantsipae caratapojatsineca, irootarite onteroncantapojempaca igatsimaca Aapani Irioshi.

² Nameniquea aisa quejevetaroca incajare, saancorencajavaequequeea ocanca quempetaca potirinaqui, oconoamorecajacaroqueea paamarimoreca. Ariqueea oraniqui icatintiitaca maasano anaquerica covejencavetatsica aisa ivaantorite ipeacaavaantorijitaca, teatarite intsaromentajiguempariji aisa teequeea intioncacojiteroji onomerote ivajiro ivancaqui irooca iracoqui. Icaramirincavaeque yajiricajiaque iraarepate yojocajiaquenerica Aapani Irioshi. ³ Yamashajiaqueroqueea iramashaireni Moishishini irajaanire Aapani Irioshi, iroguenti aisa iramashaire Ovejajaniqui, ocanque: “Nomajirote Aapani Irioshi Agavejamajatatsica, oganejencavaetaca pantaguetaqueca, oacaavaetanacuaquea intati. Pitampaticamajataqueroqueea maasanopae, iroomajacaquea. Aviguenti Imajirojiate maasano caquinteguetatsica.

☆ 14:14 Iran. 7.13. * 14:20 Oraqueea 1,600 estadiopae ovegarataca 300 quiromeeteropae, irooqueea quempetacaro arigueti anijivaete 7 savincaguiterpae, irooca 8. Aparo estadio ocaravaeque oquejevecaro 185 meeteropae.

⁴ Nomajirote, ¿arimpate inchoocaque caarica tsaroacaguimpi? Aato ichoocati. ¿Arimpate inchoocaque caarica shineventimpi? Aato ichoocati. Apaniroquea aviatimpa picoguitani poganejencamajataca, teequea pincovaeguishetimatempaji. Incoaquecoraqueitashiquempitarite maasano caquinteja intiguroaventajiaquem-piquea intsaromentajiaquempi. Conijavaetaquetari pitampaticamajaqueroquea maasanopae.”

⁵ Iroompaquea nameniquea otanarejanaca teemporo inquitequi. Iroguenti oquempetacaro otaverenacorote Paaquito.* ⁶ Isotosotoitantapojaroquea irirajia 7 irashivantijitete Aapani Irioshi atsipetacaantantajianquitsineca. Ijamirincajiaque quitsaajiaca quitamarocantari quitsaarentsi saancamagori, tsirencavaeque. Yaguiatacari ineguiqui ichompimashite ipeacaajitaca ooro. ⁷ Ariquea namenitsitariquea aparo anijari, yojocajivaqueneri ashivantijite 7 taso ipeacaajitaca ooro tseraiquijencavaequeate igatsimaca Aapani Irioshi icoguitani ichoocati. ⁸ Oraquea iroganejencare aisa iragavejane Aapani Irioshi osotoajencavaequequea oquempetacaro paamarivoga inirovogajencavaetiguete otsitacajencavaequequea intsompoguiqui iteemporotequi, aritarite ichoocaque iriatimpa. Aatoquea ichoocatisi quijanquitsineca oraniqui arejevaetanajempataja interoncajiajerotaja irashivantijitete Aapani Irioshi carajianquitsica 7 irisocajiaqueroqueti oratica 7 atsipetagantsi yajiricacojiaqueca irantsipetacaantajiaquemparica caquinte.

16

Siete tasopae tseraiquijencavaeca igatsimaca Aapani Irioshi

¹ Iroompaquea noquemiquea iquenquetsajencajitanaquequea irirajencavaeque icanca osotoajencapojaroquea teemporo icantajiaqueri 7 irashivantijitete Aapani Irioshi: “Pijateja poapoaitanaqueja pisocajiaquiteroja quepatsiqui igatsimaca Aapani Irioshi oratica tasoquitica carajianquitsica 7.”

² Ariquea yoanaque aparo ashivanti isocaquitiro quepatsiqui yajiricacojiaqueca itasonequi, ariquite itioncacojiaqueca ivancaqui ivajiro covejencavetatsica, iriguentijia tigueroaventajiacarica ivaantorite ipeacaavaantorijitaca iquempetacaamajajivecari iriatimpa. Irirajia avejancajianquitsica ooquea yatsipejiacaroquea ogatsica.

³ Iroompaquea irira ashivanti mavitetapojatsica yaacotapanajantiroquea itasone, isocaquitiro inirojaniqui quentijani. Ariquea oquempetanacaro irirajia metojanquitsica. Imetojajianaquequea maasano choocajianquitsica inirojaniqui quentijani iteroncajianacaqueate.

⁴ Ariquiteate irira ashivanti trestapojatsica yaacotapanajantiroquea itasone, isocaquitiro ojaaquipaequi aisa maasanopae osotoajaguetequeti nijatenipae. Ariquiteate ocotanaca opeaguetequeate irajantsipae. ⁵ Iroompaquea noquemiri iquenquetsatanaque ashivanti quempoguijiroca ojapae, icanque: “Nomajirote, aviatimpa aviguenti tampaticamajatiroca patsipetacaantamajatan-tacagueti piquempetacaantaqueroquea imaica.

Choocaquem-piquea, aisa picoguitani pichoocatini coramani, Pirioshimajati teequea pincovaeguishetimatempaji.

⁶ Patsipetacaantajiacarica pamenajiaqueritari imetojajiaqueri tsavetantajiatatsica aisa itsipajia pigomajamajarejia, ichovivincajatacaajiaqueri irirajia. Pimirajatacaantantajiacarica irajantsi, inchiquiojita iquejetacaantajiacarica iriatimpajia.”

⁷ Iroompaquea noquemiriquea iquenquetsatanaque itsipa aretarequi icanque: “Arimajaguitatsi, Nomajirote Aapani Irioshi Agavejamajatatsica. Pitampaticamajaqueroquea picatsimajiaqueriguete, teetarite pincantashitempaji.”

* 15:5 oquempetacaro otaverenacorote Paaquito. Oratica Taverenacoro iroguenti quitsaarentsivanco ochoocatan-tacaca mavicotate mapicota itioncantacaca Aapani Irioshi yojocaquenerica Moishishini.

⁸ Ariqueate irira ashivanti cuatrotapojatsica yaacotapanajantiroquea itasone, isocaquitiro catsirincaiteriqui, icatsirincamajatanaquequea itsiajiaqueri caquinte. ⁹ Icantacoguitaniqua yatsipejiaca itsiaquerigueti, cotanquitsiquea teequea irovashiantajigueroji ipeacaaguishejiacaca. Teenicate iraventempariji Aapani Irioshi intsarovenquemparime, manaquea icantaguishejiaqueri yamenajiavecaroquea irioquea tigaranchimojiaqueri atsipetagantsi.

¹⁰ Iroompaquea irira ashivanti cincotapojatsica yaacotapanajantiroquea itasone iso-caquitiro imajirontamentoqui isavicantapinitaca covejencavetatsica. Ariquea icojianaca ipitsecacovaetanaque majirontajiacarica icantacovaetanaque manquimanquimanqui. Iriatimpajia yatsicajianaquero inene irooriji yatsipemajajiaca. ¹¹ Cotanquitsiquea arimpa yogaamajajanaca teequea irovashiantajiajeroji ipeacaaguishejiacaca, manaquea icantaguishejiaqueriquea Aapani Irioshi ashincaroquea inquite, yamenajiaqueriquea iriguenti atsipetacaajiacari aisa ishimoiriquishimoiriquiatatacaqueri.

¹² Iroompaquea irira ashivanti seistapojatsica yaacotapanajantiroquea itasone, iso-caquitiro inirojaqui ojaqui Eoperateshi. Ariquea ocotanaca ochaquirejanaquequea cameetsanjite incoraquecoraqueitapojenijite majirontajiatatsica quenaquenaitapojanquitsineca isotoguigueti catsirincaiteri.*

¹³ Ariqueate nameniriquea casantonqueninero aisa covejencavetatsica aisa tsavetanatsica amataatsica. Aparopae iriatimpajia isotosotoitanaquequea ampatsini ivagantepaequi. Iriaquea ampatsini quempevaeca oanto. ¹⁴ Ampatsini inajiaque. Yonigaantajiaqueroquea oacaantantatsica intati, iroompaquea yoayoaitanaque incapiocajiaqueriquea maasano majirontajiatatsica quepatsipaequitica irashimirintajiaquempaquate arejetapojempagueti oratica savincaguiteri anaavaetapojatsineca irashi Aapani Irioshi Agavejamajatatsica.†

¹⁵ [Iroompaquea iquenquetsatanaque Quirishito icanque:] “Intsijate pinquemisantajiguenajate. Naatimpa noncoraquepojaquegueti manaquea noncatimapojajempaqua nonquempetapojajempari aitsitantatsica. Noshineventavaetaquempariquea maasano tinajaventaquenanea aisa inquempoguijamajaqueroqueti iitsaare aatoniji icajaratsinogui aatoniji ipashiventajiga.”

¹⁶ Iriaquea ampatsini quempejiacaroca oanto icapiocajiaqueri majirontajiatatsica ontaniqui ipajijitica evereotsaqui Aremajeroni.

¹⁷ Iroompaquea irira ashivanti sietetapojatsica yaacotapanajantiroquea itasone iso-caquitiro otampijaguitetaquegueti. Noquemiquea iquenquetsajitanaque inirojencani ocanca oquenajencavaetapojaque imajirontamentoqui Aapani Irioshi teemporoqui, icantajiti: “¡Jac teroncapojaca!” ¹⁸ Ariquea ocotanaca otimemecapinique careti ocantapinique timemec timemec, aisa ocantavaetaquiti serororon serororon tsijec tsijec, omoguecavaetanaquequea quepatsi anaavaetanaqueroquea maasanopae moguecaripae omoguecaguetigueti coramaniqui iroaqueragueti icaquintetacaajiaqueriquea caquinte arejevaeca imaica. ¹⁹ Ariquea ocotanaca otsecaguetanaquequea oratica guinteninintsi anaajencavaevetatsica, otsecaguetanaque oquijipejitanaca 3, aisa maasanopae tsovironaquipae choocaguetatsica quepatsipaequi osoveaguetanaca, ootari teroncagueta-caquea. Iquenquejaqueroquea Aapani Irioshi icovaeguishejiacagueti Vavironiaquitica, icatsimajiaqueriquea yatsipetacaajiavecari, quejevaeca yojocacotsitanariquea tseraja igatsimareja. ²⁰ Maasanopaequea ovogorepae opeagueca, aisa otsempipae teequea irinejajitajeroji. ²¹ Aisa asacaraatsentseinavaetapojaca incojariquitsentseina oquenapoji jenoqui inquitequi otenavaequequea ocanca, apatsentseinropae otenataque 40 quiro. Iriaquea caquinteja arimpaquate icantaguishejianaqueriquea Aapani Irioshi yamenajiaquegueti ipeacaimovetacarica yasacaraaqueroqueti incojariquitsentseina, yatsipemajatacatari.

* 16:12 Incoraquejiapojaquegueti majirontajiatatsica intsipatsipaitaquempari igoaretajiate irashimirintajipojaquempa. † 16:14 oratica savincaguiteri anaavaetapojatsineca irashi Aapani Irioshi Agavejamajatatsica. Pamenero 19.11-21 itsavetacoqueroqueti oratica ashimirintagantsi.

17

Joanca yamenaquero Vavironia quejetaca iroguenti manquigarentsi cantatsatantamajatan-tatsica

¹ Ariqueate icoraquetashiquenaquea aparo ashivanti carajianquitsica 7 ajiricajianquitsica itasonepae, icantapojaquena: “Caacate namenacaaguequempiroquea quero incojiqueroni incatsimajiquerogueti cantatsatantamajatan-tatsica savicantaguetaroca otsipajatopaequi oshequipaequi. ² Iriraquea majirontajiatsica quepatsipaequitica yoayoaitashipinijiaqueroquea icantatsajiaqueroquea, iroatimpa ocantatsatacaaji-avacari. Aisa iriraquea guintenijiatsica quepatsiqui icovaeguishemajajiaquea ocovaeguishetacaajiavacari.”

³ Iroompaquea yaashirentavaetanaquenaquea ashivanti oquitamampororoitapojaquegueti. Ariquea oraniqui namenapojiro manquigarentsi osavicantacari quityoncari covejencavetatsica. Oraquea itsinoqui maasanotseentena otiontioguishevaetaca vajirontsipae iquejemanatacotantacarica Aapani Irioshi. Ocaravaeque 7 iguitopae, oraquea ivaapae ocaratsitaquea 10. ⁴ Oraqueate manquigarentsi oquitsaaca oitsaare camachoncamorenari aisa quityoncamorenari. Oashiguetaca ooropae, cameetsapiguetatsica, aisa peererapae. Ajiricaque oshovaote ipeacaajitaca ooro, tseraiquivaeca taaca opajita covaeguisherentsipae aisa ogantatsarejia. ⁵ Oraquea ovancaqui ochooacque otioncacocaqueate ovajiro, cotanquitsiquea teequea intsajiteroji taaca opaji ocantacocquea, ocanquequea:

“Vavironia anaajencavaetatsica,
iniro cantatsatantajiatsica,

aisa iroguenti guivorocajencaguetaqueroca covaeguisherentsimajaca quepatsiquitica.”

⁶ Iroompaquea namenitsitaroquena oshinquitacarora iriraja igomajamajare Aapani Irioshi ometojacaantajiaqueca, iriotari tsavetantajiaquerica Jesoshi.

Ariqueea namenaquitiguiro oacaavaetanaquena intati. ⁷ Cotanquitsiquea iriraquea ashivanti icanquena: “¿Queroquea ocoani poantantanacaca intati? Imaicaquea noguisotoguempirojate ocantacoguetaqueca ocatica manquigarentsi jeeri aisa covejencavetatsica quijanaqueroca choocatanquitsica 7 iguitopae aisa 10 ivaapae. ⁸ Iriratica covejencavetatsica pinejaqueca, coramani ichoocaveca, imaica tee inchoocatajeji, cotanquitsiquea incoraquetapanajante inquentapanojemparo omoro oagantavaetanankuitsica isaviji, ariqueea interoncajiqueri. Coramani iroaqueragueti ipeacaacarogueti Aapani Irioshi quepatsi ocancani itioncacojiqueroquea ivaperitequi ivajiropae maasano coguitatsineca inchoocajiaque. Iriraquea guintenijiatsica quepatsiqui teeca intioncacojiguempaji ivajiropae mana iroaroaitanaque intati iramenajiaquerigueti iriratica covejencavetatsica, iroorijite ichoocavetaca coramani, tee inchoocatajeji imaica, cotanquitsi inchoocataje.

⁹ “Quericaca tsatanquitsica inquemavaqueroja noncanqueca imaica. Oraquea 7 iguitopae iroguenti ocantacocque 7 otsempi osavicantacaca oratica manquigarentsi.

¹⁰ Aisa iriguenti ocantacocque 7 majirontajiatsica. Imajirontavetaca 5, metojajiaque. Aparo imajirontaca imaica. Iriraquea itsipa tequerata incoraquetejeji. Oraquea incoraquevetapojempagueti taampina irimajirontavetapanajantempa. ¹¹ Iriraquea covejencavetatsica choocavetatsica cotanquitsiquea teequea inchoocatajeji imaica, iriotari majirontajatsineca oochotapojatsineca. Ichocaveca coramani, cotanquitsiquea iroompaquea imetojaque, jero ocantacotantacarica apaguitotiro iguito carajiatsica 7. Oncoramanitapojajegueti incoraquepanajante impeapanajantempaquea majirontatsica, ariqueea interoncajiqueri.

¹² “Oraquea 10 ivaapae pamenaguetaqueca imaica iriguentijia ocantacocque 10 peajianquitsineca majirontajiatsica. Tequerata irimajirontajiguempaji. Ariqueea incantajiqueri impeajiaquempaquea majirontajiatsica intsipatsipaitaquempari covejencavetatsica, cotanquitsiquea aatoquea osamani imajirontajiga. ¹³ Irirajia 10 majirontajiatsica inquemavacaajiaquempa iroguijaguijaitanaqueri covejencavetatsica irinetsanajiaqueroquea taaca opaji inintaguetaqueca iriatimpa, impatampishicajiqueri irimajironquempaniji. ¹⁴ Iroompaquea iriatimpa incapiocajiaqueriquea maasano intsipatsipaitashiquempariquea irashimirintsijavetempari Ovejajaniqui, cotanquitsiquea

iriguenti agavejantanquitsine Ovejajaniqui, iriguentitarite Anaantaguetatsica anaague-
taquerica maasano anaantaguevetatsica, iriguenti Majirontatsica anaaguequerica
maasano majirontajatsica. Iriraquea intsipatsipaiquempaca iriguentijia icajemaji-
aqueca Aapani Irioshi icoguiajiaqueca quisho oahoaiquerineca.”

¹⁵ Iroompaquea icanquena ashivanti: “Oraquea otsipajatopae pamenaguetaqueca os-
avicantaguetacaca cantatsatantatsica iriguentijia ocantacojiaque maasano caquintegue-
tatsica caramirincajatsica guintenijatsica quepatsipaequi cantashitatiaguetanquitsica
iguenquetsatsarepae. ¹⁶ Iriraquea covejencavetatsica intsipatsipaiquempari irirajia ma-
jirontajatsica ocantacojiaqueca 10 ivaapae, irisemasemaitanaquemparo cantatsatantat-
sica, incatsimajianaquero irisapocatsinojiaquero cajaratsinoni oncanquempani. Aisa
irishecajiaquemparoquea oteshi, iroompaquea intajiaquero. ¹⁷ Iriotarite cotacaacaro
Aapani Irioshi iquemavacaantantajiacaca iroguijaguijaiqueriquea covejencavetatsica
impatampishicajaqueri irimajironquempaniji, arejevaetaquempa onetsanamajaquempa
icanqueca Aapani Irioshi. ¹⁸ Oraquea manquigarentsi pinejaqueca imaica manaquea
ocantacoque oratica guinteninintsi anaajencavaetanquitsica agavejajiaquerica maasano
majirontajatsica quepatsipaequitica.”

18

Interoncajitaquerigueti Vavironiaquitica

¹ Iroompaquea nameniriquea itsipa ashivanti yaguijitapojaque iquenapojaque in-
quitequi. Yagavejavaeque, yoganejencavaetaca, itsirencaguitejavaetanaqueroquea
maasanopae quepatsi. ² Ariquea irijencavaetanaque icajemanaquequea icanque:

“¡Soveaca! ¡Soveaca Vavironia oratica guinteninintsi anaantavaevetatsica!

Iriguenti guintenitantanajaro ampatsinijia,
iriguenti choocatantajiacaro taaca ipajitapae ampatsiniguetsatsica,
iriguentijia aisa maasano araguetatsica teeca incameetsagueteji aisa joratantaguetat-
sica.

³ Iroorijite maasano guintenijatsica quepatsipaequi yoayoaitashijianaqueriquea guin-
tenijavetanquitsica Vavironiaqui,
ariquea yaajencatsijiaqueriquea icovaeguishetacaajiacari, quejetaca imiritsipojacaro
ogupishijarote cantatsatantatsica.

Aisa maasano majirontajatsica ishineventajiavecari itsipatsipaivecari icovaeguisheji-
acaguetei covaequisherentsipae.

Ariquea iquempejiaca jocantavaetatsica iriatimpajia iquenaquenaivaetapojaque osama-
nipaequi yamapinijiguiroqueate taaca opajitapae irajaararo oraniqui Vavironi-
aqui yojocantantapinijiaqueroquea yaantajiacaroquea imentaquipae,

caavijitari ishineventajiacaro Vavironiaquitica irajaarantajiaquempacea.”

⁴ Iroompaquea noquemiquea iquenquetsajencajitanaque oquenajencavaetapoji in-
quitequi, icantajiti:

“Pisotoanaqueroshiatsi, aviatimpajia nashintajiacaca,

aatonijite paajencatsijiguirotsi ogovaeguisherejia,

aatonijite notsipatacaantajiguimpiro nantsipetacaavaequemparoguetei.

⁵ Otigariseavaejiaquero ogovaeguisherejia arejevaetanaca inquitequi.

Ogantaga iquenquejacotiro Aapani Irioshi oveacaaguisherejia.

⁶ Querocaguetei ocojiaquerini itsipajia ariqueate pinquempetacaquempari iroatimpa,
cotanquitsiquea caaviji pogaaqueroquea.*

Atsipetacaantajiacatarite, imaica ariqueate pinquempetacaquemparoquea iroatimpa,
caaviji pogaaqueroquea pantsipetacaquemparoquea,
quempetaca inconoajatashijitaqueroguetei quepishijamajatanquitsica iroguipia-
jatashimajatanajitaquempari manquigarentsi oshovaotequi.

* 18:6 Tee onconigamajateji queri iquenquetsatacaaqueca acaniqui. Arica imaica ipitsocashitanacari majirontaji-
atsica itsavetacotaqueca incajaranqui capitoroqui 17 otsapaqui 16, iquenquetsatacaaqueri iriatimpajia semajiacaroca
Vavironia iquejetacaacaca manquigarentsi. Imaica icanque irantsipetacaajiaquempari choocatantajiacaroca.

⁷ Osemeseiteaque ocantacoguitani, aisa ocantacoguitani osavicaventaqueroquea maasanopae onintaguishequeca iroatimpa.

Imaicaquea poguipiashitantajemparoja iroatimpa, panaacaavaetajero antsipevaetajempaqua oshimampoancaguitempani.

Aventacoca oquenquetsashirentaque ocantaque:

‘Manaquea nosavicaque quejequena majirontatsica.

Teequea nonquempetemparoji metojacoro coguitejacovaetatsica,

aatotarite noshimampoancavaeta.’

⁸ Irootarite onteroncantapanajantempaca taampina Vavironia, apajencaro savincaguiteri ontiatiavaetanaquemparoqueate atsipetagantsipae: metojagantsi, shimampoancagantsi, tasettsijenca.

Iroompaquea irampevoquijajitaquero Vavironia apevoquianisano.

Yagavejamajatitarite Aapani Irioshi Majirontamajatatsica cantomajaqueroa.”

⁹ Irirajiaquea maasano majirontajatsica quepatsiquitica shineventajivecaroca Vavironia tsipatsipaivecarica guinteninitantajavetaroca ipeacaaguishejiavaecagueti covaequisherentsi iriraacojiaqueroquea incajemajianaquequea iramenajiaquerogueti ampevoquijanaquempagueti oncatipogajencatanaquempaqua.

¹⁰ Omintsaromintsarovaetanaqueri iramenajiaquerogueti atsipetsipevaetaca, incaticatiivaetanaque ontaniqui, incantajigue:

“¡Ooo! ¡Ooshiatsi, aviatimpajia guinteniguintenitantaroca Vavironia anaajencavaevetatsica tampishivaevetatsica!

Aapojacagueti icantomajajitimpigueti apajaniquiro hora iteroncajitaquempi.”

¹¹ Ariqueate inquempējaquempaqua aisa jocantantajatsica quepatsipaequitica iriraaianaquempa iriraacojiaqueroquea incajemavaejianaquequea iramenajiaquegueti quericampate vegarajiajeroneca irajaararopae. ¹² Quericampate vegarajiajerineca ooro, perata, cameetsapiripae, peerera, aramaroncari quitsaarentsipae ipeacaajitaca quitamaromorenaro irino, irooca aisa carenimorenaro sera, aisa otsipapae quitsaarentsipae camachoncamorenari aisa quityoncamorenari, irooca aisa poncajaguetatsica inchato, irooca aisa taaca opajitapae ipeacaajitaca itsiconte erepaante aisa cameetsaripae inchato, cavorejari quishoguetatsica quejecaroca voronquise aisa yero, aisa mapi icantajitica maremore. ¹³ Quericampate vegarajiajeroneca casancapaneri canera aisa otsipapae casancapaneri iconoantajiguetaroca ishecajigueta, casancapaneripae itajaitica, mira, poncajencajaripae, vinoja, oreji orivo, shipetapaneri tirigovane aisa tirigoqui. Quericampate vegarajiajerineca caapironcaari, oveja, quitavaireri, aisa itigaritacotantajitaca itigaritanaqueca quitavaireri. Quericampate vegarajiajerineca iromperaperaitaca irashintajiaquempaca, yojocantajavetaritari irapicaquintete. ¹⁴ Incantajiaqueri Vavironiaquitica:

“¡Teetarite onchoocatajeji maasanopae pishineventamajajiacaca,

jac oteroncaguetanaca maasanopae cameetsaripae pashintajiacaca

aisa taaca opajitapae vegaramajatatsica pishineventajiacaca,

imaica aatonica pinejajiro aviatimpajia!”

¹⁵ Irirajiaquea jocantantajatsica ashintaguetanquitsica imentaquitsitepae yaantajiacaroca irajaararo yojocantajiaquerogueti Vavironiaqui intsaroajianaquequea iramenajiaquerogueti irantsipejiaquempaca, incaticatiivaetanaque ontaniqui. Iriraacojiaqueroquea Vavironia incajemajianaquequea, ¹⁶ incantajigue:

“¡Ooo! ¡Ooshiatsi, guinteninintsi anaajencavaevetatsica!

Yamenajiaqueroquea iroaqueragueti quempetaca manquigarentsi onetsanatacotagueti oquitsaatarogueti shipetamorenaro quitsaarentsi camachoncamorenaro aisa quityoncamorenaro ipeacaajitaca irino.

Oshequiavaetanaquequea ocantashitatiaguetanacaquea yavitajigueta aisa inenquequijigueta aisa oconoaca iriguenti ipeacaantajigueta ooro, otsipapae manaquea ipeacaantajigueta aisa cameetsapiripae aisa peerera.

¹⁷ ¡Taampinashiatsi ojatacopanajanti, imaica jac apajaniquiro hora oteroncaguetanaca maasanopae ajaarantavaevetacaca!”

Ariquea inquempajiaquempa maasano taquijajiguiroca quenajarontsi inirotsantsanapae, iriguentijia tetantajigaroca, iriguentijia marinerojia amijiguirica taquijajiguiroca, iriguentijia aisa maasano antavaejatsica inirojaniqui quantijani jmm, incaticatiivaetapojaque ontaniqui. ¹⁸ Iramenajiavaquerogueti ovogajencavaetanaquempagueti oratica guinteninintsi, incajemajianaque incantajigue: “¡Querocampate onchoocatajani otsipa quempetajemparoneca iroatimpa anaajencavaetajequeate!” ¹⁹ Ariqueate incojianaquempa iroajianaquemparoquea quepatsivane iguitoqui iriraacojiaqueroquea incajemajianaque incantajigue:

“¡Ooo! ¡Ooshiatsi, guinteninintsi anaajencavaevetatsica!

Irootaquequea choocatacaajiavecarica imentaquitsitepae ashintajatsica iguenajaro, ivegaraventajiqueroquea taaca opajitapae ishineventajiguetaacaca.

¡Taampinashiatsi ojatacopanajanti, imaica jac apajaniquiro hora teroncajiaca maasano guintenitantajigarocal!”

²⁰ Cotanquitsiquea imaica pishinejianaquempaja aviatimpajia inquitequitica.

Pishinejianaquempaja aviatimpajia igomajamajare Aapani Irioshi, aisa aviatimpajia itigarancanejia Jesoshi, aviguentijia aisa tsavetantajatsica, pamenajiaqueriquea iteroncajiakeriquea Aapani Irioshi maasanojia Vavironiaquitica, aviguentijiaquea yompejiaca.

²¹ Iroompaquea nameniriquea ashivanti agavejavaetatsica yaaqueroquea mapi quejevaeca inirotsentseina shimentapiri itononcantajitaca, ipishoncajataqueroquea inirojaniqui quantijani, iquenquetsatanaque icanque:

“Ariquea inquempetacaajitaquemparoquea Vavironia oratica guinteninintsi anaajencavaevetatsica,

quejeni nopishoncajataqueroqueti mapi, ariquea ompejaencaquempa, aato yamenajitajirotsi.

²² Aatoquea iquemajitajirotsi yampenejencatacaajitajaro aarepa pivogoniqui, Vavironia, aisa aatoquea isoncajitaji, aatoquea icovijitaji, aatoquea itivojitaji.

Aisa aatoquea ichoocatomatajitsi antavaetajatsineca aviatimpaqui, aisa aatoquea iquemimajitajirotsi itononcantajitaca.

²³ Aatoquea itsivojitajiritsi tsivorentsi aviatimpaqui.

Aisa aatoquea iquemimajitajiritsi aviatimpaqui iriaqueraca manquigatanquitsica aisa imanquigare.

Iroorijite yanaajencajiavetaca quepatsipaequi jocantantajatsica guintenitantajavequempica.

Pamatavimatavivaequeriquea maasano quepatsipaequitica pimatsitantigueti.

²⁴ Oraniquitarite imetojacaantajitaqueri tsavetantajatsica aisa itsipajia igomajamajarejia Aapani Irioshi imetojajitaqueca,

aisa maasano itsipajia imetojajitaqueca quepatsipaequi.”

19

Itsaromentajiacari Aapani Irioshi inquitequi

¹ Iroompaquea noquemiquea icajemajianaquequea inquitequi icaramirincavaeque jmm, icantajigui:

“¡Antsaromentemparija Yave!”*

Iriguenti aavacaji Arioshite Majirontamajatatsica, ochoocataquetari iroganejencare aisa iragavejane.

² Teequea inchoocateji incatsimatashiquempaca, tampatica yoaquero maasanopae, jero icatsimatantacaroca caavijica ocantatsatanti jocajencajiaquenerica otsanirore maasano quepatsipaequitica.

Aisa icatsimatimenqueroquea yompetacojiacari irajaanirejia ometojacaantajiaqueca.”

³ Icantsijianaquea aisa:

* 19:1 Ocanquegueti ocantajigui ¡Antsaromentemparija Yave!, iguenquetsatsarequi evereo icanquero ¡Alelyua! Oraquea Yave iroguenti ivajiro Aapani Irioshi. Iguenquetsatsarequi evereojia iriraqueate Aapani Irioshi ipajita YHWH (Yahweh). Ancanquequea Yave. Yoguipitsocajitaqueroqueti quimajareritsaqui iconoagarantaca icanqueriquea Jehová, itsipajia icanqueri Yavé.

“¡Antsaroventemparija Yave!

Iroatimpa oncoquempani ompoasecantaguitempani, aatoquea osajaencatacotimatitsi.”

⁴ Iriraquea 24 iramajirorejia aisa 4 anijaripae itigueroaventajiacari Aapani Irioshi savicanquitsica imajirontamentoqui, itsaroventajiacari icantajigui:

“¡Arimajaguitatsi! ¡Antsaroventemparija Yave!”

⁵ Iroompaquea noquemiquea iquenquetsajencajitanaquequea oquenajencatantapojacaroquea imajirontamentoqui Aapani Irioshi icantajiti:

“¡Pintsaroventajiguemparija Aapani Irioshi, maasano aviatimpajia irajaanirejia, aviatimpajia pincatsajiguirica, maasanomajaca: anaantajanquitsica aisa teeca panaanteji!”

⁶ Iroompaquea noquemiquea quempejencavaeca icajemamirincatiguete caquinteja, aisa quempetaca opojimajencataguete omporocajataguete ojaaquiniqui, aisa quempetaca otampishijencatiguete careti ocanquitiguete tsijec tsijec, icantajigui:

“¡Antsaroventemparija Yave!

¡Imajirontamajatacatarite Amajirote Aapani Irioshi Agavejamajatatsica!

⁷ Jaameja ashinevaejiaquempa, ashineventamajajiaquempari ancantajiaqueri: ‘Aviguenti caaviji poganejencamajataca’, arejetapojacatarite savincaguiteri iraanquemparoca Ovejajaniqui inintane, iroatimpaquea netsanataconi.

⁸ Icavintsajajiquero yojocajiquenero oquitsaacaca

ogameetsamorenareni irino saancamorenavaeque tsirencamorenari.”

Oraquea irino ocantacoque icomajamajajiacaguete igomajamajarejia Aapani Irioshi.

⁹ Iroompaquea icanquena ashivanti: “Pintioncacotavaqueroja ocatica: ‘Irishinetacaavaejitaquempariquea maasano icajemajitaqueca irishecajiaquempa irogavisajitaqueneriguete Ovejajaniqui iraaqueroguete inintane.’ ” Aisa icanquena: “Ocaticaquea pitioncavaqueca imaica iroguenti iroomajaca, iroguentiquea Iguenquetsatsare Aapani Irioshi.”

¹⁰ Notigueroaventavetanacari ashivanti nontsaroventaquemparimequea, cotanquitsiquea iriatimpa icanquena: “Aatoquea piquejetirotsi imaica, naroguentitari papiaajanirentsiteni, aritarite noquempetajimpitarite aviatimpa aisa papitsaroventarijiateni tsavetantajiguirica Jesoshi aisa netsanamajatiroca itsatacaantaguetica. ¡Iriompani pintsaroventempa Aapani Irioshi! Iroorijite itsavetantica Jesoshi, irootaquequea tsatacaashirentaguetiquerica tsavetantajiatsica.”

Shiacotantacarica quitamarori quitavaireri

¹¹ Iroompaquea nameniroquea inquite tanarejaca, conijani quitavaireri quitamarori. Iriraquea shiacotantacarica manaquea icantajiqueri Netsanamajatiroca Iguenquetsatsare, aisa icantajiqueri Iriomajaca, itampaticamajatirotari maasano icantomajantiguete aisa yashimirintaguete. ¹² Oraquea iroquija quempetaca paamarimoreca. Oraqueate iguitoqui ochooaque oshequiavaequequea iramatsaero. Aisa tioncavaeca ivajiro teeca intsajiteroji, iriguentiquea tsataquero. ¹³ Oraquea iquitsaatacaca yajavicaajiqueca irajantsiqui. Oraquea ivajiro iroguenti Iguenquetsatsare Aapani Irioshi.

¹⁴ Yoguijajipojaqueri igoaretajiate choocajiatatsica inquitequi. Iquejetavacaajiac quitasaajiac aramaroncari quitsaarentsi ipeacaantajitaroca irino, quitamaromorenavaetaque saancamorenavaeque. Ishiashiaitacotantajiacari quitavaireripae quitamarori.

¹⁵ Oraquea ivagantequi iriatimpa osotoatsantsamenivaeque itsaampitsantsamenirite yamecamajajitaqueca iragavejantajiaquemparica maasano quepatsipaequitica. Impeamajataquempaqueate Majirontamajataatsica irimajirontantaquempari imajirontaquijire ipeacaajitaca cavorejari quishomajatatsica,[†] iragavejaqueriquea maasano teeca inquemisantajigueriji. Incatsimajivaequeriquea irantsipetacaajiaquempari inquempetacaajiaquempariquea agaticamirijaquitiroca ovaitsoqui. Iriguentitarite catsimajiaquerine Aapani Irioshi Agavejamajatatsica. ¹⁶ Oraquea iitsaarequi aisa ivoriqui ochooaque otioncaca ocanque:

[†] 19:15 Irimajirontantaquempari imajirontaquijire ipeacaajitaca cavorejari quishomajatatsica. Irooquea ocanque intampishitashimajaqueroquea irimajironquempariguete.

“Majirontamajatatsica anaaguequerica maasanopae majirontajiatsica, Anaamajatatsica anaaguequerica maasano anaaguevetanquitsica.”

¹⁷ Iroompaquea nameniriquea itsipa ashivanti catiaca catsirincaiteriqui icajemacojiaqueriquea maasano arajianquitsica quempeguevetarica sheetyaoni, iririjencavaeque icanca icanque: “¡Caacateshia pincapiocajiaquempa pishecajiaquempa irojocajiaquempica Aapani Irioshi! ¹⁸ ¡Pishecajiaquemparoquea iteshi majirontajiatsica aisa jivajivaitirica igoaretajiate, aisa itsipajia tampishiri, aisa iteshi quitavaireripae aisa shiacotantajiacarica! ¡Pishecajiaquempariquea maasano, irioca yashintajitaca irioca teeca irashintajitempariji! ¡Pishecajiaquempariquea anaaguevetanquitsica aisa teeca iranaajencavaeteji!”

¹⁹ Iroompa namenitsitari covejencavetatsica, aisa imajirojiate quepatsiquitica itsipajiacari igoaretajiate, iroguentiquea icapioquimentajiacarica irashimirintajiaquempari shiacotantacarica quitavaireri aisa igoaretajiate. ²⁰ Iriiraquea covejencavetatsica yaajiqueri iconoacaantajicari tsavetantatsica amataavaetatsica nigaimotaquerica oacaantantatsica intati. Oraquea oacaantantatsica intati irootaquequea yamatavimatavivaetantacarica maasano itioncacojiqueca ivajiro covejencavetatsica, aisa maasano tsariventajiacarica ivaantorite ipeacaajitaca iquempetacaamajavetajari iriatimpa. Mavitequea ipishoncajiqueri anijatseentenatiraja osamimicatsantsamorecavaequegueti asopiri, quempeni incajaremorecari. ²¹ Iroompaquea iriraquea shiacotantacarica quitavaireri mana imetojantacari itsipajia itsaampitsantsamenirite sotoatsantsamenitanquitsica ivagantequi. Maasanoquea araguetatsica shecaguetarica iteshipae yomporoguijaventajiacari ishcajiacari, iquemamajianaca.

20

Iyavitacojiqueri Satanashi 1,000 ajagantsini

¹ Iroompaquea nameniri itsipa irashivantite Aapani Irioshi iquenapojaque inquitequi yaguijitaipojaque, yajiricaquero iniropetana cavorejatsari aisa yavi iriyavirejantaquemparooca omoro oagantavaetananquitsica isaviji. ² Ariquea yaapojaqueriquea casantonqueniniro yoishotapojaqueri incoramanitacovaetanaquequea 1,000 ajagantsini. Iriotaquequea camaarini coramanitica, iriotaque ampatsini pajitatsica Satanashi.✠ ³ Iroompaquea ipishonquitsitari omoroqui oagantavaetananquitsica isaviji, yashitacotsitari iyavitacotsitari. Ivinchajacoseyotsitari aatoniji isotoaji iramatavimatavivaetajeri quepatsipaequitica arejevaetaquemparo anaavaetanajeguete 1,000 ajagantsini. Oncoramanitapojajeguete intanarejacotsijivetajempariquea, cotanquitsiquea capichaji inchoocavetapanajantempa.

⁴ Ariquea namenitsitaro majirontamentontsipae, isavisaviitantacaro irirajia ipeacaajitacaca jivajivaitatsica icantajitaqueca irinetsanajiaqueriquea maasano. Aisa namenajiaqueroquea ishirejia ijitorejimentajiguequeca itsavetantajiaqueriguete Jesoshi, aisa itsavetantajiaquerogueti Iguenquetsatsare Aapani Irioshi. Iriatimpajia teequea intsariventajiguempariji covejencavetatsica aisa ivaantorite ipeacaajitaca iquempetacaamajatajaca iriatimpa, aisa teequea irisantoncatacotsitempariji ivajiro covejencavetatsica ivancaqui aisa iracoqui. Ariquea namenajiaqueri itancoretancoreitanaji itsipatsipaitanajari Quirishito ipeajiacaqueate majirontajiatsica arejevaetanaquempa aapojajempaguete 1,000 ajagantsini. ⁵ Itsipajia metojajavetanquitsica tequerataquea intancoretancoreitajeji, iriatimpajia manaquea intancoretancoreitanaje anaanajempaguete ocatica 1,000 ajagantsini. Ocaticaquea nocanquempica imaica iroguenti icantajitica “iroquetica intancoretancoreitantanajempaca”. ⁶ Iriiraquea Aapani Irioshi irishinetacaavaequempariquea irirajia tancorejantajanajemparoneca oratica icantajitica “iroquetica intancoretancoreitantanajempaca”, iriguentijiaquea comajamajajiatsica. Aatotarite agavejajajiri “mavitetapojatsineca metojagantsi”, manaquea impeajiaquempaquea isaserrotejiate Aapani Irioshi aisa isaserrotejiate Quirishito. Aisa intsipatsipaitajempari impeacaajiaquempari majirontajiatsica irimajirontajiaquempa 1,000 ajagantsini.

Intsijaiqueriquea Satanashi

✠ 20:2 Jen. 3.1, 13.

⁷ Oraquea anaanaavaetanajegueti 1,000 ajagantsini irisantanatacorejaitajeriquea Satanashi. ⁸ Iroavaetanaquequea intsitacaguitejavaetanaquemparoquea quepatsi iramatavimatavivaetanaqueriquea maasano caquinteguetatsica incapiocajiaqueriniji irashimirintajiaquempaniji. Iramatavijaqueri Gogue aisa Magogue incapiocantajiaquemparica igoaretajiate, intirorencavaetanaquempaqua incaramirincajiaque jmm inquempevaetanaquemparoquea impanequi ocaratsapijjatapojaquegueti inirojani quentijani.

⁹ Iquenaquenaivaetapojaque quepatsipaequi itsitacaguitejavaetanacaroquea, yanquitsaetacovaetapojacari tsariventajiacarica Aapani Irioshi aisa oratica guinteninintsi ipintsamajataca, cotanquitsiquea yasacaraashijitaqueri paamari oquenapojaquequea inquitequi otsiajiaqueri apevoquijavaetaqueriquea. ¹⁰ Iriraquea ampatsini amatavimatavivaetaquerica ipishoncajitaqueriquea osamimicatsantsamorecavaequetu asopiri quempeni incajaremorecari ichooaquegueti covejencavetatsica aisa tsavetanatsica amataatsica. Incoguitempaniquea irantsipeguitempani savincaguiteriqui aisa pitsecariqui, aatoquea ivejencarejacovaetajatsi.

Ontaniqui oguitamaroreni majirontamentontsi qui iramenacotsijiacajiro antajiaqueca

¹¹ Iroompaquea nameniroquea iniroshitaponcarovaeca majirontamentontsi oguitamaroreni. Ariquea ichooaque savicantacaroca. Oraquea quepatsi aisa inquite ariquate ocotanaca opeimocari, teequea irinejimajitajeroji. ¹² Ariquea namenajiaqueriquea metojajianquitsica, caavijica yanaajencavaeti aisa teeca iranaajencavaeteji, icatintiitimojiacaro majirontamentontsi. Nameniroquea ampinaicarejaguetacaquea paperipae itioncacotantajicaroca ipeacaaguetacaca maasano caquinteja. Iroompaquea ampinaicarejaca otsipa paperi itioncacotantaguecaroca ivajiropae maasano coguitatsineca inchoocaguiteni. Iriraquea savicanquitsica imajirontamentoqui icanque queroquea incojitaquerini aparopae caquinte, iroguentiquea yoguijatacotaque itioncacotantajiacaca paperiqui. ¹³ Ariquate iquempetacaajiacari maasano metojajiatsica choocajiatatsica inirojani quentijaniqui, icajemajiaqueri yoguisotosotoajaitaqueriquea, iriguentijia aisa maasano metojajianquitsica choocavaetanquitsica Areshiqui* icajemajiaqueriquea icapiocajiaqueriquea, ariquea icanque quero incohincoiquerini aparopae, yoguijat-acotanaqueroquea tioncanquitsica ipeacaajiacaca caquinteja tequerataguete irime-tojeji. ¹⁴ Oraquea Metojagantsi aisa Areshi ipishoncajiquero incajaremorecariqui. Oraticaquea incajaremorecari iroguentiquea icantajitica “mavitetapojatsineca metojagantsi”.† ¹⁵ Ariquate iquempetacaajitacariquea aisa maasano teeca intioncacotempaji paperiqui itioncacotantajitacarica ivajiropae maasano coguitatsineca inchoocaguiteni. Maasano teeca intioncacotempaji ipishoncajitaqueri incajaremorecariqui.

21

Iroaqueraro inquite aisa quepatsi

¹ Iroompaquea namenaguequeroquea iroaqueraro inquite aisa iroaqueraro quepatsi. Oraquea iroquetinica inquite aisa iroquetinica quepatsi jac opeagueca. Ariquea oquempetaca inirojani quentijani iroatimpa jac opeagueca. ² Naatimpa nameniroquea aguijitatapojaque iroaqueraro Jerosare caavijica oganejencamajataca yashintacaca Aapani Irioshi, oquenapojaque inquitequi iriatimpaqui. Netsanatacovaecaquea ocanca quempevaeca onetsanatacovaetaguete manquigarentsi irooshipojaquegueti irimanquigatemparo nintiroca. ³ Iroompaquea noquemiquea iquenquetsajencajiquequea oquenajencavaetantapojacaro majirontamentontsi. Carajencajeguiniquea ocanca icantajitaque: “¡Pameneroja! Imaicaquea oratica Itaverenacorote Aapani Irioshi ochocatomojiaqueri caquinteja, iriatimpa iriguintenitimojiaquempari, impeamajatajeri igaquinteji-ate incoquempani inconoavaequempari. Iriatimpajia impeamajatsitempari Irioshimajate. ⁴ Iriraquea Aapani Irioshi irisheoquijajeneriquea maasano ijaquija, aatoquea

* 20:13 Areshiqui. (Pamenero 1.18; 6.8.) Oraquea Areshi iroguenti ichooajiaquegueti metojatsica tequerataguete impishoncajiteriji camorecariqui. Irira guiriego icanquero hades, iguenquetsatsarequi evereo icanquero sheol.

† 20:14 mavitetapojatsineca metojagantsi. Pamenero 2.11; 20.6; 21.8.

ijaquitajitsi. Aatoquea imetojajajitsi, aato irajaijaatsi, aatoquea icajemajajitsi, aisa aatoquea icatsijajitsi, maasanotari coramaniquitica jac anaaguetanaca.”

⁵ Ariqueate iriraquea savicanquitsica majirontamentontsiqui icanque: “¡Pameneja, niroaqueratacaaguetajeroquea maasanopae!” Aisa icanque: “Pintioncacotavaqueroja maasanopae nocantaguequeca, iroguentitari iroomajaca, teequea namataguempaji.”

⁶ Iroompaquea icanquena: “Imaicaquea agataca. Naroguenti *Alfa* aisa naroguenti *Omega*,* nocoguitanitarite nochoocaguitini, aisa aatoquea nosanticoguitejacovaetajitsi. Querica miretanquitsineca nojocaqueneriquea irimiraqueroquea motojaaro anijacaantantatsica. Aatoquea ivegaraventirotsi, manaquea nojocashiquenempari intati. ⁷ Querica tampishitashijiaqueroneca maasanopae coraquetashijiaquerineca noncavintsajaqueriquea nojocaqueneri maasano oraticapae, irashintajemparoquea. Impeamajatsitena Irioshimajate, naatimpaquea nirijanitsitempari. ⁸ Cotanquitsiquea maasano tsarontijia intsiajiaquempaquea osamimicatsantsamorcavaequegueti asopiri, quempeni incajaremorecari. Ariquea iquempejiaca teeca intsaraventajiguenaji, iriguentijia coguishemajajitsica, iriguentijia metojantajatsica, iriguentijia cantatsatantajatsica, iriguentijia matsinti aisa itsipajia aventajiacaroca iragavejanepae ampatsinipae, iriguentijia peajiaquerica itsipa irioshivijitashicaca, iriguentijia aisa maasano tsojenti. Oraqueate intsiajiaquempaguete osamimicatsantsamorcavaequegueti iroguentiquea icantajitica ‘mavitetapojatsineca metojagantsi’.”

Iroaqueraro Jerosare

⁹ Iroompaquea icoraquetashiquenaquea aparo ashivanti tsipajiacarica incajaranqui itsipajia ashivantijite socajiaqueroca oratica 7 atsipetagantsi carapojatsica yajiricacojiaqueca yatsipetacaantajiacarica quepatsipaequitica, icantapojanaquea: “Caacateja nonigaaquempiroquea inintane Ovejajaniqui irimanquigaquempaca.” ¹⁰ Ariquea yaashirentavaetanaquenaqueate inirotsempivaetatsica agasataavaetanquitsica. Yonigaaguequenaroqueate Jerosare, oratica guinteninintsi caavijica oganejencamajataca yashintacaca Aapani Irioshi, oquenapojaque inquitequi ichoocatiguete Aapani Irioshi aguijitaotapojaque. ¹¹ Cantavaequequea tsiren otsirenquitsitaroquea iroganejencare Aapani Irioshi, quempevaeca mapi vegaravaetatsica, quempetacaro jaashipe, saancorencapiri. ¹² Anquitsaetacocaroquea iniropiricavaequequea tantontsi ocaravaequequea jenoqui, osotomorosotomoroataca ocaravaeque 12, aisa ichoocataque 12 ashivanti quem poguijaqueroca osotomoropae. Aisa aparopae ashitacoropaequi chooca itioncacojiqueroquea aparo ivajiropae irijanijiate Ishiraeri, ariquate icarajiaque iriatimpajia aisa 12. ¹³ Oraquea tantontsi chooca 3 osotomoropae tampaticataqueroca isotoguiguete catsirincaiteri. Oraquea iquijiguete ochoocaque 3. Ariquate oquempetaca ocatoncopojaqueguete ochoocaque 3, aisa oquirincapojaqueguete ochoocaque 3. ¹⁴ Oraquea isaviji otantotacaguete ochoocaque 12 mapi oquishomajatantacaca. Aparopae ochoocaque itioncacojiqueroquea aparo ivajiropae itigarancane Ovejajaniqui, ariquate icarajiaque iriatimpajia aisa 12.

¹⁵ Iriraquea ashivanti quenquetsatacaaquea yajiricaquero cavorejaquijiri igomarotantajitaca ipeacaajitaca ooro, irigomarotantaquemparoca Jerosare, aisa osotomoropae aisa otantopae. ¹⁶ Oraquea Jerosare ochoocaquequea 4 omerequipae oquejetsantsatavacaaca. Igomarotaqueroquea ocaravaeque 12,000 estadiopae† ogatsantsacapae aisa ojenoquivaqueguete, ariquea oquempetavacaaca. ¹⁷ Iroompaquea igomaroqueroquea ocarapiricaque otantotacaguete ocaravaeque 144 catsantsaonaquirentsi.‡ Oraquea igomarotantajitaca igomarotantacaca ashivanti, iroguentiquea igatsantsaonaquire caquinte.

¹⁸ Oraquea otantotsaequitacaca iroguenti ipeacaajitaca mapi jaashipepi. Oraquea Jerosare saancorencavaeque ocanca cantavaequequea tsiren, iriguentiquea igotanquitsi

* 21:6 Alfa aisa Omega. Oratica alfa iroguenti pariapojaroca abecedario irashi guiriego. Oratica omega iroguenti carapojiroca. † 21:16 Oraquea 12,000 estadiopae ovegarataca 2,200 quiromeeteropae, irooquea quempetacaro ariguete anijivaete 55 savincaguiteripae. Aparo estadio ocaravaeque oquejevecaro 185 meeteropae. ‡ 21:17 144 catsantsaonaquirentsi. Iroguenti oquejetsantsavecaro 65 meeteropae.

ooromajaca teeca inconoantajitempariji otsipa cavorejatatsica. ¹⁹ Oraquea mapipae isaviquitica oquishomajatantacaca otanto iroguenti cameetsapiripae vegaramajatatsica pajiguetatsica jaashipepi, sapiro, aagata, aisa esemerarera; ²⁰ aisa oonise, coronarina, quirisoorito, veriro, topashio, quirisoperasa, jashinto aisa amatishita. Ariquea ocaravaeque 12. ²¹ Oraquea 12 osotomoropae iroguentivaeque peerera, § aparopae iroguenti ipeacaantajitaro aparo peerera. Oraquea quenavoquirontsi iquenaquenaitantamajatacaca iriguentini ooromajaca teeca inconoantajitempariji otsipa cavorejatatsica, saancorerejavaequequea ocanca quejevaeca potirinaqui.

²² Tee nonejeroji teemporo ontaniqui guinteninintsiqui, iroguentitari iguinenti Amajirote Aapani Irioshi Agavejamajatatsica itsipatacari Ovejajaniqui, iriguentijitari quempetajaroa teemporo. ²³ Iriraquea catsirincaiteri teequea irinintajitajeriji irivoreacotantajequeate. Ariquea iquempetaca taai teequea irinintajitajeriji inquitasetacotantajequeate, iroguentitarite savincaguitetacaavaequeroquea iroganejencare Aapani Irioshi, ari iquejetaca aisa Ovejajaniqui iriguentitarite otsivore. ²⁴ Maasano caquinteguetatsica iranijinijitantanaquemparo otsirencare. Aisa incoraquecoraqueiquequea maasano majirontajiatsica quepatsipaequitica iramajencatapojajenero iroganejencare, irishineventavaetapojajempari Aapani Irioshi. ²⁵ Aatoquea yashijitajirotsi osotomoropae, aatonica inejajitajiro pitsecari, oncoguitempani osavincaguiteguiteni. ²⁶ Incoraquecoraqueiquequea maasano caquinteguetatsica quepatsipaequitica iramajencatapojajenero iroganejencare, irishineventavaetapojajempari Aapani Irioshi. ²⁷ Aatoquea oquijajencatimatitsi oraniqui covaeguisherentsipae. Aatotarite iquijitsi antaguishetatsica teeca oncameetsateji aisa tsojeajiatsica, iriguentitarite choocajajatsine tioncacotanquitsica ivajirojia ivaperitequi Ovejajaniqui itioncacotantajiguecaroca ivajirojia maasano coguitatsineca inchoocaguiteni.

22

¹ Ariqueate yonigaaquenaroquea ojaaqui saancorencajarimajaca anijacaantantatsica osotoajatantapojacaro imajirontamento Aapani Irioshi aisa Ovejajaniqui, ² oniganquirejavoquiijaatanaquero quenavoquirontsi iquenaquenaitantamajatacaca. Oraquea omavitetsapijaatapojaquegueti ochooaque ocatintiitaca inchato anijacaantantatsica. Aparopae taai opishivoroquijacovaetantanacaroquea osovena ocantashitatiaguecaquea. Oraquea ovanapae iroguenti iroveantajanajempaca maasano caquinteguetatsica. ³ Aatoquea ochoocatimatajitsi incantomajacotimentajiquerica, aritari onchooaque oraniqui imajirontamento Aapani Irioshi aisa Ovejajaniqui. Irirajia irajaanirejia incoguitempani irisavicaventaguiterni. ⁴ Iramenavorojiapojajeri, aisa intioncacotsijitempari ivajiro Aapani Irioshi ivancapaequi. ⁵ Aatoquea ochoocataji pitsecari. Iriraquea choocajiatsica oraniqui aatoquea icoguitejacojiaja intsivojajeri, aisa aatoquea inintajitajiritsi catsirincaiteri intsirencaguitetacotantajequeate, incoguitempanitari intsirencaguitejacotantaguiteni Amajirote Aapani Irioshi. Iriatimpajia impejiaaquempa quea majirontajiatsica incoguitempani irimajirontajaguitempani.

Irooshipojishiatsi incoraqueatjate Jesoquirishito

⁶ Iroompaquea icanquena [ashivanti]: “Maasanopae ocativa pitioncaqueca imaica iroguenti iroomajaca, teetari amatavitanteji. Iriraquea Amajirote Aapani Irioshi quenquetsashirentacaajiguirica tsavetantajiatsica itigarancaqueri irashivantite ironigaaguequeneriquea irajaanirejia querocaca oncoguetanaquempani, irooshipojishiatsi aapojempa.” [Icanquetari Jesoshi:]

⁷ “¡Arimajaguitatsi noncoraqueatjate taampina! ¡Irishinetacaavaejiquempariquea guijatocomajaquero maasanopae itsavetacotsijitacaca ocativa paperiqui!”

⁸ Naatimpa Joana, naroguenti nejaguetaquero aisa quemaguequero maasanopae ocativapae. Irooquea noquemaguequerogeti, aisa nonejaguetaquerogeti notigueroaventavanacariquea ashivanti onigaaguequenaroca nontsarovenquemparime.

§ 21:21 peerera. Chooqa quantijaqui quejevetarica chopiro. Onquijaquerigueti capichaji impanequi, asereaqueri, ari intiritapiniquero cameetsaniji oncarenitanaque. Oncoramanitapojajegueti ompeanaquempa icantajitica peerera, quitasaancorerejavaeque, impeacaquemparo nenquetsiqui.

⁹ Icantsitana: “Aato piquejetirotsi imaica, naroguentitari papiaajanirentsiteni, noquejetajimpiquea aviatimpa aisa papitsaromentarijiateni tsavetantajiaqueroca icanqueca Aapani Irioshi, noquejetajari aisa maasano quemisantajiguiroca tioncanquitsica ocaniqui paperiqui. ¡Iriompani pintsaromentempa Aapani Irioshi!”

¹⁰ Aisa icanquena: “Aatoja pivinchajacoseyotiotsi* pitioncacotaqueca paperiqui, irooshipojaquetari aapojaquempa onetsanamajatanaquempa. ¹¹ Iiraquea peacaaguishetaroca covaeguisherentsipae iintsija incoguitempani inquempetanaquempa imaica. Iiraquea coguishemajatatsica iintsija incoguitempani incoguishemajatanaquempa. Ariquea inquempetanaquempa peacaatsica cameetsaripae, iintsija incoguitempani inquempetanaquempa imaica. Aisa iriraquea comajamajatatsica iintsija incoguitempani incomajamajatanaquempa.”

¹² “Arimajaguitatsi noncoraquetaje taampina, novegarapojajeneri maasano caquintejia querocaca yantaguetaqueca apaniropae. ¹³ Naroguenti *Alfa* aisa naroguenti *Omega*, † naroguenti jivatatsica aisa naroguenti carapojatsica, nocoguitanitarite nochoocaguitini, aisa aatoquea nosanticoguitejacovaetajitsi.

¹⁴ “Irishinetacaavaejitaquempariquea ajaquiroca iitsaare, irishinetsijitempari irishecajiaquemparorquea osovena inchato anijacaantantatsica, aisa iniquijaquijaitantapojajemparo osotomoro guinteninintsi. ¹⁵ Cotanquitsiquea incoguitempani inchoocajiaque sotsiqui maasano coguishemajatatsica, matsinti, cantatsatantajatsica, metojantajatsica, tsaromentajavetarica irioshivijirentsi, aisa maasano shineventajigaroca yamatavitantajigui.

¹⁶ “Naroguenti Jesoshi, notigarancaqueriquea nashivantite incamanquempiquea maasanopae pitioncacotaqueca cameetsaniji paacaantajiaqueneriniji tsaromentajatsica capiocapinijsatsica tsovironaquipaequi. Naroguenti ichoviquitanaqueca Taavini, aisa naroguenti shigompiri tsirencamenquitatsica pitsecaguitetirajagueti.”

¹⁷ Iiraquea Ishire Aapani Irioshi aisa inintane Ovejajaniqui icantajigui: “¡Caacate!” Ariquea inquempējaquempa quemajiaqueroneca incantajigue: “¡Caacate!” Iiraquea mirejatsica incoraquecoraqueiteja; irira nintajianquitsica, iintsija irimirajiguemparo oja anijacaantantatsica, aatoquea ivegaratirotsi, manaquea irojocashijiquenempari intati.

¹⁸ Maasanoquea quemajiaqueroneca maasanopae ocativa itsavetacotsijitacaca ocaniqui paperiqui noncantajiaqueri: Quericagueti gavitashitajemparoneca tioncanquitsica ocaniqui, iriraquea Aapani Irioshi irogavitacaantavaetajempari atsipetagantsipae itsavetacotsijitacaca ocativa paperiqui. ¹⁹ Aisa quericagueti jocagaranqueroneca tioncacotanquitsica ocaniqui paperiqui, iriraquea Aapani Irioshi irapitsatsitempari osovena inchato anijacaantantatsica irishecacuempameca, aisa aatoquea inejajirotsi guinteninintsi yashincaca Aapani Irioshi tioncacoguetanquitsica ocaniqui.

²⁰ Iiraquea oguisotoamajaqueroca maasanopae ocativa icanque: “Jeeje, noncoraquetaje taampina.”

Arimajaguitatsi. ¡Caacateshiatsi, Nomajirote Jesoshi!

²¹ Iiraquea Amajirote Jesoshi incavintsajamajaquempiquea maasano aviatimpajia. Ariquea oncoquempani.

* 22:10 Ocanquegueti Aatoja pivinchajacoseyotiotsi, iroguenti oncanque “Aatoja pomanirotsi”. † 22:13 Alfa aisa Omega. Oratica alfa iroguenti pariapojaroca abecedario irashi guiriego. Oratica omega iroguenti carapojiroca.